


Yesus Aqa Anjam Bole

2014



The New Testament in the Anjam language of Papua New Guinea,

2014 revision

**Yesus Aqa Anjam Bole 2014**  
**The New Testament in the Anjam language of Papua**  
**New Guinea, 2014 revision**  
**Nupela Testamen long tokples Anjam long Niugini, 2014**  
copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

---

PDF generated using Haiola and XeLaTeX on 11 Nov 2022 from source files dated 9 Oct 2020

0eb339dc-c20a-5065-9483-338933d97585

## Contents

Matyu . . . . .	1
Mak . . . . .	84
Luk . . . . .	134
Jon . . . . .	219
Aposel . . . . .	277
Rom . . . . .	359
1 Korin . . . . .	397
2 Korin . . . . .	432
Galesia . . . . .	455
Efesus . . . . .	468
Filipai . . . . .	480
Kolosi . . . . .	489
1 Tesalonaika . . . . .	498
2 Tesalonaika . . . . .	506
1 Timoti . . . . .	511
2 Timoti . . . . .	522
Taitus . . . . .	530
Filemon . . . . .	535
Hibru . . . . .	538
Jems . . . . .	567
1 Pita . . . . .	577
2 Pita . . . . .	588
1 Jon . . . . .	595
2 Jon . . . . .	604
3 Jon . . . . .	605
Jut . . . . .	607
Uli Anjam . . . . .	611

## MATYU

*Yesus Kristus aqa moma nanjo ñam kalil*

<sup>1</sup> Endi Yesus Kristus aqa moma nanjo ñam kalil. Yesus Kristus a Devit aqa len na ñambabej. Devit a Abraham aqa len na ñambabej.

<sup>2</sup> Abraham a Aisak aqa abu. Aisak a Jekop aqa abu. Jekop a Juda aqa was nanji ti nanjo abu. <sup>3</sup> Juda a Peres Sera wo nanjo abu. Nanjo ai Tamar. Peres a Hesron aqa abu. Hesron a Ram aqa abu. <sup>4</sup> Ram a Aminadap aqa abu. Aminadap a Nason aqa abu. Nason a Salmon aqa abu. <sup>5</sup> Salmon a Boas aqa abu. Boas aqa ai Rahap. Boas a Obet aqa abu. Obet aqa ai Rut. Obet a Jesi aqa abu. <sup>6</sup> Jesi a Mandor Koba Devit aqa abu.

Devit a Solomon aqa abu. Solomon aqa ai a nami Uria aqa ñauñ soqnej. <sup>7</sup> Solomon a Rehoboam aqa abu. Rehoboam a Abiya aqa abu. Abiya a Asa aqa abu. <sup>8</sup> Asa a Jehosafat aqa abu. Jehosafat a Jehoram aqa abu. Jehoram a Usia aqa abu. <sup>9</sup> Usia a Jotam aqa abu. Jotam a Ahas aqa abu. Ahas a Hesekia aqa abu. <sup>10</sup> Hesekia a Manase aqa abu. Manase a Emon aqa abu. Emon a Josaia aqa abu. <sup>11</sup> Josaia a Jehoiakin aqa was nanji ti nanjo abu. Aqa bati qa jeu tamo nanji na Israel nanji tontnjrsib joqsib Babilon qureq di taqatnjresoqneb.

<sup>12</sup> Babilon qureq di nanji tontnjrnab sonabqa Jehoiakin aqa angro Sealtiel a ñambabej. Sealtiel a Serubabel aqa abu. <sup>13</sup> Serubabel a Abiut aqa abu. Abiut a Eliakim aqa abu. Eliakim a Asor aqa abu. <sup>14</sup> Asor a Sadok aqa abu. Sadok a Akim aqa abu. Akim a Eliut aqa abu. <sup>15</sup> Eliut a Eleasar aqa abu. Eleasar a Matan aqa abu. Matan a Jekop aqa abu. <sup>16</sup> Jekop a Josep aqa abu. Josep a Maria aqa gumbuluñ.

Maria aqa miligiq na Yesus a ñambabej. Nanji a qa mareqñub, a Kristus.

<sup>17</sup> Deqa Abraham aqaq dena bosiq Devit a ñambabej di moma 14. Devit aqaq dena bosiq Israel nanji Babilon qureq di soqneb di dego moma 14. Nanji Babilon qureq di soqneb dena bosiq Kristus a ñambabej di dego moma 14.

*Yesus Kristus a ñambabej*

<sup>18</sup> Yesus Kristus a endegsi ñambabej. Aqa ai Maria Josep na oqajqa saga qameb. Ariya Josep a Maria ombla ñereñosaisonabqa Mondor Bole a Maria aqaq ainaqa a gumañej. <sup>19</sup> Onaqa Maria aqa gumbuluñ Josep a endegsi quej, “Maria a gumañqo.” Josep aqa kumbra tulañ boledamu deqa a endegsi are qalej, “E lumu na Maria uratqai. E boleq di uratqasai. Maria a jemaiyo uge.” <sup>20</sup> Degsi are qaleqnaqa

Tamo Koba aqa laŋ aŋgro bei a Josep aqaq ainaqa ŋeiobilqei na unej. Unnaqa laŋ aŋgro na minjej, “O Josep, Devit aqa moma, ni Maria ame. Ni ulaa'im. Ni que. Mondor Bole a Maria aqaq aiqoqa a gumaŋqo. <sup>21</sup> Deqa a aŋgro mel oqas. Amqa bunuqna aŋgro dena aqa segi tamo ungasari naŋgo une kobotetnrsim naŋgi elenqas. Deqa ni aqa ñam Yesus waiyqam.”

<sup>22</sup> Kumbra kalil di brantej deqa anjam bei Tamo Koba aqa medabu o tamo bei nami marej qaji di aqa damu brantej. A endegsi marej, <sup>23</sup> “Niŋgi quiy. Bunuqna duŋgeŋge bei a tamo ombla ŋerenosaisosimqa a gumaŋosim aŋgro mel oqas. Amqa naŋgi aqa ñam Emanuel waiyqab.” Ñam di aqa damu, “Qotei a iga koba na unum.”

<sup>24</sup> Onaqa Josep a qutuosiqa Tamo Koba aqa laŋ aŋgro na anjam minjej qaji di dauryosiqa Maria ej. <sup>25</sup> Bati deqa a Maria ombla ŋerenosai'oqneb. Gilsil gilsiq Maria a aŋgro mel ej. Onaqa Josep na aŋgro di aqa ñam Yesus waiyej.

## 2

### *Bongar sisiyo qaji tamo naŋgi Yesus unqajqa beb*

<sup>1</sup> Yesus a Betlehem qureq di ŋambabej. Qure di Judia sawaq di unu. Bati deqa Mandor Herot a Judia sawa taqatesoqnej. Yesus a ŋambabonaqa bongar sisiyo qaji tamo qudei naŋgi seŋ oqo sawaq na walwelosib gilsib Jerusalem qureq di brantosisib tamo qudei naŋgi endegsib nenemnjroqneb, <sup>2</sup> “Juda naŋgo mandor koba ŋambabej qaji a qabi unu? Iga seŋ oqo sawaq di aqa bongar unsimqa dauryosim bonum. Iga a qa louqajqa deqa bonum.” <sup>3</sup> Onaqa Mandor Herot a naŋgo anjam di qusiqa a are koba qaloqnej. Tamo ungasari kalil Jerusalem di soqneb qaji naŋgi dego are koba qaloqneb. <sup>4</sup> Deqa Herot a Israel naŋgo atra tamo kokba ti naŋgo dal anjam qalie tamo naŋgi ti kalil metnjrnaqa naŋgi bosib koroonaqba a na naŋgi endegsi nenemnjrej, “Kristus a qabia ŋambabqas?” <sup>5</sup> Onaqa naŋgi na kamba minjeb, “Kristus a Betlehem qureq di ŋambabqas. Qure di agi Judia sawaq di unu. Qotei aqa medabu o qaji tamo bei a nami endegsi nengrenyej, <sup>6</sup> ‘O Betlehem tamo ungasari, nuŋgo qure Judia sawaq di unu. Qure kokba kalil Judia sawaq di unub qaji naŋgi na nuŋgo qure bunyqasai. Di kiyaya? Nuŋgo qureq dena gate koba bei tigelosimqa a na ijo segi Israel tamo ungasari naŋgi taqatnjqas.’ ”

<sup>7</sup> Onaqa Herot a anjam di qusiqa bongar sisiyo qaji tamo naŋgi lumu na metnjrnaqa naŋgi aqa areq bonabqa nenemnjrej, “Bati gembu bongar di brantej?” <sup>8</sup> Onaqa naŋgi bongar brantej qaji aqa bati di ubtosib Herot minjnbqba a na kamba minjrej, “Niŋgi Betlehem aisib aŋgro deqa geregere ŋamoiy.

Ŋamosib a tal qabi unu di unsib bosib e merbiy. Yim e kamba aisiy a qa louqai.”

<sup>9</sup> Onaqa nanŋi Mandor Herot aqa anjam di qusib Betlehem aiyeb. Aisib ŋam atsibqa bongar nami seŋ oqo sawaq di uneb qaji di namo aisiq anŋro soqnej qaji tal di tiŋsi sonaq uneb.

<sup>10</sup> Unsib nanŋi tulaŋ areboleboleinjrej.

<sup>11</sup> Onaqa nanŋi tal miligiq gilsib anŋro aqa ai Maria wo sonab unjrsibqa anŋro aqa areq di siŋga pulutosib a qa loueb. Osib nanŋo qasan inŋi inŋi qudei ti gol ti goren ti qa ti walaqaja quleq bole bole di elenjosib anŋro atraiyeb. Inŋi inŋi di nanŋi nami silali kokba na awaiyelenjeb. <sup>12</sup> Ariya nanŋi tal uratosib olo puluqa laqnaqqa Qotei a ŋeiobilqei na minjrej, “Ninŋi olo Herot aqaq di brantaib.” Degsi minjrnaqa nanŋi gam bei dauryosib nanŋo segi qure utruq aiyeb.

### *Josep na Yesus aqa ai wo joqsiq Isip sumeb*

<sup>13</sup> Nanŋi ainabqa bati di Tamo Koba aqa laŋ anŋro bei a Josep aqaq gilsiq ŋeiobilqei na minjej, “Herot a bosim anŋro Yesus qalsim moiyoqajqa ŋamqas. Deqa ni tigelosim anŋro aqa ai wo joqsim Isip sawaq sumiy. Sumsib di soqnaqqa bunuqna e ni mermitqa sawa endeq olo bqaq.” <sup>14</sup> Onaqa Josep a qolo tigeloŋsiqa anŋro aqa ai wo joqsiq Isip sawaq sumeb. <sup>15</sup> Sumsib di sonabqa bunuqna Herot a moiyej. Josep a kumbra di yej deqa anjam bei Tamo Koba aqa medabu o tamo nami marej qaji di aqa damu brantej. A endegsi marej, “Ijo anŋro mel a Isip sawaq di soqnaqqa e dena metit a Isip sawa uratosim ijoq bqaq.”

### *Qaja tamo nanŋi na anŋro mel nanŋi ŋumelenjeb*

<sup>16</sup> Herot a bongar sisiyo qaji tamo nanŋi qa tariŋonaq ugeiyonaq qalieej, nanŋi a gisaŋyeb. Deqa a minjin ani oqeton-aqa aqa qaja tamo qudei nanŋi qarinjrnnaqa aisib Betlehem qureq di anŋro mel kiŋilala wausau aiyel osaisoqneb qaji nanŋi kalil ŋumelenjosib moiyoqnaq. Qure qure Betlehem jojomq di soqneb qaji dia dego anŋro mel kiŋilala wausau aiyel osaisoqneb qaji nanŋi kalil moiyoqnaq. Herot a bongar brantej qaji aqa bati dauryosiq kumbra degyej. <sup>17</sup> Deqa anjam bei Qotei aqa medabu o tamo Jeremaia nami marej qaji di aqa damu brantej. A endegsi marej, <sup>18</sup> “Rama qureq di Resel a akamkobaoqnsiq pailoqnej. Aqa anŋro kalil nanŋi ŋumnab morenjeb deqa akameqnaqa tamo unŋasari nanŋi aqa are latetqa yeqnaq a nanŋo anjam quqwa uratoqnej. Di kiyaaq? Aqa anŋro kalil nanŋi morenjekriteb deqa.”

### *Josep na Yesus aqa ai Maria wo joqsiq olo Israel sawaq beb*

<sup>19</sup> Bati Herot a moinaqa Tamo Koba aqa laŋ anŋro bei a Isip sawaq di Josep aqaq di brantosiqa ŋeiobilqei na minjej, <sup>20</sup> “Ni

tigelosim angro kiñala Yesus aqa ai Maria wo joqsim olo Israel sawaq gile. Tamo nanği Yesus qalsib moiyoṭṭa maroqneḃ qaji nanği moreṇekriteḃ deqa ni olo gile.”<sup>21</sup> Onaqa Josep a tigelosiqa Yesus aqa ai Maria wo joqsiq olo Israel sawaq gilej.<sup>22</sup> Bati deqa Arkelaus a na aqa abu Herot aqa sawa osiq Judia sawa taqatesoqnej. Deqa Josep a anjam di qusiqa Judia sawaq gilqa ulaej. Onaqa Qotei a Josep ṇeiobilqei na minjej, “Ni Galili sawaq gile.”<sup>23</sup> Onaqa Josep a Qotei aqa anjam di dauryosiqa Galili sawaq gilej. Gilsiq qure bei aqa ñam Nasaret di soqnej. A di soqnej deqa anjam bei Qotei aqa medabu o tamo qudei nanği nami maroqneḃ qaji di aqa damu brantej. Nanği endegsib maroqneḃ, “Nanği a qa maroqñqab, ‘A Nasaret tamo.’”

### 3

#### *Jon yansjro qaji a Qotei aqa anjam palontoqnej*

<sup>1</sup> Bunuqna Jon yansjro qaji a Judia nanngo wadau sawaq di brantej. Brantosiq dia tamo ungasari nanği Qotei aqa anjam palontosiq endegsi minjroqnej,<sup>2</sup> “Qotei lan qureq di unu qaji a nungo Mandor Koba sosim ninği taqatṇwajqa bati jojomqo. Deqa ninği are bulyiy.”<sup>3</sup> Jon a kumbra degyej deqa anjam bei Qotei aqa medabu o tamo Aisaia nami marej qaji di aqa damu brantej. A Jon qa endegsi marej, “Tamo bei a wadau sawaq di tigelosimqa a tulan leleṇoqnsim tamo ungasari nanği endegsim minjroqñqas, ‘Tamo Koba a bqajqa gam gereiyetiḃ. Gam tingitetiy.’”

<sup>4</sup> Jon a wadau sawaq di sosiqa a gara jugo kamel aqa junḡum na gereiyo qaji di jugoqnsiqa alalag na singilatosisiq laqnej. A inği uyo saiṇoḃi deqa a sis ti bisim qaq ti uyoqnej.<sup>5</sup> Bati deqa tamo ungasari Jerusalem di soqneḃ qaji nanği ti Judia sawaq di soqneḃ qaji nanği ti qure kalil Jordan ya qalaq di soqneḃ qaji nanği ti tigelosib Jon aqa areq boqneḃ.<sup>6</sup> Boqnsibqa nanngo une kalil babteqñab Jon na Jordan yaq di yansjroqnej.

<sup>7</sup> Bati deqa Farisi tamo ti Sadyusi tamo ti tulan gargekoba nanği Jon na yansjrqqa marsibqa aqa areq beqñabqa unjrsiqa nanği endegsi minjroqnej, “Ninği kumbra uge yo qaji tamo. Ninği amal uge bul. Ninği yai na mernḡwoqa mondon Qotei aqa minjin nunḡoq aiyaim deqa ulaosib ijoq bonub?”<sup>8</sup> Ninği are bulyosib nunḡoq kumbra uge kalil uratosib kumbra bole bole yoqñiy. Yim e unsiy marqai, ‘Bole, ninği are bulyonub.’ Osiy ninği yansḡwai.<sup>9</sup> Ninği endegsib are qalaib, ‘Abraham a gago moma utru unu deqa iga Qotei aqa ṇamgalaq di tamo bole.’ Ninği degsib are qalaib. Ninği quiy. Qotei na marimqa meniḃ kalil endi dego tamo bulyosib tigelosib Abraham aqa moma brantqab.<sup>10</sup> Qotei na tapor qalat ojsiqa

nam qomqajqa utruq di atej unu. Deqa nam kalil gei bole ato-saieqnu b qaji di Qotei na tapor dena qomelenosim njamyuwoq di breinjrqas.

<sup>11</sup> “Ninji are bulyqajqa deqa e ya na ninji yansngeqnum. Ariya Tamo Koba a bunuqna ijo qoreq na bqas. A tamo singila koba. Ijo singila aqa singila ti keresai. Deqa e a kangalyqajqa e tamo bolesai. A bosimqa Mondor Bole aqa singila na ti njamyuwo na ti ninji yansjgwas. <sup>12</sup> A bem sum ñoqoryosim damu elenosim aqa talq di atqas. Osim a bem sum aqa suwi breinjrim njamyuwo gaigai yuejunu qaji dia yuekritqab.”

### *Jon na Yesus yansej*

<sup>13</sup> Bati deqa Yesus a Galili sawaq dena tigelosiqa wal-welosiq Jordan yaq gilej. A Jon na yansqa marsiqa aqa areq gilej. <sup>14</sup> Gilnaqa Jon na saidyosiq minnej, “Ni e yansbqam di kere. Kiyaqa e ni yansmqqa marsim ijoq bonum?” <sup>15</sup> Onaqa Yesus na kamba minnej, “Ungum. Ni ijo anjam dauryosim e yansbe. Yimqa kumbra dena iga Qotei aqa areqalo kalil keretosim dauryqom.” Onaqa Jon a Yesus aqa anjam di dauryosiqa a yansej.

<sup>16</sup> Yesus a yanso osiqa a yaq na tigelosiqa tarosiq lanj goge koqyonaqa lanj waqej. Lanj waqonaqa Qotei aqa Mondor a binon bulosiq aisiq Yesus aqa jejamuq di awoonaq unej. <sup>17</sup> Unnaqa lanj goge dena Qotei aqa anjam bei endegsi brantej, “Endi ijo angro qujai. E a tulan qalaqalaiyeqnum. E a qa tulan areboleboleibeqnu.”

## 4

### *Satan a bosiq Yesus walawalaiyoqnej*

<sup>1</sup> Onaqa bati deqa Mondor a Yesus wadau sawaq osi gilsiq di uratonaqa Satan bosiqqa Yesus a une bei atqa marsiqa walawalaiyoqnej. <sup>2</sup> Qanam 40 qolo 40 Yesus a wadau sawaq di soqnej. Sosisqa inji uratoqnsiqa qurien ti soqnej. Deqa bati 40 di koboonaqa a mamyej. <sup>3</sup> Onaqa walawalaiyo tamo Satan a Yesus aqa areq bosiqqa minnej, “Ni Qotei aqa Njiriamqa menin kalil endi minjrim bem bulyibqa ni uye.” <sup>4</sup> Degsi minjnaqa Yesus na kamba minnej, “Qotei aqa anjam bei nami endegsib nengrenyeb unu, ‘Tamo nanji inji uyo na segi nambile sqasai. Anjam kalil Qotei aqa medabuq na branteqnu qaji dena nanji nambile sqab.’”

<sup>5</sup> Onaqa Satan na Yesus olo osiqa Qotei aqa qure koba Jerusalem gilsiq atra tal quraq oqsiq goge dia Yesus atsiqa minnej, <sup>6</sup> “Ni Qotei aqa Njiriamqa endena prugosim mandamq aiye. Agi Qotei aqa anjam bei nami endegsib nengrenyeb unu, ‘Qotei na aqa lanj angro nanji minjrimqa bosib ni taqatmqab.’ Anjam bei dego nengrenq di unu. Anjam agiende, ‘Lanj angro



nanği bosib ban na ni soqtmibqa ino sinğa meniñ na qalqasai.’”<sup>7</sup> Onaqa Yesus na kamba Satan minjej, “Qotei aqa anjam bei dego nenğrençq di unu. Anjam agiende, ‘Ni ino Tamo Koba Qotei aqa sinğila lanğa tenemtqa osim a gisanıyaim.’”

<sup>8</sup> Degsi minjnaqa Satan a Yesus olo osıqa mana goge kobaq oqsıq dia Yesus tigeltosıqa sawa sawa kalil mandor kokba nanği na taqatejunub qaji nanğo sinğila ti ñoro ti di Yesus osoryosıqa minjej, <sup>9</sup> “Ni ijo ulatamuq endi sinğa pulutosim e qa louımqa sawa sawa kalil di nanğo sinğila ti ñoro ti ni emqai.” <sup>10</sup> Onaqa Yesus na minjej, “Satan, ni ulanğ. Qotei aqa anjam bei nami endegsib nenğrenjyeb unu, ‘Ino Tamo Koba Qotei a segi qa louoqnsimqa aqa sorgomq di soqne.’”

<sup>11</sup> Degsi minjnaqa Satan a Yesus uratosıq ulañej. Onaqa Qotei aqa lanğro nanği bosib Yesus sinğilatoqneb.

### *Yesus a olo Galili sawaq gilej*

<sup>12</sup> Bati bei Jon a tonto talq di waiyonab sonaqa Yesus a di qusıqa olo tigelosıq Galili sawaq gilej. <sup>13</sup> Gilsıq Nasaret qureq di brantej. Dena walwelosıqa Kaperneam qureq gilsıq di soqnej. Kaperneam qure agi Galili ya agu kobaquja qalaqsi unu. Ya agu jojomq di Sebulun sawa ti Naptali sawa ti unub. <sup>14</sup> Yesus a Kaperneam qureq gilej deqa anjam bei Qotei aqa medabu o tamo Aisaia nami marej qaji di aqa damu brantej. A endegsi marej, <sup>15</sup> “Gam kobaquja Jordan ya qalaq dena aiyejunu qaji di Galili sawa ambleq na aiyejunu. Aisiq yuwalq di diñejunu. Gam qalaq di Sebulun ti Naptali ti unub. Sawa bei bei qaji nanği beleñosib Galili di unub. <sup>16</sup> Deqa tamo unğasari ambruq di unub qaji nanği pulonğ kobaquja unqab. Tamo unğasari padalo gam dauryosib ambruq di unub qaji nanği pulonğ dena suwantnırqas.”

### *Yesus na tamo qolqe nanği metnjrnaq a dauryeb*

<sup>17</sup> Bati deqa Yesus na aqa wau utru atsiqa Qotei aqa anjam palontoqnsıqa tamo unğasari nanği endegsi minjroqnej, “Qotei lanğ qureq di unu qaji a nunğo Mandor Koba sosim niñgi taqatñğwajqa bati jojomqo. Deqa niñgi are bulıyiy.”

<sup>18</sup> Osıqa a Galili ya agu qalaq aisiq alile dia walweloqnsıqa ñam atej di Saimon aqa ñam bei Pita aqa was Andru wo sonab unjrej. Nanği aiyel qe o qaji tamo soqneb deqa nanği kakanğ waiyeqñab unjrısqı minjrej, <sup>19</sup> “Niñgi e daurbıy. Niñgi qe o qaji tamo unub deqa niñgi qe eqnub. Dego kere e wau enğıtqa niñgi olo tamo oqñqab.” <sup>20</sup> Yesus a nanği degsi minjnınaqa nanği nanğo kakanğ uratosib Yesus dauryeb.

<sup>21</sup> Onaqa Yesus a olo walwelosıq aisiqa Sebedi aqa ñiri Jems aqa was Jon wo nanği aiyel qobunğ miligiq di nanğo abu ti kakanğ branğo qandimeqñabqa unjrısqı metnjrej.

<sup>22</sup> Metnjrnaqa nanngo abu Sebedi a qobun miligiq di sonaqa uratosib Yesus dauryeb.

*Yesus a Qotei aqa anjam palontoqnsiqa ma tamo nanngi boletnjroqnej*

<sup>23</sup> Yesus a dena walweloşiqa Galili sawa keretoqnsiqa Juda nanngo Qotei tal miligiq giloqnsiqa dia Qotei aqa anjam palontoqnej. Qotei na aqa segi tamo ungasari nanngi taqatnjrsim nanngo Mandor Koba sqas anjam bole di Yesus na palontoqnej. Osiqa tamo ma utru segi segi kalil nanngi boletnjroqnej.

<sup>24</sup> Yeqnaqa tamo ungasari kalil Siria sawaq di soqneb qaji nanngi Yesus qa quocnsib deqa tamo ma utru segi segi joqsib aqa areq boqneb. Tamo jejamu jaqatiñjro qaji nanngi ti tamo mondor uge uge na ojeleno qaji nanngi ti tamo nanarioqnsib mangaloqneb qaji nanngi ti tamo jejamu lainjro qaji nanngi ti kalil joqsib beqnab Yesus na boletnjroqnej. <sup>25</sup> Bati deqa tamo ungasari tulan gargekoba nanngi Yesus dauryoqnsib laqneb. Galili sawa nanngi ti Dekapolis sawa nanngi ti Jerusalem qure nanngi ti Judia sawa nanngi ti qure qure Jordan ya taqal beiq di soqneb qaji nanngi ti kalil Yesus dauryoqnsib laqneb.

## 5

*Yesus a manaq oqsiq dia anjam palontej*

<sup>1</sup> Onaqa Yesus na tamo ungasari kalil nanngi di unjrsiqa a manaq oqsiq di awesonaqa aqa segi angro nanngi aqa areq beb.

<sup>2</sup> Bonabqa a Qotei aqa anjam palontosiq endegsi minjrej, <sup>3</sup> “Tamo ungasari qudei nanngi poinjrco, nanngi Qotei aqa ñamgalaq di sougetejunub. Tamo ungasari nanngi di areboleboleinjreme. Qotei lan qureq di unu qaji a nanngo Mandor Koba sosim nanngi taqatnjrqas.

<sup>4</sup> “Tamo ungasari akam ti unub qaji nanngi dego areboleboleinjreme. Qotei na nanngo are olo boletetnjrqas.

<sup>5</sup> “Tamo ungasari lawo na sosib nanngo segi ñam aguq ateqnub qaji nanngi dego areboleboleinjreme. Qotei na mandam kalil osim nanngi enjrqas.

<sup>6</sup> “Tamo ungasari kumbra bole dauryqajqa arearetnjreqnu qaji nanngi dego areboleboleinjreme. Nanngi tulan kere na sqab. Iga ñngi ti ya ti uyqajqa arearetgeqnu dego kere.

<sup>7</sup> “Tamo ungasari duleqñub qaji nanngi dego areboleboleinjreme. Qotei a kamba nanngi qa duloqñqas.

<sup>8</sup> “Tamo ungasari nanngo are miligiq di jiga bei saiqoji unub qaji nanngi dego areboleboleinjreme. Nanngi Qotei aqa ulatamu unqab.

<sup>9</sup> “Tamo ungasari jeu turyeqñub qaji nanngi dego areboleboleinjreme. Qotei a nanngi qa marqas, ‘Nanngi ijo segi angro bole.’

10 “Tamo ungasari qudei nanği kumbra bole dauryeqnub deqa jeu tamo nanği na nanği gulbe enjreqnub. Tamo ungasari nanği di dego areboleboleinjreme. Qotei lan qureq di unu qaji a nanžo Mandor Koba sosim nanği taqatnjrqas.

11 “Ninği ijo ñam ti unub deqa bunuqna tamo qudei na ninği misilingoqnsib ugeugeinjoqnsib nunžo jejamu lanja gisanjoqnaqab. Di unğum. Ninği areboleboleinğeme. <sup>12</sup> Od, nunžo are tulan boleinğim soqniy. Nunžo awai bole agi lan goge di unu. Nami jeu tamo nanği na Qotei aqa medabu o qaji tamo nanği dego degsib ugeugeinjroqneb.”

### *Ninği bar ti pulon ti bul soqniy*

<sup>13</sup> Osiqa Yesus a olo marej, “Ninği mandamq endi bar bul soqniy. Ariya bar aqa qajarara koboqas di inği kiye na olo qajararatqas? Di keresai. Bar aqa qajarara koboqas di a ugeqas. Deqa bar di mandamq di waiyibqa tamo qudei nanği bosib sinğa na sosqab.

<sup>14</sup> “Ninği mandamq endi pulon bul soqniy. Ninği are qaliy. Qure kobaquja a mana gogeqsi sqas di a boleq di sqas. A uliesqa keresai. <sup>15</sup> Tamo bei a lam qatrentosim guwe na kabutqasai. Boleq di gaintim warum suwanamqa tamo kalil tal miligiq di unub qaji nanği warum gegerere unqab. <sup>16</sup> Dego kere ninği pulon bul sosib boleq di kumbra bole bole yoqniy. Yoqniqbqa tamo ungasari nanği na nunžo kumbra di unoqnsib nunžo Abu lan qureq di unu qaji aqa ñam soqtoqnaqab.”

### *Yesus a dal anjam qa marej*

<sup>17</sup> Osiqa Yesus a olo marej, “E Moses aqa dal anjam ti Qotei aqa medabu o qaji tamo nanžo anjam ti kalil dauryosiy keretqajqa deqa mandamq aiyem. Ninği endegsib are qalaib, ‘Yesus a dal anjam di taqal waiyqajqa bej.’ Di sai. <sup>18</sup> E bole mernğwai. Lan ti mandam ti koboosaisoqnimqa dal anjam mutu kiñala bei koboqasai bole sai. Dal anjam soqnim soqnim Qotei na aqa wau kalil keretqas. <sup>19</sup> Deqa ninği quiy. Tamo bei a dal anjam mutu kiñala bei uge qa marsim tamo ungasari nanği dego titnjroqnim nanği uge qa marqab tamo di aqa ñam tulan aguq aiqas. Deqa Qotei lan qureq di unu qaji a na tamo di taqatqasai. Osim aqa Mandor Koba sqasai dego. Ariya tamo bei a dal anjam kalil dauryosim tamo ungasari nanği dego dauryqa minjroqnaqas tamo di aqa ñam tulan kobaqas. Deqa Qotei na tamo di taqatosim aqa Mandor Koba sqas. <sup>20</sup> E ninği endegsi mernğwai. Ninği kumbra tulan bolequja yoqniy. Yoqniqb nunžo kumbra bole dena dal anjam qalie tamo nanği ti Farisi ti nanžo kumbra bole bunjoqneme. Bunjoqasai di Qotei lan qureq di unu qaji a nunžo Mandor Koba sosim ninği taqatnğwasai.

*Yesus a niriŋ kumbra qa anjam palontej*

<sup>21</sup> “Niŋgi dal anjam endegsib queb, ‘Niŋgi tamo bei moiyo-taib. Niŋgi tamo bei moiyoŋqab di niŋgi une ti sqab.’ Dal anjam di nuŋgo moma naŋgi nami minjreb. <sup>22</sup> Ariya e dal anjam di buŋyosiy niŋgi endegsi mernŋwai. Tamo bei na aqa was niriŋŋqas di a une ti sqas. Tamo bei na aqa was misilinyqas di une kobaquja aqa jejamuq di sqas. Deqa a ojsib anjam pegiyo talq di tigeltosib aqa une ubtetqab di kere. Tamo bei na aqa was minjŋqas, ‘Ni tulaŋ nanari, areqalo saiŋoŋji,’ degyqas di aqa une deqa Qotei na a osim ŋamyuwoq waiyqas di kere.

<sup>23-24</sup> “Deqa ni Qotei atraiyqa marsimqa ino was bei a ni qa niriŋ ti soqnimqa ni deqa are qalsim atraiyo iŋgi iŋgi mati atra bijal qalaq di uratosim ino was aqaq gile. Gilsim a ombla anjam gereiyekritosim dena bosim Qotei atraiyqam.

<sup>25</sup> “Deqa tamo bei a ni qa anjam bei soqnimqa niŋgi ombla walwelosib anjam pegiyo talq giloqnsibqa gamq di niŋgi segi aiyel na anjam urur gereiyoqujatiy. Yosib anjam moiyoŋosib a ni osim anjam pegiyo talq gilqasai. Ariya niŋgi gamq di anjam gereiyqasai di a na ni osi gilsimqa anjam pegiyo tamo aqa ulatamuq di tigeltmimqa anjam pegiyo tamo a ni osim qaja tamo naŋgo baŋq di atqas. Yimqa naŋgi na ni osib tonto talq di waimqab. <sup>26</sup> Deqa e bole mermqai. Ni tonto talq dena olo oqedqasai. Ni mati ino une aqa awai kalil keretimqa qaja tamo naŋgi na ni uratmib oqedqam.

*Yesus a uŋa jejamu ojetqajqa kumbra qa anjam palontej*

<sup>27</sup> “Niŋgi dal anjam endegsib queb, ‘Niŋgi tamo bei aqa uŋa jejamu ojetaib.’ <sup>28</sup> Ariya e dal anjam di buŋyosiy niŋgi endegsi mernŋwai. Tamo bei a uŋa bei laŋa kokoqyosiqa are prugyqo di aqa are miligiq na a uŋa di aqa jejamu ojetqo.

<sup>29</sup> “Ino ŋamdamu wo na ni titmosim uneq waimqa laqnimqa ŋamdamu di otorosim waiy. Ni degye. Di kiyaaqa? Ino ŋamdamu qujai loumimqa ni une yqasai di kere. Ariya ni ŋamdamu aiyel ti soqnimqa Qotei na ni ŋamyuwoq waimqas di keresai. <sup>30</sup> Ino baŋ wo na ni titmosim uneq waimqa laqnimqa baŋ di gentosim waiy. Ni degye. Di kiyaaqa? Ino baŋ qujai loumimqa ni une yqasai di kere. Ariya ni baŋ aiyel ti soqnimqa Qotei na ni ŋamyuwoq waimqas di keresai.

*Yesus a uŋa uratqajqa kumbra qa anjam palontej*

<sup>31</sup> “Nami naŋgi dal anjam endegsib mareb, ‘Tamo bei na aqa uŋa uratqa osimqa pepa bei nenŋrenyosim yosim di a uratqas.’ <sup>32</sup> Ariya e dal anjam di buŋyosiy niŋgi endegsi mernŋwai. Tamo bei na aqa ŋauŋ laŋa uratim a olo tamo bei oqas di tamo dena aqa ŋauŋ kumbra ugeq waiyqo. Tamo bunuj a dego une atqo. Di kiyaaqa? Uŋa di a nami tamo bei ombla une atosai deqa.

*Niingi anjam bei marqa osibqa ingi bei na singilataib*

<sup>33</sup> “Niingi dal anjam endegsib queb, ‘Ni anjam bei singilatosim Tamo Koba minjqam di ni na olo urataim. Ni anjam di dauryosim ye.’ Dal anjam di nunngo moma nanqi nami minjreb. <sup>34</sup> Ariya e dal anjam di bunyosiy niingi endegsi merngwai. Niingi anjam bei singilataib. Niingi anjam bei marqa osibqa ingi bei na singilataib. Lan qure a Qotei aqa awo jaram koba. Deqa niingi lan qure aqa ñam na anjam bei singilataib. <sup>35</sup> Mandam a Qotei aqa singa atqajqa sawa. Deqa niingi mandam aqa ñam na anjam bei singilataib. Jerusalem a Mandor Koba aqa segi qure koba. Deqa niingi Jerusalem aqa ñam na anjam bei singilataib. <sup>36</sup> Ni anjam bei marqa osimqa ino gate na anjam singilataim. Ni segi na marimqa ino gate banqa sara qat bei oqwa keresai. Tulu bei dego oqwa keresai. Deqa ni ino gate na anjam singilataim. <sup>37</sup> Niingi od qa segi marsib said qa dego segi mariy. Niingi anjam bei totoryosib marqab di niingi Satan aqa areqalo dauryqab.

*Tamo bei na ni kumbra uge emimqa ni kamba a kumbra uge yaim*

<sup>38</sup> “Niingi dal anjam endegsib queb, ‘Tamo bei na tamo bei aqa ñamdamu ugetetqas di niingi kamba aqa ñamdamu ugetetiy. Tamo bei na tamo bei aqa qalagei ugetetqas di niingi kamba aqa qalagei ugetetiy.’ <sup>39</sup> Ariya e dal anjam di bunyosiy niingi endegsi merngwai. Tamo bei na ni kumbra uge emimqa ni kamba a kumbra uge yaim. Tamo bei na ula ponmimqa belosim waline bei osoryimqa ponyem. <sup>40</sup> Tamo bei a ni qa anjam bei soqnim ino gara jugo yaimqajqa mermimqa ni na saidyaim. Olo ino gara olekoba dego ye. <sup>41</sup> Qaja tamo bei na ni ojsim singila na mermqas, ‘Ni ijo ingi ingi qoboiyetbosim e daurbosim gam truquyala endeq gile.’ A degsi mermimqa ni aqa anjam di bunyosim aqa ingi ingi qoboiyetosim dauryosim gam olekobaq osi gilete. <sup>42</sup> Tamo bei na ino ingi bei yaimqajqa mermimqa ye. Tamo bei na ino ingi bei yaimosim bunuqna a kamba olo ni emqajqa mermimqa ingi di ye. A saidyaim.

*Niingi na jeu tamo nanqi geregereinjroqniy*

<sup>43</sup> “Niingi dal anjam endegsib queb, ‘Ni ino was nanqi qalaqalainjroqne. Osim ino jeu tamo nanqi qoreinjroqne.’ <sup>44</sup> Ariya e dal anjam di bunyosiy niingi endegsi merngwai. Niingi nunngo jeu tamo nanqi dego qalaqalainjroqniy. Tamo qudei na niingi ugeugeingibqa niingi olo nanqi qa Qotei pailyoqniy. <sup>45</sup> Niingi kumbra degyqab di niingi nunngo Abu lan qureq di unu qaji aqa angro bole sqab. Niingi qalie, Qotei a dego tamo bole ti tamo uge ti nanqi turtnjroqnsiq kumbra bole bole enjreqnu. Agi a na aqa sen qarinyeqnaqa tamo bole ti tamo uge ti nanqoq

aiyeqnu. Awa dego qarinyeqnaqa tamo bole ti tamo uge ti nanngoq aiyeqnu. <sup>46</sup>Tamo ungasari ningi qalaqalaingeqnuq qaji nanngi segi ningi kamba qalaqalainjroqnaqab di kumbra tulan bolesai. Nunngo kumbra deqa Qotei a ningi awai bole engwasai. Takis o qaji tamo nanngi dego kumbra degyeqnub. <sup>47</sup>Ningi nunngo was nanngi segi gereinjroqnaqab di kumbra tulan bolesai. Nunngo kumbra dena ningi na tamo qudei bunjrqasai. Tamo nanngi Qotei qaliesai qaji nanngi dego nanngo segi was nanngi gereinjreknub. <sup>48</sup>Nunngo Abu lan qureq di unu qaji a gaigai kumbra bole bole keretoqnsiq yeqnu. Deqa ningi dego nunngo Abu aqa kumbra di dauryosib kumbra bole bole keretoqnsib yoqniy.

## 6

### *Ningi lanja baban na kumbra bole yaim*

<sup>1</sup>“Tamo qudei nanngi endegsib are qaleqnuq, ‘E lanja baban na kumbra bole yoqnit tamo nanngi e nubognsib ijo ñam soqtetboqnaqab.’ Ariya ningi degyai. Ningi degyqab di nunngo Abu lan qureq di unu qaji a ningi awai bole engwasai.

<sup>2</sup>“Ningi gisan tamo nanngo kumbra dauryaib. Gisan tamo nanngo kumbra agiende. Nanngi na tamo ingi ingi saiqoji nanngi aqaryainjrqa oqnsib tamo qudei qarijnjreknab nanngi qa namooqnsib gul anjameqnuq. Gul anjameqnuq tamo ungasari nanngi na gisan tamo nanngi di unjroqnsib nanngo ñam soqtetnjreknub. Gisan tamo nanngi di Qotei tal miligiq di, gam kokbaq di kumbra degyeqnuq. Deqa e bole merngwai. Qotei a tamo nanngi di awai bole enjrqasai. Nanngo awai agi tamo ungasari nanngi na nanngo ñam soqtetnjreknub di kere. <sup>3</sup>Deqa ni degyai. Ni tamo ingi ingi saiqoji nanngi aqaryainjrqa osimqa ban qonan a uli na aqaryainjrimqa ban wo a qalieqasai. <sup>4</sup>Di yawo anjam. Aqa damu endegsi unu. Ni uli na tamo ingi ingi saiqoji nanngi aqaryainjrimqa tamo ungasari kalil nanngi qalieqasai. Ni kumbra di uli na yoqnim ino Abu a segi unoqnaqas. Deqa a segi na ino ñam soqtetmosim ni awai bole emoqnaqas.”

### *Yesus a pailyo kumbra qa anjam palontej*

<sup>5</sup>Osiqa Yesus a olo marej, “Ningi Qotei pailyqa osibqa gisan tamo nanngi pailyeqnuq degsib pilyaib. Gisan tamo nanngi Qotei pailyqa oqnsib tamo ungasari kalil nanngo ñamdamuq di tigeleqnuq unjroqnsib nanngo ñam soqtetnjreknub. Tamo nanngi di Qotei tal miligiq di, qure ambleq di, gam kokba qalaq di kumbra degyeqnuq. Deqa e bole merngwai. Qotei a nanngi awai bole enjrqasai. Nanngo awai agi tamo ungasari nanngi na nanngo ñam soqtetnjreknub di kere. <sup>6</sup>Deqa ni degsi pilyaim. Ni Qotei pailyqa osimqa ino segi warum miligiq gilsim siran

qandimtosim ino Abu uliejunu qaji a pailyimqa tamo kalil nanği ni numqasai. Ni kumbra di uli na yoqnm ino Abu a segi unoqnqas. Deqa a segi na ino ñam soqtetmosim ni awai bole emoqnqas.

<sup>7</sup> “Tamo nanği Qotei qaliesai qaji nanği laña laña pailyo olekokba yoqnsibqa endegsib are qaleqnub, ‘Iga pailyo olekokba yoqnmqa Qotei a gago pailyo quqwas.’ Di gisanj. Deqa ninği Qotei pailyo osibqa degsib pailyaib. <sup>8</sup> Ninği nanğo kumbra di dauryaib. Ninği inği bei qa truquosib nunğo Abu pailyo saisoqnibqa a nami qalieqo.

<sup>9</sup> “Deqa ninği endegsib Qotei pailyoqniy, ‘O gago Abu, ni lañ qureq di unum. Ino ñam tulan getento.

<sup>10</sup> Ni bosim gago Mandor Koba sosim iga taqatgoqnime.

Lañ qureq di nanği ino areqalo dauryeqnub dego kere iga mandamq endi ino areqalo dauryoqnqom.

<sup>11</sup> O Abu, gago inği uyo bati gaigai keretgoqnime.

<sup>12</sup> Tamo nanği iga qa une ateqnub qaji nanğo une kalil iga na kobotetnjreqnum deqa ni kamba gago une kalil dego kobotetgime.

<sup>13</sup> Gulbe bei na iga walawalaigosim uneq waigwa laqnmqa ni iga aqaryaigime.

Yim Satan na iga ugetgwasai.’

<sup>14</sup> “O ijo anğro, ninği degsib Qotei pailyoqniy. Ninği quiy. Ninği tamo bei qa anjam soqnmqa ninği na aqa une kobotiy. Yimqa nunğo Abu lañ qureq di unu qaji a na kamba nunğo une kalil kobotetngwas. <sup>15</sup> Ninği aqa une kobotetqasai di nunğo Abu a dego nunğo une kobotetngwasai.”

### *Yesus a qurienj qa anjam palontej*

<sup>16</sup> Osiqa Yesus a olo marej, “Ninği qurienjqa marsibqa gisanj tamo nanği qurienjeqnub ninği degsib qurienjaib. Gisanj tamo nanği qurienjoqnsibqa ulatamu ugeinjreqnu. Tamo unğasari kalil nanği na unjrsib nanğo ñam soqtetnjrqajqa deqa nanği kumbra degyeqnub. Deqa e bole mernğwai. Tamo nanği di Qotei na awai bole enjrqasai. Nanğo awai agi tamo unğasari nanği na nanğo ñam soqtetnjreqnub di kere. <sup>17</sup> Ariya ni kumbra degyaim. Ni qurienjqa osimqa ino ulatamu geregere yansoqnsim ino gate banğa pranjoqnsim ino jejamu gereiyosim laqne. <sup>18</sup> Yimqa tamo unğasari kalil nanği ni numoqnsib ni qurienj ti unum di nanği qalieqasai. Ni kumbra di uli na yoqnm ino Abu a segi na unoqnqas. Deqa a segi na ino ñam soqtetmosim awai bole emoqnqas.”

*Ninği mandam qa inği inği koroiyayib*

19 Osiqa Yesus a olo marej, “Ningi mandam qa ingi ingi koroiyaib. Di sisimbin na ugetqab. Baisuwi ojqas. Bajin tamo nanngi tal paratosib oqab. 20 Deqa ningi lan qure qa ingi ingi koroiyiy. Di sisimbin na ugetqasai. Baisuwi ojqasai. Bajin tamo nanngi tal paratosib oqasai dego. 21 Sawa qabia ino ñoro bole unu dia ino are miligi dego singilatim sqas.”

*Ino ñamdamu a ino jejamu qa pulon bul*

22 Osiqa Yesus a olo marej, “Ino ñamdamu a ino jejamu qa pulon bul. Deqa ino ñamdamu boleqas di ino jejamu kalil suwanesqas. 23 Ariya ino ñamdamu ugeqas di ino jejamu kalil ambruesqas. Deqa pulon ino are miligiq di unu qaji a olo ambruqas di ino are miligi kalil ambruekritqas.”

*Ni tamo kokba aiyel nanngi wauetnjrqqa keresai*

24 Osiqa Yesus a olo marej, “Tamo qujai a tamo kokba aiyel nanngi wauetnjrqqa keresai. A tamo kobaquja bei qalaqalayosim olo tamo kobaquja bei jeutqas. Bei aqa anjam dauryosim olo bei qoreiyqas. Dego kere ningi silali ti Qotei ti turtnjrsib nanngi wauetnjrqqa keresai.”

*Ningi bole sqajqa deqa areqalo kobaiyaib*

25 Osiqa Yesus a olo marej, “Ningi mandamq endi bole sqajqa deqa areqalo kobaiyaib. Osib endegsib maraib, ‘Iga ingi ti ya ti qabe na osim uyqom? Gara qabe na osim gago jejamu kabutqom?’ Ningi degsib maraib. Ningi ingi uyo na segi ñambile oqasai. Ningi gara jugoqnqab dena segi nungo jejamu bole sqasai. 26 Ningi qebari nanngi unjriy. Nanngi ingi yagosaieqnub. Ingi otorosib talq di atosaiieqnub. Ariya nungo Abu lan qureq di unu qaji a na qebari nanngi ingi anainjreqnu. Ningi qalie, qebari nanngi qunun saiqoji. Ningi tamo qunun ti. Ningi na qebari nanngi tulan bunjnjrejrunub. 27 Ningi mandamq endi sokobaiyqajqa deqa are koba qalaib. Ningi are koba qalqab dena ningi nungo segi sqajqa bati olo yala totoryqa keresai. Sai bole sai.

28 “Deqa ningi kiyaaqqa gara qabe na osib jejamu kabutqajqa are koba qaleqnub? Ningi ñam so unjriy. Nanngo wala kiyersib branteqnub di ningi qaliesai. Nanngi segi wauosaieqnub. Nanngo segi wala gereiyosaieqnub. 29 Deqa e ningi endegsi merngwai. Nami Solomon a gara wala boledamu jugoqnej. Ariya ñam so aqa wala dena Solomon aqa wala tulan bunyejunu. 30 Man lanaj a bini oqwas nebe tamo nanngi na ginjenyosib ñamyuwoq waiyqab. Man lanaj di Qotei na wala enjreqnu. Deqa ningi kiyaaqqa Qotei qa nungo areqalo singilatqa yonub keresaiingwo? Ningi man lanaj sai. Ningi tamo qunun ti. Deqa ningi endegsi poingem, Qotei a ningi dego gara engoqnqas. 31 Ningi areqalo kobaiyosib endegsib maraib,



‘Iga inġi ti ya ti qabe na osim uyqom? Gara qabe na osim gago jejamu kabutqom?’ Niġi deġsib maraib. <sup>32</sup> Tamo unġasari Qotei qaliesai qaji naġi inġi inġi deqa are koba qaleqnub. Ariya niġi deqa are koba qalaib. Nunġo Abu lan qureq di unu qaji a qalie, niġi lana sqa keresai. Niġi inġi inġi deqaji oqnsib sqab. <sup>33</sup> Deqa niġi kumbra qujai endi yoqniy. Niġi Qotei na taqatnġosim nunġo Mandor Koba sqajqa ti aqa kumbra bole bole dauryqajqa ti singilaoqniy. Niġi deġyqab di Qotei na kamba inġi uyo ti gara ti dego enġoqnqas. <sup>34</sup> Deqa nebe kumbra kiye nunġoq di brantqas niġi deqa are koba qalaib. Nebe a bati bei. Nebe qa gulbe di aqa segi gulbe. Bati segi segi aqa gulbe di nanġo segi segi. Deqa niġi are koba qalaib.”

## 7

### *Niġi na tamo qudei naġi peginjraib*

<sup>1</sup> Osiqa Yesus a olo marej, “Niġi na tamo qudei naġi peginjraib. Niġi peginjrqasai di Qotei a kamba dego niġi peginġwasai. <sup>2</sup> Ariya niġi na tamo naġi peginjrqab kere dego Qotei a kamba niġi peginġwas. Niġi na tamo nanġo jejamuq di une qametnjrqab kere dego Qotei a kamba nunġo jejamuq di une qametnġwas. <sup>3</sup> Kiyaqa ni ino was aqa nġamdamuq di nġam nġenġi kiñala unu di unsimqa ino segi nġamdamuq di nġampaġ kobaquja unu di ni unosai? <sup>4</sup> Kiyaqa ino segi nġamdamuq di nġampaġ kobaquja soqniġqa ni na tentosim ino was minjġam, ‘Was, e ino nġamdamuq di nġam nġenġi kiñala unonum di osiy taqal waiyetmġai?’ <sup>5</sup> Ni ġisaġ tamo. Ni mati nġampaġ kobaquja ino segi nġamdamuq di unu qaji di taqal waiyosim nġamdamu suwanġimġqa ariya degam nġam nġenġi kiñala ino was aqa nġamdamuq di unu qaji di ġeregere unsim taqal waiyete.

<sup>6</sup> “Niġi nġoro bole bole oqnsib baun naġi enjroqnaib. Enjrqab di naġi nġoro di taqal waiyosib bosib niġi uñinġwab. Niġi kolilei bole bole oqnsib bel naġi enjroqnaib. Enjrqab di naġi kolilei di mandamq di waiyosib nanġo sinġa na soselenqab.”

### *Niġi Qotei pailyqab di a na niġi aqaryainġwas*

<sup>7</sup> Osiqa Yesus a olo marej, “Niġi inġi bei qa Qotei pailyqab di a na enġwas. Niġi inġi bei oqa marsibqa nġamqab di itqab. Niġi siranġme kindokindonġabqa Qotei na siranġ waqtetnġwas. <sup>8</sup> Tamo kalil Qotei pailyeqnub qaji naġi inġi eqnub. Tamo kalil inġi qa nġameqnub qaji naġi iteqnub. Tamo kalil siranġme kindokindoneqnub qaji naġi Qotei na siranġ waqtetnjreqnu.

<sup>9</sup> “Tamo bei aqa anġro a mamyim inġi qa minjimqa a inġi yqas. A meniġ yqasai. <sup>10</sup> A na qe qa minjimqa a qe yqas. A amal yqasai. <sup>11</sup> Deqa niġi quiy. Niġi tamo bolesai. Ariya

ninigi nunngo angro nanngi ingi bole bole enjreqnub. Ninigi nanngi saidnjrosaeqnu. Nunngo kumbra dena ninigi endegsi poingem, nunngo Abu lan qureq di unu qaji a dego ninigi saidnjgosaieqnu. Ninigi pailyqab di a na ingi bole bole ninigi engoqnqas. A na ninigi saidnjgwasai bole sai.

12 “Kumbra bole bole tamo nanngi na ninigi enjwajqa arearetnjeqnu qaji di ninigi na olo nanngi enjroqniy. Ninigi degyqab di ninigi Moses aqa dal anjam ti Qotei aqa medabu o qaji tamo nanngo anjam ti kalil keretosib dauryqab.”

### *Ninigi siranme kiñala miligiq giliy*

13 Osiqa Yesus a olo marej, “Ninigi siranme kiñala miligiq giliy. Ninigi siranme kobaquja miligiq gilqab di ninigi padalo sawaq aiqab. Gam di kobaquja. Tamo gargekoba nanngi gam di dauryeqnub. 14 Ninigi siranme kiñala miligiq gilqab di ninigi gam kiñala dauryosib nambile gaigai sqajqa sawaq di brantqab. Tamo quja quja segi gam di itosib dauryeqnub.”

### *Ninigi gisanj anjam maro tamo nanngi qa nam atoqniy*

15 Osiqa Yesus a olo marej, “Ninigi geregere nam atoqniy. Tamo qudei na bosib gisanosib merngwab, ‘Iga Qotei aqa medabu o qaji tamo bole.’ Di sai. Tamo nanngi di kaja bul lawo na boqnsib ninigi walawalaingoqnsib anjam merngeqnu. Ariya nanngo are miligiq di nanngi tamo uge. Nanngi baun juwan kaja nanngi ñumeqnu dego bul. 16 Ninigi nanngo kumbra di geregere tenemosib poinqwas, nanngi Qotei aqa medabu o qaji tamo bolesai. Ninigi are qaliy. Tamo nanngi sil luwit marinq dena wain gei osib uyeqnu e? Sai. Man luwit marinq dena qura gei osib uyeqnu e? Sai. 17 Ninigi qalie, nam bole nanngi gei bole ateqnu. Nam uge nanngi gei uge ateqnu. 18 Nam bole nanngi gei uge atosaeqnu. Nam uge nanngi gei bole atosaeqnu. 19 Nam kalil gei bole atosaeqnu qaji di tamo nanngi na qomelenoqnsib namyuwoq di breinjreqnu. 20 Dego kere ninigi gisanj tamo nanngo kumbra geregere tenemosib poinqwas, nanngi Qotei aqa medabu o qaji tamo bolesai.

21 “Ninigi endegsib are qalaib. Tamo ungasari nanngi ‘O Tamo Koba, O Tamo Koba’ e degsib metbqab di Qotei na nanngi taqatnjrsim nanngo Mandor Koba sqas. Di sai. Tamo ungasari ijo Abu aqa areqalo dauryeqnu qaji nanngi segi Qotei na taqatnjrsim nanngo Mandor Koba sqas. Qotei agi lan qureq di unu. 22 Mondonj diño bati bamqa tamo ungasari gargekoba nanngi ijo ulatamuq di tigelosib endegsib merbqab, ‘O Tamo Koba, iga ino ñam na anjam mare mare laqnem. Iga ino ñam na mondor uge uge winjroqnsimqa manjwa gargekoba yoqnem.’ Nanngi e degsib merbqab. 23 Merbibqa e kamba

minjrqai, 'Ningi tal qabe? E ningi qaliesai. Deqa ningi jaraiyyi. Ningi kumbra uge yo qaji tamo.' ”

*Yesus a tal gereiyo kumbra qa yawo anjam marej*

<sup>24</sup> Osiqa Yesus a olo marej, “Tamo a ijo anjam kalil endi qusim dauryqas di a tamo bei meniñ quraq di aqa tal atej a bul sqas. <sup>25</sup> Bunuqna awa jagwa ti bosimqa ya meli dosim tal di qamsim putqasai. Singila na tigelesqas. Di kiyaaqa? A meniñ quraq di tal atej deqa. <sup>26</sup> Ariya tamo a ijo anjam kalil endi qusim olo dauryqa uratqas di a nanari tamo bei laña sub gogeq di aqa tal atej qaji a bul sqas. <sup>27</sup> Tal atnaq sonaqa awa jagwa ti bosiqqa ya meli dosiqa tal di qamsiq reñginñtosiq putonaq aisiq tulañ niñaqej. Od, tal di a torei padalej.”

<sup>28</sup> Yesus a anjam kalil di marsiq koboonaqa tamo ungasari tulañ gargekoba nañgi queb. Qusib nañgi prugugeteb. <sup>29</sup> Di kiyaaqa? Yesus aqa anjam maroqnej di singila ti. Dal anjam qalie tamo nañgo anjam maroqneb de ti keresai. Yesus a segi anjam di aqa abu.

## 8

*Yesus a tamo yu na aqa jejamu ugeelenej qaji di boletej*

<sup>1</sup> Yesus a manaq dena aiyeqnaqa tamo ungasari tulañ gargekoba nañgi a dauryosib aiyeq. <sup>2</sup> Onaqa tamo bei yu na aqa jejamu ugeelenej qaji a Yesus aqa areq bosiqqa aqa singaq di singa pulutosiqa minnej, “O Tamo Koba, ni e boletbqa are soqniñqa e boletbe.” <sup>3</sup> Degsi minjnaqa Yesus a bañ waiyosiq tamo di ojsiqa minnej, “E ni boletmqa are unu. Deqa ino jejamu olo boleeme.” Onaqa bati qujai deqa aqa yu kalil mosoosiq aqa jejamu boleej. <sup>4</sup> Onaqa Yesus na olo minnej, “Ni que. Ino jejamu boleqo deqa ni tamo qudei nañgi minjraim. Ni gilsim ino jejamu atra tamo osoryosim atraiyqajqa inñgi inñgi Moses a nami marej qaji di osim Qotei atraiyime. Yimqa tamo ungasari nañgi ni numsiq marqab, ‘Bole, ino jejamu boleqo.’ ”

*Yesus na qaja tamo gate aqa kañgal tamo boletej*

<sup>5</sup> Onaqa Yesus a walweloosiñ Kaperneam qureq di brantej. Dia qaja tamo gate bei soqnej. A Rom tamo. A Yesus aqa areq bosiqqa pailiyosiñ minnej, <sup>6</sup> “O Tamo Koba, ijo kañgal tamo a makobaiyqo. Aqa tanu kalil laiyoosiñ jejamu tulañ jaqatinñyoqqa talq di ñeiejunu.” <sup>7</sup> Onaqa Yesus na minnej, “E gilsiy boletqai.” <sup>8</sup> Degsi minjnaqa qaja tamo gate na olo minnej, “O Tamo Koba, e tamo bolesai deqa ni ijo talq baim. Ni anjam segi marimqa ijo kañgal tamo a boleqas. <sup>9</sup> E dego tamo kokba qudei nañgo sorgomq di unum. Ijo qaja tamo nañgi ijo sorgomq di unub. E bei minjqai, ‘Ni gile.’ Yimqa a gilqas. Bei minjqai, ‘Ni au.’ Yimqa a bñqas. Ijo kañgal tamo bei minjqai,

‘Wau di ye.’ Degsi minjitqa a ijo anjam dauryqas.”<sup>10</sup> Onaqa Yesus a qaja tamo gate aqa anjam di qusiqa tulan prugugetej. Osiqa bulosiq tamo ungasari gargekoba a dauryoqneb qaji nanği minjrej, “E bole mernğwai. Qaja tamo gate endi a e qa aqa areqalo tulan şingilatqo. Israel tamo nami e qa degsi aqa areqalo şingilato qaji bei unosai.

<sup>11</sup> “Deqa e niği endegsi mernğwai. Tamo ungasari gargekoba nanği sawa guta na guma na ti bosib koroosib Abraham, Aisak, Jekop nanği koba na awoosib iği uyoqnqab. Yimqa Qotei lan qureq di unu qaji a nanço Mandor Koba sosim nanği taqatnrqas. <sup>12</sup> Ariya tamo qudei Qotei a nami taqatnrqa osiq metnjrej qaji nanği a qa nanço areqalo şingilatosai deqa a nanço Mandor Koba sosim nanği taqatnrqasai. A na nanği osim qalaq di breinjrimqa nanği sawa ambruq di sqab. Sawa dia nanği akamkobaoqnsib pailoqnsib nanço jaqatin qa qalagei anjam atoqnqas.”

<sup>13</sup> Osiqa Yesus a qaja tamo gate di minjej, “Ni gile. Ni e qa ino areqalo şingilatonum deqa ni gilsim unime. Ino kanğal tamo a boleosiq unu.” Degsi minjnaqa bati qujai deqa aqa kanğal tamo aqa ma koboonaqa a boleej.

#### *Yesus na Pita aqa mimibe boletej*

<sup>14</sup> Onaqa Yesus a Pita aqa tal gogetosiqa Pita aqa mimibe makobaiyonaqa jejamu kanğanyonaq bijalq di neiesonaq unej. <sup>15</sup> Unsiqa aqa ban ojsiqa tigeltonaqa aqa jejamu kanğal di koboonaqa a tigelosiqa iği goiyetej.

#### *Yesus a tamo ungasari gargekoba nanği boletnjroqnej*

<sup>16</sup> Şen aiqa laqnaqa tamo ungasari mondor uge uge na ojeleno qaji nanço was nanği na joqsib Yesus aqa areq osi boqneb. Osi beqnaqqa Yesus a anjam segi minjreqnaqa mondor uge nanği aqa anjam quoqnsib jaraiyoqneb. Tamo ma utru segi segi so qaji nanği dego osi beqnaq Yesus na boletnjroqnej. <sup>17</sup> A kumbra di yoqnej deqa anjam bei Qotei aqa medabu o tamo Aisaia nami marej qaji di aqa damu brantej. A endegsi marej, “Kristus a gago ma utru segi segi kalil yayietgoqnsiq taqal waiyeqnu.”

#### *Tamo qudei nanği Yesus dauryqajqa minjeb*

<sup>18</sup> Bati deqa Yesus a nam atej di tamo ungasari tulan gargekoba nanği aqa areq di koroesonab unjrej. Deqa a na aqa anğro nanği minjrej, “Iga qobun gogetosim jaraiyosim ya agu taqal beiq gilqom.” <sup>19</sup> Degsi minjrşiqqa nanği joqsıq koba na gilqa laqnaqqa dal anjam qalie tamo bei a Yesus aqa areq bosıqa minjej, “O Qalie Tamo, ni sawa sawaq giloqnimqa e ni daurmoqnqai.” <sup>20</sup> Onaqa Yesus na minjej, “Bauñ juwan nanği tal ti. Ağı sub miligiq di nereneqnub. Qebari nanği simi ti.

Deqa nanġi simiq di nereneqnub. Ariya e Tamo Anġro nġeqajqa tal saiqoji. Deqa ni e daurbqajqa gulbe koba.” <sup>21</sup> Onaqa Yesus aqa anġro bei na minnej, “O Tamo Koba, ni e odbimqa e mati aisiy ijo abu qa tariñoqnqai. A moiymqa subq atsiy di e ni daurmqai.” <sup>22</sup> Onaqa Yesus na minnej, “Unġum. Tamo moiyo qaji nanġi segi na tamo moiyo qaji nanġi subq atelenoqnqab. Ariya ni bosim e daurbe.”

*Yesus a jagwa ti ya korkor ti anjam minjrnaq laeb*

<sup>23</sup> Osiqa Yesus a qobun gogetonaqa aqa anġro nanġi a dauryosib koba na qobun gogetosib gileb. <sup>24</sup> Nanġi gileqnabqa Yesus a qobun miligiq di nġisq qambumtej. Onaqa jagwa tulaġ koba tigelosiq ya korkortosiq qobun qaloqnsiq morman miligiq aiyeqnaqa ya maqej. <sup>25</sup> Deqa Yesus aqa anġro nanġi tulaġ ulaugetosib aqa areq bosib dudumyosib minjeb, “O Tamo Koba, ni iga aqaryaige. Iga padalqa laqnum.” <sup>26</sup> Onaqa Yesus a tigelosiq minjrej, “Ninġi e qa nunġo areqalo sinġilatqa yonub tulaġ keresaiingwo. Ninġi kiyafa ulaonub?” Degsi minjrnsiq jagwa ti ya ti nriñtnjrnaqa nanġi laeb. <sup>27</sup> Onaqa Yesus aqa anġro nanġi are koba qalsib segi segi maroqneb, “Yesus a tamo kiyero deqa jagwa ti ya ti minjrjoqa aqa anjam qusib laonub?”

*Yesus a tamo aiyel nanġo jejamuq na mondor uge gargekoba winjrej*

<sup>28</sup> Onaqa Yesus aqa anġro nanġi ti qobun na gilsib ya agu taqal beiq di brantosib Gadara nanġo sawaq di tiryeb. Tiryonabqa tamo aiyel nanġi tamo sub ato sawaq dena brantosib walwelosib Yesus aqa areq beb. Tamo nanġi di mondor uge uge na ojeleno qaji. Nanġi aiyel qaja ani. Deqa tamo kalil nanġi gam dena walwelqa keresai. <sup>29</sup> Nanġi aiyel Yesus aqa areq bosib lelenkobaosib minjeb, “O Qotei aqa Niri, ni iga kiyergwajqa bonum? Iga padalqajqa bati bosaisonaqa ni laġa ambleq di iga jaqatin egwa bonum e?” <sup>30</sup> Bati deqa isaq yala dia bel tulaġ gargekoba nanġi suwaroqneb. <sup>31</sup> Deqa mondor uge nanġi sinġila na pailosib Yesus minjeb, “Ni iga qarinqimqa iga bel nanġo jejamuq gilelenqom.”

<sup>32</sup> Onaqa Yesus na minjrej, “Di kere. Ninġi jaraiyosibqa bel nanġo jejamuq gilelenoij.” Degsi minjrnaqa mondor uge nanġi na tamo aiyel di uratnrsib bel nanġo jejamuq gilelenjeb. Gilnabqa bel kalil nanġi gurgurosib botau dena prugelenosib yaq aisib ya uysib morenejeb.

<sup>33</sup> Onaqa bel taqatoqneb qaji tamo nanġi kumbra di unsi-bqa jaraiyosib qure miligiq aiyeb. Aisib bel qa ti tamo aiyel mondor uge uge na ojeleno qaji nanġi qa ti saqnsib laqneb. <sup>34</sup> Onaqa qure deqaji kalil nanġi qusibqa Yesus unqajqa aqa

areq beb. Bosib Yesus unsib minjeb, “Ni gago sawa endi uratosim sawa beiq gile.”

## 9

*Yesus a tamo bei jejamu laiyej qaji di boletej*

<sup>1</sup> Onaqa Yesus aqa angro nanqi ti olo qobun gogetosibqa ya agu taqal beiq aisib Yesus aqa segi qureq di branteb.

<sup>2</sup> Brantosib sonabqa tamo qudei na tamo bei jejamu laiyej qaji a saperaq di atsib Yesus aqa areq osi beb. Onaqa Yesus a nanqo areqalo unej di nanqo areqalo qujai Yesus na tamo jejamu laiyej qaji di boletqa kere. Degsi unsiq deqa tamo di minjej, “O ijo angro, ni areboleimeme. Ino une kalil e na kobotetmonum.”

<sup>3</sup> Onaqa dal anjam qalie tamo qudei nanqi Yesus aqa anjam di qusibqa nanqo areqalo na mareb, “Yesus a Qotei mis-ilinyqo.”

<sup>4</sup> Nanqi degsib are qaleqnabqa Yesus a nanqo areqalo di qalieosiq minjrej, “Ninqi kiyaaqa areqalo uge di onub?

<sup>5</sup> Anjam kiye e na tamo jejamu laiyo qaji di minjit ninqi qusib e qa poinjwas? ‘Ino une kalil e na kobotetmonum,’ anjam de kiyo, ‘Ni tigelosim walwel,’ anjam de kiyo? <sup>6</sup> Ariya e segi Tamo Angro. E mandamq endi sinjila ti unum deqa e na tamo nanqo une kobotetnrqa kere. Ninqi degsi poinjwajqa deqa e na tamo di boletqai.” Yesus a nanqi degsi minjrsiq tamo jejamu laiyej qaji di koqyosiq minjej, “Ni tigelosim ino sapera osim ino talq gile.” <sup>7</sup> Degsi minjnaqa aqa jejamu boleonaaqa a tigelosiq aqa talq gilej. <sup>8</sup> Onaqa tamo ungasari kalil nanqi Yesus aqa manwa di unsibqa nanqi tulan ulaosib Qotei aqa ñam soqtoqneb. Di kiyaaqa? Qotei na sinjila kobaquja Yesus yej deqa.

*Yesus na Matyu minjej, “Ni e daurbe”*

<sup>9</sup> Onaqa Yesus a dena walwelosiq takis o qaji tamo bei aqa ñam Matyu a takis o talq di awesonaq gilsiq itej. Osiqa minjej, “Ni e daurbe.” Degsi minjnaqa a tigelosiq Yesus dauryej.

<sup>10</sup> Onaqa bati bei Yesus aqa angro nanqi ti Matyu aqa talq gilsib awoosib inji uyoqneb. Nanqi segi sai. Takis o qaji tamo ti une tamo ti tulan gargekoba nanqi dego bosib awoosib Yesus aqa angro nanqi ti inji uyoqneb. <sup>11</sup> Onaqa Farisi qudei nanqi bosib Yesus a takis o qaji tamo ti une tamo ti nanqi koba na inji uyeqnab unjrsibqa Yesus aqa angro nanqi nenemn-jreb, “Nunqo Qalie Tamo a kiyaaqa takis o qaji tamo ti une tamo ti nanqi koba na awoosib inji uyeqneb?”

<sup>12</sup> Onaqa Yesus a Farisi nanqo anjam di qusiq minjrej, “Tamo ma saiqoji nanqi yu qanqra tamo aqaq gilosaieqneb. Tamo ma ti nanqi segi yu qanqra tamo aqaq gileqneb.

<sup>13</sup> Qotei aqa anjam bei nami nenngrenyeb qaji di ningi sisiyosib geregere poinngem. Agi endegsib nenngrenyeb, ‘Ningi e laña atraibeqnub. E nungo kumbra deqa arearetbosaieqnu. Ariya ningi tamo nanngi qa duloqnsib kumbra bole bole enjroqngab di e tulan arearetbqas.’” Osiqa Yesus a olo anjam endegsi minjrej, “Tamo bei a marqas, ‘E tamo bole. E une saiqoji.’ E tamo deqaji nanngi metnjrit ijoq bqajqa deqa mandamq aiyosai. Tamo a marqas, ‘E une ti.’ E tamo deqaji nanngi metnjrit ijoq bqajqa deqa mandamq aiyem.”

*Yesus a qurien qa anjam marej*

<sup>14</sup> Bati bei Jon aqa angro nanngi Yesus aqa areq bosib minjeb, “Iga ti Farisi nanngi ti ingi uratoqnsim qurieneqnum. Kiyaga ino angro nanngi qurienosaieqnub?”

<sup>15</sup> Onaqa Yesus na kamba minjrej, “Tamo bei a unja ban ojqa bati qa aqa was nanngi ti soqribqa nanngi are gulbeinjrqas e? Sai. Bunuqna nanngo was a nanngi uratnjrimqa bati deqa nanngi qurienoqnsib sqab.

<sup>16</sup> “Tamo bei a gara jugo bunuj osim dena mutu gentosim gara jugo sari branjoq di qandimqa keresai. Degsi qandimqas di bunuqna a na gara jugo sari di yansimqa gara mutu bunuj a kiñalaosim gara jugo sari di uratim bran gelikobaqas.

<sup>17</sup> Tamo bei a wain bunuj osim ya nobu sariq di qamqa keresai. Ya nobu sari di nami kangranjosiq singilaej deqa tamo dena wain bunuj qamimqa wain a didiqosim ya nobu sari paratosimqa wain bilenjosim mandamq aiqas. Ya nobu a dego ugeqas. A wain bunuj osim ya nobu bunujq di qamqas di nanngi ombla bole sqab.”

*Unja bei a Yesus aqa gara ojnaq boletosiq olo angro moiyej qaji a tigeltej*

<sup>18</sup> Yesus na Jon aqa angro nanngi yawo anjam degsi minjrsiq koboonaqa Qotei tal taqato tamo bei a walwelosiq Yesus aqa areq bosiq singa pulutosiq minnej, “O Tamo Koba, ijo angro sebin a endego moiqo. Deqa ni bosim ino ban aqa jejamuq di atimqa a olo nambile sqas.” <sup>19</sup> Onaqa Yesus na tamo di odyosiq tigelosiq a dauryosiq gileqnaqa aqa angro nanngi dego nanngi aiyel daurnjrsib gileb.

<sup>20</sup> Nanngi gileqnabqa unja bei ma ti soqnej qaji a Yesus aqa qoreq na dadauryosiq ban waiyosiq Yesus aqa gara mutu ojej. Unja di a nami bai na unej len aiyoqnsiq degsi soqnej wausau 12 uratej. <sup>21</sup> A endegsi are qalej, “E Yesus aqa gara mutu segi ban na ojitqa ijo ma koboqas.” Degsi are qalsiq ban waiyosiq Yesus aqa gara mutu ojej. <sup>22</sup> Ojnaqa Yesus a bulosiq unja di unsiq minnej, “O ijo angro, ni are lawo soqnime. Ni ino areqalo e qa singilatosim ijoq bonum deqa ino

ma agi koboqo.” Onaqa bati qujai deqa aqa len aiyoqnej qaji di koboej.

<sup>23</sup> Yesus a dena walwelosiq Qotei tal taqato tamo aqa talq di brantosiqa nam atej di tamo ungasari nanqi yumba anjamoqn-sib akam murqumyeq nab unjrej. <sup>24</sup> Unjrasiqa minjrej, “Ningi sasaloiy. Angro sebin di a moiyoasai. A lanja nejsiq qambumte-junu.” Degsi minjrnaqa nanqi Yesus kikiyeb. <sup>25</sup> Osib nanqi sasalosib tal uratonabqa Yesus a angro moiyej qaji aqa warum miligiq gilsiq angro aqa ban ojsiq soqtonaqa a olo nambile osiq tigelosiq awoej. <sup>26</sup> Onaqa bunuqna sawa sawa kalilq di tamo ungasari nanqi Yesus aqa manwa deqa saoonsib laqneb.

*Yesus a tamo qudei nanqi boletnjrej*

<sup>27</sup> Onaqa Yesus a qure di uratosiq walwelosiq gileqnaqa tamo aiyel nam qandimnjro qaji nanqi gam na Yesus dauryosib giloqneb. Nanqi giloqnsib lelenoqnsib Yesus minjoqneb, “O Devit aqa Niri, ni iga qa are ugeimeme.” <sup>28</sup> Degsib Yesus minjeq nabqa a tal bei gogetej. Tal gogetosiq sonaqa nanqi aiyel Yesus aqa areq bonabqa minjrej, “E ningi boletngwa kere ningi degsib are qalonub e?” Onaqa nanqi aiyel na minjeb, “Od, Tamo Koba.” <sup>29</sup> Onaqa Yesus na minjrej, “Ningi e qa nungo areqalo singilatosib ijoq bonub deqa e ningi boletngwai.” Osiq aqa ban waiyosiq nanjo namdamu oje. <sup>30</sup> Ojnaqa nanjo namdamu poinjrnaqa nanqi sawa uneb. Onaqa Yesus a singila na minjrej, “Nunjo namdamu boleqo deqa ningi tamo qudei nanqi ubtosib minjraib.” <sup>31</sup> Onaqa nanqi Yesus aqa anjam di dauryosai. Yesus a nanqi aiyel boletnjrej deqa nanqi gilsib mare mare laq nab sawa deqaji tamo ungasari kalil nanqi quekriteb.

<sup>32</sup> Nanqi aiyel gileq nabqa tamo bei mondor uge na ojnaq medabu getenjej qaji a tamo qudei na osib Yesus aqa areq beb. <sup>33</sup> Bonabqa Yesus na mondor uge di wiyetonaqa aqa men otyonaqa medabu waqtosiq anjam maroqnej. Onaqa tamo ungasari kalil nanqi manwa di unsibqa are koba qaloqnsib maroqneb, “Israel sawaq endi tamo bei na kumbra deqaji bei yeqnaq iga nami unosaioqnem.” <sup>34</sup> Onaqa Farisi nanqi maroqneb, “Mondor uge nanjo gate koba Satan a Yesus aqa jejamuq di unu. Singila dena Yesus na mondor uge nanqi winjreqnu.”

*Yesus a tamo ungasari nanqi qa dulej*

<sup>35</sup> Yesus a dena walwelosiq qure kokba ti qure kiñilala ti dia brantosiqa Juda nanjo Qotei tal miligiq giloqnsiq Qotei aqa anjam palantosiqa minjroqnej. Qotei na aqa segi tamo ungasari nanqi taqatnjrsim nanjo Mandor Koba sqas anjam bole di Yesus na palantosiqa Juda nanqi minjroqnej.



Osiqa tamo ma utru segi segi so qaji nanği boletnjroqnej. <sup>36</sup>Tamo unğasari tulan gargekoba nanği Yesus aqa areq beqn-abqa unjroqnsiq a nanği qa duloqnej. Di kiyayaqa? Nanği tulan sougetesoqneb deqa. Nanği kaja bul mandor saiqoji. <sup>37</sup>Deqa Yesus na aqa anğro nanği yawo anjam bei endegsi minjrej, “Wauq di inği gargekoba melionub. Ariya inği meli bunuj otorqajqa wau tamo gargekoba sai. <sup>38</sup>Deqa ninği wau lanja minjibqa a na wau tamo nanği qarınjrimqa nanği aqa wauq gilsib inği meli bunuj otorelenqab.”

## 10

### *Yesus aqa anğro 12 nanğo ñam*

<sup>1</sup> Onaqa Yesus na aqa anğro 12 nanği metnjrnaqa aqa areq beb. Bonabqa a na nanği singila enjrej. Nanği na tamo unğasari nanğo jejamuq dena mondor uge uge winjrqaqqa ti tamo unğasari nanğo ma utru segi segi kalil kobotetnjrqajqa ti deqa marsiq nanği singila enjrej.

<sup>2</sup> Aqa anjam maro tamo 12 singila enjrej qaji nanğo ñam agiende. Bei Saimon. Yesus na aqa ñam bei Pita waiyej. Nanği aqa was Andru wo. Bei Sebedi aqa njiri Jems aqa was Jon wo. <sup>3</sup> Ariya Filip Bartolomyu wo. Bei Tomas nanği takis o qaji tamo Matyu wo. Bei Alfias aqa njiri Jems nanği Tadius wo. <sup>4</sup> Bei Saimon agi Rom nanği winjrqaqqa maroqnej qaji. Ariya bei Judas Iskariot agi bunuqna Yesus osiqa jeu tamo nanğo banq di ateq qaji.

### *Yesus na aqa anğro 12 nanği wau enjrej*

<sup>5</sup> Osiqa Yesus na aqa anğro 12 nanği di qarınjnrqa osiqa minjrej, “Ninği qure qureq giloqniy. Ninği sawa bei bei qaji nanğoq giloqnaib. Samaria nanğo qureq dego giloqnaib. <sup>6</sup>Ninği Israel nanğo segiq giloqniy. Israel nanği sougetejunub. Nanği kaja bul mandor saiqoji. <sup>7</sup>Deqa ninği giloqnsibqa anjam endegsib minjroqniy, ‘Qotei lan qureq di unu qaji a nunğo Mandor Koba sosim ninği taqatnjwajqa bati jojomoqo.’ <sup>8</sup> O ijo anğro, ninği na Israel nanği degsib minjroqnsibqa nanğo ma tamo nanği boletnjroqniy. Tamo moreñoqniqbqa olo tigeltnjroqniy. Tamo nanğojamu yu na ugeelenjo qaji nanği olo gereinjroqniy. Mondor uge uge nanği dego tamo unğasari nanğojamuq dena winjroqniy. E singila enğonum qaji di ninği awaiyosai. E lanja enğonum. Deqa ninği dego tamo nanği lanja gereinjroqniy. Nanği awai bei yainjraib.

<sup>9</sup> “Ninği meniñ silali agi gol ti silva ti kapa ti di osib gilaib. <sup>10</sup> Ninği walwelosib nunğojamuq qaqun aib. Gara jugo aiye aiye aib. Singa tatal aiye aiye aib. Walwelqajqa toqon ojaib. Ninği

Qotei aqa wau tamo unub deqa ninḡi qure qureq giloqnibqa nanḡi na inḡi inḡi deqaji ninḡi enḡoqnqab.

<sup>11</sup> “Ninḡi qure bei beiq di brantoqnsibqa tamo bole bei itoqnsib aqa talq di soqniy. Dia sosib dena tigeloqnsib olo qure beiq giloqniy. <sup>12</sup> Ninḡi tal bei gogetoqnsibqa tamo unḡasari tal miligiq di unub qaji nanḡi endegsib minjroqniy, ‘Ninḡi lawo na soqniy.’ <sup>13</sup> Degsib minjroqnibqa nanḡi ninḡi joqsib gereinḡibqa nunḡo lawo anjam di nanḡoq di uratib soqnem. Ariya nanḡi ninḡi gereinḡosaiabqa nunḡo lawo anjam di olo puluosim nunḡoq bem. <sup>14</sup> Tamo bei a ninḡi gereinḡwa uratimqa kiyo nunḡo anjam quqwa asgiyimqa kiyo ninḡi qure di uratqa oqnsib nunḡo sinḡa tumberum butuyoqniy. <sup>15</sup> E bole merḡwai. Mondonḡ Qotei a tamo unḡasari nanḡo une qa peginḡrqa batiamqa Qotei na qure deqaji nanḡi tulanḡ padaltnḡrougetqas. Sodom qure ti Gomora qure ti nanḡi Qotei na mondonḡ degsim padaltnḡrqaasai. A nanḡi gulbe kiñala enḡrqaas.”

### *Gulbe bei bei brantoqnqab*

<sup>16</sup> Osiqa Yesus a olo marej, “Ninḡi quiy. Ninḡi kaja du du bul unub deqa e na ninḡi qarinḡitqa gilsib bauḡ juwanḡ nanḡo ambleq di wauoqnqab. Deqa ninḡi amal nanḡo kumbra dauryiy. Agi amal nanḡi gaigai ḡam atoqnsib laqnuḡ. Ninḡi binonḡ nanḡo kumbra dego dauryiy. Agi binonḡ nanḡi kumbra bole segi yeqnuḡ. Nanḡi kumbra uge yosaieqnuḡ. <sup>17</sup> Deqa ninḡi tamo nanḡi qa geregere ḡam atoqniy. Nanḡi bosib ninḡi ojelenḡosib anjam pegiyo talq di ninḡi tigeltḡgoqnqab. Osib nanḡo Qotei tal miligiq di ninḡi kumbainḡoqnqab. <sup>18</sup> Osib ninḡi olo joqoqnsib Rom nanḡo gate ti nanḡo mandor ti nanḡo ulatamuq di ninḡi tigeltḡgoqnqab. Yimqa ninḡi ijo anjam bole palontoqnsib nanḡi minjroqnqab. Osib sawa bei bei qaji nanḡi dego ijo anjam minjroqnqab. <sup>19</sup> Nanḡi na ninḡi ojoqnsib anjam pegiyo talq di tigeltḡgoqnibqa ninḡi ulaaib. Osib endegsib are qalaib, ‘Iga na kamba anjam kiyersim minḡrqaom?’ Ninḡi degaib. Bati deqa Qotei na powo enḡimqa ninḡi kamba anjam minḡrqaab. <sup>20</sup> Ninḡi segi na anjam minḡrqaasai. Nunḡo Abu aqa Mondor na nunḡo medabu sinḡilatetḡnim ninḡi anjam marqab.

<sup>21</sup> “Bati deqa kumbra uge endeqaji brantelenḡqas. Tamo qudei na nanḡo segi was nanḡi ojoqnsib jeu tamo nanḡo banḡ di atoqnibqa nanḡi na nanḡi ñumoqnib moreḡoqnqab. Tamo qudei na nanḡo segi anḡro nanḡi dego degsib ojoqnqab. Anḡro qudei na nanḡo segi ai abu nanḡi ojoqnsib jeu tamo nanḡo banḡ di atoqnibqa nanḡi na nanḡi ñumoqnib moreḡoqnqab. <sup>22</sup> Ninḡi ijo ñam ejunub deqa tamo unḡasari kalil nanḡi ninḡi qa tulanḡ ugeoqnsib jeutḡgoqnqab. Ariya ninḡi ijo ñam sinḡila na

ojsib gilsib diño bati itqab di Qotei na ninigi elenqas. <sup>23</sup> Ninigi qure bei beiq di brantogqibqa tamo unqasari nanqi na ninigi ugeugeingogqibqa ninigi nanqo qure di uratoqnsib olo qure beiq giloqniy. E bole mernqwai. Ninigi Israel nanqo qure kalil keretosaisogqibqa e Tamo Angro olo bqai.

<sup>24</sup> “Skul angro na aqa qalie tamo a bunyqa keresai. Kanqal tamo na aqa tamo koba a bunyqa keresai. <sup>25</sup> Skul angro a kobaqujaosimqa di aqa qalie tamo ombla kerekereqab. Kanqal tamo a powo koba osimqa di aqa tamo koba ombla kerekereqab. E tal aqa abu bul. Jeu tamo nanqi na e merbequb, ‘Ni Satan.’ Degsib ñam merbequb. Ninigi ijo talq di unub deqa jeu tamo nanqi na ninigi dego ñam tulan ugedamu mernqogqab.”

### *Ninigi Qotei segi ulaiyiy*

<sup>26</sup> Osiqa Yesus a olo marej, “Ninigi jeu tamo nanqi di ulainjraib. Kumbra kalil kabuejunu qaji di boleq dqas. Anjam kalil uliejunu qaji di tamo nanqi qusib poinjqas. <sup>27</sup> Deqa anjam e ambruq di mernqeqnum qaji di ninigi olo suwanqoq di maroqniy. Anjam ninigi lumu na quequb qaji di ninigi olo bijal gogeq di tigelosib palontogqniy. <sup>28</sup> Ninigi jeu tamo nanqi ulainjraib. Nanqi nunqo qunun moyotqa keresai. Nanqi nunqo jejamu segi moyotqa kere. Deqa ninigi nanqi ulainjraib. Qotei a segi ulaiyiy. A na qujai tamo nanqo qunun ti jejamu ti turtnjrsim nqamyuwoq di breinjrqqa kere.

<sup>29</sup> “Ninigi qalie. Tamo nanqi qebari sinjir silali kobaquja na awaiyosaiequb. Silali kiñala na awaiyequb. 10 toea dego. Ariya nunqo Abu a na qebari sinjir nanqi geregere taqatnjreqnu. A na marimqa bei a ulonqosim mandamq aiqa keresai. <sup>30</sup> Dego kere Qotei a nunqo gate banqa segi segi sisiyoqnsiq geregere taqateqnu. <sup>31</sup> Deqa ninigi ulaaib. Ninigi qebari kalil nanqi tulan bunjrejunub.”

### *Ninigi Yesus aqa ñam marqajqa ulaaib*

<sup>32</sup> Osiqa Yesus a olo marej, “Ninigi mandam tamo nanqo ulatamuq di ijo ñam boleq atsib marqab di mondon e kamba ijo Abu lan qureq di unu qaji aqa ulatamuq di nunqo ñam boleq atsiy marqai. <sup>33</sup> Ariya ninigi mandam tamo nanqo ulatamuq di ijo ñam marqajqa asgingwas di mondon e kamba ijo Abu lan qureq di unu qaji aqa ulatamuq di nunqo ñam marqajqa asgibqas.”

### *Iga Yesus tulan qalaqalaiyoqngom*

<sup>34</sup> Osiqa Yesus a olo marej, “Ninigi kiyersib are qalonub? E na qaja kobotitqa tamo unqasari nanqi geregere lawo na sqajqa e deqa bem kiyo? Sai. E na qaja kobotqajqa bosai. E na tamo unqasari nanqi pupoinjritqa nanqi jeu jeu sqajqa deqa

bem. <sup>35</sup> Od, e jeu kumbra tigeltqa bem. Deqa angro mel nanği na nanço segi abu nanği jeutnjroqnqab. Angro sebiñ nanği na nanço segi ai nanği jeutnjroqnqab. Aiñ yala nanği na nanço segi aiñ qeli nanği jeutnjroqnqab. <sup>36</sup> Tamo ungasari tal qujaiq di unub qaji nanği jeu jeu sqab.

<sup>37</sup> “Deqa ningi quiy. Tamo bei na aqa ai abu nanği tulan qalaqalainjrsimqa ariya di bunyosim e tulan qalaqalaibqasai di a e ombla wauqa keresai. Tamo bei na aqa angro mel nanği ti aqa angro sebiñ nanği ti tulan qalaqalainjrsimqa ariya di bunyosim e tulan qalaqalaibqasai di a e ombla wauqa keresai. <sup>38</sup> Tamo bei na aqa segi ñamburbas qoboiyosim e daurbqasai di a e ombla wauqa keresai. <sup>39</sup> Tamo bei a aqa segi ñambile taqatqajqa arearetqas di a padalqas. Ariya tamo bei a e qa are qalsimqa aqa segi ñambile uratqas di a olo ñambile bole oqas.”

*Tamo bei na Yesus aqa angro gereiyqas di Qotei na a awai bole yqas*

<sup>40</sup> Osiqa Yesus a olo marej, “Tamo bei na ningi osim geregereiñgwas di a na e dego osim geregereibqas. Tamo a e oqas di a na ijo Abu e qarınbej qaji di dego oqas. <sup>41</sup> Tamo bei a endegsi are qalqas, ‘Tamo di a Qotei aqa medabu o qaji tamo.’ A degsi are qalsimqa tamo di osim gereiyqas di Qotei na kamba awai bole yqas. Di kiyaaqa? A na Qotei aqa medabu o qaji tamo di gereiyqo deqa. Tamo bei a endegsi are qalqas, ‘Tamo di a Qotei aqa anjam dauryeqnu qaji tamo.’ A degsi are qalsimqa tamo di osim gereiyqas di Qotei na kamba awai bole yqas. Di kiyaaqa? A na Qotei aqa anjam dauryeqnu qaji tamo di gereiyqo deqa. <sup>42</sup> Tamo bei a ijo angro bei unsim endegsi are qalqas, ‘Tamo di a Yesus aqa angro.’ A degsi are qalsimqa ijo angro di osim ya ulili tigsim anaiyyqas di Qotei na kamba awai bole yqas. E bole mernğwai. A ijo segi angro gereiyqo deqa aqa awai bole Qotei na yqas qaji di tamo bei na olo yaiyqa keresai.”

## 11

*Jon yansjro qaji aqa angro qudei nanği anjam bei Yesus nenemyeb*

<sup>1</sup> Yesus na aqa angro 12 nanği anjam degsi minjrsiq koboon-aqa a sawa di uratosiqa qure qureq giloqnsiqa tamo ungasari nanği Qotei aqa anjam plaltosiq minjroqnej.

<sup>2</sup> Bati deqa Jon yansjro qaji a tonto talq di soqnej. Sonaqa wau kalil Kristus a yoqnej qaji di tamo qudei nanği unsib deqa mare mare laqnaab Jon a quej. Qusiqa aqa angro qudei nanği qarınjnraq Yesus aqa areq gilsib endegsib nenemyeb, <sup>3</sup> “Kristus agi Qotei na nami qarınym bqajqa marej qaji di ni kiyo? Ni saiamqa iga tamo bei qa tarınqom kiyo?”

<sup>4</sup> Onaqa Yesus na kamba minjrej, “Ningi aisib anjam ningi queqñub qaji deqa ti kumbra ningi uneqñub qaji deqa ti Jon saiyosib minjiy. <sup>5</sup> Endegsib minjiy, ‘Tamo ñam qandimñjro qaji nanği olo ñam poinjreqnaqa sawa uneqñub. Tamo jeku jamu lainjro qaji nanği olo walweleqñub. Tamo nanğojek jamu yu na ugeelenjo qaji nanğojek yu kalil koboeqñu. Tamo dabkala getenñjro qaji nanğojek dabkala olo waqeqñu. Tamo moreño qaji nanği olo tigeleqñub. Tamo sougetejunub qaji nanği Qotei aqa anjam bole queqñub. <sup>6</sup> Tamo nanği e qa nanğojek areqalo singilatoqñsib olo ijo ñam ulontosaieqñub qaji nanği tulan areboleboleinjqñu.’ ”

<sup>7</sup> Onaqa Jon aqa anğrojek nanği Yesus aqa anjam di qusibqa olo puluosib Jon minjqajqa aiyeb. Aiyeqñabqa Yesus na tamo unğasari gargəkoba a ombla soqñeb qaji nanği Jon qa endegsi minjrej, “Ningi tamo kiyero unqajqa wadau sawaq gileb? Ningi tamo silai aqa banğa bul jagwa na pileteqñabqa di unqajqa gileb kiyo? Sai. Jon a tamo deqajqi sai. <sup>8</sup> Deqa ningi tamo kiyero unqajqa wadau sawaq gileb? Ningi tamo gara bole walaosi laqñu qaji di unqajqa gileb kiyo? Di dego sai. Tamo gara bole walaieqñub qaji nanği mandor kokba nanğojek talq di unub. <sup>9</sup> Deqa ningi kiyaqqa wadau sawaq gileb? Ningi Qotei aqa medabu o qaji tamo bei unqajqa gileb kiyo? Od. Agide. Ningi deqa unqa gileb. Deqa e ningi endegsi merñgwai. Jon a Qotei aqa medabu o qaji tamo kobaquja. A na Qotei aqa medabu o qaji tamo kalil nanği tulan bunñjrejunu. <sup>10</sup> Agi nami e mandamq aiyosaisonamqa Qotei a Jon qa endegsi merbej, ‘Ni que. E na ijo anjam maro tamo qarinyitqa a ni qa namoosim ino gam gereiyetmqas.’ Tamo di agi Jon. Anjam di Qotei aqa nenğrenq di unu. <sup>11</sup> Deqa e bole merñgwai. Jon yansñjro qaji a na tamo kalil mandamq endi unub qaji nanği tulan bunñjrejunu. Ariya tamo qudei ñam saiqoji unub qaji nanği Qotei na taqatñjroqñsiqa nanğojek Mandor Koba unu deqa nanği olo Jon tulan bunyejunub.

<sup>12-13</sup> “Nami Moses aqa dal anjam ti Qotei aqa medabu o qaji tamo nanğojek anjam ti maroqñeb dena bosiq bosiq Jon yansñjro qaji aqa bati brantej. Dena bosiq bini tamo unğasari nanği Qotei na taqatñjrsim nanğojek Mandor Koba sqajqa tulan singilaeqñub. Qotei agi lañ qureq di unu. <sup>14</sup> Ningi quiy. Qotei aqa medabu o qaji tamo Elaija a olo bqas. Anjam di nenğrenq di unu. Elaija agi bej. E Jon qa merñgwa osimqa Elaija aqa ñam na yawo anjam merñgeqñum. Ningi ijo anjam di quqwa are soqñimqa quiy. <sup>15</sup> Tamo a dabkala ti sqas di a ijo anjam di geregere quem.

<sup>16</sup> “Tamo unğasari bini bati endeqa unub qaji nanğojek kumbra qa e yawo anjam kiyersiy marqai? E nanğojek kumbra qa

endegsi marqai. Nanġi anġro du du bul qure ambleq di alañoqnsib anġro qudei na qudei minjreqnub, <sup>17</sup> ‘Iga yumba anjamonumqa niġi lou tuosai. Iga are uge qa louonumqa niġi akamosai.’ ” <sup>18</sup> Osiqa Yesus a olo marej, “Jon a bosiq a iġi ti wain ti uratosiq sonaqa tamo nanġi a qa maroqneb, ‘A mondor uge ti unu.’ ” <sup>19</sup> Ariya e Tamo Anġro bosimqa iġi ti wain ti uyeqnamqa tamo nanġi e nuboqnsib mareqnu, ‘Niġi uniy. Yesus a qunjañ ani. A wain uyo ani. A takis o qaji tamo ti une tamo ti nanġi koba na walweleqnu.’ ” Osiqa Yesus a olo marej, “Qotei aqa tamo unġasari nanġi aqa wau kalil unoqnsib dena nanġi bole qalieeqnu, aqa powo tulañ kobaquja.”

*Yesus na tamo unġasari are bulyosai qaji nanġi niriñnjrej*

<sup>20</sup> Qure qudei Yesus a dia mañwa gargekoba yoqnej qaji nanġi are bulyosai deqa a nanġi qa niriñej. <sup>21</sup> Osiqa minjrej, “O Korasin qure ti Betsaida qure ti, niġi tulañ padalougetqab. Di kiyaaqa? Mañwa e nuñgoq di yoqnem qaji di Tair qure ti Saidon qure ti nanġoq di brantej qamu nanġi nami are bulyosib are uge qa gara jigsib ñam sumq di awoeb qamu. <sup>22</sup> Deqa e niġi endegsi mernġwai. Mondonj Qotei a tamo unġasari nanġo une qa peginjrq a batiamqa a na niġi tulañ padaltñgougetqas. Qotei na Tair qure ti Saidon qure ti nanġi degsim padaltñjqasai. A nanġi gulbe kiñala enjrqas. <sup>23</sup> O Kaperneam tamo unġasari, niġi lañ qureq oqwa kere e? Keresai. Qotei na niġi breiñgimqa moiyo qureq aiqab. Di kiyaaqa? Mañwa e nuñgoq di yoqnem qaji di Sodom qure nanġoq di brantej qamu nanġi bini unub qamu. Nanġi padalosa qamu. <sup>24</sup> Deqa e niġi endegsi mernġwai. Mondonj Qotei a tamo unġasari nanġo une qa peginjrq a batiamqa a na niġi tulañ padaltñgougetqas. Qotei na Sodom qure nanġi degsim padaltñjqasai. A nanġi gulbe kiñala enjrqas.”

*Yesus na niġi aqaryaiñgimqa niġi aqaratqab*

<sup>25</sup> Bati deqa Yesus a endegsi Qotei pailyej, “O Abu, ni segi lañ qa ti mandam qa ti Koba. E ino ñam soqteqnum. Di kiyaaqa? Ni ijo anjam kalil powo tamo nanġi qa ulitoqnsimqa tamo nanġi anġro du du bul unub qaji nanġi segi qa babteqnam nanġi poinjreqnu. <sup>26</sup> Od, Abu, ni ino segi areqalo dauryosim agi degyeqnum.” <sup>27</sup> Yesus a degsi Qotei pailyej. Osiqa marej, “Ijo Abu na iġi iġi kalil ijo bañq di ateleñej unu. E segi Qotei aqa Niri. Tamo bei a e qa qaliesai. Ijo Abu a segi e qa qalie. Tamo bei a ijo Abu qa qaliesai dego. E segi ijo Abu qa qalie. E na tamo qudei nanġi ijo Abu osornjrq a areibqas di osornjrqai. Yim nanġi dego ijo Abu qa qalieqab.

28 “Ninggi gulbe qoboioqnsib waukobaeqnum qaji ningi kalil ijoq babqa e na aqaryaingitqa ningi aqaratqab. 29 E ijo segi ñam aguq atoqnsim tamo nanği lawo kumbra enjre-qnum. Deqa ningi e qa geregere qalieosib ijo anjam dauryoqniy. Yim ningi aqaratqab. 30 Ningi ijo anjam dauryqajqa di gulbe sai. Di oto. Wau e na ningi engeqnum qaji di dego gulbe sai. Di oto.”

## 12

### *Yesus a segi yori bati aqa Tamo Koba*

1 Yori bati bei Yesus aqa anğro nanği ti wau ambleq na giloqnsibqa aqa anğro nanği mamjnraqa bem sum gei elenjoqnsib uye uye giloqneb. 2 Nanği deqsib gileq nabqa Farisi qudei nanği bosib nanği unjrsib Yesus minjeb, “Ni une. Ino anğro nanği gago dal anjam groteqnum. Yori bati qa kumbra degyo di getento koba.” 3 Onaqa Yesus na kamba Farisi nanği minjrej, “Nami Devit aqa wau tamo nanği ti mamjnraqa kumbra yeb qaji di ningi buk miligiq di sisiosai kiyo? 4 Devit a atra tal miligiq gilsiqqa Qotei atraiyqajqa bem osiqqa aqa wau tamo nanği koba na uyeb. Bem di getento. Di atra tamo nanço segi uyqajqa bem. Devit a degyej di a dal anjam grotej. Ariya a Qotei aqa ñamgalaq di une saiqoji. 5 Dal anjam bei dego nenğrenq di unu. Anjam agiende. Atra tamo nanği yori bati gaigai atra tal miligiq di waueqnum. Nanço kumbra dena nanği dal anjam groteqnum. Ariya nanği Qotei aqa ñamgalaq di une saiqoji. Ningi anjam di nami buk miligiq di sisiosai kiyo? 6 Ariya e ningi endegsi mernğwai. Bini tamo bei atra tal tulañ bunyejunu qaji a nunço ambleq di unu. 7 Qotei aqa anjam bei dego nami endegsib nenğrenyeb unu, ‘Ninggi e laña atraibeqnum. E nunço kumbra deqa arearetbosaieqnu. Ningi tamo nanği qa duloqnsib kumbra bole bole enjroqnaq di e tulañ arearetbqas.’ O Farisi, ningi Qotei aqa anjam di sisiosib poinço qamu ningi tamo une saiqoji nanği gulbe enjrosai qamu. 8 E Tamo Anğro. Deqa e segi na yori bati taqatejunum. E segi yori bati aqa Tamo Koba.”

### *Yori bati qa Yesus a tamo bañ qandamyey qaji di boletej*

9 Onaqa Yesus a dena walweloşiqa qure beiq di brantosiqa Juda nanço Qotei tal miligiq gilej. 10 Qotei tal miligiq di tamo bei bañ qandamyey qaji a soqnej. Deqa tamo qudei nanği Yesus aqa jejamuq di anjam laña qametqa marsibqa endegsib nenemyeb, “Iga yori bati qa tamo boletqom di kere kiyo? Dal anjam a kiyersi março?” 11 Onaqa Yesus na kamba minjrej, “Tamo bei aqa kaja a yori bati qa ulonşim subq aiyimqa a uratqasai. A na aqaryaişim olo subq dena osim goge atqas. Di ningi qalie. 12 Ariya tamo nanği kaja sai. Nanği tamo

qunun ti. Deqa iga yori bati qa tamo aqaryaiyim a bole sqas di kumbra bole.”<sup>13</sup> Yesus a nanngi degsi minjrsiqa tamo ban qandamyey qaji di minnej, “Ni ino ban waiy.” Degsi minjnaqa aqa ban waiyonaq boleej. Aqa ban bei ombla na kerekereeb.<sup>14</sup> Onaqa Farisi nanngi Qotei talq dena oqedosib nanngi gam kiyersib Yesus qalib moiqajqa deqa qairoqneb.

*Yesus a segi qujai Qotei aqa wau tamo bole*

<sup>15</sup> Farisi nanngi Yesus qalqajqa qairoqneb di qalieosiqa qure di uratosiq walwelosiq gilej. A gileqnaqa tamo ungasari gargekoba nanngi a dauryeqnab a nanngo ma tamo kalil nanngi boletnjroqnej.<sup>16</sup> Osiqa a na nanngi saidnjroqnej, “Ninngi ijo ñam ubtosib maraib.”<sup>17</sup> Yesus a kumbra di yey deqa anjam bei Qotei aqa medabu o tamo Aisaia nami marej qaji di aqa damu brantej. A anjam endegsi marej,<sup>18</sup> “Endi ijo wau tamo e segi na giltem qaji. E a tulan qalaqalaiyeqnum. E a qa areboleboleibeqnu. E ijo Mondor aqaq di atitqa a na sawa bei bei qaji nanngi endegsim minjroqnqas, ‘Ninngi kumbra bole dauryiy.’<sup>19</sup> A njirin anjam maroqnqasai. A lelenkobaoqnqasai. Gamq di tamo ungasari nanngi aqa kakro quoqnqasai.<sup>20</sup> Silai aqa banqa genqa laqnimqa a na torei gentqasai. Wanjal aqa pulon kiñalaamqa a na torei mosotqasai. A degsim lawo na wauoqnsim gilsim gilsim kumbra bole torei singilatqas.<sup>21</sup> Yimqa sawa bei bei qaji nanngi a qa nanngo areqalo singilatosisib a na nanngi aqaryainjrqaqqa deqa tariñoqnsib sqab.”

*Tamo qudei nanngi maroqneb, “Yesus a Belsebul aqa singila na waueqnu”*

<sup>22</sup> Onaqa bati di tamo bei mondor uge na medabu getentosiq ñam qandimyej qaji a soqnej. Sonaqa tamo qudei na a osib Yesus aqa areq beb. Bonabqa Yesus na mondor uge di wiyetonaqa aqa men otyonaqa aqa ñamdamu boleosiqa a sawa unsiqa anjam bole maroqnej.<sup>23</sup> Onaqa tamo ungasari kalil nanngi Yesus aqa manwa di unsibqa tulan prugugetosisib maroqneb, “Tamo di a Devit aqa Niri kiyo?”<sup>24</sup> Onaqa Farisi nanngi nanngo anjam di qusibqa maroqneb, “Sai. Mondor uge nanngo gate koba Belsebul a Yesus aqa jejamuq di unu. Singila dena a na mondor uge nanngi winjreqnu.”

<sup>25</sup> Onaqa Yesus a nanngo areqalo di qalieosiqa yawo anjam bei endegsi minjrej, “Tamo nanngi sawa qujaiq di unub qaji nanngi segi poaiyelosib qotqab di nanngi koba na geregere sqa keresai. Nanngi niñaqosib koboqab. Tamo nanngi qure qujai kiyo tal qujai kiyo di unub qaji nanngi segi poaiyelosib qotqab di nanngi dego koba na geregere sqa keresai.<sup>26</sup> Dego kere Satan na aqa segi mondor uge nanngi winjrqaq di nanngi poaiyelqab. Deqa Satan a kiyersim aqa mondor uge nanngi



olo taqatnjrqas? Di keresai. <sup>27</sup> Ningi mareqñub, ‘Yesus a Belsebul aqa siñgila na mondor uge nanñi winjreñnu.’ Di sai. E Belsebul aqa siñgila na mondor uge nanñi winjrqai di yai aqa siñgila na nuñgo anñro nanñi mondor uge winjrqab? Deqa nanñi segi na mernñwab, ninñi anjam groteqñub. <sup>28</sup> Ariya e Qotei aqa Mondor aqa siñgila na mondor uge nanñi winjrqai di ninñi endegsi poinñwas, ‘Bole, Qotei a gago Mandor Koba sosim iga taqatgwajqa bati brantqo.’ Ninñi degsi poinñwas.

<sup>29</sup> “Tamo bei a kiyersim tamo siñgila koba bei aqa tal gogetosim aqa inñi inñi kalil bajinñqas? E marñai. A mati tamo di sil na tontim soqñimqa di aqa inñi inñi kalil bajinñqas. Tontqasai di aqa inñi inñi bajinñqa keresai.

<sup>30</sup> “Tamo bei na e beterbqasai di a na e jeutbqas. Tamo bei a e ombla wauqasai di a na ijo wau ugetetbqas.

<sup>31</sup> “Deqa e ninñi endegsi mernñwai. Tamo unñgasari nanñgo une kalil Qotei na kobotetnjrqas. Nanñgo misilinñ anjam mareqñub qaji une di dego Qotei na kobotetnjrqas. Ariya nanñi Qotei aqa Mondor misilinñyqab une di Qotei na kobotetnjrqasai. <sup>32</sup> E Tamo Anñro. Tamo a e misilinñbqas une di Qotei na kobotqas. Ariya tamo a Mondor Bole misilinñyqas une di Qotei na kobotqasai. Bini bati endeqa Qotei na kobotqasai. Mondonñ dego Qotei na kobotqasai.”

### *Nam uge nanñi gei uge ateqñub*

<sup>33</sup> Osiqa Yesus a olo marej, “Nam bole nanñi gei bole ateqñub. Nam uge nanñi gei uge ateqñub. Deqa tamo nanñi nam aqa gei unsibqa dena poinñrqas, ‘Nam di bole. Nam di uge.’

<sup>34</sup> Ninñi amal uge bul. Ninñi tamo uge. Deqa ninñi kiyersib anjam bole maroqñqab? Tamo nanñgo areqalo kalil nanñgo are miligiq na oqoqñsiq medabuq na branteqñnu. <sup>35</sup> Tamo bole nanñgo are miligi di areqalo bole na maqejunu. Deqa nanñi kumbra bole yeqñub. Ariya tamo uge nanñgo are miligi di areqalo uge na maqejunu. Deqa nanñi kumbra uge yeqñub.

<sup>36</sup> “Deqa e ninñi endegsi mernñwai. Mondonñ Qotei a tamo unñgasari nanñi peginñrqa batiamqa nanñgo anjam kalil nanñi laña laña mareqñub qaji di Qotei na nanñgo jejamuq di qametnjrqas. <sup>37</sup> Ino anjam boleamqa Qotei na mermqas, ‘Ni tamo bole.’ Ino anjam ugeamqa Qotei na mermqas, ‘Ni tamo uge.’”

### *Tamo qudei nanñi Yesus aqa mañwa unqajqa minñeb*

<sup>38</sup> Onaqa dal anjam qalie tamo qudei ti Farisi qudei ti nanñi na kamba Yesus minñeb, “O Qalie Tamo, ni Qotei aqa mañwa bei babtım iga unqom.”

<sup>39</sup> Onaqa Yesus na kamba minñrej, “Tamo unñgasari bini bati endeqa unub qaji nanñgo kumbra tulanñ ugedamu. Nanñi Qotei

areiyosaieqñub. Nanġi gaigai ijo mañwa laña unqajqa met-beqñub. Deqa e na ijo mañwa bei nanġi osornjrqasai. Qotei aqa medabu o tamo Jona aqa mañwa segi osornjritqa nanġi unqab. <sup>40</sup> Agi Jona a bati qalub qolo qalub qe ani aqa miligiq di soqnej. Dego kere e Tamo Angro bati qalub qolo qalub sub miligiq di sqai. <sup>41</sup> Mondorj Qotei na tamo unġasari nanġi peginjrqqa batiamqa Ninive tamo nanġi tigelqab. Tigelosibqa tamo unġasari bini bati endeqa unub qaji nanġo kumbra uge babtetnjrqab. Nanġi degyqab. Di kiyaaqa? Ninive tamo nanġi nami Jona aqa anjam qusib are bulyeb deqa. Ariya bini tamo bei Jona tulañ bunyejunu qaji a nuñgo ambleq di unu. <sup>42</sup> Mondorj Qotei na tamo unġasari nanġi peginjrqqa batiamqa unja mandor nami guta di sawa taqatoqnej qaji a dego tigelqas. Tigelosimqa tamo unġasari bini bati endeqa unub qaji nanġo kumbra uge babtetnjrqas. A degyqas. Di kiyaaqa? Unja di a nami Solomon aqa powo kobaquja unqa marsiqa sawa isaq na walwelosi bej deqa. Ariya bini tamo bei Solomon tulañ bunyejunu qaji a nuñgo ambleq di unu.”

*Mondor uge a tamo aqa jejamu uratosim olo bqas*

<sup>43</sup> Osiqa Yesus a olo marej, “Mondor uge a tamo bei aqa jejamuq dena ulañosim sawa kanġrañoq gilqas. Gilsim dia laqnsimqa aqaratqajqa sawa ñamam ugeiyim marqas, <sup>44-45</sup> ‘E olo puluosiy ijo tal uratem qaji deq olo aiqai.’ A degsi marsimqa aisim tal di laña unu degsim unqas. Tal di nami mañ solsis inġi inġi kalil gereiyeb milalejunu di unsimqa olo puluosim gilsim mondor uge 7 tulañ ugedamu nanġi joqsim bosim koba na tal dia sqab. Soqñibqa tamo di aqa so tulañ ugeqas. Aqa so uge namij degwasai. Aqa so olo tulañ ugedamuqas. Dego kere tamo unġasari bini bati endeqa kumbra uge uge yeqñub qaji nanġi degsib sougetesqab.”

*Yesus a marej, “Ijo ai ijo was nanġi tal qabe?”*

<sup>46</sup> Yesus na tamo unġasari gargekoba nanġi anjam degsi minjreqnaqa aqa was nanġi aqa ai koba na Yesus qa bosib talq di iteb. Yesus a warum miligiq di sonaqa nanġi na anjam bei minjqajqa deqa oqeq di tigelesoqñeb. <sup>47</sup> Onaqa tamo bei na Yesus minjej, “Ni que. Ino was nanġi ino ai ombla na ni anjam bei mermqa bonub agi oqeq di tigelejunub.” <sup>48</sup> Onaqa Yesus na kamba minjej, “Ijo ai ijo was nanġi tal qabe?” <sup>49</sup> Degsi minjsiqa aqa ban na aqa segi angro nanġi osoryosiqa minjej, “Ni une. Ijo ai ijo was nanġi agide. <sup>50</sup> Tamo a ijo Abu lañ qureq di unu qaji aqa areqalo dauryoqñqas di a ijo was bole. A ijo jaja. A ijo ai.”

# 13

## *Yesus a saga yago qa yawo anjam marej*

<sup>1</sup> Bati deqa Yesus a tal uratosiqa alile aisiq ya agu qalaq di awoej. <sup>2</sup> Onaqa tamo ungasari tulan gargekoba nanqi bosib aqa areq di koroonabqa a sasalosiqa qobun gogetosiq di awoej. Awesonaga tamo ungasari kalil nanqi alile di tigelesoqneb. <sup>3</sup> Tigelesonabqa a na yawo anjam gargekoba nanqi minjroqnej. Yawo anjam bei endegsi minjrej, “Ningi quiy. Tamo bei a gilsiq aqa ingi wauq di saga yago breiyelenej. <sup>4</sup> Breiyonaqa saga yago qudei gam qalaq aiyeleneb. Ainabqa qebari nanqi bosib uyekriteb. <sup>5</sup> Saga yago qudei mandam lanjaq di aiyeleneb. Mandam di guma menin ti. Gogeq di mandam kiñala. Deqa saga yago aiyelenosib urur oqoqujateb. <sup>6</sup> Nanjo jirim tulan guma aiyosai deqa sen oqsiq kanqonaqa nanqi laosib moreneb. <sup>7</sup> Saga yago qudei sil luwit ambleq di aiyeleneb. Dena oqeb qaji sil luwit na dego dauryosiq oqsiq kabutnjrnaq geitosai. <sup>8</sup> Saga yago qudei mol mandam boledamuq di aiyeb. Di aisib oqoboledamuyosib gei tulan gargekoba ateleneb. Qudei 100. Qudei 60. Qudei 30. <sup>9</sup> Tamo a dabkala ti sqas di a ijo anjam endi geregere quem.”

## *Yesus a kiyaaqa tamo ungasari nanqi yawo anjam minjroqnej?*

<sup>10</sup> Onaqa Yesus aqa angro nanqi aqa yawo anjam di qusibqa nanqi aqa areq bosib nenemyeb, “Ni kiyaaqa tamo ungasari nanqi yawo anjam minjreqnum?” <sup>11</sup> Onaqa Yesus na kamba minjrej, “Qotei lan qureq di unu qaji a na aqa segi tamo ungasari nanqi taqatnjrsim nanjo Mandor Koba sqas. Anjam di aqa utru uliejunu. Di Qotei na babtinqa ijo angro ningi segi utru qalieqab. Ariya a na tamo ungasari lanaj nanqi yawo anjam aqa utru osornjqasai. <sup>12</sup> Tamo a powo ti sqas di Qotei na powo olo yimqa a powo koba oqas. Ariya tamo a powo ti sqasai di powo kiñala aqaq di unu qaji di Qotei na olo yayimqa a lanja sqas. <sup>13</sup> Tamo ungasari nanqi di nam atoqnsib ijo anjam aqa damu unosaieqnum. Nanqi dab atoqnsib ijo anjam aqa utru quosaieqnum. Osib poinjrosaieqnu. Deqa e na nanqi yawo anjam segi minjreqnum. <sup>14</sup> Nanjo kumbra dena anjam bei Qotei aqa medabu o tamo Aisaia nami marej qaji di aqa damu branteqnu. A endegsi marej, ‘Ningi dab atoqnqab di ijo anjam aqa utru poinjwasai. Ningi nam atoqnqab di ijo anjam aqa damu dego poinjwasai. <sup>15</sup> Tamo ungasari di nanjo are miligi getenjrejunu. Nanjo dabkala na ijo anjam quqwjaja asginjreqnu. Nanqi nam brunejunub. Deqa nanjo namdamu na ijo kumbra unqasai. Nanjo dabkala na ijo anjam qusib utru poinjqasai. Nanqi are bulyosib ijoq bqasai dego. Deqa e na nanqi boletnjrqasai.’ Qotei a nami degsi marej.

16 “O ijo angro, ningi nungo njamdamu na ijo kumbra uneqnu. Nungo dabkala na ijo anjam queqnu. Deqa ningi tulan areboleboleingem. 17 E bole merngwai. Nami Qotei aqa medabu o tamo nanngi ti tamo bole bole nanngi ti gargekoba kumbra ningi bini uneqnu qaji di unqajqa are koba soqnej. Ariya nanngi unosaiogneb. Anjam ningi bini queqnu qaji di dego nanngi quqwajqa are koba soqnej. Ariya nanngi quosaiogneb.”

*Saga yago qa yawo anjam aqa utru Yesus na babtej*

18 Osiqa Yesus a olo marej, “Saga yago qa yawo anjam e maronum di aqa utru e na babbatqa ningi quiy. 19 Saga yago qudei gam qalaq ainabqa qebari nanngi bosib uyekriteb di aqa utru endegsi unu. Qotei lan qureq di unu qaji a na aqa segi tamo ungasari nanngi taqatnjrsim nanngo Mandor Koba sqas. Anjam di tamo qudei nanngi qusibqa ariya nanngi geregere poinjrosai. Deqa Satan a bosim anjam di olo yainjqas. Qotei na nanngo are miligiq di anjam di atej ariya Satan a bosim olo yainjqas. 20 Saga yago qudei mandam lanjaq di aiyeb qaji di aqa utru endegsi unu. Tamo qudei nanngi Qotei aqa anjam qusib tulan areboleboleinjrimqa anjam di oqujatosib nanngo areq atqab. 21 Ariya anjam di nanngo are miligiq tulan guma aiyosai. Deqa sokiñala Qotei aqa anjam gotranjo qaji tamo qudei na bosib nanngi gulbe enjrsib ugeugeinjraqab. Yimqa nanngo areqalo Yesus qa singilateqnu qaji di nanngi olo ulontqab. 22 Saga yago qudei sil luwit ambleq di aiyeb qaji di aqa utru endegsi unu. Tamo qudei nanngi Qotei aqa anjam qusibqa ariya bunuqna nanngi olo mandam qa ingi ingi qa are koba qaloqnsib ñoro koba oqajqa are prugnjqroqnas. Yimqa kumbra dena nanngi gisanjrsim Qotei aqa anjam nanngo are miligiq di tentim loumqas. Saga yago uge nanngi gei bole atosaiqnu dego kere. 23 Saga yago qudei mol mandam boledamuq di aiyeb qaji di aqa utru endegsi unu. Tamo qudei nanngi Qotei aqa anjam qusib geregere poinjrimqa nanngo are miligiq di singilatqab. Deqa Qotei aqa anjam di nanngo are miligiq di saga bul tulan kobaqas. Qudei 100. Qudei 60. Qudei 30.”

*Pilagin yago breiyqajqa yawo anjam*

24 Osiqa Yesus a olo yawo anjam bei tamo ungasari nanngi endegsi minjrej, “Qotei lan qureq di unu qaji a na aqa segi tamo ungasari nanngi taqatnjrsim nanngo Mandor Koba sqas. Kumbra di tamo bei a gilsiqqa aqa ingi wauq di bem sum yagelenej dego kere. 25 Bem sum yagelenaqqa qolo tamo ungasari nanngi nerenesonabqa jeu tamo bei a bosiqqa bem sum yago ambleq di pilagin yago dego breiyej. Breiyosiq ulanej. 26 Ariya bunuqna bem sum oqsib geitelenonabqa pilagin na

dego dauryosiq oqej. <sup>27</sup> Deqa kanjal tamo nanji na bosib unsibqa wau lanja minjeb, ‘O Tamo Koba, ni bem sum segi yagem. Deqa kiyaga bem sum oqsib geitonubqa pilagin dego dauryosib oqonub?’

<sup>28</sup> “Onaqa wau lanja na kamba minjrej, ‘Jeu tamo bei a bosiq pilagin yago breiyej.’ Degsi minjrnaqa nanji na kamba minjeb, ‘O Tamo Koba, ni marimqa iga pilagin di otorelenqom.’ <sup>29</sup> Onaqa minjrej, ‘Ningi pilagin otoraib. Ningi otorqab di bem sum ti turtosib otoro uge. <sup>30</sup> Deqa ningi uratib soqneb. Bem sum ti pilagin ti koba na oqsib geitelenabqa e na ijo wau tamo qudei nanji endegsi minjrqi, “Ningi pilagin otorosib ruwoelenosib namyuwoq di koitij. Koitosib bem sum olo osib ijo talq di atelenij.” ’ ”

### *Sis yago qa yawo anjam*

<sup>31</sup> Osiga Yesus a olo yawo anjam bei endegsi minjrej, “Qotei lan qureq di unu qaji a na aqa segi tamo ungasari nanji taqatnrsim nanjo Mandor Koba sqas. Kumbra di tamo bei na sis yago osiq aqa wauq di yagej dego kere. <sup>32</sup> Sis yago nanji tulan kiñilala kas yago bul. Ingi ingi qudei nanjo yago kokba yala. Sis yago nanji tulan kiñilala. Ariya sis yago di tamo bei na osim aqa wauq di yagimqa bunuqna a oqsim tulan kobaqujaqas. Osim nam qudei bunjrnsim dani kokba atelenqas. Amqa qebari nanji bosib aqa daniq di simi atelenqab.”

### *Bem tiyeqnu qaji sum aqa yawo anjam*

<sup>33</sup> Osiga Yesus a olo yawo anjam bei endegsi minjrej, “Qotei lan qureq di unu qaji a na aqa segi tamo ungasari nanji taqatnrsim nanjo Mandor Koba sqas. Kumbra di bem tiyeqnu qaji sum bul. Unja bei a bem tiyeqnu qaji sum kiñala osiga bem sum lanaj ti turtosiq web kobaqujaq di bulyonaqa bem kalil tiyekritej.”

### *Yesus a yawo anjam gargekoba maroqnej*

<sup>34</sup> Yesus a na tamo ungasari nanji yawo anjam gargekoba deqaji minjroqnej. A anjam bei minjrosaiognej. Yawo anjam segi minjroqnej. <sup>35</sup> A kumbra di yej deqa anjam bei Qotei aqa medabu o tamo bei nami marej qaji di aqa damu brantej. A endegsi marej, “E yawo anjam tamo ungasari nanji minjroqnqai. Tulan nami yawo anjam di aqa utru uliesoqnej. Sosiqaq agi bini uliejunu. Deqa e na ubtosiy maroqnqai.”

### *Pilagin yago breiyqajqa yawo anjam aqa utru*

<sup>36</sup> Osiga Yesus na tamo ungasari nanji uratnrsiqa tal gogetosiq di sonaqa aqa angro nanji aqa areq bosib minjeb, “O

Tamo Koba, ni na pilagin qa yawo anjam di aqa utru geregere plaltosim merge.”

<sup>37</sup> Onaqa Yesus na minjrej, “Tamo bem sum yagej qaji di agi e segi. E Tamo Angro. <sup>38</sup> Bem sum aqa wau di mandam endi. Bem sum yago di tamo ungasari Qotei na taqatnjreqnu qaji nanji. Pilagin yago di Satan aqa segi tamo ungasari nanji. <sup>39</sup> Jeu tamo pilagin yago breiyej qaji di Satan. Bem sum geiteleno bati di diño bati. Wau tamo bem sum otoreleneb qaji di lan angro nanji. <sup>40</sup> Deqa ningi quiy. Wau tamo nanji bosib pilagin otorosib namyuwoq di koiteleneb dego kere lan angro nanji diño bati qa kumbra degyqab. <sup>41</sup> Bati deqa e Tamo Angro na ijo lan angro nanji qarinjritqa aisib ingi uge uge kalil tamo nanji uneq breinjreqnub qaji nanji ti tamo kalil kumbra uge uge yeqnub qaji nanji ti pilagin bul breinjrib namyuwo kobaq aiqab. Deqa Qotei a nanjo Mandor Koba sqasai. Osim nanji taqatnjrqasai dego. <sup>42</sup> Nanji namyuwo kobaq aisib dia akamkobaoqnsib pailoqnsib nanjo jaqatin qa qalagei anjam atoqnqas. <sup>43</sup> Bati deqa tamo ungasari kumbra bole bole yeqnub qaji nanjo Abu Qotei na nanji taqatnjrsim nanjo Mandor Koba sqas. Deqa nanji sen bul tulan suwanesqab. Tamo a dabkala ti sqas di a ijo anjam endi geregere quem.”

### *Silali ulitqajqa yawo anjam*

<sup>44</sup> Osiqa Yesus a olo marej, “Qotei lan qureq di unu qaji a na aqa segi tamo ungasari nanji taqatnjrsim nanjo Mandor Koba sqas. Kumbra di tamo qudei na silali kobaquja osib nam monqum miligiq di ateb dego kere. Atsib nañu agu beiq di sub bogsib sub miligiq di nam monqum uliteb. Onaqa tamo bei na bosiq nam monqum di itosiq tulan areboleboleiyej. Deqa a nam monqum di olo subq di mororyosiq gilsiq aqa ingi ingi kalil qarinyosiq dena silali osiq nañu agu di awaiyej.”

### *Kolilei qa yawo anjam*

<sup>45</sup> Osiqa Yesus a olo marej, “Qotei lan qureq di unu qaji a na aqa segi tamo ungasari nanji taqatnjrsim nanjo Mandor Koba sqas. Kumbra di ingi ingi qarinyo tamo bei a kolilei qa namoqnej dego kere. <sup>46</sup> A gilsiq kolilei tulan boledamu bei itosiq olo puluosi bosiq aqa ingi ingi kalil qarinyosiq dena silali osiq kolilei di awaiyej.”

### *Kakan waiyqa yawo anjam*

<sup>47</sup> Osiqa Yesus a olo marej, “Qotei lan qureq di unu qaji a na aqa segi tamo ungasari nanji taqatnjrsim nanjo Mandor Koba sqas. Kumbra di tamo nanji yuwalq di kakan waiyosib qe gargekoba utru segi segi eleneb dego kere. <sup>48</sup> Kakan maqonaqa tamo nanji na titosib bosib ululq di goge atsib awoosib qe

bole bole gumbaꝓ di jigelenꝓeb. Osib ꝓe uge uge uratosib ꝓalaꝓ di breinjreb. <sup>49-50</sup> Kumbra deꝓaji diꝓo bati ꝓa brantꝓas. Lan anꝓro naꝓgi bosib tamo bole bole naꝓgi elenꝓqab. Osib tamo uge uge naꝓgi breinjribꝓa ꝓamyuwoꝓ aiꝓqab. ꝓamyuwo koba dia naꝓgi akamkobaoꝓnsib ꝓailoꝓnsib naꝓgo jaꝓatin ꝓa ꝓalagei anꝓam atoꝓnꝓas.”

<sup>51</sup> Osiꝓa Yesus na aꝓa anꝓro naꝓgi endegsi nenemꝓjrej, “Yawo anꝓam kalil mernꝓonum ꝓaji endi niꝓgi utru ꝓoinꝓwo e?” Onaꝓa naꝓgi na minꝓeb, “Od.” <sup>52</sup> Onaꝓa Yesus na olo minꝓrej, “Qotei lan ꝓureꝓ di unu ꝓaji a na aꝓa segi tamo unꝓasari naꝓgi taꝓatnꝓrsim naꝓgo Mandor Koba sꝓas. Anꝓam di dal anꝓam ꝓalie tamo ꝓudei naꝓgi ꝓoinꝓreqnu. Poinꝓreqnu ꝓaji naꝓgi tal aꝓa abu bul sꝓqab. Deꝓa naꝓgi naꝓgo talꝓ dena ñoro bunuj ti ñoro namij ti elenꝓoꝓnsib oꝓeꝓ atoꝓnꝓab.”

### *Yesus aꝓa ꝓure utru naꝓgi aꝓa anꝓam ꝓetosai*

<sup>53</sup> Yesus a yawo anꝓam di kalil marsiꝓ koboonaꝓa a sawa di uratej. <sup>54</sup> Osiꝓa aꝓa segi ꝓure utruꝓ gilsiꝓ di sonaꝓa yori batiej. Deꝓa a Juda naꝓgo Qotei tal miligiq gilsiꝓa tamo unꝓasari gargekoba sonab tigelosiꝓa Qotei aꝓa anꝓam ꝓalontosiꝓ minꝓroꝓnej. Minꝓreqnaꝓa tamo unꝓasari naꝓgi aꝓa anꝓam ꝓusibꝓa tulan ꝓruguetosib maroꝓneꝓ, “Yesus a ꝓowo ꝓabe na osiꝓa anꝓam siꝓgila deꝓaji ꝓalontosiꝓ mergeꝓnu? A kiyersiꝓ maꝓwa deꝓaji babtelenꝓeꝓnu? <sup>55</sup> Aꝓa abu a lanꝓa tal gereiyo ꝓaji tamo. A Maria aꝓa ꝓiri. A Jems na Josep na Sai-mon na Judas na naꝓgo was. <sup>56</sup> Aꝓa jaja kalil naꝓgi agi iga koba na endi unum. Deꝓa a kiyersiꝓ maꝓwa deꝓaji babtelenꝓeꝓnu?” <sup>57</sup> Naꝓgi degsib yomu anꝓam marsib Yesus ꝓa ugeeb. Onaꝓa a na minꝓrej, “Qotei aꝓa medabu o ꝓaji tamo bei aꝓa segi ꝓure utruꝓ gilsim anꝓam minꝓroꝓnꝓas di naꝓgi aꝓa anꝓam ꝓetꝓa asginꝓrꝓas. Deꝓa a ñam saiꝓoji sꝓas. Aꝓa segi talꝓ di dego a ñam saiꝓoji sꝓas. Ariya a ꝓure bei beiꝓ giloꝓnsim anꝓam minꝓroꝓnꝓas di naꝓgi aꝓa anꝓam ꝓetotoꝓnsib aꝓa ñam soꝓtoꝓnꝓab.” <sup>58</sup> Yesus na tamo unꝓasari naꝓgi degsi minꝓrej. Aꝓa segi ꝓure utruꝓ di a maꝓwa gargekoba yosai. Di kiyaaꝓa? Naꝓgi a ꝓa naꝓgo areꝓalo siꝓgilatosai deꝓa.

## 14

### *Herot a are ꝓalej, “Yesus a Jon yansꝓro ꝓaji”*

<sup>1</sup> Bati deꝓa tamo unꝓasari naꝓgi Yesus ꝓa saosib laꝓnabꝓa Mandor Herot a ꝓuej. <sup>2</sup> Qusiꝓa aꝓa wau tamo naꝓgi minꝓrej, “Tamo di a Jon yansꝓro ꝓaji. A moisiꝓ olo subꝓ na tigelꝓo. A deꝓa siꝓgila osiꝓa maꝓwa babtelenꝓeꝓnu.”

<sup>3-4</sup> Herot a nami aꝓa was Filip aꝓa ꝓaun Herodias yayiosiꝓ ej. Deꝓa Jon na Herot minꝓoꝓnej, “Ni ino segi was aꝓa unꝓa em di kumbra bolesai. Ni kumbra ugeteꝓnum.” Jon na Herot

degsi minjoqnej. Deqa Herot a Jon qa minjin oqetonaqa aqa qaja tamo qudei qarijnjrnaqa gilsib Jon ojsib sil na qosisib tonto talq di waiyeb. <sup>5</sup> Jon a tonto talq di sonaqa Herot a endegsi are qaloqnej, “E Jon qalit moiqas.” Ariya tamo ungasari kalil nanqi maroqneb, “Jon a Qotei aqa medabu o qaji tamo bole.” Nanqi degsib maroqneb deqa Herot a nanqi ulainjrnsiq Jon qalqa uratej.

<sup>6</sup> Ariya bati bei Herot a Jon qalim moiqajqa gam endegsi itej. Aqa nambabo bationaqa a na maruro atsiqa tamo qudei nanqi metnjrnaq bosib aqa talq di koroeb. Koroosib inji uyeqnaqqa Herot aqa nauj aqa angro sebin a warum miligiq bosiqqa nanqi lou tuetnjroqnej. Onaqa Herot a di unsiqa tulan areboleboleiyej. <sup>7</sup> Deqa a na angro sebin di minnej, “Ni ijo inji kiye oqajqa merbqam e ni emqai.” Osiqa aqa anjam di olo singilatosiq minnej, “Ijo anjam di e bole dauryqai. E uratqasai bole sai.” <sup>8</sup> Onaqa angro sebin aqa ai na minnej, “Ni Jon aqa gate qa Herot minje.” Onaqa angro sebin na Herot minnej, “Ni Jon yansnjro qaji aqa gate tabirq di atsim ebe.”

<sup>9</sup> Onaqa Herot a Jon qalim moiqajqa are sosai deqa a are tulan gulbekobaiyej. Ariya aqa segi anjam tamo kalil nanjo ulatamuq di marsiq singilatej qaji deqa are qalsiqqa angro sebin di minnej, “Di kere.” <sup>10</sup> Osiqa aqa qaja tamo bei qarinyonaq gilsiqqa tonto talq di Jon aqa kakro gentetej. <sup>11</sup> Osiqa aqa gate tabirq di atsiqa osi bosiq angro sebin di yonaqa a na osi gilsiqqa aqa ai yej. <sup>12</sup> Onaqa bunuqna Jon aqa angro nanqi deqa qusibqa bosib Jon aqa qusa osi gilsib subq ateb. Osib Yesus aqa areq gilsib minjeb, “Herot na Jon qalnaq moiyej.”

### *Yesus a tamo 5,000 nanqi inji anainjrej*

<sup>13</sup> Onaqa Yesus a anjam di qusiqqa a sawa di uratosiq qobun bei gogetosiq wadau sawaq gilej. Aqa angro nanqi ti gileb. A gileqnaqa tamo ungasari kalil nanqi deqa qusibqa nanjo segi segi qureq na tigelosib singa na gurgurosib Yesus namqajqa gileb. <sup>14</sup> Onaqa Yesus a qobun na gilsiq tiryosiqqa nam atej di tamo ungasari tulan gargekoba nanqi nami tiryqa sawaq di tarinesonab unjrej. Unjrnsiqqa a nanqi qa are ugeiyej. Deqa a nanjo areq aisiqa nanjo ma tamo kalil boletnjroqnej.

<sup>15</sup> Onaqa sen aisiq bilaqtonaqa Yesus aqa angro nanqi aqa areq bosib minjeb, “O Tamo Koba, endi wadau sawa. Sen aiqo. Qoloqas. Deqa ni na tamo ungasari nanqi minjrimqa qure qureq gilsib di inji awaiyosib uyqab.” <sup>16</sup> Onaqa Yesus na minjrej, “Nanqi kiyaaqa qure qureq gilqab? Ninji segi na inji anainjriy.” <sup>17</sup> Degsi minjrnaqa nanqi na kamba minjeb, “Iga inji sai. Iga bem 5 qe aiyela segi unu.” <sup>18</sup> Onaqa Yesus na minjrej, “Bem ti qe ti di ijoq osib boiy.”



19 Onaqa nanği bem ti qe ti di osi bosib Yesus yonabqa a na tamo unğasari kalil nanği minjrej, “Ninği kalil ñinğ di awoelenjoiy.” Onaqa nanği kalil awoonabqa Yesus na bem 5 ti qe aiyel ti di osiqa lan goge tarosiq Qotei pailyej. Pailyo koboonaqa bem ti qe ti ginğenyosiq aqa anğro nanği enjrnaqa nanği na osi giloqnsibqa tamo unğasari nanği jeisib enjre-qnab uyoqneb. 20 Uynab kalil menetnjrej. Onaqa inği oto uratelenğeb qaji di Yesus aqa anğro nanği na koroiyosib gumba kokba 12 di jignab mağelenğej. 21 Tamo kalil bem ti qe ti uyeb qaji nanği sisiyeb 5,000. Ariya unğasari ti anğro du du ti nanği sisiyosai.

*Yesus a ya banğaq na walwelej*

22 Onaqa Yesus na aqa anğro nanği endegsi minjrej, “Ninği qobun gogetosib namoosib gilsib ya agu taqal beiq di tiryosib soqniy. E na tamo unğasari nanği minjritqa nanço qure qureq jaraiyoqñib e bqai.” 23 Onaqa Yesus aqa anğro nanği namoosib qobun na gileqñabqa Yesus na tamo unğasari nanği minjrnaq jaraiyeqñabqa a segi Qotei pailyqa marsiq manaq oqej. Oqsıq a segi mana goge di sonaqa bilaqtej. 24 Onaqa aqa anğro nanği qobun na gileqñabqa ya agu ambleq di jagwa koba tigelosiq ya korkortosiq nanği pulutnjrej. 25 Nobqolo ambru Yesus a aqa anğro nançoq bosiq ya banğaq na walwelosiq nanği daurnjrsiq gilej. 26 Onaqa nanği ñam ateb di Yesus a ya banğaq na walwelosiq nanço areq beqnaqa unsib mareb, “Di buga beqnu.” Osib nanği tulan ulağetosib lelenkobaeb. 27 Onaqa Yesus na minjrej, “Nunço are sinğilatıy. Endi e beqnum. Ulaaib.”

28 Onaqa Pita na minnej, “O Tamo Koba, ni kiyo beqnum? Ni degam e odbimqa e kamba ya banğaq na walwelosiy ino areq bqai.” 29 Onaqa Yesus na Pita minnej, “Od, endi e. Ni au.” Degsi minjnaqa Pita a qobun uratosiq ya banğaq na walwelosı gilsiq Yesus jojomyej. 30 Yesus jojomyosiq ñam atsiq jagwa unsiq ulaej. Ulaosiq tuqoqnsiq maosiq Yesus minnej, “O Tamo Koba, e tuqeqnum. Deqa ni e aqaryaibe.”

31 Onaqa Yesus na aqa ban waiyosiq Pita ojsiq soqtej. Soqtosiq minnej, “Kiyaqa ni areqalo aiyeltonum? Ni e qa ino areqalo sinğilatqa yonum keresaiimço.” 32 Degsi minjsiq nanği aiyel qobun gogetonabqa jagwa laej. 33 Onaqa tamo qobunğ di soqneb qaji nanği Yesus aqa mañwa di unsibqa nanği aqa ñam soqtosib minjeb, “Bole, ni Qotei aqa Niri.”

*Tamo unğasari nanği Yesus aqa gara mutu ojeqñab nanço ma kobooqnej*

34 Yesus aqa anğro nanği koba na qobun na gilsib ya agu taqal beiq di brantosib Genesaret sawaq di tiryeb.

35 Tiryonabqa qure deqaji nanği na Yesus unsibqa aqa ulatamu poinjrej. Poinjrnaqa anjam qarinyonab qure qure kalil jojom di soqneb nanği quoqnsib nanžo ma tamo nanği joqoqnsib Yesus aqa areq osi belenjoqneb. <sup>36</sup> Belenjoqnsib Yesus endegsib minjoqneb, “Nanği ino gara mutu segi ojibqa nanžo ma kobooqnas.” Onaqa Yesus na odnjrnaqa tamo ungasari kalil ma ti soqneb qaji nanği aqa gara mutu ojoqneb. Ojoqneb qaji kalil nanžo ma kobooqnej.

## 15

*Yesus a Qotei aqa dal anjam ti moma nanžo kumbra qa ti marej*

<sup>1</sup> Onaqa bati deqa Farisi nanği ti dal anjam qalie tamo qudei ti nanği Jerusalem dena bosibqa Yesus aqa areq di koroeb. Koroosib minjeb, <sup>2</sup> “Ino anžo nanği kiyaaqa gago moma nanžo kumbra gotranjeqneb? Agi nanği inği uyqa oqnsib mati ban yansosaisosib laņa uyeqneb.”

<sup>3</sup> Onaqa Yesus na kamba minjrej, “Ninği kiyaaqa Qotei aqa dal anjam gotranjoqnsibqa olo nunžo segi moma nanžo kumbra dauryeqneb?” <sup>4</sup> Qotei a nami marej, ‘Ni ino ai abu nanžo sorgomq di geregere sosimqa nanžo anjam dauryoqne. Tamo bei na aqa ai abu nanği misilinjrimqa a qalib moyem.’ Qotei a nami degsi marej. <sup>5</sup> Ariya ninği mareqneb, ‘Tamo bei aqa ai kiyo aqa abu kiyo inği qa truquamqa a na minjqas, ‘Ijo inği inği ejunum endi e ni emqa kere. Eo. E ni emqasai. E nami Qotei atraiyqa giltem deqa e ni aqaryaimqasai.’ ’ <sup>6</sup> A degsi minjqas di ninği marqab, ‘A keretqo. A na aqa ai abu nanği aqaryainjraiq.’ Ninği degsib marqab. Nunžo kumbra dena ninği Qotei aqa anjam gotranjoqnsibqa olo nunžo segi moma nanžo kumbra dauryeqneb.

<sup>7</sup> “Ninği gisanj tamo. Ninği anjam maro aiyelteqneb. Qotei aqa medabu o qaji tamo Aisaia a kere ninği qa anjam endegsi marej, <sup>8</sup> “Tamo nanği di nanžo medabu na ijo ñam soqteqneb. Ariya nanžo are miligi e qa sosai. Isaq di unu. <sup>9</sup> Nanği laņa baban na e qa loueqneb. Osib mandam tamo nanžo dal anjam palontoqnsib olo beltoqnsib mareqneb, “Anjam endi Qotei aqa anjam.” ’ ”

*Inği kiye na tamo a jiga yeqnu?*

<sup>10</sup> Yesus a Farisi nanği anjam degsi minjrsiqa olo tamo ungasari kalil nanği metnjrnaqa aqa areq bonabqa minjrej, “Ninği ijo anjam endi geregere qusib poingem. <sup>11</sup> Tamo bei a inği uyimqa aqa miligiq aiqas dena tamo jiga yqasai. Inği uge uge tamo aqa medabuq na branteqnu qaji dena tamo jiga yeqnu.”

<sup>12</sup> Yesus na tamo ungasari nanġi anjam degsi minjrseq ko-boonaqa aqa anġro nanġi aqa areq bosib minjeb, “Farisi nanġi ino anjam di qusib ni qa are ugeinjrġo. Di ni qalie e?”

<sup>13</sup> Onaqa Yesus na minjrej, “Ijo Abu laġ ġureq di unu ġaji a inġi yagobuleqnu. Inġi kalil a yagosai ġaji di a na jirim ġoji otorosim taqal breinjrġas. <sup>14</sup> Deqa ninġi Farisi nanġi uratnġrib soqneb. Nanġi tamo nġam qandimo bul unub deqa nanġi na tamo bei gam osoryqa keresai. Ninġi qalie, tamo nġam qandimo bei na tamo nġam qandimo bei aqa baġ ojsim ombla walwelqab di ombla maġgalsib subq aiqab. Farisi nanġi tamo deqaji bul.”

<sup>15</sup> Onaqa Pita na Yesus minjej, “O Tamo Koba, inġi jiga qa yawo anjam ni maronum di aqa utru geregere plaltosim mergim iga quqwow.” <sup>16</sup> Onaqa Yesus na kamba aqa anġro nanġi endegsi minjrej, “Ninġi dego ijo yawo anjam di aqa utru poingosai e? <sup>17</sup> Tamo nanġi inġi uyeq nabqa aisiq meneq di unu. Meneq dena bi talq di waiyeq nub. Ninġi di poingosai kiyo? <sup>18</sup> Inġi uge uge tamo aqa are miligiq na oqoqnsiq medabuq na branteqnu ġaji dena tamo jiga yeqnu. <sup>19</sup> Inġi uge uge di aġi ubtosiy mernġwai. Areqalo uge uge, tamo qaloqa, uġa qa laoqa, was aqa nġauġ anġamyoqa, bajinjoqa, was aqa jejamu laġa gisaġyoqa, was yomuiyoqa. <sup>20</sup> Kumbra uge uge dena tamo jiga yeqnu. Tamo a baġ yansosaisosim laġa inġi uyqas dena a jiga yqasai.”

*Kenan ġaji uġa a Yesus qa aqa areqalo sinġilatej*

<sup>21</sup> Onaqa Yesus a dena tigelosiq walwelosiq Tair ġure ti Saidon ġure ti nanġo sawaq gilej. <sup>22</sup> Gilsiq di sonaqa Kenan ġaji uġa bei a sawa dena brantosiq Yesus aqa areq bosiq sinġila na pailjosiq minjej, “O Tamo Koba, Devit aqa Njiri, ni e qa are ugeimeme. Mondor uge na ijo anġro sebiġ a tulaġ ugeugeiyoqnsiq jaqatiġ koba yeqnu.” <sup>23</sup> Onaqa Yesus a uġa di aqa anjam qusiq quosaibulosiq anjam bei kamba minjosai. A mequmej. Deqa Yesus aqa anġro nanġi aqa areq bosib minjeb, “O Tamo Koba, uġa di a sinġila na iga pailgoqnsiq daurgeqnu. Deqa ni na saidyimqa a puluosim ulaġqas.”

<sup>24</sup> Onaqa Yesus na minjrej, “Israel nanġi sougetejunub. Nanġi kaja bul mandor saiġoji. Qotei na e qarinqbonaq nanġo segiq bem.” <sup>25</sup> Onaqa uġa di a Yesus aqa areq di sinġa pulutosiq pailjosiq minjej, “O Tamo Koba, ni e aqaryaibe.” <sup>26</sup> Onaqa Yesus na kamba minjej, “Iga anġro du du nanġo inġi yainjr sim olo baun nanġi anainjrġom di kumbra bolesai.” <sup>27</sup> Onaqa uġa dena olo Yesus minjej, “O Tamo Koba, ni kere maronum. Ariya e kamba anjam bei mermit ni que. Anġro du du nanġi inġi uyeq nabqa inġi nġenġi ululoneqnaqa baun nanġi dego uyeq nub.” <sup>28</sup> Onaqa Yesus a anjam di qusiq minjej,

“O unja, ni e qa ino areqalo tulanj singilatonum. Osim agi ni na anjam degsi merbonum. Deqa ni gilime. Ino anjam di e na dauryosiy ino angro boletqai.” Degsi minjnaqa bati qujai deqa mondor uge na aqa angro di uratonaga a boleej.

*Yesus a tamo ungasari gargekoba nanji boletnjroqnej*

<sup>29</sup> Onaqa Yesus a sawa di uratosiqa walweloqnej Galili ya aguq di brantej. Brantosiqa dena manaq oqsiq dia awesoqnej. <sup>30</sup> Awesonaqa tamo ungasari tulanj gargekoba nanji na tamo singa qandamnjro qaji ti tamo nam qandimnjro qaji ti tamo jexamu lainjro qaji ti tamo menj singilainjro qaji ti tamo ma utru segi segi so qaji nanji ti joqsib boqnsib Yesus aqa areq di atoqneb. Ateq nabqa a na nanji kalil boletnjroqnej. <sup>31</sup> Deqa tamo menj singilainjro qaji nanji olo anjam bole maroqneb. Tamo jexamu lainjro qaji nanjo jexamu olo singilaoqnej. Tamo singa qandamnjro qaji nanji olo tigelosib walweloqneb. Tamo nam qandimnjro qaji nanji olo nam poinjreqnaqa sawa unoqneb. Deqa tamo ungasari kalil nanji Yesus aqa manwa di unoqnsib tulanj prugoqnsib Israel nanjo Qotei aqa nam soqtoqneb.

*Yesus a tamo 4,000 nanji inji anainjrej*

<sup>32</sup> Onaqa Yesus na aqa angro nanji olo metnjrnaqa aqa areq bonabqa minjrej, “Tamo ungasari nanji bati qalub e koba na soqneb nanji inji saiqoji. Deqa e nanji qa are ugeibqo. E nanji mam ti suweinjitqa gamq di nanji mam na lao uge.” <sup>33</sup> Degsi minjrnaqa nanji na kamba minjeb, “Sawa endi wadau. Deqa iga inji qabe na osimqa tamo ungasari gargekoba endi anainjronam kereqas?” <sup>34</sup> Onaqa Yesus na minjrej, “Ningi bem gembub unu?” Onaqa minjeb, “Bem 7 unu. Qe kiñilala quja quja dego unu.”

<sup>35</sup> Onaqa Yesus na tamo ungasari nanji minjrej, “Ningi kalil mandamq di awoelenoij.” <sup>36</sup> Degsi minjrnaqa nanji kalil mandamq di awoonabqa Yesus na bem 7 ti qe ti di osiqa Qotei pailyej. Pailyosiqa bem ti qe ti ginjenyosiqa aqa angro nanji enjreqnaqa nanji na osi giloqnsibqa tamo ungasari nanji anainjreqnab uyoqneb. <sup>37</sup> Uynab kalil menetnjrej. Onaqa inji oto uratelenjeb qaji di Yesus aqa angro nanji na koroiyosib gumba kokba 7 di jignab maqelenjeb. <sup>38</sup> Tamo kalil inji uyeb qaji nanji sisiyeb 4,000. Ariya ungasari ti angro du du ti nanji sisiyosai. <sup>39</sup> Onaqa Yesus na tamo ungasari kalil nanji suweinjrnaqa nanjo qure qureq gileq nabqa a qobun gogetosiqa Magadan sawaq gilej.

## 16

*Farisi nanji Qotei aqa manwa bei unqajqa mareb*

<sup>1</sup> Onaqa Farisi ti Sadyusi ti nanği Yesus aqa areq bosibqa a anjam bei grotimqa qusib a ojğajqa deqa gisanjosib minjeb, “Ni endego Qotei aqa mañwa bei babtım iga unqom.” <sup>2</sup> Onaqa Yesus na kamba minjrej, “Bilaqteqnaqa ninği mareqnub, ‘Señ lentqo. Lanbi usriñqo. Deqa sawa boleqas.’ <sup>3</sup> Nebeeçnaqa ninği mareqnub, ‘Lanbi tuluqo. Señ lentqo. Deqa jagwa awa ti bğas.’ Od, ninği lan unoqnsib geregere pegiyeqnub. Ariya Qotei aqa mañwa bini branteqnu qaji di ninği kiyaaq utru poiñgosaieqnu? <sup>4</sup> Tamo unğasari bini bati endeqa unub qaji nanço kumbra tulan ugedamu. Nanği Qotei areiyosaieqnub. Nanği gaigai Qotei aqa mañwa lanja unqajqa metbeqnub. Deqa e na Qotei aqa mañwa bei nanği osornjrğasai. Jona aqa mañwa segi osornjritqa nanği unqab.” Yesus na Farisi ti Sadyusi ti nanği degsi minjrsiqa uratnjrsiq gilej.

### *Bem tiyeqnu qaji sum qa yawo anjam*

<sup>5</sup> Osiqa Yesus na aqa anğro nanği joqsıqa koba na olo qobun gogetosibqa ya agu taqal beiq di branteb. Bati deqa aqa anğro nanği bem oqajqa are walnjrej. <sup>6</sup> Onaqa Yesus a nanği endegsi minjrej, “Ninği geregere ñam atsib soqniy. Bem tiyeqnu qaji sum Farisi nanço bem ti bulyimqa bem dena tiyekritosim tulan kobaqujaqas. Sadyusi nanço bem dego tiyekritosim tulan kobaqujaqas.” <sup>7</sup> Onaqa Yesus aqa anğro nanği aqa yawo anjam di qusibqa segi segi maroqneb, “İga bem osai deqa kiyo mergwo?” <sup>8</sup> Onaqa Yesus a nanço anjam di qalieosiqa minjrej, “Nunço areqalo e qa sinğilatqa yonub tulan keresaiñgwo. Ninği kiyaaq bem osai deqa mareqnub? <sup>9</sup> Ninği e qa poiñgosai unu kiyo? E nami bem 5 giñgenjosimqa tamo 5,000 anainjronam uynab menetnjrnaqa ninği inği oto koroiyosib gumba kokba 12 di jignab maqelenej. Ninği deqa are walñgwo kiyo? <sup>10</sup> E bati bei bem 7 dego giñgenjosimqa tamo 4,000 anainjronam uynab menetnjrnaqa ninği inği oto koroiyosib gumba kokba 7 di jignab maqelenej. Ninği deqa are walñgwo kiyo? <sup>11</sup> O ijo anğro, e ninği bem tiyeqnu qaji sum qa mernğonum di e ninği yawo anjam mernğonum. E ninği bem bole qa mernğosai. Ninği kiyaaq deqa poiñgosai? Ninği quiy. Bem tiyeqnu qaji sum Farisi ti Sadyusi ti nanço bem ti bulyimqa bem dena tiyekritosim tulan kobaqujaqas. Ninği deqa geregere ñam atsib soqniy.”

<sup>12</sup> Yesus na aqa anğro nanği degsi minjrnaqa nanği qusib poinjrej, “Bole, Yesus a bem bole tiyosim kobaqujaqas deqa iga mergosai. Farisi ti Sadyusi ti nanço gisan anjam bem bul tulan kobaqas deqa iga mergwo.”

*Pita a Yesus qa poiyoñaqa aqa ñam ubtej*

<sup>13</sup> Onaqa bati bei Yesus na aqa angro nanği olo joqsıqa koba na walwelosib Sisaria Filipai qure nanço sawaq di branteb. Brantosib Yesus na aqa angro nanği endegsi nenemnjrej, “Tamo unğasari nanği e Tamo Angro e qa kiyersib mareqnub?”

<sup>14</sup> Onaqa nanği na minjeb, “Tamo qudei nanği mareqnub, ni Jon yansnjro qaji. Qudei nanği mareqnub, ni Elaija. Qudei nanği mareqnub, ni Jeremaia kiyo Qotei aqa medabu o tamo nanği nami soqneb deqaji bei kiyo?” <sup>15</sup> Onaqa Yesus a nanği olo nenemnjrej, “Niği segi e qa kiyersib mareqnub?”

<sup>16</sup> Onaqa Saimon Pita na minjej, “Ni Kristus. Ni Qotei nambile gaigai unu qaji aqa Njiri.”

<sup>17</sup> Pita a kamba Yesus degsi minjnaqa a na minjej, “O Saimon, Jona aqa njiri, ni tulan areboleboleimeme. Di kiyaaq? Ino anjam merbonum di mandam tamo bei na babtosiğ mermosai. Ijo Abu lan qureğ di unu qaji a segi na anjam di babtosiğ mermqo. <sup>18</sup> Deqa e ni endegsi mermqai. Ni Pita. Ni meniğ bul. Meniğ qurağ di e na ijo segi tamo unğasari kalil nanği koroinjrçai. Koroinjritqa Moiyo Qure aqa siğgila na nanği ugetnjrçai keresai. <sup>19</sup> O Pita, ni que. Qotei a lan qureğ di Mandor Koba unu deqa e ni siğgila emqai. Emitqa ni mandamğ endi gam getentqam di Qotei a dego lan qureğ di gam getentqas. Ni mandamğ endi gam waqtqam di Qotei a dego lan qureğ di gam waqtqas.” <sup>20</sup> Yesus na Pita degsi minjsıqa olo aqa angro nanği endegsi minjrej, “E Kristus. Niği ijo ñam di ubtosib tamo qudei minjraib.”

*Yesus a marej, “E moisiy olo subq na tigelçai”*

<sup>21</sup> Bati deqa Yesus na aqa angro nanği endegsi minjrej, “E Jerusalem aiyeqnum. Dia Juda gate nanği ti atra tamo kokba ti dal anjam çalie tamo nanği ti e jaqatin koba ebsib lubsib moiyoqbqab. Bati çalub koboamqa e olo subq na tigelçai.” Yesus a anjam di ubtosığ minjrej.

<sup>22</sup> Onaqa Pita a anjam di çusiqa Yesus osıqa çalağ gilsıqa njirıntosiğ minjej, “O Tamo Koba, kumbra di inoğ di degsi brantqa maraim.” <sup>23</sup> Onaqa Yesus a bulosiqa Pita koçyosiqa njirıntosiğ minjej, “Ni Satan bul. Deqa ni ijo çoreğ gile. Ni e uneğ waibaim. Ni Qotei aqa areçalo dauryosai. Ni mandam tamo nanço areçalo dauryonum. Dauryosim ağı ni na anjam di merbonum.”

<sup>24</sup> Osıqa Yesus na aqa angro kalil nanği endegsi minjrej, “Tamo bei na e daurbqa osimqa a aqa segi areçalo kalil uratekritosim aqa segi namburbas çoboiyosim e daurbem. <sup>25</sup> Tamo bei na aqa segi nambile taqatqajqa arearetqas di a padalças. Ariya tamo bei a e qa are çalsimqa aqa segi nambile uratqas di a olo nambile bole oças. <sup>26</sup> Tamo bei a mandam qa ñoro kalil koroiyosim ariya mondoğ aqa segi

qunun padalqas di ñoro dena a kiyersim aqaryaiyqas? Di keresai. Aqa qunun padalqas di a awai kiye atsim dena aqa qunun olo aqaryaiyosim a ñambile sqas? Di keresai. <sup>27</sup> E Tamo Angro. Mondon e ijo Abu aqa rian na ti aqa lan angro nanjo rian na ti bqai. Bosiy tamo ungasari kalil nanjo kumbra qa peginjrsiy awai keretosiy enjrqai. <sup>28</sup> E bole merngwai. Tamo qudei ijo areq endi tigelejunub qaji nanji moreñosaisoqnbqa e Tamo Angro bqai. Bosiy nanji taqatnjrsiy nanjo Mandor Koba soqnit nanji e nubqab.”

## 17

*Yesus aqa jejamu bulyonaq aqa angro qalub nanji unobeiteb*

<sup>1</sup> Osiqqa bati 6 onaqa Yesus a tigelosiqqa Pita na Jems na aqa was Jon na nanji segi qalub joqsiqa koba na mana goge kobaq oqsib di soqneb. <sup>2</sup> Sosibqa Yesus aqa jejamu bulyonaq nanji unobeiteb. Aqa ulatamu sen bul tulan suwanjoqnej. Aqa gara dego tulan pulonjosiq qatekritej. <sup>3-4</sup> Onaqa Moses Elaija wo nanji brantosib Yesus koba na anjam maroqneb. Mareqnabqa Yesus aqa angro nanji na nanji aiyel unjrsibqa Pita a Yesus minjej, “O Tamo Koba, Moses Elaija wo nanji bosib iga koba na endi unum di bolequja. Deqa ni na e odbimqa e tal kiñilala qalub gereiyqai. Bei ino. Bei Moses aqa. Bei Elaija aqa.”

<sup>5</sup> Pita a degsi mareqnaqa lanbi tulan suwanjosiq aisiqa nanji kabutnjrej. Onaqa lanbi miligiq dena anjam bei endegsi brantonaq nanji queb, “Endi ijo Angro qujai e na tulan qalaqalaiyeqnum qaji. E a qa areboleboleibeqnu. Deqa ninji aqa anjam quetoqniy.”

<sup>6</sup> Onaqa Yesus aqa angro nanji anjam di qusibqa tulan ulaugeteb. Osib sinja pulutosib mandamq di ñam quosib ñereñeb. <sup>7</sup> Onaqa Yesus a nanjo areq gilsiqqa nanjo gateq di aqa ban atsiqa minjrej, “Ninji tigeliy. Ninji ulaaib.” <sup>8</sup> Degsi minjrnaqa nanji tigelosib ñam ateb di Yesus a segi nanji koba na sonab uneb. Nanji tamo bei unosai.

<sup>9</sup> Nanji Yesus ombla manaq dena olo aiyoqnsibqa Yesus a singila na minjrej, “Manwa ninji mana goge di unonub qaji di ubtosib tamo qudei minjraib. Bunuqna e Tamo Angro moisiy olo subq na tigelotqa bati deqa ninji na ubtosib minjroqnqab.”

<sup>10</sup> Onaqa nanji Yesus aqa anjam di qusib kamba minjeb, “Dal anjam qalie tamo nanji mareqnu, ‘Elaija a namo bamqa Kristus a bunuqna bqas.’ Anjam di kiyaaqa degsib mareqnu?”

<sup>11</sup> Onaqa Yesus na minjrej, “Nanjo anjam di bole. Elaija a namo bosim tamo ungasari kalil nanjo areqalo gereiyetnjrsim

soqniṃqa bunuqna Kristus a bqaṣ. <sup>12</sup> Ariya e niṅgi endegsi mernṅwai. Elaija agi bej. Bonaqa tamo naṅgi a qa poinjrosai. Deqa gulbe kalil naṅgi a yqajqa are soqnej qaji agi yeb. E Tamo Anṅro dego degsib jaqatiṅ ebqab.” <sup>13</sup> Onaqa naṅgi Yesus aqa anjam di qusib endegsi poinjrej, “Bole, Yesus a Elaija qa bole marosai. A Jon yansnjro qaji qa marqa osiqa Elaija aqa ṅam na yawo anjam marqo.”

*Yesus a anṅro mel aqa jejamuq na mondor uge wiyetej*

<sup>14</sup> Onaqa Yesus na aqa anṅro qalub naṅgi di joqsiqa koba na aisib tamo unṅasari tulaṅ gargekoba mana utruq di tariṅesonab itnjreb. Onaqa tamo bei a bosiqqa Yesus aqa areq di siṅga pulutosiqa minjej, <sup>15</sup> “O Tamo Koba, ni ijo anṅro mel qa are ugeimimqa aqaryaiye. A bati gaigai nanarioqnsiqa dena aqa jejamu tulaṅ ugeeqnu. Bati gargekoba a uloṅoqnsiqa ṅamyuwoq o yaq aiyeqnu. <sup>16</sup> Deqa e a osim ino anṅro naṅgoq osi bonumqa naṅgi na boletqa yonub keresaiinjrqo.”

<sup>17</sup> Onaqa Yesus a anjam di qusiqa endegsi marej, “Niṅgi tamo unṅasari bini bati endeqa unub qaji nuṅgo areqalo e qa siṅgilatosai bole sai. Nuṅgo kumbra tulaṅ uge. Bati gembub e niṅgi koba na sosiyqa nuṅgo gulbe di qoboiyonqai? Anṅro mel di ijo areq osib boiy.” <sup>18</sup> Onaqa osi bonabqa Yesus na mondor uge di ṅiriṅtosiq minjej, “Ni anṅro di uratosim ulaṅ.” Degsi minjnaqa mondor uge na anṅro di uratosiq ulaṅej. Ulaṅonaqa bati qujai deqa anṅro a bolelej.

<sup>19</sup> Onaqa Yesus aqa anṅro naṅgi aqa areq lumu bosib nenemyeb, “Iga kiyaaqa mondor uge di wiyqa yonum keresai-igwo?”

<sup>20</sup> Onaqa Yesus na minjrej, “Utru agiende. Niṅgi e qa nuṅgo areqalo siṅgilatqa yonub niṅgi tulaṅ truquonub. E bole mernṅwai. Nuṅgo areqalo e qa siṅgilato qaji di sis yago bul kiṅala sqas di kereqas. Degesqas di niṅgi mana kobaquja endi minjibqa a nuṅgo anjam dauryosim tigelosim sawa beiq gilqas. Nuṅgo areqalo e qa siṅgilato qaji degesqas di niṅgi kumbra kalil yqa kereṅwas. <sup>21</sup> Deqa niṅgi mondor uge deqaji winjrqa osibqa niṅgi mati iṅgi uratosib quriṅosib Qotei pailyoqniy. Dena qujai niṅgi na mondor uge winjrib jaraiqab.”

*Yesus a marej, “E moisiy olo subq na tigelqai”*

<sup>22</sup> Onaqa Yesus na aqa anṅro naṅgi olo joqsiqa koba na sawa di uratosib Galili sawaq gilsib dia sosibqa Yesus na minjrej, “E Tamo Anṅro. Jeu tamo naṅgi na e ojsib tamo qudei naṅgo baṅq di e atqab. <sup>23</sup> Atib lubib moiqai. Bati qalub koboamqa e olo subq na tigelqai.” Onaqa Yesus aqa anṅro naṅgi anjam di qusib utru poinjrosai. Deqa naṅgi are tulaṅ gulbekobainjrej.



*Yesus a atra tal takis waiyej*

<sup>24</sup> Onaqa bati bei Yesus aqa angro nanği koba na walwelosib Kaperneam qureq gileb. Gilsib di sonabqa atra tal takis o tamo nanği Pita aqa areq bosib nenemyeb, “Nunġo Qalie Tamo a atra tal takis oqnsiq ateqnu e?” <sup>25</sup> Onaqa Pita na minjrej, “Od, a ateqnu.”

Osiqa Pita a tal gogetosiqa takis o tamo nanġo anjam di Yesus minjqa laqnaqa Yesus a nami qalieosiq deqa minjoqujatej, “O Saimon, ni kiyersi are qalonum? Mandam endeqaji mandor nanği yai nanġoq dena takis eqnub? Nanġo segi anġro nanġoq dena eqnub kiyo tamo lanaj nanġoq dena eqnub kiyo?” <sup>26</sup> Onaqa Pita na kamba minjej, “Tamo lanaj nanġoq dena eqnub. Nanġo segi anġro nanġoq dena osaieqnub.” Onaqa Yesus na minjej, “Ni kere maronum. E Qotei aqa Anġro unum deqa e atra tal takis atqa uratqai di kere. <sup>27</sup> Unġum. Iga takis o tamo nanġo are ugetetnrqasai. Deqa ni alile aisim yima waiyosim qe namoqna oqam qaji di aqa medabu waqtosimqa aqa medabu miligiq di silali bei soqnim unqam. Unsim silali di osi gilsim gago aiyel qa takis atqa osimqa takis o tamo nanġi enjre.”

## 18

*Ninġi anġro kiñilala bul soqniye*

<sup>1</sup> Bati deqa Yesus aqa anġro nanği aqa areq bosib minjeb, “O Tamo Koba, Qotei lan qureq di unu qaji a na iga taqatgosim gago Mandor Koba soqnim bati deqa ino anġro yai a iga kalil bunġosim ñam ti sqas?”

<sup>2</sup> Onaqa Yesus na anġro kiñala bei metonaq aqa areq bonaqa nanġo ambleq di tigeltosiqa osornjrej. <sup>3</sup> Osornjrsiqa minjrej, “E bole mernġwai. Ninġi are bulyosib anġro kiñala endeqaji bulqasai di Qotei lan qureq di unu qaji a na ninġi taqatnġwasai. Osim a nunġo Mandor Koba sqasai dego. <sup>4</sup> Tamo bei na aqa segi ñam aguq atsim anġro kiñala endeqaji bulqas di Qotei na tamo di aqa ñam olo soqtetimqa a tamo kalil nanği bunjrsim a ñam ti sqas. Deqa Qotei na a taqatosim aqa Mandor Koba sqas.

<sup>5</sup> “Tamo bei a e qa are qalsimqa anġro kiñala endeqaji bei osim geregereiyqas di a e dego osim geregereibqas.”

*Ninġi une torei uratiy*

<sup>6</sup> Osiqa Yesus a olo marej, “Tamo bei na anġro kiñala endeqaji bei e qa aqa areqalo singilateqnu qaji di osim uneq waiyqas di a kumbra tulan ugedamu yqo. Iga tamo di ojsim meniñ kobaquja osim sil na aqa kakroq di tontosim waiyim ya robuq aisim moiqas di kere.

<sup>7</sup> “Bunuqna tamo qudei nanḡi tamo qudei uneq breinjroqñqab. Bole, kumbra di brantoqñqas. Ariya tamo nanḡi kumbra di yoqñqab qaji nanḡi tulañ padalougetqab. <sup>8</sup> Ino bañ na kiyo ino siñga na kiyo ni titmosim uneq waimq̄a laqñimq̄a di gentosim waiy. Ni degye. Di kiyaqa? Ni bañ geño kiyo siñga geño kiyo sosimq̄a une bei yq̄asai di kere. Di ni ñambile gaigai sq̄am. Ariya ni bañ aiyel ti kiyo siñga aiyel ti kiyo sosimq̄a une yq̄am di keresai. Di Qotei na ni ñamyuwoq waimq̄as. Ñamyuwo di gaigai yuoqñsim sq̄as. <sup>9</sup> Ino ñamdamu na ni titmosim uneq waimq̄a laqñimq̄a ñamdamu di otorosim waiy. Ni degye. Di kiyaqa? Ni ñamdamu qujai ti sosimq̄a une bei yq̄asai di kere. Di ni ñambile gaigai sq̄am. Ariya ni ñamdamu aiyel ti sosimq̄a une yq̄am di keresai. Di Qotei na ni ñamyuwoq waimq̄as.

<sup>10</sup> “Deqa niñgi aṅgro kiñilala endeqaji nanḡi qa ugeaib. E mernḡwai. Nanḡo lañ aṅgro nanḡi na ijo Abu lañ qureq di unu qaji aqa ulatamu gaigai koqyeqñub. <sup>11</sup> E segi Tamo Aṅgro. E na tamo uñgasari padalo gamq̄ di unub qaji nanḡi elen̄eqnum. E deqa mandamq̄ aiyem.

### *Kaja du alelqo qaji aqa yawo anjam*

<sup>12</sup> “Niñgi kiyersib are qalonub? Tamo bei aqa kaja 100 nanḡi manaq di soqñibqa qujai bei alelamq̄a a kiyerq̄as? E mernḡwai. A na kaja 99 nanḡi uratñjrsim qujai alelqo qaji di ñamosim gilsim itq̄as. <sup>13</sup> E bole mernḡwai. A na kaja qujai di itosim tulañ areboleboleiyq̄as. A kaja du du 99 alelosai qaji nanḡi qa tulañ areboleboleiyq̄asai. Qujai alelqo qaji a qa tulañ areboleboleiyq̄as. <sup>14</sup> Deqo kere nuñgo Abu lañ qureq di unu qaji a aṅgro kiñilala endeqaji bei padalqajqa a deqa are sosai.”

### *Niñgi nuñgo was aqa une olo gereiyeti*

<sup>15</sup> Osiqa Yesus a olo marej, “Ino Kristen was bei na ni une bei emimq̄a niñgi segi aiyel ombla awoosib aqa une ni emqo qaji di ubtosim minje. Minjimq̄a a ino anjam qusim are bulyq̄as di ni na ino was olo onum. <sup>16</sup> Ariya a ino anjam quetmosaiamq̄a ni na Kristen tamo qujai kiyo aiyel kiyo joqsimq̄a nanḡi ni taqmosib ino was aqa une di olo ubtosib minjq̄ab. <sup>17</sup> Ariya a nuñgo anjam deqo quetñjrosaiamq̄a ni na Kristen tamo uñgasari kalil nanḡi metñjrim koroosib ni taqmosib ino was aqa une di olo ubtosib minjq̄ab. Ariya a nuñgo anjam deqo quetñjrosaiamq̄a ni na a qoreiye. Ni na une tamo ti takis o qaji tamo ti nanḡi qoreinjreqnum deqo kere ni na ino was di qoreiye.

<sup>18</sup> “E bole mernḡwai. Niñgi mandamq̄ endi gam getentq̄ab di Qotei a deqo lañ qureq di gam getentq̄as. Niñgi mandamq̄ endi gam waqtq̄ab di Qotei a deqo lañ qureq di gam waqtq̄as.

19 “E olo mernḡwai. Mandamḡ endi ijo anḡro aiyel nanḡi inḡi bei oḡa marsibḡa areḡalo qujaitosib ijo Abu lanḡ qureḡ di unu ḡaji a pailyḡab di a na inḡi di enjḡḡas. 20 Tamo aiyel kiyo ḡalub kiyo ijo ḡam ḡa are ḡalsib koroḡab di e nanḡo ambleḡ di sḡai.”

*Gago Kristen was aḡa une kobotḡajḡa yawo anjam*

21 Onaḡa bati deḡa Pita a Yesuḡ aḡa areḡ bosiq nenemyej, “O Tamo Koba, ijo Kristen was bei na e une gembub ebimḡa e aḡa une di moiyoḡḡai? E endegyḡai kiyo? A na une 7 ebimḡa aḡa une di moiyoḡḡai. Ariya a olo une bei ebimḡa e moiyoḡḡasai. Degyḡai kiyo?”

22 Onaḡa Yesuḡ na kamba minnej, “Ino was bei na ni une 7 emimḡa aḡa une di segi moiyoḡḡam di keresai. A na une gargekoba emoḡnsim soḡnim ni aḡa une kalil di deḡo moiyoḡḡone. A ni une 7 emoḡnim une di moiyoḡḡone. Olo une 7 emoḡnim moiyoḡḡone. Degsim giloḡnem.

23 “Niḡi quiy. Qotei lanḡ qureḡ di unu ḡaji a na aḡa segi tamo unḡasari nanḡi taḡatnjḡsim nanḡo Mandor Koba sḡas. Kumbra di mandor bei aḡa kumbra sigitejunu. Mandor dena aḡa kanḡal tamo ḡudei nami silali yayieb ḡaji di kamba olo yḡajḡa minjrej. 24 Aḡa kanḡal tamo bei 10 milion kina yayiej ḡaji di osib aḡa ulatamuḡ di tigelteb. 25 Tigeltonabḡa a na silali di kamba olo yḡajḡa keresaiiej. Deḡa mandor a na minnej, ‘Ni silali di kamba olo e ebḡa keresaiimḡo deḡa e ni ino ḡauḡ wo ino anḡro nanḡi ti osiy tamo bei aḡa banḡ di uratḡḡitḡa tamo dena silali ebimḡa niḡi a lanḡa wauetoḡnḡab. Ino inḡi inḡi kalil deḡo e ni yaimosiy tamo ḡudei nanḡi enjḡitḡa nanḡi na kamba silali ebḡab. Gam dena ni silali nami yaibem ḡaji di kobotḡam.’ 26 Degsi minjnaḡ ḡusiḡa aḡa areḡ di siḡa pulutosiḡa pailyosiḡ minnej, ‘O Tamo Koba, ni e kumbra degbaim. Ni e ḡa dulosim mati e ḡa tariḡoḡnime. E silali nami yaimem ḡaji di kalil itosiy e kamba emekritḡai.’ 27 Onaḡa mandor a kanḡal tamo deḡa dulosiḡa silali kalil nami yayiej ḡaji di lanḡa kobotej. Osiḡa a uratonaḡ gilej.

28 “Gilsḡa kanḡal tamo bei ombla wauo ḡaji a itosiḡa ojsiq kakro apiyetosiq minnej, ‘Ni nami 10 kina yaibem ḡaji di kamba olo ebe.’

29 “Degsi minjnaḡ ḡusiḡa aḡa areḡ di siḡa pulutosiḡa pailyosiḡ minnej, ‘Ni e ḡa dulosim mati e ḡa tariḡoḡnime. E 10 kina nami yaimem ḡaji di itosiy e kamba emekritḡai.’

30 Degsi minjnaḡa a aḡa anjam di ḡuetḡa asḡiyonaḡa a osi gilsḡa tonto talḡ di waiyosiḡ minnej, ‘Ni tonto talḡ endi soḡne. Bunuḡna ni 10 kina nami yaibem ḡaji di kamba ebekritimḡa e ni olo uratmit oḡedḡam.’

31 “A deḡyonaḡa kanḡal tamo ḡudei a koba na wauo ḡaji nanḡi unsibḡa are uḡeinjḡnaḡa aisib nanḡo mandor a deḡa

saiyosib minjeb. <sup>32</sup> Minjnab qusiqa kanjal tamo di metonaq bonaqa minjej, 'Ni kanjal tamo uge. Ni e pailbonumqa silali ni nami yaibem qaji di e na kobotonum. <sup>33</sup> E ni qa dulosim silali di kobotonum. Ariya kiyaga ni olo gilsim kanjal tamo bei ni ombla wauo qaji a qa dulosai? Osim silali a na nami yaimej qaji di ni kobotosai?' <sup>34</sup> Degsi minjsiqa a qa tulan minjin oqetonaqa osiq qaja tamo nanjo banq di atsiqa minjrej, 'Ningi a wau koba yibqa a jaqatin ti wauosim gilsim gilsim silali kalil nami yaibej qaji di kamba ebekritimqa ningi a olo uratib gilqas.'

<sup>35</sup> "O ijo angro, dego kere ningi nunjo are miligiq na nunjo Kristen was nanjo une kobotetnjrqasai di ijo Abu lan qureq di unu qaji a dego nunjo une kobotetngwasai."

## 19

### *Yesus a unja uratqajqa anjam marej*

<sup>1</sup> Yesus a anjam degsi marsiq koboonaqa a Galili sawa uratosiqa Judia sawaq gilsiq Jordan ya taqal beiq di soqnej.

<sup>2</sup> A di sonaqa tamo ungasari tulan gargekoba nanji a dau-ryosib aqa areq di koroonabqa a na nanjo ma tamo kalil nanji boletnjroqnej.

<sup>3</sup> Onaqa Farisi nanji olo Yesus aqa areq bosibqa a anjam bei grotimqa qusib nanji a ojqajqa deqa gisanjosib endegsib nenemyeb, "Tamo bei aqa njanj aqa jejamuq di une kinala bei soqnimqa tamo dena a uratqa kere e? Gago dal anjam a kiyersi marqo?"

<sup>4</sup> Onaqa Yesus na kamba minjrej, "Qotei aqa anjam bei nenjrenq di so qaji di ningi nami sisiyosai kiyo? Anjam endegsi unu, 'Tulan nami Qotei a mandam ti inji inji kalil ti gereiyosiqa bati deqa a tamo unja wo dego gereinjrej.

<sup>5</sup> Gereinjrsiqa marej, "Tamo bei na aqa ai abu nanji urat-njrsimqa aqa njanj wo beterosib jejamu qujaitosib sqab." '

<sup>6</sup> Qotei aqa anjam di agi nenjrenq di unu. Deqa tamo unja wo nanji jejamu qujai sqab. Nanji olo jejamu aiyel sqasai. Qotei na nanji aiyel turtnjrej deqa tamo bei na olo potnjrai."

<sup>7</sup> Onaqa Farisi nanji na kamba Yesus minjeb, "Ni anjam degsi mergonum deqa Moses a kiyaga dal anjam endegsi marej, 'Tamo bei na aqa njanj uratqa osimqa pepa bei nenjrenjosim yosim di a uratqas?'"

<sup>8</sup> Onaqa Yesus na kamba minjrej, "Nunjo are getenjejunu deqa Moses a ningi unja uratqa merngej. Ariya tulan nami kumbra degsi sosai. <sup>9</sup> Ningi quiy. Tamo bei na aqa njanj lanja uratosim olo unja bei oqas di a na aqa njanj kumbra ugeq waiyqo. Di kiyaga? Unja di a nami tamo bei ombla une atosai deqa."

10 Onaqa Yesus aqa angro nanği na minjeb, “Tamo unğa ti unub qaji nanği gulbe deqaji oqab deqa unğum. Nanği unğa aib. Nanği lanğa soqneb.”

11 Onaqa Yesus na kamba minjrej, “Ninği anjam maronub di tamo kalil nanği dauryqa keresai. Tamo nanği Qotei na singila enjreqnu qaji nanği segi anjam di dauryqa kere. 12 Tamo qudei nanğo jejamu bolesai. Nanği degsib ai miligiq na nambabeb. Deqa nanği unğa oqa keresai. Tamo qudei nanği tamo qudei na welum etnjreb deqa nanği anğrotqa keresai. Deqa nanği dego unğa oqa keresai. Nanği lanğa unub. Ariya tamo qudei nanğo segi areqalo na Qotei aqa wau ojqa marsibqa unğa oqa urateqñub. Tamo nanği ijo anjam endi dauryqa kereamqa nanği dauryebe.”

*Anğro du du nanği Yesus aqa areq beb*

13 Onaqa tamo unğasari qudei nanği nanğo angro du du joqsib Yesus na aqa ban nanğo gateq di atetnjrsim nanği qa Qotei pailyqajqa deqa marsib Yesus aqa areq beb. Beqñabqa Yesus aqa angro nanği na saidnjrsib minjreb, “Nunğo angro du du nanği joqsib endeq baib.” 14 Degsib saidnjrnabqa Yesus na aqa angro nanği minjrej, “Angro du du nanği uratnjrib ijo areq beb. Nanği saidnjraib. Tamo unğasari nanği angro du du bul sqab di Qotei lanğ qureq di unu qaji a nanğo Mandor Koba sosim nanği taqatnjrqas.” 15 Osiqa Yesus na angro du du nanğo gateq di aqa ban atetnjrsiqa a sawa di uratosiq gilej.

*Ñoro tamo bei a Yesus ombla anjam mareb*

16 Onaqa tamo bei a Yesus aqa areq bosiqā nenemyej, “O Qalie Tamo, e kumbra bole kiye dauryosiy dena e nambile gaigai sqai?”

17 Onaqa Yesus na kamba minjej, “Ni kiyāqa e kumbra bole qa nenembonum? Qotei a segi qujai tamo bole. Ariya ni nambile gaigai sqajqa osimqa ni Qotei aqa dal anjam daurye.”

18 Onaqa tamo dena olo Yesus nenemyej, “E dal anjam kiye dauryqai?” Onaqa Yesus na minjej, “Ni tamo bei qalsim moiyoaim. Ni tamo bei aqa unğa jejamu ojetaim. Ni bajinaim. Ni tamo bei aqa jejamu lanğa gisanjaim. 19 Ni ino ai abu nanğo sorgomq di geregere sosimqa nanğo anjam dauryoqne. Ni ino segi jejamu gereiyeqnum dego kere ino was nanği degsim gereinjroqne.’ ”

20 Onaqa angro wala dena olo Yesus minjej, “E dal anjam kalil di nami dauryosim boqñem agi bini degsi unum. Deqa e Qotei aqa kumbra kiye keretosai unum?”

21 Onaqa Yesus na kamba minjej, “Ni Qotei aqa kumbra kalil keretqa osimqa endegye. Ni gilsim ino inği inği kalil qarinyosim silali osim tamo inği inği saiqoji nanği jeisim enjre.

Degsim enjrsim bosim e daurbe. Osim bunuqna ni lan qureq di awai bole itqam.”<sup>22</sup> Yesus na tamo di degsi minjnaq qusiqa are tulan gulbeiej. A ingi ingi koba ti soqnej deqa ulatamu ugeiyonaqa ulanej.

<sup>23</sup> Onaqa Yesus na aqa angro nanngi minjrej, “E bole merngwai. Tamo ungasari ingi ingi koba ti unub qaji nanngi Qotei na taqatnjrsim nanngo Mandor Koba sqa marsibqa lan qureq oqwajqa tulan banngi koba.”<sup>24</sup> E ninngi olo merngwai. Kamel a yumba miligiq gilqajqa banngi koba. Dego kere tamo ungasari ingi ingi koba ti unub qaji nanngi Qotei na taqatnjrsim nanngo Mandor Koba sqa marsibqa lan qureq oqwajqa tulan banngi koba.”

<sup>25</sup> Onaqa Yesus aqa angro nanngi anjam di qusibqa tulan pruguetosib minjeb, “Ni anjam degsi mergonum deqa tamo yai nanngi Qotei na elenqamqa nanngi nambile gaigai sqa kere?”

<sup>26</sup> Onaqa Yesus a nanngi koqnjrsiqa minjrej, “Tamo nanngi segi nambile sqa keresai. Ariya Qotei na nanngi elenqa kere. Di kiyaaqa? Qotei a kumbra kalil yqa kere.”

<sup>27</sup> Onaqa Pita na Yesus minnej, “O Tamo Koba, ni une. Iga gago ingi ingi kalil uratosim ni daurmeqnum. Deqa iga awai kiye oqom?”

<sup>28</sup> Onaqa Yesus na minjrej, “E bole merngwai. Mondonj Qotei a lan bunuj ti mandam bunuj ti atimqa bati deqa e Tamo Angro nam kobaquja osiy ijo segi awo jaram kobaq di awesqai. Awesosiyqa ninngi tamo e daurbeqnub qaji metngitqa ninngi dego awo jaram kokba 12 di awoelenqab. Awoosib Jekop aqa angro 12 nanngo moma kalil nanngi taqatnjroqnqab.”<sup>29</sup> Deqa tamo nanngi ijo nam qa are qaloqnsib nanngo segi tal, nanngo was nanngi, nanngo jaja nanngi, nanngo ai abu nanngi, nanngo angro nanngi ti nanngo wau kalil dego uratnjrsib e daurbqab di Qotei na olo ingi bole bole tulan gargekoba nanngi enjrqas. Yimqa mondonj nanngi nambile gaigai sqab.”<sup>30</sup> Deqa ninngi quiy. Tamo gargekoba bini nam ti unub qaji nanngi mondonj nam saiqoji sqab. Ariya tamo gargekoba bini nam saiqoji unub qaji nanngi mondonj nam ti sqab.”

## 20

### *Yesus a ingi wauqa yawo anjam marej*

<sup>1</sup> Osiqa Yesus a olo aqa angro nanngi endegsi minjrej, “Qotei lan qureq di unu qaji a na aqa segi tamo ungasari nanngi taqatnjrsim nanngo Mandor Koba sqas. Kumbra di wau lanja bei aqa kumbra sigitejunu. Wau lanja dena nobqolo ambru tigelosiqqa aisiq tamo qudei nanngi aqa ingi wauq di wauetqajqa itnjrej.”<sup>2</sup> Itnjrsiqa minjrej, ‘Ninngi ijo ingi wauq di wauoqnib wau qa bati koboamqa e na silali qurunjo quja

quja engwai.’ Degsi minjrseq qarinjrnaqa nanqi gilsib aqa inji wauq di wauoqneb. <sup>3</sup> Sen kiñala goge oqnaqa wau lanja a koro sawaq aisiqa dia tamo qudei nanqi lanja tigelesonab unjrseqa minjrej, <sup>4</sup> ‘Ningi dego gilsib ijo wauq di wauoiy. Wauab kere dego awai engwai.’ <sup>5</sup> Degsi minjrnaqa nanqi gilsib aqa inji wauq di wauoqneb. Qanam jige tamo qudei nanqi dego lanja tigelesonab unjrseqa minjrej, ‘Ningi dego gilsib ijo wauq di wauoiy. Wauab kere dego awai engwai.’ Degsi minjrnaqa nanqi gilsib aqa wauq di wauoqneb. Sen keliñtonaqa olo tamo qudei dego degsi minjrnaqa nanqi gilsib wauoqneb.

<sup>6</sup> “Sen bilaqtonaqa wau lanja a aisiqa gamq di tamo qudei nanqi lanja tigelesonab unjrseqa nenemnjrej, ‘Ningi kiyaaqa lanja tigelesonab sen bilaqtqo?’ <sup>7</sup> Onaqa nanqi na minjeb, ‘Tamo bei na iga wau egosai deqa iga lanja tigelejunum.’ Onaqa wau lanja na minjrej, ‘Ningi dego gilsib ijo inji wauq di wauoiy.’

<sup>8</sup> “Ariya wau qa bati koboonaqa wau lanja na aqa wau taqato tamo bei qarinyosiq minjej, ‘Ni gilsim wau tamo nanqi di metnjrim ino areq di koroabqa nanqo awai enjre. Enjrqa osimqa tamo nanqi bilaq bosib wauonub qaji nanqo awai namo enjrsimqa ariya tamo nanqi nobqolo ambru bosib wauosib bilaqtonub qaji nanqo awai bunuqna enjre.’ <sup>9</sup> Degsi minjnaq qusiqa tamo nanqi bilaq bosib waueb qaji nanqi namo metnjrnaq aqa areq bonabqa silali quruño quja quja enjrej. <sup>10</sup> Onaqa tamo nanqi nobqolo ambru bosib wauosib bilaqteb qaji nanqi degsib unsibqa are qaleb, ‘Iga nobqolo ambru bosim wauosim bilaqtonum. Deqa iga silali kobaquja oqom.’ Degsib are qalnabqa wau taqato tamo na nanqi metnjrnaq aqa areq bonabqa nanqi dego silali quruño quja quja enjrej. <sup>11</sup> Onaqa nanqi degsib unsibqa nanqi na wau lanja njirintosi minjeb, <sup>12</sup> ‘Tamo nanqi di bilaq bosib waukiñalayonubqa silali ni na iga egonum qaji dego kere nanqi enjronum. Iga nobqolo ambru waueqnam sen oqsiq gago jejamu tulan kanqaneqnaqa bilaqtqo. Iga silali koba osai.’

<sup>13</sup> “Onaqa wau lanja a nanqo anjam di qusiqa bei endegsi minjej, ‘O was, e ni kumbra uge emosai. Aqo ombla bini nobqolo anjam keretosimqa e ni silali quruño qujai emqa mermonum. <sup>14</sup> Deqa ni ino silali quruño qujai osim aiye. E ni silali quruño qujai emonum dego kere tamo nanqi bunuqna bosib wauonub qaji nanqi silali quruño quja quja enjronum. E ijo segi areqalo na degyonum. <sup>15</sup> Silali di ijo segi silali. Deqa e ijo segi areqalo dauryosiy ijo silali jeiqa kere. E na tamo nanqi bunu bonub qaji nanqi kumbra bole enjrqa areibqas enjrqai. Deqa ni kiyaaqa e qa are ugeimqo?’ ”

16 Yesus a yawo anjam degsi marsiqa olo marej, “Dego kere tamo bini ñam ti unub qaji nanġi mondoŋ ñam saiġoji sqab. Ariya tamo bini ñam saiġoji unub qaji nanġi mondoŋ ñam ti sqab.”

*Yesus a marej, “E moisiy olo subq na tigelqai”*

17 Osiqa Yesus na aqa anġro 12 nanġi joqsiqa koba na wal-welosib Jerusalem aiyogneb. Aiyognsibqa Yesus na nanġi segitnrjsiqa endegsi minjrej, 18 “Niŋgi quiy. E Tamo Anġro. Iga Jerusalem aiyegnum. Dia tamo qudei na e ojsib atra tamo kokba ti dal anjam qalie tamo ti nanġo banq di e atqab. Yimqa nanġi na ijo jejamuq di une qamsib merbqab, ‘Ni une ti. Deqa ni moiqam.’ 19 Nanġi e degsib merbosib tamo nanġi Qotei qaliesai qaji nanġo banq di e atqab. Yimqa nanġi na e misilinjboqnsib bu toqoŋ na kumbainjboqnsib namburbasq di lubsib moiyoqbqab. Bati qalub koboamqa e olo subq na tigelqai.”

*Jems Jon wo nanġi aiyel tamo kokba sqajqa mareb*

20 Onaqa Sebedi aqa niri aiyel nanġo ai ombla na Yesus aqa areq bosibqa nanġo ai a sinġa pulutosiqa Yesus minjej, “O Tamo Koba, e ni anjam bei mermitqa ni ijo anjam dauryqa kere kiyo?” 21 Onaqa Yesus na kamba minjej, “Ni inġi kiye qa merbqam?” Onaqa a na Yesus minjej, “Mondoŋ ni gago Mandor Koba sosimqa bati deqa ni marimqa ijo anġro aiyel endi nanġi ino ban woq ino ban qonanq di awoqab.”

22 Onaqa Yesus na kamba nanġi aiyel endegsi minjrej, “Anjam niŋgi merbonub di aqa utru niŋgi geregere poingosai. E jaqatiŋ koba oqai. Jaqatiŋ di ya uge uyo bul. Jaqatiŋ e oqai di niŋgi aiyel dego oqa kere e?” Onaqa nanġi na minjeb, “Od, aqo aiyel oqa kere.” 23 Onaqa Yesus na olo nanġi aiyel minjrej, “Bole, jaqatiŋ e oqai di niŋgi dego oqab. Ariya tamo yai nanġi ijo ban woq ijo ban qonanq di awoqab di e na marqa keresai. Di ijo wau sai. Tamo nanġi ijo Abu na giltjnrej qaji nanġi segi ijo ban woq ijo ban qonanq di awoqab.”

24 Yesus aqa anġro 10 nanġo njamdamuq di was aiyel nanġi na anjam di Yesus minjeb deqa qusib nanġi aiyel qa niriheb. 25 Onaqa Yesus na aqa anġro 10 nanġi metnjrnaqa aqa areq bonabqa minjrej, “Niŋgi qalie, mandor kokba sawa sawa kalil taqateqnuq qaji nanġi nanġo segi ñam soqtoqnsib tamo unġasari nanġi niriŋ na taqatnjreqnuq. 26 Ariya kumbra di nunġoq di saiġ. Nunġo ambleq di anġro bei a ñam ti sqa marsimqa a mati nunġo wau tamo soqnem. Osim a ñam ti sqas. 27 Nunġo ambleq di anġro bei a tamo kobaquja sqa marsimqa a mati nunġo kanġal tamo soqnem. Osimqa a olo tamo kobaqujaqas. 28 E Tamo Anġro. Niŋgi ijo kumbra



qalieosib degsib dauryoqniy. Ijo kumbra agiende. E na tamo ungasari nanği wauetnjreqnum. E deqa bem. Tamo ungasari nanği e wauetbqajqa e deqa bosai. Bunuqna e ijo segi nambile uratosiy tamo ungasari gargekoba nanği elenqai.”

*Yesus na tamo aiyel nam qandimnjro qaji nanği boletnjrej*

<sup>29</sup> Osiqa Yesus na aqa angro nanği joqsiqa koba na walwelosib aisib Jeriko qureq di branteb. Brantosib Jeriko qure ambleq na walwelosib olo Jeriko uratosib aiyeq nabqa tamo ungasari tulan gargekoba nanği Yesus dauryosib koba na aiy-oqneb. <sup>30</sup> Aiyeq nabqa tamo aiyel nam qandimnjro qaji nanği gam qalaq di awesosibqa anjam endegsib queb, “Yesus a beqnu.” Nanği degsib qusibqa tulan lelenosib mareb, “O Tamo Koba, Devit aqa Niri, ni aqo aiyel qa dulame.” <sup>31</sup> Onaqa tamo ungasari gargekoba Yesus dauryosib aiy-oqneb qaji nanği na nanği aiyel niri njrsib minjreb, “Ninği lelenkobaaib. Kirioiy.” Degsib minjrnabqa nanği aiyel kiriosai. Nanği olo tulan lelenoqnsib Yesus minjoqneb, “O Tamo Koba, Devit aqa Niri, ni aqo aiyel qa dulame.”

<sup>32</sup> Onaqa Yesus a tigelosiq nanği aiyel metnjrnaqa aqa areq bonabqa minjrej, “E ninği aiyel kiyerngwajqa deqa ninği e qa lelenoq nab?” <sup>33</sup> Onaqa nanği aiyel na minjeb, “O Tamo Koba, aqo aiyel olo nam poigim sawa unqajqa deqa iga ni qa lelenoq nam.” <sup>34</sup> Onaqa Yesus a nanği aiyel qa dulosiq aqa ban waiyosiq nanžo namdamu ojetnjrej. Ojetnjrnaqa nanği aiyel nam poinjrnaqa sawa unsibqa tigelosib Yesus dauryosib aiyeb.

## 21

*Yesus a donki aqa quraq di awoosiq Jerusalem aiyej*

<sup>1</sup> Onaqa Yesus aqa angro nanği koba na walwelosib aisib Jerusalem jojomyosib Betfage qureq di branteb. Betfage qure agi Oliv mana utruq di unu. Di brantosib Yesus na aqa angro aiyel qarinjrsiq minjrej, <sup>2</sup> “Ninği aisib qure bei jojom di unu di brantosib donki bei aqa du wo tontnjronub unub di unjrqab. Unjrsib sil palontosib titnjrsib joqsiq boiy. <sup>3</sup> Ninği sil palonteqnibqa tamo bei na nenemngwas kiyo, ‘Ninği kiyaaq donki aiyel nanžo sil palonteqnub?’ Degsi nenemngimqa ninği na minjiy, ‘Tamo Koba a wau ti deqa donki aqa du wo qa mergwo.’ Yimqa a na donki aqa du wo nanği qarinjrim ijoq bqab.”

<sup>4</sup> Yesus a kumbra di yej deqa anjam bei Qotei aqa medabu o tamo bei nami marej qaji di aqa damu brantej. A endegsi marej, <sup>5</sup> “Ninği na Saion qure nanği endegsib minjriy, ‘Ninği uniy. Nunžo Mandor Koba a nunžoq beqnu. A lawo na beqnu.

A areqalo minjinj saiqoji. Deqa a donki quraq di awoosiq beqnu. Od, a donki aqa du quraq di awoosiq beqnu.’ ”

<sup>6</sup> Onaqa Yesus aqa angro aiyel nanji aisib anjam Yesus na minjrej qaji di dauryeb. <sup>7</sup> Osib nanji donki aqa du wo Yesus aqa areq joqsib beb. Bosib nanjo segi gara jugo piqtosib donki aiyel nanjo quraq di tunabqa Yesus a segi donki gogetosiq quraq di awoej. <sup>8</sup> Awoonaqa donki aiyel nanji walwelosib aiyeq nabqa tamo ungasari tulanj gargekoba nanji belenosib nanjo segi gara jugo piqtelenosib gamq di tuelenoqneb. Tamo qudei nanji nañuq dena nam banja ginjenyosibqa osi bosib di dego gamq di tuelenoqneb. <sup>9</sup> Onaqa Yesus a donki quraq di awoosiq walweleqnaqa tamo ungasari namooqneb qaji nanji ti bunuoqneb qaji nanji ti tulanj lelenoqnsibqa maroqneb, “O Devit aqa Niri, iga ni qa tulanj areboleboleiqe qnu. Ni Tamo Koba aqa ñam na bonum deqa a ni tulanj gegerimeqnu. Deqa iga Qotei lanj goge di unu qaji aqa ñam tulanj soqtoqnqom.” Tamo ungasari nanji degoqnsib lelenj ti Yesus dauryoqneb.

<sup>10</sup> Onaqa Yesus a walwelosi aisiq Jerusalem di brantonaqa tamo ungasari kalil nanji a unsibqa tulanj prugugetosib segi segi maroqneb, “Tamo endi yaiyo?” <sup>11</sup> Degsib mareq nabqa tamo ungasari qudei Yesus dauryosib aiyooqneb qaji nanji na kamba minjreb, “Tamo endi Yesus. A Qotei aqa medabu o qaji tamo bole. Aqa qure utru Nasaret. Qure di Galili sawaq di unu.”

*Yesus na tamo ungasari nanji atra talq dena winjrej*

<sup>12</sup> Onaqa Yesus a walwelosi aisiqa atra tal koba miligiq gilej. Gilsiqqa nam atej di tamo ungasari gargekoba nanji inji inji qarinyoqnsibqa dena silali eq nab unjr siqa nanji winjr naq jaraiyeb. Tamo qudei nanji silali piloqneb. Qudei nanji binonj qarinyoqnsib dena silali oqneb. Deqa Yesus a nanjo jar ti jaram ti bilbelyosiqqa nanji dego winjr naq jaraiyeb. <sup>13</sup> Nanji kalil jaraiyeq nabqa Yesus na minjrej, “Qotei aqa anjam bei nami endegsib nengrenyeb unu, ‘Ijo tal endi pailyqajqa tal.’ Ariya ningi na olo tal endi ugetonubqa a bajinj tamo nanjo tal bulqo.”

<sup>14</sup> Yesus a atra tal miligiq di sonaqa tamo nam qandimnjro qaji ti tamo sinja qandamnjro qaji ti nanji aqa areq beq nabqa a na nanji kalil boletnjroqnej. <sup>15</sup> Onaqa angro du du atra tal miligiq di soqneb qaji nanji Yesus aqa manjwa di unsibqa tulanj lelenoqnsib minjoqneb, “O Devit aqa Niri, iga ni qa tulanj areboleboleiqe qnu.” Onaqa dal anjam qalie tamo nanji ti atra tamo kokba ti nanji angro du du nanjo anjam di qusibqa Yesus qa ugeeb. <sup>16</sup> Osib Yesus minjeb, “Angro du du nanji lelenoqnsib anjam mareq nub di ni queqnum e?” Onaqa Yesus

na kamba minjrej, “Od, e nanjo anjam queqnum. Ariya anjam bei nenjrenq di unu qaji di ninji nami sisiyosai kiyo? Anjam agiende, ‘O Abu, anjro du du ti anjro mom ti nanji ino ñam soqteqnum.’ ” <sup>17</sup> Yesus a nanji degsi minjrsiq koboonaqa a tigelosiq Jerusalem uratosiq Betani qureq gilej. Gilsiq qoloonaq di nej.

*Yesus a qura minjej, “Ni olo bunu geitqasai”*

<sup>18</sup> Nebeonaqa Yesus a olo tigelosiq Jerusalem aiyosiq gamq di a mamyej. <sup>19</sup> Mamyonaqa nam atsiqa qura banqa ti gam qalaq di tigelesonaq unsiqa aqa gei unqajqa utruq gilej. Gilsiq unej qura gei bei saiqoji. Banqa segi sonab unej. Unsiqa qura di minjej, “Ni olo bunu geitqasai.” Degsi minjnaqa bati qujai deqa qura di utru ti kalil laosiq moiyej.

<sup>20</sup> Onaqa Yesus aqa anjro nanji aqa kumbra di unsibqa tulan pruguetosib Yesus nenemyeb, “Qura di kiyersi urur laosiq moiyo?”

<sup>21</sup> Onaqa Yesus na kamba minjrej, “E bole mernjwai. Ninji Qotei qa nunjo areqalo singilatosib nunjo areqalo aiyeltqasai di ninji dego qura minjibqa a laosim moiqa. Qura segi sai. Ninji mana kobaquja endi dego minjqab, ‘Ni tigelosim yuwalq aiye.’ Minjibqa a nunjo anjam di dauyosim tigelosim yuwalq aiqa. <sup>22</sup> Deqa ninji Qotei qa nunjo areqalo singilatosib inji bei qa pailyqab di ninji inji di oqab.”

*Juda nanji na Yesus nenemyeb, “Ni singila qabe na osimqa kumbra endi yeqnum?”*

<sup>23</sup> Osiqa Yesus a olo atra tal miligiq gilsiq dia Qotei aqa anjam palontonej. Onaqa Israel nanjo gate nanji ti atra tamo kokba ti nanji na Yesus aqa areq bosib nenemyeb, “Ni iga merge. Ni singila qabe na osimqa kumbra endi yeqnum? Yai na ni qarimej deqa ni bosim wau endi yeqnum?” <sup>24</sup> Onaqa Yesus na minjrej, “E kamba anjam bei ninji nenemjwai. Nenemjitqa ninji e merbibqa e yai na qaribonaq bosim wau endi yeqnum di ubtosiy mernjwai. <sup>25</sup> Ninji na merbiy. Yai na Jon qarinyonaq bosiq tamo ungasari nanji yansjroqnej? Qotei na kiyo? Tamo bei na kiyo?”

Onaqa nanji Yesus aqa anjam di qusibqa segi segi qairosib mareb, “Iga Yesus minjqom, ‘Qotei na Jon qarinyej,’ degsi minjqom di a iga mergwas, ‘Kiyaqa ninji Jon aqa anjam qetosai?’ ” <sup>26</sup> Ariya iga minjqom, ‘Tamo bei na Jon qarinyej,’ degsi minjqom di dego keresai. Tamo ungasari nanji mareqnum, ‘Jon a Qotei aqa medabu o qaji tamo bole.’ Deqa iga nanji ulainjronum.” <sup>27</sup> Nanji degsib qairosib olo Yesus minjeb, “Yai na kiyo Jon qarinyej di iga qaliesai.” Onaqa Yesus na

kamba minjrej, “Ningi degsib merbonub deqa e dego yai na qarinjbonaq bosim wau endi yeqnum di ningi mernjwasai.”

*Yesus a yawo anjam bei marej*

<sup>28</sup> Osiqa Yesus a olo Juda gate nanji ti atra tamo kokba ti nanji endegsi minjrej, “Ningi kiyersib are qalonub? Tamo bei aqa njiri aiyel soqneb. Bati bei a aqa njiri matu aqaq bosiqqa minjej, ‘O ijo angro, ni gilsim ijo ingi wauq di wauame.’”  
<sup>29</sup> Onaqa aqa njiri matu na minjej, ‘Sai. E wauqa uratonum.’ Degsi aqa abu saidyosiqqa bunuqna areqalo bei osiqa gilsiq wauetej. <sup>30</sup> Onaqa abu a aqa njiri yala aqaq bosiqqa minjej, ‘O ijo angro, ni gilsim ijo ingi wauq di wauame.’ Onaqa aqa njiri yala na minjej, ‘Od, Abu, e wauqai.’ Degsi aqa abu odyosiqqa ariya a wauosai. A lanja talq di soqnej. <sup>31</sup> Deqa ningi na merbiy. Angro yai na aqa abu aqa anjam dauryej?” Onaqa nanji na kamba Yesus minjeb, “Njiri matu a na aqa abu aqa anjam dauryej.”

Nanji degsib Yesus minjnabqa a na olo minjrej, “E bole mernjwai. Takis o qaji tamo ti gam qaji unja ti nanji na ningi bunjosib namoosib Qotei aqaq oqibqa a nanji elenjosim nango Mandor Koba sosim nanji taqatnjrqas. <sup>32</sup> Di kiyaaqa? Jon yansnjro qaji a nunjoq bosiqqa Qotei aqa kumbra bole ningi osornjgonaaqa ningi Jon aqa anjam quetosai. Ariya takis o qaji tamo ti gam qaji unja ti nanji Jon aqa anjam geregere queteb. Quetonab ningi di unsibqa ariya ningi olo are bulyosai. Osib ningi Jon aqa anjam quetosai dego.”

*Wain wau qa yawo anjam*

<sup>33</sup> Yesus a Juda tamo kokba nanji degsi minjrsiqqa olo endegsi minjrej, “E ningi yawo anjam bei mernjit ningi quiy. Tamo bei a tigelosiqqa aqa wauq gilej. Gilsiqqa wain sil yagelenjosiqqa jen qosej. Qoso koboonaaqa meniñ qura gogeq di tabir kuru bul gereiyej. Wain sil geitimqa wain gei koroiyosib paraparaiyosib aqa ya dia bilentqajqa deqa gereiyej. Osiqa wauq di tal atsiqa wau taqato tamo qudei nango banq di aqa wau uratetnjrsiqqa sawa isaq gilsiq di soqnej. <sup>34</sup> Sonaqa wain gei melionaaqa a na aqa kanjal tamo qudei nanji qarinjnrnaqa wau taqato tamo nanjoq aisib minjreb, ‘Wau lanja a na iga qarinjwo bonum. Deqa ningi wain gei egibqa iga na osi gilqom.’”  
<sup>35</sup> Degsi minjrnabqa nanji na nanji ojelenjosib bei qalougeteb. Bei qalnab moiyej. Bei meniñ na qalnab moiyej.  
<sup>36</sup> Onaqa wau lanja a di qusiqa olo aqa kanjal tamo gargekoba nanji qarinjnjroqnej. Qarinjnjreqnaqa aiyeq nab nanji dego ñumoqneb.

<sup>37</sup> “Onaqa wau lanja a endegsi are qalej, ‘E ijo segi angro qujai qarinyit aiqas di nanji a qalqasai. Nanji aqa anjam

quetqab.’ Degsi are qalsiqa aqa segi niri qarinyonaq aiyej.  
<sup>38</sup> Aiyeqnaqa wau taqato tamo nanqi a unsibqa segi segi qairosib mareb, “Tamo a bqo endi wau lanja aqa segi niri. A na aqa abu aqa ingi ingi kalil oqas. Deqa iga a qalsim moiotosimqa wau endi iga na oqom.’ <sup>39</sup> Degsib marsibqa wau lanja aqa niri ojsib osi gilsib wau qalaq di qalnab moiyej.  
<sup>40</sup> Deqa ningi kiyersib are qalonub? Wau lanja a bosimqa wau taqato tamo uge nanqi di kiyernjrqs? Ningi na merbiy.”

<sup>41</sup> Onaqa nanqi na minjeb, “Wau lanja a bosimqa tamo uge nanqi di tulan ugeugeinjsim padaltnjrougetqas. Osim aqa wau di olo yainjsim tamo qudei nanqo banq di uratetnjrimqa nanqi na kamba wau taqatosib wain gei melioqnimqa koroiyoqnsib wau lanja yoqnqab.”

<sup>42</sup> Nanqi degsib Yesus minjnabqa a na olo minjrej, “Qotei aqa anjam bei unu. Ningi anjam di nami sisiyosai kiyo? Anjam agiende,  
 ‘Tal gereiyo qaji tamo nanqi na tal ai arqsibqa uge qa marsib taqal waiyeb.

Onaqa tal ai di Qotei na olo osiq tumaq di tigeltej unu.

Tal ai di tal singilatqajqa deqa tigeltej.

Tamo Koba a segi na tal ai di tigeltej deqa iga unsim mareqnum,

“Tal ai di tulan bolequja.” ’

<sup>43</sup> Deqa e ningi endegsi mernqwai. Qotei a nunqo Mandor Koba sosim ningi taqatngwajqa uratosim ningi taqal breingwas. Osim olo tamo unqasari qudei aqa kumbra bole dauryeqnub qaji nanqi elenqosim nanqo Mandor Koba sosim nanqi taqatnjrqs. Nanqi gei bole atobuleqnub deqa Qotei na nanqi taqatnjrqs. <sup>44</sup> Tamo unqasari ululoqnsib tal ai quraq aiqab qaji nanqi di tal ai dena nanqo tanu ginqenyqas. Ariya tal ai di ulonqosim tamo unqasari qudei nanqoq aisim jejamu ti tanu ti torei paraparainjrqs.”

<sup>45</sup> Onaqa atra tamo kokba ti Farisi nanqi ti yawo anjam di qusib endegsib qalieeb, Yesus a yawo anjam dena nanqo jejamuq di une qametnjrej. <sup>46</sup> Nanqi degsib qalieosib deqa nanqi Yesus ojqa mareb. Ariya nanqi tamo unqasari nanqi ulainjsib deqa Yesus ojqa urateb. Di kiyaqqa? Tamo unqasari kalil nanqi maroqneb, “Yesus a Qotei aqa medabu o qaji tamo bole.”

## 22

*Yesus a maruro qa yawo anjam marej*

<sup>1</sup> Onaqa Yesus a olo Juda tamo kokba nanqi yawo anjam bei endegsi minjrej, <sup>2</sup> “Qotei lanq qureq di unu qaji a na aqa segi tamo unqasari nanqi taqatnjsim nanqo Mandor

Koba sqas. Kumbra di mandor bei aqa njiri unja ban ojqa bationaqa maruro atej dego kere. <sup>3</sup> A maruro atsiqa aqa kanjal tamo qudei qarinjrnaja nangi gilsib tamo ungasari nami aqa maruro unqa minjrej qaji nangi metnjreb, 'Ningi boiy.' Onaqa nangi bqa asginjrej. <sup>4</sup> Asginjrnaja mandor a deqa qusiqa aqa kanjal tamo qudei olo qarinjrsiqa minjrej, 'Ningi gilsib tamo ungasari e ijo maruro unqa minjrem qaji nangi olo endegsib minjriy, "Ningi quiy. Mandor a inji inji kalil gereiyosiq atqo unu. Makau ti wagme namur bole bole ñumsiqa goiqo. Deqa ningi asgingaiq. Ningi bosib aqa maruro uniy." O kanjal tamo, ningi gilsib nangi degsib minjriy.'

<sup>5</sup> "Onaqa nangi gilsib tamo ungasari nangi di minjreb, 'Ningi boiy.' Minjrnabqa nangi kalil bqa asginjrej. Bei a ulanosiqa aqa inji wauq gilej. Bei a ulanosiqa aqa silali wauq gilej. <sup>6</sup> Qudei na kanjal tamo nangi di ojelenosib ugeugeinjsib ñumnab moreneb. <sup>7</sup> Onaqa mandor a deqa qusiqa minjin oqetonaqa aqa qaja tamo nangi qarinjrnaja gilsib tamo nangi kanjal tamo ñumeb qaji nangi kamba ñumekriteb. Osib nango tal inji inji kalil qatrentonab yuekriteb.

<sup>8</sup> "Onaqa mandor a olo aqa kanjal tamo qudei qarinjrsiqa minjrej, 'Ijo angro aqa unja ban ojqa bati kereqo deqa e na maruro atonum unu. Tamo ungasari e nami ijo maruro unqa minjrem qaji nangi bqa asginjrej. Nangi tamo ungasari bolesai deqa nangi ijo maruro unqa keresai. <sup>9</sup> Deqa ningi gilsib gamq di tamo ungasari lanja lanaj nangi turosib metnjrib ijo maruro unqa beb.' <sup>10</sup> Onaqa nangi gilsib gamq di tamo ungasari gargekoba bole ti uge ti nangi turosib metnjrnabqa nangi kalil maruro unqajqa bosib koroonaqqa tal tamo na maqej.

<sup>11</sup> "Onaqa mandor a na tamo ungasari nangi di unjrqa marsiqa tal miligiq gilej. Gilsiq nam atej di tamo bei a maruro qa gara wala jugosai di unsiqa minjej, <sup>12</sup> 'O was, ni kiyaaq maruro qa gara wala jugosai? Ni degsim maruro unqa baim.' Degsi minjnaqa tamo di a na kamba olo anjam bei minjqa keresaiyonaqa lanja kiriesoqnej. <sup>13</sup> Onaqa mandor a na aqa kanjal tamo nangi minjrej, 'Ningi na tamo di singa ti ban ti tontetosib oqeq waiyibqa sawa ambruq di soqnem. Sawa dia tamo nangi akamkobaoqsib pailoqsib nango jaqatin qa qalagei anjam atoqnqas.' "

<sup>14</sup> Osiqa Yesus a olo marej, "Ningi quiy. Qotei a tamo tulan gargekoba nangi metnjreqnu. Ariya a tamo quja quja segi giltjnreqnu."

*"Iga Sisar takis yqom e?"*

<sup>15</sup> Onaqa Farisi nangi gilsib nangi anjam kiye Yesus nenemyib a anjam grotim qusib a oqajqa deqa qairoqneb. <sup>16</sup> Qairosib anjam kereonaq nango angro qudei Herot aqa wau

tamo qudei ti qarınjnrbab Yesus aqa areq bosib minjeb, “O Qalie Tamo, iga qalie, ni anjam bole maro qaji tamo. Ni anjam bole segi tamo unğasari nanğı minjroqnsim Qotei aqa kumbra osornjreqnum. Ni tamo bei ulaiyosaieqnum. Ni tamo ñam ti nanğı anjam bei minjroqnsim olo tamo ñam saiqoji nanğı anjam bei minjrosaieqnum. Ni anjam qujai tamo kalil nanğı minjreqnum. <sup>17</sup> Deqa ni iga merge. Iga Sisar takis yqom e? Yqasai e? Ni kiyersi are qalonum?”

<sup>18</sup> Onaqa Yesus a nanğı areqalo uge di poiyoñaqa minjrej, “Nınğı gisanj tamo. Kiyaqa nınğı e anjam bei grotitqa qusib e ojqajqa deqa gisanjbeqnum? <sup>19</sup> Nınğı meniñ silali bei osorbiy.” Degsi minjrnacaq nanğı meniñ silali bei osi bosib osoryonab unsiqa minjrej, <sup>20</sup> “Meniñ silali quraq endi tamo yai aqa ulatamu ti ñam ti unu?” <sup>21</sup> Onaqa nanğı na minjeb, “Di Sisar aqa.” Onaqa a na minjrej, “Deqa Sisar aqa inğı inğı a qa olo yiy. Qotei aqa inğı inğı a qa olo yiy.”

<sup>22</sup> Onaqa nanğı Yesus aqa anjam di qusibqa tulan prugugeteb. Osib nanğı Yesus uratosib jaraiyeb.

### *Tamo moreño qaji nanğı olo subq na tigelqab*

<sup>23</sup> Onaqa bati deqa Sadyusi tamo qudei nanğı Yesus aqa areq beb. Sadyusi nanğı mareqnum, “Tamo moreño qaji nanğı olo subq na tigelqasai.” Deqa nanğı bosib Yesus endegsib minjeb, <sup>24</sup> “O Qalie Tamo, ni que. Moses a nami endegsi marej, ‘Tamo bei a moiymıqa aqa ñauñ anğro saiqoji soqnımqa aqa was bei na olo uña qobul di osim aqa was moiyej qaji aqa anğro ñambabtetas.’ Moses a nami degsi marej. <sup>25</sup> Deqa ni que. Was 7 nanğı soqneb. Nanğı was matu a uña osıqa moiyej. A anğro saiqoji. Onaqa aqa was yala na olo uña qujai di ej. <sup>26</sup> Osıqa a dego moiyej. A anğro saiqoji. Onaqa aqa was yala na olo uña qobul di osıqa a dego moiyej. A anğro saiqoji. Was 7 kalil nanğı uña qujai di osib moreñeb. Nanğı anğro saiqoji. <sup>27</sup> Nanğı kalil moreñonabqa ariya bunuqna uña di a dego moiyej. <sup>28</sup> Deqa ni iga merge. Mondonj subq na tigelobqamqa tamo kalil nanğı subq na tigelabqamqa uña di a yai aqa ñauñ tıntın sqas? Ni qalie, was 7 kalil nanğı uña qujai di eb.”

<sup>29</sup> Onaqa Yesus na minjrej, “Qotei aqa anjam nengrenq di unu qaji di aqa damu nınğı poıngosai. Qotei aqa sıngıla dego nınğı poıngosai. Deqa nınğı anjam grotonub. Grotosib agi nenembonub. <sup>30</sup> Mondonj tamo unğasari nanğı subq na tigelosıbqamqa nanğı unatqasai. Nanğı tamotqasai. Nanğı lan anğro bul lanja sqab.

<sup>31</sup> “Nınğı quiy. Tamo nanğı moısib olo subq na tigelqab anjam di aqa utru Qotei a nami babtosiq nınğı merngej. Di nınğı sısiyosai kiyo? Qotei a endegsi marej, <sup>32</sup> ‘E Abraham aqa Qotei. E Aısak aqa Qotei. E Jekop aqa Qotei.’ Qotei a

degsi marej deqa iga qalieonum, Qotei a tamo moreno qaji nanngo Qotei sai. A tamo nambile so qaji nanngo Qotei.”<sup>33</sup> Onaqa tamo ungasari kalil nanngi Yesus aqa anjam di qusibqa tulan pruguteb.

*Dal anjam kiye a tulan bolequja?*

<sup>34</sup> Yesus a Sadyusi nanngi anjam degsi minjrnaqa nanngi na kamba olo anjam bei minjqqa keresaiinjrej. Onaqa Farisi nanngi deqa qusib olo Yesus aqa areq beb. <sup>35</sup> Nanngo ambleq dena dal anjam qalie tamo bei a tigelosiqqa Yesus gisanjyosiq nenemyej, <sup>36</sup> “O Qalie Tamo, ni mare. Qotei aqa dal anjam kiye a segi qujai tulan bolequja? Dal anjam kiye a dal anjam kalil bunjnjrejunu?”

<sup>37</sup> Onaqa Yesus na minjej, “Dal anjam tulan bolequja agi mermqai. Dal anjam agiende. ‘Ni ino Tamo Koba Qotei a tulan qalaqalaiyime. Qalaqalaiyosim ino are miligi ti ino qunun ti ino areqalo ti kalil a yekritime.’ <sup>38</sup> Dal anjam di a segi qujai tulan bolequja. A na dal anjam kalil bunjnjrejunu. <sup>39</sup> Ariya dal anjam deqaji bei dego mermqai. Dal anjam agiende. ‘Ni ino segi jexamu gereiyeqnum dego kere ino was nanngi degsim geregereinjroqnime.’ Dal anjam boledamu aiyel agi e na mermonum. <sup>40</sup> Ni dal anjam aiyel di dauryqam di ni Moses aqa dal anjam ti Qotei aqa medabu o qaji tamo nanngo anjam ti kalil keretosim dauryqam.”

*Kristus a kiyersim Devit aqa njiri sqas?*

<sup>41</sup> Onaqa Farisi nanngi olo Yesus aqa areq di koroesonabqa a na nenemnjrej, <sup>42</sup> “Ninggi Kristus qa kiyersib are qalonub? A yai aqa njiri?” Onaqa nanngi na kamba minjeb, “Kristus a Devit aqa njiri.”

<sup>43</sup> Onaqa Yesus na olo minjrej, “Devit a nami marej, ‘Kristus a ijo Tamo Koba.’ Agi Qotei aqa Mondor na Devit aqa medabu singilatetonaqa a endegsi marej,

<sup>44</sup> “Tamo Koba a na ijo Tamo Koba minjej,

“Ni ijo ban woq endi awo.

Awesoqninqa e ino jeu tamo kalil nanngi elenjosiy ino sorgomq di atitqa ni na nanngi taqatnjroqnqam.” ’

<sup>45</sup> Ninggi uniy. Devit a marej, ‘Kristus a ijo Tamo Koba.’ Deqa Kristus a kiyersim Devit aqa njiri sqas?”

<sup>46</sup> Yesus a Farisi nanngi anjam degsi minjrnaqa tamo bei na kamba anjam bei minjqqa keresai. Deqa tamo nanngi olo bunuqna anjam bei Yesus nenemyqajqa ulaeb.



<sup>1</sup> Onaqa Yesus na olo aqa angro nanngi ti tamo ungasari kalil nanngi ti endegsi minjrej, <sup>2</sup> “Dal anjam qalie tamo nanngi ti Farisi nanngi ti Moses aqa ñam osib dal anjam plaltoqnsib ninngi merngeq nub. <sup>3</sup> Deqa anjam kalil nanngi na merngeq nub qaji di ninngi qusib dauryoqniy. Ariya kumbra nanngi yeqnub qaji di ninngi dauryaib. Nanngi anjam maroqnsib ariya nanngi segi anjam di dauryosaieq nub. <sup>4</sup> Nanngi gulbe kokba tamo ungasari nanngi enjreq nab qoboioyqnsib unub. Ariya nanngi olo tamo ungasari nanngo gulbe di qoboietnjrosaieq nub. <sup>5</sup> Kumbra kalil nanngi yeqnub qaji di tamo ungasari nanngi unoqnsib nanngo ñam soqtetnjrqajqa deqa yeqnub. Nanngo kumbra bei agiende. Nanngi Qotei aqa dal anjam mutu qudei pepa kiñilalaq di nengrenyoqnsibqa lopo miligiq di jigelenoqnsib nanngo lanjaq di gara ñenngi na qoseq nub. Osib nanngo gara jugo mutuq di gara burbur nengren ti wala bole bole tonteq nub. <sup>6</sup> Nanngi goiyo kokbaq di, Qotei tal miligiq di sosibqa tamo ñam ti nanngo awo jaramq di awoqajqa tulan areboleboleinjreqnu. <sup>7</sup> Nanngi koro sawaq di tamo ungasari nanngi na nanngo ñam soqtoqnsib ban ojetnjrqajqa deqa areboleboleinjreqnu. Tamo ungasari nanngi na ‘O Qalie Tamo Koba’ degsib minjroq nqajqa deqa ti nanngi areboleboleinjreqnu.

<sup>8</sup> “O ijo angro, tamo qudei na ninngi ‘O Qalie Tamo Koba’ degsib merngaib. Tamo qujai a segi nunngo Qalie Tamo. Ninngi kalil was. <sup>9</sup> Mandamq endi ninngi na tamo bei endegsib minjaib, ‘O Abu.’ Tamo qujai a segi nunngo Abu. Agi a lan qureq di unu. <sup>10</sup> Tamo qudei na ninngi endegsib merngaib, ‘O Gate Koba.’ Tamo qujai a segi nunngo Gate Koba. Agi e Kristus. <sup>11</sup> Nunngo ambleq di angro bei a ñam ti sqa marsimqa a mati nunngo wau tamo soqnem. Osimqa a ñam ti sqas. <sup>12</sup> Tamo kalil nanngo segi ñam soqteq nub qaji nanngi Qotei na olo ñam aguq atetnjrqas. Ariya tamo kalil nanngo segi ñam aguq ateq nub qaji nanngi Qotei na olo ñam soqtetnjrqas.”

*Yesus a Juda tamo kokba nanngo kumbra uge qa marej*

<sup>13</sup> Osiqa Yesus a olo marej, “O dal anjam qalie tamo ti Farisi ti, ninngi gisanj tamo. Deqa ninngi tulan padalougetqab. Ninngi anjam maro aiyelteq nub. Agi tamo ungasari nanngi lan qureq oqwajqa gam itqa mareq nabqa ninngi na olo gam getentetnjreq nub. Ninngi segi lan qureq oqwajqa gam itqa keresai. Deqa tamo ungasari nanngi dego lan qureq oqwajqa gam itqa yeq nab ninngi na gam getentetnjreq nub. <sup>14</sup> O dal anjam qalie tamo ti Farisi ti, ninngi gisanj tamo. Deqa ninngi tulan padalougetqab. Ninngi anjam maro aiyelteq nub. Agi ninngi unja qobul nanngi gisanjnroqnsibqa nanngo tal ti inngi inngi ti laja yainjreq nub. Osib tamo ungasari nanngi na ninngi nunngsib nunngo ñam soqtetngwajqa deqa pailyo olekokba yeqnub. Deqa

mondorj Qotei na tamo nanji peginjrqa batiamqa a na ninji awai tulanj uge enjwas.

15 “O dal anjam qalie tamo ti Farisi ti, ninji gisanj tamo. Deqa ninji tulanj padalougetqab. Ninji anjam maro aiyelteqñub. Agi ninji na tamo qujai segi ninji daurnjgwa maroqnsib sinja na kiyo qobun na kiyo sawa sawa kalil keretoqnsib laqñub. Ariya tamo qujai di a ninji daurnjgwas di a na ninji bunjosim tamo tulanj ugedamu sqas. Deqa a ninji qa namoosim torei njamyuwoq aiqas.

16 “Ninji tamo njam qandimo bul unub. Deqa ninji tamo nanji gam osornjrqa keresai. Agi ninji mareqñub, ‘Tamo bei a anjam singilatqa osimqa atra tal aqa ñam na singilatqas di aqa anjam singilaqasai. Deqa a na anjam di uratqas di kere. Ariya a gol atra tal miligiq di unu qaji aqa ñam na anjam singilatqas di aqa anjam bole singilaqas. Deqa a anjam di urataiq.’ Ninji degsib mareqñub. 17 Ninji tamo njam qandimo bul unub. Ninji tulanj nanari. Ninji na merbiy. Inji kiye a Qotei aqa njamgalaq di tulanj bole? Atra tal a tulanj bole kiyo atra tal aqa gol a tulanj bole kiyo? Od, atra tal a tulanj bole. Ariya gol atra tal miligiq di unu qaji a dego inji bole. 18 Ninji endegsib mareqñub, ‘Tamo bei a anjam singilatqa osimqa atra bijal aqa ñam na singilatqas di aqa anjam singilaqasai. Deqa a na anjam di uratqas di kere. Ariya a atraiyo inji inji atra bijal gogeq di unub qaji nanjo ñam na anjam singilatqas di aqa anjam bole singilaqas. Deqa a anjam di urataiq.’ Ninji degsib mareqñub. 19 Ninji tamo njam qandimo bul unub. Ninji na merbiy. Inji kiye a Qotei aqa njamgalaq di tulanj bole? Atra bijal a tulanj bole kiyo atraiyo inji inji atra bijal gogeq di unub qaji nanji tulanj bole kiyo? Od, atra bijal a tulanj bole. Ariya atraiyo inji inji atra bijal gogeq di unub qaji nanji dego bole kalil. 20 Deqa ninji quiy. Tamo bei a atra bijal aqa ñam na anjam singilatqas di a atra bijal ti inji inji kalil atra bijal gogeq di unub qaji nanji ti nanjo ñam na anjam singilatqas. 21 Tamo bei a atra tal aqa ñam na anjam singilatqas di a atra tal ti Qotei agi atra tal miligiq di unu qaji a ti nanjo ñam na anjam singilatqas. 22 Tamo bei a lanj qure aqa ñam na anjam singilatqas di a Qotei ti aqa awo jaram ti nanjo ñam na dego anjam singilatqas.

23 “O dal anjam qalie tamo ti Farisi ti, ninji gisanj tamo. Deqa ninji tulanj padalougetqab. Ninji anjam maro aiyelteqñub. Agi ninji dal anjam kiñilala segi dauryeqñub. Ninji lei ti lombo ti saga ti oqnsib poto 10 yoqnsib oto qujai Qotei atraiyeqñub. Ariya ninji Qotei aqa dal anjam kokba dauryqajqa urateqñub. Agi ninji kumbra bole bole dauryqa asginjeqñu. Ninji tamo nanji qa dulosaieqñub. Ninji Qotei qa nunjo areqalo singilatosaieqñub. Ninji dal anjam kiñilala

segi dauryeqnub. Deqa e ningi endegsi mernɣwai. Ningi are bulyosib dal anjam kokba dauryosib laqniy. Ningi dal anjam kiñilala dego dauryqa urataib. <sup>24</sup> Ningi tamo ñam qandimo bul unub. Deqa ningi tamo nanɣi gam osornjrqa keresai. Agi ningi qui uyqa oqnsib añiñig kiñala quiq di sonaqa un-oqnsib taqal ateqnub. Ariya kamel a quiq di sonaqa ningi unosaieqnub. Qoji uyeqnub.

<sup>25</sup> “O dal anjam qalie tamo ti Farisi ti, ningi gisañ tamo. Deqa ningi tulañ padalougetqab. Ningi anjam maro aiyelteqnub. Agi ningi ya gambañ ti tabir ti qore segi yanseqnub. Ningi miligi yansosaieqnub. Dego kere ningi babañ na tamo bole. Ariya nuñgo are miligi bajin kumbra ti jejamu qa kumbra uge ti dena maqejunu. <sup>26</sup> O Farisi ningi tamo ñam qandimo bul unub. Deqa ningi endegiyi. Ningi mati ya gambañ ti tabir ti miligi yansiy. Yansib milalamqa qore dego milalqas.

<sup>27</sup> “O dal anjam qalie tamo ti Farisi ti, ningi gisañ tamo. Deqa ningi tulañ padalougetqab. Ningi anjam maro aiyelteqnub. Agi ningi tamo moiyo qaji sub bul unub. Sub gogeq di wala boledamu. Ñam qaq na liyeb. Ariya sub miligiq di tamo aqa qusa ti tanu ti dena maqejunu. <sup>28</sup> Ningi sub di bul. Deqa tamo unɣasari nanɣi na ningi nuñgoqnsib mareqnub, ningi tamo bole. Ariya nuñgo are miligi gisañ kumbra ti dal anjam gotrañyqajqa kumbra ti dena maqejunu.”

<sup>29</sup> Osiqa Yesus a olo marej, “O dal anjam qalie tamo ti Farisi ti, ningi gisañ tamo. Deqa ningi tulañ padalougetqab. Ningi anjam maro aiyelteqnub. Bole, ningi Qotei aqa medabu o tamo nanɣo sub gereiyosib tamo unɣasari nami kumbra bole bole yoqneb qaji nanɣo sub walateqnub. <sup>30</sup> Ariya ningi olo endegsib mareqnub, ‘Iga nami soqnem qamu iga gago moma nanɣi ti beterosim Qotei aqa medabu o tamo nanɣi ñumosai qamu.’ Di gisañ koba. Ningi nuñgo moma nanɣi ti areqalo qujai. <sup>31</sup> Ningi mareqnub, ‘Gago moma.’ Nuñgo anjam dena ningi segi qa ubtosib endegsib marobuleqnub, ‘Tamo nanɣi na Qotei aqa medabu o tamo nanɣi ñumoqneb qaji nanɣo anɣro agi iga.’ <sup>32</sup> Ningi degsib marobuleqnub. Deqa unɣum. Nuñgo moma nanɣo kumbra uge di ningi na olo keretosib yoqniy. <sup>33</sup> Ningi amal uge bul. Deqa mondon Qotei a nuñgo une qa mernɣsim ningi ñamyuwoq di breinɣwas. Yimqa ningi kiyersib olo bole sqab? Keresai.

<sup>34</sup> “Deqa ningi quiy. E na Qotei aqa medabu o tamo nanɣi ti Qotei aqa powo tamo nanɣi ti Qotei aqa dal anjam qalie tamo nanɣi ti qariñnjroqnit nuñgoq boqñqab. Boqñbqa ningi na nanɣi qudei ñumoqnsib moiyoñnjroqñqab. Osib nanɣi qudei ñamburbasq di gaintnjrqaqab. Osib nanɣi qudei ojelenosib nuñgo Qotei tal miligiq di kumbainnjroqñqab. Osib nanɣi qudei

teteinjribqa nanġi jaraiyosib qure bei beiq giloqnqab. <sup>35</sup> Ninġi nanġi degnjroqnbqa bati deqa Qotei a nuġgo moma nanġo une kalil osim nuġgo jejamuq di atelenqas. Nuġgo moma nanġo une agiende. Nanġi na tamo unġasari kumbra bole bole yoqneb qaji nanġi ñumoqneb. Nanġo une di agi nanġi nami yqajqa utru atsib Kein na Abel qalnaq moiyej. Dena bosib Berekia aqa nġiri Sekaraia atra bijal ti atra tal ti ambleq di qalnab moiyej. Une kalil di Qotei na osim nuġgo jejamuq di atelenqas. <sup>36</sup> E bole mernġwai. Une kalil di aqa awai uge Qotei na osim tamo unġasari bini bati endeqa unub qaji nanġi enjrqas.”

### *Yesus a Jerusalem nanġi qa dulej*

<sup>37</sup> Osiqa Yesus a olo marej, “O Jerusalem qure, O Jerusalem qure, ni na Qotei aqa medabu o tamo nanġi ñumoqnsim moiyo-tnjreqnum. Osim tamo unġasari Qotei na inoq qarinjnjreqnu qaji nanġi meniġ na ñumeqnam moreġeqnub. Bati gargekoba e ino anġro nanġi tuwe du du bul koroinjrqajqa yeqnam ninġi saideqnu. <sup>38</sup> Deqa ninġi quiy. Qotei a nuġgo atra tal koba uratetġimqa a laġa sqas. <sup>39</sup> Deqa e ninġi endegsi mernġwai. Ninġi olo e nubqasai. Degsim gilsim mondoġ e olo laġ qureq na boqnitqa ninġi e nubsib marqab, ‘Tamo a bqo endi Tamo Koba aqa ñam na bqo. Deqa Qotei na a tulaġ geregereiyeqnu.’ ”

## 24

### *Bunuqna jEU tamo nanġi na atra tal niñaqyqab*

<sup>1</sup> Osiqa Yesus a atra tal koba uratosiq gileqnaqa aqa anġro nanġi na aqa areq bosib atra tal osoryeb. <sup>2</sup> Osoryonab Yesus na minjrej, “E bole mernġwai. Atra tal ninġi unonub endi bunuqna jEU tamo nanġi na bosib tulaġ niñaqyosib aqa meniġ kalil paraparainjrsibqa taqal breinjrqab. Yimqa meniġ bei meniġ bei aqa quraq di sqasai. Meniġ kalil segi segiqab.”

### *Gulbe kobaquja bunuqna brantqas*

<sup>3</sup> Yesus na aqa anġro nanġi degsi minjrsiqa Oliv manaq oqsiq goqe di awesonaqa aqa anġro nanġi aqa areq bosib lumu nenemyeb, “Ni iga merge. Bati gembu jEU tamo nanġi bosib atra tal endi niñaqyqab? Mandam endi koboqa laqnimqa ni olo laġ qureq na boqnim kumbra kiye namoqna brantim iga unsim poigwas, ‘Bati di jojomoq?’”

<sup>4</sup> Onaqa Yesus na kamba minjrej, “Ninġi geregere ñam atoqniy. Tamo qudei na ninġi gisanġo uge. <sup>5</sup> Bunuqna gisaġ tamo gargekoba nanġi ijo ñam na boqnsib tamo unġasari nanġi endegsib minjroqnqab, ‘E Kristus.’ Degsib tamo unġasari tulaġ gargekoba nanġi gisaġnjroqnqab. <sup>6</sup> Bunuqna sawa bei

bei qaji nanġi an na qotokobaoqnqab. Ningi deqa qusib ulaaib. Qotei a nami marej, ‘Kumbra di brantqas.’ Deqa brantem. Ariya kumbra di brantimqa diġo bati urur brantqasai. Soboleiyosim brantqas. <sup>7</sup> Bati deqa sawa bei ti sawa bei ti qotoqnqab. Mandor qudei nanġi tigeloqnsibqa mandor qudei nanġi qoto itnjroqnqab. Sawa bei beiq di mimin kokba ti mam ti inġi saio bati dego brantelenqas. <sup>8</sup> Kumbra kalil di uġa anġrotqa osiqa mati jaqatin kiġala eqnu dego kere.

<sup>9</sup> “Bati deqa nanġi na ningi ojelenoqnsib jaqatin ti gulbe ti enġoqnqab. Osib ningi qudei luġsib moiyoġnwab. Ningi ijo ñam ejunub deqa sawa bei bei qaji nanġi ningi qa tulaġ ugeoqnsib jeutnjgoqnqab. <sup>10</sup> Bati deqa tamo uġgasari gargekoba e qa nanġo areqalo sinġilato qaji nanġi ijo ñam ulontosib segi segi jeu sqab. Sosibqa nanġo segi was nanġi ojelenoqnsib tamo uge nanġo baġq di atoqnqab. <sup>11</sup> Gisaġ tamo tulaġ gargekoba nanġi boqnsib ijo segi tamo uġgasari nanġi endegsib minjroqnqab, ‘E Qotei aqa medabu o qaji tamo bole.’ Degsib nanġi gisaġnjroqnqab. <sup>12</sup> Kumbra uge deqaji tulaġ kobaoqnmqa tamo gargekoba nanġi qalaqalaiyo kumbra uratoqnqab. <sup>13</sup> Ariya ningi ijo ñam sinġila na ojsib gilsib diġo bati itqab di Qotei na ningi elenqas. <sup>14</sup> Ijo wau tamo nanġi sawa sawa kalil keretoqnsibqa Qotei aqa anjam bole mare mare laqnqab. Amqa diġo bati brantqas. Anjam bole di aqa damu agiende. Qotei na aqa segi tamo uġgasari nanġi taqatnjrsim nanġo Mandor Koba sqas.”

### *Inġi tulaġ ugedamu brantqas*

<sup>15</sup> Osiqa Yesus a olo aqa anġro nanġi endegsi minjrej, “Diġo batiamqa inġi tulaġ ugedamu Qotei aqa medabu o tamo Daniel a nami deqa marej qaji di brantim ningi unqab. Inġi ugedamu di a Qotei aqa getento warum miligiq di tigelesqas.” E Matyu. Tamo uġgasari ijo anjam endi sisiyeqnu bati nanġi geregere sisiyosib poinjrem. Poinjrim marqab, bole. <sup>16</sup> Osiqa Yesus na aqa anġro nanġi olo endegsi minjrej, “Ningi inġi ugedamu di unsibqa bati deqa tamo uġgasari Judia sawaq di unub qaji nanġi jaraiyosib manaq oqoqujatebe. <sup>17</sup> Tamo uġgasari tal meq di unub qaji nanġi jaraiqa oqnsib inġi inġi oqa osibqa olo warum miligiq gilaib. Nanġi jaraiyoqujatebe. <sup>18</sup> Tamo uġgasari wauq di unub qaji nanġi jaraiqa oqnsib nanġo gara jugo oqa osibqa olo puluosib qureq baib. Nanġi tori dena jaraiyoqujatebe. <sup>19</sup> Bati deqa uġa gumaġ ti uġa anġro mom ti jaraiyo baġgioqnsib gulbe koba oqab. <sup>20</sup> Deqa ningi endegsib pailyoqniy, ‘Gulbe di awa bati qa brantaiq. Yori bati qa dego brantaiq.’ <sup>21</sup> Ningi degsib pailyoqniy. Di kiyafa? Bati deqa tamo uġgasari nanġi gulbe tulaġ kobaquja oqab. Gulbe deqaji nami brantosaioqnej. Qotei na mandam

atej bati deqa gulbe deqaji brantosai dena bosib bosiq agi bini unum. Bunuqna lanja ambleq di dego brantqasai. Agi bati qujai deqa brantqas. <sup>22</sup> Gulbe di aqa bati Qotei na truqutqas. A na truqutqasai di tamo ungasari kalil nanji padalekritqab. Aqa segi tamo ungasari nami giltnjrej qaji nanji padalaib deqa a na gulbe di aqa bati truqutqas.

<sup>23</sup> “Bati deqa tamo qudei na merngwab, ‘Ninji uniy. Kristus bqo agiende’ o ‘Kristus bqo agide.’ Degrab merngibqa ninji nanjo anjam quetnjraib. <sup>24</sup> Tamo qudei nanji bosib gisanosib marqab, ‘E Kristus.’ Qudei marqab, ‘E Qotei aqa medabu o qaji tamo bole.’ Degrab maroqnsib manwa kokba babtoqnqab. Nanjo manwa dena nanji na tamo ungasari kalil areqalo niñaqyetnjroqnqab. Osib Qotei aqa segi tamo ungasari nami giltnjrej qaji nanji dego areqalo niñaqyetnjrqajqa wauoqnqab.

<sup>25</sup> “Ninji quiy. Kumbra kalil di brantosaisonaqa e namoqna merngonum. <sup>26</sup> Deqa tamo qudei na ninji endegsib merngwab, ‘Ninji uniy. Kristus bqo agi wadau sawaq di unu.’ Degrab merngibqa ninji nanjo anjam di dauryosib wadau sawaq gilaib. Tamo qudei na ninji merngwab, ‘Kristus bqo agi talq di unu.’ Degrab merngibqa ninji nanjo anjam quetnjraib. <sup>27</sup> Ninji qalie, kola minjaleqnaqa lan kalil suwanqenu. Dego kere e Tamo Angro lan qureq na boqnitqa tamo ungasari kalil nanji e nubqab.

<sup>28</sup> “Tamo nanjo jejamu qusaeqnu qaji sawa dia qal nanji koroqab.”

### *Tamo Angro a singila ti rian ti bqas*

<sup>29</sup> Osiaqa Yesus a olo marej, “Gulbe kalil di nanjo bati koboamqa sen ambruqas. Bai dego suwanqasai. Bongar nanji lan goge na ululonosis mandamq aiyelenqab. Lan goge dia inji inji kalil renjinyelenqab. <sup>30</sup> Bati deqa e Tamo Angro bqai. Ijo toqor a lan goge dia brantimqa tamo ungasari sawa sawa kalilq di unub qaji nanji e qa akamugetqab. E singila ti rian ti lanbiq na boqnit tamo ungasari kalil nanji e nubqab. <sup>31</sup> Yimqa e singila na gul anjamosiy ijo lan angro nanji qarinjritqa nanji sawa sawa kalil keretosib Qotei aqa segi tamo ungasari nami giltnjrej qaji nanji lan utru utruq na koroinjqab.”

### *Ninji qura qa yawo anjam dena poingem*

<sup>32</sup> Osiaqa Yesus a olo marej, “E na qura qa yawo anjam ninji merngitqa dena poingwas. Qura banga qalsim o ñalguyoqnimqa ninji unsib qalieqab, ‘Sen aqa bati jomqo.’ <sup>33</sup> Dego kere kumbra kalil e ubtosim merngonum qaji endi brantimqa ninji unsib endegsib qalieoiy, ‘Bole, Kristus bqajqa bati jomqo. A siranmeq di tigelejunu.’ <sup>34</sup> E bole merngwai. Tamo ungasari bini bati endeqa unub qaji

nanği kalil moreñosaisoqñibqa kumbra kalil endi brantelenqas. <sup>35</sup> Lanğ ti mandam ti koboqab. Ariya ijo anjam koboqa kere-sai.”

*Yesus bqajqa bati di tamo bei a qaliesai*

<sup>36</sup> Osiqa Yesus a olo marej, “Ijo bqajqa bati tamo qujai bei a qaliesai. Lanğ anğro nanği qaliesai. E Qotei aqa Njiri e segi dego qaliesai. Ijo Abu a segi qalie. <sup>37</sup> Noa aqa bati qa tamo unğasari nanği kumbra yoqneb dego kere e Tamo Anğro bqajqa bati qa tamo unğasari nanği kumbra degyoqnqab. <sup>38</sup> Agi Noa aqa bati qa mandam ya maqosaisonaqa tamo unğasari nanği inği ti ya ti uyoqnsib unğa banğ ojelenoqnsib sonabqa Noa a qobunğ miligiq gilej. <sup>39</sup> Mandam ya maqosim nanği padaltnjrqas nanği deqa qaliesai. Nanği lanğa nanari soqneb. Sonabqa gulbe di nanğoq di brantej. Dego kere e Tamo Anğro bqajqa bati qa tamo unğasari nanği nanari degsib sqab. <sup>40</sup> Tamo aiyel wau qujaiq di inği yagoqñibqa Qotei na bei lanğ qureq osi oqsimqa bei uratim sqas. <sup>41</sup> Unğa aiyel tal qujaiq di saplanğ gereiyoqñibqa Qotei na bei lanğ qureq osi oqsimqa bei uratim sqas. <sup>42</sup> Deqa ninği geregere ñam atiy. E nunğo Tamo Koba. E bati gembu bqai di ninği qaliesai. <sup>43</sup> Ninği are qaliy. Bati gembu bajinğ tamo a bosim tal paratqas di tal lanğa a qalieqasai. A nami qalieosiq sonaq qamu bajinğ tamo bosiq tal paratqa yonaq unsiq wiyej qamu. <sup>44</sup> Dego kere e Tamo Anğro bqajqa bati ninği qaliesai. E bosiy ninği prugtñgaim deqa ninği geregere ñam atoqnsib e qa tariñoqnsib soqñiy.”

*Tamo yai a kanğal tamo bole?*

<sup>45</sup> Osiqa Yesus a olo marej, “Kanğal tamo yai a areqalo bole ti sosisqa gaigai wau bole yeqnu? Kanğal tamo di tal lanğa na endegsi minğqas, ‘Ni na ijo kanğal tamo kalil nanği geregere taqatnjroqnsimqa nanğo inği uyqajqa batioqñimqa inği anainjroqnsim soqne.’ <sup>46</sup> Degsi minjsimqa sawa beiq gilsim di sqas. Olo puluosim wau kalil a na aqa kanğal tamo yej qaji di kalil keretosim soqñimqa a bosim unimqa kanğal tamo di a tulanğ areboleboleiyqas. <sup>47</sup> Deqa e bole mernğwai. Kanğal tamo di a wau boledamu yej deqa tal lanğa na aqa inği inği kalil osim aqa banğ di atim a na taqatetoqnqas. <sup>48</sup> Ariya kanğal tamo di a tamo uge sqas di a endegsi are qalqas, ‘Ijo tamo koba a urur bqasai.’ <sup>49</sup> Degsi are qalsimqa a na kanğal tamo qudei a ombla wauo qaji nanği lanğa lanğa kumbainjroqnqas. Osim wain uyo tamo qudei nanği joqsim koba na inği ti wain ti uyoqnsib nanarioqnqab. <sup>50</sup> Aqa tamo koba bqajqa bati a qaliesai deqa a kumbra degsim yoqñimqa aqa tamo koba brantoqujatosim unimqa a tulanğ prugugetqas. <sup>51</sup> Deqa aqa tamo koba a na qalougetosim gisanğ

tamo nanjo so sawaq waiyim aiqas. Sawa dia tamo nanji tulan akamkobaoqnsib pailoqnsib nanjo jaqatin qa qalagei anjam atoqnaqas.”

## 25

### *Dunqenge 10 nanjo yawo anjam*

<sup>1</sup> Osiqa Yesus a olo marej, “Qotei lan qureq di unu qaji a na aqa segi tamo unqasari nanji taqatnjrsim nanjo Mandor Koba sqas. Kumbra di dunqenge 10 nanjo kumbra sigitejunu. E deqa ninji sainqwai. Tamo bei a unqa ban ojej. A unqa ban ojqa sawaq gilqa laqnaqa dunqenge 10 nanji a ombla gilqa marsib nanjo segi segi lam osib walwelosib aisib gamq di a qa tariñoqneb. <sup>2</sup> Dunqenge 5 nanji nanari. Dunqenge 5 nanji powo ti. <sup>3</sup> Dunqenge nanari nanjo lam miligiq di ya kiñala segi soqnej. Nanji lam ya bei o ti aiyosai. <sup>4</sup> Dunqenge powo ti nanji nanjo lam osibqa lam ya jaliñaq di qamsib o ti aiyeb. <sup>5</sup> Ariya tamo a unqa ban ojqa sawaq urur gilosai. A sokobaiyej. Deqa dunqenge 10 nanji gamq di a qa tariñosib sonabqa urnamnjrnaqa nereneb.

<sup>6</sup> “Nerenesonabqa qolo jige tamo qudei nanji maosib mareb, ‘Tamo unqa ban ojqa qaji agi gileqnu. Deqa ninji tigelosib walwelosib gamq di a turoiy.’ <sup>7</sup> Onaqa dunqenge 10 nanji tigelosib nanjo lam gereiyeb. <sup>8</sup> Gereiyosibqa dunqenge nanari nanji na dunqenge powo ti nanji minjreb, ‘Ninji lam ya kiñala egij. Gago lam ya saiqa deqa mosoqa laqnu.’ <sup>9</sup> Onaqa dunqenge powo ti nanji na kamba minjreb, ‘Lam ya endi gago segi qa kere. Iga ninji qa ti keresai. Deqa ninji olo sumsib nunjo segi lam ya awaiyiy.’ <sup>10</sup> Onaqa dunqenge nanari 5 nanji tigelosib lam ya awaiyqajqa sumeqnabqa tamo di a unqa ban ojqa sawaq giloqnej. Gileqnaqa dunqenge powo ti nanji nami nanjo lam gereiyosib soqneb deqa nanji na tamo di dauryosib unqa ban ojqa sawaq gileb. Gilsib tal miligiq gilekritisib siran kabuteb.

<sup>11</sup> “Sokiñalayonaq dunqenge nanari nanji tal meq di brantosib maosib tamo di minjeb, ‘O Tamo Koba, iga bonum. Ni na siranme waqtetgime.’ <sup>12</sup> Onaqa a na kamba minjrej, ‘E bole mernqwai. E ninji qaliesai.’ ”

<sup>13</sup> Osiqa Yesus a olo marej, “Dego kere ninji geregere nam atsib soqniy. Di kiyaqa? Ijo bqajqa bati ninji qaliesai deqa.”

### *Silali taqatqajqa yawo anjam*

<sup>14</sup> Osiqa Yesus a olo marej, “Qotei na aqa segi tamo unqasari nanji taqatnjrsim nanjo Mandor Koba sqas. Kumbra di tamo bei a sawa isaq gilsiq di soqnej dego kere. A gilqa osiqa aqa kanqal tamo nanji koroinjrsiqa nanji na aqa silali taqatqa



minjrsiq nanjo banq di uratetnjrej. <sup>15</sup> A na aqa kanqal tamo nanjo segi segi siŋgila pegiyetnjrsiqa nanqi wau yqajqa kere dego silali pupoiyosiqa enjrej. Bei 5,000 kina yej. Bei 2,000 kina yej. Bei 1,000 kina yej. Osiqa a sawa isaq gilsiq di soqnej. <sup>16</sup> Sonaqa kanqal tamo 5,000 kina ej qaji a silali dena wauosiqa olo 5,000 kina bei ej. <sup>17</sup> Kanqal tamo 2,000 kina ej qaji a dego silali dena wauosiqa olo 2,000 kina bei ej. <sup>18</sup> Ariya kanqal tamo 1,000 kina ej qaji a silali dena wauosai. A silali di osi gilsiq mandamq di sub bogsiq sub miligiq di ulitonaq soqnej.

<sup>19</sup> “Bati olekoba yala koboonaqa tamo koba a olo puluosi bosiq aqa kanqal tamo nanqi wauqa silali enjrej qaji di metnjrej. Metnjrnaqa nanqi aqa areq bonabqa a na minjrej, ‘E nami silali engem qaji dena niŋgi waueb olo silali di osorbiy.’ <sup>20</sup> Onaqa kanqal tamo 5,000 kina ej qaji a na 5,000 kina bei osi bosiq aqa tamo koba minjej, ‘O Tamo Koba, ni unime. Ino 5,000 kina nami ebem qaji dena e wauonamqa olo 5,000 kina bei brantej agiende.’ <sup>21</sup> Onaqa aqa tamo koba a na minjej, ‘Ni kanqal tamo bolequja. Ni wau kiñala geregere taqatonum deqa e wau gargekoba olo ino banq di uratitqa ni na taqatoqnqam. Deqa ni bosim e ombla areboleboleigim sqom.’

<sup>22</sup> “Onaqa kanqal tamo 2,000 kina ej qaji a bosiq aqa tamo koba minjej, ‘O Tamo Koba, ni unime. Ino 2,000 kina ebem qaji dena e wauonamqa olo 2,000 kina bei brantej agiende.’ <sup>23</sup> Onaqa aqa tamo koba a na minjej, ‘Ni dego kanqal tamo bolequja. Ni wau kiñala geregere taqatonum deqa e wau gargekoba olo ino banq di uratitqa ni na taqatoqnqam. Deqa ni bosim e ombla areboleboleigim sqom.’

<sup>24</sup> “Onaqa kanqal tamo 1,000 kina ej qaji a bosiq aqa tamo koba minjej, ‘O Tamo Koba, ni que. E nami qalieem, ni tamo njirin ani. Tamo qudei nanqi iŋgi yageq nab melieqnaqa ni segi na otorosim uyeqnum. Tamo qudei nanqi saga yago breiyeq nab boleeqnaq ni segi na koroiyoqnsim uyeqnum. <sup>25</sup> Deqa e ni qa ulaosim ino 1,000 kina ebem qaji di osi gilsimqa mandamq di sub bogsim sub miligiq di ulitonam soqnej agiende.’

<sup>26</sup> “Onaqa aqa tamo koba a na minjej, ‘Ni kanqal tamo uge. Ni lola ani. Ni nami qalieem, tamo qudei nanqi iŋgi yageq nab melieqnaqa e segi na otorosim uyeqnum. Tamo qudei nanqi saga yago breiyeq nab boleeqnaq e segi na koroiyoqnsim uyeqnum. Ni nami e qa degsim qalieem. <sup>27</sup> Deqa ni kiyaaq ijo silali di osi gilsim silali talq atosai? Ni di atem qamu e bosimqa silali talq dena ijo silali aqa oto kobaqo qamu turtosim onum qamu.’ <sup>28</sup> Degsi minjsiqa aqa kanqal tamo qudei nanqi minjrej, ‘Niŋgi 1,000 kina di yayiyosibqa kanqal

tamo nami wauosiqa 10,000 kina ejunu qaji di olo yiy. <sup>29</sup> Ningi degyiy. Di kiyaaqa? Tamo a wau geregere taqatoqnqas di Qotei na olo wau yimqa a wau gargekoba taqatoqnqas. Ariya tamo a wau geregere taqatqasai di wau kiñala a na taqatejunu qaji di a olo bunu taqatqasai. Qotei na a kobotimqa a laña sqas. <sup>30</sup> Deqa ningi na kanjal tamo uge di qalaq di waiyibqa sawa ambruq di soqnem. Sawa dia nanqi akamkobaoqnsib pailoqnsib nanjo jaqatin qa qalagei anjam atoqnqas.’ ”

*Mondon Tamo Angro a bosim tamo ungasari kalil nanqi peginjrqas*

<sup>31</sup> Osiqa Yesus a olo marej, “Mondon e Tamo Angro ñam kobaquja oqai. Osiy lan angro kalil nanqi joqsiy mandamq aisiy ijo segi awo jaram kobaq di awesqai. <sup>32-33</sup> Awesoqnit sawa bei bei qaji kalil nanqi bosib ijo ulatamuq di koroabqa e na nanqi peginjrqai. E na nanqi qudei ijo ban woq di atelenosiy olo nanqi qudei ijo ban qonanq di atelenqai. Wagme taqato tamo nanqi na kaja ti meme ti nanqi peginjreqnub dego kere. <sup>34</sup> Osiy tamo ungasari ijo ban woq di unub qaji nanqi endegsi minjrqai, ‘Ijo Abu a ningi qa tulan areboleboleiyeqnu. Nami a mandam atej bati deqa a nunjo Mandor Koba sosim ningi taqatngwajqa gam gereiyetngej. Deqa ningi ijoq babqa ijo Abu na ningi taqatngwas. <sup>35</sup> Di kiyaaqa? E mambonaqa ningi na e inqi anaibeb. E ya qarbonaqa ningi na e ya anaibeb. E yaun tamo sonamqa ningi na e osib nunjo talq di gereibeb. <sup>36</sup> E gara saiqoji sonamqa ningi na gara tigetbeb. E maibonaqa ningi na e taqatbeb. E tonto talq di sonamqa ningi na bosib e gereibeb.’

<sup>37</sup> “E na tamo ungasari ijo ban woq di unub qaji nanqi degsi minjritqa nanqi e kamba nenembqab, ‘O Tamo Koba, bati gembu ni mammonaqa iga na inqi anaimem? Bati gembu ni ya qarmonaqa iga na ya anaimem? <sup>38</sup> Bati gembu ni yaun tamo sonamqa iga ni osim gago talq di gereimem? Bati gembu ni gara saiqoji sonamqa iga na gara tigetmem? <sup>39</sup> Bati gembu ni maimonaqa iga na taqatmem? Bati gembu ni tonto talq di sonamqa iga bosim ni gereimem?’

<sup>40</sup> “Nanqi e degsib nenembibqa e na kamba minjrqai, ‘E bole merngwai. Ningi na ijo was ñam saiqoji unub qaji nanqi geregereinjroqneb di agi ningi e dego gereiboqneb.’

<sup>41</sup> “Ariya e na tamo ungasari ijo ban qonanq di unub qaji nanqi endegsi minjrqai, ‘Ningi tamo ungasari tulan ugedamu. Deqa ningi jaraiyiy. Jaraiyosib aisib njamyuwo gaigai yuejunu qaji dia soqniy. Satan aqa lan angro nanqi ti dia sqab. Qotei a nami njamyuwo di nanqi gereiyetnjrej. <sup>42</sup> Deqa ningi njamyuwo deq aiyiy. Di kiyaaqa? E mambonaqa ningi na e inqi anaibosai. E ya qarbonaqa ningi na e ya anaibosai. <sup>43</sup> E yaun tamo sonamqa ningi na e osib nunjo talq di gereibosai. E gara

saiqoji sonamqa ningi na gara tigetbosai. E maibonaqa ningi na e taqatbosai. E tonto talq di sonamqa ningi na bosib e gereibosai.'

<sup>44</sup> "E na tamo ungasari ijo ban qonanq di unub qaji nanqi degsi minjritqa nanqi e kamba nenembqab, 'O Tamo Koba, bati gembu ni mammej? Bati gembu ni ya qarmej? Bati gembu ni yaun tamo soqnem? Bati gembu ni gara saiqoji soqnem? Bati gembu ni maimej? Bati gembu ni tonto talq di soqnem? O Tamo Koba, bati gembu ni degsi sonamqa iga ni numsim gereimosai?'

<sup>45</sup> "Nanqi e degsib nenembibqa e na kamba minjrqi, 'E bole mernjwai. Ningi na ijo was nam saiqoji unub qaji nanqi gereinjrosaiqneq di agi ningi e dego gereibosaiqneq.' <sup>46</sup> E na nanqi degsi minjrsiyqa nango awai uge enjrsiy breinjrit nanyuwoq aiqab. Dia nanqi bati gaigai jaqatin oqnsib sqab. Ariya tamo ungasari kumbra bole yeqnub qaji nanqi nambile gaigai sqab."

## 26

*Juda tamo kokba nanqi Yesus qalib moiqaqqa gam namoqneq*

<sup>1</sup> Yesus a anjam kalil di marsiq koboonaqa a na aqa angro nanqi endegsi minjrej, <sup>2</sup> "Ninqi qalie, yori bati koba jojomoqo. Bati aiyel unu. Yori bati di brantimqa Juda tamo kokba nanqi na e Tamo Angro ojsib jeu tamo nango banq di atqab. Atibqa nanqi na e namburbasq di lubib moiqai." Yesus na aqa angro nanqi degsi minjrej. Yori bati di Qotei a nami Israel nanqi Isip sawaq di padalqa laqnabqa aqaryainjrej deqa olo are qalqajqa bati.

<sup>3</sup> Yori bati di jojomej deqa atra tamo kokba ti Israel nango gate nanqi ti gilsib atra tamo gate aqa nam Kaiafas aqa talq di koroeb. <sup>4</sup> Koroosib endegsib nenemoqneq, "Iga kiyersim Yesus lumu na ojsim qalsim moiyoqom?" <sup>5</sup> Osib mareb, "Iga yori bati qa Yesus ojqsai. Ojqom di tamo ungasari nanqi iga nugsib njirinosis qoto tigelto uge."

*Unja bei a gorej quleq ti osiq Yesus aqa gateq di bilentej*

<sup>6</sup> Onaqa Yesus a Betani qureq gilsiqqa tamo bei nami yu na aqa jejamu ugeelenej qaji aqa nam Saimon aqa talq di soqnej. <sup>7</sup> Sosisqa inji uyeqnaqa unja bei a gorej quleq ti tulan boledamu silali kobaquja na awaiyej qaji di jalinajq jigsiqqa osi bosiqqa Yesus aqa gateq di bilentej. <sup>8</sup> Onaqa Yesus aqa angro nanqi unja di aqa kumbra unsibqa njirinosis segi segi maroqneq, "Unja di a kiyaaqa gorej di lanja nanguiyqo?" <sup>9</sup> A gorej di osiq tamo qudei enjrqa qamu silali kobaquja yonub qamu gilsiq tamo inji inji saiqoji nanqi jeisi enjrqa qamu di kere."

<sup>10</sup> Onaqa Yesus a nanjo areqalo di qalieosiqa minjrej, “Ninji kiyaqa unja di gulbe yeqnub? A kumbra bole ebqo. <sup>11</sup> Tamo inji inji saiqoji nanji bati gaigai ninji ti sqab. Ariya e bati gaigai ninji ti sqasai. <sup>12</sup> E moiqai. Moiyyitqa e subq atqab. Unja di a e qa are qalsiqa ijo jejamuq di gorej bilentosiq dena ijo jejamu subq atqajqa gereiyetbqo. <sup>13</sup> E bole merngwai. Bunuqna ijo wau tamo nanji sawa sawa kalilq di ijo anjam bole mare mare laqnsibqa unja endena kumbra ebqo qaji deqa are qaloqnsib a qa saonqab.”

*Judas a Yesus osim atra tamo kokba nanjo banq di atqas*

<sup>14</sup> Onaqa Judas Iskariot a tigelosiqa atra tamo kokba nanjoq gilej. Judas a Yesus aqa angro 12 nanji deqaji bei. <sup>15</sup> A nanjoq gilsiqqa minjrej, “Ninji na awai kiye ebibqa e Yesus osiy nunjo banq di atqai?” Onaqa nanji na menin silali 30 yeb. <sup>16</sup> Yonab a gilsiqqa a Yesus osim nanjo banq di atqajqa gam njamonej.

*Yesus aqa angro nanji ti yori bati aqa inji uyeb*

<sup>17</sup> Ariya Bem Tiyosai Qaji Uyqajqa Bati brantonaqa Yesus aqa angro nanji aqa areq bosib minjeb, “O Tamo Koba, ni iga merge. Iga aisim tal qabia yori bati aqa inji inji gereiyetmonamqa ni inji uyqam?” <sup>18</sup> Onaqa Yesus na kamba minjrej, “Ninji aisib qure ambleq di tamo bei itqab. Itosib minjiy, ‘Qalie Tamo a marqo, ‘Ijo bati jojomqo. Deqa e ijo angro nanji koba na ino talq di awoosim yori bati aqa inji uyqom.’ ” <sup>19</sup> Onaqa Yesus aqa angro nanji qure miligiq aisib anjam kalil Yesus na minjrej qaji degsib brantonab dauryosib inji inji kalil gereiyelenjeb.

<sup>20-21</sup> Onaqa bilaqtonaqa Yesus aqa angro 12 nanji ti koba na aisib tal gogetosib awoosib inji uyoqnsibqa Yesus na nanji endegsi minjrej, “E bole merngwai. Ninji ijo angro 12. Nunjo ambleq dena angro bei a tigelosim e osim tamo qudei nanjo banq di atqas.” <sup>22</sup> Degsi minjrnaq qusibqa are tulan gulbeinjrnaga segi segi Yesus nenemyoqneb, “O Tamo Koba, ni e qa kiyo maronum?” <sup>23</sup> Onaqa minjrej, “Angro aqo ombla endego tabir qujaiq di bem quiq di tuqteqnum qaji a na e osim tamo qudei nanjo banq di atqas. <sup>24</sup> Ninji quiy. E Tamo Angro moiqai. Nami Qotei aqa anjam degsib e qa nengrenjeb. Deqa unqum. E anjam di dauryosiy moiqai. Ariya angro e osim tamo qudei nanjo banq di atqas qaji a tulan padalougetqas. A nami nambabosai qamu di kere.” <sup>25</sup> Onaqa Judas agi Yesus osim jeu tamo nanjo banq di atqas qaji a na Yesus nenemyej, “O Tamo Koba, ni e qa kiyo ubtosim maronum?” Onaqa Yesus na kamba minjej, “Od. Anjam agi ni na maronum.”

*Yesus na aqa angro nanji bem ti wain ti anainjrej*

<sup>26</sup> Osiqa Yesus aqa anğro nañgi koba na inçi uyoqnsibqa Yesus a Qotei pailyosiqa bem bei osiq giñgenyosiqa aqa anğro nañgi enjrsiqa endegsi minjrej, “Endi ijo jejamu. Osib uyiy.”  
<sup>27</sup> Osiqa wain osiqa gambanq di bilentosiq Qotei pailyosiqa aqa anğro nañgi enjrsiqa minjrej, “Niñgi kalil wain endi uyiy.  
<sup>28</sup> Endi ijo leñ. Tamo unğasari gargekoba nañgo une kobotet-njrqaqqa deqa ijo leñ aıqas. Aisim Qotei aqa anjam bunuj nami gereiyej qaji di siñgilatqas. <sup>29</sup> E niñgi mernğwai. E wain endi olo uyqasai. Degsi gilsiy mondoñ diño batiamqa ijo Abu a nuñgo Mandor Koba soqnimqa e niñgi koba na awoosiy olo wain bunuj uyqai.”

<sup>30</sup> Yesus na aqa anğro nañgi degsi minjrsiqa nañgi koba na lousib koboonaqa qure uratosib Oliv manaq oqeb.

*Yesus na aqa anğro nañgi minjrej, “Niñgi kalil e uratbosib jaraiqab”*

<sup>31</sup> Yesus aqa anğro nañgi ti manaq oqoqnsibqa Yesus na minjrej, “Qolo qujai endeqa niñgi kalil ijo ñam ulontosib e uratbosib jaraiqab. Nuñgo kumbra deqa Qotei aqa anjam bei nami endegsib nenğrenyeb, ‘E na kaja nañgo mandor qalitqa kaja nañgi segi segi jaraiqab.’ Qotei aqa anjam nami degsib nenğrenyeb. <sup>32</sup> Ariya bati qalub koboamqa e olo subq na tigelosiy niñgi qa namoosiy Galili sawaq gilitqa niñgi bunuqna e daurbosib dia e itbqab.” <sup>33</sup> Onaqa Pita na minjej, “Anğro kalil nañgi ino ñam ulontosib jaraiqab e segi ino ñam ulontqasai.” <sup>34</sup> Onaqa Yesus na kamba minjej, “E bole mermqai. Qolo qujai endeqa ni ijo ñam ulitqam. Tuwe anjamosaisoqnimqa ni gisañoqalubtosim marqam, ‘E Yesus qaliesai.’” <sup>35</sup> Onaqa Pita a tulañ saidosiq minjej, “Sai. E ni ombla moiqa marimqa, unğum, e ino ñam ulitqasai bole sai.” Onaqa Yesus aqa anğro kalil nañgi anjam qujai di minjoqneb.

*Yesus a Getsemani nañu aguq di aqa Abu pailyej*

<sup>36</sup> Yesus aqa anğro nañgi koba na walwelosib nañu agu beiq di branteb. Nañu agu di aqa ñam Getsemani. Di brantosib Yesus na aqa anğro nañgi minjrej, “Niñgi endi awesoqniy. E kiñala sasalosiy ijo Abu pailyosiy bqai.” <sup>37</sup> Degsi minjrsiqa aqa anğro qalub agi Sebedi aqa niri aiyel nañgi Pita koba na joqsıqa pailyqajqa sasalej. Sasalosıqa pailyoqnsıqa a are tulañ gulbekobaiyej. <sup>38</sup> Osiqa aqa anğro qalub nañgi minjrej, “E are tulañ gulbekobaibqo. Gulbe dena e moiyepratonum. Deqa niñgi e ombla endi sosimqa ñam atoqniy.” <sup>39</sup> Degsi minjrsiqa olo kiñala sasalosıqa mandamq di ñam quosıqa Qotei pailyosiq minjej, “O ijo Abu, gam bei soqnimqa ni na marimqa gulbe endi ijoq baiq. Gulbe endi ya uge uyo

bul. Uŋgum, ni ijo areqalo dauryaim. Ni ino segi areqalo dauryosim ye.”

<sup>40</sup> Yesus a degsi Qotei pailyosiq olo tigelosiqqa aqa angro nanŋo areq aisiq ŋam atej di nanŋi are gulbe na ŋerenesonab unjrej. Deqa Yesus na Pita minjej, “Niŋgi e ombla na ŋam sokiñalayqa keresai e? <sup>41</sup> Niŋgi ŋerenai. Niŋgi ŋam sosib pailyoqniy. Yim gulbe bei nunŋoq bŋas di gulbe dena niŋgi uneq waiŋwasai. Bole, nunŋo are miligiq di niŋgi e daurbqajqa are unu. Ariya niŋgi segi gulbe di oqajqa siŋgila saiqoji.”

<sup>42</sup> Osiqa Yesus a olo puluosi sasalosiq endegsi pailyej, “O ijo Abu, gam bei saiamqa, uŋgum, ni ino segi areqalo dauryosim marimqa e gulbe endi oqai.” <sup>43</sup> Degsi pailyosiq bosiqqa aqa angro qalub nanŋi urnamnjrnaqa ŋerenesonab unjrej. <sup>44</sup> Unjrsiqqa olo nanŋi uratnjrsiq puluosi gilsiq a nami pailyej qaji degsi olo pailyej.

<sup>45</sup> Osiqa a olo aqa angro nanŋo areq aisiq minjrej, “Niŋgi aqaratosib geregere ŋerenjunub e? Uŋgum. Bati koboqo. Niŋgi uniy. E Tamo Anŋro osib une tamo nanŋo baŋq di atqajqa bati bŋo. <sup>46</sup> Niŋgi tigelab gilqom. Tamo e osim nanŋo baŋq di atqajqa agi brantqo.”

### *Judas a Yesus osiq jeu tamo nanŋo baŋq di atej*

<sup>47</sup> Onaqa Yesus aqa angro 12 nanŋi deqaji bei agi Judas a na tamo gargekoba nanŋi sebru ti torom ti elenonab joqsiqua Yesus aqa areq di branteb. Israel nanŋo gate nanŋi ti atra tamo kokba ti nanŋi na nanŋi qarinjrnab Yesus ojqa beb. <sup>48</sup> Judas a nami nanŋi ti qairosib anjam gereiyosib a na endegsi minjrej, “E tamo kundoqyqai agide. A ojsib osib giliy.” <sup>49</sup> Onaqa Judas a Yesus aqa areq bosiq minjej, “O Tamo Koba, qolo bole.” Degsi minjsiq kundoqyej. <sup>50</sup> Kundoqyonaqa Yesus na minjej, “O was, ni kumbra kiye e ebqa bonum ni degye.” Degsi minjnaqa tamo nanŋi di brantosib baŋ waiyosib Yesus ojeb.

<sup>51</sup> Onaqa Yesus aqa angro bei na aqa sebru osiqqa atra tamo gate aqa kanŋal tamo gateq di qalqajqa sebru waiyej grotosiqqa dabkala segi gentetej. <sup>52</sup> Onaqa Yesus na aqa angro di minjej, “Ino sebru olo ate. Tamo kalil sebru na qotqab qaji nanŋi sebru na moreŋqab. <sup>53</sup> Ni que. E ijo Abu minjqai di a na laŋ angro 72,000 nanŋi qarinjrimqa bosib e aqaryaibqab. Ni di qaliesai kiyo? <sup>54</sup> Ariya e ijo Abu degsi minjqasai. Minjqai di aqa anjam nenŋrenŋ di unu qaji di aqa damu brantqasai. Agi nami endegsib nenŋrenjyeb, ‘Kristus a moiŋas.’ ”

<sup>55</sup> Osiqa bati deqa Yesus na tamo nanŋi di minjrej, “E len ojo tamo unum deqa kiyo niŋgi sebru ti torom ti elenonab e ojqa bonub e? E bati gaigai atra tal miligiq di sosimqa Qotei aqa anjam plaltoqnem. Bati deqa niŋgi yala baŋ waiyosib e ojosai. <sup>56</sup> Niŋgi kumbra degyeb deqa Qotei aqa medabu

o tamo nanjo anjam nenjrenj di unu qaji di aqa damu agi brantej.” Yesu a nanji degsi minjrnaqa aqa anjro kalil nanji a uratosib jaraiyeb.

*Juda tamo kokba nanji Yesu aqa jejamuq di une qametqa marsib koroeb*

<sup>57</sup> Onaqa tamo Yesu ojob qaji nanji na a osib atra tamo gate aqa ñam Kaiafas aqa talq osi gileb. Dia Juda gate nanji ti dal anjam qalie tamo nanji ti kalil koroesoqneb. Koroesonabqa tamo nanji na Yesu osi gilsib nanjo ulatamuq di tigeltib. <sup>58</sup> Nanji Yesu osi gileq nabqa Pita a kiñala isa isaq na Yesu dauryosiq uli uliosiq gilsiq torei atra tamo gate aqa tal meq di brantej. Brantosiqa nanji Yesu kiyeryib unqajqa deqa are qalsiq qaja tamo qudei nanjo ambleq di awesoqnej.

<sup>59</sup> Onaqa atra tamo kokba ti Juda gate nanji ti kalil ko-roesosibqa nanji gisanj anjam na Yesu aqa jejamuq di une qametqa are qalsib anjam ñamoqneb. Di kiyaaqa? Anjam dena nanji Yesu qalib moiqaqqa deqa. <sup>60</sup> Anjam ñamonab ñamonab ugeinjrej. Deqa nanji tamo gargekoba metnjreqnab boqnsib gisanj anjam Yesu aqa jejamuq di qamelenjoqneb. Nanjo ambleq dena tamo aiyel tigelosib Yesu aqa jejamu laña gisanjosib mareb, <sup>61</sup> “Tamo endi a endegsi marnaq iga quem, ‘E Qotei aqa atra tal koba endi konjrontosiyqa bati qalub qa olo tigeltqai.’ ”

<sup>62</sup> Onaqa atra tamo gate a nanjo anjam di qusiqa a tigelosiq Yesu aqa areq bosiq nenemyej, “Tamo nanji endi une gargekoba ino jejamuq di qameq nub. Di ni kamba anjam bei marqasai e?” <sup>63</sup> Onaqa Yesu a torei mequmej. A anjam bei yala marosai. Deqa atra tamo gate na olo nenemyej, “Qotei ñambile gaigai unu qaji aqa ñam na e ni nenemmqai, ni Kristus e? Ni Qotei aqa Njiri e? Ni e merbe.”

<sup>64</sup> Onaqa Yesu na minjej, “Od. Anjam ni maronum di kere. Ni que. E Tamo Anjro. Bunuqna e lanj qureq oqsij Qotei singila koba ti unu qaji aqa banj woq di awesosiy olo lanjbij na boqnit ningi e nubqab.” <sup>65</sup> Onaqa atra tamo gate a Yesu aqa anjam di qusiqa a tulan minjin oqetonaqa aqa segi gara jugo bumbranjosiq marej, “Aqa une agi a segi babtqo iga quonum. Deqa iga kiyaaqa tamo bei olo metonam bosim aqa une marqas? Aqa misilij anjam ningi quonub. <sup>66</sup> Deqa ningi kiyersib marqab?” Onaqa nanji kalil mareb, “A bole une ti. Deqa qalib moiym.”

<sup>67-68</sup> Nanji kalil degsib marnabqa nanjo ambleq dena tamo qudei nanji tigelosib Yesu aqa ulatamuq di miselyoqnsib banj na qaloqneb. Osib aqa ñamdamu gara na qosetosib ula poñyoqnsib minjoqneb, “Ni Kristus amqa ni ubtosim mare, yai na ni lumqo?”

*Pita a gisaŋoqalubtosiq marej, “E Yesus qaliesai”*

<sup>69</sup> Ariya Pita a tal meq di awesonaqa kaŋgal uŋa bei na aqa areq bosiq minjej, “Ni dego Yesus Galili qaji aqa angro bei. Ni nami a dauryosim laqnem.” <sup>70</sup> Onaqa Pita a tamo kalil naŋgo ŋamdamuq di tulaŋ saidosiq uŋa di minjej, “Ni anjam merbonum di e qaliesai.” <sup>71</sup> Degsi minjsiqa tigelosiq tal qala beiq gilsiq di soqnej. Sonaqa kaŋgal uŋa bei na Pita unsiqa tamo naŋgi Pita aqa areq di tigelesoqneb qaji naŋgi minjrej, “Tamo di a dego Yesus Nasaret qaji aqa angro bei. A nami Yesus dauryosiq laqnej.” <sup>72</sup> Onaqa Pita a olo tulaŋ saidosiq marej, “E tamo di qaliesai bole sai. E bole maronum.” <sup>73</sup> Olo kiŋala soboleiyonaq tamo qudei jojom di tigelesoqneb qaji naŋgi Pita aqa areq bosib minjeb, “Iga ino anjam maro na qalieonum, ni Galili qaji tamo. Dena iga poigwo, ni Yesus aqa angro bei.” <sup>74</sup> Onaqa Pita a olo tulaŋ singila na saidosiq marej, “E tamo di qaliesai bole sai. E bole maronum. E gisaŋot Qotei na e lubem.” A degsi marnaqa tuwe anjamej. <sup>75</sup> Tuwe anjamonaga Pita a qusiqa anjam nami Yesus na minjej qaji, “Tuwe anjamosaisoqnimqa ni gisaŋoqalubtosim marqam, ‘E Yesus qaliesai,’” anjam deqa olo are qalsiqa poiyoŋaqa oqedosiqa tulaŋ akamugetej.

## 27

*Juda tamo kokba naŋgi Yesus osib Pailat aqa baŋq di ateb*

<sup>1-2</sup> Onaqa nobqolo malu qameqnaq atra tamo kokba ti Israel naŋgo gate naŋgi ti kalil koroesosibqa Yesus qalib moiqaŋqa anjam keretoqneb. Anjam kereonaq naŋgi Yesus aqa baŋ tontetosib osi gilsib Rom naŋgo gate Pailat aqa baŋq di ateb.

*Judas na aqa segi jejamu qalsiq moiyej*

<sup>3-4</sup> Atra tamo kokba ti Juda gate naŋgi ti Yesus qalib moiqaŋqa anjam keretonabqa Judas a qusiqa olo areqalo bei osiqa naŋgo areq bosiq minjrej, “E une kobaquja yonum. Tamo e nuŋgo baŋq di atonum qaji a une saiqoji. Niŋgi a laŋa qalsib moiyoŋqab. Deqa meniŋ silali 30 niŋgi na ebeb qaji endi olo oiy.” Degsi minjrnaqa naŋgi na kamba minjeb, “Di gago gulbe sai. Di ino segi gulbe.” <sup>5</sup> Onaqa Judas a silali di olo osi gilsiq atra tal meq di breiyosiqa aisiq a segi na aqa kakroq di sil waiyosiq gainosiq moiyej.

<sup>6</sup> Onaqa atra tamo kokba naŋgi mareb, “Silali endi tamo qalib moiqaŋqa aqa awai. Deqa iga silali endi atra tal aqa silali ti turtqasai.” <sup>7</sup> Naŋgi degsib marsibqa silali di olo osib web gereiyo qaji tamo bei aqa mandam mutu bei awaiyeb. Yaun tamo naŋgi moreŋoqnbqa mandam mutu dia subq atelenqajqa deqa awaiyeb. <sup>8</sup> Mandam mutu di “Leŋ Aiyo Qaji Mandam”



ñam degsib waiyeb. Ñam di bini mareqñub. <sup>9-10</sup> Deqa anjam bei Qotei aqa medabu o tamo Jeremaia a nami marej qaji di aqa damu brantej. A endegsi marej, “Israel nanği Kristus aqa jejamu awaiyqa marsib meniñ silali 30 atqab. Atsib silali di olo osib web gereiyo qaji tamo bei aqa mandam mutu bei awaiyqab. Tamo Koba a na anjam degsi merbqo.” Jeremaia a nami degsi marej.

*Pailat na Yesus nenemyej, “Ni Juda nanngo Mandor Koba e?”*

<sup>11</sup> Onaqa Yesus a Pailat aqa ulatamuq di tigelonaqa Pailat na nenemyej, “Ni Juda nanngo Mandor Koba e?” Onaqa Yesus na minjej, “Od. Anjam ni maronum di kere.” <sup>12</sup> Onaqa atra tamo kokba ti Juda gate nanği ti Yesus aqa anjam di qusib minjin oqetnırnaqa Yesus gisanıyoqsib aqa jejamuq di une gargekoba qamelenoqneb. Onaqa Yesus a torei mequmej. A anjam bei kamba yala marosai. <sup>13</sup> Deqa Pailat na olo Yesus nenemyej, “Nanği une gargekoba ino jejamuq di qameqñub. Di ni queqñum e?” <sup>14</sup> Onaqa Yesus a kamba anjam bei marosai. Deqa Pailat a tulan prugugetej.

*Pailat a marej, “Ninği Yesus a ñamburbasq di qamiy”*

<sup>15</sup> Pailat aqa kumbra agiende. Wausau gaigai yori bati koba brantoqñimqa Juda tamo unğasari nanği tamo qujai aqa ñam maroqñibqa Pailat na tamo di tonto talq dena uratoqñsim enjroqñas. <sup>16</sup> Bati deqa tamo bei aqa ñam Barabas a tonto talq di soqnej. A leñ ojo tamo. <sup>17</sup> Deqa tamo unğasari kalil nanği Pailat aqa areq di koroonabqa a na nenemnırej, “E tamo yai tonto talq dena uratosiy enğwai? E Barabas uratosiy enğwai kiyo Yesus agi ninği Kristus qa mareqñub qaji a uratosiy enğwai kiyo? Ninği na merbiy.” <sup>18</sup> Pailat a nanği degsi nenemnırej. Di kiyaya? A qalıeej, atra tamo kokba nanği Yesus qa ugeosib deqa a ojsib Pailat aqa banq di ateb. <sup>19</sup> Bati di Pailat a une pegiyo qaji awo jaramq di awesonaqa aqa ñaun na anjam bei pepa mutu kiñalaq di nengrenıyosiq Pailat aqaq qarınıyej. A endegsi nengrenıyej, “Yesus aqa jejamuq di une saıqoji. Deqa ni a kumbra uge bei yaim. Qolo e ñeiobilqeiosim Yesus unonum. Deqa e are tulan gulbekobaibqo.”

<sup>20</sup> Onaqa Juda gate nanği ti atra tamo kokba ti nanği na tamo unğasari nanngo areqalo tigeltetnıreb. Tamo unğasari nanği Pailat minjibqa a na Barabas uratosim enırsim olo Yesus qalim moiqaıjqqa deqa nanngo areqalo tigeltetnıreb. <sup>21</sup> Onaqa Pailat na olo tamo unğasari nanği nenemnırej, “E tamo yai uratosiy enğwai? Barabas kiyo Yesus kiyo? Ninği na merbiy.” Onaqa nanği na kamba minjeb, “Ni Barabas uratosim ege.” <sup>22</sup> Onaqa Pailat na olo minırej, “E ninği Barabas enğwaijqqa merbonub deqa e Yesus kiyeryqai? Agi ninği a qa mareqñub.

'A Kristus.' ” Onaqa nanġi kalil murqumyosib minjeb, “Ni Yesus osim namburbasq di qame.” <sup>23</sup> Onaqa minjrej, “Kiyafaq Yesus qalit moiqa? A une kiye yqo deqa a namburbasq di qamqai?” Degsi minjrnaqa nanġi olo tulaġ murqumyoqnsib wainyoqnsib minjoqneb, “Ni a namburbasq di qame.”

<sup>24</sup> Onaqa Pailat a nanġo anjam di qusiqa endegsi poiyej, “Tamo unġasari nanġi ijo anjam quetbqasai. E nanġi said-njrqai di nanġi nriņosib qoto tigeltqab.” Pailat a degsi poiyej deqa a tamo unġasari nanġo ulatamuq di ya bei tabirq di qamsiqa ya dena aqa baġ yansosiqa minjrej, “Yesus a moiqa di nunġo une. Di ijo une sai.” <sup>25</sup> Onaqa tamo unġasari nanġi na minjeb, “Di kere. Unġum. Yesus a moiqa di gago une. Di gago anġro nanġo une dego.” <sup>26</sup> Nanġi Pailat degsib minjn-abqa a nanġo anjam di dauryosiqa Barabas tonto talq dena oqeq atsiqa nanġi enjrej. Enjrsiqa olo Yesus osiq qaja tamo nanġo baġq di atsiqa minjrej, “Niņġi Yesus bu toqoġ na kumbainyiy.” Degsi minjrnaqa nanġi na Yesus osib kumbainyeb. Kumbainyosib koboonaqa Pailat na olo minjrej, “Niņġi Yesus namburbasq di qamqajqa osib giliy.”

### *Qaja tamo nanġi Yesus misilinyoqneb*

<sup>27</sup> Pailat na qaja tamo nanġi degsi minjrnaqa nanġi Yesus osib Rom nanġo tal kobaqujaq osi gileb. Osı gilsib qaja tamo kalil nanġi metjnab bosib tal dia koroeb. <sup>28</sup> Koroosib Yesus aqa gara piqtetosib gara jugo olekoba lent mandor kokba nanġi gaigai jigeqñub deqaji bei osib Yesus jigeteb. <sup>29</sup> Osib sil luwit osib lulumosib sil dena mandor nanġo gate tatal bul gereiyosib aqa gateq di atetosib siņgila na teqiyeb. Osib bu toqoġ kanenjo osib Yesus aqa baġ woq di yonab a mandor koba bul ojsiq tigelesoqnej. Osib aqa areq di siņga pulutosib a gisaġ na binjyoqnsib minjoqneb, “O Juda nanġo Mandor Koba, kaiye.” <sup>30</sup> Degsib Yesus minjoqnsib a miselyoqnsib bu toqoġ esoqnej qaji di tatruiyosib dena aqa gateq di qaloqneb. <sup>31</sup> Nanġi degsib Yesus misilinyosib koboonaqa gara lent di piqtetosib aqa segi gara olo jigetosib aqa qawarq di namburbas atetosib a baġ ojsib gaintqa sawaq osi gileb.

### *Nanġi Yesus osib namburbasq di qameb*

<sup>32</sup> Nanġi Yesus osi giloqnsibqa gamq di tamo bei walwelosiq aiyeqnaqa a turosib ojsib Yesus aqa qawarq dena namburbas yayiosib tamo di yonabqa a kamba qoboiyosiqa gam na Yesus dauryosiq giloqnej. Tamo di aqa ñam Saimon. A Sairini qure qaji. <sup>33</sup> Nanġi Yesus osi gilsib sawa agu kiñala bei aqa ñam Golgota di branteb. Ñam di aqa damu, “Tamo gate tanu.” <sup>34</sup> Di brantosib qaja tamo nanġi na wain ya ti kial aqa ya isa koba de ti bulyosib Yesus anaiyonab uyo oneiyonaq ugeiyonaq

uratej. <sup>35</sup> Onaqa qaja tamo nanği na Yesus osib namburbasq di qameb. Qamsib Yesus aqa gara elenqa marsib gilteleneb. Osib meniņ silali alaņeb. Tamo yai aqa meniņ na buņnrqas di a na gara oqas. Degsib marsib meniņ silali alaņosib gara eleneb. <sup>36</sup> Onaqa Yesus a namburbas goge di gainesonaqa qaja tamo nanği namburbas utruq di awoosib Yesus taqatesoqneb. <sup>37</sup> Osib namburbas mutu gogeq di anjam endegsib nenğrenjyeb, “Tamo endi Yesus. A Juda nanğo Mandor Koba.” Yesus a nami maroqnej, “E Juda nanğo Mandor Koba.” Yesus aqa une deqa osib anjam di nenğrenjyeb.

<sup>38</sup> Bati deqa bajıņ tamo aiyel dego namburbasq di gaintnjrsib ñumeb. Bei Yesus aqa baņ woq di qameb. Bei Yesus aqa baņ qonaņq di qameb. <sup>39</sup> Yesus a namburbas goge di sonaqa tamo unğasari nanği aqa ulatamuq dena walwelosib gile beoqnsib a misilinjoqnsib gate gainyoqnsib minjoqneb, <sup>40</sup> “Ni nami marem, ‘E atra tal koba koņgrontosiyqa bati qalub qa olo tigeltqai.’ Ni degsi marem deqa ni ino segi jejamu aqaryaiye. Ni Qotei aqa Niriamqa ni namburbas uratosim mandamq aiye.” <sup>41-42</sup> Atra tamo kokba ti dal anjam qalie tamo nanği ti Juda gate nanği ti dego Yesus degsib misilinjoqneb. Osib segi segi maroqneb, “A na tamo unğasari gargekoba nanği aqaryainjroqnej. Ariya a na aqa segi jejamu aqaryaiyqa keresai. A Israel nanğo Mandor Koba boleamqa a namburbas uratosim mandamq aiyimqa iga unsim marqom, ‘Bole.’ <sup>43</sup> A segi mareqnu, ‘E Qotei qa ijo areqalo singilatejunum. E segi Qotei aqa Njiri.’ Aqa anjam di boleamqa Qotei na endego aqaryaiyem.” <sup>44</sup> Onaqa bajıņ tamo aiyel Yesus ombla gaintnjreb qaji nanği dego Yesus degsib misilin anjam minjoqneb.

### *Yesus a moiyej*

<sup>45</sup> Qanam jige seņ bati 12 onaqa sawa kalil tulaņ ambruosi sonaq gilsiq seņ bati 3 onaq bilaqtej. <sup>46</sup> Onaqa Yesus a tulaņ lelenosiqa marej, “Eloi, Eloi, lema sabaktani?” Di Hibru anjam. Anjam di aqa damu, “O ijo Qotei, O ijo Qotei. Ni kiyaaqa e qoreibonum?” <sup>47</sup> Onaqa tamo qudei Yesus aqa areq di tigelesoqneb qaji nanği aqa anjam di qusib mareb, “A Elaija meteqnu.” <sup>48</sup> Degsib marnabqa tamo bei a urur ti gilsiq gara ñenği bei osiq wain isa kobaq di tuqtosiqa soruq di qosisiqa osi bosiqqa Yesus anaiyqajqa soqtosiqa aqa medabuq di atej. <sup>49</sup> Onaqa tamo qudei nanği mareb, “Iga mati tariņosim koqyesqom. Elaija a bosim Yesus namburbasq dena osim mandamq atqas kiyo?” <sup>50</sup> Onaqa Yesus a olo tulaņ lelenosiqa mondor titosiq aqa nambile uratosiq moiyej.

<sup>51</sup> Bati qujai deqa gara kobaquja atra tal miligiq di gainesoqnej qaji a goge na braņosiq aisiq poaiyelej. Onaqa mimin kobaquja dego dosiq mandam renğinyonaqa

menin kokba paraparaeleneb. <sup>52-53</sup> Bati deqa Qotei aqa segi tamo ungasari gargekoba nami moreneb qaji nanngo sub waqelenonabqa nanngi olo subq na tigeleb. Bunuqna Yesus a dego subq na tigelonaqa tamo ungasari nanngi di Qotei aqa qure koba Jerusalem miligiq gileb. Gilnabqa tamo gargekoba nanngi na unjreb. <sup>54</sup> Ariya qaja tamo nanngi njamburbas utruq di Yesus taqatesoqneb qaji nanngo gate ombla na mimin dosiq mandam renjinyonaq menin kokba paraparaelenonab unsi-bqa nanngi tulan ulaugetosib mareb, “Bole. Tamo endi a Qotei aqa Niri.”

<sup>55-56</sup> Ungasari gargekoba nanngi isaq di tigelesosib Yesus koqyoqneb. Bei Maria Makdala qure qaji. Maria bei agi Jems Josep wo nanngo ai. Ariya unja bei Sebedi aqa njiri aiyel nanngo ai. Yesus a nami Galili sawaq di sonaqa ungasari nanngi dena a dauryosib laqnsib kangalyoqneb. Bati Yesus a Galili sawa uratosiqa a na nanngi joqsiqa koba na Jerusalem beleneb.

### *Josep a Yesus aqa jejamu osiq subq atej*

<sup>57-58</sup> Onaqa bilaqtonaqa ñoro tamo bei aqa ñam Josep a Yesus aqa jejamu osim subq atqa marsiqa Pailat a nenemyqa gilej. Josep a Arimatea qure qaji. A dego Yesus dauryoqnej qaji. Deqa a Pailat aqa talq gilsiq nenemyej, “Ni e odbimqa e Yesus aqa jejamu osiy subq atqa kere e?” Onaqa Pailat na odyosiqa aqa qaja tamo qudei nanngi minjrej, “Ninngi Yesus aqa jejamu osib Josep yiy.” <sup>59-60</sup> Onaqa Josep na Yesus aqa jejamu osi gilsiq gara qat omu na dalaosiq aqa segi sub bunuj nami menin miligiq di gereiyej qaji dia atej. Atsiqa menin kobaquja belbeltosiq dena sub me getentej. Osiqa olo aiyej. <sup>61</sup> Onaqa Maria Makdala qure qaji wo Maria bei wo bosib sub areq di awoosib taqatesoqneb.

### *Qaja tamo nanngi sub me taqatesoqneb*

<sup>62</sup> Juda nanngo yori bati brantqa laqnej deqa yori bati aqa inngi inngi kalil gereiyosib atnab soqnej. Deqa atra tamo kokba ti Farisi nanngi ti Pailat aqa talq gilsib minjreb, <sup>63</sup> “O Tamo Koba, Yesus a gisan tamo. Deqa a moiyoaisosiqa endegsi marnaq iga quem, ‘Bati qalub koboamqa e olo subq na tigelqai.’ A degsi marnaq iga quem. <sup>64</sup> Deqa ni ino qaja tamo qudei qarinjrimqa nanngi gilsib sub me geregere getentosib taqatesoqneb bati qalub koboqas. Ni degye. Ni degyqasai di Yesus aqa angro nanngi gilsib aqa jejamu bajinosib gisanosib tamo ungasari nanngi minjrqab, ‘Yesus a subq na tigelqo.’ Yimqa nanngo gisan anjam di tulan kobaosim Yesus aqa gisan anjam nami marej qaji di tulan bunyqas.” <sup>65</sup> Onaqa Pailat na minjrej, “Ninngi nunngo segi qaja tamo qudei joqnsib gilibqa nanngi sub me geregere getentosib taqatesqab.” <sup>66</sup> Pailat a nanngi

degsi minjrnaqa nanġi na qaja tamo qudei nanġi joqsib gilsib minjreb, “Niġi na sub me geregere taqatesoqniy.” Degsib minjrsib meniġ kobaquja nami sub me getentesoqnej qaji di olo geregere singilatosib sub meq di saga waiyeb. Nanġi degyeb. Di kiyaaqa? Yesus aqa anġro nanġi bunuqna bosib saga olo taqal atqab di tamo kalil nanġi poinjrqaq, Yesus aqa anġro nanġi aqa jejamu bajinonub.

## 28

### *Yesus a olo subq na tigelej*

<sup>1</sup> Yori bati koboonaqa nebeonaq nobqolo amburu Maria Makdala qure qaji wo Maria bei wo tigelosib Yesus aqa sub unqajqa gileb. <sup>2</sup> Nanġi gileqnaqqa Tamo Koba aqa lanġ anġro bei a lanġ goge na aisiqa meniġ kobaquja sub me getentesoqnej qaji di belbeltosiq qalaq di atsiqa meniġ quraq di awesoqnej. Awesonaqa mimiġ kobaquja dej. <sup>3</sup> Lanġ anġro di aqa ulatamu kola bul tulanġ minjalej. Aqa gara lanġbi bul tulanġ qat. <sup>4</sup> Onaqa qaja tamo sub me taqatesoqneb qaji nanġi na lanġ anġro di unsibqa nanġi tulanġ ulaugetosib gindagindanosib mandamq di ululoġosib tamo moreġo bul tindanoqneb.

<sup>5</sup> Onaqa lanġ anġro na uġa aiyel di minjrej, “Niġi ulaaib. E galie, niġi Yesus ġamburbasq di qameb qaji a qa ġameqnaq. <sup>6</sup> A endi sosai. A subq na tigelqo. Aġi a nami niġi endegsi merġej, ‘E subq na tigelqai.’ Deqa niġi aiyel bosib sub miligi uniy. A ġeioteb qaji lume aġi unu. <sup>7</sup> Niġi unsibqa olo puluosib gurgur ti aisib Yesus aqa anġro nanġi endegsib minjriy, ‘Yesus a subq na tigelqo. Tigelosiq niġi qa namoosiq Galili sawaq gilqo. Niġi dego Galili sawaq gilsib dia a itqab.’ O uġa aiyel, e niġi anjam di merġwa bonum.”

<sup>8</sup> Onaqa uġa aiyel di nanġi tulanġ ulaugeteb. Osib nanġi olo areboleholeinjrej. Deqa nanġi subq dena olo puluosib lanġ anġro na anjam minjrej qaji di Yesus aqa anġro nanġi minjrqaqqa gurgur ti aiyeb. <sup>9</sup> Aiyeqnaqqa gamq di Yesus a segi nanġi aiyel turosiqa minjrej, “Nobqolo bole.” Degsi minjrnaqa nanġi aiyel aqa areq bosibqa aqa singa ojsib a biġiyeb. <sup>10</sup> Onaqa Yesus na minjrej, “Niġi ulaaib. Niġi aisib ijo was nanġi endegsib minjriy, ‘Niġi Galili sawaq giliy. Gilsib dia Yesus itqab.’”

### *Qaja tamo nanġo gisanġ anjam*

<sup>11</sup> Uġa aiyel aiyeqnaqqa qaja tamo qudei sub taqatesoqneb qaji nanġi tigelosib qure miligiq aiyeb. Aisib kumbra kalil subq di brantonaq uneb qaji di atra tamo kokba nanġi sainjreb. <sup>12</sup> Sainjrnab qusibqa Juda gate kalil nanġi metnjrnab bosib koroosib anjam qosisib qaja tamo nanġi di silali kobaquja enjreb. Osib minjreb, <sup>13</sup> “Niġi na tamo

uŋgasari nanŋi anjam endegsib minjroqniy, ‘Iga sub taqatosim ɲereɲesonamqa Yesus aqa aŋgro nanŋi qolo bosib subq dena Yesus aqa jejamu bajinɔsib jaraiyeb.’<sup>14</sup> Yimqa Pailat a nuŋgo anjam di qusim niŋgi qa ɲirinamqa iga na aqa are olo latetosim anjam gereiyonamqa a niŋgi gulbe bei engwasai.”<sup>15</sup> Onaqa qaja tamo nanŋi silali di osib atra tamo kokba nanŋo anjam dauryosib Yesus aqa aŋgro nanŋi na aqa jejamu subq dena bajinɛb anjam di mare mare laqneb. Laqnab Juda tamo uŋgasari tulaŋ gargəkoba nanŋi anjam di quelenɔsib nanŋi kamba saoqneb agi bini saoqnsib unub.

*Yesus na aqa aŋgro nanŋi wau enjrej*

<sup>16</sup> Onaqa Yesus aqa aŋgro 11 nanŋi Galili sawaq gilsib mana bei Yesus a nami nanŋi deq oqwajqa minjrej qaji deq oqeb. <sup>17</sup> Oqsib dia Yesus itosib a binjyosib aqa ñam soqteb. Ariya nanŋi qudei areqalo aiyelteb. <sup>18</sup> Onaqa Yesus a nanŋo areq gilsiqqa minjrej, “Ijo Abu na siŋgila kalil ijo banq di atej deqa e mandam ti laŋ ti taqatejunum. <sup>19</sup> Deqa niŋgi walwelosib sawa sawa kalil keretoqnsibqa tamo uŋgasari nanŋi ijo anjam minjre minjre laqniy. Yim nanŋi e daurbqajqa deqa. Niŋgi ijo Abu aqa ñam na ti e Qotei aqa ɲiri ijo segi ñam na ti Mondor Bole aqa ñam na ti nanŋi yansnjroqniy. <sup>20</sup> O ijo aŋgro, anjam kalil e nami merngoqnem qaji di niŋgi walwelosib tamo uŋgasari nanŋi minjroqniy. Yim nanŋi anjam di dauryqajqa deqa. Niŋgi quiy. E bati gaigai niŋgi koba na wauoqnsiy sqai. Degsim soqnim soqnim diŋo bati brantqas.”

## MAK

### *Jon yansnjro qaji a anjam palontoqnej*

<sup>1</sup> Qotei aqa Njiri Yesus Kristus aqa anjam bole e utruq na saqai.

<sup>2</sup> Nami Qotei na aqa Njiri Yesus endegsi minjej, “Ni que. E na ijo anjam maro tamo qarinyitqa a ni qa namoosim ino gam gereiyetmqas. <sup>3</sup> A wadau sawaq di tulan lelenoqnsim tamo ungasari nanqi endegsi minjroqngas, ‘Tamo Koba a bqajqa gam gereiyetiy. Aqa gam tingitetiy.’” Qotei a nami aqa Njiri degsi minjej. Onaqa aqa medabu o qaji tamo Aisaia a anjam di nenngrenyonaq soqnej.

<sup>4-5</sup> Bunuqna Jon yansnjro qaji a wadau sawaq di brantej. Brantosiq dia tamo ungasari nanqi Qotei aqa anjam palontosiq minjroqnej. Tamo ungasari Judia sawaq di soqneb qaji nanqi ti Jerusalem qureq di soqneb qaji nanqi ti kalil Jon aqa areq gileq nabqa a na nanqi endegsi minjroqnej, “Ninji are bulyibqa Qotei na nungo une kalil kobotetngwas. Amqa e na ninji yansngwai.” Degsi minjre qnaqa nanqi na nanngo une kalil babteq nabqa Jordan yaq di yansnjroqnej.

<sup>6</sup> Jon a wadau sawaq di soqnej di a ingi ingi saiqoji. Deqa a gara jugo kamel aqa junqum na gereiyo qaji di jugoqnsiqa alalag na singilatosisq laqnej. A ingi uyo saiqoji deqa a sis ti bisim qaq ti uyoqnej. <sup>7</sup> A Qotei aqa anjam palontoqnsiqa tamo ungasari nanqi endegsi minjroqnej, “Tamo Koba a bunuqna ijo qoreq na bqas. A tamo singila koba. Ijo singila aqa singila ti keresai. Deqa e a kangalyqajqa e tamo bolesai. <sup>8</sup> E ya na ninji yansngeqnum. Ariya Tamo Koba a bosimqa Mondor Bole aqa singila na ninji yansngwas.” Jon na tamo ungasari nanqi anjam degsi minjroqnej.

### *Jon na Yesus yansej*

<sup>9</sup> Bati bei Yesus a Jon na yansqa marsiqa Nasaret qureq dena tigelosiqa Galili sawa uratosiq Jon aqa areq bej. Bonaqa Jon na Jordan yaq di yansej. <sup>10</sup> Yansonaqa a yaq na tigelosiqa tarosiq lan goge koqyonaqa lan waqej. Lan waqonaqa Qotei aqa Mondor a binon bulosiq aisiq Yesus aqa jejamuq di awoej. <sup>11</sup> Awoonaqa lan goge dena Qotei na Yesus metonaqa aqa kakro quej. A endegsi minjnaq quej, “Ni ijo Angro qujai. E ni tulan qalaqalaimeqnum. E ni qa tulan areboleboleibeqnu.”

*Satan a bosiq Yesus walawalaiyoqnej*

12-13 Onaqa Mondor a Yesus wadau sawaq osi gilsiq di uratonaga bati 40 a di laqnej. Di laqnaqa Satan bosiq a Yesus a une bei atqa marsiq walawalaiyoqnej. Yesus a wagne juwan nanji ti soqneb. Sonabqa Qotei aqa lan angro nanji bosib Yesus singilatoqneb.

*Yesus a Galili sawaq di aqa wau utru atej*

14 Bati bei Jon a tonto talq di waiyonab sonaqa Yesus a olo Galili sawaq ayej. Aisiq dia Qotei aqa anjam bole palontoqnej. 15 A endegsi maroqnej, “Qotei na aqa segi tamo ungasari nanji taqatnrsim nanjo Mandor Koba sqajqa bati jojomo. Deqa ninji are bulyosib Qotei aqa anjam bole nunjo areqaloq di singilatiy.”

*Yesus na tamo qolqe nanji metnjrnaq a dauryeb*

16 Osiqa Yesus a Galili ya agu kobaqujaq gilej. Gilsiq alile dia walweloqnsiq nam atej di Saimon aqa was Andru wo nanji qe o qaji tamo soqneb deqa nanji kakan waiyeq nab unjrej. 17 Unjrsiq minjrej, “Ninji aiyel e daurbiy. Ninji qe o qaji tamo unub deqa ninji qe eqnub. Dego kere e wau engitqa ninji olo tamo oqnaqab.” 18 Yesus a nanji degsi minjrnaqa nanji nanjo kakan uratosib Yesus dauryeb.

19 Onaqa Yesus a olo walweloqnsiq gilokiñalayosiqa Sebedi aqa njiri Jems aqa was Jon wo nanji aiyel qobun miligiq di kakan branjo qandimeq nabqa unjrsiq metnjrej. 20 Metnjrnaqa nanjo abu Sebedi wau tamo ti qobun miligiq di sonabqa nanji uratnrsib Yesus dauryeb.

*Yesus a tamo bei aqaq dena mondor uge wiyetej*

21 Onaqa Yesus aqa angro nanji ti walweloqnsib gilsib Kaperneam qureq di branteb. Brantosib sonabqa Juda nanjo yori batiej. Deqa Yesus a Juda nanjo Qotei tal miligiq gilsiq Qotei aqa anjam palontosiq minjroqnej. 22 Aqa anjam palontej di singila ti. Dal anjam qalie tamo nanjo anjam maroqneb de ti keresai. Yesus a segi anjam di aqa abu. Aqa anjam dena dal anjam qalie tamo nanjo anjam tulan bunyoqnej. Deqa tamo ungasari nanji Yesus aqa anjam di qusib tulan prugeb.

23 Bati di tamo bei mondor uge na ojej qaji a Qotei tal miligiq di awesoqnej. Deqa a Yesus unsiqa tulan lelenosiqa minjej, 24 “O Yesus Nasaret qaji tamo, ni iga kiyergwajqa bonum? Ni iga padaltgwa bonum e? E ni qalie. Ni Qotei aqa Tamo Boledamu. Ino jejamuq di une bei saiqoji.” 25 Onaqa Yesus na mondor uge di njirintosiq minjej, “Ni medabu getentosim tamo di uratosim ulan.” 26 Degsi minjnaqa mondor uge dena tamo di kunjimyosiqa tulan lelenosiqa a uratosiq ulanej. 27 Onaqa tamo ungasari nanji Yesus aqa manwa di unsibqa nanji tulan prugosib segi segi maroqneb, “Yesus a tamo kiyero? A anjam



bunuj mareqnu. Aqa anjam bunuj di singila ti mareqnu. A segi anjam di aqa abu. Agi a na mondor uge nanği minjre-  
qnaqa nanği aqa anjam dauryosib jaraiyeqnu.”<sup>28</sup> Tamo unğasari nanği degsib maroqneb. Osib nanği walwelosib Galili sawa keretosib Yesus aqa manwa deqa saoqnsib laqneb.

*Yesus na Pita aqa mimibe boletej*

<sup>29</sup> Onaqa Yesus aqa anğro nanği ti Qotei tal uratosib Saimon Andru wo nanğo tal gogeteb. Jems Jon wo nanği koba na tal gogeteb. <sup>30</sup> Tal gogetosibqa Saimon aqa mimibe makobaiy-  
onaq jejamu tulan kanğanyonaqa ñeiesonaq uneb. Deqa Yesus aqa anğro nanği na Yesus minjeb, “Ni na unğa di boletqa kere e?” Onaqa minjrej, “Od, e na boletqa kere.” <sup>31</sup> Degsi minjrşiqa unğa maiyej qaji aqa areq gilsıqa ban ojsıqa tigeltej. Tigeltonaqa aqa jejamu kanğan di koboonaqa a tigelosıqa nanği inği goiyetnjrej.

*Yesus a tamo unğasari gargekoba nanği boletnjroqnej*

<sup>32</sup> Sen aiyeqnaqa qure deqaji tamo unğasari ma utru segi segi so qaji nanği ti mondor uge uge na ojeleno qaji nanği ti nanğo was nanği na joqoqnsib Yesus aqa areq boqneb. <sup>33</sup> Boqnsib Yesus soqnej qaji tal meq di koroqneb. <sup>34</sup> Onaqa Yesus na tamo unğasari kalil ma ti soqneb qaji nanği bolet-  
njroqnej. Osiqa mondor uge nanği dego winjroqnej. Mondor uge nanği di Yesus qa qalieeb deqa nanği aqa ñam ubtqa mareqnab a na nanği saidnjroqnej.

*Yesus a Galili sawaq di Qotei aqa anjam mare mare laqnej*

<sup>35</sup> Onaqa nobqolo ambru Yesus na tamo unğasari nanği alelnjrşiqa wadau sawaq gilsıqa dia Qotei pailyoqnej. <sup>36-37</sup> Pailyeqnaqa aqa anğro nanği Saimon koba na a qa ñamosib gilsib itosib minjeb, “Tamo unğasari kalil nanği ni qa ñameqnu.” <sup>38</sup> Onaqa Yesus na kamba minjrej, “Ninği tigelabqa iga qure qureq giloqnsimqa dia Qotei aqa anjam palontoqnsim tamo unğasari nanği minjroqnoq. E wau di yqajqa deqa mandamq aiyem.” <sup>39</sup> Degsi minjrşiqa walweloqnsıqa qure qure kalil Galili sawaq di brantoqnsıqa Juda nanğo Qotei tal miligiq giloqnsıqa Qotei aqa anjam palontoqnsıq minjroqnej. Osiqa mondor uge uge nanği winjreqnaqa nanği na tamo unğasari nanğoq dena jaraiyoqneb.

*Yesus a tamo yu na aqa jejamu ugeelenej qaji di boletej*

<sup>40</sup> Onaqa tamo bei yu na aqa jejamu ugeelenej qaji a Yesus aqa areq bosıqa aqa singaq di singa pulutosıqa pailyoşiq minjej, “O Tamo Koba, ni e boletbqa are soqnimqa e boletbe.” <sup>41</sup> Onaqa Yesus na tamo di aqa yu unşiqa a qa dulosıqa ban

waiyosiq ojej. Ojsiqa minjej, “E ni boletmq̄a are unu. Deqa ino jejamu olo boleeme.”<sup>42</sup> Onaqa bati qujai deqa aqa yu kalil mosoosiq aqa jejamu bolelej.<sup>43</sup> Onaqa Yesus a singila na minjej, “Ni tigelosim gile.<sup>44</sup> Ino jejamu boleqo deqa ni tamo qudei nan̄gi minjraim. Ni gilsim ino jejamu atra tamo osoryosim atraiyqajqa in̄gi in̄gi Moses a nami marej qaji di osim Qotei atraiye. Yimqa tamo un̄gasari nan̄gi ni numsis marqab, ‘Bole, ino jejamu boleqo.’”<sup>45</sup> Onaqa a gilsiq ariya a Yesus aqa anjam di dauryosai. Yesus na boletej deqa a anjam mare mare laqnaqa tamo un̄gasari tulan̄ gargekoba nan̄gi quekriteb. Deqa Yesus a segitosiq̄a gilsiq̄ wadau sawaq̄ di soqnej. Tamo un̄gasari nan̄gi a jujun̄yaib deqa a qure beiq̄ di brantosaiognej. A wadau sawaq̄ di sonaqa tamo un̄gasari tulan̄ gargekoba nan̄gi qure qure kalilq̄ dena tigeloqnsib aqa areq̄ belen̄oqneb.

## 2

### *Yesus a tamo bei jejamu laiyej qaji di boletej*

<sup>1</sup> Bati bei Yesus a olo Kaperneam gilsiq̄ di sonaqa qure deqaji nan̄gi endegsis queb, “Yesus a gago qureq̄ olo b̄qo. A talq̄ di unu.”<sup>2</sup> Deqa tamo un̄gasari gargekoba nan̄gi bosib siran̄meq̄ di jujun̄onabqa Yesus a Qotei aqa anjam palontosiq̄ minjroqnej.<sup>3</sup> Onaqa tamo qolqe nan̄gi na tamo bei jejamu laiyej qaji a saperaq̄ di atsibqa qoboiyosib Yesus aqa talq̄ osi beb.<sup>4</sup> Osi bosib n̄am ateb di tamo un̄gasari gargekoba nan̄gi siran̄me jun̄onab unjreb. Deqa nan̄gi Yesus aqa areq̄ gilqa keresaiin̄rnaqa tal quraq̄ oqsib goge na waqtosibqa tamo sapera qoji gulaintosib ura uratonab Yesus aqa areq̄ aiyej.<sup>5</sup> Onaqa Yesus a nan̄go areq̄alo unej di nan̄go areq̄alo qujai Yesus na tamo jejamu laiyej qaji di boletqa kere. Degsi unsiq̄ deqa tamo di minjej, “O ijo angro, ino une kalil e na kobotetmonum.”

<sup>6</sup> Onaqa dal anjam qalie tamo qudei warum dia awesoqneb qaji nan̄gi Yesus aqa anjam di qusibqa nan̄go areq̄alo na mareb,<sup>7</sup> “Yesus a kiyaga anjam degsi marqo? A Qotei misilin̄yqo. Yai na tamo nan̄go une kobotqa kere? Qotei a segi qujai.”<sup>8</sup> Nan̄gi degsis are qaleqnabqa Yesus a nan̄go areq̄alo di qalieosiq̄a minjrej, “Nin̄gi kiyaga areq̄alo di onub?”<sup>9</sup> Anjam kiye e na tamo jejamu laiyoq̄ qaji di minjitqa nin̄gi qusib e qa poin̄gwas? ‘Ino une kalil e na kobotetmonum,’ anjam de kiyo, ‘Ni tigelosim ino sapera osim walwel,’ anjam de kiyo?<sup>10</sup> Ariya e segi Tamo Angro. E mandamq̄ endi singila ti unum deqa e na tamo nan̄go une kobotetnrqa kere. Nin̄gi degsi poin̄gwajqa deqa e na tamo di boletqai.” Yesus a nan̄gi degsi minjrsiq̄a tamo jejamu laiyej qaji di koqyosiq̄a minjej,<sup>11</sup> “E ni mermqai.

Ni tigelosim ino sapera osim ino talq gile.”<sup>12</sup> Degsi minjnaqa aqa jejamu boleonaqa a tigelosiq aqa sapera osiq aqamo ungasari kalil nanjo njamdamuq di walwelosiq gilej. Onaqa aqamo ungasari kalil nanji Yesus aqa manwa di unsibqa nanji tulan prugugetosib Qotei aqa nam soqtosib mareb, “Manwa iga endego unonum di kumbra tulan bei. Tamo bei na manwa deqaji bei yeqnaq iga nami unosaiognem.”

*Yesus na Livai minjej, “Ni e daurbe”*

<sup>13</sup> Onaqa Yesus a olo alile ainaqa aqamo ungasari gargekoba nanji bosib aqa areq di koroonaqqa a na Qotei aqa anjam palonteqnaq nanji quoqneb. <sup>14</sup> Dena walwelosiq takis o qaji tamo bei aqa nam Livai a takis o talq di awesonaq gilsiq itej. A Alfias aqa njiri. A itosiq minjej, “Ni e daurbe.” Degsi minjnaqa a tigelosiq Yesus dauryej.

<sup>15</sup> Onaqa bati bei Yesus aqa angro nanji ti Livai aqa talq gilsib awoosib inji uyoqneb. Nanji segi sai. Une tamo ti takis o qaji tamo ti gargekoba nanji dego koba na Yesus dauryosib Livai aqa talq di awoosib Yesus aqa angro nanji ti inji uyoqneb. <sup>16</sup> Onaqa Farisi qudei nanji bosib Yesus a une tamo ti takis o qaji tamo ti nanji koba na inji uyeq nab unjrsibqa Yesus aqa angro nanji minjreb, “Yesus a kiyaaq une tamo ti takis o qaji tamo ti nanji koba na inji uyeq nub?” <sup>17</sup> Onaqa Yesus a Farisi nanjo anjam di qusiq minjrej, “Tamo ma sai qoji nanji yu qangra tamo aqaq gilosaieq nub. Tamo ma ti nanji segi yu qangra tamo aqaq gileq nub. Tamo bei a marqas, ‘E tamo bole. E une sai qoji.’ E tamo deqaji nanji metnjrit ijoq bqajqa deqa mandamq aiyosai. Tamo a marqas, ‘E une ti.’ E tamo deqaji nanji metnjrit ijoq bqajqa deqa mandamq aiyem.”

*Yesus a qurien qa anjam marej*

<sup>18</sup> Bati bei Jon aqa angro nanji ti Farisi nanji ti inji uratoqnsib qurienoqneb. Deqa nanji Yesus aqa areq bosib minjeb, “Jon aqa angro nanji inji uratoqnsib qurieneq nub. Farisi nanjo angro nanji dego inji uratoqnsib qurieneq nub. Ariya ino angro nanji kiyaaq qurienosaieq nub?” <sup>19</sup> Onaqa Yesus na kamba minjrej, “Tamo bei a unja ban ojqa bati qa aqa was nanji ti soqnibqa nanji qurienqab e? Sai. <sup>20</sup> Bunuqna nanjo was a nanji uratnjrimqa bati deqa nanji qurienoqnsib sqab.

<sup>21</sup> “Tamo bei a gara jugo bunuj osim dena mutu gentosim gara jugo sari branjoq di qandimqa keresai. Degsi qandimqas di bunuqna a na gara jugo sari di yansimqa gara mutu bunuj a kiñalaosim gara jugo sari di uratim bran qelikobaqas. <sup>22</sup> Tamo bei a wain bunuj osim ya nobu sariq di qamqa keresai. Ya nobu sari di nami kangranjosiq singilaej deqa a wain

bunuj qamimqa wain a didiqosim ya nobu sari paratosimqa wain bilenjosim mandamq aiqas. Ya nobu a dego ugeqas. A wain bunuj osim ya nobu bunujq di qamqas di kere.”

### *Yesus a segi yori bati aqa Tamo Koba*

<sup>23</sup> Yori bati bei Yesus aqa angro nanqi ti wau ambleq na giloqnsibqa aqa angro nanqi bem sum gei elenjoqnsib uye uye giloqneb. <sup>24</sup> Nanqi degsib gileq nabqa Farisi qudei nanqi bosib unjrsibqa Yesus minjeb, “Ino angro nanqi kiyaa kumbra degyeq nub? Yori bati qa kumbra degyo di getento koba.”

<sup>25</sup> Onaqa Yesus na kamba Farisi nanqi minjrej, “Nami Devit aqa wau tamo ti nanqi mamjnraqa kumbra yeb qaji di ningi buk miligiq di sisiosai kiyoo? <sup>26</sup> Abiatar a atra tamo gate sonaqa bati deqa Devit a atra tal miligiq gilsiq Qotei atraiqqajqa bem uysiq aqa wau tamo nanqi dego anainjnaq uyeb. Bem di getento. Di atra tamo nanjo segi uyqqajqa bem. Devit a degyej di a dal anjam grotej. Ariya a Qotei aqa namgalaq di une saiqoji. Ningi anjam di sisiosai kiyoo?”

<sup>27</sup> Osiqa minjrej, “Qotei a yori bati qa are qalsiq tamo nanqi atosai. A tamo nanqi qa are qalsiq yori bati atej. <sup>28</sup> E Tamo Angro. Deqa e segi na yori bati taqatejunum. E segi yori bati aqa Tamo Koba.”

## 3

### *Yori bati qa Yesus a tamo ban qandamyey qaji di boletej*

<sup>1</sup> Olo yori bati bei Yesus a Juda nanjo Qotei tal miligiq gilsiq tamo bei ban qandamyey qaji a di sonaq unej. <sup>2</sup> Onaqa Farisi nanqi Yesus koqyoqneb. Nanqi are qaleb, “Yesus a yori bati qa tamo di boletqas kiyoo? Yimqa minjqom, ‘Ni na yori bati grotonum.’” Deqa nanqi Yesus koqyoqneb. <sup>3</sup> Onaqa Yesus a tamo ban qandamyey qaji di minjej, “Ni tigelosim au.” <sup>4</sup> Degsi minjnaqa a tigelosiq Yesus aqa areq gileqnaqa Yesus na Farisi nanqi nenemnjrej, “Iga yori bati qa kumbra bole yqom kiyoo kumbra uge yqom kiyoo? Tamo bei a padalqa laqnimqa iga na aqaryayonam a bole sqas di kere kiyoo iga na uratonam a padalqas di kere kiyoo? Dal anjam a kiyersi marqo? Ningi na merbiy.” Onaqa Farisi nanqi kamba olo anjam bei Yesus minjosai. Nanqi mequmesoqneb. <sup>5</sup> Nanjo are getenjnresoqnej deqa Yesus a nanqi koqnjrej. Osiqa nanqi qa minjin oqetonaqa tamo ban qandamyey qaji di minjej, “Ni ino ban waiy.” Degsi minjnaqa aqa ban waiyonaq boleej. <sup>6</sup> Onaqa Farisi nanqi Qotei talq dena oqedosib Herot aqa wau tamo nanqi ti koba na koroosib nanqi kiyersib Yesus qalib moiqqajqa deqa qairoqneb.

*Tamo unqasari gargekoba nanqi Yesus dauryoqneb*

7-8 Onaqa Yesus aqa angro nanngi ti tigelosib tamo ungasari kalil nanngi uratnjrsib alile aisib di soqneb. Bati deqa tamo ungasari tulan gargekoba nanngi endegsib queb, “Yesus a manwa gargekoba yeleneqnu.” Degsib qusibqa Yesus dau-ryosib alile aisib aqaq di korooqneb. Galili sawa nanngi ti Judia sawa nanngi ti Jerusalem qure nanngi ti Idumia sawa nanngi ti qure kalil Jordan ya taqal beiq di soqneb qaji nanngi ti Tair qure ti Saidon qure ti nanngi kalil belenosib Yesus aqaq di korooqneb. 9 Onaqa Yesus na aqa angro nanngi endegsi minjrej, “Qobun bei atib soqnem. Tamo ungasari nanngi bosib e jujunbaib deqa e qobun gogetosiy di awoqai.” Onaqa aqa angro nanngi qobun bei atnab soqnej. Nanngi degyeb. Di kiyaya? 10 Yesus a nami tamo ungasari gargekoba nanngi bo-letnjroqnej. Deqa tamo ma ti kalil nanngi aqa areq boqnsibqa nanngo ban aqa jejamuq di atqa maroqnsib a jujunyoqneb. 11 Tamo mondor uge uge na ojeleno qaji nanngi dego Yesus aqa areq boqneb. Boqnsibqa mondor uge nanngi na Yesus unoqnsib aqa singaq di singa pulutoqnsib lelenoqnsib minjoqneb, “Ni Qotei aqa Niri.” 12 Degsib minjeqnabqa a nanngi singila na saidnjroqnsiq minjroqnej, “Ninngi ijo ñam ubtosib maraib.”

### *Yesus a tamo 12 nanngi giltnjrej*

13 Onaqa Yesus a dena walwelosiqa manaq oqej. A endegsi are qalej, “E na tamo qudei giltnjritqa nanngi e koba na laqn-sibqa ijo wau ojoqnqab.” A degsi are qalsiqa manaq oqsiiq dia tamo qudei nanngi metnjrnaqa aqa areq beb. 14 Bonabqa a na tamo 12 nanngi giltnjrej. Nanngi a ombla sqajqa deqa ti a na nanngi qarijnjrimqa nanngi aqa anjam mare mare laqajqa deqa ti nanngi giltnjrej. 15 Nanngi na mondor uge uge tamo ungasari nanngo jejamuq dena winjrqaajqa deqa ti nanngi giltnjrej. 16 Tamo 12 giltnjrej qaji nanngo ñam agiende. Bei Saimon. Yesus na aqa ñam bei Pita waiyej. 17 Bei Sebedi aqa njiri Jems aqa was Jon wo. Nanngo ñam bei Yesus na Boanerges wainjrej. Ñam di aqa damu, “Tamo kola bul.” 18 Ariya Andru Filip wo. Bei Bartolomyu Matyu wo. Bei Tomas. Bei Alfias aqa njiri Jems. Bei Tadius. Bei Saimon agi Rom nanngi winjrqaajqa maroqnej qaji. 19 Ariya bei Judas Iskariot agi bunuqna Yesus osiqa jeu tamo nanngo banq di atej qaji.

*Tamo qudei nanngi maroqneb, “Yesus a Belsebul aqa singila na waueqnu”*

20 Onaqa Yesus a tal bei gogetosiq di sonaqa tamo ungasari gargekoba nanngi olo bosib korooqneb. Deqa aqa angro nanngi ti ingi uyqa bati saiinjrej. 21 Yesus aqa was nanngi aqa ai koba na degsib qusibqa Yesus oqajqa marsib qure deq gileb. Nanngi maroqneb, “Yesus a nanariqo kiyoy?”

<sup>22</sup> Onaqa dal anjam qalie tamo qudei Jerusalem dena beb qaji nanği Yesus yomuiyoqnsib maroqneb, “Mondor uge nanço gate koba Belsebul a Yesus aqa jejamuq di unu. Singila dena Yesus na mondor uge nanği winjreqnu.” <sup>23</sup> Onaqa Yesus a nanği metnjrnaqa aqa areq bonabqa yawo anjam bei endegsi minjrej, “Satan na aqa segi mondor uge nanği kiyersim winjrças? Di keresai. <sup>24</sup> Tamo nanği qure qujaiq di unub qaji nanği segi poaiyelosib qotqab di nanği koba na geregere sqa keresai. <sup>25</sup> Tamo nanği tal qujaiq di unub qaji nanği segi poaiyelosib qotqab di nanği dego koba na geregere sqa keresai. <sup>26</sup> Dego kere Satan na aqa segi mondor uge nanği jeutnjrsim winjrças di aqa singila koboosim aqa wau ulonças.

<sup>27</sup> “Tamo bei a tamo singila koba bei aqa tal gogetosim aqa inği inği kalil bajınqa keresai. A mati tamo singila di sil na tontim soqnımqa di aqa inği inği kalil bajınças. Tontçasai di aqa inği inği bajınqa keresai.

<sup>28</sup> “E bole mernğwai. Tamo unğasari nanço une kalil Qotei na kobotetnjrças. Tamo unğasari nanği misilin anjam mareqnub une di dego Qotei na kobotetnjrças. <sup>29</sup> Ariya tamo a Mondor Bole misilinıyças une di Qotei na kobotçasai. Une di tamo aqa jejamuq di gaigai sças.” <sup>30</sup> Yesus na dal anjam qalie tamo nanği anjam degsi minjrej. Di kiyayaqa? Nanği maroqneb, “Yesus a mondor uge ti.”

*Yesus a marej, “Ijo ai ijo was nanği tal qabe?”*

<sup>31</sup> Onaqa Yesus aqa was nanği aqa ai koba na bosib tal oqeq di tigeleb. Yesus a warum miligiq di sonaqa nanği oqeq di tigelosib tamo qudei minjreb, “Iga Yesus qa bonum. Deqa ninği a minjib endeq bem.” <sup>32</sup> Onaqa tamo unğasari Yesus aqa areq di awesoqneb qaji nanği na Yesus minjeb, “Ino was nanği ino ai ombla na ni qa bonub agi oqeq di tigelejunub.” <sup>33</sup> Onaqa Yesus na kamba minjrej, “Ijo ai ijo was nanği tal qabe?” <sup>34</sup> Degsi minjrsıqa tamo unğasari aqa areq di awesoqneb qaji nanği koqnjrsıqa minjrej, “Ninği segi ijo ai ijo was nanği. <sup>35</sup> Ninği quiy. Tamo a Qotei aqa areqalo dauryoqnças di a ijo was bole. A ijo jaja bole. A ijo ai bole.”

## 4

*Yesus a saga yago qa yawo anjam marej*

<sup>1-2</sup> Onaqa Yesus a olo alile ainaqa tamo unğasari tulan gargekoba nanği bosib aqaq di koroonabqa a sasalosıqa qobun bei gogetosıq di awoej. Awoosıqa tamo unğasari kalil nanği alile di sonabqa a na yawo anjam gargekoba minjroqnej.

A na yawo anjam bei endegsi minjrej, <sup>3</sup> “Niŋgi quiy. Tamo bei a gilsiq aqa iŋgi wauq di saga yago breiyelenēj. <sup>4</sup> Breiyonaqa jagwa na saga yago qudei puyonaqa gam qalaq aiyelenēb. Ainabqa qebari naŋgi bosib uyekriteb. <sup>5</sup> Saga yago qudei mandam lanjaq di aiyelenēb. Mandam di guma meniŋ ti. Gogeq di mandam kiñala. Deqa saga yago aiyelenosib urur oqoqujateb. <sup>6</sup> Naŋgo jirim tulaŋ guma aiyosai deqa seŋ oqsiq kaŋkaŋonaqa naŋgi laosib moreneb. <sup>7</sup> Saga yago qudei sil luwit ambleq di aiyelenēb. Dena oqeb qaji sil luwit na dego dauryosiq oqsiq kabutnjrnaq geitosai. <sup>8</sup> Saga yago qudei mol mandam boledamuq di aiyeb. Di aisib oqoboledamuyosib gei tulaŋ gargekoba atelenēb. Qudei 30. Qudei 60. Qudei 100.” <sup>9</sup> Yesus na tamo uŋgasari naŋgi yawo anjam degsi minjrsiq koboonaqa olo endegsi minjrej, “Tamo a dabkala ti sqas di a ijo anjam endi geregere quem.”

*Yesus a kiyaqa tamo uŋgasari naŋgi yawo anjam minjroqnej?*

<sup>10</sup> Onaqa Yesus na tamo uŋgasari naŋgi uratnjrsiq a kiñala qalaq gilsiq a segi sonaqa aqa aŋgro 12 naŋgi ti tamo qudei a dauryosib laqneb qaji naŋgi ti aqa areq bosibqa aqa yawo anjam di aqa utru geregere qalieqajqa deqa nenemyeb. <sup>11</sup> Nenemyonabqa a na kamba endegsi minjrej, “Qotei na aqa segi tamo uŋgasari naŋgi taqatnjrsim naŋgo Mandor Koba sqas. Anjam di aqa utru uliejunu. Di Qotei na babtinqa ijo aŋgro niŋgi segi utru qalieqab. Ariya tamo uŋgasari qala qalaq di unub qaji naŋgi yawo anjam segi minjroqnaqai. <sup>12</sup> Deqa naŋgi ŋam atoqnaqab di ijo anjam aqa damu unsib poinjrqsai. Naŋgi dab atoqnaqab di ijo anjam aqa utru quqwasai. Osib poinjrqsai dego. Deqa naŋgi are bulyosib Qotei aqaq bqa keresai. Deqa Qotei a naŋgo une kobotetnjrqasai.”

*Saga yago qa yawo anjam aqa utru Yesus na babtej*

<sup>13</sup> Osiaqa Yesus a olo aqa aŋgro naŋgi endegsi minjrej, “Saga yago qa yawo anjam maronum di aqa utru niŋgi poingosai e? Dego di niŋgi kiyersib ijo yawo anjam kalil qa poinguas? <sup>14</sup> Tamo a saga yago breiyej di a Qotei aqa anjam breiyej. <sup>15</sup> Saga yago qudei gam qalaq ainabqa qebari naŋgi bosib uyekriteb di aqa utru endegsi unu. Tamo qudei naŋgi Qotei aqa anjam quqwab. Ariya anjam di naŋgo are miligiq di soqnimqa Satan a urur bosim anjam di olo yainjrqsas. Qotei na naŋgo are miligiq di anjam di atej ariya Satan a bosim olo yainjrqsas. <sup>16</sup> Saga yago qudei mandam lanjaq di aiyeb qaji di aqa utru endegsi unu. Tamo qudei naŋgi Qotei aqa anjam qusib tulaŋ areboleboleinjrimsa anjam di oqujatosib naŋgo areq atqab. <sup>17</sup> Ariya anjam di naŋgo are miligiq tulaŋ guma aiyosai. Deqa sokiñala Qotei aqa anjam gotraŋyo qaji tamo

qudei na bosib nanġi gulbe enjrsib ugeugeinjrġab. Yimġa nanġo areqalo Yesus qa sinġilateqnuġ qaji di nanġi olo ulon-tġab. <sup>18-19</sup> Saga yago qudei sil luwit ambleġ di aiyeb qaji di aġa utru endegsi unu. Tamo qudei nanġi Qotei aġa anġam qusibġa ariya bunuġna nanġi olo mandam qa inġi inġi qa are koba qaloqnsib ñoro koba oġnqajġa are prugnġroqnsas. Yimġa kumbra dena nanġi gisañjrsim Qotei aġa anġam nanġo are miligiq di tentim loumġas. Saga yago uge nanġi ġei bole atosaeqnuġ deġo kere. <sup>20</sup> Saga yago qudei mol mandam boledamuġ di aiyeb qaji di aġa utru endegsi unu. Tamo qudei nanġi Qotei aġa anġam qusib nanġo are miligiq di ġeregere ojsib sinġilatġab. Deġa Qotei aġa anġam di nanġo are miligiq di saga bul tulañ kobaġas. Qudei 30. Qudei 60. Qudei 100.”

*Tamo bei a lam qatrentosim puloñamġa ġuwe na kabutġasai*

<sup>21</sup> Osiġa Yesus a olo minjrej, “Tamo bei a lam qatrentosim puloñamġa ġuwe na kabutġasai. Bijal surumġ di atġasai. Boleġ di ġaintim warum suwañesġas. <sup>22</sup> Deġo kere kumbra kalil uliejunu qaji di Qotei na boleġ atġas. Kumbra kalil kabuejunu qaji di deġo Qotei na babtġas. <sup>23</sup> Tamo a dabkala ti sġas di a iġo anġam endi ġeregere quem.”

<sup>24</sup> Osiġa Yesus a olo minjrej, “Anġam niñġi queqnuġ qaji di ġeregere quoqniy. Niñġi ġeregere quoqñġab kere deġo Qotei a kamba powo enġoqnsas. Osim olo powo tulañ koba enġoqnsas. <sup>25</sup> Tamo a powo ti sġas di Qotei na powo olo yimġa a powo koba oġas. Ariya tamo a powo ti sġasai di powo kiñala aġaq di unu qaji di Qotei na olo yaiyim a laña sġas.”

*Saga yago nanġi segi oqeleneqnuġ*

<sup>26</sup> Osiġa Yesus a olo marej, “Qotei na aġa segi tamo unġasari nanġi taġatnġrsim nanġo Mandor Koba sġas. Kumbra di tamo bei a saga yago breiyeqnu deġo kere. <sup>27</sup> Tamo di a qolo ñeioqnsiġa nobqolo a olo tigelocnsiġa walweleqnu. A kumbra deġyeqnaġa saga yago nanġi segi kokitoqnsibġa oqeleneqnuġ. Saga yago nanġi kiyersib oqeleneqnuġ di tamo a qaliesai. <sup>28</sup> Mandam a segi waueqnaġa saga yago nanġi kokitoqnsibġa bañġateqnuġ. Dena sotoqnsibġa ġeitoqnsibġa melieqnuġ. <sup>29</sup> Meli sau bġo deġa tamo di a bosim serie na ġinġenġosim oġas.”

*Sis yago qa yawo anġam*

<sup>30</sup> Osiġa Yesus a olo marej, “Qotei na aġa segi tamo unġasari nanġi taġatnġrsim nanġo Mandor Koba sġas. Kumbra di aġa utru niñġi ġeregere poiñġwajġa deġa yawo anġam bei endegsi merñġwai. <sup>31-32</sup> Kumbra di tamo bei na sis yago osiq aġa wauġ di yagej deġo kere. Sis yago nanġi tulañ kiñilala kas yago bul. Inġi inġi qudei nanġo yago kokba yala. Sis yago nanġi



tulan kiñilala. Ariya sis yago di tamo bei na osim aqa wauq di yagimqa bunuqna a oqsim tulan kobaqujaqas. Osim ñam qudei buñjrsim dani kokba atelenqas. Amqa qebari nanği bosib aqa waburq di awoelenqab.”

*Yesus a yawo anjam gargekoba maroqnej*

<sup>33</sup> Yesus na tamo unğasari nanği yawo anjam gargekoba deqaji minjroqnej. Nanği aqa yawo anjam quqwa kere deqa a degsi minjroqnej. <sup>34</sup> A anjam bei minjrosaiyoqnej. Yawo anjam segi minjroqnej. Olo segitoqnsiqa aqa segi anğro nanği yawo anjam aqa utru gegerere plaltosiq minjroqnej.

*Yesus a jagwa ti ya korkor ti anjam minjrnaq laeb*

<sup>35</sup> Onaqa bilaqtonaqa Yesus na aqa anğro nanği endegsi minjrej, “Iga gilsim ya agu taqal beiq di brantqom.” <sup>36</sup> Degsi minjrsiqa nanği koba na tamo unğasari kalil nanği uratnjrsibqa qobuñ na gileq nabqa tamo qudei nanği dego nanço qobuñ osib Yesus dauryosib giloqneb. <sup>37</sup> Yesus aqa anğro nanği ti qobuñ na gileq nabqa jagwa tulan koba tigelosiq ya korkortosiqa qobuñ qaloqnsiqa morman miligiq aiyeqnaqa ya maqej. <sup>38</sup> Yesus a nami qobuñ bunuq di gate kulun atsiqa ñeisiq qambumtej. Deqa aqa anğro nanği tulan ulaugetosib aqa areq bosib dudumyosib minjeb, “O Qalie Tamo, iga padalqa laqnum. Ni deqa are qalosai kiyo?” <sup>39</sup> Onaqa Yesus a tigelosiq jagwa ti ya ti singila na minjrej, “Ninği laoiy.” Minjrnaqa jagwa laej. Ya dego maninej. <sup>40</sup> Onaqa Yesus na aqa anğro nanği endegsi minjrej, “Ninği kiyaya ulaosib e qa yala poinğosai?” <sup>41</sup> Onaqa aqa anğro nanği olo tulan ulaugetosib segi segi maroqneb, “Yesus a tamo kiyero deqa jagwa ti ya ti minjr qoqa aqa anjam qusib laonub?”

## 5

*Yesus a tamo bei aqa jejamuq na mondor uge gargekoba winjretej*

<sup>1</sup> Onaqa Yesus aqa anğro nanği ti qobuñ na gilsib ya agu taqal beiq di brantosib Gerasa sawaq di tiryeb. <sup>2</sup> Tiryosib Yesus a qobuñ uratosiq mandamq ainaqa tamo bei a tamo sub ato sawaq dena brantosiq Yesus aqa areq bej. Tamo di a mondor uge uge na ojeleno qaji. <sup>3</sup> A bati gaigai tamo sub ato sawaq di ñeioqnej. A tamo singila koba. Tamo bei na a ojqa keresai. Sil kokba na a tontqa keresai dego. <sup>4</sup> Bati gargekoba tamo qudei nanği aqa singa ti ban ti sil kokba na tonteq nabqa a olo kukoqyoqnej. Tamo bei na a ojqa keresai bole sai. <sup>5</sup> A bati gaigai qolo ti qanam ti tamo sub ato sawaq di tulan lelenoqnsiqa aqa segi jejamu meniñ na pupoiyoqnej. A manaq di dego kumbra di yoqnej.

6-8 Deqa a isaq na ñam atsiqa Yesus unsiqa urur ti aqa areq bosiqa aqa siñgaq di siñga pulutej. Onaqa Yesus na mondor uge di minnej, “O mondor uge, ni tamo di uratosim ulañ.” Degsi minjnaqa mondor uge dena tulañ lelenosiqa siñgila na pailosiq Yesus minnej, “O Yesus, Qotei Goge Koba aqa Njiri, ni e kiyerbqajqa bonum? E Qotei aqa ñam na ni mermqai, ni e jaqatiñ ebaim.” 9 Onaqa Yesus na mondor uge di nenemyej, “Ino ñam yai?” Degsi nenemyonaqa minnej, “Ijo ñam Qoto Tamo Gargekoba. Iga mondor tulañ gargekoba tamo endi aqa jejamuq di unum.” 10 Osiqa siñgila na pailosiq Yesus minnej, “Ni iga sawaq beiq waigaim.”

11 Bati deqa bel tulañ gargekoba nanqi mana goge dia suwaroqneb. 12 Deqa mondor uge nanqi na Yesus minjeb, “Ni iga qarinqimqa iga bel nanqo jejamuq gilelenqom.” 13 Mondor uge nanqi degsib Yesus minjnabqa a na nanqi odnjrnaqa tamo di uratosibqa bel nanqo jejamuq gilelenqeb. Gilnabqa bel kalil nanqi gurgurosib botau dena prugelenosib yaq aisib ya uysib moreñeb. Bel moreñeb qaji nanqi sisiyeb 2,000.

14 Onaqa bel taqatoqneb qaji tamo nanqi kumbra di un-sibqa jaraiyosib qure miligiq aisib tamo unqasari kalil nanqi sainjroqnsib laqneb. Gamq di dego sainjroqnsib laqneb. Onaqa tamo unqasari nanqi kumbra di unqajqa beb. 15 Bosib Yesus aqa areq di koroosib ñam ateb di tamo nami mondor uge ti soqnej qaji aqa areqalo boleosiqa gara tigsig awesonaq uneb. Unsib tulañ ulaugetej. Di kiyaaqa? Mondor uge tulañ gargekoba nami tamo di aqa jejamuq di soqneb deqa. 16 Onaqa tamo nanqo ñamdamu na Yesus a mondor uge di winjrnac uneb qaji nanqi bel qa ti mondor uge qa ti tamo unqasari nanqi sainjrnab queb. 17 Qusibqa Yesus minjeb, “Ni gago sawa endi uratosim sawa beiq gile.”

18 Onaqa Yesus a qobuñ gogetosiq gilqa laqnaqa tamo aqaq na Yesus na mondor uge uge winjretej qaji a siñgila na pailosiq minnej, “E ni daurmqai.” 19 Onaqa Yesus na saidyosiq minnej, “Ni olo ino segi qureq gile. Gilsim Tamo Koba a ni qa dulosiqa kumbra tulañ boledamu emqo deqa ino was nanqi sainjre.” 20 Onaqa a puluosiq aqa qureq gilsiq Yesus na a kumbra tulañ boledamu yej deqa Dekapolis sawa (ñam di aqa damu, Qure 10) dia tamo unqasari kalil nanqi sainjroqnsiq laqnej. Sainjreqnaqa nanqi aqa anjam quoqnsib tulañ prugoqneb.

*Unqa bei a Yesus aqa gara ojnaq boletosiq olo angro moiyej qaji a tigeltej*

21 Onaqa Yesus a olo qobuñ gogetosiq ya agu taqal beiq gilej. Gilsiq qobuñ tiryonaq mandamq aisiq alile di sonaqa tamo unqasari tulañ gargekoba bosib aqaq di korooqneb.

22-23 Koroosib sonabqa Qotei tal taqato tamo bei aqa ñam Jairus a walwelosiq Yesus unsiqa aqa areq bosiq siŋga pulutosiq siŋgila na pailyosiq minjej, “O Tamo Koba, ijo angro sebiŋ a moiqa laqnu. Deqa ni bosim ino baŋ aqa jejamuq di atimqa a olo boleosim ñambile sqas.”<sup>24</sup> Onaqa Yesus na Jairus odyosiq a dauryosiq gileqnaqa tamo ungasari tulaŋ gargekoba naŋgi dego naŋgi aiyel daurnjrsib jujun̄osib giloqneb.<sup>25</sup> Gileqnaqba naŋgo ambleq di uŋa bei ma ti soqnej qaji a naŋgi daurnjrsiq giloqnej. Uŋa di a nami bai na unej leŋ aiyocnsiq degsi soqnej wausau 12 uratej.<sup>26</sup> Yu qangra tamo gargekoba naŋgi nami a boletqa yeqnaq a jaqatin̄kobaiyoqnej. A ma gereiyo talq giloqnsiq silali koba urateqnaqa naŋgi aqa jejamu gereiyeqnaqba a boleosaioqnej. Aqa ma olo kobaqujaoqnej.<sup>27-28</sup> Deqa a Yesus aqa ñam qusiqa are qalej, “E aqa gara mutu segi baŋ na ojotqa ijo ma koboqas.” Degsi are qalsiq Yesus aqa qoreq na dadauryosiq baŋ waiyosiq aqa gara mutu ojej.<sup>29</sup> Ojnaqa aqa leŋ aiyocnej qaji di koboej. Koboonaqa a aqa segi jejamu qalieosiq marej, “Bole, ijo ma saiqa.”<sup>30</sup> Onaqa Yesus a poiyej, “Siŋgila qudei ijo jejamu uratosiq gilqo.” Degsi poiyoqa bulosiq tamo ungasari tulaŋ gargekoba soqneb qaji naŋgi unjrsiq naenemnjrej, “Yai na ijo gara ojqa?”<sup>31</sup> Degsi nenemjnraqa aqa angro naŋgi na minjeb, “Ni kiyaaqba degsi nenemonum? Ni une. Tamo ungasari tulaŋ gargekoba naŋgi ni daurmosib jujun̄mejunub.”<sup>32</sup> Onaqa Yesus a uŋa gara mutu ojej qaji di unqajqa ñam atoqnej.<sup>33</sup> Onaqa uŋa di a endegsi qalieej, “Ijo ma saiqa deqa Yesus a e nubqajqa ñam ateqnu.” A degsi qalieosiq tulaŋ ulaugetosiq are ton̄ton̄yonaqa jiŋga na bosiq Yesus aqa areq di siŋga pulutosiq a segi qa ubtosiq minjej, “E na ino gara mutu ojonum.”<sup>34</sup> Onaqa Yesus na minjej, “O uŋa, ni ino areqalo e qa siŋgilatosim ijoq bonum deqa ino ma agi koboqo. Deqa ni are lawo na gilsim bole soqnime.”

<sup>35</sup> Yesus a uŋa degsi minjeqnaqa tamo qudei naŋgi Jairus aqa talq dena bosibqa gamq di Jairus Yesus wo turosib naŋgi na Jairus minjeb, “Un̄gum. Ino angro a nami moiqa. Deqa ni na Qalie Tamo a laŋa wau koba yaim. Uratim aiyem.”<sup>36</sup> Onaqa Yesus a naŋgo anjam di qusiqa Jairus minjej, “Ni ulaaim. Ni e qa ino areqalo siŋgilatime.”<sup>37-39</sup> Degsi minjsiq tamo ungasari kalil naŋgi a dauryqa saidnjrsiq Jems aqa was Jon wo Pita ombila naŋgi segi joqsiqa Jairus koba na gilsib aqa talq di branteb. Brantosib Yesus a ñam atej di tamo ungasari gargekoba naŋgi qatron̄ koba yoqnsib akam murqumyeqnaq unjrej. Unjrsiq tal gogetosiq minjrej, “Nin̄gi kiyaaqba qatron̄ koba yoqnsib akameqnu? Angro di a moiyoŋai. A laŋa ñeisiq qambumtejunu.”<sup>40</sup> Degsi minjnraqa naŋgi Yesus

kikiyeb. Nanġi qalieeb, “Anġro a nami moiyoletqo.” Degsib qalieosib deqa Yesus kikiyeb. Onaqa Yesus a nanġi kalil minjrej, “Niġi sasaloij.” Degsi minjrnaqa nanġi sasalonabqa Yesus a anġro moiyej qaji aqa ai abu osiqa aqa segi anġro qalub nanġi dego joqsqa anġro aqa warum miligiq gilej. <sup>41</sup> Gilsiq anġro aqa baġ titosiqa minjej, “Talita, kum.” Di Hibru anjam. Anjam di aqa damu, “O anġro, ni tigel.” <sup>42</sup> Degsi minjrnaqa anġro di a olo nambile osiqa urur tigelej. Tigelosiq walwelej. Anġro aqa wausau 12. Onaqa nanġi kalil Yesus aqa maġwa di unsibqa tulaġ prugeb. <sup>43</sup> Onaqa Yesus a nanġi sinġila na endegsi minjrej, “Niġi ijo maġwa endi unonub deqa tamo qudei minjraib.” Osiqa marej, “Niġi anġro endi inġi anaiyij.”

## 6

### *Yesus aqa qure utru nanġi aqa anjam quetosai*

<sup>1</sup> Onaqa Yesus a sawa di uratosiqa aqa anġro nanġi joqsqa aqa segi qure utruq gilej. <sup>2</sup> Gilsiq di sonaqa yori batiej. Deqa a Juda nanġo Qotei tal miligiq gilsqa tamo unġasari gargekoba sonabqa tigelosiq Qotei aqa anjam palontosiġ minjroqnej. Minjreqnaqa tamo unġasari nanġi aqa anjam qusibqa tulaġ prugugetosib maroqneb, “Yesus a powo qabe na osiqa anjam sinġila endeqaji palontosiġ mergeqnu? A kiyersiq maġwa endeqaji babtelenqnu? <sup>3</sup> Iga qalie, a laġa tal gereiyo qaji tamo. A Maria aqa nġiri. A Jems na Joses na Judas na Saimon na nanġo was. Aqa jaja kalil nanġi agi iga koba na endi unum.” Tamo unġasari nanġi degsib yomu anjam marsib Yesus qa ugeeb. <sup>4</sup> Onaqa Yesus na kamba minjrej, “Qotei aqa medabu o qaji tamo bei aqa segi qure utruq gilsim anjam minjroqnaqas di nanġi aqa anjam quetqa asġinjrqaqas. Deqa a nġam saiġoji sqas. Aqa segi talq di dego a nġam saiġoji sqas. Ariya a qure bei beiq giloqnsim anjam minjroqnaqas di nanġi aqa anjam quetoqnsib aqa nġam soqtoqnaqab.” <sup>5</sup> Yesus a nanġi degsi minjrnsiq aqa segi qure utruq di maġwa bei yqajqa keresaiyej. A tamo quja quja segi nanġo gateq di aqa baġ atnaqa nanġo ma koboej. <sup>6</sup> Aqa segi qure utru nanġi a qa nanġo areqalo sinġilatosai deqa a are gulbeiyej.

### *Yesus na aqa anġro 12 nanġi wau enjrej*

Onaqa Yesus a walwelosiqa qure bei beiq giloqnsiq Qotei aqa anjam palontoqnej. <sup>7</sup> Osiqa bati bei a na aqa anġro 12 nanġi metnrnaqa aqa areq bonabqa nanġi tamo unġasari nanġo jejamuq na mondor uge uge winjroqnaqajqa deqa sinġila enjrej. Osiqa minjrej, “Niġi aiye aiye giloqnsibqa qure qureq di ijo anjam palontoqnsib laqniy. <sup>8</sup> Niġi inġi inġi osib gilaib. Inġi uyo bei aib. Nunġo qaquġ aib. Silali osib gilaib. Toqoġ segi osib walweliy. <sup>9</sup> Sinġa tatal dego jigsib

giliy. Gara jugo aiye aiyel aib.”<sup>10</sup> Osiqa minjrej, “Ninği qure bei beiq di brantqnsibqa tal qujaiq di soqniy. Dia sosib dena olo tigelosib qure beiq giloqniy.”<sup>11</sup> Tamo bei na ninği gereingwa uratimqa kiyo nunğo anjam quqwa asgiyimqa kiyo ninği qure di uratqa oqnsib nunğo sinğa tatal tumburum butuyoqniy. Yimqa nanği nunğo kumbra di unsib poinjrqaş, ‘Bole, iga kumbra ugetonum.’”<sup>12</sup> Yesus na aqa anğro 12 nanği degsi minjrşiq qarınjrnaqa nanği qure qureq giloqnsibqa Qotei aqa anjam palontoqnsib tamo unğasari nanği endegsib minjroqneş, “Ninği are buliy.”<sup>13</sup> Osib mondor uge uge nanği winjroqnsibqa tamo unğasari nanğo gateq di goren bilenteqneş.

*Herot a are qaleş, “Yesus a Jon yansjro qaji”*

<sup>14</sup> Yesus aqa anğro nanği aqa ñam mare mare laqneşqa Mandor Herot a queş. Tamo unğasari gargekoba nanği dego qusib maroqneş, “Tamo di a Jon yansjro qaji. A moisiq olo subq na tigelqo. A deqa sinğila osiqa mañwa endeqaji babelleñeqnu.”<sup>15</sup> Onaqa tamo qudei nanği maroqneş, “Tamo di a Elaija olo bqo.” Onaqa qudei nanği maroqneş, “Tamo di a Qotei aqa medabu o tamo nanği nami soqneş deqaji bei.”<sup>16</sup> Ariya Herot a segi Yesus aqa ñam qusiqa mareş, “Tamo di a Jon e nami kakro gentetem qaji. A moisiq olo subq na tigelqo.”

<sup>17-18</sup> Herot a nami aqa was Filip aqa ñauñ Herodias yayosiq ej. Deqa Jon yansjro qaji a na Herot minjoqneş, “Ni ino segi was aqa unğa em di kumbra bolesai. Ni kumbra ugeteqnum.” Jon na Herot degsi minjoqneş. Deqa Herot a Jon qa minjin oqetonaca aqa qaja tamo qudei nanği qarınjrnaqa gilsib Jon ojsib sil na qosisib tonto talq di waiyeb.<sup>19</sup> Bati deqa Herot aqa ñauñ a Jon qa tulañ ñirinğeteş deqa a na Herot wainyosiq minjoqneş, “Ni na Jon qalim moiyeş.” Yeçnaqa Herot na saidyoqneş.<sup>20</sup> Di kiyaca? A Jon qa ulaoqneş deqa. Deqa a Jon geregere taqatoqneş. A endegsi qalieş, “Jon a tamo bole. Aqa jejamuq di une bei saiqoji. A Qotei aqa tamo tiñtinğ.” Herot a degsi qalieosiq deqa a Jon taqatoqnsiqa aqa anjam quoqneş. Quoqnsiqa are koba qaloqneş. A Jon aqa anjam quqwaşqa tulañ arearetoqneş.

<sup>21</sup> Ariya bati bei Herot aqa ñauñ a Jon qalim moiqaşqa gam endegsi iteş. Herot aqa ñambabo bationaca Herot na maruro atsiqa aqa tamo kokba ti aqa qaja tamo nanğo gate kokba ti Galili sawa taqato tamo nanği ti metnjraq bosib aqa talq di koroeb.<sup>22</sup> Koroosib inği uyeqneşqa Herot aqa ñauñ aqa anğro sebinğa warum miligiq bosiqqa nanği lou tuetnjreqnaqa nanği a unsibqa tulañ areboleboleinjrş. Deqa Herot na anğro sebinğa di minjeş, “Ni ijo inği kiye oqaşqa merbqam e ni emqai.”

<sup>23</sup> Osiqa aqa anjam di olo singilatosiqa minjej, “Ni ijo ñoro kalil ambleq na potosim oqajqa marqam emqai. E ijo anjam di uratqasai bole sai.”

<sup>24</sup> Onaqa angro sebiñ a gilsiqqa aqa ai nenemyej, “E ingi kiye qa Herot minjqai?” Onaqa minjej, “Ni Jon yansnjro qaji aqa gate qa mare.” <sup>25</sup> Onaqa a olo urur ti warum miligiq gilsiqqa Herot minjej, “Ni Jon yansnjro qaji aqa gate tabirq di atsim ebe.” <sup>26</sup> Onaqa Herot a Jon qalim moiqaqqa are sosai deqa a are tulan gulbekobaiyej. Ariya aqa segi anjam tamo kalil nanjo ulatamuq di marsiq singilatej qaji deqa are qalsiq angro sebiñ di saidyqa uratej. <sup>27-28</sup> Osiqa aqa qaja tamo bei qarinyosiqa minjej, “Ni gilsim Jon aqa kakro gentosim aqa gate osau.” Degsi minjnaqa a gilsiqqa tonto talq di Jon aqa kakro gentosiqa aqa gate tabirq di atsiqa osi bosiq angro sebiñ di yej. Yonaqa a na osi gilsiqqa aqa ai yej.

<sup>29</sup> Onaqa bunuqna Jon aqa angro nanji deqa qusibqa bosib Jon aqa qusa osi gilsib subq ateb.

*Yesus a tamo 5,000 nanji ingi anainjrej*

<sup>30</sup> Bati bei Yesus aqa anjam maro tamo nanji olo aqa areq di koroosib kumbra kalil nanji yoqneq qaji deqa ti anjam kalil nanji palontoqneq qaji deqa ti Yesus saiyoqneq. <sup>31</sup> Bati deqa tamo ungasari tulan gargekoba nanji gile be eqnab Yesus aqa angro nanji ti ingi uyqa bati saiinjrej. Deqa a na nanji endegsi minjrej, “Ningi tigeliy. Iga tamo ungasari nanji uratnjrsim segitosim wadau sawaq di kiñala aqaratqom.” <sup>32</sup> Degsi minjrsiqa aqa angro nanji joqsiqa koba na qobun gogetosib wadau sawaq gileb.

<sup>33</sup> Nanji qobun na gileqnabqa tamo ungasari kalil nanji Yesus unsibqa aqa ulatamu poinjrnaqa nanjo qure qureq na tigelosib singa na gurgurosib gilsib Yesus tiryqajqa sawaq di namoqna branteb. <sup>34</sup> Onaqa Yesus a qobun na gilsiq tiryosiqa nam atej di tamo ungasari tulan gargekoba nanji nami tiryqa sawaq di tarinesonab unjrej. Nanji kaja bul mandor saiqoji. Deqa Yesus a nanji qa dulosiqa Qotei aqa anjam gargekoba minjroqnej. <sup>35</sup> Onaqa señ aisiq bilaqtonaqa Yesus aqa angro nanji aqa areq bosib minjeb, “O Tamo Koba, endi wadau sawa. Señ aiqo. Qoloqas. <sup>36</sup> Deqa ni na tamo ungasari nanji minjrimqa qure qureq gilsib dia ingi uysib nerenqab.” <sup>37</sup> Onaqa Yesus na minjrej, “Ningi na ingi anainjriy.” Degsi minjrnaqa nanji na kamba minjeb, “Iga kiyersim ingi anainjrrom? Iga 200 kina qabe na osimqa ingi awaiyosim nanji anainjrrom?” <sup>38</sup> Onaqa Yesus na nenemnjrej, “Ningi ingi gembub unu? Ningi gilsib uniy.” Onaqa nanji gilsib unsib minjeb, “Iga bem 5 qe aiyela segi unu.”

<sup>39</sup> Onaqa Yesus na tamo ungasari kalil nanngi minjrej, “Ninngi qur segi segi yosibqa ñinq di awoelenjoiy.” <sup>40</sup> Onaqa nanngi kalil dedegsib awoeb. Qudei nanngi qur segi segi 100 awoelenjeb. Qudei nanngi qur segi segi 50 awoelenjeb. <sup>41</sup> Awoonabqa Yesus na bem 5 ti qe aiyel ti di osiqa lan goge tarosiq Qotei pailyej. Pailyo koboonaqa bem ginjenyosiq aqa angro nanngi enjrsiq minjrej, “Bem endi jeisib tamo ungasari nanngi anainjriy.” Osiqa qe aiyel dego ginjenyosiq aqa angro nanngi enjrsiq minjrej, “Qe endi dego jeisib tamo ungasari nanngi anainjriy.” Degsi minjrnaqa nanngi bem ti qe ti osi giloqnsibqa tamo ungasari nanngi jeisib anainjreqnab uyoqneb. <sup>42</sup> Uynab kalil menetnjrej. <sup>43</sup> Onaqa inngi oto uratelenjeb qaji di Yesus aqa angro nanngi na koroiyosib gumba kokba 12 di jignab maqelenjeb. <sup>44</sup> Tamo kalil bem ti qe ti uyeb qaji nanngi sisiyeb 5,000.

### *Yesus a ya banqaq na walwelej*

<sup>45</sup> Onaqa Yesus na aqa angro nanngi endegsi minjrej, “Ninngi qobun gogetosib namoosib gilsib Betsaida qureq di tiryosib soqniy. E na tamo ungasari nanngi minjritqa nanngo qure qureq jaraiyoqnib e bqai.” <sup>46</sup> Onaqa Yesus aqa angro nanngi namoosib qobun na gileq nabqa Yesus na tamo ungasari nanngi minjrnaq jaraiyeq nabqa a segi Qotei pailyqa marsiq manaq oqej. <sup>47-50</sup> Oqsiq a segi mana goge di sonaqa bilaqtej. Onaqa aqa angro nanngi qobun na gileq nabqa ya agu ambleq di jagwa koba tigelosiq ya korkortosiq nanngi pulutnjrej. Nobqolo amburu Yesus a ya banqaq na walwelosiq aqa angro nanngi daurnjrsiq gilej. Gilsiq nanngi jojomnjrsiq bunjnrqa laqnaqa nam ateb di Yesus a ya banqaq na walwelosiq nanngoq beqnaqa unsib mareb, “Di buga beqnu.” Osib tulan ulaugetosib lelenkobaeb. Onaqa Yesus na minjrej, “Nunngo are singilatiy. Endi e beqnum. Ulaaib.” <sup>51-52</sup> Degsi minjrsiq qobun gogetonaqa jagwa laej. Onaqa Yesus aqa angro nanngi tulan prugugeteb. Di kiyaaqa? Nanngi Yesus aqa manwa di unsib utru geregere poinjrosai deqa. Nami Yesus na tamo 5,000 nanngi inngi anainjrej manwa di dego aqa angro nanngi unsib poinjrosai. Nanngo are getenjresoqnej.

### *Yesus a Genesaret sawaq di ma tamo gargekoba nanngi boletnjroqnej*

<sup>53</sup> Ariya Yesus aqa angro nanngi koba na qobun na gilsib ya agu taqal beiq di brantosib Genesaret sawaq di tiryeb. <sup>54-55</sup> Tiryonabqa qure deqaji nanngi na Yesus unsibqa aqa ulatamu poinjrnaqa gurgur ti qure qureq giloqnsibqa Yesus tiryej qaji sawa di ubtosib tamo ungasari nanngi minjroqneb. Minjreqnab quoqnsib nanngo ma tamo nanngi saperaq di atelenoqnsib qoboioqnsib Yesus aqa areq osi beleneq nab a

na nan̄gi boletnjroqnej. <sup>56</sup> A qure kiñilala ti qure kokba ti ga gamq di dego branteqnaqa tamo un̄gasari nan̄gi a unoqnsibqa tamo ma ti nan̄gi joqoqnsib nan̄go qure ambleq di atoqnsib endegsib minjoqneb, “O Tamo Koba, nan̄gi ino gara mutu segi ojibqa nan̄go ma saioqnqas.” Onaqa Yesus a nan̄gi odnjreqnaqa ma tamo kalil nan̄gi aqa gara mutu ojoqneb. Ojeq nab nan̄go ma kalil kobooqnej.

## 7

*Yesus a Qotei aqa dal anjam ti moma nan̄go kumbra qa ti marej*

<sup>1</sup> Onaqa Farisi nan̄gi ti dal anjam qalie tamo qudei ti nan̄gi Jerusalem dena bosibqa Yesus aqa areq di koroeb. <sup>2</sup> Koroosib ñam ateb di Yesus aqa an̄gro qudei nan̄gi bañ yansosaisosib laña in̄gi uyeq nab un̄jreb. <sup>3</sup> Farisi nan̄go kumbra agiende. Bati gaigai nan̄gi in̄gi uyqa oqnsib mati bañ yanseqnub. Nan̄gi bañ yansqasai di nan̄gi in̄gi uyqasai. Juda kalil nan̄gi kumbra degyeq nub. Di nan̄go moma nan̄go kumbra dauryeqnub. <sup>4</sup> Nan̄gi in̄gi qarinyo sawaq dena boqnsibqa in̄gi uyqa oqnsib mati nan̄go jejamu geregere yanseqnub. Nan̄gi nan̄go jejamu yansqasai di nan̄gi in̄gi uyqasai. Nan̄gi kumbra deqaji gargekoba yeqnub. Nan̄go ya gambañ, ya nobu, web dego mati geregere yanselenjoqnsib in̄gi uyeq nub. Kumbra di nan̄go moma nan̄goq dena elen̄josib dauryeqnub. <sup>5</sup> Deqa bati di Farisi nan̄gi ti dal anjam qalie tamo nan̄gi ti Yesus nenemyeb, “Ino an̄gro nan̄gi kiyaaq gago moma nan̄go kumbra gotran̄yeq nub? Agi nan̄gi in̄gi uyqa oqnsib mati bañ yansosaisosib laña uyeq nub.” <sup>6</sup> Onaqa Yesus na kamba minjrej, “Nin̄gi gisañ tamo. Nin̄gi anjam maro aiyelteq nub. Qotei aqa medabu o qaji tamo Aisaia a kere nin̄gi qa anjam endegsi nen̄gren̄yej, ‘Tamo nan̄gi di nan̄go medabu na ijo ñam soqteq nub. Ariya nan̄go are miligi e qa sosai. Isaq di unu. <sup>7</sup> Nan̄gi laña babañ na e qa loueq nub. Osib mandam tamo nan̄go dal anjam palontoqnsib olo beltoqnsib mareq nub, ‘Anjam endi Qotei aqa anjam.’” <sup>8</sup> Aisaia a anjam degsi nen̄gren̄yej. Aqa anjam di bole. Agi nin̄gi Qotei aqa dal anjam gotran̄yoqnsibqa olo mandam tamo nan̄go dal anjam dauryqajqa tulañ singilaeq nub.”

<sup>9</sup> Yesus na Farisi nan̄gi anjam degsi minjrsiqa olo minjrej, “Nin̄gi Qotei aqa dal anjam gotran̄yoqnsibqa olo nun̄go segi moma nan̄go kumbra dauryeqnub. <sup>10</sup> Moses a marej, ‘Ni ino ai abu nan̄go sorgomq di geregere sosimqa nan̄go anjam dauryoqne. Tamo bei na aqa ai abu nan̄gi misilin̄njrimqa a qalib moyem.’ Moses a degsi marej. <sup>11</sup> Ariya nin̄gi mareq nub, ‘Tamo bei aqa ai kiyo aqa abu kiyo in̄gi qa truquamqa a na minjqas, ‘Ijo in̄gi in̄gi ejunum endi e ni emqa kere. Eo. E ni



emqasai. E nami Qotei atraiyqa giltem deqa e ni aqaryaimqasai.” ’ <sup>12</sup> A degsi minjqas di nŋngi marqab, ‘A keretqo. A na aqa ai abu nanŋgi aqaryainjrai.’ Niŋgi degsib marqab. <sup>13</sup> Nunŋgo kumbra dena nŋngi Qotei aqa anjam gotranjoqnsibqa olo nunŋgo segi moma nanŋgo kumbra dauryeqnub. Niŋgi kumbra deqaji gargekoba yeqnub.”

*Inŋgi kiye na tamo a jiga yeqnu?*

<sup>14</sup> Yesus a Farisi nanŋgi anjam degsi minjrasiqa olo tamo unŋgasari kalil nanŋgi metnjrnaqa aqa areq bonabqa minjrej, “Niŋgi kalil ijo anjam endi geregere qusib poingem. <sup>15</sup> Tamo bei a inŋgi uyimqa aqa miligiq aiqas dena tamo jiga yqasai. Inŋgi uge uge tamo aqa miligiq na oqoqnsiq branteqnu qaji dena tamo jiga yeqnu. <sup>16</sup> Tamo a dabkala ti sqas di a ijo anjam endi geregere quem.”

<sup>17</sup> Yesus na tamo unŋgasari nanŋgi anjam degsi minjrasiq ko-boonaqa a nanŋgi uratnjrsiqa tal miligiq gilej. A tal miligiq gilsiq di sonaqa aqa anŋgro nanŋgi na aqa yawo anjam di aqa utru qa nenemyeb. <sup>18-19</sup> Nenemyonabqa minjrej, “Niŋgi dego ijo yawo anjam di aqa utru poingosai e? Niŋgi quiy. Tamo nanŋgi inŋgi uyeq nabqa aisiq meneq di unu. Meneq dena bi talq di waiyeqnub. Inŋgi di tamo aqa are miligiq aiyosai. Aqa bi aniq aiqo koboqo. Deqa inŋgi dena tamo jiga yqa keresai.” Yesus aqa anjam dena a inŋgi uyo kalil jiga saiqoji qa marej. <sup>20</sup> Osiqa aqa anŋgro nanŋgi olo minjrej, “Inŋgi uge uge tamo aqa miligiq na oqoqnsiq branteqnu qaji dena tamo jiga yeqnu. <sup>21</sup> Di kiyaaqa? Inŋgi uge uge di tamo aqa are miligiq na branteqnu. Inŋgi uge uge di agi ubtosiy mernŋwai. Areqalo uge uge, uŋa qa laoqa, bajinoqa, tamo qaloqa, <sup>22</sup> was aqa nŋaun anjamyoqa, was aqa ñoro qa maulyoqa, kumbra uge uge yoqa, gisaŋoqa, laŋa laŋa laoqa, was qa ugeoqa, was yomuiyoqa, aqa segi ñam soqtoqa, nanari kumbra yoqa. <sup>23</sup> Kumbra uge uge deqaji tamo aqa are miligiq na brantoqnsiq dena tamo jiga yeqnu.”

*Fonisia qure qaji uŋa a Yesus qa aqa areqalo sinŋilatej*

<sup>24</sup> Onaqa Yesus a dena tigelosiqa walwelosiq Tair qure nanŋgo sawaq gilej. Tamo nanŋgi a qa qalieaib deqa a uliosiqa gilej. Gilsiq tal bei gogetosiq sosiqa a uliesqa keresai. Tamo qudei nanŋgi a unsib mareb, “Yesus a gago sawaq bqo. A talq di unu.” <sup>25</sup> Degsib marnabqa uŋa bei a qusiqa aqa anŋgro sebiŋ a mondor uge ti soqnej deqa a Yesus aqa talq giloqujatosiqa aqa areq di sinŋa pulutej. <sup>26</sup> Uŋa di a Grik qaji. A Juda uŋa sai. A Siria sawaq di nŋambabej. A Fonisia qure qaji. A Yesus aqa areq di sinŋa pulutosiq a wainyoqnsiqa minjoqnej, “Ni na mondor uge di wiyimqa a ijo anŋgro uratosim ulanqas.” <sup>27</sup> Onaqa Yesus

na minnej, “Iga angro du du nanği mati inği anainjrim uyib menetnrqas di kumbra bole. Iga angro du du nanço inği yainjrsim olo bauñ nanği anainjrçom di kumbra bolesai.”

<sup>28</sup> Onaça uña dena olo Yesus minnej, “O Tamo Koba, ni kere maronum. Ariya e kamba anjam bei mermit ni que. Angro du du nanği inği uyeqñabqa inği ñenği ululoñeqnaqa bauñ nanği dego uyeqñub.”

<sup>29</sup> Onaça Yesus na minnej, “O uña, ni kere maronum. Ni degsi maronum deqa ni gilime. Mondor uge a ino angro uratosiq ulanço.” <sup>30</sup> Degsi minjnaça a aqa talq gilsiqña ñam atej di mondor uge a nami aqa angro uratonaca a bijalq di ñeiesonaq unej.

*Tamo bei dabkala geteño meñ singilaej qaji di Yesus na boletej*

<sup>31</sup> Onaça Yesus a Tair qure nanço sawa uratosiqña Saidon qure ambleq na walwelosiqa Dekapolis sawaq gilsiqña Galili ya aguq di brantej. <sup>32</sup> Di brantosiq sonaça tamo qudei na tamo bei dabkala geteño meñ singilaej qaji a osi bosibqa Yesus pailjosib minjeb, “O Tamo Koba, ni ino ban aqa gateq di atimqa a boleqas.” <sup>33</sup> Onaça Yesus a tamo di osiqña tamo unğasari nanği uratnrjsiq a segi sosiqña aqa ban gei aiyel tamo di aqa dabkalaq jigej. Jigsiqña aqa segi maul osiqña tamo di aqa meñ tonyetej. <sup>34</sup> Osiqa lan tarosiqña are tulan gulbekobaiyon-aqa jagwa titosiq marej, “Efata.” Di Hibru anjam. Anjam di aqa damu, “Dabkala waqeme.” <sup>35</sup> A degsi marnaça tamo di aqa dabkala waqej. Aqa meñ dego bolelej. Boleonaça a anjam bole maroqnej. <sup>36</sup> Onaça Yesus na tamo unğasari nanği endegsi minjrej, “Ninği kumbra unonub endi tamo qudei nanği ubtosib minjraib.” Degsi minjrnaça nanği aqa anjam di quetosai. Nanği giloqnsibqa Yesus aqa manwa deqa mare mare laqneb. <sup>37</sup> Mare mare laqñabqa tamo gargekoba nanği quoqnsib tulan prugoqnsib maroqneb, “Manwa kalil Yesus a yeqnu qaji di a geregere yeqnu. Agi a na tamo dabkala geteñjro qaji nanği boletnrjeqnaça nanço dabkala olo waqeqnaça nanği anjam queqñub. Tamo meñ singilainjro qaji nanği dego gereinjreçnaça nanği anjam bole mareqñub.”

## 8

*Yesus a tamo 4,000 nanği inği anainjrej*

<sup>1</sup> Onaça bati bei Yesus a wadau sawaq di sonaça tamo unğasari tulan gargekoba nanği olo aqa areq di korooqneb. Nanği inği saiqoji. Deqa Yesus na aqa angro nanği metnrjnaça aqa areq bonabqa minjrej, <sup>2</sup> “Tamo unğasari nanği bati qalub e koba na soqneb nanği inği saiqoji. Deqa e nanği qa are ugeibqo. <sup>3</sup> Nanği qudei isaq na beb. Deqa e nanği mam

ti suweinjritqa gamq di nanği mam na lao uge.”<sup>4</sup> Degsi minjrnaqa nanği na kamba minjeb, “Sawa endi wadau. Deqa iga qabe na ingi osimqa tamo unğasari gargekoba endi anain-ironam kereqas?”<sup>5</sup> Onaqa Yesus na minjrej, “Ninği bem gembub unu?” Onaqa minjeb, “Bem 7 unu.”

<sup>6</sup> Onaqa Yesus na tamo unğasari nanği minjrej, “Ninği kalil mandamq di awoelenjoiy.” Degsi minjrnaqa nanği kalil mandamq di awoonabqa Yesus na bem 7 di osiqa Qotei pailyej. Pailyosiqa bem giñgenyosiqa aqa anğro nanği enjreqnaqa nanği na osi giloqnsibqa tamo unğasari nanği anainjreqnab uyoqneb.<sup>7</sup> Qe kiñilala qudei dego soqneb. Deqa Yesus na qe di osiqa Qotei pailyosiqa aqa anğro nanği minjrej, “Qe endi dego tamo unğasari nanği anainjriy.” Degsi minjrnaqa nanği na qe di osib tamo unğasari nanği jeisib anainjreqnab uyoqneb.<sup>8</sup> Uynab kalil menetnjrej. Onaqa ingi oto urateleñeb qaji di Yesus aqa anğro nanği na koroiyosib gumba kokba 7 di jignab maqelenej.<sup>9</sup> Tamo kalil ingi uyeb qaji nanği sisiyeb 4,000.

Onaqa Yesus na tamo unğasari kalil nanği suweinjrnaqa nanço qure qureq giloqneb.<sup>10</sup> Nanği gileqnaqbqa Yesus na aqa anğro nanği olo joqsiqa koba na qobun gogetosib Dalmanuta sawaq gileb.

### *Farisi nanği Qotei aqa mañwa bei unqajqa mareb*

<sup>11</sup> Onaqa Farisi nanği Yesus aqa areq bosibqa a anjam bei grotimqa qusib a ojqajqa deqa a ombla anjam na qoteb. Osib gisanjosib minjeb, “Ni Qotei aqa mañwa bei babtım iga unqom.”<sup>12</sup> Degsib Yesus minjnabqa a nanği qa are tulañ gulbeyonaqa jagwa titosiqa minjrej, “Ninği tamo unğasari bini bati endeqa unub qaji kiyaa e Qotei aqa mañwa bei laña babtıt ninği unqajqa metbeqñub? Ninği quiy. E Qotei aqa mañwa bei ninği osorñwasai.”<sup>13</sup> Yesus a Farisi nanği degsi minjrnsiqa nanği uratnjrsiqa olo qobun gogetosiqa ya agu taqal beiq gilej.

### *Bem tiyeqnu qaji sum qa yawo anjam*

<sup>14</sup> Bati deqa Yesus aqa anğro nanği bem oqajqa are walnjrej. Bem qujai bole qujai qobun miligiq di soqnej.<sup>15</sup> Onaqa Yesus a yawo anjam bei endegsi minjrej, “Ninği geregere ñam atsib soqniy. Bem tiyeqnu qaji sum Farisi nanço bem ti bulyimqa bem dena tiyekritosim tulañ kobaqujaqas. Herot aqa bem dego tiyekritosim tulañ kobaqujaqas.”<sup>16</sup> Onaqa Yesus aqa anğro nanği aqa yawo anjam di qusibqa segi segi maroqneb, “Iga bem osai deqa kiyo mergwo?”<sup>17</sup> Onaqa Yesus a nanço anjam di qalieosiqa nenemnjrej, “Ninği kiyaaqqa bem osai deqa mareqñub? Kiyaaqqa ninği e qa poingosai

unu? Nungo are getenjejunu kiyo? <sup>18</sup> Ningi ijo singila un-oqnsib unosaibuleqñub. Ningi ijo anjam quoqnsib quo-saibuleqñub. <sup>19</sup> E nami bem 5 giñgenyosimqa tamo 5,000 anainjronam uynab menetnjrnaqa ningi ingi oto koroiyosib gumba kokba gembub jignab maqelenej?" Onaqa nanği na Yesus minjeb, "Gumba 12." <sup>20</sup> Onaqa olo minjrej, "Bati bei e bem 7 dego giñgenyosimqa tamo 4,000 anainjronam uynab menetnjrnaqa ningi ingi oto koroiyosib gumba kokba gembub jignab maqelenej?" Onaqa minjeb, "Gumba 7." <sup>21</sup> Onaqa minjrej, "Ningi kiyaaqa e qa poiñgosai unu?"

*Yesus a tamo ñam qandimyej qaji boletej*

<sup>22</sup> Yesus na aqa añgro nanği degsi minjrsiqa koba na qobun na gilsib Betsaida qureq di tiryeb. Tiryosib mandamq ain-abqa tamo qudei na tamo bei ñam qandimyej qaji a Yesus aqa areq osi bosib minjeb, "Ni ino bañ aqa gateq di atimqa a olo boleosim ñam poiyyas." <sup>23</sup> Onaqa Yesus a tamo di aqa bañ ojsiqa qure polomq osi gilsiqqa aqa ñamdamuq di misel atetej. Osiqa aqa gateq di aqa bañ atsiqa nenemyej, "Ni sawa unqa kere e?" <sup>24</sup> Onaqa a ñam atsiqa marej, "E tamo nanği unjronum nanği ñamtañ bul aññileqñub." <sup>25</sup> Onaqa Yesus a olo tamo di aqa ñamdamuq di aqa bañ atnaqa a ñam atej ñamdamu bole suwañej. A sawa kalil geregere unej. <sup>26</sup> Onaqa Yesus na minjej, "Ni ino talq gilime. Ni qure miligiq gilaim."

*Pita a Yesus qa poiyyonaqa aqa ñam ubtej*

<sup>27</sup> Onaqa Yesus na aqa añgro nanği olo joqsiqa koba na walwelosib Sisaria Filipai qure nañgo sawaq di brantosib gamq di Yesus na aqa añgro nanği endegsi nenemnjrej, "Tamo unğasari nanği e qa kiyersib mareqñub?" <sup>28</sup> Onaqa nanği na minjeb, "Tamo qudei nanği mareqñub, ni Jon yansnjro qaji. Qudei nanği mareqñub, ni Elaija. Qudei nanği mareqñub, ni Qotei aqa medabu o tamo nanği nami soqñeb deqaji bei." <sup>29</sup> Onaqa Yesus na olo nenemnjrej, "Ningi segi e qa kiyersib mareqñub?" Onaqa Pita na minjej, "Ni Kristus." <sup>30</sup> Pita a anjam degsi ubtonaqa Yesus na aqa añgro nanği singila na getentnjrsiqa minjrej, "Ningi anjam di olo tamo qudei minjraib."

*Yesus a marej, "E moisiy olo subq na tigelqai"*

<sup>31</sup> Osiqa Yesus na aqa añgro nanği endegsi minjrej, "E Tamo Añgro. Bunuqna e jaqatiñ koba oqai. Juda gate nanği ti atra tamo kokba ti dal anjam qalie tamo nanği ti e qoreibosib lubsib moiyoñbqab. Bati qalub koboamqa e olo subq na tigelqai." <sup>32</sup> Yesus a anjam degsi ubtosiq marnaqa Pita na Yesus osiqa qalaq gilsiqqa ñiriñtej. <sup>33</sup> Onaqa Yesus a bulosiqa aqa añgro nanği koqñrsiqa Pita ñiriñtosiq minjej, "Ni Satan

bul. Deqa ni ijo qoreq gile. Ni Qotei aqa areqalo dauryosai. Ni mandam tamo nanjo areqalo dauryonum. Dauryosim agi ni na anjam di merbonum.”

<sup>34</sup> Osiqa Yesus na tamo ungasari kalil nanji ti aqa segi angro nanji ti metnjrnaqa aqa areq bonabqa minjrej, “Tamo bei na e daurbqa osimqa a aqa segi areqalo kalil uratekritosim aqa segi namburbas qoboyosim e daurbem. <sup>35</sup> Tamo bei na aqa segi nambile taqatqajqa arearetqas di a padalqas. Ariya tamo bei a e qa ti ijo anjam bole qa ti are qalsimqa aqa segi nambile uratqas di a olo nambile bole oqas. <sup>36</sup> Tamo bei a mandam qa ñoro kalil koroyosim ariya mondoñ aqa segi qunun padalqas di ñoro dena a kiyersim aqaryaiyqas? Di keresai. <sup>37</sup> Aqa qunun padalqas di a awai kiye atsim dena aqa qunun olo aqaryaiyosim a nambile sqas? Di keresai. <sup>38</sup> E Tamo Angro. Tamo ungasari bini bati endeqa unub qaji nanji Qotei torei qoreiyosnsib une atoqnsib laqnub. Deqa bini bati endi tamo bei a e qa ti ijo anjam qa ti jemaiyqas di mondoñ e ijo Abu aqa rian na ti aqa lan angro nanjo rian na ti bosiyqa e kamba tamo deqa jemaibqas.”

## 9

<sup>1</sup> Osiqa Yesus a olo aqa angro nanji endegsi minjrej, “E bole merngwai. Tamo qudei ijo areq endi tigelejuned qaji nanji morenosaisoqnibqa Qotei a singila ti bqas. Bosim nanji taqatnjrsim nanjo Mandor Koba soqnm nanji unqab.”

*Yesus aqa jejamu bulyonaq aqa angro qalub nanji unobeiteb*

<sup>2</sup> Osiqa bati 6 onaqa Yesus a tigelosiqqa Pita na Jems na Jon na nanji segi qalub joqsiqa koba na mana goge kobaq oqsib di soqneb. Sosibqa Yesus aqa jejamu bulyonaq nanji unobeiteb. <sup>3</sup> Aqa gara dego tulan pulonosiq qatekritej. Tamo bei na gara yansqas degsim qatqa keresai. <sup>4-5</sup> Onaqa Moses Elaija wo nanji brantosib Yesus koba na anjam maroqneb. Mareqnabqa Yesus aqa angro nanji na nanji aiyel unjrsibqa Pita a Yesus minjej, “O Tamo Koba, Moses Elaija wo nanji bosib iga koba na endi unum di bolequja. Deqa ni marimqa iga tal kiñilala qalub gereiyqom. Bei ino. Bei Moses aqa. Bei Elaija aqa.” <sup>6</sup> Yesus aqa angro nanji tulan ulaugeteb deqa Pita a anjam bei marqa saiiyonaqa anjam di lanja marej. <sup>7</sup> Onaqa lanbi aisiqa nanji kabutnjrnaqa lanbi miligiq dena anjam bei endegsi brantonaq nanji queb, “Endi ijo Angro qujai e na tulan qalaqalaiyeqnum qaji. Ningi aqa anjam quetoqniy.” <sup>8</sup> Onaqa Yesus aqa angro nanji bulosib nam ateb di Yesus a segi nanji koba na sonab uneb. Nanji tamo bei unosai.

<sup>9</sup> Onaqa nanji Yesus ombila manaq dena olo aiyosnsibqa Yesus na minjrej, “Manwa ningi mana goge di unonub qaji di

ubtosib tamo qudei minjraib. Bunuqna e Tamo Anqro moisiy olo subq na tigelotqa bati deqa ningi na ubtosib minjroqnqab.”<sup>10</sup> Onaqa nanqi Yesus aqa anjam di qusib segi segi maroqneb, “Yesus a kiyaaqa subq na tigelqa marqo? Anjam di aqa utru iga poigosai.” Degsib maroqnsib Yesus aqa anjam di nanqo areqaloq di atnab soqnej.

<sup>11</sup> Osib nanqi Yesus minjeb, “Dal anjam qalie tamo nanqi mareq nub, ‘Elaija a namo bamqa Kristus a bunuqna bqas.’ Anjam di kiyaaqa degsib mareq nub?”<sup>12</sup> Onaqa Yesus na minjrej, “Nanqo anjam di bole. Elaija a namo bosim tamo unqasari kalil nanqo areqalo gereiyetnjrsim soqnim bunuqna Kristus a bqas. Ariya anjam kiye nenqrenq di unu? Anjam agiende. Jeu tamo nanqi na e Tamo Anqro kumbra uge ebibqa e jaqatin koba oqai.”<sup>13</sup> E ningi olo mernqwai. Elaija agi bej. Bonaqa gulbe kalil nanqi a yqajqa are soqnej qaji agi yeb. Anjam di nami a qa nenqrenqyeb unu.”

*Yesus a anqro mel aqa jejamuq na mondor uge wiyetej*

<sup>14</sup> Onaqa Yesus na aqa anqro qalub nanqi di joqsiqa koba na aisib mana utruq di branteb. Brantosib nam ateb di Yesus aqa anqro qudei nanqi ti dal anjam qalie tamo qudei ti anjam na qoteqnab unjreb. Tamo unqasari gargekoba nanqi dego Yesus aqa anqro nanqi kainjnresonab unjreb.<sup>15</sup> Onaqa tamo unqasari kalil nanqi Yesus unsibqa tulan prugugetosib gurgur ti aqa areq bosib minjeb, “O Tamo Koba, bilaq bole.”<sup>16</sup> Degsib minjnabqa Yesus na aqa anqro nanqi nenemnjrej, “Ningi nanqi ti anjam kiye na qoteqnub?”<sup>17</sup> Onaqa tamo unqasari nanqo ambleq dena tamo bei brantosiqa Yesus minjej, “O Qalie Tamo, e ijo anqro mel osi bonum agiende. Ni na a boletqajqa deqa osi bonum. A mondor uge ti. Deqa aqa medabu getenyejunu.”<sup>18</sup> Mondor uge dena aqa jejamu ojoqnsiqa mandamq waiyeqnaqa ara gijiriqtoqnsiqa tindaqenu. Oqnsiqa maul aiyeqnu. Deqa e na ino anqro nanqi minjronum, ‘Ningi mondor uge di wiyiy.’ Minjronumqa nanqi na wiyqa yonub keresaiinjrqo.”

<sup>19</sup> Onaqa Yesus a anjam di qusiqa marej, “Ningi tamo unqasari bini bati endeqa unub qaji nunqo areqalo e qa singilatosai bole sai. Bati gembub e ningi koba na sosiyqa nunqo gulbe di qoboioqnqai? Anqro mel di ijo areq osi boiy.”<sup>20</sup> Onaqa osi bonabqa mondor uge dena Yesus unsiqa anqro di qunjimyonaqa a mandamq aisiqa belbelonaqa aqa medabuq na maul aiyoqnej.

<sup>21</sup> Onaqa Yesus na anqro di aqa abu nenemyej, “Bati gembub a degesoqnej?” Onaqa minjej, “A anqro kiñala qa degesoqnej agi bini unu.”<sup>22</sup> Mondor uge na a qalsim moiyoqqa oqnsiqa bati gaigai a namyuwoq o yaq waiyeqnu. Deqa ni na iga aqaryaigwa kereamqa aqaryaige.”<sup>23</sup> Onaqa Yesus na minjej,

“‘Kereamqa’ degsi merbaim. Tamo bei a e qa aqa areqalo singilatqas di a kumbra kalil yqa kere.”<sup>24</sup> Onaqa tamo dena lelenosiqqa Yesus minjej, “E ni qa ijo areqalo singilatqas. Ariya ijo areqalo olo gulbeibeqnu. Deqa ni na aqaryaibimqa e geregere ijo areqalo ni qa singilatqai.”<sup>25</sup> Onaqa tamo ungasari gargekoba nanji gurgur ti bosib Yesus aqa areq di koroeqnabqa Yesus a nanji unjrsiqqa mondor uge di nriñtosiq minjej, “Ni mondor uge. Ni na anqro di aqa dabkala getentqas. Ni aqa medabu dego getentqas. Deqa ni anqro di uratosim olo aqa jejamuq gilaim.”<sup>26</sup> Degsi minjnaqa mondor uge a lelenkobaosiqqa anqro di singila na qunjimosiqqa a uratosiq ulañej. Ulanonaqa anqro di a moyobulosiqqa neiesonaqa tamo qudei nanji unsib mareb, “A moiqa.”<sup>27</sup> Onaqa Yesus na anqro di aqa ban titonaqa a boleosiq tigelej.

<sup>28</sup> Onaqa Yesus aqa anqro nanji aqa areq lumu bosib nenemyeb, “Iga kiyaaqa mondor uge di wiyqa yonumqa keresai-igwo?”<sup>29</sup> Onaqa Yesus na minjrej, “Ninji mondor uge deqaji winjrqa osibqa Qotei pailyoqniy. Dena qujai ninji na mondor uge winjrib jaraiqab. Gam bei na sai.”

*Yesus a marej, “E moisiy olo subq na tigelqai”*

<sup>30</sup> Onaqa Yesus na aqa anqro nanji olo joqsiqa koba na sawa di uratosib Galili sawa ambleq na walwelosib giloqneb. Tamo ungasari nanji a qa qalieaib deqa nanji uliosib giloqneb.<sup>31</sup> Giloqnsibqa gamq di Yesus na aqa anqro nanji anjam endegsi minjrej, “E Tamo Anqro. Jeu tamo nanji na e ojsibqa tamo qudei nanjo banq di atib lubib moiqai. Bati qalub koboamqa e olo subq na tigelqai.”<sup>32</sup> Onaqa Yesus aqa anqro nanji aqa anjam di geregere poinjrosai. Deqa nanji a olo nenemyaqajqa ulaeb.

*Yesus aqa anqro yai a ñam ti sqas?*

<sup>33</sup> Onaqa Yesus aqa anqro nanji ti gilsib Kaperneam qureq di branteb. Brantosib tal bei gogetosib di sosibqa Yesus na aqa anqro nanji endegsi nenemnjrej, “Ninji gamq di anjam kiye na qotoqnab?”<sup>34</sup> Onaqa nanji mequmosib soqneb. Di kiyaaqa? Nanji gamq di Yesus aqa anqro yai a nanji kalil bunjrsim ñam ti sqas deqa anjam na qotoqneb.<sup>35</sup> Onaqa Yesus a awoosiqa aqa anqro 12 nanji metnjrnaqa aqa areq bonabqa minjrej, “Tamo bei a ñam ti sqa marsimqa a mati tamo kalil nanjo kanqal tamo soqnem. Osimqa a ñam ti sqas.”<sup>36</sup> Yesus a nanji degsi minjrsiqqa anqro kiñala bei osiqqa nanjo ambleq di tigeltosiqqa olo soqonyosiqqa nanji minjrej,<sup>37</sup> “Tamo bei a ijo ñam qa are qalsimqa anqro kiñala endeqaji bei osim geregereiyqas di a e dego osim geregereibqas. Tamo a e osim

geregereibqas di a na e segi geregereibqasai. A na ijo Abu e qarinjbej qaji di dego osim geregereiyqas.”

*Tamo nanji iga jeutgosaieqnu di nanji iga koba na wau qujai*

<sup>38</sup> Onaqa Jon na Yesus minjej, “O Qalie Tamo, ni que. Iga tamo bei unem. A ino ñam na mondor uge nanji winjreqnaqa iga na unsim saidyem. Di kiyaaqa? A iga koba na wauosaieqnu deqa.” <sup>39</sup> Onaqa Yesus na minjej, “Ninji a saidyaib. A ijo ñam na manwa bei babtqas di a urur olo e misilinjba keresai. <sup>40</sup> Tamo nanji iga jeutgosaieqnu di nanji iga koba na wau qujai. <sup>41</sup> Tamo bei a endegsi are qalqas, ‘Tamo di a Kristus dauryeqnu qaji tamo.’ A degsi are qalsimqa tamo di osim ya tigsim anaiyqas di Qotei na kamba awai bole yqas. Yimqa aqa awai bole di tamo bei na olo yayyqa keresai.”

*Ninji une torei uratiy*

<sup>42</sup> Osiqa Yesus a olo marej, “Tamo bei na angro kiñala bei e qa aqa areqalo singilateqnu qaji di osim uneq waiyqas di a kumbra tulan ugedamu yqo. Iga tamo di ojsim meniñ kobaquja osim sil na aqa kakroq di tontosim waiyim ya robuq aiqas di kere. <sup>43-44</sup> Ino ban na ni titmosim uneq waimqa laqnimqa ban di gentosim waiy. Ni degye. Di kiyaaqa? Ni ban geño sosimqa une bei yqasai di kere. Di ni ñambile gaigai sqam. Ariya ni ban aiyel ti sosimqa une yqam di keresai. Di Qotei na ni ñamyuwoq waimqas. Ñamyuwo di mosoqasai. Gaigai yuoqnqas. <sup>45-46</sup> Ino sinğa na ni titmosim uneq waimqa laqnimqa sinğa di gentosim waiy. Ni degye. Di kiyaaqa? Ni sinğa geño sosimqa une bei yqasai di kere. Di ni ñambile gaigai sqam. Ariya ni sinğa aiyel ti sosimqa une yqam di keresai. Di Qotei na ni ñamyuwoq waimqas. <sup>47</sup> Ino ñamdamu na ni titmosim uneq waimqa laqnimqa ñamdamu di otorosim waiy. Ni degye. Di kiyaaqa? Ni ñamdamu qujai ti sosimqa une bei yqasai di kere. Di Qotei a ino Mandor Koba sosim ni taqatmqas. Ariya ni ñamdamu aiyel ti sosimqa une yqam di keresai. Di Qotei na ni ñamyuwoq waimqas. <sup>48</sup> Ñamyuwo di mosoqasai. Gaigai yuoqnqas. Ñamyuwoq di tamo nanjo ambli bati gaigai sqab. Nanji morenqa keresai.”

<sup>49</sup> Osiqa Yesus a olo marej, “Ijo angro kalil nanji jaqatin oqn-sib sqab. Atraiyo injiq di bar atoqnsib ñamyuwo na koiteqnu dego kere.

<sup>50</sup> “Bar a bole. A qajarara koba. Ariya bar aqa qajarara koboqas di inji kiye na olo qajararatqas? Di keresai. Dego kere ninji bar bul sosibqa nunjo was nanji koba na geregere lawo na laqniy.”



## 10

### *Yesus a unja uratqajqa anjam marej*

<sup>1</sup> Osiqa Yesus a sawa di uratosiqa Judia sawaq gilsiq Jordan ya taqal beiq di soqnej. A di sonaqa tamo ungasari gargekoba nanqi bosib aqaq di koroonaqqa aqa kumbra gaigai yoqnej qaji di olo dauryosiqa Qotei aqa anjam plaltosiq minjroqnej.

<sup>2</sup> Onaqa Farisi nanqi olo Yesus aqa areq bosibqa a anjam bei grotimqa qusib nanqi a ojqaqqa deqa lanja gisanjosib endegsib nenemyeb, “Tamo bei na aqa unja uratqa kere e? Gago dal anjam degsi unu e?” <sup>3</sup> Onaqa Yesus na kamba minjrej, “Moses a dal anjam kiyersi marej?” <sup>4</sup> Onaqa nanqi na minjeb, “Moses a marej, ‘Tamo bei na aqa njaun uratqa osimqa pepa bei nengrenjosim yosim di a uratqas.’” <sup>5</sup> Onaqa Yesus na minjrej, “Nunqo are getenjejunu deqa Moses a dal anjam degsi nengrenjosiq ninqi engej. <sup>6</sup> Ariya ninqi quiy. ‘Tulan nami Qotei a mandam ti inqi inqi kalil ti gereiyosiqa a tamo unja wo dego gereinjrej. <sup>7-8</sup> Deqa tamo bei na aqa ai abu nanqi uratnjrsimqa aqa njaun wo heterosib jejamu qujaitosib sqab.’ Qotei aqa anjam di nengrenq di unu. Deqa tamo unja wo nanqi jejamu qujai sqab. Nanqi olo jejamu aiyel sqasai. <sup>9</sup> Qotei na nanqi aiyel turtnjrej deqa tamo bei na olo potnjraiq.”

<sup>10</sup> Osiqa Yesus a tal bei gogetosiq di sonaqa aqa angro nanqi aqa areq bosib aqa anjam deqa nenemyeb. <sup>11</sup> Nenemyonabqa minjrej, “Tamo bei na aqa njaun uratosim olo unja bei oqas di a na aqa njaun kumbra ugeq waiyqo. <sup>12</sup> Unja a dego aqa gumbulun uratosimqa olo tamo bei oqas di a na aqa gumbulun kumbra ugeq waiyqo.”

### *Angro du du nanqi Yesus aqa areq beb*

<sup>13</sup> Onaqa tamo ungasari qudei nanqi nanqo angro du du joqsib Yesus na aqa ban nanqo gateq di atetnjrqa marsib Yesus aqa areq beb. Beqnabqa Yesus aqa angro nanqi na saidnjrsib minjreb, “Nunqo angro du du nanqi joqsib endeq baib.” <sup>14</sup> Degsib saidnjrnabqa Yesus na aqa angro nanqi njrintnjrsiqa minjrej, “Angro du du nanqi uratnjrib ijo areq beb. Nanqi saidnjraib. Tamo ungasari nanqi angro du du deqaji bul sqab di Qotei a nanqo Mandor Koba sosim nanqi taqatnjrqas. <sup>15</sup> E bole mernqwai. Tamo nanqi angro du du bul sqasai di Qotei na nanqi osim taqatnjrqasai. Deqa a nanqo Mandor Koba sqasai dego.” <sup>16</sup> Osiqa Yesus na angro du du nanqi di soqonnjrsiqa aqa ban nanqo gateq di atetnjrsiqa nanqi qa Qotei pailyej.

*Noro tamo bei a Yesus ombla anjam mareb*

<sup>17</sup> Osiqa Yesus a dena tigelosiq gam dauryosiq gileqnaqa tamo bei urur ti aqa areq bosiq aqa singaq di singa pulu-tosiq nenemyej, “O Qalie Tamo Bole, e kumbra bole kiye dauryosiy dena e nambile gaigai sqai?” <sup>18</sup> Onaqa Yesus na kamba minnej, “Ni kiyaaqa e tamo bole qa merbonum? Qotei a segi qujai tamo bole. <sup>19</sup> Ariya ni Qotei aqa dal anjam qalie. Anjam agiende. ‘Ni tamo bei qalsim moiyoaim. Ni tamo bei aqa uña jejamu ojetaim. Ni bajinaim. Ni tamo bei aqa jejamu laña gisanjaim. Ni was bei aqa ingi ingi laña gisanj na yaiyaim. Ni ino ai abu nanjo sorgomq di geregere sosimqa nanjo anjam dauryoqne.’” <sup>20</sup> Onaqa tamo dena olo Yesus minnej, “O Qalie Tamo, e angro kiñala qa dal anjam kalil di dauryosim boqnem agi bini degsi unum.” <sup>21</sup> Onaqa Yesus a tamo di koqyosiq qalayosiq minnej, “Ni dal anjam kalil di dauryosim keretonum. Ariya kumbra qujai ni keretosai. Deqa e ni mermqai. Ni gilsim ino ingi ingi kalil qarinyosim silali osim tamo ingi ingi saiqoji nanji jeisim enjre. Degsim enjrsim bosim e daurbe. Yimqa bunuqna ni lañ qureq di awai bole itqam.” <sup>22</sup> Yesus na tamo di degsi minjnaq qusiq are tulan gulbekobaiyej. A ingi ingi koba ti soqnej deqa ulatamu ugeiyonaqa ulanej.

<sup>23</sup> Onaqa Yesus na aqa angro nanji koqnjrsiq endegsi minjrej, “Tamo ungasari ingi ingi koba ti unub qaji nanji Qotei na taqatnjrsim nanjo Mandor Koba sqa marsibqa lañ qureq oqwajqa banji koba.” <sup>24</sup> Onaqa Yesus aqa angro nanji aqa anjam di qusibqa tulan prugeb. Onaqa Yesus na olo minjrej, “O ijo angro, ninji quiy. Tamo ungasari nanji Qotei na taqatnjrsim nanjo Mandor Koba sqa marsibqa lañ qureq oqwajqa tulan banji koba. <sup>25</sup> Kamel a yumba miligiq gilqajqa banji koba. Dego kere tamo ungasari ingi ingi koba ti unub qaji nanji Qotei na taqatnjrsim nanjo Mandor Koba sqa marsibqa lañ qureq oqwajqa tulan banji koba.” <sup>26</sup> Onaqa Yesus aqa angro nanji aqa anjam di qusibqa olo tulan pruguetosib segi segi maroqneb, “Yesus a anjam degsi mergwo deqa tamo yai nanji Qotei na elenamqa nanji nambile gaigai sqa kere?” <sup>27</sup> Onaqa Yesus a nanji koqnjrsiq minjrej, “Tamo nanji segi nambile sqa keresai. Ariya Qotei na nanji elenqa kere. Di kiyaaqa? Qotei a kumbra kalil yqa kere.”

<sup>28</sup> Onaqa Pita na Yesus minnej, “O Tamo Koba, ni une. Iga gago ingi ingi kalil uratosim ni daurmeqnum.” <sup>29-30</sup> Onaqa Yesus na minjrej, “E bole merngwai. Tamo nanji e qa ti ijo anjam bole qa ti are qaloqnsib nanjo segi tal, nanjo was nanji, nanjo jaja nanji, nanjo ai abu nanji, nanjo angro nanji ti nanjo wau kalil dego uratnjrsib e daurbqab di Qotei na olo tal, was, jaja, ai, angro, wau gargekoba nanji enjrqas. Yimqa

jeu tamo nan̄gi dego bosib nan̄gi gulbe enjroq̄nqab. Ariya mondoṅ nan̄gi ṅambile gaigai sqab. <sup>31</sup> Deqa niṅgi quiy. Tamo gargekoba bini ṅam koba ti unub qaji nan̄gi mondoṅ ṅam saiqoṅji sqab. Ariya tamo gargekoba bini ṅam saiqoṅji unub qaji nan̄gi mondoṅ ṅam koba ti sqab.”

*Yesus a marej, “E moisiy olo subq na tigelqai”*

<sup>32</sup> Osiqa Yesus na aqa an̄gro nan̄gi joqsiqa koba na gam dauryosib Jerusalem aiyoc̄neb. Aiyoq̄nsibqa Yesus a namoeq̄naqa aqa an̄gro nan̄gi bunuq̄na dauryoq̄nsibqa are toṅtoṅniroq̄nej. Tamo un̄gasari qudei gam na dauryoq̄neb qaji nan̄gi dego ulaosib aiyoc̄neb. Onaqa Yesus na aqa an̄gro 12 nan̄gi segitniṅsiqa a une kiye turq̄as deqa nan̄gi sainjroq̄nej. <sup>33-34</sup> A na nan̄gi endegsi minjrej, “Niṅgi quiy. E Tamo An̄gro. Iga Jerusalem aiyeq̄num. Dia tamo qudei na e ojsib dal anjam qalie tamo nan̄gi ti atra tamo kokba ti nan̄go ban̄q di e atqab. Yimqa nan̄gi na ijo jejamu laṅa gisaṅyosib merbqab, ‘Ni une ti. Deqa ni moiqam.’ Nan̄gi e degsib gisaṅbosib e olo ojsib tamo nan̄gi Qotei qaliesai qaji nan̄go ban̄q di e atqab. Yimqa nan̄gi na e misilin̄boq̄nsib miselboq̄nsib bu toq̄on na e kumbain̄boq̄nqab. Osib e ṅamburbasq di lubsib moiyoṅbqab. Bati qalub koboamqa e olo subq na tigelqai.”

*Jems Jon wo nan̄gi aiyel tamo kokba sqajqa mareb*

<sup>35</sup> Onaqa Sebedi aqa ṅiri aiyel Jems Jon wo nan̄gi Yesus aqa areq bosib minjeb, “O Qalie Tamo, aqo aiyel anjam bei mermonam ni gago anjam dauryqa kere kiyo?” <sup>36</sup> Onaqa Yesus na nan̄gi aiyel nenemnjrej, “E niṅgi kiyerṅwajqa deqa niṅgi ijoq bonub?” <sup>37</sup> Onaqa nan̄gi aiyel na Yesus minjeb, “Mondoṅ ni rian̄ koba ti laṅ goge na bosim gago Mandor Koba sosimqa bati deqa ni marimqa aqo aiyel ino ban̄ woq̄ ino ban̄ qonan̄q di awoq̄om.”

<sup>38</sup> Onaqa Yesus na kamba minjrej, “Anjam niṅgi merbonub di aqa utru niṅgi geregere poiṅgosai. E jaqatin̄ koba oqai. Jaqatin̄ di ya uge uyo bul. E gulbe koba dego oqai. Gulbe di tamo nan̄gi ya tuqt̄niro bul. Jaqatin̄ ti gulbe ti e oqai di niṅgi aiyel dego oqa kere e?” <sup>39</sup> Onaqa nan̄gi na minjeb, “Od, aqo aiyel oqa kere.”

Onaqa Yesus na olo nan̄gi aiyel minjrej, “Bole, jaqatin̄ e oqai di niṅgi dego oqab. Gulbe e oqai di niṅgi dego oqab. <sup>40</sup> Ariya tamo yai nan̄gi ijo ban̄ woq̄ ijo ban̄ qonan̄q di awoq̄ab di e na marqa keresai. Di ijo wau sai. Tamo nan̄gi Qotei na gilitnjrej qaji nan̄gi segi ijo ban̄ woq̄ ijo ban̄ qonan̄q di awoq̄ab.”

<sup>41</sup> Yesus aqa an̄gro 10 nan̄go ṅamdamuq̄ di Jems Jon wo nan̄gi na anjam di Yesus minjeb deqa qusib nan̄gi aiyel qa niriṅeb. <sup>42</sup> Onaqa Yesus na aqa an̄gro 10 nan̄gi metnjrnaqa

aqa areq bonabqa minjrej, “Ningi qalie, mandor kokba sawa sawa kalil taqateqnuq qaji nanği nanġo segi ñam soqtoqnsib tamo unġasari nanği nġirin na taqatnjreqnuq. <sup>43</sup> Ariya kumbra di nuńgoq di saiq. Nunġo ambleq di anġro bei a ñam ti sqa marsimqa a mati nuńgo wau tamo soqnem. Osim a ñam ti sqa. <sup>44</sup> Nunġo ambleq di anġro bei a tamo kobaquja sqa marsimqa a mati nuńgo kanġal tamo soqnem. Osimqa a olo tamo kobaqujaqas. <sup>45</sup> E Tamo Anġro. Ningi ijo kumbra qalieosib degsib dauryoqniy. Ijo kumbra agiende. E na tamo unġasari nanği wauetnjreqnum. E deqa bem. Tamo unġasari nanği e wauetbqajqa e deqa bosai. Bunuqna e ijo segi nambile uratosiy tamo unġasari garkekoba nanği elenqai.”

*Yesus na tamo ñam qandimo boletej*

<sup>46</sup> Osiqa Yesus na aqa anġro nanği joqsiqa koba na walwelosib aisib Jeriko qureq di branteb. Brantosib Jeriko qure ambleq na walwelosib olo Jeriko uratosib aiyeqnaqba tamo unġasari tulań gargekoba nanği Yesus dauryosib koba na aiyoqneb. Aiyeqnaqba tamo bei ñam qandimyej qaji aqa ñam Bartimeus a gam qalaq di awesosiqa tamo unġasari nanği silali qa nġilnroqnej. Bartimeus a Timeus aqa nġiri. <sup>47</sup> A gam qalaq di awesosiqa anġam endegsi quej, “Yesus Nasaret qaji a beqnu.” A degsi qusiqa tulań lelenosiq marej, “O Yesus, Devit aqa Nġiri, ni e qa dulame.” <sup>48</sup> Onaqa tamo unġasari gargekoba Yesus dauryosib aiyoqneb qaji nanği na Bartimeus nġirinġosib minjeb, “Ni lelenkobaaim. Kiri.” Degsib minjeqnaqba a nanġo anġam quetnjrosai. A olo tulań lelenoqnsiq Yesus minjoqnej, “O Devit aqa Nġiri, ni e qa dulame.” <sup>49</sup> Onaqa Yesus a tigelosiqa tamo unġasari nanği minjrej, “Tamo di metib ijo areq bem.” Onaqa nanği na tamo ñam qandimyej qaji di metosib minjeb, “Ni are sińġilat. Ni tigel. Yesus a ni metmeqnu.” <sup>50</sup> Degsib minjnab qusiqa aqa gara jugo taqal atsiqa urur tigelosiqa Yesus aqa areq bej. <sup>51</sup> Bonaqa Yesus na nenemyej, “E ni kiyermqajqa deqa ni e qa lelenoqnam?” Onaqa minjej, “O Tamo Koba, e olo ñam poibim sawa unqajqa deqa e ni qa lelenoqnam.” <sup>52</sup> Onaqa Yesus na minjej, “Ni e qa ino areqalo sińġilatonum deqa e ni boletmqai. Deqa ino ñamdamu olo poimimqa ni aiye.” Degsi minjnaqa aqa ñamdamu poiyoņaqa sawa unsiqa tigelosiq Yesus dauryosiq aiyej.

## 11

*Yesus a donki aqa quraq di awoosiq Jerusalem aiyej*

<sup>1</sup> Onaqa Yesus aqa anġro nanği koba na walwelosib aisib Jerusalem jojomyosib Betfage qure ti Betani qure ti dia branteb. Qure aiyej di agi Oliv mana utruq di unu. Di brantosib Yesus na aqa anġro aiyej qarınġrsiqa minjrej, <sup>2</sup> “Ningi aisib

quire bei jom di unu di brantosib donki bei tontonub unu di unqab. Donki di bunuj tamo bei nami aqa quraq di awoosaiocnej qaji. Ningi donki di unsib sil palontosib titosib osi boiy. <sup>3</sup> Ningi sil palontoqnbqqa tamo bei na nenemngwas kiyo, 'Ningi kiyaaq donki aqa sil palonteqnub?' Degsi nenemngimqa ningi na minjiy, 'Tamo Koba a wau ti deqa donki qa mergwo.' Yimqa a na donki qarinyim ijoq bqas." <sup>4-5</sup> Yesus a nanngi aiyel degsi minjrsiq qarinjrnacaq a isib gam jomq di donki uneb. Donki di tal meq di tontonab sonaq uneb. Unsib sil palonteqnabqqa tamo qudei gamq di tigelesoqneb qaji nanngi na nanngi aiyel nenemnjreb, "Ningi kiyaaq donki aqa sil palonteqnub?" <sup>6</sup> Onaqa nanngi aiyel na anjam Yesus a minjrej qaji di tamo nanngi di minjrnab odnjrnabqqa donki di osib Yesus aqa areq osi beb. <sup>7</sup> Bosib nanngo aiyel gara jugo piqtosib donki aqa quraq di tunabqqa Yesus a segi donki gogetosiq quraq di awoej. <sup>8</sup> Awoonaqa donki a walwelosi aieqnaqa tamo ungasari gargekoba nanngi belesosib nanngo segi gara jugo piqtelenosib gamq di tuelenoqneb. Tamo qudei nanngi nañuq dena nam banqa gingenyosibqa osi bosib di dego gamq di tuelenoqneb. <sup>9</sup> Onaqa Yesus a donki quraq di awoosiq walweleqnaqa tamo ungasari namooqneb qaji nanngi ti bunuoqneb qaji nanngi ti tulan lelenoqnsibqa maroqneb, "Iga ni qa tulan areboleboleigeqnu. Ni Tamo Koba aqa ñam na bonum deqa a ni tulan geregereimeqnu. <sup>10</sup> Ni gago moma Devit aqa wau osimqa ni kamba gago Mandor Koba sosim iga taqatgwajqa bonum. Deqa iga Qotei lan goge di unu qaji aqa ñam soqtoqnqom!" Tamo ungasari nanngi degoqnsib lelen ti Yesus dauryoqneb.

<sup>11</sup> Onaqa Yesus a walwelosi aisiq Jerusalem di brantosiq atra tal koba miligiq gilej. Gilsiq inngi inngi kalil atra tal miligiq di soqnej qaji di koqyoqnej. Osiq bilaqtonaqa a olo atra tal koba uratosiq aqa segi angro <sup>12</sup> nanngi joqsiqa koba na puluosib Betani qureq gileb.

*Yesus a qura minjej, "Ni olo bunu geitqasai"*

<sup>12</sup> Nebeonaqa Yesus aqa angro nanngi ti olo tigelosib Betani qure uratosib aiyeb. Nanngi aiyeqnsibqa gamq di Yesus a mamyej. <sup>13</sup> Onaqa a isaq na nam atsiqa qura banqa ti sonaq unsiqa aqa gei unqajqa utruq gilej. Gilsiq unej qura gei bei saiqoji. Geitqa bati sai deqa banqa segi sonab unej. <sup>14</sup> Unsiqa qura di minjej, "Ni olo bunu geitqasai. Tamo bei a bosim ino gei bei oqasai." Degsi minjnaqa aqa angro nanngi queb.

*Yesus na tamo ungasari nanngi atra talq dena winjrej*

<sup>15</sup> Onaqa Yesus aqa angro nanngi ti walwelosi a isib Jerusalem di branteb. Brantosib Yesus a atra tal koba miligiq gilsiqqa nam

atej di tamo ungasari gargekoba nanği inği inği qarinyoqnsibqa dena silali eqnab unjrşiqa nanği winjrnaq jaraiyeb. Tamo qudei nanği silali piloqneb. Qudei nanği binon qarinyoqnsib dena silali oqneb. Deqa Yesus a nanço jar ti jaram ti bilbeyosiqa nanği dego winjrnaq jaraiyeb. <sup>16</sup> Osiqa tamo ungasari atra tal miligiq di inği inği osi laqneb qaji nanği dego saidnrşiqa winjrnaq jaraiyeb. <sup>17</sup> Nanği kalil jaraiyeq nabqa Yesus na minjrej, “Qotei aqa anjam bei nami endegsib nengrenyeb unu, ‘Ijo tal endi tamo ungasari kalil nanço pailyqajqa tal.’ Qotei aqa anjam degsi unu. Ariya ninği na olo tal endi ugetonubqa a bajın tamo nanço tal bulço.”

<sup>18</sup> Onaqa atra tamo kokba ti dal anjam qalie tamo nanği ti Yesus aqa anjam di qusibqa nanği a qa ulaosib a qalib moiqa-jqa gam namoqneb. Di kiyaaqa? Tamo ungasari kalil nanği Yesus aqa anjam quqwajqa tulan arearetnjroqnej deqa. <sup>19</sup> Ariya bilaqtonaqa Yesus aqa anğro nanği koba na olo Jerusalem uratosib gileb.

### *Qura a laosiq moiyej*

<sup>20</sup> Nebeonaqa Yesus aqa anğro nanği ti olo tigelosib gam dauryosib aiyocnsib qura di olo uneb utru ti kalil laosiq moiyej. <sup>21</sup> Onaqa Pita a Yesus aqa anjam nami qura minjej qaji deqa olo are qalsiqa Yesus minjej, “O Tamo Koba, ni unime. Qura ni ya nriñtem qaji agi laosiq moiço.” <sup>22</sup> Onaqa Yesus na aqa anğro nanği endegsi minjrej, “Ninği Qotei qa nunço areqalo sinğilatiy. <sup>23</sup> E bole mernğwai. Tamo bei a areqalo aiyeltqasai di a mana kobaquja endi minjças, ‘Ni tigelosim yuwalq aye.’ Aqa are miligiq di a endegsi are qalças, ‘Bole, mana di a ijo anjam dauryças.’ Degsi are qalças di mana a aqa anjam dauryosim tigelosim yuwalq aiças. <sup>24</sup> Deqa ninği quiy. Ninği inği bei qa Qotei pailyqa osibqa endegsib are qaliy, ‘Inği di Qotei na egwas.’ Degsib are qalsib pailyqab di a na enğwas. <sup>25</sup> Deqa ninği Qotei pailyqa osibqa tamo bei qa anjam soqnimqa ninği na aqa une kobotosib Qotei pailyiy. Yimqa nunço Abu lan qureq di unu qaji a kamba nunço une kalil kobotetnğwas. <sup>26</sup> Ariya ninği tamo di aqa une kobotetqasai di nunço Abu lan qureq di unu qaji a dego nunço une kobotetnğwasai.”

*Juda nanği na Yesus nenemyeb, “Ni sinğila qabe na osimqa kumbra endi yeqnum?”*

<sup>27</sup> Osiqa Yesus a aqa anğro nanği koba na walwelosib aisib olo Jerusalem di branteb. Brantosib Yesus a atra tal koba miligiq gilsiq dia walweleqnaqa atra tamo kokba ti dal anjam qalie tamo nanği ti Juda gate nanği ti Yesus aqa areq bosib nenemyeb, <sup>28</sup> “Ni iga merge. Ni sinğila qabe na osimqa

kumbra endi yeqnum? Yai na ni qarınmej deqa ni bosim wau endi yeqnum?”

<sup>29</sup> Onaqa Yesus na minjrej, “E kamba anjam bei nıngi nenemngwai. Nenemngitqa nıngi e merbibqa e yai na qarınbonaq bosim wau endi yeqnum di ubtosiy merngwai. <sup>30</sup> Nıngi na merbiy. Yai na Jon qarınyonoqa bosıqa tamo ungasari nanđi yansnjroqnej? Qotei na kiyo? Tamo bei na kiyo?”

<sup>31</sup> Onaqa nanđi Yesus aqa anjam di qusibqa segi segi qairosib mareb, “Iga Yesus minjqom, ‘Qotei na Jon qarınjeje,’ degsi minjqom di a iga mergwas, ‘Kiyaqa nıngi Jon aqa anjam quetosai?’ <sup>32</sup> Ariya iga minjqom, ‘Tamo bei na Jon qarınjeje,’ degsi minjqom di dego keresai.” Nanđi tamo ungasari nanđi ulainrsib deqa degsib qaireb. Di kiyaqa? Tamo ungasari nanđi maroqneb, “Jon a Qotei aqa medabu o qaji tamo bole.”

<sup>33</sup> Nanđi degsib qairosib olo Yesus minjeb, “Yai na kiyo Jon qarınjeje di iga qaliesai.” Onaqa Yesus na kamba minjrej, “Nıngi degsib merbonub deqa e dego yai na qarınbonaq bosim wau endi yeqnum di nıngi merngwasai.”

## 12

### *Wain wau qa yawo anjam*

<sup>1</sup> Yesus na Juda tamo kokba nanđi degsi minjrısiqa olo yawo anjam bei endegsi minjrej, “Tamo bei a tigelosiqa aqa wauq gilej. Gilsıqa wain sil yagelenosiqa jeñ qosej. Qoso koboonaqa meniñ qura gogeq di tabir kuru bul gereiyej. Wain sil geitimqa wain gei koroiyosib paraparaiyosib aqa ya dia bilentqajqa deqa gereiyej. Osiqa wauq di tal atsiqa wau taqato tamo qudei nanđo banq di aqa wau uratetnrısiqa sawa isaq gilsiq di soqnej. <sup>2</sup> Sonaqa wain gei melionaqa a na aqa kanđal tamo bei qarınyonoqa wau taqato tamo nanđoq aisiqa minjrej, ‘Wau lanja na e qarınbqo bonum. Deqa nıngi wain gei ebibqa e na osi gilqai.’ <sup>3</sup> Degsi minjrnaqa nanđi na a ojsib qalougetosib wiyonab lanja puluosiq gilej. <sup>4</sup> Gilnaqa wau lanja na olo kanđal tamo bei qarınyonoq ainaqa a dego ojsib aqa gate paratetosib tulan ugeugeiyeb. <sup>5</sup> Onaqa wau lanja na olo kanđal tamo bei qarınyonoq ainaqa a dego qalougetosib moiyyoteb. Olo kanđal tamo gargekoba nanđi qarınjreqnaqa aiyeqnaq qudei ñumougetoqneb. Qudei moiyyotnjroqneb. <sup>6</sup> Onaqa wau lanja a endegsi are qalej, ‘Ijo segi anđro qujai e na tulan qalaqalaiyeqnum qaji di qarınjit aıqas di nanđi a qalqasai. Nanđi aqa anjam quetqab.’ <sup>7</sup> Degsi are qalsıqa aqa segi niri qarınyonoq aiyej. Aiyeqnaqa wau taqato tamo nanđi a unsibqa segi segi qairosib mareb, ‘Tamo a bqo endi wau lanja aqa segi niri. A na aqa abu aqa ingi ingi kalil oqas. Deqa iga a qalsim moiyyotosimqa wau endi iga na

oqom.’<sup>8</sup> Degsib marsibqa wau lanja aqa njiri ojsib qalnab moinaqa aqa jejamu osib wau qalaq di waiyeb.

<sup>9</sup> “Deqa ningi kiyersib are qalonub? Wau lanja a bosimqa wau taqato tamo uge nanngi di kiyernjrqas? E ningi merngwai. A bosim nanngi ñumsim moiyojnjqas. Osim aqa wau di olo yainjrsim tamo qudei nanngo banq di uratetnjrimqa nanngi na kamba taqatesqab.

<sup>10</sup> “Qotei aqa anjam bei unu. Ningi anjam di nami sisiosai kiyo? Anjam agiende, ‘Tal gereiyo qaji tamo nanngi na tal ai arqsibqa uge qa marsib taqal waiyeb.

Onaqa tal ai di Qotei na olo osiq tumaq di tigeltej unu. Tal ai di tal singilatqajqa deqa tigeltej.

<sup>11</sup> Tamo Koba a segi na tal ai di tigeltej deqa iga unsim mareqnum,

“Tal ai di tulan bolequja.” ’ ’ ”

<sup>12</sup> Onaqa Juda tamo kokba nanngi yawo anjam di qusib endegsib qalieeb, Yesus a yawo anjam dena nanngo jejamuq di une qametnjrej. Nanngi degsib qalieosib deqa Yesus ojqa mareb. Ariya nanngi tamo ungasari nanngi ulainjrsib deqa nanngi Yesus ojqa uratosib jaraiyeb.

*“Iga Sisar takis yqom e?”*

<sup>13-14</sup> Juda tamo kokba nanngi jaraiyosib Farisi nanngi ti Herot aqa wau tamo qudei ti nanngoq aisib minjreb, “Ningi Yesus aqaq gilsib anjam bei nenemyibqa a anjam grotim iga qusim ojgom.” Degsib minjrsib nanngi qarinjrnab Yesus aqa areq gilsib minjeb, “O Qalie Tamo, iga qalie, ni anjam bole maro qaji tamo. Ni anjam bole segi tamo ungasari nanngi minjroqnsim Qotei aqa kumbra osornjreqnum. Ni tamo bei ulaiyo-saieqnum. Ni tamo ñam ti nanngi anjam bei minjroqnsim olo tamo ñam saiqoji nanngi anjam bei minjrosaieqnum. Ni anjam qujai tamo kalil nanngi minjreqnum. Deqa ni iga merge. Iga Sisar takis yqom e? Yqasai e? Ni kiyersi are qalonum?”

<sup>15</sup> Onaqa Yesus a nanngo gisan anjam di poiyoanaqa minjrej, “Kiyaqa ningi e anjam bei grotitqa qusib e ojqajqa deqa gisanbeqnum? Meniñ silali bei osi boiy. Osbab e unqai.”

<sup>16</sup> Degsi minjrnaqa nanngi meniñ silali bei osi bosib osoryonab unsiqa minjrej, “Meniñ silali quraq endi tamo yai aqa ulatamu ti ñam ti unu?” Onaqa nanngi na minjeb, “Di Sisar aqa.” <sup>17</sup> Onaqa a na minjrej, “Deqa Sisar aqa ingi ingi a qa olo yiy. Qotei aqa ingi ingi a qa olo yiy.” Onaqa nanngi Yesus aqa anjam di qusibqa tulan prugueteb.

*Tamo moreño qaji nanngi olo subq na tigelqab*

<sup>18</sup> Onaqa bati deqa Sadyusi tamo qudei nanngi Yesus aqa areq beb. Sadyusi nanngi mareqnum, “Tamo moreño qaji nanngi



olo subq na tigelqasai.” Deqa nanqi bosib Yesus endegsib minjeb, <sup>19</sup> “O Qalie Tamo, ni que. Moses a nami dal anjam endegsi nenngrenyej, ‘Tamo bei a moiymqa aqa n̄auŋ angro saiqoji soqnmqa aqa was bei na olo uŋa qobul di osim aqa was moiyej qaji aqa angro n̄ambabtetqas.’ Moses a nami dal anjam degsi nenngrenyej. <sup>20</sup> Deqa ni que. Was 7 nanqi soqneb. Nanqo was matu a uŋa osiqa moiyej. A angro saiqoji. <sup>21</sup> Onaqa aqa was yala na olo uŋa qujai di osiqa a dego moiyej. A angro saiqoji. Onaqa aqa was yala na olo uŋa di ej. Osiqa a dego moiyej. A angro saiqoji. <sup>22</sup> Was 7 kalil nanqi uŋa qujai di osib moren̄eb. Nanqi angro saiqoji. Nanqi kalil moren̄onabqa ariya bunuqna uŋa di a dego moiyej. <sup>23</sup> Deqa ni iga merge. Mondon̄ subq na tigelo batiamqa tamo kalil nanqi subq na tigelabqa uŋa di a yai aqa n̄auŋ t̄int̄in sqas? Ni qalie, was 7 kalil nanqi uŋa qujai di eb.”

<sup>24</sup> Onaqa Yesus na minjrej, “Qotei aqa anjam nenngrenq di unu qaji di aqa damu ninqi poin̄gosai e? Qotei aqa singila dego ninqi poin̄gosai e? Od, ninqi poin̄gosai. Utru deqa ninqi anjam grotonub. Grotosib agi nenembonub. <sup>25</sup> Mondon̄ tamo un̄gasari nanqi subq na tigelosibqa nanqi un̄atqasai. Nanqi tamotqasai. Nanqi lan̄ angro bul lan̄a sqab.

<sup>26</sup> “Nin̄gi quiy. Tamo nanqi moisib olo subq na tigelqab anjam di aqa utru Moses a nami babtosiq nenngrenyej. Di ninqi sisiyosai kiyo? N̄am marin̄ miligiq di pulon̄eqnaqa Qotei a n̄am pulon̄q di sosisqa Moses metosiq endegsi minjej, ‘E Abraham aqa Qotei. E Aisak aqa Qotei. E Jekop aqa Qotei.’ <sup>27</sup> Qotei na Moses degsi minjej deqa iga qalieonum, Qotei a tamo moren̄o qaji nanqo Qotei sai. A tamo n̄ambile so qaji nanqo Qotei. Anjam di ninqi tulan̄ grotonub!”

### *Dal anjam kiye a tulan̄ bolequja?*

<sup>28</sup> Onaqa dal anjam qalie tamo bei a bosiqqa Yesus a Sadyusi nanqi ti anjam na qoteqna b unjrej. Yesus a geregere Sadyusi nanqi kamba anjam minjrn̄aqa qusiqa Yesus nene-myej, “Qotei aqa dal anjam kiye a segi qujai tulan̄ bolequja? Dal anjam kiye a dal anjam kalil bun̄njrejunu?” <sup>29</sup> Onaqa Yesus na minjej, “Dal anjam tulan̄ bolequja agi mermqai. ‘O Israel nin̄gi quiy. Gago Tamo Koba Qotei a segi qujai Tamo Koba. <sup>30</sup> Deqa ni ino Tamo Koba Qotei a tulan̄ qalaqalaiyime. Qalaqalaiyosim ino are miligi ti ino qun̄uŋ ti ino areqalo ti ino singila ti kalil a yekritime.’ Dal anjam di a segi qujai tulan̄ bolequja. A na dal anjam kalil bun̄njrejunu. <sup>31</sup> Ariya dal anjam deqaji bei dego mermqai. Dal anjam agiende. ‘Ni ino segi jejamu gereiyeqnum dego kere ino was nanqi degsim geregereinjroqnime.’ Dal anjam boledamu aiyel agi e na mermonum. Dal anjam deqaji bei saiqoji.”

<sup>32</sup> Onaqa dal anjam qalie tamo dena kamba Yesus minjej, “O Qalie Tamo, ni bole maronum. Qotei a segi qujai. Qotei bei saiqoji. <sup>33</sup> Iga a tulan qalaqalaisyosim gago are miligi ti gago powo ti gago singila ti kalil a yekritqom di kumbra bolequja. Iga gago segi jejamu gereiyeqnum dego kere gago was nanği degsim geregereinjroqnoqom di dego kumbra bolequja. Dal anjam aiyel di tulan boledamu. Iga ingi ingi Qotei atraiyqom di laņa kiņala. Iga ingi bei nıamyuwo na koitosim Qotei atraiyqom di dego laņa kiņala. Ariya iga dal anjam aiyel di dauryqom di tulan bolequja.”

<sup>34</sup> Dal anjam qalie tamo di a tulan poiyoņaqa anjam degsi marnaqa Yesus a qusiqa minjej, “Ni anjam tulan boledamu maronum. Deqa sokiņala Qotei na ni taqatmosim ino Mandor Koba sqas.”

Onaqa tamo ungasari nanği olo anjam bei Yesus nenemyqajqa ulaeb.

*Kristus a kiyersim Devit aqa niri sqas?*

<sup>35</sup> Onaqa Yesus a atra tal koba miligiq di sosiqa Qotei aqa anjam plaltoqnej. Osiqa tamo ungasari nanği anjam bei endegsi minjrej, “Dal anjam qalie tamo nanği kiyaya mareqnum, ‘Kristus a Devit aqa niri?’ <sup>36</sup> Devit a nami marej, ‘Kristus a ijo Tamo Koba.’ Agi Mondor Bole na Devit aqa medabu singilatetonaqa a endegsi marej, ‘Tamo Koba a na ijo Tamo Koba minjej, ‘Ni ijo ban woq endi awo.

Awesoqnumqa e ino jeu tamo kalil nanği elenjosiy ino sorgomq di atitqa ni na nanği taqatnjroqnoqam.” ’

<sup>37</sup> Niņgi uniy. Devit a marej, ‘Kristus a ijo Tamo Koba.’ Deqa Kristus a kiyersim Devit aqa niri sqas?”

*Dal anjam qalie tamo nanği kumbra uge uge yoqneb*

Tamo ungasari gargekoba nanği sosibqa Yesus aqa anjam quqwajqa tulan arearetnjroqnej. <sup>38</sup> Yesus a anjam bei endegsi plaltosiq minjrej, “Niņgi dal anjam qalie tamo nanği kumbra uge geregere tenemtoqniy. Nanği koro sawaq di tamo ungasari nanği na nanği ñam soqtetnjrsib ban ojetnjrqajqa deqa gara olekokba jugoqnsib laqnum. <sup>39</sup> Nanği Qotei tal miligiq di, goiyo kokbaq di sosibqa tamo ñam ti nanği awo jaramq di awoqnoqajqa deqa areboleboleinjreqnu. <sup>40</sup> Nanği unğa qobul nanği gisanjroqnsibqa nanği tal ti ingi ingi ti laņa yainjreqnum. Osib tamo ungasari nanği na unjrsib nanği ñam soqtetnjrqajqa deqa pailyo olekokba yeqnum. Deqa mondon Qotei na nanği awai tulan ugedamu enjrqas.”

*Unğa qobul aqa silali kiņala soqnej di Qotei yekritej*

<sup>41</sup> Osiqa Yesus a atra tal miligiq di sosiqa silali ato qaji kulum jojomq di awoej. Awoosiqa nam atej di tamo ungasari nanqi boqnsib silali ateqnab unjroqnej. Ñoro tamo gargekoba nanqi boqnsib silali tulan kokba atoqneb. <sup>42</sup> Onaqa unqa qobul bei ñoro tulan saiqoji a dego bosiqqa meniñ silali kiñilala aiyel segi atej. <sup>43</sup> Atnaqa Yesus na unsiqa aqa angro nanqi metnjrnaqa aqa areq bonabqa minjrej, “E bole merngwai. Unqa qobul endi a ñoro tulan saiqoji. Deqa a na ñoro tamo kalil nanqi bunjrsiqa silali kobaquja atqo. <sup>44</sup> Ñoro tamo nanqi silali koba ejunub. Nanqi oto kiñala segi ateqnub. Ariya unqa qobul endi a silali tulan sai bole sai. Aqa meniñ silali kiñilala aiyel segi naj agi atekritqo.”

## 13

### *Bunuqna jeu tamo nanqi na atra tal niñaqyqab*

<sup>1</sup> Osiqa Yesus na aqa angro nanqi joqsiqa koba na atra tal koba uratosib giloqnsibqa aqa angro bei na minjej, “O Qalie Tamo, ni unime. Atra tal endi tulan bolequja. Atra tal walato qaji meniñ di tulan boledamu!” <sup>2</sup> Onaqa Yesus na kamba minjej, “Atra tal ni unonum endi bunuqna jeu tamo nanqi na bosib tulan niñaqyosib aqa meniñ kalil paraparainjsibqa taqal breinjrqab. Yimqa meniñ bei meniñ bei aqa quraq di sqasai. Meniñ kalil segi segiqab.”

### *Gulbe kobaquja bunuqna brantqas*

<sup>3</sup> Osiqa Yesus a Oliv manaq oqsiq atra tal areiyosiq aweson-aqa Pita na Jems na Jon na nanqi qalub Yesus aqa areq bosib lumu nenemyeb, <sup>4</sup> “Ni iga merge. Bati gembu jeu tamo nanqi bosib atra tal endi niñaqyqab? Niñaqyqa osibqa kumbra kiye namoqna brantim iga unsim poigwas, ‘Bati di jojomqo?’”

<sup>5</sup> Onaqa Yesus na minjrej, “Niñgi geregere nam atoqniy. Tamo qudei na niñgi gisanqo uge. <sup>6</sup> Bunuqna gisanqo tamo gargekoba nanqi ijo ñam na bosib tamo ungasari nanqi minjroqngab, ‘E Kristus.’ Degsib tamo ungasari tulan gargekoba nanqi gisa gisanjroqngab.

<sup>7</sup> “Bunuqna sawa bei bei qaji nanqi an na qotokobaoqngab. Niñgi deqa qusib ulaaib. Qotei a nami marej, ‘Kumbra di brantqas.’ Deqa brantem. Ariya kumbra di brantimqa diño bati urur brantqasai. Soboleiyosim brantqas. <sup>8</sup> Bati deqa sawa bei ti sawa bei ti qotoqngab. Mandor qudei nanqi tigeloqnsibqa mandor qudei nanqi qoto itnjroqngab. Sawa bei beiq di mimiñ kokba ti mam ti ingi saio bati brantelenqas. Kumbra kalil di unqa anqrotqa osiqa mati jaqatin kiñala eqnu dego kere.

<sup>9</sup> “Deqa ningi geregere ñam atoqniy. Kumbra kalil di brantosaioqnimqa Juda nanngi na bosib ningi ojelenosib anjam pegiyo talq di ningi tigeltngoqngab. Osib nanngo Qotei tal miligiq di ningi kumbaingoqnsib olo ningi joqoqnsib Rom nanngo gate ti nanngo mandor ti nanngo ulatamuq di ningi tigeltngoqngab. Yimqa ningi ijo anjam bole palontognsib nanngi minjroqngab. <sup>10</sup> Sawa sawa kalilq di dego ningi ijo anjam bole ubtosib mare mare laqribqa tamo ungasari nanngi quoqngab. Amqa diño bati brantqas. <sup>11</sup> Nanngi na ningi ojoqnsib anjam pegiyo talq di tigeltngoqngab ningi endegsib are qalaib, ‘Iga na kamba anjam kiyersi minjrqom?’ Ningi degaib. Bati deqa Qotei na powo engoqnimqa ningi kamba anjam minjroqngab. Ningi segi na anjam minjrqasai. Mondor Bole na nunngo medabu singilatetngim ningi anjam marqab. <sup>12</sup> Bati deqa kumbra uge endeqaji brantqas. Tamo qudei na nanngo segi was nanngi ojoqnsib qaja tamo nanngo banq di atoqribqa nanngi na nanngi ñumoqrib moreñoqngab. Tamo qudei na nanngo segi angro nanngi dego degsib ojoqngab. Angro qudei na nanngo segi ai abu nanngi jeutnjroqnsib ojoqnsib qaja tamo nanngo banq di atoqribqa nanngi na nanngi ñumoqrib moreñoqngab. <sup>13</sup> Ningi ijo ñam ejunub deqa tamo kalil nanngi ningi qa are tulan ugeinjroqngas. Ariya ningi ijo ñam singila na ojsib gilsib diño bati itqab di Qotei na ningi elenqas.”

### *Ingi tulan ugedamu brantqas*

<sup>14</sup> Osiqa Yesus a olo marej, “Diño batiamqa ingi tulan ugedamu a Qotei aqa getento warum miligiq di tigelesoqnim ningi unqab.” E Mak. Tamo ungasari ijo anjam endi sisiyeqñub qaji nanngi geregere sisiyosib poinjrem. Poinjrim marqab, bole. Osiqa Yesus na aqa angro nanngi olo endegsi minjrej, “Ningi ingi ugedamu di unsibqa bati deqa tamo ungasari Judia sawaq di unub qaji nanngi jaraiyosib manaq oqoqujatebe. <sup>15</sup> Tamo ungasari tal meq di unub qaji nanngi jaraiqa oqnsib ingi ingi oqa osibqa olo warum miligiq gilaib. Nanngi jaraiyoqujatebe. <sup>16</sup> Tamo ungasari wauq di unub qaji nanngi jaraiqa oqnsib nanngo gara jugo oqa osibqa olo puluosib qureq baib. Nanngi torei dena jaraiyoqujatebe. <sup>17</sup> Bati deqa unja guman ti unja angro mom ti nanngi jaraiyo bangioqnsib gulbe koba oqab. <sup>18</sup> Deqa ningi endegsib pailyoqniy, ‘Gulbe di awa bati qa brantaiq.’ <sup>19</sup> Ningi degsib pailyoqniy. Di kiyaya? Bati deqa tamo ungasari nanngi gulbe tulan kobaquja oqab. Gulbe deqaji nami brantosaioqnej. Qotei na mandam atej bati deqa gulbe deqaji brantosai dena bosu bosiq agi bini unum. Bunuqna laña ambleq di dego brantqasai. Agi bati qujai deqa brantqas. <sup>20</sup> Gulbe di aqa bati Tamo Koba a na truqutqas. A na truqutqasai di tamo ungasari kalil nanngi

padalekritqab. Aqa segi tamo ungasari nami giltnjrej qaji nanqi padalaib deqa a na gulbe di aqa bati truqutqas.

<sup>21</sup> “Bati deqa tamo qudei na merngwab, ‘Ninigi uniy. Kristus a bqo agiende’ o ‘Kristus a bqo agide.’ Degsib merngibqa ninigi nanqo anjam quetnjraib. <sup>22</sup> Tamo qudei nanqi bosib gisanosib maroqnqab, ‘E Kristus.’ Qudei nanqi maroqnqab, ‘E Qotei aqa medabu o qaji tamo bole.’ Degsib maroqnsib manwa kokba gargekoba babtoqnqab. Nanqo manwa dena nanqi na tamo ungasari kalil areqalo niñaqyetnjroqnqab. Osib Qotei aqa segi tamo ungasari nami giltnjrej qaji nanqo areqalo dego niñaqyetnjrqajqa wauoqnqab. <sup>23</sup> Deqa ninigi geregere nam atsib soqniy. Kumbra kalil di brantosaisonaqa e namoqna merngonum.”

### *Tamo Angro a singila ti rian ti bqas*

<sup>24</sup> Osiaqa Yesus a olo marej, “Gulbe kalil di nanqo bati koboamqa sen ambruqas. Bai dego suwanqasai. <sup>25</sup> Bongar nanqi lan goqe na ululonosis mandamq aiyelenqab. Lan goqe dia inqi inqi kalil renqinyelenqab. <sup>26</sup> Bati deqa e Tamo Angro singila ti rian koba ti lanbiq na mandamq aiyonit tamo ungasari nanqi tarosib e nubqab. <sup>27</sup> Yimqa bati deqa e na ijo lan angro nanqi qarinjritqa nanqi sawa sawa kalil keretosib Qotei aqa segi tamo ungasari nami giltnjrej qaji nanqi lan utru utruq na koroinjqab.”

### *Ninigi qura qa yawo anjam dena poingem*

<sup>28</sup> Osiaqa Yesus a olo marej, “E na qura qa yawo anjam ninigi merngitqa dena geregere poingem. Qura banqa qalsim olo ñalguyoqnimqa ninigi unsib qalieqab, ‘Sen aqa bati jojomqo.’ <sup>29</sup> Dego kere kumbra kalil e ubtosim merngonum qaji endi brantimqa ninigi unsib endegsib qalieoiy, ‘Bole, Kristus bqajqa bati jojomqo. A siranmeq di tigelejunu.’ <sup>30</sup> E bole merngwai. Tamo ungasari bini bati endeqa unub qaji nanqi kalil morenosaisoqnbqa kumbra kalil endi brantqas. <sup>31</sup> Lan ti mandam ti koboqab. Ariya ijo anjam koboqa keresai.”

### *Yesus bqajqa bati di tamo bei a qaliesai*

<sup>32</sup> Osiaqa Yesus a olo marej, “Ijo bqajqa bati tamo qujai bei a qaliesai. Lan angro nanqi qaliesai. E Qotei aqa Njiri e segi dego qaliesai. Ijo Abu a segi qalie.

<sup>33</sup> “Ninigi ijo bqajqa bati qaliesai deqa ninigi geregere nam atsib soqniy. <sup>34</sup> Ijo bqajqa bati di tamo bei a sawa isaq gilej dego kere. A gilqa osiaqa aqa kanqal tamo nanqo banq di aqa tal ti inqi inqi ti uratetnjrsiqqa nanqi wau segi segi enjrej. Aqa kanqal tamo bei minjej, ‘Ni siranmeq di tigelesosim geregere nam atoqne.’ <sup>35</sup> Degsi minjej. Dego kere ninigi geregere nam atsib soqniy. Di kiyaaq? Tal lanja a olo bqajqa bati

ningi qaliesai. A bilaq kiyo, qolo kiyo, tuwe anjamoqnimqa kiyo, nobqolo kiyo bqas. <sup>36</sup> A boqujatosim ningi njerenjesoqni b nunqaim deqa ningi geregere nam atsib soqniy. <sup>37</sup> E anjam merngonum qaji endi tamo kalil nangi dego minjreqnum. Ijo anjam agiende, 'Ningi geregere nam atsib soqniy.' ” Yesus na aqa anqro nangi degsi minjrej.

## 14

*Juda tamo kokba nangi Yesus qalib moiqajqa gam njamqneq*

<sup>1</sup> Onaqa Juda nanqo yori bati koba jojomej. Yori bati di aqa nam Bem Tiyosai Qaji Uyqajqa Bati. Qotei a nami Israel nangi Isip sawaq di padalqa laq nabqa aqaryainjrej. Deqa olo are qalqajqa bati jojomej. Bati aiyel soqnej. Deqa atra tamo kokba ti dal anjam qalie tamo nangi ti endegsib nenemoqneq, “Iga kiyersim Yesus lumu na ojsim qalsim moiyo tqom?” <sup>2</sup> Osib mareb, “Iga yori bati qa Yesus ojqasai. Ojqom di tamo unqasari nangi iga nugsib nirinosisib qoto tigelto uge.”

*Unqabei a gorenq quleq ti osiq Yesus aqa gateq di bilentej*

<sup>3</sup> Onaqa Yesus a Betani qureq gilsiq tamo bei nami yu na aqa jejamu ugeelenej qaji aqa nam Saimon aqa talq di soqnej. Sosisiq ingi uyeqnaqa unqabei a gorenq quleq ti tulan boledamu silali kobaquja na awaiyej qaji di jalinqajq jigsisqa osi bosisqa aqa medabu paratosisqa Yesus aqa gateq di bilentej. <sup>4</sup> Onaqa tamo qudei tal miligiq di awesoqneq qaji nangi unqabei aqa kumbra unsibqa nirinosisib segi segi maroqneq, “Unqabei a kiyaq gorenq di lanq nanguiq?” <sup>5</sup> A gorenq di osiq tamo qudei enjrqo qamu meniñ silali 300 yonub qamu gilsiq tamo ingi ingi saiqoji nangi jeisi enjrqo qamu di kere.” Osib nangi unqabei a nirinqteb. <sup>6</sup> Onaqa Yesus na kamba minjrej, “Ningi kiyaq unqabei a gulbe yeqneq? A kumbra bole ebqo. <sup>7</sup> Tamo ingi ingi saiqoji nangi bati gaigai ningi ti sqab. Deqa ningi na nangi aqaryainjrq are soqnimqa aqaryainjroqniy. Ariya e bati gaigai ningi ti sqasai. <sup>8</sup> E moiqai. Moiyitqa e subq atqab. Unqabei a e qa are qalsisqa ijo jejamuq di gorenq bilentosiq dena ijo jejamu subq atqajqa gereiyetbqo. A na kumbra di e qa yqa kere agi yqo. <sup>9</sup> E bole mernqwai. Bunuqna ijo wau tamo nangi sawa sawa kalilq di ijo anjam bole mare mare laqnsibqa unqabei a endena kumbra ebqo qaji deqa are qaloqnsib a qa saonqab.”

*Judas a Yesus osim atra tamo kokba nanqo banq di atqas*

<sup>10</sup> Onaqa Judas Iskariot a tigelosisqa atra tamo kokba nanqoq gilej. Judas a Yesus aqa anqro 12 nangi deqaji bei. A nanqoq gilsisqa minjrej, “E Yesus osiy nunqo banq di atqai.” <sup>11</sup> Degsi minjrnaqa nangi qusib tulan areboleboleinjrnaqa minjeb, “Ni Yesus osim gago banq di atimqa iga ni silali emqom.”

Degsib minjnabqa a gilsiqqa a Yesus osim nanngo banq di atqajqa gam njamonqnej.

*Yesus aqa angro nanngi ti yori bati aqa ingi uyeb*

<sup>12</sup> Ariya Bem Tiyosai Qaji Uyqajqa Bati brantej. Qotei a nami Israel nanngi endegsi minjrej, “Ningi kaja du du nanngi ñumelenosib siranmeq di leñ liyibqa e na unsiy ningi uratngwai. E ningi padaltngwasai.” Qotei a nami Israel nanngi degsi minjrej. Kumbra deqa olo are qalqajqa yori bati brantonaaqqa Juda nanngi mareb, “Iga kaja du du nanngi ñumelenosim Qotei atraiyqom.” Onaqa bati deqa Yesus aqa angro nanngi na endegsib nenemyeb, “Ni iga merge. Iga aisim tal qabia yori bati aqa ingi ingi gereiyetmonamqa ni ingi uyqam?” <sup>13</sup> Onaqa Yesus na aqa angro aiyel qarinnrsiqa minjrej, “Ningi aiyel aisib qure ambleq di tamo bei ya nobu qoboyosim giloqnm gamq di itosib dauryiy. <sup>14</sup> Ningi a dauryosib tal a gogetqas qaji di miligiq gilsib tal lanja endegsib minjiy, ‘Qalie Tamo a marqo, “E ijo angro nanngi koba na awoosim yori bati aqa ingi uyqajqa warum a qabi unu?”’ <sup>15</sup> Ningi degsib minjibqa a na warum kobaquja bei gogeqsi unu di ningi osornngwas. Warum dia nami jar ti awo jaram ti ateleneb unu. Ningi aiyel aisib warum dia gago ingi ingi gereiyelenjoiy.” <sup>16</sup> Onaqa nanngi aiyel qure miligiq aisib anjam kalil Yesus na minjrej qaji degsi brantonab unsibqa ingi ingi kalil warum dia gereiyeleneb.

<sup>17-18</sup> Onaqa bilaqtonaqa Yesus aqa angro 12 nanngi ti koba na aisib tal gogetosib awoosib ingi uyoqnsibqa Yesus a nanngi endegsi minjrej, “E bole mernngwai. Ningi ijo angro 12. Nunngo ambleq dena angro bei a tigelosim e osim tamo qudei nanngo banq di atqas. Angro di agi iga koba na ingi uyeqnum.” <sup>19</sup> Degsi minjrnaq qusibqa are tulan gulbekobainjrnaqa segi segi Yesus nenemyoqneb, “O Tamo Koba, ni e qa kiyo maronum?” <sup>20</sup> Onaqa minjrej, “Angro aqo ombla endego tabir qujaiq di bem quiq di tuqtqnum qaji a na e osim tamo qudei nanngo banq di atqas. A dego ijo angro 12 ningi deqaji bei. <sup>21</sup> Ningi quiy. E Tamo Angro moiqai. Nami Qotei aqa anjam e qa degsib nengrenyeb. Deqa unngum. E anjam di dauryosiy moiqai. Ariya angro e osim tamo qudei nanngo banq di atqas qaji a tulan padalougetqas. A nami nambabosai qamu di kere.”

*Yesus na aqa angro nanngi bem ti wain ti anainjrej*

<sup>22</sup> Osiqqa Yesus aqa angro nanngi koba na ingi uyoqnsibqa Yesus a Qotei pailyosiqa bem bei osiq gingenyosiqa nanngi enjrsiqa endegsi minjrej, “Endi ijo jejamu. Osib uyiy.” <sup>23</sup> Osiqqa wain osiqqa gambanq di bilentosiqqa Qotei pailyosiqa aqa angro nanngi enjrnaqa nanngi kalil osib uyeb. <sup>24</sup> Onaqa Yesus na minjrej, “Wain gambanq endi ijo leñ. Tamo unngasari gargekoba

nanjo une kobotetnrqajqa deqa ijo len aigas. Aisim Qotei aqa anjam bunuj nami gereiyey qaji di siŋgilatqas. <sup>25</sup> E bole mernjwai. E wain endi olo uyqasai. Degsi gilsiy mondon diŋo batiamqa Qotei a nanjo Mandor Koba soqnimqa e olo wain bunuj uyqai.”

<sup>26</sup> Yesus na aqa angro nanji degsi minjrsiqa nanji koba na louosib koboonaqa qure uratosib Oliv manaq oqeb.

*Yesus na aqa angro nanji minjrej, “Niŋgi kalil e uratbosib jaraiqab”*

<sup>27</sup> Yesus aqa angro nanji ti manaq oqoqnsibqa Yesus na minjrej, “Niŋgi kalil ijo ñam ulontosib e uratbosib jaraiqab. Nunjo kumbra deqa Qotei aqa anjam bei nami endegsib nenjrenyeb unu, ‘E na kaja nanjo mandor qalitqa kaja nanji segi segi jaraiqab.’ Qotei aqa anjam nami degsib nenjrenyeb. <sup>28</sup> Ariya bati qalub koboamqa e olo subq na tigelosiy niŋgi qa namoosiy Galili sawaq gilitqa niŋgi bunuqna e daurbosib dia e itbqab.” <sup>29</sup> Onaqa Pita na minjej, “Angro kalil nanji ino ñam ulontosib jaraiqab e segi ino ñam ulontqasai.” <sup>30</sup> Onaqa Yesus na kamba Pita minjej, “E bole mermqai. Qolo qujai endeqa ni ijo ñam ulitqam. Tuwe anjamoaiyeltosaisoqnimqa ni gisaŋoqalubtosim marqam, ‘E Yesus qaliesai.’” <sup>31</sup> Onaqa Pita a tulan saidosiq minjej, “Sai. E ni ombla moiqa marimqa, unjgum, e ino ñam ulitqasai bole sai.” Onaqa Yesus aqa angro kalil nanji anjam qujai di minjoqneb.

*Yesus a Getsemani nañu aguq di aqa Abu pailyej*

<sup>32</sup> Yesus aqa angro nanji koba na walwelosib nañu agu beiq di branteb. Nañu agu di aqa ñam Getsemani. Di brantosib Yesus na aqa angro nanji minjrej, “Niŋgi endi awesoqniy. E kiñala sasalosiy ijo Abu pailyosiy bqai.” <sup>33</sup> Degsi minjrsiqa aqa angro qalub agi Pita na Jems na Jon na nanji segi joqsiqa pailyqajqa sasalej. Sasalosiqa pailyoqnsiqa a are tulan gulbekobaiyej. <sup>34</sup> Osiqa aqa angro qalub nanji di minjrej, “E are tulan gulbekobaibqo. Gulbe dena e moiyepratonum. Deqa niŋgi e ombla endi sosimqa ñam atoqniy.” <sup>35-36</sup> Degsi minjrsiqa olo kiñala sasalosiqa mandamq di ñam quosiqa endegsi pailyej, “O Aba. (Di Hibru anjam. Aqa damu, “O Abu.”) Gam bei soqnimqa ni na marimqa gulbe aqa bati bqo endi e bunbosim gilem. Ni kumbra kalil yqa kere. Deqa ni marimqa gulbe endi ijoq baiq. Gulbe endi ya uge uyo bul. Unjgum, ni ijo areqalo dauryaim. Ni ino segi areqalo dauryosim ye.”

<sup>37</sup> Yesus a degsi Qotei pailyosiq olo tigelosiq aqa angro nanjo areq aisiq ñam atej di nanji are gulbe na ñerenesonab unjrej. Deqa Yesus na Pita minjej, “O Saimon, ni ñeiejunum



e? Ni n̄am sokiñalayqa keresai e? <sup>38</sup> Niñgi n̄eren̄aib. Niñgi n̄am sosib pailyoqniy. Yim gulbe bei nuñgoq b̄qas di gulbe dena niñgi uneq wain̄gwasai. Bole, nuñgo are miligiq di niñgi e daurbqajqa are unu. Ariya niñgi segi gulbe di oqajqa singila saiqoji.”

<sup>39-40</sup> Osiqa Yesus a olo puluosi sasalosiq a nami pailyej qaji degsi olo pailyosiq bosiq aqa an̄gro qalub nañgi urn̄amnjrnaqa n̄eren̄esonab unjrej. Unjrn̄aqa nañgi Yesus anjam bei minjqa keresaiinjrej.

<sup>41</sup> Olo gilsiq Qotei pailyosiq bosiq aqa an̄gro nañgi itnjrsiq minjrej, “Niñgi aqaratosib geregere n̄eren̄ejunub e? Un̄gum. Bati koboqo. Niñgi uniy. E Tamo An̄gro osib une tamo nañgo bañq di atqajqa bati b̄qo. <sup>42</sup> Niñgi tigelab gilqom. Tamo e osim une tamo nañgo bañq di atqajqa agi brantqo.”

### *Judas a Yesus osiq jeu tamo nañgo bañq di atej*

<sup>43</sup> Onaqa Yesus aqa an̄gro 12 nañgi deqaji bei agi Judas a na tamo gargekoba nañgi sebru ti torom ti elen̄onab joqsiqua Yesus aqa areq di branteb. Juda gate nañgi ti dal anjam qalie tamo nañgi ti atra tamo kokba ti nañgi na nañgi qarinjrn̄ab Yesus ojqa beb. <sup>44</sup> Judas a nami nañgi ti qairosib anjam gereiyosib a na endegsi minjrej, “E na tamo kundoqyqai agide. A ojsib geregere taqatosib osib giliy.”

<sup>45</sup> Onaqa Judas a Yesus aqa areq bosiq minjej, “O Tamo Koba.” Degsi minjsiq kundoqyej. <sup>46</sup> Kundoqyonaqa tamo nañgi brantosib bañ waiyosib Yesus ojeb.

<sup>47</sup> Onaqa Yesus aqa an̄gro bei jojom di tigelesoqnej qaji a na aqa sebru osiq atra tamo gate aqa kan̄gal tamo gateq di qalqajqa sebru waiyej grotosiq dabkala segi gentetej.

<sup>48</sup> Onaqa Yesus na tamo nañgi di minjrej, “E len̄ ojo tamo unum deqa kiyo niñgi sebru ti torom ti elen̄osib e ojqa bonub e? <sup>49</sup> E bati gaigai atra tal miligiq di niñgi koba na sosimqa Qotei aqa anjam plaltoqnem. Bati deqa niñgi yala bañ waiyosib e ojosai. Niñgi kumbra degyeb deqa Qotei aqa anjam nen̄gren̄q di so qaji di aqa damu brantej.” <sup>50</sup> Yesus a nañgi degsi minjrn̄aqa aqa an̄gro kalil nañgi a uratosib jaraiyeb.

### *An̄gro wala bei a yosi ulanej*

<sup>51</sup> Bati deqa an̄gro wala bei a n̄eio gara segi na kabuosiq Yesus dauryej. Onaqa tamo nañgi na an̄gro di ojeb. <sup>52</sup> Ojnabqa a n̄eio gara segi nañgo bañq di uratosiq yosi ulanej.

### *Juda tamo kokba nañgi Yesus aqa jejamuq di une qametqa marsib koroeb*

<sup>53</sup> Onaqa tamo nañgi na Yesus osib atra tamo gate aqa talq osi gileb. Dia atra tamo kokba ti Juda gate nañgi ti dal anjam

qalie tamo nanği ti kalil koroesoqneb. Koroesonabqa tamo nanği na Yesus osi gilsib nanço ulatamuq di tigeltib. <sup>54</sup> Nanği Yesus osi gileq nabqa Pita a kiñala isa isaq na Yesus dauryosiq uli uliosiq gilsiq torei atra tamo gate aqa tal meq di brantej. Brantosiqa nanği Yesus kiyeryib unqajqa deqa are qalsiq qaja tamo qudei nanği tal meq di nam tunğuyosib awesonabqa bosiq nanği koba na nam yoroqneb.

<sup>55</sup> Onaqa atra tamo kokba ti Juda gate nanği ti kalil koroesosibqa nanği Yesus aqa jejamuq di une qametqa are qalsib anjam namoqneb. Di kiyaaqa? Anjam dena nanği Yesus qalib moiqaajqa deqa. Anjam namonab namonab ugeinjrej. <sup>56</sup> Deqa nanği tamo gargekoba metnjreqnab boqnsib gisanj anjam Yesus aqa jejamuq di qamelenjoqneb. Nanği anjam laña laña maroqneb. Nanço anjam di qujaiosai. <sup>57</sup> Onaqa nanço ambleq dena tamo qudei nanği tigelosib Yesus aqa jejamu laña gisanjyosib mareb, <sup>58</sup> “Tamo endi a endegsi marnaq iga quem, ‘E atra tal koba endi tamo na gereiyo qaji di kongrontosiyqa bati qalub qa olo atra tal bei tamo na gereiyosai qaji di tigeltqai.’” <sup>59</sup> Ariya nanço anjam di dego qujaiosai. Nanği anjam laña laña maroqneb.

<sup>60</sup> Onaqa atra tamo gate a nanço anjam di qusiqa a tigelosiq Yesus aqa areq bosiq nenemyej, “Tamo nanği endi une gargekoba ino jejamuq di qameq nub. Di ni kamba anjam bei marqasai e?” <sup>61</sup> Onaqa Yesus a torei mequmej. A anjam bei yala marosai.

Deqa atra tamo gate na olo nenemyej, “Ni Kristus e? Ni Qotei Goge Koba aqa Njiri e? Ni e merbe.” <sup>62</sup> Onaqa Yesus na minnej, “Od. Agi e segi. Ni que. E Tamo Anğro. Bunuqna e lañ qureq oqsij Qotei siñgila koba ti unu qaji aqa ban woq di awesosiyo olo lañbiq na boqnit niñgi e nubqab.” <sup>63</sup> Onaqa atra tamo gate a Yesus aqa anjam di qusiqa a tulañ minjin oqetonaqa aqa segi gara jugo bumbranyosiq marej, “Aqa une agi a segi na babtqo iga quonum. Deqa iga kiyaaqa tamo bei olo metonam bosim aqa une marqas? <sup>64</sup> Aqa misilin anjam niñgi quonub. Deqa niñgi kiyersib marqab?” Onaqa nanği kalil mareb, “A bole une ti. Deqa qalib moiym.”

<sup>65</sup> Nanği kalil degsib marnabqa nanço ambleq dena tamo qudei nanği tigelosib Yesus miselyoqneb. Osib aqa namdamu gara na qosetosib ban na qaloqnsib minjoqneb, “Ni Kristus amqa ni ubtosim mare, yai na ni lumqo?” Onaqa qaja tamo qudei nanği Yesus aqa areq boqnsib a ula ponjoqneb.

*Pita a gisañjoqalubtosiq marej, “E Yesus qaliesai”*

<sup>66-67</sup> Ariya Pita a tal meq di awesosiyo nam yoreqnaqa atra tamo gate aqa kanjal unja bei a bosiqqa Pita unsiqa koqyosiq minnej, “Ni dego Yesus Nasaret qaji aqa anğro bei. Ni nami a

dauryosim laqnem.” <sup>68</sup> Onaqa Pita a tulan saidosiq minjej, “Ni anjam merbonum di e qaliesai.” Degsi minjsiq tigelosiq tal qala beiq gilsiq di soqnej. <sup>69</sup> Sonaqa kanjal unja dena olo Pita unsiqa tamo nanji jojom di tigelesoqneb qaji nanji minjrej, “Tamo di a dego Yesus aqa angro bei.” <sup>70</sup> Onaqa Pita a olo tulan saidej.

Olo kiñala soboleiyonaq tamo qudei Pita aqa areq di tigelesoqneb qaji nanji Pita koqyosib minjeb, “Ni Galili qaji tamo. Deqa iga qalieonum, ni Yesus aqa angro bei.” <sup>71</sup> Onaqa Pita a olo tulan sinjala na saidosiq marej, “E tamo di qaliesai bole sai. E bole maronum. E gisanot Qotei na e lubem.” <sup>72</sup> A degsi maraqa tuwe anjamej. Tuwe anjamonaga Pita a qusiqa anjam nami Yesus na minjej qaji, “Tuwe anjamoaiyeltosaisoqnimqa ni gisanjoqalubtosim marqam, ‘E Yesus qaliesai,’ ” anjam deqa olo are qalsiqa poiyoonaqa tulan akamugetej.

## 15

### *Juda tamo kokba nanji Yesus osib Pailat aqa banq di ateb*

<sup>1</sup> Onaqa nobqolo malu qameqnaq atra tamo kokba ti Juda gate nanji ti dal anjam qalie tamo nanji ti kalil koroesosibqa Yesus qalib moiqajqa anjam keretoqneb. Anjam kereonaq nanji Yesus aqa ban tontetosib osi gilsib Rom nanjo gate Pailat aqa banq di ateb. <sup>2</sup> Onaqa Pailat na Yesus nenemyej, “Ni Juda nanjo Mandor Koba e?” Onaqa Yesus na minjej, “Od. Anjam ni maronum di kere.” <sup>3</sup> Onaqa atra tamo kokba nanji Yesus aqa anjam di qusib minjin oqetnjrnaqa aqa jejamuq di une gargekoba qametoqneb. <sup>4</sup> Deqa Pailat na olo Yesus minjej, “Nanji une gargekoba ino jejamuq di qameleneqnub. Ni kamba anjam bei marqasai e?” <sup>5</sup> Onaqa Yesus a torei mequmej. A anjam bei yala marosai. Deqa Pailat a tulan prugugetej.

### *Pailat a marej, “Ninji Yesus a namburbasq di qamiy”*

<sup>6</sup> Pailat aqa kumbra agiende. Wausau gaigai yori bati koba brantoqnimqa Juda tamo ungasari nanji tamo qujai aqa ñam maroqnbqa Pailat na tamo di tonto talq dena uratoqnsim enjroqnas. <sup>7</sup> Bati deqa tamo bei aqa ñam Barabas a tonto talq di soqnej. A nami tamo qudei joqsiqa Rom nanji ti qotsib tamo qudei ñumnab morenej. Deqa a ojsib tonto talq di waiyeb. <sup>8</sup> Waiyonab sonaqa tamo ungasari kalil nanji Pailat aqa areq gilsibqa a nanjo yori bati qa kumbra gaigai yoqnej qaji di olo yqajqa minjeb. <sup>9</sup> Minjnabqa a na nenemnjrej, “E Juda nanjo Mandor Koba uratosiy engwai e? Ninji na merbiy.” <sup>10</sup> Pailat a nanji degsi nenemnjrej? Di kiyaaqa? A qalieej, atra tamo kokba nanji Yesus qa ugeosib deqa a ojsib Pailat aqa banq

di ateb. <sup>11</sup> Onaqa atra tamo kokba nanġi na tamo unġasari kalil nanġo areqalo tigeltetnjreb. Tamo unġasari nanġi Pailat minjibqa a na Barabas uratosim enjrsimqa olo Yesus qalim moiġajqa deqa nanġo areqalo tigeltetnjreb. <sup>12</sup> Onaqa Pailat na olo minjrej, “E niġi Barabas enġwajqa merbonub deqa e Yesus kiyeryqai? Aġi niġi a qa mareqnu, ‘A Juda nanġo Mandor Koba.’” <sup>13</sup> Onaqa nanġi kalil murqumyosib minjeb, “Ni a namburbasq di qame.” <sup>14</sup> Onaqa minjrej, “Kiyafa Yesus qalit moiġas? A une kiye yqo deqa a namburbasq di qamqai?” Degsi minjrnaqa nanġi olo tulaġ murqumyoqnsib wainyoqnsib minjoqneb, “Ni a namburbasq di qame.” <sup>15</sup> Onaqa Pailat a nanġo are latetnrqa osiqa nanġo anjam di dauryosiqa Barabas tonto talq dena oqeq atsiqa nanġi enjrej. Enjrsiqa olo Yesus osiq qaja tamo nanġo baġq di atsiqa minjrej, “Niġi Yesus bu toqoġ na kumbainyiy.” Degsi minjrnaqa nanġi na Yesus osib kumbainyeb. Kumbainyosib koboonaqa Pailat na olo minjrej, “Niġi Yesus namburbasq di qamqajqa osib giliy.”

### *Qaja tamo nanġi Yesus misilinyoqneb*

<sup>16-17</sup> Pailat na qaja tamo nanġi degsi minjrnaqa nanġi Yesus baġ ojsib Rom nanġo tal kobaqujaq osi gileb. Osi gilsib qaja tamo kalil nanġi metnjrnab bosib tal dia koroeb. Koroosib gara jugo olekoba lent mandor kokba nanġi gaigai jigeqnu deqaji bei osib Yesus jigeteb. Osib sil luwit osib lulumosib sil dena mandor nanġo gate tatal bul gereiyosib aqa gateq di atetosib siġila na teqiyeb. <sup>18</sup> Osib gisaġ na Yesus binjyoqnsib minjoqneb, “O Juda nanġo Mandor Koba, kaiye!” <sup>19</sup> Degsib Yesus minjoqnsib bu toqoġ na aqa gateq di qaloqnsib mise-lyoqnsib aqa areq di siġa pulutoqneb. <sup>20</sup> Nanġi degsib Yesus misilinyosib koboonaqa gara lent di piqtetosib aqa segi gara olo jigetosib aqa qawarq di aqa segi namburbas atetosib a baġ ojsib gaintqa sawaq osi gileb.

### *Nanġi Yesus osib namburbasq di qameb*

<sup>21</sup> Nanġi Yesus osi giloqnsibqa gamq di tamo bei walweloq Jerusalem aieyqnaqa a turosib ojsib Yesus aqa qawarq dena namburbas yayiosib tamo di yonabqa a kamba qoboiyosiqa gam na Yesus dauryosiq giloqnej. Tamo di aqa ñam Saimon. A Sairini qure qaji. A Aleksander Rufus wo nanġo abu.

<sup>22</sup> Nanġi Yesus osi gilsib sawa agu kiñala bei aqa ñam Golgota di branteb. Ñam di aqa damu, “Tamo gate tanu.” <sup>23</sup> Di brantosib qaja tamo nanġi na wain ti kial aqa ya isa koba de ti bulyosib Yesus anaiyonab uyo oneiyonaq ugeiyonaq uratej. <sup>24</sup> Onaqa qaja tamo nanġi na Yesus osib namburbasq di qameb. Qamsib Yesus aqa gara elenqa marsib gilteleneb. Osib meniġ

silali alaṇeb. Tamo yai aqa meniṇ na buṇṇrqaṣ di a na gara oqaṣ. Degsiḃ marsiḃ meniṇ silali alaṇosiḃ gara elenḃeb.

<sup>25</sup> Senḃ bati 9 onaqa nobqolo naṅgi Yesuṣ ṇamburbasq di qameḃ. <sup>26</sup> Qamsiḃ ṇamburbas mutu gogeq di anjam endegsiḃ nenḡrenḡyeb, “Tamo endi a Juda naṅgo Mandor Koba.” Yesuṣ a nami maroqnej, “E Juda naṅgo Mandor Koba.” Yesuṣ aqa une deqa osiḃ anjam di nenḡrenḡyeb. <sup>27</sup> Bati deqa baiṇḡ tamo aiyel dego ṇamburbasq di gaintnḡrsiḃ ṇumeḃ. Bei Yesuṣ aqa baṇ woq di qameḃ. Bei Yesuṣ aqa baṇ qonaṇq di qameḃ. <sup>28</sup> Kumbra dena Qotei aqa anjam bei nenḡrenḡq di so qaji di aqa damu brantej. Agi endegsiḃ nenḡrenḡyeb, “Tamo uṅgasari naṅgi marqab, ‘Kristuṣ a dego une tamo.’”

<sup>29</sup> Yesuṣ a ṇamburbas goge di sonaqa tamo uṅgasari naṅgi aqa ulatamuq dena walwelosiḃ gile beoqnsiḃ a misiliṇyoqnsiḃ gate gainyoqnsiḃ minjoqneḃ, “Ni nami mareḃ, ‘E atra tal koba koṅgrontosiyya bati qalub qa olo tigeltqai.’ Ni nami degsi mareḃ. <sup>30</sup> Ino anjam di boleamqa ni ino segi jejamu aqaryaiyosim ṇamburbas uratosim mandamq aiye.” <sup>31</sup> Atra tamo kokba ti dal anjam qalie tamo naṅgi ti dego Yesuṣ degsiḃ misiliṇyoqneḃ. Osib segi segi maroqneḃ, “A na tamo uṅgasari gargekoba naṅgi aqaryainjroqnej. Ariya a na aqa segi jejamu aqaryaiyya keresai. <sup>32</sup> A maroqnej, ‘E segi Kristuṣ. E Israel naṅgo Mandor Koba.’ Aqa anjam di boleamqa a ṇamburbas uratosim mandamq aiyimqa iga unsim marqom, ‘Bole.’” Onaqa baiṇḡ tamo aiyel Yesuṣ ombla gaintnḡjreb qaji naṅgi dego Yesuṣ degsiḃ misiliṇ anjam minjoqneḃ.

### *Yesuṣ a moiyej*

<sup>33</sup> Qanam jige senḃ bati 12 onaqa sawa kalil tulaṇ ambruosi sonaq gilsiq senḃ bati 3 onaq bilaqtej. <sup>34</sup> Onaqa Yesuṣ a tulaṇ leleṇosiqa marej, “Eloi, Eloi, lama sabaktani?” Di Hibru anjam. Anjam di aqa damu, “O ijo Qotei. O ijo Qotei. Ni kiyaa e qoreibonum?” <sup>35</sup> Onaqa tamo qudei Yesuṣ aqa areq di tigelesoqneḃ qaji naṅgi aqa anjam di qusiḃ mareḃ, “Niṅgi quiy. A Elaija meteqnu.” <sup>36</sup> Degsiḃ marnabqa tamo bei a urur ti gilsiq gara ṇenḡi bei osiq wain isa kobaq di tuqtosiqa soruq di qosisiqa osi bosiq Yesuṣ anaiyqajqa soqtosiqa aqa med-abuq di atej. Osiqa marej, “Iga mati tariṇosim koqyesqom. Elaija a bosim Yesuṣ ṇamburbasq dena osim mandamq atqas kiyo?” <sup>37</sup> Onaqa Yesuṣ a olo tulaṇ leleṇosiqa mondor titosiq aqa ṇambile uratosiq moiyej.

<sup>38</sup> Bati qujai deqa gara kobaquja atra tal miligiq di gainḡesoqnej qaji a goge na braṇosiq aisiq poaiyelej. <sup>39</sup> Yesuṣ a degsi mondor titosiq moiyej deqa qaja tamo naṅgo gate Yesuṣ aqa areq di tigelesoqnej qaji a unsiqa marej, “Bole. Tamo endi a Qotei aqa Ṇiri.”

<sup>40</sup> Unḡasari qudei nanḡi isaḡ di tigelesosib Yesus koḡyoqneb. Bei Maria Makdala qure qaji. Maria bei aḡi Jems yala Joses wo nanḡo ai. Unḡa bei Salome. <sup>41</sup> Yesus a nami Galili sawaḡ di sonaḡa unḡasari nanḡi dena a dauryosib laḡnsib kanḡgalyoqneb. Bunuḡna Yesus a Galili sawa uratosiḡa a na nanḡi qalub unḡasari qudei ti joḡsiḡa koba na Jerusalem beleneb.

*Josep a Yesus aḡa jejamu osiḡ subḡ ateḡ*

<sup>42</sup> Juda nanḡo yori bati brantḡa laḡnej deḡa yori bati aḡa inḡi inḡi kalil gereiyosib atnab soḡnej. <sup>43</sup> Onaḡa bilaḡtonaḡa tamo bei aḡa ñam Josep a Yesus aḡa jejamu osim subḡ atḡa marsiḡa Pailat nenemyḡa gilej. Josep a Juda nanḡo gate bei. A Arimatea qure qaji. Aḡa kumbra tulaḡ boledamu. Deḡa tamo unḡasari kalil nanḡi a ḡa maroqneb, “A tamo boleḡuja.” A endegsi are ḡaloḡnej, “Bunuḡna Ḡotei a bosim gago Mandor Koba sosim iḡa taḡatḡwas.” A degsi are ḡaloḡnsiḡ Ḡotei ḡa tariḡoḡnsiḡ soḡnej. A Pailat aḡa talḡ gilsiḡa aḡa areḡ di tigelej. A ulaosai. Osiḡa Pailat nenemyej, “Ni e odbimḡa e Yesus aḡa jejamu osiy subḡ atḡa kere e?” <sup>44</sup> Onaḡa Pailat a tulaḡ pruguḡetosiḡ marej, “Yesus a urur moiḡo e?” Osiḡa ḡaja tamo nanḡo gate a metonaḡ bonaḡ nenemyej, “Yesus a bole moiḡo e?” <sup>45</sup> Onaḡa minnej, “Od, a moiḡo.” Onaḡa Pailat a anjam di ḡusiḡa Josep odyosiḡ minnej, “Di kere. Ni Yesus aḡa jejamu am. Osim subḡ ate.” <sup>46</sup> Onaḡa Josep a gilsiḡa gara ḡat awaiyosiḡa Yesus aḡa jejamu ḡamburbasḡ dena osiḡa gara ḡat na dalaosiḡ osi gilej. Osi gilsiḡa sub bei nami meniḡ miligiq di gereiyeb ḡaji dia atsiḡa meniḡ kobaḡuja belbeltosiḡ dena sub me getentej. <sup>47</sup> Josep na Yesus subḡ ateqnaḡa Maria Makdala qure qaji wo Maria bei aḡi Joses aḡa ai wo bosib koḡyesoqneb.

## 16

*Yesus a olo subḡ na tigelej*

<sup>1</sup> Onaḡa yori bati koboonaḡa Salome na Maria Makdala qure qaji na Jems aḡa ai Maria na nanḡi qalub ḡam so aḡa ya ḡuleḡ tulaḡ boledamu awaiyeb. Ḡam so aḡa ya di Yesus aḡa jejamuḡ di liyḡajḡa deḡa awaiyeb. <sup>2-3</sup> Osib nobḡolo ambru nanḡi tigelosib Yesus aḡa jejamuḡ di liyḡajḡa deḡa subḡ giloḡnsib ḡamḡ di segi segi maroqneb, “Yai na meniḡ kobaḡuja sub me getentejunu ḡaji di beltosim taḡal atetḡwas?” <sup>4</sup> Degsib maroḡnsib gilsib ḡam ateb di meniḡ kobaḡuja waḡosiḡ taḡal di sonaḡ uneb. Meniḡ di tulaḡ kobaḡuja. <sup>5</sup> Onaḡa nanḡi sub miligiq aisib anḡro wala bei baḡ woḡ di awesonaḡ unsib ulauḡeteb. Anḡro wala di aḡa gara tulaḡ ḡat.

<sup>6</sup> Onaḡa anḡro wala na minḡrej, “Niḡi ulaaib. E ḡalie, niḡi Nasaret tamo Yesus ḡamburbasḡ di ḡameb ḡaji a ḡa ḡameḡnub. A endi sosai. A subḡ na tigelḡo. Niḡi bosib sub miligiq uniy. A

nejoteb qaji lume agi unu. <sup>7</sup> Ningsi unsibqa olo puluosib aisib Yesus aqa angro qudei nangi Pita ombla endegsib minjriy, 'Yesus a subq na tigelqo. Tigelosiq ningsi qa namoosiq Galili sawaq gilqo. Agi a nami ningsi endegsi merngej, "E ningsi qa namoosiy Galili sawaq gilqai." Deqa ningsi dego Galili sawaq gilsib dia a itqab.' "

<sup>8</sup> Onaqa nangi qalub tulan ulaugetosib are ton-tonjnnaqa sub uratosib olo puluosib aiyeb. Aiyocnsibqa gamq di tamo ungasari nangi turoqnsib anjam bei minjrosaiocneq. Nangi lanja aiyocneq. Di kiyaca? Nangi tulan ulaugeteb deqa.

### *Maria Makdala qure qaji a Yesus unej*

<sup>9</sup> Yori bati koboonaqa nobqolo amburu Yesus a subq na tigelosiqa mati Maria Makdala qure qaji aqac di brantonaq unej. Maria agi nami Yesus na mondor uge <sup>7</sup> nangi aqac dena winjretej qaji. <sup>10-11</sup> A Yesus unsiqa olo puluosi gilsiq Yesus aqa angro qudei nami Yesus dauryosib laqneq qaji nangi are ugeinjrnaqa akameqnaqba itnjrsiqa minjrej, "E Yesus unonum. A nambile unu." Onaqa nangi Maria aqa anjam di qunab ugeinjrej. Nangi aqa anjam deqa poinjrosai.

### *Yesus aqa angro aiyel nangi gamq di Yesus uneb*

<sup>12</sup> Olo bati bei Yesus aqa angro aiyel nangi nañu gam bei dauryosib gileqnaqba Yesus aqa jejamu bulyosiqa nanqoq di brantonaq uneb. <sup>13</sup> Unsibqa nangi olo puluosib aisib Yesus aqa angro qudei nangi minjreb, "Yesus a gagoq di brantqoqa iga unonum." Degsib minjrnabqa nangi dego qunab ugeinjrej. Nangi anjam deqa poinjrosai.

### *Yesus na aqa angro nangi wau enjrej*

<sup>14</sup> Olo bati bei Yesus aqa angro <sup>11</sup> nangi tal miligiq di awoosib inji uyeqnaqba Yesus a nanqoq di brantej. A nami subq na tigelonaqa tamo qudei na unsib nangi sainjrnab qunab ugeinjrej. Nanqo are getenjnresoqnej. Deqa Yesus a segi nanqoq di brantosiqa nangi njrintnjrej. <sup>15</sup> Osiqa minjrej, "Ningsi tigelosib sawa sawa kalil keretocnsib tamo ungasari kalil nangi ijo anjam bole minjre minjre laqniy. <sup>16</sup> Tamo ungasari nangi e qa nanqo areqalo singilatosis yanso oqab di Qotei na nangi elenqas. Ariya tamo ungasari nangi e qa nanqo areqalo singilatqasai di Qotei na nangi elenqasai. A na nanqo une qa peginjrsim awai uge enjrqas. <sup>17</sup> Tamo ungasari e qa nanqo areqalo singilatqab qaji nangi manwa gargekoba endeqaji babtoqnqab. Nangi ijo nam na mondor uge uge winjroqnqab. Qotei na nanqo menj bulyetnjroqnmqa nangi qure utru bei bei nanqo anjam bunuj maroqnqab. <sup>18</sup> Nangi ban waiyosib amal uge ojoqnqab. Nangi ya isa koba qaja ti di

uyoqñib dena moreñqasai. Nañgi ma tamo nañgo gateq di ban atoqñib nañgi olo boleoqñqab.”

*Yesus a lañ qureq oqej*

<sup>19</sup> Tamo Koba Yesus na aqa añgro nañgi degsi minjrnaqa Qotei a Yesus lañ qureq osi oqsiqa aqa ban woq di awotej.

<sup>20</sup> Onaqa aqa añgro nañgi jaraiyosib sawa sawa kalil keretoqñsib Qotei aqa anjam palontoqñeb. Palonteñqñabqa Tamo Koba a nañgi koba na wauoqñsiqa mañwa gargekoba babtoqñsiqa dena nañgo anjam siñgilatoqñej.



## LUK

### *Luk a anjam endi nengrenyosiq Tiofilus aqaq qarinyej*

<sup>1-2</sup> O Tamo Koba Tiofilus, kumbra kalil Qotei a nami gago ambleq di yoqnej qaji di aqa wau tamo nanngi unoqnsib deqa iga saigoqneb. Nanngo anjam di tamo gargekoba nanngi quoqnsib nengrenyoqneb. <sup>3</sup> Deqa e dego anjam di nengrenyosiy inoq qarinyqa are qalem. Are qalsimqa anjam aqa damu geregere qalieqajqa deqa nenemosim laqnem. Nenemosim laqnsimqa anjam di utruq na nengrenyosim agi inoq qarinyonum. <sup>4</sup> Deqa ni sisiyosim qalieqam, anjam ni nami mermoqneb qaji di bole kalil.

### *Sekaraia aqa njan Elisabet a gumannej*

<sup>5</sup> Herot a Judia sawa nanngo mandor sonaqa bati deqa atra tamo bei aqa ñam Sekaraia a soqnej. A atra tamo Abiya aqa moma. Sekaraia aqa njan a atra tamo gate Aron aqa moma. Aqa ñam Elisabet. <sup>6</sup> Sekaraia aqa njan wo nanngo kumbra tulan boledamu. Nanngi Qotei aqa dal anjam kalil geregere dauryoqnsib soqneb. Nanngi Tamo Koba aqa namgalaq di une saiqoji. <sup>7</sup> Elisabet aqa miligi ugeej deqa aqa gumbulun wo angro saiqoji sosibqa qelieb.

<sup>8</sup> Bati bei Sekaraia aqa wau qujai nanngi ti Qotei atraiyqa marsibqa Jerusalem gileb. <sup>9</sup> Nanngo ambleq dena tamo bei giltibqa a Tamo Koba aqa atra tal miligiq gilsim nam qaq koitim quleqamqa Qotei atraiyqajqa deqa Jerusalem gileb. Gilsib nanngi tamo yai giltqab di qalieqajqa deqa nanngi menin alano bubuneb. Menin alanonabqa Sekaraia aqa menin na bunyej. Deqa nanngi Sekaraia giltonabqa a atra tal miligiq gilsiqqa Qotei atraiyej. <sup>10</sup> Qotei atraiyeqnaqa tamo ungasari tulan gargekoba nanngi atra tal oqeq di koroosib Qotei pailiyosib soqneb. <sup>11-12</sup> Onaqa Tamo Koba aqa lan angro bei aisiq Sekaraia aqa ulatamuq di brantosiqa atra bijal nam qaq koitoqnej qaji ban woq di tigelonaq unsiqa tulan ulaugetej. <sup>13</sup> Onaqa lan angro na minnej, "Sekaraia, ni ulaaim. Qotei a ino pailyo quetmqo. Deqa ino njan Elisabet a gumanjosim angro mel oqas. Yim ni aqa ñam Jon waiyqam. <sup>14</sup> Angro di a nambabimqa ni tulan areboleboleimqas. Tamo ungasari gargekoba nanngi dego a unsibqa tulan areboleboleinjrqas. <sup>15</sup> Angro di a Tamo Koba aqa namgalaq di ñam koba ti sqas. A wain ti ya singila ti uyoqnqasai. A aqa ai miligiq di soqnimqa Mondor Bole na a singilatoqnqas. <sup>16</sup> Bunuqna a na Israel gargekoba nanngi are bulyetnjroqnm nanngi nanngo Tamo Koba Qotei areiyoqnqab. <sup>17</sup> Kristus a bqa laqnmqa

Jon a namoosim Qotei aqa medabu o tamo Elaija aqa kumbra ti singila ti osim Kristus aqa gam gereiyetqas. A Kristus aqa gam endegsi gereiyetqas. Abu nanngo angoro nanngi ti jeu jeu soqribqa a na nanngi are bulyetnjroqnim nanngi are qujaitosib sqab. Tamo ungasari Qotei aqa anjam gotranjyeqnuv qaji nanngi dego a na are bulyetnjroqnim nanngi kumbra bole bole dauryoqngab. Jon na degsim tamo ungasari nanngo areqalo gereiyetnjrim soqribqa Tamo Koba a bqas.”

<sup>18</sup> Onaqa Sekaraia na kamba lan angro di minjej, “E tulan qelionum. Ijo njan a dego qeliqo. Deqa e kiyersiy qalieqai, ino anjam di bole?”

<sup>19</sup> Onaqa lan angro na Sekaraia minjej, “Ijo ñam Gabriel. E Qotei aqa ulatamuq di tigelejunum. Qotei a segi na e qarinjboqqa bosim anjam bole endi ni mermonum. <sup>20</sup> Deqa ni que. Ni ijo anjam poimosai deqa bini medabu getenmimqa sqam. Bunuqna anjam e ni mermonum qaji aqa damu kalil brantimqa ino medabu olo waqtosim anjam maroqngam. Bati Qotei na giltqo qaji batiamqa ijo anjam aqa damu kalil brantim ni unqam.” Lan angro na degsiqa Sekaraia minjej.

<sup>21</sup> Tamo ungasari nanngi Sekaraia a olo atra talq dena oqedqajqa deqa tarinqoneb. Osib maroqneq, “Sekaraia a kiyaaq atra tal miligiq di sokobaiyqo?” <sup>22</sup> Onaqa Sekaraia a oqedosiqa nanngi anjam minjrqa yonaq keresaiyej. Deqa nanngi mareb, “Qotei aqa manwa bei atra tal miligiq di brantqoqa Sekaraia a unqo. Deqa a anjam marqa keresai.” Sekaraia aqa medabu getenyej deqa a ban na segi nanngi anjam minjroqnej. <sup>23</sup> Ariya bunuqna aqa atraiyo wauqa bati koboonaqa a olo puluosiqqa aqa qureq oqej. <sup>24</sup> Bati bei aqa njan Elisabet a gumanej. Deqa a bai 5 aqa talq di soqnej. A boleq di walwelosaiqnej. Osiqqa marej, <sup>25</sup> “Bini Tamo Koba a kumbra tulan boledamu e ebsiqqa tamo ungasari nanngo njanjalaq di ijo gulbe kobotetbqo.”

### *Lan angro Gabriel a Maria aqaq di brantej*

<sup>26</sup> Onaqa bai 5 di koboonaqa Qotei na aqa lan angro Gabriel olo qarinyonaqa Galili sawa nanngo qure bei ñam Nasaret deq aiyej. <sup>27</sup> Aisiq dia dungenge bei aqa ñam Maria aqaq di brantej. Tamo bei aqa ñam Josep a na Maria oqajqa saga gameb. Josep a Mandor Koba Devit aqa moma. <sup>28</sup> Gabriel a Maria aqaq di brantosiqa minjej, “O Maria, kaiye. Tamo Koba a ni ombla unub. A ni kumbra tulan boledamu emqo.” <sup>29</sup> Onaqa Maria a anjam di qusiqa tulan prugugetej. Osiqqa are qalej, “Lan angro di aqa anjam e poibosai.” <sup>30</sup> Onaqa lan angro na minjej, “Maria, ni ulaaim. Qotei a ni qa are tulan boledamuiyqo. <sup>31</sup> Deqa ni gumanosim angro mel oqam. Osim aqa ñam Yesus waiyqam. <sup>32</sup> A ñam tulan kobaquja oqas. Nanngi a qa maroqngab, ‘A Qotei Goge Koba aqa Njiri.’ Qotei na a

giltimqa a Mandor Koba sqas. A na aqa moma Devit nami mandor koba soqnej qaji aqa wau osim a kamba Mandor Koba sqas. <sup>33</sup> Deqa a Jekop aqa moma kalil nanngo Mandor Koba sosimqa nanngi bati gaigai taqatnjroqngas. Aqa wau di koboqa keresai.”

<sup>34</sup> Onaqa Maria na lan angro di minjej, “Kumbra di kiyersi brantqas? E tamo osaiunum.”

<sup>35</sup> Onaqa lan angro na minjej, “Mondor Bole a inoq aisim Qotei Goge Koba aqa singila emimqa ni angro oqam. Deqa nanngi a qa maroqngab, ‘A Qotei aqa Njiri.’ A Qotei aqa segi kumbra ti sqas.

<sup>36</sup> “Ni que. Ino gagai Elisabet a dego angro mel oqas. A qeliosiq gumanqo. Nanngi nami a qa maroqneb, ‘A angro oqa keresai.’ Ariya bini a gumanqo bai 6 gilqo. <sup>37</sup> Qotei a kumbra kalil yqa kere. Kumbra bei a yqa keresai di sosai.”

<sup>38</sup> Onaqa Maria na lan angro di minjej, “E Tamo Koba Qotei aqa kanqal unqa. Anjam ni e merbonum qaji di Qotei na dauryosim kumbra degsi ebem.” Onaqa lan angro a Maria uratosiqa gilej.

### *Maria a Elisabet unqajqa gilej*

<sup>39</sup> Bati deqa Maria a tigelosiqa urur ti Sekaraia aqa qureq oqej. Qure di yambañ. A Judia sawaq di unu. <sup>40</sup> Oqsiq Sekaraia aqa talq di brantosiqa Elisabet itosiq metej, “O gagai Elisabet, kaiye.” <sup>41-42</sup> Metonaqa Elisabet a Maria aqa anjam di qunaqa angro a Elisabet aqa meneq di anjilej. Onaqa Mondor Bole a Elisabet aqaq aisiq singila yonaqa a tulan maosiqa Maria minjej, “Qotei a kumbra tulan boledamu ni emqo. Kumbra deqaji Qotei a nami unqasari qudei nanngi enjrosaiognej. Angro ino meneq di unu qaji a dego Qotei na kumbra tulan boledamu yqo. <sup>43</sup> O Maria, ni ijo Tamo Koba aqa ai. E unqa kiyero deqa ni ijo talq bonum? <sup>44</sup> Ni que. Ni e metbonum e ino anjam quonumqa angro ijo meneq di unu qaji a areboleboleiyqoqa anjilqo. <sup>45</sup> Tamo Koba a na ni kumbra boledamu emqas anjam di mermonaqa ni qusim marem, ‘Bole, Qotei aqa anjam di aqa damu brantqas.’ Ni degsi marem deqa ni tulan areboleboleimim sqam.” Elisabet na degsiqa Maria minjej.

### *Maria a Qotei aqa ñam soqtej*

<sup>46</sup> Onaqa Maria a kamba medabu waqtosiqa marej, “Ijo are na e Tamo Koba aqa ñam soqtosim a binjyeqnum.

<sup>47</sup> E Qotei qa tulan areboleboleibeqnu. Agi a na iga padalo sawaq na elenej.

<sup>48</sup> E aqa kanqal unqa. E ñam saiqoji. Di unqum. Qotei na e uratbosai. A na e nubsisqa areibqo.

Deqa bati endeqa ti bunuq qa ti tamo ungasari kalil nanği e qa endegsib maroqnqab, ‘Qotei na Maria kumbra tulan boledamu yej.’

<sup>49</sup> Qotei sinğila koba ti unu qaji a na e aqaryaibeqnu.

Qotei aqa ñam getento koba. Une bei aqaq di sosai.

<sup>50</sup> Qotei a tamo ungasari kalil aqa sorgomq di unub qaji nanği qa tulan duleqnu. Bati endeqa ti bunuq qa ti Qotei a nanği qa duloqnsim sqas.

<sup>51</sup> Qotei a wau sinğila koba yeqnu.

Tamo ungasari nanço segi ñam soqtqa are qaleqnu qaji nanği Qotei na olo winjreqlaq jaraiyeqnu.

<sup>52</sup> A na mandor kokba nanği kobotnjroqnsiqa tamo ungasari nanço segi ñam aguq ateqnu qaji nanği olo ñam soqtet-njreqlaq.

<sup>53</sup> Tamo ungasari mam unub qaji nanği Qotei na inği anainjreqlaq nanği kere na unub.

Ariya tamo ungasari inği koba ti unub qaji nanği a na uratnjreqlaq nanği inği saiinjreqlaq.

<sup>54-55</sup> A na aqa wau tamo Israel nanği aqaryainjreqlaq.

A nami marej, ‘E Israel nanği qa gaigai duloqnqai.’

A aqa anjam deqa are qaloqnsiqa agi bini Israel nanği aqaryainjreqlaq.

Qotei aqa anjam di a na nami gago moma utru nanği minjrej. Agi a na anjam di Abraham aqa moma kalil nanği ti minjrej.”

Maria a medabu waqtosiqa anjam degsi marej.

<sup>56</sup> Bai qalub Maria a Elisabet aqa talq di soqnej. Di koboonaqa a olo puluosiqa aqa qureq gilej.

*Elisabet a aqaratonaq Jon a ñambabej*

<sup>57</sup> Onaqa Elisabet aqa bati kereonaqa a aqaratej. Aqaratonaqa aqa anğro mel ñambabej. <sup>58</sup> Nambabonaqa aqa qure qujai nanği ti aqa leñ nanği ti kalil endegsi poinjrej, “Tamo Koba a Elisabet qa tulan dulosiqa aqa miligi gereiyqoqa anğro mel oqo.” Nanği degsi poinjrej deqa nanği Elisabet koba na areboleboleinjrej.

<sup>59-60</sup> Bati 8 koboonaqa nanği anğro di muluñ waiyqa marsib koroeb. Koroosib aqa ñam Sekaraia waiyqa laqnabqa aqa ai na saidnjrsiqa minjrej, “Iga aqa ñam Jon waiyqom.” <sup>61</sup> Onaqa nanği na minjeb, “Ñam di ino leñ nançoq di sosai.” <sup>62</sup> Degsi minjsib ban na Sekaraia nenemyeb, “Ni ino anğro ñam yai waiyqam?” <sup>63</sup> Onaqa a ban na minjrej, “Pepa bei osbabqa e aqa ñam nenğrenyit niñgi unqab.” Pepa osi bonabqa endegsi nenğrenyjej, “Aqa ñam Jon waiyqom.” Degsi nenğrenyonaqa nanği kalil tulan prugeb. <sup>64</sup> Onaqa bati qujai deqa Sekaraia aqa meñ otyonaqa medabu waqtosiqa anjam maroqnsiqa Qotei aqa ñam soqtoqnej. <sup>65</sup> Bati deqa tamo ungasari kalil

qure dia soqneb qaji nanği kumbra deqa qusib ulaeb. Ulaosib kumbra deqa mare mare laqnaqqa nanġo anjam di tulan kobaonaqa qure kalil Judia sawaq di so qaji nanği quekriteb. <sup>66</sup> Tamo unġasari anjam di queb qaji nanği kalil maroqneb, “Anġro di a tamo kiyero sqas?” Nanği degsi maroqneb. Di kiyaaq? Qotei aqa siġgila anġro di aqaq di sonaq uneb deqa.

### *Sekaraia a Qotei aqa medabu osiqa anjam marej*

<sup>67</sup> Onaqa Mondor Bole a Jon aqa abu Sekaraia aqaq aisiq siġgila yonaqa medabu waqtosiqa anjam endegsi marej, <sup>68</sup> “Iga Tamo Koba Qotei aqa ñam tulan soqtoqnqom. A Israel gago Qotei. Iga aqa segi tamo unġasari unum deqa a na bosim iga awaigim iga padalqasai. <sup>69</sup> Aqa wau tamo Devit aqa len na tamo siġgila koba bei ñambabqas. Qotei na tamo di giltej deqa a na iga elenqas. <sup>70</sup> Qotei aqa kumbra deqa nami aqa segi medabu o qaji tamo nanği anjam palontoqneb. <sup>71</sup> Nanği anjam endegsib palontoqneb, ‘Qotei a gago jeu tamo nanġo banq dena iga elenqas. Osim tamo kalil iga qa ugeeqnub qaji nanġo banq na dego iga elenqas.’ Nanği anjam degsib palontoqneb. <sup>72</sup> Qotei a gago moma utru nanği qa dulosiqa aqaryainrej. Aqa segi anjam nami siġgilatej qaji deqa are qalsiqa nanği aqaryainrej. <sup>73</sup> Aqa anjam di a siġgilatosiq gago moma utru Abraham minjej. <sup>74</sup> Deqa a na gago jeu tamo nanġo banq dena iga elenamqa iga aqa wau ojoqnqom. Iga ulaqasai. <sup>75</sup> Iga bati gaigai Qotei aqa ñamgalaq di aqa segi kumbra bole tiñtiñ dauryoqnqom. <sup>76</sup> O ijo anġro Jon, bunuqna ni Qotei Goge Koba aqa medabu o qaji tamo sqam. Tamo unġasari nanği degsib ni qa maroqnqab. Tamo Koba a bqa laqnimqa ni namoosim aqa gam gereiyetosim soqnim a bqas. <sup>77-78</sup> Ni na Qotei aqa segi tamo unġasari nanği anjam minjroqnimqa nanği quoqnsib endegsi poinjroqnas, ‘Bole, Qotei a iga qa dulej deqa a na gago une kobotetgosim iga elenqas.’ Gago Qotei a lan goge na suwan qarinyim gagoq bqas. <sup>79</sup> Tamo unġasari ambruq di sosib morenqa ulaeqnub qaji nanği Qotei na suwantnjroqnas. Osim a na iga gam osorgoqnimqa iga lawo kumbra dauryoqnqom.” Sekaraia a anjam degsi marej.

<sup>80</sup> Onaqa Jon a kobaqujaeqnaqa Qotei aqa Mondor na siġgila yoqnej. A wadau sawaq di sosiqa a na Israel tamo unġasari nanği Qotei aqa anjam minjrqaqqa bati qa tariñoqnej.

## 2

### *Maria a aqaratonaaq Jesus a ñambabej*

<sup>1</sup> Bati deqa Rom nanġo mandor koba Sisar Ogastus a marej, “Iga sawa sawa kalilq di tamo unġasari nanġo ñam sisiyqom.”

<sup>2</sup> Degsi marnaqa Kwirinius a Siria sawaq di gate sonaqa nanġi na ñam sisiyeb. Nanġi nami ñam sisiyosai oqneb. <sup>3</sup> Deqa tamo unġasari kalil nanġi na nanġo ñam atelenqajqa marsibqa nanġo segi segi qure utruq gileleñeb. <sup>4</sup> Josep a Nasaret qureq dena tigelosiqqa Devit aqa qure utruq oqej. Nasaret qure a Galili sawaq di unu. Devit aqa qure utru aqa ñam Betlehem. Betlehem a Judia sawaq di unu. Josep a deq oqej. Di kiyaaqa? A Devit aqa leñ na ñambabej deqa. <sup>5</sup> Maria a Josep aqa ñaun soqnej deqa nanġi aiyel ombla na nanġo ñam atqa marsibqa Betlehem oqeb. Bati deqa Maria a gumañ ti. <sup>6-7</sup> Nanġi Betlehem di sonabqa Maria aqa bati kereonaqa a anġro ej. Nereño tal koba qaji tamo na maqej deqa aqa anġro matu mel ñambabonaqa gara na dalaosiq makau nanġo inġi uyo tabirq di ñeiotej.

*Lañ anġro nanġi na kaja taqato tamo nanġi  
Qotei aqa anjam minjreb*

<sup>8</sup> Qolo qujai deqa qure qalaq di tamo qudei nanġo kaja ñin uyeq nabqa taqatnjresoqneb. <sup>9</sup> Onaqa Tamo Koba aqa lañ anġro bei aisiqqa nanġo areq di tigelonaq uneb. Aqa rian na nanġi suwantnjrnaqa nanġi unsib tulañ ulaugeteb. <sup>10</sup> Onaqa lañ anġro dena nanġi minjrej, “Niñgi ulaaib. E niñgi anjam bole mernġwajqa bonum. Mernġitqa niñgi qusib tulañ areboleboleinġwas. Tamo unġasari sawa sawa kalilq di unub qaji nanġi dego tulañ areboleboleinjrqa. <sup>11</sup> Anjam bole agiende. Bini Tamo Koba Kristus a Devit aqa qure utruq di ñambabqo. A na qujai tamo unġasari nanġi elenamqa nanġi padalqasai. <sup>12</sup> Anġro mom di gara na dalaosib makau nanġo inġi uyo tabirq di ñeiotonub unu. Niñgi aisib unsib poinġwas.”

<sup>13</sup> Degsi minjre qnaqa lañ anġro tulañ gargekoba nanġi lañ goge na bosib lañ anġro nami bej qaji a ombla tigelosibqa Qotei aqa ñam soqtoqnsib endegsib maroqneb, <sup>14</sup> “Lañ goge di Qotei a ñam kobaquja oqo. Mandamq endi tamo unġasari nanġi lawo na soqnebe. Qotei a nanġi qa are tulañ boleiyeqnu.”

*Kaja taqato tamo nanġi Yesus unqajqa marsib Betlehem qureq aiyeb*

<sup>15</sup> Lañ anġro nanġi olo puluosib lañ qureq oqeq nabqa kaja taqato tamo nanġi qairosib mareb, “Iga tigelosim Betlehem aisim Tamo Koba a iga kumbra deqa mergwo qaji di unqom.” <sup>16</sup> Degsib marsibqa gurgur ti aisib Maria Josep wo nanġo anġro mom a makau nanġo inġi uyo tabirq di ñeiotosib sonab unjreb. <sup>17</sup> Unjrsibqa anġro deqa anjam lañ anġro na minjrej qaji di kalil ubtosib saoqneb. <sup>18</sup> Saeqnab tamo unġasari kalil anjam di queb qaji nanġi prugugetosib are koba qaloqneb.

<sup>19</sup> Ariya Maria a anjam di qusiqa aqa areqaloq di atsiq soqnej.  
<sup>20</sup> Onaqa kaja taqato tamo nanği olo puluosib gileb. Anjam kalil lan anğro na minjrnaq queb qaji deqa ti kumbra kalil nanği uneb qaji deqa ti nanği tulan areboleboleinjrnaqa Qotei aqa ñam soqtoqnsib giloqneb.

*Nanği anğro aqa ñam Yesus waiyeb*

<sup>21</sup> Ariya Yesus a ñambabosiq sonaqa bati 8 kereonaqa a muluñ waiyeb. Osib aqa ñam Yesus waiyeb. Ñam di nami lan anğro na Maria gumanosaisonaq minjej qaji.

*Simeon Ana wo nanği atra talq di Yesus uneb*

<sup>22</sup> Juda nanğo dal anjam bei agiende. Uña anğrotimqa bati 40 koboamqa nanği uña aqa jejamu yansetqab. Dal anjam di Moses a nami marej. Deqa Maria aqa jejamu yansetqa bati kereonaqa aqa gumbuluñ wo Jerusalem gilsibqa atra tal miligiq di Maria aqa jejamu yansetosib Yesus osib Tamo Koba aqa banq di ateb. <sup>23</sup> Agi Moses a nami Tamo Koba aqa dal anjam endegsi nenğrenyej, “Anğro matu mel ñambabamqa ninği Tamo Koba Qotei aqa banq di atiy. Atibqa a Qotei aqa segi tamo sqas.” <sup>24</sup> Nanği aiyel Tamo Koba Qotei aqa dal anjam di dauryosib wagme bei osib Qotei atraiyeb. Agi dal anjam endegsi unu, “Binonğ aiyel kiyo qebari bunuj aiyel kiyo osib Qotei atraiyiy.”

<sup>25</sup> Jerusalem dia tamo bei soqnej aqa ñam Simeon. Aqa kumbra tulan boledamu. A Qotei aqa sorgomq di geregere soqnej. Mondor Bole na a singilatonaq soqnej. A endegsi are qaloqnej, “Bati brantimqa Qotei na Israel tamo unğasari nanğo are boletetnjrqas.” A degsi are qaloqnsiq deqa bati di brantqajqa tariñoqnsiq soqnej. <sup>26</sup> Mondor Bole na nami Simeon minjej, “Ni mati moiğasai. Ni moiyoşaisoqnimqa Tamo Koba a na aqa Kristus qarinyim bamqa ni unsim moiğam.” <sup>27</sup> Onaqa bati bei Qotei aqa Mondor na Simeon aqa are tigeltetonaqa atra tal miligiq gilej. Gilsiq di sonaqa Maria Josep wo nanği dal anjam dauryosib nanğo anğro Yesus osib Qotei aqa banq di atqa marsibqa atra tal miligiq gileb. <sup>28</sup> Onaqa Simeon a Yesus unsiqa a osiq soqonyej. Soqonyosiq Qotei aqa ñam soqtosiq endegsi pailyej,

<sup>29</sup> “O Tamo Koba, e ino wau tamo. Ino anjam ni nami e merbem qaji di ni uratosai. Deqa e lawo na moiğai.

<sup>30</sup> Ni na ino segi tamo unğasari nanği eleñam nanği padalaib deqa ino Kristus qarinyem agi e unonum.

<sup>31</sup> Tamo unğasari kalil nanğo ñamdamuq di ni kumbra di yqajqa gam gereiyem.

<sup>32</sup> Kristus aqa rian na sawa bei bei qaji nanği suwantnjroqngas.

Osim ino segi tamo ungasari Israel nanği dego suwantnjrimqa nanžo ñam kobaqas.”

<sup>33</sup> Simeon a Yesus qa anjam degsi marnaqa Yesus aqa ai abu nanği qusib tulan prugeb. <sup>34</sup> Onaqa Simeon a nanği aiyel qa Qotei pailyosiq Yesus aqa ai Maria minjej, “Ni que. Qotei na anğro endi giltej deqa Israel gargekoba nanği ulonşosib padalqab. Gargekoba dego olo tigelosib nambile bole oqab. Anğro endi a toqor bul soqnimqa gargekoba nanği na a jeutoqnqab. <sup>35</sup> Deqa gargekoba nanžo areqalo uliejunu qaji di olo boleq dqas. Yimqa serie na ino are qametmo bul are jaqatin oqnqam.”

<sup>36</sup> Bati deqa Qotei aqa medabu o qaji unja bei soqnej aqa ñam Ana. A Fanuel aqa anğro. A Aser aqa moma. A tulan qeliej. A nami tamo osiqa gumbulun wo wausau 7 soqneb. <sup>37</sup> Aqa gumbulun moinaqa a segi qobul soqnej. Aqa wausau kalil 84. A qobul sosiqa a bati gaigai qolo ti qanam ti atra tal miligiq giloqnsiqa inği ti ya ti uratoqnsiqa Qotei pailyoqnej. A atra tal uratosaiyoqnej. <sup>38</sup> Simeon a anjam marsiq koboonaqa Ana a bosiq anğro kiñala di unsiqa Qotei aqa ñam soqtej. Osiqa Jerusalem tamo ungasari kalil Qotei na awainjrqa marsib tarinjoqneb qaji nanği Yesus qa sainjroqnej.

### *Maria Josep wo nanği olo Nasaret qureq gileb*

<sup>39</sup> Maria Josep wo nanği Jerusalem dia Tamo Koba aqa dal anjam kalil dauryekritosib nanği olo puluosib Galili sawaq gilsib nanžo segi qure utru Nasaret di soqneb. <sup>40</sup> Di sosibqa nanžo anğro kiñala Yesus a boleqnsiqa singilaoqnsiq powo qelikoba oqnej. Qotei a Yesus qa are tulan boleiyyoqnej.

### *Yesus aqa wausau 12 kereonaqa a Jerusalem aiyej*

<sup>41</sup> Yesus aqa ai abu nanği wausau gaigai Juda nanžo yori bati koba ñam Pasova di unqajqa maroqnsib Jerusalem aiyyoqneb. <sup>42</sup> Deqa Yesus aqa wausau 12 kereonaqa a na aqa ai abu nanği daurnjrşiqa yori bati di unqajqa koba na Jerusalem aiyeb. <sup>43</sup> Aisib yori bati di unsib koboonaqa tamo ungasari kalil nanği puluosib nanžo segi segi qureq olo gileq nabqa anğro wala Yesus a segi Jerusalem di soqnej. Aqa ai abu nanği deqa qaliesai. <sup>44</sup> Nanği are qaleb, “Yesus a tamo qudei nanği daurnjrşiqa nami gilqo kiyo?” Degsib are qalsibqa qanam qujai nanği walwelosib gileb. Gilsib gamq di Yesus unosai deqa nanği na nanžo segi kadoi nanği ti nanžo segi len nanği ti Yesus qa nene nenemnjroqneb. <sup>45</sup> Onaqa ugeinjrnaqa nanği aiyel olo puluosib Jerusalem aisib dia Yesus qa namoqneb. <sup>46</sup> Bati qalub nanği Yesus qa namoqneb. Namosib gilsib atra tal miligiq di nam atsib Yesus a di awesonaq uneb. A dal anjam qalie tamo nanžo ambleq di awesosiqa nanžo anjam



quoqnsiqa anjam qudei nanġi nenemnjroqnej. <sup>47</sup> Aqa powo tulaġ kobaquja deqa a dal anjam qalie tamo nanġi kamba anjam bole bole minjreqnaqa tamo kalil aqa anjam di quoqneb qaji nanġi prugoqneb. <sup>48</sup> Onaqa aqa ai abu nanġi a unsib pruguetosib aqa ai na minjeġ, “O ijo anġro, ni kiyaaqa aqo ino abu wo kumbra deggonum? Ni que. Aqo aiyel are tulaġ gulbeigwoqa ni qa nġamoqnam.” <sup>49</sup> Onaqa Yesus na minjreġ, “Niġi kiyaaqa e qa nġamoqnaġ? E ijo Abu aqa talq endi sqai. Niġi di qaliesai kiyoo?” <sup>50</sup> Onaqa aqa ai abu nanġi aqa anjam di qusib poinjrosai.

<sup>51</sup> Onaqa Yesus a tigelosiqa aqa ai abu nanġi daurnjrsiqa Nasaret qureq gileb. Gilsib dia a nanġo aiyel anjam geregere dauryoqnsiqa nanġo sorgomq di soqnej. Aqa kumbra kalil di aqa ai na unoqnsiqa tulaġ areboleboleiyeqnaqa aqa areqaloq di atnaq soqnej. <sup>52</sup> Yesus a Nasaret qureq di sosisqa a tamo kobaqujaqnsiqa aqa powo dego qelikobaoqnej. Qotei a Yesus qa are boleiyooqnej. Tamo unġasari nanġi dego Yesus qa are boleinjroqnej.

### 3

*Jon yansnjro qaji a wadau sawaq di Qotei aqa anjam palontonej*

<sup>1-2</sup> Bunuqna Sekaraia aqa nġiri Jon a wadau sawaq di sonaqa Qotei na aqa anjam minjnaq quej. Bati deqa Sisar Taiberius a wausau 15 Rom nanġo mandor koba soqnej. Pontius Pailat a Judia sawa nanġo gate soqnej. Herot a Galili sawa taqatoqnej. Herot aqa was Filip a Ituria sawa ti Trakonitis sawa ti taqatoqnej. Lisanias a Abilene sawa taqatoqnej. Anas Kaiafas wo nanġi aiyel atra tamo gate soqneb. <sup>3</sup> Jon a sawa kalil Jordan ya qalaq di soqneb qaji deq giloqnsiqa Qotei aqa anjam palontooqnsiq tamo unġasari nanġi endegsi minjroqnej, “Niġi are bulyibqa e na niġi yansnġwai. Amqa Qotei a nunġo une kalil kobotetnġwas.” <sup>4</sup> Jon a kumbra degyej deqa anjam bei Qotei aqa medabu o tamo Aisaia nami nengrenjej qaji di aqa damu brantej. A Jon qa anjam endegsi nengrenjej, “Tamo bei a wadau sawaq di tigelosimqa a tulaġ lelenoqnsim tamo unġasari nanġi endegsim minjroqnaqas, ‘Tamo Koba a bqajqa gam gereiyeti. Gam tingiteti. <sup>5</sup> Botau kalil mororyi. Mana kokba ti mana kiñilala ti kalil ġinġenġrsib taqal atiy. Gam kanenjo kalil tingiti. Gam niñaqejunub qaji kalil di dego gereiyi. <sup>6</sup> Yimqa tamo unġasari sawa sawa kalilq di unub qaji nanġi Qotei na padalo sawaq dena elenjam unqab.’ ”

<sup>7</sup> Tamo unġasari tulaġ gargekoba nanġi Jon na yansnjrqa marsibqa aqa areq beqnaġba siġila na endegsi minjroqnej, “Niġi kumbra uġe yo qaji tamo. Niġi amal uġe bul. Niġi yai

na merngwoqa mondon Qotei aqa minjin nungoq aiyaim deqa ulaosib ijoq bonub? <sup>8</sup> Ningi are buliy. Osib nungo kumbra uge kalil uratosib kumbra bole bole yoqniy. Yim e unsiy marqai, 'Bole, ningi are bulyonub.' Osiy ningi yansngwai. Ningi endegsib are qalaib, 'Abraham a gago moma utru unu deqa iga Qotei aqa namgalaq di tamo bole.' Ningi degsib are qalaib. Ningi quiy. Qotei na marimqa menin kalil endi dego tamo bulyosib tigelosib Abraham aqa moma brantqab. <sup>9</sup> Qotei na tapor qalat ojsiqa nam qomqajqa utruq di atej unu. Deqa nam kalil gei bole atosaiqnuq qaji di Qotei na tapor dena qomelenosim namyuwoq di breinjrqas."

<sup>10</sup> Jon a tamo ungasari nanqi anjam degsi minjrnaqa nanqi na kamba nenemyeb, "Ni anjam degsi mergonum deqa iga kumbra kiyeryqom?" <sup>11</sup> Onaqa Jon na minjrej, "Ni gara aiyel soqnimqa bei osim tamo gara saiqoji di ye. Ni inqi uyo soqnimqa qudei osim tamo inqi saiqoji di anaiye." <sup>12</sup> Onaqa takis o qaji tamo qudei nanqi Jon na yansnrqa marsibqa aqa areq bosib nenemyeb, "O Qalie Tamo, ni mare. Iga takis o qaji tamo. Deqa iga kumbra kiyeryqom?" <sup>13</sup> Onaqa Jon na minjrej, "Nungo gate kokba nanqi takis silali gembub ningi oqajqa merngonub kere dego oqniy. Silali bei laja goge ataib." <sup>14</sup> Onaqa qaja tamo qudei nanqi Jon aqa areq gilsib nenemyeb, "Ni mare. Iga kumbra kiyeryqom?" Onaqa Jon na minjrej, "Ningi tamo nanqi ugeugeinjraib. Osib nanngo silali bajinoqnaib. Ningi tamo qudei gisan na nanngo jejamuq di une gametnjraib. Ningi endegsib are qaloqniy, 'Gago awai iga eqnum di iga qa kere.'"

<sup>15</sup> Bati di tamo ungasari nanqi Kristus bqajqa tarinoqnsib soqneb. Deqa nanqi Jon aqa anjam quoqnsib are qaloqneb, "Jon a Kristus kiyo?" <sup>16</sup> Onaqa Jon a nanngo areqalo di qalieosiqa minjrej, "Tamo Koba a bunuqna ijo qoreq na bqas. A tamo singila koba. Ijo singila aqa singila ti keresai. Deqa e a kangalyqajqa e tamo bolesai. E ya na laja yansngeqnum. Ariya Tamo Koba a bosimqa Mondor Bole aqa singila na ti namyuwo na ti ningi yansngwas. <sup>17</sup> A bem sum noqoryosim damu elenosim aqa talq di atqas. Osim a bem sum aqa suwi breinjrim namyuwo gaigai yuejunu qaji dia yuekritqab."

<sup>18</sup> Jon na tamo ungasari nanngo are gametnjrqas osiq deqa anjam gargekoba nanqi minjroqnej. A Qotei aqa anjam bole nanqi minjroqnej.

### *Herot na Jon ojsiqa tonto talq di waiyej*

<sup>19</sup> Bati bei Jon na mandor Herot aqa une qa njirintej. Aqa une agi a na aqa segi was aqa nauj Herodias yayiosiq ej. Une deqa ti kumbra uge uge kalil Herot a yoqnej qaji deqa ti Jon

na njirinfej. <sup>20</sup> Deqa Herot a olo kumbra uge bei dego yej. Aqa kumbra uge bei agiende. A Jon ojsiqa tonto talq di waiyej.

<sup>21</sup> Ariya tamo ungasari kalil nanji yanso eqnabqa Yesus a dego yanso ej. Yanso osiqa bati deqa a tarosiq lan goge koqyosiq Qotei pailyeqnaqa lan waqej. <sup>22</sup> Lan waqonaqa Mondor Bole a binon bulosiq aisiqa Yesus aqa jejamuq di awoej. Awoonaqa lan goge na Qotei aqa anjam bei endegsi brantej, “Ni ijo segi angro qujai. E ni tulan qalaqalaimeqnum. E ni qa tulan areboleboleibeqnu.”

*Yesus aqa moma nanjo ñam kalil*

<sup>23</sup> Yesus aqa wausau 30 kereonaqa aqa wau utru atej. Nanji Yesus qa endegsib maroqneb, “A Josep aqa njiri.” Yesus aqa moma nanjo ñam kalil agi marqai. Josep a Heli aqa njiri. <sup>24</sup> Heli a Matat aqa njiri. Matat a Livai aqa njiri. Livai a Melki aqa njiri. Melki a Janai aqa njiri. Janai a Josep aqa njiri. <sup>25</sup> Josep a Matatias aqa njiri. Matatias a Amos aqa njiri. Amos a Nahum aqa njiri. Nahum a Esli aqa njiri. Esli a Nagai aqa njiri. <sup>26</sup> Nagai a Mat aqa njiri. Mat a Matatias aqa njiri. Matatias a Semen aqa njiri. Semen a Josek aqa njiri. Josek a Joda aqa njiri. <sup>27</sup> Joda a Joanan aqa njiri. Joanan a Resa aqa njiri. Resa a Serubabel aqa njiri. Serubabel a Sealtiel aqa njiri. Sealtiel a Neri aqa njiri. <sup>28</sup> Neri a Melki aqa njiri. Melki a Adi aqa njiri. Adi a Kosam aqa njiri. Kosam a Elmadam aqa njiri. Elmadam a Er aqa njiri. <sup>29</sup> Er a Josua aqa njiri. Josua a Elieser aqa njiri. Elieser a Jorim aqa njiri. Jorim a Matat aqa njiri. Matat a Livai aqa njiri. <sup>30</sup> Livai a Simeon aqa njiri. Simeon a Juda aqa njiri. Juda a Josep aqa njiri. Josep a Jonam aqa njiri. Jonam a Eliakim aqa njiri. <sup>31</sup> Eliakim a Melea aqa njiri. Melea a Mena aqa njiri. Mena a Matata aqa njiri. Matata a Natan aqa njiri. Natan a Devit aqa njiri. <sup>32</sup> Devit a Jesi aqa njiri. Jesi a Obet aqa njiri. Obet a Boas aqa njiri. Boas a Salmon aqa njiri. Salmon a Nason aqa njiri. <sup>33</sup> Nason a Aminadap aqa njiri. Aminadap a Atmin aqa njiri. Atmin a Arni aqa njiri. Arni a Hesron aqa njiri. Hesron a Peres aqa njiri. Peres a Juda aqa njiri. <sup>34</sup> Juda a Jekop aqa njiri. Jekop a Aisak aqa njiri. Aisak a Abraham aqa njiri. Abraham a Tera aqa njiri. Tera a Nahor aqa njiri. <sup>35</sup> Nahor a Seruk aqa njiri. Seruk a Reu aqa njiri. Reu a Pelek aqa njiri. Pelek a Eber aqa njiri. Eber a Sela aqa njiri. <sup>36</sup> Sela a Kainan aqa njiri. Kainan a Arpaksat aqa njiri. Arpaksat a Siem aqa njiri. Siem a Noa aqa njiri. Noa a Lamek aqa njiri. <sup>37</sup> Lamek a Metusela aqa njiri. Metusela a Enok aqa njiri. Enok a Jaret aqa njiri. Jaret a Mahalalel aqa njiri. Mahalalel a Kenan aqa njiri. <sup>38</sup> Kenan a Enos aqa njiri. Enos a Set aqa njiri. Set a Adam aqa njiri. Adam a Qotei aqa njiri.

## 4

*Satan a bosiq Yesus walawalaiyoqnej*

1-2 Mondor Bole a Yesus aqa jejamuq di awoonaqa a Jordan yaq dena olo pulueqnaqa Mondor na a wadau sawaq osi gilej. Osi gilsiq uratonaqa bati 40 a di laqnej. Di laqnaqa Satan bosiq a Yesus a une bei atqa marsiq a walawalaiyoqnej.

Bati deqa Yesus a ingi uratoqnsiqa qurien ti soqnej. Bati 40 koboonaqa a mamyej. <sup>3</sup> Onaqa Satan na minjej, “Ni Qotei aqa Niriamqa meniñ kalil endi minjrim bem bulyibqa ni uye.”

<sup>4</sup> Degsi minjnaqa Yesus na kamba minjej, “Qotei aqa anjam bei nami endegsib nengrenyeb unu, ‘Tamo nanği ingi uyo na segi nambile sqasai.’ ”

<sup>5</sup> Onaqa Satan a Yesus olo osiqa mana goge kobaq oqsıq dia Yesus tigeltosiqa sawa sawa kalil mandor kokba nanği na taqatejunub qaji di Yesus osoryej. <sup>6</sup> Osoryosiqa minjej, “Sawa sawa kalil di nanço singila ti ñoro ti ni emqai. Sawa sawa kalil di ijo. Qotei na nami ebej. Deqa e na tamo bei yqa are soqnim yqai. <sup>7</sup> Deqa ni ijo ulatamuq endi singa pulutosim e qa louimqa sawa sawa kalil di ni emqai.” <sup>8</sup> Onaqa Yesus na minjej, “Nami Qotei aqa anjam bei endegsib nengrenyeb unu, ‘Ino Tamo Koba Qotei a segi qa louoqnsimqa aqa sorgomq di soqne.’ ”

<sup>9</sup> Onaqa Satan na Yesus olo osiqa Jerusalem gilsiq atra tal quraq oqsıq goge dia Yesus atsiqa minjej, “Ni Qotei aqa Niriamqa endena prugosim mandamq aiye. <sup>10</sup> Agi Qotei aqa anjam bei nami endegsib nengrenyeb unu, ‘Qotei na aqa lan angro nanği minjrimqa bosib ni taqatmqab.’ <sup>11</sup> Anjam bei dego nengrenq di unu. Anjam agiende, ‘Lan angro nanği bosib ban na ni soqtmibqa ino singa meniñ na qalqasai.’ ”

<sup>12</sup> Onaqa Yesus na kamba Satan minjej, “Qotei aqa anjam bei dego nengrenq di unu. Anjam agiende, ‘Ni ino Tamo Koba Qotei aqa singila lan tenemtqa osim a gisanjaim.’ ”

<sup>13</sup> Satan a kumbra kalil dena Yesus uneq waiyqa yonaq ugeiyonaqa a uratosiq ulanej. Bunuqna a na olo Yesus walawalaiyqa marsiq a tariñosi q soqnej.

*Yesus a Galili sawaq di aqa wau utru atej*

<sup>14</sup> Qotei aqa Mondor aqa singila Yesus aqaq di soqnej deqa a olo puluosiq a Galili sawaq aiyej. Aisiq di sonaqa qure kalilq di tamo unğasari nanği a qa saoqnsib laqneb. <sup>15</sup> A bati gaigai Juda nanço Qotei tal miligiq giloqnsiqa tamo unğasari nanği Qotei aqa anjam minjreqnaqa nanği quoqnsib aqa ñam soqtoqneb.

*Nasaret qureq di nanği Yesus qa minjin oqetnjrej*

<sup>16</sup> Onaqa Yesus a dena walwelosiq Nasaret qureq aiyej. Di aqa qure utru. A dia boleej. Aisiq di sosisqa yori bationaqa aqa kumbra gaigai yoqnej qaji di dauryosiqqa Juda nanqo Qotei tal miligiq gilsiqqa Qotei aqa anjam sisiyqa osiq tigelej. <sup>17</sup> Onaqa buk Baibel yonabqa a na waqtosiqqa Qotei aqa medabu o tamo Aisaia aqa anjam nami nengrenyej qaji mutu bei itosiq endegsi sisiyej, <sup>18</sup> “Tamo Koba aqa Mondor ijoq di unu deqa a na e giltbosiqqa merbej, ‘Ni na tamo unqasari sougetejunub qaji nanqi ijo anjam bole minjroqne.’ Osiqa a na e qarinqbosiq merbej, ‘Ni na tamo unqasari nam qandimo unub qaji nanqi boletnjroqne. Osim tamo unqasari nanqo segi une na ojejunu qaji nanqi gereinjroqne. Osim tamo unqasari jeu tamo nanqi na ugeugeinjroqne qaji nanqi aqaryainjroqne. <sup>19</sup> Osim anjam endegsi palontogne, “Tamo Koba a na tamo unqasari nanqi boletnjrqajqa bati brantqo.” ’ ’

<sup>20</sup> Yesus a anjam degsi sisiyosiq koboonaqa buk Baibel kabutosiqqa Qotei tal taqato tamo yosiq a olo awoej. Onaqa tamo unqasari kalil Qotei tal miligiq di soqneb qaji nanqi Yesus koqyesoqneb.

<sup>21</sup> Onaqa Yesus na nanqi minjrej, “Qotei aqa anjam e endego sisiyonum ninqi quonub qaji di aqa damu agi bini brantqo.” <sup>22</sup> Degsi minjrnaqa nanqi kalil aqa anjam di qusib mareb, “Yesus aqa anjam di bolequja.” Osib olo areqalo kobaiyoqnsib maroqneb, “Yesus a Josep aqa njiri. Deqa a powo qabe na osiqqa anjam bole endeqaji palontosiq mergeqnu?”

<sup>23</sup> Onaqa Yesus na minjrej, “Ninqi yawo anjam endegsib merbqab kiyo, ‘O yu qanqra tamo, ni ino segi jejamu gereiye.’ Osib ninqi endegsib merbqab, ‘Kaperneam qureq di ni manwa babteqnam iga deqa queqnum. Manwa kere dego ni ino segi qure utruq endi babtım iga unqom.’” <sup>24</sup> Osiqa Yesus a olo endegsi minjrej, “E bole mernqwai. Qotei aqa medabu o tamo bei aqa segi qure utruq gilsim anjam minjroqngas di nanqi aqa anjam quietqa asginjrqas. Deqa a nam saiqoji sqas. <sup>25</sup> E bole mernqwai. Elaija aqa bati qa lan getenqsonaqa wausau qalub bai 6 gilsiq awa bosaiognej. Deqa sawa sawa kalilq di nanqi mam koba eb. Bati deqa Israel sawaq di unqa qobul gargekoba soqneb. <sup>26</sup> Sonabqa Qotei na Elaija nanqoq qarinqosai. A na Elaija qarinqonaqa Saidon sawaq gilsiq Sarefat qureq di unqa qobul bei aqaq di segi brantosiqa aqaryaiyej. <sup>27</sup> Qotei aqa medabu o tamo Elisa dego aqa bati qa tamo gargekoba nanqo jejamu yu na ugeelenqej qaji nanqi Israel sawaq di soqneb. Ariya Elisa a nanqi boletnjrosai. A Siria sawaq gilsiq dia tamo bei yu na aqa jejamu ugeelenqej qaji aqa nam Naman a segi boletej.”

28-29 Yesus na tamo unġasari Qotei tal miligiq di soqneb qaji nanġi anjam degsi minjrnaqa nanġi kalil qusibqa minjin ani oqetnrnaqa tigelosib Yesus ojsib tututosib qure qalaq osi gileb. Nanġo qure mana goge di soqnej deqa nanġi Yesus mana goge dena waiyqa mareb. <sup>30</sup> Onaqa a nanġo ambleq na loumosiq ulanej.

*Yesus a tamo bei aqaq dena mondor uge wiyetej*

<sup>31</sup> Onaqa Yesus a Kaperneam qureq gilej. Qure di Galili sawaq di unu. Gilsiq di sosiqa yori batieqnaqa tamo unġasari nanġi Qotei aqa anjam plaltoqnsiq minjroqnej. <sup>32</sup> Yesus aqa anjam maroqnej di sinġila ti. A segi anjam di aqa Abu. Deqa tamo unġasari kalil nanġi aqa anjam di quoqnsib tulaŋ prugugetoqneb.

<sup>33</sup> Yori bati bei tamo mondor uge na ojej qaji a Qotei tal miligiq di soqnej. Deqa a tulaŋ lelenosiqa Yesus minnej, <sup>34</sup> “O Yesus Nasaret qaji tamo, ni iga kiyergwajqa bonum? Ni iga padaltgwa bonum e? E ni qalie. Ni Qotei aqa segi Njiri bolequja. Ino jejamuq di une bei saiqoji.”

<sup>35</sup> Mondor uge dena Yesus degsi minjnaqa a sinġila na njirintosiq minnej, “Ni medabu getentosim tamo di uratosim ulaŋ.” Onaqa mondor uge dena tamo di uratqa osiqa tamo unġasari nanġo ambleq di a waiyonaq mandamq di njeisonaqa uratosiq ulanej. Tamo di aqa jejamu yala ugetosai. A bole soqnej. <sup>36</sup> Onaqa tamo unġasari kalil nanġi Yesus aqa maŋwa di unsibqa nanġi tulaŋ prugugetosib segi segi maroqneb, “Yesus a anjam bunuj mareqnu. Aqa anjam bunuj di sinġila ti mareqnu. Agi a na mondor uge nanġi anjam minjreqnaqa nanġi aqa anjam dauryoqnsib jaraiyeqnu.” <sup>37</sup> Tamo unġasari nanġi degsib maroqnsib olo walwelosib sawa sawa kalilq di Yesus aqa maŋwa deqa saoqnsib laqneb.

*Yesus na Pita aqa mimibe boletej*

<sup>38</sup> Onaqa Yesus a tigelosiqa Qotei tal uratosiq Saimon aqa ñam bei Pita aqa tal gogetej. Tal gogetosiqa Saimon aqa mimibe makobaiyonaqa jejamu kaŋkaŋyonaq unej. Deqa Yesus aqa aŋgro nanġi na minjeb, “Ni a boletime.” <sup>39</sup> Onaqa Yesus a gilsiq uŋa maiyej qaji aqa areq di tigelosiqa anjam segi minjnaqa aqa jejamu kaŋkaŋ di koboej. Onaqa uŋa a tigelosiqa nanġi inġi goiyetnjrej.

*Yesus a tamo unġasari gargekoba nanġi boletnjroqnej*

<sup>40</sup> Sen aiqa laqnaqa tamo unġasari ma utru segi segi so qaji nanġo was nanġi na joqoqnsib Yesus aqa areq boqneb. Beqnaqqa Yesus na aqa baŋ nanġo gateq di ateqnaqa nanġo ma koboeqnaqa nanġi jaraiyoqneb. <sup>41</sup> Mondor uge gargekoba dego Yesus na winjreqnaqa nanġi olo tamo unġasari nanġi

uratnjroqnsib jaraiyoqneb. Jaraiyoqnsib tulan lelenjoqnsib Yesus minjoqneb, “Ni Qotei aqa Njiri.” Yeqnabqa Yesus a siŋgila na saidnjroqnej, “Niŋgi ijo ñam ubtosib maraib.” Degsi saidnjroqnej. Di kiyaaqa? Nanŋi qalie, Yesus a Kristus.

*Yesus a qure qureq giloqnsiqa Qotei aqa anjam plaltosiq minjroqnej*

<sup>42</sup> Onaqa nobqolo ambru Yesus na tamo uŋgasari nanŋi alelnjrsiqa qure di uratosiq wadau sawaq gilej. Gilsiq di sonaqa nanŋi a qa ñamosib gilsib itosib minjeb, “Ni iga uratgaim.” <sup>43</sup> Onaqa Yesus na minjrej, “E qure bei beiq dego giloqnsiyqa Qotei aqa anjam bole endegsi minjroqñqai, ‘Niŋgi are bu-lyibqa Qotei a nuŋgo Mandor Koba sosim niŋgi taqatŋgwas.’ Degsi minjroqñqai. Qotei a deqa e qarĩbonaq mandamq aiyem.” <sup>44</sup> Yesus na tamo uŋgasari nanŋi degsi minjrsiqa nanŋi uratnjrsiq gilsiq Judia sawaq di walweloqnsiqa Juda nanŋo Qotei tal miligiq giloqnsiqa Qotei aqa anjam palontoqnej.

## 5

*Yesus na Pita minjnaqa a kakan waiyosiq qe ani ej*

<sup>1</sup> Bati bei Yesus a Genesaret ya agu kobaqujaq gilsiq alile dia tigelesonaqa tamo uŋgasari tulan gargekoba nanŋi Qotei aqa anjam quqwajqa are qalsibqa Yesus aqa areq bosib ko-roeb. <sup>2</sup> Koroesonabqa Yesus a ñam atsiqa qobuŋ aiyel alile di tiryosib sonab unjrej. Qe o qaji tamo nanŋi qobuŋ dena mandamq aisib nanŋo kakan yansoqneb. <sup>3</sup> Qobuŋ bei Saimon aqa qobuŋ. Yesus a Saimon aqa qobuŋ gogetosiq di awoosiqa Saimon minjej, “Qobuŋ tututim kiñala sasalem.” Onaqa Saimon na qobuŋ tututonaq sasalonaqa Yesus a qobuŋ miligiq di awoosiqa tamo uŋgasari kalil nanŋi alile di sonabqa Qotei aqa anjam plaltosiq minjroqnej.

<sup>4</sup> Anjam minjrsiq koboonaqa a na Saimon minjej, “Niŋgi qobuŋ oyoosib ya robuq oqsib nuŋgo kakan waiyqab qe oqab.” <sup>5</sup> Onaqa Saimon na kamba minjej, “O Tamo Koba, iga qolo waukobaonum gilsiq nebeqo. Iga qe bei yala osai. Di unŋum. Ni maronum deqa e kakan olo waiyqai.” <sup>6-7</sup> Onaqa qe o qaji tamo nanŋi ya robuq oqsib kakan olo waiyosib qe tulan ani eb. Qe ani onabqa nanŋo kakan qe na maqej deqa branqa laqnaqa titqa keresaiinjrej. Deqa nanŋi na nanŋo was qudei qobuŋ beiq di soqneb qaji nanŋi metnjrnab bosib koba na kakan titosib qe osib qobuŋ aiyel miligiq di jugonab maqosib tugwa laqneb. <sup>8</sup> Onaqa Saimon aqa ñam bei Pita a Yesus aqa maŋwa di unsiqa aqa siŋgaq di siŋga pulutosiq minjej, “O Tamo Koba, e une tamo. Deqa ni e uratbosim gile.” <sup>9</sup> Saimon na Yesus degsi minjej. Di kiyaaqa? Aqa was nanŋi ti qe tulan koba elenjosib prugugeteb deqa. <sup>10</sup> Sebedi aqa njiri aiyel Jems

Jon wo nanġi Saimon ombla wau qujai. Nanġi dego Yesus aqa maŋwa di unsibqa tulaŋ prugeb. Onaqa Yesus na Saimon minjeġ, “Ni ulaa'im. Ni qe o tamo unum deqa ni qe eqnum. Bunuqna ni degsim olo tamo oqnaqam.” <sup>11</sup> Onaqa nanġi nanġo qobuŋ alile dia atsib nanġo ai abu nanġi uratnjsib nanġo ñoro ti inġi inġi kalil ti uratosib Yesus dauryeb.

*Yesus a tamo yu na aqa jejamu ugeelenjeġ qaji di boletej*

<sup>12</sup> Nanġi Yesus dauryosib bati bei nanġi koba na qure beiq gileb. Dia tamo bei yu na aqa jejamu ugeelenjeġ qaji a Yesus unsiqa aqa areq bosiq sinġa pulutosiq mandamq di nġam quosisqa Yesus pailyosiq minjeġ, “O Tamo Koba, ni e boletbqa are soqnim e boletbe. E qalie, ni e boletbqa kere.” <sup>13</sup> Degsi minjnaqa Yesus a baŋ waiyosiq tamo di aqa jejamu ojeġ. Ojsiq minjeġ, “E ni boletmq are unu. Deqa ino jejamu olo boleeme.” Onaqa bati qujai deqa aqa yu uge kalil mosoosiq aqa jejamu boleeġ. <sup>14</sup> Onaqa Yesus na minjeġ, “Ino jejamu boleqo deqa ni tigelosim gile. Ni tamo qudei nanġi ijo ñam ubtosim minjraim. Ni gilsim ino jejamu atra tamo osoryosim atraiyqajqa inġi inġi Moses a nami mareġ qaji di osim Qotei atraiyime. Yimqa tamo unġasari nanġi ni numsis marqab, ‘Bole, ino jejamu boleqo.’” <sup>15</sup> Onaqa a gilsiq ariya a Yesus aqa anjam di dauryosai. Yesus na a boleteġ deqa mare mare laqnaqa aqa anjam tulaŋ kobaosiq sawa sawa kalil kereteġ. Deqa tamo unġasari tulaŋ gargekoba nanġi Yesus aqa anjam quqwjqa ti a na nanġo ma boletetnjqajqa ti are qalsibqa boqnsib aqa areq di korooqneb. <sup>16</sup> Ariya bati gargekoba Yesus a tamo unġasari nanġi alelnjqnsiq wadau sawaq giloqnsiq dia a segi sosiq Qotei pailyoqnej.

*Yesus a tamo bei jejamu laiyeġ qaji di boletej*

<sup>17-18</sup> Bati bei tamo unġasari nanġi olo koroesonabqa Yesus a Qotei aqa anjam palontoqnsiq minjqoneġ. Minjqonaqa bati di Farisi nanġi ti dal anjam qalie tamo nanġi ti bosib Yesus aqa areq di awesoqneb. Nanġi Galili sawa ti Judia sawa ti nanġo qure qureq dena beleneb. Nanġi Jerusalem dena dego beleneb. Tamo Koba Qotei aqa sinġila Yesus aqag di soqnej deqa a na tamo unġasari nanġo ma boletetnjqajqa wauoqnej. Onaqa tamo qudei nanġi tamo bei jejamu laiyeġ qaji a sapersaq di nġeiosib Yesus aqa areq di atqa marsibqa qoboyosib beb. <sup>19</sup> Bosib nġam ateb di tamo tulaŋ gargekoba siraŋmeq di jujuneb. Deqa nanġi Yesus aqa areq gilqa kere-saiinjraqa tal quraq oqsib goge na waqtosibqa tamo sapersaqoji gulaintosib ura uratonab Yesus aqa areq aiyeġ. <sup>20</sup> Onaqa Yesus a nanġo areqalo unej di nanġo areqalo qujai Yesus na tamo jejamu laiyeġ qaji di boletqa kere. Deqa a na tamo



di minjej, “O ijo was, ino une kalil e na kobotetmonum.”  
<sup>21</sup> Onaqa dal anjam qalie tamo nanği ti Farisi nanği ti tal dia awesoqneb qaji nanği Yesus aqa anjam di qusibqa nanğo areqalo na mareb, “Yesus a Qotei misilinyqo. Yai na tamo nanğo une kobotqa kere? Qotei a segi qujai.”  
<sup>22</sup> Nanği degsib are qaleqnabqa Yesus a nanğo areqalo di qalieosiqa minjrej, “Ninği kiyaaqa degsib are qaleqnub?”  
<sup>23</sup> Anjam kiye e na tamo jejamu laiyyo qaji di minjit ninği qusib e qa poingwas? ‘Ino une kalil e na kobotetmonum,’ anjam de kiyo, ‘Ni tigelosim walwel,’ anjam de kiyo?  
<sup>24</sup> E segi Tamo Anğro. E mandamq endi sinğila ti unum deqa e na tamo nanğo une kobotetnrqa kere. Ninği degsi poingwajqa deqa e na tamo di boletqai.”  
 Yesus a nanği degsi minjrsiqa tamo jejamu laiyej qaji di koqyosiqa minjej, “E ni mermqai. Ni tigelosim ino sapera osim ino talq gile.”  
<sup>25</sup> Degsi minjnaqa a tamo unğasari kalil nanğo namdamuq di tigelosiqa aqa sapera neiesoqnej qaji di qoboiyosiqa Qotei aqa ñam soqtosiqa walwelosiq aqa talq gilej.  
<sup>26</sup> Onaqa tamo unğasari kalil nanği Qotei aqa manwa di unsibqa nanği tulan prugugetosib Qotei aqa ñam soqtosib a binjyeb. Osib nanği ulaosib mareb, “Manwa iga endego unonum di kumbra bei. Tamo qudei na manwa deqaji yeq nab iga nami unosaiognem.”

*Yesus na Livai minjej, “Ni e daurbe”*

<sup>27</sup> Yesus a dena walwelosiq takis o qaji tamo bei aqa ñam Livai a takis o talq di awesonaq gilsiq itej. Itosiqa minjej, “Ni e daurbe.”  
<sup>28</sup> Onaqa a na aqa inği inği kalil uratosiqa tigelosiq Yesus dauryej.  
<sup>29</sup> Osiqa bati bei Livai a maruro atsiqa takis o qaji tamo tulan gargekoba nanği ti Yesus aqa segi anğro nanği ti tamo lanja lanaj nanği ti metnjrnaq bosib koba na awoosib inği uyoqneb.  
<sup>30</sup> Onaqa Farisi nanği ti dal anjam qalie tamo nanği ti bosib kumbra di unsibqa Yesus aqa anğro nanği njrintnjrsib minjreb, “Ninği kiyaaqa takis o qaji tamo ti une tamo ti nanği koba na awoosib inği ti ya ti uyeqnub?”  
<sup>31</sup> Onaqa Yesus a nanğo anjam di qusiqa minjrej, “Tamo ma saiqoji nanği yu qanğra tamo aqaq gilosaieqnub. Tamo ma ti nanği segi yu qanğra tamo aqaq gileqnub.”  
<sup>32</sup> Tamo bei a marqas, ‘E tamo bole. E une saiqoji.’ E tamo deqaji nanği metnjrit ijoq bqajqa deqa mandamq aiyosai. Tamo a marqas, ‘E une ti.’ E tamo deqaji nanği metnjrit ijoq bqajqa deqa mandamq aiyem.”

*Yesus a qurien qa anjam marej*

<sup>33</sup> Onaqa Farisi nanği na olo Yesus minjeb, “Jon aqa anğro nanği bati gaigai inği uratoqnsib qurienjoqnsib Qotei pailyoqnsib unub. Farisi nanğo anğro nanği dego kumbra degyeqnub.

Ariya ino angro nanngi kiyaa qurienosaieqñub? Agi nanngi bati gaigai inngi ti ya ti uyoqnsib unub.”<sup>34</sup> Onaqa Yesus a nanngo anjam di qusiqa a kamba yawo anjam bei endegsi minjrej, “Tamo bei a unja ban ojqa bati qa aqa was nanngi ti soqñibqa nanngi qurienqab e? Sai.”<sup>35</sup> Bunuqna nanngo was a nanngi uratñjrimqa bati deqa nanngi qurienqnsib sqab.”

<sup>36</sup> Osiqa Yesus a olo yawo anjam bei endegsi minjrej, “Tamo bei a gara jugo bunuj osim dena mutu gentosim gara jugo sari branqoq di qandimqa keresai. Degsi qandimqas di a na gara jugo bunuj di ugeugeiyqas. Amqa gara sari aqa uno bolesaiqas. Di kiyaaqa? Gara sari ti gara bunuj ti kerekereqasai.”<sup>37</sup> Tamo bei a wain bunuj osim ya nobu sariq di qamqa keresai. Ya nobu sari di nami kanqranosiq singilaej. Deqa a wain bunuj qamimqa wain a didiqosim ya nobu sari paratosimqa wain bilenqosim mandamq aiqas. Ya nobu a dego ugeqas.”<sup>38</sup> A ya nobu bunujq di wain bunuj qamimqa ombla bole sqab.”<sup>39</sup> Tamo bei a wain namij uysimqa a olo wain bunuj uyqasai. Di kiyaaqa? A marqas, ‘Namij di bole.’”

## 6

### *Yesus a segi yori bati aqa Tamo Koba*

<sup>1</sup> Yori bati bei Yesus aqa angro nanngi ti wau ambleq na giloqnsibqa aqa angro nanngi bem sum gei elenqnsib ban na ñoqoryoqnsib uye uye giloqñeb.”<sup>2</sup> Nanngi degsib gileqñabqa Farisi qudei nanngi bosib nanngi unjrsib minjreb, “Ninngi kiyaaqa kumbra degyeqñub? Yori bati qa kumbra degyo di getento koba.”<sup>3</sup> Onaqa Yesus na kamba Farisi nanngi minjrej, “Nami Devit aqa wau tamo nanngi ti mamñjrnaqa kumbra yeb qaji di ninngi buk miligiq di sisiyosai kiyoo? <sup>4</sup> Devit a atra tal miligiq gilsiqqa Qotei atraiyqajqa bem uysiqqa aqa wau tamo nanngi dego anainjrnaq uyeb. Bem di getento. Di atra tamo nanngo segi uyqajqa bem. Devit a degyej di a dal anjam grotej. Ariya a Qotei aqa ñangalaq di une saiqoji. Ninngi anjam di sisiyosai kiyoo?”<sup>5</sup> Osiqa minjrej, “E Tamo Angro. Deqa e segi na yori bati taqatejunum. E segi yori bati aqa Tamo Koba.”

### *Yori bati qa Yesus a tamo ban qandamyey qaji di boletej*

<sup>6</sup> Olo yori bati bei Yesus a Juda nanngo Qotei tal miligiq gilsiqqa Qotei aqa anjam plaltosiq minjroqñej. Qotei tal miligiq di tamo bei ban wo qandamyey qaji a soqñej.”<sup>7</sup> Onaqa dal anjam qalie tamo nanngi ti Farisi nanngi ti Yesus koqyoqñeb. Nanngi are qaleb, “Yesus a yori bati qa tamo di boletqas kiyoo? Yimqa minjqom, ‘Ni na yori bati grotonum.’” Deqa nanngi Yesus koqyoqñeb.”<sup>8-9</sup> Onaqa Yesus a nanngo areqalo di qalieosiqqa tamo ban qandamyey qaji di minnej, “Ni tigelosim gago ambleq au.” Degsi minjnaqa a tigelosiq nanngo ambleq bonaqa Yesus na

Farisi nanġi minjrej, “E niġi anjam bei nenemngwai. Iga yori bati qa kumbra bole yqom kiyo kumbra uge yqom kiyo? Tamo bei a padalqa laqnimqa iga na aqaryaiyonam bole sqas di kere kiyo iga a uratonam padalqas di kere kiyo? Dal anjam a kiyersi marqo?”<sup>10</sup> Yesus na nanġi kalil degsi minjrsiq koqnrjsiq tamo baġ qandamyej qaji di minjej, “Ni ino baġ waiy.” Degsi minjnaqa aqa baġ waiyonaq boleej.<sup>11</sup> Onaqa Farisi nanġi Yesus aqa kumbra di unsibqa minjin oqetnjrnaqa nanġi Yesus kiyeryqajqa deqa qairoqneb.

*Yesus na aqa anġro 12 nanġi giltnjrej*

<sup>12</sup> Bati deqa Yesus a segi Qotei pailyqa marsiq manaq oqej. Manaq oqsic dia Qotei pailyeqnaqa nebeej.<sup>13</sup> Nebeonaqa Yesus na tamo kalil a dauryosib laqneb qaji nanġi metnjrnaqa aqa areq bonabqa nanġo ambleq dena anġro 12 giltnjrej. Nanġi a ombla sosib aqa anjam mare mare laqajqa deqa giltnjrej.<sup>14</sup> Nanġo ñam agiende. Bei Saimon. Yesus na aqa ñam bei Pita waiyej. Nanġi aqa was Andru wo. Bei Jems. Nanġi aqa was Jon wo. Bei Filip. Bei Bartolomyu.<sup>15</sup> Ariya Matyu Tomas wo. Bei Alfias aqa ñiri Jems. Bei Saimon agi Rom nanġi winjrqaqqa maroqnej qaji.<sup>16</sup> Ariya bei Jems aqa ñiri Judas. Bei Judas Iskariot agi bunuqna Yesus osiq jeu tamo nanġo baġq di atej qaji.

*Yesus na tamo unġasari gargekoba nanġi boletnjroqnej*

<sup>17-18</sup> Onaqa Yesus na aqa anġro nanġi di joqsicqa koba na manaq dena olo aiyej. Aisib sawa guġ dia sonabqa tamo unġasari gargekoba a dauryosib laqneb qaji nanġi bosib aqa anjam quqwjajqa ti a nanġo ma boletetnjrqajqa ti koroeb. Tamo unġasari lanja lanaj gargekoba dego Judia sawa nanġo qure qureq dena ti Jerusalem dena ti Tair qure wo Saidon qure wo nanġo sawa alile jojom dena ti belenej. Bonabqa Yesus a tamo kalil mondor uge uge na ojeleno qaji nanġi boletnjroqnej.<sup>19</sup> Aqa jejamuq na singila gileqnaqa tamo ma ti kalil nanġo ma kobooqnej. Deqa nanġi kalil aqa jejamuq di nanġo baġ atqa maroqnsib baġ waiyoqnsib ojqoneb.

*Tamo yai nanġi tulaġ areboleboleinjrqas?*

<sup>20</sup> Onaqa Yesus a bulosicqa aqa anġro nanġi koqnrjsicqa endegsi minjrej,

“Niġi bini sougetejunub qaji bunuqna Qotei a nuġo Mandor Koba sosim niġi taqatngwas. Deqa niġi tulaġ areboleboleinjwas.

<sup>21</sup> “Niġi bini mam unub qaji bunuqna kere na sqab. Deqa niġi tulaġ areboleboleinjwas.

“Niġi bini akam ti unub qaji bunuqna akam uratosib olo kikiqab. Deqa niġi tulaġ areboleboleinjwas.

22-23 “Ninggi e Tamo Angro daurbegqub deqa bunuqna tamo qudei na ningi jeutnjoqnsib misilingoqnsib nunjo ñam ugeugeiyoqngab. Nami nanjo moma nanji na Qotei aqa medabu o qaji tamo nanji degsib ugeugeinjroqneb. Nanji ningi ugeugeinjibqa, di unjum, ningi tulan areboleboleingem. Ningi quiy. Nunjo awai bole agi lan goge di unu. Bunuqna ningi oqsib awai di itqab.

24 “Ariya ningi bini ñoro koba ti unub qaji ningi ñam atoqniy. Nunjo are boletetngwajqa ingi ingi agi ningi mandamq endi ekritonub deqa bunuqna ningi gulbe koba oqab.

25 “Ninggi bini ingi qa kere na unub qaji ningi dego ñam atoqniy. Bunuqna ningi mam oqab.

“Ninggi bini kiekequb qaji ningi dego ñam atoqniy. Bunuqna ningi are ugeingim akam ti sqab.

26 “Tamo kalil nanji na nunjo ñam soqtetngwab di uge. Deqa ningi ñam atoqniy. Nami nanjo moma nanji na dego gisan anjam maro tamo nanjo ñam soqtetnjroqneb.

*Ninggi nunjo jeu tamo nanji qa bole oqnsib gereinjroqniy*

27 “Ninggi ijo anjam endi quequb qaji e na olo endegsi merngwai. Tamo qudei na ningi jeutnjoqnbqa ningi kamba olo nanji jeutnjraib. Ningi nanji qa bole oqnsib qalaqalainjroqniy. 28 Tamo qudei na ningi misilingoqnbqa ningi kamba olo nanji misilinjraib. Ningi anjam bole bole minjroqniy. Tamo qudei na ningi ugeugeingqnbqa ningi kamba olo nanji ugeugeinjraib. Ningi nanji qa Qotei pailyoqniy. 29 Tamo bei na ula ponmimqa belosim waliqe bei osoryimqa ponyem. Tamo bei a ino gara jugo yaimimqa ni na saidyaim. Olo ino gara jugo bei dego ye. 30 Tamo bei na ino ingi bei yaimqajqa mermimqa ye. Yosim a na kamba olo ni emqajqa minjaim. 31 Kumbra bole bole tamo nanji na ningi engwajqa arearetngqnu qaji di ningi na olo nanji enjroqniy.

32 “Tamo ungasari ningi qa boleequb qaji nanji qa segi ningi kamba bole oqngab di kumbra bolesai. Dal anjam gotranjo qaji tamo nanji dego kumbra degyequb. 33 Tamo ungasari ningi geregereingqub qaji nanji segi ningi na kamba geregereinjroqngab di kumbra bolesai. Dal anjam gotranjo qaji tamo nanji dego kumbra degyequb. 34 Ningi na tamo qudei nanji ingi bei enjrqa osibqa nanji kamba olo ningi engwajqa minjrsib ingi enjrqab di kumbra tulan bolesai. Dal anjam gotranjo qaji tamo nanji dego kumbra degyequb. 35 Deqa ningi ijo anjam endi quiy. Tamo qudei na ningi jeutnjoqnbqa ningi kamba olo nanji jeutnjraib. Ningi nanji qa bole oqnsib nanji qalaqalainjroqniy. Osib ingi bole bole enjroqnsib nanji na kamba olo ningi engwajqa minjroqnaib. Ningi kumbra degyqab di ningi Qotei Goge Koba aqa angro

bole sosib awai tulan boledamu oqab. Niŋgi qalie, tamo unŋasari kumbra uge uge yoqnsib Qotei binjyqa urateqnu qaji naŋgi di Qotei na kamba kumbra uge uge enjrosaieqnu. A na naŋgi olo kumbra bole bole enjreqnu. Deqa niŋgi dego Qotei aqa kumbra di dauryosib tamo bole ti tamo uge ti naŋgi turtnjroqnsib kumbra bole bole enjroqniy. Niŋgi kumbra degyqab di niŋgi Qotei aqa angro bole sqab. <sup>36</sup> Nunŋo Abu a tamo naŋgi qa duleqnu deqa niŋgi dego Qotei aqa kumbra di dauryosib tamo naŋgi qa duloqniy.

*Niŋgi na tamo qudei naŋgi peginjraib*

<sup>37</sup> “Niŋgi na tamo qudei naŋgi peginjraib. Niŋgi peginjrasai di Qotei a kamba dego niŋgi peginŋwasai. Niŋgi na tamo qudei naŋgo jejamuq di une qametnjraib. Yimqa Qotei a kamba dego nunŋo jejamuq di une qametnŋwasai. Niŋgi na tamo naŋgo une kalil taqal atetnjroqniy. Yimqa Qotei a dego nunŋo une kalil taqal atetnŋoqniqas. <sup>38</sup> Niŋgi na tamo naŋgi lueinjroqnsib inŋi inŋi enjroqniy. Yimqa Qotei a kamba dego niŋgi lueinŋoqnsim inŋi inŋi enŋoqniqas. Osim inŋi inŋi tulan koba enŋoqnsim nunŋo mogomq di bilentoqnimqa ojqa keresainŋoqnimqa bilenŋoqnsib dobulq aiyonqab. Niŋgi tamo naŋgi kumbra enjroqniqab kere dego Qotei a kamba niŋgi kumbra enŋoqniqas.” Yesus na aqa angro naŋgi anjam degsi minjrej.

<sup>39</sup> Osiqa Yesus a olo yawo anjam bei endegsi minjrej, “Tamo bei ŋam qandimo unu qaji a na tamo bei dego ŋam qandimo unu qaji di gam osoryqa keresai. A na aqa baŋ ojsim ombla walwelqab di ombla maŋgalsib subq aiqab. <sup>40</sup> Skul angro na aqa qalie tamo a bunyqa keresai. A kobaqujaosimqa di aqa qalie tamo ombla kerekereqab.

<sup>41</sup> “Kiyaqa ni ino was aqa ŋamdamuq di ŋam ŋeŋgi kiŋala unu di unsimqa ino segi ŋamdamuq di ŋampaŋ kobaquja unu di ni unosai? <sup>42</sup> Kiyaqa ino segi ŋamdamuq di ŋampaŋ kobaquja soqniqas ni na tentosim ino was minjqam, ‘Was, e ino ŋamdamuq di ŋam ŋeŋgi kiŋala unonum di osiy taqal waiyetmqai?’ Kiyaqa ni degsi minjqam? Kiyaqa ŋampaŋ kobaquja ino segi ŋamdamuq di unu qaji di ni unosai? Ni gisaŋ tamo. Ni mati ŋampaŋ kobaquja ino segi ŋamdamuq di unu qaji di taqal waiyosim ŋamdamu suwanmimqa ariya degam ŋam ŋeŋgi kiŋala ino was aqa ŋamdamuq di unu qaji di geregere unsim taqal waiyete.”

*Ŋam uge naŋgi gei uge ateqnu*

<sup>43</sup> Osiqa Yesus a olo marej, “Ŋam bole naŋgi gei bole ateqnu. Naŋgi gei uge atosaieqnu. Ŋam uge naŋgi gei uge ateqnu. Naŋgi gei bole atosaieqnu. <sup>44</sup> Deqa tamo naŋgi

nam aqa gei unsibqa dena nanġi poinjrqa, ‘Nam di bole. Nam di uge.’ Niġi maġ luwit mariġq dena qura gei osib uyo-saieqnu. Sil luwit mariġq dena wain gei osib uyosaieqnu. <sup>45</sup> Dego kere tamo bole nanġo are miligiq di areqalo bole na maqejunu. Deqa nanġi kumbra bole yeqnu. Ariya tamo uge nanġo are miligiq di areqalo uge na maqejunu. Deqa nanġi kumbra uge yeqnu. Tamo nanġo areqalo kalil nanġo are miligiq na oqoqnsiq medabuq na branteqnu.”

*Yesus a tal gereiyo kumbra qa yawo anjam marej*

<sup>46</sup> Osiqa Yesus a olo marej, “Kiyaqa niġi ‘O Tamo Koba, O Tamo Koba’ e degsib metboqnsib olo ijo anjam dauryo-saieqnu? <sup>47-48</sup> Niġi quiy. Tamo uŋasari nanġi ijoq bosib ijo anjam qusib dauryqab di nanġi tal gereiyo tamo bul sqab. Tal gereiyo tamo di a tal utru atqa osiqa tal ai sub bogelenosiq guma koba aiyelenosiq meniġ itelenej. Bunuqna awa koba bosimqa ya meli dosim tal di qamsim putqasai. Singila na tigelesqas. Di kiyaqa? A meniġ quraq di tal atej deqa. <sup>49</sup> Ariya tamo uŋasari nanġi ijo anjam qusib olo dauryqa uratqab di nanġi tamo bei laġa sub gogeq di aqa tal atej qaji a bul sqas. Tal atnaq sonaqa awa koba bosiq ya meli dosiqa tal di qamsiq reŋiŋtosiq putonaq aisiq tulaġ niñaqej.”

## 7

*Yesus na qaja tamo gate bei aqa kaŋgal tamo boletej*

<sup>1</sup> Yesus a anjam kalil degsi marnaqa tamo uŋasari nanġi qunabqa a nanġi uratnjrsiqa Kaperneam qureq aieej. <sup>2</sup> Dia qaja tamo gate bei soqnej. A Rom tamo. Aqa kaŋgal tamo a tulaġ qalaqalaiyoqnej qaji di makobaiyosiq moiqa laqnej. <sup>3</sup> Deqa tamo qudei na qaja tamo gate di minjeb, “Yesus a bqo Kaperneam endi unu.” Degsi minjnab quej. Qusiqa Juda gate qudei nanġi Yesus minjib bosim aqa kaŋgal tamo boletqajqa deqa qarinjrnac gileb. <sup>4</sup> Gilsib Yesus itosib singila na pailyosib minjeb, “O Tamo Koba, ni iga uratgaim. Qaja tamo gate di a tamo bolequja. <sup>5</sup> A Juda kalil nanġi qa tulaġ boleqnsiqa gaigai geregereinjreanu. Agi a na gago Qotei tal gereiyej.”

<sup>6</sup> Nanġi degsib Yesus minjnab qusiqa tigelosiq nanġi daunjrsiq koba na aiyeb. Aisib tal jojomyqa laq nabqa qaja tamo gate dena aqa was qudei nanġi olo qarinjrnac gilsib gamq di Yesus turosib minjeb, “O Tamo Koba, gago was a marqo, ‘Uŋum, ni laġa waukobaaim. E tamo bolesai deqa ni ijo talq baim. <sup>7</sup> E dego ino areq bqo keresai. Deqa ni anjam segi marimqa ijo kaŋgal tamo a boleqas. <sup>8</sup> E dego tamo kokba qudei nanġo sorgomq di unum. Ijo qaja tamo nanġi ijo sorgomq di unub. E bei minjqai, “Ni gile.” Yimqa a gilqas. Bei

minjqai, “Ni au.” Yimqa a bças. Ijo kanğal tamo bei minjqai, “Wau di ye.” Degsi minjitqa a ijo anjam dauryqas.’ ”

<sup>9</sup> Onaqa Yesus a anjam di qusiqa tulan prugugetej. Osiqa bulosiq tamo unğasari gargekoba a dauryoqneb qaji nanğı minjrej, “E ningi endegsi mernğwai. Qaja tamo gate di a e qa aqa areqalo tulan singilatqo. Israel tamo nami e qa degsi aqa areqalo singilato qaji bei unosai.” <sup>10</sup> Onaqa qaja tamo gate aqa was nanğı a na qarınjrej qaji nanğı olo puluosib aqa talq gilsib kanğal tamo di a boleosiğ sonaq uneb.

*Yesus a unğa qobul bei aqa ħiri moiyej qaji di olo tigeltej*

<sup>11</sup> Olo bati bei Yesus a qure beiq aiyej. Qure di aqa ñam Nain. Tamo unğasari gargekoba nanğı Yesus aqa anğro ti koba na aiyeb. <sup>12</sup> Yesus a qure polomq di branteqnaqa tamo bei nami moiyej qaji a subq atqajqa qoboiyosib giloqneb. Tamo di aqa ai qobulej. Aqa anğro qujai bole qujai agi a segi. Anğro di qoboiyosib gileqnaqqa tamo unğasari tulan gargekoba qure dia soqneb qaji nanğı unğa di koba na walwelosib giloqneb. <sup>13</sup> Onaqa Tamo Koba a unğa di unsiqa a qa tulan dulosiqa minjej, “Ni akamaim.” <sup>14</sup> Degsi minjsiq walwelosiq bañ waiyosiq kulum anğro jigeğ qaji di ojnaqa tamo nanğı a qoboiyosib giloqneb qaji tigeleb. Onaqa Yesus na anğro moiyej qaji di minjej, “O anğro, e ni mermqai, ni tigel.” <sup>15</sup> Degsi minjnaqa a tigelosiq awoosiq anjam maroqnej. Onaqa Yesus na a bañ ojsiqqa osi gilsiqqa aqa ai yej. <sup>16</sup> Onaqa tamo unğasari kalil qure dia soqneb qaji nanğı Qotei aqa mañwa di unsibqa nanğı tulan prugugetosib Qotei aqa ñam soqtosib maroqneb, “Bole, bini Qotei aqa medabu o qaji tamo kobaquja a gago ambleq endi brantqo. Qotei na aqa segi tamo unğasari nanğı aqaryainjrğajqa deqa tamo di qarınjyqo bqo.” <sup>17</sup> Yesus a mañwa di yonaqa tamo unğasari nanğı unsib deqa mare mare laqnağ Judia sawaq di, sawa bei beiq di nanğı quekriteb.

*Jon yansnjro qaji aqa anğro aiyel nanğı anjam bei Yesus nenemyeb*

<sup>18</sup> Jon aqa anğro nanğı mañwa kalil Yesus a yoqnej qaji deqa Jon saiyeğ. <sup>19</sup> Saiyonab Jon na aqa anğro aiyel nanğı metnjrnaq aqa areq bonabqa minjrej, “Ningı Tamo Koba aqa areq gilsib endegsib nenemyiy, ‘Kristus agi Qotei na nami qarınjim bqajqa marej qaji di ni kiyo? Ni saiamqa iga tamo bei qa tariñqom kiyo?’ ” <sup>20</sup> Jon na nanğı aiyel degsi minjrsiq qarınjrnaqa Yesus aqa areq gilsib minjeb, “Jon yansnjro qaji a na iga qarınğwoqa inoq bonum. A ni endegsi nenemmqo, ‘Kristus agi Qotei na nami qarınjim bqajqa marej qaji di ni kiyo? Ni saiamqa iga tamo bei qa tariñqom kiyo?’ ”

21 Bati deqa Yesus na tamo ungasari tulan gargekoba ma utru segi segi nanngi ti tamo nanngo jejamu mondor uge uge na ojeleno qaji nanngi ti boletnjroqnej. Tamo nam qandimo gargekoba dego boletnjreqnaqa nam poinjroqnej. 22 Deqa Yesus a tamo aiyel Jon na qarinjnjrej qaji nanngi di minjrej, “Ninngi aisib kumbra ninngi uneqnub qaji deqa ti anjam ninngi queqnub qaji deqa ti Jon saiyosib minjiy. Endegsib minjiy, ‘Tamo nam qandimnjro qaji nanngi olo nam poinjreqnaqa sawa uneqnub. Tamo jejamu lainjro qaji nanngi olo walweleqnub. Tamo nanngo jejamu yu na ugeeleno qaji nanngo yu kalil koboeqnu. Tamo dabkala getenjnjro qaji nanngo dabkala olo waqeqnu. Tamo moreno qaji nanngi olo tigeleqnub. Tamo sougetejunub qaji nanngi Qotei aqa anjam bole queqnub. 23 Tamo nanngi e qa nanngo areqalo singilatoqnsib olo ijo nam ulontosaieqnub qaji nanngi tulan areboleboleinjreqnu.’”

24 Onaqa Jon aqa angoro aiyel nanngi Yesus aqa anjam di qusibqa nanngi olo puluosib Jon minjqajqa aiyeb. Aiyeqnabqa Yesus na tamo ungasari gargekoba a ombla soqneb qaji nanngi Jon qa endegsi minjrej, “Ninngi tamo kiyero unqajqa wadau sawaq gileb? Ninngi tamo silai aqa banqa bul jagwa na pileteqnaqa di unqajqa gileb kiyo? Sai. Jon a tamo deqaji sai. 25 Deqa ninngi tamo kiyero unqajqa wadau sawaq gileb? Ninngi tamo gara bole walaosi laqnu qaji di unqajqa gileb kiyo? Di dego sai. Tamo gara bole walaoqnsib noro koba ti unub qaji nanngi mandor kokba nanngo talq di unub. 26 Deqa ninngi tamo kiyero unqajqa wadau sawaq gileb? Ninngi Qotei aqa medabu o qaji tamo bei unqajqa gileb kiyo? Od. Agide. Ninngi deqa unqa gileb. Deqa e ninngi endegsi merngwai. Jon a Qotei aqa medabu o qaji tamo kobaquja. A na Qotei aqa medabu o qaji tamo kalil nanngi tulan bunjnjrejunu. 27 Agi nami e mandamq aiyosaisanamqa Qotei a Jon qa endegsi merbej, ‘Ni que. E na ijo anjam maro tamo qarinyitqa a ni qa namoosim ino gam gereiyetmqas.’ Tamo di agi Jon. Anjam di Qotei aqa nenngrenq di unu. 28 Deqa e bole merngwai. Jon yansnjro qaji a na tamo kalil mandamq endi unub qaji nanngi tulan bunjnjrejunu. Ariya tamo qudei nam saiqoji unub qaji nanngi Qotei na taqatnjroqnsiqa nanngo Mandor Koba unu deqa nanngi olo Jon tulan bunyejunub.”

29 Onaqa tamo ungasari nanngi ti takis o qaji tamo nanngi ti anjam di qusib mareb, “Bole. Qotei aqa kumbra kalil di bole tinjtinj.” Nanngi degsib mareb. Di kiyaaqa? Nanngi nami are bulyonab Jon na yansnjrej deqa. 30 Ariya Farisi nanngi ti dal anjam qalie tamo nanngi ti Jon na yansnjrqqa urateb deqa nanngi gam bole Qotei na osornjrej qaji di qoreiyeb.

31 Onaqa Yesus a olo marej, “Tamo ungasari bini bati endeqa



unub qaji nanjo kumbra qa e yawo anjam kiyersiy marqai?  
<sup>32</sup> E nanjo kumbra qa endegsi marqai. Nanji angro du du bul  
 qure ambleq di alanoqnsib angro qudei na qudei minjreknub,  
 'Iga yumba anjamonumqa ninji lou tuosai. Iga are uge qa  
 louonumqa ninji akamosai.' ” <sup>33</sup> Osiqa Yesus a olo marej, “Jon  
 yansnjro qaji a bosiqqa inji ti wain ti uratosiq sonaqa ninji  
 a qa mareknub, 'A mondor uge ti unu.' ” <sup>34</sup> Ariya e Tamo  
 Angro bosimqa inji ti wain ti uyeqnamqa ninji e nubognsib  
 mareknub, 'Ninji uniy. Yesus a qunjan ani. A wain uyo ani. A  
 takis o qaji tamo ti une tamo ti nanji koba na walweleknub.' ”  
<sup>35</sup> Osiqa Yesus a olo marej, “Qotei aqa tamo ungasari nanji bole  
 qalieeknub, aqa powo tulan kobaquja.”

*Unja bei a gorenj quleq ti osiq Yesus aqa sinja liyoqnej*

<sup>36</sup> Bati bei Farisi tamo bei aqa nam Saimon a Yesus minjej,  
 “Ni ijo talq bamqa aqo ombla inji uyqom.” Onaqa Yesus a  
 Saimon odyosiqqa aqa talq gilsiqqa Saimon ombla awoosib inji  
 uyoqneb. <sup>37-38</sup> Onaqa sambala unja bei qure dia soqnej qaji a  
 anjam endegsi quej, “Yesus a Saimon aqa talq di sosiqqa inji  
 uyeqnu.” A anjam degsi qusiqqa gorenj jalinja quleq ti osiqqa  
 Saimon aqa tal miligiq gilsiq Yesus aqa qoreq na bosiqqa aqa  
 sinja jomq di tigelosiq akamej. Akamonaqa aqa nam ya  
 Yesus aqa sinjaq ainaqa sinja tombol na awoosiqqa aqa nam ya  
 sinjaq aiyej qaji di aqa segi gate banja na piyoqnsiqqa Yesus  
 aqa sinja kundoqyoqnsiqqa gorenj quleq ti dena Yesus aqa  
 sinja liyoqnej.

<sup>39</sup> Unja a kumbra di yonaqa Saimon a unsiqqa are qalej,  
 “Yesus a Qotei aqa medabu o tamo unu qamu unja endi bosiq  
 aqa jejamu ojjo qaji di sambala unja a degsi poiyoq qamu.”

<sup>40</sup> Onaqa Yesus a Saimon aqa areqalo di qalieosiqqa minjej,  
 “Saimon, e ni anjam bei mermqai.” Onaqa Saimon na minjej,  
 “O Qalie Tamo, ni mare.” <sup>41</sup> Onaqa Yesus na yawo anjam  
 endegsi Saimon minjej, “Tamo aiyel na tamo bei silali yaiyeb.  
 Bei na 100 kina yaiyej. Bei na 10 kina yaiyej. Yaiyonabqa  
 minjrej, 'Bunuqna ninji na kamba silali di olo e ebqab.' ”

<sup>42</sup> Ariya bunuqna nanji aiyel na kamba silali di a olo yqa  
 keresai deqa a na nanji aiyel minjrej, 'Unqum, ninji na silali  
 di olo ebai. Uratiy.' Degsi minjrej. Deqa Saimon, ni merbe,  
 tamo yai a tamo deqa tulan are boledamuiyqas? Tamo 100  
 kina yaiyej qaji a kiyo tamo 10 kina yaiyej qaji a kiyo?”

<sup>43</sup> Onaqa Saimon na minjej, “E are qalonum, tamo 100 kina  
 ej qaji a tamo deqa tulan are boledamuiyqas.” Onaqa Yesus  
 na Saimon minjej, “Ni kere maronum.”

<sup>44</sup> Osiq bulosiqqa sambala unja di areiyosiqqa Saimon minjej,  
 “Ni unja endi unime. E ino tal miligiq gilonumqa ni ijo sinja  
 yansetbosai. Ariya unja endi a bosiqqa aqa nam ya na ijo

sinğa yansetbosiqa aqa gate banğa na ijo sinğa piyqo. <sup>45</sup> E ino tal miligiq gilonumqa ni e kundoqbosai. Ariya uña endi a bosiqqa ijo sinğa kundoqyoqnaj agi kundoqyoqnsiq unu. <sup>46</sup> Ni na ijo gate goreñ na liyosai. Ariya uña endi a goreñ boledamu quleq ti osi bosiqqa dena ijo sinğa liyqo. <sup>47</sup> Deqa Saimon, e ni mermqai. Sambala uña endi aqa une tulañ gargekoba. E na aqa une kalil kobotetonum deqa a e qa are tulañ boledamuiyqo. Ariya e na tamo bei aqa une quja quja segi kobotetqai di a e qa are bolekiñalayqas.” <sup>48</sup> Osiqa uña di minjej, “Ino une kalil e na kobotetmonum.” <sup>49</sup> Onaqa tamo nañgi Yesus koba na awoosib inği uyoqneñ qaji nañgi aqa anjam di qusibqa segi segi maroqneñ, “Yesus a tamo kiyero deqa a na tamo nañgo une kobotetnjreñnu?” <sup>50</sup> Onaqa Yesus na uña di minjej, “Ni ino areqalo e qa sinğilattonum deqa Qotei na ni oqo. Deqa ni are lawo na gilime.”

## 8

### *Uñgasari qudei nañgi Yesus dauryosib koba na walweloqneñ*

<sup>1</sup> Bati bei Yesus a walweloqsiqa qure kokba ti qure kiñilala ti dia brantoqnsiqqa Qotei a tamo uñgasari nañgo Mandor Koba sosim nañgi taqatnjrqas anjam bole di minjre minjre laqnej. Tamo 12 Yesus na giltnjrej qaji nañgi a ti walweloqneñ. <sup>2</sup> Uñgasari qudei nami nañgo jejamuq dena Yesus na mondor uge uge winjrej qaji nañgi ti uña qudei nami mainjrnaqa Yesus na boletnjrej qaji nañgi ti Yesus dauryosib koba na walweloqneñ. Uña bei aqa ñam Maria. A Makdala qure qaji. Nami mondor uge 7 nañgi aqa jejamuq di sonabqa Yesus na winjretej. <sup>3</sup> Uña bei aqa ñam Joana. A Kusa aqa ñaun. Kusa a Mandor Herot aqa tal taqatoqnej qaji. Uña bei aqa ñam Susana. Uñgasari gargekoba nañgi dego Yesus dauryoqneñ. Nañgi nañgo segi silali na Yesus aqa anğro nañgi ti inği awaiyetnjroqneñ.

### *Yesus a saga yago qa yawo anjam marej*

<sup>4</sup> Bati deqa tamo uñgasari tulañ gargekoba nañgi qure qure kalilq dena bosib Yesus aqa areq di koroonañqa a tigelosiqa yawo anjam endegsi minjrej, <sup>5</sup> “Tamo bei a saga yago osiq aqa inği wauq di breiyej. Breiyonaqa saga yago qudei gam qalaq aiyeleneb. Ainabqa tamo qudei nañgi walwelosib saga yago di soselenonabqa qebari nañgi bosib uyekriteb. <sup>6</sup> Saga yago qudei mandam lanjaq di aiyeleneb. Mandam di guma meniñ ti. Gogeq di mandam kiñala. Deqa saga yago aiyelenosib urur oqoqujateb. Onaqa mandam olo kangrañonaq saga yago laosib moreñeb. <sup>7</sup> Saga yago qudei sil luwit ambleq di aiyeleneb. Dena oqeb qaji sil luwit na dego dauryosiq

oqsiq kabutnjrnaq geitosai. <sup>8</sup> Saga yago qudei mol mandam boledamuq di aiyeb. Di aisib oqoboledamuyosib gei tulan gargekoba ateb. 100 dego.” Yesus na tamo ungasari nanngi yawo anjam degsi minjrsiq koboonaqa a tulan lelenosiq marej, “Tamo a dabkala ti sqas di a ijo anjam endi gegerere quem.”

*Yesus a kiyaaqa tamo ungasari nanngi yawo anjam minjroqnej?*

<sup>9</sup> Onaqa Yesus aqa angro nanngi aqa yawo anjam di qusi-bqa nanngi anjam aqa utru gegerere qalieqajqa deqa Yesus nenemyeb. <sup>10</sup> Nenemyonabqa a na kamba endegsi minjrej, “Qotei na aqa segi tamo ungasari nanngi taqatnjrsim nanngo Mandor Koba sqas. Anjam di aqa utru uliejunu. Di Qotei na babtinqa ijo angro ninngi segi utru qalieqab. Ariya tamo ungasari lanaj nanngi yawo anjam segi minjroqnqai. Deqa nanngi nam atoqnqab di nanngi ijo anjam aqa damu unqasai. Nanngi dab atoqnqab di nanngi ijo anjam aqa utru poinjrqsai.”

*Saga yago qa yawo anjam aqa utru Yesus na babtej*

<sup>11</sup> Osiqa Yesus a olo marej, “Saga yago qa yawo anjam maronum di aqa utru e na babbittqa ninngi quiy. Saga yago di Qotei aqa anjam. <sup>12</sup> Saga yago qudei gam qalaq aiyeb qaji di aqa utru endegsi unu. Tamo qudei nanngi Qotei aqa anjam qusib nanngo are miligiq di atib soqnimqa Satan a bosim anjam di olo yainjrqsas. Yim nanngi Qotei aqa anjam nanngo areqaloq di singilatqa keresai. Deqa Qotei a nanngi elenqasai. <sup>13</sup> Saga yago qudei mandam lanjaq di aiyeb qaji di aqa utru endegsi unu. Tamo qudei nanngi Qotei aqa anjam qusib tulan areboleboleinjrimqa anjam di oqujatosib nanngo areq atqab. Ariya anjam di nanngo are miligiq tulan guma aiyosai. Deqa sokiñala gulbe bei bei nanngoq bamqa nanngo areqalo Yesus qa singilateqnbub qaji di nanngi olo ulontqab. <sup>14</sup> Saga yago qudei sil luwit ambleq di aiyeb qaji di aqa utru endegsi unu. Tamo qudei nanngi Qotei aqa anjam quqwab. Ariya bunuqna nanngo segi jejamu qa ulaqajqa ti ñoro koba oqajqa ti mandam qa ingi ingi qa areboleboleinjrqajqa ti kumbra dena anjam bole nanngo are miligiq di unu qaji di tentim loumqas. Saga yago uge nanngi gei bole atosaiqnbub dego kere. <sup>15</sup> Saga yago qudei mol mandam boledamuq di aiyeb qaji di aqa utru endegsi unu. Tamo qudei nanngi Qotei aqa anjam qusib ojsib dauryoqnqab. Nanngo are miligi bolequja deqa nanngi singila na tigelesosib gulbe qoboiyoqnqab. Saga yago bole nanngi gei bole atelenqnbub dego kere.”

*Tamo bei a lam qatrentosim kulum miligiq jugwasai*

<sup>16</sup> Osiqa Yesus a olo marej, “Tamo bei a lam qatrentosim web na kabutqsai. A bijal surumq di atqasai. Boleq di

gaintim warum suwanamqa tamo ungasari nanği tal miligiq gilsib warum geregere unqab. <sup>17</sup> Dego kere kumbra kalil uliejunu qaji di olo boleq dqas. Inği inği kalil kabuejunu qaji di dego olo boleq dimqa tamo ungasari nanği unsib utru qalieqab.

<sup>18</sup> “Deqa ninği ijo anjam geregere qusib poingem. Tamo a powo ti sqas di Qotei na powo olo yimqa a powo koba oqas. Ariya tamo a powo ti sqasai di powo kiñala aqaq di unu qaji di Qotei na olo yayimqa a laña sqas. Tamo di a marqas, ‘E powo ti.’ Di sai. A powo saiqoji.”

*Tamo yai nanği Yesus aqa was bole? Tamo yai nanği Yesus aqa ai bole?*

<sup>19</sup> Onaqa Yesus aqa was nanği aqa ai koba na Yesus aqaq bosib talq di iteb. Itosib tamo ungasari gargekoba siranmeq di jujuneb deqa nanği aqa areq gilqa keresainjrej. <sup>20</sup> Deqa tamo qudei na Yesus minjeb, “Ino was nanği ino ai ombla na ni numqa bonub agi oqeq di tigelejunub.” <sup>21</sup> Onaqa Yesus na kamba minjrej, “Tamo ungasari Qotei aqa anjam qusib dauryeqnub qaji nanği ijo ai bole. Nanği ijo was bole dego.”

*Yesus a jagwa ti ya korkor ti anjam minjrnaq laeb*

<sup>22-23</sup> Bati bei Yesus aqa angro nanği ti qobun bei gogetosibqa Yesus na minjrej, “Iga ya agu taqal beiq gilqom.” Degsi minjrnsiqa nanği koba na qobun na gileqnabqa Yesus a urnamyonaqa qobun miligiq di ñeisiq qambumtej. Onaqa jagwa koba tigelosiq ya korkortosiqa qobun qaloqn-siqa morman miligiq aieyqnaqa ya maqonaqa qobun tugwa laqnej. <sup>24</sup> Deqa Yesus aqa angro nanği tulan ulaugetosib aqa areq bosib dudumyosib minjeb, “O Tamo Koba, iga padalqa laqnum.” Degsi minjnabqa Yesus a nanngo anjam di qusiqa qutuosiqa tigelej. Tigelosiqa jagwa ti ya ti singila na minjrej, “Ninği laoiy.” Onaqa jagwa ti ya ti laosib tulan maninej. <sup>25</sup> Onaqa Yesus na aqa angro nanği minjrej, “Ninği kiyaaqa e qa nunngo areqalo singilatosai?” Degsi minjrnaqa nanği tulan ulaugetosib segi segi maroqneb, “Yesus a tamo kiyero deqa jagwa ti ya ti minjrqaqa aqa anjam qusib laonub?”

*Yesus a tamo bei aqa jejamuq na mondor uge gargekoba winjretej*

<sup>26</sup> Onaqa Yesus aqa angro nanği ti Galili sawa uratosib ya agu ambleq na potosib qobun na gilsib Gerasa sawaq di tiryeb. <sup>27</sup> Tiryosib Yesus a mandamq ainaqa qure deqaji tamo bei a bosiqqa Yesus itej. Tamo di a mondor uge uge na ojelenjo qaji. A bati gaigai yosi laqnej. A nami koba degsi soqnej. A talq di ñeiosaiqnej. A gaigai tamo sub ato sawaq di ñeioqnej. <sup>28</sup> Deqa a Yesus unsiqa tulan lelenosiqa bosiq Yesus aqa areq

di singa pulutosiqa minnej, “O Yesus, Qotei Goge Koba aqa Niri, ni e kiyerbqa bonum? E ni endegsi mermqai, ni e jaqatin ebaim.”

<sup>29</sup> Mondor uge dena Yesus degsi minnej. Di kiyaaqa? Yesus na singila na minjoqnej, “Ni tamo di uratosim ulanj.” Mondor uge dena bati gargekoba tamo di aqa jejamu ugeugeiyeteqnaqa tamo qudei na ojoqnsib sil kokba na aqa singa ti ban ti tontoqnsib geregere taqatoqneb. Yeqnaqa mondor uge dena sil kokba kukoqyelenjoqnsiqa tamo di oqnsiqa wadau sawaq osi giloqnej.

<sup>30</sup> Deqa Yesus na mondor uge di nenemyej, “Ino ñam yai?” Onaqa minnej, “Ijo ñam Qoto Tamo Gargekoba.” A na Yesus degsi minnej. Di kiyaaqa? Mondor uge tulan gargekoba tamo di aqa jejamuq di soqneb deqa. <sup>31</sup> Onaqa mondor uge nanği singila na pailosib Yesus minjeb, “Ni iga sub guma kobaq di waigaim.”

<sup>32-33</sup> Bati deqa bel tulan gargekoba nanği mana goge dia suwaroqneb. Deqa mondor uge nanği na Yesus minjeb, “Ni iga qarinqimqa iga bel nanžo jejamuq gilelenqom.” Onaqa Yesus a mondor uge nanği odnjrnaqa nanği na tamo di uratosibqa segi segi bel nanžo jejamuq gileleneb. Gilnabqa bel kalil nanği gurgurosib botau dena prugelenosib yaq aisib ya uysib morenej.

<sup>34</sup> Onaqa bel taqatoqneb qaji tamo nanği kumbra di un-sibqa jaraiyosib qure miligiq aisib tamo unğasari kalil nanği sainjroqnsib laqneb. Gamq di dego sainjroqnsib laqneb. <sup>35</sup> Onaqa tamo unğasari nanği kumbra di unqajqa beb. Bosib Yesus aqa areq di koroosib ñam ateb di tamo nami mondor uge ti sosisq yosi laqnej qaji aqa areqalo boleosisq gara tigsisq Yesus aqa singa jojomq di awesonaq uneb. Unsib ulaugetej. <sup>36</sup> Onaqa tamo nanği Yesus aqa manwa di uneb qaji nanği na tamo unğasari nanği sainjreb. Yesus na mondor uge winjrnaq tamo a boleej deqa sainjreb. <sup>37</sup> Yesus a manwa di bajtej deqa tamo unğasari kalil Gerasa sawaq di soqneb qaji nanği tulan ulaugetosib minjeb, “Ni iga uratgosim ulanj.” Onaqa Yesus a qobun gogetosiqa nanği uratnjrsiq aijej. <sup>38</sup> Aiqqa laqnaqa tamo Yesus na mondor uge winjretej qaji a singila na pailosiq minnej, “E ni daurmqai.” Onaqa Yesus na saidyosiq minnej, <sup>39</sup> “Ni olo ino segi qureq gilsim Qotei na kumbra tulan boledamu emqo deqa nanği sainjre.” Onaqa a puluosiq aqa qureq gilsiq Yesus na kumbra tulan boledamu yej deqa tamo unğasari kalil nanği sainjroqnsiq laqnej.

*Unğa bei a Yesus aqa gara ojnaq boletosisq olo anğro moiyej qaji a tigeltej*

<sup>40</sup> Onaqa Yesus a olo qobun gogetosiqa Galili sawaq gilej. Gilsiq qobun tiryonaq mandamq aisiq nam atej di tamo ungasari tulan gargekoba nanqi nami bosib a qa tarijesonab unjrej. Deqa nanqi a unsibqa tulan areboleboleinjrej. <sup>41</sup> Onaqa Qotei tal taqato tamo bei aqa nam Jairus a bosiq Yesus aqa areq di singa pulutosiqa pailyosiq minjej, “Ni ijo talq au.” <sup>42</sup> Degsi minjej. Di kiyaaqa? Aqa angro sebin qujai bole qujai moiqa laqnej deqa. Angro aqa wausau 12.

Onaqa Yesus na Jairus odyosiqa tigelosiq a dauryosiq gileqnaqa tamo ungasari tulan gargekoba nanqi dego nanqi aiyel daurnjrsib jujunosib giloqneb. <sup>43</sup> Gileqnaqnaqa nanjo ambleq di unja bei ma ti soqnej qaji a nanqi daurnjrsiq giloqnej. Unja di nami bai na unej len aiyosiq degsi soqnej wausau 12 uratej. Tamo gargekoba nanqi nami a boletqa yeqnab nanqi keresaiinjroqnej. <sup>44</sup> Deqa a Yesus aqa qoreq na dadauryosiqa ban waiyosiq Yesus aqa gara mutu ojej. Ojnaqa aqa len aiyosiq qaji di koboej. <sup>45</sup> Onaqa Yesus a marej, “Yai na ijo gara ojjo?” Onaqa tamo ungasari kalil nanqi saidonabqa Pita na Yesus minjej, “O Tamo Koba, ni unime. Tamo ungasari tulan gargekoba nanqi ni daurmosib jujunmejunub.” <sup>46</sup> Onaqa Yesus a kamba marej, “E qalieonum, bei na ijo gara ojjoqa singila qudei ijo jejamu uratosiq aqaq gilqo.” <sup>47</sup> Onaqa unja di a are qalej, “E Yesus aqa gara ojonum ijo ma koboqo di ulitqa keresai.” A degsi are qalsiqa are ton-tonyonaqa jingga na bosiq Yesus aqa areq di singa pulutosiq tamo ungasari kalil nanjo namdamuq di aqa kumbra yej qaji di ubtekratej. A Yesus aqa gara ojej deqa ti aqa ma urur koboej deqa ti ubtej. <sup>48</sup> Onaqa Yesus na minjej, “O unja, ni ino areqalo e qa singilatosisim ijoq bonum deqa ino ma agi koboqo. Deqa ni are lawo na gilsim bole soqnime.”

<sup>49</sup> Yesus na unja degsi minjeqnaqa tamo bei a Jairus aqa talq dena bosiq Jairus minjej, “Unjum. Ino angro nami moiqo. Deqa ni Qalie Tamo a laja wau koba yaim. Uratim aiyem.” <sup>50</sup> Degsi minjnaqa Yesus a anjam di qusiqa Jairus minjej, “Ni ulaaim. Ni e qa ino areqalo singilatimqa ino angro a boleosisim nambile sqas.” <sup>51</sup> Osiqa Jairus ombla gilsib Jairus aqa talq di branteb. Brantosib Yesus na tamo ungasari kalil nanqi tal gogetqa saidnjrsiqa angro moiyej qaji aqa ai abu aqa angro qalub agi Pita na Jon na Jems na nanqi segi joqsiqa tal gogeteb. <sup>52</sup> Tamo ungasari kalil nanqi na angro moiyej qaji a akamkoboqneb. Deqa Yesus na minjrej, “Ninji akamaib. Angro di a moiyoasai. A laja nejsiq qambumtejunu.” <sup>53</sup> Degsi minjnaqa nanqi Yesus kikiyeb. Nanqi qalieeb, “Angro a nami moiyoqoletqo.” Degsib qalieosisib deqa Yesus kikiyeb. <sup>54</sup> Onaqa Yesus a warum miligiq gilsiq angro aqa ban ojsiqa

soqtosiq minjej, “O Anġro, ni tigel.” <sup>55</sup> Degsi minjnaqa a olo ħambile osiqa urur tigelej. Onaqa Yesus na aqa ai abu naŋgi minjrej, “Niŋgi iŋgi osib a anaiyiy.” <sup>56</sup> Aqa ai abu naŋgi Yesus aqa maŋwa di unsib deqa naŋgi tulaŋ prugugeteb. Onaqa Yesus na minjrej, “Niŋgi ijo maŋwa endi unonub deqa niŋgi ijo ñam ubtosib tamo qudei minjraib.”

## 9

### *Yesus na aqa anġro 12 naŋgi wau enjrej*

<sup>1</sup> Bati bei Yesus na aqa anġro 12 naŋgi koroinjrasiqa siŋgila enjrej. Naŋgi tamo uŋgasari naŋgo jejamuq dena mondor uge uge winjrqaqqa ti tamo naŋgo ma kobotetnjqajqa ti deqa siŋgila enjrej. <sup>2</sup> Osiqa naŋgi qarinhjrasiqa minjrej, “Niŋgi giloqnsibqa Qotei na aqa segi tamo uŋgasari naŋgi taqatnjrsim naŋgo Mandor Koba sqaq anjam di minjre minjre laqnsibqa naŋgo ma kobotetnjroqniy.” <sup>3</sup> Osiqa olo minjrej, “Niŋgi iŋgi iŋgi osib gilaib. Toqoŋ ojaib. Nunġo qaquŋ aib. Inġi uyo bei osib gilaib. Silali osib gilaib. Gara jugo aiye aiyel aib.” <sup>4</sup> Niŋgi qure bei beiq di brantoqnsibqa tal qujaiq di soqniy. Dena olo tigelqnsib qure beiq giloqniy. <sup>5</sup> Tamo naŋgi niŋgi gereiŋgosaiabqa niŋgi qure di uratqa oqnsib nunġo siŋga tumburum butuyoqniy. Yimqa naŋgi nunġo kumbra di unsib poinjrqaq, ‘Bole, iga kumbra ugetonum.’” <sup>6</sup> Onaqa Yesus aqa anġro 12 naŋgi tigelosib qure qureq giloqnsibqa Yesus aqa anjam bole tamo uŋgasari naŋgi minjre minjre laqnsib naŋgo ma kobotetnjroqneq.

### *Herot a qalieqajqa, “Yesus a tamo yai?”*

<sup>7</sup> Mandor Herot a maŋwa kalil Yesus a yoqnej qaji deqa quej. Qusiqa areqalo kobaiyej. Di kiyaaqa? Tamo qudei naŋgi maroqneq, “Tamo di a Jon yansnjro qaji. A moisiq olo subq na tigelqo.” <sup>8</sup> Onaqa qudei naŋgi maroqneq, “Tamo di a Elaija kiyo olo bqo?” Olo qudei naŋgi maroqneq, “Tamo di a Qotei aqa medabu o tamo naŋgi nami soqneq deqaji bei. A olo subq na tigelqo.” <sup>9</sup> Ariya Herot a segi marej, “Tamo di a Jon sai. Jon agi e na kakro gentem moiyej koboej. Di tamo yai olo bqo? E a qa anjam gargekoba queqnum.” Herot a degsi marsiqa Yesus unqajqa are qalsiq soqnej.

### *Yesus a tamo 5,000 naŋgi iŋgi anainjrej*

<sup>10</sup> Onaqa Yesus aqa anjam maro tamo 12 naŋgi olo bosib aqa areq di koroosibqa kumbra kalil naŋgi yoqneq qaji deqa saiyosib minjoqneq. Minjnabqa Yesus a qusiqa naŋgi joqsiq qure bei ñam Betsaida gileb. <sup>11</sup> Gileqnaqqa tamo uŋgasari naŋgi endegsib queq, “Yesus a Betsaida gileqnu.” Degsib

qusibqa Yesus dauryosib gileb. Dauryosib gileq nabqa unjr-siqa Qotei na aqa segi tamo ungasari nanngi taqatnjrsim nanngo Mandor Koba sqas anjam di minjroqnej. Tamo ungasari ma ti so qaji nanngi dego Yesus dauryosib gileq nabqa a na nanngi kalil boletnjroqnej. <sup>12</sup> Onaqa sen aisiq bilaqtonaqa Yesus aqa angro 12 nanngi aqa areq bosib minjeb, “O Tamo Koba, ni na tamo ungasari nanngi minjrimqa qure qureq gilsib dia ingi uysib nerenqab. Endi wadau sawa. Ingi sai qoji.” <sup>13</sup> Onaqa Yesus na minjrej, “Ninngi na ingi anainjriy.” Degsi minjrnaqa nanngi na kamba minjeb, “Iga ingi sai. Iga bem 5 qe aiyela segi unu. Di keresai. Iga aisim ingi tulan koba awaiyosim tamo ungasari kalil endi nanngi anainjrqom di dego kereqasai.” <sup>14</sup> Nanngi degsib mareb. Di kiyayaqa? Tamo 5,000 soqneb deqa.

Onaqa Yesus a kamba aqa angro nanngi endegsi minjrej, “Ninngi na tamo ungasari nanngi minjribqa qur segi segi 50 awoelenqab.” <sup>15</sup> Onaqa Yesus aqa angro nanngi na tamo ungasari nanngi minjrnab dedegsib awoelenqab. <sup>16</sup> Awoonabqa Yesus na bem 5 ti qe aiyel ti di osiqa lan goge tarosiqa Qotei pailyej. Pailyo koboonaqa bem ti qe ti ginjenyosiqa aqa angro nanngi enjreqnaqa nanngi na osi giloqnsibqa tamo ungasari nanngi jeisib enjreqnab uyoqneb. <sup>17</sup> Uynab kalil menetnjrej. Onaqa ingi oto urateleqnej qaji di Yesus aqa angro nanngi na koroiyosib gumba kokba 12 di jignab maqelenqej.

*Pita a Yesus qa poiyoonaqa aqa ñam ubtej*

<sup>18</sup> Bati bei Yesus aqa angro nanngi ti sasalosib nanngi segi sosibqa Yesus a Qotei pailyoqnej. Pailyo koboonaqa a na aqa angro nanngi endegsi nenemnjrej, “Tamo ungasari nanngi e qa kiyersib mareqnub?” <sup>19</sup> Onaqa aqa angro nanngi na minjeb, “Tamo qudei nanngi mareqnub, ni Jon yansnjro qaji. Qudei nanngi mareqnub, ni Elaija. Qudei nanngi mareqnub, ni Qotei aqa medabu o tamo nanngi nami soqneb deqaji bei agi subq na tigelqo.” <sup>20</sup> Onaqa Yesus a nanngi olo nenemnjrej, “Ninngi segi e qa kiyersib mareqnub?” Onaqa Pita na minnej, “Ni Qotei aqa Kristus.”

*Yesus a marej, “E moisiy olo subq na tigelqai”*

<sup>21</sup> Pita a anjam degsi marnaqa Yesus na aqa angro nanngi singila na getentnjrsiqa minjrej, “Ninngi anjam di ubtosib tamo qudei minjraib.” <sup>22</sup> Osiqa minjrej, “E Tamo Angro. Bunuqna e jaqatin koba oqai. Juda gate nanngi ti atra tamo kokba ti dal anjam qalie tamo nanngi ti e qoreibosib lubsib moiyoqbqab. Bati qalub koboamqa e olo subq na tigelqai.”

<sup>23</sup> Osiqa aqa angro kalil nanngi endegsi minjrej, “Tamo bei na e daurbqa osimqa a aqa segi areqalo kalil uratekritisim bati gaigai aqa segi namburbas qoboiyosim e daurboqnem. <sup>24</sup> Tamo



bei na aqa segi nambile taqatqajqa arearetqas di a padalqas. Ariya tamo bei a e qa are qalsimqa aqa segi nambile uratqas di a olo nambile bole oqas. <sup>25</sup> Tamo bei a mandam qa ñoro kalil koroiyosim ariya mondon aqa segi qunun padalqas di ñoro dena a kiyersim olo aqaryaiyqas? Di keresai. <sup>26</sup> E Tamo Angro. Tamo bei a e qa ti ijo anjam qa ti jemaikyqas di mondon e bosiyqa e kamba tamo deqa jemaibqas. Bati di e ijo segi rian na ti ijo Abu aqa rian na ti ijo Abu aqa lan angro nanjo rian na ti bqai. <sup>27</sup> E bole merngwai. Tamo qudei ijo areq endi tigelejunub qaji nanqi morenosaisoqnibqa Qotei na nanqi taqatnjrsim nanjo Mandor Koba soqnimqa nanqi unqab.”

*Yesus aqa angro qalub nanqi mana goge di Yesus aqa jejamu bulyonaq unobeiteb*

<sup>28</sup> Yesus a anjam degsi marsiq koboonaqa bati 8 onaqa a Qotei pailyqa marsiqa Pita na Jon na Jems na nanqi qalub joqsiqa koba na manaq oqeb. <sup>29</sup> Manaq oqsib dia Yesus a Qotei pailyeqnaqa aqa ulatamu bulyonaq nanqi unobeiteb. Aqa gara dego tulan pulonosiya qatekritej. <sup>30</sup> Onaqa tamo aiyel brantosib Yesus ombla anjam maroqneb. Tamo aiyel di Moses Elaija wo. <sup>31</sup> Nanqi aiyel rian koba ti Qotei aqa singila ti beb. Bosibqa Yesus a bunuqna Jerusalem dia aqa wau kobotosim moisis mandam uratqas anjam deqa Yesus ombla qairoqneb. <sup>32</sup> Yesus aqa angro qalub nanqi tulan urnjamnjrnaqa nerenesoqneb deqa olo qutuosibqa nam poinjrnaqa Yesus aqa rian koba de ti tamo aiyel a ombla tigelesoqneb qaji nanqi ti unjreb. <sup>33</sup> Onaqa Moses Elaija wo nanqi olo Yesus urateqnabqa Pita na minnej, “O Tamo Koba, Moses Elaija wo bosib iga koba na endi unum di bolequja. Deqa iga tal kiñilala qalub gereiyqom. Bei ino. Bei Moses aqa. Bei Elaija aqa.” Pita a anjam bei marqa saiiyonaqa anjam di lanja marej.

<sup>34</sup> Mareqnaqa lanbi aisiqa nanqi kabutnjrnaqa nanqi ulaugeteb. <sup>35</sup> Onaqa lanbi miligiq dena anjam bei endegsi brantonaq nanqi queb, “Endi ijo Angro qujai e segi na giltem qaji. Ninqi aqa anjam quetoqniy.” <sup>36</sup> Onaqa Yesus aqa angro nanqi anjam di qusib nam ateb di Yesus a segi nanqi koba na sonab uneb. Nanqi tamo bei unosai. Bati deqa nanqi kumbra uneb qaji di ubtosib tamo qudei nanqi minjrosaiyoqneb. Nanqi mequmosib soqneb.

*Yesus a angro mel aqa jejamuq na mondor uge wiyetej*

<sup>37</sup> Nebeonaqa nanqi manaq dena olo aisib tamo ungasari tulan gargekoba mana utruq di tarijesonab itnjreb. <sup>38</sup> Onaqa tamo ungasari nanjo ambleq dena tamo bei a brantosiq tulan maosiq Yesus minnej, “O Qalie Tamo, ni ijo angro mel unime. A ijo angro qujai bole qujai. <sup>39</sup> Mondor uge na aqa jejamu

ojoqnsiqa mandamq waiyeqnaqa a tulan lelenoqnsiqa aqa medabuq na maul aieqnu. Mondor uge dena a qunjimy-oqnsiqa aqa jejamu tulan ugeugeiyeqnu. A olo uratosaiqnu. <sup>40</sup> Deqa e na ino angro nanqi minjronum, ‘Ninigi mondor uge di wiyiy.’ Minjronumqa nanqi na wiyqa yonub keresaiinjrqo.”

<sup>41</sup> Onaqa Yesus a anjam di qusiqa marej, “Ninigi tamo ungasari bini bati endeqa unub qaji nungo areqalo e qa singilatosai bole sai. Nungo areqalo ti kumbra ti tulan uge. Bati gembub e ninigi koba na sosiyqa nungo gulbe di qoboioqnc-qai?” Degsi marsiqa angro di aqa abu minjej, “Ino angro mel di osau.” <sup>42</sup> Onaqa osi beqnaqa mondor uge dena aqa jejamu ojsiq mandamq waiyosiq qunjimyoqnej. Yeqnaqa Yesus na mondor uge di nriintosiq wiyonaq angro aqa jejamu uratonaq boleej. Boleonaqa Yesus na angro di ban ojsiq osi gilsiq aqa abu yej. <sup>43</sup> Onaqa tamo ungasari kalil mana utruq di soqneb qaji nanqi Qotei aqa manwa di unsibqa tulan prugugeteb.

*Yesus a marej, “E moisiy olo subq na tigelqai”*

Tamo ungasari nanqi manwa kalil Yesus a yoqnej qaji deqa are koba qaleqnaqqa a na aqa angro nanqi endegsi minjrej, <sup>44</sup> “Ninigi ijo anjam endi geregere quiy. E Tamo Angro. Jeu tamo nanqi na e ojsib tamo qudei nanjo banq di atqab.” <sup>45</sup> Onaqa Yesus aqa angro nanqi aqa anjam di qusib anjam aqa utru Qotei na ulitej deqa nanqi poinjrosai. Deqa nanqi Yesus nenemyqajqa ulaeb.

*Yesus aqa angro yai a ñam ti sqas?*

<sup>46</sup> Bati bei Yesus aqa angro nanqi segi segi nriñosib angro yai a nanqi kalil bunjrsim ñam ti sqas deqa anjam na qotoqneb. <sup>47-48</sup> Onaqa Yesus a nanjo areqalo di qalieosiqa angro kiñala bei osiqa aqa areq di tigeltosiqa nanqi osornjrej. Osornjrsiqa minjrej, “Tamo bei a ijo ñam qa are qalsimqa angro kiñala endeqaji bei osim geregereiyqas di a e dego osim geregereibqas. Tamo a e osim geregereibqas di a na ijo Abu e qarinjbej qaji di dego osim geregereiyqas. Nungo ambleq di tamo bei a aqa segi ñam soqtqa uratqas di tamo dena ninigi kalil bunjosim ñam ti sqas.”

*Tamo nanqi ninigi jeutngosaieqnu di nanqi ninigi koba na wau qujai*

<sup>49</sup> Onaqa Jon na Yesus minjej, “O Tamo Koba, ni que. Iga tamo bei unem. A ino ñam na mondor uge nanqi winjreqnaqa iga na unsim saidyem. Di kiyayaqa? A iga koba na wauosaieqnu deqa.” <sup>50</sup> Onaqa Yesus na minjej, “Ninigi a saidyaib. Tamo nanqi ninigi jeutngosaieqnu di nanqi ninigi koba na wau qujai.”

*Samaria tamo nanqi na Yesus qoreiyeb*

<sup>51</sup> Onaqa Yesus a mandam uratosim lan qureq oqwjajqa bati jojomonaqa a Jerusalem aiqajqa areqalo qujaitosiqa Jerusalem areiyosiq walwelej. <sup>52-53</sup> Walweloqnsiqa aqa angro qudei nanqi qarinjrnnaqa nanqi namo aisib Samaria nanjo qure beiq di brantosib Yesus a di njeiqajqa minjrnabqa nanqi na saideb. Di kiyajqa? A Jerusalem aiyognej deqa. <sup>54</sup> Onaqa Yesus aqa angro aiyel Jems Jon wo nanqi kumbra di unsibqa minjin oqetnjrnnaqa Yesus minjeb, “O Tamo Koba, ni marimqa iga njamyowo metonam lan goge na aisim tamo nanqi di koitnjrqas.” <sup>55</sup> Onaqa Yesus a bulosiqa nanqi aiyel njirinjnrej. <sup>56</sup> Osija aqa angro kalil nanqi joqsiqa koba na qure beiq aiyeb.

### *Tamo qudei nanqi Yesus dauryqajqa mareb*

<sup>57</sup> Nanqi gam dauryosib aiyeqnabqa tamo bei na Yesus minjej, “Ni sawa sawaq giloqnmqa e ni daurmoqngai.” <sup>58</sup> Onaqa Yesus na minjej, “Baun juwan nanqi tal ti. Agi sub miligiq di nereneqnub. Qebari nanqi simi ti. Deqa nanqi simiq di nereneqnub. Ariya e Tamo Angro njeiqajqa tal saiqoji. Deqa ni e daurbqajqa gulbe koba.” <sup>59</sup> Osija tamo bei minjej, “Ni e daurbe.” Degsi minjnaqa tamo dena minjej, “O Tamo Koba, ni e odbimqa e mati aisiy ijo abu qa tarinoqngai. A moiymqa subq atsiy di e ni daurmqai.” <sup>60</sup> Onaqa Yesus na minjej, “Unqum. Tamo moiyo qaji nanqi segi na tamo moiyo qaji nanqi subq atelenoqngab. Ariya ni sawa sawaq giloqnsimqa Qotei na aqa segi tamo ungasari nanqi taqatnjrsim nanjo Mandor Koba sqas anjam di minjre minjre laqne.”

<sup>61</sup> Onaqa tamo bei na Yesus minjej, “O Tamo Koba, ni marimqa e mati gilsiy ijo was nanqi ban ojelenosiy bosiy ni daurmqai.” <sup>62</sup> Onaqa Yesus na minjej, “Qotei na aqa segi tamo ungasari nanqi taqatnjrsim nanjo Mandor Koba sqas anjam di ni mare mare laqne. Ni que. Tamo bei a kuñi ojsimqa a bulosim qoreq njam atoqngas di a Qotei aqa wau ojqa keresai.”

## 10

### *Tamo 72 nanqi Yesus aqa anjam mare mare laqneb*

<sup>1</sup> Bati bei Tamo Koba a na tamo kalil a dauryoqneb qaji nanqi metnjrnnaqa aqa areq bonabqa nanjo ambleq dena tamo 72 nanqi giltjnrej. Nanqi aqa anjam mare mare laqajqa deqa giltjnrej. Giltjnrsiqa nanqi aiye aiyel namoosib qure kalil a segi bunuqna walwelosim aiqas qaji nanqi deq aiqajqa minjrsiqa qarinjrnnaq aiyeb. <sup>2</sup> A nanqi qarinjrnnaq osija yawo anjam endegsi minjrej, “Wauq di inji gargekoba melionub. Ariya inji meli bunuj otorqajqa wau tamo gargekoba sai. Deqa ningi wau lanja minjibqa a na wau tamo nanqi qarinjrnnaq nanqi aqa wauq gilsib inji meli bunuj otorelenqab.

<sup>3</sup> “Deqa nĩngi aiyiy. Nĩngi kaja du du bul unub deqa e na nĩngi qarĩngitqa aisib bauŋ juwan nanŋo ambleq di wauoqn-qab. <sup>4</sup> Nĩngi silali osib aiyai. Nunŋo qaquŋ aib. Singa tatal jĩgaib. Nĩngi aiyoqnsibqa gamq di tamo qudei turoqnsibqa nanŋi anjam bei minjraib. <sup>5</sup> Nĩngi tal bei gogetoqnsibqa tamo unŋasari tal miligiq di unub qaji nanŋi endegsib minjroqniy, ‘Nĩngi lawo na soqniy.’ <sup>6</sup> Degsib minjroqniyqa lawo tamo bei sqas di a nunŋo lawo anjam di oqas. Ariya lawo tamo bei sqasai di nunŋo lawo anjam di olo puluosim nunŋoq bqas. <sup>7</sup> Nĩngi qure bei beiq di brantoqnsibqa tal qujaiq di soqniy. Olo tal bei bei gogetoqnaib. Nanŋi na nĩngi joqsib iŋgi ti ya ti anaĩngoqniyqa uyoqniy. Nĩngi Qotei aqa wau tamo unub deqa nunŋo awai agi oqniy.

<sup>8</sup> “Nĩngi qure beiq di brantoqniyqa nanŋi nĩngi joqoqnsib iŋgi anaĩngoqniyqa uyoqniy. <sup>9</sup> Nĩngi qure dia sosibqa tamo unŋasari ma ti unub qaji nanŋi boletnjroqnsib endegsib minjroqniy, ‘Qotei a nunŋo Mandor Koba sosim nĩngi taqatŋwajqa bati jojomqo.’ <sup>10</sup> Ariya nĩngi qure beiq di brantoqniyqa nanŋi nĩngi gereĩngosaiabqa nĩngi nanŋi uratnjrqa oqnsib nanŋo qure ambleq di tigelqnsibqa endegsib minjroqniy, <sup>11</sup> ‘Nĩngi Qotei qoreiyonub deqa nunŋo qure qa tumbrum gago singa qandratqo qaji agi butuyetŋgonum. Ariya nĩngi endegsib qalieoiy, Qotei a nunŋo Mandor Koba sosim nĩngi taqatŋwajqa bati jojomqo.’ O ijo anŋro, nĩngi degsib minjroqniy. <sup>12</sup> E nĩngi mernŋwai. Mondonŋ Qotei a tamo unŋasari nanŋo une qa peginjrqqa batiamqa a na qure deqaji nanŋi tulanŋ padaltnjrougetqas. A na Sodom qure nanŋi degsim padaltnjrqasai. A nanŋi gulbe kiŋala enjrqas.

*Tamo unŋasari are bulyosai qaji nanŋi mondonŋ tulanŋ padalougetqab*

<sup>13</sup> “O Korasin qure ti Betsaida qure ti, nĩngi tulanŋ padalougetqab. Di kiyaaqa? Maŋwa e nunŋoq di yoqnem qaji di Tair qure ti Saidon qure ti nanŋoq di brantej qamu nanŋi nami are bulyosib are uge qa gara jigsib ŋam sumq di awoeb qamu. <sup>14</sup> Deqa e nĩngi endegsi mernŋwai. Mondonŋ Qotei a tamo unŋasari nanŋo une qa peginjrqqa batiamqa a na nĩngi tulanŋ padaltnjrougetqas. A na Tair qure ti Saidon qure ti nanŋi degsim padaltnjrqasai. A nanŋi gulbe kiŋala enjrqas. <sup>15</sup> O Kaperneam tamo unŋasari, nĩngi lanŋ qureq oqwa kere e? Keresai. Qotei na nĩngi breĩngimqa moiyo qureq aiqab.”

<sup>16</sup> Osiqa Yesus na aqa anŋro nanŋi endegsi minjrej, “Tamo bei a nunŋo anjam qusim dauryqas di a ijo anjam dego qusim dauryqas. Ariya tamo a nĩngi qoreĩngwas di a na e dego qoreibqas. Tamo a e qoreibqas di a na ijo Abu e qarĩnbej qaji di dego qoreiyqas.”

*Tamo 72 Yesus na qarinjnjrej qaji nanji olo aqa areq beb*

<sup>17</sup> Yesus na tamo 72 nanji di qarinjnjrnaq aisib aqa anjam mare mare laqneb. Onaqa bunuqna nanjo wau di koboon-aqa nanji olo puluosib Yesus aqa areq bosib areboleboleinjrnaja minjeb, “O Tamo Koba, iga ino ñam na mondor uge uge nanji winjreqnamqa nanji gago anjam dauryoqnsib jaraiyoqneb.” <sup>18</sup> Onaqa Yesus na minjrej, “Kola minjal urur mandamq aiyeqnu dego kere Satan a urur lan goge na ulonosiq aiyeqnaq e unonum. <sup>19</sup> Njingi quiy. E na Qotei aqa singila njingi engonum. Deqa njingi singila di osib amal uge ti deginj ti nanjo singila tentoqnsib laqnaqab. Gago jeu tamo Satan aqa singila kalil dego njingi na kobotoqnaqab. Deqa inji bei na yala njingi ugeugeingwa keresai. <sup>20</sup> Mondor uge nanji nunjo anjam dauryoqnsib jaraiyeqnu di bolequja. Ariya njingi deqa tulan areboleboleingaiq. Qotei a nunjo ñam lan qureq di nengrenyej unu. Njingi deqa tulan areboleboleingem.”

*Yesus a tulan areboleboleiyonaqa Qotei pailyej*

<sup>21</sup> Bati deqa Mondor Bole a Yesus aqaq aisiq areqalo singilatetonaqa a tulan areboleboleiyonaqa Qotei endegsi pailyej, “O Abu, ni segi lan qa ti mandam qa ti Koba. E ino ñam soqteqnum. Di kiyaaqa? Ni ijo anjam kalil powo tamo nanji qa ulitoqnsimqa tamo nanji angro du du bul unub qaji nanji segi qa babteqnam nanji poinjreqnu. Od, Abu, ni ino segi areqalo dauryosim agi degyeqnum.” <sup>22</sup> Yesus a degsi Qotei pailyej. Osiqa marej, “Ijo Abu na inji inji kalil ijo banq di atelenje unu. E segi Qotei aqa Niri. Tamo bei a e qa qaliesai. Ijo Abu a segi e qa qalie. Tamo bei a ijo Abu qa qaliesai dego. E segi ijo Abu qa qalie. E na tamo qudei nanji ijo Abu osornjrqa areibqas di osornjrqai. Yim nanji dego ijo Abu qa qalieqab.”

<sup>23</sup> Yesus a degsi marsiqa aqa angro nanji joqsiqa nanji segi sasalosib a na minjrej, “Njingi nunjo ñamdamu na ijo kumbra uneqnu deqa njingi tulan areboleboleingem. <sup>24</sup> Njingi quiy. Nami mandor kokba ti Qotei aqa medabu o tamo nanji ti gargekoba kumbra njingi bini uneqnu qaji di unqajqa are koba soqnej. Ariya nanji unosaiqneb. Anjam njingi bini queqnu qaji di dego nanji quqwajqa are koba soqnej. Ariya nanji quosaiqneb.”

*Samaria tamo bei a kumbra bole yej*

<sup>25</sup> Onaqa dal anjam qalie tamo bei a Yesus aqa singila lanja tenemtqa osiqa endegsi nenemyej, “O Qalie Tamo, e kumbra bole kiye dauryosiy dena e ñambile gaigai sqai?” <sup>26</sup> Onaqa Yesus na kamba minjej, “Dal anjam nengrenq di kiyersi unu? Ni gaigai sisiyeqnum. Deqa ni segi na mare.” <sup>27</sup> Onaqa tamo dena minjej, “Dal anjam endegsi unu, ‘Ni ino Tamo Koba

Qotei a tulan qalaqalaiyime. Qalaqalaiyosim ino are miligi ti ino qunun ti ino singila ti ino areqalo ti kalil a yekritime. Osim ni ino segi jejamu gereiyeqnum dego kere ino was nanji degsim geregereinjroqnime.’”<sup>28</sup> Onaqa Yesus na minjej, “Ni kere maronum. Deqa ni kumbra di yoqnqam dena ni nambile oqam.”

<sup>29</sup> Onaqa tamo di a diqosiq aqa segi powo babtqa are qalsiq deqa olo Yesus nenemyej, “Tamo yai a ijo was unu deqa e na gereiyqai?”<sup>30</sup> Onaqa Yesus na kamba yawo anjam endegsi minjej, “Tamo bei a Jerusalem dena tigelosiq gam dauryosiq Jeriko qureq aieyqnaqa gamq di bajin tamo qudei nanji na a ojsib aqa inji inji kalil yayiekrateb. Osib aqa gara palontetosib qalougetonab a moiqa jomonaqa gam qalaq di a uratosib jaraiyeb.<sup>31</sup> A gam qalaq di neiesonaqa atra tamo bei a gam dena walwelosiq gilsiq tamo di unej. Unsiqa a aqaryaiyqa uratosiq gam qalaq beiq na bunyosiq gilej.<sup>32</sup> Onaqa sokiñalayonaq tamo bei a dego gam dena walwelosiq gilej. A Livai tamo. A atra tal taqatoqnej qaji. A gam dena walwelosiq tamo di gam qalaq di neiesonaq unsiqa a dego tamo di aqaryaiyqa uratosiq gam qalaq beiq na bunyosiq walwelosiq gilej.

<sup>33-34</sup> “Ariya olo sokiñalayonaq Samaria tamo bei a dego gam dena walwelosiq gilej. Gilsiq tamo di unsiqa a qa tulan dulosiq aqa areq bosiq goren ti wain ti osiq aqa jejamu pupoiyeleneb qaji di yanselenosiq qoselenetej. Osiq a soqtosiq aqa donki quraq di atsiqa osi gilsiq tamo nerenjo qaji talq di gereiyosiq taqatoqnej.<sup>35</sup> Onaqa nebeonaqa Samaria tamo di aqa segi qureq gilqa osiq nerenjo qaji tal taqato tamo aqa banq di silali banqa qudei atsiqa minjej, ‘Ni silali endena tamo di geregereiyogne. E bosiy ino segi silali banqa gembub ni olo uratqam di ni kamba emqai.’”

<sup>36</sup> Yesus na dal anjam qalie tamo di yawo anjam degsi minjsiq olo minjej, “Tamo qalub nanji gam dena walwelosib gileb. Deqa ni merbe. Tamo yai a tamo gam qalaq di qalnab neiesoqnej qaji aqa was bole?”<sup>37</sup> Onaqa dal anjam qalie tamo na kamba Yesus minjej, “Samaria tamo agi tamo deqa dulej qaji di aqa was bole.” Onaqa Yesus na minjej, “Ni kere maronum. Deqa ni gilsim kumbra degsim yoqne.”

### *Yesus a Marta Maria wo nanjo talq di soqnej*

<sup>38</sup> Onaqa bati bei Yesus aqa angro nanji koba na walwelosib aisib qure beiq di branteb. Qure dia unja bei soqnej aqa ñam Marta. A nanji joqsiq koba na aqa tal gogeteb.<sup>39</sup> Marta aqa jaja bei soqnej aqa ñam Maria. A Tamo Koba aqa singa jomq di awoosiq aqa anjam quoqnej.<sup>40</sup> Ariya Marta a nanjo inji goiyetnrqa marsiq wau koba yoqnej. Osiq a Yesus

aqa areq bosiq minjej, “O Tamo Koba, ijo jaja na e uratbqoqa e segi inği goiyocnsim inği inği kalil gereiyecnum. A na e yala aqaryaibosai. Deqa ni na minjimqa a e aqaryaibem.”  
<sup>41</sup> Onaqa Tamo Koba a na kamba Marta minjej, “O Marta, ni inği inği kalil qa are koba qaleqnum. Ni inği inği deqa are kobaimaiq. <sup>42</sup> Inği qujai qa are qalqam di kere. Maria a inği qujai di oqo. Inği di tulan boledamu. Inği di tamo bei na olo yayiqa keresai.”

## 11

### *Yesus a pailyo kumbra qa anjam palontej*

<sup>1</sup> Onaqa bati bei Yesus a sawa beiq gilsiq dia Qotei pailyosiq sonaqa aqa anğro bei na minjej, “O Tamo Koba, Jon a nami aqa anğro nanği pailyqajqa gam osornjroqnej dego kere ni na iga dego pailyqajqa gam osorge.” <sup>2</sup> Onaqa Yesus na aqa anğro nanği endegsi minjrej, “Ninği Qotei pailyqa osibqa endegsib pailyoqniy,

‘O Abu, ino ñam tulan getento.

Ni bosim gago Mandor Koba sosim iga taqatgoqnime.

<sup>3</sup> Gago inği uyo bati gaigai keretgoqnime.

<sup>4</sup> Tamo nanği iga qa une ateqnub qaji nanço une kalil iga na kobotetnjreqnum deqa ni kamba gago une kalil dego kobotetgoqnime.

Gulbe bei na iga walawalaigosim uneq waigwa laqnimqa ni iga aqaryaigoqnime.’ ”

<sup>5-6</sup> Osıqa Yesus na olo minjrej, “Ino kadoi bei a qolo jige ino talq bosimqa oqeq di tigelosim mermqas, ‘O kadoi, ijo was a sawa isaq na walweloşiq ijo talq bqoqa e inği bei anaiyqajqa di saıqoji. Deqa ni bem qalub ebimqa e anaiyqai.’ <sup>7</sup> A degsi mermimqa ni na kamba minjqam, ‘Ni e ñeio ñam gentbaim. E siran qandimtonum. E ijo anğro nanği ti ñeiejunum. Deqa e ni bem emqa keresai.’ <sup>8</sup> Ni na ino kadoi degsi minjimqa a ni tulan wainmqas. Wainmimqa ni tigelosim bem yqam. A ino kadoi unu ni deqa are qalsim bem yqasai. A ni tulan wainmqo deqa ni tigelosim inği keretosim yqam. <sup>9</sup> Deqa e ninği endegsi mernğwai. Ninği inği bei qa Qotei pailyqab di a na enğwas. Ninği inği bei oqa marsibqa ñamqab di itqab. Ninği siranme kindokindonabqa Qotei na siran waqtetjğwas. <sup>10</sup> Tamo kalil Qotei pailyeqnub qaji nanği inği eqnub. Tamo kalil inği qa ñameqnub qaji nanği iteqnub. Tamo kalil siranme kindokindoneqnub qaji nanği Qotei na siran waqtetnjreqnu.

<sup>11</sup> “Tamo bei aqa anğro a mamyim qe qa minjimqa a qe yqas. A amal uge yqasai. <sup>12</sup> A na tuwe tawel qa minjimqa a tuwe tawel yqas. A değin yqasai. <sup>13</sup> Deqa ninği quiy. Ninği tamo bolesai. Ariya ninği nunço anğro nanği inği bole bole

enjqreñub. Ningi nanđi saidñjrosaieqñub. Nunđo kumbra dena ningi endegsi poingem, nunđo Abu lanđ qureq di unu qaji a dego ningi saidñgosaieqñu. Ningi pailyqab di a na aqa Mondor Bole engwas. A na ningi saidñgwasai bole sai.”

*Tamo qudei nanđi maroqñeb, “Belsebul a Yesus aqa jejamuq di unu”*

<sup>14</sup> Onaqa Yesus a tamo bei mondor uge na medabu getentesoqñej qaji di mondor uge wiyetej. Wiyetonaqa a olo boleosiqa anjam maroqñej. Deqa tamo unđasari nanđi Yesus aqa mañwa di unsibqa tulañ prugugeteb. <sup>15</sup> Onaqa tamo qudei nanđi dego Yesus aqa mañwa di unsib Yesus yomuiyosib maroqñeb, “Mondor uge nanđo gate koba Belsebul a Yesus aqa jejamuq di unu. Singila dena a na mondor uge nanđi winjqreñu.” <sup>16</sup> Onaqa tamo qudei nanđi Yesus aqa singila laña tenemtqa osib gisanjosib minjeb, “Ni Qotei lanđ goge di unu qaji aqa singila bei babtım iga unqom.” <sup>17</sup> Onaqa Yesus a nanđo areqalo di qalieosiqa yawo anjam endegsi minjrej, “Tamo nanđi sawa qujaiq di unub qaji nanđi segi poaiyelosib qotqab di nanđi koba na geregere sqa keresai. Nanđi niñaqosib koboqab. Tamo nanđi tal qujaiq di unub qaji nanđi segi poaiyelosib qotqab di nanđi dego koba na geregere sqa keresai. <sup>18</sup> Dego kere Satan na aqa segi mondor uge nanđi winjqras di nanđi poaiyelqab. Deqa Satan a kiyersim aqa mondor uge nanđi olo taqatñjqras? Di keresai. Ningi mareqñub, ‘Yesus a Belsebul aqa singila na mondor uge nanđi winjqreñu.’ <sup>19</sup> Di sai. E Belsebul aqa singila na mondor uge nanđi winjqrai di yai aqa singila na nunđo anđro nanđi mondor uge winjqrab? Deqa nanđi segi na mernđwab, ningi anjam groteqñub. <sup>20</sup> Ariya e Qotei aqa singila na mondor uge nanđi winjqrai di ningi endegsi poingwas, ‘Bole, Qotei a gago Mandor Koba sosım iga taqatğwajqa bati brantqo.’ Ningi degsi poingwas.

<sup>21</sup> “Tamo singila koba bei a anđ ti qaja ti ojelenosım aqa segi tal geregere taqatqas di aqa inđi inđi kalil bole sqab. <sup>22</sup> Ariya tamo bei tulañ singila koba a bosım tamo di ombla qotsım singilaqas di a na qaja ti anđ ti tal aqa abu a dena singilaoqñej qaji di yaiyelenosım aqa inđi inđi kalil elenqas. Osim inđi inđi di tamo qudei nanđo banđ di olo atelenqas.

<sup>23</sup> “Tamo bei na e beterbqasai di a na e jeutbqas. Tamo bei a e ombla wauqasai di a na ijo wau ugetetbqas.”

*Mondor uge a tamo aqa jejamu uratosım olo bqas*

<sup>24</sup> Osiqa Yesus a olo marej, “Mondor uge a tamo bei aqa jejamuq dena ulanjosım sawa kanđranđoq gilqas. Gilsım dia laqnsımqa aqaratqajqa sawa ñamam ugeiyım marqas, ‘E olo puluosiy ijo tal uratem qaji deq olo aiqai.’ <sup>25-26</sup> A degsi



marsimqa aisim tal di nami manj solsisib ingi ingi kalil gereiyeb milalejunu di unsimqa olo puluosim gilsim mondor uge 7 tulan ugedamu nanqi joqsim bosim koba na tal dia sqab. Soqribqa tamo di aqa so tulan ugeqas. Aqa so uge namij degwasai. Aqa so olo tulan ugedamuqas.”

*Tamo yai nanqi tulan areboleboleinjrim sqab?*

<sup>27</sup> Yesus a anjam degsi marnaqa tamo ungasari nanjo ambleq dena unja bei a brantosiqa tulan lelenosiqa Yesus minjej, “Ino ai agi ni nami nambabtmosiqa munqum anaimoqnej qaji a Qotei aqa nmgalaq di unja tulan bolequja. Deqa a tulan areboleboleiyim sqas.” <sup>28</sup> Onaqa Yesus na kamba minjej, “Ijo ai a segi areboleboleiyqasai. Tamo nanqi Qotei aqa anjam quoqnsib dauryeqnub qaji nanqi dego tulan areboleboleinjrim sqab.”

*Tamo qudei nanqi Yesus aqa manwa unqajqa minjeb*

<sup>29</sup> Onaqa tamo ungasari tulan gargekoba nanqi Yesus aqa areq di koroeq nabqa a na nanqi endegsi minjroqnej, “Tamo ungasari bini bati endeqa unub qaji nanjo kumbra tulan ugedamu. Nanqi gaigai Qotei aqa manwa lanja unqajqa metbeqnub. Deqa e na Qotei aqa manwa bei nanqi osornjrqasai. Jona aqa manwa segi osornjritqa nanqi unqab. <sup>30</sup> Agi Jona a segi manwa bul sonaqa tamo ungasari Ninive qureq di soqneb qaji nanqi manwa di uneb. Dego kere e Tamo Angro manwa bul soqnit tamo ungasari bini bati endeqa unub qaji nanqi manwa di unqab. <sup>31</sup> Mondonj Qotei na tamo ungasari nanqi peginjrqqa batiamqa unja mandor nami guta di sawa taqatoqnej qaji a tigelqas. Tigelosimqa tamo ungasari bini bati endeqa unub qaji nanjo kumbra uge babetnjrqas. A degyqas. Di kiyaaqa? Unja di a nami Solomon aqa powo kobaquja unqa marsiqa sawa isaq na walwelosi bej deqa. Ariya bini tamo bei Solomon tulan bunyejunu qaji a nunjo ambleq di unu. <sup>32</sup> Mondonj Qotei na tamo ungasari nanqi peginjrqqa batiamqa Ninive tamo nanqi dego tigelqab. Tigelosibqa tamo ungasari bini bati endeqa unub qaji nanjo kumbra uge babetnjrqab. Nanqi degyqab. Di kiyaaqa? Ninive tamo nanqi nami Jona aqa anjam qusib are bulyeb deqa. Ariya bini tamo bei Jona tulan bunyejunu qaji a nunjo ambleq di unu.”

*Ino namdamu a ino jejamu qa pulonj bul*

<sup>33</sup> Osiqa Yesus a olo marej, “Tamo bei a lam qatrentosim tal surumq di atqasai. Kulum miligiq jugwasai. Boleq di gaintim warum suwanamqa tamo ungasari nanqi tal miligiq gilsib warum geregere unqab. <sup>34</sup> Ino namdamu a ino jejamu qa pulonj bul. Deqa ino namdamu boleqas di ino jejamu kalil suwanesqas. Ariya ino namdamu ugeqas di ino jejamu

kalil ambruesqas. <sup>35</sup> Deqa nıngi geregere unoqniy. Nungo jejamu suwanjejunu qaji di olo ambruo uge. <sup>36</sup> Ino jejamu kalil suwanekritqas di taqal bei ambruqa keresai. Deqa ino jejamu kalil suwanjoq di soqneme. Lam pulonjosiq ni suwantmeqnu dego kere.”

*Farisi ti dal anjam qalie tamo nanği ti kumbra uge uge yeqñub*

<sup>37</sup> Yesus a anjam degsi marsiq koboonaqa Farisi tamo bei a Yesus aqa areq bosiq minjej, “Aqo ombla ijo talq gilsim inği uyqom.” Osiqa nanği ombla aqa talq gilsib awoeb. <sup>38</sup> Awoosib Yesus a inği uyqa osiqa a mati ban yansosaisosiq laña uyej. Deqa Farisi tamo a Yesus aqa kumbra di unsiqa tulan prugugetej. <sup>39</sup> Onaqa Tamo Koba a na minjej, “Nıngi Farisi nungo kumbra uge ağı ubtosiy mernğwai. Nıngi ya gamban ti tabir ti qore segi yanseqñub. Nıngi miligi yansosaieqñub. Di yawo anjam. Aqa damu agiende. Nıngi baban na tamo bole. Ariya nungo are miligi kumbra uge ti bajın kumbra ti dena maqejunu. <sup>40</sup> Nıngi nanari tamo! Qotei a nungo jejamu gereiyosiq nungo are miligi dego gereiyej. Di nıngi qaliesai kiyo? <sup>41</sup> Deqa inği inği kalil nungo are miligiq di unu qaji di nıngi elenjosib tamo inği saiqoji nanği enjroqniy. Nıngi kumbra degyibqa nungo inği inği kalil milalesqas.

<sup>42</sup> “O Farisi tamo, nıngi tulan padalougetqab. Di kiyaaq? Nıngi dal anjam kiñilala segi dauryeqñub. Ağı nıngi lei ti lombo ti saga ti oqnsib poto 10 yoqnsib oto qujai Qotei atraiyeqñub. Ariya nıngi Qotei aqa dal anjam kokba dauryqajqa urateqñub. Ağı nıngi kumbra bole bole dauryosaieqñub. Nıngi Qotei qalaqalaiyosaieqñub. Nıngi dal anjam kiñilala segi dauryeqñub. Deqa e nıngi endegsi mernğwai. Nıngi are bulyosib dal anjam kokba dauryosib laqniy. Nıngi dal anjam kiñilala dego dauryqa urataib.

<sup>43</sup> “O Farisi tamo, nıngi tulan padalougetqab. Di kiyaaq? Nıngi Qotei tal miligiq di tamo ñam ti nanngo awo jaramq di awoqajqa tulan areboleboleıngeqnu. Nıngi koro sawaq di dego tamo unğasari nanği na nungo ñam soqtetnjosib ban ojetnğwajqa deqa areboleboleıngeqnu.

<sup>44</sup> “O Farisi tamo, nıngi tulan padalougetqab. Di kiyaaq? Nıngi tamo moiyo qaji sub bul unub. Sub gogeq di marın na kabutqo. Deqa tamo unğasari nanği quraq na walweloqnqab di nanği qalieqasai.”

<sup>45</sup> Yesus a anjam degsi marnaqa dal anjam qalie tamo bei a Yesus aqa anjam di qusiqa minjej, “O Qalie Tamo, ni Farisi nanği anjam degsi minjronum deqa ni gago ñam dego ugetoiyonum.” <sup>46</sup> Onaqa Yesus na kamba minjej, “O dal anjam qalie tamo, nıngi dego tulan padalougetqab. Di kiyaaq? Nıngi tamo

unğasari nañgi gulbe kokba enjreqnab qoboiyoqnsib unub. Ariya niñgi na olo nañgo gulbe di qoboiyetnjrosaeqñub.

<sup>47</sup> “Niñgi tulañ padalougetqab. Di kiyaaqa? Nuñgo moma nañgi nami Qotei aqa medabu o qaji tamo nañgi ñumeqñab moreñoqñeb. Ariya niñgi na olo nañgo sub gereiyeqñub. <sup>48</sup> Nuñgo kumbra dena niñgi endegsib marobuleqñub, ‘Gago moma nañgo kumbra bole.’ Niñgi degsib marobuleqñub. Agi nuñgo moma nañgi Qotei aqa medabu o qaji tamo nañgi ñumoqñeb. Ariya niñgi na olo nañgo sub gereiyeqñub.

<sup>49</sup> “Utru deqa Qotei powo koba ti unu qaji a endegsi marej, ‘E ijo medabu o tamo nañgi ti ijo anjam maro tamo nañgi ti qarinjritqa tamo unğasari bini bati endeqa unub qaji nañgoq giloqñibqa nañgi na nañgi jeutnjroqnsib tulañ ugeugeinjroqñqab. Osib qudei ñumoqñib moreñoqñqab.’ <sup>50-51</sup> O dal anjam qalie tamo, Qotei a nuñgo moma nañgo une kalil osim tamo unğasari bini bati endeqa unub qaji nañgo jejamuq di atelenqas. Nuñgo moma nañgo une di agi nañgi nami yqajqa utru atsib Kein na Abel qalnaq moiyej. Qotei a mandam atej bati deqa nañgi une di yqajqa utru ateb. Dena bosib bosib Sekaraia atra bijal ti atra tal ti ambleq di qalnab moiyej. E bole mernğwai. Une kalil di aqa awai uge Qotei na osim tamo unğasari bini bati endeqa unub qaji nañgi enjrqas.

<sup>52</sup> “O dal anjam qalie tamo, niñgi tulañ padalougetqab. Di kiyaaqa? Tamo unğasari nañgi Qotei qalieqajqa gam itqa mareqñabqa niñgi na olo gam getentetnjreqñub. Niñgi segi Qotei qalieqajqa gam itqa keresai. Deqa tamo unğasari nañgi dego gam di itqa yeqñab niñgi na olo gam getentetnjreqñub.”

<sup>53</sup> Osiqa Yesus a tigelosiqa tal di uratosiq gilej. Bati deqa dal anjam qalie tamo nañgi ti Farisi nañgi ti a qa minjñ oqetnjrnaqa anjam gargekoba nenemyoqñeb. <sup>54</sup> A anjam bei grotimqa nañgi a ojqaqqa deqa anjam gargekoba nenemyoqñeb a dadauryoqñeb.

## 12

### *Yesus a Farisi nañgo kumbra uge qa anjam marej*

<sup>1</sup> Onaqa tamo unğasari tulañ gargekoba nañgi Yesus unqajqa bosib koroosib jujunqobaeb. Sinğa waiyosib walwelqa keresai. Deqa tamo qudei na tamo qudei nañgo sinğa sosenjroqñeb. Bati deqa Yesus a aqa anğro nañgi joqsiqa nañgi sasalosib a na minjrej, “Niñgi geregere ñam atoqñiy. Farisi nañgi gisañ tamo. Nañgi anjam maro aiyelteqñub. Bem tiyeqnu qaji sum Farisi nañgo bem ti bulyimqa bem dena tiyekritosim tulañ kobaqujaqas. <sup>2</sup> Deqa niñgi quiy. Kumbra kalil kabuejunu qaji di boleq dqas. Anjam kalil uliejunu qaji di tamo nañgi qusib poinjrqas. <sup>3</sup> Deqa anjam kalil niñgi

ambruq di mareqñub qaji di suwanamqa tamo nanği quqwab. Anjam kalil ninği warum miligiq di mareqñub qaji di tamo nanği bijal gogeq di tigelosib palontqab.”

*Ninği Qotei segi ulaiyyi*

<sup>4</sup> Osiqa Yesus a olo marej, “O ijo anğro, ninği quiy. Ninği jeu tamo nanği ulainjraib. Nanği nuņgo jejamu segi qalsib moiyoṭqa kere. Nanği ninği gulbe bei eņgwa keresai. Deqa ninği nanği ulainjraib. <sup>5</sup> Tamo ninği ulaiyqab qaji agi deqa merygwai. Qotei a segi nuņgo jejamu moiyotosim bunuqna nuņgo qunuņ dego nıamyuwoq waiyqa kere. Deqa ninği a segi ulaiyyi.

<sup>6</sup> “Ninği qalie. Tamo nanği qebari sinjir silali kobaquja na awaiyosaieqñub. Silali kiñala na awaiyeqñub. Ariya Qotei na qebari sinjir nanği geregere taqatñreqnu. A na nanği uratñjrosaieqnu. <sup>7</sup> Dego kere Qotei a nuņgo gate banğa segi segi sisiyoqnsiq geregere taqateqnu. Deqa ninği ulaaib. Ninği qebari kalil nanği tulañ buññrejñub.”

*Iga Yesus aqa ñam marqajqa jemaigwasai*

<sup>8</sup> Osiqa Yesus a olo marej, “E Tamo Anğro. Ninği mandam tamo nanço ulatamuq di ijo ñam boleq atsib marqab di mondoñ e na kamba Qotei aqa lañ anğro nanço ulatamuq di nuņgo ñam boleq atsiy marqai. <sup>9</sup> Ariya ninği mandam tamo nanço ulatamuq di ijo ñam marqajqa asgingwas di mondoñ e kamba dego Qotei aqa lañ anğro nanço ulatamuq di nuņgo ñam marqajqa asgibqas.

<sup>10</sup> “E Tamo Anğro. Tamo bei na e misilinqbas une di Qotei na kobotqas. Ariya tamo bei na Mondor Bole misilinyqas une di Qotei na kobotqasai.

<sup>11</sup> “Bunuqna Juda tamo kokba nanği ninği ojsib nanço Qotei tal miligiq di tigeltñgosib nenemñgibqa ninği na kamba anjam kiye minjrçajqa deqa are koba qalaib. Rom nanço gate ti nanço mandor ti nanço ulatamuq di dego ninği tigeltñgibqa ninği na kamba anjam minjrçajqa ulaaib. <sup>12</sup> Bati deqa Mondor Bole na areqalo eņgimqa ninği anjam marqab.”

*Ñoro tamo qa yawo anjam*

<sup>13</sup> Onaqa tamo unğasari koroesoqneb qaji nanço ambleq dena tamo bei a tigelosiqa Yesus minjej, “O Qalie Tamo, ni ijo was minjimqa a na gago abu moiyej qaji aqa ñoro kalil ambleq na potosim taqal bei ebqas.” <sup>14</sup> Onaqa Yesus na minjej, “Tamo yai na e gilbqo deqa e nuņgo gulbe di gereiyqai?” <sup>15</sup> Degsi minjsiqa tamo unğasari kalil nanği endegsi minjrej, “Ninği ñoro koba oqajqa mamaulñgaiq. Ninği ñoro koba ti sqab dena ninği nıambile bole oqa keresai. Ninği ijo anjam deqa geregere are qaloqniy.”

<sup>16</sup> Osiqa yawo anjam bei endegsi minjrej, “Ñoro tamo bei soqnej. Aqa wauq di ingi tulan koba melioqnej. <sup>17</sup> Deqa a endegsi are qalej, ‘E kiyerqai? Ijo ingi tulan koba melieleñqo. Deqa e ingi di atqajqa tal keresaiibqo.’ <sup>18</sup> Osiqa marej, ‘E endegyqai. E ijo tal kalil konelenosiy olo tal kokba atelenqai. Osiy ijo ingi meli kalil tal kokbaq di jugwai. Ijo ñoro kalil dego dia jugelenqai. <sup>19</sup> Jugelenosiy marqai, “Ijo ingi ingi tulan koba agi atonum unu. Deqa e aqaratosiy lanja awesqai. Sosiy ingi ti ya ti uyoqnsiy areboleboleiboqngas. Wausau gargekoba gilqas ijo ingi ingi di koboqasai.”’ <sup>20</sup> Tamo di a degsi marnaqa Qotei na minjej, ‘Ni nanari tamo. Qolo qujai endeqa e ino qunun yaimitqa ni moiqam. Yimqa ingi ingi kalil ni na gereiyosim atonum qaji di tamo yai na olo oqas?’ Qotei na degsi minjej. <sup>21</sup> Dego kere tamo nanqi ñoro koba koroiyejunub qaji nanqo ñoro qoji padalqab. Nanqi lan qure qa ñoro saiqoji unub deqa nanqi Qotei aqa ñamgalaq di sougetesosib moreñqab.”

*Ningi bole sqajqa deqa areqalo kobaiyaib*

<sup>22</sup> Osiqa Yesus na aqa anqro nanqi endegsi minjrej, “Ningi mandamq endi bole sqajqa deqa areqalo kobaiyaib. Osib endegsib maraib, ‘Iga ingi qabe na osim uyqom? Gara qabe na osim gago jejamu kabutqom?’ Ningi degsib maraib. <sup>23</sup> Ningi ingi uyo na segi ñambile oqasai. Ningi gara jugoqngab dena segi nunqo jejamu bole sqasai. <sup>24</sup> Ningi qebari nanqi unjriy. Nanqi ingi yagosaieqñub. Ingi otorosib talq di atosaiieqñub. Ariya Qotei na qebari nanqi ingi anainjreqnu. Ningi qalie, qebari nanqi qunun saiqoji. Ningi tamo qunun ti. Ningi qebari nanqi tulan bunjrejunub. <sup>25</sup> Ningi mandamq endi sokobaiyqajqa deqa are koba qalaib. Ningi are koba qalqab dena ningi nunqo segi sqajqa bati olo yala totoryqa keresai. Sai bole sai. <sup>26</sup> Ningi wau kiñala deqaji yqa keresai deqa ningi kiyaaq ingi qudei qa are koba qaleqñub?

<sup>27</sup> “Ningi ñam so unjriy. Nanqo wala kiyersib branteqñub di ningi qaliesai. Nanqi segi wauosaieqñub. Nanqo segi wala gereiyosaieqñub. Deqa e ningi endegsi mernqwai. Nami Solomon a gara wala boledamu jugoqnej. Ariya ñam so aqa wala dena Solomon aqa wala tulan bunyejunu. <sup>28</sup> Mañ lanaj a bini oqwas nebe tamo nanqi na ginqenqosib ñamyuwoq waiyqab. Mañ lanaj di Qotei na wala enjreqnu. Deqa ningi kiyaaq Qotei qa nunqo areqalo sinqilatqa yonub keresaiingwo? Ningi mañ lanaj sai. Ningi tamo qunun ti. Deqa ningi endegsi poinqem, Qotei a ningi dego gara enqoqngas. <sup>29</sup> Ningi areqalo kobaiyosib endegsib maraib, ‘Iga ingi ti ya ti qabe na osim uyqom?’ Ningi degsib maraib. <sup>30</sup> Tamo unqasari Qotei qaliesai qaji nanqi ingi ingi deqa are koba qaleqñub. Ariya ningi deqa are koba qalaib. Nunqo Abu a qalie, ningi lanja sqa keresai.

Ningi ingi ingi deqaji oqnsib sqab. <sup>31</sup> Deqa ningi Qotei na taqatngosim nungo Mandor Koba sqajqa singilaoqniy. Ningi degyqab di Qotei na kamba ingi uyo ti gara ti dego engoqngas.”

*Ningi lan qure qa ingi ingi oqajqa deqa are qaloqniy*

<sup>32</sup> Osiqua Yesus a olo marej, “O ijo kaja du du ningi ulaaib. Nungo Abu a nungo Mandor Koba sosim ningi taqatngwajqa areareteqnu. <sup>33</sup> Deqa ningi kumbra endegyiy. Ningi nungo ñoro kalil qarinyosib silali osib tamo ingi ingi saiqoji nanngi di jeisib enjriy. Osib silali jugwajqa qun ugeosaieqnu qaji di gereiyosib lan qure qa ingi ingi elenosib di jugelenoy. Ingi ingi di koboqa keresai. Bajin tamo nanngi bosib oqasai. Sisimbin na ugetqasai. Ingi ingi di gaigai sqas. <sup>34</sup> Sawa qabia ino ñoro bole unu dia ino are miligi dego singilatim sqas.”

*Kangal tamo bole a tal lanja olo bqajqa bati qa tariñeqnu*

<sup>35</sup> Osiqua Yesus a olo marej, “Ningi nungo gara tigelenosib nungo ingi ingi kalil gereiyosib wanal qatrentosib ijo bqajqa bati qa tariñosib soqniy. <sup>36</sup> Tamo bei a goiyo kobaq dena olo bosim aqa talq di brantosim siranme kindokindonjamqa aqa kangal tamo nanngi a qa tariñejunub qaji nanngi siranme waqtoqujatqab. Dego kere ningi ijo bqajqa bati qa tariñosib soqniy. <sup>37</sup> Tal lanja aqa kangal tamo nanngi a qa tariñosib ñam atoqnibqa bosim degsi unjrimqa nanngi tulan areboleboleinjrqas. Deqa a na nanngi metnjrim awoelenabqa ingi anainjroqngas. <sup>38</sup> A qolo jige kiyo nebeqa laqnimqa kiyo bosim aqa kangal tamo nanngi a qa tariñosib ñam atoqnibqa degsi unjrimqa nanngi tulan areboleboleinjrqas.

<sup>39</sup> “Ningi are qaliy. Bati gembu bajin tamo a bosim tal paratqas di tal lanja a qalieqasai. A nami qalieosiq sonaq qamu bajin tamo a bosiq tal paratqa yonaq unsiq wiyej qamu. <sup>40</sup> Dego kere e Tamo Anqro bqajqa bati ningi qaliesai. E bosiy ningi prughtngaim deqa ningi gegerere ñam atoqnsib e qa tariñoqnsib soqniy.”

*Tamo yai a wau tamo bole?*

<sup>41</sup> Onaqa Pita na Yesus minjej, “O Tamo Koba, ni yawo anjam maronum di iga segi quqwajqa kiyo tamo ungasari kalil nanngi dego quqwajqa kiyo?” <sup>42</sup> Onaqa Tamo Koba a na minjej, “Kangal tamo yai a areqalo bole ti sosiqa gaigai wau bole yeqnu? Kangal tamo di tal lanja na endegsi minjqas, ‘Ni na ijo kangal tamo kalil nanngi gegerere taqatnjroqnsimqa nanngo ingi uyqajqa batioqnimqa ingi anainjroqne.’ <sup>43</sup> Degsi minjsimqa sawa beiq gilsim di sqas. Olo puluosim wau kalil a na aqa kangal tamo yej qaji di kalil keretosim soqnimqa a bosim unimqa kangal tamo di a tulan areboleboleiyqas. <sup>44</sup> Deqa e bole merngwai. Kangal tamo di a wau boledamu yej deqa

tal lanja na aqa inġi inġi kalil osim aqa banq di atim a na taqatetoqnqas. <sup>45</sup> Ariya kanġal tamo di a endegsi are qalqas, 'Ijo tamo koba a urur bqasai.' Degsi are qalsimqqa a na kanġal tamo ti kanġal uña ti nanġi lanja lanja kumbainjnroqnqas. Osim inġi ti wain ti uyoqnsim nanarioqnqas. <sup>46</sup> Aqa tamo koba bqajqa bati a qaliesai deqa a kumbra degsim yoqnimqqa aqa tamo koba brantoqujatosim unimqqa a tulañ prugugetqas. Deqa aqa tamo koba na a qalougetosim tamo nanġi Qotei qa nanġo areqalo sinġilatosaieqnu qaji nanġo so sawaq waiyim aiqas.

<sup>47</sup> "Tal lanja na aqa kanġal tamo bei minjqas, 'Ni wau di ye.' Yimqqa a geregere qusim ariya a olo asgimosim wau di yosaiamqqa tal lanja na a kumbainjyogargekobatqas. <sup>48</sup> Ariya tal lanja na aqa kanġal tamo bei minjqas, 'Ni wau di ye.' Yimqqa a geregere quosai deqa a wau di yosaiamqqa tal lanja na a jinġa na kumbainjoqujaitqas. Niġi quiy. Qotei na tamo bei wau koba yimqqa a wau di ojsim olo wau tulañ koba dego ojeme. Qotei na tamo bei aqa banq di wau koba atimqqa a wau di taqatosim olo wau tulañ koba dego taqateme."

*Yesus na tamo unġasari nanġi pupoinjrimqqa nanġi jeu jeu sqab*

<sup>49</sup> Osiqa Yesus a olo marej, "E nġamyuwo waiyit mandamq aiqas. E deqa bem. Deqa e Qotei endegsi pailyeqnum, 'O Abu, nġamyuwo di urur pulonjeme.' <sup>50</sup> Niġi quiy. E yanso bei oqai. E yanso di osaiunum deqa e are tulañ gulbekobaibeqnu. <sup>51</sup> O ijo anġro, niġi kiyersib are qalonub? E na qaja kobotitqqa tamo unġasari nanġi geregere lawo na sqajqa e deqa bem kiyo? Sai. E na qaja kobotqajqa bosai. E na tamo unġasari nanġi pupoinjritqqa nanġi jeu jeu sqajqa deqa bem. <sup>52</sup> Bini bati endeqa ti bunuq qa ti tamo 5 tal qujaiq di unub qaji nanġi ijo ñam qa jeu jeu sqab. Tamo qalub nanġi na tamo aiyel jeutnroqnqab. Tamo aiyel nanġi na tamo qalub jeutnroqnqab. <sup>53</sup> Abu nanġi na nanġo segi anġro mel nanġi jeutnroqnqab. Anġro mel nanġi na nanġo segi abu nanġi jeutnroqnqab. Ai nanġi na nanġo segi anġro sebiñ nanġi jeutnroqnqab. Anġro sebiñ nanġi na nanġo segi ai nanġi jeutnroqnqab. Ain qeli nanġi na nanġo segi ain yala nanġi jeutnroqnqab. Ain yala nanġi na nanġo segi ain qeli nanġi jeutnroqnqab."

*Kumbra bini branteqnu qaji di tamo nanġi utru poinjro-saieqnu*

<sup>54</sup> Osiqa Yesus na tamo unġasari kalil nanġi endegsi minjrej, "Señ aiyuq dena lanġbi tigelamqqa niġi unsib marqab, 'Awa bqas.' Degsib marqab awa bqas. <sup>55</sup> Meli jagwa bamqqa niġi unsib marqab, 'Sawa kanġanqas.' Degsib marqab sawa kanġanqas. <sup>56</sup> Niġi gisañ ani. Niġi mandam ti lanġ ti unoqnsib

geregere pegiyeqnub. Ariya kiyaaqa kumbra bini branteqnu qaji di ninigi unoqnsib utru poiŋgosaieqnu?”

*Tamo bei a ni qa anjam soqnimqa ninigi segi aiyel anjam urur gereiyuojatij*

<sup>57</sup> Osiqa Yesus a olo marej, “Kumbra bole ti kumbra uge ti di ninigi kiyaaqa geregere pegiyosaieqnu? <sup>58</sup> Tamo bei a ni qa anjam soqnimqa ninigi ombla walwelosib anjam pegiyo talq giloqnsibqa gamq di ninigi segi aiyel anjam urur gereiyuojatij. Yosib anjam moiotosib a ni osim anjam pegiyo talq gilqasai. Ariya ninigi gamq di anjam gereiyqasai di a na ni osi gilsimqa anjam pegiyo tamo aqa ulatamuq di tigeltmimqa anjam pegiyo tamo a ni osim qaja tamo nanjo banq di atqas. Yimqa nanji na ni osib tonto talq di waimqab. <sup>59</sup> Deqa e ni mermqai. Ni tonto talq dena olo oqedqasai. Ni mati ino une aqa awai kalil keretimqa di ni uratmib oqedqam.”

## 13

*Tamo a are bulyqasai di a padalqas*

<sup>1</sup> Onaqa bati deqa tamo qudei nanji Yesus aqa areq bosib minjeb, “O Tamo Koba, Galili tamo qudei nanji wagme osib Qotei atraiyeq nabqa Pailat na aqa qaja tamo nanji qarijnrnaq gilsib nanji ñumnab nanjo leŋ aisiq wagme nanjo leŋ ti tuturej.” <sup>2</sup> Onaqa Yesus na minjrej, “Ninigi kiyersib are qalonub? Galili tamo nanji di une gargekoba yoqneb deqa gulbe di nanjoq di brantej. Galili tamo qudei nanji une gargekoba yosaieqnu. Ninigi deqsib are qalonub kiyo? <sup>3</sup> Di sai. E ninigi merngwai. Ninigi are bulyqasai di ninigi kalil dego padalqab. <sup>4</sup> Jerusalem dia tal olekoba aqa ñam Siloam di puosiqa tamo 18 nanji ñumnabq moreneb. Deqa ninigi kiyersib are qalonub? Tamo 18 moreneb qaji nanji une gargekoba yoqneb deqa nanji deqsib moreneb. Tamo qudei Jerusalem di unub qaji nanji une gargekoba yosaieqnu. Ninigi deqsib are qalonub kiyo? <sup>5</sup> Di sai. E ninigi merngwai. Ninigi are bulyqasai di ninigi kalil dego padalqab.”

*Qura geitosai qaji aqa yawo anjam*

<sup>6</sup> Osiqa Yesus a yawo anjam bei endegsi marej, “Tamo bei a aqa wauq di qura yagej. Bunuqna a qura gei oqajqa marsiq bej. Bosiq unej qura geitosai. <sup>7</sup> Deqa a na aqa wau taqato tamo minjej, ‘Ni que. Wausau qalub gilqo e boqnsim ñam atoqnem qura geitosai. Deqa unqum. Qomsim waiy. A kiyaaqa mandam aqa namur laŋa saitqas?’ <sup>8</sup> Onaqa wau taqato tamo na minjej, ‘O Tamo Koba, ni mati uratim soqnem. Wausau qujai endeqa e na qura utruq di moror qamsiy namur atsiy unqai. <sup>9</sup> Degyitqa wausau bei qa geitqas kiyo sai kiyo?”



Saiamqa ni marim e qomsiy waiyqai.’ ” Yesus a yawo anjam degsi marej.

*Yori bati qa Yesus na uña bei boletej*

<sup>10-11</sup> Onaqa yori bationaqa Yesus a Juda nanço Qotei tal miligiq gilsıqa Qotei aqa anjam minjroqnej. Minjroqnsıqa ñam atej uña bei sonaq unej. Uña di a maiyej. Mondor uge na ma yonaqa wausau 18 a gronosi q laqnej. A tıntın tıgelqa keresai. <sup>12</sup> Deqa Yesus na uña di unsiq metonaqa aqa areq bonaqa minjej, “O uña, ni que. Endego ino ma di ni uratmqas.” <sup>13</sup> Degsi minjsıqa uña aqa jejamuq di ban atnaqa aqa ma koboonaqa a tıntın tıgelosiqa Qotei aqa ñam soqtoqnej. <sup>14</sup> Onaqa Qotei tal taqato tamo a Yesus aqa manwa di unsiqa minjin oqetej. Di kiyaaqa? Yesus a yori bati qa uña di boletej deqa. Deqa Qotei tal taqato tamo na tamo ungasari nançi endegsi minjrej, “Bati 6 iga waueqnum. Deqa wau qa bati segi nunço ma boletqajqa boqniy. Yori bati qa nunço ma boletqajqa baib.” <sup>15</sup> Onaqa Tamo Koba a na kamba minjej, “Ninçi gisanj tamo. Ninçi yori bati gaigai nunço makau ti donki ti tontonub unub di sil palontoqnsib joqoqnsib ya anainjreqnub. <sup>16</sup> Ariya uña endi a Abraham aqa moma. Satan na ma yonaqa wausau 18 ma ti soqnej. Deqa e kiyaaqa yori bati qa aqa ma di uratit sqas? Sai. E boletqai.” <sup>17</sup> Yesus a degsi marnaqa aqa jeu tamo kalil nançi aqa anjam di qusıbqa jemainjrej. Kumbra kalil Yesus a yoqnej qaji di tulan boleqıja deqa tamo ungasari kalil nançi tulan areboleboleinjroqnej.

*Sis yago qa yawo anjam*

<sup>18</sup> Onaqa Yesus a olo marej, “Qotei na aqa segi tamo ungasari nançi taqatnjrsim nanço Mandor Koba sqas. Yawo anjam kiye ninçi merñgitqa Qotei aqa kumbra di aqa utru ninçi geregere poinçwas? <sup>19</sup> Od, e qalieonum. Qotei aqa kumbra di tamo bei na sis yago osiq aqa wauq di yagej dego kere. Bunuqna sis a oqsıq tulan kobaqujaonaqa qebari nançi bosib aqa daniq di simi ateleneb.”

*Bem tiyeqnu qaji sum aqa yawo anjam*

<sup>20</sup> Osıqa Yesus a olo marej, “Qotei na aqa segi tamo ungasari nançi taqatnjrsim nanço Mandor Koba sqas. Yawo anjam kiye ninçi merñgitqa Qotei aqa kumbra di aqa utru ninçi geregere poinçwas? <sup>21</sup> Od, e qalieonum. Qotei aqa kumbra di bem tiyeqnu qaji sum bul. Uña bei a bem tiyeqnu qaji sum kiñala osıqa bem sum lanaj ti turtosıq web kobaqujaq di bulyonaqa bem kalil tiyekritej.”

*Ninçi sirançe kiñala miligiq gilqajqa singılaoiy*

<sup>22</sup> Yesus a dena tigelosiqa Jerusalem aiqajqa gam dauryosiq qure kokba ti qure kiñilala ti dia Qotei aqa anjam minjre minjre aiyocnej. <sup>23</sup> Aiyeqnaqa tamo bei na minjej, “O Tamo Koba, Qotei na tamo quja quja segi elenqas kiyo? Ni iga geregere merge.” Onaqa Yesus na kamba minjrej, <sup>24</sup> “Ningi siranme kiñala miligiq gilqajqa singilaoiy. E ningi merngwai. Tamo gargekoba nangi siranme kiñala miligiq gilqajqa singilaoqrib ugeinjroqnaqas. <sup>25</sup> Tal aqa abu a tigelosim siranme kabutimqa ningi oqeq di tigelosibqa siranme kindokindonosisib minjoqnaqab, ‘O Tamo Koba, ni na siranme waqtetgime.’ Amqa a na kamba merngwas, ‘Ningi tal qabe? E ningi qaliesai.’ <sup>26</sup> Degsi merngimqa ningi na minjqab, ‘O Tamo Koba, iga ni ombla inji ti ya ti uyoqnem. Ni gago qureq di Qotei aqa anjam plaltosim mergoqnem.’ <sup>27</sup> Degsib minjibqa a na kamba merngwas, ‘Ningi tal qabe? E ningi qaliesai. Deqa ningi kalil jaraiyy. Ningi kumbra uge yo qaji tamo.’ <sup>28</sup> A na ningi degsim merngsim ningi qalag di breingwas. Yimqa Abraham, Aisak, Jekop, Qotei aqa medabu o qaji tamo kalil nangi ti Qotei na taqatnjrsim nanjo Mandor Koba sqas. Soqnimqa ningi nangi unjrsibqa akamkobaoqnsib pailoqnsib nunjo jaqatin qa qalagei anjam atoqnaqas. <sup>29</sup> Tamo ungasari gargekoba nangi sawa guta na guma na tauñ na beben na ti bosib Qotei aqa singaq di koroelenabqa Qotei a nanjo Mandor Koba sosim nangi taqatnjrqas. Yimqa nangi Qotei ombla awoosib inji uyoqnaqab. <sup>30</sup> Deqa ningi quiy. Tamo qudei bini ñam ti unub qaji nangi mondon ñam saiqoji sqab. Ariya tamo qudei bini ñam saiqoji unub qaji nangi mondon ñam ti sqab.”

### *Yesus a Jerusalem nangi qa dulej*

<sup>31</sup> Onaqa bati deqa Farisi qudei nangi Yesus aqa areq bosib minjeb, “Mandor Herot a ni lumsim moiyoqtmqa mareqnu. Deqa ni sawa endi uratosim ulañ.” <sup>32</sup> Onaqa Yesus na kamba minjrej, “Ningi gilsib gisan tamo Herot a endegsib minjiy, ‘Yesus a marqo, “Bini e mondor uge uge nangi winjroqnsiyqa tamo ma ti nangi boletnjroqnaqai. Nebe dego e wau di yoqnaqai. Ariya alieb e ijo wau di kobotqai.” ’ Ningi gilsib Herot degsib minjiy. <sup>33</sup> Bini e walwelosi aisiy nebe olo tigelosiy aisiy ariya alieb e Jerusalem di brantqai. E degyqai. Di kiyayaqa? Jerusalem dia qujai jeu tamo nangi na Qotei aqa medabu o tamo nangi ñumeqnaqab moreñeqnub. Nangi qure beiq di nangi ñumosaieqnub.

<sup>34</sup> “O Jerusalem qure, O Jerusalem qure, ni na Qotei aqa medabu o tamo nangi ñumoqnsim moiyoqtmqa mareqnu. Osim tamo ungasari Qotei na inoq qarinjreñeqnu qaji nangi menin na ñumeqnam moreñeqnub. Bati gargekoba e ino angro nangi tuwe du du bul koroinjrqajqa yeqnam ni saideqnum. <sup>35</sup> Deqa

ninigi quiy. Qotei a nungo atra tal koba uratetngimqa a lanja sqas. Deqa e ninigi endegsi mernjwai. Ninigi olo e nubqasai. Degsim gilsim mondon e olo lanj qureq na boqnitqa ninigi e nubsib marqab, ‘Tamo a bqo endi Tamo Koba aqa ñam na bqo. Deqa Qotei na a tulanj geregereiyeqnu.’ ”

## 14

### *Tamo bei jejamu sunyelenej qaji di Yesus na boletej*

<sup>1</sup> Yori bati bei Yesus a Farisi gate bei aqa talq gilsiq a ombla inji uyoqneb. Inji uyeq nabqa tamo qudei tal dia soqneb qaji nanji Yesus koqyoqneb. <sup>2</sup> Yesus aqa areq di tamo bei jejamu sunyelenej qaji a awesoqnej. <sup>3</sup> Deqa Yesus na tamo di unsiqa dal anjam qalie tamo nanji ti Farisi nanji ti endegsi nenemnjrej, “Ninigi mariy. Yori bati qa tamo boletqajqa di kere kiyo? Dal anjam a kiyersi marqo?” <sup>4</sup> Onaqa nanji na kamba anjam bei Yesus minjosai. Nanji mequmesoqneb. Deqa Yesus na tamo di aqa jejamu ojsiq aqa ma boletej. Osiqa qarinyonaq gilej. <sup>5</sup> Onaqa Yesus na Farisi nanji olo nenemnjrej, “Nunjo angro kiyo nunjo makau kiyo yori bati qa ulonjosim subq aiyimqa ninji na aqaryaiyosib subq dena osib goge atqab e? Ninji na merbiy.” <sup>6</sup> Onaqa nanji na kamba olo anjam bei Yesus minjqqa yonab keresaiinjrej.

### *Ninji na nunjo segi ñam soqtaib*

<sup>7</sup> Bati deqa Yesus a ñam atej di tamo qudei nanji inji uyo qa marsib talq bosib tamo ñam ti nanjo awo jaramq di awoosib inji uyeq nab unjrej. Deqa a na nanji yawo anjam endegsi minjrej, <sup>8-9</sup> “Tamo bei na maruro atsim ni metmimqa ni tamo ñam ti nanjo awo jaramq di namo awoaim. Ni tamo ñam ti nanjo awo jaramq di awoqam di goiyo lanja na tamo ñam ti bei metim bam ni mermqas, ‘Ni awo jaram di uratosim tamo endi yim awoqas.’ Yim ni jemaimim tamo lanaj nanjo awo jaramq di awoqam. <sup>10</sup> Deqa tamo bei na maruro atsim metmimqa ni tamo lanaj nanjo awo jaramq di awo. Yimqa goiyo lanja na bosim mermqas, ‘O was, ni bosim tamo ñam ti nanjo awo jaramq endi awo.’ Yim tamo kalil inji uyeq nub qaji nanjo ñamgalaq di ni ñam ti sqam. <sup>11</sup> Tamo kalil nanjo segi ñam soqteq nub qaji nanji Qotei na olo ñam aguq atetnjrqas. Ariya tamo nanjo segi ñam aguq ateq nub qaji nanji Qotei na olo ñam soqtetnjrqas.”

### *Ninji na tamo sougetejunub qaji nanji gereinjriy*

<sup>12</sup> Osiqa Yesus na goiyo lanja minjej, “Ni maruro atsimqa ino segi was nanji ti ino segi kadoj nanji ti tamo ungasari ñoro koba ejunub qaji nanji ti metnjraim. Ni degyqam di ni endegsi are qalqam, ‘Nanj na kamba maruro atsib e metbib

gilit inġi anaibqab.’ <sup>13</sup> Ni degyaim. Ni maruro atsimqa tamo ñoro saiqoji nanġi ti tamo jejamu lainjro qaji nanġi ti tamo sinġa uge nanġi ti tamo ñam qandimo nanġi ti metnjrim bab inġi anainjre. <sup>14</sup> Amqa ni tulañ areboleboleimqas. Di kiyaaqa? Nanġi ni kamba inġi anaimqa keresai. Deqa mondoñ tamo bole bole nanġi olo subq na tigelu batiamqa Qotei na kamba awai tulañ boledamu ni emqas.”

*Yesus a maruro qa yawo anjam marej*

<sup>15</sup> Yesus a anjam degsi marnaqa tamo bei Yesus ombla awoosib inġi uyoqneb qaji a qusiqa minjej, “Mondoñ Qotei na aqa segi tamo unġasari nanġi taqatnjrsim nanġo Mandor Koba sqas. Sosimqa a na nanġi inġi anainjrim awoosib koba na inġi uyoqnqab. Deqa nanġi tulañ areboleboleinjrim sqab.”

<sup>16</sup> Onaqa Yesus na kamba yawo anjam bei endegsi minjej, “Tamo bei a maruro atqa osiqa tamo gargekoba nanġi aqa maruro unqa metnjrej. <sup>17</sup> Aqa maruro bati brantonaqa a na aqa kañgal tamo bei qarinyonaq gilsiqqa tamo nanġi di minjrej, ‘Niñgi boiy. Inġi inġi kalil gereiyosib atonub unu.’ <sup>18</sup> Degsi minjrnaca nanġi kalil bqa urateb. Osib minjoqneb, ‘Iga bqa keresai.’ Bei na minjej, ‘E mandam bunuj awaiyonum. Di unqajqa aiqai. Deqa ni goiyo lanja minje, “E bqa keresai.” ’

<sup>19</sup> Bei na minjej, ‘E makau bunuj 10 awaiyem. Deqa bini e nanġi wau enjrqai. Deqa ni goiyo lanja minje, “E bqa keresai.” ’ <sup>20</sup> Bei na minjej, ‘E bini unja bunuj onum. Deqa e dego bqa keresai.’

<sup>21</sup> “Onaqa kañgal tamo a olo puluosiq aisiq anjam kalil nanġi na minjeb qaji di aqa tamo koba minjnaqa a minjin oqetonaqa olo qarinyosiqqa minjej, ‘Ni urur gilsimqa gam kokbaq di gam kiñilalaq di tamo inġi inġi saiqoji nanġi ti tamo jejamu lainjro qaji nanġi ti tamo ñam qandimnjro qaji nanġi ti tamo sinġa ugeinjro qaji nanġi ti itnjrsimqa joqsim ijo talq boiy.’

<sup>22</sup> Onaqa kañgal tamo a olo gilsiqqa tamo nanġi di kalil joqsi bosiqqa aqa tamo koba minjej, ‘O Tamo Koba, e ino anjam dauryosim agi nanġi kalil joqsi bonum. Ariya ino tal tamo na maqosai unu.’

<sup>23</sup> “Onaqa goiyo lanja na olo aqa kañgal tamo qarinyosiqqa minjej, ‘Ni gilsim gam kalilq dena ti nañuq dena ti tamo nanġi joqsim boiy. Nanġi kalil babqa ijo tal magwas. <sup>24</sup> E ni mermqai. Tamo nanġi e nami metnjronum bqa uratonub qaji nanġi ijo maruro unqasai.’ ”

*Tamo a Yesus dauryqa marsimqa a mati geregere are qal-sim Yesus dauryem*

<sup>25</sup> Yesus a dena tigelosiqqa walwelosiq aiyeqnaqa tamo unġasari tulañ gargekoba nanġi a dauryosib aiyoqneb. Deqa

a bulosiqa nanği endegsi minjrej, <sup>26</sup> “Tamo bei a e daurbqa osimqa aqa abu, aqa ai, aqa n̄auñ, aqa anğro nanği, aqa was nanği, aqa jaja nanği, aqa segi jejamu dego jeutn̄jqasai di a ijo anğro sqa keresai. <sup>27</sup> Tamo bei na aqa segi n̄amburbas qoboiyosim e daurbqasai di a ijo anğro sqa keresai.”

<sup>28</sup> Osiqa nanği endegsi minjrej, “Tamo bei a tal atqa osimqa a mati awoosim tal kobotqajqa aqa awai geregere are qalsim aqa silali sisiyqas. Aqa silali kereqas kiyo sai kiyo degsi are qalqas. <sup>29-30</sup> A mati degsi are qalqasai di a tal aqa utru atsim bati amble di aqa silali saiamqa tal kobotqa keresaiiyimqa tamo nanği unsib a kikiyosib minjqab, ‘Ni tal aqa utru atem di ni kobotqa keresai.’ Yim a jemaıyqas.

<sup>31</sup> “Mandor bei na mandor bei qoto itqa marsimqa a mati awoosim geregere endegsi are qalqas, ‘Ijo qaja tamo 10 tausen nanği na mandor di aqa qaja tamo 20 tausen nanği n̄umsib winjrqa kere kiyo?’ <sup>32</sup> A degsi are qalsim marqas, ‘E na mandor di qoto bunyqa keresai.’ Degsi marsimqa aqa wau tamo qudei nanği qarın̄njrim gilsib mandor di minjqab, ‘Uñgum, iga qotqa uratonum.’

<sup>33</sup> “Dego kere tamo bei na e daurbqa osimqa a mati aqa segi inği inği kalil uratqasai di a ijo anğro sqa keresai.”

### *Bar qa yawo anjam*

<sup>34</sup> Osiqa Yesus a olo marej, “Bar a bole. Inği q di bar atoqnib aqa uyo boledamuqas. Ariya bar aqa qajarara koboqas di inği kiye na olo qajararatqas? Di keresai. <sup>35</sup> Bar aqa qajarara koboqas di a ugeqas. Iga bar di mandam ti bulyonamqa mandam namuryqa keresai. Deqa iga bar di uratosim waiyqom. Tamo a dabkala ti sqas di a ijo anjam endi geregere quem.”

## 15

### *Kaja du alelqo qaji aqa yawo anjam*

<sup>1</sup> Bati bei takis o qaji tamo nanği ti une tamo nanği ti kalil Yesus aqa anjam quqwa marsibqa aqa areq bosib koroeb. <sup>2</sup> Koroonabqa Farisi nanği ti dal anjam qalie tamo nanği ti Yesus yomuiyosib mareb, “Yesus a une tamo nanği joqoqn̄siqa koba na inği uyeqñub.”

<sup>3</sup> Degsib marnabqa Yesus a nanço anjam di qusiqa yawo anjam endegsi minjrej, <sup>4</sup> “Tamo bei aqa kaja 100 nanği n̄in̄ uyoqn̄ibqa qujai bei alelamqa a na kaja 99 nanği uratn̄jsim qujai alelqo qaji di n̄amosim gilsim itqas. <sup>5</sup> Itosim areboleboleiyim soqtosim qoboiyqas. <sup>6</sup> Qoboiyosim aisim aqa qureq di brantosim aqa was nanği ti aqa qure qujai nanği ti kalil koroin̄jsimqa minjrqa, ‘Ninği uniy. Ijo kaja alelqo qaji agi olo itonum! Deqa ninği e ombla areboleboleigim sqom!’ ”

<sup>7</sup> Osiqa Yesus a olo marej, “Dego kere une tamo qujai a are bulyqas di lan goge dia nanği a qa tulan areboleboleinjrqas. Tamo 99 nanği mareqnub, ‘İga tamo bole une saiqoji. Deqa İga are bulyqasai.’ Nanği qa lan goge dia nanği areboleboleinjrqasai. Ariya une tamo qujai a are bulyqas di nanği a qa tulan areboleboleinjrqas.”

*Silali loumqo qaji aqa yawo anjam*

<sup>8</sup> Osiqa Yesus a olo marej, “Uña bei aqa meniñ silali 10 soqniñqa meniñ silali qujai loumiñqa a wañal qatrentosim aqa talq di mañ solsim ñamosim itqas. <sup>9</sup> İtosim gilsim aqa was nanği ti aqa qure qujai nanği ti kalil koroinjsimqa minjrqas, ‘İjo meniñ silali qujai loumqo qaji ağı olo itonum! Deqa niñgi e ombla areboleboleigim sqom!’ ” <sup>10</sup> Osiqa Yesus a olo marej, “Dego kere une tamo qujai a are bulyqas di Qotei aqa lan anğro nanği a qa tulan areboleboleinjrqas.”

*Tamo bei aqa ñiri aiyel qa yawo anjam*

<sup>11</sup> Osiqa Yesus a olo marej, “Tamo bei aqa ñiri aiyel soqneb. <sup>12</sup> Bati bei ñiri yala na aqa abu minjej, ‘O Abu, ni ino ñoro kalil ambleq na potosim taqal bei e ebe.’ Degsi minjnaqa abu na aqa ñoro ambleq na potosıqa taqal bei aqa ñiri yala yej. Taqal bei aqa ñiri koba yej. <sup>13</sup> Onaqa bati bei ñiri yala na aqa ñoro kalil qarınysıqa silali osıq tigelosıqa sawa beıq gilej. Gilsıq dia diqosi laqnsıqa aqa silali kalil uyekritej. <sup>14</sup> Onaqa sawa dia mam koba aiyej deqa ñiri yala a ingi tulan saiiyej. <sup>15</sup> Deqa a sawa deqaji tamo bei aqaq gilnaqa minjej, ‘Ni ijo bel taqatnjroqnsim ingi anainjroqne.’ <sup>16</sup> Onaqa a bel nanği taqatnjroqnsıqa ingi anainjroqnej. Osiqa are qaloqnej, ‘E mam koba unum. Deqa e endegyqai. Bel nanği ingi oto uratoqnitqqa di oqnsiy uyoqnitqqa dena e kereoqnqas.’ A degsi are qalsıq soqnej. Di kiyaya? Tamo bei na ingi anaiyosaiyoqnej deqa.

<sup>17</sup> “Osiqa olo are qalej, ‘E kumbra grotonum deqa e mam na moiqa laqnum. İjo abu aqa wau tamo nanği ingi koba uyeqnub. E segi qujai mam na moiqa laqnum. <sup>18</sup> Deqa e olo puluosiy ijo abu aqaq aisiy minjqai, “O Abu, e Qotei aqa ñamgalaq di une kobaquja atonum. İno ñamgalaq di dego e une kobaquja atonum. <sup>19</sup> Deqa e ino anğro sqa keresai. Deqa ni marimqa e ino wau tamo sosiy ni wauetmoqnqai.” ’ <sup>20</sup> Degsi are qalsıqa tigelosıq aqa abu aqaq olo aiyej.

“Aiyeqnaqa aqa abu ñam atsiqa isaq di unsiq a qa tulan dulosıqa urur ti gilsıq a soqonyosıqa qalaqalaiyoqnsıqa kundogyoqnej. <sup>21</sup> Onaqa minjej, ‘O Abu, e Qotei aqa ñamgalaq di une kobaquja atonum. İno ñamgalaq di dego e une kobaquja atonum. Deqa e ino anğro sqa keresai.’ <sup>22</sup> Degsi minjnaqa aqa

abu na aqa kanğal tamo qudei nanğı minjrej, ‘Ninğı urur ti gilsib gara jugo tulañ boledamu olekoba di osi bosib jigeti. Banrıñ dego osi bosib aqa ban duq di jigeti. Singa tatal dego osib aqa sinğaq di jigeleneti. <sup>23</sup> Makau meli bunuj didiqo di qalsib goiyi. Goisib osib babqa iga koba na uysim areboleboleigim sqom. <sup>24</sup> Iga degyqom. Di kiyaaqa? Ijo anğro yala a moiyo bulosiq olo ñambile sosiq bqo deqa. A loumej agi gagoq di olo brantqo.’ Degsi minjrnaqa nanğı aqa anjam kalil di dauryosib makau goisib koba na awoosib areboleboleinjrnaq soqneb.

<sup>25-26</sup> “Ariya ñiri koba a wauq di sosiq dena puluosi bosiq tal jojomyosiq nanğı areboleboleinjrnaq lou tueqnab qusiq kanğal anğro bei metonaq aqa areq bonaqa nenemyej, ‘Nanğı kiyaaqa lou tueqnub?’ <sup>27</sup> Degsi nenemyonaqa kanğal anğro dena minnej, ‘Ino was yala a olo bqo. Deqa ino abu na makau meli bunuj didiqo di qalqo nanğı uyoqnsib areboleboleinjrnaq lou tueqnub. Aqa anğro a bole sosiq olo brantqo deqa lou tueqnub.’ <sup>28</sup> Degsi minjnaq qusiq ñiriñosiq qudalej. Osiq tal miligiq gilqa uratej. Deqa aqa abu a talq dena oqedosiq minnej, ‘O ijo anğro, ni tal miligiq au. Bamqa iga koba na awoosim inğı uysim areboleboleigim sqom.’ <sup>29</sup> Onaqa ñiri koba a na kamba aqa abu minnej, ‘O Abu, ni que. E wausau gargekoba ino anjam dauryosim ni wauetmoqnem. E ino anjam bei gotranjosaioqnem. Ni deqa e qa are qalsim kaja du bei qalsim goiyosaieqnum. E ijo kadoi nanğı ti koba na areboleboleigosaieqnu. <sup>30</sup> Ariya ino anğro yala a na ino ñoro osiq gam qaji uña nanğı ombla sambalaoqnsiq silali kalil uyekritej. Osiq olo bqoqa ni a qa tulañ areboleboleimqoqa makau meli bunuj didiqo di agi qaletonum.’

<sup>31</sup> “Degsi minjnaqa aqa abu na kamba minnej, ‘O ijo anğro, ni gaigai e ombla unum. Ijo inğı inğı kalil di ino dego. <sup>32</sup> Ariya bini iga maruro atsimqa areboleboleigeqnu. Di kiyaaqa? Ino was a moiyo bulosiq olo ñambile sosiq bqo. A loumej agi gagoq di olo brantqo.’ ”

## 16

### *Yesus a ñoro taqato tamo qa yawo anjam marej*

<sup>1</sup> Osiq Yesus a olo aqa anğro nanğı endegsi minjrej, “Ñoro tamo bei soqnej. Aqa ñoro kalil aqa wau tamo bei na taqatoqnej. Bati bei tamo qudei na ñoro tamo di minjeb, ‘Ino ñoro taqato tamo a ino ñoro kalil laña uyeqnu.’ <sup>2</sup> Degsi minjnabqa a na ñoro taqato tamo di metonaq aqa areq bonaqa minnej, ‘Ni qa anjam degsi merbonubqa e quonum. Ni kiyaaqa kumbra degyonum? Deqa ijo ñoro kalil ni uyonum qaji di sisiyosim

merbimqa e gegerere qalieosiy ni kobotmqai. Yim ni ijo ñoro olo bunu taqatqasai.'

3 "Onaqa ñoro taqato tamo di a segi are qalej, 'E kiyerqai? Ijo tamo koba a na e kobotbqa marqo. E sinqila saiqoji deqa e wau bei yqa keresai. E tamo qudei nanqi minjrit silali laña ebqab di e jemaibqas. 4 Deqa e kiyerqai? E qalieonum. Tamo qudei nami ijo tamo koba aqaq dena ñoro osib nanqi a kamba olo yqajqa minjeb qaji nanqi di metnjrqai. Metnjrit ijoq babqa ñoro nami eb qaji di e na aguq atitqa nanqi e qa tulan areboleboleinjqas. Deqa ijo tamo koba a na e wibimqa tamo nanqi dena e osib nanqo talq di e gegerereiboqnqab.' 5 A degsi are qalsiqa tamo kalil nami aqa tamo koba aqaq dena ñoro eb qaji nanqi metnjrnaq bonabqa tamo namo bej qaji di nenemyej, 'Ni ñoro gembub ijo tamo koba aqaq dena em?' 6 Onaqa minnej, 'E goren kulum 100 em.' Degsi minjnaqa ñoro taqato tamo na minnej, 'Ni olo goren kulum 50 segi nenqrenye.' 7 Osiqa tamo bei nenemyej, 'Ni ñoro gembub ijo tamo koba aqaq dena em?' Onaqa minnej, 'E bem sum aqa qun 100 em.' Degsi minjnaqa ñoro taqato tamo na minnej, 'Ni olo bem sum aqa qun 80 segi nenqrenye.'

8 "Onaqa ñoro tamo a aqa ñoro taqato tamo aqa kumbra gisan di poiyoaqa aqa ñam soqtosiq minnej, 'Ni keretonum.' Degsi minnej. Di kiyaya? Ñoro taqato tamo uge di a powo ti sosisq deqa kumbra gisan di yej. Deqa ninqi quiy. Mandam endeqa tamo unqasari nanqi mandam qaji powo koba ti unub. Ariya suwanqqa tamo unqasari nanqi mandam qaji powo kiñala ti unub.

9 "Deqa e ninqi endegsi mernqwai. Ninqi mandam qaji ñoro uge oqnsib dena tamo unqasari nanqi kumbra bole enjroqnb nanqi ninqi qa tulan areboleboleinjqroqnqas. Yim bunuqna ninqi moisib mandam qaji ñoro uge kalil uratibqa Qotei na ninqi joqsim tal gaigai sqas qaji dia ninqi gegerereinqwas.

10 "Ninqi ñoro kiñala gegerere taqatqab di ninqi ñoro qelikoba dego gegerere taqatqab. Ariya ninqi ñoro kiñala gegerere taqatqasai di ninqi ñoro qelikoba dego gegerere taqatqasai. 11 Ninqi mandam qaji ñoro uge gegerere taqatqasai di ninqi lan qure qaji ñoro dego gegerere taqatqasai. Deqa tamo yai na lan qure qaji ñoro nunqo banq di atqas? Tamo dego bei sosai. 12 Ninqi tamo bei aqa ñoro gegerere taqatqasai di ninqi nunqo segi ñoro dego gegerere taqatqasai. Deqa tamo yai na ñoro bei nunqo banq di atqas? Tamo dego bei sosai.

13 "Tamo qujai a tamo kokba aiyel nanqi wauetnjrqqa keresai. A tamo kobaquja bei qalaqalaisyosim olo tamo kobaquja bei jeutqas. Bei aqa anjam dauryosim olo bei qoreiyqas.



Dego kere nin̄gi silali ti Qotei ti turtnjrsib nan̄gi wauetnjqra keresai.”

*Yesus a dal anjam qa ti Mandor Koba Qotei qa ti anjam palontej*

<sup>14</sup> Onaqa Farisi nan̄gi Yesus aqa anjam di qusib a yomuiyeb. Farisi nan̄gi bati gaigai silali oqngajqa are koba soqnej. Utru deqa nan̄gi Yesus yomuiyeb. <sup>15</sup> Onaqa Yesus na kamba minjrej, “Nin̄gi are qaleqnub, ‘Iga kumbra bole bole lan̄a baban̄ na yoqnim tamo un̄gasari nan̄gi na iga nugoqnsib iga tamo bole qa mergwab.’ Nin̄gi degsib are qaleqnub. Di gisan̄. Nun̄go are miligi di Qotei a segi qalie. Kumbra qudei tamo nan̄gi deqa arearetnjreqnu qaji di Qotei aqa n̄amgalaq di kumbra tulan̄ ugedamu.

<sup>16</sup> “Nami Moses aqa dal anjam ti Qotei aqa medabu o qaji tamo nan̄go anjam ti maroqneb dena bosiq Jon aqa bati brantej. Jon aqa bati brantej dena bosiq bini ijo anjam maro tamo nan̄gi Qotei aqa anjam bole palonteqnub. Palonteqnab tamo un̄gasari kalil nan̄gi Qotei na taqatnjsim nan̄go Mandor Koba sqajqa tulan̄ singilaeqnub.

<sup>17</sup> “Lan̄ ti mandam ti koboqab. Ariya Qotei aqa dal anjam mutu kiñala bei koboqasai bole sai.”

*Tamo bei na aqa n̄aun̄ uratqa anjam*

<sup>18</sup> Osiqa Yesus a olo marej, “Tamo bei na aqa n̄aun̄ uratosim olo un̄a bei oqas di a na aqa n̄aun̄ kumbra ugeq waiyqo. Un̄a bei dego aqa gumbulun̄ na a uratimqa bunuqna tamo bei na olo oqas di tamo bunuj dena un̄a di kumbra ugeq waiyqo.”

*Ñoro tamo Lasarus wo nan̄go sa anjam*

<sup>19</sup> Osiqa Yesus a olo marej, “Ñoro tamo bei soqnej. A bati gaigai gara wala bole jugoqnsiqa tulan̄ areboleboleiyeqnaqa in̄gi bole bole uyoqnsiq soqnej. <sup>20</sup> Aqa tal meq di tamo bei in̄gi tulan̄ saiqoji aqa ñam Lasarus a bati gaigai awooqnsiq n̄eioqnsiq soqnej. Aqa jejamu kalil yu na ugetej. <sup>21</sup> Deqa a tal meq di awesonaqa ñoro tamo a in̄gi uyeqnaqa ñen̄gi ululoneqnaqa osiq uyoqnej. Aqa yuq dena len̄ aiyeqnaqa baun̄ nan̄gi boqnsib nan̄go meñ na yu bilgetoqneb.

<sup>22</sup> “Bati bei Lasarus a moiyej. Moinaqa Qotei aqa lan̄ an̄gro nan̄gi bosib aqa qunun̄ osib Abraham aqa areq di awoteb. Bunuqna ñoro tamo a dego moinaqa subq ateb. <sup>23-24</sup> Subq atnabqa aqa qunun̄ aisiq moiyo qureq di soqnej. Sosiqa jaqatin̄ kobaiyeqnaqa tarosiqa Abraham isaq di sonaq unej. Lasarus a Abraham aqa areq di awesonaq unsiqa tulan̄ maosiqa Abraham minjej, ‘O Abu Abraham, e n̄amyuwoq endi sosimqa tulan̄ kan̄kan̄oqnsim jaqatin̄ koba eqnum. Deqa

ni e qa are ugeimimqa Lasarus minjim aqa ban gei yaq di tuqtosim bosim ijo menq di atimqa kiñala ulilibqas.'

<sup>25</sup> "Onaqa Abraham na minjej, 'O angro, ni are qale. Ni nami mandamq di sosimqa ni inqi bole bole uyoqnem. Ariya Lasarus a inqi uge uge uyoqnej. Deqa bini Lasarus a sawa boleq endi sosiqa a tulan areboleboleiyeqnu. Ariya ni namyuwoq di sosimqa jaqatin koba eqnum. <sup>26</sup> Ni nam atsim une. Ni iga ti ambleq di sub guma koba unu. Deqa iga sub di laqaiosim nungoq bqa keresai. Ninqi dego sub di laqaiosib gagoq bqa keresai.'

<sup>27-28</sup> "Onaqa ñoro tamo dena kamba Abraham minjej, 'O Abraham, ni na Lasarus minjimqa olo puluosim ijo abu aqa talq gilsim ijo was 5 nanqi saidnjrimqa nanqi sawa uge endeq bqasai.' <sup>29</sup> Onaqa Abraham na minjej, 'Ino was nanqi Moses aqa dal anjam qalieonub. Nanqi Qotei aqa medabu o qaji tamo nanqo anjam dego qalieonub. Nanqi anjam di dauryqab di kere.' <sup>30</sup> Onaqa ñoro tamo dena olo minjej, 'O Abu Abraham, di keresai. Ariya tamo moiyej qaji a subq na tigelosim anjam minjrqas di nanqi qusib are bulyosib dauryqab.'

<sup>31</sup> "Onaqa Abraham na minjej, 'Tamo nanqi Moses aqa dal anjam ti Qotei aqa medabu o qaji tamo nanqo anjam ti qusib are bulyqasai di tamo bei a subq na tigelosim nanqi anjam minjrqas di dego nanqi qusib are bulyqasai.' "

## 17

*Tamo a Yesus aqa angro kiñala bei uneq waiyqas di a tulan padalougetqas*

<sup>1</sup> Osiqa Yesus na aqa angro nanqi olo endegsi minjrej, "Bunuqna tamo qudei na tamo qudei uneq breinjroqngab. Bole, kumbra di brantoqngas. Ariya tamo nanqi kumbra di yoqngab qaji nanqi tulan padalougetqab. <sup>2</sup> Iga tamo deqaji nanqi ojsim meniq kobaquja osim sil na nanqo kakroq di ton-tosim breinjrim ya robuq aiqab di kere. Yim nanqi bunuqna angro kiñala bei uneq waiyqasai.

<sup>3</sup> "Deqa ninqi geregere nam atoqniy. Ino was bei a une bei atimqa ni na minje, 'Une di urat.' Yim a ino anjam di qusim are bulyqas di ni aqa une di torei moiyoitime. <sup>4</sup> Ariya a bati qujai qa une 7 ni emoqnsim olo boqnsim ni mermoqngas, 'O was, e kumbra grotonum.' Degsi mermo 7 yimqa ni aqa une kalil di torei moiyoitime."

*Iga Yesus qa gago areqalo siñgilatqajqa anjam*

<sup>5</sup> Onaqa Yesus aqa anjam maro tamo nanqi na minjeb, "O Tamo Koba, gago areqalo ni qa siñgilateqnum qaji di ni na olo kobaqujatime." <sup>6</sup> Onaqa Tamo Koba a na kamba minjrej, "Nunqo areqalo e qa siñgilato qaji di sis yago bul kiñala

sqas di kereqas. Degesqas di nıngi subar endi minjibqa a nuńgo anjam dauryosim jirim qoji waqosim aisim yuwalq di tigelqas.”

*Yesus a kanğal tamo aqa kumbra qa anjam marej*

<sup>7</sup> Osiqa Yesus a olo marej, “Tamo bei na aqa kanğal tamo qarınjonaqa gilsıqa aqa ıngi wauq di mandam qamsiq bu-lyej. Osiqa aqa kaja nanđi dego taqatnjrej. Ariya a wau di kobotinqa aqa tamo koba a na kiyersi minjqas? ‘Ni namo ıngi uye’ degsi minjqas e? Sai. <sup>8</sup> A minjqas, ‘Ni ijo ıngi goiyetbosim gara tigsim ıngi suweiyosim ebimqa ıngi ti ya ti uyqai. Uyit menetbimqa bunu ni kamba ıngi ti ya ti uyqam.’ A na aqa kanğal tamo degsi minjqas. Di kiyaca? A kanğal tamo lanaj deqa. <sup>9</sup> Kanğal tamo dena aqa tamo koba aqa anjam dauryimqa a na kamba aqa ñam soqtetqasai. Osim ‘Ni keretonum’ degsi minjqasai. Di kiyaca? A kanğal tamo lanaj deqa. <sup>10</sup> Dego kere nıngi Qotei aqa kanğal tamo sosibqa wau kalil a na nıngi engoqnqas qaji di yoqniy. Yoqnsib maroqniy, ‘Iga kanğal tamo lanaj. Deqa wau kalil Qotei na iga egeqnu qaji di agi yeqnum.’ ”

*Yesus a tamo 10 nanđo jejamu yu na ugeelenej qaji nanđi boletnjrej*

<sup>11</sup> Yesus a dena tigelosiqa Jerusalem aiqajqa gam dau-ryosiqa Samaria sawa ti Galili sawa ti ambleq na walwelosiq aiyoqnej. <sup>12-13</sup> Aiyoqnsiq qure beiq di brantej. Onaqa tamo 10 nanđo jejamu yu na ugeelenej qaji nanđi bosib Yesus itosibqa nanđi kiñala isaq di tigelosib tulan maosib minjeb, “O Tamo Koba, ni iga qa dulosim aqaryaige.” <sup>14</sup> Onaqa Yesus a nanđi unjrısiqa minjrej, “Nıngi olo puluosib aisib nuńgo jejamu atra tamo nanđi osornjriy.” Degsi minjrnaqa nanđi aiyoqnsibqa gamq di nanđo yu kalil mosoonaca nanđo jejamu boleonaq uneb. <sup>15</sup> Onaqa nanđo ambleq dena qujai a segi olo puluosıqa Yesus aqa areq gilej. A lelen ti Qotei aqa ñam soqtoqnsiq gilo-qnej. <sup>16</sup> Gilsiq Yesus aqa singaq di singa pulutosıqa binjyosiq minjej, “O Tamo Koba, ni keretosim ijo jejamu boletonum.” Tamo di a Samaria qaji. <sup>17</sup> Onaqa Yesus a tamo di unsiqa marej, “E na tamo 10 nanđo jejamu boletetnjronumqa ariya qujai a segi ijoq bqo. Tamo 9 nanđi qabi unub? <sup>18</sup> Nanđi olo ijoq bosai. Nanđi Qotei aqa ñam soqtosai dego. Sawa bei qaji tamo endi a segi qujai olo bosiq Qotei aqa ñam soqtqo.” <sup>19</sup> Yesus a degsi marsıqa tamo di minjej, “Ni tigelosim aiye. Ni ino areqalo e qa singilatunum deqa ino jejamu boleqo.”

*Mondoń Tamo Anđro a lan qureq na bqas*

<sup>20</sup> Bati bei Farisi nanđi Yesus endegsib nenemyeb, “Bati gembu Qotei a bosim aqa segi tamo unğasari nanđo Mandor

Koba sosim nanġi taqatnjrqas?” Onaqa Yesus na minjrej, “Qotei a Mandor Koba sqajqa bati brantognimqa manwa bei namoqna bam niġi unqasai. <sup>21</sup> Tamo bei na endegsi mernġwasai, ‘Niġi uniy, Mandor Koba a bqo agiende,’ o ‘Mandor Koba a bqo agide.’ Degyqasai. Niġi quiy. Bini Qotei a nuġgo ambleq endi Mandor Koba unu.”

<sup>22</sup> Osiqa Yesus na aqa anġro nanġi endegsi minjrej, “E Tamo Anġro. Bati bei brantimqa niġi ijo bqajqa bati unqa maroqnsib unqasai. <sup>23</sup> Tamo qudei na niġi gisanġoqnsib mernġgoqnaqab, ‘Niġi uniy. Tamo Anġro bqo agide,’ o ‘Tamo Anġro bqo agiende.’ Degsib mernġgoqnaqab niġi nanġi dau-rnjraib. <sup>24</sup> Kola minjaleqnaqa laj kalil suwanġeqnu dego kere mondoj e Tamo Anġro brantitqa tamo unġasari kalil nanġi e nubqab. <sup>25</sup> Ariya e brantosaisoqnitqa tamo unġasari bini bati endeqa unub qaji nanġi na e qoreibosib jaqatin koba ebqab.

<sup>26</sup> “Noa aqa bati qa tamo unġasari nanġi kumbra yoqneb dego kere e Tamo Anġro bqajqa bati qa nanġi kumbra degy-oqnaqab. <sup>27</sup> Agi Noa aqa bati qa tamo unġasari kalil nanġi inġi ti ya ti uyoqnsib unja ban ojelenoqnsib sonabqa Noa a qobun miligiq gilnaqa awa koba aisiqa mandam ya maqonaqa nanġi kalil morejkrateb. <sup>28-29</sup> Lot aqa bati qa dego tamo unġasari nanġi inġi ti ya ti uyoqnsib inġi inġi awaiyoqnsib silali oqnsib inġi yagoqnsib tal atoqneb. Nanġi kumbra degyoqnsib son-abqa Lot a Sodom qure uratosiq ulanġeqnaqa nġamyuwo ti menin pulon ti lan goge na awa bul aisiqa Sodom tamo unġasari kalil nanġi padaltnjrej. <sup>30</sup> Dego kere bunuqna tamo unġasari nanġi kumbra degyoqnsib soqnaqab e Tamo Anġro brantqai.

<sup>31</sup> “Bati deqa tamo unġasari tal meq di unub qaji nanġi jaraiqa oqnsib inġi inġi oqa osibqa olo warum miligiq gilaib. Nanġi jaraiyoqujatebe. Tamo unġasari wauq di unub qaji nanġi jaraiqa oqnsib inġi inġi oqa osibqa olo puluosib qureq baib. Nanġi torei dena jaraiyoqujatebe. <sup>32</sup> Kumbra nami Lot aqa njan aqag di brantej qaji niġi deqa are qaliy. <sup>33</sup> Tamo bei a aqa segi nġambile taqatqajqa areqalo kobaiyqas di a padalqas. Ariya tamo bei a aqa segi nġambile uratqas di a olo nġambile bole oqas.

<sup>34</sup> “E niġi endegsi mernġwai. Ijo bqajqa bati brantimqa qolo deqa tamo aiyel warum qujaiq di nġerenesoqnaqab Qotei na bei lan qureq osi oqsimqa bei uratim sqas. <sup>35</sup> Unja aiyel tal qujaiq di saplan gereiyoqnaqab Qotei na bei lan qureq osi oqsimqa bei uratim sqas. <sup>36</sup> Tamo aiyel wau qujaiq di inġi yagoqnaqab Qotei na bei lan qureq osi oqsimqa bei uratim sqas.” Yesus na aqa anġro nanġi anjam degsi minjrej. <sup>37</sup> Onaqa nanġi na kamba nenemyeb, “O Tamo Koba, kumbra kalil di sawa qabia brantqas?” Onaqa Yesus a nanġi yawo

anjam endegsi minjrej, “Tamo nanjo jejamu qusaeqnu qaji sawa dia qal nanji koroqab.”

## 18

### *Iga Qotei pailyqajqa asgigwasai*

<sup>1-2</sup> Yesus aqa angro nanji bati gaigai Qotei pailyoqñib asgin-jraim deqa a na yawo anjam bei endegsi minjrej, “Qure beiq di anjam pegiyo tamo soqnej. Tamo di aqa kumbra bolesai. A Qotei ulaiyosai oqnej. A tamo ungasari nanji qa dego are qalosaioqnej. <sup>3</sup> Qure dia unja qobul soqnej. A bati gaigai anjam pegiyo tamo di aqa areq giloqnsiqa minjoqnej, ‘Tamo bei na e gulbe ebeqnu. Deqa ni na aqaryaibosim gago aiyel anjam pegiyetgimqa tamo dena e olo gulbe ebqasai.’ <sup>4</sup> A degsi minjeqnaqa a aqaryaiyqa uratoqnej. Bunuqna a areqalo bei osiqa marej, ‘Bole, e Qotei ulaiyosaieqnum. E tamo ungasari nanji qa are qalosaieqnum. <sup>5</sup> Ariya unja qobul di a bati gaigai e wainboqnsiqa merbeqnu, “Ni aqaryaibe.” A merbo gaigai yeqnu deqa unqum e aqa anjam gereiyetqai. E aqa anjam gereiyetqasai di a bati gaigai ijo areq boqnsim sqas. Yim e tulan asgibo uge.’”

<sup>6</sup> Osiqa Tamo Koba a olo marej, “Anjam pegiyo tamo uge aqa anjam marej qaji di ningi quiy. <sup>7</sup> Qusib are qaliy. Qotei a tamo bole. A anjam pegiyo tamo di bul sai. Deqa tamo ungasari a na giltnjrej qaji nanji qolo ti qanam ti pailyoqñqab di a nanjo pailyo qusimqa tariñsokobaiyqasai. A nanji urur aqaryainjrqas. <sup>8</sup> E ningi merngwai. Qotei na nanji urur aqaryainjroqujatqas. Ariya mondon e Tamo Angro bosiyqa tamo ungasari mandamq endi unub qaji nanji e qa nanjo areqalo siñgilatosis soqñib degsi unqai e?”

*Farisi tamo bei takis o qaji tamo bei wo nanji aiyel Qotei pailyeb*

<sup>9</sup> Tamo qudei nanji mareqñub, “Iga tamo bole. Iga tamo qudei nanji unub dego sai.” Yesus na tamo deqaji nanji yawo anjam bei endegsi minjrej, <sup>10</sup> “Tamo aiyel nanji Qotei pailyqa marsibqa atra tal miligiq gileb. Bei Farisi tamo. Bei takis o qaji tamo. <sup>11</sup> Nanji atra tal miligiq gilsibqa Farisi tamo a namo tigelosiqa endegsi pailyej, ‘O Qotei, e tamo qudei nanji unub dego sai. E gisan na tamo ungasari nanji silali yainjrosai e qnum. E sambala kumbra yosaieqnum. E kumbra uge bei dego yosaieqnum. E takis o qaji tamo di bul sai. <sup>12</sup> E gaigai ni pailmqa oqnsim ingi ti ya ti urateqnum. E ijo segi ingi ingi kalil potelenjoqnsim oto bei ni atraimeqnum.’ <sup>13</sup> Farisi tamo a degsiqa Qotei pailyej. Onaqa takis o qaji tamo a kiñala isaq di tigelesosiqa lan goge koqyosim pailyqajqa jemaionyonaqa turuosiqqa are soqonjyosiqqa marej, ‘O Qotei, e une

ti. Deqa ni e qa dulosim ijo une kalil kobotetbime.’ Takis o qaji tamo a degsiqa Qotei pailyej.”

<sup>14</sup> Yesus a yawo anjam degsi minjrsiqa olo minjrej, “E ningi merngwai. Takis o qaji tamo di aqa une kalil Qotei na kobotetonaqa a olo puluosiqa aqa talq aiyej. Ariya Farisi tamo di aqa une Qotei na kobotetosai. Di kiyaga? Tamo kalil nanjo segi ñam soqteqñub qaji nanji Qotei na olo ñam aguq atetnjrqas. Ariya tamo nanjo segi ñam aguq ateqñub qaji nanji Qotei na olo ñam soqtetnjrqas.”

*Yesus a marej, “Angro du du nanji ijo areq bqajqa saidnjraib”*

<sup>15</sup> Onaqa tamo ungasari qudei nanji nanjo angro du du ti angro mom ti joqsib Yesus na aqa ban nanjo gateq di atetnjrqas marsib aqa areq beb. Beqñabqa Yesus aqa angro nanji na saidnjrsib minjreb, “Nunjo angro du du nanji joqsib endeq baib.” <sup>16</sup> Degsib saidnjrnabqa Yesus na angro du du nanji di metnjrej. Osiqa aqa angro nanji minjrej, “Angro du du nanji uratnjrib ijo areq beb. Nanji saidnjraib. Tamo ungasari nanji angro du du bul sqab di Qotei a nanjo Mandor Koba sosim nanji taqatnjrqas. <sup>17</sup>E bole merngwai. Ningi angro du du nanji bul sqasai di Qotei a ningi osim taqatngwasai. Deqa a nunjo Mandor Koba sqasai dego.”

*Ñoro tamo bei a Yesus ombla na anjam mareb*

<sup>18</sup> Onaqa Juda gate bei na Yesus endegsi nenemyej, “O Qalie Tamo Bole, e kiyersiyqa ñambile gaigai sqai?” <sup>19</sup> Onaqa Yesus na kamba minjej, “Ni kiyaga e tamo bole qa merbonum? Qotei a segi qujai tamo bole. <sup>20</sup> Ariya ni Qotei aqa dal anjam kalil qalie unum. ‘Ni tamo bei aqa uña jejamu ojetaim. Ni tamo bei qalsim moiyoaim. Ni bajinaim. Ni tamo bei aqa jejamu lanja gisanjaim. Ni ino ai abu nanjo sorgomq di geregere sosimqa nanjo anjam dauryoqne.’” <sup>21</sup> Onaqa Juda gate dena olo Yesus minjej, “E angro kiñala qa dal anjam kalil di dauryosim boqñem agi bini degsi unum.” <sup>22</sup> Degsi minjnaq qusiqa kamba minjej, “Ni dal anjam kalil di dauryosim keronum. Ariya kumbra qujai ni keretosai. Deqa e ni mermqai. Ni gilsim ino inji inji kalil qarinyosim silali osim tamo inji inji saiyoji nanji jeisim enjre. Degsim enjrsim bosim e daurbe. Osim bunuqna ni lanj qureq di awai bole itqam.” <sup>23</sup> Yesus na tamo di degsi minjnaq qusiqa are gulbekobaiyej. Di kiyaga? A inji inji koba ti soqnej deqa.

<sup>24</sup> Onaqa Yesus a tamo di koqyosiqa marej, “Tamo ungasari inji inji koba ti unub qaji nanji Qotei na taqatnjrsim nanjo Mandor Koba sqa marsibqa lanj qureq oqwajqa tulanj banji koba. <sup>25</sup> Kamel a yumba miligiq gilqajqa banji koba. Dego kere tamo ungasari inji inji koba ti unub qaji nanji Qotei

na taqatnjrsim nanjo Mandor Koba sqa marsibqa lan qureq oqwajqa tulan banji koba.”<sup>26</sup> Onaqa tamo qudei Yesus aqa anjam di queb qaji nanji na minjeb, “Ni anjam degsi maronum deqa tamo yai nanji Qotei na elenamqa nanji nambile gaigai sqa kere?”<sup>27</sup> Onaqa Yesus na kamba minjrej, “Tamo nanji segi nambile sqa keresai. Ariya Qotei na nanji elenqa kere. Di kiyaaqa? Qotei a kumbra kalil yqa kere.”

<sup>28</sup> Yesus a nanji degsi minjrnaqa Pita na minjej, “O Tamo Koba, ni une. Iga gago inji inji kalil uratosim ni daurmeqnum.”<sup>29-30</sup> Onaqa Yesus na minjrej, “E bole merngwai. Tamo bei a Qotei na taqatosim aqa Mandor Koba sqa marsimqa aqa segi qure, aqa njan, aqa was nanji, aqa ai abu nanji, aqa angro nanji ti kalil uratnjrsim e daurbqas tamo di Qotei na inji inji gargekoba olo yelenqas. Yimqa mondon a nambile gaigai sqas.”

*Yesus a marej, “E moisiy olo subq na tigelqai”*

<sup>31</sup> Yesus na aqa angro 12 nanji anjam degsi minjrnsiq ko-boonaqa nanji joqsia segitnjrsiqa endegsi minjrej, “Ninji quiy. E Tamo Angro. Iga Jerusalem aiyeqnum. Dia anjam kalil Qotei aqa medabu o tamo nanji nami e qa nengrenyeb qaji di aqa damu brantqas.”<sup>32</sup> Agi tamo qudei na e ojgab. E ojsib tamo nanji Qotei qaliesai qaji nanjo banq di e atqab. Yimqa nanji na e misilijnboqnsib miselboqnsib ugeugeiboqngab.<sup>33</sup> Osib e kumbainbosib lubsib moiyoqbqab. Bati qalub koboamqa e olo subq na tigelqai.”<sup>34</sup> Yesus na aqa angro nanji anjam degsi minjrnaq qusibqa anjam di aqa utru Qotei na ulitej deqa nanji geregere poinjrosai.

*Yesus na tamo bei nam qandimyej qaji di boletej*

<sup>35</sup> Onaqa Yesus a walweleri aisiq Jeriko qure jomyeqnaqa tamo bei nam qandimyej qaji a gam qalaq di awesosiqa tamo ungasari nanji silali qa njlnjqonej.<sup>36</sup> Tamo ungasari tulan gargekoba nanji Yesus dauryosib qatronoqnsib aiyeqnaq tamo dena qusiqa nenemnjrej, “Ninji kiyaaqa qatroneqnub?”<sup>37</sup> Onaqa nanji na minjeb, “Yesus Nasaret qaji a aiyeqnu.”<sup>38</sup> Degsi minjnabqa a tulan lelenosiqa marej, “O Yesus, Devit aqa Niri, ni e qa dulame.”<sup>39</sup> Onaqa tamo ungasari namoeb qaji nanji na tamo di njrintosib minjeb, “Ni lelenkobaaim. Kiri.” Degsi minjnabqa a nanjo anjam quetnjrosai. A olo tulan lelenoqnsiq Yesus minjoqnej, “O Devit aqa Niri, ni e qa dulame.”<sup>40</sup> Onaqa Yesus a tigelosiqa tamo ungasari nanji minjrej, “Tamo di osib ijo areq osi boiy.” Onaqa nanji na a osib Yesus aqa areq osi beb. Osi bonabqa nenemyej,<sup>41</sup> “E ni kiyermqajqa deqa ni e qa lelenoqnam?” Onaqa minjej, “O Tamo Koba, e olo nam poibim sawa unqajqa deqa e ni qa

lelenoqnam.”<sup>42</sup> Onaqa Yesus na minjej, “Ni e qa ino areqalo singilatonum deqa e ni boletmqai. Deqa ino njamdamu olo poimeme.”<sup>43</sup> Degsi minjnaqa aqa njamdamu poiyoonaqa sawa unsiqa Qotei aqa ñam soqtosiqa tigelosiq Yesus dauryosiq aiyej. Onaqa tamo ungasari kalil nanği Yesus aqa manwa di unsibqa nanği dego Qotei aqa ñam soqtoqneb.

## 19

### *Yesus a Sakius aqa talq gilej*

<sup>1-3</sup> Onaqa Yesus a aisiqa Jeriko qureq di brantosiq qure ambleq na walweleqnaqa tamo bei aqa ñam Sakius a Yesus tamo kiyero degosiq unqajqa dauryej. Sakius a takis o qaji tamo nanço gate. A ñoro koba ti soqnej. A tamo truquyala deqa a Yesus dauryosiq unqajqa yonaq ugeiyej. Di kiyaaqa? Tamo gargekoba nanği na sawa getenteb deqa.<sup>4</sup> Deqa Sakius a urur ti aisiq tamo ungasari kalil nanği bunjnrsiqa namoosiq gam qalaq di ñam bei oqsıq ñam atej. Ñam atsiqa are qalej, “Yesus a gam endena bamqa e geregere unqai.”<sup>5</sup> Onaqa Yesus a gam dena walwelosi aisiq ñam utruq di tigelosiq tarosiq Sakius unsiqa minjej, “O Sakius, ni mandamq aiyoqumat. Bini e ino talq di sqai.”<sup>6</sup> Degsi minjnaqa a qusiqa mandamq aiyoqumatosiqa tulan areboleboleiyonaqa Yesus osiqa ombla na aqa talq gileb.<sup>7</sup> Gileqnaqqa tamo ungasari kalil nanği di unsib nřirinosis mareb, “Ninği uniy. Yesus a une tamo aqa talq gileqnu.”<sup>8</sup> Onaqa talq di Sakius a tigelosiq Yesus minjej, “O Tamo Koba, ni que. E ijo inği inği kalil ambleq na potosiy tamo inği inği saiçoji nanği jeisi enjrqai. E nami tamo bei gisanıyosim silali dala qujai yaiyem kiyo? Degamqa e kamba silali dala qolqe olo yqai.”<sup>9</sup> Onaqa Yesus a Sakius aqa anjam di qusiqa tamo ungasari nanği minjrej, “Bini Sakius a dego Abraham aqa anğro tinğınço. Deqa Qotei na a ti tamo kalil aqa talq endi unub qaji nanği ti elenço.”<sup>10</sup> E segi Tamo Anğro. E na tamo ungasari padalo gamq di unub qaji nanği nıamoaqnsim elenqnum. E deqa mandamq aiyem.”

### *Silali taqatqajqa yawo anjam*

<sup>11</sup> Onaqa tamo ungasari nanği Yesus aqa anjam di qusib are qaleb, “Bini kiyo Qotei a gago Mandor Koba sosim iga taqatğvajqa bati brantqas?”<sup>12</sup> Nanği degsib are qaleb. Di kiyaaqa? Yesus a Jerusalem jojomyej deqa. Onaqa Yesus a yawo anjam bei endegsi minjrej, “Tamo kobaquja bei a sawa isağ gilej. Tamo di a are qalej, ‘E sawa değ gilitqa sawa değaji nanği na e mandor atqab. Yibqa e olo puluosiy bosiy ijo segi qure qujai nanço mandor sosiy nanği taqatnırqai.’ A degsi are qalsiqa sawa isağ gilej.”<sup>13</sup> A gilqa osiqa aqa kanğal tamo 10 nanği metnırnaqa aqa areğ bonabqa nanği segi segi 20 kina



enjrsiqa minjrej, 'Silali endena wauosib silali aqa oto dego oiy. Bunuqna e olo bosiy unqai.'

<sup>14</sup> "Tamo kobaquja a degsi minjrsiqa sawa isaq gilsiq di sonaqa aqa qure qujai nanqi a qa tulan ugeosib are qaleb, 'A gago mandor sqasai.' Degsib are qalsibqa tamo qudei nanqi qarijnrnab sawa deq gilsib sawa deqaji nanqi minjreb, 'Tamo di a gago mandor ataib. A na iga taqatgwajqa iga uratonum.'  
<sup>15</sup> Ariya sawa deqaji nanqi na tamo di mandor ateb. Onaqa bunuqna a olo puluosiq aqa segi qureq aisiqa kanqal tamo nanqi wau qa silali enjrej qaji nanqi metnjrej. Metnjrnaqa nanqi aqa areq bonabqa a na minjrej, 'E nami silali engem qaji dena ninqi wauoqneb olo silali di osorbiy.'

<sup>16</sup> "Onaqa kanqal tamo deqaji bei a bosiqqa minjej, 'O Tamo Koba, ino 20 kina ebem qaji dena e waueqnamqa olo 200 kina brantej agiende.'  
<sup>17</sup> Onaqa aqa tamo koba a na minjej, 'Ni kanqal tamo bolequja. Ni wau kiñala geregere taqatonum deqa e qure kokba 10 ino banq di uratitqa ni na taqatnjroqnam.'

<sup>18</sup> "Onaqa kanqal tamo bei a bosiqqa aqa tamo koba minjej, 'O Tamo Koba, ino 20 kina ebem qaji dena e waueqnamqa olo 100 kina brantej agiende.'  
<sup>19</sup> Onaqa aqa tamo koba a na minjej, 'E qure kokba 5 ino banq di uratitqa ni na taqatnjroqnam.'

<sup>20</sup> "Onaqa kanqal tamo bei a bosiqqa aqa tamo koba minjej, 'O Tamo Koba, ni unime. Ino 20 kina ebem qaji agi olo osibetmonum. E gara ñenqi na dalaosim atnam soqnej.'  
<sup>21</sup> E kumbra degyem. Di kiyaaqa? E ni qa ulaem deqa. E qalieem, ni tamo njirin ani. Tamo qudei nanqi waueq nab silali branteqnaqa ni segi na eqnum. Tamo qudei nanqi inji yageq nab melieqnaqa ni segi na otorosim uyeqnum.'

<sup>22</sup> "Onaqa tamo koba dena kamba endegsi minjej, 'Ni kanqal tamo uge. Ino segi anjam dena e ino une ubtosiy ni pegimqai. Ni nami qalieem, e tamo njirin ani. Tamo qudei nanqi waueq nab silali branteqnaqa e segi na eqnum. Tamo qudei nanqi inji yageq nab melieqnaqa e segi na otorosim uyeqnum. Ni nami e qa degsim qalieem.'  
<sup>23</sup> Deqa ni kiyaaqa ijo silali di osi gilsim silali talq di atosai? Ni di atem qamu e bosimqa silali talq dena ijo silali aqa oto kobaqo qamu turtosim onum qamu.'  
<sup>24</sup> Degsi minjsiqa tamo qudei aqa areq di tigelesoqneb qaji nanqi minjrej, 'Ninqi aqa 20 kina di yayiosibqa kanqal tamo nami wauosiqa 200 kina ej qaji di olo yiy.'  
<sup>25</sup> Onaqa nanqi na minjeb, 'O Tamo Koba, a 200 kina ejunu. Deqa ni kiyaaqa 20 kina olo yqa maronum?'

<sup>26</sup> "Onaqa tamo koba a na minjrej, 'E ninqi merngwai. Tamo a wau geregere taqatoqnqas di Qotei na olo wau koba yimqa

a na taqatoqnqas. Ariya tamo a wau geregere taqatqasai di wau kiñala a na taqatejunu qaji di a olo bunu taqatqasai. Qotei na a kobotinqa a laña sqas.’ <sup>27</sup> Osiqa minjrej, ‘Tamo nanği e qa jeu ateb qaji nanği di joqsib boiy. Nanği e qa mareb, “Tamo di a gago mandor ataib.” Deqa tamo nanği di joqsib bosib ijo ulatamuq endi nanği ñumib moreñqab.’ ”

<sup>28</sup> Yesus a yawo anjam degsi marsiqa a Jerusalem aiqajqa gam dauryosiq aiyoqnej.

### *Mandor Koba Yesus a Jerusalem aiyej*

<sup>29-30</sup> Yesus a aisiqa Betfage qure ti Betani qure ti Oliv mana utruq di jojomyosiqa aqa angro aiyej qarijnrsiqa minjrej, “Ninği aisib qure bei jojom di unu di brantosib donki bei tontonub unu di unqab. Donki di bunuj tamo bei nami aqa quraq di awoosaiyoqnej qaji. Ninği donki di unsibqa sil palontosib titosib osib boiy. <sup>31</sup> Ninği sil palontoqnibqa tamo bei na nenemñgwas kiyo, ‘Ninği kiyaga donki aqa sil palonteqnub?’ Degsi nenemñgimqa ninği na minjiy, ‘Tamo Koba a wau ti. Deqa a donki qa mergwo.’ ”

<sup>32</sup> Yesus a nanği aiyej degsi minjrsiq qarijnjrnaqa aisib anjam Yesus na minjrej qaji di dauryosib donki di uneb. <sup>33</sup> Unsib sil palonteqnabqa donki aqa abu nanği na nanği aiyej nenemñjreb, “Ninği kiyaga donki aqa sil palonteqnub?” <sup>34</sup> Degsi nenemñjrnaqa nanği aiyej na kamba minjreb, “Tamo Koba a wau ti. Deqa a donki qa mergwo.”

<sup>35</sup> Degsi minjrnab odnjrnab nanği aiyej donki di osib Yesus aqa areq osi gileb. Osi gilsib nanço segi gara jugo piqtosib donki aqa quraq di tusib Yesus soqtosib donki aqa quraq di awoteb. <sup>36</sup> Yesus a donki aqa quraq di awoonaqa donki a walwewosi aiyeqnaqa tamo ungasari nanği nanço gara jugo piqtelenosib gamq di tuelenjoqneb. <sup>37</sup> Onaqa Yesus a Oliv mana utru jojomyeqnaqa aqa angro gargekoba nanği tulañ areboleboleinjqreñnaqa lelenjoqneb. Yesus a nami mañwa gargekoba yeqnaqa nanği unoqneb deqa nanği Qotei aqa ñam soqtoqn-sib endegsib maroqneb, <sup>38</sup> “Ni Tamo Koba aqa ñam na bonum deqa a ni tulañ geregereimeqnu. Ni gago Mandor Koba. Iga Qotei Goge Koba aqa ñam tulañ soqtoqnqom! Lañ qureq di lawo kumbra gaigai sqas.”

<sup>39</sup> Onaqa tamo ungasari nanço ambleq dena Farisi qudei nanği tigelosib Yesus minjeb, “O Qalie Tamo, ni ino angro nanço medabu getentetnjrime.” <sup>40</sup> Onaqa Yesus na minjrej, “Ijo angro nanço medabu getentqab di meniñ nanği tamo bulyosib tulañ murqumyoqnsib Qotei aqa ñam soqtoqnqab.”

### *Yesus a Jerusalem nanği qa akamej*

<sup>41</sup> Osiqa Yesus a Jerusalem jojomyosiq unsiqa akamej.  
<sup>42</sup> Akamosiq marej, “O Jerusalem tamo ungasari, bini bati endeqa ningi Qotei aqa kumbra qalieeb qamu ningi geregere lawo na unub qamu. Ariya kumbra di ningi qa uliejunu deqa ningi qalieqa keresai. <sup>43-44</sup> Deqa ningi quiy. Bati bei brantimqa tamo qudei na bosib ningi jeutngosib nungo qure koba endi agutibqa ningi jaraiqa keresainngwas. Amqa nanqi na ningi qoto itngosib tulan ugeugeingosib nungo qure koba endi niñaqyekritqab. Osib qure aqa menin kalil paraparainrsib breinjribqa menin bei menin bei aqa quraq di sqasai. Menin kalil segisegiqab. Jeu tamo nanqi bosib ningi degngwab. Di kiyaaqa? Qotei na ningi aqaryainngwajqa bati brantqo di ningi poinngosai deqa.”

*Tamo ungasari nanqi atra tal miligiq di inqi inqi qarinyoqneb*

<sup>45</sup> Osiqa Yesus a atra tal koba miligiq gilsiq nam atej di tamo ungasari gargekoba nanqi inqi inqi qarinyoqnsibqa dena silali eqnab unjrsiqqa nanqi winjrnaq jaraiyeb. <sup>46</sup> Nanqi jaraiyeq nabqa Yesus na minjrej, “Qotei aqa anjam bei nami endegsib nenngrenyeb unu, ‘Ijo tal endi pailyqajqa tal.’ Qotei aqa anjam degsi unu. Ariya ningi na olo tal endi ugetonubqa a bajin tamo nanngo tal bulqo.”

<sup>47</sup> Yesus a bati gaigai atra tal miligiq giloqnsiq dia tamo ungasari nanqi Qotei aqa anjam palontosiq minjroqnej. Bati deqa atra tamo kokba ti dal anjam qalie tamo nanqi ti Juda gate nanqi ti Yesus qalib moiqaqajqa gam namoqneb. <sup>48</sup> Ariya tamo ungasari kalil nanqi Yesus aqa anjam quqwajqa tulan arearetnjroqnej. Deqa Juda gate nanqi Yesus qalib moiqaqajqa gam namonab ugeinjrej.

## 20

*Juda nanqi na Yesus nenemyeb, “Ni singila qabe na osimqa kumbra endi yeqnum?”*

<sup>1-2</sup> Bati bei Yesus a atra tal koba miligiq gilsiq dia tamo ungasari nanqi Qotei aqa anjam bole palontosiq minjroqnej. Onaqa atra tamo kokba ti dal anjam qalie tamo nanqi ti Juda gate nanqi ti bosib nenemyeb, “Ni iga merge. Ni singila qabe na osimqa kumbra endi yeqnum? Yai na ni qarinyej deqa ni wau endi yeqnum?” <sup>3</sup> Onaqa Yesus na minjrej, “E kamba anjam bei ningi nenemngitqa ningi e merbiy. <sup>4</sup> Yai na Jon qarinyonaqa bosiqqa tamo ungasari nanqi yansnjroqnej? Qotei na kiyoo? Tamo bei na kiyoo? Ningi na merbiy.” <sup>5</sup> Onaqa nanqi Yesus aqa anjam di qusibqa segi segi qairosib maroqneb, “Iga Yesus minjqom, ‘Qotei na Jon qarinyej’ degsi minjqom di a iga mergwas, ‘Kiyaaqa ningi Jon aqa anjam quetosai?’ <sup>6</sup> Ariya iga minjqom, ‘Tamo bei na Jon qarinyej’ degsi minjqom di tamo

uᅇgasari naᅇgi ᅇriᅇosib bosib iga meniᅇ na lugwab. Di kiyaaqa? Naᅇgi mareqᅇub, ‘Jon a Qotei aqa medabu o qaji tamo bole.’ ”  
 7 Naᅇgi degsib qairosib olo Yesus minjeb, “Yai na kiyo Jon qarinyej di iga qaliesai.” 8 Onaqa Yesus na kamba minjrej, “Niᅇgi degsib merbonub deqa e dego yai na qarinybonaq bosim wau endi yeqnum di niᅇgi merywasai.”

### *Wain wau qa yawo anjam*

9 Osiqa Yesus a olo tamo uᅇgasari naᅇgi yawo anjam bei endegi minjrej, “Tamo bei a tigelosiqqa aqa wauq gilej. Gilsiqqa wain sil yagelenosiqqa wau taqato tamo qudei naᅇgo baᅇq di aqa wau uratetnjrsiqqa sawa isaᅇ gilsiq dia sokobaiyej. 10 Sonaqa wain gei melionaqa a na aqa kaᅇgal tamo bei qarinyonaqa wau taqato tamo naᅇgoq aisiᅇ minjrej, ‘Wau lanja na e qarinybqo bonum. Deqa niᅇgi wain gei ebibqa e na osi gilqai.’ Degsi minjrnaqa naᅇgi na a ojsib qalougetosib wiyonab laᅇa puluosiq gilej. 11 Gilnaqa wau lanja na olo kaᅇgal tamo bei qarinyonaq ainaqa a dego qalougetosib ugeugeiyosib wiyonabqa a laᅇa puluosiq gilej. 12 Onaqa wau lanja na olo kaᅇgal tamo bei qarinyonaq ainaqa a dego qalougetosib ugeugeiyosib wiyonab gilej. 13 Onaqa wau lanja a are qalej, ‘E kiyerqai? E endegyqai. E ijo segi anᅇro qujai e na tulaᅇ qalaqalaiyeqnum qaji di qarinyit aiqas naᅇgi aqa anjam quetqab.’ 14 Degsi are qalsiqqa aqa segi ᅇiri qarinyonaq aiyej. Aiyeqnaqa wau taqato tamo naᅇgi a unsibqa segi segi qairosib mareb, ‘Tamo a bqo endi wau lanja aqa segi ᅇiri. A na aqa abu aqa iᅇgi iᅇgi kalil oqas. Deqa iga a qalsim moiotosimqa wau endi iga na oqom.’ 15 Degsib marsibqa wau lanja aqa ᅇiri ojsib wau qalaq osi gilsib dia qalnab moiyej.

“Deqa niᅇgi kiyersib are qalonub? Wau lanja a bosimqa wau taqato tamo uge naᅇgi di kiyernjrqqas? 16 E niᅇgi merygwai. A bosim naᅇgi ᅇumsim moiyoᅇnrqqas. Osim aqa wau di olo yainjrsim tamo qudei naᅇgo baᅇq di uratetnjrimqa naᅇgi na kamba taqatesqab.” Yesus na tamo uᅇgasari naᅇgi yawo anjam degsi minjrnaqa naᅇgi qusib minjeb, “Wau taqato tamo naᅇgi kumbra uge di yaib.”

17 Onaqa Yesus na naᅇgi koqnrjsiqqa minjrej, “Qotei aqa anjam bei neᅇgreᅇq di unu. Aqa damu niᅇgi poiᅇgwo e? Anjam agiende,

‘Tal gereiyo qaji tamo naᅇgi na tal ai arqsibqa uge qa marsib taqal waiyeb. Onaqa tal ai di Qotei na olo osiq tumaq di tigeltej unu. Tal ai di tal siᅇgilatqajqa deqa tigeltej.’

18 Niᅇgi quiy. Tamo uᅇgasari ululoᅇosib tal ai quraq aiqab qaji naᅇgi di tal ai dena naᅇgo tanu giᅇgeᅇyqqas. Ariya tal ai di

ulonjosim tamo ungasari qudei nanngoq aisim jejamu ti tanu ti torei paraparainjrqsas.”

<sup>19</sup> Onaqa atra tamo kokba ti dal anjam qalie tamo nanngi ti yawo anjam di qusib endegsib qalieeb, Yesus a yawo anjam dena nanngo jejamuq di une qametnjrej. Nanngi degsib qalieosib deqa minjin oqetnjrnaqa Yesus ojqa mareb. Ariya nanngi tamo ungasari nanngi ulainjrsib deqa nanngi Yesus ojqa uratosib jaraiyeb.

*“Iga Sisar takis yqom e?”*

<sup>20</sup> Ariya atra tamo kokba ti dal anjam qalie tamo nanngi ti Yesus koqyesoqneb. Osib endegsib are qaleb, “Iga tamo qudei qarijnjrnam nanngi Yesus aqa areq gilsib gisanjosib anjam bei nenemyibqa a nanngi tamo bole edegwas. Osim anjam gro-timqa iga qusim ojsim Rom nanngo gate aqa banq di atqom.” Nanngi degsib are qalsibqa tamo qudei qarijnjrnab nanngi Yesus aqa areq gileb. <sup>21</sup> Gilsib minjeb, “O Qalie Tamo, iga qalie, ni anjam bole maro qaji tamo. Ni anjam bole segi tamo ungasari nanngi minjroqnsim Qotei aqa kumbra osornjreqnum. Ni tamo bei ulaiyosaieqnum. Ni tamo ñam ti nanngi anjam bei minjroqnsim olo tamo ñam saiqoji nanngi anjam bei minjro-saieqnum. Ni anjam qujai tamo kalil nanngi minjreqnum. <sup>22</sup> Deqa ni iga merge. Iga Sisar takis yqom e? Yqasai e? Ni kiyersi are qalonum?” <sup>23</sup> Onaqa Yesus a nanngo areqalo uge di poiyoonaqa minjrej, <sup>24</sup> “Ninngi meniñ silali bei osorbiy.” Degsi minjrnaga nanngi meniñ silali bei osi bosib osoryonab unsiqa minjrej, “Meniñ silali quraq endi tamo yai aqa ulatamu ti ñam ti unu?” Onaqa nanngi na minjeb, “Di Sisar aqa.” <sup>25</sup> Onaqa a na minjrej, “Deqa Sisar aqa ingi ingi a qa olo yiy. Qotei aqa ingi ingi a qa olo yiy.” <sup>26</sup> Onaqa nanngi Yesus aqa anjam di qusibqa tulan prugugetosib mequmosib soqneb. Tamo ungasari nanngo ñamdamuq di nanngi Yesus gisanjosib a anjam bei grotqa yonab ugeinjrej.

*Tamo moreño qaji nanngi olo subq na tigelqab*

<sup>27</sup> Onaqa Sadyusi tamo qudei nanngi Yesus aqa areq beb. Sadyusi nanngi mareqnuq, “Tamo moreño qaji nanngi olo subq na tigelqasai.” <sup>28</sup> Deqa nanngi bosib Yesus endegsib minjeb, “O Qalie Tamo, ni que. Moses a nami dal anjam endegsi nenngrenyej, ‘Tamo bei a moiymqa aqa ñaun angro saiqoji soqnimqa aqa was bei na olo unqa qobul di osim aqa was moiyej qaji aqa angro ñambabtetqas.’ Moses a nami dal anjam degsi nenngrenyej. <sup>29</sup> Deqa ni que. Was 7 nanngi soqneb. Nanngo was matu a unqa osiqa moiyej. A angro saiqoji. <sup>30</sup> Onaqa aqa was yala na olo unqa qujai di osiqa a dego moiyej. A angro saiqoji. <sup>31</sup> Onaqa aqa was yala na olo unqa qobul di osiqa a

dego moiyej. A anğro saiqoji. Was 7 kalil nanği uña qujai di osib moreñeb. Nanği anğro saiqoji. <sup>32</sup> Nanği kalil moreñonabqa ariya bunuqna uña di a dego moiyej. <sup>33</sup> Deqa ni iga merge. Mondon subq na tigelo batiamqa tamo kalil nanği subq na tigelabqa uña di a yai aqa ñaun tintin sqas? Ni qalie, was 7 kalil nanği uña qujai di eb.”

<sup>34</sup> Onaqa Yesus na minjrej, “Mandamq endi tamo nanği unateqñub. Uña nanği tamoteqñub. <sup>35</sup> Ariya mondon tamo unğasari Qotei na subq na tigelqa giltñjrej qaji nanği subq na tigelosibqa nanği tamotqasai. Nanği unatqasai. <sup>36</sup> Nanği lan anğro bul laña sqab. Qotei na nanği subq na tigeltnjrimqa nanği aqa segi anğro bole sqab. Deqa nanği olo moreñqa keresai. <sup>37</sup> Ningi quiy. Tamo nanği moisib olo subq na tigelqab anjam di aqa utru Moses a nami babtosiq endegsi nenğrenyej, ‘Nam mariñ miligiq di puloñeqnaqa Qotei a ñam puloñq di sosiqa Moses metosiq minjej, “E Abraham aqa Qotei. E Aisak aqa Qotei. E Jekop aqa Qotei.” ’ <sup>38</sup> Qotei na Moses degsi minjej deqa iga qalieonum, Qotei a tamo moreño qaji nanğo Qotei sai. A tamo ñambile so qaji nanğo Qotei. Deqa tamo kalil nanği Qotei aqa ñamgalaq di ñambile unub.”

<sup>39-40</sup> Onaqa dal anjam qalie tamo nanği Yesus aqa anjam di qusibqa nanği olo anjam bei nenemyqajqa ulaeb. Deqa nanği na minjeb, “O Qalie Tamo, ino anjam di bole.”

### *Kristus a kiyersim Devit aqa ñiri sqas?*

<sup>41</sup> Onaqa Yesus a olo nanği endegsi minjrej, “Dal anjam qalie tamo nanği kiyayaqa mareqñub, ‘Kristus a Devit aqa ñiri’? <sup>42-43</sup> Devit a nami marej, ‘Kristus a ijo Tamo Koba.’ Agi louqa buk miligiq di Devit a anjam endegsi nenğrenyej, ‘Tamo Koba a na ijo Tamo Koba minjej, “Ni ijo bañ woq endi awo.

Awesoqñimqa e ino jeu tamo kalil nanği elenjosiy ino sorgomq di atitqa ni na nanği taqatñjroqñam.” ’

<sup>44</sup> Ningi uniy. Devit a marej, ‘Kristus a ijo Tamo Koba.’ Deqa Kristus a kiyersim Devit aqa ñiri sqas?”

### *Dal anjam qalie tamo nanği kumbra uge uge yeqñub*

<sup>45</sup> Tamo unğasari kalil nanği Yesus aqa anjam di queqñabqa a na aqa anğro nanği endegsi minjrej, <sup>46</sup> “Ningi dal anjam qalie tamo nanğo kumbra uge geregere tenemtoqñiy. Nanği koro sawaq di tamo unğasari nanği na nanğo ñam soqtetñjrsib bañ ojetñjrçajqa deqa gara jugo olekokba jugoqñsib laqñub. Nanği Qotei tal miligiq di, goiyo kokbaq di sosibqa tamo ñam ti nanğo awo jaramq di awoqajqa tulañ areboleboleinjqñu. <sup>47</sup> Nanği uña qobul nanği gisañjroqñsibqa nanğo tal ti inği

inji ti lanja yainjreqnub. Osib tamo ungasari nanji na unjrsib nanjo ñam soqtetnrqajqa deqa pailyo olekokba yeqnub. Deqa mondoj Qotei na nanji awai tulan ugedamu enjrças.”

## 21

### *Uña qobul aqa silali kiñala soqnej di Qotei yekritej*

<sup>1</sup> Yesus a atra tal miligiq di sosiqa ñam atej di ñoro tamo nanji boqnsib silali ato qaji kulumq di silali ateqnab unjroqnej. <sup>2</sup> Onaqa uña qobul bei ñoro tulan saiqoji a dego bosiq menin silali kiñilala aiyel segi atej. Atnaqa Yesus na unsiq aqa angro nanji minjrej, <sup>3</sup> “E bole merngwai. Uña qobul endi a ñoro tulan saiqoji. Deqa a na ñoro tamo kalil nanji bujnrsiq silali kobaquja atqo. <sup>4</sup> Ñoro tamo nanji silali koba ti unub. Nanji oto kiñala segi ateqnub. Ariya uña qobul endi a silali tulan sai bole sai. Aqa menin silali kiñilala aiyel segi naj agi atekritqo.”

### *Bunuqna jeu tamo nanji na atra tal niñaqyqab*

<sup>5</sup> Onaqa Yesus aqa angro qudei nanji atra tal di koqyosibqa Yesus minjeb, “O Tamo Koba, ni unime. Atra tal walato qaji menin di tulan boledamu. Qotei atraiyqajqa inji inji ti menin ti turtosib atra tal endi walateb.” Onaqa Yesus na kamba minjrej, <sup>6</sup> “Atra tal ninji unonub endi bunuqna jeu tamo nanji na bosib tulan niñaqyosib aqa menin kalil paraparainjrsibqa taqal breinjrqab. Yimqa menin bei menin bei aqa quraq di sqasai. Menin kalil segiseqiqab.”

### *Gulbe kobaquja bunuqna brantqas*

<sup>7</sup> Onaqa Yesus aqa angro nanji na kamba nenemyeb, “O Qalie Tamo, bati gembu jeu tamo nanji bosib atra tal endi niñaqyqab? Niñaqyqa osibqa kumbra kiye namoqna brantim iga unsim poigwas, ‘Bati di jojomqo?’” <sup>8</sup> Onaqa Yesus na minjrej, “Ninji geregere ñam atoqniy. Tamo qudei na ninji gisanjo uge. Bunuqna gisanjo tamo gargekoba nanji ijo ñam na boqnsib maroqnqab, ‘E Kristus.’ Qudei maroqnqab, ‘Kristus bqajqa bati agi jojomqo.’ Degsib gisanjosib maroqnibqa ninji nanji daurnjraib. <sup>9</sup> Bunuqna sawa bei bei qaji nanji an na qotokobaoqnqab. Ninji deqa qusib ulaaib. Qotei a nami marej, ‘Kumbra di brantqas.’ Deqa brantem. Ariya kumbra di brantimqa diño bati urur brantqasai. Soboleiyosim brantqas.”

<sup>10</sup> Yesus a nanji degsi minjrsiq olo minjrej, “Bati deqa sawa bei ti sawa bei ti qotoqnqab. Mandor kokba qudei nanji dego tigelosibqa mandor kokba qudei nanji qoto itnjroqnqab. <sup>11</sup> Sawa bei beiq di mimin kokba ti ma uge ti

mam ti ingi saio bati brantelenqas. Lan goge di manwa bei bei brantoqnibqa tamo unqasari nanqi unoqnsib ulaugetoqnqab.

<sup>12</sup> “Ariya kumbra kalil di brantosaisoqnmqqa Juda nanqi na bosib ningi jeutngoqnsib ugeugeingqnsib ojelenoqnqab. Ojelenoqnsib anjam pegiyo talq di ningi tigeltngoqnsib tonto talq di breingqnsib. Osib ijo ñam ugetqa are qaloqnsib ningi joqoqnsib Rom nanqo mandor ti nanqo gate ti nanqo ulatamuq di ningi tigeltngoqnsib. <sup>13</sup> Yimqa gam dena ningi ijo anjam bole palontoqnsib nanqi minjroqnqab. <sup>14</sup> Deqa ningi na kamba anjam kiye minjrqajqa deqa nami are koba qalaib. <sup>15</sup> E segi na nunqo medabu singilatetngosiy powo engitqa ningi kamba anjam minjroqnqab. Minjroqnibqa nanqi nunqo anjam di gotranqqa yoqnb ugeinjroqnqas.

<sup>16</sup> “Bati deqa nunqo ai abu nanqi ti nunqo was nanqi ti nunqo leñ nanqi ti nunqo kadoi nanqi ti tigeloqnsib ningi ojelenoqnsib jeu tamo nanqo banq di atelenoqnqab. Osib ningi qudei lunqoqnb moreñoqnqab. <sup>17</sup> Ningi ijo ñam ejunub deqa tamo unqasari kalil nanqi ningi qa tulan ugeoqnsib jeutngoqnqab. <sup>18</sup> Ariya Qotei na ningi geregere taqatngoqnqas deqa ijo anqro bei padalqasai. Ningi kalil bole sqab. Nunqo gate banqa bei dego ugeqasai. <sup>19</sup> Deqa ningi gulbe di qoboiyoqnsib singila na tigelesoqniy. Sosib dena ningi ñambile bole oqab.

### *Bunuqna qaja tamo nanqi Jerusalem qure niñaqyqab*

<sup>20</sup> “Bunuqna qaja tamo nanqi bosib Jerusalem agutesqab. Agutesoqnb ningi unsibqa endegsib qalieqab, ‘Bole, Jerusalem padalqajqa bati brantqo.’ <sup>21</sup> Bati deqa tamo unqasari Judia sawaq di unub qaji nanqi jaraiyosib manaq oqoqujatebe. Tamo unqasari Jerusalem di unub qaji nanqi qure uratosib jaraiyoqujatebe. Tamo unqasari wauq di, gamq di unub qaji nanqi olo puluosib qureq baib. Nanqi torei dena jaraiyoqujatebe. <sup>22</sup> Bati deqa Qotei na tamo unqasari nanqo une qa kambatnjrougetqas. Yimqa aqa anjam kalil nami nenqrenqeb qaji di aqa damu brantqas. <sup>23</sup> O aiyo! Bati deqa Qotei aqa minjin Juda nanqoq aiyimqa gulbe tulan kobaquja nanqo mandamq di brantqas. Deqa unqa guman ti unqa anqro mom ti nanqi jaraiyo banqioqnsib gulbe gargekoba oqnqab. <sup>24</sup> Jeu tamo nanqi bosib Juda nanqi serie na ñumoqnb moreñoqnqab. Osib qudei ojelenosib joqsib sawa bei beiq di uratnjroqnqab. Tamo Juda sai nanqi bosib Jerusalem tulan niñaqyosib singila na taqatesqab. Taqatesoqnb bati Qotei a nami giltej qaji di kereamqa a na nanqi olo taqal breinjrqas.

*Tamo Anqro a singila ti rian ti lanbiq na mandamq aiqas*



25 “Bati deqa seŋ ambruqas. Bai dego suwanqasai. Bongar naŋgi ululoŋosib mandamq aiyelenqab. Yuwal dego korkortosim anjam atoqnqas. Yimqa sawa bei bei qaji naŋgi quoqniŋ areqalo niñaqyetnjoqniŋnaŋgi tulaŋ ulaugetoqnqab. 26 Lan goge di iŋgi iŋgi kalil reŋginyleneŋamqa tamo ungasari naŋgi unsib maroqnqab, ‘Bole, gulbe oqa batiqo.’ Naŋgi degsiŋ maroqnsib ulaugetoqnsib ŋam eririqniŋroqniŋnaŋgi. 27 Bati deqa e Tamo Anqro siŋgila ti rian koba ti lanbiq na mandamq aiyeqniŋ tamo ungasari naŋgi tarosib e nubqab. 28 Kumbra kalil di brantqa utru atoqniŋnaŋgi ulaaib. Niŋgi tigelosib tarosib ŋam atoqniŋ. Di kiyaqa? Qotei na niŋgi awaiŋim niŋgi bole sqajqa bati jojomqo deqa.”

*Niŋgi qura qa yawo anjam dena poiŋgem*

29 Osiqa Yesus a yawo anjam endegsi minjrej, “Niŋgi qura ti ŋam kalil ti unjriy. 30 Naŋam baŋga qalsim olo niŋalguyoqniŋnaŋgi niŋgi unsib qalieqab, ‘Seŋ aqa bati jojomqo.’ 31 Dego kere kumbra kalil e ubtosim merŋgonum qaji endi brantimqa niŋgi unsib endegsiŋ qalieoiy, ‘Bole, Qotei na aqa segi tamo ungasari naŋgi taqatniŋrsim naŋgo Mandor Koba sqajqa bati jojomqo.’

32 “E bole merŋgwai. Tamo ungasari bini bati endeqa unub qaji naŋgi kalil moreŋosaisoqniŋba kumbra kalil e ubtosim merŋgonum qaji endi brantelenqas. 33 Lan ti mandam ti koboqab. Ariya ijo anjam koboqa keresai.”

*Niŋgi gegerere ŋam atsib soqniye*

34 Osiqa Yesus a olo marej, “Niŋgi gegerere ŋam atsib soqniy. Niŋgi ya uge uyoqnsib nanarioqnaib. Nuŋgo segi jejamu qa iŋgi iŋgi qa areqalo kobaiyoqnaib. Aliem urur bel qaleqnu dego kere bati uge di bosim niŋgi pruoqniŋgo uge. 35 Od, bati uge di bosim tamo ungasari sawa sawa kalilq di unub qaji naŋgoq di brantokuqatqas. 36 Deqa niŋgi gaigai ŋam atoqnsib Qotei pailyoqnsib soqniy. Yimqa Qotei a siŋgila eŋgoqniŋnaŋgi kumbra kalil brantelenqas qaji di niŋgi na britosib e Tamo Anqro ijo ulatamuq di tigelesqab.” Yesus a degsi marej.

37 Bati gaigai qanam Yesus a atra tal miligiq di sosiqa tamo ungasari naŋgi Qotei aqa anjam palontoqnsiq minjroqnej. Qoloeqnaqa a olo qure uratoqnsiq mana niŋam Oliv di niŋeioqnej. 38 Tamo ungasari kalil naŋgi Yesus aqa anjam quqwa maroqnsib nobqolo ambru tigeleqnsibqa atra tal miligiq giloqneŋ.

## 22

*Judas a Yesus osim jeu tamo naŋgo baŋq di atqas*

1 Onaqa Juda naŋgo yori bati jojomej. Yori bati di aqa niŋam Bem Tiyosai Qaji Uyqajqa Bati. Qotei a nami Israel

nanği Isip sawaq di padalqa laq nabqa aqaryainjrej. Deqa olo are qalqajqa yori bati jojomej. <sup>2</sup> Yori bati jojomonaqa atra tamo kokba ti dal anjam qalie tamo nanği ti Yesus qalsib moyotqajqa gam n̄amoqneb. Di kiyaaqa? Nanği tamo ungasari nanği ulainjreb deqa.

<sup>3</sup> Onaqa Satan a Judas aqa miligiq aiyej. Judas aqa ñam bei Iskariot. A dego Yesus aqa angro 12 nanği deqaji bei. <sup>4</sup> Satan a Judas aqa miligiq aisiq walawalaiyonaqa tigelosiqa atra tamo kokba ti atra tal taqato tamo nanği ti nanğoq gilsiq minjrej, “E Yesus osiy nunğo banq di atqai.” <sup>5</sup> Degsi minjrnaqa nanği areboleboleinjrnaqa minjeb, “Ni Yesus osim gago banq di atimqa iga ni silali emqom.” <sup>6</sup> Degsi minjnabqa a nanğo anjam di qusiqa minjrej, “Di kere.” Osiqa Judas a gilsiq a na Yesus osim nanğo banq di atqajqa gam n̄amoqnej. A are qalej, “Yesus a tamo ungasari nanği uratnjrsim a segi soqnimqa e na osiy Juda tamo kokba nanğo banq di atqai.”

*Pita Jon wo nanği yori bati aqa inği inği gereiyeb*

<sup>7</sup> Onaqa Bem Tiyosai Qaji Uyqajqa Bati brantej. Qotei a nami Israel nanği endegsi minjrej, “Niği kaja du du nanği ñumelenosib siranmeq di leñ liyibqa e na unsiy niği uratngwai. E niği padaltngwasai.” Qotei a nami Israel nanği degsi minjrej. Kumbra deqa olo are qalqajqa yori bati brantonaqa Juda nanği mareb, “Iga kaja du du nanği ñumelenosim Qotei atraiyqom.” <sup>8</sup> Onaqa bati deqa Yesus na Pita Jon wo nanği minjrej, “Bini yori bati koba. Deqa niği aiyel aisib gago inği inği gereiyetgibqa iga koba na inği uyqom.” <sup>9</sup> Onaqa nanği aiyel na minjeb, “Ni iga merge. Iga aisim tal qabia inği inği gereiyqom?” <sup>10-11</sup> Onaqa Yesus na nanği aiyel qarijnjrsiqa minjrej, “Niği aiyel aisib qure ambleq di tamo bei ya nobu qoboyosim giloqnim gamq di itosib dauryiy. Niği a dauryosib tal a gogetqas qaji di miligiq gilsib tal lanja endegsib minjiy, ‘Qalie Tamo a marqo, “E ijo angro nanği koba na awoosim yori bati aqa inği uyqajqa warum a qabi unu?” ’ <sup>12</sup> Niği degsib minjibqa a na warum kobaquja bei gogeqsi unu di niği osornğwas. Warum dia nami jar ti awo jaram ti ateleneb unu. Niği aiyel aisib warum dia gago inği inği gereiyelenoy.” <sup>13</sup> Onaqa nanği aiyel aisib anjam kalil Yesus na minjrej qaji degsi brantonab unsibqa inği inği kalil gereiyeleneb.

*Yesus na aqa angro nanği bem ti wain ti anainjrej*

<sup>14</sup> Onaqa inği uyqa bati brantonaqa Yesus aqa anjam maro tamo nanği ti koba na awoosib inği uyoqneb. <sup>15</sup> Nanği inği uyoqnsibqa Yesus na nanği endegsi minjrej, “E jaqatin osaiunum. Deqa e niği koba na awoosim yori bati aqa

inji uyqajqa tulan areboleboleibqo. <sup>16</sup> E ninji merngwai. E inji endi olo uyqasai. Degsi gilsiy mondon Qotei na ninji taqatngosim a nungo Mandor Koba soqnimqa inji endi aqa utru e na geregere babtosiyo olo uyqai.”

<sup>17</sup> Osika a wain osiq gambanq di bilentosiqa Qotei pailyosiqa aqa angro nanji endegsi minjrej, “Ninji wain gambanq endi osib uyiyo. <sup>18</sup> E ninji merngwai. E wain endi olo uyqasai. Degsi gilsiy mondon Qotei na ninji taqatngosim a nungo Mandor Koba soqnimqa e olo uyqai.” <sup>19</sup> Osika Yesus a olo Qotei pailyosiqa bem osiq ginjenyosiqa nanji enjrsiqa minjrej, “Endi ijo jejamu. E ninji aqaryainqwa osim deqa enqonum. Deqa ninji osib uyiyo. Bunuqna ninji gaigai uyoqn-sib e qa are qaloqniyo.” <sup>20</sup> Onaqa nanji bem uynabqa Yesus na olo wain gambanq osiq Qotei pailyosiqa minjrej, “Wain gambanq endi ijo leq. Nunqo une kobotqajqa deqa ijo leq aisim Qotei aqa anjam bunuj nami gereiyej qaji di singilatqas. <sup>21</sup> Ariya ninji quiy. Ijo angro bei na e osim tamo qudei nanqo banq di atqas. Angro di agi iga koba na endego awoosim inji uyeqnum. <sup>22</sup> E Tamo Angro. Deqa Qotei na nami merbej, ‘Ni moiqam.’ A degsi merbej deqa e aqa anjam di dauryosiy moiqai. Ariya angro e osim tamo qudei nanqo banq di atqas qaji a tulan padalougetqas.” <sup>23</sup> Yesus na aqa angro nanji degsi minjrnaq qusibqa segi segi maroqneb, “Angro yai a kumbra di yqas?”

*Yesus aqa angro nanji njirinosisib anjam na qotoqneb*

<sup>24</sup> Onaqa Yesus aqa angro nanji segi segi njirinosisib yai a angro kalil bunjrnsim ñam ti sqas deqa anjam na qotoqneb. <sup>25</sup> Onaqa Yesus na minjrej, “Mandor kokba sawa sawa kalil taqateq-nub qaji nanji njirin na sawa taqateq-nub. Yeqnab tamo unqasari nanji na nanqo ñam soqtoqnsib mareq-nub, ‘Nanji sawa taqato tamo bole.’ <sup>26</sup> Ariya kumbra di nunqoq di saiq. Nunqo ambleq di angro bei a tamo kobaquja sqa marsimqa a mati tamo lanqaj bul soqnem. Osim a tamo kobaquja sqas. Nunqo ambleq di angro bei a ñam ti sqa marsimqa a mati nunqo wau tamo soqnem. Osimqa a ñam ti sqas. <sup>27</sup> Ninji are qaliyo. Tamo yai a tamo kobaquja? Tamo awoosiq inji uyeqnu a kiyo? Tamo wauosiq inji suweiyeqnu a kiyo? Tamo agi awoosiq inji uyeqnu qaji a tamo kobaquja. Ariya ijo kumbra degsi sosai. E nunqo ambleq endi sosim ninji wauetngeqnum.

<sup>28</sup> “O ijo angro, e gulbe qoboiyeqnam ninji e uratbo-saieq-nub. Ninji e beterbeq-nub. <sup>29</sup> Ijo Abu na e Mandor Koba atej dego kere e kamba ninji mandor atelenqai. <sup>30</sup> Osii mondon e nunqo Mandor Koba sosii ninji koba na inji ti ya ti uyoq-nqom. Yimqa ninji awo jaram kokbaq di awoosib Jekop aqa angro 12 nanqo moma kalil nanji taqatnjroq-nqab.”

*Pita a gisaŋoqalubtosim marqas, “E Yesus qaliesai”*

<sup>31</sup> Osiqa Yesus a olo marej, “O ijo angro kalil Saimon ombla niŋgi quiy. Satan na niŋgi uneq waiŋgwa marqo. Niŋgi siŋgila na tigelesosib e daurbqab kiyo e uratbosib jaraiqab kiyo di Satan a nuŋgo areqalo tenemtosim qalieqajqa deqa niŋgi uneq waiŋgwa marqo. Agi tamo naŋgi bem sum ŋoqoryoqnsib damu elenqeqnub dego kere. <sup>32</sup> O Pita, e ni qa gaigai endegsim pailyeqnum, ‘O Abu, ni na Pita aqa areqalo siŋgilatetimqa a e uratbqasai.’ E ni qa degsim pailyeqnum. Bole, ni mati ulonqam. Ariya bunuqna ni olo are bulyosim ijoq bqam. Bosim ino was naŋgi siŋgilatnjqroqnaqam.”

<sup>33</sup> Onaqa Pita na Yesus minjej, “O Tamo Koba, ni na marimqa aqo ombla tonto talq aisim moreŋqom. E ulaqasai.” <sup>34</sup> Onaqa Yesus na minjej, “O Pita, ni que. Bini tuwe anjamosaisoqniŋqa ni gisaŋoqalubtosim marqam, ‘E Yesus qaliesai.’ ”

*Yesus aqa angro naŋgi silali ti qaquŋ ti sebru ti oqab*

<sup>35</sup> Osiqa Yesus na aqa angro naŋgi endegsi minjrej, “E niŋgi nami qarinqosim merngem, ‘Niŋgi gilsib ijo anjam mare mare laqniy. Niŋgi silali ti gilaib. Nuŋgo qaquŋ aib. Siŋga taqal jigaib.’ Degsi merngonamqa niŋgi iŋgi bei qa truqueb e?” Onaqa naŋgi na minjeb, “Sai. Iga iŋgi bei qa truquosai.” <sup>36</sup> Onaqa a na minjrej, “Ariya bini e anjam di beltosiy olo endegsi merngwai. Nuŋgo silali bei soqnim oiy. Nuŋgo qaquŋ bei soqnim di dego oiy. Niŋgi sebru saiamqa nuŋgo gara jugo bei qarinqosib silali osib dena sebru awaiyiy. <sup>37</sup> E niŋgi merngwai. Anjam e qa nami nenjrenjyeb qaji di aqa damu brantqas. Anjam agiende, ‘Tamo ungasari naŋgi marqab, “Kristus a une tamo.” ’ ” <sup>38</sup> Onaqa Yesus aqa angro naŋgi na minjeb, “O Tamo Koba, ni unime. Iga sebru aiyel ejunum.” Onaqa Yesus na minjrej, “Di kere.”

*Yesus a Oliv manaq oqsiq dia Qotei pailyej*

<sup>39</sup> Yesus aqa kumbra gaigai yoqnej qaji di dauryosiqa Jerusalem uratosiq Oliv manaq oqej. Aqa angro naŋgi dego a dauryosib oqeb. <sup>40</sup> Oqsib naŋu agu beiq di brantosib Yesus na aqa angro naŋgi minjrej, “Niŋgi endegsib pailiy, ‘O Abu, gulbe bei na iga uneq waigaiq.’ ” <sup>41</sup> Yesus a degsi minjrjsiqa naŋgi uratnjrjsiq kiŋala sasalej. Tamo bei na meniŋ waiyim isaq yala gilqas dego kere a sasalosiq siŋga pulutosiq Qotei pailyej. <sup>42</sup> A endegsi pailyej, “O Abu, ni marimqa gulbe endi ijoq baiq. Gulbe endi ya uge uyo bul. Unqum, ni ijo areqalo dauryaim. Ni ino segi areqalo dauryosim ye.”

<sup>43-44</sup> Yesus a degsi siŋgila na Qotei pailyoqnsiqa a are tulan gulbekobaiyej. Onaqa a ŋeskobaiyosiqa aqa ŋes len ti mandamq aiyonqej. Bati deqa lan angro bei aisiqa Yesus

taqyosiqa singilatej. <sup>45-46</sup> Yesus a pailyo koboonaqa a olo tigelosiqa aqa angro nanjo areq aisiq nam atej di nanji are gulbe na nerenesonab unjrej. Unjrnaqa minjrej, “Ningi kiyaaqa nerenejunub? Ningi tigelosib Qotei pailyoqniy. Yim gulbe bei nunjoq bqas di gulbe dena ningi uneq wainjwasai.”

*Judas a Yesus osiq jeu tamo nanjo banq di atej*

<sup>47</sup> Yesus a anjam degsi mareqnaqa aqa angro 12 nanji deqaji bei agi Judas a na tamo gargekoba nanji joqsiqa Yesus aqa areq di branteb. Brantonabqa Judas a Yesus aqa areq bosiq kundoqyej. <sup>48</sup> Kundoqyonaqa minjej, “O Judas, e Tamo Angro. Tamo nanji endi e ojqaqqa deqa ni na e kundoqbonum e?”

<sup>49</sup> Onaqa tamo nanji di Yesus ojqa laqnabqa aqa angro nanji unsibqa Yesus minjeb, “O Tamo Koba, ni marimqa iga gago sebru osim tamo nanji di ñumnam morenqab.” <sup>50</sup> Degsi minjsibqa aqa angro bei na aqa sebru osiqqa atra tamo gate aqa kanjal tamo bei gateq di qalqajqa sebru waiyej grotosiqa dabkala wo segi gentetej. <sup>51</sup> Onaqa Yesus na aqa angro nanji minjrej, “Kumbra degyaib. Uratiy.” Degsi minjrsiqa tamo di aqa dabkala ojnaqa olo boleej.

<sup>52</sup> Onaqa Yesus na atra tamo kokba ti atra tal taqato tamo nanji ti Juda gate nanji ti minjrej, “E leñ ojo tamo unum deqa kiyo ningi sebru ti torom ti elenosisib e ojqa bonub e? <sup>53</sup> E bati gaigai atra tal miligiq di ningi koba na soqnem. Bati deqa ningi yala ban waiyosib e ojosai. Ariya bati uge nunjoq di brantqo deqa ningi e ojonub. Endego amburu aqa singila agi brantqo.”

*Pita a marej, “E Yesus qaliesai”*

<sup>54-55</sup> Onaqa nanji Yesus ojsib walwelosib atra tamo gate aqa talq osi gileb. Nanji Yesus osi gileqnabqa Pita a kiñala isa isaq na nanji daurnjrsiq gilej. Gilsiqqa atra tamo gate aqa tal meq di brantej. Brantosiqa qaja tamo qudei nanji tal meq di nam tunjuyosib awesonabqa bosiq nanji koba na nam yoroqnej. <sup>56</sup> Pita a namyuwo areq di awesonaqa kanjal unja bei na unsiqqa koqyosiq qaja tamo nanji minjrej, “Tamo endi Yesus ombla soqneb.” <sup>57</sup> Onaqa Pita a saidosiq minjej, “Unja, e tamo di qaliesai.” <sup>58</sup> Sokiñalayonaq tamo bei na olo Pita unsiqqa minjej, “Ni dego Yesus aqa angro bei.” Onaqa Pita na minjej, “E aqa angro sai.” <sup>59</sup> Olo kiñala soboleiyonaq tamo bei na Pita koqyosiqqa singila na marej, “Tamo endi a dego Galili qaji tamo. Deqa e qalieonum, a Yesus ombla soqneb.” <sup>60</sup> Onaqa Pita na minjej, “Ni anjam maronum di e poibosai bole sai.” Degsi minjnaqa tuwe anjamej. <sup>61-62</sup> Tuwe anjamon-aqa Tamo Koba a bulosiqa Pita koqyej. Koqyonaqa anjam nami Yesus na minjej qaji, “Bini tuwe anjamosaisoqnimqa ni

gisañoqalubtosim marqam, ‘E Yesus qaliesai,’ ” anjam deqa olo are qalsiqa poiyoñaqa tal qalaq gilsiqqa tulañ akamugetej.

*Nanji na Yesus misiliñyoqnsib ban na qaloqneb*

<sup>63</sup> Tamo Yesus ojob qaji nanji a misiliñyoqnsibqa ban na qaloqneb. <sup>64</sup> Qaloqnsibqa aqa ñamdamu gara na qosetosib minjoqneb, “Ni Kristus amqa ni ubtosim mare, yai na ni lumqo?” <sup>65</sup> Degsib minjoqnsib olo misiliñ anjam gargekoba minjoqneb.

*Yesus a Juda tamo kokba nanjo ulatamuq di tigelej*

<sup>66</sup> Onaqa nobqolo malu gameqnaq Juda gate nanji ti atra tamo kokba ti dal anjam qalie tamo nanji ti koroosib Yesus osib tigeltosib nenemyeb, <sup>67</sup> “Ni Kristus amqa geregere merge.” Onaqa a na minjrej, “E kamba anjam merñgwai di ninji ijo anjam quetbqasai. <sup>68</sup> E anjam bei nenemñgwai di ninji olo anjam merbqasai. <sup>69</sup> Deqa e ninji endegsi merñgwai. E Tamo Anjro. Bini bati endeqa ti bunuq qa ti e Qotei singila koba ti unu qaji aqa ban woq di awesqai.”

<sup>70</sup> Yesus a nanji degsi minjrnaqa nanji na minjeb, “Deqa ni Qotei aqa Niri e?” Onaqa a na minjrej, “Od. Anjam ninji maronub di kere.” <sup>71</sup> Onaqa nanji Yesus aqa anjam di qusib tulañ minjiñ oqetnrnaqa segi segi maroqneb, “Aqa une agi a segi babtqo iga quonum. Deqa iga kiyaaqa tamo bei olo metonam bosim aqa une marqas?”

## 23

*Juda tamo kokba nanji Yesus osib Pailat aqa ulatamuq di tigelteb*

<sup>1</sup> Juda tamo kokba nanji degsib marsibqa Yesus osi gilsib Rom nanjo gate Pailat aqa ulatamuq di tigelteb. <sup>2</sup> Tigeltosib Pailat minjeb, “Iga Yesus uneqnum, a na Juda tamo ungasari nanji kumbra ugeq breinjreqnu. Osiqa nanji mandor koba Sisar takis yqajqa saidnjroqnsiqa minjreqnu, ‘E segi nunjo Mandor Koba. E segi Kristus.’ ” Juda tamo kokba nanji degsib Yesus aqa jejamuq di une qameteb. <sup>3</sup> Onaqa Pailat a nanjo anjam di qusiqa Yesus nenemyej, “Ni Juda nanjo Mandor Koba e?” Onaqa Yesus na minjej, “Od. Anjam ni maronum di kere.” <sup>4</sup> Onaqa Pailat na atra tamo kokba ti tamo ungasari kalil nanji ti minjrej, “E segi are qalonum, Yesus aqa jejamuq di une bei saiqoji.” <sup>5</sup> Degsi minjrnaqa nanji na kamba minjeb, “Yesus a tamo ungasari nanji kumbra uge dauryqajqa are tigeltetnjreqnu. Agi a Galili sawaq di aqa wau utru atsiqa dena Judia sawaq aisiq qure qure kalilq di walweloqnsiqa dena bosiq gago qure endia dego kumbra degyeqnu.”

*Pailat na Yesus qarinyonaqa Herot aqaq gilej*

<sup>6</sup> Onaqa Pailat a nanngo anjam di qusiqa nenemnjrej, “Yesus a Galili qaji tamo e?” <sup>7</sup> Degsi nenemnjrnaqa nanngi na minjeb, “Od, a Galili qaji tamo.” Onaqa Pailat a nanngo anjam di qusiqa minjrej, “Mandor Herot a Galili sawa taqatejunu. Bini a Jerusalem endi unu. Deqa e Yesus qarinyitqa a Herot aqaq gilinqa a kamba Yesus aqa anjam quqwas.” Degsi minjrsiqa Yesus qarinyonaqa Herot aqaq gilej.

<sup>8</sup> Herot a nami Yesus qa anjam quoqnej deqa a Yesus itqajqa arearetoqnej. Yesus a bosim Herot aqa ulatamuq di manwa bei yim unqajqa deqa are qaloqnej. Deqa a Yesus aqa ulatamuq unsiqa tulan areboleboleiyej. <sup>9</sup> Onaqa a na Yesus anjam gargekoba nenemyoqnej. Nenemyeqnaqa Yesus a kamba anjam bei marosai. A torei mequmesoqnej. <sup>10</sup> Deqa atra tamo kokba ti dal anjam qalie tamo nanngi ti bosib Herot aqa ulatamuq di tigelosib Yesus aqa jejamuq di une gargekoba qamelenoqneb. <sup>11</sup> Onaqa Herot aqa qaja tamo qudei nanngi ti Yesus tulan ugeugeiyosib misilinyoqneb. Osib gara jugo olekoba mandor kokba nanngi gaigai jigeqnuq deqaji bei osib jigetosib qarinyonab olo Pailat aqaq aiyej. <sup>12</sup> Bati qujai deqa Herot Pailat wo nanngi jeu turyeb. Nami nanngi ombla jeu soqneb.

*Pailat a marej, “Ninngi Yesus a namburbasq di qamiy”*

<sup>13-14</sup> Onaqa Pailat na atra tamo kokba ti Juda gate nanngi ti tamo ungasari kalil nanngi ti metnjrnaqa aqa areq bosib koroonaqqa endegsi minjrej, “Ninngi Yesus osib ijo areq di tigeltosib merbonub, ‘Tamo endi a tamo ungasari nanngi kumbra ugeq breinjreqnu.’ Merbonubqa e segi Yesus geregere nenemyonum ninngi quonub. Une kalil ninngi aqa jejamuq di gameqnuq qaji di e quonum ugeibqo. E aqa jejamuq di une bei itosai. <sup>15</sup> Herot a dego Yesus aqa jejamuq di une bei itosai. Deqa a na Yesus olo qarinyoqqa ijoq bqo. Deqa ninngi quiy. Ninngi Yesus aqa une bei babtosai. Deqa e a lanja moiyoqqa keresai. <sup>16-17</sup> Deqa e ijo qaja tamo nanngi minjrit nanngi bu toqon na kumbainyosib a uratib gilqas.”

<sup>18</sup> Onaqa tamo ungasari kalil nanngi Pailat aqa anjam di qusiqa nanngi tulan murqumyosib minjeb, “Ni Yesus urataim. Ni a moiyoqqa. Osim Barabas oqeq atsim iga ege.” <sup>19</sup> Barabas a nami tamo qudei nanngi joqsiqa Rom nanngi ti qotsib tamo qudei ñumeb deqa qaja tamo nanngi Barabas osib tonto talq di waiyeb. <sup>20</sup> Ariya Pailat a Yesus uratim oqedqajqa are soqnej deqa a na tamo ungasari nanngi olo minjrej, “Ninngi marib e Yesus uratit gilqas.” <sup>21</sup> Onaqa nanngi olo tulan murqumyoqnsib wainyoqnsib minjoqneb, “Ni Yesus urataim. Ni a namburbasq di qame! Ni a namburbasq di qame!” <sup>22</sup> Onaqa olo minjrej, “Kiyaqa Yesus qalit moiqaq? A une kiye yej deqa

a namburbasq di qamqai? Ningi Yesus aqa une bei babtosai. Deqa e a laña moyotqa keresai. Deqa e ijo qaja tamo nanngi minjrit nanngi bu toqoñ na kumbainyosib a uratib gilqas.”<sup>23-24</sup> Onaqa tamo ungasari nanngi olo tulan murqumyoqnsib singila na Pailat saidyoqnsibqa wainyoqnsib minjoqneb, “Ni Yesus namburbasq di qame!” Degsib singila na Pailat minjeqnab nanngo anjam dena Pailat aqa anjam qalotoqnej. Deqa a nanngo anjam di dauryosiqa minjrej, “Di kere. Unqum. E na ijo qaja tamo nanngi minjrit Yesus osi gilsib namburbasq di qamib moiqas.”<sup>25</sup> Degsi minjrsiqa Barabas tonto talq dena oqeq atsiqa nanngi enjrej. Osiqa tamo ungasari nanngo areqalo dauryosiqa Yesus osiqa qaja tamo nanngo banq di atnaqa nanngi na aqa qawarq di aqa segi namburbas atetosib a osib gileb.

*Nanngi Yesus osib namburbasq di qameb*

<sup>26</sup> Nanngi Yesus osi giloqnsibqa gamq di tamo bei walwelosiq Jerusalem aieyqnaqa a turosib ojsib Yesus aqa qawarq dena namburbas yayiosib tamo di yonabqa a kamba qoboiyosiqa gam na Yesus dauryosiq giloqnej. Tamo di aqa ñam Saimon. A Sairini qure qaji.

<sup>27</sup> Tamo ungasari tulan gargekoba nanngi Yesus gam na dauryosib giloqneb. Giloqnsibqa nanngo ambleq di unqa qudei nanngi are tulan gulbeinjrnaqa Yesus qa akamoqnsib lou ti giloqneb. <sup>28</sup> Gileqnabqa Yesus a qusiqa bulosiqa nanngi minjrej, “O Jerusalem ungasari, ningi e qa akamaib. Ningi nunngo anqro nanngi qa ti ningi segi qa ti akamoiy. <sup>29</sup> Ningi quiy. Bati bei brantinqa tamo nanngi endegsib marqab, ‘Unqa nanngo miligi ugeej qaji nanngi ti unqa angtosaieqnub qaji nanngi ti areboleboleinjrqas. Unqa anqro munqum anainjrosaieqnub qaji nanngi dego areboleboleinjrqas.’ Tamo nanngi degsib marqab. <sup>30</sup> Osib mana nanngi minjrqab, ‘Ningi bosib iga kabutgosib ulitgiy.’ <sup>31</sup> O ungasari, e ñam gesgi bul. Tamo nanngi na e kumbra uge ebeqnub. Tamo nanngi di ñam moyo bul. Deqa kumbra tulan ugedamu nanngoq di brantqas.”

<sup>32</sup> Bajin tamo aiyel dego namburbasq di ñumib moreñqajqa marsib Yesus koba na joqsib giloqneb. <sup>33</sup> Nanngi giloqnsib sawa agu kiñala bei aqa ñam Tamo Gate Tanu di brantosib dia Yesus namburbasq di qameb. Qamsib bajin tamo aiyel nanngi dego namburbasq di ñumeb. Bei Yesus aqa ban woq di qameb. Bei Yesus aqa ban qonanq di qameb. <sup>34</sup> Yesus a namburbas goge di sosiqa a endegsi pailyej, “O Abu, ni na tamo nanngi e gaintbonub qaji nanngo une di kobotime. Nanngi une yonub di nanngi qaliesai.” Bati deqa qaja tamo nanngi Yesus aqa gara elenqa marsib gilteleneb. Osib meniñ silali alaneb. Tamo yai aqa meniñ na bunjrqas di a na gara oqas. Degsib marsib meniñ silali alanosib gara eleneb.



35 Onaqa tamo ungasari kalil nanği tigelesosib Yesus koqyeq nabqa Juda gate nanği na Yesus misilinjoqnsib endegsib maroqneb, “A na tamo ungasari nanği aqaryainjroqnej. Ariya a na aqa segi jejamu aqaryaiyqa keresai. A maroqnej, ‘E Qotei aqa Kristus. A na e giltbej.’ Anjam di boleamqa a na aqa segi jejamu aqaryaiyosim namburbas uratosim mandamq aiyem.” 36-37 Qaja tamo nanği dego Yesus degsib misilinjoqneb. Osib aqa areq gilsib wain isa koba anaiyosib minjeb, “Ni Juda nanžo Mandor Koba boleamqa ni ino segi jejamu aqaryaiyosim namburbas urat.” 38 Osib namburbas mutu gogeq di anjam endegsib nenjrenyeb, “Tamo endi a Juda nanžo Mandor Koba.”

39 Onaqa bajin tamo bei namburbasq di qameb qaji a na Yesus misilinjosiq minjej, “Ni Kristus amqa ni ino segi jejamu aqaryaiyosim aqo aiyel dego aqaryaige.” 40 Onaqa bajin tamo bei na aqa anjam di qusiq nirinjosiq minjej, “Gulbe Yesus a oqo endi ni dego onum. Deqa ni kiyaaqa Qotei ulaiyosai? 41 Aqo aiyel une tamo. Deqa iga kere morenqom. Ariya Yesus aqa jejamuq di une bei saiqoji.” 42 Osiq Yesus minjej, “O Yesus, mondoj ni olo bosim Mandor Koba sosimqa ni e qa are qalsim e ame.” 43 Onaqa Yesus na minjej, “Bini qujai ni e ombla lan qureq di sqom. E bole mermonum.”

### *Yesus a moiyej*

44-45 Qanam jige sen bati 12 onaqa sawa kalil tulan ambrusi sonaq gilsiq sen bati 3 onaq bilaqtej. Bati qujai deqa gara kobaquja atra tal miligiq di gainesoqnej qaji a goge na branosiq aisiq poaiyelej.

46 Onaqa Yesus a tulan lelenosiq marej, “O Abu, e na ijo qunun osim ino banq di atonum.” Degsi marsiq mondor titosiq moiyej.

47 Onaqa qaja tamo nanžo gate a Yesus degsi mondor titosiq moiyej di unsiq Qotei aqa nam soqtosiq marej, “Bole, Yesus aqa jejamuq di une bei saiqoji.”

48 Onaqa tamo ungasari kalil Yesus unqa beleneb qaji nanği dego Yesus degsi moiyej di unsibqa a qa are tulan gulbeinjrnaqa are soqonyeb. Osib jaraiyosib nanžo segi segi talq gileleneb.

49 Yesus aqa kadoi kalil nanği ti ungasari qudei nami Yesus dauryosib Galili sawa uratosib Jerusalem beleneb qaji nanği ti isaq di tigelesosibqa Yesus a namburbasq di gainosiq moinaq koqyoqneb.

### *Josep a Yesus aqa jejamu osiq subq atej*

50 Tamo bei aqa nam Josep a soqnej. A Juda nanžo gate bei. A Arimatea qure qaji. Arimatea a Judia sawaq di unu. Josep a

tamo bolequja. Aqa kumbra tulan boledamu. <sup>51</sup> A endegsi are qaloqnej, “Bunuqna Qotei a bosim gago Mandor Koba sosim iga taqatgwas.” A degsi are qaloqnsiq Qotei qa tarinoqnsiq soqnej. Juda gate kokba nanqi Yesus qalib moiqajqa anjam qoseb bati deqa Josep a nanqi koba na anjam qososai. A nanqo anjam di uratoqnej. <sup>52</sup> Tamo di a Pailat aqa areq bosiq nenemyej, “Ni e odbimqa e Yesus aqa jejamu osiy subq atqa kere e?” <sup>53</sup> Onaqa Pailat na odyonaqa gilsiq Yesus aqa jejamu namburbasq dena osiq gara qat na dalaosiq osi gilsiq sub bei nami meniḡ miligiq di gereiyeb qaji dia atej. Sub di bunuj. Sub dia nami tamo bei jugosaioqneb. <sup>54</sup> Juda nanqo yori bati brantqa laqnej deqa yori bati aqa inḡ inḡ kalil gereiyosib atnab soqnej.

<sup>55</sup> Bati di unḡasari qudei nami Yesus dauryosib Galili sawaq dena beleneb qaji nanqi Josep koba na subq gileb. Gilsib Josep na Yesus subq atnaq uneb. <sup>56</sup> Unsib olo puluosib nanqo talq aisib ḡam so aqa ya quleq tulan boledamu di gereiyosib atnab soqnej. ḡam so aqa ya di Yesus aqa jejamuq di liyqajqa marsib deqa gereiyeb. Onaqa yori bati brantonaga nanqi Qotei aqa dal anjam dauryosib wau getentosib aqaratosib soqneb.

## 24

### *Yesus a olo subq na tigelej*

<sup>1</sup> Yori bati koboonaqa nebeonaq nobqolo ambru unḡasari nanqi olo tigelosib ḡam so aqa ya quleq boledamu nami gereiyeb qaji di osib Yesus aqa jejamuq di liyqajqa deqa subq gileb. <sup>2</sup> Nanqi gilsib ḡam ateb di meniḡ kobaquja sub me getentesoqnej qaji di waqosiq taqal di sonaq uneb. <sup>3</sup> Unsib sub miligiq aiyeḡ di nanqi Tamo Koba Yesus aqa jejamu unosai. <sup>4-5</sup> Deqa nanqi are tulan kobainjrej. Onaqa tamo aiyel nanqi brantosib unḡasari nanqo areq di tigelesonab unjrsib tulan ulaugetosib turuosib mandamq di ḡam queb. Tamo aiyel di nanqo gara tulan minjalo. Onaqa nanqi na unḡasari nanqi minjreb, “Ninḡi kiyaaq tamo moiyo sawaq endi tamo ḡambile unu qaji a qa ḡameqnub? <sup>6</sup> Yesus a endi sosai. A olo subq na tigelqo. Nami a Galili sawaq di sosisqa bati deqa a na ninḡi endegsi mernḡej, ‘E olo subq na tigelqai.’ Ninḡi aqa anjam deqa olo are walḡwo kiyo? <sup>7</sup> Agi a ninḡi endegsi mernḡej, ‘E Tamo Anḡro ojsibqa une tamo nanqo banq di atib lubib moiqai. Bati qalub koboamqa e olo subq na tigelqai.’”

<sup>8-9</sup> Onaqa unḡasari nanqi Yesus aqa anjam deqa olo are qalsibqa subq dena puluosib aisib anjam kalil tamo aiyel na minjreb qaji di Yesus aqa anḡro 11 nanqi tamo qudei ti sainjreb. <sup>10</sup> Unḡa bei aqa ḡam Maria. A Makdala qure qaji. Bei Joana. Bei Maria. A Jems aqa ai. Unḡasari qudei dego

tamo aiyel nanḡo anjam di qusib aisib Yesus aqa anjam maro tamo nanḡi sainjreb. <sup>11</sup> Sainjrnb qunab ugeinjrnaq mareb, “Uḡgasari nanḡo anjam di lanḡa sa anjam.” <sup>12</sup> Onaqa Pita a tigelosiq urur ti gilsiq sub miligiq di tirosiq ḡam atej di Yesus dalaeb qaji gara di segi sonaq unej. Unsiqa olo puluosiq aqa talq aisiq kumbra deqa are koba qaloqnej.

*Yesus aqa anḡro aiyel nanḡi Emeus gamq di Yesus tureb*

<sup>13</sup> Bati qujai deqa Yesus aqa anḡro aiyel nanḡi Jerusalem uratosib qure bei aqa ḡam Emeus deq giloqneb. Jerusalem dena tigelosib Emeus qureq gilqajqa kiḡala isaq 11 kilomita dego. <sup>14</sup> Nanḡi aiyel giloqnsibqa kumbra kalil jeu tamo nanḡi na Yesus yoqneb qaji deqa ombla maroqnsib giloqneb. <sup>15</sup> Gileqnbqa Yesus a segi nanḡoq di brantosiqa nanḡi koba na walwelosib giloqneb. <sup>16</sup> Nanḡi Yesus uneb ariya nanḡi a qa poinjrosai.

<sup>17</sup> Deqa a na nanḡi aiyel endegsi nenemnjrej, “Niḡi anjam kiye maroqnsib gileqnb?” Degsi nenemnjrnaqa nanḡi tigeleb. Yesus a moiyej deqa nanḡi aiyel ulatamu tulanḡ ugeinjrej. <sup>18</sup> Onaqa bei aqa ḡam Kliopas a na kamba Yesus minjej, “Tamo gargekoba nanḡi Jerusalem endi unub. Ni segi kiyo kumbra brantej qaji deqa qaliesai?” <sup>19</sup> Onaqa Yesus na kamba nenemnjrej, “Kumbra kiye brantej?”

Onaqa nanḡi aiyel na minjeb, “Kumbra kalil Nasaret tamo Yesus aqaq di brantej qaji iga deqa mareqnum. A Qotei aqa medabu o qaji tamo bole soqnej. A Qotei ti tamo uḡgasari kalil ti nanḡo ḡamdamuq di maḡwa kokba yoqnej. Osiqa anjam siḡgila ti dego maroqnej. <sup>20</sup> Ariya a kumbra degyeqnaqa gago gate nanḡi ti atra tamo kokba ti nanḡi na a ojsib Rom nanḡo banq di ateb. Atnabqa nanḡi na a osib tigeltosib minjeb, ‘Ni une tamo. Deqa ni moiqam.’ Degsib minjsib a osib ḡamburbasq di qalnab moiyej. <sup>21</sup> Iga are qalem, ‘Yesus a na qujai iga Israel tamo uḡgasari awaigim iga bole sqom.’

“Anjam bei dego unu. Yesus a moiyej bati qalub gilqo. <sup>22-23</sup> Yqoqa nobqolo amburu gago uḡgasari qudei nanḡi Yesus aqa subq gilonub nanḡi aqa jejamu unosai. Dena puluosib bosib iga mergonub, ‘Iga subq di lanḡ anḡro qudei unjronumqa nanḡi na mergonub, “Yesus a subq na tigelqo. Deqa a ḡambile unu.” ’ Uḡgasari nanḡi na iga degsi mergonubqa iga tulanḡ prugugetonum. <sup>24</sup> Tamo qudei nanḡi iga koba na sonam nanḡi dego subq gilonub. Gilsib kumbra kalil uḡgasari nanḡi na unsib saigonub qaji di unonub. Ariya nanḡi Yesus aqa jejamu unosai.”

<sup>25</sup> Onaqa Yesus na kamba minjrej, “Nunḡo areqalo tulanḡ truquingwo. Qotei aqa medabu o tamo nanḡo anjam nami maroqneb qaji di niḡi poinḡosai. <sup>26</sup> Anjam agiende. Kristus

a jaqatin koba osim moिसim lan qureq oqimqa Qotei na ñam kobaquja yqas.”<sup>27</sup> Osiqa Yesus a segi qa anjam kalil nenngrenq di so qaji di nanngi sainjrej. A Qotei aqa medabu o tamo kalil nanngi Moses ombla nanngo anjam nenngrenq di so qaji dena utru atsiq anjam gegerere plaltosiq minjroqnej.

<sup>28-29</sup> Ariya nanngi qalub koba na walwelosib qure nanngi gilqa mareb qaji di jojomyosib Yesus a nanngi uratnjrsim gam bei dauryqa laqnaqa nanngi aiyel na saidyosib minjeb, “Ni iga uratgaim. Qoloqas. Deqa ni iga koba na sqom.” Degsi minjnabqa a nanngi aiyel daurnjrsiqa nanngo tal gogetosib koba na soqneb. <sup>30</sup> Sosib awoosib ingi uyoqnsib Yesus a bem osiq Qotei pailyosiqa bem ginngenyosiqa nanngi aiyel anainjrej. <sup>31</sup> Anainjrnaqa bati deqa nanngi Yesus qa poinjrnaqa mareb, “Bole, tamo endi Yesus.” Degsib marnabqa Yesus a nanngo ambleq na loumosiq ulanej. <sup>32</sup> Ulanonaq nanngi mareb, “Bole, aqo aiyel gamq di walweleqnamqa Yesus a Qotei aqa anjam nenngrenq di so qaji di aqa utru gegerere plaltosiq mergeqnaqa iga quoqnsim tulan arearetgoqnaj.”

<sup>33</sup> Nanngi aiyel degsib marsib bati qujai deqa nanngi tigelosib olo puluosib Jerusalem aisib Yesus aqa angro 11 nanngi tamo qudei ti koroesonab itnjreb. <sup>34</sup> Onaqa nanngi na nanngi aiyel endegsib minjreb, “Tamo Koba a bole subq na tigelqo. Agi a subq na tigelosiq Saimon aqaq di brantqoqa a bole unqo.” <sup>35</sup> Degsib minjrnabqa nanngi aiyel kamba anjam kalil gamq di Yesus na minjrej qaji deqa ti a na bem ginngenyosiq anainjrnaqa nanngi a qa poinjrej deqa ti nanngi sainjreb.

### *Yesus aqa angro nanngi a uneb*

<sup>36</sup> Degsib sainjreqnabqa Yesus a segi nanngo ambleq di brantosiqa minjrej, “Ninngi are lawo soqniy.” <sup>37</sup> Degsi minjrnaqa nanngi kalil ulaosib tulan prugugetosib are qaleb, “Iga buga bei unonum kiyo?” <sup>38</sup> Onaqa Yesus na minjrej, “Ninngi kiyaga e buga qa marsib ulaosib prugonub?” <sup>39</sup> Endi e di. Ninngi ijo ban bile unsib ijo singa unsib ban waiyosib ijo jejamu ojsib poinngwas, e damu ti tanu ti. Buga a damu ti tanu ti saiqoji.” <sup>40-41</sup> Yesus na nanngi degsi minjrsiqa aqa ban ti singa ti nanngi osornjrnaqa nanngi unsib tulan areboleboleinjrej. Onaqa nanngi olo areqalo aiyeltoqnsib are koba qaloqneb. Yeqnaqa Yesus na minjrej, “Ninngi ingi bei unu e?” <sup>42-43</sup> Onaqa nanngi qe bei koiteb qaji di gentosib mutu bei Yesus yonab osiq nanngo ñamdamuq di uyej.

<sup>44</sup> Uysiqa minjrej, “E nami ninngi koba na sosimqa endegsi merngoqnem, ‘Dal anjam kalil Moses a e qa nenngrenjyej qaji di aqa damu brantqas. Anjam kalil Qotei aqa medabu o tamo nanngi e qa nenngrenjyeb qaji di dego aqa damu brantqas. Anjam kalil louqa buk miligiq di e qa nenngrenjyeb qaji di dego aqa

damu brantqas.' E nami ninji degsi merngoqnem." <sup>45</sup> Osiqa Yesus a nanjo areqalo waqtetnrnaqa nanji Qotei aqa anjam nenngrenq di so qaji di aqa utru geregere poinjrej. <sup>46</sup> Onaqa Yesus na olo minjrej, "Kristus a jaqatin koba osim moisim bati qalub koboamqa a olo subq na tigelqas anjam di nenngrenq di unu. <sup>47-48</sup> Deqa ijo anjam maro tamo nanji sawa sawa kalilq giloqnsibqa dia ijo anjam palontoqnqab. Palontoqnib tamo ungasari nanji quoqnsib are bulyoqnqab. Yimqa Qotei a ijo ñam na nanjo une kobotetnrroqnqas. O ijo angro, ninji segi ijo anjam maro tamo unub deqa kumbra kalil e nami nunjo namdamuq di yoqnem qaji deqa tamo ungasari nanji sainjroqniy. Ninji Jerusalem endia wau di utru atsib laqniy. <sup>49</sup> Ninji quiy. Mondor Bole ijo Abu a nami nunjoq qarinyqa marej qaji di e na qarinyit nunjoq bqas. Deqa ninji qure endia tarinoqniy. Tarinosib soqniqbqa lan goge na Qotei aqa singila nunjoq bqas."

*Qotei na Yesus osiq lan qureq oqej*

<sup>50</sup> Osiqa Yesus na aqa angro nanji joqsiqa Jerusalem uratosib Betani qureq gileb. Gilsib dia aqa ban soqtosiqa nanji qa pailyej. <sup>51</sup> Pailyeqnaqa Qotei na a metonaq nanji uratnrjsiqa lan qureq oqej. <sup>52</sup> A lan qureq oqeqnaqa nanji singa pulutosibqa a qa louosib tulan areboleboleinjrej. Onaqa nanji olo puluosib Jerusalem aiyebe. <sup>53</sup> Aisib bati gaigai atra tal miligiq di sosibqa Qotei aqa ñam soqtoqnebe.

# JON

## *Qotei a tamo bulyosiqa gago ambleq di soqnej*

<sup>1</sup> Tulañ nami ingi ingi kalil brantosaisonabqa Anjam a soqnej. Anjam a Qotei ombla soqneb. Anjam a segi Qotei.

<sup>2</sup> Tulañ nami Anjam a Qotei ombla soqneb. <sup>3</sup> Anjam a singila ti soqnej. Singila dena Qotei na ingi ingi kalil gereiyej. Ingi bei gam bei na brantosai. Ingi ingi kalil branteleneb qaji di Anjam a segi na gereiyej. <sup>4</sup> Anjam a segi nambile qa utru. Nambile di puloñ bul. Nambile dena tamo ungasari nanği suwantnjreqnu. <sup>5</sup> Puloñ di ambruoq di suwanqnu. Ambru na puloñ di mosotqa keresai.

<sup>6</sup> Tamo bei brantej aqa ñam Jon. Qotei na a qarinyonaq bej. <sup>7</sup> A bosiqqa puloñ qa anjam palontoqnej. Di kiyaaqa? Tamo ungasari kalil nanği aqa anjam qusib puloñ qa nanço areqalo singilatqajqa deqa. <sup>8</sup> Jon a puloñ sai. A puloñ qa anjam palontqajqa bej. <sup>9</sup> Puloñ di puloñ bole. A mandamq aisiqa tamo ungasari kalil nanği suwantnjreqnu.

<sup>10</sup> Anjam a mandamq di soqnej. Aqa singila na Qotei a mandam atej. Ariya tamo ungasari mandamq di soqneb qaji nanği a qa poinrosai. <sup>11</sup> A aqa segi qure utruq ainaqa aqa leñ qujai nanği a areiyosai. <sup>12</sup> Ariya tamo ungasari a areiyosib aqa ñam qa nanço areqalo singilateb qaji nanği a na giltjnnaqa nanği Qotei aqa anğro tintin branteb. <sup>13</sup> Ai abu na nambabtnjro qaji nançoq dena nanği Qotei aqa anğro brantosai. Nanço segi areqalo na nanği Qotei aqa anğro brantosai. Tamo bei aqa areqalo na dego nanği Qotei aqa anğro brantosai. Qotei a segi na marnaqa nanği aqa anğro tintin branteb.

<sup>14</sup> Anjam di a tamo bulyosiqa gago ambleq di soqnej. Son-aqa iga aqa ñam koba ti aqa singila koba ti unem. A segi qujai Qotei aqa Niri. A iga qa are tulañ boleiyeqnu. A segi anjam bole qa utru. <sup>15</sup> A qa nami Jon a anjam palontoqnsiqa endegsi leleñoqnej, “E nami maroqnem, ‘Tamo di a ijo qoreq na bqas. E nambabosaisonamqa a nami soqnej. Deqa a na e tulañ bunbejunu.’”

<sup>16</sup> Qotei aqa Niri a iga kalil qa are tulañ boleiyeqnu. Aqa kumbra dena a na iga tulañ geregereigeqnu. <sup>17</sup> Bole, nami Qotei a Moses aqa wau na iga dal anjam egej. Ariya Yesus Kristus aqa wau na Qotei a iga qa are boleiyosiqa anjam bole egej. <sup>18</sup> Tamo bei na Qotei aqa ulatamu unosai. Qotei aqa Niri a na qujai iga Qotei osorgej. Qotei aqa Niri a segi Qotei. A aqa Abu aqa areq di sosisq beteryejunu.

*Jon yansnjro qaji a anjam palontoqnej*

<sup>19</sup> Bati bei Juda tamo kokba nanġi na atra tamo ti Livai nanġi ti qarinjrnabqa Jerusalem qure uratosib Jon aqa areq gilsib nenemyeb, “Ni tamo yai?” <sup>20</sup> Ariya Jon a anjam ulitosai. A segi qa ubtosiq minjrej, “E Kristus sai.” <sup>21</sup> Onaqa nanġi na olo nenemyeb, “Deqa ni tamo yai? Ni Elaija kiyo?” Onaqa a na minjrej, “Sai.” Onaqa nanġi na olo nenemyeb, “Ni Qotei aqa medabu o tamo iga a qa tariņeqnum qaji tamo de kiyo?” Onaqa a na kamba minjrej, “Sai. E a sai.” <sup>22</sup> Deqa olo nenemyeb, “Ni tamo yai? Ni segi qa kiyersi mareqnum di geregere mergimqa iga olo aisim tamo nanġi iga qarinjgonub qaji di minjrqom.” <sup>23</sup> Onaqa Jon na minjrej, “Nami Qotei aqa medabu o qaji tamo Aisaia a anjam endegsi nenġrenyej, ‘Tamo bei a wadau sawaq di tulaņ leleņoqnsim tamo uņgasari nanġi minjroqnaqas, ‘Tamo Koba a bqajqa gam gereiyeti.’” ’ Aisaia a nami anjam degsi nenġrenyej. Gam gereiyqa tamo agi e segi.”

<sup>24</sup> Tamo nanġi di Farisi nanġi na qarinjrnab Jon aqaq gileb. <sup>25</sup> Deqa nanġi olo Jon nenemyeb, “Ni Kristus sai. Ni Elaija sai. Ni Qotei aqa medabu o qaji tamo di sai. Deqa ni kiyaqqa tamo uņgasari nanġi yansnjreqnum?” <sup>26</sup> Onaqa Jon na kamba minjrej, “E ya na nanġi yansnjreqnum. Ariya nuņgo ambleq di tamo bei unu. Niņgi a qa qaliesai. <sup>27</sup> A ijo qoreq na bqas. A ñam ti unu. E ñam saiqoji. Deqa e na a kaņgalyqajqa e tamo bolesai.” <sup>28</sup> Jon a Betani qureq di nanġi anjam degsi minjroqnej. Betani qure di Jordan ya taqal beiq di unu. Dia Jon na tamo uņgasari nanġi yansnjroqnej.

### *Yesus a Qotei aqa Kaja Du*

<sup>29</sup> Nebeonaqa Yesus a walwelošiq Jon aqa areq beqnaqa unsiq marej, “Niņgi uniy. Tamo di a Qotei aqa Kaja Du. A na qujai tamo uņgasari mandamq endi unub qaji naņgo une kobotetnrqas. <sup>30</sup> E tamo deqa nami endegsi merngoqnem, ‘A ijo qoreq na bqas. E ñambabosaisonamqa a nami soqnej. Deqa a na e tulaņ bunbejunu.’ <sup>31</sup> E nami a qa qaliesai. Ariya Israel nanġi a qa qalieqajqa deqa e bosim ya na tamo uņgasari nanġi yansnjreqnum.”

<sup>32</sup> Jon a nanġi degsi minjršiqqa olo minjrej, “Qotei aqa Mondor a laņ qure uratosiq binon bulosiq mandamq aisiqa Yesus aqa gateq di awoonaq e unem. <sup>33</sup> E nami Yesus qa qaliesai. Ariya Qotei agi e ya na tamo uņgasari nanġi yansnjrqajqa qarinjbej qaji a na merbej, ‘Ijo Mondor Bole a aisim tamo bei aqa gateq di awoamqa ni unqam. A na qujai Mondor aqa singila na tamo uņgasari nanġi yansnjroqnaqas.’ <sup>34</sup> Qotei na e degsi merbonaqa e tamo di unsim marem, ‘Bole, a Qotei aqa Niri.’”

*Tamo qalub nanġi Yesus dauryeb*

<sup>35-36</sup> Olo nebeonaqa Jon aqa anġro aiyel nanġi ti koba na tigelesonabqa Yesus a walwelosiq gileqnaqa Jon na unsiqa nanġi aiyel minjrej, “Niġi uniy. Tamo di a Qotei aqa Kaja Du.” <sup>37</sup> Degsi minjrnaqa nanġi aiyel Jon dauryqa uratosib olo Yesus dauryosib gileb. <sup>38</sup> Onaqa Yesus a bulosiqqa nanġi aiyel a dauryosib beqnaqqa unjrnsiqqa nenemnjrej, “Niġi aiyel kiyaaqa e daurbeqnaq?” Onaqa minjeb, “Rabai, ni tal qabia unum?” Ñam “Rabai” di Hibru anjam. Gago anjam, “Qalie Tamo Koba.” <sup>39</sup> Onaqa Yesus na nanġi aiyel minjrej, “Niġi bosib ijo tal uniy.” Onaqa nanġi Yesus dauryosib gilsib tal a soqnej qaji di uneb. Unsib senj bati 4 onaqa bilaqtej deqa nanġi a ombla soqneb.

<sup>40</sup> Tamo aiyel Jon aqa anjam qusib Yesus dauryeb qaji bei aqa ñam Andru. A Saimon Pita aqa was. <sup>41</sup> A Yesus uratosiq walwelosiq aqa was Saimon itosiq minjej, “Iga Me-saia unonum.” Ñam “Mesaia” di Hibru anjam. Gago anjam, “Kristus.” <sup>42</sup> Degsi minjsiqqa Saimon osiq Yesus aqa areq osi gilej. Onaqa Yesus na Saimon unsiqa minjej, “Ni Saimon. Ni Jon aqa njiri. Bunuqna ino ñam Sifas mermoqnaqab.” Ñam “Sifas” di Hibru anjam. Gago anjam, “Pita.” Aqa damu, “Menij.”

*Yesus a Filip Nataniel wo nanġi metnjrej*

<sup>43</sup> Olo nebeonaqa Yesus a Galili sawaq gilqa osiqa tamo bei aqa ñam Filip itosiq minjej, “Ni e daurbe.” <sup>44</sup> Filip a Betsaida qure qaji. Di Andru Pita wo nanġo qure utru. <sup>45</sup> Onaqa Filip a aisiqa tamo bei aqa ñam Nataniel itosiq minjej, “Ni au. Iga tamo a qa nami Moses marsiq dal anjamq di nengrenjey qaji a unonum. Qotei aqa medabu o qaji tamo nanġi dego a qa maroqnsib nengrenjoqneb. Tamo di Yesus Nasaret qure qaji. A Josep aqa njiri.” <sup>46</sup> Onaqa Nataniel na kamba Filip minjej, “Nasaret di qure kiñala. Di qure kobaquja sai. Tamo bole bei a qure dena brantqa kere kiyoo?” Onaqa Filip na minjej, “Ni bosim tamo di unime.”

<sup>47</sup> Onaqa Nataniel a walwelosiq Yesus aqa areq beqnaqa unsiqa a qa marej, “Niġi uniy. Tamo di a Israel tamo bolequja. A gisañ anjam marosaieqnu.” <sup>48</sup> Onaqa Nataniel na Yesus nenemyej, “Ni kiyersi e qa qalieonum?” Onaqa Yesus na kamba minjej, “Filip a ni metmosaisonaqa ni qura utruq di awesonamqa e ni numonum.” <sup>49</sup> Onaqa Nataniel a Yesus aqa anjam di qusiqa minjej, “O Qalie Tamo Koba, ni degsi maronum deqa e poibqo, ni Qotei aqa Njiri. Ni Israel nanġo Mandor Koba.” <sup>50</sup> Onaqa Yesus na kamba minjej, “Ni qura utruq di awesonam e ni numonum e degsi ubtosim



mermonumqa ni qusim ino areqalo e qa singilatonum e? Di ijo singila kiñala segi e babtonum. Bunuqna e ijo singila kokba babtoqnit ni unoqnaqam.”<sup>51</sup> Osiqa nanği kalil minjrej, “Niği quiy. E bole mernjwai. E segi Tamo Anğro. Deqa bunuqna lan waqamqa Qotei aqa lan anğro nanği ijo jejamuq na lan qureq oqoqnsib olo mandamq aiyonib niği unjrqab.”

## 2

### *Tamo bei uña bañ ojqa bati brantej*

<sup>1</sup> Bati aiyel koboonaqa Kana qure agi Galili sawaq di unu dia tamo bei uña bañ ojqa bati brantej. Deqa tamo unğasari nanği koroosib iği goiyeb. Anjam qarinyonab Yesus aqa ai a koro deq gilej. <sup>2</sup> Yesus aqa anğro nanği ti dego metnjrnab koro deq gileb. <sup>3</sup> Koroosib iği uyeqnaqba wain saiinjrnaba Yesus aqa ai na minjej, “Nanği wain saiinjrqo.” <sup>4</sup> Onaqa Yesus na minjej, “Ai, di ino wau. Di ijo wau sai. Ijo wauqa bati brantosaiunu.” <sup>5</sup> Onaqa aqa ai na kanğal tamo nanği endegsi minjrej, “Yesus a anjam kiye mernjimqa di dauryiy.”

<sup>6</sup> Tal dia ya nobu 6 kokba meniñ na gereiyo qaji atelenonab soqneb. Juda nanği Qotei pailyqa oqnsib ya nobu dena ya tigoqnsib nanço bañ ti jejamu ti yansoqneb. Deqa ya nobu di atelenonab soqneb. Ya nobu quja quja 100 lita. <sup>7</sup> Ariya Yesus na kanğal tamo nanği minjrej, “Ya nobu di maqteleniy.” Onaqa nanği ya nobuq di ya qamelenonab maqej. <sup>8</sup> Onaqa Yesus na olo minjrej, “Ya bei tigsib osi gilsib goiyo lanja a yiy.” Onaqa kanğal tamo nanği Yesus aqa anjam di dauryosib ya bei tigsib osi gilsib goiyo lanja a yeb. <sup>9</sup> Ya di Yesus na bulyonaq wain babej. Wain babonaqa goiyo lanja a uyo oneiyosiq marej, “Endi wain bolequja.” Wain di qabe na bej di a qaliesai. Kanğal tamo ya tigeq qaji nanği segi qalie. Onaqa goiyo lanja a na tamo uña bañ ojeq qaji di metonaq aqa areq bonaq minjej, <sup>10</sup> “Bati gaigai tamo nanği iği goiyoqnsib wain qaqatiñ bole namo tamo nanği anainjreqnab uyeqnaq. Uyeqnaq olo bunu wain qaqatiñ bolesai di anainjreqnab. Ariya ni degyosai. Ni wain qaqatiñ bole tentosim namo wain qaqatiñ bolesai anainjronum uyonub olo bunu wain qaqatiñ bole anainjronum.”

<sup>11</sup> Yesus a Kana qureq di mañwa di babtej. Kana qure agi Galili sawaq di unu. A nami mañwa bei babtosaioqnej. Bati di qujai a na mañwa babtqa utru atej. Mañwa dena a na aqa segi ñam koba ti aqa singila koba ti boleq atej. Onaqa aqa anğro nanği mañwa di unsibqa a qa nanço areqalo singilateb.

<sup>12</sup> Ariya uña bañ ojqa bati di koboonaqa Yesus aqa was nanği ti aqa anğro nanği ti aqa ai koba na Kana qure uratosib Kaperneam qureq gileb. Gilsib dia bati qudei soqneb.

*Tamo nanġi atra tal miligiq di inġi inġi qarinyoqneb*

<sup>13</sup> Qotei a nami Israel nanġi Isip sawaq di padalqa laqna bqa nanġi elenej. Deqa olo are qalqajqa yori bati jojomonaqa Yesus a Jerusalem aijej. <sup>14</sup> Aisiq atra tal kobaquja miligiq gilej. Gilsiq a nam atej di tamo nanġi na makau ti kaja ti binon ti qarinyeqnabqa tamo qudei na awaiyeqneb unjrej. Silali piloqneb qaji tamo nanġi nanġo awo jaramq di awesosib silali pileqna bqa nanġi dego Yesus na unjrej. <sup>15</sup> Unjrsiq raunġa osiq dena toqon gereiyosiq ganinyoqnsiq nanġi kalil nanġo kaja ti nanġo makau ti winjrnaqa atra tal uratosib jaraiyeb. Silali piloqneb qaji tamo nanġi dego winjrsiq nanġo awo jaram bilbelyosiq silali bimblejyetnjrej. <sup>16</sup> Osiqa tamo nanġi binon qarinyoqnsibqa dena silali oqneb qaji nanġi endegi minjrej, “Ninġi binon di elenjosib jaraiyiy. Ninġi na ijo Abu aqa tal endi inġi qarinyo tal bulyaib.” <sup>17</sup> Onaqa Yesus aqa anġro nanġi aqa kumbra di unsibqa Qotei aqa anjam bei nenġrenq di so qaji deqa olo are qaleb. Agi nami endegsib nenġrenyeb, “O Abu, e ino tal qa tulan arearetbqo. Deqa e ino tal bole sqajqa sinġilaeqnum.”

<sup>18</sup> Yesus na tamo nanġi di winjrnaqa Juda tamo kokba nanġi unsibqa deqa nenemyeb, “Ni manwa kiye babtım dena iga poigwas, ni Qotei aqa ñam na kumbra endi yeqnum?” <sup>19</sup> Onaqa Yesus na kamba minjrej, “Ninġi na atra tal kobaquja endi konġrontibqa bati qalub qa e olo tigeltqai.” <sup>20</sup> Onaqa nanġi na minjeb, “Atra tal endi gereiyeqnab wausau 46 koboej. Ni kiyaaqa bati qalub qa olo tigeltqa maronum? Keresai.”

<sup>21</sup> Yesus a atra tal qa marej di aqa segi jejamu sigitosiq yawo anjam marej. <sup>22</sup> Deqa bunuqna a subq na tigelonaqa aqa anġro nanġi aqa anjam deqa olo are qalsibqa Qotei aqa anjam nami nenġrenyeb qaji deqa poinjrnaqa Yesus qa nanġo areqalo sinġilateb.

*Yesus a tamo kalil nanġo kumbra qa qalie bole*

<sup>23</sup> Qotei a nami Israel nanġi Isip sawaq di padalqa laqna bqa nanġi elenej. Deqa olo are qalqajqa yori bati brantonaqa Yesus a Jerusalem di sosiq manwa babteqnaqa tamo unġasari tulan gargekoba nanġi unoqnsib aqa ñam qa nanġo areqalo sinġilatoqneb. <sup>24</sup> Ariya Yesus a nanġi areinjrosai. A tamo kalil nanġi qa qalie bole. <sup>25</sup> A powo bei qa truquosaieqnu. Deqa tamo bei na tamo nanġi qa ubtosim Yesus minjaiq. A segi tamo nanġo areqalo qalie bole.

### 3

*Nikodemus a qolo Yesus ombla anjam qaireb*

<sup>1</sup> Jerusalem dia tamo bei soqnej aqa ñam Nikodemus. A Farisi tamo. A Juda nanjo gate bei. <sup>2</sup> A qolo Yesus aqa areq bosiqá minnej, “O Qalie Tamo Koba, iga qalieonum, ni powo tamo bole. Ni Qotei aqáq na bem. Qotei a ni singila emosai qamu manwa ni yeqnum qaji di ni babtqa keresai qamu.”

<sup>3</sup> Onaqa Yesus na kamba minnej, “E bole mermqai. Tamo bei a angro mom bunuj bulosim ñambabqasai di Qotei na a taqatosim aqa Mandor Koba sqasai. Deqa a Qotei unqa keresai.” <sup>4</sup> Onaqa Nikodemus na nenemyej, “Tamo a qeliqo di a kiyersim olo aqa ai miligiq aisim angro mom bulosim ñambabqas?”

<sup>5</sup> Onaqa Yesus na kamba minnej, “E bole mermqai. Tamo bei a ya na ti Qotei aqa Mondor na ti angro mom bunuj bulosim ñambabqasai di Qotei na a taqatosim aqa Mandor Koba sqasai. <sup>6</sup> Niñgi nunjo ai abu nanjo jejamuq dena ñambabeqñub deqa niñgi mandam tamo unub. Ariya Qotei aqa Mondor na tamo bei ñambabtqas di a mondor ti sqas. <sup>7</sup> E ni mermonum, ‘Niñgi angro mom bunuj bulosib ñambaboij.’ Ni ijo anjam di qusim prugugetaim. <sup>8</sup> Jagwa a segi puyoqnsiqá sawa sawaq gileqnaqa ni aqa anjam ato queqnum. Ariya a qabe na kiyo boqnsiq qabiteqnu di ni qaliesai. Tamo kalil Qotei aqa Mondor aqa singila na angro mom bunuj bulosib ñambabeqñub qaji nanji kere dego.”

<sup>9</sup> Onaqa Nikodemus na olo Yesus nenemyej, “Kumbra di kiyersi brantqas?” <sup>10</sup> Onaqa Yesus na kamba minnej, “Ni Israel nanjo qalie tamo koba. Ni kiyaaqá ijo anjam endeqa poimosai? <sup>11</sup> E bole mermqai. Anjam iga qalieonum qaji deqa mareqnum. Kumbra iga uneqnum qaji deqa saeqnum. Ariya niñgi gago anjam endi ojosaieqñub. <sup>12</sup> Endego e mandam qa anjam merngonumqa niñgi qusib nunjo areqaloq di singilatqasai. Deqa e lan qure qa anjam dego merngit niñgi kiyersib nunjo areqaloq di singilatqab? <sup>13</sup> Tamo bei a lan qureq oqosai. E Tamo Angro e segi qujai lan qureq dena mandamq aiyem. <sup>14</sup> Nami Moses a wadau sawaq di sosiqa a amal sigitosiq soqtosiqá gaintej. Dego kere e Tamo Angro soqtbosib gaintqab. <sup>15</sup> Amqa tamo kalil e qa nanjo areqalo singilatqab qaji nanji ñambile gaigai sqab.

<sup>16</sup> “Qotei aqa Niri qujai unu. Qotei na tamo ungasari kalil mandamq endi unub qaji nanji tulan qalaqalainjrsiq deqa aqa segi Niri qujai di nanji enjrej. A endegsi are qalej, ‘Tamo ungasari nanji ijo Angro qa nanjo areqalo singilatqab di nanji padalqasai. Nanji ñambile gaigai sqab.’ Qotei a degsi are qalsiq deqa aqa segi Niri qujai nanji enjrej. <sup>17</sup> Qotei a tamo ungasari mandamq endi unub qaji nanjo une qa peginjrqá marsiq aqa Niri qarinyosai. A nanji elenam nanji padalaib

deqa osiq aqa Niri qarinyonaq mandamq aiyej. <sup>18</sup> Tamo ungasari Yesus qa nanngo areqalo singilateqñub qaji nanngi Qotei na peginjrqasai. Ariya tamo ungasari Yesus qa nanngo areqalo singilatosaieqñub qaji nanngi Qotei na peginjrqas. Di kiyaaqa? Nanngi aqa segi Niri qujai aqa ñam qa nanngo areqalo singilatosaieqñub qaji nanngi Qotei na peginjrqas di aqa utru agiende. Puloñ a mandamq ainaqa nanngi ambru qa arearetnjroqnej. Nanngi puloñ qa arearetnjrosaiqnej. Di kiyaaqa? Nanngi kumbra uge yoqñeb deqa. <sup>20</sup> Tamo ungasari kalil kumbra uge yeqñub qaji nanngi puloñ jeuteqñub. Nanngo kumbra uge di puloñ na boleq ataim deqa nanngi puloñ aqaq bosaieqñub. <sup>21</sup> Ariya tamo ungasari anjam bole dauryeqñub qaji nanngi puloñ aqaq beqñub. Boqñsib wau bole bole yeqñ-abqa tamo nanngi unoqñsib mareqñub, ‘Bole, nanngi Qotei aqa singila na wau di yeqñub.’ ”

*Jon yansnjro qaji a Yesus qa anjam palontoqnej*

<sup>22</sup> Bati bei Yesus aqa angro nanngi ti walwelosib Judia sawaq gileb. Gilsib dia sosibqa Yesus na tamo ungasari nanngi yansnjroqnej. <sup>23</sup> Jon yansnjro qaji a Ainon qureq di sosisqa a dego tamo ungasari nanngi yansnjroqnej. Ainon qure di Salim qure jojomq di unu. Dia ya koba soqnej deqa tamo ungasari nanngi Jon aqa areq beqñabqa a na yansnjroqnej. <sup>24</sup> Herot na Jon tonto talq di waiyosaisoqnej deqa Jon a kumbra di yoqnej.

<sup>25</sup> Bati bei Jon aqa angro qudei nanngi Juda tamo bei ti jejamu yanso kumbra qa anjam na qotoqñeb. <sup>26</sup> Osib nanngi Jon aqa areq gilsib minjeb, “O Qalie Tamo, nami tamo ni ombla Jordan ya taqal beiq di sosibqa ni a qa anjam maroqñem qaji bini tamo ungasari kalil nanngi aqa areq gileqñabqa a na yansnjreqñu. Nanngi inoq bosaieqñub.” <sup>27</sup> Onaqa Jon na kamba minjrej, “Qotei lañ qureq di unu qaji a na iga ingi bei egwasai di iga ingi bei oqa keresai. <sup>28</sup> Ningi segi ijo anjam bei quoqñeb. Agi e merñgoqñem, ‘E Kristus sai. Qotei na e namoqna qarinqbonaq e Kristus bqajqa gam gereiyetem.’ <sup>29</sup> Tamo unja bañ ojqaq qaji a segi na unja di oqas. Aqa was a laña qalaq di tigelesosimqa tamo unja bañ ojqa qaji aqa anjam quoqñqas. Qusimqa tulañ areboleboleiyqas. Dego kere e bini tulañ areboleboleibqo. <sup>30</sup> Kristus aqa ñam tulañ kobaqas. Ijo ñam aguq aiqas.” Jon na aqa angro nanngi degsi minjrej.

<sup>31</sup> Tamo lañ qureq di sosisqa dena mandamq aiyej qaji a na ingi ingi kalil tulañ buñnjrejunu. Mandam qaji tamo ungasari nanngi mandam endeqa kumbra yoqñsib anjam mareqñub. Ariya tamo lañ qureq di sosisqa dena mandamq aiyej qaji a na ingi ingi kalil tulañ buñnjrejunu. <sup>32</sup> Kumbra a uneqñu qaji a deqa saeqñu. Anjam a queqñu qaji di a na babtosiq mareqñu. Ariya mandam qaji tamo ungasari nanngi aqa anjam

di ojosaieqñub. <sup>33</sup>Tamo unğasari Yesus aqa anjam di ojeqñub qaji nanği a qa nanğo areqalo singilatoqñsib mareqñub, “Bole, Qotei a anjam bole qa utru.” Nanği degsib mareqñub. <sup>34</sup>Tamo Qotei na qarınıyej qaji a Qotei aqa anjam babtosiq mareqñu. Di kiyacaq? Qotei na aqa Mondor a torei yekritej deqa. A na aqa Mondor potosiq taqal bei segi Yesus yosai. <sup>35</sup>Abu na aqa segi Niri qalaqalaiyeqñu deqa a na inği inği kalil aqa banq di atelenej. <sup>36</sup>Tamo unğasari Qotei aqa Niri qa nanğo areqalo singilateqñub qaji nanği nambile gaigai sqab. Ariya tamo unğasari Qotei aqa Niri aqa anjam dauryqa urateqñub qaji nanği nambile itqasai. Qotei aqa minjin nanğoq di sqas.

## 4

### *Yesus a Samaria unğa bei wo anjam maroqñeb*

<sup>1-3</sup>Farisi nanği endegsib queb, “Yesus a Jon bunyosiqa tamo unğasari tulan gargekoba yansnjreqnaqa nanği a dauryeqñub. Jon a tamo gargekoba yansnjrosaieqñu.” Farisi nanği degsib queb. Bole, Yesus a segi na tamo unğasari nanği yansnjrosaioqñej. Aqa anğro nanği na yansnjroqñeb. Tamo Koba Yesus a qalieej, Farisi nanği degsib queb. Deqa a Judia sawa uratosiqa olo Galili sawaq gilej. <sup>4</sup>A gam dauryosiqa Samaria sawa amble potosiqa walweloşiq gilej.

<sup>5</sup>Gilsiq Samaria nanğo qure kiñala bei aqa ñam Sikar di brantej. Qure qalaq di mandam mutu bei soqnej. Mandam mutu di Jekop a nami aqa niri Josep yej. <sup>6</sup>Ya uyqajqa sub dia soqnej. Ya sub di Jekop a nami boğej qaji. Yesus a walweloşiq qanam jige seş bati 12 onaqa aqa jejamu asgiyonaqa aqaratqa osiqa ya sub qalaq di awoej.

<sup>7-8</sup>Onaqa aqa anğro nanği inği awaiyqa marsib qure miligiq aiyeb. Aiyeqñabqa Samaria unğa bei a ya tugwajqa bej. Bonaqa Yesus na minnej, “Ya gamban tigsim e anaibe.” <sup>9</sup>Onaqa Samaria unğa dena Yesus kamba minnej, “Ni Juda tamo. E Samaria unğa. Deqa ni kiyacaq e merbonum, ‘Ya gamban tigsim e anaibe?’” Unğa na degsiqa Yesus minnej. Di kiyacaq? Juda nanği Samaria nanği ti koba na anjam marosaieqñub. <sup>10</sup>Onaqa Yesus na unğa di minnej, “Ni inği bole Qotei na lanğa emqajqa di qalieosim qamu tamo ni na ya tigsim anaiyqajqa mermqo qaji a qa poimqo qamu ni e merbimqa nambile gaigai sqajqa ya anaimonum qamu.” <sup>11</sup>Onaqa unğa dena minnej, “O Tamo Koba, ni ya tugwajqa gamban saiqoji. Ya sub endi tulan guma koba. Deqa ni qabe na nambile gaigai sqajqa ya di oqam?” <sup>12</sup>Gago moma utru Jekop a nami ya sub endi bogsiqa gago moma nanği enjrej. A sub endena ya uyoqñej. Aqa anğro nanği ti aqa makau ti aqa kaja ti nanği dego sub endena ya uyoqñeb. Ni na gago moma utru

Jekop bunyqam kiyo?”<sup>13</sup> Onaqa Yesus na kamba minjej, “Tamo nanği sub endena ya uyoqnqab di nanği olo bunu ya qarnjroqnqas.<sup>14</sup> Ariya e na tamo nanği ya anainjrqai di nanği bunu ya qarnjrqasai. Ya e na anainjrqai di nanği uyibqa nanço are miligiq di ya ani bul polyoqnmqqa nanği nambile gaigai sqab.”<sup>15</sup> Onaqa uña dena Yesus minjej, “O Tamo Koba, ni na ya di anaibimqqa e olo ya qarboqnqasai. Amqa e olo bosiy sub endena ya tugoqnqasai.”

<sup>16</sup> Onaqa Yesus na minjej, “Ni mati aisim ino gumbulun metosim ninği ombla endeq boiy.”<sup>17</sup> Onaqa uña na minjej, “E gumbulun saiçoji.” Onaqa Yesus na minjej, “Ni gumbulun saiçoji di kere maronum.<sup>18</sup> Ni nami gumbulun 5 osim urat-njrem. Ariya tamo ni bini ombla unum qaji di ino gumbulun sai. Deqa ino anjam di bole.”<sup>19</sup> Onaqa uña dena minjej, “O Tamo Koba, ni anjam di ubtosim merbonum deqa e poibqo, ni Qotei aqa medabu o qaji tamo bole.”<sup>20</sup> Gago moma nanği nami manaq endi korooqnsib Qotei qa louoqneb. Ariya Juda nanği mareqnum, ‘Qotei qa louqajqa sawa qujai agi Jerusalem.’ ”

<sup>21</sup> Onaqa Yesus na olo minjej, “O uña, e ni anjam bei mermit ni qusim poimeme. Anjam agiende. Bati bei brantimqqa manaq endi ninği Abu qa louoqnqasai. Jerusalem dia dego ninği Abu qa louoqnqasai.”<sup>22</sup> Ninği Samaria qaji. Deqa ninği Abu qa loueqnub qaji a qa geregere poingosai. Ariya iga Juda qaji. Deqa iga Abu qa loueqnum qaji a qa geregere poiqe qnu. Di kiyaaqa? Abu na tamo unğasari nanği elenqajqa utru agi Juda iga segi.<sup>23</sup> Ariya bati bei brantimqqa tamo nanği Mondor na ti anjam bole na ti Abu qa louoqnqab. Osib nanço lou dena nanği Abu qa bole louoqnqab. Yim Abu a nanği qa tulan areboleboleiyqas. Bati di agi brantqo.<sup>24</sup> Qotei a segi Mondor. Deqa tamo nanği Qotei qa louqa oqnsib Mondor na ti anjam bole na ti louoqnqab di nanği Qotei qa bole louoqnqab.”<sup>25</sup> Onaqa uña dena Yesus minjej, “E qalie, Mesaia a bqas.” “Mesaia” di Hibru anjam. Gago anjam, “Kristus.” Osiaqa Yesus minjej, “Mesaia a bosimqqa Qotei aqa anjam kalil ubtosim mergekritqas.”<sup>26</sup> Onaqa Yesus na minjej, “Mesaia agi e segi. Aqo ombla anjam mareqnum.”

<sup>27</sup> Yesus a uña degsi minjnaqa aqa anğro nanği olo qureq na bosibqa a uña de wo anjam mareqnum unsibqa tulan prugueteb. Ariya nanği Yesus nenemyosai, “Ni kiyaaqa uña de wo anjam mareqnum?” Degyosai.<sup>28</sup> Onaqa uña dena aqa ya nobu uratosiqa olo qure miligiq aisiqa tamo unğasari nanği minjrej,<sup>29</sup> “Ninği bosib tamo di uniy. E kumbra nami yoqnem qaji di a na ubtekritqo. Tamo di a Kristus kiyo?”<sup>30</sup> Degsi minjrnaqa nanği qure uratosib Yesus unqajqa beb.

<sup>31</sup> Beqnaabqa Yesus aqa angro nanji na minjeb, “O Qalie Tamo Koba, ni bosim inġi uye.” <sup>32</sup> Onaqa Yesus na minjrej, “Ijo inġi uyo bei unu di ninġi qaliesai.” <sup>33</sup> Onaqa aqa angro nanji aqa anjam di qusibqa segi segi maroqneb, “Tamo bei na inġi bei osi bosiq anaiyqo kiyi?” <sup>34</sup> Onaqa Yesus na minjrej, “Qotei e qarinqej qaji aqa areqalo e dauryosiy aqa wau kobotqai. Ijo inġi uyo bole agide.

<sup>35</sup> “Ninġi mareqnu, ‘Bai qolqe koboeqnaqa inġi melieqnu.’ Ninġi degsib mareqnu. Ariya e na ninġi yawo anjam bei endegsi mernġwai. Ninġi inġi wauq di nam atsib inġi meliosiq unu di unqab. <sup>36</sup> Tamo inġi meli gentoqnsib koroiyeqnu qaji nanji awai eqnu. Nanġo awai agi nanji nambile gaigai sqab. Deqa tamo nanji inġi yageqnu qaji ti tamo nanji inġi meli genteqnu qaji ti koba na areboleboleinjraqas. <sup>37</sup> Deqa anjam endi bole, ‘Tamo bei na inġi yagwas. Olo tamo bei na inġi meli gentqas.’ <sup>38</sup> E ninġi qarinqonumqa gilsib wau ninġi na wauosai qaji dena inġi elenqnu. Tamo qudei nanji nami waukobaeb. Ariya ninġi lanja gilsib inġi elenqnu.”

<sup>39</sup> Uña dena Samaria tamo unġasari gargekoba qure dia soqneb qaji nanji Yesus qa sainjrnaq qusibqa Yesus qa nanġo areqalo sinġilateb. Di kiyaaqa? Uña na minjrej, “Kumbra kalil e nami yoqnem qaji di tamo dena ubtekritqo.” <sup>40</sup> Degsi minjrnaq qusibqa Yesus aqa areq bosib minjeb, “Ni gago qureq endi iga koba na sqom.” Degsi minjnabqa Yesus a bati aiyel nanġo qureq di soqnej. <sup>41</sup> Sosiqa Qotei aqa anjam palonteqnaqa tamo unġasari gargekoba nanġi aqa anjam quoqnsib poinjreqnaqa a qa nanġo areqalo sinġilatoqneb. <sup>42</sup> Deqa nanġi na uña di minjeb, “Ni Yesus qa anjam mergonam qusim gago areqaloq di sinġilatem. Sinġilatosim sonamqa a segi na olo anjam mergwo qusim turtosim gago areqalo a qa torei sinġilatonum. Osim deqa iga endegsi poigwo, ‘Bole, Yesus a na qujai tamo unġasari mandamq endi unub qaji nanġi elenqas.’ ”

*Yesus na Rom nanġo tamo gate aqa niri boletej*

<sup>43</sup> Onaqa bati aiyel koboonaqa Yesus a qure di uratosiqa walwelosiq Galili sawaq gilej. <sup>44</sup> A segi nami endegsi marej, “Qotei aqa medabu o qaji tamo bei aqa segi qure utruq gilsim anjam minjroqnaqas di nanġi aqa anjam quietqa asginjraqas. Deqa a qure dia nam saiqoji sqas.”

<sup>45</sup> Yesus a Galili sawaq di brantonaqa tamo unġasari sawa dia soqneb qaji nanġi a qa tulan areboleboleinjrej. Di kiyaaqa? Nami Juda nanġo yori bati koba qa Yesus a Jerusalem dia manwa babteqnaq nanġi unoqneb deqa.

<sup>46</sup> Ariya Yesus a olo Kana qureq aiyej. Qure di agi Galili sawaq di unu. Qure dia nami Yesus a ya bulyonaqa wain babej. Aisiq di sonaqa Kaperneam qureq di Rom nanġo

mandor aqa tamo gate bei aqa niri makobaiyonaq n̄iesoqnej. <sup>47</sup> Deqa tamo gate di Yesus a Judia sawa uratosiq bosiq Galili sawaq di soqnej di qusiqa walweloq aqa areq aisiq pai-lyosiq minjej, “O Tamo Koba, ijo angro a moiqa laqnu. Deqa ni bosim a boletime.” <sup>48</sup> Onaqa Yesus na tamo di minjej, “Ninji ijo manwa bei nunjo namdamu na unqasai di ningi e qa nunjo areqalo singilatqasai.” <sup>49</sup> Onaqa tamo dena olo Yesus minjej, “O Tamo Koba, ni boqujat. Ijo angro a moiyo uge.” <sup>50</sup> Onaqa Yesus na minjej, “Ni gile. Endego ino angro a boleqo nambile unu. A moiqasai.” Onaqa a Yesus aqa anjam di qusiqa bole qa marsiq gilej.

<sup>51</sup> A gileqnaqa aqa kanjal tamo qudei nanji aqa talq dena bosib gamq di turosib minjeb, “Ino angro a boleosiq nambile unu.” <sup>52</sup> Onaqa a na nenemnrej, “Sej bati gembu a boleqo?” Onaqa minjeb, “Ya qanam sej bosiq inji uyo bati tinyonaaqa aqa jejamu kanjan koboonaqa a boleej.” <sup>53</sup> Degsi minjnabqa a qalieej, sej bati deqa tintin Yesus na minjej, “Endego ino angro a boleqo nambile unu. A moiqasai.” A degsi qalieosiq deqa a Yesus qa aqa areqalo singilatej. Tamo kalil a ombla tal qujaiq di soqneb qaji nanji dego Yesus qa nanjo areqalo singilateb. <sup>54</sup> Yesus a Judia sawa uratosiq bosiq Galili sawaq di sosiq bati deqa a manwa di yej. A nami Galili sawaq di manwa bei yosaiqnej. Aqa manwa qujai nami yej qaji agi a ya bulyonaq wain babej.

## 5

### *Yesus a ma tamo bei boletej*

<sup>1</sup> Bati bei Yesus a Judia nanjo yori bati koba unqa marsiqa Jerusalem aiyej.

<sup>2</sup> Jerusalem dia ya kuru bei soqnej. Ya kuru di kaja nanjo siranme qalaq di soqnej. Ya kuru di aqa nam Betesda. Di Hibru anjam na mareqnu. Ya kuru areqsi jagwa oqajqa tal kiñilala 5 soqneb. <sup>3</sup> Tal dia tamo ma ti, tamo nam qandimo, tamo singa uge, tamo jejamu lainjro qaji tulan gargekoba soqneb. Nanji ya annilqajqa tariñoqneb. <sup>4</sup> Bati qudei Tamo Koba aqa lan angro ya kuru miligiq aiyoqnsiqa ya enteqnaqa anniloqnej. Ya anniloqnimqa tamo a namo yaq aiqas qaji aqa ma koboqas. Utru deqa nanji ya annilqajqa tariñoqneb.

<sup>5</sup> Ariya bati deqa tamo bei wausau 38 ma ti soqnej qaji a dia tariñoqnej. <sup>6</sup> Onaqa Yesus na tamo di n̄iesonaq unsiqa a bati olekoba ma de ti soqnej di qalieosiqa nenemyej, “Ni boleqajqa are unu e?”

<sup>7</sup> Onaqa minjej, “O Tamo Koba, ya anniloqnimqa tamo yai na e aqaryaibosim urur yaq osi aiqas? Tamo dego bei sosai. E aiqa yeqnam ma tamo qudei nanji e bunboqnsib namo yaq



aiyeqñub.”<sup>8</sup> Onaqa Yesus na minjej, “Ni tigelosim ino sapera qoboiyosim walwel.”<sup>9</sup> Degsi minjnaqa bati qujai deqa aqa jejamu boleonaqa a tigeloqujatosiq aqa sapera qoboiyosiq walweloq gilej.

Bati di Juda nanjo yori bati.<sup>10</sup> Deqa Juda tamo kokba nanji na tamo boleej qaji di unsib minjeb, “Bini yori bati. Iga wauqa getento. Deqa ni ino sapera qoboiyaim.”<sup>11</sup> Onaqa a na kamba minjrej, “Tamo e boletbqo qaji a na merbqo, ‘Ni ino sapera qoboiyosim walwel.’”<sup>12</sup> Degsi minjrnaqa nanji na nenemyeb, “Tamo yai na ni mermqo, ‘Ni ino sapera qoboiyosim walwel?’”<sup>13</sup> Onaqa a na minjrej, “Tamo e boletbqo qaji aqa ñam di e qaliesai.” A nanji degsi minjrej. Di kiyaaqa? Tamo gargekoba sonab Yesus a nanjo ambleq na ulanej.

<sup>14</sup> Onaqa nebeonaqa Yesus a atra tal miligiq gilsiq tamo di itosiq minjej, “Ni que. E ni boletmonum deqa ni olo une bei ataim. Gulbe kobaquja bei ino jejamuq di olo branto uge.”<sup>15</sup> Onaqa tamo di aisiqa Juda tamo kokba nanji minjrej, “Tamo e boletbej qaji agi Yesus.”

<sup>16</sup> Onaqa Juda tamo kokba nanji Yesus ugeugeiyqajqa maroqneb. Di kiyaaqa? A manwa di yori bati qa yoqnej deqa.<sup>17</sup> Onaqa Yesus na kamba minjrej, “Ijo Abu a nami gaigai wauoqnej agi bini wauoqnsiq unu. Deqa e dego wauoqnum.”<sup>18</sup> Onaqa Juda tamo kokba nanji Yesus aqa anjam di qusibqa nanji a qalib moiqajqa torei singilaoqneb. Di kiyaaqa? A yori bati segi gentosai. A dego marej, “Qotei a ijo Abu.” Aqa anjam dena a segi qa marej, “Aqo Qotei wo ombla kerekere.”

### *Yesus a Qotei aqa Niri*

<sup>19</sup> Onaqa Yesus na kamba minjrej, “E bole merngwai. E Qotei aqa Niri. E ijo segi areqalo na kumbra bei yqa kere-sai. Kumbra ijo Abu na yeqnaq e uneqnum qaji di e dego yeqnum.”<sup>20</sup> E ijo Abu aqa Niri. Deqa a na e qalaqalaiboqnsiq kumbra kalil a yeqnu qaji di e olo osorbeqnu. Bunuqna a kumbra tulanj singila kokba dego osorboqngas. Yim ningi unsib tulanj prugwab.<sup>21</sup> Ijo Abu na tamo moreño qaji nanji olo ñambile enjroqnsiq subq na tigeltjnreqnu. Deqa e Qotei aqa Niri e kamba dego ijo segi areqalo na tamo nanji ñambile enjreqnum.<sup>22</sup> Ijo Abu na tamo nanjo une qa nanji peginjrosaeqnu. Wau di a na e ebej. E Qotei aqa Niri deqa e na tamo nanjo une qa nanji peginjreqnum.<sup>23</sup> E wau di yeqnum. Di kiyaaqa? Tamo kalil nanji ijo ñam soqtetboqngajqa deqa. Agi nanji ijo Abu aqa ñam soqtetqñub dego kere. Tamo a ijo ñam soqtetbosaeqnu di a ijo Abu e qarinjbej qaji aqa ñam dego soqtosaeqnu.

24 “E bole mernḡwai. Tamo a ijo anjam qusim ijo Abu e qarınbej qaji a qa aqa areqalo sinḡilatqas di a ḡambile gaigai sqas. Deqa e aqa une qa pegiyqasai. A moiyo gam uratosim olo ḡambile oqas.

25 “E bole mernḡwai. E Qotei aqa Niri. Bati bei brantimqa tamo unḡasari moreḡo qaji nanḡi ijo kakro qusib ḡambile oqab. Bati di agi brantqo. 26 Ijo Abu a segi ḡambile qa utru. E aqa Niri. A na e sinḡila ebej deqa e dego ḡambile qa utru. 27 E Tamo Anḡro unum deqa ijo Abu na e sinḡila ebej. Sinḡila dena e na tamo unḡasari nanḡo une qa peginjreqnum. 28 Ninḡi ijo anjam di qusib tulaḡ prugaib. Bati bei brantimqa tamo unḡasari kalil subq di unub qaji nanḡi ijo kakro quqwab. 29 Qusib olo sub uratosib tigelqab. Tamo unḡasari kumbra bole bole yeqnub qaji nanḡi tigelosib ḡambile sqab. Tamo unḡasari kumbra uge uge yeqnub qaji nanḡi tigelabqa e na nanḡi peginjrsiy padaltnjrqai.”

*Tamo qudei na Yesus aqa ñam ubteqnu*

30 Osiqa Yesus a olo marej, “E ijo segi areqalo na wau bei yqa keresai. Ijo Abu na e anjam merbeqnaq quoqnsim tamo unḡasari nanḡi peginjreqnum. E kumbra tintin na nanḡi peginjreqnum. E ijo segi areqalo dauryosaieqnum. Ijo Abu e qarınbej qaji aqa areqalo dauryeqnum.

31 “E segi na ijo kumbra ti ijo wau ti ubtosiy marqai di tamo nanḡi bole qa maraib. 32 Tamo bei unu agi Qotei. A dego ijo kumbra ti ijo wau ti ubtosiq mareqnu. E qalieonum, anjam a mareqnu qaji di bole.

33 “Ninḡi na tamo qudei qarınjnrbab Jon aqaq gilnabqa a anjam bole ubtosiq minjroqnej. 34 Bole, mandam tamo bei na ijo kumbra ti ijo wau ti ubtqa keresai. Ariya Qotei na ninḡi elenqajqa deqa e ninḡi Jon qa mernḡonum. 35 Jon a ḡam pulonḡ bul sosiqa tamo unḡasari nanḡi suwantnjreqnaqa ninḡi aqa suwanjoq di sokiñalayoqnsib areboleboleinḡoqnej.

36 “Ijo anjam e ubtosim mareqnum qaji di anjam kobaquja. Anjam dena Jon aqa anjam tulaḡ bunyejenu. Di kiyaaqa? Wau kalil ijo Abu na ebej qaji di e yeqnam tamo unḡasari nanḡi unoqnsib endegsi poinjreqnu, bole, ijo Abu na e qarınbonaq bem. 37 Ijo Abu e qarınbej qaji a e qa anjam ubtosiq mareqnu. Ariya ninḡi aqa kakro nami quosaioqneb. Aqa ulatamu dego ninḡi nami unosaiioqneb. 38 Qotei aqa anjam dego nunḡo are miligiq di sosai. Tamo Qotei na qarınyonoaq mandamq aiyej qaji aqa anjam ninḡi nunḡo areqaloq di sinḡilatosaieqnu.

39 “Bole, ninḡi Qotei aqa anjam nengrenq di unu qaji di sisiyoqnsib peleiyeqnub. Ninḡi are qaleqnu, anjam dena ninḡi ḡambile gaigai sqab. Ariya anjam di e ubtosiq mareqnu.

40 Niŋgi kiyaaqa ɲambile oqajqa are qaloqnsib olo ijoq bqajqa urateqñub?

41 “E mandam tamo naŋgoq dena ñam koba oŋaieqñum. 42 Ariya e niŋgi qa qalieonum. Nuŋgo are miligiq di niŋgi Qotei qalaqalaiyosaieqñub. 43 E ijo Abu aqa ñam na bonamqa niŋgi ijo anjam osai. Tamo bei aqa segi ñam na bqas di niŋgi aqa anjam oqujatqab. 44 Niŋgi nuŋgo segi was naŋgoq dena ñam koba oqajqa are qaleqñub. Ariya niŋgi Qotei aqaq dena ñam koba oqajqa are qalosaieqñub. Qotei agi a segi qujai Qotei bole. Niŋgi kumbra degyeqñub deqa niŋgi kiyersib e qa nuŋgo areqalo siŋgilatqab? Di keresai.

45 “E ijo Abu aqa ɲamdamuq di nuŋgo une qa mernɲwai edegaib. Nuŋgo une qa mernɲwajqa tamo qujai agi Moses. Niŋgi are qaleqñub, Moses a na niŋgi aqaryainɲwas. Di sai. 46 Niŋgi Moses aqa anjam nuŋgo areqaloq di siŋgilateqñub qamu ijo anjam dego nuŋgo areqaloq di siŋgilateqñub qamu. Di kiyaaqa? Moses a nami e qa anjam nenɲrenɲey. 47 Niŋgi Moses aqa anjam nami nenɲrenɲey qaji di nuŋgo areqaloq di siŋgilatosaieqñub deqa niŋgi kiyersib ijo anjam dego nuŋgo areqaloq di siŋgilatqab? Di keresai.”

## 6

### *Yesus a tamo 5,000 naŋgi iŋgi anainjrej*

1 Bati bei Yesus a Galili ya agu taqal beiq gilej. Ya agu di yuwal bul tulaŋ kobaquja. Ya agu di aqa ñam bei Taiberias ya agu. 2 Yesus a tamo mainjro qaji naŋgoq di maŋwa babteqnaqa tamo uŋgasari tulaŋ gargekoba naŋgi unoqñeb. Deqa a ya agu taqal beiq gileqnaqa naŋgi a dauryosib giloqñeb. 3 Bati di Yesus na aqa aŋgro naŋgi joqsiqa koba na manaq oqsibqa mana goge dia awesoqñeb. 4 Qotei a nami Israel naŋgi Isip sawaq di padalqa laqnabqa naŋgi elenej. Deqa olo are qalqajqa yori bati jojomej. 5 Deqa Yesus a ɲam atsiqa tamo uŋgasari tulaŋ gargekoba a dauryosib aqa areq beqnabqa unjrsiqa Filip nenemyej, “Iga qabe na iŋgi awaiyosim tamo uŋgasari kalil di anainjronam kereqas?” 6 Filip a kamba Yesus kiyersi minjim quqwajqa deqa Yesus na laŋa nenemyej. Yesus a kumbra kiye yqas di a segi nami qalieej.

7 Onaqa Filip na kamba Yesus minnej, “Tamo uŋgasari naŋgi di tulaŋ gargekoba. Iga 200 kina osim dena iŋgi awaiyosim iŋgi kiñala kiñala anainjrqom di tulaŋ kereqasai.” 8 Onaqa Yesus aqa aŋgro bei Andru di Saimon Pita aqa was a na Yesus minnej, 9 “Aŋgro wala bei unu. A bem 5 qe kiñilala aiyel ojejunu. Iŋgi di dego tamo uŋgasari gargekoba endi anainjrqom di tulaŋ kereqasai.” 10 Onaqa Yesus na aqa aŋgro naŋgi minjrej, “Niŋgi na tamo uŋgasari kalil naŋgi minjribqa

mandamq di awoeleneb.” Sawa dia ñin koba soqnej deqa Yesus aqa angro nanqi na tamo ungasari minjrnabqa kalil ñinq di awoeleneb. Tamo awoeleneb qaji sisiyeb 5,000.

<sup>11</sup> Awoonabqa Yesus na bem ti qe ti di osiqa Qotei pailyosiqa tamo ungasari awoeleneb qaji nanqi jeisi anainjretnaq uy-oqneb. Uynab kalil menetnrej. <sup>12</sup> Menetnjrnaqa Yesus na aqa angro nanqi minjrej, “Ningi inqi oto kalil koroiyiy. Oto bei urataib.” <sup>13</sup> Degsi minjrnaqa nanqi bem 5 aqa oto kalil tamo ungasari nanqi urateleneb qaji di koroiyosib gumba kokba 12 di jignab maqelenej.

<sup>14</sup> Onaqa tamo ungasari kalil nanqi Yesus aqa manwa di unsib maroqneb, “Bole, Qotei aqa medabu o tamo nami Qotei na qarinyim mandamq aicajqa marej qaji agi a di.” <sup>15</sup> Onaqa Yesus a nanqo anjam di qusiqa endegsi qalieej, “Nanqi bosib e ojsib e nanqo Mandor Koba atqajqa are qaleqñub.” A degsi qalieosiq deqa a sawa di uratosiqa a segi manaq oqsiq di soqnej.

*Yesus a ya banqaq na walwelej*

<sup>16</sup> Ariya bilaqtonaqa Yesus aqa angro nanqi alile aiyeb. <sup>17</sup> Alile aisib qobun bei gogetosib qobun suweiyosib gileb. Nanqi mareb, “Iga ya agu taqal beiq gilsim Kaperneam qureq di tiryqom.” Nanqi degsib marsib gileb. Qoloonaga Yesus a nanqoq bosaisoqnej. <sup>18</sup> Nanqi ya agu ambleq di gileqñabqa jagwa koba tigelosiqa ya korkortosiqa nanqi pulutnrej. <sup>19</sup> Nanqi 5 o 6 kilomita oyoosib gileqñabqa Yesus a ya banqaq na walweloosiqa nanqi daurnjrsiq gilej. Gilsiq qobun jojomyonaqa nam ateb di a ya banqaq na walweloosiq beqnaqa unsib ulakobaeb. <sup>20</sup> Deqa a na minjrej, “Endi e beqnum. Ulaaib.” <sup>21</sup> Degsi minjrnaqa nanqi areboleboleinjrnaqa a metonab qobun gogetej. Onaqa qobun a ururosiq sawa nanqi gilqajqa mareb qaji di tiryej.

*Tamo ungasari nanqi Yesus qa ñamoqneb*

<sup>22</sup> Nebeonaqa tamo ungasari qudei nanqi ya agu taqal beiq di soqneb. Nanqi qalie, ya bilaq qobun qujai segi dia tiryosiq soqnej. Yesus aqa angro nanqi qobun di gogetosib gileb. Yesus a nanqi koba na qobun di gogetosai. <sup>23</sup> Ariya tamo ungasari nanqi alile di sonabqa qobun qudei Taiberias qureq dena beb. Bosib sawa Tamo Koba Yesus a pailyosiq nanqi inqi anainjrej qaji sawa jojomq di tiryeb. <sup>24</sup> Yesus aqa angro nanqi ti di sosai. Tamo ungasari nanqi degsi unsibqa qobun di gogetosib gilsib Kaperneam qureq di Yesus qa ñamoqneb.

*Yesus a segi ñambile qa bem uyo bole*

<sup>25</sup> Ariya nanqi ya agu taqal beiq di Yesus itosib nenemyeb, “O Qalie Tamo Koba, ni señ bati gembu endeq bem?” <sup>26</sup> Onaqa

Yesus na kamba minjrej, “E bole mernjwai. E manjwa babteqnam ninji unoqneb ninji deqa are qalsib e qa njasai. E ninji bem anainjonam uynab menetnjej ninji deqa are qalsib e qa njaeqnub. <sup>27</sup> Jejamu qa inji a koboqas. Ninji inji deqa wauaib. Nambile gaigai sqajqa inji deqa ninji wauoqniy. Inji di e na ninji anaingit uyqab. E Tamo Anjro. Ijo Abu Qotei na e giltbej.”

<sup>28</sup> Onaqa nanji na kamba Yesus nenemyeb, “Iga Qotei aqa wau kiye yoqnqom?” <sup>29</sup> Onaqa Yesus na minjrej, “Qotei aqa wau agi mernjwai. Ninji tamo Qotei na qarinjey qaji a qa nunjo areqalo sinjilatij. Tamo di agi e segi.”

<sup>30-31</sup> Onaqa nanji Yesus aqa anjam di qusibqa olo nene-myeb, “Ni manjwa kiye babtij igi unsim ni qa gago areqalo sinjilatqom? Nami gago moma nanji wadau sawaq di sosibqa bem uyoqneb. Agi Qotei aqa anjam bei endegsi unu, ‘Moses a lanj qure qa bem tamo unjasari nanji anainjreqnaq uyoqneb.’ Deqa ni wau kiye yim igi unsim ni qa poigim gago areqalo ni qa sinjilatqom?” <sup>32</sup> Onaqa Yesus na kamba minjrej, “E bole mernjwai. Bem Moses na tamo unjasari nanji anainjrej qaji di lanj qure qa bem bolesai. Bem Ijo Abu na ninji anainjoqnqas qaji di lanj qure qa bem bole. <sup>33</sup> Bem di Qotei aqa segi bem. Bem di lanj qureq dena mandamq aisiq tamo unjasari mandamq endi unub qaji nanji nambile enjreqnu.” <sup>34</sup> Onaqa nanji na Yesus minjeb, “O Tamo Koba, bati gaigai bem di anaigoqne.” <sup>35</sup> Onaqa Yesus na minjrej, “E segi nambile qa bem uyo bole. Deqa tamo bei a ijoq bqas di a bunu mamqasai. Tamo bei a e qa aqa areqalo sinjilatqas di a bunu ya qaryqasai dego.

<sup>36</sup> “Ninji nunjo namdamu na e nubeqnub. Ariya ninji e qa nunjo areqalo sinjilatosaieqnub. E nami degsi mernjem. <sup>37</sup> Ninji quiy. Tamo unjasari kalil Qotei na e ebej qaji nanji ijoq boqnqab. Tamo unjasari ijoq bqab qaji nanji di e na olo winjrqa keresai. <sup>38</sup> E ijo segi areqalo dauryqajqa deqa e lanj qure uratosim mandamq aiyosai. Abu e qarinjey qaji aqa areqalo dauryqajqa deqa e lanj qure uratosim mandamq aiyem. <sup>39</sup> Abu e qarinjey qaji aqa areqalo agiende. Tamo unjasari a na ebej qaji bei e uratis padalqasai. E nanji kalil dijo bati qa olo subq na tigeltjrqai. <sup>40</sup> Od, ijo Abu aqa areqalo agiende. Tamo unjasari kalil e nubeqnsib e qa nanjo areqalo sinjilateqnub qaji nanji nambile gaigai sqab. Dijo bati qa e na nanji olo subq na tigeltjrqai. E Qotei aqa Niri unum deqa e kumbra di yqai.”

<sup>41</sup> Onaqa Juda nanji Yesus aqa anjam di qusibqa nanji a qa ugeosib yomuqneb. Di kiyaga? A marej, “E segi bem bole lanj qure uratosim mandamq aiyem qaji.” <sup>42</sup> Nanji a qa

yomuqnsib maroqneb, “Tamo di Yesus. A Josep aqa n̄iri. Aqa ai abu nan̄gi qa iga qalie bole. A kiyaaqa marqo, ‘E lan̄ qure uratosim mandamq aiyem?’”

<sup>43</sup> Onaqa Yesus na kamba minjrej, “Nīngi e qa lan̄a lan̄a n̄irin̄oqnaib. <sup>44</sup> Tamo bei aqa segi areqalo na ijoq bqa keresai. Ijo Abu e qar̄in̄bej qaji a na tamo bei aqa are tigeltetim ijoq bqas. Yim dīno bati qa e na olo subq na tigeltqai. <sup>45</sup> Agi Qotei aqa medabu o qaji tamo nan̄gi nami anjam endegsib nen̄gren̄yeb, ‘Qotei na tamo kalil nan̄gi anjam plaltosim minjroqnas.’ Anjam degsib nen̄gren̄yeb. Deqa tamo kalil ijo Abu aqa anjam quocnsib a qa poinjreqnu qaji nan̄gi ijoq boqnqab.

<sup>46</sup> “Tamo bei a ijo Abu aqa ulatamu unosai bole sai. E segi qujai ijo Abu aqa ulatamu unem. Agi e nami Qotei aqaq dena mandamq aiyem. <sup>47</sup> E bole mern̄gwai. Tamo a e qa aqa areqalo sīngilatqas di a n̄ambile gaigai sqas. <sup>48</sup> E segi n̄ambile qa bem uyo bole. <sup>49</sup> Nami nun̄go moma nan̄gi wadau sawaq di sosibqa bem uyoqneb. Bunuqna nan̄gi kalil moren̄ekriteb. <sup>50</sup> Ariya e segi qujai bem bole lan̄ qure uratosim mandamq aiyem qaji. Tamo un̄gasari nan̄gi bem di uyqab di nan̄gi moren̄qasai. <sup>51</sup> E segi n̄ambile qa bem bole lan̄ qure uratosim mandamq aiyem qaji. Tamo bei a bem di uyqas di a n̄ambile gaigai sqas. Bem di agi ijo jejamu. E na tamo un̄gasari mandamq endi unub qaji nan̄gi ijo jejamu anain̄jrit uyqab. Uysib nan̄gi n̄ambile sqab.”

<sup>52</sup> Onaqa Juda nan̄gi Yesus aqa anjam di qusib segi segi anjam na qotoqnsib maroqneb, “Tamo di a kiyersim aqa jejamu iga anaigim uyqom?”

<sup>53</sup> Onaqa Yesus na kamba minjrej, “E bole mern̄gwai. E Tamo An̄gro. Deqa nīngi ijo jejamu ti ijo len̄ ti uyqasai di nīngi n̄ambile sqasai. <sup>54</sup> Tamo nan̄gi ijo jejamu ti ijo len̄ ti uyqab di nan̄gi n̄ambile gaigai sqab. Deqa dīno bati qa e na nan̄gi olo subq na tigelt̄n̄jqai. <sup>55</sup> Ijo jejamu di īngi uyo bole. Ijo len̄ di ya uyo bole. <sup>56</sup> Tamo nan̄gi ijo jejamu ti ijo len̄ ti uyqab di nan̄gi e beterbesqab. E dego nan̄gi betern̄jresqai. <sup>57</sup> Ijo Abu n̄ambile unu qaji a na e qar̄in̄bej deqa aqa sīngila na e dego n̄ambile unum. Dego kere tamo nan̄gi ijo jejamu ti ijo len̄ ti uyqab di nan̄gi ijo sīngila na n̄ambile sqab. <sup>58</sup> E segi bem bole lan̄ qure uratosim mandamq aiyem qaji. Nun̄go moma nan̄gi nami bem uyoqneb dego sai. Nan̄gi bem uyoqnsib olo moren̄oqneb. E segi bem uyo bole. Deqa tamo nan̄gi bem bole di uyqab di nan̄gi moren̄qasai. Nan̄gi n̄ambile gaigai sqab.” <sup>59</sup> Yesus a Kaperneam qureq Juda nan̄go Qotei tal miligiq di sosiqa Qotei aqa anjam di palontosiq tamo un̄gasari nan̄gi minjroqnej.

*Yesus a segi n̄ambile gaigai sqajqa utru*

<sup>60</sup> Onaqa tamo ungasari Yesus dauryoqneb qaji nanği aqa anjam di qusibqa nanği gargekoba endegsib maroqneb, “Anjam di gulbe koba. Tamo yai nanği anjam di poinjrqa kere?”

<sup>61</sup> Degsib maroqnsib Yesus qa yomueq nabqa di qalieosiqa minjrej, “Ijo anjam dena nungo areqalo ugetetngwoqa ninği ijo ñam ulontonub e? <sup>62</sup> E Tamo Anğro. Qure e nami soqnem qaji deq olo oqoqnitqa ninği e nubsibqa kiyersib are qalqab?”

<sup>63</sup> Qotei aqa Mondor a segi na tamo ungasari nanği ñambile enjreqnu. Nungo jejamu na ninği aqaryainğwa keresai. Ijo anjam kalil e ninği merngeqnum qaji endi Mondor aqa anjam. Anjam dena ninği ñambile oqab. <sup>64</sup> Ariya ninği qudei e qa nungo areqalo sinğilatosaieq nub.” Yesus a nanği degsi minjrej. Di kiyayaqa? Tamo yai nanği a qa nanço areqalo sinğilatqasai di a nami qalieej. Bunuqna aqa anğro bei na a osim jeu tamo nanço banq di atqas di dego a nami qalieej. <sup>65</sup> Osiqa minjrej, “Utru deqa e ninği merngonum, ‘Qotei na tamo bei aqa are tigeltetqasai di a ijoq bqa keresai.’”

<sup>66</sup> Yesus a anjam degsi marnaqa tamo ungasari gargekoba a nami dauryoqneb qaji nanği a dauryqa uratosib jaraiyeb. <sup>67</sup> Onaqa Yesus na aqa anğro 12 nanği nenemnrej, “Ninği dego e uratbosib jaraiqab e?”

<sup>68</sup> Onaqa Saimon Pita na minjej, “O Tamo Koba, iga ni uratmosim tamo yai aqaq gilqom? Tamo dego bei sosai. Ni segi qujai ñambile gaigai sqajqa anjam mergeqnum. <sup>69</sup> Iga ni qa gago areqalo sinğilatosisim endegsi qalieonum, Qotei aqa segi Tamo Bole a na nami giltej qaji agi ni qujai.”

<sup>70</sup> Onaqa Yesus na minjrej, “E segi na ijo anğro 12 ninği giltngem. Ariya nungo ambleq di anğro bei a mondor uge ti unu.” <sup>71</sup> Yesus a Saimon Iskariot aqa ñiri Judas a qa degsi marej. Yesus aqa anğro 12 nanği deqaji bei agi Judas. A na bunuqna Yesus osiq jeu tamo nanço banq di atej qaji.

## 7

### *Yesus a Jerusalem aiyej*

<sup>1</sup> Bati bei Yesus a Judia sawaq di laqajqa uratosiq walweloşiq Galili sawaq di laqnej. Di kiyayaqa? Juda tamo kokba nanği a qalib moiqaşqa maroqneb deqa. <sup>2</sup> Ariya Juda nanço yori bati koba jojomej. Yori bati di aqa utru agiende. Juda nanço moma nanği nami jagwa oqajqa tal gereiyonşib osi laqneb. <sup>3</sup> Deqa Yesus aqa was nanği na minjeb, “Ni Galili sawaq endi saim. Ni tigeloşim Judia sawaq aiye. Aisim dia ino maşwa babtoqnimqa ino anğro nanği unonqab. <sup>4</sup> Ni ino maşwa boleq atqajqa are soqnim ni uli na yaim. Ni tamo ungasari kalil nanço ñamdamuq di yoqne.” <sup>5</sup> Yesus aqa was nanği a qa nanço areqalo sinğilatosisi deqa nanği degsib misilin

anjam minjeb. <sup>6</sup> Onaqa Yesus na kamba minjrej, “Ijo bati kereosaiunu. Ariya bati kalil di nungo bati. <sup>7</sup> Mandam tamo nanngi ninngi jeutngwa keresai. Ariya nanngi e jeutbeqñub. Di kiyaaqa? E nanngo kumbra uge uge babtetnjreqnum deqa. <sup>8</sup> Ninngi segi aisib yori bati di uniy. Ijo bati kereosai unu deqa e aiqasai.” <sup>9</sup> Yesus na aqa was nanngi degsi minjrsiqa a Galili sawaq di soqnej.

<sup>10</sup> Ariya aqa was nanngi yori bati di unqajqa ainabqa a dego aiyej. A boleq di aiyosai. Tamo nanngi a unaib deqa a loumosiq aiyej. <sup>11</sup> Yori bati di brantonaqa Juda tamo kokba nanngi Yesus qa nãmoqñeb. Nãmoqñsib maroqñeb, “Yesus a qabi unu?” <sup>12</sup> Onaqa tamo ungasari gargekoba nanngi segi segi njirinoqñsib anjam laña laña Yesus qa maroqñeb. Qudei nanngi maroqñeb, “Yesus a tamo bolequja.” Qudei nanngi maroqñeb, “Sai. A na tamo ungasari nanngi gisa gisañnjreqnu.” <sup>13</sup> Nanngi degsib maroqñeb. Ariya nanngi Juda tamo kokba nanngi ulainjrsib deqa nanngi Yesus qa boleq di anjam marosaioqñeb.

<sup>14</sup> Ariya yori bati gilsiq ambleqyonaqa Yesus a segi bran-tosiqa atra tal miligiq gilsiq dia tamo ungasari nanngi Qotei aqa anjam palontosiqa minjroqnej. <sup>15</sup> Onaqa Juda tamo kokba nanngi Yesus aqa anjam di qusibqa nanngi tulan pruguetosib segi segi maroqñeb, “Yesus aqa powo kobaquja di qabe na osiqa anjam mareqnu? A nami skul beiq gilosai.” <sup>16</sup> Onaqa Yesus na kamba minjrej, “Anjam e mareqnum endi ijo anjam sai. Anjam endi ijo Abu e qarinqej qaji aqa anjam. <sup>17</sup> Tamo bei a Qotei aqa areqalo dauryqajqa are soqnimqa anjam e mareqnum qaji endi aqa utru a gegerere poiyyas. Osim qalieqas, ijo anjam endi Qotei aqaq na bej. E ijo segi areqalo na marosaieqnum. A degsim qalieqas. <sup>18</sup> Tamo bei aqa segi areqalo na anjam marqas di a aqa segi ñam soqtqa osim deqa anjam marqas. Ariya e Qotei aqa ñam soqtqa are qaleqnum. Agi a na e qarinqej. Deqa e tamo bole. E gisañ tamo sai.

<sup>19</sup> “Nami Moses na ninngi dal anjam engej. Ariya ninngi dal anjam di dauryosaieqñub. Kiyaaqa ninngi e lubsib moiyoqbqa mareqñub?” <sup>20</sup> Onaqa tamo ungasari nanngi na kamba Yesus minjeb, “Mondor uge inoq di unu. Yai na ni lumsim moiyoqbqa mareqnu?” <sup>21</sup> Onaqa Yesus na kamba minjrej, “E manwa qujai babtem deqa ninngi kalil prugueteqñub. <sup>22</sup> Ariya ninngi are qaliy. Moses a ninngi muluñ engej deqa nungo angro mel nanngo muluñ waiyya bati bosiq yori bati tintineqnu di ninngi yori bati qa nanngi muluñ breinjreqñub. Bole, Moses a muluñ qa utru sai. Nungo moma nanngi muluñ qa utru. <sup>23</sup> Ninngi Moses aqa dal anjam dauryqa maroqñsib yori bati qa nungo angro mel nanngi muluñ breinjreqñub. Ariya e yori bati qa tamo qujai aqa jejamu boletonamqa ninngi unsibqa kiyaaqa e qa



nirineqñub? <sup>24</sup> Niñgi lanja ñamdamu na ijo kumbra tenemtaib. Geregere ijo kumbra tenemtosib bole qa maroqñiy.”

*Yesus a tamo yai?*

<sup>25</sup> Bati deqa tamo unğasari qudei Jerusalem di soqñeb qaji nañgi segi segi endegsib maroqñeb, “Yesus a kiyo Juda gate nañgi na qalib moiqajqa laqñub? <sup>26</sup> Niñgi uniy. A boleq di anjam palonteqnaqa nañgi a anjam bei minjosaieqñub. Nañgi qalie kiyo, a Kristus? <sup>27</sup> Kristus a qabe na bças di tamo bei a qalieqasai. Ariya tamo endi aqa qure utru di iga qalie bole.”

<sup>28</sup> Onaqa Yesus a atra tal miligiq di sosisqa a lelenosiqqa Qotei aqa anjam palontosiqa tamo unğasari nañgi endegsi minjrej, “Niñgi e qa qalie e? E qabe na bem di dego niñgi qalie e? Ariya e ijo segi areqalo na bosai. Ijo Abu na e qarinqbonaq bem. Ijo Abu a segi anjam bole qa utru. Niñgi a qa qaliesai. <sup>29</sup> E a qa qalie bole. E aqaq na bem. A na e qarinqbej.”

<sup>30</sup> Onaqa Juda tamo kokba nañgi Yesus aqa anjam di qusi-bqa nañgi a ojsib tonto talq di waiyqa maroqñeb. Ariya a ojqa bati kereosaisoqñej deqa tamo bei na a ojosai. <sup>31</sup> Bati deqa tamo unğasari gargekoba nañgi Yesus qa nañgo areqalo siñgilatoqñeb. Osib maroqñeb, “Tamo endi a manwa gargekoba babteqñu. Kristus a bosim tamo endi burñyqa keresai.”

*Farisi nañgi Yesus ojqa mareb*

<sup>32</sup> Tamo unğasari nañgi Yesus qa anjam degsib mareqñab Farisi nañgi qusibqa atra tamo kokba ti koroosib qaja tamo qudei qarinqñrnab Yesus ojqa gileb. <sup>33</sup> Deqa Yesus a endegsi marej, “E niñgi koba na sokiñalayosiy ijo Abu e qarinqbej qaji aqaq olo oqwai. <sup>34</sup> Oqitqa niñgi e qa ñamqab e nubqasai. Qure e sqai di niñgi oqwa keresai.” <sup>35</sup> Onaqa Juda tamo kokba nañgi segi segi maroqñeb, “Yesus a qabitimqa iga a unqasai? A Grik nañgo sawaq oqsim dia Juda tamo qudei ti sosib Grik nañgi anjam plaltosim minjroqñqas kiyo? <sup>36</sup> A marqo, ‘Niñgi e qa ñamqab di niñgi e nubqasai. Qure e sqai di niñgi oqwa keresai.’ Utru kiyayqa a degsi marqo?”

*Yesus a ñambile gaigai sqajqa ya qa marej*

<sup>37</sup> Ariya yori bati gilsiq koboqa laqnaqa yori kobaquja brantonaqa Yesus a tigelosiqqa lelenosiq marej, “Tamo bei a ya qaryimqa ijoq bosim ya uyem. <sup>38</sup> Tamo bei a e qa aqa areqalo siñgilatqas di aqa are miligiq na ñambile gaigai sqajqa ya oqoqñsim ya ani bul polyoqñqas. Nami Qotei aqa anjam degsib nengrenyeb unu.” <sup>39</sup> Yesus a ya qa marej di a Mondor Bole sigitosiqqa yawo anjam marej. A lan qureq oqosaisosiq deqa a ñam koba osaisoqñej. Deqa bati di tamo

nanği a qa nanžo areqalo siŋgilateb qaji nanği Mondor Bole di osaisoqneb.

*Tamo unğasari nanği Yesus aqa anjam qusib poaiyeleb*

<sup>40</sup> Onaqa tamo unğasari qudei nanği Yesus aqa anjam di qusib maroqneb, “Bole, Qotei aqa medabu o tamo nami Qotei na qarinyim bqajqa marej qaji agi a endi.” <sup>41</sup> Onaqa qudei maroqneb, “Tamo endi a bole Kristus.” Onaqa qudei maroqneb, “Sai. Kristus a bqas di a Galili sawaq dena bqasai. <sup>42</sup> Kristus a Devit aqa len na nambabosim aqa qure utru Betlehem dena bqas. Nami Qotei aqa anjam degsib nenğrenyeb unu.” <sup>43</sup> Tamo unğasari nanği degsib Yesus qa anjam tititosib niriŋosib poaiyeleb. <sup>44</sup> Osib nanği qudei Yesus ojqa mareb. Mareb di tamo bei na a ojosai.

*Juda tamo kokba nanği Yesus qa nanžo areqalo siŋgilatosai*

<sup>45</sup> Onaqa qaja tamo nanği olo puluosib atra tamo kokba ti Farisi ti nanžoq ainabqa minjreb, “Niŋgi kiyaaq Yesus ojsib osi bosai?” <sup>46</sup> Onaqa qaja tamo nanği na kamba minjreb, “Iga Yesus aqa anjam quonum di anjam bolequja maroqnaj. Tamo bei nami anjam deqaji marosai oqnej. Deqa iga a ojosai.” <sup>47</sup> Onaqa Farisi nanği na minjreb, “Yesus a niŋgi dego gisaŋgwo e? <sup>48</sup> Niŋgi uniy. Juda gate bei Yesus qa aqa areqalo siŋgilatosai. Farisi tamo bei dego Yesus qa aqa areqalo siŋgilatosai. Sai bole sai. <sup>49</sup> Ariya tamo unğasari laŋa laŋaj nanği dal anjam qaliesai deqa nanği Yesus qa nanžo areqalo siŋgilateqneb. Tamo unğasari nanği di Qotei na torei qoreinjrim padalqab.”

<sup>50</sup> Onaqa Juda gate Nikodemus agi nami Yesus aqaq gilsiq anjam minjej qaji a Farisi nanžo ambleq di tigelosiq minjrej, <sup>51</sup> “Gago dal anjam kiyersi unu? Iga tamo bei laŋa ojsim aqa une qa pegiyqom e? Sai. Gago dal anjam degsi sosai. Iga mati aqa anjam qusim aqa kumbra geregere qalieqom.” <sup>52</sup> Onaqa Farisi nanği na kamba minjeb, “Ni dego Galili qaji tamo kiyo? Qotei aqa anjam nenğrenq di unu qaji di geregere peleiye. Peleiym endegsi poimqas, Qotei aqa medabu o qaji tamo bei a Galili sawaq dena bqasai.”

*Unğa bei une atej qaji a ojsib Yesus aqa areq osi beb*

<sup>53</sup> Onaqa koro koboonaqa tamo unğasari kalil nanği jaraiyosibqa nanžo segi segi talq gileleneb.

## 8

<sup>1</sup> Ariya Yesus a Oliv manaq oqej. <sup>2</sup> Nobqolo ambru a olo tigelosiq atra tal miligiq gilej. Gilsiq di sonaqa tamo unğasari kalil nanği aqa areq beqnabqa a awoosiq Qotei aqa anjam palontosiq minjroqnej. <sup>3</sup> Ariya unğa bei a tamo bei wo une

ateq nab tamo qudei na uneb. Unsibqa dal anjam qalie tamo nanği ti Farisi nanği ti minjrnab qusibqa uņa di ojsib osi bosib tamo unğasari nanğo nğamdamuq di tigelteb. <sup>4</sup> Osib Yesus minjeb, “O Qalie Tamo Koba, uņa endi a tamo bei wo une ateq nab tamo qudei na unjronub. <sup>5</sup> Ni qalie, Moses a nami dal anjam endegsi nengrenjey, ‘Uņa bei a tamo bei wo une atibqa meniņ na a qalib moyem.’ Deqa ni kiyersi marqam?” <sup>6</sup> Nanği Yesus degsib nenemyeb. Di kiyaaqa? Nanği a laņa are qametib a anjam bei grotimqa qusib a ojqaqqa deqa. Onaqa Yesus a kamba nanği anjam bei minjrosai. A mana qamsiq turuosiq baņ gei na mandamq di nengrenjyoqnej.

<sup>7</sup> Onaqa nanği na olo anjam di Yesus nenemyonabqa a tigelosiq minjrej, “Nunğo ambleq di tamo bei une saiqoji unu kiyo? Soqnimqa niņgi na minjib a namo meniņ osim uņa di qalem.” <sup>8</sup> Osiqa olo turuosiq mandamq di nengrenjyoqnej. <sup>9</sup> Onaqa nanği Yesus aqa anjam di qusibqa segi segi oqedosib jaraiyeb. Tamo qeli nanği namoosib jaraiyonab qudei bunueb. Osib nanği kalil Yesus uratonab a segi soqnej. Uņa di a Yesus aqa ulatamuq di tigelesoqnej.

<sup>10</sup> Onaqa Yesus a olo tigelosiq uņa di minjej, “Uņa, tamo nanği qabitonub? Ni unime. Tamo bei na ino une qa olo ni mermosai.” <sup>11</sup> Onaqa uņa dena Yesus minjej, “Od, Tamo Koba, tamo bei na ijo une qa olo merbosai.” Onaqa Yesus na minjej, “E dego ino une qa mermqasai. Deqa ni gile. Olo une bei ataim.”

### *Yesus a puloņ bulosiq tamo nanği suwantnjreqnu*

<sup>12</sup> Osiqa Yesus na tamo unğasari nanği olo endegsi minjrej, “E mandamq endi puloņ bul unum. Tamo a e daurbqas di a ambruq di walwelqasai. A suwanjoq di walweloqnsim nambile gaigai sqas.” <sup>13</sup> Onaqa Farisi nanği Yesus aqa anjam di qusib minjeb, “Ni segi ino kumbra ti ino wau ti ubtosim mareqnum. Deqa iga bole qa marqasai.” <sup>14</sup> Onaqa Yesus na kamba minjrej, “E segi ijo kumbra ti ijo wau ti ubtosiy marqai di niņgi bole qa marqa kere. Di kiyaaqa? E qabe na bem di e segi qalie bole. E puluosiy olo qabitqai di dego e qalie. Ariya e qabe na bem di niņgi qaliesai. E puluosiy olo qabitqai di dego niņgi qaliesai. <sup>15</sup> Niņgi mandam qa kumbra na tamo nanği peginjreqnub. E tamo nanği peginjrosai eqnum. <sup>16</sup> Ariya e tamo nanği peginjrqai di e kumbra tiņtiņ na peginjrqai. Di kiyaaqa? E segi na tamo nanği peginjrosai eqnum. Ijo Abu e qarinjbej qaji a ombla na tamo nanği peginjreqnum. <sup>17</sup> Nunğo dal anjam bei endegsib nengrenyeb unu, ‘Tamo aiyel nanği anjam qujai marqab di nanğo anjam bole brantqas.’ <sup>18</sup> Deqa e segi ijo kumbra ti ijo wau ti ubtosim mareqnum. Ijo Abu e

qarinbej qaji a dego e ombla ijo kumbra ti ijo wau ti ubtosim mareqnum.”

<sup>19</sup> Onaqa Farisi nanġi na Yesus nenemyeb, “Ino Abu a qabi unu?”

Onaqa Yesus na kamba minjrej, “Niġgi e qa qaliesai deqa niġgi ijo Abu qa dego qaliesai. Niġgi e qa qalie qamu niġgi ijo Abu qa dego qalie qamu.”

<sup>20</sup> Yesus a atra tal miligiq di sosiqa anjam degsi plaltosiq marej. A silali ato qaji warum jojomoq di awesoqnej. Warum dia tamo nanġi Qotei atraiyoqnsibqa silali atoqneb. Yesus ojqa bati kereosaisoqnej deqa tamo bei na a ojsai.

*Yesus a marej, “Qure e oqwai di niġgi oqwa keresai”*

<sup>21</sup> Onaqa Yesus na tamo unġasari nanġi olo endegsi minjrej, “E niġgi uratnġitqa niġgi e qa nmaqab e nubqasai. Niġgi nunġo une ti sosib morenqab. Qure e oqwai di niġgi oqwa keresai.”

<sup>22</sup> Onaqa Juda nanġi Yesus aqa anjam di qusibqa segi segi endegsib maroqneb, “Yesus a kiyaaq marqo, ‘Qure e oqwai di niġgi oqwa keresai’? A na aqa segi jejamu qalim moiqaas kiyo?” <sup>23</sup> Onaqa Yesus na olo minjrej, “Niġgi mandam endena branteb. E lanġ goge na bem. Niġgi mandam qaji tamo. E mandam qaji tamo sai. <sup>24</sup> Deqa niġgi e qa nunġo areqalo sinġilatiy. Osib poingem, e segi qujai gaigai degsi unum. Niġgi degyqasai di niġgi nunġo une ti sosib morenqab. Agi e nami niġgi degsi mernġonum.”

<sup>25</sup> Onaqa nanġi na Yesus nenemyeb, “Ni tamo yai?” Onaqa Yesus na minjrej, “E nami ijo kumbra ti ijo wau ti ubtosim mernġoqnsim agi bini mernġeqnum. <sup>26</sup> E anjam gargekoba mernġsiy nunġo une qa peginwajqa ijo areqaloq di unu. Ariya ijo Abu e qarinbej qaji a anjam bole qa utru. Deqa anjam kalil a na merbeqnu qaji di e quoqnsim tamo unġasari mandamq endi unub qaji nanġi minjreqnum.” Yesus a nanġi degsi minjrej.

<sup>27</sup> Juda nanġi qaliesai, Yesus a Abu qa nanġi minjrej. <sup>28</sup> Deqa a na olo minjrej, “Niġgi e Tamo Anġro soqtbosib gainbibqa bati deqa niġgi poingwas, e segi qujai gaigai degsi unum. Osib qalieqab, e ijo segi areqalo na kumbra bei yosaieqnum. Anjam kalil ijo Abu na merbeqnaq queqnum qaji di segi e mareqnum. <sup>29</sup> Ijo Abu e qarinbej qaji a e ombla sosiqa taqbejunu. E gaigai kumbra kalil a tulan areareteqnu qaji di dauryeqnum. Deqa a na e uratbosaieqnu.” <sup>30</sup> Yesus a anjam degsi marnaqa tamo unġasari nanġi qusibqa nanġi gargekoba a qa nanġo areqalo sinġilateb.

*Yesus na iga aqaryaigimqa gago une na iga taqatgwa keresai*

<sup>31</sup> Juda nanġi Yesus qa nanġo areqalo sinġilateb qaji nanġi a na endegsi minjrej, “Ninġi ijo anjam sinġila na dauryoqniy. Ninġi degyqab di ninġi ijo anġro tinġin sqab. <sup>32</sup> Sosibqa ninġi anjam bole geregere qalieqab. Yimqa anjam bole dena ninġi aqaryainġimqa inġi bei na ninġi ojsim taqatnġwa keresai.” <sup>33</sup> Onaqa nanġi na kamba minjeb, “Iga Abraham aqa moma. Iga nami tamo bei aqa kanġal tamo sosai. Deqa ni kiyaaq mergonum, ‘Inġi bei na ninġi ojsim taqatnġwa keresai?’”

<sup>34</sup> Onaqa Yesus na kamba minjrej, “E bole mernġwai. Tamo kalil une yeqnu b qaji nanġi une aqa kanġal tamo bul unub. <sup>35</sup> Kanġal tamo nanġi laġa wau tamo unub deqa nanġi abu sai qoji. Ariya anġro nanġi abu ti unub deqa nanġi gaigai nanġo abu ombla sqab. <sup>36</sup> E Qotei aqa Niri deqa e Abu ti unum. Deqa e na ninġi aqaryainġitqa nunġo une na ninġi ojsim taqatnġwa keresai bole sai.

<sup>37</sup> “E qalie, ninġi Abraham aqa moma unub. Ariya ijo anjam nunġo are miligiq di sosai. Utru deqa ninġi e lubsib moiyo b q mareqnu. <sup>38</sup> Kumbra kalil ijo Abu na e osorbeqnu qaji deqa e saeqnum. Ninġi dego kumbra kalil nunġo abu na osorbeqnu qaji di dauryeqnu b.”

<sup>39</sup> Onaqa Juda nanġi Yesus aqa anjam di qusibqa olo kamba minjeb, “Gago abu bole agi Abraham.” Onaqa Yesus na minjrej, “Ninġi Abraham aqa anġro unub qamu kumbra Abraham a yoqnej qaji di ninġi dego dauryeqnu b qamu. <sup>40</sup> Ariya ninġi dauryosaieqnu b. Anjam bole kalil Qotei na e merbeqnaq queqnum qaji di e ninġi olo mernġeqnam ninġi e lubsib moiyo b q mareqnu b. Abraham a kumbra deqaji yosai oqnej. <sup>41</sup> Ninġi nunġo abu aqa kumbra dauryeqnu b.” Onaqa nanġi na minjeb, “Gago ai nanġi laġa laġa laosib iga nambabtgosai. Gago Abu qujai agi Qotei.” <sup>42</sup> Onaqa Yesus na minjrej, “Qotei a nunġo Abu qamu ninġi e qalaqalaibonub qamu. Di kiyaaq? E Qotei aqaq na bem deqa. E ijo segi areqalo na bosai. Qotei na e qarinbonaq bem.

<sup>43</sup> “Kiyaaq ninġi ijo anjam endi poingosai? E mernġwai. Ninġi ijo anjam quqwa keresai deqa. <sup>44</sup> Ninġi nunġo abu Satan aqa anġro sosib aqa areqalo dauryqajqa tulaġ sinġilaeqnu b. Satan a nami leġ ojo tamo soqnej agi a bini degsi unu. A kumbra bole dauryosaieqnu. A kumbra bole dauryqajqa torei urateqnu. A gisaġ tamo. A anjam marqas di a gisaġ anjam segi marqas. A gisaġ anjam qa utru. A gisaġ anjam kalil qa abu. <sup>45</sup> Ariya e anjam bole palonteqnam ninġi ijo anjam nunġo areqaloq di sinġilatosaieqnu b. <sup>46</sup> Ninġi ijo jejamuq di une qametbeqnu b e? E anjam bole maritqa ninġi kiyaaq ijo anjam nunġo areqaloq di sinġilatqasai? <sup>47</sup> Tamo unġasari Qotei

aqaq na beb qaji nanği aqa anjam queqñub. Niñgi Qotei aqaq na bosai deqa niñgi aqa anjam quosaieqñub.”

*Yesus a segi qujai gaigai degsi unu*

<sup>48</sup> Onaqa Juda nanği Yesus aqa anjam di qusibqa minjeb, “Iga bole maronum, ni Samaria qaji tamo. Mondor uge inoq di unu.” <sup>49</sup> Onaqa Yesus na kamba minjrej, “Mondor uge ijoq di sosai. E ijo Abu aqa ñam soqteqñam niñgi na olo ijo ñam ugetetbeqñub. <sup>50</sup> E ijo segi ñam soqtqa are qalosaieqñum. Ijo Abu a segi na ijo ñam soqtetbqa are qaleqñu. Agi a na qujai nuñgo une qa niñgi pegingeqñu. <sup>51</sup> E bole mernğwai. Tamo bei na ijo anjam qusim dauryqas di a moiqa keresai. Sai bole sai.”

<sup>52</sup> Onaqa Juda nanği na minjeb, “Endego iga qalieonum, mondor uge inoq di unu. Abraham a moiyej. Qotei aqa medabu o qaji tamo kalil nanği dego moreñekriteb. Ariya ni maronum, ‘Tamo bei na ijo anjam qusim dauryqas di a moiqa keresai.’ <sup>53</sup> Ni gago moma utru Abraham bunyqam kiyo? A moiyej. Qotei aqa medabu o qaji tamo kalil nanği dego moreñeb. Deqa ni segi qa kiyersi marqam?”

<sup>54</sup> Onaqa Yesus na kamba minjrej, “E ijo segi ñam soqteqñum qamu e laña soqteqñum qamu. Ariya ijo Abu na ijo ñam soqtetbeqñu. Agi niñgi a qa mareqñub, ‘A gago Qotei.’ <sup>55</sup> Niñgi a qa qaliesai. E segi a qa qalie. E a qa qaliesai degsi marqai di e niñgi bul gisañ tamo sqai. E a qa qalieosim deqa agi aqa anjam dauryeqñum.

<sup>56</sup> “Nuñgo moma utru Abraham a nami ijo bqajqa bati unqa marsiqa areboleboleiyonaq soqnej. A unsiqa tulañ areboleboleiyej.” <sup>57</sup> Onaqa Juda nanği Yesus aqa anjam di qusibqa minjeb, “Ino wausau 50 osaiunu. Ni Abraham unem e?” <sup>58</sup> Onaqa Yesus na kamba minjrej, “E bole mernğwai. Abraham a ñambabosaisonaqa e segi qujai gaigai degsi unum.”

<sup>59</sup> Onaqa nanği Yesus aqa anjam di qusibqa minjiñ oqetnjrnaqa meniñ elenjosib Yesus meniñ na qalsib moyotqa yonab a loumosiq atra tal uratosiq ulañej.

## 9

*Yesus a tamo ñam qandimo boletej*

<sup>1</sup> Yesus a walweloşiq gilsiq gam qalaq di tamo bei ai miligiq na ñam qandimo ñambabej qaji di awesonaq unej. <sup>2</sup> Onaqa Yesus aqa anğro nanği na nenemyeb, “O Qalie Tamo Koba, yai aqa une na tamo di a ñam qandimo ñambabej? Aqa segi une na kiyo aqa ai abu nanço une na kiyo?”

<sup>3</sup> Onaqa Yesus na kamba minjrej, “Tamo di aqa une na sai. Aqa ai abu nanço une na sai dego. A ñam qandimo ñambabej di aqa utru agiende. Qotei na a boletimqa tamo

uŋgasari naŋgi Qotei aqa wau unsib aqa ñam soqtqab. <sup>4</sup> Sawa suwanesoqnimqa ijo Abu e qarinqbej qaji aqa wau yoqnqom. Ambruamqa tamo naŋgi wauqa keresai. <sup>5</sup> E mandamq endi sosimqa e mandam endeqa pulonj bul unum.”

<sup>6</sup> Yesus na aqa angro naŋgi degsi minjrsiqa mandamq di miselosiq aqa misel mandam ti ojnaq jagi bulonaq osiqa tamo di aqa namdamuq di atej. <sup>7</sup> Atsiqa qarinyosiq minjej, “Ni gilsim ya bei ñam Siloam di yal.” “Siloam” di Hibru anjam. Aqa damu, “Qarinyqo.” Onaqa tamo di a gilsiq yalonaqa nam poiyoonaqa sawa unej. Sawa unsiqa olo puluosi bej. <sup>8</sup> Bonaqa aqa qure qujai naŋgi ti tamo naŋgi a nami nam qandimo sosiqa silali qa njlnjroqnej qaji naŋgi ti a unsibqa mareb, “Tamo nami silali qa njlgoqnej qaji agiende kiyo?” <sup>9</sup> Onaqa tamo qudei naŋgi mareb, “Od, agi a qujai.” Onaqa tamo qudei naŋgi mareb, “A sai. Endi tamo bei. Aqa ulatamu tamo nam qandimo aqa ulatamu bul.” Onaqa a segi na minjrej, “Agi e segi.”

<sup>10</sup> Onaqa tamo uŋgasari naŋgi na nenemyeb, “Ni namdamu kiyersi poimqoqa sawa unonum?” <sup>11</sup> Onaqa a na kamba minjrej, “Tamo bei aqa ñam Yesus a na jagi gereiyosiq ijo namdamuq di atsiqa merbqo, ‘Ni gilsim Siloam yaq di yal.’ Degsi merbqoqa e gilsim yalonumqa nam poibqoqa sawa unonum.” <sup>12</sup> Onaqa tamo uŋgasari naŋgi na olo nenemyeb, “Tamo ni boletmqo qaji a qabi unu?” Onaqa a na minjrej, “A qabitqo kiyo di e qaliesai.”

<sup>13</sup> Onaqa tamo uŋgasari naŋgi na tamo nami nam qandimye-soqnej qaji di osib Farisi naŋgoq osi gileb. <sup>14</sup> Bati Yesus na jagi gereiyosiq tamo di boletej di Juda naŋgo yori bati. <sup>15</sup> Deqa Farisi naŋgi na tamo di endegsib nenemyeb, “Ni namdamu kiyersi poimqoqa sawa unonum?” Onaqa a na minjrej, “Tamo bei aqa ñam Yesus a jagi misel ti bulyosiq ijo namdamuq di atqoqa e yalonum nam poibqoqa sawa unonum.” <sup>16</sup> Onaqa Farisi qudei naŋgi mareb, “Yesus a yori bati grotqo deqa iga qalieonum, Qotei na a qarinyosai.” Ariya Farisi qudei naŋgi mareb, “Sai. Une tamo a kiyersim manwa deqaji babtqas?” Farisi naŋgi anjam deqa njirinosisib poaiyeleb.

<sup>17</sup> Onaqa naŋgi na tamo di olo nenemyeb, “Yesus a ino namdamu boletqo deqa ni a qa kiyersi are qalonum?” Onaqa a na minjrej, “E are qalonum, a Qotei aqa medabu o qaji tamo bole.”

<sup>18</sup> Tamo di a nami nam qandimo sosiqa olo nam poiyej deqa Juda tamo kokba naŋgi areqalo kobaiyeb. Osib aqa ai abu naŋgi metnjrnab beb. <sup>19</sup> Bonabqa endegsib nenemnjreb, “Tamo endi nunjo angro e? A bole nam qandimo nambabej e? Boleamqa niŋgi na mergibqa iga quqwom. A kiyersi bini

nam poiyoqqa sawa uneqnu?”<sup>20</sup> Onaqa aqa ai abu nanği na kamba minjreb, “Di bole, a gago anğro. A nam qandimo nambabey di iga qalie.”<sup>21</sup> Ariya a kiyersi bini nam poiyoqqa sawa uneqnu di iga qaliesai. Tamo yai na aqa namdamu boletqo di dego iga qaliesai. A tamo boleqo. A segi nenemyibqa a segi na marqas.”<sup>22</sup> Aqa ai abu nanği Juda tamo kokba nanği ulainjrsib deqa anjam degsib minjreb. Juda tamo kokba nanği nami maroqneb, “Tamo bei a marqas, ‘Yesus a bole Kristus,’ degsi marimqa tamo di iga taqal waiyonam a bunu olo Qotei tal miligiq gilqasai.”<sup>23</sup> Deqa nanği aiyel Juda tamo kokba nanği ulainjrsib minjreb, “A tamo boleqo. A segi nenemyiy.”

<sup>24</sup> Onaqa tamo nami nam qandimyesoqnej qaji di Farisi nanği na olo metonab bonaq minjeb, “Ni Qotei aqa nam soqtosim anjam bole merge. Iga qalieonum, Yesus a une tamo. Ni degsi merge.”<sup>25</sup> Onaqa a na kamba minjrej, “A une tamo kiyo sai kiyo di e qaliesai. Ariya e nami nam qandimo soqnem bini e olo nam poibqoqa sawa uneqnum di e qalieonum.”

<sup>26</sup> Onaqa nanği na olo nenemyeb, “Yesus a ni kiyermqo? A kiyersi ino namdamu boletqoqa ni sawa uneqnum?”<sup>27</sup> Onaqa a na kamba minjrej, “E nami merngonum ninği ijo anjam quetbosai. Kiyaqqa ololo mernğit quqwab? Ninği dego Yesus aqa anğro sqajqa are unu e?”

<sup>28</sup> Onaqa Farisi nanği na tamo di misilinyosib minjeb, “Ni Yesus aqa anğro. Iga Moses aqa anğro.”<sup>29</sup> Iga qalie, Qotei a bole Moses anjam minjoqnej. Ariya Yesus a qabe na kiyo bej di iga qaliesai.”<sup>30</sup> Onaqa tamo dena kamba minjrej, “E nunğo anjam di quonum ugeibqo. Ninği mareqnub, ‘Yesus a qabe na kiyo bej di iga qaliesai.’ Ariya Yesus a ijo namdamu boletqoqa e sawa uneqnum.”<sup>31</sup> Iga qalie, tamo nanği une ateqnub qaji nanği Qotei pailyqab di a nanğo pailyo quqwasai. Ariya tamo nanği Qotei qa ulaoqnsib aqa areqalo dauryeqnub qaji nanği pailyqab di a nanğo pailyo quqwas.”<sup>32</sup> Tamo ai miligiq na nam qandimo nambabo qaji di tamo bei na nami boletonaq iga quosaiognem.”<sup>33</sup> Qotei na Yesus qarinyosai qamu a manwa bei babtqa keresai qamu.”

<sup>34</sup> Onaqa Farisi nanği na kamba minjeb, “Une aqa kumbra inoq di beterejunu. Ni une ti sosim nambabem agi bini ni degsi unum. Deqa ni Qotei aqa anjam iga mergaim.” Degsib minjsib a taqal waiyosib a olo Qotei tal miligiq gilqajqa saidyeb.

### *Farisi nanği tamo nam qandimo bul unub*

<sup>35</sup> Farisi nanği na tamo di taqal waiyonab Yesus a di qusiqa a qa namosiq itosiq nenemyej, “Ni Tamo Anğro qa ino areqalo singilatonum e?”<sup>36</sup> Onaqa a na kamba Yesus minjej, “O Tamo Koba, Tamo Anğro di yai? Ni merbimqa e qusiy ijo areqalo



a qa singilatqai.” <sup>37</sup> Onaqa Yesus na minjej, “Ni na Tamo Angro agi itonum. Endego aqo ombla anjam mareqnum.” <sup>38</sup> Onaqa a na Yesus minjej, “Od, Tamo Koba, e ni qa ijo areqalo singilatunum.” A degsi Yesus minjsiqa aqa areq di sinğa pulutosiqa a binjiyej.

<sup>39</sup> Onaqa Yesus a marej, “E tamo unğasari nanği peginjrqajqa deqa mandamq aiyem. Deqa tamo nam qandimo unub qaji nanği olo namdamu bole atoqnqab. Tamo namdamu bole ateqnub qaji nanği olo nam qandimnjresqas.” <sup>40</sup> Onaqa Farisi qudei Yesus aqa jojomq di tigelesoqneb qaji nanği aqa anjam di qusib nenemyeb, “Iga dego nam qandimgejunu kiyo?” <sup>41</sup> Onaqa Yesus na kamba minjrej, “Ninği nam qandimgejunu qamu ninği une saiqoji unub qamu. Ariya ninği mareqnum, ‘Iga namdamu bole ateqnum.’ Dego di ninği une ti unub.”

## 10

### *Yesus a kaja nanğo mandor bole*

<sup>1</sup> Osiqa Yesus a olo marej, “E bole mernğwai. Tamo bei a kaja nanğo jeñ miligiq gilqa osimqa a siranmeq na gilqa uratosim qalaq na jeñ prugosim miligiq gilqas di a bajinj tamo. <sup>2</sup> Tamo a siranmeq na jeñ miligiq gilqas di a kaja nanğo mandor bole. <sup>3</sup> Deqa siranme taqato tamo na siran waqtetoqnim miligiq giloqnsim aqa segi kaja nanğo nam metnjroqnqas. Metnjroqnim nanği aqa kakro qusib boqrib joqsim oqedoqnqas. <sup>4</sup> A na aqa segi kaja kalil nanği joqsim oqedoqnsim a nanği qa namoosim giloqnmqa nanği aqa kakro qa poinjrim deqa nanği a dauryoqnqab. <sup>5</sup> Tamo lanaj bei na nanği metnjrqas di nanği aqa kakro qalieqasai deqa nanği a dauryqasai. Nanği a uratosib jaraiqab.” <sup>6</sup> Yesus na yawo anjam degsi minjrnaqa nanği qusib utru poinjrosai. <sup>7</sup> Deqa Yesus a damu ubtosiqas endegsi minjrej, “E bole mernğwai. Kaja nanği di ijo segi tamo unğasari nanği sigitnjrejunub. Jeñ miligiq gilqajqa siranme agi e segi. <sup>8</sup> Anjam plalto tamo kalil e bosaisonam nami beb qaji nanği bajinj tamo bul. Deqa kaja nanği nanğo medabu dauryosaioqneb. <sup>9</sup> E segi siranme. Tamo unğasari nanği ijoq na jeñ miligiq giloqnqab di Qotei na nanği elenqas. Amqa nanği miligiq gile oqede oqnsib inği bole uyoqnqab.

<sup>10</sup> “Ninği qalie, bajinj tamo nanği kaja bajinjosib ugeugeinjsib namqajqa deqa beqnum. Ariya e degyqa bosai. E na kaja nanği nambile enjritqa nanği nambile tulan boledamu oqajqa e deqa bem. <sup>11</sup> E kaja nanğo mandor bole. Mandor bole aqa kumbra agiende. A kaja nanği aqaryainjrqas marsimqa aqa segi nambile uratosim moiqas. <sup>12</sup> Ariya tamo lanaj aqa kumbra degosai. A silali qa segi wauqas deqa a kaja nanği geregere taqatnjrqasai. A kaja nanğo mandor bolesai. Kaja

nanği aqa sai. Deqa baun juwan bamqa unsim kaja nanği uratnjrsim ulanqas. Yimqa baun juwan na kaja qudei ñumim kalil segisegiosib jaraiqab. <sup>13</sup> A silali qa segi wauqas deqa a kaja nanği geregere taqatnjrqasai. A kaja nanği qa are qalosai. Baun juwan bamqa a kaja nanği uratnjrsim ulanqas.

<sup>14</sup> “E kaja nanngo mandor bole. E ijo segi kaja nanği qa qalie bole. Ijo segi kaja nanği e qa dego qalie bole. <sup>15</sup> Ijo Abu a e qa qalie bole. E ijo Abu qa qalie bole. Dego kere e ijo segi kaja nanği qa qalie bole. Nanği dego e qa qalie bole. Deqa e na ijo kaja nanği aqaryainjrqa marsiy ijo segi ñambile uratosiy moiqai. <sup>16</sup> Ijo kaja qudei dego jen oqeq di unub. Nanği jen miligiq di sosai. Deqa e nanği dego joqsiy bosiy ijo kaja jen miligiq di unub qaji nanği ti turtnjrsiy jen qujaiq di breinjrit nanği mandor qujai ti sqab. Sosib ijo medabu quoqnqab. <sup>17</sup> Ijo Abu na e tulan qalaqalaibegnu. Di kiyaaqa? E ijo segi ñambile uratosiy moisiy olo subq na tigelqai. <sup>18</sup> Tamo bei na ijo ñambile yaibqa keresai. E ijo segi areqalo na ijo ñambile uratosiy moiqai. E singila ti unum deqa e na ijo ñambile uratqa kere. Osiy olo ijo ñambile oqa kere. Ijo Abu a nami merbej, ‘Ni degye.’ Deqa e degyqai.”

<sup>19</sup> Onaqa Juda nanği Yesus aqa anjam deqa ñiriñosib poaiyeleb. <sup>20</sup> Osib nanği gargekoba endegsib maroqneb, “Yesus a mondor uge ti unu deqa a tulan nanariqo. Kiyaaqa ninği aqa anjam queteqñub?” <sup>21</sup> Onaqa nanği qudei maroqneb, “Tamo a mondor uge ti sqas di a anjam bole deqaji marqa keresai. Mondor uge na tamo ñam qandimo boletqa kere e? Sai.”

*Juda tamo kokba nanği Yesus qa minjin oqetnjrej*

<sup>22</sup> Nami Juda nanngo moma nanği atra tal bunuj siran waqteb. Deqa olo are qalqajqa yori bati Jerusalem dia brantej. Bati di ulili aiqa bati. <sup>23</sup> Onaqa Yesus a atra tal miligiq gilsiqqa tal me ñam Solomon dia walweloqnej. <sup>24</sup> Walweleqnaqa Juda tamo kokba nanği aqa areq di koroosib minjeb, “Bati gembub koboamqa ni na ino kumbra ti ino wau ti ubtosim geregere mergwam? Ni Kristus amqa geregere merge.”

<sup>25</sup> Onaqa Yesus na kamba minjrej, “E nami ninği merngem, ‘E Kristus.’ Merngonam ninği qunab ugeinje. Wau kalil e ijo Abu aqa ñam na yeqnum qaji di ninği geregere tenemtoqniy. Tenemtosib endegsi poinqwas, bole, e Qotei aqa Niri. <sup>26</sup> Ninği ijo kaja sai deqa ninği e qa nungo areqalo singilatosaieqñub. <sup>27</sup> Ijo kaja nanği ijo medabu queqñub. E nanği qa qalie bole. Nanği e daurbeqñub. <sup>28</sup> E nanği ñambile enjreqnum deqa nanği ñambile gaigai sqab. Nanği padalqasai. Sai bole sai. Tamo bei na nanği ijo banq dena yaibqa keresai. <sup>29</sup> Ijo Abu

na nanği e ebej. A segi qujai inği inği kalil tulañ bunñrejunu. Deqa tamo bei na ijo kaja nanği ijo Abu aqa bañq dena yayıyqa keresai bole sai. <sup>30</sup> Aqo ijo Abu wo tamo qujai.”

<sup>31</sup> Onaqa Juda tamo kokba nanği Yesus aqa anjam di qusi-bqa nanği a qalib moiqajqa marsib meniñ eleñeb. <sup>32</sup> Osib Yesus qalqa laqnab endegsi minjrej, “E na Abu aqa wau bole gargekoba niñgi osorñgoqnem. Wau bole kiye qa niñgi e lubsib moiyoñbqa meniñ eleñonub?”

<sup>33</sup> Onaqa Juda tamo kokba nanği na kamba endegsib minjeb, “Wau bole bei qa iga ni meniñ na lumqasai. Ni Qotei misilinyonum deqa lumqom. Agi ni segi qa maronum, ni Qotei. Ni degsi maraim. Ni mandam tamo. Deqa ni lumqom.”

<sup>34</sup> Onaqa Yesus na kamba nanği minjrej, “Nuñgo dal anjam bei nami endegsib neñgreñyeb, ‘E niñgi merñgonum, “Niñgi qotei.” ’ <sup>35</sup> Agi Qotei na tamo qudei nanği minjrej, ‘Niñgi qotei.’ A na nanği degsi minjrej. Niñgi qalie, iga Qotei aqa neñgreñ bei gentqa keresai. <sup>36</sup> Abu a segi na e giltbosiqa qarınbonaq mandamq aiyem deqa e maronum, ‘E Qotei aqa Niri.’ E degsi maronum deqa niñgi kiyayqa merbonub, ‘Ni Qotei misilinyonum’?

<sup>37</sup> “E ijo Abu aqa wau yosaiotqa niñgi ijo anjam quetbaib. <sup>38</sup> Ariya e Abu aqa wau yitqa niñgi ijo anjam quib ugeingim olo ijo wau unsib dena geregere poingem, bole, Abu na e beterbesonaqa e kamba Abu beteryejunum.”

<sup>39</sup> Onaqa nanği Yesus aqa anjam di qusib a ojqa yonab a nanği qa loumosiq ulañej.

<sup>40</sup> Ulanosiq olo Jordan ya taqal beiq gilej. Gilsiq Jon na nami tamo unğasari nanği yansnjroqnej qaji sawaq di soqnej. <sup>41</sup> Sonaqa tamo unğasari gargekoba nanği aqaq giloqnsib segi segi maroqneb, “Jon a mañwa bei babtosaioqnej. Ariya anjam kalil Jon a Yesus qa maroqnej qaji di bole.” <sup>42</sup> Nanği degsib maroqneb deqa Yesus a sawa dia sonaqa tamo unğasari gargekoba nanği a qa nanço areqalo sinğilateb.

## 11

### *Lasarus a makobaiyosiq moiyej*

<sup>1</sup> Tamo bei aqa ñam Lasarus a maiyej. Lasarus aqa qure utru Betani. Qure di Maria aqa jaja Marta wo nanço qure utru. <sup>2</sup> Maria agi bunuqna Tamo Koba Yesus aqa sinğaq di goren bilentosiq aqa gate banqa na piyej qaji a di. Aqa jaja Lasarus a maiyej. <sup>3</sup> Deqa Maria Marta wo nanği na tamo qudei qarınjnrb Yesus aqaq gilsib minjeb, “O Tamo Koba, tamo ni tulañ qalaqalaiyeqnum qaji a maiyqo.” <sup>4</sup> Onaqa Yesus a nanço anjam di qusiqa minjrej, “Ma di moiqajqa ma sai. A maiyqo di aqa utru agiende. Qotei aqa sinğila boleq

dimqa tamo ungasari nanqi unsib Qotei aqa ñam soqtqajqa deqa a ma di oqo. E Qotei aqa Niri dego ñam koba oqai.”

<sup>5</sup> Yesus a Marta aqa jaja Maria wo nanqi aiyel qalaqalain-  
jrej. A Lasarus dego qalaqalaiyej. <sup>6</sup> Lasarus a maiyej anjam  
di qusiqa quosaibulosiqa sawa a soqnej qaji dia bati aiyel olo  
soqnej. <sup>7</sup> Sosiqa aqa angro nanqi minjrej, “Iga olo Judia sawaq  
aiqom.” <sup>8</sup> Onaqa nanqi na Yesus minjeb, “O Qalie Tamo Koba,  
nami yala Juda nanqi meniñ na ni lumqa mareb. Di ni olo  
deq aiqam e?” <sup>9</sup> Onaqa Yesus na kamba minjrej, “Señ oqsiiq  
qanam jigeqo sawa suwanqo. Deqa tamo nanqi walwelqa  
kere. Mangalqasai. <sup>10</sup> Ariya señ aisiq qoloqo sawa ambruoqo.  
Deqa tamo nanqi walwelqa keresai. Mangalqab.”

<sup>11</sup> Yesus a anjam degsi marsiqa olo minjrej, “Gago was  
Lasarus a ñeiejunu. E aisiy dudumyqai.” <sup>12</sup> Onaqa Yesus aqa  
angro nanqi aqa anjam di qusibqa minjeb, “O Tamo Koba,  
a ñeiejunu degam aqa ma saiqa.” <sup>13</sup> Nanqi Lasarus a bole  
ñeiejunu edegeb. Di sai. A bole moiyej. Yesus a Lasarus aqa  
moiyo sigitosiqa ñeio qa marej. <sup>14</sup> Deqa a na ubtosiq minjrej,  
“Lasarus a bole moiyej. <sup>15</sup> Ningi ijo singila unsib e qa nunqo  
areqalo singilatqajqa deqa e aqaq aiyosaisanam a moiyej. E  
ningi qa are qalsim kumbra degyem. E ijo kumbra deqa  
areboleboleibeqnu. Ningi tigelab iga Lasarus aqaq aiqom.”

<sup>16</sup> Onaqa Tomas aqa ñam bei Didimus a na Yesus aqa angro  
qudei nanqi minjrej, “Unqum. Iga kalil aisim Yesus a koba na  
moiqaom.”

*Yesus a marej, “E segi subq na tigelo qa utru”*

<sup>17</sup> Onaqa Yesus aqa angro nanqi koba na aisib Betani qure  
jojomyosib anjam endegsib queb, “Lasarus a nami moiyej  
subq ateb. Bati qolqe koboqo.” <sup>18</sup> Betani qure di Jerusalem  
jojom. Kilomita qalub. <sup>19</sup> Deqa Juda tamo ungasari gargekoba  
nanqi Betani qureq bosib Marta Maria wo nanqo jaja moiyej  
deqa are latetnrqajqa koroosib soqneb.

<sup>20</sup> Onaqa Marta a anjam endegsi quej, “Yesus a beqnu.”  
A degsi qusiqa walwelosiqqa gamq di Yesus turqajqa gilej.  
Maria a talq di awesoqnej. <sup>21</sup> Marta a gilsiq gamq di Yesus  
turossiq minjej, “O Tamo Koba, ni nami endi so qamu ijo  
jaja a moiyoasai qamu. <sup>22</sup> E qalieonum, ni inqi kiye qa Qotei  
pailyqam a ni emqas.”

<sup>23</sup> Onaqa Yesus na Marta minjej, “Ino jaja a olo subq na  
tigelqas.” <sup>24</sup> Onaqa Marta na kamba minjej, “E qalie, diño  
bati qa tamo ungasari kalil nanqi subq na tigelabqa ijo jaja  
dego ombla tigelqab.” <sup>25</sup> Onaqa Yesus na minjej, “E segi subq  
na tigelo qa utru. E segi ñambile sqajqa utru. Tamo a e qa  
aqa areqalo singilatossim moiqaas di unqum. A ñambile sqas.

26 Tamo kalil nambile sosib e qa nanngo areqalo sinngilateqnuub qaji nanngi olo bunu moiqasai. O Marta, ni ijo anjam di qusim ino areqaloq di sinngilatunum e?”

27 Onaqa Marta na Yesus minnej, “Od, Tamo Koba. E qalieonum, ni Kristus, Qotei aqa Niri. Ni qujai Qotei na qarinqmonaqa mandamq aiyem qaji. Deqa e ni qa ijo areqalo sinngilatunum.”

*Yesus a Lasarus qa are ugeiyonaqa akamej*

28 Marta a anjam degsi marsiqa olo puluosi aisiq aqa jaja Maria metonaq aqa areq bonaq ombla sasalosibqa minnej, “Qalie Tamo Koba a bqo. A ni qa marqo.” 29 Onaqa Maria a Marta aqa anjam di qusiqa tigeloqujatosiq Yesus unqa gilej. 30 Yesus a qure miligiq aiyosaisoqnej. A Marta wo anjam mareb qaji sawaq di soqnej. 31 Sonaqa Juda tamo ungasari talq di Maria are latetoqneb qaji nanngi Maria a tigeloqujatosiq tal uratosiq gileqnaqa unsib are qaleb, “A Lasarus aqa subq di akamtqajqa gileqnu kiyu.” Nanngi degsib are qalsib tigelosib Maria dauryosib gileb.

32 Maria a gilsiq Yesus soqnej qaji sawaq di brantosiqa Yesus unsiqa aqa areq di sinnga pulutosiqa minnej, “O Tamo Koba, ni nami endi so qamu ijo jaja a moiynosai qamu.”

33 Onaqa Yesus a Juda tamo ungasari Maria dauryosib beb qaji nanngi Maria ombla akamoqneb di unsiqa nanngi qa are gulbeiyonaqa nenemnnej, 34 “Ninggi Lasarus qabia subq ateb?” Onaqa nanngi na minjeb, “O Tamo Koba, ni bosim aqa sub une.” 35 Degsi minjnabqa Yesus a dego akamej. 36 A akamonaqa Juda nanngi di unsibqa mareb, “Ninggi uniy. Yesus a Lasarus tulan qalaqalaiyoqnej deqa akamqo.” 37 Onaqa nanngi qudei Yesus qa yomuosib mareb, “Yesus a nami tamo nam qandimo boletej. A kiyaaqqa Lasarus boletosai? Yim a moiqasai.”

*Yesus a Lasarus subq na tigeltej*

38 Onaqa Yesus a nanngo yomu anjam di qusiqa are gulbeiyonaqa walwelosiq Lasarus aqa subq gilej. Sub di mana miligiq di bogeb. Lasarus nami subq atsib meniñ kobaquja na sub me getenteb. 39 Deqa Yesus na tamo qudei minnnej, “Ninggi meniñ kobaquja di taqal atiy.” Onaqa tamo moiyej qaji aqa jaja Marta na Yesus minnej, “O Tamo Koba, a nami moiyej bati qolqe gilqo. Iga meniñ taqal atqom di aqa qusa quleqwas.” 40 Onaqa Yesus na kamba minnej, “E nami mermonum, ni e qa ino areqalo sinngilatqam di ni Qotei aqa sinngila unqam.” 41 Degsi minjnaqa nanngi meniñ kobaquja di taqal atnabqa Yesus a lan goge tarosiqa Qotei endegsi pailyej, “O Abu, ni ijo pail endi quonum deqa e ni qa tulan areboleboleibqo. 42 E qalieonum,

ni gaigai ijo pail queqnum. Ariya tamo ungasari ijo areq endi tigelejunub qaji nanqi e qa nanqo areqalo singilatqajqa deqa e ni pailmonum. Yim nanqi qalieqab, ni na e qarinjbonam bem.”

<sup>43</sup> Yesus a degsi Qotei pailyosiq koboonaqa a tulan maosiq marej, “O Lasarus, ni subq dena tigelosim au.” <sup>44</sup> Degsi marnaqa tamo moiyej qaji a subq dena tigelosiq oqedej. Aqa singa ti ban ti ulatamu ti nami gara na dalaeb. Deqa Yesus na minjrej, “Aqa gara di pamblojyib walwelosim gilem.”

*Juda tamo kokba nanqi koroosib Yesus qalib moiqaqqa maroqneb*

<sup>45</sup> Bati deqa Juda tamo ungasari Maria aqa are latetqa beb qaji nanqi Yesus aqa manwa di unsibqa nanqi gargekoba Yesus qa nanqo areqalo singilateb. <sup>46</sup> Ariya nanqi qudei tigelosib Farisi nanqoq gilsib kumbra Yesus yej qaji deqa sainjreb. <sup>47</sup> Sainjrnab qusibqa atra tamo kokba ti Juda tamo kokba ti metnjrnab nanqo areq bosib koba na koroosib mareb, “Iga kiyerqom? Yesus a manwa gargekoba yeleneqnu. <sup>48</sup> Iga a uratonam degsi kumbra yoqnqas di tamo ungasari kalil nanqi a qa nanqo areqalo singilatqab. Yim Rom nanqi bosib gago atra tal niñaqyosib iga dego kobotgwab.”

<sup>49</sup> Wausau deqa tamo bei aqa ñam Kaiafas a Juda nanqo atra tamo gate soqnej. Deqa a nanqo ambleq di tigelosiq minjrej, “Ninji tulan nanarionub. Anjam lanja lanja mareqnu. <sup>50</sup> Ninji are qaliy. Tamo qujai a tamo ungasari kalil nanqi qa moiqas di kere. Amqa iga padalqasai.”

<sup>51</sup> Kaiafas aqa segi areqalo na anjam di marosai. A wausau deqa atra tamo gate soqnej deqa a Qotei aqa medabu osiq anjam di marej. Yesus a Juda nanqi qa moiqas anjam di ubtosiq marej. <sup>52</sup> Bole, Yesus a Juda nanqi segi qa moiqasai. Qotei aqa anqro kalil sawa bei beiq di unub qaji nanqi qa ti moiqas. Moisis nanqi kalil koroinjrimqa nanqi aqa segi tamo ungasari sqab. Kaiafas a anjam di ubtosiq marej.

<sup>53</sup> Bati qujai deqa Juda tamo kokba nanqi Yesus qalib moiqaqqa anjam gereiyqa utru ateb. <sup>54</sup> Yesus a di qalieosiq deqa a Juda nanqo ambleq di walwelosai oqnej. A segitosiq qure kiñala bei wadau sawa jojom deq gilsiq aqa anqro nanqi koba na dia soqneb. Qure di aqa ñam Efraim.

<sup>55</sup> Qotei a nami Israel nanqi Isip sawaq di padalqa laqnaqqa nanqi elenej. Deqa olo are qalqajqa yori bati jojomej. Yori bati jojomonaqa Juda tulan gargekoba nanqo qure qureq dena tigelosib yori bati di unqajqa deqa Jerusalem beb. Juda nanqo kumbra agiende. Yori bati di brantosaisoqnimqa nanqi Jerusalem bosib nanqo segi jejamu yansosib yori bati qa tarinqab. Utru deqa nanqi Jerusalem beb. <sup>56</sup> Ariya nanqi Jerusalem bosib Yesus qa ñamoqneb. Ñamoqnsib atra tal miligiq

bosib segi segi maroqneb, “Ninği kiyersib are qalonub? Yesus a yori bati unqajqa Jerusalem bças kiyo sai kiyo?” <sup>57</sup> Nanği degsib maroqneb. Di kiyaaqa? Atra tamo kokba ti Farisi ti nanği na tamo unğasari nanği nami endegsib minjreb, “Tamo bei a Yesus qabi soqnimqa unsim bosim iga mergim iga na ojgom.”

## 12

*Maria a gorenj quleq tulanj boledamu Yesus aqa sinğaq di bilentej*

<sup>1</sup> Ariya Juda nanžo yori bati koba jojomej. Bati 6 amqa brantqas. Deqa Yesus a tigelosıqa Betani qureq gilej. Qure di Lasarus ağı Yesus na subq na tigeltej qaji aqa qure utru. <sup>2</sup> Gilnaqa qure deqaji tamo unğasari nanği a unsibqa arebolebolejnırnaqa inği goiyeteb. Marta a inği suweiyosiq Lasarus Yesus wo tamo qudei ti metnjrnaq bosib koba na awoosib inği uyoqneb. <sup>3</sup> Onaqa Maria a gorenj quleq tulanj boledamu silali kobaquja na awaiyej qaji di jalınjaq jıgsıqa osi bosıqa Yesus aqa sinğaq di bilentosıqa aqa segi gate banğa na piyetej. Onaqa gorenj aqa quleq na tal keretej. <sup>4</sup> Onaqa Yesus aqa anğro bei Judas Iskariot ağı bunuqna Yesus osiq jeu tamo nanžo banq di atej qaji a Maria aqa kumbra di unsıqa njirinısıq marej, <sup>5</sup> “A kiyaaqa gorenj di qarınjosıq menin silali 300 osiq dena tamo inği inği saiqoji nanği aqaryainjrosai?” <sup>6</sup> Judas a tamo inği inği saiqoji nanği qa are qalsiq anjam di marosai. A bajın tamo. A Yesus aqa anğro nanžo silali jugwajqa qun taqatoqnej. Deqa nanği qun miligiq di silali ateqnab a na olo bajınjoqnej. A deqa are qalsiq anjam di marej.

<sup>7</sup> Onaqa Yesus a Judas aqa anjam di qusıqa minjej, “Unğa di urat. A gorenj di ojesoqnem. A ijo jejamu subq atqajqa are qalsiq nami gereiyqo. <sup>8</sup> Tamo inği inği saiqoji nanği bati gaigai ninği ti sqab. Ariya e bati gaigai ninği ti sqasai.”

*Atra tamo kokba nanği Lasarus qalsib moiyyotqa maroqneb*

<sup>9</sup> Juda tulanj gargekoba nanği qalieeb, Yesus a Betani qureq gilsiq di soqnej. Deqa nanği a unqa beleneb. Nanği Yesus segi unqajqa bosai. Yesus a nami Lasarus subq na tigeltej deqa nanği a dego unqa beb. <sup>10</sup> Atra tamo kokba nanği Lasarus dego qalsib moiyyotqa qairoqneb. <sup>11</sup> Di kiyaaqa? Yesus a Lasarus subq na tigeltonaqa Juda gargekoba nanği atra tamo kokba nanği uratnjrsib olo Yesus qa nanžo areqalo sinğilatoqneb.

*Mandor Koba Yesus a Jerusalem bej*

<sup>12</sup> Tamo ungasari tulan gargekoba nanġi yori bati unqajqa marsib Jerusalem beleşeb. Beleşosib nebeonaqa nanġi endegsib queb, “Yesus a Jerusalem bqas.” <sup>13</sup> Nanġi degsib qusib deqa nanġi tuwom banġa eleşosib Yesus gamq di turqajqa aiyeb. Aisib Yesus beqnaqa unsib tulan leleşoqnsib endegsib minjoqneb, “Iga ni qa tulan areboleboleiqeġnu. Ni Tamo Koba aqa ñam na bonum deqa a ni tulan geregereimeġnu. Ni Israel nanġo Mandor Koba.”

<sup>14</sup> Onaqa Yesus a donki osiqa quraq di awoej. Aqa kumbra deqa nami Qotei aqa anjam bei endegsib nenġrenyeb unu, <sup>15</sup> “O Saion tamo ungasari, niġi ulaaib. Niġi uniy. Nunġo Mandor Koba a donki bunuj quraq di awoosiq beġnu.” <sup>16</sup> Bati deqa Yesus aqa anġro nanġi anjam di aqa utru poinġrosai. Bunuqna Yesus a moisiq ñam koba onaqa nanġi anjam deqa olo are qalsib endegsib mareb, “Bole, anjam di Yesus qa nenġrenyeb deqa tamo ungasari nanġi leleşoqnsib a biġiyoqneb.”

<sup>17</sup> Ariya tamo ungasari Yesus a Lasarus metosiq subq na tigeltonaq uneb qaji nanġi maġwa deqa saeqnsib laqneb. <sup>18</sup> Laqna b tamo ungasari tulan gargekoba nanġi quoqneb. Deqa Yesus a donki bunuj quraq di awoosiq Jerusalem beqnaqa nanġi a gamq di turqajqa aiyeleleşeb. <sup>19</sup> Ainabqa Farisi nanġi na unġrsibqa segi segi maroqneb, “Iga Yesus singila na saidyeqnamqa keresaiiqeġnu. Niġi uniy. Tamo ungasari kalil nanġi a dauryeqnub.”

*Grik tamo qudei nanġi Filip minjeb, “Iga Yesus unqom”*

<sup>20</sup> Tamo ungasari Qotei louqa marsib yori bati unqajqa Jerusalem aiyeleleşeb qaji nanġo ambleq di Grik tamo qudei soqneb. <sup>21</sup> Grik tamo nanġi di Filip aqaq di branteb. Di kiyaaqa? Filip a dego Grik tamo. Filip aqa qure utru Betsaida. Qure di Galili sawaq di unu. Nanġi Filip aqaq di brantosib nenemyeb, “O gago was, iga Yesus unqa kere e?” <sup>22</sup> Onaqa Filip a aisiqa nanġo anjam di Andru minjsiqa Andru ombla gilsib olo Yesus minjeb. <sup>23</sup> Minjnab qusiqa nanġi kamba minjrej, “E Tamo Anġro. Deqa e ñam koba oqajqa bati brantqo. <sup>24</sup> E bole mernġwai. Kurgus yago breiyibqa mandamq aisim moiqaasai di a laġa sqas. Moiqas di a olo qoqi oqsim gei gargekoba ateleşqas. <sup>25</sup> Dego kere tamo bei na aqa segi ġambile tulan qalaqalaiyqas di a padalqas. Ariya a mandamq endi aqa segi ġambile qoreiyqas di a ġambile gaigai sqas. <sup>26</sup> Tamo bei na e wauetbqa osimqa a e daurbem. Yimqa qure e sqai di a dego e ombla sqom. A ijo wau yoqnaqas di ijo Abu na a ñam kobaquja yqas.”

*Jeu tamo nanġi na Yesus soqtosib goge gaintqab*



<sup>27</sup> Osiqa Yesus a olo anjam endegsi marej, “Endego e are tulan gulbekobaibqo. Deqa e endegsi Qotei pailyqai kiyo, ‘O ijo Abu, ni na marimqa bati uge endi ijoq baiq?’ Ungum, e degsi pailyqasai. Bati uge endi branteme. E deqa mandamq aiyem. <sup>28</sup> O ijo Abu, ni na ino ñam tulan kobaqujatime.” Yesus a degsi marnaqa lan goge dena anjam endegsi brantej, “E ijo ñam kobaqujatonum. Ololo kobaqujatqai.” <sup>29</sup> Anjam degsi brantonaqa tamo ungasari Yesus aqa areq di tigelesoqneb qaji nanqi qusibqa segi segi maroqneb, “Kola anjam atqo kiyo?” Onaqa tamo qudei nanqi mareb, “Sai. Lan angro bei na Yesus anjam minjqo.”

<sup>30</sup> Onaqa Yesus na kamba minjrej, “Anjam ninqi quonub qaji di e aqaryaiqbajqa brantosai. Di ninqi aqaryaiñgwajqa brantqo. <sup>31</sup> Ninqi quiy. Qotei na tamo ungasari mandamq endi unub qaji nanqi peginjrqajqa bati bqo. A na mandam endeqa gate koba Satan taqal waiyqajqa bati dego bqo. <sup>32</sup> E bini mandamq endi unum. Ariya bunuqna jeu tamo nanqi na e soqtbosib goge gaintbqab. Yimqa bati deqa e na tamo ungasari kalil nanqi are tigeltetnjritqa ijoq bqab.” <sup>33</sup> Yesus a aqa segi moiqajqa gam boleq atqa osiqa deqa degsi marej.

<sup>34</sup> Onaqa tamo ungasari nanqi na kamba Yesus minjeb, “Kristus a bati gaigai sqas. Dal anjam nami degsib marnab iga quem. Deqa ni kiyaaq maronum, ‘E Tamo Angro soqtbosib goge gaintbqab?’ Tamo Angro di tamo yai?”

<sup>35</sup> Onaqa Yesus na minjrej, “Pulon a nungo ambleq di sokiñalayosim ninqi olo uratngwas. Deqa ninqi pulon ti sosib pulonq na laqniy. Yimqa ninqi ambruingwasai. Tamo ambruq na laqnu qaji a qabiteqnu kiyo di a qalieqasai. <sup>36</sup> Ninqi pulon ti sosib pulon qa nungo areqalo sinqilatiy. Ninqi degyqab di ninqi pulon aqa angro sqab.”

*Juda tamo gargekoba nanqi Yesus qa nanngo areqalo sinqilatosai*

Yesus na tamo ungasari nanqi anjam degsi minjrsiqa nanqi uratnjrnaq nanqi a olo unosai. <sup>37</sup> A Qotei aqa manjwa gargekoba nanngo ñamdamuq di yeqnaqa nanqi unoqneb. Un-oqnsib ariya nanqi Yesus qa nanngo areqalo sinqilatosai oqneb. <sup>38</sup> Nanqi kumbra di yeb deqa anjam bei Qotei aqa medabu o tamo Aisaia a nami marej qaji di aqa damu brantej. A endegsi marej, “O Tamo Koba, tamo yai a gago anjam endi qusiqa aqa areqaloq di sinqilatqo? Tamo yai a Tamo Koba aqa sinqila unsiq poiyoqo? Tamo dego bei sosai.” Aisaia a nami anjam degsi marej.

<sup>39</sup> Deqa nanqi Yesus qa nanngo areqalo sinqilatqa keresai. Utru deqa Aisaia a anjam bei dego endegsi nenqrenyej, <sup>40</sup> “Qotei a nanngo ñamdamu getentetnjrej. A nanngo are miligi

dego getentetnjrej. Deqa nanği nanġo nġamdamu na Qotei aqa kumbra bei unqa keresai. Nanği nanġo are miligiq na Qotei aqa anjam dego poinjrqa keresai. Deqa nanği are bulyosib ijoq bqa keresai. Deqa e na nanği boletnjrqasai.” <sup>41</sup> Aisaia a nami Yesus aqa singila unsiq deqa anjam degsi marej.

<sup>42</sup> Bole, Juda gate gargekoba nanği are bulyosib Yesus qa nanġo areqalo singilateb. Ariya nanği Farisi nanği ulainjsib deqa nanği boleq di Yesus aqa nġam marosaioqneb. Nanği are qaleb, “Iga boleq di Yesus aqa nġam marqom di Farisi nanği iga Qotei tal miligiq gilqa saidgwab.” <sup>43</sup> Nanği degsib are qaleb. Di kiyaqqa? Nanği Qotei na nanġo nġam soqtqajqa arearetnjrosaiqnej. Tamo nanği na nanġo nġam soqtqajqa deqa arearetnjroqnej.

*Yesus aqa anjam a tamo sigitosim tamo unġasari nanği peginjrqas*

<sup>44</sup> Onaqa Yesus a tulan lelenosiq marej, “Tamo bei a e qa aqa areqalo singilatqas di a e qa segi aqa areqalo singilatqasai. Ijo Abu e qarınbej qaji a qa dego aqa areqalo singilatqas. <sup>45</sup> Tamo bei a e nubqas di a ijo Abu e qarınbej qaji di dego unqas. <sup>46</sup> E pulon bulosim mandamq aiyem. Deqa tamo unġasari kalil e qa nanġo areqalo singilateqneb qaji nanği ambruq di sqasai. <sup>47</sup> Tamo bei a ijo anjam qusimqa ariya a dauryqasai di e na a pegiyqasai. E tamo unġasari nanği peginjrqas bosai. E nanği elenqajqa bem. <sup>48</sup> Tamo unġasari nanği e qoreibosib ijo anjam quqwa uratqab di nanği peginjrqajqa tamo bei unu. Anjam e mareqnum qaji a segi tamo sigitosim tamo unġasari nanği peginjrqas. Diño batiamqa anjam dena nanği peginjrqas. <sup>49</sup> E ijo segi areqalo na anjam marosaieqnum. Ijo Abu e qarınbej qaji a na anjam merbeqnaqa quoqnsim agi mareqnum. <sup>50</sup> E qalieonum, ijo Abu aqa anjam di nġabile gaigai sqajqa anjam. Deqa anjam kalil e mareqnum qaji di ijo Abu na e merbeqnaq quoqnsim agi mareqnum.”

## 13

*Yesus na aqa anġro nanġo singa yansetnjrej*

<sup>1</sup> Juda nanġo yori bati koba jojomonaqa Yesus a endegsi qalieej, “E mandamq endi so bati koboqo. E moisiy ijo Abu aqaq olo oqwa bati brantqo.” Yesus na aqa segi anġro mandamq di soqneb qaji nanği tulan qalaqalainjroqnsiq gilsiq aqa moiqa bati itej.

<sup>2</sup> Deqa a nanği koba na awoosib inġi uyoqneb. Di bilaq. Inġi uyeqnaqqa Satan a Judas Iskariot aqaq aiyej. Aisiqa Judas na Yesus osim jeu tamo nanġo banq di atqajqa deqa are tigeltetnej. Judas a Saimon Iskariot aqa nġiri. <sup>3</sup> Yesus a qalieej, aqa Abu na inġi inġi kalil aqa banq di atelennej. A

Qotei aqaq na bej puluosim Qotei aqaq olo oqwas di dego qalieej. <sup>4</sup> Deqa a aqa angoro nanqi koba na inqi uyoqnsibqa a tigelosiqqa aqa gara olekoba piqtosiq jejamu piyo qaji gara osiqqa tigej. <sup>5</sup> Tigsiqqa kanjal tamo bulosiqqa tabirq di ya qamsiq aqa angoro nanqo singa yansetnjroqnsiqqa jejamu piyo qaji gara dena piyetnjroqnej.

<sup>6</sup> Osiqqa Pita aqa singa yansetqa laqnaqa minnej, “O Tamo Koba, ni ijo singa yansetbqam e?” <sup>7</sup> Onaqa Yesus na kamba minnej, “Kumbra e endego yeqnum endi ni utru poimosai unu. Bunuqna ni poimqas.” <sup>8</sup> Onaqa Pita na Yesus saidyosiq minnej, “Ni ijo singa yansqasai. Sai bole sai.” Onaqa Yesus na minnej, “E ni yansmqasai di ni e ombla sqa keresai.” <sup>9</sup> Onaqa Saimon Pita na minnej, “O Tamo Koba, ni ijo singa segi yansaim. Ijo ban ti gate ti dego yansetbe.” <sup>10</sup> Onaqa Yesus na minnej, “Tamo a yalqo a olo yalqasai. Aqa singa segi yansqas di kere. Dena a torei milalo sqas. Ningi milalo unub. Ariya ninqi kalil milalo sosai.” <sup>11</sup> Yesus a qalieej, aqa angoro bei agi Judas a na Yesus osim jeu tamo nanqo banq di atqas. Deqa a na minjrej, “Ninqi kalil milalo sosai.”

<sup>12</sup> Yesus a nanqo singa yansetnjrsiq koboonaqa aqa segi gara olekoba olo jigsiqqa awoosiq nenemnjrej, “Kumbra e endego ninqi enqonum qaji di ninqi utru poingwo e? <sup>13</sup> Ninqi e merbeq nub, ‘O Qalie Tamo Koba. O gago Tamo Koba.’ Ninqi kere e merbeq nub. Agi e segi qujai. <sup>14</sup> E nunqo Tamo Koba. E nunqo Qalie Tamo Koba dego. Ariya e nunqo singa yansetnqonum deqa ninqi dego segi segi qa kumbra degyoqniy. <sup>15</sup> Kumbra e endego ninqi osornqonum qaji di ninqi kamba dego degsib yoqniy. <sup>16</sup> E bole mernqwai. Kanjal tamo na aqa tamo koba bunyqa keresai. Tamo a wau qa gilqas di a na tamo a qarinqyo qaji di bunyqa keresai. <sup>17</sup> Kumbra e yeqnum endi aqa utru ninqi poingim dauryiy. Yimqa ninqi tulan areboleboleingwas.

<sup>18</sup> “Ijo anjam endi e ninqi kalil qa marosai. E na ninqi giltngem deqa e ninqi qa qalie bole. Ariya Qotei aqa anjam bei nenqrenq di unu qaji di aqa damu brantqas. Anjam agiende, ‘Tamo e ombla bem quiq di tuqtosim uyqas qaji a na e jeutbqas.’ <sup>19</sup> Kumbra di brantosaisonaqa e nami mernqonum. Deqa kumbra di brantimqa ninqi e qa nunqo areqalo singilatosis marqab, ‘Bole, Yesus a segi qujai gaigai degsi unu.’ <sup>20</sup> E bole mernqwai. Tamo bei na tamo unqasari e qarinnqronum qaji nanqi osim geregereinjqas di a e dego osim gereibqas. A e osim gereibqas di a na ijo Abu e qarinqbej qaji a dego osim gereiyqas.”

*Judas a Yesus osim jeu tamo nanqo banq di atqas*

<sup>21</sup> Yesus a degsi marsiqqa are tulan gulbekobaiyonaqa olo marej, “E bole mernqwai. Ijo angoro bei na e osim jeu tamo

nanjo banq di atqas.”<sup>22</sup> Onaqa Yesus aqa angro nanji segi segi kokoqoqneb. Yesus a angro yai qa degsi marej di nanji qaliesai deqa nanji degyoqneb.<sup>23</sup> Yesus aqa angro bei agi Yesus na tulan qalaqalaiyoqnej qaji a Yesus aqa areq di awe-soqnej.<sup>24</sup> Deqa Saimon Pita a ban na angro di minjej, “Ni na Yesus nenemyimqa a angro yai qa degsi marqo di mermqas.”<sup>25</sup> Onaqa angro dena Yesus beteryosiq nenemyej, “O Tamo Koba, ni angro yai qa degsi maronum?”<sup>26</sup> Onaqa Yesus na minjej, “Angro e endego bem osiy quiq di tuqtosiy anaiyqai qaji a na e osim jeu tamo nanjo banq di atqas.” Degsi minjsiq bem quiq di tuqtosiq Saimon Iskariot aqa njiri Judas anaiyej.

<sup>27</sup> Anaiyonaq Satan a Judas aqa are miligiq ainaqa Yesus na minjej, “Ni kumbra yqam qaji di endego yoqujat.”<sup>28</sup> Yesus a Judas degsi minjnaqa aqa angro kalil awesoqneb qaji nanji qusibqa Yesus na Judas kiyaqa anjam di minjej nanji deqa poinjrosai.<sup>29</sup> Judas a nanjo silali jugwajqa qun taqatoqnej deqa nanji qudei are qaleb, Judas a gilsim yori bati aqa inji inji awaiyqajqa deqa kiyo Yesus na degsi minjej. Nanji qudei are qaleb, Judas a gilsim inji awaiyosim tamo sougetejunub qaji nanji anainjrqas.<sup>30</sup> Onaqa Judas a bem di uysiq warum uratosiq oqedej. Di qolo.

*Yesus na aqa angro nanji dal anjam bunuj enjrej*

<sup>31</sup> Judas a oqedonaqa Yesus a endegsi marej, “Bini e Tamo Angro ñam koba oqai. E ñam koba otqa Qotei a dego ñam koba oqas.<sup>32</sup> Qotei a ñam koba osimqa a na e dego ñam koba ebqas. A urur ñam koba ebqas.<sup>33</sup> O ijo angro ningi quiy. E ningi koba na sokiñalayosiy uratngitqa ningi e qa ñamoqnqab. Qure e oqwai di ningi oqwa keresai. E nami Juda tamo kokba nanji degsi minjroqnem agi bini ningi dego olo merngonum.<sup>34</sup> Endego e dal anjam bunuj engwai. Dal anjam bunuj agiende. Ningi segi segi qa qalaqalaiyo kumbra yoqniy. E ningi qalaqalaingeqnum dego kere ningi kamba dego segi segi qa qalaqalaiyo kumbra yoqniy.<sup>35</sup> Ningi segi segi qa qalaqalaiyo kumbra yoqniyqa tamo kalil nanji nunjo kumbra di unoqnsib dena qalieoqnqab, ningi ijo angro bole.”

*Yesus na Pita minjej, “Ni maroqalubtqam, ‘E Yesus qaliesai’ ”*

<sup>36</sup> Onaqa Saimon Pita na Yesus nenemyej, “O Tamo Koba, ni qabitqam?” Onaqa Yesus na minjej, “Qure e oqwai di ni mati oqwa keresai. Bunuqna ni e daurbosim qure deq oqwam.”<sup>37</sup> Onaqa Pita na olo Yesus nenemyej, “O Tamo Koba, kiyaga e bini ni daurmqa keresai? Ni marimqa e ni qa ijo ñambile uratosiy moiqai.”

<sup>38</sup> Onaqa Yesus na kamba minjej, “Ni e qa ino nambile uratosim moiqam e? E bole mermqai. Tuwe anjamosaisoqn-imqa ni maroqalubtqam, ‘E Yesus qaliesai.’ ”

## 14

### *Iga Qotei aqaq oqwajqa gam agi Yesus a segi qujai*

<sup>1</sup> Osiqa Yesus a olo marej, “Ningi are gulbeingaiq. Ningi Qotei qa nungo areqalo singilateq nub ariya ningi e qa dego nungo areqalo singilatoqniy. <sup>2</sup> Ijo Abu aqa talq di warum gargekoba unub. E oqsiy nungo segi segi warum gereiyetngwai. Ijo anjam di bolesai qamu e ningi merngosai qamu. <sup>3</sup> E nungo segi segi warum gereiyetngsiy olo bosiy ningi joqsiy qure e sqai di ningi dego e ombla sqab. <sup>4</sup> Qure e sqai deq oqwajqa gam di ningi qalie.”

<sup>5</sup> Onaqa Tomas na Yesus minjej, “O Tamo Koba, qure ni oqwam di iga qaliesai. Deqa iga kiyersim qure deq oqwajqa gam qalieqom?” <sup>6</sup> Onaqa Yesus na minjej, “E segi gam. E segi anjam bole qa utru. E segi nambile qa utru dego. Tamo bei a gam bei na ijo Abu aqaq oqwa keresai. Ijo Abu aqaq oqwajqa gam agi e segi qujai. <sup>7</sup> Ningi e qa qalieonub qamu ningi ijo Abu qa dego qalieonub qamu. Agi endego ningi ijo Abu qa qalieqa utru atonub. Osib ningi a unonub.”

<sup>8</sup> Onaqa Filip na Yesus minjej, “O Tamo Koba, ni na ino Abu osorgimqa di iga qa kereqas.” <sup>9</sup> Onaqa Yesus na minjej, “O Filip, e bati olekoba ningi koba na soqnem. Ni e qa qalieosai unum e? Tamo a e nubqo di a ijo Abu dego unqo. Deqa ni kiyaaqa e merbonum, ‘Ni na ino Abu iga osorge?’ <sup>10</sup> E ijo Abu beteryesonam a e dego beterbejunu di ni poimosai kiyo? Anjam e na ningi merngeqnum qaji endi ijo segi areqalo na merngosai. Ijo Abu na e beterbesosiq aqa wau ojeqnu. <sup>11</sup> E ijo Abu beteryesonam a e dego beterbejunu. Ningi ijo anjam di qusib e qa nungo areqalo singilatiy. Saiamqa wau kalil e nungo namdamuq di yeqnum qaji di ningi unsib e qa nungo areqalo singilatiy.

<sup>12</sup> “E bole merngwai. Tamo bei a e qa aqa areqalo singilatqas di wau kalil e yeqnum qaji a dego yoqnqas. Osim ijo wau di bunyosim wau tulan kokba yoqnqas. Di kiyaaqa? E ijo Abu aqaq olo oqwai deqa. <sup>13</sup> E Qotei aqa Niri unum deqa ningi ijo nam na inqi bei qa Qotei pailyqab di e na inqi di engwai. Yim dena ijo Abu a nam koba oqas. <sup>14</sup> Ningi ijo nam na inqi bei qa Qotei pailyqab di e na inqi di engwai.”

### *Yesus a aqa Abu minjim a na aqa Mondor Bole qarinyqas*

<sup>15</sup> Osiqa Yesus a olo marej, “Ningi e qalaqalaibqab di ningi ijo anjam dauryoqnqab. <sup>16</sup> Amqa e ijo Abu minjitqa a na

Aqaryaingo Tamo qarinyim nungoq bosim singilatngwas. Osim a bati gaigai ningi koba na sqas. <sup>17</sup> Aqaryaingo Tamo di a anjam bole qa Mondor. Tamo ungasari mandamq endi unub qaji nanngi Mondor di oqa keresai. Nanngi a unosaieq nub. Nanngi a qa qaliesai dego. Ariya ningi a qa qalie. A ningi koba na unub. Bunuqna a bosim nungo are miligiq di sqas.

<sup>18</sup> “E ningi mandum angro bul uratngwasai. E nungoq olo bqai. <sup>19</sup> Sokiñala tamo ungasari mandamq endi unub qaji nanngi e olo nubqasai. Ariya ningi e nubqab. E nambile unum deqa ningi dego nambile sqab. <sup>20</sup> Sosibqa bati deqa ningi endegsib qalieqab, e na ijo Abu beteryesonam ningi kamba e beterbesonab e ningi beterngejunum. <sup>21</sup> Ningi quiy. Tamo bei na e qalaqalaibqas di a ijo dal anjam dego qusim dauryoqnqas. Yim ijo Abu na kamba tamo di qalaqalaiyqas. E na dego tamo di qalaqalaiyoqnsiy aqaq di brantoqnsiyqa e segi qa babtoqnqai.”

<sup>22</sup> Onaqa Judas bei Judas Iskariot sai a na Yesus endegsi nenemyej, “O Tamo Koba, kiyaga ni tamo ungasari kalil mandamq endi unub qaji nanngoq di brantqa saidosim gago segiq di brantoqnsim ni segi qa babtoqnqam?” <sup>23</sup> Onaqa Yesus na minnej, “Tamo bei na e qalaqalaibqas di a ijo anjam dauryoqnqas. Yim ijo Abu na kamba tamo di qalaqalaiyimqa aqo ijo Abu wo aqaq bosim a ombla gaigai sqom. <sup>24</sup> Tamo bei a e qalaqalaibqasai di a ijo anjam dauryqasai. Anjam e na ningi merngeqnum qaji endi ijo anjam sai. Anjam endi ijo Abu e qarinqej qaji aqa anjam.

<sup>25</sup> “Anjam endi e ningi koba na sosim merngeqnum. <sup>26</sup> Bunuqna Aqaryaingo Tamo a nungoq bosim singilatngwas. A Mondor Bole. Ijo Abu na a qarinyim ijo ñam na bosim anjam kalil ningi merngekritqas. Osim nungo areqalo tigeltetngimqa anjam kalil e ningi merngeqnum qaji deqa olo are qaloqnqab.

<sup>27</sup> “E ningi uratngwa osiy nungo are latetngwai. E segi are lawo unum deqa e nungo are latetngwai. Mandam tamo bei na degsim nungo are latetngwa keresai. Deqa ningi are gulbeingaiq. Osib ulaaib. <sup>28</sup> E ningi endegsim merngonum quonub, ‘E ningi uratngsiy olo nungoq bqai.’ Ningi e qalaqalaibonub qamu ningi ijo anjam deqa areboleboleingwo qamu. Di kiyaga? E ijo Abu aqaq olo oqwai deqa. Ijo Abu agi a na e tulan bunbejunu. <sup>29</sup> E ijo Abu aqaq oqosaisosim anjam endi merngonum. Deqa bunuqna e ijo Abu aqaq oqitqa ningi e qa nungo areqalo torei singilatqab.

<sup>30</sup> “Mandam endeqa gate koba Satan a beqnu. A na e gulbe bei ebqa keresai. Deqa e olo anjam olekoba totoryosiy mernngwasai. <sup>31</sup> Ijo are koba endegsi unu. Mandam qaji tamo ungasari nanngi qalieqab, e ijo Abu qalaqalaiyeqnum deqa

anjam a na merbeqnu qaji di e dauryeqnum. Ariya ningi tigelab iga gilqom.”

## 15

### *Yesus a wain namtan bole*

<sup>1</sup> Osiqa Yesus a olo marej, “E segi wain namtan bole. Ijo Abu a wain wau qa lanja. <sup>2</sup> Ijo dani qudei nanngi gei bole atqasai di ijo Abu na nanngi gingenjrsim taqal breinjrqas. Ijo dani nanngi gei bole atelenqab di ijo Abu na gereinjrimqa nanngi olo gei koba atelenqab. <sup>3</sup> Anjam kalil e nami merngoqnem qaji dena ningi gereinjegej koboej. <sup>4</sup> Ningi e beterbesoqniy. Yimqa e dego ningi beterngesqai. Nam dani a segi sqas di a geitqa keresai. Qoboq di beteresqas di a geitqas. Dego kere ningi e beterbesqasai di ningi gei bole atqa keresai.

<sup>5</sup> “E segi wain namtan bole. Ningi ijo dani bul. Tamo bei a e beterbesqas di e dego a beteryesqai. Yimqa a gei koba atelenqas. Ningi e uratbqab di ningi wau bei yqa keresai. <sup>6</sup> Tamo bei a e beterbesqasai di a nam dani uge bul gingenyosib taqal breiyib kangranamqa koroiyosib namyuwoq di breiyib yugwas.

<sup>7</sup> “Ningi e beterbesosib ijo anjam nungoq di soqnimqa ningi ingi bei qa Qotei pailyqab di a na ingi di engwas. <sup>8</sup> Ningi gei koba atelenosib ijo angro bole soqniy. Yimqa ijo Abu aqa nam tulan kobaqas. <sup>9</sup> Ijo Abu na e qalaqalaibeqnu dego kere e na ningi qalaqalaingeqnum. Deqa ningi gaigai ijo qalaqalaiyo kumbraq di soqniy. <sup>10</sup> Ningi ijo dal anjam kalil dauryoqnqab di ningi ijo qalaqalaiyo kumbraq di sqab. E ijo Abu aqa dal anjam dauryoqnsimqa aqa qalaqalaiyo kumbraq di unum dego kere. <sup>11</sup> E segi areboleboleibeqnu deqa ningi dego areboleboleingeqnum. Ijo arebolebole di nungoq di tulan kobaoqnm. Utru deqa e na anjam endi ningi merngonum. <sup>12</sup> Ijo dal anjam agiende. E na ningi qalaqalaingeqnum dego kere ningi segi segi qa qalaqalaiyo kumbra yoqniy. <sup>13</sup> Qalaqalaiyo kumbra tulan bolequja bei agiende. Tamo bei na aqa was nanngi aqaryainjrqa osimqa aqa segi nambile uratosim moiqa. Qalaqalaiyo kumbra dena qalaqalaiyo kumbra kalil tulan bunjrejunu. <sup>14</sup> Ningi ijo anjam kalil e na merngeqnum qaji endi dauryqab di ningi ijo segi was bole sqab. <sup>15</sup> Anjam kalil ijo Abu na e merbeqnaq queqnum qaji di e ubtosim ningi merngeqnum. Deqa e ningi ‘was’ merngeqnum. E ningi ‘kanjal tamo’ merngosaieqnum. Kanjal tamo a aqa tamo koba aqa wau qaliesai.

<sup>16</sup> “Ningi na e giltbosai. E na ningi giltngem. Osim ningi wau engem. Ningi gilsib gei koba atelenoqnbqa nungo gei gaigai sqajqa deqa e na ningi wau engem. Deqa ningi ijo nam na ingi

bei qa ijo Abu pailyqab di a na inġi di enġwas. <sup>17</sup> E na ninġi dal anjam endegsi mernġwai. Ninġi segi segi qa qalaqalaiyo kumbra yoqniy.”

*Mandam qaji tamo unġasari nanġi na  
Yesus aqa anġro nanġi jeutnjreqnub*

<sup>18</sup> Osiqua Yesus a olo marej, “Mandam qaji tamo unġasari nanġi na ninġi jeutnġeqnub. Deqa ninġi endegsi poingem, nanġi namoqna e dego jeutboqneb. <sup>19</sup> Ninġi mandam qaji tamo unub qamu mandam qaji tamo unġasari nanġi na ninġi qalaqalainġeqnub qamu. Agi nanġi na nanġo segi was nanġi qalaqalainjreqnub dego kere. Ariya ninġi mandam qaji tamo sai. E na ninġi giltġgem deqa ninġi mandam qaji kumbra urateb. Utru deqa mandam qaji tamo unġasari nanġi na ninġi jeutnġeqnub. <sup>20</sup> E nami mernġonum, kanġal tamo na aqa tamo koba bunjyqa keresai. Ninġi anjam deqa are qaliy. Jeu tamo nanġi na e ugeugeiboqneb dego kere nanġi na ninġi ugeugeinġoqnqab. Nanġi ijo anjam dauryoqneb qamu nanġi nunġo anjam dego dauryeqnub qamu. <sup>21</sup> Ariya nanġi ijo Abu e qarinjbej qaji a qa qaliesai. Deqa nanġi ninġi ugeugeinġoqnqab. Di kiyafa? Ninġi ijo ñam ejunub deqa.

<sup>22</sup> “E bosim nanġi anjam minjrosai qamu nanġi une saiqoji unub qamu. Ariya e nanġi anjam minjrem deqa nanġi nanġo une ulitqa gam saiqoji. <sup>23</sup> Tamo bei na e jeutbqas di a na ijo Abu dego jeutqas. <sup>24</sup> E mañwa qudei tamo bei na nami yosaiqnej qaji di nanġo ambleq di babtosa qamu nanġi une saiqoji unub qamu. Ariya e nanġo ambleq di mañwa qudei babteqnamqa nanġi unoqnsib aqo ijo Abu wo jeutgeqneb. <sup>25</sup> Nanġo kumbra dena dal anjam bei nengrenq di unu qaji di aqa damu brantej. Anjam agiende, ‘Tamo nanġi e lanja jeutbeqneb.’

<sup>26</sup> “Aqaryainġo Tamo a ijo Abu ombla unub. E na a qarinyit nunġoq bqas. A anjam bole qa Mondor. A ijo Abu aqaq dena bqas. Bosim ijo kumbra ti ijo wau ti ubtosim marqas. <sup>27</sup> Ninġi dego ijo kumbra ti ijo wau ti ubtosib marqab. Di kiyafa? Nami e ijo wau utru atem bati deqa ninġi e ombla sosib ijo wau unoqneb dena bosib agi bini ninġi e ombla unum.

## 16

<sup>1</sup> “Ninġi ijo ñam uratosib ulonjaib deqa e na anjam endi mernġeqnum. <sup>2</sup> Bunuqna jeu tamo nanġi na ninġi taqal breinġosib ninġi olo Qotei tal miligiq gilqa saidnġwab. Osib bati bei bamqa nanġi na ninġi moiyoġnġoqnqab. Osib endegsib are qaloqnqab, ‘Iga Qotei aqa wau ojeqnum deqa iga na nanġi moiyoġnjreqnum.’ <sup>3</sup> O ijo anġro, jeu tamo nanġi aqo ijo Abu wo



qa qaliesai deqa nanği ninği degnğwab. <sup>4</sup>Nanği ninği degnğibqa ninği ijo anjam e bini merñgeqnum qaji endeqa olo are qaliy.”

*Yesus a Mondor Bole qa anjam marej*

Osiqa Yesus a olo marej, “Nami e ninği koba na soqnem bati deqa e na anjam endi ninği merñgosaiognem. <sup>5</sup>Sokiñala e ninği uratñgsiy ijo Abu e qarınbej qaji aqaq olo oqwai deqa bini e anjam endi ninği merñgeqnum. Ariya ninği kamba e nenembosaieqñub, ‘Ni qabitqam?’ degbosai. <sup>6</sup>E ninği anjam endi merñgeqnum deqa ninği are gulbeinğeqnu. <sup>7</sup>E bole merñğwai. E ninği uratñgsiy oqwai. E oqwasai di Aqaryaingo Tamo agi Mondor Bole a nuñgoq bğasai. Utru deqa e ninği uratñgsiy oqwai. E oqsiy Mondor qarınıytqa a nuñgoq bğas. <sup>8</sup>Bosimqa mandam qaji tamo uñğasari nanğo une babetnğroqñim nanği poinğroqñas. Kumbra bole qa utru dego a na osornğroqñim nanği qalieoqñqab. Qotei a tamo uñğasari nanği peginğrğas kumbra di dego nanği qalieqajıqa deqa Mondor na nanği osornğroqñas. <sup>9</sup>A na mandam qaji tamo uñğasari nanğo une babetnğroqñas. Di kiyaaqa? Nanği e qa nanğo areqalo sinğilatosaieqñub deqa. <sup>10</sup>Kumbra bole qa utru dego a na nanği osornğroqñas. Di kiyaaqa? E ijo Abu aqaq oqıtqa ninği e olo nubqasai. <sup>11</sup>Qotei a tamo uñğasari nanği peginğrğas kumbra di dego Mondor na nanği osornğroqñas. Di kiyaaqa? Qotei na mandam endeqa gate koba Satan pegiyosim ñamyuwoq waiyqas.

<sup>12</sup>“E anjam gargekoba ninği merñğwajıqa ijo areqaloq di unu. Bini e merñğwasai. Di kiyaaqa? Nuñgo areqalo na ojqa keresai deqa. <sup>13</sup>Ariya anjam bole qa Mondor a bosimqa nuñgo areqalo gereiyetñğimqa ninği anjam bole kalil poinğekritqas. Aqa segi areqalo na anjam merñğwasai. A anjam quoqñsim di segi ninği merñgoqñqas. Osim kumbra mondoñ brantelenğas qaji di dego ubtoqñsim merñgoqñqas. <sup>14</sup>A ijo anjam osim ninği merñgoqñqas. Kumbra dena a na ijo ñam koba ti ijo sinğila koba ti boleq atqas. <sup>15</sup>Ijo Abu aqa inği inği kalil di ijo inği inği dego. Deqa e ninği merñgonum, Qotei aqa Mondor na ijo anjam osim ninği merñgoqñqas.”

*Yesus aqa anğro nanği are gulbeinğrimqa olo bunuqna nanği areboleinğrğas*

<sup>16</sup>Osiqa Yesus a olo marej, “Sokiñala ninği e nubqasai. Olo sokiñala ninği e nubqab.” <sup>17</sup>Onaqa Yesus aqa anğro nanği segi segi maroqñeb, “Yesus a marqo, ‘Sokiñala ninği e nubqasai. Olo sokiñala ninği e nubqab.’ A dego marqo, ‘E ijo Abu aqaq olo oqwai.’ A kiyaaqa degsi marqo?” <sup>18</sup>Nanği degsib maroqñsib olo maroqñeb, “Yesus a kiyaaqa marqo, ‘Sokiñala’? Anjam di aqa utru iga poigosai.”

19 Nanġi Yesus aqa anjam deqa nenemyqa laq nab di qalieosiqa endegsi minjrej, “E niġi mernġonum, ‘Sokiñala niġi e nubqasai. Olo sokiñala niġi e nubqab.’ Ijo anjam di aqa utru niġi poingosai deqa niġi segi segi qaireq nub. 20 O ijo anġro, e bole mernġwai. Niġi akam ti sosib are tulaġ gulbeinġwas. Amqa mandam qaji tamo unġasari nanġi areboleboleinjrqas. Ariya nunġo are gulbe di olo koboamqa niġi tulaġ areboleboleinġwas. 21 Unġa a anġro oqajqa batieq-naqa aqa jejamu tulaġ jaqatinġyeqnaqa a are gulbekobaiyeqnu. Ariya a anġro osim aqa jaqatinġ koboamqa a aqa jaqatinġ deqa olo are qalqasai. A anġro osim deqa tulaġ areboleboleiyqas. 22 Dego kere bini niġi are gulbeinġwo. Ariya bunuqna e niġi olo niġitqa niġi are gulbe di uratosib tulaġ areboleboleinġwas. Nunġo arebolebole di tamo bei na olo yainġwa keresai. 23 Bati deqa niġi olo e anjam bei nenembqasai. E bole mernġwai. Niġi ijo ñam na inġi bei qa Abu pailyqab di a na inġi di enġwas. 24 Niġi nami ijo ñam na Qotei pailyosaio-qneb. Ariya bini niġi inġi bei oqajqa are soqnimqa niġi ijo ñam na Qotei pailyoqniy. Osib deqa niġi inġi di osib tulaġ areboleboleinġwas.”

*Yesus a mandam endeqa sinġila kalil gotranġyosiq tigelejunu*

25 Osiqa Yesus a olo marej, “E niġi yawo anjam mernġoqnam. Bunuqna e olo yawo anjam bei niġi mernġwasai. Anjam aqa damu geregere plaltosiy ijo Abu qa mernġoqnaqi. 26 Bati deqa e segi niġi qa Abu pailyqasai. Niġi ijo ñam na Abu pailyoqnaqab. 27 Ijo Abu a segi na niġi qalaqalaingeqnu. Di kiyaaqa? Niġi e qalaqalaiboqnsib e Qotei aqaq na bem degsi poingeqnu deqa. 28 Nami e ijo Abu aqaq na bosim mandamq aiyem. Sokiñala e olo mandam uratosiy aqaq olo oqwai.”

29 Onaqa Yesus aqa anġro nanġi aqa anjam di qusib minjeb, “Od, endego ni boleq di anjam ubtosim mergonum. Ni yawo anjam mergosai. 30 Deqa bini iga poigwo, ni kumbra kalil qa qalieonum. Deqa iga ni anjam bei nenemmqasai. Ni namoqna gago nenem qalieonum. Utru deqa iga ni qa gago areqalo sinġilatosim maronum, bole, ni Qotei aqaq na bem.”

31 Onaqa Yesus na kamba minjrej, “Niġi e qa nunġo areqalo sinġilatonub e? Di keretonub. 32 Niġi quiy. Bati bei bqas agi bqo. Sokiñala jeu tamo nanġi na niġi teteinġibqa niġi kalil segisegiosib nunġo qureq jaraiqab. Jaraiyibqa e segi sqai. Bole, e segi sqasai. Ijo Abu a e ombla sqom. 33 E anjam endi niġi mernġeqnum. Di kiyaaqa? Niġi na e beterbosib are lawo sqajqa deqa. Bole, niġi mandamq endi gulbe koba oqnaqab. Di unġum. E segi na mandam endeqa sinġila kalil gotranġyosim tigelejunum. Deqa niġi are sinġilatosib soqniy.”

## 17

*Yesus a aqa angro nanği qa pailyej*

<sup>1</sup> Yesus a anjam degsi marsiq koboonaqa laj goge tarosiqa Qotei endegsi pailyej, “O Abu, bati brantqo. E ino segi Angro qujai unum deqa ni ijo ñam kobaqujatimqa e kamba dego ino ñam kobaqujatqai. <sup>2</sup> Ni e singila ebem. Singila dena e na tamo unğasari kalil nanği taqatnjroqnqai. Osiy tamo kalil ni na ebem qaji nanği ñambile enjritqa nanği ñambile gaigai sqab. <sup>3</sup> Ñambile gaigai sqajqa kumbra agiende. Tamo e na ñambile enjreqlum qaji nanği ni qa bole qalieeqnub. Agi ni segi Qotei bole. Nanği e Yesus Kristus qa dego bole qalieeqnub. Agi ni na e qarınbonam mandamq aiyem. Ñambile gaigai sqajqa kumbra agide.

<sup>4-5</sup> “O Abu, e mandamq endi ino ñam koba ti ino singila koba ti babtoqnem. Osim wau kalil ni na ebem qaji di yekritem. Nami mandam a brantosaisonaqa e ni ombla ñam koba ti soqnem. Ñam di ni na olo ebimqa aqo ombla ñam koba ti sqom.

<sup>6</sup> “Tamo kalil ni na ebem qaji nanği di e na ino ñam osornjroqnem. Deqa nanği ino anjam dauryoqneb. Nanği ino segi tamo soqneb deqa ni na nanği mandamq endena elenjosim e ebem. <sup>7</sup> Bini nanği qalieonub, inği inği kalil ni na e ebem qaji di inoq dena branteb. <sup>8</sup> Nanği degsib qalieonub. Di kiyayaqa? Anjam kalil ni na e merbem qaji di e kamba nanği minjrnem nanği queb. Qusib ni na e qarınbonam bem anjam di nanço areqaloq di singilateb. Osib endegsi poinjrej, e inoq dena bem.

<sup>9</sup> “E nanği qa ni pailmonum. E mandam qaji tamo unğasari nanği qa ni pailmosai. Tamo ni na ebem qaji nanği qa segi e ni pailmonum. Di kiyayaqa? Nanği ino tamo unub deqa. <sup>10</sup> Ijo tamo kalil nanği di ino dego. Ino tamo kalil nanği di ijo dego. Nançoq dena e ñam kobaquja eqnum.

<sup>11</sup> “E inoq olo bqai. Deqa e mandamq endi olo sqasai. Ariya tamo ni na ebem qaji nanği mandamq endi sqab. O Abu, ino kumbra kalil tulan boledamu. Ni segi qujai une saiqoji. Ino ñam koba ni na ebem qaji ñam dena ni na ijo tamo nanği taqatnjroqnime. Amqa aqo aiyel are qujaitosim unum dego kere nanği kamba are qujaitosib sqab. <sup>12</sup> E nanği koba na sosimqa ino ñam kobaquja ni na ebem qaji ñam dena nanği taqatnjroqnem. Deqa ijo angro bei padalosai. Angro qujai agi ni nami padalqajqa giltem qaji a segi padalqas. A padalamqa ino anjam nenğrenq di unu qaji di aqa damu brantqas. <sup>13</sup> E olo inoq bqai. Ijo segi arebolebole tulan kobaosim tamo ni na ebem qaji nançoq di gaigai sqajqa deqa e mandamq endi sosimqa anjam endi mareqlum.

14 “E na nanġi ino anjam minjroqnem. Utru deqa mandam qaji tamo unġasari nanġi na nanġi jeutnjreqnub. Nanġi mandam qaji tamo sai. Aġi e dego mandam qaji tamo sai. 15 Ni na nanġi joqsim nanġi mandam uratosib lan qureq oqwjajqa deqa e ni pailmosai. Nanġi mandamq endi soqneb ni na nanġi taqatnjroqnim tamo uge Satan na nanġi ugeugeinjraim deqa e ni pailmonum. 16 Nanġi mandam qaji tamo sai. Aġi e dego mandam qaji tamo sai. 17 Ino anjam kalil bole. Ni ino anjam bole di nanġi minjroqne. Yimqa anjam di nanġo are miligiq di wauoqnmqqa nanġi ino segi tamo tiñtiñ sqab. 18 Nami ni na e qarinjbonam mandamq aisim tamo unġasari nanġo ambleq di soqnem. Deqa e kamba tamo ni na ebem qaji nanġi qarinjritqa mandam qaji tamo unġasari nanġo ambleq di sqab. 19 E nanġi qa are qalsiy ijo segi jejamu ni emekritqai. Ijo kumbra dena nanġi ino segi tamo tiñtiñ sosib ino anjam bole dauryoqnaqab.

20 “E ijo anġro 11 nanġi qa segi ni pailmosai. Bunuqna nanġi ijo anjam mare mare laqnebqa tamo unġasari gargekoba nanġi nanġo anjam quoqnsib e qa nanġo areqalo singilatoqnaqab. E nanġi qa dego ni pailmonum. 21 O Abu, ni ijoq di unum. E dego inoq di unum. Aqo aiyel are qujaitosim unum. Ijo segi tamo unġasari kalil nanġi dego aqo aiyel koba na are qujaitosim sqajqa deqa e ni pailmonum. Yimqa mandam qaji tamo unġasari nanġi qalieqab, ni na e qarinjbonam bem. 22 Aqo aiyel are qujaitosim unum. Ñam koba ni na ebem qaji di e kamba olo ijo segi tamo unġasari nanġi enjrem. Di kiyaja? Nanġi dego aqo aiyel koba na are qujaitosim sqajqa deqa. 23 E ijo segi tamo unġasari nanġoq di unum. Ni ijoq di unum. Kumbra dena nanġi kalil dego aqo aiyel koba na are qujaitosim sqom. Soqnmqqa mandam qaji tamo unġasari nanġi na nanġi unjrsibqa qalieqab, ni na e qarinjbonam bem. Osib qalieqab, ni e qalaqalaibeqnum dego kere ni ijo segi tamo unġasari nanġi qalaqalainjreqnum.

24 “O Abu, tamo unġasari ni na ebem qaji qure e sqai di nanġi dego e ombla qure dia sqom. E deqa ni pailmonum. Nanġi e ombla sosibqa ñam koba ni na ebem qaji di unqajqa deqa ti e ni pailmonum. Nami ni mandam atosaisosimqqa ñam koba di e ebem. Di kiyaja? Ni na e qalaqalaiboqnem deqa. 25 O Abu, ino kumbra kalil tulañ bole tiñtiñ. Mandam qaji tamo unġasari nanġi ni qa qaliesai. Ariya e ni qa qalie bole. Ijo segi tamo unġasari nanġi dego ni qa qalie bole. Deqa nanġi qalieonub, ni na e qarinjbonam bem. 26 E ino ñam nanġi osornjroqnem. Nanġi olo osornjrqai. Yimqa ni na e qalaqalaibeqnum dego kere nanġi ino qalaqalaiyo kumbraq di sqab. Amqa e segi nanġi koba na sqom.”

## 18

### *Judas a Yesus osiq jeu tamo nanjo banq di atej*

<sup>1</sup> Yesus a degsi Qotei pailyosiq koboonaqa a na aqa angro nanji joqsiqa koba na walwelosib Kidron ya dosib taqal beiq aisib nañu agu beiq di soqneb. <sup>2</sup> Bati gaigai Yesus aqa angro nanji koba na nañu agu dia korooqneb. Deqa Yesus aqa angro Judas agi Yesus osim jeu tamo nanjo banq di atqas qaji a nañu agu di qaliesoqnej. <sup>3</sup> Deqa a na qaja tamo gargekoba nanji wanjal ti lam ti sebru ti eleñonab joqsiqa nañu agu deq gileb. Atra tamo kokba ti Farisi ti nanji na nanji qarinjrnab Yesus ojqa gileb. Rom nanjo qaja tamo qudei dego nanji koba na gileb. <sup>4</sup> Gulbe kalil Yesus aqaq di brantqas qaji di a nami qaliesoqnej. Deqa qaja tamo nanji aqaq bonabqa a nanjo areq aisiqa nenemnjrej, “Ninji yai qa bonub?”

<sup>5</sup> Onaqa nanji na kamba minjeb, “Iga Yesus Nasaret qaji a qa bonum.” Onaqa Yesus na minjrej, “E agiende.” Judas agi Yesus osiq qaja tamo nanjo banq di atej qaji a nanji koba na tigelesoqneb. <sup>6</sup> Onaqa nanji Yesus aqa anjam di qusibqa qore na ululoñosib ñereñeb.

<sup>7</sup> Onaqa Yesus na olo nenemnjrej, “Ninji yai qa bonub?” Onaqa nanji na minjeb, “Iga Yesus Nasaret qaji a qa bonum.”

<sup>8</sup> Onaqa Yesus na minjrej, “E nami merngonum, e agiende. Ninji e qa bonub di e segi ojiy. Ijo angro nanji uratnjrib gileb.”

<sup>9</sup> Yesus a nanji degsi minjrej deqa aqa anjam bei nami marej qaji di aqa damu brantej. Agi a nami endegsi marej, “O Abu, tamo nanji ni na ebem qaji bei e uratit padalqasai.”

<sup>10</sup> Onaqa jeu tamo nanji Yesus ojeqnab Saimon Pita na aqa sebru osiq atra tamo gate aqa kanjal tamo bei gateq di qalqajqa waiyej grotosiq dabkala segi gentetej. Kanjal tamo di aqa ñam Malkus. <sup>11</sup> Onaqa Yesus na Pita minjrej, “Ino sebru olo ate. E jaqatin koba oqai. Jaqatin di ya uge uyo bul. Di uyqai. Ijo Abu na merbej, ‘Ni jaqatin di oqam.’”

### *Qaja tamo nanji Yesus ojsib Anas aqa talq osib aiyeb*

<sup>12</sup> Onaqa qaja tamo nanji ti nanjo gate koba a ombla na Yesus ojsib aqa ban tonteteb. <sup>13</sup> Osib Kaiafas aqa sou Anas aqa talq osib aiyeb. Kaiafas a wausau deqa Juda nanjo atra tamo gate soqnej. <sup>14</sup> Agi a nami Juda tamo kokba nanji minjrej, “Tamo qujai a tamo ungasari kalil nanji qa moiqas di kere.”

### *Pita a marej, “E Yesus aqa angro sai”*

<sup>15</sup> Qaja tamo nanji Yesus osi aieyqnabqa Saimon Pita a qoreq na Yesus dauryosiq aiyej. Yesus aqa angro bei dego a dauryosiq aiyej. Angro di atra tamo gate a qalie. Deqa a Yesus dauryosiq torei jen miligiq gilsiq atra tamo gate aqa talq di brantej. <sup>16</sup> Ariya Pita a siranme qala oqeq di

tigelesoqnej. Onaqa Yesus aqa angro agi atra tamo gate a qaliesoqnej qaji a na siranme taqato uña minjnaqa odyonaqa Pita osiq ombla na jeñ miligiq gilsib tal qalaq di tigelesoqneb. <sup>17</sup> Onaqa siranme taqato uña a na Pita nenemyej, “Ni Yesus aqa angro kiyo?” Onaqa Pita na kamba minjej, “Eo. E aqa angro sai.” <sup>18</sup> Kanjal tamo nançi ti tal taqato tamo nançi ti yornjrnaqa ñam tunguyosib ñamyuwo areq di tigelesosib ñam yoroqneb. Onaqa Pita a dego bosiq nançi koba na tigelesosib ñam yoroqneb.

*Atra tamo gate a anjam gargekoba Yesus nenemyoqnej*

<sup>19</sup> Bati deqa atra tamo gate a anjam gargekoba Yesus nenemyoqnej. Yesus aqa angro nançi qa ti aqa anjam a na tamo ungasari nançi minjroqnej qaji deqa ti nenemyoqnej. <sup>20</sup> Onaqa Yesus na kamba minjej, “E boleq di tamo ungasari nançi anjam minjroqnem. E bati gaigai Qotei tal miligiq di, atra tal miligiq di, Juda nanço koro sawaq di anjam palontqnsim minjroqnem. E uliosim anjam minjrosaiqnem. <sup>21</sup> Deqa ni kiyaa e nenemkobai beqnum? Tamo ungasari ijo anjam quoqneb qaji nançi segi nenemnjrimqa nançi na mermqab. E anjam minjroqnem qaji di nançi qalie.”

<sup>22</sup> Yesus a atra tamo gate degsi minjnaqa qaja tamo bei Yesus aqa areq di tigelesoqnej qaji a ban lubtosiqa Yesus aqa ulatamuq di qaleb. Osiqa minjej, “Ni kiyaa atra tamo gate aqa medabu ojonum?” <sup>23</sup> Onaqa Yesus na kamba minjej, “E anjam maronum endi gisanamqa ubtosim merbe. Ariya ijo anjam boleamqa ni kiyaa e lubonum?”

<sup>24</sup> Onaqa Anas na aqa qaja tamo nançi minjrnaqa Yesus osib atra tamo gate Kaiafas aqaq gileb. Yesus aqa ban tonto qorbi sonaq osi gileb.

*Pita a olo marej, “E Yesus aqa angro sai”*

<sup>25</sup> Saimon Pita a ñamyuwo areq di tigelesosiq ñam yoreqnaqa tamo qudei na minjeb, “Ni dego Yesus aqa angro bei kiyo?” Onaqa Pita a saidosiq minjrej, “Eo. E aqa angro sai.”

<sup>26</sup> Onaqa atra tamo gate aqa kanjal tamo bei na Pita minjej, “E ni kiyo Yesus ombla nañu aguq di sonam numonum?” Tamo di agi Pita na tamo dabkala gentetej qaji aqa was. <sup>27</sup> Onaqa Pita a olo saidosiq minjej, “Di e sai.” Pita a degsi gisanjoqalubtonaqa tuwe anjamej.

*Juda tamo kokba nançi na Yesus osib Pailat aqa talq gileb*

<sup>28</sup> Onaqa nobqolo malu qameqnaq Juda tamo kokba nançi na Kaiafas aqa talq dena Yesus osib Rom nanço mandor Pailat aqa tal kobaqujaq gileb. Nançi tal miligiq gilosai. Nançi endegsib are qaleb, “Pailat a Juda tamo sai. A sawa bei qaji tamo. Deqa iga aqa tal miligiq gilqa getento. Gago dal anjam

degsi unu. Iga aqa tal miligiq gilqom di iga une ti sqom. Deqa gago yori bati koba brantimqa iga inji uyqa keresaiigwas.” Nanji degsib are qalsib deqa nanji Pailat aqa tal miligiq gilosai. <sup>29</sup> Nanji oqeq di tigelesonabqa Pailat a segi oqedosiq nanqoq di brantej. Brantosiqa nenemnjrej, “Tamo endi aqa une kiye qa ninji a osib ijoq bonub?” <sup>30</sup> Onaqa nanji na Pailat minjeb, “Tamo endi a kumbra uge yosai qamu iga inoq osi bosai qamu.”

<sup>31</sup> Onaqa Pailat na olo minjrej, “Ninji a olo osi aisib nunqo segi dal anjam na aqa une qa pegiyiy.” Onaqa nanji na kamba Pailat minjeb, “Iga Juda tamo. Deqa iga na tamo moiyoqqa keresai.” <sup>32</sup> Nanji Pailat degsib minjeb deqa anjam bei Yesus a nami marej qaji di aqa damu brantej. Agi Yesus a gam kiye na moiqaq di a segi nami ubtej.

<sup>33</sup> Onaqa Pailat a olo puluosiq aqa tal miligiq gilsiq aqa qaja tamo nanji minjrnaqa nanji na Yesus osib aqa areq beb. Bonabqa Pailat na nenemyej, “Ni Juda nanqo Mandor Koba e?” <sup>34</sup> Onaqa Yesus na kamba minjej, “Ni ino segi areqalo na anjam di merbonum kiyo tamo qudei na e qa saimonub qusim anjam di merbonum kiyo? Ni e merbe.” <sup>35</sup> Onaqa Pailat na olo minjej, “E Juda tamo e? Sai. Ni que. Ino segi lej agi Juda nanji ti atra tamo kokba ti nanji na ni osib ijoq bonub. Deqa ni merbe. Ni une kiye yonum deqa ni osi bonub?”

<sup>36</sup> Onaqa Yesus na minjej, “E mandam qaji mandor sosai. Degsi so qamu Juda nanji na e ojeqnaq ijo wau tamo nanji njirinosisib qoto itnjreb qamu.” <sup>37</sup> Onaqa Pailat na olo Yesus nenemyej, “Ni bole mandor e?” Onaqa Yesus na minjej, “Od, ni kere merbonum. E mandor. E anjam bole ubtqajqa deqa mandamq aisim nambabem. Tamo kalil anjam bole dauryeqnub qaji nanji ijo anjam queqnaq.” <sup>38</sup> Onaqa Pailat na nenemyej, “Anjam bole di kiye?”

*Juda nanji na Pailat minjeb, “Ni Yesus namburbasq di qame!”*

Pailat a degsi marsiq olo oqedosiq Juda tamo kokba nanqoq gilsiq minjrej, “E tamo endi aqa jejamuq di une bei unosai. <sup>39</sup> Deqa e nunqo kumbra bei dauryqai. Wausau gaigai nunqo yori bati koba branteqnaqa e na tamo qujai tonto talq dena uratoqnsim engeqnum. Deqa ninji na merbiy. Wausau endeqa e tamo yai uratosiy engwai? E Juda nanqo mandor endi uratosiy engwai e?” <sup>40</sup> Onaqa Juda tamo kokba nanji olo tulan saidosib minjeb, “Ni a uratim oqedaiq. Tonto tamo Barabas a uratim oqedem.” Nanji Pailat degsib minjeb. Barabas a lej ojo tamo.

## 19

<sup>1</sup> Onaqa Pailat a Yesus osiqa aqa qaja tamo nanjo banq di atsiqa minjrej, “Ningi Yesus bu toqon na kumbainjyiy.” Degsi minjrnaqa nanji na Yesus osib bu toqon na kumbainyeb. <sup>2</sup> Kumbainyosib koboonaqa nanji na sil luwit osib lulumosib dena mandor kokba nanjo gate tatal bul gereiyosib aqa gateq di atetosib singila na teqiyeb. Osib gara jugo olekoba lent mandor kokba nanji gaigai jigeq nub deqaji bei osib Yesus jigeteb. A segi qa Mandor Koba maroqnej deqa nanji na kumbra degyeb. <sup>3</sup> Osib nanji Yesus aqa areq bosib a misilinjoqnsib gisan na binjoqnsib minjoqneb, “O Juda nanjo Mandor Koba, kaiye.” Nanji degsib Yesus misilinjoqnsib ban lubtosib aqa ulatamuq di qaloqneb.

<sup>4</sup> Onaqa Pailat a olo aqa talq dena oqedosiqa Juda tamo kokba nanji minjrej, “Ningi uniy. E Yesus aqa jejamuq di une bei yala unosai bole sai. Ningi di qalieqajqa deqa e Yesus olo nungoq osi bonum.” <sup>5</sup> Degsi minjrnaqa Yesus a oqedej. Gate tatal sil luwit na gereiyosib aqa gateq di ateteb qaji de ti gara lent a jigeteb qaji de ti qorbi oqedej. Onaqa Pailat na minjrej, “Ningi tamo endi uniy.”

<sup>6</sup> Degsi minjrnaqa atra tamo kokba ti nanjo qaja tamo nanji ti Yesus unsibqa nanji murqumyoqnsib Pailat wainjoqnsib minjoqneb, “Ni a namburbasq di qame! Ni a namburbasq di qame!” Onaqa Pailat na minjrej, “Ningi segi na Yesus osib namburbasq di qamiy. E aqa jejamuq di une bei unosai.” <sup>7</sup> Onaqa Juda tamo kokba nanji na olo Pailat minjeb, “Yesus a segi qa marqo, ‘E Qotei aqa Niri.’ Aqa une deqa a moiym. Gago dal anjam degsi unu.”

<sup>8</sup> Onaqa Pailat a nanjo anjam di qusiqa a tulan ulaugetej. <sup>9</sup> Osiqa a olo Yesus osiq tal miligiq gilsiq nenemyej, “Ni sawa qabe qaji? Ni e merbe.” Onaqa Yesus a mequmesoqnej. A na kamba anjam bei Pailat minjosai. <sup>10</sup> Deqa Pailat na olo minjej, “Ni anjam bei merbqasai e? Ni que. E tamo kobaquja. Deqa e ni uratmit ni gilqam. E ni uratmqasai di ni namburbasq di gainjosim moiqam. Ni degsi poimosai e?”

<sup>11</sup> Onaqa Yesus na Pailat minjej, “Qotei lan qureq di unu qaji a na ni singila emosai qamu ni e gulbe bei ebqa keresai qamu. Deqa ino une kiñala. Ariya atra tamo gate agi e ojsiq ino banq di atqo qaji aqa une kobaquja.” <sup>12</sup> Yesus na Pailat degsi minjnaq qusiqa olo oqedosiqa Juda tamo kokba nanji minjrej, “Unqum. E Yesus uratit gilqas.” A nanji degsi minjreqnaqa nanji na olo tulan saidoqnsib murqumyoqnsib minjoqneb, “Ni Yesus uratim gilaiq. Ni a uratqam di ni mandor koba Sisar aqa wau tamo bolesai. Yesus a marqo, ‘E segi mandor koba.’ A degsi marqo deqa a na Sisar jeu atqo.”



<sup>13</sup> Nanġi na Pailat degsib minjeqna b qusiqa a olo Yesus osiq oqedosiqa aqa awo jaram kobaq di awoej. Pailat a gaigai tamo nanġo une qa peginjraqa oqnsiq dia awoqnej. Jaram so qaji sawa di aqa ñam Meniñ Bijal. Hibru anjam na “Gabata” mareqna. <sup>14</sup> Juda nanġo yori bati koba brantqa laqnej deqa yori bati aqa inġi inġi kalil gereiyosib atna b soqnej. Sen bati 12 ona q qanam jigeej. Deqa Pailat na Yesus osiq Juda tamo kokba nanġi minjrej, “Niñġi nuñġo mandor koba uniy.” <sup>15</sup> Onaqa nanġi tulañ leleñoqnsib minjoqne b, “Ni a taqal waiy! Osim ñamburbasq di qame!” Onaqa Pailat na nenemnjrej, “E nuñġo mandor koba osiy ñamburbasq di qamqai e?” Onaqa atra tamo kokba nanġi na kamba minjeb, “Gago mandor bei saiqoji. Gago mandor qujai agi Sisar.” <sup>16</sup> Onaqa Pailat a nanġo areqalo dauryosiqa Yesus osiq nanġo bañq di atsiqa minjrej, “Niñġi na Yesus osib ñamburbasq di qamiy.”

*Yesus a ñamburbasq di gainej*

<sup>17</sup> Pailat a Juda tamo kokba nanġi degsi minjrnaqa qaja tamo nanġi Yesus osib aqa qawarq di aqa segi ñamburbas atetosib a bañ ojsib Jerusalem uratosib osi gilsib sawa agu kiñala bei aqa ñam Tamo Gate Tanu di branteb. Ñam di Hibru anjam na “Golgota” mareqna. <sup>18</sup> Di brantosib Yesus osib ñamburbasq di qame b. Tamo aiyel dego ñamburbasq di qameleneb. Yesus a ambleq di tigeltosib tamo bei aqa bañ qonañq di tigelte b. Bei aqa bañ woq di tigelte b.

<sup>19</sup> Onaqa Pailat a anjam bei nenġrenyosiq ñamburbas mutu gogeq di atej. A endegsi nenġrenyej, “Yesus Nasaret qaji a Juda nanġo Mandor Koba.” <sup>20</sup> Sawa agu Yesus ñamburbasq di gainteb qaji di Jerusalem jojom. Deqa Juda tamo unġasari gargekoba nanġi gile beoqnsib anjam Pailat na nenġrenyej qaji di sisiyoqne b. Anjam di Hibru anjam na ti Rom nanġo anjam na ti Grik nanġo anjam na ti turtosiq nenġrenyej. <sup>21</sup> Onaqa Juda nanġo atra tamo kokba nanġi na Pailat minjeb, “ ‘Yesus a Juda nanġo Mandor Koba’ anjam degsi nenġrenyaim. ‘A marej, ‘E Juda nanġo Mandor Koba,’ ’ anjam degsi nenġrenye.’ ”

<sup>22</sup> Onaqa Pailat na minjrej, “Unġum. E anjam nenġrenyonum degesoqnem.”

<sup>23</sup> Ariya qaja tamo nanġi na Yesus ñamburbasq di qamsibqa aqa gara elenqa marsib gilteleneb. Giltelenosib tumbol qolqe ateb. Aqa gara jugo olekoba di gara bañga qujai na gereiyeb. Gara bañga bei na totoryosai. Gara di tulañ boledamu. <sup>24</sup> Deqa qaja tamo nanġi segi segi qairosib mare b, “Iga gara di bumbranjqasai. Iga meniñ silali alaño nam tamo yai aqa meniñ na bunjraqas a na gara di oqas.” Degsib marsib meniñ silali alañeb. Nanġi kumbra di yeb deqa Qotei aqa anjam bei nenġrenq di unu qaji di aqa damu brantej. Anjam agiende,

“Nanġi ijo gara elenqa marsib giltelenqab. Giltelenosib menin silali alanqab.”

<sup>25</sup> Yesus aqa ai wo aqa ai yala wo namburbas utruq di tigelesoqneb. Maria Makdala qure qaji wo Klopas aqa njanj Maria wo nanġi aiyel dego bosib koba na tigelesoqneb. <sup>26</sup> Onaqa Yesus a tirosiqa aqa ai wo aqa anġro agi a tulan qalaqalaiyoqnej qaji de wo namburbas utruq di tigelesonab unjrsiqa aqa ai metosiq minjej, “O ai, di ino anġro.” <sup>27</sup> Osiqa anġro di minjej, “Di ino ai.” Onaqa bati qujai deqa anġro dena Yesus aqa ai osiqa aqa segi talq di ombla sosibqa taqatoqnej.

### *Yesus a moiyej*

<sup>28</sup> Yesus a qalieej, wau kalil aqa Abu na yej qaji di kobotej. Osiqa marej, “E ya qarbqo.” A degsi marej. Di kiyaqqa? Qotei aqa anjam bei nengrenq di so qaji di aqa damu brantqajqa deqa. <sup>29</sup> Onaqa qaja tamo nanġi Yesus aqa anjam di qusibqa gara nengi bei osib wain isa kobaq di tuqteb. Tuqtosib namanj bei aqa dani osib mutuq di gara nengi qosisib osib Yesus anaiyqajqa soqtosib aqa medabuq di ateb. Wain di ya nobu bei namburbas utruq di nami atnab soqnej qaji dena tigsib Yesus anaiyeb. <sup>30</sup> Onaqa Yesus a wain isa koba di uysiqqa marej, “Bini e ijo wau kobotonum.” Degsi marsiqa aqa gate gulainosiqa mondor titosiq moiyej.

### *Qaja tamo bei na Yesus aqa jar banġaq di qamej*

<sup>31</sup> Juda nanġo yori bati koba brantqa laqnej deqa yori bati aqa inġi inġi kalil gereiyosib atnab soqnej. Nebe yori bati. Deqa Juda nanġi mareb, “Iga yori bati qa tamo nanġi namburbasq di uratnjrim sqasai.” Osib nanġi Pailat aqa areq bosib minjeb, “Ni ino qaja tamo nanġi minjrimqa gilsib tamo namburbasq di gainejunub qaji nanġo sinġa gentetnjribqa urur morenabqa osib subq atqab.” <sup>32</sup> Onaqa Pailat a nanġo anjam di qusiqa odosiq aqa qaja tamo qudei qarinjrnajqa gilsib tamo aiyel Yesus koba na namburbasq di gainesoqneb qaji nanġo sinġa gentetnjreb. <sup>33</sup> Osib Yesus aqa areq gilsib uneb a nami moiyej. Deqa nanġi aqa sinġa gentosai. <sup>34</sup> Onaqa qaja tamo bei na aqa qaja osiq Yesus aqa jar banġaq di qamnaq lej ti ya ti aiyej. <sup>35</sup> Nanġi kumbra di yonabqa e ijo segi njamdamu na unem. E kumbra deqa saqnsim laqnum. E segi qalieonum, ijo anjam bole. Deqa ninġi qusib nunġo areqaloq di singilatij. <sup>36</sup> Qaja tamo nanġi kumbra di yeb deqa Qotei aqa anjam bei nengrenq di so qaji di aqa damu brantej. Agi endegsib nengrenjeb, “Nanġi aqa tanu bei gentqasai.” <sup>37</sup> Qotei aqa anjam bei dego aqa damu brantej. Anjam agiende, “Nanġi qaja na aqa jar banġaq di qamsibqa a koqyesqab.”

### *Tamo aiyel na Yesus aqa jejamu osib sub bunujq di ateb*

<sup>38</sup> Onaqa tamo bei aqa ñam Josep a Yesus aqa jejamu osim subq atqa marsiqa Pailat a nenemyqa gilej. Josep a Arimatea qure qaji. A Yesus dauryoqnej qaji. A Juda tamo kokba nanği ulainjrsiq deqa uliosiq Yesus dauryoqnej. A boleq di dauryosaiqnej. Ariya a Pailat aqa areq gilsiq nenemyej, “Ni e odbimqa e Yesus aqa jejamu osiy subq atqa kere e?” Onaqa Pailat na Josep odyonaqa a Yesus aqa jejamu osiq subq atqa gilej. <sup>39</sup> Nikodemus agi nami qolo Yesus aqaq gilej qaji a dego Josep ombla na Yesus aqa jejamu osib subq atqa gileb. Nikodemus a gilqa osiqa ñam so aqa ya quleq ti utru aiyela turtosiq gereiyosiq osi gilej. Ñam so aqa ya di aqa gulbe 30 kilogram. <sup>40</sup> Onaqa nanği aiyel Yesus aqa jejamu osib gara boledamu na dalaosib ñam so aqa ya di osib aqa jejamuq di liyeb. Juda nanği na tamo subq atqa oqnsib degyeqñub.

<sup>41</sup> Sawa Yesus ñamburbasq di qameb qaji qalaq di nañu agu bei soqnej. Nañu agu dia sub bunuj bei soqnej. Sub dia nami tamo bei atosaisoqñeb. <sup>42</sup> Sub di isaq di sosai. A jojom di soqnej. Juda nanği yori bati aqa inği inği kalil gereiyqa bati brantej deqa nanği aiyel na Yesus aqa jejamu osib sub miligiq di jugeb.

## 20

### *Yesus a subq na tigelej*

<sup>1</sup> Yesus a subq di sonaq yori batiej. Olo nebeonaqa nobqolo ambru Maria Makdala qure qaji a tigelosiq Yesus aqa subq gilej. Gilsiq ñam atej meniñ kobaquja sub me getenteb qaji di waqosiq taqal di sonaq unej. <sup>2</sup> Unsiqa olo puluosiq urur ti aisiq Saimon Pita wo Yesus aqa anğro agi a tulañ qalaqalaiyoqnej qaji de wo nanği aiyel itnjrsiqa minjrej, “Gago Tamo Koba aqa jejamu subq dena osib jaraiyonub. Qabia kiyo atonub di iga qaliesai.”

<sup>3</sup> Degsi minjrnaqa Pita anğro de wo nanği anjam di qusi-bqa Yesus aqa sub unqajqa gileb. <sup>4</sup> Nanği aiyel gurgurosib giloqnsib anğro dena Pita bunyosiq namoosi gilsiq subq di brantej. <sup>5</sup> Osiq sub meq di tigelosiq miligi tirosiq gara Yesus dalaeb qaji di sonaq unej. A sub miligiq aiyosai. <sup>6</sup> Onaqa Saimon Pita a bunuqna bosiq torei sub miligiq aiyej. Aisiq a dego gara Yesus dalaeb qaji di unej. <sup>7</sup> Gara mutu bei Yesus aqa gate qoseteb qaji di lubosiq taqal beiq di sonaq unej. Gara mutu di gara qudei ti turtosiq sosai. A segiq di soqnej. <sup>8</sup> Onaqa anğro namo subq di brantej qaji a dego sub miligiq aiyej. Aisiq gara di unsiq marej, “Bole.” <sup>9</sup> Bati deqa nanği aiyel Qotei aqa anjam bei nengrenq di so qaji di aqa utru geregere poinjrosaisoqnej. Anjam agiende, “Kristus a olo

subq na tigelqas.” <sup>10</sup> Ariya nanği olo puluosib nanğo qureq aiye.

*Maria Makdala qaji a Yesus unej*

<sup>11</sup> Onaqa Maria a sub qalaq di tigelesosiqa akamoqnej. Akamoqnsiqa sub miligi tirej. <sup>12</sup> Tirosiqa lanğ anğro aiye sub miligiq di sonab unğrej. Nanği gara qat jigsib Yesus neieteb qaji lumeq di awesoqneb. Bei gateqsi bei siŋgaqsi awesoqneb. <sup>13</sup> Awesosibqa Maria minjeb, “Uña, ni kiyaaqa akameqnum?” Onaqa minğrej, “Nanği ijo Tamo Koba osib jaraiyonub. Qabia kiyo atonub di e qaliesai.” <sup>14</sup> Maria a nanği degsi minğrsiq bulosiqa aqa qoreq di Yesus a tigelesonaq unej. A qaliesai, di Yesus.

<sup>15</sup> Onaqa Yesus na Maria minğej, “O uña, ni kiyaaqa akameqnum? Ni yai unqa bonum?” Onaqa Maria a are qalej, “Tamo endi a nañu agu taqateqnu kiyo?” Degsi are qalsiq minğej, “Ni na kiyo ijo Tamo Koba osim sawa qabia atonum di merbimqa e gilsiy oqai.” <sup>16</sup> Onaqa Yesus na minğej, “O Maria.” Degsi minğnaqa Maria a Yesus qa poiyoonaqa areiyosiq minğej, “O Rabonai.” Di Hibru anjam. Aqa damu, “O Qalie Tamo Koba.” <sup>17</sup> Onaqa Yesus na Maria minğej, “E ijo Abu aqaq oqosaiunum deqa ni e ojaim. Ni ijo was nanğoq gilsim endegsi minğrej, ‘Yesus a marqo, ‘E ijo Abu aqaq olo oqwai. Ijo Abu agi nunğo Abu dego. Ijo Qotei agi nunğo Qotei dego.’ ” Ni gilsim nanği degsi minğrej.”

<sup>18</sup> Onaqa Maria Makdala qaji a Yesus aqa anjam di qusiqa gilsiq Yesus aqa anğro nanği itnğrsiqa minğrej, “E gago Tamo Koba a unonum.” Osiqa anjam kalil Yesus na minğej qaji di olo nanği sainğrej.

*Yesus aqa anğro nanği na a uneb*

<sup>19</sup> Yori bati koboosiqa bilaqtonaqa Yesus aqa anğro nanği tal bei gogetosib sirañme kalil qandimteleñosib warum miligiq di soqneb. Nanği Juda tamo kokba nanği ulainğrsib deqa degyeb. Onaqa bati qujai deqa Yesus a tal miligiq di brantosiqa nanğo ambleq di tigelosiq minğrej, “O ijo anğro, ningsi are lawo soqniy.” <sup>20</sup> Osiqa aqa ban ti jar banğa ti nanği osornğrej. Onaqa nanği kalil Tamo Koba a unsibqa tulanğ areboleboleinğrej. <sup>21</sup> Onaqa Yesus na olo minğrej, “Ningsi are lawo soqniy. Ijo Abu na e qarinğej dego kere e ningsi qarinğeqnum.” <sup>22</sup> Yesus na aqa anğro nanği anjam degsi minğrsiqa aqa mondor puynğrsiqa minğrej, “Ningsi Qotei aqa Mondor Bole oiy. <sup>23</sup> Ningsi tamo unğasari nanğo une kobotetnğrqab di Qotei a dego nanğo une kobotetnğrqas. Ariya ningsi tamo unğasari nanğo une kobotetnğrqasai di Qotei a dego nanğo une kobotetnğrqasai.”

*Tomas a Yesus unej*

<sup>24</sup> Yesus a nanḡoq di brantej di Tomas a nanḡi koba na sosai. Tomas a Yesus aqa anḡro 12 deqaji bei. Aqa ñam bei Didimus. <sup>25</sup> Onaqa Yesus aqa anḡro nanḡi gilsib Tomas itosib minjeb, “Iga gago Tamo Koba a unonum.” Degsi minjnabqa a nanḡo anjam di qunaq ugeiyonaq minjrej, “E ijo ñamdamu na Yesus aqa baḡ bile tutu na qameb qaji pirigi di unsiy ojḡai di e marḡai, ‘Bole.’ E aqa jar baḡa qaja na qameb qaji pirigi di dego unsiy ojḡai di e marḡai, ‘Bole.’ E unḡasai di e bole qa marḡasai.”

<sup>26</sup> Ariya bati 7 koboonaqa Yesus aqa anḡro nanḡi olo tal miligiq di soqneb. Tomas a dego nanḡi koba na soqneb. Siranḡe kalil qandimesonabqa Yesus a tal miligiq di brantosiqa nanḡo ambleq di tigelosiq minjrej, “O ijo anḡro, niḡi are lawo soqniy.” <sup>27</sup> Osiqa Tomas minjej, “O Tomas, ni ino baḡ gei na ijo baḡ bile qameb qaji pirigi ojsim unime. Ino baḡ waiyosim ijo jar baḡa qameb qaji pirigi dego oje. Areqalo aiyeltaim. Areqalo qujaitosim e qa ino areqalo siḡilat.” <sup>28</sup> Onaqa Tomas na Yesus minjej, “O Yesus, ni ijo Tamo Koba. Ni ijo Qotei dego.”

<sup>29</sup> Onaqa Yesus na olo Tomas minjej, “Ni ino ñamdamu na e nubsim deqa ino areqalo e qa siḡilatonum e? Ariya tamo unḡasari nanḡo ñamdamu na e nubosaieqḡub qaji nanḡi e qa nanḡo areqalo siḡilatqab di nanḡi tulaḡ areboleboleinḡras.”

### *Jon a anjam endi nenḡrenḡej di aqa utru*

<sup>30</sup> Yesus a Qotei aqa maḡwa tulaḡ gargekoba aqa anḡro nanḡo ñamdamuq di yoqnej. E aqa maḡwa quja quja segi buk miligiq endi nenḡrenḡyonum. <sup>31</sup> E anjam endi nenḡrenḡyonum. Di kiyaaq? Niḡi sisiyosib Yesus qa nunḡo areqalo siḡilatosib a bole Kristus Qotei aqa Niḡi degsi poiḡwajqa deqa. Osib niḡi Yesus aqa ñam na ñambile gaigai sqajqa deqa.

## 21

### *Yesus aqa anḡro 7 nanḡi na Yesus uneb*

<sup>1</sup> Onaqa bati bei Yesus a Taiberias ya agu qalaq di sosiqa aqa anḡro nanḡoq di olo brantej. E deqa kiñala saḡai. <sup>2</sup> Ya agu qalaq di Yesus aqa anḡro 7 nanḡi soqneb. Anḡro bei Saimon Pita. Bei Tomas aqa ñam bei Didimus. Bei Nataniel. Nataniel aqa qure utru Kana. Kana a Galili sawaq di unu. Sebedi aqa niḡi aiyel nanḡi dego ya agu qalaq di soqneb. Ariya Yesus aqa anḡro aiyel dego nanḡi koba na soqneb. <sup>3</sup> Onaqa Saimon Pita na nanḡi minjrej, “E qe oqajqa deqa kakanḡ waiyqa aiyeqnum.” Onaqa nanḡi na minjeb, “Iga kalil koba na aiqom.” Degsi minjsib nanḡi koba na aisib qobunḡ gogetosib ya robuq oqsib kakanḡ waiyoqneb. Di qolo. Waiyeqḡab nebeej. Nanḡi qe bei osai bole sai.

<sup>4</sup> Nobqolo ambru nanɣi qobun miligiq di sosib nam ateb Yesus a alile di tigelesonaq uneb. Nanɣi qaliesai, di Yesus. <sup>5</sup> Deqa a na nenemnɣrej, “O ijo anɣro, niɣi qe onub e?” Onaqa nanɣi na minjeb, “Eo. Iga qe osai.” <sup>6</sup> Onaqa minɣrej, “Niɣi qobun aqa qala bei ban woq di kakan waiyyi. Waiyosib niɣi qe oqab.” Onaqa nanɣi Yesus aqa anjam di dauryosib ban woq di kakan waiyeb qe tulan ani eb. Qe di tulan gargekoba deqa nanɣi na soqtosib qobun goge di atqa keresaiinɣrej.

<sup>7</sup> Onaqa Yesus aqa anɣro agi a tulan qalaqalaiyoqnej qaji a na Pita minjej, “Tamo di gago Tamo Koba.” Onaqa Saimon Pita a anjam di qusiqa aqa gara jugo wauqa osiq piqtej qaji di olo jigsiqu qobun dena prugosiq yaq aisiq qawainosiq Yesus aqa areq gilej. <sup>8</sup> Yesus aqa anɣro qobun miligiq di soqneb qaji nanɣi alile jojom 100 mita. Deqa kakan qe na maqesonaq nanɣi qobun na titosib aisib alile di tiryeb.

<sup>9</sup> Alile di tiryosib nam ateb di Yesus a nami nam tunguyosiq qe koitonaq namyuwoq di sonaq uneb. Bem qudei dego sonaq uneb. <sup>10</sup> Deqa Yesus na minɣrej, “Niɣi qe onub di qudei osi boiy.” <sup>11</sup> Onaqa Pita a olo qobun gogetosiqu kakan qe ti titosiq alile di atej. Qe di kokba. Qe kalil sisiyeb 153. Di qe gargekoba. Ariya kakan yala branosai.

<sup>12</sup> Onaqa Yesus na minɣrej, “Niɣi bosib inɣi uyiy.” Anɣro bei na yala nenemyosai, “Ni tamo yai?” Degosai. Nanɣi qalie, di nanɣo Tamo Koba. <sup>13</sup> Onaqa Yesus a namyuwo jojomyosiqu bem ti qe ti di osiq nanɣi anainjronaq uyeb.

<sup>14</sup> Yesus a subq na tigelosiqu aqa anɣro nanɣoq di bran-toaiyeltej. Bini qalubqo.

*Yesus na Pita minjej, “Ni ijo kaja du du nanɣi gereinjɣime”*

<sup>15</sup> Nanɣi inɣi uynab koboonaqa Yesus na Saimon Pita nenemyej, “O Saimon, Jon aqa nɣiri, ni ijo anɣro kalil nanɣi bunɣjrsimqa ni segi e tulan qalaqalaibeqnum e?” Onaqa Pita na minjej, “Od, Tamo Koba, ni qalieonum, e ni qalaqalaimeqnum.” Onaqa Yesus na minjej, “Ni ijo kaja du du nanɣi gereinjɣime.”

<sup>16</sup> Osiqu olo Pita nenemyej, “O Saimon, Jon aqa nɣiri, ni e tulan qalaqalaibeqnum e?” Onaqa Pita na minjej, “Od, Tamo Koba, ni qalieonum, e ni qalaqalaimeqnum.” Onaqa Yesus na minjej, “Ni ijo kaja nanɣi taqatnɣime.”

<sup>17</sup> Osiqu olo nenemyej, “O Saimon, Jon aqa nɣiri, ni e qalaqalaibeqnum e?” Yesus na Pita anjam di nenemyoqalubtej deqa Pita a are gulbeyonaq minjej, “O Tamo Koba, ni kumbra kalil qa qalie. Deqa ni qalieonum, e ni qalaqalaimeqnum.” Onaqa Yesus na olo minjej, “Ni ijo kaja nanɣi gereinjɣime.”

18 “O Pita, e bole mermqai. Ni angro wala sosimqa ni ino segi areqalo dauryoqnsim sawa ni gilqajqa are soqnej qaji deq giloqnem. Ariya bunuqna ni qeliosimqa ino ban aiyel soqtim tamo bei na ni tontmosim sawa ni gilqajqa asgimqas qaji deq osi gilqas.” 19 Pita aqa moiqajqa gam di Yesus na ubtosiq degsi minjej. Pita a gam dena moiym Qotei aqa ñam goge oqwas. Pita a di qalieqajqa deqa Yesus na degsi minjej. Osiqa Pita minjej, “Ni e daurbe.”

### *Anjam getento*

20 Osiqa Yesus a Pita ombla walweloqnsibqa Pita a bulosiq angro Yesus na tulan qalaqalaiyoqnej qaji a nanqi aiyel daurn-jreqnaq unej. Angro di agi nami Yesus aqa angro nanqi koba na inji uyoqnsibqa a Yesus beteryosiq nenemyej, “O Tamo Koba, angro yai na ni osim jeu tamo nanjo banq di atqas?” 21 Deqa Pita a angro di unsiqa Yesus nenemyej, “O Tamo Koba, bunuqna ino angro di a kumbra kiye turqas?” 22 Onaqa Yesus na Pita minjej, “Angro di a moiysaisoqnmqa e olo bqai degsi minjitqa ni deqa are koba qalaim. Di ino wau sai. Di ijo wau. Ni e daurbe.” 23 Yesus na Pita degsi minjej. Deqa angro di a moiqasai anjam di sawa sawaq gileqnaqa Kristen was kalil nanqi quoqneb. Angro di a moiqasai Yesus na Pita degsi minjosai. A na minjej, “Angro di a moiysaisoqnmqa e olo bqai degsi minjitqa ni deqa are koba qalaim.”

24 Yesus aqa angro di agi e segi. E na anjam endi nenjrenyonum. E ijo segi njamdamu na Yesus aqa kumbra kalil endi unsim deqa nenjrenyonum. Iga qalieonum, ijo anjam endi bole.

25 Yesus a mandamq endi sosisqa a kumbra tulan gargekoba yoqnej. Deqa e are qalonum, Yesus aqa kumbra kalil deqa nenjrenyqom di buk tulan tumbol kobaosim sawa sawa kalilq di maqosim sawa atqa keresaiqas.

## YESUS AQA ANJAM MARO TAMO NANGI

*Yesus na aqa Mondor qarinyim aqa angro nanngoq aiqas*

<sup>1</sup> O Tiofilus, e nami anjam bei nengrenyosim inoq qarinyem. Kumbra kalil Yesus a yoqnej qaji deqa ti anjam kalil a na tamo ungasari nanqi minjroqnej qaji deqa ti utruq na nengrenyem. <sup>2</sup> Nengrenyosim gilsimqa Qotei na Yesus osiq lan qureq oqej di patem. Yesus a lan qureq oqosaisosiq aqa segi angro giltjrej qaji nanqi koroinjrnaqa Mondor Bole na aqa medabu singilatetonaqa minjrej, “Ninqi ijo wau ojoqnsib ijo anjam mare mare laqniy.” <sup>3</sup> Yesus a jaqatin osiq moisiq olo nambile sosiq aqa angro nanngoq di brantoqnsiq manjwa gargekoba yeqnaqa nanqi unoqneb. Unoqnsib maroqneb, “Bole.” Bati 40 qa a nanngoq di brantoqnej. Brantoqnsiq Qotei a tamo ungasari nanjo Mandor Koba sosim nanqi taqatnrqas anjam di minjroqnej. <sup>4</sup> Onaqa bati bei Yesus na aqa angro nanqi di olo koroinjrnsiq minjrej, “Ninqi Jerusalem urataib. Ijo Abu aqa Mondor ninqi nami enjwa marej qaji deqa tarinoqnsib soqniy. E nami ninqi deqa merngoqnem. <sup>5</sup> Jon a ya na tamo ungasari nanqi yansjroqnej. Ariya bati qudei koboamqa e Mondor Bole aqa singila na ninqi yansjgwai.”

<sup>6</sup> Onaqa bati bei Yesus a olo aqa angro nanqi koroinjrnaqa nanqi na endegsib nenemyeb, “O Tamo Koba, bini bati endeqa kiyo ni na Rom nanjo singila kobotosim iga Israel tamo ungasari singila egimqa iga kamba mandam endi taqatqom?” <sup>7</sup> Onaqa Yesus na minjrej, “Ninqi bati di qalieqa maraib. Di nunjo wau sai. Di ijo Abu aqa wau. A segi na bati di giltej unu. <sup>8</sup> Ariya Mondor Bole a nunngoq bamqa ninqi singila osib e qa anjam mare mare laqniy. Ninqi Jerusalem endia, Judia sawaq di, Samaria sawaq di, sawa sawa kalil keretosib e qa anjam mare mare laqniy.”

*Yesus a lan qureq oqej*

<sup>9</sup> Yesus na aqa angro nanqi anjam degsi minjrnsiq a mandam uratosisq lan goge oqeqnaqa nanqi a koqyesoqneb. Onaqa lanbi na a kabutonaqa nanqi a olo unosai. <sup>10-11</sup> Nanqi lan goge tarosib nam ateqnabqa tamo aiyel gara qat jigeb qaji nanqi bosib nanjo areq di tigelosib minjreb, “O Galili tamo, ninqi kiyaaqa lan goge tarosib nam ateqnub? Yesus a ninqi uratjnsiqqa lan goge oqeqnaq ninqi unonub mondonj a degsim olo bqas.”



*Yesus aqa angro nanji na tamo bei giltonab a Judas aqa sawa ej*

12-13 Mana nanji soqneb qaji aqa ñam Oliv mana. Mana di Jerusalem jomq di unu. Nanji dena olo puluosib Jerusalem aisib tal gogetosib nanjo warum bei gogeqsi nanji gaigai soqneb qaji deq gileb. Yesus aqa angro warum deq gileb qaji nanjo ñam agiende. Pita, Jon, Jems, Andru, Filip, Tomas, Bartolomyu, Matyu, Alfius aqa njiri Jems, Jems bei aqa njiri Judas, Saimon agi nami Rom nanji winjr qajqa maroqnej qaji. Yesus aqa angro 11 nanji di warum deq gileb. <sup>14</sup> Nanji ti ungasari qudei ti Yesus aqa was nanji ti aqa ai Maria dego nanji koba na gaigai warum dia korooqnsibqa are qujaitoqnsib Qotei pailyoqneb.

<sup>15</sup> Bati bei tamo ungasari 120 Yesus qa nanjo areqalo singilateb qaji nanji koroosib sonabqa Pita a nanjo ambleq di tigelosiqa minjrej, <sup>16-17</sup> “O ijo was ninji quiy. Qotei aqa anjam bei nengrenq di unu qaji di aqa damu bini brantqo. Anjam di aqa damu Qotei a nami brantqa marej deqa agi brantqo. Anjam di Qotei aqa Mondor na Devit minjnaq qusiqa nengrenyonaq soqnej. A Judas qa nengrenyej. Judas agi iga koba na sosimqa Yesus aqa wau ojoqnem. Ninji qalie, bunuqna a na jeu tamo nanji gam osornjrnaqa Yesus ojob.” Pita a nanji anjam degsi minjrej.

<sup>18</sup> Judas aqa kumbra tulan uge. Aqa kumbra uge agiende. Juda tamo kokba nanji na a silali yonabqa Yesus osiqa nanjo banq di atej. A silali di osiqa mandam taqal bei awaiyej. Awaiyosiqa a mandam dia ulonosiqa aqa mene paraonaqa bi bileney. <sup>19</sup> Bunuqna tamo ungasari kalil Jerusalem di soqneb qaji nanji deqa qusibqa mandam di aqa ñam “Akeldama” waiyeb. Di nanjo segi anjam na ñam waiyeb. Ñam di aqa damu, “Leñ Aiqajqa Mandam.”

<sup>20</sup> Ariya Pita a olo marej, “Devit a nami Qotei louqa buk miligiq di Judas qa endegsi nengrenyej, ‘Aqa tal lanja sqas. Tamo bei na olo aqa tal oqasai.’ Osiqa olo Judas qa endegsi nengrenyej, ‘Tamo bei na kamba aqa wau ojqs.’”

<sup>21</sup> “Deqa ijo was ninji quiy. Iga tamo bei giltonamqa a na Judas aqa sawa osim iga ti Yesus aqa wau ojgom. Iga nami Tamo Koba Yesus dauryosim laqnamqa bati deqa tamo nanji iga koba na soqnem deqaji bei giltqom. <sup>22</sup> Jon yansjro qaji aqa bati qa Yesus na aqa wau utru atej dena bosiq bosiq Qotei a Yesus yaigosiqqa lan qureq oqej. Bati deqa tamo nanji iga koba na soqnem deqaji bei giltonamqa a iga ti Yesus aqa wau ojgom. Ojsimqa Yesus a moisiq olo subq na tigelej deqa mare laqnom.”

<sup>23</sup> Pita a nanġi anjam degsi minjrnaqa nanġi na tamo aiyel giltnjreb. Josep Matias wo giltnjreb. Josep aqa ñam bei Barsabas. Aqa ñam bei Jastas. <sup>24</sup> Nanġi aiyel giltnjrsibqa endegsib pailyeb, “O Tamo Koba, ni tamo kalil nanġo areqalo qalie. Deqa tamo aiyel endi ni yai giltqam di iga osorgimqa tamo dena Judas aqa sawa osim aqa wau ojqs. <sup>25</sup> Judas a wau di uratosiqa moisiq sawa uge ni nami a aiqajqa giltem qaji deq aiyej.” <sup>26</sup> Nanġi degsib pailyosib koboonaqa tamo yai na kamba Judas aqa wau ojqs deqa marsibqa meniñ silali alaheb. Alanonabqa Matias aqa meniñ na bunyej. Deqa nanġi Matias giltonabqa a Yesus aqa anjam maro tamo 11 nanġi koba na sosib wauoqneb.

## 2

### *Qotei aqa Mondor a mandamq aiyej*

<sup>1-2</sup> Onaqa Juda nanġo yori bati koba ñam Pentikos di brantej. Juda nanġo moma nanġi nami inġi meli bunuj otoreleneb. Deqa olo are qalqajqa yori bati brantonaqa Yesus aqa tamo unġasari nanġi tal qujaiq di koroosib soqneb. Sonabqa lanġ goge na jagwa koba anjam ato bulosiq tal nanġi awesoqneb qaji deq aiyej. Aisiq tal keretej. <sup>3</sup> Onaqa inġi bei a ñam pulon bulosiqa aisiq segi segiosiqa nanġo gateq di awoelenonaq uneb. <sup>4</sup> Bati deqa Mondor Bole a nanġo segi segi are miligiq aisiq meñ bulyetnrnaqa nanġi kalil qure utru segi segi nanġo anjam marelenjoqneb.

<sup>5</sup> Bati deqa Juda tulañ gargekoba sawa sawa kalilq di ñambabeb qaji nanġi Jerusalem di soqneb. Nanġi kalil Qotei qa louoqneb qaji. <sup>6-7</sup> Jagwa koba di anjam ato bulonaqa nanġi kalil queb. Qusibqa mañwa di unqajqa bosib koroeb. Koroosib nanġo segi segi qure utru anjam Yesus aqa tamo unġasari nanġi na mareq nab qusibqa prugugetoqneb. Osib maroqneb, “Tamo unġasari kalil endi Galili qaji. <sup>8</sup> Nanġi kiyersib gago segi segi qure utru anjam mareq nab iga queqnum? <sup>9</sup> Iga qudei Partia, Midia, Elam, Mesopotemia, Judia, Kapadosia, Pontus, Esia qaji. <sup>10</sup> Iga qudei Frigia, Pamfilia, Isip qaji. Iga qudei Libia sawa agi Sairini sawa jojom deqaji. Iga qudei Rom qaji. <sup>11</sup> Iga qudei Juda tamo tintiñ. Iga qudei Juda nanġo lou dauryqa marsim nanġo miligiq aiyem. Iga qudei Krit. Iga qudei Arebia qaji. Nanġi kiyersib gago segi segi qure utru anjam na Qotei aqa mañwa kalil qa saeq nab iga queqnum?” <sup>12</sup> Juda kalil nanġi anjam degsib marsibqa prugugetoqnsib segi segi maroqneb, “Endi kumbra kiyero?” <sup>13</sup> Onaqa nanġi qudei yomuoqnsib maroqneb, “Nanġi wain bunuj uysib deqa nanariosib anjam lanġa lanġa mareq nub.”

### *Pita a anjam palontej*

<sup>14</sup> Onaqa Yesus aqa angro 11 nanġi Pita ombla tigelosibqa Pita na aqa medabu waqtosiq endegsi marej, “Ninġi Juda ti tamo kalil Jerusalem endi unub qaji ninġi ti ijo anjam endi qusib poingem. <sup>15</sup> Ninġi maronub, ‘Tamo unġasari nanġi di wain uysib nanarionub.’ Di sai. Endego nobqolo koba. Wain uyqa bati sai. <sup>16</sup> Mañwa ninġi bini unonub qaji endeqa Qotei aqa medabu o tamo Joel a nami marej. Agi a endegsi marej, <sup>17</sup> ‘Qotei a marqo, “Diño bati jojomoqnmqa e na ijo Mondor qarinyitqa tamo unġasari kalil nanġoq aiqas. Aisim nunġo angro mel ti nunġo angro sebiñ ti nanġi singila enjrimqa nanġi ijo medabu osib anjam maroqnqab. Nunġo angro wala nanġi ti nunġo tamo bole bole nanġi ti areqalo waqtetnjroqnmqa ñeio buloqnsibqa ijo kumbra gargekoba unoqnqab. <sup>18</sup> Bati deqa e na ijo Mondor qarinyitqa ijo wau tamo ti ijo wau uña ti nanġoq aisim singila enjroqnmqa nanġi ijo medabu osib anjam maroqnqab. <sup>19</sup> Lan goge dia e mañwa gargekoba yoqnqai. Mandamq di dego mañwa gargekoba yoqnqai. Len ti ñamyuwo ti qurem koba ti qarinyit mandamq aiqas. <sup>20</sup> Sen ambruqas. Bai lentosim len bulqas. Amqa Tamo Koba a rian koba ti singila koba ti bqas. <sup>21</sup> Bati deqa tamo unġasari gargekoba nanġi Tamo Koba aqa ñam metosib pailyibqa a na nanġo pailyo qusim nanġi kalil eleñamqa nanġi so bole gaigai sqab.” ’ Qotei aqa medabu o qaji tamo Joel a nami anjam degsi marej.

<sup>22</sup> “Deqa Israel tamo unġasari, ninġi ijo anjam endi quiy. Ninġi qalie, Qotei a Yesus Nasaret qaji aqa singila na mañwa gargekoba nunġo ambleq di yoqnej. A degyoqnej. Di kiyaaqa? Ninġi poingwajqa, Qotei na a qarinyonaq bej. <sup>23</sup> Bunuqna Qotei na Yesus olo osiq nunġo bañq di atej. A nami kumbra degyqa marsiq aqa segi areqalo dauryosiq degyej. Degyonaqa ninġi na Yesus ojsib tamo uge nanġo bañq di atnabqa nanġi a osib ñamburbasq di qalnab moiyej. Nunġo kumbra dena ninġi segi na Yesus qalsib moiyyoteb. <sup>24</sup> Onaqa Qotei na Yesus olo subq na tigeltosiq moiyo aqa gulbe kobotej. Deqa moiyo na Yesus a olo ojqa keresai. <sup>25</sup> Agi Devit a nami Yesus qa endegsi marej, ‘Tamo Koba a bati gaigai ijo ulatamuq di sonaq e uneqnum. A ijo bañ woq di unu deqa e padalqasai.

<sup>26</sup> Deqa e tulan areboleboleibeqnu. E arebolebole na anjam mareqnum.

O Qotei, inġi bole bole ni na e ebqajqa marem qaji di e oqajqa tariñoqnsim unum.

<sup>27</sup> Ni ijo qununj uratim moiyo qureq aiqasai.

Ni ino segi angro bolequja ni na giltem qaji aqa jejamu dego subq di uratim qusaqasai.

28 Nambile sqajqa gam di ni na e osorbeqnum.

Ni e ombla sqam deqa e tulan areboleboleibeqnu.'

Devit a nami anjam degsi marej.

29 "O ijo was, e bole merngwai. Gago moma Devit a moinaqa subq ateb. Aqa sub agi bini unu iga gaigai uneqnum.

30-31 Nami Qotei na Devit minjej, 'Mondon ino moma nanji paraosibqa len dena tamo bei a nambabqas. Amqa e na tamo di gilititqa ni mandor koba unum dego kere a kamba ino sawa osim Mandor Koba sqas.' Qotei a nami Devit anjam degsi minjsiqa aqa anjam di singilatosiqa olo minjej, 'E ijo anjam di uratqasai. E dauryqai.' Devit a Qotei aqa medabu o tamo soqnej deqa kumbra Qotei na mondon yqas qaji di Devit a nami qalieej. Osiqa Kristus qa endegsi marej, 'Bunuqna a subq na tigelqas.' Osiqa olo marej, 'Qotei na Kristus moiyo qureq di uratqasai. Aqa jejamu dego subq di uratim qusaqasai.'

32 O ijo was, Yesus qujai di Qotei a subq na tigeltonaqa iga kalil namdamu na unem. Deqa bini iga a qa mare mare laqnum.

33 A lan qureq oqsiq nam kobaquja osiq Qotei aqa ban woq di awoej. Osiqa Mondor Bole ninji nami engwa marej qaji di aqa Abu aqaq dena yayiosiq qarinyqo aiqoqa ninji unsib nungo dabkala na dego quonub.

34 Devit a subq na tigelosiq lan qureq oqosai. Ariya a Kristus qa endegsi marej,

'Tamo Koba a na ijo Tamo Koba minjej,

'Ni ijo ban woq endi awo.

35 Awesoqnimqa e ino jeu tamo kalil nanji elenjosiy ino sorgomq di atitqa ni na nanji taqatnjqam."

Devit a nami Kristus qa degsi marej.

36 "Deqa Israel tamo ungasari, ninji kalil endegsi poinjem. Yesus agi ninji na namburbasq di qalnab moiyej qaji a Qotei na olo giltosiqa a gago Tamo Koba Kristus nam waiyej."

*Tamo ungasari gargekoba nanji are bulyosib yanso eb*

37 Onaqa tamo ungasari nanji Pita aqa anjam di qunabqa anjam dena nanjo are qametnjurej. Deqa nanji na Yesus aqa angro nanji Pita ombla minjreb, "O gago was ninji na mergiy. Iga kiyeronamqa Qotei na iga elenamqa iga padalqasai?"

38 Onaqa Pita na kamba minjreb, "Ninji segi segi are bulyosib Qotei aqaq boiy. Babqa iga Yesus Kristus aqa nam na ninji yansngonam Qotei na nunjo une kalil kobotetngwas. Osim aqa Mondor Bole ninji lanja engwas. Awai saiqoji. 39 Qotei a nami marej, 'E na ninji ti nunjo angro ti tamo kalil isa isaq di unub qaji nanji ti ijo Mondor engwai.' Qotei a nami degsi marej. Deqa ninji quiy. Gago Tamo Koba Qotei aqa anjam di uratqasai. Tamo ungasari kalil a na metnrim aqaq bqab qaji nanji aqa Mondor enjqas."

40 Pita a anjam deqaji gargekoba siŋgila na nanŋi minjroqnej. Osiqa olo endegsi minjrej, “Tamo unŋasari bini bati endeqa unub qaji nanŋi kumbra uge uge yoqnsib laqnub. Niŋgi nanŋi ti Qotei na padaltŋgaim deqa niŋgi geregere ŋam atoqniy.” 41 Pita a anjam degsi marnaqa bati deqa tamo unŋasari 3,000 nanŋi aqa anjam di qusib nanŋo are miligiq di ateb. Osib nanŋi yanso eb. Nanŋi Yesus qa nanŋo areqalo siŋgilateb deqa nanŋi tamo unŋasari nami Yesus qa nanŋo areqalo siŋgilateb qaji nanŋo miligiq aisib koba na soqneb.

*Yesus aqa tamo unŋasari kalil nanŋi are qujaitoqnsib soqneb*

42 Tamo unŋasari Yesus qa nanŋo areqalo siŋgilateb qaji nanŋi bati gaigai aqa anjam maro tamo nanŋo anjam quoqnsib dauryoqneb. Nanŋi are qujaitoqnsib bem gentoqnsib uyoqnsibqa Qotei pailyoqnsib soqneb. 43 Qotei na Yesus aqa anjam maro tamo nanŋi di siŋgila enjreqnaqa nanŋi maŋwa gargekoba yoqneb. Yeqnab Yesus aqa tamo unŋasari kalil nanŋi maŋwa di unoqnsib Qotei aqa ñam soqtoqneb. 44 Tamo unŋasari kalil Yesus qa nanŋo areqalo siŋgilateb qaji nanŋi bati gaigai korooqnsibqa are qujaitoqnsib soqneb. Nanŋo iŋgi iŋgi kalil di koba qaji degsib maroqnsib segi segi qa jei jeiyoqneb. 45 Nanŋo mandam ti iŋgi iŋgi ti qarinyeleneqnab tamo qudei na awaiyoqnsib silali enjreqnab oqnsib Yesus aqa tamo unŋasari iŋgi iŋgi saiqoji nanŋi jeisib enjroqneb. 46-47 Nanŋi bati gaigai are qujaitoqnsib sosibqa atra tal miligiq di korooqnsib louoqneb. Nanŋo segi segi talq di dego korooqnsibqa bem gentoqnsib uyoqneb. Nanŋi arebolebole ti lawo na sosibqa Qotei aqa ñam soqtoqnsib koba na iŋgi uyoqneb. Degyeqnabqa tamo unŋasari kalil nanŋi nanŋo kumbra di unoqnsib nanŋi qa tulaŋ areboleboleinjroqnej. Bati gaigai tamo unŋasari qudei nanŋi are bulyeqnab Tamo Koba a na nanŋi eleneqnaqa nanŋi boqnsib tamo unŋasari nami Yesus qa nanŋo areqalo siŋgilateb qaji nanŋo miligiq aiyoqnsib koba na soqneb.

### 3

*Pita Jon wo nanŋi na tamo siŋga qandamo boleteb*

1-2 Bati gaigai bilaq seŋ kelinteqnaqa Juda tamo unŋasari nanŋi atra tal miligiq giloqnsib dia Qotei pailyoqneb. Pailyo bati bei Pita Jon wo nanŋi aiyel pailyqa marsib atra tal miligiq gilqa laqnabqa tamo bei ai miligiq na siŋga qandamo ŋambabej qaji a atra tal siranme jomq di awesoqnej. Bati gaigai aqa was nanŋi a qoboioqnsib boqnsib siranme jomq di ateqnabqa awoqnsiqa tamo unŋasari atra tal miligiq gileqnabqa silali qa ŋilnjroqnej. Siranme di aqa ñam Siranme Boledamu. 3 Bati deqa Pita Jon wo nanŋi atra tal miligiq gilqa laqnabqa unjrsiqa silali qa ŋilnjrej. 4 Onaqa nanŋi aiyel na

tamo di koqyosibqa Pita na minjej, “Ni aqo nige.” <sup>5</sup> Degsi minjnaqa a are qalej, “Nanji aiyel silali bei ebqab.” Degsi are qalsiqa nanji aiyel koqnjresoqnej. <sup>6</sup> Onaqa Pita na minjej, “E silali saiqoji. Ijo inji bei unu di ni emqai. Yesus Kristus Nasaret qaji aqa ñam na e ni mermonum, ‘Ni tigelosim walwel.’” <sup>7-8</sup> Degsi minjsiqa aqa ban woq di ojsiq tigeltonaqa aqa singa tombol singilaonab tigelokuqjatosiq walwelej. Osiqua Pita Jon wo nanji aiyel daurnjrsiqa atra tal miligiq gilsiq tulan areboleboleiyeqnaqa pruprugoqnsiq Qotei aqa ñam soqtoqnej. <sup>9-10</sup> A degyeqnaqa tamo ungasari kalil nanji a unsibqa are koba qaloqneb. Osib maroqneb, “Tamo singa qandamo bati gaigai atra tal siranme jojomq di awooqnsiqa silali qa ñileqnu qaji agi a di.”

*Pita a atra tal miligiq di anjam palontej*

<sup>11</sup> Tamo di a Pita Jon wo nanji aiyel daurnjrsiq laqnaqa tamo ungasari kalil nanji a unoqnsib are koba qaloqneb. Deqa nanji gurgur ti bosib atra tal meq di Pita Jon wo sonabqa koba na korooqneb. Atra tal me di aqa ñam Solomon aqa Tal Me. <sup>12</sup> Tamo ungasari nanji bosib koroeqneb Pita a nanji unjrsiqa endegsi minjrej, “O Israel tamo ungasari, ninji kiyaaqa aqo aiyel tamo di boletonum unsibqa are koba qaleqneb? Ninji kiyaaqa aqo aiyel nugsibqa endegsib mareqneb, ‘Nango segi singila na ti kumbra bole na ti tamo di boletonub walwelqo?’ Ninji degsib maraib. <sup>13</sup> Qotei aqa wau tamo Yesus aqa singila na tamo di boleosiq walwelqo. Qotei a Abraham, Aisak, Jekop, gago moma kalil nanji ti nanjo Qotei. A na Yesus lan qureq osi oqsiq ñam kobaquja yej. Yesus qujai di ninji na osib jeu tamo nanjo banq di ateb. Onaqa Pailat a olo Yesus tonto talq dena oqeq atqajqa marnaqa ninji na saideb. <sup>14</sup> Yesus a Qotei aqa segi Tamo Boledamu. A une saiqoji. Ariya ninji na Yesus qoreiyosib saidosib Pailat minjeb, ‘Tonto tamo bei oqeq atsim ege.’ Ninji na Pailat degsib minjnabqa a nunjo anjam di dauryosiqa len ojo tamo osiqa oqeq atsiq engej. <sup>15</sup> Ariya Yesus a segi ñambile qa utru. Di ninji na qalnab moiyej. Moinaqa Qotei na olo subq na tigeltonaqa iga gago ñamdamu na unem. Deqa bini iga a qa mare mare laqnum. <sup>16</sup> Aqo aiyel Yesus qa gago areqalo singilateqnum deqa iga aqa ñam na tamo singa qandamo di boletonum a singilaqo. Tamo singa qandamo di ninji qalie. Ninji gaigai a unoqneb. Yesus a segi na aqo aiyel singila egwoqa a qa gago areqalo singilatosim tamo di boletonumqa nunjo ñamdamuq di walwelqo.

<sup>17</sup> “O gago was, e qalieonum, ninji ti nunjo gate nanji ti une kobaquja ateb di ninji poingosai. <sup>18</sup> Ninji kumbra di yeb deqa Qotei aqa medabu o tamo kalil nanjo anjam nami maroqneb qaji di aqa damu Qotei na babtej. Agi Qotei na

nanngo medabu singilatetnjreqnaqa nanngi endegsib maroqneb, 'Qotei aqa Kristus a jaqatin koba osim moiqa.'

<sup>19-20</sup> "Deqa ijo was kalil, ningi are bulyosib Tamo Koba aqaq boiy. Babqa a na nunngo une kobotetngsim ningi singila bunuj engwas. Osim mondonj a na Yesus olo qarinyim nunngoq bqas. Tamo di agi Kristus Qotei a nami ningi qa osiq giltej qaji. <sup>21</sup> A lanj qureq oqej di unu. A di soqnimqa Qotei na mandam bunuj ti lanj bunuj ti atqa bati brantimqa a olo bqas. Qotei a nami aqa kumbra deqa anjam marej. Osiqa aqa anjam di aqa medabu o qaji tamo nanngi minjreqnaqa nanngi na nenngrenjyoqneb.

<sup>22</sup> "Nami Moses a Yesus qa endegsi marej, 'Mondonj Tamo Koba Qotei na aqa medabu o qaji tamo bei e bul nunngo ambleq dena tigeltimqa a anjam mernngoqnaqas. Anjam mernngoqnimqa ningi aqa anjam kalil qusib dauryoqniy. <sup>23</sup> Tamo ungasari kalil aqa anjam quqwa uratqab qaji nanngi Qotei na numim morenqab. Deqa nanngi olo Qotei aqa tamo ungasari nanngo ambleq di sqasai.' Moses a nami Yesus qa degsi marej. <sup>24</sup> Qotei aqa medabu o qaji tamo kalil nanngi dego nami Yesus qa anjam degsib maroqneb. Agi Samuel a utru atsiqa a Yesus bqajqa bati qalieosiq deqa Yesus qa anjam maroqnej. Samuel a moinaqa Qotei aqa medabu o tamo kalil bunuqna brantelenjeb qaji nanngi dego Yesus bqajqa bati qalieosib deqa anjam maroqneb.

<sup>25</sup> "Qotei a ningi elenqa osiq deqa aqa medabu o qaji tamo nanngi qarinjnjreqnaqa aqa anjam mare mare laqneb. A nami nunngo moma utru nanngi ti koba na anjam qosisibqa Abraham endegsi minjej, 'Mondonj ino moma nanngi paraosibqa len dena tamo bei nambabqas. Nambabosim tamo ungasari sawa sawa kalilq di unub qaji nanngi boletnjrqas.' Qotei a ningi elenqa osiq deqa anjam di Abraham minjej. <sup>26</sup> Osiqa bunuqna aqa wau tamo Yesus a qarinyonaq nunngoq aiyej. Qotei a are qalej, a Yesus qarinyim a ningi kalil boletngimqa ningi nunngo kumbra uge uge kalil uratqab. Qotei a degsi are qalsiq Yesus qarinyonaq nunngoq aiyej."

## 4

### *Nanngi na Pita Jon wo ojelenjosib tonto talq di breinjreb*

<sup>1-3</sup> Pita Jon wo nanngi na tamo ungasari nanngi Qotei aqa anjam minjreqnabqa atra tamo nanngi ti Sadyusi nanngi ti atra tal taqato tamo nanngo gate ombla na tulanj minjinj oqetnjrnaqa bosib nanngi aiyel ojelenjosib tonto talq di breinjreb. Di kiyaaqa? Nanngi aiyel maroqneb, "Yesus a moisiq olo subq na tigelej deqa tamo kalil nanngi dego moisiq olo subq na tigelqab." Deqa nanngi aiyel tonto talq di breinjreb. Bilaqtej deqa nanngi

aiyel tonto talq di uratnjrnab sonab nebeej. <sup>4</sup> Bati deqa tamo ungasari tulan gargekoba nanqi Qotei aqa anjam quogsib Yesus qa nanqo areqalo singilatoqneb. Nanqi kalil turteb 5,000.

*Pita Jon wo nanqi Juda gate kokba nanqo ulatamuq di tigeleb*

<sup>5</sup> Nebeonaqa Juda nanqo tamo kokba ti gate nanqi ti dal anjam qalie tamo nanqi ti Jerusalem di koroeb. <sup>6</sup> Atra tamo gate Anas aqa lej kalil nanqi ti dego koroeb. Bei Kaiafas. Bei Jon. Bei Aleksanda. <sup>7</sup> Koroosib Pita Jon wo nanqi metnjrnab bonab nanqo ambleq di tigeltjreb. Tamo singa qandamyonaq olo boleej qaji a dego osi bosib tigelteb. Osib Pita Jon wo nenemjreb, “Ninigi singila qabe na osib tamo endi boleteb? Ninigi yai aqa ñam na boleteb?”

<sup>8-9</sup> Onaqa Mondor Bole a Pita aqa miligiq aisiq medabu singilatetonaqa a na nanqi endegsi minjrej, “O Israel tamo kokba ti gate ninigi ti ijo anjam endi quiy. Aqo aiyel na tamo singa qandamo endi boletem deqa ninigi iga osib nunqo ñamdamuq di tigeltgonub. Tamo endi a kiyersi boleej deqa ninigi qalieqa osib nenemgonub. <sup>10</sup> Deqa ninigi ti Israel tamo ungasari kalil ti ijo anjam endi qusib poinjem. Nasaret tamo Yesus Kristus agi ninigi na ñamburbasq di qalnab Qotei a olo subq na tigeltej qaji aqa ñam na tamo endi a boleqo. Boleosiq nunqo ulatamuq endi tigelesonaq ninigi unonub. <sup>11</sup> Yesus a tal ai bul. Ninigi tal gereiyo qaji tamo bul. Ninigi na tal ai di arqsibqa uge qa marsib taqal waiyeb. Onaqa Qotei na olo tal ai di osiqa tal singilatqajqa deqa tumaq di tigeltej unu. <sup>12</sup> Ninigi quiy. Tamo bei aqa ñam na Qotei na iga elenqasai. Yesus aqa ñam na qujai Qotei na iga elenqas. Amqa iga padalqasai. Iga elenqajqa tamo bei saiqoji. Sawa bei beiq di Qotei na tamo bei iga osorgosai bole sai.”

<sup>13</sup> Pita Jon wo nanqi singila na anjam di maroqneb nanqi ulaosai. Deqa Juda tamo kokba nanqi tulan prugeb. Di kiyaqa? Nanqi qalieeb, nanqi aiyel nami skul beiq gilosai. Nanqi tamo lanaj. Degsib qalieosib poinjrej, nanqi aiyel nami Yesus ombla laqneb. <sup>14</sup> Tamo singa qandamyonaq olo boleej qaji a Pita Jon wo nanqo areq di tigelesonaq Juda tamo kokba nanqi unsibqa anjam bei kamba marqa keresaiinjrej.

<sup>15</sup> Deqa nanqi na Pita Jon wo minjrnabqa taqal beiq gilnabqa nanqi segi qairosib mareb, <sup>16</sup> “Iga nanqi aiyel kiyernjrqom? Nanqi aiyel manwa kobaquja yonubqa Jerusalem tamo ungasari kalil nanqi quekritonub. Deqa iga gisan qa marqa keresai. <sup>17</sup> Unqum, iga na nanqi aiyel Yesus aqa ñam mare mare laqajqa saidnjrqom. Yimqa nanqo anjam kobaqasai.” <sup>18</sup> Juda tamo kokba nanqi degsib qairosib nanqi aiyel olo metnjrnab bonabqa singila na saidnjrsib minjreb, “Ninigi aiyel olo Yesus aqa ñam maroqnaib. Medabu getentiy.”



<sup>19</sup> Onaqa Pita Jon wo nanġi na kamba minjreb, “Aqo aiyel Qotei aqa anjam dauryqa uratosim olo nunġo anjam dauryqom di Qotei aqa nġamgalaq di kumbra bole e? Ningi segi mariy. <sup>20</sup> Aqo aiyel medabu getentqa keresai. Qotei aqa maŋwa kalil gago nġamdamu na unoqnem qaji deqa iga mare mare laqŋqom. Aqa anjam kalil gago dabkala na quoqnem qaji di dego iga mare mare laqŋqom. Iga uratqa keresai.”

<sup>21</sup> Onaqa Juda tamo kokba nanġi na olo nanġi aiyel Yesus aqa nġam marqajqa siŋgila na saidnjrsib uratnjrnab gileb. Nanġi aiyel na tamo siŋga qandamo boletonabqa tamo unġasari tulaŋ gargekoba nanġi unsibqa Qotei aqa nġam soqtoqneb. Deqa Juda tamo kokba nanġi tamo unġasari nanġi ulainjreb. Nanġi nanġo aiyel jejamuq di une bei babtosai deqa nanġi nġumqa keresai. Utru deqa nanġi tamo unġasari nanġi ulainjrsib nanġi aiyel uratnjrnab gileb. <sup>22</sup> Tamo siŋga qandamo nanġi aiyel na boleteb qaji di aqa wausau 40.

*Yesus aqa wau tamo nanġi Qotei pailieb*

<sup>23</sup> Juda tamo kokba nanġi na nanġi aiyel uratnjrnab gilsib tamo unġasari Yesus qa nanġo areqalo siŋgilateb qaji nanġoq di branteb. Brantosib anjam kalil atra tamo kokba ti tamo gate ti nanġi na minjreb qaji deqa sainjreb. <sup>24</sup> Sainjrnab qusibqa tulaŋ areboleboleinjrej. Deqa nanġi kalil medabu qujaitosib Qotei endegsib pailieb, “O Tamo Koba, ni na laŋ ti mandam ti yuwal ti inġi inġi kalil ti atem unub. <sup>25</sup> Nami ni na Mondor Bole qarinyonamqa aisiq ino wau tamo agi gago moma Devit aqa medabu siŋgilatetonaqa endegsi marej,

‘Kiyaqa sawa bei bei qaji nanġi minjin oqetnjreqnu?

Kiyaqa nanġo areqalo tulaŋ nanarieqnaq nanġi Qotei ti gotqajqa qaireqnu?

<sup>26</sup> Sawa bei beiq di mandor kokba nanġi tigeloqnsib Kristus qalib moiqajqa deqa siŋgilaeqnub.

Gate kokba nanġi na Tamo Koba aqa Kristus wo qoto itnjrqajqa deqa koroeqnub.’

<sup>27</sup> “O Qotei, Devit aqa anjam di aqa damu gam endena brantej. Herot wo Pontius Pailat wo Israel nanġi ti sawa bei bei qaji nanġi ti kalil qure endia koroosibqa ino segi wau tamo bole Yesus ni nami giltem qaji a ugeugeiyqa marsibqa anjam kereteb. <sup>28</sup> O Qotei, ni nami marem, ‘Nanġi Yesus qalib moiqas.’ Ino anjam di agi nanġi dauryosib Yesus qalnab moiyej. Nanġo segi areqalo na nanġi Yesus qalosai. Ino siŋgila na ti ino areqalo na ti nanġi Yesus qalnab moiyej.

<sup>29</sup> O Tamo Koba, Juda tamo kokba nanġi minjin oqetnjrqoqa iga ula egwajqa anjam mergonub di ni unime. Iga ino wau tamo unum. Deqa ni iga siŋgila egoqnimqa iga ino anjam maroqŋqom. Iga ulaqasai. <sup>30</sup> Ni iga siŋgila egoqnimqa iga

ino wau tamo bole Yesus aqa ñam na tamo ungasari nanği boletnjroqñqom. Osim ino manwa kokba babtoqñqom.”

<sup>31</sup> Nanği degsib Qotei pailyosib koboonaqa tal nanği koroe-soqneb qaji di renğinej. Onaqa Mondor Bole aisiqa nanği singila enjrnaqa nanği Qotei aqa anjam mare mare laqneb. Nanği ulaosai.

*Yesus aqa tamo ungasari nanği na nanço Kristen was nanği aqaryainjroqneb*

<sup>32</sup> Bati deqa tamo ungasari Yesus qa nanço areqalo singilateb qaji nanği kalil are qujaitoqnsib soqneb. Tamo bei na aqa inji inji saiaosiq aqa segi qa marosaiyoqnej. Nanço inji inji kalil di koba qaji degsib maroqnsib segi segi qa jei jeiyoyqneb. <sup>33</sup> Tamo Koba Yesus aqa anjam maro tamo kalil nanği aqa wau ojoqneb. A subq na tigelej anjam di nanği mare mare laqneb. Nanço anjam di singila ti. Nanği mare mare laqnab Qotei a nanği qa are tulan boleyoyqnej. <sup>34-35</sup> Tamo ungasari Yesus qa nanço areqalo singilateb qaji nanği kalil inji kere soqneb. Bei a inji qa truquosaiyoqnej. Di kiyayaqa? Nanği nanço segi mandam ti tal ti qarinyeqnabqa tamo qudei na awaiyoqnsib silali enjroqneb. Enjreqnab silali di osi boqnsib Yesus aqa anjam maro tamo nanço banq di ateqnab nanği na tamo inji inji saiyoji nanği jeisib enjroqneb.

<sup>36</sup> Nanço ambleq di tamo bei soqnej aqa ñam Josep. Aqa ñam bei Barnabas. Yesus aqa anjam maro tamo nanği na ñam di waiyeb. Aqa ñam di aqa damu, “Tamo are singilatetnjro qaji.” Barnabas a Livai aqa leñ. A Saiprus nui qaji. <sup>37</sup> Aqa mandam bei soqnej di tamo qudei na awaiyosib silali yonab osi gilsiq Yesus aqa anjam maro tamo nanço banq di atej.

## 5

*Ananaias aqa njanj Safaira wo nanği Qotei gisanjyeb*

<sup>1-2</sup> Ariya tamo bei soqnej aqa ñam Ananaias. Aqa njanj aqa ñam Safaira. Ananaias aqa mandam bei tamo qudei na awaiyosib silali yonabqa a silali di osiqa aqa njanj wo anjam keretosib silali oto aqa segi qa ulitosiq oto bei osi gilsiq Yesus aqa anjam maro tamo nanço banq di atej. <sup>3</sup> Onaqa Pita na minjej, “Ananaias, kiyayaqa Satan a ino are miligiq aiyoqa ni Mondor Bole a gisanjonum? Ino mandam awaiyonub silali osim kiyayaqa oto bei ino segi qa marsim ulitonum? <sup>4</sup> Nami ino mandam awaiyosaisonabqa di ino segi mandam. Ariya bunuqna mandam awaiyosib silali emonub di ino segi silali. Ni segi na silali di taqatosim ni wau kiye yqa osim ye. Ni kiyayaqa gisanjosim maronum, ‘Silali kalil agi osi bonum?’ Ni kiyayaqa kumbra uge di yqajqa are qalonum? Ni que. Ino gisanj anjam di ni na tamo nanği minjrosai. Ni Qotei gisanjyqa

osim minjonum.”<sup>5-6</sup> Pita a degsi marnaqa Ananaias a anjam di qusiq moiyoqujatosiq mandamq di ulonej. Onaqa angro wala nanji bosib aqa jejamu gara na dalaosib osi gilsib subq ateb. Subq atnabqa tamo ungasari kumbra deqa queb qaji nanji tulan ulaugeteb.

<sup>7</sup> Sokiñalayonaq Ananaias aqa njaun bej. Aqa gumbulun moiyej di a qaliesai. <sup>8</sup> A bonaqa Pita na minjej, “Ni mare. Ni ino gumbulun wo nungo mandam bei tamo qudei na awaiyosib silali engonub qaji agi ino gumbulun na osi bosiq ebqo endi segi e?” Onaqa minjej, “Od. Silali kalil agide.” <sup>9</sup> Degsi minjnaqa Pita na minjej, “Kiyaqa ni ino gumbulun wo anjam keretosib kumbra uge di yonub? Ningi are qalonub, Tamo Koba aqa Mondor a nungo kumbra di unqasai. Degosib ningi yonub. Ni que. Angro wala ino gumbulun subq atonub qaji nanji bosib siranmeq di tigelonub. Nanji ni dego qoboimosib gilsib subq atqab.” <sup>10</sup> Degsi minjnaqa a dego moiyoqujatosiq Pita aqa singaq di ulonej. Onaqa angro wala nanji bosib a moiyej di unsib qoboimosib gilsib aqa gumbulun aqa areq di subq ateb. <sup>11</sup> Onaqa tamo ungasari kalil kumbra deqa queb qaji nanji tulan ulaugeteb. Kristen kalil nanji dego ulaugeteb.

*Yesus aqa anjam maro tamo nanji manwa gargekoba babtoqneb*

<sup>12</sup> Bati deqa Qotei na Yesus aqa anjam maro tamo nanji singila enjreqlaqa nanji manwa gargekoba yeqnaabqa tamo ungasari nanji unoqneb. Tamo ungasari Yesus qa nanjo areqalo singilateb qaji nanji kalil are qujaitoqnsibqa atra tal meq di koroqnsibqa Qotei qa louoqneb. Tal me di aqa ñam Solomon aqa Tal Me. <sup>13</sup> Jerusalem dia tamo ungasari lanja lanaj kalil nanji na tamo ungasari Yesus qa nanjo areqalo singilateb qaji nanjo ñam soqtetnjroqnsibqa nanji ti koba na koroqajqa ulaoqneb. <sup>14</sup> Tamo ti unja ti tulan gargekoba nanji Tamo Koba Yesus qa nanjo areqalo singilatoqnsib boqnsib tamo ungasari nami Yesus qa nanjo areqalo singilateb qaji nanjo miligiq aieqnaab nanji tulan kobaoqneb. <sup>15</sup> Kobaoqnsib nanjo ma tamo nanji saperaq di nejotnjroqnsib qoboinjroqnsib gam qalaq di atelenoqneb. Di kiyaaqa? Pita a gam na walwelosim giloqnmqa aqa sen qunun na nanji waburtnjroqnmqa nanjo ma kobooqnaqajqa deqa. <sup>16</sup> Qure kiñilala kalil Jerusalem jomomq di soqneb qaji dena dego tamo mainjro qaji nanji ti tamo mondor uge uge na ojeleno qaji nanji ti joqsib boqneb. Joqsib beqnaab nanji kalil boleooqneb.

*Lan angro na Yesus aqa anjam maro tamo nanji tonto talq dena oqeq atej*

17-18 Yesus aqa anjam maro tamo nanği kumbra degyeqn-abqa atra tamo gate aqa wau qujai agi Sadyusi nanği ti koba na unsib minjin oqetnjrnaqa nanği ojelenosib tonto talq di breinjrnab soqneb. <sup>19</sup> Sonabqa qoloej. Onaqa Tamo Koba aqa lan angro bei aisiqa tonto tal siranme waqtosiq nanği joqsıq oqedeb. Oqedonabqa lan angro na minjrej, <sup>20</sup> “Ninği gilsib atra tal miligiq di tigelosib tamo unğasari nanği nambile gaigai sqajqa anjam palontosib minjroqniy.” <sup>21</sup> Onaqa nanği lan angro aqa anjam di dauryosib nobqolo malu qameqnaqa atra tal miligiq gilsib dia tigelosib tamo unğasari nanği Qotei aqa anjam palontosib minjroqneb.

Bati deqa atra tamo gate aqa wau qujai ti nanği na Juda tamo kokba ti Israel tamo gate ti nanği metnjrnab bosib koroeb. Koroosib anjam keretosib nango qaja tamo nanği minjreb, “Ninği aisib Yesus aqa anjam maro tamo nanği tonto talq dena joqsib boiy.” <sup>22</sup> Onaqa qaja tamo nanği aisib tonto talq di brantosib nam ateb Yesus aqa anjam maro tamo nanği di sosai. Nanği degsi unsib deqa olo puluosib bosib Juda tamo kokba nanği minjreb, <sup>23</sup> “Iga aiyonum di tonto tal siranme qandimesonaq unonum. Tal taqato tamo nanği anğ ti siranmeq di tigelenab. Ariya iga siran waqtosim miligiq gilonum di iga tamo bei unosai.”

<sup>24</sup> Degsib minjrnabqa atra tamo kokba ti atra tal taqato tamo nango gate ombla na anjam di qusib are koba qalsib maroqneb, “Tamo nanği di kiyersib tonto tal uratosib jaraiyonub?” <sup>25</sup> Onaqa tamo bei bosıqa nanği minjrej, “Ninği quiy. Tamo ninği na tonto talq di breinjreb qaji nanği atra tal miligiq di sosıbqa anjam plalteq nab tamo unğasari nanği queq nub.” <sup>26</sup> Degsi minjrnaqa qaja tamo nanği ti atra tal taqato tamo nango gate ombla na atra tal miligiq gileb. Gilsib Yesus aqa anjam maro tamo nanği di sonab unjrsib ojelenosib joqsib gileb. Singila na ojsib gilosai. Lawo na joqsib gileb. Tamo unğasari nanği nriņosib meniņ osib nanği ñumaib deqa ulaosib lawo na joqsib gileb.

*Yesus aqa anjam maro tamo nanği aqa anjam marqajqa ulaosai*

<sup>27</sup> Joqsib gilsib Juda tamo kokba nango ulatamuq di tigelt-njreb. Tigelonabqa atra tamo gate na nanği nriņtnjrsıqa minjrej, <sup>28</sup> “Ninği Yesus aqa ñam mare mare laqajqa iga singila na saidņgem. Di ninği na olo mare mare laq nabqa tamo unğasari kalil Jerusalem endi unub qaji nanği quekriteq nub. Di segi sai. Ninği gago jejamuq di une qamoqnsib mareq nub, iga na Yesus namburbasq di qalnam moiyej.”

<sup>29</sup> Atra tamo gate na Yesus aqa anjam maro tamo nanği degsi minjrnaqa nanği Pita ombla na kamba minjeb, “Iga

Qotei aqa anjam segi dauryqom di kere. Iga tamo nanjo anjam dauryqasai. <sup>30</sup> Di bole, ningi na Yesus namburbasq di qalnab moiyej. Moinaqa gago moma utru nanjo Qotei na olo subq na tigeltej. <sup>31</sup> Yesus qujai di Qotei na lan qureq osi oqsiqu aqa ban woq di awotej. Deqa Yesus a gago Tamo Koba. A na qujai iga elenamqa iga padalqasai. Yesus qujai dena iga Israel tamo ungasari are bulyetgoqnsiqu gago une kobotetgeqnu. <sup>32</sup> Iga gago segi namdamu na Yesus aqa kumbra di unoqnem deqa mare mare laqnum. Mondor Bole a dego Yesus aqa kumbra di ubtosiq mareqnu. Mondor di agi Qotei na tamo ungasari aqa anjam dauryeqnub qaji nanji enjreqnu.”

*Gamaliel a Juda tamo kokba nanji dalnjrej*

<sup>33</sup> Onaqa Juda tamo kokba nanji Yesus aqa anjam maro tamo nanjo anjam di qusibqa minjin ani oqetnjrnaqa nanji numib morenqajqa maroqneb. <sup>34</sup> Onaqa nanjo ambleq dena Farisi tamo bei aqa nam Gamaliel a tigelej. A dal anjam qalie tamo kobaquja. Tamo kalil nanji bati gaigai a qa maroqneb, “A tamo bolequja.” A tigelosiqua Juda tamo kokba nanji minjrej, “Ningi mati tamo nanji endi minjrib taqal beiq gileb.” <sup>35</sup> Onaqa nanji taqal beiq gilnabqa Gamaliel na olo Juda tamo kokba nanji minjrej, “O Israel tamo, ningi na tamo nanji endi gulbe enjrqa osibqa mati gegerere are qaliy. <sup>36</sup> Ningi qalie, nami yala tamo bei aqa nam Teudas a tigelosiqua aqa segi nam soqtoqnsiqua maroqnej, ‘E tamo kobaquja.’ Degsi mareqnaqa tamo 400 a dauryoqneb. Onaqa Rom nanji na bosib a qalnab moinaqa tamo kalil a dauryoqneb qaji nanji segi segi jaraiyonab aqa wau koboej. <sup>37</sup> Bunuqna tamo ungasari nanjo nam sisiyo bati qa Galili qaji tamo bei aqa nam Judas a dego tigelosiqua Rom nanji ti qotqajqa maroqnsiqua tamo nanjo are tigeltetnjreqnaqa nanji a dauryoqneb. Onaqa Rom nanji na a qalnab moinaqa tamo kalil a dauryoqneb qaji nanji segi segi jaraiyeb. <sup>38</sup> Deqa ningi quiy. Ningi tamo nanji endi uratnjrib nanjo wau yoqnebe. Nanji nanjo segi areqalo na wau endi tigeltqab di nanjo wau koboqas. <sup>39</sup> Ariya nanji Qotei aqa areqalo na wau endi tigeltqab di ningi na nanji kobotnjrqa keresai. Ningi nanji numqab di ningi Qotei ti qotqab.”

Gamaliel na Juda tamo kokba nanji degsi minjrnaqa nanji aqa anjam di dauryosib Yesus aqa anjam maro tamo nanji numqa urateb. <sup>40</sup> Osib nanji metnjrnabqa nanji olo bonabqa bu toqon na nanji kumbainjrsib nanji Yesus aqa nam olo marqajqa singila na saidnjrsib nanji uratnjreb. <sup>41</sup> Onaqa nanji koro sawa di uratosib gileb. Qotei a are qalej, nanji Yesus aqa nam qa jaqatinj ti jemai ti oqa kere. Deqa nanji areboleboleinjrnaq gileb. <sup>42</sup> Nanji Yesus aqa anjam mare

mare laqajqa uratosaiogneb. Nanği bati gaigai Yesus aqa anjam plaltoqnsib maroqneb. Atra tal miligiq di, tamo unğasari nanço segi segi talq di nanği anjam endegsib maroqneb, “Yesus a bole Kristus.”

## 6

### *Tamo 7 nanği inği jeiyu wau ojqaqqa giltnjreb*

<sup>1</sup> Bati deqa Juda tulañ gargəkoba nanği are bulyoqnsib Yesus qa nanço areqalo siñgilatogneb. Juda qudei nanği Grik qaji. Deqa nanği Grik anjam qalie. Juda qudei nanği Hibru qaji. Deqa nanği Hibru anjam qalie. Bati bei Grik qaji Juda nanği tigelosib Hibru qaji Juda nanği qa nriñeb. Di kiyaqqa? Inği jeiyu batieqnaqa Hibru qaji Juda nanği na Grik qaji Juda nanço unça qobul nanği uratnjroqnsib nanço segi unça qobul nanği inği jeisib enjroqneb. <sup>2</sup> Deqa Yesus aqa anjam maro tamo 12 nanği na tamo unğasari kalil Yesus dauryogneb qaji nanği koroinrsib minjreb, “Iga Yesus aqa anjam maro tamo unum. Gago wau qujai agi iga Qotei aqa anjam mare mare laqnum. Iga gago wau di uratosim inği jei jeiyogqasai. <sup>3</sup> Deqa ijo was, niñgi tamo 7 nunço ambleq dena giltnjriy. Tamo endeqaji giltnjriy. Nanço kumbra tulañ boledamu. Qotei aqa Mondor a nançoq di sosisqa nanği siñgilatnjreqnu. Nanği powo koba ti unub. Niñgi tamo deqaji giltnjrsib wau enjribqa nanği na inği jeiyetngogqab. <sup>4</sup> Iga Yesus aqa anjam maro tamo unum deqa iga bati gaigai Qotei pailyoqnsim Yesus aqa anjam mare mare laqnoqom. Gago wau bole agide.”

<sup>5</sup> Onaqa Kristen nanği kalil anjam di qusib odosib tamo 7 nanği giltnjreb. Bei aqa ñam Stiven. Stiven aqa areqalo kalil Yesus qa siñgilatognej. A areqalo aiyeltosaiognej. Mondor Bole a Stiven aqa are miligiq aiyognsiqqa siñgilatognej. Bei aqa ñam Filip. Bei Prokorus. Bei Nikanor. Bei Timon. Bei Parmenas. Bei Nikolas. Nikolas aqa qure utru Antiok. A Juda tamo sai. A nami Jerusalem bosiqqa Juda nanço lou dauryqa marsiq nanço miligiq aiyej. <sup>6</sup> Kristen nanği na tamo 7 nanği di giltnjrsib Yesus aqa anjam maro tamo nanço ulatamuq di tigeltjnrb nanço gateq di bañ atsib nanği qa Qotei pailyeb.

<sup>7</sup> Bati deqa Qotei aqa anjam tulañ kobognej. Jerusalem dia tamo unğasari tulañ gargəkoba nanği Yesus qa nanço areqalo siñgilatogneb. Atra tamo gargəkoba nanği dego Qotei aqa anjam dauryoqnsibqa Yesus qa nanço areqalo siñgilatogneb.

### *Stiven a Juda tamo kokba nanço ulatamuq di tigelej*

<sup>8</sup> Qotei a Stiven qa are tulañ boleyognsiq a siñgila yeqnaqa a na tamo unğasari kalil Jerusalem di soqneb qaji nanço ñamdamuq di mañwa gargəkoba yognej. <sup>9</sup> Onaqa bati bei Juda tamo qudei nanği tigelosib Stiven ombla anjam na qotogneb.

Tamo nanġi di Juda nanġo Qotei tal beiq di gaigai louoqneb. Nanġi nami kanġal tamo sosibqa olo bunuqna nanġo segi wau ojoqneb deqa nanġi Qotei tal dia louoqneb. Qotei tal di aqa ñam endegsib waiyeb, “Tamo Nanġo Segi Wau Ojo Qaji Nanġo Qotei Tal.” Tamo nanġi di Stiven ombla anjam na qotoqneb. Nanġi nami Sairini qure ti Aleksandria qure ti Silisia sawa ti Esia sawaq dena ti belenġeb. <sup>10</sup> Nanġi Stiven ombla anjam na qoteqna Qotei aqa Mondor na Stiven powo koba yoqnej deqa nanġi aqa anjam qalotqa keresai. <sup>11</sup> Deqa nanġi lumu na tamo qudei nanġi metnjrnab bonab minjreb, “Ninġi Stiven aqa jejamu lanġa gisanġiy.” Degyosib silali enjreb. Silali enjrnab nanġi gisanġosib mareb, “Stiven a Moses Qotei wo qa misilinġ anjam mareqnaq iga quoqnem.” <sup>12</sup> Nanġi anjam degsib marnabqa Juda tamo unġasari nanġi ti Juda gate nanġi ti dal anjam qalie tamo nanġi ti qusibqa Stiven qa minjinġ oqetnjrnaqa a oġeb. A ojsib koro sawaq osi gilsib Juda tamo kokba nanġo ulatamuq di tigelteb. <sup>13</sup> Tigeltosib tamo qudei nanġi dego osi bonab nanġi Stiven aqa jejamu lanġa gisanġosib mareb, “Tamo endi a bati gaigai Qotei aqa atra tal qa ti Moses aqa dal anjam qa ti misilinġ anjam mareqnu. <sup>14</sup> Bati bei a endegsi marnaq iga quem, ‘Nasaret tamo Yesus a na atra tal endi niñaqyosim Moses aqa dal anjam iga nami egej qaji di dego kobotosim dal anjam bunuj egwas.’” <sup>15</sup> Onaqa tamo kalil koro sawaq di awesoqneb qaji nanġi Stiven koqyoqneb. Koqyoqnsib aqa ulatamu lanġ anġro aqa ulatamu bulonaq uneb.

## 7

### *Stiven a Qotei aqa anjam plaltej*

<sup>1</sup> Onaqa atra tamo gate a na Stiven nenemyej, “Nanġo anjam maronub di bole e?” <sup>2-3</sup> Onaqa Stiven a kamba marej, “O ijo was ijo abu ti ninġi ijo anjam endi quiy. Nami gago moma utru Abraham a Mesopotemia sawaq di sosiqa Haran qureq gilosaisonaqa gago Qotei lanġ qureq di unu qaji a Abraham aqa ulatamuq di brantosiq minnej, ‘O Abraham, ni ino sawa ti ino was nanġi ti uratnjrsimqa mandam mutu bei e na osormitqa deq gilime.’” <sup>4</sup> Qotei na Abraham degsi minjnaqa a tigelosiq Kaldia sawa uratosiq Haran qureq gilsiq di soqnej. Bunuqna aqa abu moinaqa Qotei na a qarinjonaq mandam mutu iga bini unum qaji endeq bosiq soqnej. <sup>5</sup> Sonaqa Qotei na mandam mutu endi a yosai. A anġro saiġoji sonaqa Qotei na minnej, ‘Bunuqna e na ni ti ino moma kalil nġambabqab qaji nanġi ti mandam mutu endi enġwai.’ <sup>6</sup> Osiq minnej, ‘Mati ino moma kalil nanġi sawa beiq di yaunġ tamo soqnbqa sawa deqaji tamo nanġi na wau koba enjroqnsib ugeugeinjroqnbqa

wausau 400 gilqas. <sup>7</sup> Yimqa e na kamba sawa deqaji tamo nanği peginjrsiy ñumitqa ino moma nanği sawa di uratosib bosib mandam mutu endia sosib e qa louoqnqab.’ Qotei na nami Abraham degsi minjej. <sup>8</sup> Osiqa Abraham ombla anjam qosisiqa minjej, ‘Ni muluñ unqam.’ Degsi minjnaqa Abraham aqa anğro Aisak a ñambabonaqa bati 8 qa muluñ waiyej. Bunuqna Aisak aqa anğro Jekop a ñambabej. Olo bunuqna Jekop aqa anğro 12 nanği dego ñambabeb. Di gago moma utru 12.

<sup>9-10</sup> “Onaqa bati bei Jekop aqa anğro 11 nanği nanço was Josep qa ugeosib a ojsib tamo qudei nanço banq di atnabqa nanği na silali enjrsib Josep osi sumsib Isip sawaq di uratonab soqnej. Josep a Isip sawaq di gulbe ti sonaqa Qotei na aqaryaiyoqnsiqa geregereiyoqnej. Osiqa Josep powo koba yeqnaqa Isip nanço mandor a di unoqnsiqa Josep qa are boleiyonaq soqnej. Deqa a na Josep minjej, ‘Ni gate koba sosim Isip sawa taqatqam.’ Degsi minjej deqa Josep a Isip sawa taqatoqnej. A mandor aqa tal dego taqatoqnej.

<sup>11</sup> “Bunuqna Isip sawa ti Kenan sawa ti nanği mam koba osib gulbe kobaquja iteb. Gago moma utru nanği dego inği sainjrej. <sup>12</sup> Onaqa Jekop a endegsi quej, ‘Isip sawaq di inği unu.’ Qusiqa gago moma utru nanği qarijnjnaq inği awaiyqajqa Isip sumeb. Sumsib inği awaiyosib olo puluosib beb. <sup>13</sup> Bunuqna Jekop na gago moma utru nanği olo inği awaiyqa qarijnjnaq Isip sumeb. Sumsib nanço was Josep aqa ulatamuq di tigelonab a segi qa babtonaq nanği a qa poinjrej. Josep a aqa abu qa ti aqa was nanği qa ti dego babtonaq Isip nanço mandor a nanği qa poinjrej. <sup>14</sup> Deqa Josep na aqa was nanği olo qarijnjnaq aisib Josep aqa leñ kalil aqa abu Jekop ombla joqsib Isip sumeb. Tamo ti unğa ti kalil turtonab 75. <sup>15</sup> Bati deqa Jekop a Isip sumsqa dia sosisq moiyej. Gago moma utru nanği dego dia moreñeb. <sup>16</sup> Onaqa nanço qusa osi bosib Sekem qureq di subq ateleneb. Sub di nami Abraham a Hamor aqa anğro nançoq dena awaiyej.

<sup>17</sup> “Ariya Israel nanği Isip uratosib mandam mutu iga bini unum qaji endeq bqajqa bati jojomej. Bati jojomonaqa Israel nanği tulañ gargekobaeb. Agi nami Qotei na Abraham minjej, ‘Bunuqna e na ni ti ino moma nanği ti mandam mutu endi enğwai.’ <sup>18</sup> Bati deqa Isip nanço mandor bei tigelej. A Josep qa poiyoşai. <sup>19</sup> Deqa a na gago moma nanği gisa gisañjroqnsiq ugeugeinjroqnej. Nanço anğro ñambabeqnaq a na nanği minjreqnaq osi giloqnsib nañuq di uratnjreqnaq moreñoqneb. <sup>20</sup> Bati deqa Moses a ñambabej. Qotei a Moses qa are tulañ boleiyonaq soqnej. Bai qalub qa Moses aqa ai abu nanço talq di a ulitosib geregereiyoqneb. <sup>21</sup> Bunuqna nanği Moses osib



yaq di uratonab sonaqa Isip nanjo mandor aqa angro sebin na itosiq aqa segi qa marsiq a boletonaq tamo kobaqujaej. <sup>22</sup> A Isip nanjo skul kobaq giloqnsiq powo koba oqnej. Deqa a tamo singila koba soqnej. A singila na wauoqnsiqa anjam maroqnej.

<sup>23-24</sup> “Moses aqa wausau 40 kereonaqa a na aqa was Israel nanji unjrqaqja marsiqa gilsiq nanjoq di brantej. Branton-aqa Isip tamo bei na Israel tamo bei qalougeteqnaq unsiqa a kamba Israel tamo di aqaryaiyosiq Isip tamo qalnaq moiyej. <sup>25</sup> Osiqa are qalej, ‘Ijo was Israel nanji ijo kumbra di unsib endegsi poinjrqa, “Bole, Qotei a Moses giltimqa a na iga joqsim Isip sawa uratqom.” ’ Nanji degsi poinjrosai. <sup>26</sup> Nebeonaqa Moses a olo walwewosi gilsiq Israel tamo aiyel qoteqnaq unjr-siqa nanji aiyel potnjrsiq minjrej, ‘Ninji aiyel was wo. Kiyaqa ninji qoteqnaq?’ <sup>27</sup> Degsi minjrnaqa tamo aqa was qaloqnej qaji a na tigelosiq Moses aqa ban gotranjetosiq minjej, ‘Yai na ni gago gate koba atqoqa iga taqatgosim gago une gereiyqa bonum? <sup>28</sup> Ya ni na Isip tamo bei qalnam moiyej degsim e olo lubsim moiyoqbqam e?’ <sup>29</sup> Onaqa Moses a anjam di qusiqa a ulanjosiqa gilsiq Midian sawaq di yaunej. Di sosiqa unja osiqa angro mel aiyel nambabtnjrej.

<sup>30</sup> “A di sosiqa wausau 40 koboonaqa Sainai mana aqa wadaw sawaq di nam luwit yusiq puloneqnaqa Qotei aqa lan angro bei nam pulonq di sonaq unej. <sup>31-32</sup> Unsiqa are koba qalsiqa olo geregere unqa osiqa nam luwit utruq gilej. Gilnaqa nam pulon miligiq di Tamo Koba a na anjam endegsi minjej, ‘O Moses, e ino moma nanjo Qotei. E Abraham aqa Qotei. E Aisak aqa Qotei. E Jekop aqa Qotei.’ Degsi minjnaqa Moses a qusiqa ulaugetosiq gindagindanej. Osiqa nam pulon di unqa uratosiqa turuej. <sup>33</sup> Onaqa Tamo Koba a na olo minjej, ‘Mandam mutu kiñala ni tigelejunum endi getento koba. Deqa ino singa tatal piqt. <sup>34</sup> Ni que. Ijo segi tamo ungasari nanji Isip sawaq di gulbe koba ti sonab e unjreqnum. Nanji akamkobaqnaq e queqnum. Deqa e na nanji Isip nanjo mandor aqa banq dena elenqai. E deqa ni mermqa bonum. Deqa ni tigel. E ni qarimmitqa Isip aiqam.’ Qotei na Moses degsi minjej.

<sup>35</sup> “O ijo was, Moses qujai di nami Israel nanji na qoreiyosib minjeb, ‘Yai na ni gago gate koba atqoqa iga taqatgosim gago une gereiyqa bonum?’ Agi a qujai Qotei na gate koba atsiqa qarinyonaqa a Israel nanjoq aisiqa aqaryainjrej. Lan angro nam luwitq di sosiqa Moses aqaq di brantej qaji a Moses singilatonaq a kumbra di yej. <sup>36</sup> Moses qujai dena Isip aisiq dia manwa gargekoba yoqnej. Osiqa Israel nanji joqsiqa Isip uratosib gilsib wadaw sawaq di, Yuwal Lentq di Moses na

manwa gargekoba yeqnaqa wausau 40 koboej. <sup>37</sup> Moses qujai dena Israel nanği minjrej, ‘Bunuqna Qotei na aqa medabu o qaji tamo bei e bul nunğo ambleq dena tigeltimqa a na ninği anjam mernğoqnqas.’ <sup>38</sup> Moses qujai dena Israel nanği joqsiq wadau sawaq di korooqneb. Di gago moma nanği. Moses qujai di Sainai manaq oqsiq dia lan anğro bei na anjam minjnaqa a ombla soqneb. Sosibqa Moses a anjam nambile unu qaji di Qotei aqaq dena yayisiqa gago moma nanği enjrej.

<sup>39</sup> ‘Ariya Moses a Sainai mana goge di sonaqa gago moma nanği na aqa anjam dauryqa uratosib a qoreiyosib olo pulosib Isip aiqajqa maroqneb. <sup>40</sup> Osib atra tamo gate Aron endegsib minjeb, ‘Ni gago qotei qudei gereiyetgimqa nanği na iga joqsib puluosim Isip olo aiqom. Moses agi iga Isip dena joqsi bej qaji bini a qabitqo kiyo di iga qaliesai.’ Nanği na Aron degsib minjeb. <sup>41</sup> Minjsib bati deqa nanği na makau sigitosib aqa sulum gereiyosib gisan qotei di atraiyosib areboleboleinjroqnej. <sup>42</sup> Nanği kumbra degyeb deqa Qotei na nanği qoreinjrnaqa nanği seņ ti bai ti bongar ti binjinroqneb. Nanğo kumbra deqa Qotei aqa medabu o qaji tamo nanği bunuqna endegsib nenğrenyeb, ‘O Israel tamo unğasari, ninği wausau 40 wadau sawaq di sosibqa makau ti kaja ti numoqnsib gisan qotei nanği atrainjroqneb. Ninği e atraibosaiqneb. <sup>43</sup> Ninği gisan qotei Molek aqa tal ti gisan qotei Refan aqa bongar ti sigitosib nanğo sulum gereiyosib wadau sawaq di osi laqnsib nanği binjinroqneb. Nunğo une deqa e ninği winğitqa ninği sawa endi uratosib Babilon qure taqal beiq gilsib di sqab.’ Qotei aqa medabu o qaji tamo nanği anjam degsib nenğrenyeb.

<sup>44</sup> ‘Gago moma nanği wadau sawaq di sosibqa Qotei aqa tal gara na gereiyo qaji di osi laqneb. Tal di Qotei na nami sigitosiqa Moses osoryonaqa degsi gereiyej. Tal dia Qotei na aqa anjam bole babtoqnej. <sup>45</sup> Bunuqna gago moma nanği tal di onabqa Josua na nanği joqsi bosiqa mandam mutu endia soqneb. Sonabqa Qotei a Josua minjnaqa a na sawa bei bei qaji nanği winjrnaq jaraiyonabqa Qotei a gago moma nanği mandam mutu endi enjrej. Bati deqa gago moma nanği Qotei aqa tal di osi bosib mandam mutu endia atnab soqnej gilsigilsiq Devit aqa batiej. <sup>46</sup> Qotei a Devit qa are boleiyonaq soqnej deqa Devit a endegsi pailyej, ‘O Jekop aqa Qotei, ni e odbimqa e ni sqajqa tal kobaquja gereiyetmqai.’ <sup>47</sup> Ariya a tal gereiyosai. Bunuqna Devit aqa niri Solomon a na tal di Qotei gereiyetej.

<sup>48</sup> ‘O was ninği quiy. Qotei Goge Koba a tal tamo na gereiyo qaji dia sqasai. Aqa medabu o qaji tamo bei a nami anjam endegsi marej, <sup>49</sup> ‘Tamo Koba a marqo, ‘Lan qure a ijo awo

jaram koba. Mandam a ijo singa atqajqa sawa. Deqa e sqajqa tal ningi na gereiyetbqa keresai. E aqaratqajqa sawa bei sosai. <sup>50</sup>E ijo segi ban na inği inği kalil di gereiyem unu.” ’ ’

<sup>51</sup>Stiven a anjam kalil di marekritisıq olo Juda tamo kokba nanği singila na endegsi minjrej, “Ningi anjam gotranjo ani tamo. Nunjo are Qotei aqaq di sosai. Ningi sawa bei bei qaji nanği bul. Ningi Qotei aqa anjam quqwa urateqñub. Ningi bati gaigai Mondor Bole aqa anjam dego quqwa urateqñub. Nunjo moma nanği kumbra deqaji yoqñeb agi ningi na olo yeqñub. <sup>52</sup>Qotei aqa medabu o qaji tamo nanği na nunjo moma nanği anjam endegsib minjroqñeb, ‘Kumbra Bole Yeqñu Qaji Tamo a bqas.’ Degsib minjreñab nanği quqwa uratoqñeb. Osib Qotei aqa medabu o qaji tamo kalil nanği ugeugeinjroqñsib ñumoqñeb. Bei uratosai oqñeb. Ariya tamo di a bonaqa ningi na nunjo moma nanjo kumbra uge di dauryosib agi tamo di ojsib jeu tamo nanjo banq di ateb. Atnabqa nanği na qalñab moiyej. Tamo di agi Yesus. <sup>53</sup>Moses a lan anğro nanjo banq dena dal anjam yainjrej. Dal anjam di ningi na osib olo dauryqa urateqñub.” Stiven a Juda tamo kokba nanği degsi minjrej.

### *Nanği Stiven meniñ na qalsib moiyoñeb*

<sup>54</sup>Onaqa Juda tamo kokba nanği Stiven aqa anjam di qunab are qametnjrnaqa minjin ani oqetnjrnaqa qalagei anjam atoqñej. <sup>55</sup>Bati qujai deqa Mondor Bole na Stiven singila yonaqa a lan goqe tarosiqa Qotei aqa rian koba unej. Unsiqa Yesus a dego Qotei aqa ban woq di tigelesonaq unej. <sup>56</sup>Osiqa Juda tamo kokba nanği minjrej, “Ningi quiy. Lan waqwoqa Tamo Anğro a Qotei aqa ban woq di tigelesonaq e unonum.”

<sup>57</sup>Stiven a nanği degsi minjrnaqa nanği kalil aqa anjam di quqwa uratosib tulan murqumyosib nanjo dabkala ban na getentosib gurgur ti gilsib singila na Stiven oñeb. <sup>58</sup>Ojsib meniñ na qalib moiqajqa titosib qure polomq osi gileb. Osi gilsib meniñ na qaloqñeb. Tamo nanği nami Stiven aqa jejamu lanja gisanjeñb qaji nanği na nanjo gara jugo piqtelenosib anğro wala bei aqa ñam Sol aqa singaq di koroiyeñb. <sup>59</sup>Tamo kalil nanği meniñ na Stiven qaleqñabqa a moiqa osiqa endegsi pailyej, “O Tamo Koba Yesus, ni na ijo qunun ame.” <sup>60</sup>Degsi pailyosiqa singa tombol na awoosiq tulan maosiq marej, “O Tamo Koba, nanği e lubonub nanjo une deqa ni na kambatnjraime.” A degsi pailyosiqa moiyej.

## 8

1-2 Nanği Stiven qalñab moınaqa Sol a di unsiqa tulan areboleboleiyej. Osiqa marej, “Keretosib Stiven qalñub moiqa.” Onaqa tamo qudei Qotei aqa kumbra dauryoqñeb qaji nanği

Stiven moiyej deqa akamkobaoqnsib bosib aqa jejamu osib subq ateb.

### *Sol a Kristen nanġi ugeugeinjroqnej*

Bati deqa Jerusalem dia Juda tamo kokba nanġi Kristen nanġi qa minjin oqetnjrnaqa ugeugeinjroqneb. Deqa Kristen nanġi segi segi jaraiyosib Judia sawa ti Samaria sawa ti deq giloqneb. Yesus aqa anjam maro tamo nanġi segi Jerusalem di soqneb. Nanġi jaraiyosai. <sup>3</sup> Sol a dego Kristen nanġi qa minjin oqeqnaqa ugeugeinjroqnej. A nanġo segi segi talq giloqnsiqa tamo ti unġa ti ojelenoqnsiqa nanġi joqoqnsiq aiyooqnsiqa tonto talq di breinjroqnej.

### *Samaria qureq di nanġi Qotei aqa anjam mare mare laqneb*

<sup>4</sup> Yesus aqa tamo unġasari jaraiyeb qaji nanġi sawa bei beiq di Qotei aqa anjam bole palontoqnsib laqneb. <sup>5</sup> Filip a Samaria nanġo qure kobaqujaq gilsiq dia nanġi Kristus aqa anjam minjroqnej. <sup>6</sup> Minjroqnsiqa manġwa gargekoba yeqnaqa nanġi unoqnsib Filip aqa anjam dauryoqneb. <sup>7</sup> Tamo unġasari gargekoba nanġi mondor uge ti sonabqa Filip na mondor uge wiyetnjreqnaqa mondor uge nanġi nanġo jejamu uratoqnsib tulan lelenoqnsib jaraiyoqneb. Tamo unġasari jejamu lainjro qaji ti sinġa qandamnġro qaji ti gargekoba Filip na boletnjroqnej. <sup>8</sup> Deqa qure dia tamo unġasari nanġi tulan areboleboleinjroqnej.

<sup>9</sup> Qure dia quñam tamo bei soqnej aqa ñam Saimon. A nami quñam gargekoba yoqnsiqa aqa segi ñam soqtoqnsiqa maroqnej, “E tamo kobaquja.” Degyeqnaqa tamo unġasari qure dia soqneb qaji nanġi a ulaiyoqnsibqa binjiyoqneb. <sup>10</sup> Deqa tamo ñam ti tamo lanġaj ti kalil qure dia soqneb qaji nanġi Saimon aqa anjam quoqnsib dauryoqneb. Osib aqa ñam soqtoqnsib maroqneb, “Tamo endi a sinġila koba. A Qotei aqa sinġila na waueqnu.” <sup>11</sup> Nanġi degyoqneb. Di kiyaaqa? Saimon a nami quñam qaloqnsiq manġwa gargekoba yoqnej deqa. Degsi yonaq yonaq nanġi a unoqnsib binjiyoqneb. <sup>12</sup> Ariya Qotei na aqa segi tamo unġasari nanġi taqatnjrsim nanġo Mandor Koba sqas anjam bole di Filip a palontoqnsiqa Yesus Kristus aqa ñam mare mare laqnej. Laqnaqa tamo unġasari gargekoba nanġi quoqnsib are bulyoqnsib Yesus qa nanġo areqalo sinġilatoqneb. Degyeqnaqqa Filip na nanġi yansnjroqnej. <sup>13</sup> Onaqa Saimon a dego Filip aqa anjam di qusiqa quñam uratosiq are bulyosiq aqa areqalo Yesus qa sinġilatej. Deqa Filip na Saimon dego osiq yansej. Yansonaaqa Saimon a Filip dauryosiq laqnsiqa Qotei na Filip aqa ban na manġwa gargekoba yeqnaq unoqnsiqa tulan prugoqnej.

14-15 Bati deqa Samaria tamo ungasari gargekoba nanji Qotei aqa anjam osib Yesus qa nanjo areqalo singilatoqneb. Deqa Yesus aqa anjam maro tamo Jerusalem di soqneb qaji nanji degsi qusibqa Pita Jon wo qarinjrnab Samaria nanjoq gileb. Gilsib Samaria nanji qa endegsib Qotei pailyeb, “O Abu, ni na Samaria nanji ino Mondor Bole enjtime.” Degsib Qotei pailyeb. <sup>16</sup> Di kiyaaqa? Bati di Qotei aqa Mondor nanjoq aiyosaisoqnej deqa. Nanji Tamo Koba Yesus aqa ñam na segi yanso eb. <sup>17</sup> Ariya nanji aiyel Samaria nanji qa pailyoqnsibqa nanjo gateq di ban ateqnab nanji Qotei aqa Mondor oqneb.

<sup>18</sup> Pita Jon wo nanji degyeq nabqa Saimon a unsiqa silali osi bosiq nanji aiyel silali enjrqa osiqa minjrej, <sup>19</sup> “Ninji e dego singila ebibqa e kamba tamo qudei nanjo gateq di ban atoqnitqa nanji Mondor Bole oqñab.”

<sup>20</sup> Degsi minjrnaqa Pita na minjej, “Qotei aqa singila endi a na iga lanja egwo. Iga silali na awaiyosai. Deqa ni silali na awaiyqa maraim. Ni kumbra ugetonum. Deqa ni ino silali qoji padalqam. <sup>21</sup> Ino are miligi Qotei na unqo bolesai. Deqa ni iga ombla wau endi ojqa keresai. <sup>22-23</sup> E ni numonum ino are miligi tulan uge. Ino kumbra uge dena ni singila na ojejunu. Deqa ni are bulyosim ino kumbra uge di urat. Osim Tamo Koba pailyimqa a ino are uge di taqal waiyetmqas. Yim a ni qa olo are boleyqas.” <sup>24</sup> Onaqa Saimon na minjrej, “Ninji segi aiyel e qa Tamo Koba pailyiy. Yimqa e padalqa merbonub di e padalqasai.”

<sup>25</sup> Ariya Pita Jon wo nanji qure dia Tamo Koba aqa anjam bole palontoqnsib aqa kumbra kalil qa saoqneb. Osib bati bei olo puluosib Jerusalem aiyooqnsib Samaria nanjo qure qure kalilq di brantoqnsib Yesus aqa anjam bole minjre minjre aiyeq nab quoqneb.

*Filip a Itiopia tamo bei itosiq Yesus qa saiyoqnej*

<sup>26</sup> Onaqa Tamo Koba aqa lanj angro bei a Filip aqaq aisiqa minjej, “Ni tigelosim gam Jerusalem dena Gasa qureq aiyejunu deq aye.” Gam di wadau sawaq di unu. <sup>27</sup> Onaqa Filip a lanj angro aqa anjam di qusiqa tigelosiq gam deq aiyej. Aisiq ñam atej di Itiopia tamo bei a Qotei louqajqa Jerusalem gilsiq dena puluosiq Itiopia sawaq olo aiyeqnaqa gamq di turej. Tamo di a tamo kobaquja. A Itiopia nanjo mandor aqa ñoro taqatoqnej. Mandor di aqa ñam Kandasi. A uña. Aqa ñoro ti silali ti kalil tamo dena taqatoqnej. <sup>28</sup> Aqa karis goge di awoosiqa Qotei aqa medabu o tamo Aisaia aqa anjam nenngrenq di so qaji di sisiyoqnsiq aiyooqnej. <sup>29</sup> Onaqa Mondor na Filip minjej, “Ni gilsim karis di jojomye.” <sup>30</sup> Degsi minjnaqa Filip a ururosiq karis jojomyosiqa tamo di a Aisaia aqa

anjam sisiyeqnaqa qusiqa nenemyej, “Ni anjam sisiyeqnum di aqa damu poimqo e?” <sup>31</sup> Onaqa tamo dena minjej, “E kiyersiy anjam endi aqa damu poibqas? Tamo bei na anjam endi aqa damu plaltosim merbimqa e poibqas.” Osiqa Filip metonaqa a karis gogetosiqa ombla awoeb.

<sup>32</sup> Tamo di a Qotei aqa anjam endegsi sisiyoqnej, “A kaja du bul qalib moiqajqa osi gileb. Kaja nanqi jungum joqetnjreqnab mequmosib unub dego kere a mequmesoqnej. <sup>33</sup> Nanqi a tulan ugeugeiyosib gisanj anjam gargekoba aqa jejamuq di lanja qametoqneb. Deqa a mandamq endi olo sqasai. A angro saiqoji unu deqa tamo qudei na aqa angro bei qa marqa keresai.”

<sup>34</sup> Itiopia tamo dena anjam di sisiyekritosiq Filip minjej, “Ni e merbe. Qotei aqa medabu o qaji tamo aqa anjam endi yai qa nengrenyey? A segi qa kiyosimo tamo bei qa kiyosimo nengrenyey?”

<sup>35</sup> Onaqa Filip a anjam dena utru atsiq Qotei aqa anjam qudei ti turtosiq Yesus qa saiyosimoqnej. <sup>36</sup> Onaqa nanqi gam dauryosib aiyosimoqsim gam qalaq di ya bei sonaq unsibqa Itiopia tamo dena Filip minjej, “Ni une. Ya agide. Ingi bei na e getentbqa keresai. Deqa ni e yansbe.” <sup>37</sup> Onaqa Filip na minjej, “Ni are bulyosim ino areqalo kalil Yesus qa singilatqam di e ni yansmqai.” Onaqa minjej, “E ijo areqalo Yesus Kristus qa singilatqosim poibqo, a Qotei aqa Niri.”

<sup>38</sup> Degsi minjisiqa aqa karis tigeltosiq nanqi aiyel mandamq aisib Filip na a osiq yaq aisiq yansey. <sup>39</sup> Onaqa nanqi aiyel yaq dena tigelonabqa Tamo Koba aqa Mondor na Filip loumtosiq osi gilsiq sawa beiq di atnaqa Itiopia tamo a olo Filip unosai. A yanso ej deqa a tulan areboleboleiyonaqa gam dauryosiq aiyey. <sup>40</sup> Onaqa Filip a Asdot qureq di brantosiqa dena walweloqnsiq qure qureq di Yesus aqa anjam bole tamo ungasari nanqi minjroqnsiq gilsiq Sisaria qureq di brantej.

## 9

### *Sol a are bulyosiq Yesus qa aqa areqalo singilatej*

<sup>1</sup> Bati deqa Sol na tamo ungasari Tamo Koba Yesus dauryosimoqneb qaji nanqi ugeugeinjsim moyotnjrqajqa singila na maroqnej. Deqa a atra tamo gate aqaq gilsiq minjej, <sup>2</sup> “Ni anjam bei nengrenyosim ebimqa e anjam di osiy gilsiy Damaskus qureq di Juda tamo kokba nanqi enjrqai. Enjritqa nanqi na anjam di sisiyosim e odbibqa tamo ungasari Damaskus qureq di Yesus aqa gam dauryeqnub qaji nanqi tontnjrsiy joqsiy Jerusalem bqi.” <sup>3-4</sup> Degsi minjnaqa anjam di nengrenyosiq yonaqa walwelosiq gilsiq Damaskus qure jomyeqnaqa gamq di pulonj singila koba minjal ti lanj goge na aqaq aisiq tulan rianonaqa a ulonjosiqa mandamq di nejey. Neiesosiq Yesus

aqa kakro quej. Yesus na minjej, “O Sol, ni kiyaga e ugeugeibeqnum?” <sup>5</sup> Onaga Sol na minjej, “O Tamo Koba, ni yai?” Onaga minjej, “E Yesus agi ni na ugeugeibeqnum. <sup>6</sup> Deqa ni tigelosim Damaskus qureq gile. Gilsim dia tamo bei itqam. A na ni wau kiye yqam di mermqas.”

<sup>7</sup> Onaga tamo nanji Sol ombla walweloqneb qaji nanji Yesus aqa kakro qusib nam ateb nanji tamo bei unosai. Deqa nanji ulaosib mequmosib lana tigelesoqneb. <sup>8</sup> Onaga Sol a mandamq dena tigelosiq nam plaltej a sawa unqa keresai. Deqa nanji a babanyosib Damaskus qureq osi gileb. <sup>9</sup> Sol a bati qalub nam qandimyonaq soqnej. Deqa a inji bei uyosai. A ya uyosai dego.

<sup>10</sup> Damaskus qureq di tamo bei aqa nam Ananias a soqnej. A Yesus dauryoqnej qaji. Tamo Koba a na aqa areqalo waqtetosiqa nejobilqei na minjej, “O Ananias.” Onaga minjej, “Tamo Koba, e agiende.” <sup>11</sup> Onaga Tamo Koba a na minjej, “Ni tigelosimqa gam bei aqa nam Tinjin di dauryosim gilsim Judas aqa talq di brantqam. Tarsus tamo bei aqa nam Sol a dia pailyoqnsiq unu di unqam. <sup>12</sup> E na Sol aqa areqalo waqtetonumqa a nejobilqei na kumbra endegsi unqo. Tamo bei aqa nam Ananias a bosim Sol aqaq di ban atimqa nam poiyim sawa unqas.”

<sup>13-14</sup> Onaga Ananias na kamba minjej, “O Tamo Koba, Sol a Jerusalem dia ino tamo ungasari nanji tulan ugeugeinjreqnu. Atra tamo kokba nanji na a qarinyonab Damaskus qure endeq bej. A qure endia tamo ungasari ino nam metoqnsib pailmeqneb qaji nanji tontnjrsim joqsim Jerusalem aiqajqa deqa bej. Tamo gargekoba nanji degsib mareqneb e queqnum.” <sup>15</sup> Onaga Tamo Koba a na Ananias minjej, “Ni ijo anjam dauryosim Sol aqaq gile. Sol a ijo wau tamo. E na a giltem deqa a ijo nam osi walwelosim sawa sawa kalilq di tamo ungasari Qotei qaliesai qaji nanji ti mandor kokba ti Israel nanji ti ijo nam ubtosim minjroqngas. <sup>16</sup> A ijo nam qa gulbe gargekoba itoqngas. Gulbe di e na osoryoqnit itoqngas.”

<sup>17</sup> Onaga Ananias na minjej, “Od, Tamo Koba, e ino anjam dauryqai.” Osiq tigelosiq gilsiq Sol soqnej qaji tal di gogetosiq Sol aqaq di ban atsiqa minjej, “O ijo was Sol, Tamo Koba Yesus agi gamq di a segi qa babtonaq ni unem qaji a na e endegsi merbqo, ‘Ni gilsim Sol boletimqa aqa namdamu olo poiyqas. Yimqa Mondor Bole a Sol aqa are miligiq aisim a singilatqas.’ O Sol, Yesus na e degsi merbosiqa qarinybqoqa agi e inoq bonum.” <sup>18</sup> Ananias na Sol degsi minjnaqa bati qujai deqa inji bei qe gajige bul Sol aqa namdamuq dena ulononaq nam poiyonaqa sawa unej. Sawa unsiq tigelonaq Ananias

na Yesus aqa ñam na yansej. <sup>19-20</sup> Yansonaqa a inġi uynaqa jejamu sinġilaej.

*Sol a Damaskus qureq di maroqnej, “Yesus a Qotei aqa Niri”*

Sol a bati qudei Damaskus qureq di tamo unġasari Yesus dauryoqneb qaji nanġi koba na korooqneb. A Juda nanġo Qotei tal dego miligiq giloqnsiqa nanġi endegsi minjroqnej, “Yesus a Qotei aqa Niri.” <sup>21</sup> Yeqnaqa tamo unġasari aqa anjam quoqneb qaji nanġi tulaġ prugoqnsib maroqneb, “Niġi uniy. Sol a Yesus aqa anjam mare mare laqnu. A nami Jerusalem dia tamo unġasari Yesus aqa ñam metoqnsib pailyeqnuq qaji nanġi ugeugeinjroqnej. Osiqa Damaskus endia dego nanġi tontnjrsim atra tamo kokba nanġoq olo joqsim aiqajqa bej.” Tamo unġasari nanġi degsib maroqnsib tulaġ prugoqneb.

<sup>22</sup> Sol a sinġila na Qotei aqa wau yeqnaqa aqa sinġila ti powo ti tulaġ kobaoqnej. Deqa a Qotei aqa anjam geregere plaltoqnsiqa endegsi maroqnej, “Yesus a bole Kristus Qotei na qarinyej qaji.” Degsi mareqnaqa Juda tamo kokba Damaskus di soqneb qaji nanġi aqa anjam qalotqa keresaiinjroqnej.

*Juda tamo kokba nanġi Sol qalsib moiyoqajqa maroqneb*

<sup>23</sup> Onaqa bati gargekoba yala koboonaqa Juda tamo kokba nanġi koroosib mareb, “Iga Sol qalsim moiyoqom.” <sup>24-25</sup> Nanġi degsib marsibqa Sol a ulaġaim deqa nanġi qolo ti qanam ti qure aqa siraġme kalil taqatesoqneb. Taqatesonabqa tamo unġasari Sol dauryoqneb qaji nanġi na qolo a osib gumbaġ di jigsib qure aqa jeġ gogetosib sil na gumba tontosib goge na ura uratonab jeġ qalaq aiyej.

*Sol a Jerusalem aisiq di soqnej*

<sup>26</sup> Bunuqna Sol a walwelosiqa Jerusalem di brantosiq tamo unġasari Yesus dauryoqneb qaji nanġoq gilsiq minjrej, “E niġi koba na Qotei aqa wau ojgom.” Degsi minjrnaqa nanġi a ulaiyosib saidyeb. Di kiyafa? A Yesus dauryoqnej di nanġi poinjrosai deqa. <sup>27</sup> Onaqa Barnabas na Sol osiqa Yesus aqa anjam maro tamo nanġoq gilsiq Sol a nami gamq di Tamo Koba unnaqa anjam minjeġ qaji deqa nanġi sainjrej. Sol a Damaskus dia Yesus aqa ñam na anjam mare mare laqnej a ulaosaioqnej deqa ti Barnabas na nanġi sainjrej. <sup>28</sup> Deqa nanġi Sol osib koba na soqneb. Sosibqa Sol a Jerusalem dia Tamo Koba aqa ñam na anjam mare mare laqnej. A ulaosaioqnej. <sup>29</sup> Bati bei Sol a Juda tamo qudei ti anjam na qotoqneb. Tamo nanġi di Grik anjam maro qaji. Nanġi Sol ombla anjam na qotsibqa nanġi a qa ugeosib mareb, “Iga Sol qalsim moiyoqom.” <sup>30</sup> Onaqa Yesus aqa tamo unġasari nanġi deqa qusibqa Sol osib Sisaria qureq osi gileb. Gilsib dena Sol qarinyonabqa Tarsus qureq gilej.



<sup>31</sup> Bati deqa Judia sawaq di, Galili sawaq di, Samaria sawaq di dego tamo ungasari Yesus qa nanjo areqalo sinjilateb qaji nanji geregere lawo na soqneb. Nanji bati gaigai Tamo Koba aqa sorgomq di sonabqa Mondor Bole na are sinjilatetnjroqnej. Tamo ungasari gargekoba nanji are bulyoqnsib Kristen nanjo miligiq aiyeq nab nanji tulan kobaoqneb.

### *Pita na Ainius boletej*

<sup>32</sup> Ariya Pita a sawa bei beiq di laqnsiqa gilsiq Lida qureq di brantej. Brantosiqa Qotei aqa segi tamo ungasari qure dia soqneb qaji nanji itnjrej. <sup>33-34</sup> Dia tamo bei soqnej aqa ñam Ainius. A jejamu laiyo naq soqnej. Wausau 8 a bijalq di ñeiesoqnej. Onaqa Pita na unsiqa minjej, “Ainius, Yesus Kristus na ni boletmqo. Deqa ni tigelosim ino bijal qale.” Degsi minjnaqa aqa jejamu sinjilaonaq a tigelej. <sup>35</sup> Onaqa tamo ungasari kalil Lida qure ti Saron sawa ti dia soqneb qaji nanji tamo di boleonaq unsibqa nanji are bulyosib Tamo Koba qa nanjo areqalo sinjilateb.

### *Pita na Tabita tigeltej*

<sup>36</sup> Jopa qureq di una bei soqnej aqa ñam Tabita. A Yesus dauryoqnej qaji. Grik anjam na aqa ñam Dorkas. A una bolequja. A gaigai kumbra tulan bolequja yoqnsiqa tamo ungasari inji inji saiqoji nanji lueinjroqnsiq inji anainjroqnej. <sup>37</sup> Bati bei a maiyosiq moiyej. Moinaqa una qudei na aqa jejamu yansosib warum bei goge di atnab soqnej. <sup>38</sup> Lida qure di Jopa qure jojom. Deqa Jopa qureq di tamo ungasari Yesus dauryoqneb qaji nanji Pita a Lida qureq di soqnej di qusibqa tamo aiyel qarijnjnab aisib Pita minjeb, “Ni urur au. Ni iga daurgosim koba na Jopa qureq gilqom.” <sup>39</sup> Onaqa Pita a tigelosiqa nanji daurnjrsiqa koba na gilsib Jopa qureq di branteb. Brantonabqa nanji Pita osib una moiyej qaji aqa warum miligiq gileb. Gilnabqa una qobul kalil nanji Pita aqa areq di koroosib akamoqneb. Osib gara jugo ti gara tugo ti nami Dorkas a nanji koba na sosibqa gereiyelenej qaji di Pita osoryeb. <sup>40</sup> Onaqa Pita a nanji minjrej, “Ningi kalil oqediy.” Degsi minjrnaqa nanji oqedonab singa pulutosiq Qotei pailyej. Pailyosiq koboonaqa una moiyej qaji aqa areq gilsiq minjej, “O Tabita, ni tigel.” Degsi minjnaqa a ñam plaltosiqa Pita unsiq tigelosiq awoej. <sup>41</sup> Onaqa Pita na aqa ban ojsiq tigeltej. Tigeltosiqa Qotei aqa segi tamo ungasari nanji ti una qobul nanji ti metnjrnaqa nanji warum miligiq bosib Tabita uneb a ñambile soqnej. <sup>42</sup> Onaqa Jopa qureq di tamo ungasari kalil nanji manwa deqa qusibqa nanji gargekoba Tamo Koba qa nanjo areqalo sinjilateb. <sup>43</sup> Onaqa Pita a bati

gargekoba yala Jopa qureq di soqnej. Tamo bei wagme aqa jegara na inġi inġi gereiyo qaji aqa ñam Saimon aqa talq di a ombla soqneb.

## 10

### *Lañ aṅgro bei na Kornilius anjam minjej*

<sup>1</sup> Sisaria qureq di tamo bei soqnej aqa ñam Kornilius. A Rom tamo. A qaja tamo nanġo gate. A na qaja tamo 100 nanġi taqatnjroqnej. Qaja tamo nanġi di Itali sawa qaji. <sup>2</sup> Kornilius a Qotei aqa kumbra dauryoqnej qaji. Deqa tamo unġasari kalil a ombla tal qujaiq di soqneb qaji nanġi a ti Qotei aqa sorgomq di soqneb. Juda nanġi inġi inġi saiinjreqnaqa a nanġi silali qa aqaryainjroqnej. A bati gaigai Qotei pailyoqnej. <sup>3</sup> Ariya bati bei seṅ keliṅtonaqa Qotei na Kornilius aqa areqalo waqte-tonaqa ṅeio bulosiqa Qotei aqa lañ aṅgro bei aqaq bonaq unej. Unnaqa lañ aṅgro dena minjej, “O Kornilius.” <sup>4</sup> Onaqa Kornilius na lañ aṅgro di koqyosiqa tulañ ulaugetosiq minjej, “O Tamo Koba, ni kiyaaq ijoq bonum?”

Onaqa lañ aṅgro dena minjej, “Qotei a gaigai ino pailyo queqnu. Juda nanġi inġi inġi saiinjreqnaqa ni na nanġi aqaryainjreqnum. Ino kumbra di Qotei a unoqnsiq deqa a ni qa tulañ areboleboleiyeqnu. <sup>5</sup> Deqa ni que. Ni na tamo qudei nanġi qarinjrimqa Jopa qureq aisib dia tamo bei aqa ñam Saimon ñam bei Pita a itqab. A itosib osib babqa a na anjam bei ni mermqas. <sup>6</sup> A tamo bei wagme aqa jegara na inġi inġi gereiyo qaji aqa ñam Saimon aqa talq di unu. Aqa tal agi alile qalaq di unu.”

<sup>7</sup> Lañ aṅgro dena Kornilius anjam degsi minjsiq olo ulaṅonaqa Kornilius na aqa kaṅgal tamo aiyel metnjrnaqa aqa areq beb. Qaja tamo qujai dego metonaq aqa areq bej. Qaja tamo di a Qotei aqa kumbra dauryoqnej qaji. A bati gaigai Kornilius ombla sosiqa wauetoqnej. <sup>8</sup> Onaqa Kornilius na anjam kalil lañ aṅgro a marej qaji di nanġi qalub minjrsiqa qarinjrnnaq Jopa qureq aiyeb.

### *Pita a ṅeio bulej*

<sup>9</sup> Nanġi walwelosi aisib gamq di qoloinjrnaqa ṅereneb. Olo nebeonaqa tigelosib aisib Jopa qure jojomyeqnabqa bati qujai deqa Pita a Qotei pailyqa osiqa warum bei gogeqsi deq oqej. Di qanam jige. <sup>10-11</sup> Oqsiq warum dia sonaqa a mamyonaaqa uṅa qudei nanġi minjrnnaqa inġi goiyeteb. Inġi goiyeqnabqa Qotei na Pita aqa areqalo waqtetonaqa a ṅeio bulej. A ṅeio bulosiqa lañ waqonaq inġi bei gara kobaquja bul plalosiq mutu qolqeq di ojelenosib lañ goge dena uratonab aiyeqnaq unej. <sup>12</sup> Gara miligiq di wagme utru segi segi soqneb. Bel ti bauṅ ti amal ti bagu ti qebari ti sonab

unjrej. <sup>13</sup> Unjrsiqa kakro bei quej. A marej, “Pita, ni tigelosim wagne bei qalsim uye.” <sup>14</sup> Onaqa Pita na minjej, “O Tamo Koba, e uyqasai! Wagne uge uge deqaji e nami uyosaiognem. Wagne deqaji uyqajqa di getento koba.” <sup>15</sup> Osiqa Pita a kakro di olo quej. A marej, “Ingi ingi e jiga saiqoji qa maronum di ni olo uge qa maraim.” <sup>16</sup> Gara di degsi aiyogalubtosiqa olo torei oqej.

<sup>17</sup> Neio di aqa utru Pita a poiysai. Deqa a are koba qalsiq soqnej. Onaqa tamo qalub Kornilius na qarinjrej qaji nanji Jopa qureq di brantosib tamo qudei nanji endegsib nenemnjreb, “Saimon aqa tal qabi unu?” Degsib nenemnjrnabqa nanji na minjreb, “Saimon aqa tal agide.” Onaqa nanji walwelosib Saimon aqa tal meq di tigeleb. <sup>18</sup> Tigelosib maosib mareb, “Saimon ñam bei Pita a tal endi unu e?” <sup>19</sup> Pita a neio deqa are koba qaleqnaqa Qotei aqa Mondor na minjej, “Ni que. Tamo qalub bosib ni qa maronub. <sup>20</sup> Deqa ni tigelosim nanji daurnjrsim gile. Ni are gulbeimaiq. E na nanji qarinjronum bonub.”

<sup>21</sup> Onaqa Pita a tal uratosiq mandamq aisiq nanjo areq di brantosiq minjrej, “Ninji tamo ñameqnub qaji agi e di. Ninji kiyaqa bonub?” <sup>22</sup> Onaqa nanji na minjeb, “Qaja tamo gate aqa ñam Kornilius a tamo bolequja. A Qotei aqa sorgomq di sosiqa kumbra bole dauryeqnu. Juda kalil nanji a qa mareqnub, ‘A tamo bolequja.’ Ni que. Ya bilaq Qotei aqa lan angro bei a Kornilius aqaq di brantosiq minjej, ‘Ni tamo qudei nanji qarinjrimqa aisib Pita minjib ino talq bosim anjam bei mermim quqwam.’” <sup>23</sup> Onaqa Pita a nanjo anjam di qusiqa nanji joqsiqa tal a soqnej qaji dia koba na soqneb. Nerenjosib nebeonaqa Pita a nanji koba na tigelosib gileb. Jopa tamo qudei Yesus dauryoqneb qaji nanji dego koba na gileb.

### *Pita a Kornilius aqa talq gilej*

<sup>24</sup> Nanji gilsib gamq di qoloinjrnaqa nerenjeb. Olo nebeonaqa nanji tigelosib gilsib Sisaria qureq di branteb. Kornilius a nanji qa tariñoqnsiq ñam atoqnej. A na aqa tamo si nanji ti aqa segi leñ nanji ti kalil minjrnaq bosib a ti koroosib tariñoqneb. <sup>25</sup> Onaqa Pita a gilsiq Kornilius aqa talq di brantej. Brantosiq tal gogetonaqa Kornilius a bosiq Pita aqa singaq di singa pulutosiq a binijej. <sup>26</sup> Onaqa Pita na Kornilius tigeltosiq minjej, “Ni tigel. Ni e binibaim. Aqo ombla mandam tamo.” <sup>27</sup> Degsi minjsiq nanji ombla anjam qairosib warum bei miligiq gileb. Warum miligiq di tamo ungasari gargekoba nanji koroesonab unjrej.

<sup>28</sup> Unjrsiqa minjrej, “Ninji qalie, e Juda tamo. Ninji Juda tamo sai. Ninji sawa bei qaji. Deqa gago Juda kumbra agiende. Iga nunjo tal gogetqajqa getento koba. Iga ninji

koba na laqajqa dego getento koba. Moses aqa dal anjam nami degsi nenngrenyej unu. Ariya Qotei na e endegsi merbej, ‘Sawa bei bei qaji nanngi ijo n̄amgalaq di tamo uge edegaim.’ Qotei na e degsi merbej. <sup>29</sup> Deqa ninngi e qa anjam qarinyonab e nunngo anjam gotranjosai. E nunngo anjam dauryosim bosim nunngo tal gogetonum. Deqa ninngi merbiy, ninngi kiyaaqa e qa anjam qarinyeb?”

<sup>30-31</sup> Onaqa Kornilius na Pita minnej, “Ya ya endi bati qolqe gilqo sen bati kere endego sen kelintonaqa e pailyeq-namqa tamo bei gara tulan qat jigsiaqa bosiq ijo ulatamuq di tigelosiaqa merbej, ‘O Kornilius, Qotei a gaigai ino pailyo queqnu. Juda nanngi inngi inngi saainjreqnaqa ni na nanngi aqaryainjreqnum. Ino kumbra di Qotei a unoqnsiq deqa a ni qa tulan areboleboleiyeqnu. <sup>32</sup> Deqa ni que. Ni na tamo qudei nanngi qarijnjrimqa Jopa qureq aisib dia tamo bei aqa n̄am Saimon n̄am bei Pita a itqab. A itosib osib babqa a na anjam bei ni mermqas. A tamo bei wagme aqa jegara na inngi inngi gereiyo qaji aqa n̄am Saimon aqa talq di unu. Aqa tal agi alile qalaq di unu.’ <sup>33</sup> Lan angro na e degsi merbonaqa e tamo qudei nanngi urur qarijnjrn̄am Jopa qureq aisib inoq di branteb. Brantonabqa ni na nanngi daurnjrsim agi ijo talq bonum. Deqa e ni qa tulan areboleboleibqo. Endego iga kalil endia koroosimqa Qotei aqa n̄amgalaq di awejunum. Deqa anjam kalil Tamo Koba a na ni mermej qaji di mergimqa iga quqwom.” Kornilius na Pita degsi minnej.

### *Pita a anjam bole palontej*

<sup>34</sup> Onaqa Pita a tigelosiaqa nanngi endegsi minjrej, “Endego e qalieonum, Qotei a tamo qudei bole qa maroqnsiq olo tamo qudei uge qa marosaieqnu. Aqa n̄amgalaq di tamo kalil kerekere unub. <sup>35</sup> Deqa sawa sawa kalilq di tamo ungasari kumbra bole bole yoqnsib Qotei aqa sorgomq di unub qaji nanngi Qotei na tulan areinjreqnu. <sup>36</sup> Bole, nami Qotei na aqa anjam bole qarinyonaqa Israel nanngo segiq aiyey. Anjam bole di aqa damu endegsi unu. Tamo ungasari nanngi Qotei ti ombla jeu atoqnsib sonabqa Yesus Kristus na jeu kobotej. Yesus a tamo kalil nanngo Tamo Koba. <sup>37</sup> Ninngi qalie, Jon a bosiaqa tamo ungasari nanngi yanso qa anjam minjroqnej. Bati deqa Yesus Nasaret qaji a Galili sawaq di aqa wau utru atsiqa walweloqnsiaqa Judia sawa nanngo qure kalil keretoqnsiq wauoqnej. <sup>38</sup> Qotei na aqa Mondor Bole ti aqa singila ti Yesus yonaqa a walweloqnsiaqa kumbra bole bole yoqnej. Yoqnsiaqa tamo ungasari Satan na ugetnjro qaji nanngi kalil boletnjroqnej. Qotei a Yesus ombla soqneb deqa a singila ti wauoqnej. <sup>39</sup> Yesus a Juda nanngo sawa ti Jerusalem qure ti dia manjwa gargekoba yeqnaqa iga gago n̄amdamu na unoqnem.

Iga deqa bini saonqsim laqnum. Ariya nanqi na Yesus osib namburbasq di qalsib moiyyoteb. <sup>40</sup> Bati qalub koboonaqa Qotei na Yesus olo subq na tigeltonaqa a tigelosiqa gago njamdamuq di branteqnaqa iga unoqnem. <sup>41</sup> A Juda kalil nanqo njamdamuq di brantosaiqnej. Iga Qotei na aqa anjam mare mare laqajqa giltgej qaji gagoq di segi brantoqnej. Agi a subq na tigelosiqa iga koba na awoonqsimqa ingi ti ya ti uyoqnem. <sup>42</sup> A na mergej, ‘E segi qujai Qotei na giltbej qaji. Deqa mondoj e na tamo nambile so qaji ti tamo moreno qaji ti nanqi peginjraqi. Ningi na tamo ungasari nanqi e qa degsib minjroqniy.’ Yesus na iga degsi mergej. <sup>43</sup> O ijo was, Qotei aqa medabu o qaji tamo kalil nanqi nami endegsib maroqneb, ‘Qotei na tamo ungasari kalil Kristus qa nanqo areqalo singilatqab qaji nanqi aqa ñam na nanqo une kobotetnrqas.’”

*Qotei na sawa bei bei qaji nanqi aqa Mondor Bole enjrej*

<sup>44-46</sup> Pita a anjam degsi mareqnaqa bati qujai deqa Mondor Bole aisiqa tamo kalil Pita aqa anjam quoqneb qaji nanqo mej bulyetnrnaqa nanqi qure utru segi segi nanqo anjam poinjrnaqa marelenoqneb. Maroqnsib Qotei aqa ñam soqteqnaqba Juda Kristen Pita koba na beb qaji nanqi di qusibqa tulan prugeb. Di kiyaaqa? Bati di Qotei na sawa bei bei qaji nanqi dego aqa Mondor enjrej deqa. Onaqa Pita a endegsi marej, <sup>47</sup> “Iga Juda tamo unum. Iga nami Qotei aqa Mondor em. Dego kere bini sawa bei bei qaji nanqi aqa Mondor onub. Deqa tamo bei na iga nanqi yansnjrqajqa saidgwa keresai.” <sup>48</sup> Osiqa nanqi minjrej, “Ningi Yesus Kristus aqa ñam na yanso oiy.” Degsi minjrnaqa nanqi na yanso osib Pita minjeb, “Ni bati qudei iga koba na endi sqom.” Degsi minjnabqa a nanqi koba na soqneb.

## 11

*Pita a Jerusalem aiyej*

<sup>1</sup> Yesus aqa anjam maro tamo nanqi ti Yesus aqa tamo ungasari kalil Judia sawaq di soqneb qaji nanqi ti anjam endegsib queb, “Sawa bei bei qaji nanqi dego Qotei aqa anjam osib nanqo areqaloq di singilateb.” <sup>2</sup> Onaqa bati bei Pita a Jerusalem aisiq di sonaqa Juda tamo qudei Yesus dauryoqneb qaji nanqi na Pita nrintosib minjeb, <sup>3</sup> “Sawa bei bei qaji nanqi mulu unosaieqnuub. Deqa ni kiyaaqa nanqo tal gogetosim nanqi ti awoosim ingi uyoqnem?”

<sup>4</sup> Onaqa Pita a nanqo anjam di qusiqa utruq na anjam endegsi sainjrej, <sup>5</sup> “E Jopa qureq di palyeqnamqa Qotei na ijo areqalo waqtetbonaqa e nejio bulem. E nejio bulosimqa ingi bei gara kobaquja bul plalosiq mutu qolqeq di ojelenosib laj goge na ura uratonab ijo ulatamuq ainaq unem. <sup>6</sup> Unsim

geregere gara miligi peleyosim wagme utru segi segi unjrem. Wagme juwan ti amal ti bagu ti qebari ti gara miligiq di sonab unjrem. <sup>7</sup> Unjrsimqa kakro bei quem. A merbej, 'O Pita, ni tigelosim wagme bei qalsim uye.' <sup>8</sup> Onaqa e marem, 'O Tamo Koba, e uyqasai! Wagme uge uge deqaji e nami uyosaiognem. Wagme uge deqaji uyqajqa di getento koba.' <sup>9</sup> Onaqa kakro di a olo lan goge na brantej. A marej, 'Ingi ingi e jiga saiqoji qa maronum di ni olo uge qa maraim.' <sup>10</sup> Gara di degsi aiyogalubtosiqqa wagme kalil gara ti olo torei goge oqej.

<sup>11</sup> "Bati qujai deqa tamo qalub nanqi bosib e soqnem qaji tal meq di tigeleb. Tamo bei na nanqi Sisaria qureq dena qarinjrnraq ijoq beb. <sup>12</sup> Bonab Qotei aqa Mondor na e merbej, 'Ni tigelosim nanqi qalub daurnjrsim gile. Ni are gulbeimaiq.' Degsi merbonaqa e tigelosim nanqi qalub daurnjrsim Yesus aqa tamo 6 agi endia tigelejunub qaji nanqi koba na gilem. Gilsim Sisaria qureq di brantosim tamo di aqa tal gogetem. <sup>13-14</sup> Gogetonamqa tamo dena iga endegsi saigej, 'Lan anqro bei a bosiqqa ijo talq endi tigelesonaq e unem. Unnamqa merbej, "Ni na tamo qudei nanqi qarinjrimqa Jopa qureq aisib dia tamo bei aqa ñam Saimon ñam bei Pita a itqab. A itosib osib babqa a na ni Qotei aqa anjam mermimqa anjam dena Qotei na ni oqas. Osim tamo unqasari kalil ni ombla tal qujaiq endi unub qaji nanqi dego elenqas." ' <sup>15</sup> O ijo was, tamo dena iga degsi saigonaqa e kamba anjam marqa yeqnamqa Mondor Bole a tamo kalil tal dia koroesoqneb qaji nanqoq aiyej. Mondor a nami iga Juda gagoq aiyej dego kere nanqoq aiyej. <sup>16</sup> Nanqoq ainaqa e unsimqa Tamo Koba aqa anjam nami marej qaji deqa olo are qalem. Agi a endegsi marej, 'Jon a ya na tamo unqasari nanqi yansnjroqnej. Ariya e Mondor Bole aqa singila na ninqi yansngwai.' <sup>17</sup> O ijo was ninqi quiy. Iga nami Tamo Koba Yesus Kristus qa gago areqalo singilateq nabqa Qotei na aqa Mondor Bole iga egej. Bini sawa bei bei qaji nanqi dego Yesus qa nanqo areqalo singilateq nabqa Qotei na aqa Mondor nanqi enjreqnu. Deqa Qotei aqa wau di e na getentqa keresai."

<sup>18</sup> Onaqa Juda tamo Pita njrinteb qaji nanqi aqa anjam di qunabqa nanqo njirin koboej. Deqa nanqi Qotei aqa ñam soqtosib mareb, "Bole, Qotei a sawa bei bei qaji nanqi dego are bulyetnjreqnu. Deqa nanqi dego ñambile gaigai sqab."

*Antiok qureq di tamo unqasari gargekoba nanqi are bulyoqneb*

<sup>19</sup> Ariya Juda tamo Stiven qaleb qaji nanqi na Kristen nanqi ugeugeinjreqnab segi segi jaraiyosib Fonisia sawa ti Saiprus nui ti Antiok qure ti deq gileleheb. Gilsib dia Qotei aqa anjam mare mare laqneb. Laqnsibqa Juda nanqi segi

Qotei aqa anjam minjroqneb. Sawa bei bei qaji nanği Qotei aqa anjam minjrosaiogneb. <sup>20</sup> Ariya Kristen qudei nanği Saiprus ti Sairini ti dena tigelosib Antiok qureq aisib Grik nanği dego Tamo Koba Yesus aqa anjam bole minjroqneb. <sup>21</sup> Kristen nanği di Tamo Koba aqa singila ti wauoqneb deqa tamo unğasari tulanğ gargekoba nanği Yesus qa nanğo areqalo singilatoqnsib are bulyoqneb.

<sup>22</sup> Onaqa Yesus aqa tamo unğasari Jerusalem di soqneb qaji nanği kumbra deqa qusibqa Barnabas qarinyonab Antiok gilej. <sup>23</sup> Antiok gilsıqa Qotei a Grik nanği qa dego are boleiyognsıqa aqaryainjroqnej di unej. Unsiqa tulanğ areboleboleiyej. Deqa a na nanği kalil are singilatetnjroqnsıqa minjroqnej, “Ninği Tamo Koba a gaigai dauryognsib soqniy.” <sup>24</sup> Barnabas a tamo bolequja. Mondor Bole aqaq di sonaqa a singila ti wauoqnej. Aqa areqalo kalil Tamo Koba Yesus qa singilatosisoq soqnej. Deqa a Yesus aqa anjam mareqnaqa tamo unğasari gargekoba nanği quoqnsib Yesus aqaq boqneb.

<sup>25</sup> Ariya bati bei Barnabas a Sol namqajqa marsiq Tarsus qureq gilej. <sup>26</sup> Gilsiq Sol namosiq itosiq ombla puluosib Antiok olo aiyebe. Aisib dia wausau qujai Yesus aqa tamo unğasari nanği koba na wauoqneb. Wauoqnsibqa tamo unğasari tulanğ gargekoba nanği Qotei aqa anjam minjroqneb. Antiok dia tamo unğasari Yesus dauryoqneb qaji nanğo nam Kristen wainjreb.

<sup>27</sup> Onaqa bati bei Qotei aqa medabu o qaji tamo qudei nanği Jerusalem dena walwelosib Antiok beb. <sup>28</sup> Bei aqa nam Agabus. Nanği Antiok bonabqa Qotei aqa Mondor na Agabus medabu singilatetonaqa a tigelosıqa marej, “Sawa sawa kalilq di nanği mam koba oqab.” Agabus a degsi marej. Mam di bunuqna Mandor Koba Klodius aqa bati qa brantej. <sup>29</sup> Yesus aqa tamo unğasari nanği Agabus aqa anjam di qusibqa nanği nanğo segi segi silali soqnej di koroiyeb. Koroiyosib nanğo Kristen was Judia sawaq di soqneb qaji nanği aqaryainjrqa marsib silali qarinyonab nanğooq aiyej. <sup>30</sup> Silali di nanği Barnabas Sol wo enjrnabqa nanği na osi aisib Kristen gate Judia sawaq di soqneb qaji nanğo banq di ateb.

## 12

### *Herot na Pita ojsıqa tonto talq di waiyej*

<sup>1</sup> Bati deqa Mandor Herot na Yesus aqa tamo unğasari qudei nanği ojelenosıqa ugeugeinjroqnej. <sup>2</sup> Osıqa a na qaja tamo bei qarinyonaqa gilsiq Jon aqa was Jems serie na qalnaq moiyej. <sup>3</sup> A degyonaqa Juda tamo kokba nanği areboleboleinjrej di qalieosiq deqa Pita dego oje. Bati di Bem Tiyosai Qaji Uyqajqa Yori Bati Koba. <sup>4</sup> Herot a Pita ojsıqa tonto talq di waiyosıqa

qaja tamo 16 nanği minjrnaqa nanği Pita taqatesoqneb. Herot a endegsi are qalej, “Yori bati koba ñam Pasova di koboamqa e Pita osiy Juda nanngo ulatamuq di tigeltqai.” <sup>5</sup> Pita a tonto talq di sonaqa Yesus aqa tamo unğasari nanği singila na Pita qa pailyoqneb.

*Lañ anğro bei a bosiq Pita tonto talq dena oqeq atej*

<sup>6</sup> Herot a marej, “Nebeamqa e na Pita osiy Juda nanngo ulatamuq di tigeltqai.” Qolo deqa qaja tamo aiyel na Pita osib tonto tal miligiq di warum beiq waiyosib ambletosib sil kokba aiyel na tontonab ñeiesoqnej. Qaja tamo qudei nanği tonto tal siranme jomomq di tigelesosib taqatoqneb. <sup>7</sup> Onaqa qolo qujai deqa Tamo Koba aqa lañ anğro bei a warum miligiq di brantoqujatej. Aqa rian na warum di tulan suwantej. Onaqa lañ anğro dena Pita jar banğaq di kontosiq dudumyej. Dudumyosiq minjej, “Ni tigeloqujat.” Degsi minjnaqa sil kokba aiyel Pita aqa ban qoseb qaji di pamblojosib uloneb. <sup>8</sup> Onaqa lañ anğro na olo Pita minjej, “Ino gara tigsim ino singa tatal jige.” Onaqa Pita a degyonaqa olo minjej, “Ino gara jugo dego jigsim e daurbe.” <sup>9</sup> Degsi minjnaqa Pita a warum di uratosiq lañ anğro dauryosiq gilej. Lañ anğro a bole Pita oqeq atej di Pita a poiyosai. A are qalej, “E ñeibilqeionum kiyo?” <sup>10</sup> Nanği walwelosib qaja tamo bei tonto tal taqatesoqnej qaji di bunyosib gilsib olo qaja tamo bei bunyosib siranme kobaquja ain na gereiyo qaji di brantonab siran a segi waqonaqa nanği aiyel oqedeb. Siranme di tonto talq dena oqedosim qureq aqajqa siranme. Nanği siranme dena oqedosib gam dauryosib giloqnsib lañ anğro na Pita uratosiq ulanej.

<sup>11</sup> Onaqa Pita a poiyonaqa marej, “Bole. Endego e qalieonum, Juda nanği e lubqa laqnabqa Tamo Koba a na aqa lañ anğro qarinyqoqa bosiq e aqaryaibosiq Herot aqa banq dena e oqo.” <sup>12</sup> Pita a degsi poiyonaqa walwelosi gilsiq Jon aqa ñam bei Mak aqa ai Maria aqa talq di brantej. Tal miligiq di Kristen gargekoba nanği koroesosib Pita qa pailyoqneb. <sup>13-14</sup> Onaqa Pita a tal meq di brantosiq siranmeq di tigelosiq kindokindonosiqa maeqnaqa kanğal unja bei aqa ñam Roda a bosiq siran waqtqa osiq Pita aqa kakro qusiq tulan areboleboleiyej. Onaqa a siran waqtqa uratosiq olo urur ti warum miligiq gilsiq nanği minjrej, “Pita bço agi tal meq di tigelejunu!” <sup>15</sup> Onaqa nanği na minjeb, “Ni nanarionum. Di Pita sai.” Degsi minjnabqa a tulan singilaosiq minjrej, “E nanariosai. E bole maronum. Pita a bço aqa kakro quonum.” Onaqa nanği na minjeb, “Di Pita sai. Di aqa lañ anğro kiyo?”

<sup>16</sup> Onaqa Pita a siranmeq di tigelesosiq kindokindoneqnaqa nanği kalil bosib siran waqtosib Pita unsib tulan prugeb. <sup>17</sup> Onaqa Pita a aqa ban soqtonaqa nanği kirionabqa Tamo



Koba a na tonto talq dena oqeq atej deqa nanġi sainjrej. Osiqa minjrej, “Niġi gilsib Yesus aqa tamo unġasari kalil Jems ombla endegsib minjriy, ‘Pita a tonto talq dena oqedqo.’” Pita a nanġi degsi minjrsiqa nanġi uratnjrsiq tal beiq gilej.

<sup>18</sup> Nebeonaqa qaja tamo tonto tal taqatesoqneb qaji nanġi nġam ateb Pita a tonto talq di sosai. Nanġi degsi unsibqa tulaġ ulaugetosib are koba qaloqnsib maroqneb, “Pita a qabitqo?” <sup>19</sup> Onaqa Herot na aqa qaja tamo qudei nanġi minjrej, “Niġi tonto talq gilsib Pita qa osib boiy.” Degsi minjrnaqa nanġi tonto talq gilsib Pita qa nġamonab ugeinjrej. Ugeinjrnaqa olo pulu-osib aisib Herot minjeb, “Pita a tonto talq di sosai.” Degsib Herot minjnabqa a segi gilsiq qaja tamo tonto tal taqatesoqneb qaji nanġi nenemjnarnaqa minjeb, “Pita a qabitqo kiyo di iga qaliesai.” Nanġi degsib Herot minjnabqa a na aqa qaja tamo qudei nanġi minjrej, “Nanġi Pita gegerere taqatosai deqa niġi na nanġi nġumib morenqab.” Osiqa bunuqna Herot a Judia sawa uratosiqa Sisaria qureq gilsiq di soqnej.

### *Herot a moiyej*

<sup>20</sup> Herot a nami Tair qure ti Saidon qure ti nanġi qa nirinugetej. Deqa tamo unġasari qure aiyel dia soqneb qaji nanġi koroosib mareb, “Iga tamo qudei qarinjrimqa nanġi Sisaria qureq aisib Herot aqa are latetqab. Yim aqa nirin koboqas.” Nanġi degsib marsib tamo qudei qarinjrnabqa nanġi aisib Herot aqa talq di brantosib tal taqato tamo aqa nġam Blastus endegsib minjeb, “Ni na Herot minjim a odimqa iga a ombla qairqom. Yim aqa nirin koboqas.” Sawa kalil Herot a taqatoqnej qaji nanġoq dena Tair ti Saidon ti nanġi na inġi awaiyoqneb. Utru deqa nanġi Herot aqa nirin kobotqajqa mareb. Onaqa Blastus a nanġo anjam di qusiqa gilsiq Herot minjej.

<sup>21</sup> Minjnaqa Herot a qusiqa odosiqa nanġi koba na qairqajqa bati atej. Bati brantonaqa nanġi koroonabqa Herot a nanġi anjam bei minjrqa osiqa mandor kokba nanġo wala gaigai jigeqnuq deqaji bei jigsiqu aqa awo jaram kobaq di awoosiq nanġi anjam minjroqnej. <sup>22</sup> Minjreqnaqa tamo unġasari koroosoqneb qaji nanġi aqa anjam di quoqnsib tulaġ areboleboleinjrnaqa lelenosib maroqneb, “Herot a mandam tamo sai. A dego qotei bei. Deqa a anjam degsi mareqnu.” <sup>23</sup> Herot a Qotei bole aqa nġam soqtosai. A aqa segi nġam soqtoqnsiqa anjam maroqnej. Deqa Tamo Koba aqa lanġ anġro bei urur aisiq Herot a ma uge yonaqa aqa bi ani ambli na uynab a moiyej.

<sup>24</sup> Bati deqa Tamo Koba aqa anjam tulaġ kobaoqnsiqa qure qure kalil keretoqnej.

<sup>25</sup> Onaqa Barnabas Sol wo nanği Jerusalem dia nanğo wau kobotosib olo puluqa laqnsib Jon aqa ñam bei Mak a osib koba na Antiok qureq gileb.

## 13

*Antiok qureq di Kristen nanği na Barnabas Sol wo giltñjreb*

<sup>1</sup> Antiok dia Qotei aqa medabu o tamo nanği ti Qotei aqa anjam plalto tamo nanği ti Kristen nanğo ambleq di soqneb. Nanğo ñam agiende. Bei Barnabas. Bei Simeon aqa ñam bei Niger. Bei Lusius. A Sairini qaji. Bei Manain. A nami Mandor Herot ombla tal qujaiq di anğro kiñilala sosib boleeb. Bei Sol. <sup>2</sup> Nanği Tamo Koba a qa louoqnsib inği ti ya ti uratosib sonabqa Mondor Bole na nanği minjrej, “Ninği Barnabas Sol wo nanği aiyel giltñjrsib qarinqñribqa nanği gilsib wau e na enjronum qaji di ojqab.” <sup>3</sup> Onaqa nanği inği ti ya ti uratosib pailjosib nanğo aiyel gateq di ban atsis qarinqñrnab gileb.

*Saiprus nuiq di Barnabas Sol wo nanği Yesus aqa anjam bole maroqneb*

<sup>4</sup> Mondor Bole na nanği aiyel qarinqñrnaq gilsib Selusia qureq di brantosib dia qobun bei gogetosib qobun na gilsib Saiprus nuiq di branteb. <sup>5</sup> Brantosib Salamis qureq di tiryosib dena nanği sinğa na walweloqnsib Juda nanğo Qotei tal qudei miligiq giloqnsib Qotei aqa anjam minjre minjre laqneb. Jon aqa ñam bei Mak a nanği aiyel daurnjrsiq aqaryainjroqnej.

<sup>6</sup> Nanği Saiprus nui aqa qure kalil keretosib Pafos qureq di branteb. Osib qure dia quñam tamo bei aqa ñam Barjisas iteb. A Juda tamo. A na tamo unğasari nanği gisa gisañjroqnsiq endegsi minjroqnej, “E Qotei aqa medabu o qaji tamo bole.” <sup>7-8</sup> Rom nanğo gate koba bei aqa ñam Sergius Paulus a Pafos qureq di soqnej. Barjisas a gaigai Sergius Paulus dauryosiq laqnej. Sergius Paulus a qalie tamo kobaquja. A na Barnabas Sol wo nanği metñjrnaqa aqa areq bosib Qotei aqa anjam minjoqneb. Onaqa Barjisas (Grik anjam na aqa ñam Elimas) a are qalej, “E na Barnabas Sol wo nanğo anjam gegentoqnqai. Sergius Paulus a Yesus qa aqa areqalo sinğilato uge.” <sup>9-10</sup> Sol aqa ñam bei Pol. Mondor Bole a Pol aqa miligiq aisiq sinğila yonaqa a na Elimas koqyosiq minjej, “Ni Satan aqa anğro. Ni kumbra bole kalil jeutosim laqnum. Ni gisañ anjam marqajqa ino areqaloq di maqejunu. Ni gisañ kumbra yqajqa tulan sinğilaeqnum. Ni Tamo Koba aqa anjam bole beltoqnsimqa olo gisañ anjam segi mareqnum. Ino kumbra uge di ni uratqa keresai. <sup>11</sup> Deqa ni que. Endego Tamo Koba aqa sinğila inoq aiyimqa ni ñamdamu getenmimqa bati gargekoba yala señ unqasai.” Degsi minjnaqa aqa ñamdamu ambriuyonaqa

a sawa unqa keresai. Deqa a na tamo qudei nanği metnjroqnsiqa endegsi minjroqnej, “Niği ijo ban ojsib e gam osorbiy.”  
 12 Sergius Paulus a Tamo Koba aqa siğgila di unsiqa Qotei aqa anjam Pol Barnabas wo nanği maroqneb qaji di poiyoņaqa tulaņ prugosiq Yesus qa aqa areqalo siğgilatej.

*Pol a Pisidia sawaq di Qotei aqa anjam palontej*

13 Onaqa tamo nanği Pol dauryosib laqneb qaji nanği a koba na Pafos qure uratosib qobuņ na gilsib Pamfilia sawaq di brantosib Perga qureq di tiryeb. Tiryosib dia Jon Mak a nanği uratnjrsiqa olo puluosiq Jerusalem aiyej. 14-15 Onaqa Pol Barnabas wo nanği Perga qure uratosib siğga na walwelosib Pisidia sawaq gilsib Antiok qureq di branteb. Brantosib di sonabqa yori batiej. Deqa nanği Qotei tal miligiq gilsib awoonabqa Juda gate kokba nanği tigelosib Moses aqa dal anjam ti Qotei aqa medabu o qaji tamo naņgo anjam ti sisiyoqneb. Sisiyosib koboonaqa nanği na Pol Barnabas wo minjreb, “O gago was aiyel, niği gagoq bonub deqa tamo unğasari naņgo are siğgilatejnjrqajqa anjam bei soqnim tigelosib mariy.”

16 Onaqa Pol a tigelosiqa aqa ban soqtonaqa tamo unğasari nanği kirionabqa endegsi minjrej, “O Israel niği ti tamo unğasari kalil Qotei aqa sorgomq di unub qaji niği ti ijo anjam endi quiy. 17 Qotei a nami gago moma nanği giltnjrnaqa nanği Isip sawaq di tulaņ gargekobaonabqa Qotei a siğgila na nanği joqsiqa Isip uratosib gileb. Gago moma nanği di agi Israel. 18 Nanği gilsib wausau 40 wadau sawaq di sonabqa Qotei a naņgo gulbe qoboiyetnjroqnej. 19 Osiqa Kenan sawaq di qure kokba 7 padaltnjrsiqa naņgo mandam pupoiyoqnsiq gago moma nanği enjroqnej. Qotei a nanği degnjroqnsiq bosib bosiq wausau 450 koboej. 20 Di koboonaqa Qotei a gago moma qudei nanği giltnjrsiqa gate kokba atsiqa siğgila enjreqnaqa siğgila dena nanği na Israel tamo unğasari nanği taqatnjroqneb. Degsib yonab yonab Qotei aqa medabu o qaji tamo Samuel aqa bati brantej.

21 “Onaqa Israel nanği na Samuel minjeb, ‘Ni na tamo bei giltimqa a gago mandor koba sosim iga taqatgwas.’ Degsib Samuel minjnabqa a na Kis aqa ħiri Sol giltonaqa a Israel naņgo mandor koba soqnej. Sol a Benjamin aqa leņ. A Israel naņgo mandor koba sonaqa wausau 40 koboej. 22 Onaqa Qotei na Sol kobotosiqa olo Devit giltonaqa a kamba Israel naņgo mandor koba soqnej. Qotei a Devit qa endegsi marej, ‘E Jesi aqa ħiri Devit unonum, aqa kumbra tulaņ boledamu. E Devit aqa kumbra qa tulaņ arearetbeqnu. E qalieonum, a ijo areqalo kalil dauryoqņqas.’ 23 O ijo was niği quiy. Qotei aqa anjam bei a nami marej qaji di a segi dauryosiqa Devit aqa leņ

nanngoq dena tamo bei giltosiqqa qarinyonaq Israel gagoq bej. Tamo di aqa ñam Yesus. A iga padalo sawaq na elenqajqa deqa Qotei na qarinyonaq bej.

<sup>24</sup> “Yesus na aqa wau utru atosaisonaqa Jon a namoqna bosiqqa Israel nanqi endegsi minjroqnej, ‘Ningi are bulyibqa e na ningi yansngwai.’ <sup>25</sup> Osiqqa aqa wau kobotqa osiqqa olo endegsi maroqnej, ‘Ningi e qa kiyersib mareqnu? E nami merngem, e Kristus sai. Kristus a ijo qoreq na bqas. Aqa ñam kobaquja. E ñam saiqoji. E tamo lanaj. Deqa e na Kristus kanqalyqajqa e tamo bolesai.’ Jon a degsi maroqnej.

<sup>26</sup> “O Abraham aqa moma ningi ti tamo kalil Qotei aqa sorgomq di unub qaji ningi ti ijo anjam endi quiy. Ningi kalil ijo was. Qotei a iga padalo sawaq na elenqas anjam di a na qarinyonaq gagoq bej. <sup>27</sup> Tamo unqasari Jerusalem di unub qaji nanngo gate ti nanqi na Yesus qalib moiqajqa anjam qoseb. Di kiyaca? Yesus a bole Kristus di nanqi poinjrosai deqa. Qotei aqa medabu o tamo nanngo anjam yori bati gaigai sisiyeqnuq qaji di aqa damu dego nanqi poinjrosai. Utru deqa nanqi na Yesus qalib moiqajqa anjam qoseb. Nanngo kumbra dena nanqi Qotei aqa medabu o tamo nanngo anjam keretosib yeb. <sup>28</sup> Nanqi Yesus aqa une bei babtosai. Nanqi a moiyoqajqa utru saiqoji. Deqa nanqi lanqa aqa jejamuq di une qamsib Pailat minjeb, ‘Yesus a une ti deqa ni a namburbasq di gaint.’ Degsib minjnabqa a na Yesus osiq qaja tamo nanngo banq di atnaqa nanqi a qal nab moiyej. <sup>29</sup> Anjam kalil Qotei aqa medabu o tamo nanqi nami nengrenyeb qaji di Juda nanqi keretosib yosib agi Yesus qalsib moiyoteb. Moiyotosib namburbasq dena osib subq ateb. <sup>30-31</sup> Onaqa Qotei na olo Yesus subq na tigeltonaqa a tigelosiqqa tamo nanqi nami a ombla Galili sawa uratosib Jerusalem aiyeb qaji nanngo nandamuq di bati gargekoba branteqnaqa nanqi unoqneb. Deqa bini nanqi Yesus qa anjam saqnsib laq nabqa Juda tamo unqasari kalil nanqi queqnuq.

<sup>32</sup> “Nami Qotei na gago moma nanqi anjam bole endegsi minjrej, ‘E na Kristus qarinyit bosim tamo unqasari nanqi elenqas.’ Qotei aqa anjam bole di bini aqo Barnabas wo na ningi merngeqnum. <sup>33</sup> Qotei na anjam bole di aqa damu babtqa osiq deqa Yesus olo subq na tigeltej. Gago moma nanngo len agi iga. Deqa Yesus a gagoq bej. Devit a nami louqa buk miligiq di Yesus qa endegsi nengrenyeyj,

‘Ni ijo anqro bole.

Bini e ni nambabtmonum.’

Devit a lou namba 2q di anjam di nengrenyeyj. <sup>34</sup> Bunuqna Yesus a moinaqa Qotei na subq na tigeltej deqa Yesus a olo moiqasai. Aqa jejamu subq di qusaqasai dego. Agi Qotei

a nami marej, 'E nami Devit boletem dego kere e nin̄gi bo-  
 letn̄gwai. E bole mern̄gonum.' <sup>35</sup> Deqa nin̄gi quiy. Nami  
 Devit a Qotei min̄jej, 'Ni ino segi an̄gro bolequja ni na giltem  
 qaji aqa jejamu subq di uratim qusaqasai.' Devit a degsi  
 Qotei min̄jsiqa louqa buk miligiq di nengren̄yej. <sup>36</sup> Nin̄gi qalie,  
 Devit a mandamq di sosiqa a Qotei aqa areqalo dauryoqnej.  
 A moinaqa aqa jejamu subq ateb. Aqa moma nan̄gi nami  
 subq atelen̄eb a dego degsib subq ateb. Onaqa aqa jejamu  
 subq di qusaaj. <sup>37</sup> Ariya tamo Qotei na subq na tigeltej qaji  
 aqa jejamu qusaosai. Tamo di agi Yesus. <sup>38</sup> O ijo was, nin̄gi  
 endegsi poin̄gem. Yesus qujai di aqa ñam na Qotei a nun̄go une  
 kobotetn̄gwas. E Yesus qujai deqa anjam plaltoqnsim nin̄gi  
 mern̄geqnum. <sup>39</sup> Nin̄gi Moses aqa dal anjam dauryqab gam  
 dena Qotei a nun̄go une kobotetn̄gwasai. A nin̄gi tamo bole  
 qa mern̄gwasai dego. Tamo un̄gasari Yesus qa nan̄go areqalo  
 singilateqnum qaji nan̄gi segi Qotei na une kobotetn̄jroqnsiq  
 nan̄gi tamo bole qa min̄jreqnu. <sup>40</sup> Deqa nin̄gi geregere ñam  
 atoqniy. Qotei aqa medabu o tamo nan̄go anjam nan̄gi nami  
 maroqneb qaji di aqa damu nun̄goq bo uge. Agi nan̄gi en-  
 degsib maroqneb, <sup>41</sup> 'O ijo anjam misilin̄yo qaji tamo, nun̄go  
 bati qa e na man̄wa bei babbat̄qa nin̄gi di unsib tulan̄ prugwab.  
 Tamo bei na man̄wa deqa sain̄gwas di nin̄gi bole qa marqasai.  
 Deqa nin̄gi padalougetqab.' " Pol a anjam degsi marej.

<sup>42</sup> Onaqa lou koboonaqa Pol Barnabas wo nan̄gi Qotei talq  
 dena oqedonabqa tamo un̄gasari nan̄gi na min̄jreb, "Yori bati  
 bei nin̄gi bosib anjam deqaji olo mergibqa iga quqwom."  
<sup>43</sup> Tamo un̄gasari nan̄gi jaraiyeq nabqa nan̄go ambleq di Juda  
 gargekoba nan̄gi na Pol Barnabas wo nan̄gi daurn̄jreb. Sawa  
 bei bei qaji qudei nami Qotei aqa sorgomq di sqa marsib Juda  
 nan̄go miligiq aiyeb qaji nan̄gi dego Pol Barnabas wo nan̄gi  
 daurn̄jreb. Deqa nan̄gi aiyel na nan̄go are singilatetn̄jroqnsib  
 endegsib min̄jroqneb, "Qotei a nin̄gi qa are boleyeqnu aqa  
 kumbra di nin̄gi geregere ojesoqniy."

<sup>44</sup> Onaqa yori bati bei tamo un̄gasari kalil Antiok qureq di  
 soqneb qaji nan̄gi Qotei aqa anjam quqwa marsibqa bosib  
 Qotei talq di koroeb. <sup>45</sup> Onaqa Juda nan̄gi na nan̄gi un̄jrsib are  
 ugein̄rej. Deqa Pol a anjam mareqnaqa nan̄gi na aqa anjam  
 gegentoqnsib a misilin̄yoqneb. <sup>46</sup> Yeqnab Pol Barnabas wo  
 nan̄gi na Juda nan̄gi singila na endegsib min̄jreb, "Qotei na aqo  
 Barnabas wo qarinqosiq mergej, 'Nin̄gi namoqna Juda nan̄gi  
 segi ijo anjam min̄jroqniy.' Mergej deqa iga bosim Qotei aqa  
 anjam nin̄gi Juda segi namoqna mern̄geqnum. Mern̄geqnamqa  
 nin̄gi na gago anjam gotran̄yeqnum. Nun̄go kumbra dena  
 nin̄gi nun̄go segi jejamuq di une atoqnsib nin̄gi ñambile gaigai  
 sqajqa gam urateqnum. Deqa nin̄gi quiy. Bini aqo aiyel nin̄gi

uratngsimqa sawa bei bei qaji nanngoq giloqnsim Qotei aqa anjam nanngi minjroqnqom. <sup>47</sup>Iga degyqom. Di kiyaaqa? Tamo Koba a nami iga endegsi mergej, 'E ni qarinqmitqa ni pulon bul sosim sawa bei bei qaji nanngoq giloqnqam. Giloqnsim lan utru qolqeq di tamo ungasari nanngi ijo anjam minjroqnm e na nanngi elenqai.' "

<sup>48</sup> Onaqa sawa bei bei qaji nanngi Pol aqa anjam di qusibqa tulan areboleboleinjrnaqa Tamo Koba aqa anjam binjiyoqneb. Deqa qure dia tamo ungasari Qotei na nami nambile gaigai sqajqa giltjnrej qaji nanngi Yesus qa nanngo areqalo singilateb. <sup>49</sup> Bati deqa Tamo Koba aqa anjam tulan kobaosiqqa sawa di keretej. <sup>50</sup> Onaqa Juda nanngi Pol Barnabas wo nanngi qa tulan minjin oqetjnrnaqa unja kokba qudei Qotei qa louoqneb qaji nanngi ti qure deqa gate kokba ti nanngo are ugetetjnreb. Are ugetetjnrebqa nanngi tigelosib Pol Barnabas wo nanngi ugeugeinrsib nanngi aiyel qure dia sqajqa singila na saidnjrsib winjnab jaraiyeb. <sup>51</sup> Deqa nanngi aiyel nanngo singa tumbrum butuyosib qure di urateb. Juda nanngi nanngo segi une qalieqajqa deqa nanngi aiyel kumbra di yeb. Yosib Aikoniam qureq aiyeb. <sup>52</sup> Bati deqa Antiok qureq di Mondor Bole a tamo ungasari Yesus qa nanngo areqalo singilateb qaji nanngo are miligiq aiyosiqqa nanngi singilatjnreqnaqa nanngi tulan areboleboleinjroqnej.

## 14

*Pol Barnabas wo nanngi Aikoniam qureq di Qotei aqa anjam palontoqneb*

<sup>1</sup> Pol Barnabas wo nanngi Aikoniam dia Juda nanngo Qotei tal miligiq gileb. Gilnabqa tamo ungasari nanngi koroesonabqa tigelosib Qotei aqa anjam palontosib minjroqneb. Minjreqnabqa nanngo aiyel anjam dena tamo ungasari tulan gargekoba Juda ti Grik ti are qametjnrnaqa nanngi Yesus qa nanngo areqalo singilateb. <sup>2</sup> Onaqa Juda qudei nanngi Pol Barnabas wo nanngo anjam quqwa uratosib Grik qudei nanngo are ugetetjnrebqa nanngi Yesus aqa tamo ungasari nanngi qa ugeosib misilijnroqneb. <sup>3</sup> Deqa nanngi aiyel Aikoniam qureq di sokobaiyosib Tamo Koba a tamo ungasari nanngi qa are boleyeqnu anjam di mare mare laqneb. Nanngi aiyel ulaosai. Tamo Koba a na nanngi aiyel singila enjreqnaqa nanngi manwa gargekoba yoqneb. Yeqnabqa tamo ungasari gargekoba nanngi manwa di unoqnsib endegsi poinjroqnej, "Bole, nanngo aiyel anjam di Qotei aqa anjam." <sup>4</sup> Onaqa qure dia tamo ungasari nanngi poelenosib qudei nanngi Juda nanngi daurnjrsib olo qudei nanngi Pol Barnabas wo nanngi daurnjreb. <sup>5</sup> Deqa Grik qudei ti

Juda qudei ti nanngo gate nanngi ti endegsib are qaleb, “Iga na nanngi aiyel ugeugeinjrsim meniņ na ñumsim moiyyotnjrqom.”

<sup>6</sup> Onaqa nanngo areqalo di Pol Barnabas wo nanngi qalieosib jaraiyosib Likonia sawa nanngo qure aiyel Listra ti Derbe ti deq aiyeb. Aisib sawa bei jojom di dego branteb. <sup>7</sup> Brantosib dia Yesus aqa anjam bole mare mare laqneb.

*Pol Barnabas wo nanngi Likonia sawaq di Yesus aqa anjam bole maroqneb*

<sup>8</sup> Listra qureq di tamo bei ai miligiq na singa qandamo ħambabej qaji a soqnej. A nami walwelosaiioqnej. Aqa singa singila saiqoji. Awogaigaisoqnej. <sup>9</sup> Bati deqa Pol a Qotei aqa anjam palonteqnaqa tamo di a quoqnej. Onaqa Pol na tamo di koqyosiq aqa areqalo unej aqa areqalo qujai Qotei na a boletbqa kere. <sup>10</sup> Degsi unsiq deqa tamo di metosiq minjej, “Ni tigelosim walwel.” Minjnaqa a tigeloqujatosiq walwelej.

<sup>11</sup> Pol a kumbra di yonaqa tamo ungasari tulan gargekoba nanngi unsibqa nanngo segi Likonia anjam na lelenoqnsib maroqneb, “Niņgi uniy. Gago qotei nanngi tamo bulyosib gagoq bonub.” <sup>12</sup> Nanngi degsib lelenoqnsib Barnabas minjeb, “Ni gago qotei Sus.” Pol a Qotei aqa anjam plaltoqnej deqa nanngi a minjeb, “Ni gago qotei Hermes.” <sup>13</sup> Qure polomq di nanngo qotei Sus aqa atra tal soqnej. Deqa atra tamo a makau qudei osiq ħam so na walatnjrsiq Pol Barnabas wo nanngi aiyel atrainjrqa marsiq tamo ungasari gargekoba joqsiq nanngi koba na qure polomq gileb.

<sup>14</sup> Onaqa Yesus aqa anjam maro tamo aiyel Barnabas Pol wo nanngi deqa qusibqa are tulan gulbeinjrnaqa nanngo segi gara bumbranjosib gurgur ti tamo ungasari nanngo ambleq aisib lelenosib minjreb, <sup>15</sup> “O tamo ungasari, niņgi kiyaa kumbra endi yeqnub? Aqo aiyel mandam tamo, niņgi ti kere. Aqo aiyel na Yesus Kristus aqa anjam bole niņgi merngeqnum. Di kiyaa? Niņgi are bulyosib gisan qotei kalil endi torei uratnjrsib Qotei ħambile so qaji a qa nunngo areqalo singilatqajqa deqa. Qotei agi a na lan ti mandam ti yuwal ti ingi ingi kalil ti gereiyej. <sup>16</sup> Bole, nami Qotei na sawa bei bei qaji nanngi uratnjreqnaqa nanngi nanngo segi areqalo dauryoqnsib laqneb. <sup>17</sup> Bati deqa Qotei a niņgi qa uliosaiioqnej. Niņgi a qa qalieqajqa deqa a bati gaigai niņgi geregereingooqnej. A lan goge na awa engeqnaqa ingi uyo kalil aqa bati qa melieqnaqa niņgi uyoqnsib areboleboleingooqnej.” <sup>18</sup> Onaqa tamo ungasari nanngi Pol Barnabas wo nanngo anjam di qusib quosaibulosib olo minjreb, “Niņgi gago qotei.” Degsib minjroqnsib nanngi aiyel atrainjrqa tulan singilaeqneb nanngi na saidnjroqneb.

<sup>19</sup> Onaqa Juda tamo qudei nanngi Antiok dena ti Aikoniam dena ti walwelosib Listra qureq bosib dia tamo ungasari

nanjo are ugetetnjrnabqa nanji tigelosib Pol meniñ na qaleb. Osib a girinyosib gilsib qure qalaq di ateb. Nanji are qaleb, “A moiço.” <sup>20</sup> Onaqa tamo ungasari Yesus qa nanjo areqalo sinjilateb qaji nanji Pol aqa areq gilsib Pol a mandamq di ñeiesonaq a kainyesonabqa tigelosiqa olo qure miligiq gilej. Nebeonaqa a Barnabas osiqa ombla walwelosib Derbe qureq aiyeb.

*Pol Barnabas wo nanji na Kristen nanji sinjilatnjreb*

<sup>21</sup> Nanji aiyel Derbe qureq aisib dia Yesus aqa anjam bole plalteqnabqa tamo ungasari gargekoba nanji Yesus dauryoqneb. Onaqa bunuqna nanji aiyel olo puluosib qure kalil nanji nami laqneb qaji deq olo giloqneb. Litra qure ti Aikoniam qure ti Antiok qure ti deq giloqneb. <sup>22</sup> Nanji aiyel degsib giloqnsibqa tamo ungasari nami Yesus dauryoqneb qaji nanji sinjilatnjroqnsib minjroqneb, “Ninji Yesus qa nunjo areqalo sinjilatoqnsib soqniy. Ninji gulbe gargekoba itelenqab di unqum. Gulbe di nunjoq boqnibqa Qotei a nunjo Mandor Koba sosim ninji taqatngwas.” <sup>23</sup> Qure kalilq di nanji aiyel na Kristen gate atelenjoqneb. Osib inji ti ya ti uratoqnsib Kristen gate nanji qa pailyoqneb. Osib nanji joqnsib Tamo Koba agi nami a qa nanjo areqalo sinjilateb qaji aqa banq di atoqneb.

*Pol Barnabas wo nanji olo Antiok qureq aiyeb*

<sup>24</sup> Bunuqna Barnabas Pol wo nanji aiyel Pisidia sawa amble potosib walwelosib Pamfilia sawaq di branteb. <sup>25</sup> Brantosib Perga qureq aisib dia Yesus aqa anjam palontoqnsib minjroqneb. Dena tigelosib Atalia qureq aiyeb. <sup>26</sup> Aisib dena qobun gogetosib aisib Antiok qure agi nami nanji dena tigelosib walweleb qaji di olo branteb. Dia nami Kristen nanji koroosib nanji aiyel qa pailyosib qarinnjnab gileb. Qotei a nanji aiyel qa are boleiyim nanji aiyel sinjila na wauoqnqajqa deqa pailyeb. Ariya nanji aiyel wau di kobotosib qure deq olo aiyeb. <sup>27</sup> Aisib Kristen nanji koroinjsibqa wau kalil Qotei a nanjo ban na yoqnej qaji deqa nanji sainjroqneb. Sainjroqnsib endegsib minjroqneb, “Qotei na sawa bei bei qaji nanji dego gam waqtetnjreqnaqa nanji Yesus qa nanjo areqalo sinjilateqneb.” <sup>28</sup> Nanji aiyel Antiok qureq di tamo ungasari Yesus dauryoqneb qaji nanji koba na sokobaiyeb.

## 15

*Kristen nanji Jerusalem di koroeb*

<sup>1</sup> Bati bei tamo qudei nanji Judia sawaq dena walwelosib Antiok qureq gilsib dia Kristen nanji endegsib minjreb, “Ninji Moses aqa dal anjam dauryosib mulun uniy. Yimqa



Qotei a ningi elenqas. Ningi muluŋ unqasai di Qotei a ningi elenqasai.”<sup>2</sup> Degsib minjrnabqa Pol Barnabas wo nanŋi qusibqa tamo nanŋi di ŋirinŋnrsib nanŋi ti anjam na qotoqneb. Onaqa Kristen kalil nanŋi koroosib anjam endegsib kereteb, “Iga na Pol Barnabas wo Yesus aqa tamo qudei ti nanŋi qarinŋnrim Jerusalem aiqab. Aisib dia Yesus aqa anjam maro tamo nanŋo gate nanŋi ti koba na anjam di gereiyqab.”

<sup>3</sup> Nanŋi degsib anjam keretosib nanŋi qarinŋnrbab aiyeb. Nanŋi aiyeqnsibqa Fonisia sawa ti Samaria sawa ti dia Yesus aqa tamo unqasari nanŋi itnjqroqnsibqa endegsib minjqroqneb, “Qotei na sawa bei bei qaji nanŋi dego are bulyetnjqreŋnu.” Degsib minjqreŋnab nanŋi kalil quoqnsib tulaŋ areboleboleinjqroqnej.

<sup>4</sup> Nanŋi aisib Jerusalem di brantonabqa Yesus aqa anjam maro tamo nanŋi ti Kristen kalil ti nanŋo gate ti nanŋi na minjreb, “Ningi kere bonub.” Onaqa Pol Barnabas wo nanŋi tigelosib wau kalil Qotei a nanŋo baŋ na yoqnej qaji deqa nanŋi sainjreb. <sup>5</sup> Sainjrnabqa Farisi tamo qudei Yesus qa nanŋo areqalo ŋinŋilateb qaji nanŋi qusibqa tigelosib mareb, “Sawa bei bei qaji nanŋi gago miligiq aiqa osibqa nanŋi mati muluŋ unsib Moses aqa dal anjam dauryqab di kere.”

<sup>6-7</sup> Nanŋi degsib marnabqa Yesus aqa anjam maro tamo nanŋi ti Kristen gate nanŋi ti anjam di gereiyqa koroeb. Koroosib anjam gargekoba marelenjoqneb. Onaqa Pita a tigelosiqqa nanŋi endegsi minjrej, “O ijo was kalil ningi qalie, Qotei a nami nuŋgo ambleq dena e giltbej. E na sawa bei bei qaji nanŋi Yesus aqa anjam bole minjqroqnitqa nanŋi quoqnsib Yesus qa nanŋo areqalo ŋinŋilatqajqa deqa giltbej. <sup>8</sup> Qotei a tamo kalil nanŋo areqalo qalie. A na aqa Mondor Bole nami iga egej dego kere sawa bei bei qaji nanŋi enjqreŋnu. Aqa kumbra dena a na iga osorgeŋnu, a na sawa bei bei qaji nanŋi dego elenqajqa are qaleŋnu. <sup>9</sup> Qotei a gam bei na iga Juda elenjoqnsiq olo gam bei na sawa bei bei qaji nanŋi elenjoqnsiq. Nanŋi Yesus qa nanŋo areqalo ŋinŋilateqneb gam dena qujai Qotei na nanŋo are miligi yansetnjqreŋnu. <sup>10</sup> Deqa ningi kiyayqa tamo unqasari Yesus dauryeqnub qaji nanŋi gulbe koba enjqreŋnub? Nuŋgo kumbra dena ningi Qotei aqa areqalo ugeteteqnub. Gulbe di nami gago moma nanŋi qoboiyqa keresai. Bini iga dego qoboiyqa keresai. <sup>11</sup> Iga endegsi poigeŋnu, Tamo Koba Yesus a iga ti sawa bei bei qaji nanŋi qa ti are boleiyeŋnu kumbra dena qujai Qotei na iga kalil elenjeŋnu.”

<sup>12</sup> Pita a nanŋi degsi minjrnaqa nanŋi kalil aqa anjam di qusibqa nanŋi mequmesoqneb. Onaqa Barnabas Pol wo nanŋi kamba tigelosib Qotei na nami nanŋi aiyel

siŋgilatnjreqnaqa nanŋi sawa bei bei qaji nanŋo ambleq di maŋwa gargekoba yoqneb deqa nanŋi sainjrnab queb.

<sup>13</sup> Sainjrsib koboonaqa Jems a kamba tigelosiqa marej, “O ijo was, niŋgi e na anjam bei mernŋit quiy. <sup>14</sup> Saimon a mergwo, ‘Qotei a sawa bei bei qaji nanŋo ambleq dena aqa segi tamo unŋasari nanŋi elenqa osiq giltnjrej.’ <sup>15</sup> Saimon aqa anjam de ti Qotei aqa medabu o qaji tamo nanŋo anjam ti utru qujai. Agi Qotei aqa medabu o qaji tamo bei a anjam endegsi nenŋrenyej, <sup>16</sup> ‘Tamo Koba a marqo, “Bunuqna e olo bosiy Devit aqa tal ulonej qaji di olo tigeltqai. Tal aqa iŋgi iŋgi kalil ugeeleneb qaji di dego bunuj atelenqai. <sup>17</sup> Amqa sawa bei bei qaji nanŋi e itbqa maroqnsib ijoq boqŋqab. E na nanŋi giltnjritqa nanŋi ijo segi tamo unŋasari sqab.” <sup>18</sup> Tamo Koba aqa anjam di a nami babtej agi bini olo babtoqnsiq mareqnu.’

<sup>19</sup> “Deqa ijo was, e ijo areqalo endegsi mernŋwai. Sawa bei bei qaji nanŋi are bulyoqnsib Qotei aqaq boqŋibqa iga nanŋi gulbe bei enjrqasai. <sup>20</sup> Iga anjam truquyala segi nenŋrenyosim nanŋoq qarinyqom. Anjam agiende. ‘Niŋgi gisaŋ qotei atrainjro qaji iŋgi uyoqnaib. Niŋgi sambala kumbra yoqnaib. Wagme sil na kakro tontnjrnab moreneb qaji di niŋgi uyoqnaib. Wagme leŋ ti dego uyoqnaib.’ Iga anjam truquyala di segi nenŋrenyosim sawa bei bei qaji nanŋoq qarinyqom. <sup>21</sup> Iga qalie, nami koba Juda nanŋi Moses aqa dal anjam qure qureq di palontoqneb agi bini palontoqnsib unub. Yori bati gaigai nanŋi nanŋo Qotei tal kalil miligiq di Moses aqa dal anjam sisiyeqŋub.”

*Kristen nanŋi anjam nenŋrenyosib  
sawa bei bei qaji nanŋoq qarinyeb*

<sup>22</sup> Jems a anjam degsi marnaqa Yesus aqa anjam maro tamo nanŋi ti Yesus aqa tamo unŋasari kalil ti nanŋo gate ti nanŋo ambleq dena tamo aiyel giltnjreb. Tamo aiyel di qarinyjrib Pol Barnabas wo nanŋi daurnjrsib Antiok qureq gilqajqa deqa giltnjreb. Tamo aiyel giltnjreb qaji nanŋo ñam Judas aqa ñam bei Barsabas nanŋi Sailas wo. Nanŋi aiyel Kristen gate soqneb. <sup>23</sup> Nanŋi qarinyjrqa osibqa anjam truquyala endegsib nenŋrenyosib nanŋo banq di ateb,

“O was niŋgi kaiye. Iga Yesus aqa anjam maro tamo iga ti Kristen gate ti anjam endi nenŋrenyosim nunŋoq qarinyonum. Niŋgi Antiok qure ti Siria sawa ti Silisia sawa ti di unub. Niŋgi sawa bei bei qaji. <sup>24</sup> Iga nami quem, tamo qudei nanŋi gago ambleq na tigelosib nunŋoq gilsib nanŋo segi areqalo na anjam bei mernŋgeb. Mernŋsib anjam dena nunŋo areqalo niñaqyetŋgeb. Tamo nanŋi di iga na qarinyjrosai. <sup>25</sup> Deqa iga kalil koroosim areqalo qujaitosim tamo aiyel giltnjrsimqa nunŋoq qarinyjronum. Nanŋo ñam Judas Sailas wo. Iga na

nanġi ti gago Kristen was bole aiyel Barnabas Pol wo nanġi ti nuṅgoq qarinjronum. <sup>26</sup> Barnabas Pol wo nanġi gago Tamo Koba Yesus Kristus aqa ñam siṅgila na ojsib waueqñub. Jeu tamo nanġi na nanġi aiyel ñumib moreñqajqa mareqñab nanġi ulaosaieqñub. <sup>27</sup> Deqa iga nanġi aiyel Judas Sailas wo koba na nuṅgoq qarinjronum. Judas Sailas wo nanġi na gago anjam nenġrenyonum qaji endi niṅgi olo merñgib quqwab. <sup>28</sup> O was niṅgi quiy. Iga Mondor Bole ombla areqalo qujaitosim anjam endi qosonum. Niṅgi gago anjam truquyala endi segi qusib dauryqab di kereqas. Iga niṅgi gulbe koba enġwasai. Gago anjam truquyala agiende. <sup>29</sup> Niṅgi gisañ qotei atrainjro qaji iṅgi uyoqñab. Wagme leñ ti uyoqñab. Wagme sil na kakro tontjrnab moreñeb qaji di uyoqñab. Sambala kumbra dego yoqñab. Niṅgi kumbra di segi dauryqab di niṅgi geregere sqab. Koboqo.” Yesus aqa tamo uṅgasari nanġi anjam di nenġrenyeb.

<sup>30</sup> Nenġrenyosib tamo qolqe nanġo bañq di atsib nanġi qarinjrnab gileb. Gilsib Antiok di brantosib Yesus aqa tamo uṅgasari nanġi koroinjrsibqa anjam nenġrenyeb qaji di enjreb. <sup>31</sup> Onaqa nanġi kalil anjam di sisiyosib anjam dena nanġo are siṅgilatetjnraqa nanġi tulañ areboleboleinjrej. <sup>32</sup> Judas Sailas wo nanġi Qotei aqa medabu o qaji tamo soqñeb deqa nanġi aiyel anjam olekoba Yesus aqa tamo uṅgasari nanġi minjrnab qunabqa anjam dena nanġo are siṅgilatetjnrej. <sup>33-34</sup> Nanġi aiyel bati qudei Antiok di sonabqa bunuqna Yesus aqa tamo uṅgasari nanġi na minjreb, “O gago was aiyel niṅgi olo aiyiy.” Degsib minjrsib qarinjrnabqa nanġi aisib Yesus aqa anjam maro tamo Jerusalem di soqñeb qaji nanġoq di olo branteb. <sup>35</sup> Onaqa Pol Barnabas wo nanġi Antiok di sosibqa Kristen qudei ti koba na wauoqñsibqa Tamo Koba aqa anjam plaltoqñsib tamo uṅgasari nanġi minjroqñeb.

*Pol Barnabas wo nanġi niriñkobaosib poeb*

<sup>36</sup> Onaqa bati bei Pol na Barnabas minjej, “Aqo aiyel nami qure qureq di Tamo Koba aqa anjam palontoqñem qaji deq olo gilsimqa Yesus aqa tamo uṅgasari nanġi unjrqom. Nanġi kiyersib unub kiyo di unjrqom.” <sup>37</sup> Onaqa Barnabas na Pol minjej, “Di kere. Iga Jon olo osim koba na gilqom.” Jon aqa ñam bei Mak. <sup>38</sup> Onaqa Pol a siṅgila na Barnabas saidyoqnej, “Eo. Mak a nami iga koba na wauqa gilnamqa Pamfilia sawaq di a na iga uratgosiq Jerusalem aiyej deqa iga a olo osi gilqasai.” <sup>39</sup> Pol na Barnabas degsi saidyeqnaqa nanġi aiyel anjam titosib niriñkobaosib poeb. Deqa Barnabas a Mak osiqa qobun na Saiprus nuiq gileb. <sup>40</sup> Ariya Pol a Sailas osiqa ombla gilqa laqñabqa Yesus aqa tamo uṅgasari nanġi na minjreb, “Tamo Koba a niṅgi qa are boleiyeme.” Osib

nanği aiyel qarınjnab gileb. <sup>41</sup> Nanği aiyel gilsib Siria sawa ti Silisia sawa ti ambleq na walweloqnsibqa qure qureq di brantoqnsibqa Kristen nanği itnjroqnsib Qotei aqa anjam minjroqnsib siŋilatnjroqneb.

## 16

### *Timoti a Pol dauryej*

<sup>1</sup> Onaqa bati bei Pol a walweloŋiq Derbe qureq di brantej. Dena tigelosiq Listra qureq gilej. Dia tamo bei soqnej aqa ñam Timoti. A Yesus dauryoqnej qaji. Aqa ai a Juda uña. A Yesus qa aqa areqalo siŋilatej qaji. Timoti aqa abu a Grik tamo. <sup>2</sup> Listra qure ti Aikoniam qure ti dia Yesus aqa tamo uŋgasari nanği maroqneb, “Timoti a tamo bolequja.” <sup>3</sup> Sawa dia Juda nanği qalieeb, Timoti aqa abu a Grik tamo. Deqa Pol a Timoti osiqa a ombla wauqa marsiqa muluŋ waiyej. <sup>4</sup> Bati bei nanği aiyel Sailas koba na gilsib qure qureq di walweloqneb. Walweloqnsibqa Jerusalem dia anjam qoseb qaji di Kristen nanği qusib dauryqajqa deqa minjroqnsib laqneb. Anjam di Yesus aqa anjam maro tamo nanžo gate nanği ti qoseb. <sup>5</sup> Bati deqa Qotei na tamo uŋgasari Yesus qa nanžo areqalo siŋilateb qaji nanği siŋilatnjroqnej. Bati gaigai tamo uŋgasari gargekoba are bulyoqnsib Kristen nanžo miligiq aiyeqnab nanği tulan kobaoqneb.

### *Pol a ñejo bulosiqa Masedonia tamo bei unej*

<sup>6</sup> Bati bei Pol na Sailas na Timoti na nanği qalub walwelosib Frigia sawa ti Galesia sawa ti dia Qotei aqa anjam mare mare giloqneb. Nanği Esia sawaq di Yesus aqa anjam marqa laq nabqa Mondor Bole na nanği saidnjrej. <sup>7-8</sup> Deqa nanği walwelosib Misia sawaq di branteb. Dena Bitinia sawaq gilqa laq nabqa Yesus aqa Mondor na nanği olo saidnjrnaqa nanği Misia sawa amble potosib sumsib torei Troas qureq di branteb. <sup>9</sup> Nanği Troas di sosibqa qolo Pol a ñejo bulosiqa Masedonia tamo bei unej. Masedonia tamo di a Pol aqa ulatamuq di tigelosiq minjej, “Ni Masedonia bosim iga aqaryaige.” <sup>10</sup> Pol a ñejo degsi unej deqa iga tigelosim Masedonia sawaq sumem. Iga endegsi poigej, “Qotei na iga metgwo deqa iga Masedonia sawaq di tamo uŋgasari nanği Yesus aqa anjam bole minjroqnoqom.”

### *Lidia a Yesus qa aqa areqalo siŋilatej*

<sup>11</sup> Onaqa iga Troas qureq dena qobuŋ gogetosim Samotres nui tinjosim sumem. Sumsim nui di bunjosim nebeonaqa Neapolis qureq di tiryem. <sup>12</sup> Dena iga siŋga na walwelosim Filipai qureq di brantem. Qure di nami Rom nanği bosib awoeb qaji. Qure di Masedonia nanžo qure kobaquja. Iga

sumsim bati gargekoba yala qure dia soqnem. <sup>13</sup> Onaqa Juda nanjo yori bationaqa iga qure polomq aisim ya qala beiq di brantem. Iga are qalem, “Ya qalaq di Juda nanjo pailyo sawa unu kiyo?” Degosim aiyem. Aisim ungasari qudei dia koroesonab nanji itnjrsimqa nanji koba na awoosim Qotei aqa anjam minjroqnem. <sup>14</sup> Nanjo ambleq di unja bei soqnej aqa ñam Lidia. A gara lent oqnsiq qarinyeqnaqa tamo nanji na awaiyoqneb. Di aqa silali wau. Aqa qure utru Taiataira. A Qotei qa louoqnej qaji. A ya qalaq di sonaqa Qotei na aqa areqalo waqtetonaga a Pol aqa anjam qusiq poiyoonaqa are bulyej. <sup>15</sup> Deqa tamo ungasari Lidia aqa talq di soqneb qaji nanji Lidia a ti yanso eb. Onaqa Lidia na iga mergej, “E Tamo Koba a qa ijo areqalo singilatonum ninji bole edegosib bosib ijo talq endi iga koba na sqom.” Lidia a tulanj singilaej deqa iga aqa talq di a koba na soqnem.

*Filipai qureq di Pol Sailas wo nanji tonto talq di breinjreb*

<sup>16</sup> Onaqa bati bei iga olo pailyo sawaq aiyeqnamqa kanjal unja bei bosiq gamq di iga itgej. Unja di a mondor uge ti soqnej. Mondor uge dena kumbra bunuqna brantelenqas qaji di ubtosiq minjeqnaqa a kamba tamo qudei nanji minjroqnej. Minjreqnaqa nanji quoqnsib silali koba yeqnab osi giloqnsiqa aqa tamo kokba nanjo banq di atoqnej. <sup>17</sup> Iga Pol koba na aiyeqnamqa unja di a iga daurgoqnsiqa tulanj lelenoqnsiqa maroqnej, “Tamo nanji di Qotei Goge Koba aqa wau tamo. Nanji anjam palontoqnsib Qotei a ninji padalo sawaq na elenqajqa gam osorñgeqnub.” <sup>18</sup> Bati gargekoba unja dena anjam degsi maroqnsiq iga daurgoqnej. Deqa bati bei Pol a unja deqa minjinj oqnaqa bulosiq mondor uge di minjej, “E Yesus Kristus aqa ñam na ni mermonum, ni unja di uratosim ulanj.” Degsi minjnaqa mondor uge dena unja di uratosiq ulanej.

<sup>19-20</sup> Pol a kumbra degyej deqa unja di aqa tamo kokba nanji silali oqajqa gam sainjrej. Gam sainjrnaqa di unsibqa Pol Sailas wo nanji ojsib koro sawaq joqsib gilsib Rom gate nanjo ulatamuq di tigeltjreb. Tigeltjrsibqa Rom gate nanji endegsib minjreb, “Tamo aiyel nanji dena iga tamo ungasari qure endia unum qaji gulbe koba egeqnub. Nanji aiyel Juda tamo. <sup>21</sup> Nanji aiyel kumbra osorgeqnub qaji di iga Rom tamo na dauryqajqa getento koba.” <sup>22</sup> Onaqa tamo ungasari kalil qure dia soqneb qaji nanji anjam di qusibqa Pol Sailas wo nanjo jejamuq di une qametnjroqneb. Onaqa Rom gate nanji na nanji aiyel ojsib qaja tamo nanjo banq di ateb. Atnabqa nanji na osib gara bumbranjetnjrsib bu toqon na kumbainjreb. <sup>23</sup> Nanji kumbainjro gargekobatosib tonto talq di breinjrsib tonto tal taqato tamo a minjeb, “Ni na

nanği aiyel şingila na tontnrsim geregere taqatnjresoqne.”  
<sup>24</sup> Degsib minjnabqa a nanği aiyel joqsıqa tonto tal miligiq di warum beiq di breinjrsiq nıamtañ kobaquja na nanğo şingı gıtantetnjrej.

<sup>25</sup> Onaqa qolo jige Pol Sailas wo nanği tonto tal miligiq di Qotei pailyoqnsib loueqnabqa tamo nanği tonto talq di soqneb qaji nanği quoqneb. <sup>26</sup> Bati qujai deqa mimin koba dosıqa şingila na tonto tal reñginjyonaqa sıranme kalil waqeleneb. Sil kokba kalil tamo nanği tontnjreb qaji di pambloñeleñeb. <sup>27-28</sup> Onaqa tonto tal taqato tamo a tigelosıqa nıam atej di sıranme kalil waqelenesonaq unej. Deqa a are qalej, “Tonto tamo kalil nanği jaraiyonub.” Degsi are qalsıqa aqa serie osiq aqa segi jejamu qalqa yonaqa Pol a maosiq minjej, “Ni ino segi jejamu qalaim. Iga kalil endi unum. Iga jaraiyo-sai.” <sup>29-30</sup> Pol a degsi tonto tal taqato tamo di minjnaqa a na qaja tamo qudei nanği metnjrnaq wañal osi bonab warum suwanej. Onaqa a tulañ ulaugetosiq gındagındañosiq urur ti warum miligiq gilsiq Pol Sailas wo nanğo şingı di nıam quosiq ñeiej. Dena tigelosıqa nanği aiyel joqsıq oqedosıq nenemnjrej, “O tamo kokba aiyel, e kumbra kiye yıtqa Qotei na e oqas?”

<sup>31</sup> Onaqa nanği aiyel na minjeb, “Ni Tamo Koba Yesus qa ino areqalo şingilatime. Yimqa Qotei na ni ti tamo unğasari kalil ni ombla tal qujaiq di unub qaji nanği ti elenqas.” <sup>32</sup> Degsi minjsibqa Tamo Koba aqa anjam plalteqñabqa a quoqnej. Tamo unğasari kalil a ombla tal qujaiq di soqneb qaji nanği dego quoqneb. <sup>33</sup> Onaqa qolo deqa tonto tal taqato tamo a na nanği aiyel yu qosetnjrsıqa tamo unğasari kalil a ombla tal qujaiq di soqneb qaji nanği koba na yanso eb. <sup>34</sup> Onaqa a na nanği aiyel joqsıqa aqa talq gilsib dia inği anainjrej. Tamo unğasari kalil a ombla tal qujaiq di soqneb qaji nanği a ti tulañ areboleboleinjrej. Di kiyaqa? Nanği are bulyosib Qotei qa nanğo areqalo şingilateb deqa.

<sup>35</sup> Ariya nebeonaqa Rom gate nanği na qaja tamo qudei nanği qarınjnırab aisib tonto tal taqato tamo di minjeb, “Ni na tamo aiyel di oqeq atim nanği sumeb.” <sup>36</sup> Onaqa a nanğo anjam di qusıqa Pol minjej, “Rom gate nanği na qaja tamo qudei qarınjnıronub bosib e endegsib merbonub, ‘Ni na nanği aiyel oqeq atim nanği sumeb.’ Nanği e degsib merbonub. Deqa nınği aiyel are lawo sumiy.” <sup>37</sup> Onaqa Pol a anjam di qusıqa qaja tamo nanği minjrej, “Aqo aiyel Rom tamo. Gate nanği na gago une bole babtosai. Nanği aqo aiyel laña ojsib tamo unğasari nanğo nıamdamuq di kumbaınğosib tonto talq endi waıgeb. Bini nanği lumu na ıga olo oqeq atib sumqajqa maronub. Deqa ıga sumqasai. Nanği segi bosib ıga tonto talq endena oqeq atib sumqom.”

<sup>38</sup> Onaqa qaja tamo nanġi olo gilsib Rom gate nanġi Pol aqa anjam di minjrnabqa qusib ulaeb. Di kiyaaqa? Pol Sailas wo nanġi Rom tamo deqa. <sup>39</sup> Deqa Rom gate nanġi Pol Sailas wo nanġo are latetnrqa marsibqa tonto talq aisib minjreb, “Bole, iga grotonum.” Degsib minjrsibqa siran waqtetnrsib joqsib oqedeb. Oqedosib nanġi aiyele minjreb, “Ninġi qure endi uratosib sumiy.” <sup>40</sup> Degsib minjrnabqa nanġi aiyele tonto tal uratosibqa walwelosib Lidia aqa talq gileb. Gilsib dia Yesus aqa tamo unġasari qudei nanġi itnjrsibqa Yesus aqa anjam na nanġo are sinġilatetnreb. Osib nanġi uratnjrsib qure di uratosib sumeb.

## 17

### *Tesalonaika nanġi na Pol Sailas wo ojqa mareb*

<sup>1</sup> Pol aqa wau qujai nanġi ti sumsib Amfipolis qureq di brantosib dena walwelosib Apolonia qureq sumeb. Dena tigelosib sumsib Tesalonaika qureq di branteb. Dia Juda nanġo Qotei tal bei soqnej. <sup>2</sup> Deqa Pol aqa kumbra gaigai yoqnej qaji di dauryosiqa Qotei tal miligiq gilej. Gilsiq yori bati qalub qa Qotei aqa anjam nenġrenq di so qaji di plaltoqnsiqa Juda tamo unġasari nanġi minjroqnej. <sup>3</sup> Pol a anjam geregere plaltosiq endegsi minjroqnej, “Qotei aqa anjam nami nenġrenyeb qaji di aqa utru agiende. Kristus a jaqatin koba osim moism olo subq na tigelqas.” Osiqa minjroqnej, “Yesus agi e ninġi a qa merngeqnum qaji a bole Kristus.” <sup>4</sup> Pol a nanġi anjam degsi minjreqlaqa tamo unġasari qudei nanġi aqa anjam di qusib poinjrnaqa Yesus qa nanġo areqalo sinġilatosib Pol Sailas wo daurnjreb. Grik tamo gargekoba Qotei qa louoqneb qaji nanġi ti unġa kokba qudei ti nanġi dego Yesus qa nanġo areqalo sinġilatosib Pol Sailas wo daurnjreb.

<sup>5</sup> Onaqa Juda nanġi Pol Sailas wo nanġi qa minjin oqetnjrnaqa tamo uge qudei inġi qarinyo sawaq dena joqsib tamo unġasari kalil nanġo are ugetetnreb. Osib Pol Sailas wo ojqa marsib tamo bei aqa ñam Jeson aqa talq gurgur ti gileb. Nanġi aiyele tal dia nerenqneb. Gilsib nanġi aiyele tamo unġasari nanġo ulatamuq di tigeltnrqa marsib nanġi aiyele qa ñamoqneb. <sup>6-7</sup> Namonab ugeinjrnaq nanġi Jeson lanġa ojsib Yesus aqa tamo unġasari qudei dego ojelenosib girinjrsib aisib qure deqa gate kokba nanġo ulatamuq di tigeltnjreb. Tigeltnjrsib lelenosib endegsib maroqneb, “Pol Sailas wo qure qureq di tamo unġasari nanġo areqalo niñaqyetnjroqnsib laqnum. Agi nanġi gago qure endeq bonabqa Jeson na nanġi joqsiqa aqa talq di gereinjrej unub. Tamo aiyele dena gago mandor koba Sisar aqa dal anjam gotranjoqnsib mareqnum, ‘Mandor koba bei unu aqa ñam Yesus.’ Nanġi aiyele degsib mareqnum.” <sup>8</sup> Juda

nanği na anjam di Pol Sailas wo nanği jejamuq di qametnjrn-abqa qure deqa gate kokba ti tamo unğasari gargekoba ti nanği qusibqa nanği aiyel qa minjin oqetnjrej. <sup>9</sup> Onaqa qure deqa gate kokba nanği na Yesus aqa tamo unğasari qudei Jeson a ti minjreb, “Nanği aiyel une di ninği na awaiyosib silali atibqa iga ninği uratjgnam gilqab.” Onaqa nanği silali atnabqa gate kokba nanği na nanği uratnjrnab gileb.

*Pol Sailas wo Beria qureq di Qotei aqa anjam maroqneb*

<sup>10</sup> Onaqa qolo qujai deqa Yesus aqa tamo unğasari Tesalonaika di soqneb qaji nanği na Pol Sailas wo qarinjrnab walwelosib sumsib Beria qureq di branteb. Di brantosib Juda nanği Qotei tal miligiq gilsib Qotei aqa anjam palontosib minjroqneb. <sup>11</sup> Juda tamo unğasari Beria di soqneb qaji nanği kumbra tulan boledamu. Tesalonaika di soqneb qaji nanği bul sai. Nanği Qotei aqa anjam quqwjajqa tulan areboleboleinjroqnej. Bati gaigai nanği Qotei aqa anjam nengrenq di so qaji di geregere peleyoqneb. Pol Sailas wo nanği anjam bole kiyo sai kiyo di nanği qalieqa marsib deqa nanği aiyel anjam ti Qotei aqa anjam nengrenq di so qaji de ti geregere tenemtoqneb. <sup>12</sup> Deqa qure dia Juda gargekoba nanği Yesus qa nanği areqalo singilatoqneb. Grik tamo unğasari kokba qudei dego Yesus qa nanği areqalo singilatoqneb.

<sup>13</sup> Onaqa Juda nanği Tesalonaika di soqneb qaji nanği Pol a Beria qureq sumsiq dia dego Qotei aqa anjam palontoqnej di qusibqa minjin oqetnjrnaqa mareb, “Iga Pol qalqom.” Degsib marsibqa Beria qureq bosib dia tamo unğasari nanği are ugetetnjreb. <sup>14</sup> Deyonabqa Kristen nanği na Pol qarinyonab alile aiyej. Ariya Sailas Timoti wo nanği aiyosai. Nanği Beria di soqneb. <sup>15</sup> Tamo nanği Pol suweiyeb qaji nanği a osib koba na torei Atens qureq sumeb. Sumsib Atens qureq di nanği Pol uratosib olo puluqa laqnabqa Pol na minjrej, “Ninği oqsib Sailas Timoti wo minjrib ijoq boqujateb.”

*Pol a Atens qureq di Yesus aqa anjam plaltoqnej*

<sup>16</sup> Onaqa Pol a Atens qureq di Sailas Timoti wo nanği qa tariñesosiq qure ambleq di walweloqnsiq gisan qotei nanği sulum gargekoba unoqnsiq are tulan gulbekobaiyoqnej. <sup>17</sup> Deqa a bati gaigai Juda nanği Qotei tal miligiq giloqnsiq Juda nanği ti Grik nanği Qotei qa louoqneb qaji nanği ti Yesus aqa anjam plaltosiq minjroqnej. Atens nanği koro sawaq di dego a bati gaigai tigeloqnsiq tamo unğasari nanği Yesus aqa anjam plaltosiq minjroqnej. <sup>18</sup> Bati bei Grik nanği qalie tamo qudei Atens di soqneb qaji nanği Pol ombla anjam na qotoqneb. Qudei nanği qalie tamo koba Epikurias aqa skulq dena qalie eb. Qudei nanği skul bei aqa ñam Stoik dena



qalie eb. Pol a nanġi endegsi minjroqnej, “Yesus a moisiq olo subq na tigelej. Deqa mondoŋ tamo kalil nanġi dego subq na tigelqab.” Pol a nanġi degsi minjroqnej deqa nanġi Pol ombla anjam na qotoqnsib segi segi maroqneb, “Pol a anjam laŋa laŋa mareqnu. A anjam kiyersi mergwajqa bqo?” Qudei nanġi maroqneb, “Pol a qure bei nanġo qotei qa mergeqnu kiyo?”<sup>19</sup> Nanġi degsib maroqnsib Pol osib nanġo koro sawa aqa ñam Areopagus deq osi gileb. Osi gilsib nanġo ambleq di tigeltosib minjeb, “Anjam bunuj ni mareqnum qaji di aqa utru geregere mergimqa iga qusim qalieqom.<sup>20</sup> Anjam bunuj ni mareqnum qaji di aqa utru bei. Iga anjam deqaji nami quosaioqnem. Deqa ni na anjam aqa utru geregere mergimqa iga qalieqom.”<sup>21</sup> Bati gaigai Atens nanġi ti tamo unġasari sawa bei beiq na Atens belenġeb qaji nanġi ti koroqnsibqa anjam bunu bunuj maroqneb.

<sup>22</sup> Deqa Pol a nanġo koro sawa ambleq di tigelosiqa minjrej, “O Atens tamo unġasari, e unonum, niŋġi qotei gargekoba louetnjreqnub.<sup>23</sup> E nunġo qure ambleq di walweloqnsimqa nunġo louqajqa inġi inġi kalil unelenosim gilsim atra bijal bei unonum. Atra bijal di aqa quraq di anjam endegsi nenġrenjonab sonaq unonum, ‘Atra bijal endi qotei bei iga qaliesai qaji aqa atra bijal.’ O Atens tamo unġasari niŋġi ijo anjam endi quiy. E Qotei niŋġi qaliesai qaji di ubtosiy mernġwai. A Qotei bole. Niŋġi a qa qaliesai. Niŋġi a qa laŋa loueqnub.

<sup>24</sup> “Qotei di a laŋ ti mandam ti inġi inġi kalil dego gereiyelenġej. A segi qujai laŋ qa ti mandam qa ti Tamo Koba. Deqa atra tal tamo na gereiyo qaji Qotei a dia sqasai.<sup>25</sup> Iga mandam tamo unum deqa iga na Qotei aqaryaiyosim inġi bei yqa keresai. A inġi bei qa truquosaieqnu. A segi inġi inġi kalil nanġo utru. A segi na iga nambile egeqnu. Inġi inġi kalil dego a segi na iga egeqnu.<sup>26-27</sup> Qotei dena nami tamo qujai Adam gereiyonaqa aqa moma nanġi paraosibqa sawa sawa kalil kereteb. Qotei na tamo unġasari nanġo segi segi sqajqa bati atelenġej. Nanġo segi segi sqajqa mandam beli dego atelenġej. A degyej. Di kiyaqqa? Tamo unġasari nanġi a qa namosib namosib itqajqa deqa. O Atens tamo unġasari niŋġi quiy. Qotei a isaq di sosai. A nunġo jojomq di unu.<sup>28</sup> A segi na iga nambile egeqnaqa iga bole sosim walweleqnum. Nunġo segi powo tamo qudei nanġi nami deqa are qalsib endegsib mareb, ‘Iga dego Qotei aqa anġro.’<sup>29</sup> Di bole. Iga Qotei aqa anġro. Deqa niŋġi quiy. Qotei a sulum bul sai. Tamo nanġi gol na silva na menin na ti sulum gereiyeqnu. Nanġo segi ban na ti qalie na ti sulum di gereiyeqnu. Qotei a sulum deqaji bul unu niŋġi edegaib.

<sup>30</sup> “Nami tamo ungasari nanği nanari soqneb. Nanği Qotei qaliesai. Deqa nanği gisañ qotei nanço sulum gereinjroqnsib biñinjroqneb. Bati di Qotei a nanço kumbra di unoqnsiqa unosaibuloqnsiqa nanği kambatnjrosaiognej. Ariya bini Qotei na tamo ungasari sawa sawa kalilq di unub qaji nanği endegsi minjreqnu, ‘Ninği are buliy.’ <sup>31</sup> Qotei a bati atej unu. Bati di brantimqa a na tamo ungasari kalil nanço une qa peginjrqas. Aqa segi kumbra bole na ti aqa Njiri Yesus Kristus giltej qaji aqa wau na ti nanço une qa peginjrqas. Tamo ungasari nanği degsib qalieqajqa deqa Qotei na Yesus subq na tigeltej.”

<sup>32</sup> Onaqa tamo ungasari nanği subq na tigelo qa anjam di qusibqa nanği qudei Pol kikiyeb. Ariya nanği qudei na Pol minjeb, “Anjam di bunuqna ni na olo mergim iga quqwom.” <sup>33</sup> Onaqa Pol a nanği uratnjrsiqa gilej. <sup>34</sup> Tamo qudei nanği Pol aqa anjam di qusib poinjrnaqa Yesus qa nanço areqalo singilatosib Pol dauryeb. Bei aqa ñam Dionisius. A koro sawa deqaji gate koba. Uña bei aqa ñam Damaris. Tamo ungasari qudei dego nanği Yesus qa nanço areqalo singilatosib Pol dauryeb.

## 18

### *Pol a Korin qureq di Yesus aqa anjam plaltoqnej*

<sup>1</sup> Onaqa bati bei Pol a Atens qure uratosiqa walwelosiq Korin qureq gilej. <sup>2</sup> Gilsiq dia Juda tamo bei aqa ñam Akwila itej. Akwila aqa qure utru Pontus. Nami yala Akwila aqa ñaun Prisila wo Itali sawa uratosib Korin beb. Rom nanço mandor koba Klodius a marej, “Juda nanği Rom qureq endi sqasai. Kalil jaraiqab.” Deqa nanği aiyel Itali sawa uratosib Korin qureq beb. Bosib Korin di sonabqa Pol a gilsiq nanği itnjrej. <sup>3</sup> Pol a nanği ti silali wau qujai. Deqa nanği koba na Korin di sosibqa silali qa wauoqneb. Nanço silali wau di nanği gara na tal gereiyogneb. <sup>4</sup> Yori bati gaigai Pol a Juda nanço Qotei tal miligiq giloqnsiqa Juda ti Grik ti nanği Yesus aqa anjam plaltosiq minjroqnej. Aqa anjam dena nanço are qametnjrimqa nanği Yesus qa nanço areqalo singilatqajqa deqa osiq anjam minjroqnej.

<sup>5</sup> Onaqa bati bei Sailas Timoti wo nanği Masedonia sawa uratosib gilsib Korin dia Pol itosib nanği koba na soqneb. Deqa Pol na aqa silali wau uratosiqa Qotei aqa anjam qa segi wauoqnej. Osiqa Juda nanço Qotei tal miligiq giloqnsiqa nanği singila na endegsi minjroqnej, “Yesus a bole Kristus Qotei na qarinyej qaji.” <sup>6</sup> Degsi minjreqnaqa nanği aqa anjam di quoqnsib gotranjoqnsib a misilinyogneb. Deqa Pol na aqa segi gara jugo tumburum butuyosiqa minjrej, “Ninği padalqab di nunço segi une na padalqab. Ijo une na sai. Deqa bini e

ninigi uratnngsiy tamo Juda sai nanngoq giloqnsiyqa Yesus aqa anjam minjroqnqai.” <sup>7</sup> Pol na Juda nanngi degsi minjrnsiqqa nanngo Qotei talq dena oqedosiq tamo bei aqa ñam Titius Jastus aqa talq di soqnej. Titius a Qotei qa louoqnej qaji. Aqa tal di Juda nanngo Qotei tal jojomq di soqnej. <sup>8</sup> Bati deqa Qotei tal taqato tamo aqa ñam Krispus a ti tamo ungasari kalil a ombla tal qujaiq di soqneb qaji nanngi ti Pol aqa anjam qusib Tamo Koba a qa nanngo areqalo singilateb. Korin tamo ungasari gargekoba nanngi dego Pol aqa anjam qusib Yesus qa nanngo areqalo singilatosib yanso eb.

<sup>9</sup> Bati bei qolo Pol a ñeio bulosiqqa Tamo Koba Yesus unnaqa minnej, “O Pol, ni ulaaaim. Ni qure endia sosimqa ino medabu waqtoqnsimqa boleq di ijo anjam mare mare laqne. Mequmaim. <sup>10</sup> E ni ombla sqai deqa tamo bei na ni ugeugeimqasai. Qure endia ijo segi tamo ungasari gargekoba unub.” <sup>11</sup> Onaqa Pol a anjam di dauryosiqqa Korin dia wausau qujai bai 6 sosisqa tamo ungasari nanngi Qotei aqa anjam plaltoqnsiq minjroqnej.

<sup>12</sup> Ariya Rom nanngo gate koba Galio a Akaia sawa taqatesonaqa bati deqa Korin dia Juda nanngi Pol qa minjin oqetnjrnaqa a ojsib koro sawaq osi gilsib Galio aqa awo jaram namoq di tigeltb. <sup>13</sup> Tigeltosib Galio minjeb, “Tamo endena iga Juda gago dal anjam gotranjoqnsiqqa Qotei louqajqa gam bei osorgeqnu.” <sup>14</sup> Onaqa Pol a kamba anjam marqa laqnaqa Galio na getentosiqqa Juda nanngi minjrej, “O Juda tamo ungasari ninngi quiy. Tamo endi a une kobaquja bei yimqa kiyo tamo bei qalim moyimqa kiyo ninngi a ojsib bosib ijo ulatamuq endi tigeltqab di e nunngo anjam quqwai. <sup>15</sup> Ariya ninngi nunngo segi dal anjam qa ti nunngo segi moma nanngo ñam qa ti maronub deqa e nunngo anjam di gereiyqasai. Di ijo wau sai. Ninngi segi na gereiyiy.” <sup>16-17</sup> Galio a awo jaramq di awesosiqqa Juda nanngi degsi minjrnsiqqa nanngi winjrej. Onaqa Juda nanngi nanngo Qotei tal taqato tamo aqa ñam Sostenes a ojsib Galio aqa awo jaram namoq di qalougeteb. Qaleqnab Galio a di unsiqa a deqa yala are qalosai. Unsiq unosaibulej.

### *Pol a Jerusalem olo aisiq dena Antiok qureq gilej*

<sup>18</sup> Pol a bati gargekoba yala Korin di soqnej. Sosisqa Yesus aqa tamo ungasari nanngi uratnjrsiqqa Prisila Akwila wo nanngi joqsiqa koba na Siria sawaq aiqa marsib qobun gogeteb. Nanngi qobun gogetqa yosib Pol a mati Senkria qureq di Juda nanngo kumbra dauryosiqqa aqa segi gate banqa ti me jungum ti gentej. Nami a bati qudei Qotei pailyoqnsiq deqa aqa gate banqa ti me jungum ti uratonaq soqnej. <sup>19-21</sup> Ariya nanngi Senkria qureq di qobun gogetosib aisib Efesus qureq di tiryeb. Tiryosib mandamq aisib Pol a Juda nanngo Qotei tal

miligiq gilsiq naŋgi Qotei aqa anjam plaltosiq minjroqnej. Onaqa naŋgi Pol aqa anjam qusib minjeb, “Ni bati qudei iga koba na endi sqom.” Minjnabqa a na naŋgi saidnjrsiqa aiqa osiqa minjrej, “Qotei na odbimqa bunuqna e nungoq olo bqai.” Degsi minjrsiqa a qobuŋ gogetosiq aiyej. A na Prisila Akwila wo naŋgi Efesus qureq di uratnjrsiq aiyej. <sup>22</sup> Pol a aisiqa Sisaria qureq di tiryosiqa qobuŋ uratosiqa siŋga na walwewosi aisiq Jerusalem di brantej. Brantosiq Yesus aqa tamo ungasari naŋgi itnjrsiqa koba na soqneb. Osiqa naŋgi olo uratnjrsiqa walwewosiq Antiok qureq gilej.

<sup>23</sup> Gilsiq Antiok dia bati gargekoba yala sosiqa dena walwewosiq Galesia sawa ti Frigia sawa ti dia laqnej. Laqnsiqa naŋgo qure kalilq di brantoqnsiqa tamo ungasari Yesus dauryoqneb qaji naŋgi koroinjroqnsiqa Qotei aqa anjam na siŋgilatnjroqnej.

### *Apolos a Efesus qureq di Qotei aqa anjam paltoqnej*

<sup>24</sup> Onaqa bati bei Juda tamo bei aqa ñam Apolos a Efesus qureq bosiq dia wauoqnej. Aqa qure utru Aleksandria. A Qotei aqa anjam maro tamo. A Qotei aqa anjam tulan qaliedamu. Deqa a na Qotei aqa anjam kalil nengrenq di so qaji di geregere paltoqnej. <sup>25</sup> Tamo qudei na nami Tamo Koba aqa gam Apolos osoryeb deqa a siŋgila na Yesus aqa anjam paltoqnej. A Jon yansjro qaji aqa wau qa segi qalieej. <sup>26</sup> Deqa bati bei a Juda naŋgo Qotei tal miligiq di siŋgila na anjam palonteqnaqa Prisila Akwila wo naŋgi aqa anjam qusibqa a osib qalaq gilsibqa Qotei aqa gam bole geregere osoryonab a poiyej. <sup>27</sup> Onaqa bunuqna Apolos a marej, “E Akaia sawaq gilqai.” A degsi marnaqa Yesus aqa tamo ungasari Efesus qureq di soqneb qaji naŋgi na odyosib minjeb, “Di kere. Ni gilime.” Degsib minjsibqa anjam bei nengrenyosib Apolos yonab a na osi gilsiq Yesus aqa tamo ungasari Akaia sawaq di soqneb qaji naŋgi enjrej. Endegsib nengrenyeb, “O gago was niŋgi quiy. Apolos a nungoq bqo. Deqa niŋgi a osib geregereiyiy.” Ariya Apolos a Akaia sawaq di sosiqa a na tamo ungasari Yesus qa naŋgo areqalo siŋgilateb qaji naŋgi Qotei aqa anjam minjreqnaqa anjam dena naŋgi siŋgilatnjroqnej. Qotei a nami naŋgi elenqa marsiq deqa naŋgi qa are boleiyej. Gam dena naŋgi Yesus qa naŋgo areqalo siŋgilateb. <sup>28</sup> Apolos a tamo ungasari naŋgo ñamdamuq di Juda naŋgo anjam siŋgila na gotranjoqnej. A Qotei aqa anjam nengrenq di so qaji dena naŋgi endegsi osornjrej, Yesus a bole Kristus.

## 19

### *Pol a Efesus qureq di Qotei aqa anjam palontoqnej*

1-2 Apolos a Korin di sonaqa Pol a Esia sawa yambaŋ naŋgo qure qureq di walweloqnej. A walweloŋ aisiq Efesus qureq di brantosiqa tamo qudei Yesus dauryoqneb qaji naŋgi sonab itnjrsiqa endegsi nenemnjrej, “Niŋgi Yesus qa nuŋgo areqalo siŋgilatosib bati deqa niŋgi Mondor Bole eb e?” Onaqa naŋgi na saideb, “Eo. Mondor Bole unu kiyo sai kiyo di iga nami quosaiqnem.” <sup>3</sup> Onaqa Pol na olo nenemnjrej, “Niŋgi anjam kiye qusib yanso eb?” Onaqa naŋgi na minjeb, “Jon yansnjro qaji aqa anjam segi iga qusim dena yanso em.”

<sup>4</sup> Onaqa Pol na olo minjrej, “Jon na tamo uŋgasari naŋgi endegsi minjroqnej, ‘Niŋgi are bulyibqa e na yansŋgwai.’ Osiqa minjroqnej, ‘Niŋgi tamo ijo qoreq na bŋas qaji a qa nuŋgo areqalo siŋgilatiy.’ Tamo Jon aqa qoreq na bŋajqa maroqnej qaji agi Yesus.” <sup>5</sup> Onaqa naŋgi Pol aqa anjam di qusib poinjrnaqa Tamo Koba Yesus aqa ñam na yanso eb. <sup>6</sup> Yanso onabqa Pol a naŋgo gateq di aqa baŋ atnaqa Mondor Bole naŋgoq aisiq meŋ bulyetnjrnaqa bati qujai deqa naŋgi qure utru segi segi naŋgo anjam mareleŋoqneb. Osib naŋgi Qotei aqa medabu osib anjam palontoqneb. <sup>7</sup> Bati deqa tamo 12 naŋgi Mondor eb.

<sup>8</sup> Pol a bai qalub Efesus dia Juda naŋgo Qotei tal miligiq giloqnsiqa Qotei aqa anjam minjroqnej. Qotei na aqa segi tamo uŋgasari naŋgi taqatnjrsim naŋgo Mandor Koba sqas anjam di aqa utru Juda naŋgi geregere poinjrqaqqa deqa Pol a siŋgila na minjroqnej. <sup>9</sup> Degyeqnaqa Juda qudei naŋgi Pol aqa anjam di qusibqa naŋgi a qa ugeosib aqa anjam dauryqa urateb. Osib ŋambile gaigai sqajqa gam Yesus na babtej qaji di misiliŋyosib tamo uŋgasari naŋgi endegsib minjroqneb, “Yesus aqa gam di uge.” Deqa Pol a naŋgi uratnjrsiqa tamo uŋgasari Yesus qa naŋgo areqalo siŋgilateb qaji naŋgi segi joqsiqa tamo bei aqa ñam Tiranus aqa skul kobaq gileb. Gilsib dia Pol a bati gaigai Qotei aqa anjam plaltoqnej. <sup>10</sup> Pol a wausau aiyel degyoqnej. Deqa tamo uŋgasari kalil Esia sawaq di soqneb qaji Juda ti Grik ti naŋgi Tamo Koba aqa anjam quoqneb.

*Skeva aqa ŋiri 7 naŋgi mondor uge naŋgi winjrqaqqa wauoqneb*

<sup>11</sup> Qotei a Pol aqa baŋ na maŋwa gargekoba babtoqnej. <sup>12</sup> Deqa tamo qudei na naŋgo gara ñeŋgi oqnsib Pol aqa jejamuq di betertoqnsib gara di olo osi giloqnsib tamo mainjro qaji naŋgo jejamuq di ateqnab naŋgo ma saioqnej. Tamo mondor uge ti so qaji naŋgo jejamuq di dego gara ñeŋgi ateqnab mondor uge naŋgi jaraiyoqneb.

<sup>13</sup> Juda tamo qudei naŋgi dego sawa sawaq di walweloqnsibqa mondor uge naŋgi winjrib jaraiqaqqa wauoqneb. Naŋgi silali oqajqa deqa marsib wau di yoqneb. Onaqa bati bei

nanği qudei Tamo Koba Yesus aqa ñam na mondor uge bei wiyqa osib mondor uge endegsib minjeb, “Iga Yesus agi Pol a deqa anjam palonteqnu qaji aqa ñam na ni mermonum, ni tamo di uratosim ulañ.” <sup>14</sup> Juda nanngo atra tamo koba Skeva aqa ñiri 7 nanği kumbra di degyeb. <sup>15</sup> Degyonabqa mondor uge na nanği kamba minjrej, “E Yesus qalie. E Pol dego qalie. Ariya ninği tal qabe?” <sup>16</sup> Onaqa tamo mondor uge ti so qaji a sinğila na prugosiq nango qawarq di awoosiq nanği ñumougetnjrsiq jejamu niñaqyetnjrej. Osiqa nango gara bumbranjetnjrnaqa nanği tal uratosib yosi jaraiyeb. <sup>17</sup> Onaqa tamo unğasari kalil Juda ti Grik ti Efesus qureq di soqneb qaji nanği kumbra deqa qusibqa ulaugeteb. Osib nanği Tamo Koba Yesus aqa ñam tulañ soqtoqneb. <sup>18</sup> Bati deqa tamo unğasari gargekoba nanği Yesus qa nango areqalo sinğilatoqneb. Deqa nanği boqnsib nango kumbra uge uge nami yoqneb qaji di tamo kalil nango ñamdamuq di ubtoqneb. <sup>19</sup> Tamo unğasari gargekoba quñam qaloqneb qaji nanği dego boqnsib nango quñam qalo qaji buk kalil koroiyoqnsibqa tamo unğasari nango ulatamuq di koitelenoqneb. Buk di nami silali na awaiyo qaji. Awai sisiyeb 50,000 kina. <sup>20</sup> Nanği kumbra degyeb deqa Tamo Koba aqa anjam tulañ kobaoqnsiqa sawa sawaq gileqnaqa tamo unğasari gargekoba nanği quoqneb.

*Efesus nanği Pol qa minjin oqetnjrnaqa murqumyoqneb*

<sup>21</sup> Efesus qureq di Pol a Qotei aqa wau yoqnsiq koboonaqa Qotei aqa Mondor na Pol areqalo yonaqa a endegsi marej, “E Masedonia sawa ti Akaia sawa ti dia walweloqnsiyqa dena aisiy Jerusalem di brantqai.” Osiqa marej, “Di koboamqa e Jerusalem uratosiy gilsiy Rom qure dego unqai.” <sup>22</sup> Pol a degsi marsiqa tamo aiyel a koba na wauo qaji Timoti Erastus wo nanği qarijnjrnaqa namoosib Masedonia sawaq gileb. Pol a segi Esia sawaq di soqnej. A bunuqna Masedonia sawaq gilqa marsiqa nanği aiyel namoqna qarijnjrnaq gileb.

<sup>23</sup> Bati deqa Efesus dia tamo qudei nanği ñambile gaigai sqajqa gam Yesus na babtej qaji deqa ñirinğobaoqneb. <sup>24</sup> Nanngo ñirinğ aqa utru agiende. Tamo bei aqa ñam Demitrius a silva oqnsiq dena inği inği gereiyoqnej. A na gisañ qotei bei aqa ñam Artemis aqa atra tal sigitoqnsiqa atra tal sulum kiñilala silva na gereiyoqnej. Gereiyeqnaqa tamo unğasari nanği awaiyeqnaqna tamo qudei a koba na wauo qaji nanği a ti dena silali koba oqneb. <sup>25</sup> Bati bei Demitrius a na aqa wau qujai nanği ti tamo qudei wau deqaji yoqneb qaji nanği ti koroinjrsiqa endegsi minjrej, “Ninği quiy. Gago wau endena iga silali koba eqnum. <sup>26</sup> Ariya Pol a gago wau endi ugeteqnu. Agi a gam endena ugeteqnu. A na tamo unğasari gargekoba nango are tigeltetnjroqnsiqa minjreqnu, ‘Tamo nanği ban na

qotei gereiyo qaji di qotei bolesai. Di gisan qotei.' Yeƣnaƣa nanƣi aƣa anjam di dauryoqnsib qotei Artemis qoreiyoqnsib Artemis aƣa atra tal sulum dego awaiyƣa urateqnu. Pol aƣa kumbra di niƣi uneqnu. Aƣa anjam dego niƣi queqnu. Aƣa kumbra di a Efesus endia segi yosai. Esia sawa kere-toqnsiƣa dia dego a kumbra di yeƣnu. <sup>27</sup> Pol aƣa kumbra dena gago silali wau endi ulonƣas. Di segi sai. Gago qotei koba Artemis aƣa atra tal aƣa ñam dego ugeƣas. Amƣa tamo unƣasari kalil nanƣi Artemis aƣa ñam soqtƣa uratƣab. Niƣi ƣalie, Esia sawaƣ endi tamo unƣasari nanƣi Artemis aƣa ñam soqtoqnsibƣa a ƣa loueqnu. Sawa sawa kalilƣ di dego tamo unƣasari nanƣi Artemis aƣa ñam soqteqnu. Pol aƣa anjam mareƣnu qaji dena Artemis aƣa ñam koba di torei ulontƣas."

<sup>28</sup> Onaƣa sulum gereiyo tamo nanƣi anjam di qusib minjin ani oqetnjrnaƣa tulaƣ murqumyoqnsib maroqneƣ, "Efesus gago qotei Artemis a qotei kobaƣuƣa." <sup>29</sup> Nanƣi degsib murqumyeƣnabƣa tamo unƣasari kalil Efesus di soqneƣ qaji nanƣi qusibƣa nanƣi dego murqumyoqneƣ. Osib Masedonia tamo aiyel Pol dauryosib beb ƣaji aƣi Gaius Aristarkus wo nanƣi oƣeb. Ojsib nanƣi aiyel girinjnrsib ƣure deƣa gate kokba nanƣo ulatamuƣ di tigeltjnƣa marsib gurgurosib koro sawaƣ joqnsib gileb. <sup>30</sup> Onaƣa Pol a deƣa qusiƣa tamo unƣasari nanƣo are latetjnƣa marsiƣa nanƣo ambleƣ aiƣa laƣnaƣa tamo unƣasari Yesus dauryeb ƣaji nanƣi na saidyeb. <sup>31</sup> Rom tamo kokba ƣudei Esia sawa taƣatoqneƣ ƣaji nanƣi Pol ƣalieeb deƣa nanƣi dego anjam ƣariƣyosib minjeb, "Ni koro sawa miligiq gilaim."

<sup>32</sup> Tamo unƣasari tulaƣ gargekoba nanƣi koro sawaƣ di koroosib murqumyoqneƣ. Utru kiye ƣa nanƣi bosib koroeb di nanƣi ƣaliesai. Utru bei bei ƣa maroqnsibƣa laƣa laƣa murqumyoqneƣ. <sup>33</sup> Onaƣa Juda ƣudei nanƣi na tamo unƣasari nanƣo are latetjnƣa marsib Juda tamo bei aƣa ñam Aleksander osib koro sawa ambleƣ di atnabƣa tamo unƣasari nanƣi a unsib mareb, "Tamo di aƣa une ƣa kiyo iga bosim koroonum?" Onaƣa Aleksander a tamo unƣasari nanƣi anjam bei minjnƣa osiq tigelej. Tigelosiƣa nanƣi kiriƣa osiq aƣa baƣ soqtelj. <sup>34</sup> Baƣ soqtonaƣa nanƣi kiriosai. Nanƣi poinjrej, Aleksander a Juda tamo. Deƣa nanƣi kalil olo murqumyoqnsib maroqneƣ, "Efesus gago qotei Artemis a qotei kobaƣuƣa." Nanƣi anjam ƣujai di tulaƣ wainjoqnsib sokobaiyeb.

<sup>35</sup> Onaƣa Efesus nanƣo gate bei a kamba tamo unƣasari nanƣi anjam minjnƣa osiq tigelej. Tigelosiƣa nanƣi kiriƣa osiq aƣa baƣ soqtonaƣa nanƣi kirieleƣonabƣa minjrej, "O Efesus tamo unƣasari niƣi ƣuiy. Efesus endia niƣi na qotei koba Artemis aƣa atra tal taƣateqnu. Artemis aƣa sulum nami laƣ goge

na ulonosiq mandamq aiyey qaji di dego ningi na taqateqnuub. Tamo ungasari kalil nanngi di qalie. <sup>36</sup> Deqa tamo bei na anjam di gotranjyqa keresai. O ijo was, ningi grotosib une bei yaib deqa ningi mati lawo na sosib geregere are qaliy. <sup>37</sup> Tamo aiyel Gaius Aristarkus wo nanngi une saiqoji. Ningi na nanngi laña joqsib bonub. Nanngi gago atra talq dena ingi bei bajinosai. Nanngi gago qotei Artemis aqa ñam misilinyosai dego. <sup>38</sup> Deqa Demetrius aqa wau qujai nanngi ti tamo qudei qa anjam bei soqnimqa joqsib Rom gate kokba nanngo ulatamuq di tigelt-njrsib anjam marqab. <sup>39</sup> Ningi dego tamo qudei qa anjam bei soqnimqa bati atibqa Rom gate kokba nanngi koroosib nungo anjam gereiyqab. <sup>40</sup> Bini iga laña njirin tigeltonum utru saiqoji. Deqa Rom gate kokba nanngi bosib koro endeqa utru nenemgibqa iga na kamba anjam bei minjrqa keresaiigo uge.” <sup>41</sup> Tamo gate dena tamo ungasari nanngi anjam degsi minjrsiqa nanngi winjrnaq jaraiyeb.

## 20

### *Pol a Masedonia sawa ti Grik sawa ti dia walweloqnej*

<sup>1</sup> Onaqa tamo ungasari nanngo murqumyo koboonaqa Pol na Kristen nanngi metnjrnaqa aqa areq di koroonaqqa nanngi singilatnjrej. Osiqa nanngi uratnjrsiqa Masedonia sawaq gilej. <sup>2</sup> Gilsiq sawa dia walweloqnsiqa Kristen nanngi itnjroqnsiqa Qotei aqa anjam gargekoba minjroqnej. Minjreqnaqa aqa anjam dena nanngi singilatnjroqnej. Onaqa a sumsiq Grik nanngo sawaq di brantej. <sup>3</sup> Brantosiq sawa dia bai qalub sosisqa dena qobun na Siria sawaq aiqa laqnaqa Juda tamo qudei na Pol qalsib moiyoqqa mareqnab qusiqa endegsi are qalej, “E olo puluosiy singa na Masedonia sawaq oqsiy dena Siria sawaq aiqai.” <sup>4-5</sup> A degsi are qalsiqa tigelosiq Masedonia sawaq oqwa osiqa tamo qudei nanngi joqsiqa koba na oqeb. Tamo di nanngo ñam agi marqai. Bei Sopater. A Pirus aqa njiri. A Beria qure qaji. Tesalonaika tamo aiyel Aristarkus Sekundus wo. Bei Gaius. A Derbe qure qaji. Bei Timoti. Esia tamo aiyel Tikikus Trofimas wo. Tamo kalil nanngi di Pol ombla Masedonia sawaq oqsib dia iga Pol koba na uratgosib namo aisib Troas qureq di branteb. Brantosib dia iga qa tariñoqneb. <sup>6</sup> Onaqa Juda nanngo bem tiyosai qaji uyqa bati koboonaqa iga Filipai qureq di qobun bei gogetosim qobun na aisim bati 5 koboonaqa Troas qureq di tiryem. Tiryosim dia tamo nanngi iga qa tariñoqneb qaji nanngi itnjrsimqa bati 7 nanngi koba na soqnem.

### *Yutikus a ulonosiq moinaqa Pol na olo tigeltej*

<sup>7</sup> Onaqa Juda nanngo yori bati koboonaqa nebeonaq qolo iga Kristen nanngi koroinjrsimqa nanngi koba na bem gentosim



uyognem. Bem uyeqnamqa Pol na Qotei aqa anjam minjroqnej. A anjam olekoba mareqnaq qolo jigeej. Di kiyaaqa? Nebeamqa a nanği uratnjrsim aiqas. <sup>8</sup> Nanği koroesonabqa warum goge dia wañal gargekoba pumblonjoqneb. <sup>9</sup> Angro wala bei aqa ñam Yutikus a siranme kiñala dadan gogeqsi aqa areq di awesoqnej. Onaqa Pol a anjam tulan olekoba mareqnaqa Yutikus a urnamyonaqa tibiboqnej. Osiq qambumtosiqa warum goge dena ulonosiq mandamq aiyej. Onaqa nanği kalil mandamq aisib Yutikus osib soqteb a moiyej. <sup>10</sup> Pol a dego mandamq aisiqa angro wala di soqonyej. Soqonyonaqa a olo ñambile ej. Deqa Pol na tamo unğasari kalil nanği minjrej, “Ninği are gulbeinğaiq. A ñambile unu.” <sup>11</sup> Pol a nanği degsi minjrsiqa olo warum gogeq oqsiq dia bem ginğenğyonaqa nanği uyeb. Uynabqa Pol na olo anjam olekoba nanği minjreqnaqa nebeej. Nebeonaqa Pol a nanği uratnjrsiqa aiqa osiqa endegsi minjrej, “O ijo was ninği quiy. E aiyeqnum. Deqa ninği bole soqniy.” <sup>12</sup> Angro wala di a ñambile soqnej deqa aqa was nanği tulan areboleboleinjrnaqa a osib nanğo talq gileb.

### *Pol a Troas qure uratosiqa Miletus qureq aiyej*

<sup>13</sup> Ariya iga na Pol uratosim namoosim qobun bei gogetosim aisim Asos qureq di tiryem. Di kiyaaqa? Pol a nami iga endegsi mergej, “Ninği namooiy. E bunuqna sinğa na walwelosiy aisiy Asos qureq di ninği itnğwai. Osiy dena ninği koba na qobun gogetosim aiqom.” Pol a iga degsi mergej deqa iga namo qobun na aisim Asos qureq di tiryosim Pol qa tariñoqnem. <sup>14</sup> Bunuqna Pol a Asos qureq bosiq dia iga itgonaaqa iga koba na qobun gogetosim aisim Mitilini qureq di tiryem. <sup>15</sup> Nebeonaqa iga dena qobun na aisim Kios nui qalaq di tigelosim ñereñem. Olo nebeonaqa iga qobun na aisim Samos nui qalaq di tigelosim ñeiem. Olo nebeonaqa iga aisim Miletus qureq di tiryem. <sup>16</sup> Pol na iga endegsi mergej, “Iga Efesus qure bunğosim urur Jerusalem aiqom. Aisim di soqnimqa Juda nanğo inği meli bunuj otoro bati ñam Pentikos di brantim unqom. E Esia sawaq endi bati olekoba sqasai.” Pol na iga degsi mergej.

### *Pol a Efesus nanğo Kristen gate nanği anjam minjrej*

<sup>17-19</sup> Iga Miletus qureq di tiryonamqa Pol na tamo qudei nanği qarinjrnaqa nanği sinğa na gilsib Efesus di brantosib Kristen gate nanği endegsi minjreb, “Ninği Miletus qureq aisib dia Pol itosib aqa areq di koroabqa a na ninği anjam bei merñğwas.” Onaqa Kristen gate nanği tigelosib Miletus qureq aisib dia Pol itosib aqa areq di koroonabqa a na nanği anjam endegsi minjrej,

“O Kristen gate ningi quiy. E Esia sawaq di branto nasiti e nungoq bosim ningi koba na soqnem. Sosimqa e bati gaigai Tamo Koba aqa anjam ningi merngoqnem. E ijo segi nam soqtqajqa are qalosaioqnem. Ijo kumbra di ningi qalie. E ningi koba na sosimqa gulbe gargekoba itoqnsim akamoqnem. Bati gargekoba Juda nanngi na e lubsib moiyoqbqa mareq nab dena e are gulbekobaiboqnej. <sup>20</sup> Ningi qalie, e bati gaigai nungo koro sawaq di, nungo segi segi talq di are singilatetngwajqa anjam merngoqnem. E anjam deqaji ningi merngwajqa uratosaiqnem. <sup>21</sup> E bati gaigai Juda tamo ti Grik tamo ti nanngi singila na endegsi minjroqnem, ‘Ningi are bulyosib Qotei aqaq bosib gago Tamo Koba Yesus qa nungo areqalo singilatiy.’ E degsi minjroqnem. <sup>22</sup> Deqa ningi quiy. Qotei aqa Mondor na ijo are tigeltetbej deqa e Jerusalem aiyeqnum. Dia kumbra kiye ijoq di brantqas di e qaliesai. <sup>23</sup> E qure qureq di laqnamqa Mondor Bole na e endegsi merbeqnu, ‘Ni Jerusalem dia tonto talq aisim gulbe koba oqam.’ Deqa e qalieonum, kumbra di ijoq bqas.

<sup>24</sup> “Di unqum. E ijo segi jejamu qa are qalosaieqnum. Wau kalil Tamo Koba Yesus na ebej qaji di e yosiy kobotqajqa are qaleqnum. Wau di endegsi unu. E singila na Yesus aqa anjam bole tamo unqasari nanngi minjre minjre laqnqai. Yesus aqa anjam bole di aqa damu agiende. Qotei a tamo unqasari nanngi qa are boleiyeqnu.

<sup>25</sup> “Deqa ningi quiy. E nami nungo ambleq di sosimqa anjam endegsi palontoqnem, ‘Qotei na aqa segi tamo unqasari nanngi taqatnjrsim nanngo Mandor Koba sqas.’ Ariya bini e qalieonum, e ningi uratngitqa ningi ijo ulatamu olo unqasai. <sup>26-27</sup> Bati e nungo ambleq di sosimqa e Qotei aqa areqalo kalil ubtosim ningi merngekritem. E wau di uratosaiqnem. Deqa tamo bei a nungo ambleq di padalqas di ijo une na sai. <sup>28</sup> O Kristen gate, ningi nungo segi segi so geregere taqatosib Qotei aqa tamo unqasari nanngi dego geregere taqatnjroqniy. Qotei aqa tamo unqasari nanngi di kaja du du bul. Qotei na aqa Niri Yesus Kristus aqa len aiyej qaji dena nanngi awainjrej. Deqa ningi nanngo gate bole sosibqa nanngi geregere taqatnjroqniy. Wau di Mondor Bole na ningi engej. <sup>29</sup> E qalie, e ningi uratngitqa gisan anjam maro tamo qudei nanngi nungo ambleq aisib Qotei aqa tamo unqasari nanngi ugeugeinjroqnbqab. Baun juwan na kaja nanngi ugeugeinjreqnub dego kere. <sup>30</sup> Nungo ambleq dena dego tamo qudei nanngi tigelosib Qotei aqa anjam bole olo bubulyoqnsibqa gisan anjam maroqnbqab. Nanngi degyqab. Di kiyaaqa? Tamo unqasari Yesus dauryeqnub qaji nanngi qusibqa Qotei aqa anjam bole ulontosib olo gisan tamo nanngi di daurnjrqaqqa deqa. <sup>31</sup> Deqa ningi geregere

nam atoqniy. Osib ijo anjam e bati gaigai ningi merngoqnem qaji deqa are qaloqniy. Agi wausau qalub e ningi koba na sosimqa qolo ti qanam ti Qotei aqa anjam ningi merngoqnsim akamoqnem. E wau di uratosaiqnem. Ningi ijo anjam deqa geregere are qaloqniy.

<sup>32</sup> “Bini e ningi Qotei aqa banq di atitqa a na ningi geregere taqatngwas. Qotei a ningi qa are boleiyej anjam di ningi singila na ojesoqniqbqa anjam dena ningi singilatngwas. Amqa inji bole bole Qotei a nami aqa segi tamo ungasari nanqi enjrqa marej qaji di ningi oqab.

<sup>33</sup> “E silali qa ti gara qa ti tamo bei njlyosaiqnem. <sup>34</sup> Ningi qalie, e inji bei qa truquoqnsimqa e segi wauoqnsim ijo inji awaiyoqnem. Osim tamo nanqi e koba na soqnem qaji nanqi dego inji anainjroqnem. <sup>35</sup> Kumbra kalil e nungo ambleq di yoqnem qaji di ningi segi unoqneb. Kumbra di ningi dau-ryosib yoqniy. Kumbra agiende. Ningi waukobaoqnsibqa tamo ungasari singila saiqoji unub qaji nanqi aqaryainjroqniy. Ningi Tamo Koba Yesus aqa anjam nami marej qaji deqa are qaloqnsib degsib wauoqniy. Agi Yesus a segi nami endegsi marej, ‘Tamo bei na tamo bei inji yqas di tamo inji oqas qaji a areboleboleiyqas. Ariya tamo dena inji yqas qaji a olo tulan areboleboleiyqas.’ ”

<sup>36</sup> Pol na Efesus Kristen gate nanqi anjam degsi minjrsiq koboonaqa singa pulutosiqa nanqi koba na Qotei pailyeb. <sup>37</sup> Pailyo koboonaqa gate nanqi akamkobaoqnsib Pol soqonyosib kundogyoqneb. <sup>38</sup> Pol na minjrej, “Ningi ijo ulatamu olo unqasai.” Aqa anjam deqa nanqi are tulan gulbeinjrej. Onaqa nanqi na iga suweigonab iga alile aisim nanqi uratnjrsim qobun gogetosim aiyem.

## 21

### *Pol a qobun na Jerusalem aiyoqnej*

<sup>1</sup> Iga qobun na aisim Kos nui bunyosim nebeonaqa Rodes nuiq di tiryonam olo nebeej. Nebeonaqa iga Rodes nui uratosim aisim Patara qureq di tiryem. <sup>2</sup> Dia qobun bei Fonisia sawaq aiqa laqnaqa iga qobun di gogetosim aiyem.

<sup>3</sup> Iga qobun na aisim Saiprus nui jomyosim banq qonanq waiyosim bunyosim aiyem. Aisim Siria sawa bunyosim Tair qureq di tiryem. Tiryonamqa tamo qobunq di wauo qaji nanqi na inji inji kalil wanjarosib mandamq di atelejeb.

<sup>4</sup> Qure dia iga Yesus aqa tamo ungasari nanqi itnjrsimqa bati 7 nanqi koba na soqnem. Sonamqa Qotei aqa Mondor na anjam ubtosiqa nanqi endegsi minjrej, “Pol a Jerusalem dia gulbe koba itqas.” Degsi minjrnaq qusibqa Pol wainyoqneb, “Ni Jerusalem aiyaim.” Onaqa Pol na kamba minjroqnej, “Sai. E

Jerusalem aiqai.”<sup>5</sup> Onaqa bati 7 koboonaqa iga Pol koba na qure di uratosim qobun gogetqa marsim alile aiyem. Yesus aqa tamo kalil nanjo unja ti angro ti nanji na iga suweigosib alile aisim dia iga koba na singa pulutosim Qotei pailyem.<sup>6</sup> Pailyo koboonaqa iga nanji ban ojsimqa minjrem, “Ninji bole soqniy.” Onaqa nanji na iga mergeb, “Ninji aiyiy.” Degsib mergonab iga qobun gogetonamqa nanji olo puluosib nanjo qureq gileb.

*Qotei aqa medabu o qaji tamo Agabus a anjam bei Pol minjei*

<sup>7</sup> Ariya iga qobun na Tair qure uratosim aisim Tolemes qureq di tiryem. Tiryosim dia Yesus aqa tamo ungasari nanji itnjrsimqa bati qujai nanji koba na soqnem.<sup>8</sup> Nebeonaqa iga Tolemes qure uratosim walwelosi aisim Sisaria qureq di brantem. Brantosim Yesus aqa anjam maro tamo Filip aqa tal gogetosimqa a ombla soqnem. Nami Jerusalem dia tamo 7 nanji ingi jeiyo wau enjreb deqaji bei agi Filip.<sup>9</sup> Filip aqa angro sebin qolqe nanji a ombla soqneb. Nanji Qotei aqa medabu o qaji unja.

<sup>10</sup> Bati qudei iga Sisaria qureq di sonamqa Qotei aqa medabu o qaji tamo Agabus a Judia sawaq dena walwelosiq gagoq bej.<sup>11</sup> Bosiq Pol aqa alalag yayiosiq qombilgej. Qombil aqa utru agiende. Agabus na Pol aqa alalag osiq aqa segi ban ti singa ti alalag dena qosej. Osiqa mergej, “Mondor Bole na e endegsi merbqo, ‘Jerusalem dia Juda nanji na tamo alalag endi tigeqnu qaji aqa singa ti ban ti endegsib qosqab. Qosisib a osi gilsib tamo Juda sai nanjo banq di atibqa nanji na a ugeugeiyqab.’”

<sup>12</sup> Onaqa iga Agabus aqa anjam di qusimqa tamo ungasari qudei qure dia soqneb qaji nanji iga ti Pol minjoqnem, “Ni Jerusalem aiyaim.”<sup>13</sup> Onaqa Pol na iga mergej, “Ninji kiyaaq akamoqnsib are gulbetetbeqneb? E Tamo Koba Yesus aqa ñam qa tonto talq di waibqab di kere. Aqa ñam qa e lubib moiqai di kere. E gulbe di uratqasai. E itqai.”<sup>14</sup> Pol a degsi gago anjam quqwa uratosiq mergonaqa iga na olo saidyosai. Iga marem, “Unjum. Pol a Tamo Koba aqa areqalo dauryosim Jerusalem aiyem.”

*Pol a Jerusalem di brantej*

<sup>15</sup> Bati qudei koboonaqa iga Jerusalem aiqa marsimqa gago ingi ingi kalil gereiyosim tigelosim aiyem.<sup>16</sup> Aiqa yeqnam Sisaria tamo qudei Yesus dauryoqneb qaji nanji na iga suweigosib koba na aisim Jerusalem di brantem. Brantosim nanji na iga tamo bei aqa ñam Nason aqa talq di uratgeb. Deqa iga Nason ombla aqa talq di soqnem. Nason a nami koba Yesus dauryoqnsiq soqnej. Aqa qure utru Saiprus.

<sup>17</sup> Iga Jerusalem di brantonamqa Yesus aqa tamo ungasari dia soqneb qaji nanqi na iga nugsibqa tulan areboleboleinjrnaqa iga osib geregeregeb.

<sup>18-19</sup> Nebeonaqa iga Pol dauryosim Jems unqajqa gilem. Gilsim Kristen gate kalil nanqi Jems koba na koroesonabqa Pol a nanqi kaiyeinjrej. Osiqu wau kalil Qotei a Pol aqa ban na sawa bei beiq di tamo ungasari nanngo ambleq di yoqnej qaji deqa nanqi sainjrej.

*Kristen gate nanqi na Pol minjeb, “Ni atra tal miligiq gile”*

<sup>20</sup> Onaqa Kristen gate nanqi Pol aqa anjam di qusibqa tulan areboleboleinjrnaqa Qotei aqa ñam soqtoqneb. Osib Pol minjeb, “O gago was Pol, ni qalie, Juda tulan gargekoba nanqi Yesus qa nanngo areqalo singilateqñub. Nanqi Moses aqa dal anjam dauryqajqa dego singilaeqñub. <sup>21</sup> Deqa tamo qudei na Juda nanqi endegsib minjreqñub, ‘Pol na Juda tamo ungasari sawa bei beiq di unub qaji nanqi Moses aqa dal anjam dauryqa saidnjreqñu. Osiqu nanqi endegsi minjreqñu, “Nunngo angoro nanqi mulun breinjraib. Kumbra kalil Moses a nami ningi dauryqa merngej qaji di uratiy.” ’ O Pol, tamo qudei na Juda nanqi degsib minjreqñub. <sup>22</sup> Juda nanqi quqwab, ni Jerusalem bonum. Deqa iga kiyerqom? <sup>23</sup> Od, iga qalieonum. Iga ni endegsi mermim ni degye. Gago ambleq endi Juda tamo qolqe unub. Nanqi nami gago Juda kumbra dauryosib Qotei pailyqa osib nanngo gate banqa ti me junqum ti urateb unub. <sup>24</sup> Deqa ni nanqi joqsim atra tal miligiq gilsim une kobotqajqa kumbra Moses a nami marej qaji di nanqi koba na dauryosib yiy. Osim wagne awaiyetnjrimqa nanqi na Qotei atraiyosib nanngo gate banqa ti me junqum ti joqwab. Ni degyimqa Juda tamo kalil nanqi ino kumbra di unsib endegsib qalieqab, ‘Bole, Pol a dego Moses aqa dal anjam dauryo qaji tamo. Anjam nanqi a qa mareqñub qaji di bole-sai.’ <sup>25</sup> Ariya Pol, ni qalie, iga nami anjam bei nengrenyosim sawa bei bei qaji nanngoq qarinyem. Nanqi di Yesus qa nanngo areqalo singilateb qaji. Iga anjam endegsim qarinyem, ‘Ningi gisanj qotei atrainjro qaji ingi bei uyoqnaib. Wagne lenj ti uyoqnaib. Wagne sil na kakro tontnjrnab moreñeb qaji di uyoqnaib. Sambala kumbra dego yoqnaib.’ Iga nami anjam degsim qosisim nengrenyosim nanngoq qarinyem.” <sup>26</sup> Onaqa Pol na tamo qolqe nanqi di joqsiqa nebeonaqa atra tal miligiq gilsiq une kobotqajqa kumbra Moses a nami marej qaji di nanqi koba na dauryosib yeb. Osiqu atra tamo nanqi minjrej, “Une kobotqajqa bati koboamqa iga gago segi segi wagne osim Qotei atraiyqom.”

*Juda tamo qudei nanqi atra tal miligiq di Pol ojob*

27-28 Une kobotqajqa bati 7 di koboqa laqnaqa Juda tamo qudei Esia sawaq dena beleneb qaji nanği Pol a atra tal miligiq di sonaq unsibqa a ojob. Ojsib lelenoqnsib tamo unğasari kalil nanço areqalo ugetetnrqa marsibqa Pol aqa jejamuq di une qamsib minjreb, “O Israel tamo unğasari, ninği kalil bosib iga aqaryaigiy. Pol a sawa sawa kalilq di iga Juda qa ti Moses aqa dal anjam qa ti atra tal qa ti misilin anjam mareqnaqa tamo unğasari kalil nanği queqnu. Di segi sai. A dego Grik tamo qudei nanği joqoqnsiqa koba na atra tal miligiq gileqnu. Aqa kumbra dena a na Qotei aqa atra tal ugeteqnu.”<sup>29</sup> Nanği degsib mareb. Di kiyayaqa? Nami Efesus tamo bei aqa ñam Trofimus a Pol ombla Jerusalem dia laqnabqa unjrsib are qaleb, “Pol a tamo di osiqa atra tal miligiq gilej.”

<sup>30</sup> Onaqa tamo unğasari kalil Jerusalem di soqneb qaji nanği anjam di qusibqa minjin oqetnrnaqa gurgur ti koroosib Pol ojob. Ojsib girinyosib atra tal oqeq atsib atra tal aqa siranme kalil kabuteleneb.

### *Rom qaja tamo nanği bosib Pol olo eb*

<sup>31</sup> Onaqa nanği Pol moiyoqta marsibqa ban na qaloqneb. Qaleqnaqqa Rom qaja tamo nanço gate koba a anjam endegsi quej, “Jerusalem endia tamo unğasari kalil nanği minjin ani oqetnrqnu.”<sup>32</sup> A degsi qusiqa aqa qaja tamo qudei nanço gate nanği ti joqsiqa gurgurosib tamo unğasari nanço ambleq ainabqa unjrsibqa Pol qalqa urateb.<sup>33</sup> Onaqa qaja tamo nanço gate koba a bosiqqa Pol ojsiqa aqa qaja tamo nanği minjrej, “Sil singila kokba aiyel osi bosib a tontiy.” Onaqa nanği bosib Pol tontonabqa qaja tamo nanço gate koba a na tamo unğasari kalil nanği endegsi nenemnjrej, “Tamo endi yai? A une kiye yqo deqa ninği a qaloqnaq?”<sup>34</sup> A nanği degsi nenemnrnaqa nanği olo lelenkobaoqnsib anjam utru segi segi marelenoqneb. Qudei nanği anjam bei maroqneb. Qudei nanği anjam bei maroqneb. Nanği degsib marelenoqnsib ariya nanği Pol aqa une geregere ubtosib marqa keresai. Deqa qaja tamo nanço gate koba a na aqa qaja tamo nanği minjrnaqa nanği Pol osib nanço ñeio talq osi gileb.<sup>35-36</sup> Osi giloqnsib nanço ñeio tal jomyeqnaqqa tamo unğasari kalil nanği minjin ani oqetnrnaqa nanği daurnjroqnsib murqumyoqnsib maroqneb, “Ninği na Pol qalsib moiyoqtiy.” Nanği degsib maroqneb deqa qaja tamo nanği na Pol soqtosib nanço qawarq di atsib osi giloqneb.

### *Pol a tigelosiqqa Yesus aqa anjam palontej*

<sup>37</sup> Nanği Pol osi giloqnsib nanço ñeio tal gogeq di atqa laqnabqa Pol a Grik anjam na qaja tamo nanço gate koba endegsi nenemyej, “E ni anjam bei mermqa kere e?” Onaqa

minjej, “Ni Grik anjam qalie e? <sup>38</sup> E endegsi are qalonum. Ni Isip tamo bei nami Rom ti qotqa marsiqa tigelosiq qaja tamo 4.000 joqsiqa wadau sawaq di laqnej qaji agi ni edegonum.” <sup>39</sup> Onaqa Pol na minjej, “E tamo di sai. E Juda tamo. Ijo qure utru Tarsus. Tarsus a qure kobaquja. A Silisia sawaq di unu. Deqa ni mare. E na tamo ungasari kalil endi anjam bei minjrqa kere e?” <sup>40</sup> Onaqa qaja tamo nanjo gate koba a na Pol odyonaqa tetaq di tigelosiq aqa ban soqtonaqa tamo ungasari kalil nanji kiri kirionabqa Hibru anjam na endegsi minjrej,

## 22

<sup>1</sup> “O ijo was ti ijo abu ti e kamba anjam bei merngit quiy.” <sup>2</sup> Pol a Hibru anjam na nanji degsi minjrnaqa nanji torei kiri kiriosib sonab olo endegsi minjrej, <sup>3</sup> “E Juda tamo. Ijo qure utru Tarsus. Tarsus a Silisia sawaq di unu. E dia nambabonam ijo ai abu nanji na e Jerusalem osi bonabqa e endia tamo kobaqujaem. Kobaqujaosimqa Gamaliel aqa skul kobaq di soqnem. Sonamqa Gamaliel na gago moma nanjo dal anjam geregere plaltosiq osorboqnej. Deqa e Qotei aqa kumbra dauryqajqa tulan singilaoqnem. Agi bini ningi Qotei aqa kumbra dauryqajqa singilaeqneb dego kere. <sup>4</sup> E na tamo ungasari Yesus aqa gam dauryoqneb qaji nanji moiyojnjrqa maroqnsim nanji tulan ugeugeinjroqnsim tontjnroqnsim tonto talq di breinjroqnem. <sup>5</sup> Ningi na Juda tamo kokba ti atra tamo gate a ti nanji nenemnjribqa ijo kumbra deqa ningi saingwab. Agi e atra tamo gate endegsi minjem, ‘Ni anjam bei nenngrenyosim ebimqa e anjam di osiy gilsiy Damaskus qureq di Juda gate kokba nanji enjrqi. Enjritqa nanji na anjam di sisiosib e odbibqa tamo ungasari Yesus qa nanjo areqalo singilateqneb qaji nanji ojelenosiy joqsiy bosiy Jerusalem endia tonto talq di breinjrqai.’ E degsim atra tamo gate minjem.

### *Pol a kiyersi Kristen tamo brantej deqa saej*

<sup>6-7</sup> “Deqa e walwelosi gilsim Damaskus jojomyeqnamqa qanam jige pulon singila koba minjal ti lan goge na aisiq ijo ulatamuq di tulan rianonaqa e ulonosim mandamq di neiem. Neiesosim kakro bei brantonaq quem. A endegsi merbej, ‘O Sol, ni kiyaga e ugeugeibeqnum?’ <sup>8</sup> Onaqa e na kamba minjem, ‘O Tamo Koba, ni yai?’ Onaqa merbej, ‘E Yesus Nasaret qaji agi ni na ugeugeibeqnum.’ <sup>9</sup> Tamo e ombla soqneb qaji nanji dego pulon di uneb. Ariya anjam Yesus na merbej qaji di nanji poinjrosai.

<sup>10</sup> “Onaqa e na olo Yesus minjem, ‘O Tamo Koba, e wau kiye yqai?’ Onaqa Tamo Koba a na merbej, ‘Ni tigelosim Damaskus gilsim dia tamo bei itqam. Wau e ni emqai qaji di a

na ubtosim mermqas.’ <sup>11</sup> Puloŋ di tulaŋ rianjosiq ŋam qamot-bonaqa e ŋam ambruibonaqa ŋam atqa keresai. Deqa tamo naŋgi e ombla soqneb qaji naŋgi ijo baŋ ojsib e babanbosib Damaskus osi gileb.

<sup>12</sup> “Damaskus dia tamo bei soqnej aqa ñam Ananaias. A Qotei aqa dal anjam dauryoqnej qaji. Juda tamo ungasari kalil Damaskus di soqneb qaji naŋgi a qa maroqneb, ‘A tamo bolequja.’ <sup>13</sup> E Damaskus gilsim di sonamqa Ananaias na e itbosiqa ijo areq di tigelosiq merbej, ‘O ijo was Sol, ino ŋamdamu olo poimeme.’ Degsi merbonaqa bati qujai deqa ijo ŋamdamu poibonaqa e olo ŋam atsim Ananaias aqa ulatamu unem. <sup>14</sup> Onaqa Ananaias na olo merbej, ‘Gago moma naŋgo Qotei a ni gilmqo. Ni aqa areqalo qalieosim Yesus unsim aqa medabuq na anjam bei quqwajqa deqa ni gilmqo. Yesus a kumbra bole tintiŋ yeqnu qaji tamo. <sup>15</sup> Deqa ni aqa anjam mare mare laqnsimqa kumbra ni unem qaji ti anjam ni quem qaji deqa ti tamo ungasari kalil naŋgi sainjroqne. <sup>16</sup> Deqa ni tariŋaim. Ni urur tigelosim yanso ame. Osim Yesus aqa ñam metosim pailye. Yimqa Qotei na ino une kalil kobotetmqas.’ Ananaias na e degsi merbej.

*Pol a nami sawa bei bei qaji naŋgoq gilej deqa saej*

<sup>17-18</sup> “Bati bei e olo Jerusalem bosimqa atra tal miligiq di Qotei pailyoqnsimqa e ŋeio bulosim Yesus unem. Yesus unnamqa merbej, ‘Ni Jerusalem endia ijo anjam maroqnqam di Juda naŋgi ni quetmoqnqasai. Deqa ni Jerusalem endi saim. Ni urur tigelosim Jerusalem uratosim gile.’ <sup>19-20</sup> Onaqa e na Yesus minjem, ‘O Tamo Koba, Juda naŋgi qalie, nami e naŋgo Qotei tal miligiq giloqnsimqa tamo ungasari ni qa naŋgo areqalo singilatoqneb qaji naŋgi ojelenoqnsim toqoŋ na ñumoqnsim tonto talq di breinjroqnem. Naŋgi ino wau tamo Stiven meniŋ na qaleqnabqa e jojom di tigelosim tamo naŋgi a qaloqneb qaji naŋgo gara jugo taqatesosim endegsi minjroqnem, “Niŋgi keretosib Stiven qalonub moiqo.” Ijo kumbra di Juda naŋgi qalie.’ <sup>21</sup> Onaqa Yesus na e olo merbej, ‘Ni gile. E ni qariŋmitqa ni sawa isaq gilsim dia sawa bei bei qaji naŋgi ijo anjam minjroqnqam.’ ”

*Pol a na qaja tamo naŋgi minjrej, “E Rom tamo”*

<sup>22</sup> Pol a tamo ungasari naŋgi anjam degsi minjroqnsiq a sawa bei bei qaji naŋgoq gilqa marnaqa anjam qujai di naŋgi qusib minjin ani oqetnjrnaqa tulaŋ lelenoqnsib maroqneb, “Pol a qalib moiym. Tamo deqaji mandamq endi olo saiŋ.” <sup>23</sup> Naŋgi degsib maroqnsib murqumyoqnsib naŋgo gara jugo piqtelenosib naŋgo baŋ na wi ramboiyoqnsib breiyeq nab goge oqoqnej. <sup>24</sup> Onaqa qaja tamo naŋgo gate koba a na aqa



qaja tamo nanği minjrej, “Niği Pol osib nunğo ñeio tal miligiğ di bu toqon na kumbainiyi. Kumbainyosib nenemyibqa aqa une kiye qa tamo unğasari nanği murqumyoqnsib a qalib moiğajqa mareqñub di a na geregere merbimqa e quqwai.”  
 25 Onaqa qaja tamo nanği Pol sil na tontosib kumbainyqa laqñabqa a na qaja tamo gate bei jojom di tigelesoqnej qaji di minjej, “E Rom tamo. Deqa niği ijo une mati qalieosaiosib e laña kumbainbqab di kumbra bole kiyo?”

26 Onaqa qaja tamo gate dena Pol aqa anjam di qusiqa a qaja tamo nanğo gate koba aqa areq gilsiq a nenemyej, “Pol a Rom tamo. Deqa ni a kiyeryqam?” 27 Degsi nenemyonaq qusiqa Pol aqa areq gilsiq minjej, “Ni merbe, ni bole Rom tamo e?” Onaqa Pol na minjej, “Od. E Rom tamo.” 28 Degsi minjnaqa qaja tamo nanğo gate koba dena olo Pol minjej, “E silali kobaquja waiyonamqa deqa nanği na e Rom tamo ateb.” Onaqa Pol na kamba minjej, “E silali waiyosai. Ijo ai abu nanği Rom qaji deqa e Rom tamo tinğin.” 29 Onaqa qaja tamo nanği Pol aqa anjam di qusib a kumbainyqa urateb. Qaja tamo nanğo gate koba a dego Pol aqa anjam di qusiğ a ulaej. Di kiyaqa? A na aqa qaja tamo nanği minjrnaqa Pol sil na tonteb deqa.

### *Pol a Juda tamo kokba nanği anjam minjrej*

30 Onaqa nebeonaqa Juda nanği na une kiye Pol aqa jejamuğ di qametoqñeb di qaja tamo nanğo gate koba a qalieqa marsiqa Pol osiq sil palontetosiq atra tamo kokba ti Juda tamo kokba ti nanği metjrnaq bosib koroonaqqa Pol osiqa nanğo ulatamuğ di tigeltej.

## 23

1 Onaqa Pol a Juda tamo kokba nanği koqnjrnsiqa endegsi minjrej, “O ijo was niği quiy. E nami Qotei aqa ñamgalaq di kumbra bole bole yoqñem ağı bini yoqñsim unum. Deqa e are gulbe saiğoji.” 2 Onaqa atra tamo gate aqa ñam Ananias a Pol aqa anjam di qusiqa tamo nanği Pol aqa areq di tigelesoqñeb qaji nanği minjrej, “Niği Pol aqa medabuğ di qaliy.” 3 Onaqa Pol na Ananias minjej, “Qotei na ni dego lumğas. Ni ñamtañ babanğ di ñam qaq na limo bul. Deqa ino uno boledamu ariya ino are miligi jıgat. Ağı ni Moses aqa dal anjam dauryosim ijo une qalieğajqa tigeltbonum. Osim ni olo Moses aqa dal anjam gotranjosim nanği ijo medabuğ di lubqajqa minjrnum. Di kumbra uge.”

4 Onaqa tamo nanği Pol aqa areq di tigelesoqñeb qaji nanği aqa anjam di qusibqa minjeb, “Ni kiyaqa Qotei aqa atra tamo gate degsi misilinyonum?” 5 Degsib minjnabqa Pol na minjrej, “O ijo was, tamo endi a atra tamo gate di e qaliesai.

Deqa e anjam grotonum. Agi Qotei aqa anjam bei nami endegsib nenjrenyeb unu, ‘Ningi nunjo gate koba a anjam uge minjaib.’ ”

<sup>6</sup> Juda tamo kokba awesoqneq qaji nanjo ambleq di Sadyusi tamo ti Farisi tamo ti soqneq. Pol a di qalieosiq deqa lelenosiq minjrej, “O ijo was ningi quiy. E Farisi tamo. Ijo abu a dego Farisi tamo. Deqa e endegsi are qalonum, tamo kalil moreno qaji nanji mondon olo subq na tigelqab. E anjam deqa ijo areqalo tulan singilateqnum. Anjam deqa qujai nanji na e ojsib nunjo namdamuq di tigeltonub.”

<sup>7</sup> Pol na nanji degsi minjrnaqa Farisi ti Sadyusi ti nanji poelenosib njirinkobaeb. <sup>8</sup> Di kiyaaqa? Sadyusi nanji mareqnum, “Tamo moreno qaji nanji olo subq na tigelqasai. Lan angro saiqoji. Mondor dego saiqoji.” Ariya Farisi nanji mareqnum, “Tamo moreno qaji nanji subq na tigelqab. Lan angro unub. Mondor nanji dego unub.” <sup>9</sup> Deqa nanji kalil poelenosib njirinkobaosib murqumyoqneq. Onaqa Farisi nanjo dal anjam qalie tamo qudei nanji tigelosib singila na mareb, “Iga Pol aqa anjam quonum di a une saiqoji. Mondor bei na kiyo lan angro bei na kiyo anjam minjqoqa a degsi marqo.” <sup>10</sup> Nanji degsib marnabqa qoto anjam tulan kobaej. Onaqa qaja tamo nanjo gate koba a di unsiqa are qalej, “Nanji Pol aqa jejamu tulan ugeugeiyqab.” A degsi are qalsiqa ulaosiq aqa qaja tamo nanji metnjrnaqa bosib Juda nanjo banq dena Pol yainjrsib nanjo neio talq olo osi gileb.

<sup>11</sup> Gilsib di sonab nebeosiq olo qoloonaaqa Tamo Koba a bosiq Pol aqa areq di tigelosiq minjej, “Ni are singilatime. Ulaaim. Ni Jerusalem endia ijo anjam singila na mareqnum dego kere ni Rom gilsim dia ijo anjam minjroqnaqam.”

*Juda tamo qudei nanji Pol qalsib moiyoqajqa anjam qoseb*

<sup>12</sup> Onaqa olo nebeonaqa Juda tamo qudei nanji koroosibqa are qujaitosib anjam endegsib qoseb, “Iga Pol qalsim moiyoqom. Gago anjam di iga bole dauryqom. Iga uratqasai bole sai. Deqa iga Pol moiotosaisosimqa iga ingi ti ya ti mati uyqasai. Iga Pol qalsim moiotosimqa bati deqa iga olo ingi ti ya ti uyqom.” <sup>13</sup> Juda tamo 40 nanji anjam degsib qoseb. <sup>14</sup> Osib Juda gate nanji ti atra tamo kokba ti nanjoq gilsib minjreb, “Iga anjam endegsi qosonum. Iga Pol qalsim moiyoqom. Gago anjam di iga bole dauryqom. Iga uratqasai bole sai. Deqa iga Pol moiotosaisosimqa iga ingi ti ya ti mati uyqasai. Iga Pol qalsim moiotosimqa bati deqa iga olo ingi ti ya ti uyqom. Iga anjam degsi qosonum. <sup>15</sup> Deqa ningi ti Juda tamo kokba kalil nanji ti endegyiy. Ningi na qaja tamo nanjo gate koba a minjiy, ‘Ni Pol osau. Osbamqa iga olo koroosimqa aqa anjam geregere qusim aqa une qalieqom.’ ”

Niŋgi na qaja tamo nanŋo gate koba a degsib minjibqa a Pol osi bosim nunŋoq di brantosaisoqnimqa gamq di iga Pol qalsim moiyoŋqom.”

<sup>16</sup> Onaqa Pol aqa jaja aqa ŋiri a nanŋo anjam di qusiqa tigeloqujatosiq qaja tamo nanŋo ŋeio talq gilsiq anjam di Pol minjej. <sup>17</sup> Minjnaq qusiqa qaja tamo gate bei metonaq aqa areq bonaq minjej, “Ni anŋro wala endi osim nunŋo gate koba aqa areq osi aiyimqa a na anjam bei minjqas.” <sup>18</sup> Onaqa qaja tamo gate dena anŋro wala di osiqa aqa gate koba aqa areq osi aisiqa minjej, “Tonto tamo Pol a na e merbqo, ‘Ni anŋro wala endi osi aiye.’ Degbqo deqa agi ino areq osi bonum. A ni anjam bei mermqas.”

<sup>19</sup> Onaqa qaja tamo nanŋo gate koba a na anŋro wala di baŋ titosiqa kiŋala sasalosiq nenemyej, “Ni anjam kiye merbqam?” <sup>20</sup> Onaqa minjej, “Juda tamo kokba nanŋi anjam bei kereteb. Nanŋi na ni endegsib mermqab, ‘Nebe ni Pol gagoq osau. Osbamqa iga koroosim aqa anjam geregere qusim aqa une qalieqom.’ Nanŋi ni degsib mermqab. <sup>21</sup> Deqa ni nanŋo anjam di quetnraim. Tamo 40 nanŋi anjam endegsib qosisib maronub, ‘Iga Pol qalsim moiyoŋqom. Gago anjam di iga bole dauryqom. Iga uratqasai bole sai. Deqa iga Pol moiyoŋqosaisimqa iga iŋgi ti ya ti mati uyqasai. Iga Pol qalsim moiyoŋqosimqa bati deqa iga olo iŋgi ti ya ti uyqom.’ Nanŋi anjam degsib qosonub. Deqa bini nanŋi gamq di tariŋeqnub. Ni na Pol osi aiyoqnimqa gamq di nanŋi Pol qalsib moiyoŋqab.” <sup>22</sup> Onaqa qaja tamo nanŋo gate koba a anŋro wala aqa anjam di qusiqa minjej, “Ni gile. Ni anjam degsi merbonum di tamo qudei minjraim. Torei tent.”

*Nanŋi na Pol qarinyonabqa Rom nanŋo gate Feliks aqaq gilej*

<sup>23</sup> Osiqa a na aqa qaja tamo gate aiyel nanŋi metnjrnaqa aqa areq bonab minjrej, “Niŋgi na qaja tamo 200 siŋga na walwelo qaji nanŋi ti qaja tamo 200 aŋ osi laqnub qaji nanŋi ti qaja tamo 70 hos na walwelo qaji nanŋi ti minjribqa nanŋi bini qolo seŋ bati 9 Pol osib Sisaria qureq gilqab. Niŋgi na endegsib minjriy, ‘Nunŋo walwelqajqa iŋgi iŋgi gereiyosib soqniy.’ ” <sup>24</sup> Osiqa olo nanŋi aiyel minjrej, “Niŋgi Pol aqa hos qudei dego gereiyib soqnem. Pol a hos goge di awoamqa niŋgi na geregere taqatosib osi gilsib Rom nanŋo gate Feliks aqa talq di brantiy.” Qaja tamo nanŋo gate koba a na nanŋi aiyel degsi minjrej. <sup>25</sup> Osiqa anjam bei endegsi nenŋrenyej,

<sup>26</sup> “O Gate Koba Feliks, ijo ñam Klodius Lisias. E qaja tamo nanŋo gate koba. Ijo anjam endi ni sisiyqajqa deqa e nenŋrenyosim inoq qarinyonum. O kaiye. <sup>27</sup> Tamo agi inoq osi bonub qaji aqa ñam Pol. Juda nanŋi na a ojsib moiyoŋqqa laqnabqa e ijo qaja tamo nanŋi ti aisim Juda nanŋo baŋq

dena yainjrem. E qalieem, Pol a Rom tamo. Deqa e na a aqaryaiyosim nanjo banq dena yainjrem. <sup>28</sup> Nanji Pol aqa jejamuq di une kiye qametoqneb di e qalieqa osimqa Pol osi aisim Juda tamo kokba nanjo ulatamuq di tigelttem. <sup>29</sup> Tigeltonamqa nanji anjam gargekoba marelenjeq nabqa e qusimqa endegsi poibej, Juda tamo kokba nanji nanjo segi dal anjam qa maroqnsib deqa Pol aqa jejamuq di une qametoqneb. Nanji Pol aqa une kobaquja bei babtosai. Deqa e na a laja moyotqa keresai. Tonto talq di laja waiyqa keresai dego. E degsi poibej. <sup>30</sup> Ariya bini e quonum, nanji Pol qalsib moyotqajqa anjam qosonub. E di qusim deqa agi Pol inoq qarinyonum. E na tamo nanji Pol aqa jejamuq di une qameteq nub qaji nanji endegsi minjr qai, 'Ningi Sisaria qureq gilsib Feliks aqa ulatamuq di tigelosib Pol aqa une geregere minjib a quqwas.' "

<sup>31</sup> Qaja tamo nanjo gate koba a anjam degsi nengrenyej. Onaqa aqa qaja tamo nanji aqa medabu dauryosib qolo Pol osib Antipatris qureq osi gilsib dia nereneb. <sup>32</sup> Nebeonaqa qaja tamo sinqa na walwelo qaji nanji ti qaja tamo an osi laqneb qaji nanji ti Antipatris qureq dena olo puluosib Jerusalem aisib nanjo neio talq di soqneb. Onaqa qaja tamo hos na walwelo qaji nanji segi Pol suweiyosib torei Sisaria qureq osi gileb. <sup>33</sup> Osi gilsibqa nanjo gate koba aqa anjam nengrenyej qaji di Feliks yosib Pol osib aqa ulatamuq di tigeltteb. <sup>34</sup> Onaqa Feliks a anjam di sisiyosiqqa Pol nenemyej, "Ni sawa qabe qaji?" Onaqa Pol na minjej, "E Silisia sawa qaji." <sup>35</sup> Degsi minjnaqa Feliks na olo minjej, "Tamo nanji ino jejamuq di une qameq nub qaji nanji babqa e ino anjam geregere quqwai." Osiqa qaja tamo nanji minjr naqa nanji na Pol osib tamo koba Herot aqa talq di waiyosib taqatoqneb.

## 24

### *Juda nanji Pol aqa jejamuq di une qametoqneb*

<sup>1</sup> Bati 5 koboonaqa atra tamo gate Ananias a ti Juda gate qudei ti nanjo anjam taqyo tamo bei aqa ñam Tertulus a ti Sisaria qureq gileb. Gilsib Feliks aqa ulatamuq di tigelosibqa Pol aqa jejamuq di une qametoqneb. <sup>2</sup> Onaqa Feliks na Pol metonaq warum miligiq bosiqqa aqa ulatamuq di tigelesonaqa Tertulus a Pol aqa jejamuq di une qametqa osiqa Feliks minjej, "O Gate Koba Feliks, ni gago sawa endi geregere taqateqnum deqa bini iga bole unum. Iga qoto saiqoji. Ni iga geregere aqaryaigoqnsimqa gago gulbe kalil kobotetgeqnum. <sup>3</sup> Deqa iga ni qa tulan areboleboleigeqnaqa ino ñam soqteqnum.

4 “E anjam olekoba ni mermqasai. Ni asgimo uge. Deqa ni gago anjam truquyala endi que. 5 Iga tamo endi uneqnum, a tamo uge. A kumbra uge uge yoqnsiqa Juda tamo ungasari sawa sawa kalilq di unub qaji nanjo ambleq di qoto tigelteqnu. Osiqa nanji pupoinjroqnsiqa minjreqnu, ‘Ninji gago Juda kumbra uratosib olo Nasaret tamo a dauryiy.’ 6-7 A na gago atra tal dego ugeteqnu. Deqa iga a ojsim gago segi dal anjam na aqa une qa pegiyqa laqnamqa qaja tamo nanjo gate koba Lisias a bosiqqa gago anjam gentosiqa gago banq dena Pol singila na yaigej. 8 Yaigosiqqa mergej, ‘Ninji Pol qa anjam bei soqnimqa gilsib Rom nanjo gate Feliks aqa ulatamuq di mariy.’ Deqa iga bosim ino ulatamuq endi Pol aqa une agi mermonum. Deqa Gate Koba Feliks, ni segi na Pol nenemyimqa une kalil iga aqa jejamuq di qameqnum qaji di bole kiyo sai kiyo di a segi na mermimqa ni quqwm.” Tertulus a anjam degsiqa Feliks minjej.

9 Onaqa Juda tamo kalil nanji tigelosib Tertulus aqa anjam di singilatosib mareb, “Aqa anjam di bole.”

*Pol a kamba Feliks aqa ulatamuq di tigelosiq anjam marej*

10 Onaqa Feliks a Pol aqa anjam quqwajqa osiq aqa ban soqtosiq Pol metonaqa a kamba tigelosiqqa Feliks minjej, “E qalieonum, ni wausau gargekoba sawa endi taqatesoqnem agi bini taqatejunum. Deqa e kamba ijo anjam mermqai. 11 Ya ya endi e Qotei louqajqa Jerusalem aiyem. E aiyem bati 12 gilqo. Ni segi na Juda nanji nenemnrimqa degsib mermqab. 12 E Jerusalem aisim di sosimqa e anjam na qotosaiioqnem. Qoto tigeltosaiioqnem dego. E qoto bei tigelteqnam Juda nanji e nubosai. E atra talq di, Juda nanjo Qotei talq di, qure ambleq di dego lawo na soqnem. E kumbra uge bei yosaiioqnem. 13 Deqa une kalil Juda nanji ijo jejamuq di qameqnum qaji di bolesai. Nanji ijo une bei ubtosib marqa keresai.

14 “Ijo une qujai agiende. E Yesus aqa gam dauryeqnum. Juda nanji endegsib mareqnum, ‘Yesus aqa gam bunuj dena tamo ungasari nanji poeleneqnum.’ O Gate Feliks, gam di qujai e dauryoqnsimqa gago moma nanjo Qotei qa loueqnum. Osim Moses aqa dal anjam kalil qa ti Qotei aqa medabu o tamo nanjo anjam kalil nami nengrenyoqneb qaji deqa ti ijo areqalo singilateqnum. 15 Mondonj Qotei na tamo bole ti tamo uge ti nanji olo subq na tigeltinjqas. Qotei qujai deqa e ijo areqalo singilatoqnsim subq na tigelo bati qa tariñoqnsim unum. Juda nanji dego degyeqnum. 16 E subq na tigelo bati qa tariñeqnum deqa e bati gaigai Qotei aqa namgalaq di, tamo ungasari kalil nanjo namgalaq di kumbra bole bole yoqnsim laqnum. Deqa e are gulbe saiqoji unum.

17 “E sawa bei beiq di Qotei aqa wau yoqnsim wausau qudei koboonaqa agi ya ya endi e Jerusalem aiyem. E silali qudei osi aisim Juda Kristen nanqi mam soqneb deqa enjrem. Silali qudei dego osim Qotei atraiyem. 18 Bati deqa e atra tal miligiq gilsim dia une kobotqajqa kumbra Moses a nami marej qaji di dauryosim yeqnamqa Juda nanqi na e nubeb. E tamo ungasari gargekoba joqsim atra tal miligiq gilosai. Osim qoto bei tigeltosai dego. 19 Ariya Juda tamo qudei Esia sawaq dena Jerusalem aiyeb qaji nanqi na e ojob. Deqa tamo nanqi di e qa anjam bei soqnimqa bosib ino ulatamuq endi tigelosib ijo une marqab. 20 Nanqi bqasai di ni na Juda tamo agi endia tigelejunub qaji nanqi nenemnjre. Nenemnjrimqa e Jerusalem dia Juda tamo kokba nanqo ulatamuq di tigelesonam une kiye ijo jejamuq di iteb di ni mermqab. 21 Bole, ijo anjam qujai endeqa nanqi na ijo jejamuq di une qametbeb. E nanqo ulatamuq di tigelosim lelenosim endegsi minjrem, “Tamo kalil moreno qaji nanqi mondon olo subq na tigelqab. Anjam deqa qujai ninqi na e tigeltbonub.” Pol a Feliks degsi minjej.

22 Feliks a nami tamo ungasari Yesus aqa gam dauryoqneb qaji nanqo kumbra qalieej. Deqa a na Juda nanqi endegsi minjrej, “Nunqo anjam di mati soqnem. Qaja tamo nanqo gate koba Lisias a bamqa ninqi olo anjam di maribqa e qusiy gereiyqai.” 23 Osiqa qaja tamo gate bei minjej, “Ni na Pol osim tonto talq di waiyosim taqatesoqne. A gulbe bei yaim. Aqa was nanqi a unqa bosib ingi ingi qa aqaryaiyqa maroqribqa ni na saidnjraim.”

### *Pol a tonto talq di sonaqa wausau aiyel koboej*

24 Bati qudei koboonaqa Feliks aqa naun Drusila wo tonto talq di brantosibqa Feliks na Pol metonaq aqa areq bej. Drusila a Juda unqa. Pol a bosiqqa tamo nanqi Kristus Yesus qa nanqo areqalo singilatqajqa kumbra qa Feliks minjnaq quej. 25 Kumbra bole tintin dauryqajqa ti tamo nanqo segi segi so geregere taqatqajqa ti Qotei na mondon tamo nanqo une qa peginjrqajqa ti Pol na Feliks minjnaq quej. Qusiqqa ulaosiq Pol minjej, “Ni mati aisim ino warumq di soqne. Bunuqna e bati atsiy ni metmit bosim anjam di olo plaltim e quqwai.” 26 Feliks a bati gargekoba Pol aqa anjam quqwajqa metoqnej. Aqa anjam quqwajqa deqa segi metosaiqnej. A endegsi are qaloqnej, “E Pol metit a bosim silali ebimqa e tonto talq dena a uratqajqa deqa kiyo merbqas?” Osiq deqa metoqnej.

27 Wausau aiyel koboonaqa Feliks a Judia sawa taqato wau di uratonaga tamo bei aqa nam Porsius Festus a kamba Feliks aqa wau osiqqa Judia sawa taqatesoqnej. Feliks na Juda nanqo are boletetnjrqajqa deqa a Pol tonto talq di uratonag soqnej.

## 25

*Pol a marej, "E Sisar aqa ulatamuq di tigelqai"*

<sup>1</sup> Festus a Judia sawaq aisiq Sisaria qureq di soqnej. Bati galub koboonaqa a dena tigelosiqa Jerusalem aiyej. <sup>2-3</sup> Aisiq di sonaqa atra tamo kokba ti Juda tamo kokba ti nanği bosib Festus aqa ulatamuq di tigelosib Pol aqa jejamuq di olo une qamoqneb. Osib Festus minjeb, "Ni anjam qarinyim qaja tamo nanği Sisaria qureq dena Pol osib Jerusalem osi beb. Osbab gago are boleqas." Nanği degsib Festus minjeb. Di kiyaaqa? Nanği nami anjam endegsib qoseb, "Qaja tamo nanği Pol osi boqniqqa gamq di iga Pol qalsim moiyoqom." <sup>4</sup> Onaqa Festus na kamba minjrej, "Pol a Sisaria dia tonto talq di unu. Bati qudei koboamqa e segi olo Sisaria gilqai. <sup>5</sup> Deqa ningi Pol qa anjam bei soqnimqa ningi na tamo ñam ti qudei giltjrib nanği e daurbosib koba na Sisaria gilqom. Gilsim dia nanği ijo ulatamuq di tigelosib Pol aqa une bei ubtosib merbib e quqwai."

<sup>6</sup> Festus a bati 8 o 10 Jerusalem di sosisqa olo puluosiq Sisaria gilej. Juda tamo qudei nanği a dauryosib gileb. Nebeonaqa Festus a aqa awo jaram kobaq di awoosiqa aqa qaja tamo nanği minjrej, "Ningi Pol osi boiy." Minjrnaqa nanği na Pol osi bosib Festus aqa ulatamuq di tigelteb. <sup>7</sup> Onaqa Juda tamo Festus dauryosib Jerusalem dena beb qaji nanği Pol kalilyosib Festus aqa ulatamuq di tigelosib une gargekoba Pol aqa jejamuq di qamelenoqneb. Nanço anjam di utru saiqoji. <sup>8</sup> Onaqa Pol a kamba marej, "E Juda gago dal anjam bei gotranjyosaiqnem. E gago atra tal qa anjam uge bei marosaioqnem. E Rom nanço mandor koba Sisar a dego kumbra uge bei yosaiqnem. Deqa e une saiqoji."

<sup>9</sup> Pol a degsi marnaqa Festus a Juda nanço are boletet-njrqaqqa deqa Pol endegsi nenemyej, "Ni Jerusalem aisim dia ijo ulatamuq di tigelosim ino anjam olo marqa kere e?" <sup>10</sup> Onaqa Pol na minjej, "E bini Sisar aqa awo jaram namoq endi tigelejunum. Endia ijo anjam marqai. Ni qalie, e Juda nanği qa une bei yosai. <sup>11</sup> Une kobaquja bei ijo jejamuq di soqnimqa unğum e moiqai. Ariya une kalil Juda nanği ijo jejamuq di qameqnub qaji di bolesaiamqa tamo bei na e laña osim nanço banq di atqa keresai. Deqa e Sisar aqa ulatamuq di tigelitqa a ijo anjam qusim gereiyetbqas." <sup>12</sup> Pol na Festus degsi minjnaqa a warumq dena oqedosiqa Rom tamo kokba qudei nanği koba na anjam qairosib olo warum miligiq gilsiqqa Pol minjej, "Ni Sisar aqa ulatamuq di tigelqa maronum deqa e ni qarijnmitqa Sisar aqaq gilqam."

*Festus na Agripa nenemyej, "Ni Pol kiyeryqam?"*

<sup>13</sup> Onaqa bati qudei koboonaqa Rom nanjo mandor bei aqa ñam Agripa aqa jaja Bernaisi wo Festus unqajqa marsib Sisaria aiyeb. <sup>14</sup> Aisib bati gargekoba yala Sisaria di sonabqa Festus na Agripa minjej, “Tamo bei aqa ñam Pol a nami Feliks na tonto talq di waiyej unu. <sup>15</sup> Deqa e Jerusalem di sonamqa Juda gate nanji ti atra tamo kokba ti nanji na Pol aqa jejamuq di une qamsib endegsib merbeb, ‘Ni Pol aqa une qa marsim ojsim ino qaja tamo nanjo banq di atimqa nanji na qalib moyiem.’ <sup>16</sup> Onaqa e na kamba endegsi minjrem, ‘Iga tamo bei laña ojsim qaja tamo nanjo banq di atqa keresai. Rom gago kumbra degsi sosai. Tamo qudei nanji tamo bei qa anjam soqnimqa nanji mati aqa une ubtib qusimqa a kamba aqa anjam marqas di kere.’

<sup>17</sup> “E na Juda nanji degsi minjrnámqa nanji e daurbosib Sisaria beb. E tariñosai. Nebeonaqa nanji koroesonabqa e ijo awo jaramq di awoosim ijo qaja tamo nanji minjrnámqa nanji Pol osi bosib ijo ulatamuq di tigeltib. <sup>18</sup> Onaqa Juda nanji tigelosib Pol aqa jejamuq di une gargekoba qameleñoqneb. E nami are qalem, nanji une kokba Pol aqa jejamuq di qamqab. Nanji degyosai. <sup>19</sup> Nanji nanjo segi louqa kumbra qa njiriñoqnsib Pol ombla anjam titoqneb. Osib tamo bei qa dego anjam titoqneb. Pol a maroqnej, ‘Tamo di a moyiej olo ñambile unu. Aqa ñam Yesus.’ <sup>20</sup> Onaqa e nanjo anjam deqa utru itqa yonam keresaiibonaqa Pol nenemyem, ‘Ni Jerusalem aisim dia ijo ulatamuq di tigelosim ino anjam olo marqa kere e?’ <sup>21</sup> E degsi Pol nenemyonamqa a saidosiq merbej, ‘E mati tonto talq endi sqai. Sosiy bunuqna e Mandor Koba Sisar aqa ulatamuq di tigelitqa a ijo anjam qusim gereiyetbqas.’ Pol na e degsi merbonaqa e ijo qaja tamo nanji minjrem, ‘Ninji Pol osib tonto talq di waiyosib taqatesoqniy. Bunuqna e Pol qarinyitqa Sisar aqaq gilqas.’” <sup>22</sup> Festus a Agripa degsi minjnaqa Agripa na minjej, “E dego Pol aqa anjam quqwai.” Onaqa Festus na minjej, “Nebe ni aqa anjam quqwam.”

<sup>23</sup> Nebeonaqa Agripa Bernaisi wo gara wala boledamu jigsib koro sawaq beb. Qaja tamo nanjo gate kokba ti tamo ñam ti kalil nanji dego bosib koro sawaq di koroeb. Onaqa Festus na aqa qaja tamo nanji minjrnámqa nanji Pol osi bosib Agripa aqa ulatamuq di tigeltib. <sup>24</sup> Tigeltonab Festus na Agripa minjej, “O Mandor Agripa, Pol agi osi bonub. Ni unime. Ninji koroonub qaji dego Pol uniy. E Jerusalem di sonamqa Juda kalil nanji murqumyoqnsib endegsib merboqneb, ‘Pol a moyiem. A olo mandamq endi saiq.’ Nanji bosib Sisaria endia dego anjam degsib merboqneb. <sup>25</sup> E Pol aqa jejamuq di une kobaquja bei unosai deqa e a laña moyiotqa



keresai. Ariya Pol na merbej, ‘E Mandor Koba Sisar aqa ulatamuq di tigelitqa a ijo anjam qusim gereiyetbqas.’ Onaqa e na Pol minjem, ‘Di kere. E ni qarinqmitqa Rom gilqam.’ <sup>26</sup> O Mandor Agripa, e Pol aqa jejamuq di une bei unosai. Deqa e a qa anjam kiye nenngrenyit gago Tamo Koba Sisar aqaq gilqas? Lana qarinyqai di Sisar a nirinqas. Deqa e Pol osi bosim ino ulatamuq endi tigeltonum. Ni segi na Pol nenemyimqa aqa une bei babtım ningi kalil qusib merbibqa une deqa nenngrenyit Sisar aqaq gilqas. <sup>27</sup> E are qalonum, tamo a une saiqoji soqnimqa e lana qarinyit Sisar aqaq gilqas di kumbra bolesai.”

## 26

### *Pol a Agripa aqa ulatamuq di tigelosiq anjam marej*

<sup>1</sup> Onaqa Agripa na Pol minjej, “Ni kamba ino anjam marimqa e quqwai.” Degsi minjnaqa Pol na aqa ban soq-tosiqa endegsi marej, <sup>2</sup> “O Mandor Agripa, bini e ino ulatamuq endi tigelejunum. Une kalil Juda nanği ijo jejamuq di gameqñub qaji di bolesai. Deqa e na kamba ijo anjam marit ni que. Yim e areboleboleibqas. <sup>3</sup> Gago Juda kumbra kalil di ni qalie. Iga gaigai anjam titeqñum qaji di ni dego qalie. Deqa ni ijo anjam endi quime. Ni asgimaiq.

<sup>4</sup> “Juda kalil nanği e qa qalie unub. E anğro wala qa Judia sawa ti Jerusalem qure ti dia soqñem. <sup>5</sup> Nanği nami koba ijo kumbra qaliesoqñeb. Nanği ni degsi mermqa are soqñimqa mermqab. Nanği qalie, e anğro wala qa Farisi nanğo ambleq di sosimqa nanğo kumbra dauryoqñem. Farisi nanğo kumbra di siñgila koba. Kumbra dena gago Juda kumbra kalil tulan bunyejunu. <sup>6</sup> Bini e inği bole bole Qotei a nami gago moma nanği enjrqa marej qaji di oqajqa tariñoqñsim unum. Utru deqa e ino ulatamuq endi tigelejunum. <sup>7</sup> Gago moma nanği di agi Jekop aqa anğro 12 nanğo moma. Nanği e ti koba na inği bole bole di oqajqa tariñoqñsim qolo ti qanam Qotei qa loueqñum. O Mandor Agripa, utru deqa Juda nanği ijo jejamuq di une qametbeqñub. <sup>8</sup> Kiyaga ningi qudei endegsib are qaleqñub, ‘Qotei na tamo moreño qaji nanği olo subq na tigeltñjrqsai?’

<sup>9</sup> “Bole, e segi nami Yesus Nasaret qaji aqa ñam ugeugeiy-oqñsim jeutosim laqñem. <sup>10</sup> E Jerusalem dia kumbra uge di yoqñem. Atra tamo kokba nanği na e odbeqñabqa e Qotei aqa tamo unğasari nanği ojelenoqñsim tonto talq di breinjroqñem. Osim Juda gate nanği koba na areqalo qujaitosim maroqñem, ‘Nanği ñumsib moiyoñjriy.’ <sup>11</sup> E bati gargekoba Juda nanğo Qotei tal kalil miligiq giloqñsimqa dia Yesus aqa tamo unğasari nanği ojelenoqñsim ugeugeinjroqñem. E

endegsi are qaloqnem, ‘E nanġi jaqatin koba enjritqa nanġi ulaosib Yesus qoreiyosib aqa ñam misilinyqab.’ Degsi are qaloqnsim nanġi ugeugeinjroqnem. E nanġi qa minjin ani oqetbeqnaqa nanġi daurnjroqnsimqa qure isa isaq giloqnsim dia nanġi itnjroqnsim ugeugeinjroqnem.

*Pol a kiyersi Kristen tamo brantej deqa saej*

12-13 “O Mandor Agripa, e degyeqnamqa bati bei atra tamo kokba nanġi na e qarinjbonabqa Damaskus qureq gilem. E gileqnamqa qanam jige pulonj singila koba minjal ti lanj goge na ijoq ainaq unem. A tulanj rianjosiqa tamo e koba na walweloqnem qaji nanġi ti iga suwantgej. Aqa rianj di sej ti keresai. Rianj dena sej aqa rianj tulanj bunyej. <sup>14</sup> Suwantgonaqa iga kalil ululonjosim mandamq di nerenem. E njeiesosimqa tamo bei aqa kakro quem. A Hibru anjam na e endegsi merbej, ‘O Sol, ni kyaqa e ugeugeibeqnum? Ni e ugeugeibeqnum dena ino segi jejamu dego ugeugeiyeqnum. Ni qaja na ino jejamu qoruyqam dego kere.’ <sup>15</sup> Onaqa e na minjem, ‘O Tamo Koba, ni yai?’ Onaqa a na merbej, ‘E Yesus agi ni na ugeugeibeqnum qaji. <sup>16</sup> Deqa ni tigel. E ni giltmonum deqa ni ijo wau tamo sosimqa kumbra ni bini unonum qaji ti kumbra bunuqna osormoqnqai qaji ti deqa mare mare laqnqam. <sup>17</sup> Bunuqna e ni qarijnmitqa ni Juda nanġi ti sawa bei bei qaji nanġi ti nanġoq giloqnqam. Deqa ni nanġi qa ulaaim. E ni taqatmesoqnitqa nanġi ni moyotmqasai. <sup>18</sup> Ni nanġoq giloqnsim ijo anjam minjroqnimqa nanġi e qa poinjroqnim ambru uratosib suwanjoq boqnqab. Ni na nanġi are bulyetnjroqnimqa nanġi Satan aqa singila uratosib Qotei aqaq boqnqab. Amqa e na nanġo une kalil kobotetnjritqa inji bole bole e nami enjrqa marem qaji di nanġi oqab. E na nanġi ti tamo unġasari kalil e qa nanġo areqalo singilateqnuq qaji nanġi ti Qotei aqa segi kumbra boleq di atelenjit sqab.’

*Pol a nami Qotei aqa anjam palontoqnej a deqa Agripa saiej*

<sup>19</sup> “Deqa Mandor Agripa, lanj goge dena pulonj ainaqa e unsimqa anjam Yesus na merbej qaji di dauryem. E gotranjosai. <sup>20</sup> E aqa anjam di dauryosim tigelosim Damaskus qureq gilem. Gilsim dia Qotei aqa anjam plaltoqnsimqa tamo unġasari nanġi endegsi minjroqnem, ‘Ninġi are bulyosib Qotei aqaq boiy. Bosib kumbra bole bole yoqnibqa tamo unġasari nanġi na ninġi nunġsib mernġwab, “Bole, ninġi are bulyonub.”’ E Jerusalem dia, Judia sawaq di, sawa bei beiq di dego tamo unġasari nanġi anjam di minjroqnem. <sup>21</sup> Utru deqa Juda tamo qudei na atra tal miligiq di e ojsib moyotbqa maroqneb. <sup>22</sup> Ariya nanġi e moyotbosai. Qotei na e taqatboqnej deqa

bini e ino ulatamuq endi tigelosimqa ni ti tamo kokba ti tamo lañaj ti Qotei aqa anjam palontosim merngeqnum. E anjam bei palontosaieqnum. Nami Moses a ti Qotei aqa medabu o tamo nanñgi ti kumbra bunuqna brantelenqas qaji di ubtosib maroqneb. Nanngo anjam di segi e bini palonteqnum. <sup>23</sup> Nanngo anjam di aqa utru agiende. Kristus a jaqatinj koba osim moiqas. Osim a tamo kalil qa namoosim subq na tigelosim Juda nanñgi ti sawa bei bei qaji nanñgi ti anjam minjroqnimqa nanñgi suwanjoq boqnqab.”

*Pol na Agripa minnej, “Ni Kristus qa ino areqalo sinjilat”*

<sup>24</sup> Pol a anjam degsi mareqnaqa Festus na aqa anjam gentosiq lelenosiq minnej, “Pol, ni nanarionum. Ino qalie kobaquja dena ni tulañ nanaritmqo.” <sup>25</sup> Onaqa Pol na minnej, “O Gate Koba Festus, e nanariosai. Ijo anjam endi bole. E areqalo bole na anjam mareqnum. <sup>26</sup> Mandor Agripa a ijo anjam endi aqa utru nami qalieosiq soqnej. Deqa e na minjqa ulaosai. Yesus aqa kumbra kalil endi uli na brantosaijoqnej. A boleq di unu. <sup>27</sup> O Mandor Agripa, ni kiyersi are qalonum? Qotei aqa medabu o tamo nanngo anjam nami nenngrenyeb qaji di bole e? Od, e qalieonum, ni maronum, di bole.”

<sup>28</sup> Onaqa Agripa na Pol nenemyej, “E sokiñala Kristen tamo brantqai ni degsi are qalonum e?” <sup>29</sup> Onaqa Pol na minnej, “Ni sokiñala Kristen tamo brantqam di kere. Sokobaiyosim Kristen tamo brantqam di kere. Ariya e na Qotei endegsi pailyeqnum, ‘O Abu, tamo bini ijo anjam queqnum qaji nanñgi ti Mandor Agripa a ti nanñgi e unum degsib soqnebe. Ariya e sil na tontbeb unum nanñgi degsib sqajqa e ni pailmosai.’ ”

<sup>30-31</sup> Onaqa Agripa Bernaisi wo tamo kalil awesoqneb qaji nanñgi ti Festus koba na tigelosib warumq dena oqedeb. Oqedosib endegsib qairosib mareb, “Iga Pol aqa jejamuq di une kobaquja bei unosai bole sai. Deqa iga a qalsim moiyoqta keresai. A tonto talq di waiyqa keresai dego.” <sup>32</sup> Nanñgi degsib marsibqa Agripa na Festus minnej, “Pol a Sisar aqa ulatamuq di tigelqa marosai qamu ni na endego a tonto talq dena uratonum oqedqo qamu.”

## 27

*Pol a qobun na Rom qureq giloqnej*

<sup>1</sup> Onaqa iga qobun na Itali sawaq gilqajqa anjam qosisib Pol tamo qudei ti tonto talq dena joqsib qaja tamo nanngo gate bei aqa ñam Julius aqa banq di ateb. Julius a Rom tamo. <sup>2</sup> A na iga Pol ombla tonto tamo nanñgi ti joqsiqu Adramitium qure nanngo qobun bei Esia sawaq gilqa laqnaqa iga qobun di gogetosim koba na gilem. Aristarkus a iga koba na gilem. Aristarkus aqa qure utru Tesalonaika agi Masedonia sawaq

di unu. Qobun di yuwal qala qalaq na dauryosim qundun kalil aiga mareb. <sup>3</sup> Iga gilsim nebeonaqa Saidon qureq di tiryem. Tiryonamqa Julius a Pol qa dulosiq odyonaqa qobun uratosiq aqa Kristen was qudei nanngi itnjrnaqa nanngi na inji inji qa aqaryaiyeb. <sup>4</sup> Onaqa iga Saidon qure uratosim gileqnamqa jagwa na gotranjonaqa iga Saiprus nui taqyosim gilem. <sup>5</sup> Gilsim yuwal gentosim Silisia sawa ti Pamfilia sawa ti di brantosim yuwal qala qalaq na dauryosim gilsim Lisia sawaq di brantosim Maira qureq di tiryem.

<sup>6</sup> Dia Julius a Aleksandria qure nanngo qobun bei Itali sawaq gilqa laqnaqa unsiqa a na iga Pol ombla tonto tamo nanngi ti joqsiqa qobun di gogetem. <sup>7</sup> Gogetosim jinnga na gileqnamqa bati gargekoba koboej. Onaqa jagwa na gotranjonaqa iga singila na gilsim Nidas qure jojomyem. Dena jagwa na olo gotranjonaqa iga gilqa keresaiigonaqa qobun bulyosimqa Krit nui aqa luwi bei ñam Salmone di tinjosim oqem. <sup>8</sup> Oqsim luwi di bunjosimqa tamo qobunq di wauo qaji nanngi waukobaosib oqsib Krit nui qoreq di beterosib qala qalaq na gileb. Iga gilsim sawa bei aqa ñam Qundun Boledamu di Lasea qure jojom di brantem.

<sup>9-10</sup> Iga bati gargekoba uratem deqa Juda nanngo qurienjo bati koboej. Yuwal ugeqa batiej deqa Pol na tamo qobunq di wauo qaji nanngi endegsi minjrej, “Ninngi quiy. E qalieonum, iga qobun na gilqom di iga gulbe koba itqom. Qobun aqa inji inji gargekoba loumqas. Qobun dego tugwas. Qobun a segi sai. Iga tamo kalil dego padalqom.” <sup>11</sup> Pol a nanngi degsi minjrnaqa qobun kuñi ojo tamo wo qobun aqa abu wo nanngi aiyel na Pol aqa anjam di dauryqa uratosib gilqa mareb. Julius a dego Pol aqa anjam dauryqa uratosiqa nanngo aiyel anjam taqyej. <sup>12</sup> Deqa iga qobun na gilem. Qundun iga soqnem qaji di jagwa bati qa qobun beteqajqa qundun bolesai. Deqa tamo gargekoba nanngi mareb, “Jagwa bati brantqa jojomqo deqa iga qundun endi uratosim gilsim Finiks qundunq di jagwa bati qa beterosim sqom.” Finiks a Krit nuiq di unu. Dia jagwa bati qa beteqajqa qundun bolequja.

### *Jagwa koba bonaqa yuwal ugeej*

<sup>13</sup> Onaqa jagwa lawo guta na bonaqa tamo qobunq di wauo qaji nanngi mareb, “Jagwa endena iga puygim gilsim Finiks qundunq di tiryqom.” Degsib marsib anka titosib qobun miligiq di atsib dena iga Krit nui aqa qala dauryosim gilem. <sup>14-15</sup> Gileqnamqa manaq dena meli jagwa koba bosiq gotranjonaqa gilqa keresaiigonaqa iga loo goge oqsim di sonamqa jagwa na segi osi laqnej. <sup>16-17</sup> Onaqa iga nui kiñala bei aqa ñam Kauda aqa qoreq di otosim sonamqa nui dena jagwa getentonaqa yuwal kiñala laej. Deqa tamo qobunq di

wauo qaji nanġi waukobaosib qobun du soqtosibqa qobun ani gogeq di atsib sil na qoseb. Qobun du ulonaim deqa sil na qoseb. Osib olo sil bei osib qobun ani yuwal na paraparaaim deqa sil na kainyosib sinġilateb. Qobun ururosिम Afrika sawa jojomyosim dia sargum gogetosim paraaim deqa ulaosib qobun rer qalnab aiyej. Nanġi degyeb deqa jagwa na segi osi laqnej. <sup>18</sup> Nebeonaqa iga loo goge di sonam jagwa tulan kobaosiq iga gotranġonaqa yuwal ugeonaqa qobun tuqepatej. Deqa tamo qobunq di wauo qaji nanġi inġi inġi qudei breinjrnabqa yuwalq aiyeb. <sup>19</sup> Olo nebeonaqa nanġi qobun aqa parara ti oyo ti osib breinjrnab yuwalq aiyeb. <sup>20</sup> Bati gargekoba iga seġ ti bongar ti unosai. Iga namoqna are qalem, “Iga padalqasai.” Ariya jagwa sinġila koba boqnsiqa iga gotranġoqnej deqa gago areqalo namij di iga uratosim marem, “Iga padalqom. Jagwa endi koboqasai.”

<sup>21</sup> Bati gargekoba tamo qobunq di so qaji nanġi inġi uyosai. Deqa Pol a nanġo ambleq di tigelosiq minjrej, “O tamo ninġi quiy. E nami mernġem, ninġi Krit nui uratosib gilalb. Ninġi ijo anjam di dauryosai deqa agi iga gulbe koba itonum. Ninġi uniy. Qobun aqa inġi inġi gargekoba loumelenqo. <sup>22</sup> Deqa e ninġi olo endegsi mernġwai. Ninġi are laeme. Tamo bei padalqasai. Iga kalil bole sqom. Qobun segi padalqas. <sup>23-24</sup> Ya qolo ijo Qotei agi e bati gaigai a qa loueqnum qaji aqa lan anġro bei bosiq a ijo areq di tigelosiq merbej, ‘O Pol, ni ulaaим. Ni Sisar aqa ulatamuq di tigelqam. Deqa Qotei na ni taqatmim ni padalqasai. Tamo kalil ni ombla qobun na gileqnum qaji nanġi dego Qotei na taqatnjrim nanġi padalqasai.’ Lan anġro na e degsi merbej. <sup>25</sup> Deqa ninġi ulaalb. E qalieonum, Qotei aqa anjam qolo merbej qaji di a dauryosim degyqas. <sup>26</sup> Ariya ninġi quiy. Iga qobun na gilsim nui beiq di sargum gogetim qobun a ojtqas.”

<sup>27</sup> Pol na nanġi degsi minjrnaqa iga Mediterenian yuwalq di otosim sonamqa jagwa na segi osi laqnej. Yori aiyel koboonaqa qolo jige yuwal a mandam qaleqnaq anjam ateqnaq tamo qobunq di wauo qaji nanġi qusibqa are qaleb, “Iga nui bei jojomyonum kiyo?” <sup>28</sup> Nanġi degsib are qalsibqa yuwal aqa robu qalieqajqa deqa sil waiyonab ainaq uneb di tarag yala, 40 mita. Dena iga gilokiñalayosimqa nanġi olo sil waiyosib uneb di tulan taragej, 30 mita. <sup>29</sup> Degsib unsibqa are qaleb, “Iga gilsim nuiq di sargum gogetim qobun a ojtqas.” Degsib are qalsibqa ulaosib mareb, “Iga anka waiyonamqa qobun tigelqas.” Degsib marsibqa qobun bunuq dena anka qolqe waiyonab yuwalq aiyej. Onaqa nanġi endegsib wainoqneb, “Urur suwaneme.” <sup>30</sup> Onaqa tamo qobunq di wauo qaji nanġi endegsib are qaleb, “Iga qobun uratosim qobun du na

jaraiqom.” Nanġi degsib are qalsibqa gisaḡosib tamo nanġi minjreb, “Iga qobuḡ namoq dena anka waiyqom.” Degsib minjrsib qobuḡ du uli na osib qobuḡ ani aqa namoq na gaintonabqa yuwalq aiyej. <sup>31</sup> Degyeq nabqa Pol a di unsiq a qaja tamo nanġi ti nanġo gate Julius a ti endegsi minjrej, “Tamo qobuḡq di wauo qaji nanġi jaraiqa mareq nub. Nanġi jaraiqab di ninġi kalil padalqab.” <sup>32</sup> Onaqa qaja tamo nanġi qobuḡ du aqa sil gentonabqa jagwa na osi ulanej.

<sup>33</sup> Nebeqa laqnaqa Pol na tamo kalil nanġi endegsi minjrej, “Ninġi inġi uyi. Bati olekoba ninġi inġi uyosai. Nunġo are ḡeiosai dego. Agi yori aiyej gilqo. <sup>34</sup> Deqa e sinġila na endegsi mernġwai, ninġi inġi uysib dena ninġi sinġilaqab. Osib ninġi kalil bole sqab. Bei padalqasai.” <sup>35</sup> Pol na tamo kalil nanġi degsi minjrsiqa bem bei osiq nanġo ulatamuq di Qotei pailiosiq a bem gentosiq uyej. <sup>36</sup> Degonaqa tamo kalil nanġi areboleboleinjrnaqa nanġi kamba dego bem elenḡosib uyej. <sup>37</sup> Iga tamo qobuḡq di soqnem qaji kalil 276. <sup>38</sup> Tamo kalil nanġi inġi uynab menetnjrnaqa qobuḡ otqajqa marsibqa bem sum osib waiyelenḡonabqa yuwalq aiyej.

### *Qobuḡ paraparaej*

<sup>39</sup> Onaqa nebeonaqa nanġi ḡam atsib mandam bei uneb. Nanġi mandam di poinjrosai. Nanġi qunduḡ bei dego uneb. Qunduḡ di aqa alile bolequja ulul ti. Unsib are qaleb, “Iga alile dia qobuḡ tiryqom.” <sup>40</sup> Degsib are qalsibqa anka nami waiyeb qaji sil serie na ġinġenḡosibqa anka yuwalq di urateleḡeb. Osib kuḡni tonteb qaji sil di palontosib kuḡni ojsib rer ġiryosib alile di tiryqajqa aiyej. <sup>41</sup> Aisib qobuḡ namoq sargum bei gogetosiq dia ojotonaq soqnej. Onaqa yuwal kok-bayosiq a qobuḡ bunuq di qalnaqa paraparaej. <sup>42</sup> Onaqa qaja tamo nanġi mareb, “Tonto tamo nanġi qawainḡosib jaraiyaib deqa iga na ḡnumnam moreḡqab.” <sup>43</sup> Degsib marnabqa nanġo gate Julius a are qalej, “Nanġi Pol dego qalib moiyaib deqa e na nanġi saidnjrqai.” Degsi are qalsiqa nanġi minjrej, “Tonto tamo nanġi ḡnumaib.” Osiqa tamo qawainḡo qalie nanġi minjrej, “Ninġi namo prugosib yuwalq aisib qawainḡosib alile di patiy.” <sup>44</sup> Osiqa tamo qawainḡo qaliesai qaji nanġi minjrej, “Qobuḡ paraparao qaji aqa sarqei ninġi na elenḡosib bileq atsib dena otosib aisibqa alile di patiy.” A degsi minjrnaqa nanġi degyosib iga kalil koba na alile dia geregere patelenem.

## 28

### *Pol a Malta nuiq di soqnej*

<sup>1</sup> Iga kalil alile dia patonamqa nui di aqa ḡam Malta degsi mergonab quem. <sup>2</sup> Onaqa tamo unġasari nui dia soqneb qaji

nanġi kumbra tulaġ boledamu dauryosib iga gegerereigeb. Osib awa boqnej deqa iga yorgonaqa nam tunġuyosib mergeb, “Niġi bosib njamyuwo areq endi awooiy.” Degsib mergonabqa iga njamyuwo areq di awoonam jejamu kanġanġej. <sup>3</sup> Onaqa Pol a nam koroiyosiqa njamyuwoq di atnaqa amal uge nam miligiq di soqnej qaji kanġanġyonaqa oqedosiqa Pol aqa baġq di uñiyosiqa ġainesoqnej. <sup>4</sup> Onaqa nui deqaji tamo unġasari nanġi amal uge Pol aqa baġq di uñiyosiq ġainesonaaq unsibqa segi segi maroqneb, “Tamo endi a leġ ojo tamo kiyo? A yuwalq di moiyoasai deqa gago qotei na a kambatosiqa amal uge qarinyqoqa a uñiyqo. Deqa a moiqas.” <sup>5</sup> Onaqa Pol na aqa baġ butuyonaqa amal uloġosiqa njamyuwoq ainaqa Pol a bole soqnej. Aqa jejamu yala gulbe bei osai. <sup>6</sup> Onaqa nanġi Pol koqyoqneb. Aqa jejamu sunyqas kiyo a moisim uloġoqujatqas kiyo degsib marsibqa tariġkobaeb. Tariġonab tariġonab Pol aqa jejamuq di gulbe bei brantosai. Deqa nanġi areqalo bei osib mareb, “Tamo endi a qotei bei.”

<sup>7</sup> Nui deqaji tamo bei aqa ñam Publius a soqnej. A tamo kobaquja. A na nui di taqatoqnej. Aqa tal jojom di soqnej deqa a na iga joqsiqa aqa talq ġilsiq dia bati qalub iga gegerereigoqnej. <sup>8</sup> Iga aqa talq di sonamqa aqa abu makobaiyonaqa ñeiesoqnej. Aqa jejamu tulaġ kanġanġyosiqa bi mormantej. Deqa Pol na aqa areq ġilsiq Qotei pailyosiq aqa jejamuq di baġ atnaqa aqa ma koboosiq olo boleej. <sup>9</sup> A degyonaqa nui deqaji tamo unġasari mainjrej qaji nanġi qusi-bqa Pol aqa areq beq nabqa a na nanġi kalil boletnjroqnej. <sup>10</sup> Ariya nui deqaji tamo unġasari nanġi na iga gegerereigoqnsib kumbra tulaġ boledamu egoqneb. Bunuqna iga nui di uratqa laqnamqa inġi inġi kalil iga saiigelenej qaji di nanġi na olo egeleġonab gago inġi inġi kereej.

### *Pol a Rom qureq di brantej*

<sup>11</sup> Iga nui dia bai qalub soqnem. Di koboonaqa iga qobun bei gogetosim ġilem. Qobun di jagwa bati qa nui dia beterosiq soqnej. Qobun di Aleksandria qure qaji. Qobun aqa namoq di qotei bei aqa ñam Sus aqa anġro aiyel nanġo sulum gereiyosib atnab soqnej. <sup>12</sup> Iga qobun na ġilsim Sirakyus qureq di tiryosimqa bati qalub di soqnem. <sup>13</sup> Dena qobun na ġilsim Regium qureq di tiryosim ñeiem. Nebeonaqa jagwa guta na bonaqa iga qobun na ġileqnam qoloej. Olo nebeonaq iga ġilsim Puteoli qureq di tiryem. <sup>14</sup> Dia iga Yesus aqa tamo unġasari qudei nanġi itnjrem. Itnjrnammqa nanġi na metgonabqa iga bati 7 nanġi koba na soqnem. Sosimqa nanġi olo uratnjrsimqa sinġa na walwelosim Rom qureq di brantqa marsim ġilem. <sup>15</sup> Rom dia Yesus aqa tamo unġasari qudei

nanği iga beqnam qusibqa gamq di iga turqajqa marsib wal-welosib aiyeb. Nanği aiyeq nabqa iga giloqnsim gam qalaq di qure ñam Apius İnği Qarinjo Qure dia nanği qudei turem. Olo gilsimqa qure ñam Nerejo Tal Qalub dia nanği qudei turem. Turosım unjrsimqa Pol a tulan areboleboleiyonaqa Qotei binjiyosıqa aqa are sinğilakobaiyej.

<sup>16</sup> Ariya iga gilsim Rom di brantem. Brantonam Rom nanğo gate nanği odonabqa Pol a aqa segi talq di soqnej. Qaja tamo qujai na a taqatoqnej.

*Pol a Rom dia Yesus aqa anjam bole maroqnej*

<sup>17</sup> Bati qalub koboonaqa Pol na Juda tamo gate nanği met-njrnaqa bosib aqa areq di koroona minjrej, “O ijo was ninği quiy. Jerusalem dia Juda nanği e laña ojsib Rom nanğo banq di atnab nanği na e tonto talq di waibeb. E Juda gago kumbra bei ugeugeiyosai qnem. Gago moma nanğo kumbra bei dego gotranjosai qnem. <sup>18</sup> Deqa e Rom gate kokba nanğo ulatamuq di tigelosim ijo anjam marnamqa nanği qusibqa ariya nanği une kobaquja bei ijo jejamuq di unosai. Deqa nanği e laña moiyoqbqa uratosib tonto talq dena e uratim oqedqajqa mareb. <sup>19</sup> Marnabqa Juda nanği na Rom gate kokba nanğo anjam di gotranjeb. Deqa e gam bei saiqoji. E marem, ‘E Sisar aqa ulatamuq di tigelqai. Yim a ijo anjam quqwas.’ E degsi marem. Ariya e Juda nanği qa anjam bei yala sosai. <sup>20</sup> O ijo was, e ninği nunğsiy ijo anjam mernğwajqa deqa metnjonum. E inği bole bole Qotei a nami Israel gago moma nanği enjrqa marej qaji di oqajqa tariñoqnsim unum. Utru deqa e sil kokba endena tontbonub.” Pol a degsiqa Juda tamo gate nanği minjrej.

<sup>21</sup> Onaqa nanği na Pol minjeb, “Judia sawaq di tamo qudei nanği ni qa anjam bei nengrenjosib gagoq qarinyosai. Juda tamo bei na bosiq ni qa anjam uge bei mergosai dego. <sup>22</sup> Deqa ni segi na ino anjam mergim iga quqwom. Iga qalieonum, sawa sawa kalilq di tamo unğasari nanği mareqnub, ‘Yesus aqa gam bunuj di uge. Gam dena tamo unğasari nanği poeleneqnub.’” Juda tamo gate nanği na Pol degsib minjeb.

<sup>23</sup> Ariya nanği olo koroqajqa bati ateb. Koro bati di brantonaqa Juda gargekoba nanği nobqolo bosib Pol aqa talq di koroeb. Koroonaqqa Pol a tigelosıqa anjam utru atsiq anjam olekoba nanği minjreqnaq gilsiq bilaqtej. Qotei na aqa segi tamo unğasari nanği taqatnjrsim nanğo Mandor Koba sqas anjam di aqa utru plaltosıqa minjroqnej. Moses aqa dal anjam na ti Qotei aqa medabu o qaji tamo nanğo anjam na ti anjam mutu quja quja elenjoqnsıqa nanğo are qametnjrimqa nanği Yesus qa nanğo areqalo singilatqajqa deqa singila na minjroqnej. <sup>24</sup> Minjreqnaqa Juda qudei nanği Pol aqa anjam



di qusib mareb, “Anjam di bole.” Onaqa nanği qudei Pol aqa anjam qusib quosaibulosib mareb, “Anjam di bolesai.”<sup>25</sup> Nanği degsib areqalo aiyeltosib tigelosib jaraiqa laqnabqa Pol na anjam qujai endegsi minjrej, “Mondor Bole a kere Qotei aqa medabu o tamo Aisaia aqa medabuq na gago moma nanği anjam endegsi minjroqnej,<sup>26</sup> ‘Ninği dab atoqnqab di ijo anjam aqa utru poinqoqnqasai. Ninği nam atoqnqab di ijo anjam aqa damu dego poinqoqnqasai.’ Agi Qotei na Aisaia minjej, ‘Ni nanqoq giloqnsimqa anjam degsi minjroqne.<sup>27</sup> O Aisaia, tamo unğasari di nanqo are miligi getenjnrejunu. Nanqo dabkala na ijo anjam quqwajqa asginjreanu. Nanği nam brunėjunub. Deqa nanqo namdamu na ijo kumbra unqa keresai. Nanqo dabkala na ijo anjam qusib utru poinjrqa keresai. Nanği are bulyosib ijoq bqa keresai dego. Deqa e na nanği boletnjrqasai.’ Qotei na Aisaia degsi minjej.”

<sup>28-29</sup> Osiqa Pol a olo Juda nanği minjrej, “O ijo was ninği endegsi poinqem. Qotei na sawa bei bei qaji nanği elenqa marsiqa anjam qarinyonaqa nanqoq gilej. Nanği qusib dauryqab.”

<sup>30</sup> Onaqa Pol aqa segi tal awaiyoqnej qaji dia wausau aiyel soqnej. Sonaqa tamo unğasari nanği a unqajqa beqnabqa a na nanği kalil joqoqnsiqa aqa talq di koba na awooqnsib qairoqneb. <sup>31</sup> Qotei na aqa segi tamo unğasari nanği taqat-njrsim nanqo Mandor Koba sqas anjam di aqa utru Pol na plaltoqnsiqa nanği sainjroqnej. Tamo Koba Yesus Kristus qa dego anjam plaltosiq sainjroqnej. Pol a anjam deqaji marqajqa ulaosaiyoqnej. A anjam deqaji mareqnaqa tamo bei na saidyosaiyoqnej.

## ROM

### *Pol a Yesus aqa wau tamo*

<sup>1</sup> E Pol. E Kristus Yesus aqa wau tamo. A na e metbej deqa e Qotei aqa anjam bole mare mare laqnum. E wau di yqajqa deqa a na e giltbej.

<sup>2</sup> Tulañ nami Qotei a marej, “Ijo anjam bole di aqa damu bunuqna brantqas.” Onaqa Qotei aqa medabu o qaji tamo nanqi anjam bole di nengrenyonab soqnej. Nengren di Qotei aqa segi nengren. <sup>3</sup> Qotei aqa anjam bole di aqa segi Niri aqa anjam. Aqa Niri a tamo bulyosiqa Devit aqa len na nambabebj. <sup>4</sup> Onaqa bunuqna Qotei na a subq na tigeltej. Tigeltonaqa bati deqa aqa Mondor Bole na iga endegsi osorgej, Yesus a Qotei aqa Niri singila koba. A gago Tamo Koba Yesus Kristus. <sup>5</sup> Yesus aqa singila na Qotei a iga qa are boleiyej. Osiqa Yesus aqa ñam na iga wau egej. Deqa iga aqa anjam maro tamo unum. Tamo ungasari sawa sawa kalilq di unub qaji nanqi Yesus qa nanqo areqalo singilatosisib aqa anjam dauryqajqa deqa are qalsiq wau egej. <sup>6</sup> Ninqi dego Yesus Kristus na metñgej deqa ninqi aqa anjam dauryeqnub.

<sup>7</sup> Qotei na ninqi Rom qureq di unub qaji ninqi tulañ qalaqalaingeqnu. A na ninqi metñgej deqa ninqi aqa segi tamo ungasari unub. O ijo was, e anjam endi nengrenyosim nunqoq qarinyonum. Gago Abu Qotei wo Tamo Koba Yesus Kristus wo nanqi aiyel ninqi qa are boleinjrimqa ninqi lawo na soqniy.

### *Pol a marej, “E Rom Kristen nanqi unjrqai”*

<sup>8</sup> E mati ninqi anjam bei merngwai. Ninqi Yesus Kristus qa nunqo areqalo singilateqnub deqa tamo ungasari gargekoba nanqi ninqi qa saoqnsib laqnabqa sawa sawa kalilq di nanqi queqnub. E deqa are qaloqnsim Yesus Kristus aqa ñam na ijo Qotei minjeqnum, “Keretonum.” <sup>9</sup> E ijo are miligi singilatosisim deqa e Qotei aqa wau ojoqnsim aqa Niri aqa anjam bole palontqnsim laqnum. Qotei a segi qalie, bati gaigai e pailyqa oqnsim ninqi qa are qaleqnum. <sup>10</sup> E gaigai ninqi qa endegsi pailyeqnum, “O Qotei, ni na merbimqa e gam itosiy aisiy Rom Kristen nanqi unjrqai.” <sup>11</sup> O ijo was, e ninqi nunqwjajqa are koba qaleqnum. Di kiyajqa? E Mondor aqa anjam ninqi merngitqa dena nunqo are singilatetñgwajqa deqa. <sup>12</sup> Ijo are koba endegsi unu. E nunqoq bosiy ninqi Yesus qa nunqo areqalo singilateqnub di unsiyqa dena ijo are singilatqai. Ninqi dego e Yesus qa ijo areqalo singilateqnum di unsibqa dena nunqo are singilatqab. Gam dena iga kalil koba na gago are singilatoqnsim sqom.

<sup>13</sup> O was nĩngi endegsib qalieoiy. Bati gargekoba e bosiy nĩngi nunḡwajqa are qaleqnum. Ariya e nunḡoq bqajqa gam gaigai geteḡeqnu. Ijo are koba endegsi unu. Tamo unḡasari sawa bei beiq di unub qaji nanḡo ambleq di e waueqnamqa nanḡi are bulyoqnsib Yesus qa nanḡo areqalo sinḡilateqñub dego kere e nunḡo ambleq di wauoqnitqa tamo qudei nanḡi are bulyoqnsib Yesus qa nanḡo areqalo sinḡilatoqñqab. <sup>14</sup> E na Grik tamo nanḡi ti yaun tamo nanḡi ti powo tamo nanḡi ti nanari tamo nanḡi ti Yesus aqa anjam minjroqnit quḡwajqa deqa Qotei na e wau ebej. <sup>15</sup> Deqa nĩngi Rom qureq di unub qaji nĩngi dego e na Yesus aqa anjam bole mernḡoqnit quḡwajqa are prugbeqnu.

*Yesus aqa anjam bole a Qotei aqa sinḡila ti unu*

<sup>16</sup> E Yesus aqa anjam bole di marqajqa jemaibosaieqnu. Di kiyaaqa? Anjam bole di Qotei aqa sinḡila ti unu. Sinḡila dena Qotei na tamo kalil Yesus qa nanḡo areqalo sinḡilateqñub qaji nanḡi padalqa gamq na eleḡeqnu. A matiq Juda nanḡi eleḡeqnu. Osiqa sawa bei bei qaji nanḡi dego eleḡeqnu. <sup>17</sup> Anjam bole dena Qotei na iga tamo bole une saiḡoji sqajqa gam osorgej. Gam agiende. Iga Yesus qa gago areqalo sinḡilatqom gam dena qujai Qotei na iga tamo bole une saiḡoji qa mergwas. Gam bei saiḡoji. Agi Qotei aqa anjam bei nami endegsib nenḡrenḡyeb unu, “Tamo nanḡi Qotei qa nanḡo areqalo sinḡilatqab di a na nanḡi tamo bole une saiḡoji qa minjrqas. Yim nanḡi ḡambile gaigai sqab.”

*Tamo unḡasari kalil nanḡi na Qotei qoreiyeqñub*

<sup>18</sup> Iga qalie, Qotei a laḡ goge di sosiqa aqa minjinḡ boleq ateqnu. A na tamo unḡasari kalil a qoreiyoqnsib kumbra uge uge yeqñub qaji nanḡi awai uge enjreqnu. Nanḡo kumbra uge dena nanḡi Qotei aqa anjam bole tenteqñub. <sup>19</sup> Tamo unḡasari nanḡi di Qotei aqa kumbra qalie bole. Qotei a segi na nanḡi aqa kumbra osornjreqnu. Ariya nanḡi olo Qotei qoreiyeqñub deqa a na nanḡi awai uge enjreqnu. <sup>20</sup> Qotei a nami mandam ti inḡi inḡi kalil ti gereiyonaq sonaq aqa maḡwa di tamo unḡasari nanḡi unoqñeb dena bosu bosiq agi bini nanḡi uneqñub. Gam dena nanḡi Qotei aqa kumbra uliejunu qaji di qalieonub. Aqa kumbra utru ti aqa sinḡila gaigai sqas qaji deqa ti nanḡi qalie bole. Deqa tamo bei a marqa keresai, “E Qotei qaliesai deqa e une saiḡoji.”

<sup>21</sup> Nanḡi Qotei qa qalie unub. Ariya nanḡi aqa ñam soqtqa uratoqnsib a binjyqa asginjreqnu. A segi Qotei bole nanḡi deqa are qalosaieqñub. Nanḡo kumbra dena nanḡi nanarit-njroqnsiq nanḡo areqalo getentetnḡreqnu. Deqa nanḡi ambruḡ di laqñub. <sup>22</sup> Nanḡi diqoqnsib mareqñub, “Iga powo

koba ti unum.” Di gisanj. Nanji tulan nanarioqnsib unub. <sup>23</sup> Sosibqa Qotei nambile gaigai unu qaji a qoreiyocnsib a qa louqajqa uratoqnsib olo beloqnsib mandam tamo ti qebari ti wagme ti amal ti nanjo sulum gereiyocnsib nanji qa loueqnub.

*Tamo ungasari nanji kumbra uge uge yeqnu*

<sup>24</sup> Tamo ungasari nanji Qotei qoreiyeqnub deqa a na kamba nanji uratnjreqnaqa nanji kumbra tulan uge uge jigat yoqncqajqa are prugnjqnu. Kumbra dena nanji na nanjo segi jejamu tulan ugeugeiyeqnub. <sup>25</sup> Tamo ungasari deqaji nanji Qotei aqa anjam bole uratoqnsib olo beloqnsib gisanj anjam segi dauryeqnub. Deqa nanji Qotei qoreiyocnsib inji inji kalil a na gereinjrej qaji di binjnjroqnsib nanjo sorgomq di unub. O ijo was, Qotei a inji inji kalil qa utru deqa iga bati gaigai aqa ñam soqtoqnom. Bole.

<sup>26</sup> Tamo ungasari nanji di Qotei qoreiyeqnub deqa a na kamba nanji uratnjreqnaqa nanji jemai kumbra tulan uge uge yoqncqajqa are prugnjqnu. Nanjo jemai kumbra agiende. Ungasari nanji tamo ti nerenqajqa uratoqnsibqa uña bei bei wo nerenjqnub. <sup>27</sup> Tamo nanji dego uña ti nerenqajqa uratoqnsibqa tamo bei bei wo nerenqajqa are tulan prugnjqnu. Nanji jemai kumbra di yeqnu deqa Qotei a nanji kambatnjroqnsiqa nanjo jejamuq di awai tulan ugedamu enjqnu.

<sup>28</sup> Nanji Qotei aqa sorgomq di sqajqa are qalosaieqnub deqa Qotei na nanji uratnjreqnaqa nanji nanjo segi areqalo uge uge dauryocnsib kumbra uge uge yeqnu. <sup>29</sup> Nanjo kumbra uge agiende. Nanji kumbra bole tintinj yqajqa torei urateqnub. Nanji ñoro koba oqajqa mamaulnjreqnu. Nanji tamo nanji jeutnjreqnub. Nanji tamo qudei inji koba ti unub qaji nanji qa are ugeinjreqnu. Nanji tamo nanji ñumoqnsib moyotnjreqnub. Nanji laña laña njirinoqnsib gisanj anjam mareqnub. Nanji tamo qudei nanjo inji inji laña yainjqnub. Nanji tamo qudei nanji ugeugeinjreqnub. Kumbra kalil di nanjoq di tulan koba unu. Nanji yomueqnub. <sup>30</sup> Nanji gisanj na tamo nanjo ñam ugetetnjreqnub. Nanji Qotei jeuteqnub. Nanji diqocnsib laqnsib nanjo segi ñam soqteqnub. Nanji kumbra uge uge bunuj babtelejqnub. Nanji nanjo ai abu nanjo medabu gotranjqnub. <sup>31</sup> Nanji areqalo bole ti sosaieqnub. Nanji nanjo segi anjam bei dauryqa maroqnsib olo dauryqa urateqnub. Nanji tamo qudei nanji qalaqalainjrosaieqnub. Nanji tamo qudei nanji qa dulo-saieqnub. <sup>32</sup> Qotei aqa dal anjam endegsi unu, “Tamo ungasari kumbra uge deqaji yeqnu qaji nanji ñumib moreñebe.” Dal anjam degsi unu. Tamo ungasari nanji di Qotei aqa dal

anjam qalie bole. Ariya nanği olo gotranjoqnsib kumbra uge uge yeqñub. Di segi sai. Tamo unğasari nanği dena tamo qudei nanği kumbra uge uge deqaji yeqñab unjroqnsib nanğo ñam soqtetnjroqnsib minjreñub, “Keretonub. Niñgi kumbra degyoqñiy.”

## 2

### *Qotei a une tamo nanği awai uge enjrças*

<sup>1</sup> O tamo, ni que. Ni une saiqoji unum ni degsi marqa keresai. Kumbra uge uge tamo unğasari nanği yeqñub qaji di ni segi dego yeqñum. Deqa ni na tamo unğasari nanğojejamuq di une qametnjreñum di ni segi dego ino jejamuq di une qameqñum. <sup>2</sup> Iga qalie, tamo unğasari kumbra uge uge yeqñub qaji nanği Qotei na kamba peginjrşim awai uge enjrças. Qotei a kere nanği awai uge enjrças. <sup>3</sup> Ni na tamo unğasari kumbra uge uge yeqñub qaji nanğojejamuq di une qametnjreñum ariya kumbra nanği yeqñub qaji di ni segi dego yeqñum. Deqa ni kiyersi are qalonum? Qotei na tamo unğasari nanği di peginjrşim awai uge enjrças ariya a ni awai uge emqasai. Ni degsi are qalonum kiyo? Di sai. <sup>4</sup> Ni que. Qotei a gaigai kumbra tulañ boledamu ni emoqnsiq a ni qa tarişokobaiyeqñu. A urur ni awai uge emosaieqñu. Qotei aqa kumbra bole di ni unsim olo uge qa marsim gotranjoqam e? Degaim. Qotei a ni are bulyqajqa deqa are qaloqnsiq kumbra bole osormeñu. Ni di qaliesai kiyo? <sup>5</sup> Ariya ino are miligi getenejunu deqa ni are bulyosai. Ino kumbra dena ni ino awai uge tumbol ateqñum. Deqa mondoñ diño batiamqa Qotei a kumbra tintiñ na tamo unğasari nanği peginjrşim aqa minjiñ boleq atsimqa a na nanği ni ombla awai tulañ ugedamu enğwas. <sup>6</sup> Ni qalie, diño bati qa Qotei na tamo unğasari kalil nanğojejamuq kumbra kambatosim awai segi segi enjrças. <sup>7</sup> Tamo unğasari qudei nanği singila na tigeljoqnsib kumbra bole bole yeqñub lañ qure qa gam itqajqa waukobaeqñub. Osib nanği lañ qureq di ñam koba oqajqa ti so bole gaigai sqajqa ti tulañ singilaeqñub. Deqa Qotei na tamo unğasari nanği di awai boledamu enjrim nanği ñambile gaigai sqab. <sup>8</sup> Ariya tamo unğasari qudei nanği nanğojejamuq qa are qaloqnsib anjam bole gotranjoqnsib kumbra uge uge yeqñub. Deqa Qotei na tamo unğasari nanği di awai ugedamu enjrşim nanği qa minjiñ oqetqas. <sup>9</sup> Nanği kumbra uge uge yeqñub deqa mondoñ nanği gulbe koba ti jaqatiñ koba ti oqab. Matiq Juda nanği oqab. Bunuqna sawa bei bei qaji nanği dego oqab. <sup>10</sup> Ariya tamo unğasari kumbra bole bole yeqñub qaji nanği Qotei na aqaryainjrimqa nanği lañ qureq oqsib dia ñam koba ti lawo ti so bole gaigai sqab. Matiq a Juda nanği

aqaryainjr̄qas. Bunuqna a sawa bei bei qaji nan̄gi dego aqaryainjr̄qas. <sup>11</sup> Qotei aqa ñamgalaq di tamo un̄gasari kalil nan̄gi kerekere unub. Deqa a nan̄go ñam qa are qalsim nan̄gi peginj̄r̄qasai.

<sup>12</sup> Nin̄gi quiy. Tamo qudei nan̄gi dal anjam qaliesai. Di un̄gum. Nan̄gi une yeqnub deqa nan̄gi kalil padalqab. Tamo qudei nan̄gi dal anjam qalie unub. Di dego un̄gum. Nan̄gi une yeqnub deqa Qotei na nan̄gi peginj̄r̄qas. A dal anjam aqa wau na nan̄gi peginj̄r̄qas. <sup>13</sup> Tamo nan̄gi dal anjam lan̄ja queqnub qaji nan̄gi Qotei aqa ñamgalaq di tamo bolesai. Tamo nan̄gi dal anjam quoqnsib dauryeqnub qaji nan̄gi segi Qotei aqa ñamgalaq di tamo bole sqab. <sup>14</sup> Bole, sawa bei bei qaji nan̄gi dal anjam qaliesai. Ariya nan̄gi nan̄go segi areqalo na dal anjam mutu qudei dauryeqnub. Dena iga poigwo, dal anjam a nan̄go areqaloq di nami sosisq wauoqnej. <sup>15-16</sup> Qotei a nan̄go are miligiq di dal anjam nengren̄yobulej deqa nan̄gi kumbra bole ti kumbra uge ti qalie unub. Deqa mondon̄ diño batiamqa nan̄go areqalo qudei na nan̄gi min̄jr̄qas, “Nun̄go kumbra di uge.” Osim nan̄go areqalo qudei na olo nan̄gi min̄jr̄qas, “Nun̄go kumbra di bole.” Bati deqa Qotei na tamo un̄gasari nan̄go kumbra kalil nan̄go are miligiq di uliejunu qaji di boleq atekritosim dena nan̄gi peginj̄r̄qas. A Kristus Yesus aqa wau na nan̄gi peginj̄r̄qas. Anjam bole e palonteqnum qaji aqa damu degsi unu.

*Juda tamo nan̄gi are qaleqnub, “Iga dal anjam ti unum deqa iga kere unum”*

<sup>17</sup> O Juda tamo, nin̄gi qudei endegsib are qaleqnub, “Iga dal anjam ti unum deqa Qotei na iga pegigwasai.” Osib nin̄gi nun̄go segi ñam soqtoqnsib endegsib mareqnub, “Iga Qotei aqa tamo unum. <sup>18</sup> Iga Qotei aqa areqalo qalieonum. Qotei na aqa dal anjam iga osorgej deqa iga kumbra bole kalil qa tulan̄ arearetgeqnu.” <sup>19-20</sup> Osib nin̄gi endegsib are qaleqnub, “Iga dal anjam qalie unum deqa iga powo bole ti anjam bole ti ejunum. Deqa iga na tamo un̄gasari ñam qandimo unub qaji nan̄gi gam osorn̄jreqnum. Iga na tamo un̄gasari ambruq di unub qaji nan̄gi suwant̄njreqnum. Iga na tamo un̄gasari powo saiqoji unub qaji nan̄gi powo en̄jreqnum. Iga na tamo un̄gasari an̄gro kiñilala bulosib nanarieqnub qaji nan̄gi Qotei aqa anjam aqa damu osorn̄jreqnum.” <sup>21</sup> O Juda tamo, kiyaga nin̄gi gaigai dal anjam plaltoqnsib ariya nin̄gi olo dal anjam di dauryosaieqnub? Nin̄gi mareqnub, “Bajin̄aib.” Ariya nin̄gi olo bajineqnub. <sup>22</sup> Nin̄gi mareqnub, “Nin̄gi tamo bei aqa un̄ja jejamu ojetaib.” Ariya nin̄gi olo was bei aqa ñaun̄ jejamu ojeteqnub. Nin̄gi gisan̄ qotei nan̄gi qa asgingeqnu. Ariya nin̄gi olo gisan̄ qotei nan̄go atra talq dena sulum bajineqnub. <sup>23</sup> Nin̄gi

nunġo segi ñam soqtoqnsib mareqñub, “Iga Qotei aqa dal anjam qalie bole.” Ariya ninġi olo dal anjam di gotranġyeqñub. Nunġo kumbra dena ninġi Qotei aqa ñam ugeteqñub. <sup>24</sup> Agi Qotei aqa anjam bei nami ninġi qa endegsib nenġrenġyeb unu, “Nunġo kumbra uge di sawa bei bei qaji nanġi unoqnsib Qotei aqa ñam misilinġyeqñub.”

*Tamo yai a Juda tamo bole?*

<sup>25</sup> Bole, ni muluġ aiqa marsim ni mati dal anjam dauryoqñqam di kere. Ariya ni dal anjam gotranġyoqnsim laña muluġ aiqam di keresai. Ino kumbra dena ni tamo muluġ aiyosai qaji nanġi bulqam. <sup>26</sup> Deqa tamo bei muluġ aiyosai qaji a dal anjam dauryoqñqas di a tamo muluġ aiyeqñub qaji nanġi bul sqas. <sup>27</sup> Bole, ninġi Juda tamo unub deqa ninġi dal anjam ejunub. Ninġi muluġ dego aiyeqñub. Ariya ninġi dal anjam gotranġyqab di tamo muluġ aiyosaieqñub qaji nanġi na mernġwab, “Ninġi une ti.” Nanġi na degsib mernġwab. Di kiyaaq? Nanġi dal anjam dauryeqñub deqa. Nanġi muluġ aiyosai di unġum. <sup>28</sup> Tamo bei a laña baban na Juda tamo sqas di a Juda tamo bolesai. Aqa jejamu segi osim muluġ aiqas di aqa muluġ bolesai. <sup>29</sup> Tamo a aqa are miligiq na Juda tamo sqas di a Juda tamo bole. A aqa are miligiq na muluġ aiqas di aqa muluġ bole. A na aqa jejamu laña osim dal anjam dauryqas di keresai. Qotei aqa Mondor na a singila yimqa aqa are miligiq na a muluġ bole aiqas di kere. Tamo di a Qotei aqa ñamgalaq di ñam ti sqas. A mandam tamo nanġo ñamgalaq di ñam ti sqasai.

### 3

*Qotei a kumbra bole tinġin na tamo nanġi peginjrqas*

<sup>1</sup> O ijo was, ninġi kamba e merbqab kiyo, “O Pol, ni degsi maronum deqa unġum, iga Juda tamo unum di laña. Iga muluġ aiyem di dego laña.” O was ninġi e degsib merbaib. <sup>2</sup> Ninġi quiy. Qotei a Juda nanġo banq di inġi bole bole atej. Inġi bole bei agiende. A na Juda nanġi aqa anjam taqatqa osiq wau enjrej. <sup>3</sup> Bole, Juda qudei nanġi Qotei aqa anjam di nanġo areqaloq di singilatosaieqñub. Osib aqa anjam di dauryosaieqñub. Deqa iga endegsi marqom kiyo, “Qotei a dego aqa segi anjam di dauryosaieqñu”? <sup>4</sup> O ijo was, iga degsi marqasai bole sai. Iga endegsi marqom, “Tamo kalil nanġi gisañ tamo. Qotei a segi qujai gisañ tamo sai. A anjam bole gaigai maroqnsiq a olo uratosaietnu.” Agi Qotei aqa anjam bei nami endegsib nenġrenġyeb unu, “O Qotei, ino anjam kalil bole. Deqa tamo qudei na ni pegimqa laqñibqa ni olo nanġi tulan bunġjrsim ni une saiġoji sqam.”

<sup>5-6</sup> Deqa ijo was, ningi kamba olo e endegsib merbqab kiyo, “O Pol, ni marobulonum, ‘Iga kumbra uge yoqnqom gam dena Qotei aqa segi kumbra bole olo brantoqnqas.’ O Pol, ni degsi marobulonum deqa iga kamba marqom, ‘Degwas di Qotei a kiyaaq gago une qa niriŋosim awai uge egwas? Qotei aqa kumbra di uge.’ Degsi marqom e?” O ijo was, iga degsi marqasai bole sai. Qotei a gaigai kumbra bole segi yeqnu. A kumbra bole yosai qamu a kiyersim tamo ungasari kalil nanŋi peginjrqas? Di keresai. Nunŋo areqalo di mandam tamo nanŋo areqalo. <sup>7</sup> Ariya ningi olo e endegsib merbqab kiyo, “O Pol, ni marobulonum, ‘Iga gisaŋ anjam maroqnmqqa gam dena Qotei aqa anjam bole olo brantoqnmqqa aqa ñam tulaŋ goge oqoqnqas.’ O Pol, ni degsi marobulonum deqa iga kamba marqom, ‘Degwas di Qotei a kiyaaq iga une tamo qa mergsim awai uge egwas?’ ” O ijo was, nunŋo anjam di tulaŋ uge. <sup>8</sup> Anjam uge deqaji tamo qudei nanŋi mare mare laqnu. Agi nanŋi endegsib mareqnu, “Unŋum, iga kumbra uge uge yoqnqom. Yim gam dena kumbra bole olo brantoqnqas. Pol a anjam degsi palonteqnu.” O ijo was, tamo qudei nanŋi degsib iga yomuigosib mareqnu. Di gisaŋ koba. Nanŋo kumbra uge dena Qotei na nanŋi awai ugedamu enjrqas.

*Tamo bole bei sosai*

<sup>9</sup> Deqa iga kiyersi marqom? Iga Juda tamo unum deqa iga na tamo kalil nanŋi buŋnjreqnum degsi marqom e? Iga degsi marqasai. E nami mernŋonum, iga Juda ti Grik ti kalil une na kabutgejunu. <sup>10</sup> Agi Qotei aqa anjam bei nami endegsib nenŋrenyeb unu,

“Tamo bole bei sosai.

Qujai bei a Qotei aqa kumbra bole dauryosaieqnu.

Tamo dego bei sosai.

<sup>11</sup> Tamo qujai bei a Qotei qa poiyoŋsaieqnu.

Qujai bei a Qotei itqa are qalosaieqnu. Tamo dego bei sosai.

<sup>12</sup> Tamo kalil nanŋi gam bole uratekriteqnu.

Nanŋi kalil tamo uge.

Qujai bei a kumbra bole dauryosaieqnu. Sai bole sai.

<sup>13</sup> Nanŋi kalil anjam uge marelenŋeqnu.

Tamo moiyo qaji sub waqesonaq tamo nanŋo jejamu sub miligiq di qusaieqnu

dego kere tamo kalil nanŋo medabu na anjam tulaŋ uge uge mareqnu.

Nanŋi gisaŋ anjam koba marelenŋeqnu.

Amal uge na tamo uñinjreqnu dego kere tamo kalil nanŋo medabu na tamo nanŋi tulaŋ ugetnjreqnu.

<sup>14</sup> Osib gaigai nanŋo medabu na tamo nanŋi qa anjam uge maroqnsib nanŋi qa are ugeinjreqnu.



15 Nan̄gi bati gaigai tamo ñumsib moiyoṭn̄jr̄qaj̄qa urur ti gile-qnub.

16 Nan̄gi na tamo nan̄gi ugeugein̄jr̄qaj̄qa are qaloqnsib gulbe koba enjreqnub.

17 Nan̄gi lawo kumbra qaliesai.

18 Nan̄gi Qotei yala ulaiyosaieqnub.”

O ijo was, Qotei aqa anjam nami degsib nen̄gren̄yeb unu.

19 Iga qalie, Moses a tamo un̄gasari dal anjam ejunub qaji nan̄gi qa are qalsiq dal anjam nen̄gren̄yey. Deqa tamo bei a endegsi marqa keresai, “E tamo bole. E une saiqoji.” A degsi marqa keresai. Iga tamo un̄gasari kalil mandamq endi unum qaji iga Qotei aqa ñamgalaq di une ti unum. 20 Deqa tamo bei a dal anjam dauryosim dena a Qotei aqa ñamgalaq di tamo bole une saiqoji sqa keresai. Sai bole sai. Dal anjam na gago une iga osorgeqnu. Di segi.

*Iga Yesus qa gago areqalo sin̄gilatqom di iga tamo bole sqom*

21 O ijo was, iga Qotei aqa ñamgalaq di tamo bole sqajqa gam bei unu. Iga dal anjam dauryqom gam dena sai. Qotei na gam bei babsiq iga osorgej. Nami Moses a gam deqa marsiq dal anjamq di nen̄gren̄yey. Qotei aqa medabu o qaji tamo kalil nan̄gi dego gam deqa marsib anjam nen̄gren̄yeb.

22 Gam agiende. Tamo un̄gasari kalil Yesus Kristus qa nan̄go areqalo sin̄gilateqnub qaji nan̄gi Qotei na tamo bole une saiqoji qa minjreqnu. Gam di segi. Gam bei saiqoji. 23 Iga kalil une ateqnum deqa iga lan̄ qureq oqsim dia Qotei itqa keresai.

24 Iga degsi unum deqa Qotei na iga aqaryaigwa osiqa iga qa are boleiyosiq Kristus Yesus qarinyonaqa a bosiq iga awaigej. Gam dena Qotei na iga tamo bole une saiqoji qa mergeqnu. Di gago segi kumbra bole na sai. Qotei a Kristus Yesus aqa wau na iga lan̄a awaigej. 25 Agi Qotei a endegsi are qalej. A na Yesus qarinyim bosim moiyim aqa len̄ aisim tamo un̄gasari kalil a qa nan̄go areqalo sin̄gilateqnub qaji nan̄go une taqal waiyosim Qotei aqa minjin̄ kobotqas. Wau dena Qotei na iga tamo bole une saiqoji qa mergeqnu. Aqa wau di a na boleq atsiq iga osorgej. Nami Qotei a tamo nan̄gi qa tariñsokobaiyoqnej. Deqa a nan̄go une qa nan̄gi urur kambatn̄jrosaiqnej. 26 Ariya bini bati endi Qotei na iga endegsi osorgeqnu, a gaigai kumbra bole tin̄tin̄ yeqnu. A na tamo un̄gasari Yesus qa nan̄go areqalo sin̄gilateqnub qaji nan̄gi tamo bole une saiqoji qa minjreqnu di a lan̄a min̄jrosaiqnu. A Yesus aqa wau na nan̄gi tamo bole une saiqoji qa minjreqnu. Dena iga qalieonum, a kumbra bole tin̄tin̄ yeqnu.

27 Deqa tamo yai na aqa segi ñam soqtqa kere? Tamo dego bei sosai. Iga gago segi ñam soqtqajqa kumbra di torei koboej. Gam kiyē na kumbra di koboej? Iga dal anjam dauryqom

gam dena sai. Iga Yesus qa gago areqalo singilatqom gam dena qujai iga gago ñam soqtqajqa kumbra di koboej. <sup>28</sup> Bini iga qalieonum, iga Yesus qa gago areqalo singilatqom gam dena qujai iga Qotei aqa ñamgalaq di tamo bole une saiqoji sqom. Iga dal anjam dauryqom gam dena sai.

<sup>29</sup> Deqa iga kiyersi marqom? Qotei a Juda nanqo segi Qotei e? A sawa bei bei qaji nanqo Qotei sai e? Di sai. A sawa bei bei qaji nanqo Qotei dego. <sup>30</sup> Qotei a segi qujai Qotei bole. Deqa muluñ aiyu qaji tamo nanqi ti muluñ aiyosaieqñub qaji tamo nanqi ti Yesus qa nanqo areqalo singilatqab di Qotei a nanqi kalil turtnjrsim tamo bole une saiqoji qa minjrqas. <sup>31</sup> Iga maronum, iga Yesus qa gago areqalo singilatqom di iga tamo bole une saiqoji sqom. Gago anjam dena iga dal anjam ugeteqnum e? Sai. Iga dal anjam olo singilateqnum.

## 4

### *Abraham a Qotei aqa ñamgalaq di tamo bole soqnej*

<sup>1</sup> Abraham a iga bul mandam tamo. A gago moma utru. Deqa iga a qa kiyersi marqom? <sup>2</sup> Abraham a wau bole yoqnej gam dena a Qotei aqa ñamgalaq di tamo bole soqnej iga degsi marqom e? Sai. Iga degsi maronum qamu Abraham a aqa segi ñam soqtqa kere qamu. <sup>3</sup> Ariya Qotei aqa anjam kiye nenqrenq di unu? Anjam agiende. “Abraham a Qotei qa aqa areqalo singilatej gam dena Qotei na a tamo bole une saiqoji qa minjej.” <sup>4</sup> Iga qalie, tamo a wauqas di a awai oqas. A lanja awai oqasai. A wauosim dena awai oqas. <sup>5</sup> Ariya tamo bei a Qotei aqa ñamgalaq di tamo bole sqa marsimqa a kiyerqas? E marqai. A wauosaiosim Qotei qa aqa areqalo singilatqas. A degyqas di Qotei na a tamo bole une saiqoji qa minjqas. Iga qalie, Qotei na tamo nanqi a qoreiyeqñub qaji nanqi tamo bole une saiqoji qa minjreqnu. <sup>6</sup> Tamo nanqi di wau bole yeqñub kiyo sai kiyo di unqum. Qotei a nanqi tamo bole une saiqoji qa minjreqnu. Yeqnaqa nanqi tulan areboleboleinjqnu. Devit a nami anjam deqaji marej. <sup>7</sup> Agi a endegsi marej, “Qotei a tamo nanqo kumbra uge qa are walyimqa nanqo une kobotetnjrqas di nanqi tulan areboleboleinjqas.

<sup>8</sup> Tamo Koba a tamo nanqo une qa olo bunu are qalqasai di nanqi tulan areboleboleinjqas.”

<sup>9</sup> Deqa iga kiyersi marqom? Tamo muluñ aiyu qaji nanqi segi areboleboleinjqas e? Tamo muluñ aiyosaieqñub qaji nanqi dego areboleboleinjqas e? Od. Nanqi kalil koba na areboleboleinjqas. Agi iga mareqnum, Abraham a Qotei qa aqa areqalo singilatej gam dena Qotei na a tamo bole une saiqoji qa minjej. <sup>10</sup> Ariya Abraham a kiyersi sonaqa Qotei

na a tamo bole une saiqoji qa minjej? A nami muluḡ aiyej kiyo a muluḡ aiyosaisoqnej kiyo? Od, Abraham a muluḡ aiyosaisonaqa Qotei na a tamo bole une saiqoji qa minjej. <sup>11</sup> A muluḡ aiyosaisoqnej bati deqa a Qotei qa aqa areqalo siḡilatej. Deqa Qotei na a tamo bole une saiqoji qa minjej. Osiqa a toqor bei yej. Toqor di agi Qotei na Abraham muluḡ waiyej. Deqa iga endegsi qalieonum, Abraham a tamo kalil muluḡ aiyosaiosib naḡgo areqalo Qotei qa siḡilateqnuḡ qaji naḡgo moma matu. <sup>12</sup> A tamo naḡgi muluḡ aiyeqnuḡ qaji naḡgo moma matu dego. Ariya tamo naḡgi naḡgo jejamu laḡa oqnsib muluḡ aiyeqnuḡ qaji a naḡgo moma matu sai. Tamo naḡgi muluḡ aiyoqnsib olo Abraham aqa kumbra dego dauryeqnuḡ qaji a naḡgo moma matu bole. Gago moma matu Abraham aqa kumbra agiende. A muluḡ aiyosaisosiqa Qotei qa aqa areqalo siḡilatej.

*Tamo unḡasari Qotei qa naḡgo areqalo siḡilateqnuḡ qaji naḡgi iḡgi bole bole oqab*

<sup>13</sup> Nami Qotei na Abraham aqa moma naḡgi ti endegsi minjrej, “E niḡgi mandam kalil enḡwai.” Abraham a dal anjam dauryej deqa Qotei a anjam di marosai. A Qotei qa aqa areqalo siḡilatej deqa Qotei a anjam di marej. Osiqa Abraham a tamo bole une saiqoji qa minjej. <sup>14</sup> Tamo naḡgi dal anjam dauryqab gam dena Qotei na naḡgi iḡgi bole bole enjrqa marej qamu iga Qotei qa gago areqalo siḡilateqnum kumbra di laḡa uloḡej qamu. Qotei aqa anjam marej qaji di dego laḡa uloḡej qamu. <sup>15</sup> Iga qalie, dal anjam unu deqa tamo naḡgi dal anjam gotraḡyeqnabqa Qotei a naḡgo une deqa minjiḡ oqeteqnu. Dal anjam sosai qamu iga na tamo naḡgi endegsi minjrqa keresai qamu, “Niḡgi dal anjam gotraḡyeqnuḡ.”

<sup>16</sup> Qotei a Abraham qa ti aqa moma bunuqna branteqnuḡ qaji naḡgi qa ti are boleiyosiq iḡgi bole bole naḡgi enjrqa marej. Deqa tamo naḡgi Abraham aqa kumbra dauryosib Qotei qa naḡgo areqalo siḡilateqnuḡ qaji naḡgi iḡgi bole bole di oqab. Tamo naḡgi dal anjam ejunub qaji naḡgi segi iḡgi di oqasai. Tamo kalil Qotei qa naḡgo areqalo siḡilateqnuḡ qaji naḡgi dego iḡgi di oqab. Abraham a iga kalil gago moma matu. <sup>17</sup> Agi Qotei aqa anjam bei nami endegsib nenḡrenyeb unu, “O Abraham, e ni gilmem deqa ni tamo unḡasari sawa sawa kalilq di unub qaji naḡgo moma matu sqam.” O ijo was niḡgi quiy. Abraham a Qotei qa aqa areqalo siḡilatej deqa a Qotei aqa ḡamgalaq di gago moma matu unu. Qotei qujai di tamo moreḡo qaji naḡgi olo subq na tigeltnjreqnu. A segi na marnaqa iḡgi iḡgi kalil nami sosai qaji di brantelenej.

<sup>18</sup> Qotei a kiyersim aqa anjam a nami Abraham minjej qaji di dauryqas di Abraham a poi Yosai. Ariya a Qotei qa

aqa areqalo singilatosiq marej, “Bole, Qotei na aqa anjam di dauryqas.” Aqa kumbra dena a tamo ungasari gargekoba sawa sawa kalilq di unub qaji nanjo moma matu brantej. Agi Qotei a nami Abraham endegsi minjej, “Ino moma nanji tulan gargekobaqab.” <sup>19</sup> Abraham a angro saiqoji soqnej. Aqa wausau 100. Deqa aqa singila koboej. Aqa njan Sara a dego tulan qeliej. Deqa a angtotqa keresai. Abraham a di qalieosiq ariya a Qotei qa aqa areqalo singilatqa uratosai. <sup>20</sup> Anjam Qotei na nami minjej qaji a deqa are qalsiq soqnej. A areqalo aiyeltosai. A Qotei qa aqa areqalo singilatosiq aqa nam soqtoqnej. <sup>21</sup> A endegsi qalieej, “Bole, anjam Qotei na nami merbej qaji di a dauryqa kere.” <sup>22</sup> Abraham a degsi Qotei qa aqa areqalo singilatej deqa Qotei na a tamo bole une saiqoji qa minjej.

<sup>23</sup> Anjam di Qotei aqa nenqrenq di unu. Anjam agiende, “Qotei na Abraham a tamo bole une saiqoji qa minjej.” Anjam di Abraham qa segi nenqrenyosai. <sup>24</sup> Iga kalil qa dego anjam di nenqrenyeb. Iga dego Qotei qa gago areqalo singilateqnum deqa Qotei na iga tamo bole une saiqoji qa mergeqnu. Qotei agi gago Tamo Koba Yesus subq na tigeltej qaji a qa gago areqalo singilateqnum. <sup>25</sup> Qotei a Yesus uratonaga jeu tamo nanji na a qalnab moiyej. Qotei na Yesus degyej. Di kiyaga? A gago une kobotetgwajqa deqa. Onaga Qotei na Yesus olo subq na tigeltosiq gam dena iga tamo bole une saiqoji qa mergej.

## 5

### *Qotei na iga tamo bole une saiqoji qa mergej*

<sup>1</sup> Ariya iga Yesus qa gago areqalo singilatam deqa Qotei na iga tamo bole une saiqoji qa mergej. Gago Tamo Koba Yesus Kristus a jeu kobotej deqa iga Qotei ombla are qujaitosim unum. <sup>2</sup> Yesus na gam waqtetgonaga iga a qa gago areqalo singilatam. Bati deqa Qotei a iga qa are boleiyej. Qotei aqa kumbra di iga bini ojsim tigelejunum. Deqa iga Qotei na lan qureq joqsim oqsim dia iga a ombla sqajqa tariqeqnum. Iga deqa tulan areboleboleiqeqnu. <sup>3</sup> Iga deqa segi areboleboleigosai. Iga gulbe eqnum deqa ti areboleboleiqeqnu. Di kiyaga? Iga qalieonum, gulbe dena iga singilatgeqnaqa iga singila na tigelejunum. <sup>4</sup> Iga singila na tigelejunum deqa iga gulbe di gotranyeqnamqa Qotei na iga nugoqnsiq iga qa tulan areareteqnu. Gago kumbra dena iga Qotei na lan qureq joqsim oqwajqa tariqeqnsim unum. <sup>5</sup> Ariya iga lan tariqosaieqnum. Qotei na aqa Mondor Bole iga egej deqa Mondor dena aqa qalaqalaiyo kumbra gago are miligiq di atej unu.

<sup>6</sup> Iga nami Qotei qoreiyo qaji tamo soqnem deqa iga gago segi jejamu aqaryaiyqa keresai. Iga degsi sonamqa Kristus a iga qa moiyej. Qotei a bati giltonaqa a iga qa moiyej. <sup>7</sup> Bole, iga mandam tamo unum deqa iga na tamo bole bei aqaryaiyqa osim a qa moiqasai. Tamo tulan boledamu bei soqnim a qa kiyo iga moiqom. <sup>8</sup> Ariya Kristus a iga bul sai. Iga une tamo sonamqa a iga qa moiyej. Aqa kumbra dena Qotei na iga osorgej, a iga tulan qalaqalaigeqnu. <sup>9</sup> Kristus a moinaqa aqa lej aiyej deqa Qotei a iga tamo bole une saiqoji qa mergej. Deqa iga bole qalieonum, mondonj Qotei a Kristus aqa wau dena iga torei elenqas. Amqa aqa minjin oqwa batiamqa iga so bole sqom. <sup>10</sup> Iga Qotei ti jeu sonamqa aqa Niri a jeu kobotqa marsiq moiyej deqa bini iga Qotei ombla geregere unum. Deqa iga bole qalieonum, Yesus aqa nambile na Qotei a iga torei elenqas. <sup>11</sup> Anjam bei dego unu. Gago Tamo Koba Yesus Kristus aqa singila na iga Qotei ombla geregere unum deqa iga tulan areboleboleigoqnqas.

*Adam a moiyo qa utru, Yesus a nambile qa utru*

<sup>12</sup> Iga qalie, tamo qujai Adam a une atej. Aqa une dena tamo ungasari kalil nanji dego une eleneb. Adam a une ti soqnej deqa a moiyej. Tamo ungasari kalil nanji dego une atoqnsib morenoqneb. <sup>13</sup> Dal anjam a bosaisonaqa tamo ungasari kalil nanji une atoqnsib laqneb. Dal anjam sosai deqa Qotei a nanjo une geregere ubtosaiqnej. <sup>14</sup> Adam a soqnej dena bosiq Moses aqa bati qa tamo ungasari kalil nanji morenoqneb. Bole, dal anjam qujai Adam na gotranjej qaji di tamo bei na gotranjosai. Adam a segi na gotranjej. Ariya moiyo na nanji kalil ojesoqnej.

Adam a Kristus bunuqna bqas qaji a sigitej. <sup>15</sup> Ninji quiy. Qotei a iga qa are boleiyosiq Yesus egej aqa kumbra de ti Adam aqa une ti ombla kerekere sai. Tamo qujai Adam a une atej deqa tamo ungasari gargekoba nanji morenoqneb. Ariya Qotei a olo tamo ungasari gargekoba nanji qa are tulan boleiyosiq tamo qujai Yesus Kristus enjrej. Qotei aqa kumbra dena Adam aqa kumbra tulan bunjejunu. <sup>16</sup> Qotei na iga Yesus egej aqa kumbra de ti Adam aqa une ti ombla kerekere sai. Adam a une qujai yej deqa Qotei na tamo ungasari nanji peginjrsiq nanjo jejamuq di une qametnjrej. Ariya tamo ungasari nanji une gargekoba yoqneb deqa Qotei a olo nanji qa are boleiyosiq Yesus enjrej. Osiqa nanji tamo bole une saiqoji qa minjrej. <sup>17</sup> Tamo qujai Adam a Qotei aqa dal anjam gotranjej deqa tamo ungasari kalil nanji moreneqneb. Ariya tamo qujai Yesus Kristus aqa wau na tamo ungasari Qotei a nanji qa are boleiyeqnu qaji nanji nambile osib mandor kokba gaigai sqab. Tamo ungasari nanji di Qotei na tamo bole

une saiqoji qa minjreqnu. Qotei aqa kumbra dena Adam aqa kumbra tulan bunyejunu.

<sup>18</sup> Deqa ninji quiy. Tamo qujai Adam a dal anjam gotranyej. Aqa kumbra dena Qotei na tamo ungasari kalil nanji peginjroqnsiqa nanjo jejamuq di une qametnjreqnu. Dego kere tamo qujai Kristus a kumbra bole yej. Aqa kumbra dena Qotei a tamo ungasari kalil nanji tamo bole une saiqoji qa minjroqnsiqa nambile enjreqnu. <sup>19</sup> Tamo qujai Adam a Qotei aqa anjam gotranyej. Aqa kumbra dena tamo ungasari gargekoba nanji dego une eleneb. Dego kere tamo qujai Kristus a Qotei aqa anjam dauryej. Aqa kumbra dena tamo ungasari gargekoba nanji tamo bole une saiqoji sqab.

<sup>20</sup> Dal anjam a bonaqa tamo ungasari nanjo une kobaonaqa nanji dal anjam gotranyoqneb. Nanjo une kobaej bati deqa Qotei a olo nanji qa are tulan boleiyej. <sup>21</sup> Une aqa kumbra na moiyo babtosiqa iga singila na taqatgesoqnej. Ariya bini Qotei a iga qa are tulan boleiyeqnu kumbra dena iga olo taqatgejunu. Gago Tamo Koba Yesus Kristus aqa wau na Qotei a iga qa are tulan boleiyeqnsiqa iga tamo bole une saiqoji qa mergeqnu. Kumbra dena iga nambile gaigai sqom.

## 6

### *Iga Kristus beteryosim a koba na moiyoqbullem*

<sup>1</sup> Ariya iga kiyersi marqom? Iga endegsi marqom kiyo, "Unqum, iga une gargekoba yoqnoqom. Yim dena Qotei a iga qa are tulan boleiyeqnoqas." Iga degsi marqom kiyo? <sup>2</sup> Sai bole sai. Iga moiyoqbulosim une aqa kumbra uratem. Deqa iga olo une yoqnoqom e? Sai. <sup>3</sup> Iga Kristus Yesus beteryosim aqa ñam na yanso em. Kumbra dena iga a koba na moiyoqbullem. Ninji di qaliesai kiyo? <sup>4</sup> Iga yanso osim dena iga Kristus beteryosim a koba na moiyoqbullem. Deqa Abu na iga Kristus koba na subq atobulej. Osiqa aqa singila kobaquja na olo Kristus subq na tigeltej. Deqa iga dego a ti nambile bunuj osim kumbra bole dauryeqnoqom.

### *Iga Kristus beteryosim olo subq na tigelqom*

<sup>5</sup> Kristus a moiyej deqa iga a beteryosim a ti moiyoqbullem. A olo subq na tigelej dego kere iga kamba a beteryosim olo subq na tigelqom. <sup>6</sup> Iga qalie, une aqa singila a gago jejamuq di waueqnu. Singila di koboqajqa deqa gago areqalo namij a Kristus ombla namburbasq di moiyej. Deqa bini iga olo une aqa kanqal tamo bul sqasai. <sup>7</sup> Iga moiyo tamo bulem deqa une na iga olo ojqa keresai.

<sup>8</sup> Od, iga Kristus ombla moiyoqbullem deqa iga qalieonum, iga a ombla olo nambile sqom. <sup>9</sup> Iga qalie, Kristus a subq na tigelej deqa a olo bunu moiqa keresai. Moiyo na a olo taqatqa

keresai. <sup>10</sup> A bati qujai qa moiyej. Aqa kumbra dena a na une aqa siŋgila kobotej. Ariya bini a olo ŋambile unu di a Qotei ombla ŋambile unub. <sup>11</sup> Dego kere niŋgi endegsib are qaliy. Niŋgi moiyoqnbuleb deqa niŋgi olo une aqa kaŋgal tamo bul sosai. Niŋgi Kristus Yesus beteryosib Qotei ombla ŋambile unub.

<sup>12</sup> Deqa une a nuŋgo jejamu taqatqa laqnimqa niŋgi na olo saidiy. Niŋgi degyqab di niŋgi nuŋgo jejamu qa areqalo uge uge dauryoqnaqasai. Nuŋgo jejamu agi bunuqna moiqas. <sup>13</sup> Une a nuŋgo siŋga ti baŋ ti taqatqa laqnimqa niŋgi na olo saidiy. Niŋgi degyqab di niŋgi kumbra uge uge dauryoqnaqasai. Niŋgi subq na olo tigelobulosib ŋambile unub deqa niŋgi nuŋgo segi jejamu ti baŋ ti siŋga ti Qotei yibqa a segi na taqatqas. Yim dena niŋgi kumbra bole dauryoqnaqab. <sup>14</sup> Une na niŋgi olo taqatŋwasai. Di kiyaaqa? Niŋgi dal anjam aqa sorgomq di sosai. Qotei a niŋgi qa are boleiyey kumbra di aqa sorgomq di niŋgi unub.

*Iga kumbra bole aqa kaŋgal tamo bul unum*

<sup>15</sup> Od, iga olo dal anjam aqa sorgomq di sosai. Qotei a iga qa are boleiyey kumbra di aqa sorgomq di iga unum. Deqa iga kiyerqom? Iga une yoqnaqom e? Sai bole sai. <sup>16</sup> Niŋgi qalie, niŋgi nuŋgo segi jejamu osib tamo bei yosib aqa anjam dauryoqnaqab di niŋgi aqa kaŋgal tamo sqab. Dego kere niŋgi une dauryoqnaqab di niŋgi une aqa kaŋgal tamo bul sqab. Osib niŋgi morenqab. Ariya niŋgi Qotei aqa kaŋgal tamo sosib aqa anjam dauryoqnaqab di niŋgi tamo bole une saiqoji sqab. Di niŋgi qaliesai kiyo? <sup>17</sup> Bole, nami niŋgi une aqa kaŋgal tamo bul soqnebe. Sonabqa bunuqna Qotei na niŋgi anjam bole mernqonaq qusibqa nuŋgo are miligiq na dauryoqnebe. Qotei a degyey deqa iga na a tulaŋ binjiyoqnaqom. <sup>18</sup> Nuŋgo une na niŋgi tonto talq di breiŋgobulonaq sonabqa Qotei a dena niŋgi olo elenjej. Deqa bini niŋgi kumbra bole aqa kaŋgal tamo bul unub. <sup>19</sup> O ijo was, e mandam tamo nango kumbra qa niŋgi yawo anjam mernqeqnum. Di kiyaaqa? Niŋgi ijo anjam endi geregere poiŋgosai deqa. Nami niŋgi na nuŋgo siŋga ti baŋ ti nangi odnjreqnaqba nangi kumbra jiga ti kumbra uge ti nango kaŋgal tamo bul sosibqa niŋgi kumbra ugeq breiŋgoqnebe. Ariya bini niŋgi na olo nuŋgo siŋga ti baŋ ti minjribqa nangi kumbra bole aqa kaŋgal tamo bul soqnebe. Yim gam dena Qotei na niŋgi aqa segi kumbra boleq di atimqa niŋgi dauryoqnaqab.

<sup>20</sup> Nami niŋgi une aqa kaŋgal tamo bul soqnebe. Bati deqa niŋgi kumbra bole aqa kaŋgal tamo bul sosai. <sup>21</sup> Kumbra uge uge niŋgi nami yoqnebe qaji dena niŋgi aqaryaiŋgosai qnebe. Agi bini niŋgi kumbra deqa jemaŋgeqnu. Kumbra dena tamo

nanġi moiyo gam tureqnu. <sup>22</sup> Ariya nunġo une na ninġi tonto talq di breiġobulonaq sonabqa Qotei a dena ninġi olo elenġ. Deqa bini ninġi Qotei aqa segi kanġal tamo unub. Deqa ninġi inġi boledamu oqab. Inġi boledamu agiende. Qotei na ninġi aqa segi kumbra boleq di atimqa ninġi dauryoqnqab. Osib ninġi nambile gaigai sqab. <sup>23</sup> Une na aqa kanġal tamo nanġi awai enjreġnu. Awai agiende. Nanġi morenġeqnu. Ariya Qotei na iga inġi boledamu laña egeġnu. Inġi boledamu di agi iga nambile gaigai sqom. Nambile di iga gago Tamo Koba Yesus Kristus aqa wau na oqom.

## 7

### *Iga kumbra bunuj dauryoqnqom*

<sup>1</sup> O ijo was, ninġi dal anjam qalie unub deqa e na endegsi mernġwai. Ninġi qalie, tamo a moyosaisoqnmqa dal anjam na a taqatoqnqas. A moyimqa dal anjam na a olo taqatqasai. <sup>2</sup> Deqa uña bei a tamo ti soqnmqa aqa tamo a moyosaisoqnm a tamo bei ombla sqa keresai. Dal anjam na getentejunu. Aqa tamo moyimqa di a na olo tamo bei oqa kere. Dal anjam na getentosai. <sup>3</sup> Deqa aqa tamo soqnm a tamo bei ombla sqas di iga endegsi marqom, a sambala uña. Aqa tamo moyimqa a na olo tamo bei oqa kere. Dal anjam na getentosai. Deqa a na tamo bei oqas di a sambala uña sqasai.

<sup>4</sup> Deqa ijo was ninġi quiy. Ninġi Kristus aqa jejamu beteryosib a ombla morenġeb deqa ninġi olo dal anjam aqa sorgomq di sosai. Ninġi tamo bei agi Kristus subq na tigelej qaji aqa segi tamo unġasari unub. Deqa iga kumbra bole bole Qotei a tulañ areareteġnu qaji di yoqnqom. <sup>5</sup> Nami iga areqalo namij aqa kumbra dauryoqnm. Bati deqa dal anjam na gago banq di gago singaq di gago jejamuq di areqalo uge uge tigelteqnaqa iga une atoqnm. Osim kumbra dena iga moiyo gam turoqnm. <sup>6</sup> Dal anjam na iga tonto talq di breigobulonaq soqnm. Ariya bini iga Kristus ombla moyobulejunum deqa iga olo dal anjam aqa kanġal tamo bul sosai. Iga Qotei waueteġnum. Iga dal anjam nami nenġrenyeb qaji deqa are qalsim Qotei wauetosaieġnum. Mondor na kumbra bunuj iga osorgej deqa iga Qotei waueteġnum.

### *Gago une na iga moyotgej*

<sup>7</sup> E maronum, dal anjam a gago areqalo uge uge tigelteqnaqa iga une atoqnm. Deqa iga kiyersi marqom? Dal anjam a une tamo bulej e? Sai bole sai. Dal anjam na ijo une e osorbeġnu. Osorbosai qamu e une poibosai qamu. Dal anjam a marej, “Ni ino was aqa inġi inġi qa mamaulmaiq.” Degsi marosai qamu mamaul kumbra di uge e degsi poibosai qamu. <sup>8</sup> Ariya dal anjam bej dena une a gam itosiqa ijo are miligiq di



mamaul kumbra gargekoba babtelenjoqnej. Dal anjam bosai qamu une a moiyo bulosiq uliejunu qamu. <sup>9</sup> Nami e Qotei aqa dal anjam qalieosaisosinqa bati deqa e nambile soqnem. Ariya bunuqna Qotei aqa dal anjam ijoq bonaqa ijo une a nambile so bulosiq tigelej. <sup>10</sup> Onaqa dena e moyiem. Dal anjam aqa wau utru agi tamo nanqi nambile enjrqajqa. Ariya e dal anjam dena nambile osai. Dal anjam na e moyiotbej. <sup>11</sup> Di kiyaga? Dal anjam bej dena une a gam itosiq e gisanbej. Kumbra dena une na e moyiotbej.

<sup>12</sup> Deqa iga dal anjam qa kiyersi marqom? Iga endegsi marqom. Dal anjam a bole. A Qotei aqa segi dal anjam. A Qotei aqaq na bej. Dal anjam mutu kalil di Qotei aqa segi anjam. Anjam di bole tintin kalil. <sup>13</sup> Deqa e kiyersi marqai? Dal anjam bole dena e lubsiq moyiotbej degsi marqai e? Sai bole sai. Une na e moyiotbej. Dal anjam bej dena une a gam itosiq e moyiotbej. Dal anjam na une aqa kumbra boleq atnaqa iga unsim qalieem, bole, une a tulan ugedamu.

### *Gago une na iga taqatgejunu*

<sup>14</sup> Iga qalie, dal anjam a Qotei aqa Mondor aqaq na bej. Ariya e areqalo namijq di unum deqa une na e tonto talq di waibobulej unum. <sup>15</sup> Kumbra e yeqnum qaji di aqa utru e poibosai. Kumbra bole e yqajqa arearetbeqnu qaji di e olo yosaieqnum. Ariya kumbra uge e yqajqa arearetbosaieqnu qaji di e olo yeqnum. <sup>16</sup> Kumbra uge e yeqnum qaji di e yqajqa arearetbosaieqnu. Ijo kumbra dena ijo areqalo babteqnu. Ijo areqalo agiende, Qotei aqa dal anjam a bolequja. <sup>17</sup> Deqa e qalieonum, e segi na kumbra uge di yosaieqnum. Une ijo miligiq di unu qaji a na kumbra uge di yobuleqnu. <sup>18</sup> E qalieonum, ijo miligiq di ingi bole bei sosai. E ijo areqalo namij qa maronum. Bole, e kumbra bole yqajqa arearetbeqnu. Ariya e kumbra bole di yosaieqnum. <sup>19</sup> Kumbra bole e yqajqa arearetbeqnu qaji di e yosaieqnum. Kumbra uge e yqajqa arearetbosaieqnu qaji di e olo yeqnum. <sup>20</sup> Kumbra uge e yqajqa arearetbosaieqnu qaji di e olo yeqnum deqa e qalieonum, e segi na kumbra uge di yosaieqnum. Une ijo miligiq di unu qaji a na kumbra uge di yeqnu.

<sup>21</sup> Deqa e kumbra endeqaji uneqnum. E kumbra bole yqajqa arearetbeqnaqa kumbra uge na olo gam getentetbeqnu. <sup>22</sup> Bole, ijo miligiq di e Qotei aqa dal anjam qa tulan arearetbeqnu. <sup>23</sup> Ariya e kumbra endeqaji uneqnum. Une a ijo banq di ijo singaq di ijo jejamuq di wauoqnsiqqa Qotei aqa dal anjam ijo areqaloq di unu qaji di qoto iteqnu. Une di singila koba. Deqa a na e tonto talq di waibobuloqnsiqqa ijo banq ti ijo singa ti ijo jejamu ti di singila na taqateqnu. <sup>24</sup> Gulbe dena e tulan ugetbeqnu! Deqa tamo yai na aqaryaibimqa e ijo jejamu

moiqas qaji endi olo uratqai? <sup>25</sup> Od, e qalieonum. Gago Tamo Koba Yesus Kristus aqa wau na Qotei na aqaryaibimqa e ijo jejamu endi uratqai. Deqa e Qotei tulan binjiyoqnsiy sqai. Bole, e ijo segi areqalo na Qotei aqa dal anjam dauryeqnum. Ariya e ijo areqalo namij na une aqa kumbra dauryeqnum.

## 8

*Kristus a gago une kobotosiqa Qotei aqa Mondor Bole iga egej*

<sup>1</sup> O ijo was kalil, iga Kristus Yesus beteryejunum deqa Qotei na gago jejamuq di olo une qametgwasai. Deqa iga awai uge oqasai. <sup>2</sup> Nambile qa Mondor a Kristus Yesus aqa wau na ninji aqaryaingej deqa une ti moiyo ti na ninji olo taqatngwa keresai. <sup>3</sup> Qotei na aqa segi Niri Yesus qarinyonaqa a une tamo bulosiqa gago une kobotqa bonaqa aqa segi jejamuq di Qotei a gago une aqa awai uge atsiqa dena une aqa singila kobotej. Iga gago areqalo namij na dal anjam dauryqa keresai deqa Qotei na iga degsi aqaryaigej. <sup>4</sup> Deqa bini iga gago jejamu qa areqalo namij na walwelo saieqnum. Iga Qotei aqa Mondor aqa kumbra na walweleqnum. Osim dena iga dal anjam aqa kumbra bole geregere dauryoqnsim kereteqnum.

<sup>5</sup> Tamo nanji areqalo namij aqa kumbra na walweleqnum qaji nanji areqalo namij dauryeqnum. Ariya tamo nanji Mondor aqa kumbra na walweleqnum qaji nanji Mondor aqa areqalo dauryeqnum. <sup>6</sup> Tamo nanji areqalo namij dauryoqngab di nanji morengqab. Ariya tamo nanji Mondor aqa areqalo dauryoqngab di nanji lawo na nambile sqab. <sup>7</sup> Tamo nanji areqalo namij dauryeqnum qaji nanji Qotei ti jeu atoqnsib unub. Di kiyaaqa? Nanji Qotei aqa dal anjam aqa sorgomq di sosai deqa. Nanji dal anjam dauryqa keresai bole sai. <sup>8</sup> Tamo nanji areqalo namij na walweleqnum qaji nanji kumbra Qotei a areareteqnu qaji di dauryqa keresai.

<sup>9</sup> Ariya ninji areqalo namij aqa kumbra na walwelo saieqnum. Qotei aqa Mondor a nungo are miligiq di unu deqa ninji Mondor aqa kumbra na walweleqnum. Tamo a Kristus aqa Mondor ti sqasai di a Kristus aqa tamo sqa keresai. <sup>10</sup> Ninji une ti unub deqa nungo jejamu moiqas. Ariya Kristus a nungo are miligiq di unu deqa ninji Qotei aqa namgalaq di tamo bole une saiqoji unub. Deqa Mondor na ninji nambile engwas. <sup>11</sup> Qotei na aqa Niri Kristus Yesus subq na tigeltej. Qotei aqa Mondor a nungo are miligiq di unu deqa Qotei na nungo jejamu moiqas qaji di dego subq na tigeltosim ninji nambile engwas. Di Mondor aqa singila na ninji nambile engwas.

*Iga Qotei aqa angro tintin unum*

<sup>12</sup> Deqa ijo was, iga areqalo namij aqa kumbra na walwelqasai. <sup>13</sup> Ningi areqalo namij aqa kumbra na walwelqab di ningi morenqab. Ariya ningi Mondor aqa singila na nunjo jejamu aqa kumbra moiyoqab di ningi njambile sqab. <sup>14</sup> Tamo ungasari kalil Qotei aqa Mondor na gam osornjreqnaq walweleqnub qaji nanği Qotei aqa anğro tıntın unub. <sup>15</sup> Qotei na ningi laņa kanğal tamo sqajqa marsiq aqa Mondor ningi enğosai. Ningi laņa kanğal tamo sqab di ningi ulaqab. Qotei na ningi aqa segi anğro tıntın sqajqa marsiq aqa Mondor ningi enğej. Deqa ningi endegsib Qotei meteqnub, “O ni gago Abu.” <sup>16</sup> Mondor a segi gago are miligiq di waueqnu deqa iga endegsi boleq di mareqnum, “Bole, iga Qotei aqa anğro unum.” <sup>17</sup> Iga Qotei aqa anğro unum deqa mondoņ ingi bole bole Qotei a nami iga egwa marej qaji di egwas. İnği di gago was Kristus a ejunu. Kristus a inği di osaisosıqa jaqatın qoboiyej. Deqa iga dego jaqatın qoboiyoqnqom. Qoboiyosim mondoņ iga a ombla inği di osim so bole gaigai sqom.

*Mondoņ Qotei na iga so bole egwas*

<sup>18</sup> Mondoņ Qotei na so bole di babtosim iga egwas. E are qalonum, so bole de ti jaqatın iga bini eqnum qaji de ti ombla kerekere sai. So bole dena gago jaqatın kalil tulaņ bunyesqas. <sup>19</sup> Mondoņ Qotei na aqa segi anğro nanği babtelenqas. Nanği babtqajqa bati di Qotei a nami atej. İnği inği kalil Qotei a gereiyelenej qaji nanği na bati di unqajqa deqa tariņoqnsib njam atoqnsib endegsib nenemeqnub, “Bati gembu bati di brantqas?” <sup>20</sup> Bini inği inği kalil nanği di ugeosib unub. Nanjo segi areqalo na nanği ugeosai. Qotei a segi na nanği ugetnjrej. Deqa kumbra bole bole Qotei na mondoņ nanği enjrğas qaji deqa tariņoqnsib unub. <sup>21</sup> Qotei na inği inği kalil di nanği ugetnjrsiq tonto talq di breinjrobulej unub. Ariya mondoņ bati Qotei a nami atej qaji di brantımqa a na inği inği kalil di olo boletnjrimqa nanği aqa anğro nanği ti koba na tulaņ bole sqab.

<sup>22</sup> Iga qalie, inği inği kalil Qotei a gereiyelenej qaji nanği jaqatın koba obuloqnsib akam ti unub. Nanği nami jaqatın oqneb agi bini oqnsib unub. Unğa a anğrotqa osiq jaqatın eqnu dego kere. <sup>23</sup> İnği inği kalil di nanği segi akamosai. Iga Qotei aqa Mondor ejunum qaji iga dego jaqatın oqnsim akamoqnsim unum. Qotei na aqa Mondor iga egej deqa iga qalieonum, a olo so tulaņ boledamu dego iga egwas. Osim mondoņ a boleq di mergwas, “Ninği ijo anğro kalil.” Iga bati di brantqajqa deqa tariņoqnsim unum. Bati di brantımqa Qotei na gago jejamu bulyetgosim jejamu bunuj egwas. <sup>24</sup> Qotei a iga elenej deqa bini iga jejamu bunuj di oqajqa tariņoqnsim unum. Iga degyeqnum. Di kiyauqa? Iga jejamu bunuj di

osaiunum deqa. Tamo bei a inġi bole bei oqas di a kiyaaq inġi deqa olo tarinqas? <sup>25</sup> Iga qalie, iga jejamu bunuj di osaiunum deqa iga mondoŋ oqom. Deqa bini iga gulbe qoboioqnsim tarinqnsim unum.

<sup>26</sup> Iga sinġila saiġoji unum deqa Qotei aqa Mondor na iga aqaryaigeqnu. Iga inġi kiye qa pailyqajqa di iga geregere qaliesai. Iga pailyqajqa medabu gulbeigeqnaqa gago are miligiq na akamoqnsim palyeqnum. Deqa Mondor a segi na iga aqaryaigwa osiqa iga qa palyeqnu. <sup>27</sup> Qotei agi tamo nanġo are miligi uneqnu qaji a Mondor aqa areqalo qalieeqnu. Deqa a na Mondor minjeqnaq quoqnsiq aqa segi tamo unġasari nanġi qa palyeqnu.

<sup>28</sup> Iga qalieonum, tamo kalil Qotei qalaqalaiyeqnu qaji nanġi Qotei na geregereinjreġnu. A nami nanġi elenqa osiq metnjrej deqa kumbra bei na nanġi ugetnjrqa keresai. Kumbra kalil nanġoq di branteqnu qaji dena nanġi olo boletnjreġnu. <sup>29</sup> Tamo kalil Qotei a nami nanġi qa qalieej qaji nanġi di a na giltnjrej dego. Nanġi aqa Njiri Yesus a bulosib aqa segi kumbra bole dauryqajqa deqa osiq nanġi giltnjrej. Gam dena Yesus a Qotei aqa anġro gargekoba nanġo was matu sqas. <sup>30</sup> Ariya tamo kalil Qotei na giltnjrej qaji nanġi di a na metnjrej dego. Tamo kalil a na metnjrej qaji nanġi di a na tamo bole une saiġoji qa minjrej dego. Tamo kalil a na tamo bole une saiġoji qa minjrej qaji nanġi di a na aqa segi so bole enjrej dego.

*Gulbe bei na Qotei aqa qalaqalaiyo kumbra getentqa keresai*

<sup>31</sup> O ijo was, Qotei na kumbra bole kalil di babteqnu deqa iga kiyersi marqom? Qotei na iga areigeqnu deqa tamo yai na iga olo jeutgwas? Tamo dego bei sosai. <sup>32</sup> Qotei na aqa segi Njiri Yesus getentosai. A na Yesus qarinyonaq iga kalil qa bosiq moiyej. A na aqa segi Njiri iga egej deqa iga qalieonum, a na inġi bole kalil dego iga egoqnas.

<sup>33</sup> Qotei na iga giltgej deqa tamo yai na gago jejamuq di olo une qametgwas? Tamo dego bei sosai. Qotei a segi na iga tamo bole une saiġoji qa mergej. <sup>34</sup> Deqa tamo yai na mergimqa iga gago une aqa awai uge olo oqom? Tamo dego bei sosai. Kristus Yesus a moisiq olo subq na tigelej. Deqa bini a Qotei aqa baŋ woq di awesosiqa iga qa Qotei palyeqnu. <sup>35</sup> Kristus a segi na iga tulaŋ qalaqalaigeqnu. Deqa tamo yai na Kristus aqa qalaqalaiyo kumbra di olo getentimqa a na iga qalaqalaigwasai? Tamo dego bei sosai. O ijo was, iga gulbe osimqa kiyo, jaqatiŋ osimqa kiyo, tamo qudei na iga ugeugeigibqa kiyo, iga mam koba osimqa kiyo, gara saigimqa kiyo, kumbra uge bei na ugetgimqa kiyo, qoto bei gagoq di brantimqa kiyo Kristus a deqa iga qalaqalaigwasai e? Sai.

<sup>36</sup> Bole, inġi uge uge di gagoq di brantoqnqab. Agi Qotei aqa anjam bei nami endegsib nenġrenyeb unu, “O Qotei, iga ino segi tamo unġasari unum deqa bati gaigai jeu tamo nanġi na iga lugoqnsib moiyyotgeqnu.

Nanġi iga kaja du du bul edegosib iga lugwajqa laqnu.”

<sup>37</sup> Kristus na iga qalaqalaigej deqa inġi uge uge kalil di gagoq di brantoqnqas di unġum. A na gaigai iga sinġilatgeqnaqa iga qoto bunyoqnsim tigelejunum. <sup>38-39</sup> Od, Qotei na iga tulaġ qalaqalaigeqnu. Deqa e endegsi ijo are sinġilatosisim qalieonum, inġi bei na Qotei getentqa keresai. Yim a na iga qalaqalaigwasai. Moiyo ti nambile ti laġ anġro nanġi ti mondor sinġila nanġi ti inġi inġi bini unub qaji nanġi ti inġi inġi bunuqna brantelenqab qaji nanġi ti inġi inġi sinġila ejunub qaji nanġi ti inġi inġi laġ goge di unub qaji nanġi ti inġi inġi mandam sorgomq di unub qaji nanġi ti inġi inġi Qotei na gereiyelenġej qaji nanġi ti kalil dena Qotei getentqa keresai. Yim a na iga qalaqalaigwasai. Gago Tamo Koba Kristus Yesus aqa sinġila na Qotei na gaigai iga qalaqalaigoqnsim sqas.

## 9

### *Pol a Israel nanġi qa are gulbeiyooqnej*

<sup>1</sup> E Kristus aqa tamo unum deqa e ninġi anjam bole mernġeqnum. E gisaġ anjam mernġosaieqnum. Mondor Bole na e areqalo ebeqnu deqa e qalieonum, ijo anjam endi bole. <sup>2</sup> E gaigai are tulaġ gulbeibeqnaqa are koba qaleqnum. <sup>3</sup> Osim endegsi pailyeqnum, “O Kristus, ni na e torei taqal waibosisim ijo was agi Jekop aqa moma nanġi olo kamba elenġame.” E degsi pailyeqnum. <sup>4</sup> Ijo was nanġi di Israel tamo unub. Qotei na nanġi aqa segi anġro qa giltinġrej. A na louqajqa kumbra ti aqa segi rianġ ti aqa anjam nami sinġilatej qaji de ti aqa dal anjam ti nanġi enġrej. Osiqa minġrej, “Mondonġ e na ninġi inġi bole bole enġwai.” <sup>5</sup> Nanġo moma utru nanġi nġam koba ti soqneb. Nanġoq dena Kristus a nambabej. Kristus a segi Qotei. A inġi inġi kalil nanġo gate. Deqa iga bati gaigai aqa nġam soqtoqnqom. Bole.

### *Qotei a Israel nanġoq di kumbra kiye yej?*

<sup>6</sup> Qotei a nami ijo was nanġi di inġi bole bole enġrqa marej. Ariya a na inġi di nanġi enġrosai. Deqa iga endegsi marqom kiyo, “Qotei aqa anjam ulonġej”? Eo, iga degsi marqasai. Tamo kalil Israel nanġo lenġ na nambabeb qaji nanġi Israel tamo tintinġ sai. <sup>7</sup> Bole, nanġi Abraham aqa lenġ na nambabeb. Ariya nanġi kalil Abraham aqa anġro tintinġ sai. Qotei a nami Abraham minġej, “Ino anġro mel Aisak aqa lenġ na qujai ino anġro tintinġ nanġi brantqab.” <sup>8</sup> Anjam di aqa utru agiende. Tamo nanġo ai

abu na nanŋi ɲambabtnjrɔqab dena nanŋi Qotei aqa anŋro tintin brantqasai. Tamo nanŋi Qotei aqa anjam nami marej qaji di nanŋo areqaloq di singilatqab dena qujai nanŋi Abraham aqa anŋro tintin brantqab. <sup>9</sup> Agi Qotei na Abraham anjam endegsi minjej, “Bati e nami atem qaji di brantimqa e olo inoq botqa ino ɲaun Sara a anŋro mel oqas.”

<sup>10</sup> Qotei aqa anjam bei dego unu. Rebeka a aqaratonacaq aqa anŋro mel aiyel Eso Jekop wo nanŋi ɲambabeb. Nanŋo abu agi gago moma utru Aisak. <sup>11-12</sup> Ariya Qotei na anŋro mel qujai segi giltej. A anŋro di aqa kumbra bole bei qa are qalsiq giltosai. A segi na metosiq giltej. Deqa iga qalieonum, Qotei a gaigai aqa segi areqalo dauryoqnsiq tamo nanŋi giltjnre-qnu. Deqa Rebeka aqa anŋro aiyel nanŋi di ɲambabosaisosib kumbra bole ti kumbra uge ti yosaisonabqa Qotei na Rebeka endegsi minjej, “Anŋro namo ɲambabqas qaji a na anŋro bunu ɲambabqas qaji aqa sorgomq di sosim a kaɲgalyoqɲqas.” <sup>13</sup> Agi Qotei aqa anjam bei nami endegsib nenŋrenyeb unu, “E Jekop qalaqalaiyeqnum. E Eso qalaqalaiyosaieqnum.”

<sup>14</sup> Deqa iga kiyersi marqom? Qotei a kumbra uge yej degsi marqom e? Sai. Iga degsi marqasai bole sai. <sup>15</sup> Agi Qotei a nami Moses endegsi minjej, “E tamo bei qa are boleibqa marsiy are boleibqas. E tamo bei qa dulqajqa are soqnim dulqai.” <sup>16</sup> Deqa ijo was ninŋi quiy. Qotei a tamo bei giltqas di a aqa segi areqalo na tamo deqa dulosim giltqas. A na tamo di aqa kumbra bole ti aqa are bole ti deqa osim giltqasai. <sup>17</sup> Agi a nami Isip nanŋo mandor koba a qa dulqa uratosiqa endegsi minjej, “E ijo singila kobaquja ni osormitqa tamo unŋasari kalil nanŋi unsib sawa sawa kalilq di ijo ɲam mare mare laqɲqab. Utru deqa e ni mandor koba atem.” Qotei aqa anjam di nami nenŋrenyeb unu. <sup>18</sup> Deqa ijo was, iga endegsi qalieonum. Qotei a tamo bei qa dulqa are soqnim a tamo deqa dulqas. Ariya a tamo bei aqa areqalo getentqa are soqnim a getentqas.

<sup>19</sup> Ariya ninŋi e endegsib merbqab, “Qotei a kumbra degyeqnu deqa a kiyaaqo olo iga une ti qa mergeqnu? Qotei a gaigai aqa segi areqalo dauryeqnu deqa tamo yai a Qotei aqa areqalo di olo uratqa kere? Tamo dego bei sosai.” <sup>20</sup> O tamo, ni tamo kiyero deqa ni Qotei degsi ɲirinɲtam? Tamo bei a web gereiyim web na tigelosim endegsi minjqa kiyoo, “Ni kiyaaqo e degsi gereibonum?” A degsi minjqa keresai. <sup>21</sup> Web gereiyoo tamo a aqa segi areqalo na mandam onŋol aiyel osimqa web aiyel gereiyqas. Web bei tulaɲ boledamu gereiyqas. Di inŋi goiqajqa. Ariya web bei bolesai laɲa wau qudei qa gereiyqas. Web gereiyoo tamo a degyqas di a kumbra uge yqo e? Sai. A kumbra bole yqo.

<sup>22</sup> Qotei a dego kumbra di yeqnu. Agi a na aqa minjin boleq ateqnu. Di kiyaaqa? Tamo ungasari nanngi aqa singila qalieqajqa deqa. Tamo ungasari Qotei a nanngi qa minjin oqeteqnu qaji nanngi padalqa gamq di unub. Ariya a na nanngi urur padalt-njrosaieqnu. A nanngi qa tariñsokobaiyeqnu. <sup>23</sup> A degyeqnu. Di kiyaaqa? Tamo ungasari a nanngi qa duleqnu qaji nanngi aqa so bole qalieqajqa deqa. Aqa so bole di tulan boledamu. Nanngi aqa so bole di oqajqa deqa a na nami giltnjrej. <sup>24</sup> Tamo ungasari Qotei a nanngi qa duleqnu qaji nanngi di agi iga. A na iga metgej. A Juda nanngo segiq dena iga metgosai. A sawa bei bei qaji nanngoq dena dego iga metgej. <sup>25</sup> Agi Hosea a nami Qotei aqa medabu osiqa anjam bei endegsi nenngrenyej, “Tamo nami ijo tamo sosai qaji nanngi di e na olo minjrqai, ‘Ninngi ijo segi tamo unub.’ Tamo nami e na qalaqalainjrosai oqnem qaji nanngi di e na olo qalaqalainjrqai. <sup>26</sup> E nami sawa bei bei qaji nanngi endegsi minjrem, ‘Ninngi ijo tamo sai.’ Ariya bunuqna e na nanngi endegsi minjrqai, ‘Ninngi ijo segi angro unub. Agi e Qotei nambile unum qaji.’”

<sup>27</sup> Aisaia a dego Qotei aqa medabu osiqa Israel nanngi qa are qalsiq anjam endegsi marej, “Israel nanngo moma nanngi ulul bul tulan gargekobaqab. Ariya nanngo ambleq dena Qotei a tamo quja quja segi elenqas. <sup>28</sup> Od, Tamo Koba a na mandamq endi tamo ungasari nanngi urur n̄olawotnjrqas.” <sup>29</sup> Aisaia a anjam bei dego endegsi marej, “Qotei singila koba ti unu qaji a na iga quja quja uratgonaq iga bole soqnem. A na iga padaltgosai. Padaltgej qamu iga Sodom ti Gomora ti bulosim kalil padalekriterem qamu.”

### *Israel nanngi Qotei qa nanngo areqalo singilatosa*

<sup>30</sup> Deqa iga kiyersi marqom? Iga endegsi marqom. Sawa bei bei qaji nanngi tamo bole une saiqoji sqajqa gam n̄amosaioqneb. Ariya nanngi gam di iteb. Gam agiende. Nanngi Yesus qa nanngo areqalo singilateqnu gam dena nanngi tamo bole une saiqoji unub. <sup>31</sup> Ariya Israel nanngi Moses aqa dal anjam dauryqajqa waukobaoqneb. Nanngi are qaloqneb, “Gam dena iga Qotei aqa n̄amgalaq di tamo bole une saiqoji sqom.” Ariya nanngi dal anjam dauryoqneb gam dena nanngi tamo bole une saiqoji sosai. <sup>32</sup> Di kiyaaqa? Nanngi tamo bole une saiqoji sqajqa marsib Yesus qa nanngo areqalo singilatqa urateb deqa. Nanngi maroqneb, “Iga segi waukobaosim dena iga tamo bole une saiqoji sqom.” Nanngi deqsib maroqnsib tal ai utru quraqyoqnsib mangalqneb. <sup>33</sup> Agi Qotei aqa anjam bei nami endegsib nenngrenyej unu, “Ninngi quiy. E na tal ai utru bei osiy tal singilatqajqa deqa Saion qureq di tigeltit sqas. Tal ai utru di tamo nanngi quraqyosib mangalqab. Ariya

tamo nanġi tal ai utru deġa nanġo areqalo sinġilatqab di nanġi jemainjrqsai.”

## 10

### *Israel nanġi Qotei aqa kumbra qaliesai*

<sup>1</sup> O ijo was, e Israel nanġi qa are koba qaloqnsim endegsi pailyeqnum, “O Qotei, ni na Israel nanġi elenġame.” <sup>2</sup> E qalieonum, Israel nanġi Qotei qa tulaġ sinġilaeqnum. Ariya nanġi powo na degyosaieqnum. <sup>3</sup> Nanġi Qotei aqa nġamgalaq di tamo bole une saiqoji sqajqa gam qaliesai. Deġa nanġi nanġo segi sinġila na tamo bole une saiqoji sqajqa waueqnum. Nanġi Qotei aqa gam na tamo bole une saiqoji sqajqa urateqnum. <sup>4</sup> Iga qalie, Kristus a Moses aqa dal anjam kalil keretekritej. Deġa tamo unġasari kalil Kristus qa nanġo areqalo sinġilateqnum qaji nanġi Qotei aqa nġamgalaq di tamo bole une saiqoji unub.

<sup>5</sup> Israel nanġi tamo bole une saiqoji sqa marsibqa dal anjam dauryeqnum. Moses a nami nanġi qa osiqa anjam endegsi nenġrenġeyj, “Tamo a dal anjam mutu kalil torei dauryekritqas di a nġambile sqas.” Moses a anjam degsi nenġrenġeyj. <sup>6</sup> Ariya tamo nanġi Kristus qa nanġo areqalo sinġilateqnum qaji nanġi Qotei aqa nġamgalaq di tamo bole une saiqoji unub. Deġa Moses a nanġi qa osiqa anjam endegsi nenġrenġeyj, “Niġi nunġo segi are miligiq na endegsib maraib, ‘Yai a lan qureq oqsim Kristus osim mandamq osi aiqas?’ ” <sup>7</sup> Moses a olo anjam bei deġo endegsi nenġrenġeyj, “Niġi endegsib maraib, ‘Yai a moiyo qureq aisim Kristus olo subq na tigeltqas?’ ” <sup>8</sup> Anjam di aqa utru agiende, “Qotei aqa anjam a jojom di unu. A isaq di sosai. A nunġo medabuq di unu. A nunġo are miligiq di deġo unu.” O ijo was, tamo nanġo areqalo Yesus qa sinġilatqajqa anjam di agi iġa mare mare laqnum. <sup>9</sup> Deġa niġi nunġo medabu waqtosib Yesus a segi qujai Tamo Koba unu degsib boleq di marij. Osib Qotei a Yesus subq na olo tigeltej anjam di nunġo are miligiq di sinġilatiy. Niġi degyqab di Qotei na niġi elenqas. <sup>10</sup> Gago are miligiq na iġa Yesus qa gago areqalo sinġilateqnum deġa Qotei na iġa tamo bole une saiqoji qa mergeqnu. Gago medabu na iġa Yesus aqa nġam soqtoqnsim boleq di mareqnum deġa Qotei na iġa elenqnu.

<sup>11</sup> Agi Qotei aqa anjam bei nami endegsib nenġrenġeyb unu, “Tamo nanġi Kristus qa nanġo areqalo sinġilatqab di nanġi jemainjrqsai.” <sup>12</sup> Od, iġa Juda ti Grik ti kalil kerekere unum. Kristus a gago kalil qa Tamo Koba. Deġa a na tamo kalil a metoqnsib pailyeqnum qaji nanġi tulaġ geregereinjreġnu. <sup>13</sup> Agi Qotei aqa anjam bei endegsi unu, “Tamo kalil Tamo Koba aqa nġam metoqnsib pailyeqnum qaji nanġi a na elenqas.”



<sup>14</sup> Ariya tamo nanɣi Kristus qa nanɣo areqalo siŋgilatqasai di nanɣi kiyersib a metosib paillyqab? Nanɣi aqa anjam quqwasai di nanɣi kiyersib a qa nanɣo areqalo siŋgilatqab? Anjam palonto tamo nanɣi Kristus aqa anjam palontqasai di tamo nanɣi kiyersib aqa anjam quqwab? <sup>15</sup> Kristus na anjam palonto tamo nanɣi qarinjrqasai di nanɣi kiyersib aqa anjam palontqab? Di keresai kalil. Ariya anjam palonto tamo nanɣi agi beqnu. Qotei aqa anjam bei nami endegsib nengrenyeb unu, “Anjam palonto tamo nanɣi anjam bole osi beq nabqa tamo unɣasari nanɣi tulan areboleboleinjreqnu.”

*Israel nanɣi Qotei aqa anjam bole dauryosaieqnu*

<sup>16</sup> Tamo unɣasari kalil nanɣi Kristus aqa anjam bole di dauryeqnu e? Sai. Agi Aisaia a nami endegsi marej, “O Tamo Koba, tamo quja quja segi gago anjam nanɣo areqaloq di siŋgilateqnu.” <sup>17</sup> Deqa ijo was, iga qalieonum, iga gago dabkala na Qotei aqa anjam quqwom gam dena iga gago areqaloq di siŋgilatqom. Anjam iga queqnum qaji di agi Kristus aqa medabuq na branteqnu.

<sup>18</sup> Ariya e ninɣi endegsi nenemɣwai. Israel nanɣi Kristus aqa anjam bole di nami quosai kiyo? Sai. Nanɣi quoqneb. Agi nengrenj endegsi unu, “Qotei aqa anjam di gilsiq sawa sawa kalil keretonaqa tamo unɣasari kalil nanɣi quoqneb.”

<sup>19</sup> Deqa e ninɣi olo nenemɣwai. Israel nanɣi anjam di aqa utru poinjrosai kiyo? Sai. Nanɣi poinjrej. Agi Moses a nami Qotei aqa anjam bei endegsi marej, “Sawa bei bei qaji nanɣi ñam saiqoji unub. Nanɣi tamo bolesai. Nanɣi e qa qaliesai dego. Ariya e na nanɣi elenqai. Osiy ijo kumbra dena e na Israel nanɣo are ugetetnjrit nanɣi njirinjab.” <sup>20</sup> Aisaia a dego nami sawa bei bei qaji nanɣi qa osiq Qotei aqa anjam endegsi siŋgila na marej, “Tamo nanɣi e qa ñamosaiqneb qaji nanɣi e itbeb. Tamo nanɣi e qa marosaiqneb qaji nanɣi e nubeb.” <sup>21</sup> Ariya Aisaia a olo Qotei aqa medabu osiqa Israel nanɣi qa endegsi marej, “E bati gaigai nanɣi qa tariŋoqnsim metnjreqnam nanɣi olo diqoqnsib ijo anjam gotranjyeqnu.”

## 11

*Qotei a tamo quja quja segi elenqnsiq olo gargekoba urat-njreqnu*

<sup>1</sup> Deqa e ninɣi endegsi nenemɣwai. Qotei na aqa segi tamo unɣasari agi Israel nanɣi qoreinjrej e? Sai. E dego Israel tamo. E Abraham aqa moma. E Benjamin aqa len na ñambabem.

<sup>2</sup> Qotei na Israel nanɣi qoreinjrosai. Nanɣi aqa segi tamo unɣasari unub. A nami nanɣi qa qalieosiq giltjrej. Agi Elaija aqa anjam bei nengrenj di unu. Aqa anjam di ninɣi qaliesai kiyo? Elaija a Israel nanɣo kumbra uge qa are qalsiq endegsi

Qotei pailyej, <sup>3</sup> “O Tamo Koba, nanġi na ino medabu o qaji tamo nanġi ñumelenoqnsib ino atra bijal niñaqyeqnu. E segi qujai ni daurmeqnum deqa nanġi na e lubqa laqnu.” Elaija a Qotei degsi pailyej. <sup>4</sup> Onaqa Qotei na kamba Elaija kiyersi minjej? A endegsi minjej, “Ni segi e daurbosai. Ijo tamo 7,000 nanġi dego e daurbeqnu. Nanġi sinġa pulutosib gisañ qotei Bal a qa louosaieqnu.” Qotei na Elaija degsi minjej.

<sup>5</sup> Dego kere bini Qotei a Israel tamo quja quja segi elenjoqnsiq olo gargekoba uratnjreqnu. Tamo nanġi a na elenjoqnu qaji di a nanġi qa are boleiyonaq giltnjrej. <sup>6</sup> A nanġo wau bole bei qa are qalsiq nanġi giltnjrosai. Nanġi wau bole yonab a deqa are qalsiq nanġi giltnjrej qamu a nanġi qa are boleiyej aqa kumbra di lanġa ulonej qamu.

<sup>7</sup> Deqa iga kiyersi marqom? Iga endegsi marqom. Israel nanġi tamo bole une saiqoji sqajqa waueqnu ugeinjroqnej. Ariya Qotei na Israel nanġi qudei aqa segi qa marsiq giltnjrej. Deqa nanġi aqa ñamgalaq di tamo bole une saiqoji unub. Israel nanġi gargekoba Qotei na olo areqalo getentetnjroqnej.

<sup>8</sup> Nanġi qa anjam bei nami endegsib nenġrenyeb unu, “Qotei na nanġi nanaritnjrsiq nanġo ñamdamu ti dabkala ti torei getentetnjrej. Nanġi nami degsib soqneb bosiq agi bini degsib unub.” <sup>9</sup> Devit a dego nanġi qa osiq endegsi marej,

“Nanġi inġi uyqa korooqnbqa gulbe gargekoba nanġoq di brantoqnsim kakan bul nanġi kabutnjroqnas.

Osim sil bul nanġo kakro qainyetenjrsim nanġi uneq breinjrim nanġo sinġa meninq di tanjosib ululojosib awai ugedamu oqnaq.

<sup>10</sup> Nanġo ñamdamu dego getenjrim sawa unqajqa keresaiinjrim sqab.

Soqnb Qotei na nanġo qore tanu pulutetnjrim nanġi tingiqa keresai. Nanġi gaigai degsib sqab.”

### *Qotei na sawa bei bei qaji nanġi olo elenjoqnu*

<sup>11</sup> Deqa ijo was, e ninġi endegsi nenemngwai. Israel nanġi ululoneb deqa nanġi torei padalqab e? Sai bole sai. Israel nanġi Qotei qoreiyeb deqa Qotei a olo sawa bei bei qaji nanġi elenjoqnu. Israel nanġi Qotei aqa kumbra di unsibqa are ugeinjrim aqaq olo bqajqa deqa are qalsiq sawa bei bei qaji nanġi elenjoqnu. <sup>12</sup> Israel nanġi Qotei qoreiyeb gam dena Qotei na olo tamo unġasari mandamq endi unub qaji nanġi so bole enjreqnu. Od, Israel nanġi Qotei aqa anjam urateb gam dena Qotei na olo sawa bei bei qaji nanġi so bole enjreqnu. Deqa iga bole qalieonum, mondon Israel nanġi olo puluosib Qotei aqaq babqa gam dena Qotei na nanġi ti sawa bei bei qaji kalil nanġi ti so tulan boledamu enjrqas.

<sup>13</sup> O sawa bei bei qaji ningi e na anjam endegsi merngit quiy. Qotei na e qarınbej deqa e nuńgo ambleq di waueqnum. E ijo wau deqa tulań areboleboleibeqnu. <sup>14</sup> Ijo are koba endegsi unu. E na ijo was Israel nango areqalo tigeltetnjritqa kumbra bole bole Qotei a ningi engeqnu qaji di nangi dego oqajqa maribqa Qotei na nangi qudei elenqas. <sup>15</sup> Qotei na Israel nangi walinjrej gam dena a na olo tamo ungasari gargekoba mandamq endi unub qaji nangi elenqas jeu kobotej. Deqa iga bole qalieonum, Qotei na Israel nangi elenqas gam dena a na tamo ungasari gargekoba nangi olo subq na tigeltnjrqas.

<sup>16</sup> Iga bem sum oqnsim dena bem gereiyqnsim potoqnsim taqal bei Qotei atraiyeqnum. Deqa bem kalil dego Qotei aqa segi bem. Nam aqa jirim di Qotei aqa segi jirim. Deqa nam aqa dani di dego Qotei aqa segi dani. <sup>17</sup> Israel nangi nam oliv qure qaji aqa dani bul unub. Dani qudei Qotei na gıngenjnrsıqa breinjrej. Ariya ningi sawa bei bei qaji unub deqa ningi nańu qaji oliv aqa dani bul unub. Dani di Qotei na olo elenqas nam oliv qure qaji aqa qoboq di betertnjrej unub. Dani di agi ningi segi. Dani Qotei na gıngenjnrsıq breinjrej qaji nango sawa di agi ningi na olo eb. Deqa bini ningi nam oliv qure qaji aqa dani nangi ti namur bole oqnsib unub. <sup>18</sup> Deqa ningi diqosib endegsib are qalaib, “Iga na nam oliv qure qaji aqa dani qudei nangi bunjreqnum.” Ningi diqwab di ningi mati endegsib are qaliy. Nam oliv aqa jirim a na ningi namur engeqnu. Ningi na jirim di namur yosaieqnu.

<sup>19</sup> Ariya ningi na kamba e endegsib merbqab, “Qotei na dani qudei gıngenjnrsıq nangi breinjrsıqa olo iga osıqa nango limeq di iga betertgej unum.” <sup>20</sup> Nuńgo anjam di bole. Ariya Qotei aqa kumbra di aqa utru agiende. Israel nangi Qotei qa nango areqalo singilatosai deqa Qotei na nangi gıngenjnrsıqa breinjrej. Ariya ningi Qotei qa nuńgo areqalo singilateqnu deqa Qotei na ningi olo elenej. Di nuńgo segi wau bole bei na sai. Deqa ningi nuńgo segi nam soqtaib. Ningi ulaoiy. <sup>21</sup> Ningi are qaliy. Nam oliv qure qaji aqa dani di Qotei na gıngenjnrsıqa breinjrej. Deqa ningi nuńgo segi nam soqtosib diqwab di a na ningi dego gıngengosim breıngwas. <sup>22</sup> Ningi geregere are qaliy. Qotei na tamo qudei nangi kumbra bole enjreqnu. Osıqa olo tamo qudei nangi gulbe enjreqnu. Tamo nangi Qotei qoreiyosib uloneb qaji nangi di a na gulbe enjreqnu. Ariya ningi Qotei aqa kumbra bole geregere ojgab di a na kumbra bole di ningi engoqnas. Saiqas di a na ningi dego gıngengosim breıngwas. <sup>23</sup> Dani qudei nangi nami nam oliv qure qaji di sonab Qotei na nangi gıngenjnrsıq breinjrej. Ariya nangi are bulyosib Qotei qa nango areqalo singilatqab di a na nangi olo joqsim nam oliv qoboq di betertnjrqas. Od, Qotei na nangi

olo betertnjrqa kere. <sup>24</sup> Ningi qalie, nami ningi nañu qaji oliv aqa dani soqneb. Sonabqa Qotei na ningi dena giñgenḡosiqa joqsi bosiq ñam oliv qure qaji aqa qoboq di betertñgej. Ñam oliv qure qaji di nunḡo ñam utru tintiñ sai. Deqa iga bole qalieonum, bunuqna Qotei na ñam oliv qure qaji aqa segi dani nanḡi olo joqsim bosim nanḡo segi limeq di betertnjrqa.

*Qotei a tamo unḡasari kalil nanḡi qa are boleiyosim elenqajqa are koba unu*

<sup>25</sup> O ijo was kalil, ningi diqoqnsib endegsib maraib, “Iga powo koba ti unum.” Ningi degaib. E uli anjam bei mernḡwai. Israel gargekoba nanḡo areqalo getenñjrejunu. Nanḡi degsib soqñib sawa bei bei qaji tamo unḡasari Qotei na nami giltñjrej nanḡi di kalil elenḡekritosim kereamqa bati deqa a na Israel nanḡo areqalo olo waqtetnjrqa. <sup>26</sup> Gam dena Qotei na Israel kalil nanḡi elenqas. Agi Qotei aqa anjam bei nami endegsib nenḡrenyeb unu, “Aqaryainḡo Tamo Koba a Jerusalem dena tigelosim bosim Jekop aqa moma kalil nanḡi are bulyetnjrim nanḡi ijo anjam gotranḡqajqa kumbra di olo uratqab. <sup>27</sup> Yimqa bati deqa e nanḡi koba na anjam qosisiy dena nanḡo une kalil kobotetnjrqi.” Qotei aqa anjam nami degsib nenḡrenyeb. <sup>28</sup> Israel nanḡi Yesus aqa anjam bole qoreiyeqñub deqa nanḡi Qotei ti jeu atoqnsib unub. Deqa Qotei na nanḡi kamba uratñjroqnsiq olo ningi sawa bei bei qaji tamo unḡasari elenḡqnu. Nami Qotei na Israel nanḡi giltñjrsiqa qalaqalainḡrej. A nanḡo moma utru nanḡi qa are qalsiq kumbra degyej. <sup>29</sup> Iga qalie, Qotei a tamo unḡasari nanḡi metñjrsim inḡi bole bole enḡrqa di a bunuqna aqa kumbra di olo uratqa keresai.

<sup>30</sup> O sawa bei bei qaji ningi nami Qotei aqa anjam gotranḡyoqneb. Ariya bini Israel nanḡi kamba Qotei aqa anjam gotranḡyeqñub. Gam dena Qotei a olo ningi qa duleqnu. <sup>31</sup> Od, Israel nanḡi Qotei aqa anjam gotranḡyeqñub deqa Qotei a ningi qa duleqnu. Gam dena bunuqna Qotei a Israel nanḡi qa kamba dego olo dulqas. <sup>32</sup> Qotei na iga kalil aqa anjam gotranḡqajqa kumbraq di breigonaqa iga tonto talq di sobulem. Qotei a degyej. Di kiyayaqa? A iga kalil qa olo dulqajqa deqa.

*Iga Qotei aqa ñam soqtoqnqom*

<sup>33</sup> O ijo was, Qotei aqa areqalo ti powo ti kalil tulanḡ bolejuja. Di tulanḡ guma koba dego. Deqa iga na Qotei aqa areqalo ti powo ti di aqa utru geregere ubtosim marqa keresai. Aqa kumbra kalil dego iga dauryosim itqa keresai. <sup>34</sup> Agi Qotei aqa anjam bei nami endegsib nenḡrenyeb unu, “Tamo yai a Qotei aqa areqalo qalieqa kere? Osim a gam osoryqa kere? <sup>35</sup> Tamo yai na Qotei inḡi bei yqas? Yosim Qotei na kamba olo yqajqa minḡqas? Tamo dego bei sosai.” <sup>36</sup> O ijo was ningi quiy. Qotei

a inġi inġi kalil atelennej. A inġi inġi kalil qa utru. Inġi inġi kalil di aqa segi. Deqa iga bati gaigai aqa ñam soqtoqnqom. Bole.

## 12

### *Niġi nuġo jejamu osib Qotei atraiyiy*

<sup>1</sup> O ijo was kalil, Qotei a iga qa dulej deqa e niġi siġgila na endegsi mernġwai. Niġi nuġo segi jejamu ñambile unu qaji di osib Qotei atraiyiy. Niġi Qotei aqa segi tamo unġasari bole unub deqa niġi kumbra Qotei a tulaġ areareteqnu qaji di yoqniy. Niġi degyqab di niġi Qotei qa bole louoqnqab. <sup>2</sup> Niġi mandam tamo naġo kumbra dauryosib walwelaib. Qotei a areqalo bunuj enġimqa niġi tamo bunuj sosib dena niġi Qotei aqa areqalo gegerere qalieoiy. Qotei aqa areqalo agiende. Niġi kumbra bole ti kumbra Qotei a tulaġ areareteqnu qaji de ti kumbra tulaġ bolequja de ti keretosib dauryoqniy.

### *Wau segi segi Qotei na niġi enġej qaji di yoqniy*

<sup>3</sup> Qotei a e qa are boleiyonaq wau ebej deqa e niġi segi segi endegsi mernġwai. Niġi nuġo segi ñam soqtaib. Osib nuġo was qudei naġi buġnrqa are qalaib. Niġi areqalo bole ti sosib nuġo kumbra gegerere tenemtoqniy. Qotei na niġi segi segi siġgila enġej deqa niġi siġgila di osib Qotei qa nuġo areqalo siġgilatosib wauoqniy. <sup>4</sup> Niġi qalie, iga kalil jejamu qujai. Gago jejamu miligiq di baġ ti siġga ti ñamdamu ti dabkala ti unub. Naġi kalil wau qujai yo-saieqnu. Naġi wau segi segi yeqnu. <sup>5</sup> Dego kere iga tamo unġasari gargekoba unum. Iga kalil Kristus aqa jejamu qujai. Deqa iga segi segi kalil jejamu qujaiq di turtejunum.

<sup>6</sup> Qotei a iga qa are boleiyonaq siġgila segi segi egej. A na tamo qudei naġi siġgila enġrej deqa naġi a qa naġo areqalo siġgilatoqnsib aqa medabu osib anjam palontoqnebe. <sup>7</sup> A na tamo qudei naġi siġgila enġrej deqa naġi naġo Kristen was naġi aqaryainjroqnebe. A na tamo qudei naġi siġgila enġrej deqa naġi aqa anjam plaltoqnebe. <sup>8</sup> A na tamo qudei naġi siġgila enġrej deqa naġi naġo Kristen was naġi siġilatnġroqnebe. A na tamo qudei naġi siġgila enġrej deqa naġi silali inġi inġi jeiyuqnsib tamo unġasari inġi qa truqueqnu qaji naġi enġroqnebe. A na tamo qudei naġi siġgila enġrej deqa naġi aqa wau gegerere taqatoqnebe. A na tamo qudei naġi siġgila enġrej deqa naġi arebolebole na tamo unġasari naġi qa duloqnebe.

### *Niġi na nuġo Kristen was naġi bole qalaqalainjroqniy*

<sup>9</sup> O ijo was niġi na tamo unġasari naġi bole qalaqalainjroqniy. Niġi gisaġ na naġi qalaqalainjraib. Niġi kumbra uge

kalil torei uratekritisib kumbra bole segi beteryosib yoqniy. <sup>10</sup> Ningi gaigai Qotei aqa segi tamo ungasari nanngi nunngo was tintinj edegosib nanngi qalaqalainjroqniy. Ningi nunngo segi ñam tentoqnsib Kristen was nanngo ñam olo soqtoqniy. <sup>11</sup> Ningi gaigai singila na Qotei aqa wau ojoqniy. Qotei aqa Mondor a nunngoq aiyuqnsim are tigeltetnngoqnim ningi Tamo Koba aqa wau ojqajqa tulan singilaoqniy. <sup>12</sup> Mondonj Qotei na ningi lan qureq osi oqwas. Ningi deq oqwajqa tarinjoqnsib areboleboleinjoqneme. Osib gulbe nunngoq boqnimqa ningi singila na tigeluqnsib qoboiyoqniy. Osib gaigai Qotei pailyoqniy.

<sup>13</sup> Qotei aqa segi tamo ungasari qudei nanngi ingi ingi qa truquuqnsibqa ningi na nanngi aqaryainjroqniy. Tamo lanaj nanngi dego nunngo meq boqnsibqa nanngi oqnsib geregereinjroqniy.

<sup>14</sup> Tamo qudei na ningi ugeugeingibqa di ungum, ningi kamba olo Qotei na nanngi aqaryainjrqa marsib pailyoqniy. Qotei na nanngi ugetnjrqajqa deqa pailyaib. <sup>15</sup> Kristen was qudei nanngi areboleboleinjrimqa ningi nanngi koba na areboleboleingeme. Kristen was qudei nanngi akamoqnsibqa ningi nanngi koba na akamoiy. <sup>16</sup> Ningi segi segi kalil areqalo qujaitosib soqniy. Ningi nunngo segi ñam soqtqa are qalaib. Ningi tamo ñam saiqoji nanngi koba na laqniy. Ningi diqoqnsib endegsib maraib, “Iga powo koba ti unum.” Ningi degaib.

<sup>17</sup> Tamo qudei na ningi kumbra uge enjgibqa ningi na kamba nanngi kumbra uge enjraib. Ningi tamo kalil nanngo ñamgalaq di kumbra bole segi yoqniy.

<sup>18</sup> Ningi njirin ti qoto ti uratiy. Gam soqnimqa ningi gaigai tamo ungasari kalil nanngi koba na are qujaitosib lawo na soqniy. <sup>19</sup> O ijo was bole, tamo qudei na ningi gulbe enjgibqa ningi na kamba nanngi gulbe enjraib. Uratosib nanngi Qotei aqa banq di atibqa a segi nanngi qa njirinjosim gulbe enjrqa. Agi Tamo Koba aqa anjam bei nami endegsib nengrenyeb unu, “Une kambatqajqa wau di ijo segi wau. E segi na tamo nanngo une qa nanngi kambatnjrqai. <sup>20</sup> Deqa ino jeu tamo bei a manyimqa ni a gereiyosim ingi anaiye. A ya qaryimqa dego gereiyosim ya anaiye. Ni a degyimqa a aqa kumbra uge qa are qalsim jemaiyqas.” <sup>21</sup> O ijo was, Qotei aqa anjam degsi unu deqa e ningi segi segi endegsi mernjgwai. Kumbra uge bei na ni ojqa laqnim ni segi singilaosim kumbra bole dauryosim dena ni kumbra uge bunjosim gotranjqam.

## 13

*Ningi sawa taqato qaji mandor nanngo sorgomq di soqniy*

<sup>1</sup> Ningi kalil sawa taqato qaji mandor nanngo sorgomq di geregere soqniy. Iga qalie, mandor nanngi lanja wauosai. Qotei

a segi na nan̄gi wau enjreqnaqa nan̄gi sawa taqateq̄nub. Qotei a segi na nan̄gi atelen̄ej unub. <sup>2</sup> Deqa tamo nan̄gi mandor nan̄go anjam gotran̄yqab di nan̄gi Qotei aqa anjam dego gotran̄yonub. Tamo nan̄gi degyqab di nan̄gi awai uge oqab. <sup>3</sup> Mandor nan̄gi wau ojeq̄nub di tamo kumbra uge uge yeq̄nub qaji nan̄gi ula enjrqajqa deqa waueq̄nub. Mandor nan̄gi na tamo kumbra bole bole yeq̄nub qaji nan̄gi ula enjrqajqa deqa wauosai. Deqa nin̄gi kumbra bole bole yoq̄niy. Nin̄gi degyqab di nin̄gi mandor nan̄gi qa ulaqasai. Nan̄gi na nun̄go ñam soqtet̄ngwab. <sup>4</sup> Mandor nan̄gi Qotei aqa wau tamo bul unub. Nan̄go wau qujai agi nan̄gi na nin̄gi aqaryain̄goq̄nsib geregerein̄geq̄nub. Ariya nin̄gi kumbra uge uge yoq̄nqab di nin̄gi nan̄gi qa ulaqab. Nin̄gi qalie, mandor nan̄gi sebru ojejunub. Nan̄gi sebru laña ojosai. Nan̄gi Qotei aqa wau tamo bul unub deqa nan̄gi sebru dena tamo un̄gasari kumbra uge uge yeq̄nub qaji nan̄gi awai uge enjreq̄nub. <sup>5</sup> Deqa iga mandor nan̄go sorgomq̄ di geregere sqom. Iga awai uge oqa uratosim deqa nan̄go anjam dauryqom. Deqa segi sai. Iga gago are miligiq̄ di qalieonum, kumbra di bole. Osim deqa ti iga mandor nan̄go anjam dauryqom.

<sup>6</sup> Utru deqa nin̄gi takis waiyeq̄nub. Mandor nan̄gi Qotei aqa wau tamo bul unub deqa nan̄gi gaigai singila na wau taqateq̄nub. <sup>7</sup> Deqa nin̄gi na mandor nan̄go in̄gi in̄gi olo enjroq̄niy. Osib takis o qaji tamo nan̄go ban̄q di takis atoq̄niy. Od, nin̄gi tamo kokba kalil nan̄go sorgomq̄ di geregere sosibqa nan̄go anjam quoq̄nsib kumbra bole bole osorn̄jroq̄niy. Osib nan̄go ñam soqtoq̄niy.

### *Nin̄gi qalaqalaiyo kumbra dauryoq̄niy*

<sup>8</sup> Nin̄gi was bei aqa in̄gi in̄gi qudei ejunub di nun̄goq̄ di sokobaiyaiq̄. A qa kamba olo yiy. Ariya kumbra bole bei nun̄goq̄ di gaigai soqneme. Kumbra agiende. Nin̄gi segi segi qa qalaqalaiyo kumbra yoq̄niy. Tamo a qalaqalaiyo kumbra dauryqas di a dal anjam kalil dego keretosim dauryekritqas. <sup>9</sup> Iga qalie, dal anjam a endegsi marqo, “Nin̄gi tamo bei qalsib moyotaib. Nin̄gi bajinaib. Nin̄gi was bei aqa in̄gi in̄gi qa ma-maul̄ngaiq̄. Nin̄gi was bei aqa un̄ja jejamu ojetaib.” Anjam bei dego unu. Anjam agiende, “Ni ino segi jejamu gereiyeq̄num dego kere ni ino was nan̄gi degsim geregerein̄jroq̄ne.” O ijo was, anjam qujai dena dal anjam kalil kabutejunu. <sup>10</sup> Tamo bei na tamo bei qalaqalaiyqas di a na tamo di kumbra uge bei yqa keresai. Deqa a qalaqalaiyo kumbra dauryqas di a dal anjam kalil dego keretosim dauryekritqas.

### *Nin̄gi kumbra bole dauryosib walweloq̄niy*

<sup>11</sup> Niŋgi kumbra degyoqniy. Bati iga bini unum qaji endi niŋgi qalie. Niŋgi ŋeio qa kumbra uratosib tigelqajqa bati agi brantqo. Niŋgi qalie, Qotei na iga elenqajqa bati isaq yala sonaqa iga Kristus qa gago areqalo siŋgilatem. Ariya bini Qotei na iga elenqajqa bati jojomoqo. <sup>12</sup> Qolo koboeqnaqa sawa suwanqa laqnu. Deqa iga ambru qaji kumbra kalil uratosim suwan qaji kumbraq di sosim qoto qa gara bul jugwom. <sup>13</sup> Tamo a qanam walweleqnu dego kere iga kumbra bole tiŋtiŋ na walweloqnoqom. Deqa iga diqoqnsim alan kobaoqnsim ya uge uyoqnsim nanarioqnaasai. Iga sambala kumbra dego yoqnaqajqa are pruggoqnim kumbra uge jigat yoqnaasai. Iga laŋa laŋa ŋiriŋoqnsim tamo qudei naŋgi qa are ugeigoqnaasai. <sup>14</sup> Niŋgi Tamo Koba Yesus Kristus beteryosib a gara bul jigsib soqniy. Sosib deqa niŋgi nuŋgo segi jejamu qa areqalo namij dauryoqnaib.

## 14

### *Niŋgi nuŋgo Kristen was naŋgi peginjraib*

<sup>1</sup> Tamo uŋgasari qudei Yesus qa naŋgo areqalo siŋgilateqnu b qaji naŋgo areqalo di kiŋala siŋgilaosai unu. Deqa niŋgi naŋgo kumbra pegiyosib uge qa minjraib. Osib naŋgi koba na anjam na qotaib. Niŋgi naŋgi osib gereinjriy. <sup>2</sup> Naŋgo areqalo kiŋala siŋgilaosai unu deqa naŋgi damu uyosaieqnu b. Kalil getenteqnu b. Ariya tamo uŋgasari qudei Yesus qa naŋgo areqalo siŋgilateqnu b qaji naŋgi qalie, naŋgi iŋgi kalil uyqa kere. Osib naŋgi iŋgi kalil uyeqnu b. Naŋgi iŋgi bei getentosaieqnu b. <sup>3</sup> Deqa niŋgi quiy. Tamo uŋgasari iŋgi kalil uyeqnu b qaji naŋgi na olo tamo uŋgasari damu getenteqnu b qaji naŋgi uge qa minjraib. Tamo uŋgasari damu getenteqnu b qaji naŋgi na kamba dego tamo uŋgasari iŋgi kalil uyeqnu b qaji naŋgi uge qa minjraib. Qotei na naŋgi kalil elenjej. <sup>4</sup> Ni tamo kiyero deqa ni tamo bei aqa kaŋgal tamo a uge qa minjqam? A wau bole yqas kiyo aqa wau ulonqas kiyo di aqa wau qa gate a segi na pegiyqas. E are qalonum, kaŋgal tamo di a wau bole yqa kere. Tamo Koba Qotei na a siŋgila yimqa a wau bole yqas.

<sup>5</sup> Tamo bei a endegsi are qalqas, “Bati qudei yori bati kokba. Bati qudei bati laŋaj.” Ariya tamo bei a marqas, “Sai. Bati kalil kerekere unub.” O ijo was, niŋgi segi segi nuŋgo areqalo geregere tenemtosib areqalo bole ti soqniy. <sup>6</sup> Tamo qudei naŋgi yori bati kokba uneqnu b di naŋgi Tamo Koba a qa are qaloqnsib deqa uneqnu b. Tamo qudei naŋgi iŋgi kalil uyeqnu b di naŋgi Tamo Koba a qa are qaloqnsib deqa uyeqnu b. Naŋgi iŋgi uyqa oqnsib Qotei palyoqnsib uyeqnu b. Tamo qudei naŋgi iŋgi qudei getenteqnu b. Di naŋgi



Tamo Koba a qa are qaloqnsib deqa getenteqnub. Nanġi inġi getentqa oqnsib Qotei pailyoqnsib getenteqnub.

<sup>7</sup> Iga qalie, tamo bei a endegsi marqa keresai, “Ijo nambile di ijo segi nambile. E segi na taqatejunum. E moiġai di e segi na marsiy moiġai.” A degsi marqa keresai. <sup>8</sup> Iga nambile sqom di iga Tamo Koba a qa are qalsim nambile sqom. Iga moiġom di iga Tamo Koba a qa are qalsim moiġom. Deqa iga nambile sqom kiyo iga moiġom kiyo di iga Tamo Koba aqa segi tamo unġasari sqom. <sup>9</sup> Kristus a dego moisiq olo nambile osiq subq na tigelej. Deqa a tamo nambile so qaji nanġi ti tamo morenjo qaji nanġi ti nanġo Tamo Koba gaigai sqas.

<sup>10</sup> Niġi kiyaqna nunġo Kristen was nanġo kumbra pegiyoqnsib uge qa minjreqnub? Osib nanġi misilinjnreqnub? Niġi qalie, mondon iga kalil Qotei aqa ulatamuq di tigelamqa a na iga pegiwas. <sup>11</sup> Agi Qotei aqa anjam bei nami endegsib nenġrenyeb unu, “E segi Tamo Koba. E nambile gaigai unum. Mondon tamo unġasari kalil nanġi ijoq bosib ijo areq di sinġa pulutosib nanġo medabu qujaitosib merbqab, ‘Ni segi Qotei.’” <sup>12</sup> Qotei aqa anjam degsi unu deqa iga qalieonum, diġo bati qa iga segi segi kalil Qotei aqa ulatamuq di tigelosim gago kumbra kalil babtosi minjnam a quqwas.

*Niġi nunġo Kristen was nanġi kumbra ugeq breinjraib*

<sup>13</sup> Deqa iga gago Kristen was nanġi uge qa minjrqsai. Osim nanġi uneq breinjrqasai. <sup>14</sup> Tamo Koba Yesus na e powo ebej deqa e qalieonum, inġi inġi kalil Qotei na gereiyelenej qaji di jiga bei saiġoji. Ariya Kristen was bei a endegsi are qalqas, “Inġi di jihat.” A degsi are qalsim deqa a inġi di getentqas. <sup>15</sup> Ariya a inġi di getentimqa niġi olo inġi di uyib nunġsimqa a are gulbeiyqas. Nunġo kumbra dena niġi qalaqalaiyo kumbra uratosib nunġo Kristen was aqa are gulbetetqab. Kristus a nunġo was di qalaqalaiyosiq moiyej deqa niġi nunġo inġi uyo qa osib a ugeugeiyaib. <sup>16</sup> Niġi mareqnub, “Iga inġi di uyqom di kumbra bole.” Di niġi kere mareqnub. Ariya nunġo kumbra bole di Kristen was qudei nanġi unsib olo uge qa marqab di keresai. Deqa unġum, niġi inġi di uyaib. <sup>17</sup> Mondor Bole na aqaryaigimqa iga kumbra bole ti lawo kumbra ti arebolebole ti sqom gam dena Qotei a gago Mandor Koba sosim iga taqatgwas. Iga inġi ti ya ti uyoqnqom gam dena sai. <sup>18</sup> Tamo nanġi ijo anjam deqa are qalsib Kristus aqa wau ojġab di Qotei a nanġi qa tula arearetoqnqas. Amqa tamo unġasari kalil nanġi na nanġi unjrsib marqab, “Nanġi tamo bole.”

<sup>19</sup> Deqa iga kalil lawo na sosim gago Kristen was nanġi singilatnjqom. <sup>20</sup> Niġi inġi uyo na Qotei aqa wau ugetaib. Bole, niġi inġi kalil uyqa kere. Ariya niġi inġi bei uysib

dena nunḡo Kristen was bei uneq waiyqab di kumbra uge. <sup>21</sup> Nnḡi damu ti wain ti uysibqa kiyo kumbra bei ysibqa kiyo dena nunḡo was bei uneq waiyqab di kumbra uge. Deqa nnḡi kumbra di uratij. <sup>22</sup> Nnḡi Qotei qa nunḡo areqalo sinḡilateqnuḡ deqa nnḡi qalie, nnḡi inḡi kalil uyqa kere. Ariya nunḡo qalie di nunḡo are miligiq di ulitib soqnem. Yim Qotei a segi unqas. Nnḡi inḡi bei uyqa marsib are gulbeinḡwasai di nnḡi arebolebole na uyij. <sup>23</sup> Ariya nunḡo ambleq di tamo bei a inḡi bei uyqa osim are gulbeyim uyqas di a une ti sqas. A Qotei qa aqa areqalo sinḡilateqnu ariya a inḡi di uyqa osim are gulbeyim uyqas di a une atqas.

## 15

### *Nnḡi Kristus aqa kumbra dauryoqnij*

<sup>1</sup> Tamo unḡasari qudei Yesus qa nanḡo areqalo sinḡilateqnuḡ qaji nanḡo areqalo di kiñala sinḡilaosai unu. Deqa iga sinḡila ti unum qaji iga na nanḡi aqaryainjroqnsim nanḡo gulbe qoboiyetnjroqnqom. Iga gago segi jejamu aqaryaiyqajqa are qalqasai. <sup>2</sup> Iga gago Kristen was nanḡi aqaryainjroqnsim sinḡilatnjroqnqom. <sup>3</sup> Iga qalie, Kristus a dego aqa segi jejamu aqaryaiyosai oqnej. A nami endegsi Qotei pailyej, “O Abu, tamo qudei ni qa anjam uge mareqnuḡ qaji nanḡi e qa dego anjam uge mareqnuḡ.” Qotei aqa anjam di agi nenḡrenḡ di unu. <sup>4</sup> Qotei aqa anjam kalil nami nenḡrenḡyeb qaji di iga Qotei aqa gam osorgwajqa deqa osib nenḡrenḡyeb. Anjam dena gago are sinḡilatetgim iga sinḡila na tigeloqnsim Qotei na mondon iga elenḡqajqa deqa tariḡoqnsim sqom. Utru deqa nenḡrenḡyeb. <sup>5</sup> Qotei a segi na gago are sinḡilatetgoqnsiq aqaryaiḡeqnaqa iga sinḡila na tigeleqnum. Deqa a na marimqa nnḡi kalil koba na Kristus Yesus aqa kumbra dauryosib areqalo qujaitosib soqnij. <sup>6</sup> Sosib nnḡi kalil medabu qujaitoqnsib gago Tamo Koba Yesus Kristus aqa Abu Qotei aqa ñam soqtoqnij.

### *Kristus na Juda nanḡi ti sawa bei bei qaji nanḡi ti aqaryainjrej*

<sup>7</sup> Kristus a nnḡi qa areboleboleiyonaq nnḡi gereinḡej dego kere nnḡi nunḡo Kristen was nanḡi qa areboleboleinḡim gereinjroqnij. Yim nunḡo kumbra dena nnḡi Qotei aqa ñam tulaḡ soqtoqnij. <sup>8</sup> E endegsi marqai. Kristus a Juda nanḡi qa are qalsiq wauoqnej. Qotei aqa anjam kalil bole. A nami Juda nanḡo moma utru nanḡi inḡi bole bole enjrqa marej. Anjam di sinḡilatqajqa deqa Kristus a wauoqnej. <sup>9</sup> Kristus a sawa bei bei qaji nanḡi qa dego wauoqnej. Qotei a nanḡi qa dulej aqa kumbra di nanḡi qalieosib aqa ñam soqtqajqa deqa Kristus a wauoqnej. Agi Kristus aqa anjam bei nami endegsib nenḡrenḡyeb unu, “E sawa bei bei qaji nanḡo ambleq di ino ñam soqtoqnqai.

E ino ñam soqtqa oqnsiy ni qa louoqnqai.”

<sup>10</sup> Anjam bei dego unu, “O sawa bei bei qaji ningi ti Qotei aqa segi tamo ungasari kalil nanngi ti koba na areboleboleingim soqniy.” <sup>11</sup> Anjam bei dego unu,

“O sawa bei bei qaji kalil,  
ningi Tamo Koba aqa ñam soqtoqniy.  
Od, ningi kalil aqa ñam soqtoqniy.”

<sup>12</sup> Aisaia a dego Qotei aqa medabu osiqa anjam bei endegsi marej, “Mondor Devit aqa abu Jesi aqa moma nanngoq dena mandor kobaquja bei brantqas. Brantosim a na sawa bei bei qaji kalil nanngi taqatnjroqnqas. Nanngi a bosim boletnjrqajqa deqa are qalsib tariñoqnsib sqab.”

<sup>13</sup> O ijo was, Qotei a nami iga ingi bole bole egwajqa marej deqa iga tariñoqnsim unum. Ningi Qotei qa nungo areqalo singilateqnub deqa a na ningi tulan keretngimqa ningi arebolebole ti are lawo na ti soqniy. Amqa Mondor Bole na ningi singilatngimqa ningi ingi bole bole Qotei a nami engwa marej qaji deqa tariñoqnsib soqniy.

*Pol a Qotei aqa wau ojoqnej deqa a tulan areboleboleiyqnej*

<sup>14</sup> O ijo was kalil, ijo are miligiq di e qalieonum, ningi kumbra bole gaigai yeqnub. Ningi powo koba ti unub deqa ningi Qotei aqa tamo ungasari nanngi gam bole osornjreqnub.

<sup>15</sup> Qotei a e qa are boleiyonaq wau ebej deqa e anjam singila endi nenngrenyosim nunngoq qarinyonum. Ningi ijo anjam endeqa are walngaim deqa e nenngrenyonom. <sup>16</sup> E Kristus Yesus aqa wau tamo unum deqa e sawa bei bei qaji nanngo ambleq di wauoqnsim Qotei aqa anjam bole nanngi minjre minjre laqnum. E nanngi joqsiy Qotei aqa ulatamuq di atrainjrobuiltqa Qotei a nanngi qa tulan areboleboleiyqajqa deqa e waueqnum. Mondor Bole na nanngi singilatnjrimqa nanngi Qotei aqa segi kumbra boleq di sosib dauryqajqa deqa ti e nanngi qa waueqnum.

<sup>17</sup> Aqo Kristus Yesus wo ombla waueqnum deqa e Qotei aqa wau yqajqa tulan areboleboleibeqnu. <sup>18-19</sup> Kristus a nami ijo medabu na ti ijo ban na ti wau yoqnej. Wau deqa segi e ningi saingwai. E wau bei qa ningi saingwasai. Kristus na e singila ebeqnaqa e manwa gargekoba yoqnem. Qotei aqa Mondor na dego e singilatbeqnaqa e wauoqnem. Kristus a kumbra kalil di yoqnej. Di kiyafa? A na sawa bei bei qaji nanngo are tigeltetnjrimqa nanngi Qotei aqa anjam dauryqajqa deqa. E Jerusalem dia wau utru atsim Kristus aqa anjam bole mare mare laqnsim gilsim torei Ilirikum sawaq di dinqtem. <sup>20</sup> E are qalem, e na tamo ungasari Kristus aqa ñam qaliesai qaji nanngo sawaq di Qotei aqa anjam bole palontognqai. Tal ai utru tamo bei na tigeltej qaji goqeq di e olo tal atqasai. E degsi

are qalem. <sup>21</sup> Agi Qotei aqa anjam bei endegsi nenɡrenq di unu, “Tamo unɡasari Kristus aqa ñam nami quosai qaji nanɡi a unqab. Tamo unɡasari aqa anjam nami quosai qaji nanɡi qusib a qa poinjrqa.”

*Pol a Rom Kristen nanɡi unjrsim dena Spen sawaq gilqas*

<sup>22</sup> O ijo was, e Qotei aqa wau di ojeqnum deqa e nunɡoq bqajqa gam getenjunu. Deqa e nunɡoq bqa yeqnam kere-saiibeqnu. <sup>23</sup> Wausau gargekoba e ningi nunɡwajqa are qalo-qnem. Ariya bini e sawa endia wau bei saiqoji. <sup>24</sup> Deqa e Spen sawaq gilqa osiy e mati nunɡoq bosiy nunɡsiy ningi ti koba na sokiñalayitqa ningi inɡi inɡi qa aqaryaibibqa e Spen sawaq gilqai.

<sup>25</sup> Ariya e mati Jerusalem aisiy dia Juda Kristen nanɡi unjrsiy aqaryainjrqai. Nanɡi Qotei aqa segi tamo unɡasari unub. <sup>26</sup> Nanɡi qudei inɡi inɡi qa truqueqnum deqa Kristen was Masedonia sawa ti Akaia sawa ti di unub qaji nanɡi na nanɡi aqaryainjrqa marsib silali koroiyeb unu. <sup>27</sup> Nanɡi nanɡo segi areqalo na silali di koroiyeb. Juda Kristen nanɡi na nanɡi Qotei aqa anjam qa aqaryainjreqnum deqa nanɡi na kamba olo Juda Kristen nanɡi jejamu qa inɡi inɡi qa aqaryainjreqnum. Nanɡo wau bole agide.

<sup>28</sup> Deqa e mati silali koroiyqajqa wau di kobotosiy silali di Jerusalem osiy aisiy bunuqna e Spen sawaq gilqa osiy e nunɡoq bosiy nunɡwai. <sup>29</sup> E qalieonum. E nunɡoq bqai di e Kristus aqa kumbra bole kalil ijoq di magejunu qaji di osi bosiy ningi osorngitqa dena ningi singilaqab.

<sup>30</sup> O ijo was ningi gago Tamo Koba Yesus Kristus a qa ti qalaqalaiyo kumbra Mondor na iga osorgeqnu qaji deqa ti are qalsibqa e koba na Qotei pailyqajqa waukobaoqnom. Od, ningi e qa Qotei pailyoqniy. <sup>31</sup> Yim Qotei na e aqaryaibosim anjam gotranjo tamo Judia sawaq di unub qaji nanɡo banq dena e olo oqas. E Qotei aqa segi tamo unɡasari Jerusalem di unub qaji nanɡi qa silali koroiyeqnum. Ningi Qotei pailyibqa a na nanɡo are tigeltetnrimqa nanɡi ijo wau deqa tulan areboleboleinjrqa. <sup>32</sup> Qotei na marim e nunɡoq bosiy nunɡsiy dena e areboleboleibqas. Osiy ningi koba na aqaratosim dena e singila oqai.

<sup>33</sup> Qotei a are lawo qa utru. A ningi kalil koba na soqnebe. Bole.

## 16

*Pol a kaiye anjam Rom Kristen nanɡoq qarinyej*

<sup>1</sup> Ningi gago jaja Fibi osib gereiyoniy. A na Kristen tamo unɡasari Senkria qureq di unub qaji nanɡi qa waukobaeqnu. <sup>2</sup> Ningi Tamo Koba a qa are qalsib Fibi qalaqalaiyoqniy. Ningi

Qotei aqa segi tamo ungasari unub deqa ningi kumbra bole dauryosib Fibi qalaqalaiyoqniy. Fibi a gulbe ti soqnimqa kiyo inji bei qa truquamqa kiyo ningi na aqaryaiyiy. A nami tamo ungasari gargekoba nanngi aqaryainjroqnsiq e dego aqaryaiboqnej. Deqa ningi a urataib. A kamba dego aqaryaiyiy.

<sup>3</sup> Ningi na ijo kaiye anjam endi osib Prisila Akwila wo nanngi aiyel minjriy. Nanngi aiyel e koba na Kristus Yesus aqa wau ojeqnum. <sup>4</sup> Nami jeu tamo nanngi na e lubqa laq nab nanngi aiyel moiqa ulaosai. Nanngi e aqaryaibeb. Deqa e nanngi aiyel minjreqnum, “Keretonub.” E segi sai. Kristen tamo ungasari sawa sawa kalilq di unub qaji nanngi dego nanngi aiyel minjreqnub, “Keretonub.” <sup>5</sup> Ariya ningi na ijo kaiye anjam endi osib Kristen tamo ungasari kalil Prisila Akwila wo nanngo talq di loueqnub qaji nanngi dego minjriy.

Osib Epainetus dego ijo kaiye anjam endi minjiy. E a tulan qalaqalaiyeqnum. A Esia sawa qaji. Tamo kalil Esia sawaq di unub qaji nanngi are bulyosaisonabqa Epainetus a namoqna are bulyosiq Kristus qa aqa areqalo singilatej.

<sup>6</sup> Ningi na ijo kaiye anjam endi osib Maria dego minjiy. A ningi aqaryaingwa maroqnsiq waukobaoqnej.

<sup>7</sup> Ningi na ijo kaiye anjam endi osib Andronikus Junias wo nanngi aiyel dego minjriy. Nanngi aiyel ijo lej nanngi. Jeu tamo nanngi na nanngi aiyel e ombla ojelenosib tonto talq di breigonab soqnem. Qotei na nanngi aiyel wau enjrej deqa nanngi aqa anjam mare mare laq nub. Deqa nanngi aiyel dego nam ti. E are bulyosaisonam nanngi aiyel namoqna are bulyosib Kristus qa nanngo areqalo singilateb.

<sup>8</sup> Ariya ningi ijo kaiye anjam endi Ampliatus dego minjiy. E Tamo Koba aqa nam na a tulan qalaqalaiyeqnum.

<sup>9</sup> Ningi Urbanus dego ijo kaiye anjam endi minjiy. A iga ti koba na Kristus aqa wau ojeqnum. Ningi Stakis dego ijo kaiye anjam endi minjiy. E a tulan qalaqalaiyeqnum.

<sup>10</sup> Ningi Apeles dego ijo kaiye anjam endi minjiy. Iga qalieonum, a bole Kristus dauryeqnu.

Ningi ijo kaiye anjam endi osib Aristobulus aqa tal qujai nanngi ti dego minjriy.

<sup>11</sup> Osib Herodion a dego ijo kaiye anjam endi minjiy. A ijo lej.

Ningi ijo kaiye anjam endi osib Narsisus aqa tal qujai nanngi ti dego minjriy. Nanngi Tamo Koba aqa tamo bole unub.

<sup>12</sup> Ningi Trifina Trifosa wo nanngi aiyel dego ijo kaiye anjam endi minjriy. Nanngi aiyel Tamo Koba a qa waukobaeq nub.

Ningi ijo kaiye anjam endi osib Persis dego minjiy. E a tulan qalaqalaiyeqnum. A Tamo Koba aqa wau singila na ojeqnu.

<sup>13</sup> Niŋgi ijo kaiye anjam endi Rufus dego minjiy. A tamo bolequja sosisq Tamo Koba dauryeqnu. Niŋgi aqa ai dego ijo kaiye anjam endi minjiy. A ijo ai bul.

<sup>14</sup> Niŋgi ijo kaiye anjam endi osib Asinkritus, Flegon, Hermes, Patrobas, Hermas naŋgi minjriy. Osib Kristen was kalil naŋgi koba na unub qaji naŋgi dego minjriy.

<sup>15</sup> Osib Filologus Julia wo naŋgi aiyel dego ijo kaiye anjam endi minjriy. Niŋgi na ijo kaiye anjam endi osib Nereus na aqa jaja na Olimpasi na ariya Qotei aqa tamo ungasari kalil naŋgi koba na unub qaji naŋgi ti minjriy.

<sup>16</sup> Niŋgi na nuŋgo Kristen was kalil naŋgi segi segi kundonjriy. Kumbra di agi Qotei aqa segi tamo ungasari kalil naŋgi yeqnu.

Kristus aqa tamo ungasari qure qure kalilq di unub qaji naŋgi na dego niŋgi kaiyeiŋonub.

*Tamo qudei na Kristen naŋgi potoaiyeltnjreqnub*

<sup>17</sup> O ijo was, nuŋgo ambleq di tamo qudei naŋgi Qotei aqa anjam niŋgi nami qusib dauryeb qaji di gotranjoqnsib olo bubulyeqnub. Osib Kristen naŋgi potoaiyeltnjroqnsib uneq breinjreqnub. Deqa e niŋgi siŋgila na endegsi merngwai. Niŋgi tamo deqaji naŋgi qa geregere nam atoqnsib naŋgi qoreinjriy. <sup>18</sup> Tamo deqaji naŋgi gago Tamo Koba Kristus aqa wau ojo-saieqnub. Naŋgi naŋgo segi jejamu qa kumbra qa are qaloqnsib dauryeqnub. Osib tamo ungasari naŋgi walawalainjroqnsib gisa gisanjroqnsib naŋgi nanaritnjreqnub. Tamo ungasari naŋgi di kumbra bole ti kumbra uge ti geregere pegiyosaieqnub. <sup>19</sup> O ijo was, e niŋgi qa tulan areboleboleibeqnu. Di kiyaaqa? Niŋgi Qotei aqa anjam geregere dauryeqnab tamo ungasari kalil naŋgi deqa queqnub. Ariya e niŋgi endegsi merngwai. Niŋgi kumbra bole yqajqa geregere poingonqim kumbra uge yqajqa nanariosib soqniy. <sup>20</sup> Qotei a are lawo qa utru. Sokiñala a na Satan ojsim osi bosim nuŋgo siŋgaq di atim niŋgi na sosqab.

Gago Tamo Koba Yesus a niŋgi qa are boleyeme.

*Tamo qudei na kaiye anjam Rom Kristen naŋgoq qarinyeb*

<sup>21</sup> Timoti a e ombla wauo qaji. A na niŋgi kaiyeiŋgwo. Lusius na Jeson na Sosipater na naŋgi qalub dego niŋgi kaiyeiŋonub. Naŋgi qalub ijo leŋ naŋgi.

<sup>22</sup> Ijo ñam Tertius. E Pol aqa medabuq na anjam kalil endi osim ijo segi baŋ na nengrenyonum. E dego Tamo Koba aqa ñam na niŋgi kaiyeiŋonum.

<sup>23</sup> Gaius a dego niŋgi kaiyeiŋgwo. A na e osiqa aqa segi talq di e gereibeqnu. Osiqa Kristen tamo ungasari kalil qure endia loueqnub qaji naŋgi dego gereinjreqnu.

Erastus Kwartus wo nan̄gi aiyel dego nin̄gi kaiyein̄gonub. Erastus a Korin qure nan̄go silali taqateqnu qaji tamo. Kwartus a gago Kristen was.

<sup>24</sup> Gago Tamo Koba Yesus Kristus a nin̄gi kalil qa are boleyeme. Bole.

*Iga Qotei aqa ñam soqtoqn̄qom*

<sup>25</sup> Yesus Kristus aqa anjam bole e mare mare laqnum qaji dena Qotei na nin̄gi torei sin̄gilatngwa kere. Tulan̄ nami Kristus aqa anjam bole di uliesoqnej. <sup>26</sup> Ariya bini Qotei na anjam di boleq ateqnu. Qotei ñambile gaigai unu qaji a marnaqa aqa medabu o qaji tamo nan̄gi anjam di nen̄gren̄yonab soqnej. Sonaqa iga na olo osim tamo un̄gasari sawa sawa kalilq di unub qaji nan̄gi minjre minjre laqnum. Deqa nan̄gi uli anjam di quoqnsib poinjreqnu. Qotei na anjam di boleq ateqnu. Di kiyaaqa? Tamo un̄gasari sawa bei beiq di unub qaji nan̄gi anjam di qusib nan̄go areqaloq di sin̄gilatosib dauryqajqa deqa. <sup>27</sup> Qotei qujai di a powo koba ti unu. Deqa iga bati gaigai Yesus Kristus aqa wau na Qotei aqa ñam soqtoqn̄qom. Bole.

# 1 KORIN

## *Pol a Yesus aqa anjam mare mare laqnu*

<sup>1-2</sup> E Pol. Kristus Yesus na e qarinqbej deqa e aqa anjam mare mare laqnum. Qotei aqa segi areqalo na e metbosiqa wau di ebej. O ijo was kalil, aqo gago was Sostenes wo anjam endi nengrenyosim nungoq qarinyonum. Niŋgi Korin qureq di Qotei qa loueqnub qaji. Kristus Yesus na niŋgi elenosiqa Qotei aqa segi kumbra boleq di atej. Qotei na niŋgi aqa segi tamo ungasari sqa marsiqa niŋgi giltŋgej. Osiqa Kristen kalil qure qureq di gago Tamo Koba Yesus Kristus aqa ñam meteqnub qaji naŋgi dego giltŋjrej. Yesus a gago Tamo Koba. A Kristen kalil naŋgo Tamo Koba. <sup>3</sup> Gago Abu Qotei wo Tamo Koba Yesus Kristus wo naŋgi aiyel niŋgi qa are boleinjrimqa niŋgi lawo na soqniy.

## *Pol a Korin Kristen naŋgi qa are qaloqnsiq Qotei biŋiyeqnu*

<sup>4</sup> Kristus Yesus aqa wau na Qotei a niŋgi qa are boleiyej. Deqa e bati gaigai niŋgi qa are qaloqnsim ijo Qotei biŋiyeqnum. <sup>5-6</sup> Kristus aqa anjam iga nami niŋgi merngoqnem qaji di nungo are miligiq di siŋgila na waueqnu. Niŋgi Kristus beteryejunub deqa Qotei na nungo kumbra kalil qa ti nungo anjam maro qa ti nungo powo qa ti niŋgi tulaŋ keretŋgej. <sup>7</sup> Deqa niŋgi gago Tamo Koba Yesus Kristus a mondoŋ brantim unqajqa tariŋoqnsib unub. Niŋgi Qotei aqa Mondor aqa siŋgila ejunub deqa niŋgi siŋgila bei qa truquosaieqnu. <sup>8</sup> Yesus Kristus a niŋgi gaigai siŋgilatŋgoqnmqa niŋgi siŋgila na tigeloqnsib gilsib gilsib diŋo bati itqab. Yimqa gago Tamo Koba Yesus Kristus a laŋ qureq na brantim niŋgi Qotei aqa ŋamgalaq di une saiqoji sqab. <sup>9</sup> Yesus Kristus a Qotei aqa Ŋiri. A gago Tamo Koba. Qotei na niŋgi metŋgej deqa niŋgi Yesus beteryosib a ombla are quajaitosib unub. Qotei a tamo bole unu deqa a niŋgi uratŋwasai.

## *Korin Kristen naŋgi ŋiriŋoqnsib pupoeqnu*

<sup>10</sup> Ariya ijo was kalil, e gago Tamo Koba Yesus Kristus aqa ñam na niŋgi siŋgila na endegsi merngwai. Niŋgi kalil anjam qujai maroqniy. Niŋgi anjam bei bei qa ŋiriŋosib pupoelenjaib. Niŋgi areqalo quajaitosib koba na geregere soqniy. <sup>11</sup> Tamo naŋgi Kloe aqa talq di unub qaji naŋgi na e endegsib merbonab quem, “Korin Kristen naŋgi ŋiriŋoqnsib anjam na qoteqnu.” <sup>12</sup> O ijo was kalil, niŋgi anjam na qoteqnu qaji nungo utru agiende. Niŋgi qudei mareqnu, “E Pol dauryo qaji tamo.” Niŋgi qudei mareqnu, “E Apolos dauryo qaji tamo.”



Niŋgi qudei mareqñub, “E Pita dauryo qaji tamo.” Ariya niŋgi qudei mareqñub, “E Kristus dauryo qaji tamo.” Niŋgi anjam na qoteqñub qaji nuŋgo utru agide. <sup>13</sup> Niŋgi kiyaaqa kumbra degyeqñub? Kristus a segi poelenosiq tamo gargekobaej kiyo? E Pol e segi niŋgi qa ñamburbasq di moiyeñ kiyo? Niŋgi ijo ñam na yanso eb kiyo? Di sai. <sup>14</sup> E nami nuŋgo ambleq di sosim e tamo qudei naŋgi yansnjrosaiognem. E ijo kumbra deqa are qaloqñsim Qotei binjiyeqñum. Od, Krispus Gaius wo naŋgi aiyel e na yansnjrem. <sup>15</sup> Deqa tamo bei a endegsi marqa keresai, “E Pol aqa ñam na yanso em.” <sup>16</sup> Bole, tamo naŋgi Stefanas aqa talq di unub qaji naŋgi dego e na yansnjrem. Ariya e tamo qudei naŋgi dego yansnjrem kiyo di e poibosai. <sup>17</sup> Kristus na e tamo naŋgi yansnjrqa marsiq e qarinqosai. E aqa anjam bole palontqajqa osiq e qarinqej. Deqa e mandam tamo naŋgo powo na Kristus aqa anjam palontosaieqñum. E degyeqñum qamu Kristus a ñamburbasq di moiyej di a laña moiyej qamu.

*Kristus a Qotei aqa siŋgila ti powo ti unu*

<sup>18</sup> Tamo naŋgi padalqa gamq di unub qaji naŋgi mareqñub, “Kristus a ñamburbasq di moiyej anjam di nanari anjam.” Naŋgi deqsib mareqñub. Ariya iga Qotei na elenqnu qaji iga mareqñum, “Kristus a ñamburbasq di moiyej anjam di Qotei aqa siŋgila ti unu.” <sup>19</sup> Agi Qotei aqa anjam bei nami endegsib nenjrenyeb unu, “Powo tamo naŋgo powo e na taqal atetnjrqai. Qalie tamo naŋgo qalie dego e na kobotetnjrqai.” <sup>20</sup> O ijo was kalil, powo tamo ti dal anjam qalie tamo ti naŋgi qa iga kiyersi marqom? Iga endegsi marqom. Naŋgi mandam qaji powo ejunub deqa Qotei na naŋgi olo nanaritnjreqnu. Od, tamo naŋgi anjam na qotqajqa arearetnjreqnu qaji naŋgi di Qotei na olo nanaritnjreqnu.

<sup>21</sup> Mandam tamo naŋgo powo na naŋgi Qotei qalieqa keresai. Qotei na aqa segi powo na gam getentetnjrej deqa naŋgi a qa qalieqa keresai. Naŋgi a qa qalieqajqa gam bei a na osornjrej. Gam agiende. Anjam iga palonteqñum qaji di tamo naŋgi qusib Yesus qa naŋgo areqalo siŋgilatqab di Qotei na naŋgi elenqas. Gam dena qujai naŋgi Qotei qa qalieqab. Ariya tamo qudei naŋgi anjam di quoqñsib mareqñub, “Di nanari anjam.” <sup>22</sup> Agi Juda naŋgi Qotei aqa mañwa laña unqajqa mareqñub. Grik naŋgi mandam qaji powo oqajqa tulaŋ siŋgilaeqñub. <sup>23</sup> Kristus a ñamburbasq di moiyej anjam di iga palonteqñsim laqnam Juda naŋgi quoqñsib uge qa mareqñub. Grik naŋgi anjam di quoqñsib nanari qa mareqñub. <sup>24</sup> Ariya tamo ungasari Qotei na metnjrej qaji di Juda ti Grik ti naŋgi qalie, Kristus a Qotei aqa siŋgila ti powo ti unu. <sup>25</sup> Mandam tamo naŋgi mareqñub, “Anjam di nanari

anjam.” Di sai. Anjam di Qotei aqa powo ti unu. Anjam dena mandam tamo nanngo powo tulan bunyejunu. Mandam tamo nanngi mareqnub, “Anjam di singila saiqoji.” Di sai. Anjam di Qotei aqa singila ti unu. Singila dena mandam tamo nanngo singila tulan bunyejunu.

<sup>26</sup> O ijo was ningi are qaliy. Qotei na ningi metnjej bati deqa ningi gargekoba mandam qaji powo saiqoji soqneb. Ningi gargekoba singila saiqoji soqneb. Ningi gargekoba ñam saiqoji soqneb. <sup>27</sup> Tamo qudei nanngi mandam qaji powo ejunub deqa nanngi mareqnub, “Tamo Qotei na giltnjrej qaji nanngi nanari tamo.” Yeqnab nanari tamo nanngi dena olo mandam qaji tamo nanngi di jemai enjreqnub. Tamo singila ti unub qaji nanngi mareqnub, “Tamo Qotei na giltnjrej qaji nanngi singila saiqoji unub.” Yeqnab tamo singila saiqoji nanngi dena olo mandam qaji tamo nanngi di jemai enjreqnub. <sup>28</sup> Tamo ñam ti unub qaji nanngi mareqnub, “Tamo Qotei na giltnjrej qaji nanngi ñam saiqoji unub.” Yeqnab tamo ñam saiqoji nanngi dena olo mandam qaji tamo nanngi di ñam aguq atetnjreqnub. <sup>29</sup> Deqa iga qalieonum, Qotei aqa ñamgalaq di tamo bei na aqa segi ñam soqtqa keresai. <sup>30</sup> Qotei a segi na ningi Kristus Yesus aqa banq di atej. Deqa Kristus aqa wau na iga Qotei aqa powo ejunum. Kristus aqa wau na iga tamo bole tintin unum. Aqa wau na iga Qotei aqa segi kumbra boleq di sosim walweleqnum. Aqa wau na Qotei a gago uneq na iga awaigej deqa gago une na iga olo taqatgwa keresai. <sup>31</sup> Utru deqa iga gago segi ñam soqtqa keresai. Agi Qotei aqa anjam bei nami endegsib nenngrenyeb unu, “Tamo bei a ñam bei soqtqa marsimqa a Tamo Koba aqa ñam segi soqtme.”

## 2

### *Korin Kristen nanngi Yesus qa nanngo areqalo singilateqnub*

<sup>1</sup> O ijo was kalil, e nami nungoq bosim Qotei aqa anjam palontoqnsim merngoqnem bati deqa e mandam qaji powo na anjam palantosaiqnem. E anjam kokba laja laja palantosaiqnem. <sup>2</sup> E endegsi are qaloqnem. E nungo ambleq di sosiy Yesus Kristus aqa anjam segi merngoqnqai. A ñamburbasq di moiyej anjam di segi ningi merngoqnqai. E degsi are qaloqnem. <sup>3</sup> E nungo ambleq di soqnem bati deqa e singila saiqoji soqnem. Deqa e ulaugetoqnsim ginda gindarjoqnem. <sup>4</sup> Anjam e palontoqnem qaji di e Qotei aqa Mondor aqa singila na palontoqnem. E mandam qaji powo na anjam palontit ningi qusib are bulyqajqa deqa are qalosaiqnem. <sup>5</sup> Deqa ningi Kristus qa nungo areqalo singilateb di mandam tamo nanngo powo na sai. Di Qotei aqa singila na.

*Qotei aqa Mondor na iga powo bole egeqnu*

<sup>6</sup> Bole, Kristen qudei nanġi Qotei aqa kumbra dauryqajqa sinġila ti unub. Deqa iga nanġi anjam minjreqnam nanġi powo bole eqnub. Powo di mandam qaji powo sai. Tamo kokba padalqa gamq di unub qaji nanġo powo sai dego. <sup>7</sup> Di Qotei aqa segi powo nami ulitesoqnej qaji. Powo di iga ubtoqnsim mareqnum. Powo di aqa utru agiende. Tulaġ nami Qotei na iga laġ qureq oqwjajqa gam gereiyetgej. <sup>8</sup> Powo di mandam qaji tamo kokba nanġi poinjrosaieqnu. Nanġi poinjrej qamu nanġi na Tamo Koba laġ qureq di unu qaji a osib namburbasq di qamosai qamu. <sup>9</sup> Agi Qotei aqa anjam bei nami endegsib nengrenyeb unu, “Tamo nanġo njamdamu na laġ qure qa inġi inġi unosaieqnub. Nanġo dabkala na inġi inġi deqa quosaieqnub. Nanġo areqaloq di inġi inġi di yala sosai. Inġi inġi di Qotei na tamo unġasari a tulaġ qalaqalaiyeqnub qaji nanġi segi gereiyetnjrej unu. Deqa nanġi oqsib oqab.” <sup>10</sup> O ijo was kalil, anjam di nami uliesonaqa Qotei aqa Mondor na babtosiġ iga mergej. Qotei aqa areqalo uliejunu qaji di Mondor a segi qalie. Qalie kalil agi Mondor aqaq di unu. <sup>11</sup> Tamo bei a tamo bei aqa areqalo qalieqa keresai. Tamo aqa mondor aqa are miligiq di unu qaji a segi aqa areqalo qalie. Dego kere tamo bei a Qotei aqa areqalo qalieqa keresai. Qotei aqa Mondor a segi Qotei aqa areqalo qalie. <sup>12</sup> O ijo was kalil, iga mandam qaji mondor osai. Iga Mondor agi Qotei aqaq na bej qaji di em. Deqa laġ qure qa inġi inġi Qotei na egeqnu qaji di iga qalie. Mondor na inġi inġi di iga osorgeqnu. <sup>13</sup> Iga inġi inġi deqa anjam mare mare laqnum. Iga mandam qaji tamo nanġo powo na anjam marosaieqnum. Mondor na iga powo egeqnaqa iga anjam mareqnum. Mondor aqa anjam di iga na tamo unġasari Mondor ti unub qaji nanġi minjreqnum.

<sup>14</sup> Tamo unġasari Qotei aqa Mondor ti sosai qaji nanġi laġ qure qa inġi inġi di oqa keresai. Di kiyaaqa? Nanġi mareqnum, “Inġi inġi di nanari tamo nanġo inġi.” O ijo was kalil, inġi inġi di iga Mondor aqaq na elenejqnum. Deqa tamo unġasari Mondor ti sosai qaji nanġi inġi inġi deqa poinjrqa keresai. Tamo unġasari Mondor ti unub qaji nanġi segi inġi inġi deqa poinjrqa kere. <sup>15</sup> Od, tamo unġasari Mondor ti unub qaji nanġi inġi inġi kalil geregere pegiyeqnub. Ariya tamo unġasari nanġi di mandam tamo bei na peginjrqqa keresai. <sup>16</sup> Agi Qotei aqa anjam bei nami endegsib nengrenyeb unu, “Tamo yai a Qotei aqa areqalo qalieqa kere? Osim a gam osoryqa kere? Tamo dego bei sosai.” Ariya iga Kristus aqa areqalo ejunum.

### 3

*Pol Apolos wo nanġi Qotei aqa wau tamo bole*

<sup>1</sup> O ijo was kalil, e nungo ambleq di soqnem bati deqa ningi Kristus aqa kumbra geregere qalieosaisoqneb. Ningi angro mom bul soqneb. E na tamo ungasari Qotei aqa Mondor dauryeqnub qaji nanngi anjam damu ti minjreqnum. Ariya ningi areqalo namij dauryoqneb deqa e na anjam damu ti ningi merngwa yeqnam ugeiboqnej. <sup>2</sup> Ningi angro mom bul soqneb deqa ningi damu uyqa keresai. Deqa e ningi damu anaingosaiqnem. E ningi mungum anaingqnem. Agi bini ningi damu uyqa keresai unub. <sup>3</sup> Ningi areqalo namij dauryoqnsib unub. Agi ningi nungo Kristen was nanngi qa are ugeingeqnaqa koba na anjam na qotoqnsib laqnub. Nungo kumbra di jejamu qa kumbra uge. Di mandam tamo nanngo kumbra. <sup>4</sup> Agi ningi qudei mareqnub, “E Pol dauryo qaji tamo.” Ningi qudei mareqnub, “E Apolos dauryo qaji tamo.” O ijo was kalil, nungo kumbra di mandam tamo nanngo kumbra.

<sup>5</sup> Apolos a tamo kiyero? E Pol e segi tamo kiyero? Aqo aiyel Qotei aqa wau tamo segi. Tamo Koba a na aqo aiyel wau segi segi egej. Deqa iga aqa anjam ningi merngonam qusib Yesus qa nungo areqalo singilateb. <sup>6</sup> E wauq di ingi yagonam Apolos a ingiq di ya atej. Ariya Qotei a segi na ingi boletej. <sup>7</sup> Deqa tamo ingi yageqnu qaji a ñam saiqoji unu. Tamo ingiq di ya ateqnu qaji a dego ñam saiqoji unu. Ariya Qotei ingi boleteqnu qaji a segi ñam koba ti unu. <sup>8</sup> Tamo ingi yageqnu qaji wo tamo ingiq di ya ateqnu qaji wo nanngi aiyel ombla Qotei aqa wau ojeqnub. Mondonj Qotei na nanngo wau segi segi pegiyosim awai enjrqas. <sup>9</sup> Aqo aiyel Qotei ombla wau ojeqnum. Qotei aqa ingi wau agi ningi.

*Qotei aqa wau tamo nanngi tal gereiyo qaji tamo bul*

Ningi Qotei aqa tal bul unub. <sup>10</sup> Qotei a e qa are boleiyosiq wau ebej deqa e tal gereiyo qaji tamo bul unum. E tal gereiyqajqa qalie bole deqa e tal aqa utru atem. E tal aqa utru atem deqa tamo qudei nanngi olo tal ai gogeq di tal ateqnub. Deqa e nanngi endegsi minjreqnum, “Ningi tal geregere ateqniy.” <sup>11</sup> O ijo was ningi qalie, Qotei na Yesus Kristus osiq a tal ai tuma qaji bul tigeltej unu. Deqa tamo qudei na olo tal ai tuma qaji bei ataib. Yesus a segi qujai tal ai tuma qaji bole. <sup>12</sup> Ariya tamo nanngi tal ai gogeq di tal atqa oqnsib gol na ti silva na ti meninj naimyo na ti ñamtañ na ti liki na ti ingi ñengi aqa sau na ti tal ateqnub. <sup>13</sup> Mondonj Qotei na tamo nanngi peginjro batiamqa a ñamyuwo bulosim tamo kalil nanngo wau segi segi boleq atsim pegiyosim nanngo wau bole kiyo uge kiyo di unqas. <sup>14</sup> Tamo qudei nanngo wau di ñamyuwo na yugwasai deqa nanngi awai bole oqab. <sup>15</sup> Tamo qudei nanngo wau di ñamyuwo na yuelenqas deqa nanngo wau kalil torei loumqas. Ariya tamo

nanği di padalqasai. Nanği nıamyuwoq di padalqa jomomoqniş Qotei na nanği dena olo elenqas.

*Ninği Qotei aqa atra tal bul unub*

<sup>16</sup> Ninği Qotei aqa atra tal bul unub. Qotei aqa Mondor a nunęo ambleq di unu. Di ninği qaliesai kiyo? <sup>17</sup> Qotei aqa atra tal di ağı ninği. Deqa tamo bei na atra tal di ugeugeiyqas di Qotei na kamba tamo di ugeugeiyqas.

*Iga tamo nanęo ñam soqtqasai*

<sup>18</sup> Ninği nunęo segi jejamu gisanıyaib. Ninği qudei mandam qaji powo ti sosib endegsib are qaleqñub kiyo, “E powo koba ti unum”? Di sai. Ninği endegsib mariy, “Bole, e nanari tamo.” Degsib marib Qotei na olo powo enęimqa dena ninği powo bole oqab. <sup>19</sup> Tamo nanği mandam tamo nanęo powo ti unub qaji nanği Qotei aqa nıamgalaq di nanari tamo unub. Ağı Qotei aqa anjam bei nami endegsib nenęrenıyeb unu, “Tamo nanği mandam tamo nanęo powo ti unub qaji nanği kumbra uge uge yeqñub. Yeqñab Qotei a kamba nanği padaltnıreqñu.” <sup>20</sup> Anjam bei deęo unu,

“Tamo nanği mandam tamo nanęo powo ti unub qaji nanęo areqalo Tamo Koba a segi qalie.  
A qalie, nanęo areqalo di uge deqa nanği wau bei bei yeqñab ugeınıreqñu.”

<sup>21</sup> Deqa ninği na mandam tamo nanęo ñam soqtoqñuib. İnęi inęi kalil di nunęo. <sup>22</sup> Apolos, Pita, e Pol, mandam, nıambile, moiyo, inęi inęi kalil bini unub qaji ti inęi inęi kalil bunuqñna brantelenqab qaji ti di nunęo. <sup>23</sup> Ariya ninği Kristus aqa. Kristus a Qotei aqa.

## 4

*Qotei a segi na aqa wau tamo nanği pegınıreqñu*

<sup>1</sup> O ijo was kalil, aqo Apolos wo iga Kristus aqa wau tamo. Iga Qotei aqa wau taqateqñum. Gago wau aęiende. Iga Qotei aqa uli anjam mare mare laqñum. Ninği iga qa degsib are qaloqñiy. <sup>2</sup> Ninği qalie, wau taqato tamo a na wau lanja aqa medabu dauryoqñqas. Deęo kere e Qotei aqa medabu dauryeqñum. <sup>3</sup> Deqa anjam pegiyo tamo bei na kiyo ninği na kiyo ijo kumbra pegiyqab di unęum. E deqa yala are qalqasai. E segi deęo ijo kumbra pegiyosaieqñum. <sup>4</sup> Ijo kumbra uge bei unu kiyo di e geregere poibosai. Ariya e une saiqoıi unum degsi marqa keresai. Tamo Koba a segi na e pegıbqas. <sup>5</sup> Pegiyo bati brantosaiunu deqa ninği na tamo qudei nanği pegınıroqñuib. Ninği mati tarınęesoqñıbqa mondoı Tamo Koba a bosımqa a segi na inęi inęi kalil ambruq di ulieıunub qaji di suwanıoq di atqas. Osim tamo kalil nanęo areqalo deęo boleq

atqas. Yim bati deqa Qotei a gago segi segi kumbra unsim bole kiyo sai kiyo deqa mergwas.

*Korin Kristen nan̄gi nan̄go segi ñam soqteq̄nub*

<sup>6</sup> O ijo was kalil, aqo Apolos wo gago kumbra qa agi e na niñgi mern̄gonum. Di kiyaaqa? Niñgi Qotei aqa anjam nen̄gren̄q̄ di unu qaji de ti olo anjam qudei ti turtosib diqoq̄naib deqa. Osib tamo qudei nan̄go ñam soqtoq̄nsib olo tamo qudei nan̄go ñam aguq̄ atoq̄naib deqa. <sup>7</sup> Niñgi gate kokba unub e? Sai. Nun̄go in̄gi bole kiye Qotei na niñgi en̄gosai? Nun̄go in̄gi in̄gi kalil agi Qotei na niñgi en̄gej. Deqa niñgi kiyaaqa mareq̄nub, “Iga gago segi siñgila na in̄gi in̄gi kalil di ejunum”? Niñgi kiyaaqa nun̄go segi ñam soqteq̄nub?

<sup>8</sup> Agi niñgi are qaleq̄nub, “Iga in̄gi in̄gi kalil kere na unum. Iga ñoro koba ejunum. Deqa iga na Pol Apolos wo nan̄gi aiyel bun̄jrsimqa iga segi mandor kokba bulonum.” O was niñgi deqsib are qalaib. Niñgi mandor kokba bulonub qamu e niñgi qa tulan̄ areboleboleibqoqa Apolos ombla na niñgi betern̄gosim niñgi koba na mandor kokba bulonum qamu. <sup>9</sup> Ijo areq̄alo agiende. Iga Yesus aqa anjam maro tamo unum deqa Qotei na gago ñam tulan̄ aguq̄ atej. Deqa iga tamo uge nan̄gi bulonum. Tamo uge nan̄gi agi anjam pegiyo tamo a na une ti qa minjroq̄nsiq̄ moyotn̄jreq̄nu. Od, a na mandam tamo ti lan̄ an̄gro ti nan̄go ñamgalaq̄ di nan̄gi moyotn̄jreq̄nu. O ijo was kalil, iga tamo uge nan̄gi di bulonum. <sup>10</sup> Iga Kristus aqa ñam osi laq̄num deqa iga nanari tamo bulonum. Ariya niñgi powo ti sosib deqa niñgi Kristus qa qalie bole. Iga siñgila saiqōji unum. Ariya niñgi siñgila ti unub. Iga ñam saiqōji unum. Ariya niñgi ñam ti unub. <sup>11</sup> Iga nami mam ti ya qar ti soqnem agi bini unum. Iga gara bolesai. Tamo qudei na iga ugeugeigeq̄nub. Iga tal saiqōji. <sup>12</sup> Iga ñes na ti gago segi ban̄ na ti wauoq̄nsim unum. Tamo qudei na iga mis-ilingeq̄nab iga kamba olo nan̄gi qa pailyeq̄num. Tamo qudei na iga ugeugeigeq̄nab iga gulbe di qoboiyeq̄num. <sup>13</sup> Tamo qudei na iga yomuigeq̄nab iga kamba olo nan̄gi anjam bole minjreq̄num. Iga tamo sougetejunub qaji nan̄gi bulonum. Iga tamo un̄gasari kalil nan̄go ñamgalaq̄ di in̄gi tulan̄ jigat bulosim unum. Iga nami degsi soqnem agi bini unum.

*Pol na Korin Kristen nan̄gi minjrej, “Niñgi ijo kumbra dau-ryiy”*

<sup>14</sup> O ijo was, niñgi ijo anjam endi sisiyosib jemain̄gwajqa e deqa nen̄gren̄yosai. E nun̄go areq̄alo tingitet̄ngwajqa deqa osim anjam endi nen̄gren̄yonum. Niñgi ijo an̄gro bole. E niñgi tulan̄ qalaq̄alain̄geq̄num. <sup>15</sup> Nun̄go abu qujai agi e segi. Nun̄go abu gargekoba sai. Tamo 10,000 nan̄gi na Kristus aqa kumbra

ninji osornjoqñqab di unğum. E qujai Kristus Yesus aqa anjam bole ninji mernjonam qusib are bulyeb. Dena e nuñgo abuem. <sup>16</sup> Deqa e ninji endegsi mernğwai. Ninji ijo kumbra kalil dauryoqñiy. <sup>17</sup> Utru deqa e Timoti qarinyonum a nuñgoq bqo. E nami Tamo Koba aqa anjam Timoti minjnam a are bulyej. Deqa a ijo anğro bole. E a tulañ qalaqalaiyeqnum. A nuñgoq bosim ijo kumbra qa ninji saingim quqwab. Ijo kumbra agiende. E Kristus beteryesosim a dauryeqnum. Ijo kumbra di e na sawa sawa kalilq di Kristen nanji osornjreqnum.

<sup>18</sup> Ariya ninji qudei endegsib are qaleqñub, “Pol a gagoq bqasai.” Osib ninji diqoqñsib laqñub. <sup>19</sup> O was ninji degaib. Tamo Koba a na odbimqa e nuñgoq urur boqujatqai. Tamo nanji diqoqñsib laqñub qaji nanjo siñgila qabe na eqñub di unqajqa bqai. E nanjo anjam maro laña quqwajqa bqasai. <sup>20</sup> Ninji qalie, Qotei a gago Mandor Koba sosiq iga taqatgeqnu. A laña anjam maro na iga taqatgosaieqnu. A siñgila na iga taqatgeqnu. <sup>21</sup> Nuñgo are kiyersiq unu? E nuñgoq bosiy nirinğosiy tingitğwai kiyo e bosiy ninji qalaqalaingosiy lawo na gereingwai kiyo? Ninji segi mariy.

## 5

### *Sambala kumbra a Korin Kristen nanjo ambleq di unu*

<sup>1</sup> O ijo was kalil, e anjam bei endegsi quem. Nuñgo ambleq di tamo bei a sambala kumbra yeqnu. Aqa sambala kumbra di tulañ ugedamu. Tamo nanji Qotei qaliesai qaji nanji sambala kumbra deqaji yosaieqñub. Aqa sambala kumbra agiende. A na aqa abu aqa njaun oqñsiq ombla sambalaeqñub. <sup>2</sup> Ninji aqa sambala kumbra deqa are ugeingosaieqnu, Ninji akamosaieqñub. Ninji diqoqñsib laqñub. Ninji are ugeingej qamu ninji tamo di osib nuñgo ambleq dena taqal waiyeb qamu.

<sup>3</sup> E ninji koba na sosai. E isaq endi unum. Ariya ninji ijo are miligiq di unub deqa e ninji ti sobulejunum. Deqa e sambala tamo di aqa une qa pegiyonum koboqo. <sup>4</sup> E ninji endegsi mernğwai. Ninji gago Tamo Koba Yesus aqa ñam na korooiy. Yim koroq di e ninji ti sobulitqa Tamo Koba Yesus aqa siñgila dego nuñgoq di sqas. <sup>5</sup> Ninji koroesosibqa tamo di ojsib Satan aqa bañq di atibqa Satan na a osim aqa jejamu gulbe yqas. Yim mondoñ Tamo Koba Yesus a bqajqa batiamqa Qotei na tamo di aqa qunun olo oqas.

### *Pol na Kristen nanji minjrej, “Ninji tamo uge di wiyiy”*

<sup>6</sup> Ninji nuñgo segi ñam soqteqñub di kumbra bolesai. Ninji qalie, tamo nanji sum kiñala oqñsib bem ti bulyeqñab bem tiyekritoqñsiq tulañ kobaqujaeqnu. <sup>7</sup> Deqa ijo was kalil, ninji bem tiyeqñu qaji sum namij di taqal atiy. Osib dena ninji olo

bem bunuj bulosib sum saiqoji sqab. E qalieonum, ningi sum saiqoji unub koboqo. Di kiyaaqa? Jeu tamo nanji na Kristus qalnab a kaja du bulosiq gago une qa moisiq aqa len aiyej. Juda nanjo yori bati koba qa nanji Yesus degyeb. <sup>8</sup> Deqa iga yori bati koba di unqom. Unsim bem tiyeqnu qaji sum namij di taqal atsim olo bem bunuj sum saiqoji unu qaji di oqom. Sum namij di kumbra uge ti une ti sigitejunu. Bem bunuj sum saiqoji unu qaji di are bole ti anjam bole ti sigitejunu.

<sup>9</sup> E nami anjam endegsi nenjrenjosim nunjoq qarinyem, “Ningi sambala tamo nanji koba na laqnaib.” <sup>10</sup> O ijo was, e na tamo Yesus qaliesai qaji nanji qa ningi degsi mernjosai. Ningi nanji koba na laqnqa kere. Tamo sambalaeqnu qaji nanji ti tamo ñoro qa maulnjreqnu qaji nanji ti tamo gisan na silali eqnub qaji nanji ti tamo gisan qotei qa loueqnub qaji nanji ti ningi nanji koba na laqajqa e deqa ningi saidnjosai. Ningi nanji koba na laqasai di ningi torei mandam uratqab. Di keresai. <sup>11</sup> Ariya tamo bei a marqas, “E nunjo Kristen was bole.” Osim a olo sambala kumbra yqas kiyo, tamo bei aqa ñoro qa maulyqas kiyo, gisan qotei qa louqas kiyo, tamo nanji misilijnjqas kiyo, ya uge uyoqnsim nanarioqnqas kiyo, gisan na tamo nanjo silali yainjqas kiyo a kumbra degyimqa ningi a ombla laqnaib. Ningi a ombla inji uyoqnaib dego. Agi e nami anjam deqa nenjrenjosim nunjoq qarinyem. <sup>12-13</sup> Deqa e na tamo Yesus qaliesai qaji nanjo une qa peginjrqai e? Sai. Di ijo wau sai. Di Qotei aqa wau. Ariya Kristen nanjo une qa peginjrqajqa wau di nunjo wau tintinj. Deqa ningi tamo uge di osib nunjo ambleq dena taqal waiyiy.

## 6

### *Ningi nunjo Kristen was bei osib anjam pegiyo talq gilalib*

<sup>1</sup> Ningi qudei kumbra uge endegsib yeqnu. Ningi nunjo Kristen was bei qa anjam soqnim a osib anjam pegiyo tamo Qotei qaliesai qaji nanjo ulatamuq di tigeltqab. Ningi a osib Qotei aqa tamo ungasari nanjo ulatamuq di tigeltqab di kere. Ariya ningi degyosaieqnu. Nunjo kumbra uge deqa ningi jemaingosaieqnu. <sup>2</sup> Iga Qotei aqa segi tamo ungasari unum deqa mondon iga na tamo kalil mandamq endi unub qaji nanjo une qa peginjrqom. Di ningi qaliesai kiyo? Iga degyqom deqa kiyaaqa ningi nunjo Kristen was nanjo anjam kiñilala qudei qa nanji peginjrqas keresai? <sup>3</sup> Mondon iga lan anjo nanjo une qa dego peginjrqom. Ningi di qaliesai kiyo? Iga degyqom deqa e endegsi are qalonum, iga mandamq endi gago Kristen was nanjo anjam kalil dego pegiyqa kere. <sup>4</sup> Deqa ningi Kristen was bei qa anjam soqnim kiyaaqa ningi na a osib anjam pegiyo tamo Qotei qaliesai qaji nanjoq gilqab?



Anjam pegiyo tamo nan̄gi di Kristen tamo sai. <sup>5</sup> E anjam endi nin̄gi mer̄ngonum. Di kiyaaqa? Nin̄gi nun̄go kumbra uge deqa jemaingim uratqajqa deqa. Nun̄go ambleq di powo tamo bei unu kiyo? Sqas di Kristen was bei a was bei qa anjam soqnim powo tamo dena nan̄go anjam pegiyqa kere. <sup>6</sup> Kiyaaqa Kristen was bei a was bei osim anjam pegiyo tamo Yesus qa nan̄go areqalo singilatosaieqnu b qaji nan̄goq gilsim nan̄go ulatamuq di tigeltqas?

<sup>7</sup> Nin̄gi nun̄go Kristen was bei qa anjam soqnim a osib anjam pegiyo tamo nan̄goq gilqab di kumbra uge. Nun̄go kumbra dena nin̄gi Yesus dauryqajqa uratosib ulon̄qab. Nin̄gi nun̄go Kristen was bei qa anjam soqnim, un̄gum, nin̄gi a uratib une en̄gem. Osim nun̄go in̄gi in̄gi bajin̄em. <sup>8</sup> Ariya nin̄gi degyosaieqnu b. Nin̄gi segi kamba olo nun̄go Kristen was nan̄gi kumbra uge en̄jroqnsib nan̄go in̄gi in̄gi gisañ na yain̄jreqnu b.

<sup>9-10</sup> Tamo un̄gasari kumbra uge uge yeqnu b qaji nan̄gi Qotei na taqatn̄rsim nan̄go Mandor Koba sqasai. Di nin̄gi qalie-sai kiyo? O ijo was nin̄gi na nun̄go segi jejamu gisañyaib. Tamo sambala kumbra yeqnu b qaji nan̄gi ti, tamo gisañ qotei qa loueqnu b qaji nan̄gi ti, tamo was bei aqa ñauñ jejamu ojeteqnu b qaji nan̄gi ti, tamo un̄a wo ñereñqa uratoqnsib olo tamo bei bei wo ñereñeqnu b qaji nan̄gi ti, bajin̄ tamo nan̄gi ti, tamo was bei aqa in̄gi in̄gi qa mamaul̄njreqnu qaji nan̄gi ti, tamo ya uge uyoqnsib nanarieqnu b qaji nan̄gi ti, tamo was bei yomuiyeqnu b qaji nan̄gi ti, tamo was bei aqa silali gisañ na yayieqnu b qaji nan̄gi ti, tamo deqaji kalil nan̄gi Qotei na taqatn̄rsim nan̄go Mandor Koba sqasai. <sup>11</sup> Nami nin̄gi qudei tamo uge deqaji soqneb. Ariya bunuqna Qotei na nun̄go are miligi yanset̄ngosiqqa nin̄gi aqa segi kumbra boleq di atej. Atsiqa Tamo Koba Yesus Kristus aqa ñam na ti gago Qotei aqa Mondor aqa singila na ti nin̄gi tamo bole une saiqoji qa mer̄njej.

*Nun̄go jejamu a Qotei aqa Mondor aqa atra tal bul unu*

<sup>12</sup> Kristen qudei nan̄gi mareqnu b, “E kumbra gargekoba yqa kere. Dal anjam na getentosai.” Di nan̄gi bole mareqnu b. Ariya e kumbra qudei yoqn̄qai dena e aqaryaibqa keresai. Od, e kumbra gargekoba yqa kere. Ariya e kumbra bei aqa sorgomq di sqasai. <sup>13</sup> Tamo qudei nan̄gi mareqnu b, “In̄gi uyo aqa wau agi aisim meneq di sqas. Mene aqa wau agi in̄gi uyqas.” Di nan̄gi bole mareqnu b. Ariya mondon̄ Qotei na in̄gi uyo ti mene ti di torei kobotqas. Gago jejamu di sambala kumbra yqajqa sai. Gago jejamu di Tamo Koba aqa. A segi na taqateqnu. <sup>14</sup> Qotei aqa singila na a Tamo Koba olo subq na tigeltej. Deqa mondon̄ a na iga dego tigeltgwas.

<sup>15</sup> Nungo jejamu di Kristus aqa jejamu qujai. Di ningi qaliesai kiyo? Deqa e Kristus aqa jejamu osiy sambala uña aqa jejamuq di betertqai di kumbra bolesai. <sup>16</sup> Tamo bei a sambala uña wo betertqab di a uña de wo jejamu qujaitosib sqab. Di ningi qaliesai kiyo? Agi Qotei aqa anjam bei nami endegsib nenngrenyeb unu, “Tamo bei aqa nñauñ wo beterosib nanngi jejamu qujaitosib sqab.” <sup>17</sup> Ariya tamo bei a Tamo Koba Yesus wo betertqab di nanngi aiyel Mondor qujai ti sqab. <sup>18</sup> Deqa ijo was, ningi gaigai sambala kumbra uratoqnsib isaq giloqniy. Une kalil tamo nanngi yeqñub qaji di nanngo jejamuq di beterosaieqñu. Ariya sambala kumbra a tamo nanngo jejamuq di beteroqnsiq nanngo jejamu ugeteqñu. <sup>19</sup> Nungo jejamu di Mondor Bole aqa atra tal bul unu. Qotei a segi na Mondor di ningi engej deqa a nunngo are miligiq di unu. Ningi di qaliesai kiyo? Nungo jejamu di nunngo segi jejamu sai. Di Qotei aqa jejamu. <sup>20</sup> Qotei a awai kobaquja na ningi awaingej. Deqa kumbra kalil ningi yeqñub qaji di ningi Qotei aqa ñam soqtqa are qaloqnsib yoqniy.

## 7

### *Uña oqajqa anjam*

<sup>1</sup> Ariya anjam qudei ningi nenngrenyosib ijoq qarinyeb qaji deqa kamba merngwai. Anjam bei agi uña oqajqa anjam. Deqa merngwai. Tamo nanngi laña sosib uña oqa uratqab di kumbra bole. <sup>2</sup> Ariya sambala kumbra kobaaime deqa ningi segi segi uña oiy. Uña ningi dego segi segi tamo oiy. <sup>3</sup> Tamo aqa jejamu di aqa nñauñ qa. Deqa a aqa jejamu getentaiq. Uña aqa jejamu di dego aqa gumbuluñ qa. Deqa a aqa jejamu getentaiq. <sup>4</sup> Uñgasari nanngi na nanngo segi jejamu taqato-saieqñub. Nanngo jejamu di nanngo gumbuluñ na taqateqñub. Tamo nanngi dego nanngo segi jejamu taqatosaiieqñub. Nanngo jejamu di nanngo nñauñ na taqateqñub. <sup>5</sup> Deqa ningi nunngo jejamu getentaib. Ariya bati bei ningi nunngo uña wo ombla areqalo qujaitosib pailyqa bati atsib di ningi nunngo jejamu getentosib pailyoqniy. Bunuqna pailyo bati koboamqa ningi nunngo jejamu olo turtiy. Ningi nunngo segi jejamu geregere taqatqa keresai deqa Satan na ningi osim sambala kumbraq di olo breiñgo uge. <sup>6</sup> Ijo anjam di e ningi aqaryaingwa osim deqa merngonum. E siñgila na merngosai. <sup>7</sup> Ijo are endegsi unu. Tamo kalil nanngi e bul laña sqab di bole. Ariya Qotei na tamo nanngi siñgila segi segi enjreqñu. A na tamo qudei nanngi siñgila bei enjreqñu. Osiqa tamo qudei nanngi siñgila bei enjreqñu.

<sup>8</sup> Ariya tamo uña osai qaji nanngi ti uña tamo osai qaji nanngi ti e na anjam endegsi minjrqai. Uña qobul nanngi dego e na anjam endegsi minjrqai. Ningi e bul laña sqab di bolequja.

<sup>9</sup> Ariya ningi nungo segi jejamu taqatqa keresaiamqa ningi unja oiy. Ningi tamo oiy. Ningi sambala kumbra yqajqa are tulan prugngqoqnas di kumbra bolesai.

<sup>10</sup> Ningi tamo ti unja ti unub qaji e na anjam endegsi merngwai. E segi na merngwasai. Tamo Koba a dego ningi merngwas. Anjam agiende. Unja nanngi na nango tamo nanngi uratnjraib. <sup>11</sup> Ariya unja bei na aqa tamo uratqas di a olo tamo bei aiq. A lanja soqnem. Saiamqa a na aqa tamo nami uratej qaji di olo eme. Tamo nanngi dego nango unja nanngi uratnjraib.

<sup>12</sup> Ningi qudei e na anjam endegsi merngwai. Anjam endi Tamo Koba aqa anjam sai. E segi na merngwai. Ni Kristen tamo. Ariya ino njan a Kristen unja sai. Di ungun. Ni a urataim. A ni ombla sqa are soqnim ni a urataim. <sup>13</sup> E unja nanngi dego anjam di minjraqai. Ni Kristen unja. Ariya ino gumbulun a Kristen tamo sai. Di dego ungun. Ni a urataim. A ni ombla sqa are soqnim ni a urataim. <sup>14</sup> Ningi quiy. Tamo bei a Yesus qa aqa areqalo singilatosaiosim Kristen unja oqas. Kumbra dena a Kristen nango miligiq aisim Qotei aqa jomq di sqas. Unja bei dego a Yesus qa aqa areqalo singilatosaiosim Kristen tamo oqas. Kumbra dena a Kristen nango miligiq aisim Qotei aqa jomq di sqas. Degsi sosai qamu nango angoro nanngi Qotei aqa nangalaq di jiga ti so qamu. Ariya nanngi Kristen nango miligiq di unub deqa nango angoro nanngi Qotei aqa jomq di unub. <sup>15</sup> Ariya Kristen tamo bei aqa unja a Yesus qa aqa areqalo singilatosai deqa unja dena a uratqa marsim uratem. Tamo a deqa gulbe oqasai. Qotei na odyqas. Kristen unja dego aqa tamo a Yesus qa aqa areqalo singilatosai deqa tamo dena a uratqa marsim uratem. Unja a dego gulbe oqasai. Qotei na odyqas. Qotei a ningi kalil koba na geregere lawo na sqajqa osiq metngeqnu. Deqa ningi ijo anjam di dauryiy. <sup>16</sup> O Kristen unja, ni ino gumbulun Qotei aqa anjam minjimqa a are bulyqas kiyo sai kiyo di ni qalieqasai. O Kristen tamo, ni dego ino njan Qotei aqa anjam minjimqa a are bulyqas kiyo sai kiyo di ni qalieqasai.

*Qotei na iga gam segi segi dauryqa marsiq giltgej*

<sup>17</sup> Qotei na nami iga gam segi segi dauryqa marsiq giltgej deqa iga gam di dauryoqnsim sqom. Gam kiye Qotei na iga dauryqa metgej qaji di segi dauryqom. Ijo anjam di e na Kristen tamo ungasari qure qure kalilq di unub qaji nanngi minjre minjre laqnum. <sup>18</sup> Ningi qudei nami mulun aisib sonabqa Qotei na ningi metngej deqa ningi degsib soqniy. Ningi qudei nami mulun aiyosai sonabqa Qotei na ningi metngej deqa ningi dego degsib soqniy. <sup>19</sup> Ningi nami mulun aiyeb kiyo ningi mulun aiyosai kiyo di lanja. Ningi Qotei aqa dal anjam dauryqab di kumbra bole utru ti. <sup>20</sup> Iga nami kiyersim

sonamqa Qotei na iga metgej degsim sqom. <sup>21</sup> Niŋgi qudei kaŋgal tamo sonabqa Qotei na niŋgi metŋgej. Ariya niŋgi deqa are gulbeŋgaiq. Niŋgi kaŋgal tamo soqniy. Bunuqna niŋgi kaŋgal tamo sqa uratosib olo nuŋgo segi wau ojqa gam soqnimqa degyiy. <sup>22</sup> Tamo naŋgi kaŋgal tamo sonabqa Qotei na metnjrej qaji naŋgi Tamo Koba aqa. Deqa naŋgi aqa ŋamgalaq di kaŋgal tamo sosai. Dego kere tamo naŋgi kaŋgal tamo sosai sonabqa Qotei na metnjrej qaji naŋgi olo Kristus aqa kaŋgal tamo unub. <sup>23</sup> Qotei a awai kobaquja na niŋgi awaiŋgej deqa niŋgi mandam tamo bei aqa kaŋgal tamo saib. <sup>24</sup> O ijo was kalil, iga nami kiyersim sonamqa Qotei na iga metgej degsim olo Qotei ombla sqom.

*Pol a tamo uŋa osai qaji naŋgi ti uŋa tamo osai qaji naŋgi ti anjam minjrej*

<sup>25</sup> Ariya e na tamo uŋa osai qaji naŋgi ti uŋa tamo osai qaji naŋgi ti anjam bei minjrqi. Anjam endi Tamo Koba aqa anjam sai. E ijo segi areqalo na naŋgi minjrqi. Qotei a e qa dulej deqa e qalieonum, ijo anjam endi bole. <sup>26</sup> E endegsi are qalonum. Bini bati endi gulbe kokba bqa jojomeqnu. Deqa niŋgi kalil kiyersib unub degsib olo soqniy. <sup>27</sup> Niŋgi uŋa ti unub qaji niŋgi degsib soqniy. Niŋgi nuŋgo uŋa uratqa gam ŋamaib. Niŋgi uŋa osai qaji niŋgi dego degsib soqniy. Niŋgi uŋa oqa are qalaib. <sup>28</sup> Niŋgi uŋa ti tamo ti oqab di niŋgi une yosai. Dungeŋge naŋgi dego tamo oqab di naŋgi une yosai. Ariya tamo uŋa ejunub qaji naŋgi ti uŋa tamo ejunub qaji naŋgi ti gulbe itoqnqab. Naŋgi gulbe di itaib deqa e na anjam endi naŋgi minjronum.

<sup>29</sup> O ijo was kalil, diŋo bati jojomoqo deqa e na niŋgi endegsi merngwai. Tamo uŋa ti unub qaji naŋgi uŋa saiqoji so bul soqnebe. <sup>30</sup> Tamo akameqnu qaji naŋgi akamosai bul soqnebe. Tamo areboleboleinjreanu qaji naŋgi areboleboleinjrosai bul soqnebe. Tamo iŋgi iŋgi awaiyeqnu qaji naŋgi iŋgi iŋgi saiqoji so bul soqnebe. <sup>31</sup> Tamo mandam qa iŋgi iŋgi qa wauqnu qaji naŋgi iŋgi iŋgi qa wauosai bul soqnebe. Niŋgi qalie, sokiŋala mandam ti iŋgi iŋgi kalil ti torei koboekritqab.

<sup>32</sup> Ijo are endegsi unu. Niŋgi mandam qa iŋgi iŋgi qa are qaloqnaib. Niŋgi qalie, tamo uŋa ti sosai qaji naŋgi Tamo Koba aqa kumbra torei dauryqajqa are qaleqnu. Deqa kumbra kalil Tamo Koba a tulaŋ areareteqnu qaji di naŋgi yeqnu. <sup>33</sup> Ariya tamo uŋa ti unub qaji naŋgi mandam qa iŋgi iŋgi qa are qaleqnu. Deqa kumbra kalil naŋgo uŋa a areareteqnu qaji di naŋgi yeqnu. <sup>34</sup> Deqa naŋgi areqalo aiye aiyelteqnu. Dungeŋge naŋgi ti uŋa tamo osai qaji naŋgi ti dego Tamo Koba aqa kumbra torei dauryqajqa are qaleqnu. Deqa naŋgi naŋgo segi jejamu ti qunuŋ ti torei Qotei yekriteqnu. Ariya

uŋa tamo ti unub qaji naŋgi mandam qa iŋgi iŋgi qa are qaleqnu. Deqa kumbra kalil naŋgo tamo a areareteqnu qaji di naŋgi yeqnu. <sup>35</sup> E niŋgi aqaryaiŋgwa osim deqa anjam di merngonum. E niŋgi gulbe eŋgwa osim anjam di merngosai. Deqa niŋgi quiy. Niŋgi kumbra bole bole dauryoqnsib gaigai Tamo Koba aqa wau ojoqniy. Mandam qa iŋgi iŋgi na niŋgi titŋgaiq.

<sup>36</sup> Tamo bei aqa duŋge a kobaqujaosim tamo oqa kereamqa a endegsi are qalqas, “Ijo duŋge a laŋa sqa keresai. Deqa uŋgum, a tamo em. E na a tamo oqa getentqasai.” A degsi are qalqas di kere. A une atosai. <sup>37</sup> Ariya tamo bei aqa are miligiq di siŋgilaosim marqas, “E bole qalieonum, ijo duŋge a laŋa sqa kere. Deqa e na getentqai. Yim a tamo oqasai.” A degsi marsimqa aqa segi areqalo dauryosim aqa duŋge getentqas di kere. A dego une atosai. <sup>38</sup> Deqa tamo bei na aqa duŋge odyim a tamo oqas di a kumbra bole yqo. Ariya tamo bei na aqa duŋge getentim a tamo oqasai di a kumbra tulan boledamu yqo.

<sup>39</sup> Uŋa bei aqa tamo a moiyoaisoqnimqa uŋa dena a uratqa keresai. Aqa tamo a moiyimqa a olo tamo bei oqa are soqnim a na oqa kere. Ariya a Kristen tamo segi em. <sup>40</sup> Ijo areqalo agiende. A olo tamo bei oqa uratosim laŋa sqas di a areboleboleiyqas. Qotei aqa Mondor ijoq di unu deqa e anjam di niŋgi merngonum.

## 8

### *Sulum atrainjro qaji iŋgi uyqajqa kumbra*

<sup>1</sup> O ijo was kalil, e sulum atrainjro qaji iŋgi uyqajqa kumbra qa niŋgi merngwai. Bole, iga kalil powo ti unum. Ariya iga olo diqoqnsim gago segi ñam soqtoqnqom di uge. Iga qalaqalaiyo kumbra dauryosim gago Kristen was naŋgi siŋgilatnjroqnqom di kere. <sup>2</sup> Tamo bei a marqas, “E powo ti unum.” A degsi marqo deqa iga qalieonum, aqa powo kereosaiunu. <sup>3</sup> Ariya tamo bei a Qotei qalaqalaiyoqnqas di Qotei a tamo deqa poiyqas.

<sup>4</sup> Deqa e sulum atrainjro qaji iŋgi uyqajqa kumbra qa niŋgi endegsi merngwai. Mandamq endi sulum naŋgi unub di naŋgi gisaŋ qotei laŋa sigiteqnu. Iga qalie, Qotei bole a segi qujai unu. Qotei bei sosai. <sup>5</sup> Tamo qudei naŋgi mareqnu, “Qotei gargekoba unub. Tamo kokba dego gargekoba unub.” Tamo qudei naŋgi degsib mareqnu di uŋgum. Lanq di, mandamq di qotei deqaji naŋgi unub di laŋa. <sup>6</sup> Iga qalieonum, Qotei qujai unu. A gago Abu. A iŋgi iŋgi kalil qa utru. Iga aqa segi tamo uŋgasari tiŋtiŋ unum. Tamo Koba qujai dego unu. Di

Yesus Kristus. A ingi ingi kalil atelenjej. Iga kalil aqaq dena nambile em.

<sup>7</sup> Ariya Kristen qudei nangi anjam deqa geregere poinjrosai unu. Nangi nami ingi uyo elenjoqnsib gisanj qotei nanngo sulum atrainjroqneb. Deqa bini nangi ingi di uyqa oqnsib are gul-beinjreqnaga endegsib are qaleq nub, “Iga sulum atrainjro qaji ingi di uyqom di iga sulum nangi olo atrainjrobulqom. Dena iga une oqom.” Nangi degsib are qaleq nub. <sup>8</sup> Bole, gago ingi uyo na iga Qotei aqa areq gilqa keresai. Iga ingi getentqom dena iga Qotei aqa nangalaq di une ti sqasai. Iga ingi uyqom dena iga tamo bole sqasai dego. <sup>9</sup> Ningi geregere are qaliy. Ningi ingi bei uyqa are soqnim uyiy. Di une sai. Ariya ningi ingi di uyibqa Kristen was qudei powo bole osai qaji nangi ningi nungsib dena ulonjosib uneq aiqab di uge. Deqa unqum, ningi ingi di uyaib.

<sup>10</sup> Ningi powo bole ti unub qaji ningi sulum nanngo atra tal miligiq gilsib dia ingi uyoq nib Kristen was bei powo bole osai qaji a bosim ningi nungsimqa a endegsi are qalqas, “Kristen was nangi ingi di uyeq nub deqa unqum, e dego uyqai.” Osim a ulonjosim uneq aiqas. <sup>11</sup> Nunngo powo dena ningi na was bei di powo bole osai qaji a uneq waiyonub. Ningi qalie, Kristus a was deqa moiyej. <sup>12</sup> Deqa ningi quiy. Ningi na Kristen was nangi uneq breinjrsib nanngo areqalo Kristus qa singilateb qaji di ugetetnjrqab di ningi Kristus dego une yonub. <sup>13</sup> Deqa e damu uyitqa dena ijo was a uneq aiqas di e olo damu uyqasai. Ijo was a ulonjosim uneq aiyaim deqa e damu uratqai.

## 9

### *Pol a Yesus aqa wau ojoqnej dena a silali osai oqnej*

<sup>1</sup> Ningi ijo kumbra uniy. E tamo bei aqa sorgomq di sosai. E kumbra kiye yqa are soqnim e yqai. E Qotei aqa anjam maro tamo bole. E gago Tamo Koba Yesus unem. E aqa wau ojoqnem dena ningi are bulyeb. Ningi ijo kumbra deqa qaliesai kiyo? <sup>2</sup> Tamo qudei nangi mareq nub, “Pol a Qotei aqa anjam maro tamo bolesai.” Nangi degsib mareq nub di unqum. Ningi segi e qa qalie. E nami Tamo Koba aqa anjam ningi merngonam qusib are bulyeb. Deqa ningi qalie, e Qotei aqa anjam maro tamo bole.

<sup>3</sup> Tamo qudei nangi ijo kumbra pegiyeq nub deqa e na kamba endegsi minjreqnum. <sup>4</sup> Iga Qotei aqa anjam mare mare laqnum dena iga silali osim gago segi ingi ti ya ti uyqa kere. <sup>5</sup> Iga unja oqa are soqnim Kristen unja osim laqnqa kere. Agi Pita a unja oqnsiq laqnu. A segi sai. Qotei aqa anjam maro tamo qudei ti Tamo Koba aqa was nangi ti dego unja oqnsib laq nub. <sup>6</sup> Ningi quiy. Qotei aqa anjam maro tamo kalil

nanġi silali wau uratoqnsib Qotei aqa wau ojeqñub. Deqa aqo Barnabas wo dego silali wau uratqa kere. <sup>7</sup> Niñġi qalie, qoto tamo bei a qotqas di a silali oqas. A aqa segi silali wau ojqsai. Tamo bei a iñġi yagwas di a iñġi meli osim uyqas. Tamo bei a kaja nanġi taqatñjrqas di a mungum qaç osim uyqas.

<sup>8</sup> E mandam tamo nanġo areqalo dauryosim anjam di mernġosai. Anjam di Qotei aqa dal anjamq di dego unu. <sup>9</sup> Agi Moses a nami dal anjam bei endegsi nenġrenġej, “Makau nanġi iñġi ñenġi paraparaiyoqnsib aqa sau taqal ateqñub. Deqa nanġi iñġi ñenġi aqa damu uyqa yoqñib niñġi na nanġi saidñjraib.” O ijo was, Qotei a makau nanġi qa are qalsiq anjam di marej kiyo? Sai. <sup>10</sup> A iga qa osiqa anjam di marej. Od, Moses a iga qa osiqa anjam di nenġrenġej. Niñġi are qaliy. Tamo bei a iñġi yagwas di iñġi meliamqa a osim uyqas. Tamo bei a iñġi ñenġi ñoqoryosim damu segitqas di a damu osim uyqas. <sup>11</sup> O ijo was, iga Qotei aqa anjam qa niñġi aqaryainġoqñem di nuñġo qunuñ qa. Deqa niñġi na kamba jejamu qa iñġi iñġi qa iga aqaryaiġwajqa mernġwom di iga une yosai. Iga nuñġo are miligiq di Mondor aqa iñġi yagobulem. Iñġi di meliqo deqa niñġi na olo otorosib jejamu qa iñġi iñġi egwajqa mernġwom di iga une yosai. <sup>12</sup> Tamo qudei nanġi Qotei aqa anjam qa niñġi aqaryainġeqñub deqa nanġi nuñġoq dena olo silali iñġi iñġi yainġeqñub. Deqa iga dego nuñġoq dena silali iñġi iñġi yainġwa kere.

Ariya iga Kristus aqa anjam bole ugetaim deqa iga nuñġoq dena silali iñġi iñġi yainġwa uratem. Osim dena iga gulbe gargekoba qoboiyoqñem. <sup>13</sup> Atra tamo nanġi atra talq dena iñġi oqnsib uyeqñub. Tamo nanġi atra bijal taqateqñub qaji nanġi atra bijalq dena atraiyqa wagme oqnsib uyeqñub. Niñġi di qaliesai kiyo? <sup>14</sup> Dego kere Tamo Koba a endegsi marej, “Tamo nanġi Qotei aqa anjam bole mare mare laqñub qaji nanġi dena silali oqnsib nanġo segi iñġi awaiyoqnsib uyoqñab.”

<sup>15</sup> Ariya e nuñġo iñġi bei yainġwa osim anjam endi nenġrenġyosai. E nuñġoq dena silali iñġi iñġi yainġwa uratem agi bini unum. Degsi sosiy e moiçai. E ijo kumbra deqa tulañ areboleboleibeqñu. Deqa tamo bei na ijo kumbra di olo uge qa maraiç. <sup>16</sup> E Yesus aqa anjam bole mare mare laqñum deqa e ijo segi ñam soqtqa keresai. Qotei na e qarinjbej deqa e aqa anjam mare mare laqñai. E wau di uratqa keresai. Uratçai di Qotei na e gulbe ebqas. <sup>17</sup> E ijo segi areqalo na Yesus aqa anjam mare mare laosaieqñum. E Qotei aqa wau tamo unum deqa e aqa areqalo dauryoqnsim aqa anjam mare mare laqñum. E ijo segi areqalo na Yesus aqa anjam mare mare laqñum çamu e dena silali iñġi iñġi eqñum çamu.

18 Deqa e awai kiye oqai? Ijo awai agiende. E Yesus aqa anjam bole mare mare laqnsim dena e silali oqa urateqnum. Ijo awai bole agide. Bole, e silali oqa kere. Ariya e oqa urateqnum. E laña tamo ungasari nanği Yesus aqa anjam bole minjre minjre laqnum. Ijo awai bole agide.

*Pol a tamo ungasari kalil nanžo kanğal tamo soqnej*

19 E kumbra kiye yqa are soqnim e yqai. E tamo bei aqa sorgomq di sosai. Di unğum, e ijo segi areqalo na tamo kalil nanžo sorgomq di sosim nanği kanğalnjqreqnum. E degyeqnum. Di kiyaaqa? E tamo gargekoba nanği are bulyetnjroqnit Qotei na nanği elenqajqa deqa. 20 Deqa e Juda nanžo kumbra dauryeqnum. Di kiyaaqa? E nanği are bulyetnjroqnit Qotei na nanği elenqajqa deqa. Tamo nanği dal anjam aqa sorgomq di unub qaji nanžo kumbra dego e dauryoqnsim dal anjam aqa sorgomq di sobulejunum. Bole, e segi dal anjam aqa sorgomq di sosai. Ariya e nanžo kumbra di dauryeqnum. Di kiyaaqa? E nanği are bulyetnjroqnit Qotei na nanği elenqajqa deqa. 21 Tamo nanği dal anjam saiqoji unub qaji nanžo kumbra dego e dauryoqnsim dal anjam saiqoji sobulejunum. Bole, e Qotei aqa dal anjam ti unum. Agi e Kristus aqa dal anjam aqa sorgomq di unum. Ariya e tamo nanği dal anjam saiqoji unub qaji nanği are bulyetnjroqnit Qotei na nanği elenqajqa deqa e nanžo kumbra dauryeqnum. 22 Tamo siñgila saiqoji unub qaji nanžo kumbra dego e dauryoqnsim siñgila saiqoji sobulejunum. Di kiyaaqa? E nanği are bulyetnjroqnit Qotei na nanği elenqajqa deqa. O ijo was niñgi quiy. E tamo kalil nanžo sorgomq di sosim nanžo kumbra dauryeqnum. Di kiyaaqa? E nanği qudei are bulyetnjroqnit Qotei na nanği elenqajqa deqa. 23 E Yesus aqa anjam bole qa are qaloqnsim deqa kumbra kalil di yeqnum. Deqa mondonj Yesus na awai boledamu e ebqas. Tamo kalil Yesus aqa anjam bole qa nanžo areqalo siñgilateqnum qaji nanği dego awai di oqab.

*Iga lañ qure qaji awai oqajqa deqa gurgurqom*

24 E mandam tamo nanžo alan qa mernğwai. Tamo nanği gurguroqnsib bubuñeqnub di nanği awai oqajqa deqa. Ariya tamo qujai a segi na nanği kalil buñjrsim awai oqas. Dego kere niñgi lañ qure qaji awai oqa marsib siñgila na gurguroqniy. 25 Tamo gurgureqnum qaji nanği awai oqa marsib gurgur qalieqa osib nanžo segi jejamu qaloqnsib siñgilateqnum. Deqa gurgur batiamqa nanği siñgila na gurgurqab. Nanžo awai di mandam qaji awai. Deqa nanžo awai di koboqas. Ariya lañ qure qaji awai iga oqa mareqnum di koboqasai. Di gaigai sqas. 26 Deqa e ururoqnsim laña lañaq di ñam atosaieqnum. E awai bole di koqyoqnsim urureqnum. E qoto



tamo bul unum deqa e laña lañaq di ijo ban waiyosaieqnum. E tamo qalqajqa deqa ijo ban tiñsim geregere waiyeqnum. <sup>27</sup> E ijo segi jejamu qaloqnsim geregere taqatoqnsim dena e singila eqnum. Di yawo anjam. Aqa utru agiende. Tamo ungasari nanği lan qure qaji awai oqajqa deqa e na Yesus aqa anjam bole nanği minjre minjre laqnum. Ariya e segi dego awai di osaiam deqa e singila na waueqnum.

## 10

### *Iga kumbra uge uge dauryqajqa are prugwasai*

<sup>1</sup> O ijo was ninği ijo anjam endeqa geregere poingem. Nami gago moma nanği wadau sawaq di laqnaqqa Qotei a lanbi miligiq di sosiqa nanği gam osornjroqnej. Bati di nanği Yuwal Lent di gentosib mandam boleq aisib walwelosib gileb. <sup>2</sup> Nanği kalil Moses dauryeb deqa nanği lanbi ti Yuwal Lent ti dena yanso obuleb. <sup>3</sup> Bati deqa Qotei aqa Mondor a lan goge na nanği kalil inği anainjreqnaq uyoqneb. <sup>4</sup> Ya dego Mondor na nanği kalil anainjreqnaq uyoqneb. Mondor na nanği meniñ bei osornjrnaqa meniñ dena ya branteqnaqa nanği uyoqneb. Meniñ di wadau sawaq di nanği daurnjrsiq giloqnej. Meniñ di agi Kristus. <sup>5</sup> Ariya Qotei a nanği qa arearetosaiyoqnej. Deqa a wadau sawaq di nanği gargekoba ñumnaq moreñeb.

<sup>6</sup> Qotei na nanği ñumnaq moreñeb. Di kiyaaqa? Iga bini unum qaji iga ulaosim nanço kumbra uge dauryqa are prugaim deqa. <sup>7</sup> Deqa ijo was kalil, ninği gisañ qotei nanği qa louoqnaib. Agi gago moma qudei nanği gisañ qotei nanği qa louoqneb. Qotei aqa anjam bei nanği qa endegsib nenğrenyeb unu, “Nanği nanço segi jejamu qa areboleboleinjreqnaq inği ti ya ti uyoqnsib alañoqneb.” <sup>8</sup> O ijo was kalil, iga sambala kumbra dego yqasai. Agi gago moma qudei nanği sambala kumbra yoqneb deqa bati qujai qa Qotei na 23,000 tamo ungasari nanği ñumnaq moreñeb. <sup>9</sup> Iga Tamo Koba aqa singila laña tenemtqa osim a gisañyqasai dego. Agi gago moma qudei nanği degyoqneb deqa Qotei na amal uge qarinjrnnaqa bosib nanği uñinjrnab moreñeb. <sup>10</sup> Iga Qotei njrintqasai dego. Agi gago moma qudei nanği degyoqneb deqa Qotei na padalto qaji lan anğro bei qarinyonaq aisiq nanği padaltnjrej.

<sup>11</sup> Qotei na gago moma nanği degsi njolawotnjrej. Onaqa Moses a anjam di nenğrenyonaq soqnej. Iga diño bati jojomyonum deqa iga anjam di sisiosim ulaosim gago moma nanço kumbra uge dauryqa uratqom. <sup>12</sup> Tamo bei a endegsi are qalqas, “E singila na tigelejunum.” Ariya a olo geregere ñam ateme. A ulonjosim uneq aiyo uge. <sup>13</sup> Gulbe kalil nunçoq di branteqnu qaji di mandam tamo kalil nançoq di dego

branteqnu. Qotei a tamo bole unu deqa a ningi uratngwasai. A marimqa gulbe di aqa singila na nungo singila bunyqasai. Qotei na gam waqtetngqonimqa ningi gulbe di britoqnsib singila na tigelesqab.

*Iga Qotei bole ti mondor uge nanngi ti turtnjrsim binjnraqa keresai*

<sup>14</sup> Deqa ijo was bole, ningi gisan qotei nanngi qa louoqnaib. Ningi nanngi torei uratnjrsib isaq giliy. <sup>15</sup> Ningi powo ti unub deqa e na anjam di ningi merngonum. Deqa ningi ijo anjam di qusib geregere pegiyiy. <sup>16</sup> E ningi benngem qa anjam merngwai. Iga Qotei pailyoqnsim wain gamban uyeqnum di iga Kristus aqa len aiyej qaji deqa are qaloqnsim a ombla korooqnsim uyeqnum. Iga bem ginngenyoyqnsim uyeqnum di iga Kristus aqa jejamu qa are qaloqnsim a ombla korooqnsim uyeqnum. <sup>17</sup> Bem qujai unu agi Kristus aqa jejamu. Deqa iga kalil koba na korooqnsim bem qujai di uyeqnum. Iga kalil Kristus aqa jejamu qujai. <sup>18</sup> Ningi Israel nanngi kumbra qa are qaliy. Israel nanngi atra bijalq di damu koitoqnsib oto bei Qotei atraiyoqnsib olo oto bei uyeqnum. Nanngi kumbra dena nanngi Qotei ombla korooqnsib damu uyeqnum.

<sup>19</sup> Sulum nanngi qotei bole edegaib. Sulum atrainjro qaji ingi di atraiyqa ingi bole edegaib. <sup>20</sup> Ingi di sawa bei bei qaji nanngi na oqnsib mondor uge nanngi atrainjreqnub. Nanngi Qotei bole atraiyosaieqnum. Nanngi Qotei qaliesai deqa nanngi kumbra di yeqnum. Deqa ijo was ningi kumbra di uratiy. Uratqasai di ningi mondor uge nanngi ti beterqab. <sup>21</sup> Ningi Tamo Koba aqa wain gamban ti mondor uge nanngi wain gamban ti di turtoqnsib dena uyoqnaib. Ningi Tamo Koba aqa atra bijal ti mondor uge nanngi atra bijal ti di dego turtoqnsib dena uyoqnaib. <sup>22</sup> Iga kumbra degyqom di iga Tamo Koba aqa are ugetetim a iga qa minjin oqwas. Gago singila na Qotei aqa singila bunyqa kere e? Keresai.

*Iga bati gaigai Qotei aqa nam soqtoqnqom*

<sup>23</sup> Kristen qudei nanngi mareqnum, “E kumbra garggekoba yqa kere. Dal anjam na getentosai.” Di nanngi bole mareqnum. Ariya iga kumbra qudei yoqnqom dena iga aqaryaiqwa keresai. Od, iga kumbra garggekoba yqa kere. Ariya iga kumbra qudei yoqnqom dena iga singilaqasai. <sup>24</sup> Iga gago segi jejamu aqaryaiqajqa are qalqasai. Iga tamo kalil nanngi qa are qaloqnsim nanngi aqaryainjroqnqom.

<sup>25</sup> Ningi ingi qarinyo sawaq dena damu awaiyoqnsib uyoqniy. Damu di nami tamo qudei na sulum atrainjroqnebi kiyosai kiyosai ningi deqa nenemoqnaib. Ningi oqnsib uyoqniy.

Niŋgi nuŋgo are miligiq di qalieonub, kumbra di bole. <sup>26</sup> Agi Qotei aqa anjam bei nami endegsib nenŋrenyeb unu, “Mandam endi Tamo Koba aqa segi mandam. Inŋi inŋi kalil mandamq endi unub qaji di dego Tamo Koba aqa.”

<sup>27</sup> Deqa tamo bei Yesus qaliesai qaji a na inŋi goisim niŋgi metnŋgimqa niŋgi a ombla gilqa are soqnm giliy. Gilsib inŋi kalil a na anaŋgwas qaji di niŋgi osib uyiy. Niŋgi deqa nenemoqnaib. Niŋgi nuŋgo are miligiq di qalieonub, kumbra di bole. <sup>28</sup> Ariya Kristen was bei na niŋgi mernŋgwas, “Inŋi di sulum atrainjro qaji inŋi.” Degsi mernŋgimqa niŋgi was deqa are qalsib inŋi di osib uyaib. Niŋgi uyqab di niŋgi unetqab. <sup>29</sup> Bole, niŋgi une yosai. Ariya tamo anjam mernŋgwo qaji a are qalqas, niŋgi une yonub. E deqa niŋgi mernŋgonum.

Ariya Kristen was deqaji bei sosaiamqa e inŋi uyqa are soqnm uyqai. Di e une yosai. Kiyaaqa e tamo bei aqa areqalo dauryosiy inŋi getentqai? <sup>30</sup> E Qotei pailyosiy inŋi di uyqai di tamo bei a kiyaaqa e misilinbqas?

<sup>31</sup> Deqa niŋgi inŋi ti ya ti uyqa oqnsib Qotei aqa ñam soqtoqnsib uyoqniy. Niŋgi kumbra bei yqa oqnsib Qotei aqa ñam soqtoqnsib yoqniy. <sup>32</sup> Niŋgi na Juda ti Grik ti Qotei aqa segi tamo unŋasari naŋgi ti uneq breinjraib. <sup>33</sup> Niŋgi e nubiy. E na tamo unŋasari kalil naŋgi kumbra bole bole enjreqnam naŋgi e qa areboleboleinjreqnu. E ijo segi jejamu aqaryaiyqajqa are qalosaieqnum. E tamo unŋasari gargekoba naŋgi Qotei na elenqajqa deqa are qaloqnsim aqaryainjreqnum.

## 11

<sup>1</sup> Niŋgi ijo kumbra kalil dauryoqniy. Agi e segi Kristus aqa kumbra kalil dauryeqnum dego kere.

### *Uña nanŋo gate kabutqajqa kumbra*

<sup>2</sup> E qalieonum, niŋgi gaigai e qa are qaloqnsib anjam kalil e nami mernŋgoqnem qaji di geregere dauryeqnub. Deqa e niŋgi qa tulaŋ areboleboleibeqnu. <sup>3</sup> Ariya niŋgi ijo anjam bei dego qusib poiŋgem. Niŋgi qalie, tamo kalil nanŋo gate di Kristus. Uña nanŋo gate di tamo naŋgi. Kristus aqa gate di Qotei. <sup>4</sup> Deqa tamo naŋgi pailyqa osib kiyo anjam palontqa osib kiyo naŋgi gate tatal ataib. Naŋgi gate tatal atqab di naŋgi nanŋo gate jemai yqab. Nanŋo gate agi Kristus. <sup>5</sup> Ariya uña naŋgi pailyqa osib kiyo anjam palontqa osib kiyo naŋgi nanŋo gate kabutebe. Uña a aqa gate kabutqasai di a aqa gate jemai yqas. Osim a uña qudei nanŋo gate banŋa torei milalteqnu qaji naŋgi bul sqas. <sup>6</sup> Deqa a aqa gate kabuteme. A aqa gate kabutqa asgiyqas di unŋum, a aqa gate banŋa dego gentosim milalteme. Ariya a dena jemaiyqa uratqas di a aqa

gate kabuteme. <sup>7</sup>Tamo nanḡi nanḡo gate kabutaib. Di kiyaaqa? Nanḡi Qotei sigitoqnsib aqa ñam ti siḡgila ti boleq ateqnub. Ariya uḡa nanḡi nanḡo segi tamo nanḡo ñam ti siḡgila ti boleq ateqnub.

<sup>8</sup> Qotei a uḡa aqa tanu osiqa dena tamo gereiyosai. A tamo aqa tanu osiqa dena uḡa gereiyej. <sup>9</sup> Qotei a uḡa qa are qalsiqa tamo gereiyosai. A tamo qa are qalsiqa uḡa gereiyej. <sup>10</sup> Deqa uḡa nanḡi nanḡo segi gate kabutebe. Nanḡi degyqab di laḡ anḡro nanḡi unsib marqab, “Bole, nanḡi nanḡo segi tamo nanḡo sorgomq di unub.”

<sup>11</sup> Tamo Koba aqa areqalo endegsi unu. Uḡa nanḡi nanḡo segi qa sai. Tamo nanḡi dego nanḡo segi qa sai. <sup>12</sup> Qotei a tamo aqa tanu osiqa dena uḡa gereiyej deqa uḡa nanḡi tamo nanḡo. Tamo nanḡi uḡa nanḡoq dena ḡambabeqñub deqa tamo nanḡi uḡa nanḡo. Ariya Qotei a segi qujai iḡi iḡi kalil qa utru.

<sup>13</sup> Uḡa a aqa segi gate kabutosaiosim Qotei pailyqqas di kumbra bole e? Niḡi segi mariy. <sup>14</sup> Iga qalie, tamo nanḡi gate mariḡ uratqab di kumbra bolesai. <sup>15</sup> Ariya uḡa nanḡi gate mariḡ uratqab di bolequja. Di nanḡo wala bole. Nanḡo gate mariḡ di Qotei na enjroqnsiq dena nanḡo gate kabuteqnu. <sup>16</sup> O ijo was kalil, tamo bei a ijo anjam deqa ḡiriḡosim gotranḡyaiq. A gotranḡyqas di a endegsi poiyem, iga kumbra bei dauryosaieqnum. Qotei aqa tamo unḡasari qure qure kalilq di unub qaji nanḡi dego kumbra bei dauryosaieqñub.

*Korin Kristen nanḡi louqa korooqnsibqa kumbra uge babteqñub*

<sup>17</sup> Ariya e nunḡo kumbra qudei qa areboleboleibosaieqnu. E deqa niḡi mernḡwai. Niḡi Qotei louqa korooqnsibqa niḡi kumbra bole babtosaieqñub. Niḡi kumbra uge babteqñub. <sup>18</sup> E mati deqa niḡi mernḡwai. E anjam endegsi quem. Niḡi Qotei louqa korooqnsibqa niḡi pupooqnsibqa anjam na qoteqñub. E anjam di qusim endegsi are qalem, “Bole, nanḡi degyeqñub.” <sup>19</sup> O was niḡi pupoeqñub di kere. Niḡi pupoosai qamu tamo yai nanḡi Qotei aqa kumbra geregere dauryeqñub di niḡi qaliesai qamu. <sup>20</sup> E quem, niḡi koroeqñub di niḡi Tamo Koba a qa are qalsib iḡi uyqajqa deqa koroosaieqñub. <sup>21</sup> Niḡi qudei qunjan bolet deqa niḡi namo boqnsib Qotei tal miligiq di iḡi uyekriteqñab Kristen was qudei nanḡi bunu boqnsib mamnjreqnu. Niḡi qudei koroq di wain koba dego uyoqnsib nanarieqñub. <sup>22</sup> Nunḡo kumbra dena niḡi Qotei tal ugetoqnsib tamo iḡi saiḡoji nanḡi jemai enjreqñub. Nunḡo segi segi tal unu deqa niḡi mati nunḡo talq di iḡi ti ya ti uysib bunuqna bosib Qotei louqa korooiy. Ariya niḡi degyosaieqñub. Deqa e anjam kiyersiy mernḡwai?

E nungo kumbra deqa areboleboleibeqnu degsi mernḡwai e? Sai. E degsi mernḡwasai.

*Pol a benḡem qa anjam marej*

<sup>23-24</sup> Ariya benḡem qa anjam e nami mernḡgem qaji di olo mernḡwai. Anjam di Tamo Koba Yesus na merbonaq quem. Anjam agiende. Nami Judas na Yesus osiq jeu tamo nanḡo banḡ di atej. Qolo qujai deqa Yesus a bem osiqa Qotei pailyosiqa bem di ḡinḡenḡyosiqa aqa anḡro nanḡi enḡrsiqa minḡrej, “Endi ijo jejamu. E na ninḡi aqaryainḡwa osim deqa enḡonum. Deqa ninḡi osib uyyi. Bunuqna ninḡi gaigai uyoqnsib e qa are qaloqniy.” <sup>25</sup> Degsi minḡrnaqa nanḡi bem uynab koboonaqa a na olo wain gambanḡ osiq Qotei pailyosiqa minḡrej, “Wain gambanḡ endi ijo leḡ. Leḡ di aisim Qotei aqa anjam bunuj siḡilatqas. Deqa ninḡi osib uyyi. Bunuqna ninḡi gaigai uyoqnsib e qa are qaloqniy.” <sup>26</sup> O ijo was, ninḡi Yesus aqa anjam deqa are qaloqnsib bati gaigai bem ti wain gambanḡ ti di uyoqnsib anjam endegsib palontoqniy, “Tamo Koba a jaqatinḡ osiq moiyej.” Palontoqnsib soqnib mondonḡ a olo bḡas.

*Ninḡi bem ti wain ti uyqa osibqa ninḡi mati nunḡo segi so peleiyiy*

<sup>27</sup> Deqa tamo bei a Tamo Koba Yesus aqa bem ti wain gambanḡ ti uyqa osimqa a kumbra uge bei yqas di a Yesus aqa jejamu ti leḡ ti ugetqas. Dena a une yqas. <sup>28</sup> Deqa tamo bei a bem ti wain gambanḡ ti uyqa osimqa a mati aqa segi so peleiyosim di a uyem. <sup>29</sup> A Yesus aqa jejamu geregere peleiyosaiosim bem ti wain gambanḡ ti uyqas di a une yqas. Deqa Qotei na a kamba gulbe yqas. <sup>30</sup> Utru deqa ninḡi gargekoba siḡgila saiqoji sosib mainḡeqnu. Osib ninḡi qudei moreḡeqnub. <sup>31</sup> Iga gago segi segi so geregere peleiyosim bem ti wain gambanḡ ti uyqom di iga unetqasai. Deqa Qotei na iga gulbe egwasai. <sup>32</sup> Tamo Koba a gago kumbra uge qudei qa iga pegigoqnsiq gulbe egeqnu. Di a iga tingitḡwajqa deqa. Yim mondonḡ iga tamo kalil mandamḡ endi unub qaji nanḡi ti une osim padalqasai.

<sup>33</sup> Deqa ijo was kalil, ninḡi bem ti wain gambanḡ ti uyqa korooqnsibqa ninḡi urur uyab. Ninḡi nunḡo Kristen was nanḡi qa tariḡoiy. <sup>34</sup> Ninḡi qudei mamḡimqa ninḡi mati nunḡo segi talq di inḡi uysib bunuqna bosib korooiy. Ninḡi namo bosib koroosib Qotei tal miligiq di inḡi koba uyekritaib. Ninḡi degyqab di ninḡi une yqab. Deqa Qotei na kamba ninḡi gulbe enḡwas.

Ijo anjam qudei e mati nenḡrenḡyqasai. Bunuqna e nunḡoq bosiy anjam di nunḡo ulatamuḡ di gereiyqai.

## 12

### *Qotei aqa Mondor na iga singila segi segi egeqnu*

<sup>1</sup> O ijo was, Qotei aqa Mondor na iga singila segi segi egeqnu. E deqa ningi merngit quiy. <sup>2</sup> Ningi qalie, nami ningi Qotei qalieosaisonabqa gisan qotei nanngi na ningi titngeqnaabqa ningi nanngi daurnjroqneb. Gisan qotei nanngi di anjam marqa keresai. <sup>3</sup> Deqa ningi endegsi poingem. Qotei aqa Mondor a tamo bei aqa medabu singilatetimqa a endegsi marqa keresai, “Yesus a tamo uge.” Tamo bei a Mondor Bole ti sqasai di a endegsi marqa keresai, “Yesus a Tamo Koba.”

<sup>4</sup> Mondor na iga singila segi segi egeqnu ariya Mondor qujai segi unu. <sup>5</sup> Iga wau segi segi ojeqnum ariya Tamo Koba qujai segi unu. <sup>6</sup> Qotei na iga kumbra segi segi egeqnu ariya Qotei qujai dena iga kalil keretgeqnu. <sup>7</sup> Mondor na iga segi segi aqaryageqnu. Di kiyaya? Iga na Kristen tamo ungasari kalil nanngi geregereinjraqajqa deqa. <sup>8</sup> Mondor na tamo qudei nanngi aqaryainjreqnu deqa nanngi Qotei aqa powo babteqnu. Mondor qujai dena tamo qudei nanngi aqaryainjreqnu deqa nanngi Qotei aqa qalie babteqnu. <sup>9</sup> Mondor qujai dena tamo qudei nanngi aqaryainjreqnu deqa nanngi Yesus qa nanngo areqalo tulan singilaboletaqnu. Mondor qujai dena tamo qudei nanngi aqaryainjreqnu deqa nanngi tamo mainjro qaji nanngi boletnjreqnu. <sup>10</sup> Tamo qudei nanngi Qotei aqa manwa babteqnu. Tamo qudei nanngi Qotei aqa medabu oqnsib anjam palonteqnu. Tamo qudei na mondor kalil nanngi peginjroqnsib mareqnu, “Mondor nanngi di bole. Mondor nanngi di uge.” Tamo qudei nanngi men bulyoqnsib qure utru segi segi nanngo anjam marelejeqnu. Tamo qudei nanngi qure utru segi segi nanngo anjam di quoqnsib damu poinjreqnaqa ubteqnu. <sup>11</sup> Ariya Mondor qujai dena aqa segi areqalo na tamo nanngi segi segi keretnjreqnaqa nanngi wau di yeqnu.

### *Iga kalil Kristus aqa jejamu qujai*

<sup>12</sup> Tamo kalil nanngi segi segi jejamu qujai. Nanngo ban ti singa ti namdamu ti dabkala ti osib jejamu qujai di turtosib unub. Kristus a dego degsi unu. <sup>13</sup> Agi Mondor qujai na iga kalil yansgobulosiqa turtgej deqa iga kalil jejamu qujai di unum. Iga qudei Juda. Iga qudei Grik. Iga qudei kangal tamo. Iga qudei kangal tamo sai. Di unqum. Iga kalil Mondor qujai osim ya jumbumq dena ya uyobuleqnum.

<sup>14</sup> Gago jejamu miligiq di ban segi sosai. Singa segi sosai. Ban ti singa ti namdamu ti dabkala ti kalil jejamu qujai di turtosib unub. <sup>15</sup> Singa a marqas, “E ban sai. Deqa e jejamu miligiq di sosai. Ban a segi unu.” Di bolesai. Singa a dego jejamu miligiq di unu. <sup>16</sup> Dabkala a marqas, “E namdamu sai.

Deqa e jejamu miligiq di sosai. Namdamu a segi unu.” Di dego bolesai. Dabkala a dego jejamu miligiq di unu. <sup>17</sup> Gago jejamu a namdamu segi sqas di iga kiyersim anjam quqwom? Keresai. Gago jejamu a dabkala segi sqas di iga kiyersim ingi quleqgwas? Di dego keresai. <sup>18</sup> Gago jejamu a degsi sosai. Qotei na ban ti singa ti namdamu ti dabkala ti osiqa jejamu qujaiq di atelenej unub. A aqa segi areqalo na degyej. <sup>19</sup> Gago jejamu a namdamu segi sqas kiyo, a ban segi sqas kiyo, a singa segi sqas kiyo di gago jejamu a kiyersi sqas? A bole sqa keresai. <sup>20</sup> Gago jejamu a degsi sosai. Ban ti singa ti namdamu ti dabkala ti kalil jejamu qujaiq di turtosib unub.

<sup>21</sup> Namdamu na ban minjqas, “Ni ulan. E segi wauqa kere.” Degsi minjqas keresai. Gate na singa minjqas, “Ni ulan. E segi wauqa kere.” Degsi minjqas keresai. <sup>22</sup> Nanngi kalil jejamu qujaiq di unub. Bole, nanngi qudei singila kiñala unub. Ariya nanngi wau bole yeqnub deqa iga na nanngi uratnjrqas keresai. <sup>23</sup> Iga nanngi qudei kiñala bolesai qa mareqnum. Ariya iga na olo nanngi gereinjreqnum. Nanngi qudei iga jemai qa mareqnum. Ariya iga olo gara na nanngi kabutnjreqnum. <sup>24</sup> Nanngi qudei uno boledamu deqa iga na nanngi kabutnjro-saieqnum. Ariya Qotei na nanngi kalil jejamu qujaiq di atelenej unub. Deqa nanngi qudei ñam saiqoji unub qaji di Qotei na olo ñam soqtetnjreqnu. <sup>25</sup> Gago jejamu a poelenaim deqa Qotei a degyeqnu. Deqa jejamu miligiq di nanngi segi segi qa qalaqalaiyo kumbra yeqnub. <sup>26</sup> Bei a jaqatin oqas di nanngi kalil dego jaqatin oqab. Bei a ñam koba oqas di nanngi kalil a ombla areboleboleinjrqas.

<sup>27</sup> Ningi kalil Kristus aqa jejamu qujai. Ningi segi segi aqa jejamu miligiq di unub. <sup>28</sup> Qotei na Kristen tamo ungasari nanngi wau segi segi enjreqnu. Nanngi qudei a na qarinjnjreqnaqa nanngi aqa anjam mare mare laqnu. Nanngi qudei a na wau enjreqnu deqa nanngi aqa medabu oqnsib anjam palonteqnub. Nanngi qudei a na wau enjreqnu deqa nanngi aqa anjam plalteqnub. Nanngi qudei a na singila enjreqnu deqa nanngi aqa manwa babteqnub. Nanngi qudei a na singila enjreqnu deqa nanngi tamo mainjro qaji nanngi boletnjreqnub. Nanngi qudei a na wau enjreqnu deqa nanngi na tamo ungasari nanngi aqaryainjreqnub. Nanngi qudei a na Kristen gate atelenej deqa nanngi na aqa wau taqateqnub. Nanngi qudei a na men bulyetnjreqnu deqa nanngi qure utru segi segi nanngo anjam marelenjreqnub. <sup>29</sup> Deqa e ningi endegsi nenemngwai. Qotei na nanngi kalil qarinjnjreqnaqa nanngi aqa anjam mare mare laqnu e? Sai. Nanngi kalil Qotei aqa medabu oqnsib anjam palonteqnub e? Sai. Nanngi kalil Qotei aqa anjam plalteqnub e? Sai. Nanngi kalil Qotei aqa manwa babteqnub e? Sai.

<sup>30</sup> Nanġi kalil tamo mainjro qaji nanġi boletnjreqnub e? Sai. Nanġi kalil meġ bulyoqnsib qure utru segi segi nanġo anjam mareleġeqnub e? Sai. Nanġi kalil qure utru segi segi nanġo anjam di quoqnsib damu poinjreqnaqa ubteqñub e? Di dego sai. Qotei na nanġi kalil wau segi segi enjreqnu. <sup>31</sup> O ijo was, Mondor aqa siġgila segi segi kalil di bolequja. Niġi siġgila di oqajqa are qaloqñiy.

*Iga qalaqalaiyo kumbra dauryqom*

Ariya kumbra tulaġ boledamu bei e na ubtosiy niġi mernġit quiy.

## 13

<sup>1</sup> Kumbra boledamu di agi qalaqalaiyo kumbra. Niġi quiy. E meġ bulyosiy qure utru segi segi nanġo anjam kiyo laġ anġro nanġo anjam kiyo maroqñqai ariya e qalaqalaiyo kumbra dauryqasai di ijo anjam maro di bolesai. Ijo anjam maro di laġa noul bulosim qatronkobaqas. Osim gruma bul laġa anjam atqas. <sup>2</sup> E Qotei aqa medabu osiy anjam palonteqñqai kiyo, e Qotei aqa uli anjam kalil qalieosiy utru babtelenqai kiyo, e qalie koba ti sqai kiyo, e Qotei qa ijo areqalo tulaġ siġgilaboletosiy dena mana kobaquja minjitqa a ijo anjam dauryosim tigelosim sawa beiq gilqas kiyo ariya e qalaqalaiyo kumbra dauryqasai di ijo kumbra kalil di Qotei aqa ŋamgalaq di bolesai. <sup>3</sup> E ijo iġi iġi kalil elenqosiy tamo sougetejunub qaji nanġi jeisiy enjrqai kiyo, e ijo segi jejamu osiy jeu tamo nanġo baġq di atitqa nanġi na osib ŋamyuwo na koitqab kiyo ariya e qalaqalaiyo kumbra dauryqasai di ijo kumbra kalil dena e yala aqaryaibqa keresai.

<sup>4</sup> Tamo unġasari nanġi qalaqalaiyo kumbra dauryqab di nanġi gaigai lawo na sqab. Sosib tamo kalil nanġi kumbra bole enjroqñqab. Tamo bei a ŋoro koba ti soqñim nanġi a qa are ugeinjrqasai. Nanġi nanġo segi ŋam soqtqasai dego. <sup>5</sup> Nanġi diqoqnsib sqasai. Nanġi nanġo segi jejamu aqaryaiyqajqa are qalqasai. Nanġi urur ŋirinqasai. Tamo bei na nanġi kumbra uge enjrimqa nanġi deqa a kambatqasai. <sup>6</sup> Nanġi kumbra uge qa areboleboleinjrqasai. Nanġi kumbra bole qa areboleboleinjroqñqas. <sup>7</sup> Nanġi gulbe kalil qoboioqnsib siġgila na tigelesqab. Sosib gaigai Qotei qa nanġo areqalo siġgilatoqnsib a qa tariñoqñqab.

<sup>8</sup> Qalaqalaiyo kumbra di koboqa keresai. Tamo qudei nanġi Qotei aqa medabu oqnsib aqa anjam palonteqñub. Wau di koboqas. Tamo qudei nanġi qure utru segi segi nanġo anjam mareleġeqnub. Wau di dego koboqas. Tamo qudei nanġi Qotei aqa qalie babteqñub. Wau di dego koboqas. <sup>9</sup> Bole, iga qalie ti unum. Ariya gago qalie di oto oto deqa iga truquiqeñnu.



Iga Qotei aqa medabu oqnsim anjam palonteqnum. Anjam di dego oto oto deqa iga truquigeqnu. <sup>10</sup> Mondon Yesus a olo bosim ingi ingi kalil keretinqa bati deqa qalie ti anjam ti iga truquigeqnu qaji di torei koboqas. <sup>11</sup> Nami e angro kiñala sosimqa e angro kiñilala nanjo anjam ti powo ti areqalo ti oqnsim walweloqnem. Ariya bunuqna e tamo kobaqu-jaosimqa e angro kiñilala nanjo kumbra di uratem. <sup>12</sup> Dego kere bini iga Qotei aqa kumbra geregere qalieosai unum. Gago qalie di oto oto deqa iga truquigeqnu. Iga ya qolbiq di gago ulatamu geregere unqa keresai dego kere iga Qotei aqa kumbra geregere qalieosai unum. Mondon iga Qotei aqa ulatamu unsimqa bati deqa iga a qa geregere qalieqom. A iga qa geregere qalieeqnu dego kere iga kamba a qa geregere qalieqom. <sup>13</sup> Iga Qotei qa gago areqalo singilateqnum kumbra di gaigai sqas. Iga Qotei qa tariñeqnum kumbra di dego gaigai sqas. Qalaqalaiyo kumbra di dego gaigai sqas. Ariya qalaqalaiyo kumbra di tulan boledamu. Qalaqalaiyo kumbra dena kumbra kalil tulan bunjrejunu.

## 14

### *Iga Qotei aqa anjam palontqom di wau bolequja*

<sup>1</sup> Deqa ijo was kalil, ningi gaigai qalaqalaiyo kumbra dau-ryoqniy. Osib wau kalil Qotei aqa Mondor na ningi engeqnu qaji di yqajqa tulan singilaoqniy. Wau boledamu bei agiende. Ningi Qotei aqa medabu oqnsib anjam palontqniy. <sup>2</sup> Ningi qalie, tamo nanji men bulyoqnsib qure utru segi segi nanjo anjam mareqnu di nanji Qotei segi minjeqnu. Nanji tamo nanji minjrosaijeqnu. Mondor na nanji singila enjreqnaqa nanji uli anjam mareqnu. Deqa tamo bei a qusim poiyya keresai. <sup>3</sup> Ariya Qotei aqa medabu o qaji tamo nanji anjam aqa damu babteqnu di tamo nanji quoqnsib poinjeqnu. Deqa anjam dena nanji singilatnjroqnsiq nanji kumbra bole yqajqa are tigeltetnjroqnsiq nanjo are miligi latetnjreqnu. <sup>4</sup> Tamo nanji men bulyeqnu di nanji nanjo segi are miligi singilateqnu. Ariya Qotei aqa medabu o qaji tamo nanji anjam aqa damu babteqnu di nanji na Kristen kalil nanji dego singilatnjreqnu. <sup>5</sup> Ijo are endegsi unu. Ningi kalil men bulyoqnaq di bole. Ariya ningi Qotei aqa medabu oqnsib anjam palontqnaq di tulan bolequja. Ningi quiy. Tamo bei a men bulyosim qure utru bei nanjo anjam marim tamo bei a kamba anjam di aqa damu poiyyim ubtqas di kere. Anjam dena Kristen kalil nanji singilatnjrqas. Ariya anjam ubtqajqa tamo bei sqasai di men bulyo tamo a anjam maraiq. Aqa anjam dena Kristen nanji singilatnjrqasai. <sup>6</sup> O ijo was, ningi ijo anjam endeqa are qaliy. E nunjoq bosiy men bulyosiy qure

utru bei nanngo anjam merngit ningi qusib poinjwasai di anjam dena ningi kiyersim aqaryainjwas? Keresai. Ariya e Qotei aqa uli anjam bei ubtosiy merngitqa kiyo, Qotei aqa qalie bei babbtitqa kiyo, Qotei aqa medabu osiy anjam palontitqa kiyo, anjam bei plaltitqa kiyo ningi qusib poinjwas di bolequja. Anjam dena ningi aqaryainjwas.

<sup>7</sup> Ingi qudei nambile sosai qaji e deqa ningi merngit quiy. Tamo bei na yumba qamimqa kiyo gombinj anjamimqa kiyo ariya aqa anjam ato di jagwa na osi taqal waiyqas di iga kiyersim aqa lou poigwas? Di keresai. <sup>8</sup> Tamo nanngi qoto qa gilqa marsib gul anjamibqa ariya gul aqa anjam ato di jagwa na osi taqal waiyqas di tamo yai nanngi qoto qa gilqab? Tamo dego bei sosai. <sup>9</sup> Dego kere ningi menj bulyosib qure utru bei nanngo anjam marqab di tamo nanngi kiyersib qusib poinjrqas? Keresai. Nunngo anjam di dego jagwa na osi taqal waiyobulqas. <sup>10</sup> Bole, mandamq endi qure utru segi segi nanngo anjam gargekoba unub. Anjam kalil di damu ti. <sup>11</sup> Ariya tamo bei na qure utru bei nanngo anjam e merbim qusiy aqa damu poibqasai di a e qa marqas, "A yaun tamo." Yim deqa e kamba a qa marqai, "A dego yaun tamo." <sup>12</sup> O ijo was kalil, e qalieonum, ningi Qotei aqa Mondor aqa wau ojqajqa tulan arearetneqnu. Deqa ningi na Kristen nanngi sinjilatnjqajqa wauoqniy.

### *Menj bulyo kumbra*

<sup>13</sup> Ariya nunngo ambleq di tamo bei a menj bulyosim qure utru bei nanngo anjam marqa osimqa a mati endegsi Qotei pailyem, "O Abu, ni na powo ebimqa e anjam endi marsiy olo aqa damu ubtqai." <sup>14</sup> Ningi are qaliy. E menj bulyosiy qure utru bei nanngo anjam na Qotei pailyqai di ijo mondor ijo are miligiq di unu qaji a segi pailyimqa ijo areqalo a lanja quqwas. <sup>15</sup> Deqa e endegyqai. E ijo mondor ti ijo areqalo ti turtosiy pailyoqnqai. E ijo mondor ti ijo areqalo ti turtosiy louoqnqai dego. <sup>16</sup> Ni ino mondor na segi Qotei pailyosim binjiyqam di tamo lanaj bei a sosim ino pailyo di poiyyasai. Deqa a endegsi marqa keresai, "Ni bole maronum." <sup>17</sup> Bole, ni Qotei pailyoqnsim binjiyeqnum di bolequja. Ariya tamo bei a ino pailyo poiyyasai di ino pailyo dena a sinjilatqa keresai. <sup>18</sup> E ningi kalil tulan bunjosim bati gargekoba menj bulyeqnum. Deqa e Qotei minjeqnum, "Keretonum." <sup>19</sup> Ariya Kristen nanngi Qotei louqa koroesoqnbqa e nanngo koroq di anjam truquyala segi minjroqnit nanngi qusib poinjrqas di tulan bolequja. E menj bulyosiy qure utru segi segi nanngo anjam olekoba totoryosiy nanngi minjroqnit nanngi poinjrqasai di bolesai.

<sup>20</sup> O ijo was kalil, ningi angro kiñilala nanği bulosib nanari-oqnaib. Ningi tamo bole bole nanği bulosib areqalo bole na soqniy. Ningi angro mom nanği dego bulosib kumbra uge qa nanariosib soqniy. Ningi qalie, angro mom nanği kumbra uge qa poinjrosaieqnu. <sup>21</sup> Qotei aqa dal anjam bei nami endegsib nenğrenyeb unu, “Tamo Koba a marqo, ‘E qure utru bei bei nanğo meñ na ningi anjam mernğit ningi ijo anjam quetbqasai.’” <sup>22</sup> Deqa ijo was, meñ bulyqajqa kumbra di aqa utru agiende. Kumbra dena Qotei na tamo unğasari a qa nanğo areqalo singilatosaieqnu b qaji nanği aqa mañwa osornjreqnu. Tamo unğasari a qa nanğo areqalo singilateqnu b qaji nanği qa sai. Ariya Qotei aqa medabu o qaji tamo nanği anjam palontqajqa kumbra di aqa utru agiende. Kumbra dena Qotei na tamo unğasari a qa nanğo areqalo singilateqnu b qaji nanği aqa mañwa osornjreqnu. Tamo unğasari a qa nanğo areqalo singilatosaieqnu b qaji nanği qa sai.

<sup>23</sup> Deqa Kristen koroq di ningi kalil meñ bulyoqnsib qure utru segi segi nanğo anjam maroqnqab di bolesai. Ningi degyqab di tamo lanaj qudei kiyo tamo qudei Qotei qaliesai qaji nanği kiyo nunğo koro miligiq gilsib nunğo anjam di qusib ningi qa marqab, “Nanği nanarionub deqa anjam di mareqnu b.” <sup>24</sup> Ariya ningi kalil Qotei aqa medabu oqnsib anjam palontqanqab di tamo bei Qotei qaliesai qaji kiyo tamo lanaj bei kiyo a nunğo koro miligiq gilsim nunğo anjam di qusim a poiyyqas. Yim anjam dena aqa are qametim a aqa une qa geregere qalieqas. <sup>25</sup> Osim aqa areqalo uge kalil aqa are miligiq di uliejunu qaji di boleq atsim singa pulutosim Qotei aqa ñam soqtosim ningi mernğwas, “Bole, Qotei a nunğo ambleq endi unu.”

### *Qotei louqajqa kumbra*

<sup>26</sup> Deqa ijo was, ningi Qotei louqa koroqnsibqa ningi qudei lou babtoqniy. Ningi qudei Qotei aqa anjam plaltoqniy. Ningi qudei Qotei aqa uli anjam ubtoqniy. Ningi qudei meñ bulyoqnsib qure utru segi segi nanğo anjam maroqniy. Ningi qudei qure utru segi segi nanğo anjam aqa damu poinğim ubtoqniy. O ijo was, nunğo wau segi segi dena ningi na Kristen tamo unğasari nanği singilatnjroqniy. <sup>27</sup> Tamo qudei nanği meñ bulyqa are soqnimqa ningi na minjrib nanği aiyel kiyo nanği qalub kiyo segi meñ bulyqab. Tamo gargekoba nanği meñ bulyqab di bolesai. Ariya nanği koba na turtosib meñ bulyaib. Bei namoqna meñ bulyim bei bunuqna meñ bulyqas. Ariya nanği meñ bulyosib anjam maroqnibqa ningi na anjam ubto tamo bei minjib a nanğo anjam di aqa damu ubteme. Yim tamo unğasari kalil nanği qusib poinjrqas. <sup>28</sup> Kristen koroq di anjam ubtqajqa tamo bei sosaiamqa meñ bulyo tamo nanği

anjam maraib. Nanġi mequmosib nanġo segi are miligiq di Qotei pailyebe. <sup>29</sup> Nanġi na Qotei aqa medabu o qaji tamo nanġi dego minjribqa nanġi aiyel kiyo nanġi qalub kiyo segi anjam palontoqnebe. Tamo gargekoba nanġi anjam palontoqnaib. Nanġi anjam palontoqnbqa tamo qudei na nanġo anjam di geregere pegiyoqnebe. <sup>30</sup> Tamo bei a Qotei aqa anjam palontoqnim ariya Qotei na tamo bei awejunu qaji a anjam bei osoryim tamo nami anjam palonteqnu qaji a mati medabu getentim tamo di a kamba tigelosim anjam palonteme. <sup>31</sup> Nanġi segi segi kalil kumbra di dauryosib Qotei aqa medabu oqnsib anjam palontoqniy. Palontoqnb Kristen kalil nanġi quoqnsib poinjroqnim anjam dena nanġi singilatnjroqnas. <sup>32</sup> Nanġi na Qotei aqa medabu o qaji tamo nanġi minjribqa nanġi nanġo segi so geregere taqatoqnsib anjam palontoqnebe. <sup>33-34</sup> Qotei a aqa segi wau kalil geregere yoqnsiqa aqa wau bei niñaqyosaieqnu. A are lawo qa utru.

Ariya unġasari nanġi Kristen koroq di anjam maraib. Nanġi mequmesoqnebe. Qure qure kalilq di Kristen unġasari nanġi degyeqnub. Deqa unġasari nanġi nanġo segi ñam aguq atoqnsib nanġo tamo nanġo sorgomq di geregere mequmosib soqnebe. Agi anjam di Moses aqa dal anjamq di unu. <sup>35</sup> Deqa Kristen koroq di unġasari nanġi anjam bei aqa damu geregere qalieqajqa are soqnim ninġi na nanġi endegsib minjriy, “Yaintim nunġo segi talq di ninġi nunġo gumbulun nanġi nenemnrib nanġi na anjam aqa damu mernġwab.” Ninġi na unġasari nanġi degsib minjriy. Di kiyaaqa? Unġasari nanġi Kristen koroq di anjam marqab di kumbra bolesai. <sup>36</sup> O ijo was, Qotei aqa anjam nunġoq dena namoqna brantej e? Ninġi segi na Qotei aqa anjam osib nunġo areqaloq di singilateb ariya Kristen tamo qudei nanġi Qotei aqa anjam osaieqnu e? Sai.

<sup>37</sup> Tamo bei a endegsi are qalqas, “E Qotei aqa medabu o qaji tamo bole. E Qotei aqa Mondor ti unum.” A kere degsi are qalqo. Ariya tamo di a olo endegsi poiym, “Anjam Pol na nenġrenyosiq gagoq qarinyqo qaji endi Tamo Koba aqa segi dal anjam tintiñ.” <sup>38</sup> Tamo di a ijo anjam endi urataiq. A uratqas di ninġi na endegsib minjiy, “Ni Qotei aqa medabu o qaji tamo bolesai.” <sup>39</sup> Deqa ijo was, ninġi Qotei aqa medabu osib anjam palontqajqa tulanġ singilaoqniy. Kristen koroq di tamo qudei nanġi meñ bulyoqnb ninġi na nanġi saidnjraib. <sup>40</sup> Ninġi Qotei louqajqa kumbra kalil geregere taqatosib dauryosib soqniy.

## 15

### *Kristus a moisiq olo subq na tigelej*

<sup>1</sup> O ijo was kalil, Yesus aqa anjam bole e nami palontoqnsim mernġoqnem qaji di bini e olo pulutosiy ninġi mernġwai.

Anjam di agi ningi osib singila na tigelejunub. <sup>2</sup>E qalie, anjam e palontoqnem qaji di ningi torei ojsib nungo areqaloq di singilateb. Deqa Qotei na ningi elenjej. Ningi lanja baban na singilateb qamu Qotei a ningi elenqa keresai qamu.

<sup>3</sup>Anjam bole e ningi merngoqnem qaji di e Kristus aqa banq na em. Anjam di tulan kobaquja. Anjam agiende. Kristus a gago une qa moiyej. Anjam di agi nengrenq di unu. <sup>4</sup>A moinaqa subq ateb. Bati qalub koboonaqa a olo subq na tigelej. Anjam di dego nengrenq di unu. <sup>5</sup>A subq na tigelosiqqa Pita aqaq di brantonaq unej. Osiqa aqa angro 12 nanqoq di dego brantonaq uneb. <sup>6</sup>Osiqa bunuqna bati qujai qa a Kristen was 500 nanqoq di dego brantonaq uneb. Nanji gargekoba bini unub. Ariya nanji qudei morenej. <sup>7</sup>Bunuqna a Jems aqaq di dego brantonaq unej. Osiqa aqa anjam maro tamo kalil nanqoq di dego brantonaq uneb.

<sup>8</sup>Olo bunuqna a ijoq di dego brantonaq unem. Unja bei a bati grotosim aqa angro ougetqas dego kere Kristus a ijoq di brantonaq unem. <sup>9</sup>E nami Qotei aqa tamo ungasari nanji ugeugeinjroqnem. Deqa ningi e Yesus aqa anjam maro tamo bolesai edegwab di kere. Yesus aqa anjam maro tamo kalil nanji na e bunbejunub deqa ijo nam tulan aguq aiyejunu. <sup>10</sup>Ariya Qotei a e qa are boleiyey deqa bini e aqa anjam maro tamo unum. A e qa are boleiyey aqa kumbra di lanja ulonjosai. E aqa kumbra di osim singila na waukobaeqnum. Ijo wau di tulan kobaoqnsiq Qotei aqa anjam maro tamo kalil nanqo wau bunyejunu. Ariya e ijo segi singila na wau di yosaieqnum. Qotei a e qa are boleiyey deqa aqa singila na e wau di yeqnum. <sup>11</sup>Qotei aqa anjam maro tamo qudei na kiyo e na kiyo wau di yeqnum di unqum. Yesus a moisiq olo subq na tigelej anjam di iga kalil koba na palonteqnum. Anjam di qujai ningi osib nungo areqaloq di singilateb.

*Tamo ungasari moreno qaji nanji olo subq na tigelqab*

<sup>12</sup>Kristus a moinaqa Qotei na olo subq na tigeltej anjam di iga gaigai palontoqnsim laqnum. Ariya kiyaga ningi qudei mareqnum, “Tamo moreno qaji nanji olo subq na tigelqasai?” <sup>13</sup>Tamo moreno qaji nanji olo subq na tigelqasai anjam di bole qamu Qotei na Kristus dego subq na tigeltosai qamu. <sup>14</sup>Qotei na Kristus subq na tigeltosai qamu anjam iga palonteqnum qaji di bolesai qamu nungo areqalo Kristus qa singilateqnum qaji di lanja ulonej qamu. <sup>15</sup>Qotei na tamo moreno qaji nanji olo subq na tigeltnrqasai anjam di bole qamu Qotei na Kristus dego subq na tigeltosai qamu iga Qotei aqa kumbra qa mare mare laqnum di iga gisan anjam mare mare laqnum qamu. Agi iga endegsi mare mare laqnum, “Qotei a Kristus subq na tigeltej.” <sup>16</sup>Qotei na tamo moreno

qaji nan̄gi olo subq na tigelt̄njrqas anjam di bolesai qamu Qotei na Kristus dego subq na tigeltosai qamu. <sup>17</sup> Qotei na Kristus subq na tigeltosai qamu nun̄go areqalo Kristus qa singilateq̄nub qaji di laña ulon̄ej qamu ningi nun̄go uneq di unub qamu. <sup>18</sup> Deqa tamo nan̄gi nami Kristus qa nan̄go areqalo singilatosisib moreñeb qaji nan̄gi torei padaleb qamu. <sup>19</sup> O ijo was kalil, iga in̄gi bole bole Kristus na mondon̄ egwas qaji deqa tariñeq̄num. Ariya iga subq na olo tigelq̄asai anjam di bole qamu iga mandam qa in̄gi in̄gi qa segi tariñeq̄num qamu iga tulañ sougetejunum qamu. Gago so uge dena mandam tamo kalil nan̄go so uge tulañ bun̄yjunu qamu.

<sup>20</sup> Ariya iga degsi sougetosai. Kristus a moinaqa Qotei na olo subq na tigeltej. Kristus a tamo kalil nami moreñeb qaji nan̄gi qa namoosiq subq na tigelej. <sup>21</sup> Ningi qalie, tamo qujai Adam a une atej deqa a moiyo qa utru. Dego kere Kristus a subq na tigelu qa utru. <sup>22</sup> Adam aqa moma kalil nan̄gi moreñeq̄nub. Dego kere Kristus aqa tamo kalil nan̄gi olo ñambile oqab. <sup>23</sup> Iga gago segi segi bati dauryosim subq na tigelosim ñambile oqom. Namona Kristus a subq na tigelej. Mondon̄ a olo lañ qureq na bamqa iga aqa segi tamo ungasari unum deqa iga dego subq na tigelqom.

<sup>24</sup> Iga subq na tigelamqa diño bati brantqas. Bati deqa mandor nan̄gi ti mondor uge uge ti gate kokba ti nan̄go singila ti kalil Kristus na kobot̄njrqas. Osim a na in̄gi in̄gi kalil elen̄osim aqa Abu Qotei aqa ban̄q di uratqas. Yim Qotei a Mandor Koba sosim in̄gi in̄gi kalil di taqatqas. <sup>25</sup> Kristus a degyqas. Di kiyaaqa? A Mandor Koba sosim gilsim gilsim diño bati brantimqa Qotei a Kristus aqa jeu tamo kalil nan̄gi joqsim aqa sorgomq di atim a na nan̄gi taqat̄njresqas. <sup>26</sup> Osim bati deqa a na aqa jeu tamo kalil nan̄gi di kobot̄njrsim ariya a moiyo dego kobotqas. <sup>27</sup> Agi Qotei aqa anjam bei nami endegsib nen̄grenyeb unu, “Qotei na in̄gi in̄gi kalil elen̄osim Kristus aqa sorgomq di atqas.” O ijo was, Qotei na in̄gi in̄gi kalil di elen̄osim Kristus aqa sorgomq di atqas deqa iga qalieonum, Qotei a segi Kristus aqa sorgomq di sqasai. <sup>28</sup> Mondon̄ Qotei na in̄gi in̄gi kalil di Kristus aqa sorgomq di atim soq̄nim Qotei aqa Niri a kamba dego Qotei aqa sorgomq di sqas. Deqa Qotei a segi na in̄gi in̄gi kalil di tulañ bun̄njrsimqa a nan̄go Mandor Koba sosim bati gaigai nan̄gi taqat̄njroq̄nas.

<sup>29</sup> Ningi qalie, tamo qudei na tamo moreño qaji nan̄gi aqaryain̄roq̄nsib nan̄go sawa osib yanso eq̄nub. Tamo moreño qaji nan̄gi olo subq na tigelq̄asai anjam di bole qamu nan̄gi kiyaaqa kumbra degyeq̄nub? <sup>30</sup> Od, tamo moreño qaji nan̄gi olo subq na tigelq̄ab anjam di iga mare mare laq̄num. Mare mare laq̄nam tamo gargekoba nan̄gi iga qa ñiriñoq̄nsib

bati gaigai iga padaltgwa laqñub. Tamo moreño qaji nanği olo subq na tigelqab anjam di bolesai qamu iga kiyaaq anjam di mare mare laqñsim dena gulbe eqnum? <sup>31</sup> O ijo was, e bole maronum, e bati gaigai moiqa laqñum. E ninği qa are qaloqñsim deqa moiqa laqñum. Ninği gago Tamo Koba Kristus Yesus beteryejunub deqa e ninği qa tulañ areboleboleibeqnu. <sup>32</sup> Jeu tamo nanği wagme juwan bul unub deqa nanği na e moiyoqbqa laqñub. E Efesus qureq di nanği ti qotoqñem. E mandam qaji inği inği oqajqa marsim nanği ti qotosaiqñem. Tamo moreño qaji nanği olo subq na tigelqasai anjam di bole qamu iga endegsi mare mare laqñum qamu, “Iga nebe kiyo moiqom deqa unğum, iga alañoqñsim gago segi jejamu qa areboleboleigoqñim inği ti ya ti uyoqñqom.” Degsi mare mare laqñum qamu.

<sup>33</sup> O ijo was kalil, tamo qudei na ninği gisanğab deqa ninği geregere ñam atoqñiy. Anjam bei unu di ninği qalie. Anjam agiende, “Ninği tamo uge uge nanği koba na laqñab. Laqñqab di nanği na nuño areqalo niñaqyetñgibqa ninği kumbra bole uratosib nanği daurnjrqaab.” Anjam degsi unu. <sup>34</sup> Deqa ninği areqalo bole ti sosib olo une yoqñab. Ninği quiy. Nuño ambleq di tamo qudei nanği Qotei qaliesai bole sai. Ninği jemaingwajqa deqa e ninği degsi mernğonum.

*Tamo moreño qaji nanği jejamu kiyero osib olo tigelqab?*

<sup>35</sup> Ariya ijo was kalil, tamo bei na e endegsi nenembqas, “Tamo moreño qaji nanği kiyersib olo subq na tigelqab? Nanği jejamu kiyero osib olo tigelqab?” <sup>36</sup> O ijo was kalil, tamo di a nanariosim deqa degsi nenembqas. Ninği qalie. Kurgus bunuj breiyibqa mandamq aisim a laña mandamq di sqas. Ariya kurgus moiyo breiyib a olo ñambile sosim qoqitosim oqwas. <sup>37</sup> Kurgus kiyo saga kiyo qoqitosiq geitqo qaji di otorosim olo yagwasai. Aqa gei moiyo segi yagim dena oqwas. <sup>38</sup> Tamo bei na kurgus yago kiyo saga yago kiyo yagimqa a olo qoqitosim oqimqa Qotei aqa segi areqalo na nanği tanu segi segi enjrqaas. Nanği tanu di uno segi segi. <sup>39</sup> Tamo ti wagme ti qebari ti qe ti nanği dego nanği jejamu uno segi segi. <sup>40</sup> Lan goge qaji inği inği nanği uno bei. Mandam qaji inği inği nanği uno bei. Lan goge qaji inği inği nanği wala bei. Mandam qaji inği inği nanği wala bei. <sup>41</sup> Sen ti bai ti bongar ti nanği rian segi segi. Bongar kalil dego nanği rian segi segi.

<sup>42</sup> Tamo subq na tigelqab qaji nanği kere dego. Tamo nanği moreñeqñab nanği jejamu subq ateqñub di qusaqñu. Nanği subq na tigelabqa nanği jejamu olo qusaqñasai. Nanği ñambile gaigai sqab. <sup>43</sup> Tamo nanği moreñeqñab nanği jejamu subq ateqñub di jejamu uge. Nanği subq na tigelabqa nanği jejamu

tulan boledamu sqas. Tamo nanği moreñeqnab nanço jejamu subq ateqnub di singila saiqoji. Nanği subq na tigelabqa nanço jejamu singila ti sqas. <sup>44</sup>Tamo nanği moreñeqnab nanço jejamu subq ateqnub di mandam qaji jejamu. Nanği subq na tigelabqa nanço jejamu lan qure qaji jejamu sqas.

Mandam qaji jejamu unu. Lan qure qaji jejamu dego sqas. <sup>45</sup>Agi Qotei aqa anjam bei nami endegsib nenğrenyeb unu, “Adam namo qaji a mandamq endena brantej. Deqa a mandam qaji ñambile osiq soqnej.” Ariya Adam bunu qaji a Mondor ti soqnej. Deqa a na iga lan qure qaji ñambile egwas. <sup>46</sup>Lan qure qaji ñambile a namoqna brantosai. Mandam qaji ñambile a namoqna brantej. Lan qure qaji ñambile a bunuqna brantqas. <sup>47</sup>Qotei na Adam namo qaji a mandam na gereiyej. Deqa a mandam tamo. Ariya Adam bunu qaji a lan qureq na bej. <sup>48</sup>Adam namo qaji a mandam tamo soqnej deqa aqa moma kalil nanği dego mandam tamo unub. Ariya Adam bunu qaji a lan qure qaji tamo unu deqa aqa tamo kalil nanği dego lan qure qaji tamo sqab. <sup>49</sup>Adam namo qaji a mandam tamo soqnej deqa iga a bulosim mandam tamo unum. Dego kere Adam bunu qaji a lan qure qaji tamo unu deqa mondon iga a bulosim lan qure qaji tamo sqom.

<sup>50</sup>O ijo was, e niñgi endegsi mernğwai. Qotei na mandam tamo nanği elenqa keresai. A nanço Mandor Koba sosim nanği taqatnırqa keresai dego. Gago jejamu moisiq qusaeqnu qaji di ñambile gaigai sqa keresai. <sup>51</sup>Deqa e uli anjam bei niñgi endegsi mernğwai. Iga kalil moiqasai. Iga kalil jejamu bulyosim jejamu bunuj oqom. <sup>52</sup>Qotei na gul bunu geteñ qaji anjamimqa tamo nami moreñeb qaji nanği subq na tigelqab. Deqa nanço jejamu olo bunu qusaqasai. Iga tamo moiyoasai unum qaji iga dego jejamu bulyosim nanği ti koba na jejamu bunuj oqom. O ijo was, kumbra di urur brantoqujatqas. <sup>53</sup>Gago jejamu ugeqas qaji endi iga uratosim olo jejamu bei ugeqasai qaji di oqom. Gago jejamu moiqas qaji endi iga uratosim olo jejamu bei moiqasai qaji di oqom. <sup>54</sup>Bole, gago jejamu ugeqas qaji endi iga uratosim olo jejamu bei ugeqasai qaji di oqom. Gago jejamu moiqas qaji endi iga uratosim olo jejamu bei moiqasai qaji di oqom. Yim bati deqa Qotei aqa anjam bei nami nenğrenyeb qaji di aqa damu brantqas. Anjam agiende, “Qotei a tulan singilaosiq deqa a qoto bunyosiq moiyo kobotej. <sup>55</sup>O Moiyo, ni gaigai singilaoqnsim tamo nanği qoto itnreqnum. Ariya ino singila di qabi unu? A koboej. O Moiyo, ni gaigai tamo nanği qaja na ñumeqnum. Ariya ino qaja di qabi unu? A koboej.”

<sup>56</sup>O ijo was niñgi quiy. Moiyo aqa qaja agi gago une. Une aqa singila agi Qotei aqa dal anjam. <sup>57</sup>Ariya gago Tamo Koba



Yesus Kristus aqa wau na iga qoto bunyoqnsim tigelejunum. Qotei a segi na iga sinjilatgeqnu deqa iga a tulan binjiyoqnqom.

<sup>58</sup> Deqa ijo was bole, ningi singila na tigelesosib Tamo Koba Yesus qa waukobaoqniy. Ningi wau di uratosib asgingaiq. Ningi qalie, ningi Yesus aqa wau ojeqnu di ningi lanja wau-osaieqnu. Wau di ulonqa keresai. Deqa ningi gaigai singila na wauoqniy.

## 16

### *Korin Kristen nanqi silali koroiyqab*

<sup>1</sup> Ariya ijo was, ningi na Jerusalem Kristen nanqi qa silali koroiyiy. Silali koroiyqajqa gam di e nami Galesia Kristen nanqi osornjnam nanqi dauryeb. E ningi dego gam di osornjit dauryiy. Gam agiende. <sup>2</sup> Yori bati gaigai olo nebeoqnimqa ningi segi segi silali soqnim oto oqnsib nunjo segi talq di atoqniy. Bunuqna silali kobaamqa e botqa ningi nami silali ateb unu deqa urur koroiyib e na osiy qarinyit Jerusalem aiqas. Deqa bati di ningi olo silali qa namqasai. <sup>3</sup> E botqa ningi na tamo qudei giltnjrib e nengren bei nanqi enjrsiy qarinyit nanqi silali di osib Jerusalem aiqab. <sup>4</sup> E dego aiqa are soqnim nanqi na e daurbosib iga koba na aiqom.

### *Pol a Korin Kristen nanjoq bqa marej*

<sup>5</sup> Ariya e mati Masedonia sawa ambleq na walwelosiy aisiy dia Kristen nanqi unjrsiy bunuqna e nunjoq bqai. <sup>6</sup> E nunjoq bosiy ningi koba na sqai kiyo. E qaliesai, e bati olekoba kiyo ningi koba na soqnit ulili bati koboqas. E ningi koba na sosiy olo uratngosiy sawa beiq gilqa laqnit ningi na e silali qa aqaryaibib e gilqai. <sup>7</sup> Ijo are endegsi unu. E bati truquyala ningi koba na sqasai. Tamo Koba a na odbimqa e bati olekoba ningi koba na sqai. <sup>8</sup> Ariya e Efesus qureq endi soqnit Juda nanjo yori bati koba nam Pentikos di brantqas. <sup>9</sup> Qotei na gam waqtetbej deqa e qure endia Yesus aqa wau yoqnsim tamo ungasari gargekoba nanqi are bulyetnjreqnum. Yeqnam jeu tamo gargekoba nanqi ijo wau di ugeugeiyqajqa laqnu.

<sup>10</sup> Timoti a nunjoq bamqa ningi a osib gereiyiy. Yim a ulaqasai. A ningi koba na are lawo sqas. Ningi quiy. Timoti a e ombla Tamo Koba aqa wau ojeqnum. <sup>11</sup> Deqa tamo bei na Timoti aqa nam ugetaiq. Ariya Timoti a olo ningi uratngosim walwelqa laqnimqa ningi a silali qa aqaryaiyosib lawo na suweiyib a olo ijoq bqas. A Kristen was qudei nanqi koba na ijoq bqab deqa e nanqi qa tarinjoqnqai.

<sup>12</sup> Gago was Apolos a endi unu. E a qa ningi saingit quiy. E bati gargekoba singila na Apolos minjoqnem, "Gago Kristen

was qudei nan̄gi Korin Kristen nan̄goq giloq̄nib ni nan̄gi dau-  
rn̄rsim gile.” Onaqa a gilqa uratoq̄nej. Bunuq̄na a nun̄goq  
bqajqa bati kereamqa a nun̄goq bqas.

*Pol aqa anjam mutu qudei*

<sup>13</sup> Ariya ijo was, nin̄gi geregere ñam atoq̄niy. Osib singila na  
tigeloq̄nsib Yesus qa nun̄go areqalo singilatoq̄niy. Nin̄gi gulbe  
bei qa ulaaib. Nin̄gi singila na soq̄niy. <sup>14</sup> Osib nin̄gi kumbra bei  
yqa maroq̄nsib qalaq̄alaiyo kumbra na yoq̄niy.

<sup>15</sup> Tamo kalil Akaia sawaq di unub qaji nan̄gi are bulyo-  
saisonabqa Stefanas aqa tal qujai nan̄gi namoq̄na are bulyeb.  
Stefanas aqa tal qujai nan̄gi Qotei aqa tamo un̄gasari nan̄gi qa  
wauoq̄nsib unub. O ijo was nin̄gi di qalie. Deqa e nin̄gi singila  
na endegsi mern̄gwai. <sup>16</sup> Nin̄gi tamo deqaji nan̄go sorgomq̄ di  
geregere soq̄niy. Sosib tamo kalil Qotei aqa wau ojeq̄nub qaji  
nan̄go sorgomq̄ di dego soq̄niy.

<sup>17</sup> Nun̄go ambleq̄ dena Stefanas na Fortunatus na Akaikus  
na nan̄gi qalub ijoq̄ beb deqa e tulan̄ areboleboleibej. Nin̄gi  
kalil ijoq̄ bq̄ keresai deqa nan̄gi kamba ijoq̄ beb. <sup>18</sup> Bosib ijo  
are latetbeb. Nan̄gi nami nun̄go are dego latet̄ngoq̄neb. Deqa  
nin̄gi tamo deqaji nan̄gi qa tulan̄ arebolebolein̄goq̄neme.

<sup>19</sup> Ariya tamo un̄gasari Esia sawaq̄ endi Qotei qa loueq̄nub  
qaji nan̄gi na nin̄gi kaiyein̄gonub. Akwila Prisila wo nan̄gi  
aiyel dego nin̄gi qa tulan̄ arebolebolein̄jreq̄nu deqa nan̄gi  
Tamo Koba aqa ñam na nin̄gi kaiyein̄gonub. Tamo un̄gasari  
kalil nan̄go aiyel talq̄ di Qotei qa loueq̄nub qaji nan̄gi dego  
nin̄gi kaiyein̄gonub. <sup>20</sup> Kristen was kalil q̄ure endia unub  
qaji nan̄gi na dego nin̄gi kaiyein̄gonub. Ariya nin̄gi na nun̄go  
Kristen was nan̄gi segi segi kundoq̄njriy. Kumbra di agi Qotei  
aqa segi tamo un̄gasari kalil nan̄gi yeq̄nub.

<sup>21</sup> E Pol. E ijo segi ban̄ na kaiye anjam endi nen̄gren̄yosim  
nun̄goq̄ qar̄in̄yonum.

<sup>22</sup> E ijo anjam getentq̄ai. Tamo bei a Tamo Koba Yesus  
qalaq̄alaiyq̄asai di Qotei na kamba tamo di q̄oreiyosim  
ñolawotq̄as. O Tamo Koba Yesus, ni aue.

<sup>23</sup> Tamo Koba Yesus a nin̄gi qa are boleiyeme. <sup>24</sup> E Kristus  
Yesus aqa ñam na nin̄gi kalil qalaq̄alain̄geq̄num. Bole.

## 2 KORIN

### *Pol a Yesus Kristus aqa wau tamo*

<sup>1</sup> E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej. Aqo gago was Timoti wo anjam endi nengrenyonum. Nengrenyosim ninği Korin qureq di Qotei qa loueqnub qaji ninği ti Qotei aqa segi tamo unğasari kalil Akaia sawaq di unub qaji nanği qa ti qarınyonum. <sup>2</sup> Gago Abu Qotei wo Tamo Koba Yesus Kristus wo nanği aiyel ninği qa are boleinjrimqa ninği lawo na soqniy.

### *Qotei a gago are latetgeqnu*

<sup>3</sup> Iga gago Tamo Koba Yesus Kristus aqa Abu Qotei aqa ñam soqtoqnqom. A gago Abu unu deqa a iga qa dulqajqa utru. A gago are tulan latetgwajqa Qotei. <sup>4</sup> Deqa a gago gulbe kalil qa iga are latetgeqnu. A kumbra degyeqnu deqa iga na olo kamba Kristen tamo unğasari gulbe ti unub qaji nanço are latetnjreqnum. <sup>5</sup> Kristus a jaqatin koba qoboıyej deqa iga a ombla jaqatin koba qoboıyeqnum. Dego kere Kristus a are tulan laesonaqa iga a ombla are tulan laejunum. <sup>6</sup> O ijo was kalil, aqo Timoti wo gulbe eqnum di aqa utru agiende. Gago gulbe dena Qotei na nunço are latetnğosim ninği elenqas. Ariya Qotei na gago are latetgeqnu di aqa utru agiende. Kumbra dena dego Qotei na nunço are latetnğoqnqas. Yimqa jaqatin iga qoboıyeqnum qaji di ninği dego qoboıyoqnsib singila na tigelesqab. <sup>7</sup> Iga ninği qa gago areqalo sinğilatosim endegsi mareqnum, bole, ninği sinğila na tigelesqab. Iga qalieonum, ninği iga ti beterosim jaqatin eqnum deqa Qotei na ninği iga ti gago are latetgoqnqas.

<sup>8</sup> O ijo was kalil, iga Esia sawaq di gulbe kobaquja item. Gulbe dena iga ugeugeigosıqa gago sinğila tulan bunyej. Deqa iga endegsi are qalem, gulbe dena iga moiıyotgwas. O ijo was, ninği gago gulbe deqa qalieıy. <sup>9</sup> Bole, iga are qalem, gulbe dena iga moiıyotgwas. Anjam pegıyo tamo na tamo bei minjqas, “Ni une ti unum deqa ni moiıqam.” Dego kere iga are qalem, gulbe dena iga moiıyotgwas. Qotei na gulbe di iga egej. Di kıyaqa? Iga gago segi sinğila qa are qalaim deqa. Iga Qotei aqa sinğila qa are qaloqnqom. Agi a na qujai moiıyo tamo nanği olo subq na tigeltnjreqnu. <sup>10</sup> O ijo was, gulbe dena iga moiıyotgwa laqnaqa Qotei na gulbe di taqal atetgej. Bunuqna dego a na gago gulbe taqal atetgoqnqas. Deqa iga Qotei qa gago areqalo sinğilatoqnsim mareqnum, bole, a na olo gago gulbe taqal atetgoqnqas. Yim iga bole sqom. <sup>11</sup> O ijo was ninği iga qa Qotei pailıyoqniy. Yimqa Qotei

a nungo pailyo de ti tamo ungasari gargekoba nanjo pailyo ti quoqnsim iga aqaryaigoqngas. Gam dena ninji na dego iga aqaryaigoqngab. Yim tamo ungasari gargekoba nanji Qotei tulan binjiyoqngab.

*Pol a Kristen nanji gisanjnrosaiognej*

<sup>12</sup> O was kalil, ijo are miligiq di e qalieonum, e kumbra bole tinjin segi dauryoqnsim unum. E ijo kumbra deqa tulan arebolebolebeqnu. Kumbra bole kalil Qotei na osorbeqnu qaji di segi e dauryoqnsim unum. E mandam tamo nanjo powo na kumbra di yosaieqnum. Qotei a e qa are boleiyuqnsiq kumbra osorbeqnu qaji di segi e yeqnum. Deqa e na tamo ungasari kalil nanji kumbra bole gaigai enjreqnum. Agi e na ninji dego kumbra tulan boledamu engoqnem. <sup>13-14</sup> Ijo anjam endi ninji sisiyosib poingwajqa deqa e nengrenyonum. Bole, ijo anjam qudei qa ninji geregere poingosai unu. Ariya ijo are endegsi unu. Ninji ijo anjam kalil qa poingekritim gilsib dinjo bati itqab. Yim gago Tamo Koba Yesus a olo bqajqa batiamqa ninji e qa tulan areboleboleingim e kamba dego ninji qa tulan areboleboleibqas.

<sup>15-16</sup> Ijo are miligiq di e nami qalieem, ninji ijo kumbra kalil qa tulan areboleboleingim sqab. Utru deqa e na ninji merngem, “E mati nungoq bosiy ninji uratngosiy Masedonia sawaq gilsiy dena puluosiy nungoq olo bqai.” Od, e bati aiyel nungoq bqajqa are qalem. Di kiyaaqa? Qotei na ninji gereingo aiyelngwajqa deqa. E nungoq olo bosiy dena Judia sawaq aiqa laqnitqa ninji silali qa aqaryaibibqa e gamq di inji bei qa truquaim deqa ti are qalem. <sup>17</sup> Ninji endegsib are qaleqnu kiyu, “Pol aqa anjam di a dauryosai. A na iga gisanjeje. A mandam tamo nanjo kumbra dauryoqnsiq deqa a anjam bei maroqnsiq olo urateqnu. A laja odoqnsiq olo saideqnu.” O ijo was ninji e qa degsib are qalaib. <sup>18</sup> Qotei a tamo bole unu deqa a aqa segi anjam kalil dauryeqnu. Deqa e dego anjam bole segi ninji merngeqnum. E laja odoqnsim olo saidosaieqnum. <sup>19</sup> Nami aqo Timoti wo Sailas ombla na wauoqnsim Qotei aqa Niri Yesus Kristus aqa anjam palontoqnsim ninji merngoqnem. Ninji qalie, Yesus a dego laja odoqnsiq olo saidosaieqnu. A gaigai Qotei aqa ñam na odeqnu. <sup>20</sup> Qotei a nami inji bole bole iga egwajqa marej. Kristus a odeqnu deqa Qotei na inji di iga egwas. Deqa iga Kristus aqa ñam na mareqnum, “Bole.” Osim iga Qotei aqa ñam soqteqnum. <sup>21</sup> Qotei a segi na ninji iga ti singilatgeqnu. Singilatgeqnaqa ninji iga ti Kristus beteryejunum. A na qujai iga aqa segi qa marsiq giltgej. <sup>22</sup> Osiqa aqa toqor egsiqa gago are miligiq di atej unu. Aqa toqor di aqa Mondor Bole. Mondor di Qotei na iga namo egej deqa iga qalieonum,

bunuqna inġi bole bole a na iga egwa marej qaji di dego egwas.

*Pol a Korin Kristen nanġi gulbe enjrq a uratosiq deqa a nanġoq olo bosai*

<sup>23</sup> O ijo was, e Qotei aqa ñam na niġi endegsi mernġwai. E niġi gulbe enġwa uratosim deqa e olo Korin qureq bosai. <sup>24</sup> Nunġo areqalo Yesus qa singilateqñub qaji di iga na laña taqatosai eqnum. Iga niġi ti koba na Yesus aqa wau oje-qnum. Di kiyaaqa? Niġi tulañ areboleboleiñġwajq a deqa. Iga qalieonum, niġi nunġo areqalo Yesus qa geregere singilatosib tigelejunub.

## 2

<sup>1</sup> Ariya e olo Korin qureq bosai. E marem, e olo are gulbe na nunġoq bqasai. <sup>2</sup> E niġi are gulbetetġwai di tamo yai na olo ijo are boletetbqas? Niġi segi na ijo are boletetbqa kere. <sup>3</sup> Deqa e nunġoq olo bosiy are gulbe oqa uratonum. E nunġoq bosiy areboleboleibqas di kere. Utru deqa e anjam bei nami nenġrenyosim nunġoq qarinyem. E qalieem, e areboleboleibqas di niġi kalil dego ijo arebolebole di unsib e koba na areboleboleigwas. <sup>4</sup> Bole, e are gulbe ti akam ti sosim anjam di nenġrenyem. E niġi are gulbetetġwa osim anjam di nenġrenyosai. E niġi tulañ qalaqalainġeqnum di niġi qalieqajq a deqa e anjam di nenġrenyem.

*Niġi na tamo une atej qaji aqa une kobotetiy*

<sup>5</sup> Tamo qujai nami une atej qaji di aqa une qa e anjam koba mernġwasai. Tamo dena e are gulbetetbosai. A niġi kalil are gulbetetġej. <sup>6</sup> Aqa une aqa awai uge niġi gargekoba na a yeb di kereqo. <sup>7</sup> Deqa bini niġi olo aqa une kobotetosib aqa are latetiy. Yim a are boleqas. Niġi deġyqasai di a olo are tulañ gulbe ti so uge. <sup>8</sup> Deqa niġi a olo qalaqalaiyo kumbra osoryoqñiy. Yim a qalieqas, niġi a torei qoreiyosai. <sup>9</sup> E nunġo kumbra tenemtosi y niġi ijo anjam kalil dauryeqñub kiyosai di qalieqajq a deqa e nami anjam nenġrenyosim nunġoq qarinyem. <sup>10</sup> Niġi tamo bei aqa une kobotetqab di e kamba dego aqa une kobotetqai. E tamo bei aqa une kobotetqai di e niġi qa osiy Kristus aqa ñamgalaq di kobotetqai. <sup>11</sup> Tamo uge Satan na iga gisanġosim ugeugeigaim deqa e deġyqai. Satan aqa areqalo uge ti aqa uli kumbra ti di iga bole qalieonum.

*Pol a Taitus unqa marej*

<sup>12</sup> O ijo was kalil, e Kristus aqa anjam bole palontqa osim walwelosim Troas qureq di brantem. Brantonam Tamo Koba a na gam waqtetbonaqa e dia aqa wau ojoqñem. <sup>13</sup> Bati di e

ijo was Taitus itosai deqa e a qa are koba qaloqnem. Deqa e Troas Kristen nanği olo uratnjrsim Masedonia sawaq gilem.

*Yesus aqa wau tamo nanği qoto bunyeqnum*

<sup>14</sup> Qotei a gaigai iga aqaryaieqnaqa iga Kristus aqa singila na qoto bunyeqnum. Deqa e Qotei tulanj binjyeqnum. Iga Qotei aqa wau ojeqnum deqa tamo unğasari sawa sawa kalilq di unub qaji nanği Qotei qa bole poinjreqnu. Nanço powo di saban quleq ti bolequja bul. <sup>15</sup> Od, gago wau di qurem quleq ti bul Kristus na Qotei atraiyeqnu qaji. Quleq di tamo unğasari Qotei na elenqnu qaji nanği ti tamo unğasari padalqa gamq di unub qaji nanği ti nançoq aiyeqnu. <sup>16</sup> Quleq dena tamo unğasari padalqa gamq di unub qaji nanği moiyojnreqnu. Osiqa tamo unğasari Qotei na elenqnu qaji nanği nambile enjreqnu. Tamo yai nanği Qotei aqa wau di yqa kere? Tamo dego bei sosai. <sup>17</sup> Ningi qalie, Qotei aqa anjam maro tamo gargekoba nanği silali oqajqa deqa osib Qotei aqa anjam mare mare laqnum. Ariya iga nanği bul sai. Qotei na iga wau egej deqa iga gisanj na wauosaieqnum. Iga Kristus koba na are qujaitosim Qotei aqa nıamgalaq di aqa anjam mare mare laqnum.

### 3

*Yesus aqa wau tamo nanği anjam bunuj mare mare laqnum*

<sup>1</sup> Iga gago segi nıam soqtqajqa are unu e? Sai. Tamo qudei na kiyo ningi na kiyo iga qa anjam bolequja nengrenjyqab di unğum. Ningi na kiyo tamo qudei na kiyo anjam bolequja di sisiyosib gago nıam soqtetgwab di dego unğum. Iga deqa are qalosaieqnum. <sup>2</sup> Ningi segi nengrenj bulosib gago kumbra qa saooqsib laqnum. Ningi nengrenj bul unub deqa tamo kalil nanği nengrenj di sisiyoqnsib iga qa poinjreqnu. Nengrenj di gago are miligiq di unu. <sup>3</sup> Kristus a segi na anjam di nengrenjyobulej. Nengrenj di Kristus aqaq na bosiq boleq di unu. Nengrenj di ningi segi. Agi iga ningi wauetngeqnum. Kristus a mandam tamo bei aqa singila na anjam di nengrenjyosai. A Qotei nambile gaigai unu qaji aqa Mondor aqa singila na anjam di nengrenjyey. A meniñq di nengrenjyosai. A tamo unğasari nanço are miligiq di nengrenjyey.

<sup>4</sup> Anjam di aqa utru agiende. Qotei a Kristus aqa nıam na iga wau egej deqa iga aqa wau ojeqnum. Iga qalieonum, Qotei na aqa wau di geregere boletqas. <sup>5</sup> Bole, iga segi na wau di yqa keresai. Deqa iga gago segi singila na Qotei aqa wau yeqnum degsi marqa keresai. Qotei a segi na iga singila egeqnaqa iga aqa wau yeqnum. <sup>6</sup> Gago wau agiende. Iga Kristus aqa anjam bunuj palontoqnsim laqnum. Anjam bunuj di tamo qudei na dal anjamq di nengrenjyosai. Qotei aqa

Mondor a segi na babtej. Dal anjam na tamo ungasari nanġi moyotnjreqnu. Ariya Qotei aqa Mondor na tamo ungasari nanġi nġabile enjreqnu.

<sup>7</sup> Od, dal anjam na tamo ungasari nanġi moyotnjreqnu. Dal anjam aqa wau agide. Dal anjam di Qotei a nami meniġq di nenġrenjyonaqa a rian ti brantej. Deqa Moses aqa ulatamu rianonaqa Israel tamo ungasari nanġi aqa ulatamu koqyqa keresai. Nam qamotnjrej. Bunuqna rian di olo koboej. <sup>8</sup> Ariya Mondor aqa wau bunuj unu. Aqa wau dena dal anjam aqa wau tulaġ bunyejunu. Mondor aqa wau di olo torei rianosiġ goge oqej. <sup>9</sup> Dal anjam aqa wau agiende. A na gago une qa iga mergoqnsiq padaltgeqnu. Bole, dal anjam aqa wau di nami rian ti bej. Ariya Qotei na iga tamo bole une saiġoji sqajqa gam babtej. Wau di olo tulaġ rian koba ti bej. Rian dena dal anjam aqa rian tulaġ bunyejunu. <sup>10</sup> Wau bunuj di rian koba ti unu. Rian dena wau namij aqa rian tulaġ bunyejunu. Deqa iga wau namij aqa rian uneqnum di a torei koboej. <sup>11</sup> Wau namij di gaigai sqa keresai. A koboqas. Bole, a rian ti bej. Ariya wau bunuj gaigai sqas qaji a olo tulaġ rian koba ti unu. Rian dena wau namij aqa rian tulaġ bunyejunu.

<sup>12</sup> Rian koba di mondoġ bosim gaigai gagoq di sqajqa deqa iga tariġoqnsim unum. Deqa iga ulaosaieqnum. Iga rian deqa mare mare laqnum. <sup>13</sup> Iga Moses soqnej dego sai. Moses aqa ulatamu rian ti soqnej deqa a gara mutu oqnsiqa dena aqa ulatamu kabutoqnej. Di kiyaaqa? Israel nanġi unaib deqa. Ariya wau namij aqa rian di koboej. <sup>14</sup> Israel nanġo areqalo getenġjresoqnej deqa nanġi anjam namij sisiyoqneb di nanġo areqalo gara mutu na kabutobulesoqnej. Nanġi nami degsib soqneb agi bini unub. Tamo bei na gara di taqal atqa keresai. Kristus a segi na gara di olo taqal ateqnu. <sup>15</sup> Od, bati gaigai Israel nanġi Moses aqa dal anjam sisiyeqnum di nanġo areqalo gara mutu na kabutobulejunu. Nanġi nami degsib soqneb agi bini unub. <sup>16</sup> Ariya tamo nanġi are bulyosib Tamo Koba aqa areq bqab di Qotei na gara di olo taqal atetnrqas. <sup>17</sup> Tamo Koba a segi Mondor. Niġi Tamo Koba aqa Mondor ti sqab di nunġo une na niġi olo taqatġgwa keresai. Niġi bole sqab. <sup>18</sup> Deqa gago ulatamu olo kabuesqasai. Iga kalil Tamo Koba aqa rian ya jeqiloq di unobuloqnoqom. Unoqnim rian di gagoq di tulaġ kobaoqnimqa dena iga Tamo Koba a segi buloqnsim sqom. Tamo Koba a na kumbra di iga egeqnu. Tamo Koba a segi Mondor Bole.

## 4

*Qotei aqa wau tamo nanġi web bul unub*

<sup>1</sup> Qotei a iga qa dulosiqa wau egej deqa iga aqa wau di ojqajqa asgigosaieqnu. <sup>2</sup> Kumbra uge uge kalil tamo nanji na ulitoqnsib yeqnu qaji di iga olo qoreiyeqnum. Iga gisañ kumbra na walweloſaieqnum. Iga Qotei aqa anjam bubulyosaieqnum. Iga boleq di anjam bole segi mareqnum. Deqa tamo kalil nanji gago kumbra di unoqnsib nanjo are miligiq di qalieeqnub, iga Qotei aqa ñamgalaq di wau bole yeqnum. <sup>3</sup> Ariya tamo ungasari padalqa gamq di unub qaji nanji Yesus aqa anjam bole iga palonteqnum qaji di aqa utru poinjrosaieqnu. <sup>4</sup> Mandam endeqa gisañ qotei Satan a na tamo ungasari Kristus qa nanjo areqalo ſingilatoſaieqnu qaji nanjo areqalo getentetnjrejunu. Deqa Kristus aqa anjam bole nanjo are miligiq aiqa keresai. Nanji Kristus aqa suwan unqa keresai dego. Kristus a segi Qotei. A segi rian ti unu.

<sup>5</sup> Niñgi quiy. Iga gago segi kumbra qa saosaieqnum. Iga anjam endegsi palonteqnum, “Kristus Yesus a gago Tamo Koba unu deqa iga aqa ñam na niñgi wauetñgeqnum.” Iga anjam degsi palonteqnum. <sup>6</sup> Tulañ nami Qotei a iñgi iñgi kalil gereiyqa oſiqa endegsi marej, “Ambru aqaq na suwan brantqas.” Ariya bunuqna Qotei aqa suwan di gagoq boſiqa gago are miligi suwantetgej. Deqa iga Kristus aqa ulatamu geregere uneqnum. Kumbra dena iga suwan bole unoqnsim Qotei aqa rian poigeqnu.

<sup>7</sup> O ijo was, iñgi tulañ boledamu iga deqa mare mare laqnum qaji di gagoq di unu. Bole, iga ſingila ſaiqoji unum. Iga web jagi na gereiyo qaji di bul unum. Deqa tamo kalil nanji iga nugoqnsib endegsib qalieeqnub, “Pol a aqa segi ſingila na wau di yoſaieqnu. A Qotei aqa ſingila kobaquja na wau di yeqnu. ſingila dena mandam qaji ſingila tulañ bunyejunu.” Tamo kalil nanji degsib qalieeqnub. <sup>8</sup> Gulbe segi segi gargekoba gagoq beqnu. Ariya gulbe dena iga padaltgoſaieqnu. Iñgi iñgi gargekoba na gago areqalo niñaqyetgeqnu. Ariya iñgi iñgi dena gago areqalo torei ugetetgosaieqnu. <sup>9</sup> Jeu tamo nanji na iga jaqatiñ egeqnu. Ariya Qotei a deqa iga uratgosaieqnu. Jeu tamo nanji dena iga lugoqnsib ñeiotgeqnu. Ariya nanji na iga torei ugeugeigosaieqnu. <sup>10</sup> Gago jejamuq di tamo ungasari nanji gaigai Yesus aqa moiyo unobuleqnu. Deqa Yesus aqa ñambile dego gago jejamuq di branteqnaq nanji uneqnu. <sup>11</sup> Iga Yesus aqa wau ojeqnum deqa jeu tamo nanji na bati gaigai iga moiyoſtowa laqnu. Nanjo kumbra dena Yesus aqa ñambile dego gago jejamuq di branteqnaq tamo ungasari nanji uneqnu. <sup>12</sup> Deqa moiyo a gagoq di waueqnu. Ariya ñambile a nuñgoq di waueqnu.

<sup>13</sup> Iga Yesus qa gago areqalo ſingilateqnum deqa Qotei aqa anjam bei nenğrenq di unu qaji a gagoq di branteqnu. Anjam



agiende, “E Qotei qa ijo areqalo singilateqnum deqa e aqa anjam mare mare laqnum.” O ijo was, iga dego Yesus qa gago areqalo singilateqnum deqa iga aqa anjam mare mare laqnum. <sup>14</sup> Iga qalieonum, Qotei na Tamo Koba Yesus subq na tigeltej deqa mondoŋ a na iga dego subq na tigeltgwas. Osim iga niŋgi ti joqsim Yesus aqa areq osi oqwas. <sup>15</sup> E anjam di niŋgi merngonum. Di kiyaaq? E qalieonum, kumbra kalil gagoq di branteqnu qaji dena niŋgi aqaryaingeqnu. Gam dena Qotei a tamo ungasari tulaŋ gargekoba naŋgi qa are boleiyeqnu. Deqa naŋgi Qotei binjiyoqnsib aqa ñam soqteqnum.

### *Iga laŋ qure qaji iŋgi iŋgi qa are qaleqnum*

<sup>16</sup> Deqa iga Qotei aqa wau ojqaŋqa asgigosaieqnu. Bole, gago jejamu a uge qa laqnu. Ariya gago are miligi a bati gaigai olo boleqnsiq singilaeqnu. <sup>17</sup> Iga qalieonum, gulbe ti jaqatiŋ ti iga bini qoboieqnum qaji di tulaŋ kokba sai. Naŋgi sokiñalayosib koboqab. Iga gulbe di eqnum deqa iga qalieonum, mondoŋ iga laŋ qureq di so bole gaigai sqom. Ingi bole bole iga mondoŋ oqom qaji di tulaŋ boledamu. Ingi bole bole dena mandam qa iŋgi iŋgi tulaŋ bunjnrejunu. <sup>18</sup> Ingi iŋgi iga gago ñamdamu na uneqnum qaji di sokiñalayosim koboqas. Deqa iga iŋgi iŋgi di koqyosaieqnum. Ingi bole bole iga gago ñamdamu na unqa keresai qaji di bati gaigai sqas. Deqa iga iŋgi bole bole di koqyoqnsim unum.

## 5

<sup>1</sup> Iga qalie, gago mandam qaji jejamu endi torei ugeqas. Gago jejamu endi gago tal bul. Mondoŋ Qotei na olo tal bei iga egwas. Tal di tamo bei na gereiyosai. Tal di laŋ qureq di bati gaigai sqas. <sup>2</sup> Iga bini mandam qaji talq endi unum deqa iga akamoqnsim unum. Iga gago laŋ qure qaji tal osim gara bul jugwajqa deqa are koba unu. <sup>3</sup> Iga tal di jugwom di iga olo laŋa sqasai. Iga jejamu bunuj oqom. <sup>4</sup> Iga mandam qaji talq endi unum deqa iga are gulbeigeqnaqa akamoqnsim unum. Iga jejamu bunuj osim gara bul jugwajqa are qaleqnum. Od, iga gago jejamu moiqas qaji endi uratosim olo jejamu ñambile sqas qaji di oqajqa are qaleqnum. Iga jejamu saiqoji sqajqa asgigeqnu. <sup>5</sup> Ñambile sqajqa gam di Qotei a segi na gereiyetgosiqa aqa Mondor iga egej. Mondor di Qotei na iga namo egej deqa iga qalieonum, bunuqna iŋgi bole bole a na iga egwa marej qaji di dego egwas.

<sup>6</sup> Deqa iga gaigai are singilatoqnsim unum. Iga qalie, iga mandam qaji jejamu ti unum deqa iga laŋ qureq di Tamo Koba a ombla sosaiunum. <sup>7</sup> Bini iga Yesus unosaieqnum. Ariya iga a qa gago areqalo singilatoqnsim walweleqnum. <sup>8</sup> Od, iga gago jejamu endi uratosim oqsim Tamo Koba a ombla

sqajqa are qaleqnum. Lan qure a gago qure utru sqas. <sup>9</sup> Deqa iga bini mandamq endi sqom kiyo lan qureq oqsim dia sqom kiyo di unqum. Iga kumbra Tamo Koba a tulan areareteqnu qaji di dauryqajqa are qaleqnum. <sup>10</sup> Iga qalieonum, mondon iga kalil Kristus aqa ulatamuq di tigelamqa a na gago kumbra qa iga pegigwas. Iga mandamq endi sosimqa iga kumbra bole yoqnem kiyo kumbra uge yoqnem kiyo di a unsim awai segi segi egwas.

*Iga tamo unqasari nanqo are bulyetnjrqajqa deqa waueqnum*

<sup>11</sup> Iga Tamo Koba a qa ulaoqnsim aqa sorgomq di unum deqa iga tamo unqasari nanqo are bulyetnjreqnum. Iga wau di ugetosaieqnum. Qotei a iga qa qalie bole. Nunqo are miligiq di ninqi dego iga qa qalie bole. E degsi are qalonum. <sup>12</sup> O ijo was, iga gago segi ñam soqtqa marsim anjam endi nenqrenyosai. Ninqi gago kumbra qa areboleboleingwajqa deqa are qalsim anjam endi nenqrenyonum. Tamo qudei nanqi lanq baban na kumbra bole yqajqa arearetnjreqnu. Nanqi are miligiq na kumbra bole yqajqa arearetnjrosaeqnu. Deqa ijo was, ninqi na tamo nanqi di tingitnjroqnsib dalnjroqniy. <sup>13</sup> Tamo nanqi di endegsib mareqnuq, "Pol a nanari tamo." Nanqo anjam di bole. Iga Qotei qa are qalsim nanari tamo unum. Ariya iga ninqi qa are qalsim areqalo bole ti unum. <sup>14</sup> Kristus na iga tulan qalaqalaigej aqa kumbra dena gago areqalo tigeltetgeqnaqa iga aqa wau ojeqnum. Iga qalieonum, Yesus a iga kalil qa moiyej deqa iga kalil dego morenobulem. <sup>15</sup> Od, a iga kalil qa moiyej. Iga ñambile unum deqa iga gago segi jejamu qa are qalsim walwelqasai. Yesus a iga qa moisiq olo subq na tigelej deqa iga a qa are qaloqnsim walweloqnoqom.

<sup>16</sup> Deqa bini iga gago areqalo namij na tamo unqasari nanqi peginjrosaeqnum. Bole, nami iga gago areqalo namij na Kristus pegiyonem. Ariya bini iga degyosaieqnum. <sup>17</sup> Deqa tamo bei a Kristus beteryesqas di Qotei na aqa are bulyetimqa a tamo bunuj brantqas. Ninqi quiy. Aqa kumbra namij torei koboej. Kumbra bunuj olo brantej.

<sup>18</sup> Kumbra bunuj di Qotei aqaq na bej. Nami iga Qotei ti jeu sonamqa Qotei a olo Kristus aqa singila na jeu kobotej. Deqa bini iga a ombla are qujaitosim unum. Jeu kobotqajqa wau di Qotei na iga egej deqa iga aqa anjam mare mare laqnum. <sup>19</sup> Anjam agiende. Tamo unqasari mandamq endi unub qaji nanqi nami Qotei ti jeu sonabqa Qotei na nanqi a ombla are qujaitosib sqajqa marsiq Kristus aqa singila na jeu kobotej. Deqa a nanqo une qa olo are qalosaieqnu. Iga Kristus aqa anjam di mare mare laqajqa deqa Qotei na wau egej. <sup>20</sup> Kristus na iga qarinqej deqa Qotei a gago medabu na tamo

kalil nan̄gi metnjreqnu. Iga Kristus aqa anjam palontoqnsim tamo kalil nan̄gi endegsi metnjreqnum, “Nin̄gi jeu kumbra uratosib bosib Qotei ombla are qujaitosib soqniy.” <sup>21</sup> O ijo was, Qotei na iga aqaryaigwa marsiq deqa a gago une kalil osiqa Kristus aqa qawarq di atnaqa a une tamo bulej. Kristus a segi une yosaieqnu. Deqa iga Yesus beteryosim dena iga Qotei aqa segi tamo bole une saiqoji sqom.

## 6

### *Qotei aqa wau tamo nan̄gi gulbe iteqnub*

<sup>1</sup> Iga Qotei ombla waueqnum deqa iga nin̄gi singila na endegsi mern̄gwom, “Qotei a nin̄gi qa are boleiyeqnu aqa kumbra di nin̄gi laña urataib.” <sup>2</sup> Agi Qotei a nami marej, “E ni padalo sawaq dena oqajqa bati atem. Bati di brantonaqa e ino pailyo qusim ni aqaryaimem.” O was nin̄gi quiy. Qotei na iga aqaryaigwajqa bati brantqo. A na iga padalo sawaq dena elenqajqa bati bini qujai.

<sup>3</sup> Tamo un̄gasari nan̄gi gago wau endi uge qa marsib ulon̄osib uneq aiyai deqa iga na nan̄gi kumbra uge bei osornjro-saieqnum. <sup>4</sup> Iga Qotei aqa wau tamo unum deqa iga gaigai tamo un̄gasari kalil nan̄gi kumbra bole osornjreqnum. Iga singila na tigeloqnsim gulbe qoboieqnum. Gago gulbe agiende. Tamo qudei na iga ugeugeiqnub. Une bei bei na iga niñaqgwa laqnu. Iga are jaqatingeqnu. <sup>5</sup> Jeu tamo nan̄gi toqon̄ na iga lugoqnsib tonto talq di breiqnub. Osib murqumyoqnsib iga qa anjam uge uge mareleiqnub. Iga gaigai ñes na ti jaqatin̄ na ti waukobaeqnum. Iga geregere ñeiosaieqnum. Iga bati gaigai mam ti laqnum. <sup>6</sup> Iga gulbe kalil di oqnsim kumbra bole jiga saiqoji dauryeqnum. Iga qalie bole ti unum. Iga urur minjin̄ oqosaieqnu. Iga na tamo un̄gasari nan̄gi kumbra bole bole enjreqnum. Iga Qotei aqa Mondor Bole aqa singila oqnsim unum. Iga na tamo kalil nan̄gi qalaqalainjreqnum. Iga laña medabu na nan̄gi qalaqalainjrosaieqnum. <sup>7</sup> Iga Qotei aqa anjam bole gaigai mareqnum. Iga Qotei aqa singila oqnsim waueqnum. Iga gago ban̄ wo na ti ban̄ qonan̄ na ti qoto qa in̄gi in̄gi ojoqnsim dena kumbra bole tin̄tin̄ dauryoqnsim waueqnum.

<sup>8</sup> Tamo qudei nan̄gi gago ñam soqteqnu. Ariya tamo qudei nan̄gi gago ñam olo ugeteqnu. Tamo qudei nan̄gi iga yomuieqnu. Ariya tamo qudei nan̄gi olo gago kumbra bole babteqnu. Tamo qudei nan̄gi are qaleqnu, iga gisan̄ tamo. Sai. Iga anjam bole segi mareqnum. <sup>9</sup> Tamo qudei nan̄gi iga qa qaliesai. Ariya tamo gargekoba nan̄gi iga qa bole qalieeqnu. Iga moiyo tamo bulonum. Ariya iga olo ñambile unum. Qotei na iga tingitgwa maroqnsiq deqa iga

gulbe egeqnu. Ariya gulbe dena iga moiyoṭgosaieqnu. <sup>10</sup> Iga are gulbeigeqnu. Di unḡum. Iga gaigai areboleboleigeqnu. Iga ñoro saiḡoji unum. Di unḡum. Iga na tamo unḡasari nanḡi aqaryainjreqnam nanḡi laḡ qure qaji ñoro koba eleḡeqnub. Iga inḡi inḡi saiḡoji unum. Di unḡum. Iga inḡi bole bole kalil olo ejunum.

<sup>11</sup> O Korin tamo unḡasari, iga anjam kalil endi boleḡ at-sim ninḡi mernḡonum. Iga gago are miligi waḡtosim ninḡi enḡekritonum. <sup>12</sup> Iga gago are miligi getentosai. Iga ninḡi tulanḡ qalaqalaingeqnum. Ariya ninḡi nunḡo are miligi getentejunub. Ninḡi iga koba na are qujaitosaieqnu. <sup>13</sup> Ninḡi ijo anḡro bul unub deḡa e ninḡi endegsi mernḡwai. Iga gago are miligi waḡtosim ninḡi qalaqalaingeqnum deḡo kere ninḡi kamba nunḡo are miligi waḡtosib iga qalaqalaigoqniy.

### *Iga Qotei aqa atra tal bul unum*

<sup>14</sup> Tamo unḡasari Kristus qa nanḡo areqalo sinḡilatosaeqnuḡ qaji nanḡo kumbra nunḡo kumbra ti ombla kerekere sai. Deḡa ninḡi nanḡi ti beterosib koba na laqnaib. Ninḡi kumbra bole dauryo qaji tamo unub. Ariya nanḡi Qotei aqa dal anjam gotranḡo qaji tamo unub. Deḡa ninḡi nanḡi ti beterqa kere e? Sai. Ninḡi suwanḡoḡ di unub. Ariya nanḡi ambruḡ di laqnuḡ. Deḡa ninḡi nanḡi ti beterqa kere e? Sai. <sup>15</sup> Kristus Satan wo nanḡi aiyel are qujaitosib ombla sqa kere e? Keresai. Ninḡi Kristus qa nunḡo areqalo sinḡilateqnuḡ. Tamo unḡasari qudei nanḡi Kristus qa nanḡo areqalo sinḡilatosaeqnuḡ. Deḡa ninḡi nanḡi ti areqalo qujaitosib ombla sqa kere e? Di deḡo keresai. <sup>16</sup> Qotei aqa atra tal ti gisanḡ qotei nanḡo atra tal ti beterosib ombla sqa kere e? Di deḡo keresai. Qotei ḡambile gaigai unu qaji aqa atra tal aḡi iga segi. Deḡa Qotei aqa anjam bei nami endegsib nenḡrenḡyeb unu, “E nanḡo ambleḡ di sosiy walweloqnqai. E nanḡo Qotei sqai. Nanḡi ijo segi tamo unḡasari sqab.” <sup>17</sup> Tamo Koba a nami degsi marsiqa olo anjam bei deḡo endegsi marej, “ ‘Ninḡi na tamo unḡasari e qa qaliesai qaji nanḡi uratnjrsib sasaloiy. Ninḡi nanḡo kumbra jigat bei ojaib. Ojḡasai di e ninḡi eleḡosiy boletḡḡwai. <sup>18</sup> Osiy e nunḡo Abu soqnit ninḡi ijo segi anḡro tinḡinḡ sqab.’ Tamo Koba sinḡila ti unu qaji a nami degsi marej.”

## 7

<sup>1</sup> O ijo was bole, inḡi bole bole Qotei a nami iga egwa marej qaji di a na egwas. Deḡa kumbra jigat kalil gago jejamu ti gago are miligi ti di unub qaji di iga torei uratekritḡom. Osim dena iga Qotei aqa ḡamgalaḡ di une saiḡoji sosim a qa ulaoqnḡom. Ulaoqnḡsim gago jejamu ti gago are miligi

ti torei Qotei yekritosim aqa segi kumbra boleq di sosim dauryoqnoqm.

*Pol a Korin Kristen nanği qa tulaŋ areboleboleiyej*

<sup>2</sup> Deqa niŋgi nuŋgo are miligi waqtosib iga qalaqalaigoqniy. Iga nami tamo qudei kumbra uge bei enjrosaiognoqm. Iga tamo qudei ugeugeinjrosaiognoqm. Iga tamo qudei nanği inği inği gisaŋ na yainjrosaiognoqm. <sup>3</sup> E nuŋgo jejamuq di une qametŋgwa osim anjam endi merŋgosai. Agi e maronum, iga niŋgi tulaŋ qalaqalaingeqnum. Deqa iga moiqom kiyo iga ŋambile sqom kiyo di unğum. Iga gago are miligi waqtosim niŋgi qalaqalaingoqnsim sqom. <sup>4</sup> E qalieonum, nuŋgo kumbra bolequja. Deqa e niŋgi qa tulaŋ areboleboleibeqnu. Ijo are miligi niŋgi qa tulaŋ laejunu. Iga gulbe koba eqnum di unğum. E niŋgi qa are qaloqnsim dena e tulaŋ areboleboleibeqnu.

<sup>5</sup> Ariya iga Masedonia sawaq di brantosim bati deqa iga aqaratqa keresai. Sawa dia iga gulbe gargekoba itoqnoqm. Tamo qudei nanği iga ti anjam na qotoqnoqm. Iga ulaoqnsim are toŋtoŋgoqnej. <sup>6</sup> Niŋgi qalie, tamo unğasari are gulbeinjreqnu qaji nanği Qotei na olo are latetnjreqnu. Deqa Qotei na Taitus qarinyonaqa a gagoq bonaqa iga unsimqa gam dena gago are olo laej. <sup>7</sup> Od, gam dena Qotei na gago are latetgej. Gam dena segi sai. Taitus a nami nuŋgo ambleq di sonaqa niŋgi na aqa are lateteb a degsi mergonaq qunamqa gam dena dego Qotei na gago are latetgej. Taitus a niŋgi qa iga endegsi saigej. Niŋgi e olo nubqajqa are koba qaloqnsib nuŋgo une qa are ugeinğeqnu. Osib niŋgi e ombla are qujaitosib sqajqa siŋgilaeqnub. Taitus a niŋgi qa iga degsi saigej deqa e tulaŋ areboleboleibeqnu.

<sup>8</sup> E qalieonum, anjam e nami nenğrenyem qaji di niŋgi sisiyosib are gulbeinğej. Ariya e deqa are ugeibosai. Bole, nami e are ugeibej. Ariya bini sai. Anjam e nenğrenyem qaji dena niŋgi are gulbeinğej. Sokiñalayonaq nuŋgo are gulbe di olo koboej. <sup>9</sup> Deqa e bini areboleboleibeqnu. Niŋgi are gulbeinğej e deqa areboleboleibosai. Niŋgi are gulbeinğej ariya bunuqna niŋgi olo are bulyeb deqa e areboleboleibeqnu. Qotei a segi na are gulbe di niŋgi enğej. Deqa gago anjam nenğrenyem qaji dena niŋgi yala ugeugeinğosai. <sup>10</sup> Are gulbe Qotei na tamo unğasari nanği enjreqnu qaji dena nanği are olo bulyetnjreqnu. Deqa Qotei na nanği eleneqnu. Nuŋgo are gulbe di inği uge sai. Di inği bole. Iga deqa are ugeigwasai. Ariya mandam tamo nanği are gulbe eqnub di inği uge. Dena nanği moiyo gam tureqnu. Di kiyaaqa? Nanği are bulyosai deqa. <sup>11</sup> Niŋgi geregere are qaliy. Are gulbe Qotei na niŋgi enğej qaji dena niŋgi olo siŋgilatŋej. Agi bini niŋgi kumbra

bole bole yeqñub. Are gulbe dena Qotei na nuñgo are tigeltetñgonaqã niñgi tamo qujai nami une atej qaji di a ñiriñteb. Osib niñgi Qotei ulaiyosib aqa sorgomq di geregere soqñeb. Qotei na nuñgo are tigeltetñgej deqa niñgi iga qa are koba qalsib tamo une atej qaji di aqa une gereiyetqa waukobaeb. Niñgi kumbra kalil di yeb deqa iga qalieonum, niñgi tamo bole une saiqoji unub.

<sup>12</sup> O ijo was, e nami anjam neñgreñyosim nuñgoq qarinyem. Niñgi na tamo une atej qaji aqa une gereiyetqajqa e deqa osim anjam di neñgreñyosai. Tamo agi tamo dena une yej qaji a qa dego e are qalsim anjam di neñgreñyosai. Niñgi na iga tulañ qalaqalaigeqñub nuñgo kumbra di Qotei aqa ñamgalaq di boleq dqajqa deqa e anjam di neñgreñyem. Yim niñgi qalieqajqa, nuñgo kumbra di bolequja. <sup>13</sup> Nuñgo kumbra bole degsi unu deqa gago are tulañ laejunu.

Gago are laejunu deqa iga areboleboleigeqñu. Ariya iga olo tulañ areboleboleigeqñu. Di kiyaaqa? Niñgi na Taitus aqa are gulbe kobotetosib are boleteteb deqa. <sup>14</sup> Anjam kalil e niñgi qa Taitus saiym qaji di bole. Deqa e ijo anjam deqa jemaibosai. E nuñgo kumbra bole kalil qa Taitus saiymosim nuñgo ñam soqtem. Taitus a qalie, anjam iga niñgi qa a saiym qaji di bole. <sup>15</sup> Bati Taitus a nuñgoq bonaqa niñgi a ulaiyosib a osib aqa anjam dauryoqñeb. Nuñgo kumbra bole di Taitus aqa areqaloq di unu deqa a na niñgi tulañ qalaqalaingeqñu. <sup>16</sup> E niñgi qa are siñgilatosim qalieonum, niñgi kumbra bole kalil yoqñsib sqab. Deqa e niñgi qa tulañ areboleboleibeqñu.

## 8

### *Kristen nañgi silali koroiyeb*

<sup>1</sup> O ijo was niñgi quiy. Qotei a Kristen tamo ungasari Masedonia sawaq di unub qaji nañgi qa are boleiyej. Iga deqa niñgi saingonam quiy. <sup>2</sup> Masedonia Kristen nañgi iñgi iñgi tulañ saiqoji sosib gulbe qoboieyqñab bati deqa Qotei na nañgi siñgilatñjrnaqa nañgi areboleboleiñjrnaqa Judia Kristen nañgi aqaryainjrqa marsib silali koba koroiyeb. <sup>3</sup> E deqa niñgi merngwai. Masedonia Kristen nañgi nañgo segi areqalo na silali di koroiyeb. Nañgo silali kiñala soqnej di nañgi koroiyeb. Osib nañgi na nañgo kumbra di bunyosib olo silali tulañ koba koroiyeb. <sup>4</sup> Nañgi na iga waingosib endegsib mergoqñeb, “Niñgi iga odgibqa iga niñgi beterngosim Qotei aqa tamo ungasari nañgi silali qa aqaryainjrqom.” <sup>5</sup> O ijo was, iga nami are qalem, Masedonia Kristen nañgi silali koroiyqab. Ariya nañgi kumbra di olo bunyosib Qotei aqa areqalo dauryosib nañgo segi jejamu Tamo Koba Yesus yeb. Osib iga dego egeb.

<sup>6</sup> Qotei a nami nin̄gi qa dego are boleiyej deqa Taitus a silali koroiyqajqa wau di nun̄go ambleq di tigeltej. Deqa iga Taitus sin̄gila na minjem, “Ni olo Korin Kristen nan̄goq aisim wau di kobotime.” <sup>7</sup> O ijo was, bati gaigai nin̄gi kumbra tulan boledamu yeqnub. Agi nin̄gi Qotei qa nun̄go areqalo sin̄gilatoqnsib aqa anjam palontqajqa waukobaeqnu. Nin̄gi Qotei qa bole qalieeqnu deqa nin̄gi aqa wau ojqajqa tulan sin̄gilaeqnu. Osib nin̄gi na iga tulan qalaqalaigeqnu. Ariya Qotei a nin̄gi qa are boleiyej deqa nin̄gi silali koroiyqajqa wau di dego yosib silali koba atib soqnem.

<sup>8</sup> E nin̄gi wau di yqajqa wain̄gwasai. Kristen tamo un̄gasari qudei nan̄gi wau di yqajqa tulan sin̄gilaeqnu. Nan̄go kumbra deqa agi e na nin̄gi saingonum. Deqa nin̄gi dego qalaqalaiyo kumbra qa tulan sin̄gilaosib silali koroiyqajqa wau di yiy. Yibqa e unsiy marqai, “Bole, nin̄gi qalaqalaiyo kumbra yeqnu.” <sup>9</sup> O ijo was nin̄gi qalie, gago Tamo Koba Yesus Kristus a nin̄gi qa are boleiyej. A nami lan̄ qure qaji ñoro koba ti soqnej. Sosiqa a nin̄gi qa osiqa ñoro di olo uratosiqa in̄gi tulan saiqoji soqnej. Di kiyaaqa? Nin̄gi kamba lan̄ qure qaji ñoro koba oqajqa deqa.

<sup>10</sup> Silali koroiyqajqa wau deqa e olo ijo areqalo bei ubtosiy mern̄gwai. Wausau bei nami nin̄gi namoqna silali koroiyqajqa wau di tigelteb bati deqa nin̄gi wau di yqajqa tulan arearetn̄gej. <sup>11</sup> Deqa bini nin̄gi wau di olo kobotqa sin̄gilaoy. Nin̄gi degyqab di bolequja. Nami nin̄gi wau di yqajqa are tulan prun̄goqnej. Deqa bini nin̄gi silali soqnim sin̄gilaosib wau di kobotiy. <sup>12</sup> Nin̄gi silali koroiyqa are soqnim nin̄gi koroiyiy. Yim Qotei a nin̄gi qa tulan areboleboleiyqas. Nin̄gi silali saiamqa di un̄gum. Koroiyaib. Qotei a deqa njirin̄qasai. Nin̄gi silali soqnim di koroiyiy.

<sup>13</sup> Nin̄gi gulbe koba qoboyesoqnuib tamo qudei nan̄gi olo gulbe saiqoji sqab e deqa nin̄gi mern̄gosai. Iga kalil kerekere unum. <sup>14</sup> Deqa bini nin̄gi in̄gi koba ejunub qaji nin̄gi na tamo qudei in̄gi qa truqueqnu qaji nan̄gi aqaryain̄jroqniy. Bunuqna nin̄gi in̄gi qa truquabqa nan̄gi na kamba olo nin̄gi aqaryain̄gwab. Nin̄gi kumbra degyqab di nin̄gi kalil kere na sqab. <sup>15</sup> Agi Qotei aqa anjam bei nami endegsib nen̄gren̄yeb unu, “Tamo nan̄gi in̄gi koba koroiyeb qaji nan̄gi in̄gi uynab menetn̄rnaqa in̄gi oto bei uratosai. Tamo nan̄gi in̄gi kiñala koroiyeb qaji nan̄gi dego in̄gi uynab menetn̄rnaqa in̄gi bei qa truquosai.”

*Pol a tamo qudei nan̄gi qarijn̄rnaqa Korin Kristen nan̄goq aiyeb*

<sup>16</sup> E Qotei tulan bin̄jyeqnum. Di kiyaaqa? A na Taitus are pruqtetonaqa a iga ti are qujaitosiqa nin̄gi qa are koba soqnej.

17 Iga Taitus minjem, “Ni olo Korin Kristen nanḡoq aiyē.” Onaqa Taitus a aqa segi areqalo na odosiq silali koroiyqajqa wau deqa tulan ṡingilaosiq nunḡoq aiyēj. 18 Iga Kristen was bei osim Taitus ombla qarinjrnām nunḡoq aiyēb. Was bei di a ñām ti unu. A Yesus aqa anjam bole maro qaji tamo. Kristen tamo unḡasari qure qure kalilq di unub qaji nanḡi a qa qalie bole. 19 Di segi sai. Kristen nanḡi na a gilteb deqa a iga ti koba na walweloqnsimqa silali koroiyqajqa wau di taqateqnum. Wau di aqa utru agiende. Qotei a Kristen nanḡi sougetejunub qaji nanḡi qa are boleiyeqnu. Iga wau di taqateqnum deqa Tamo Koba aqa ñām tulan goge oqeqnaqa tamo kalil nanḡi unoqnsib iga qa mareqnu, “Bole, nanḡi wau di yqajqa tulan ṡingilaeqnu.” 20 O ijo was kalil, silali koroiyqajqa wau di tamo qudei na yomuiyaib deqa iga was bei di osim koba na silali di taqateqnum. 21 Gago are endegsi unu. Iga kumbra bole segi gaigai yoqnqom. Tamo unḡasari kalil Tamo Koba a ombla nanḡo ṡamgalaq di iga kumbra di yoqnqom.

22 Ariya iga gago Kristen was bei dego qarinyonam a Taitus was de wo nanḡi aiyel daurnjrsiq koba na nunḡoq aiyēb. Was bei di agi iga nami bati gargekoba aqa kumbra tenemtoqnem. A Qotei aqa wau ojqajqa ṡingilaoqnej iga degsi unoqnem. Bini a silali koroiyqajqa wau di ojqajqa tulan ṡingilaeqnu. A qalie, ninḡi kumbra bole yo qaji tamo unub. A degsi qalieosiq deqa a silali koroiyqajqa wau di ojqajqa tulan ṡingilaeqnu.

23 Ninḡi Taitus qalie. A e ombla ninḡi qa are qaloqnsim waukobaqnum. Ninḡi gago Kristen was aiyel nanḡi di dego qalie. Nanḡi Qotei aqa tamo unḡasari qure qure kalilq di unub qaji nanḡi qa wau bole yeqnu. Nanḡo wau dena nanḡi Kristus aqa ñām tulan soqteqnu. 24 Deqa ninḡi na was aiyel nanḡi di kumbra bole enjroqniy. Yim Kristen kalil nanḡi nunḡo kumbra di unsib marqab, “Bole, nanḡi qalaqalaiyo kumbra dauryeqnu.” Osib qalieqab, “Pol a Korin Kristen nanḡo kumbra bole qa iga saigeqnu di a gisaṡosaieqnu. A anjam bole saigeqnu.”

## 9

### *Silali koroiyqajqa wau*

1 Iga silali koroiyqajqa wau di Qotei aqa tamo unḡasari nanḡi aqaryainjrqajqa deqa. Ninḡi wau di qalieonub deqa e olo anjam olekoba tortoryosiy nenḡrenḡyasai. 2 E qalieonub, ninḡi wau di yqajqa are tulan prugnqeqnu. Deqa e gaigai Masedonia Kristen nanḡo ṡamgalaq di nunḡo ñām soqteqnum. Osim endegsi minjreqnum, “Wausau bei nami Akaia sawaq di Korin Kristen nanḡi silali koroiyqajqa wau di tigeltqa mareb.” Od, ninḡi wau di yqajqa tulan ṡingilaeqnu. E na



Masedonia Kristen nanḡi nuḡo kumbra deḡa sainjreqnam quoqnsib nanḡi gargekoba deḡo wau di yqajqa are prugnjqre-  
 qnu. <sup>3</sup> E nanḡi endegsi minjrem, “Korin Kristen nanḡi silali koroiyqajqa tulaḡ siḡgilaeqnub.” Ariya e nuḡo ḡam laḡa soqto uḡe deḡa niḡi silali di koroiyiy. Utru deḡa e was qalub nanḡi di qariḡnjrnām nuḡoq aiyeb. <sup>4</sup> E qalieonum, niḡi silali di koroiyosib atib sqas. Soqnim Masedonia Kristen qudei nanḡi e ombla na nuḡoq bosim niḡi nami silali di ateb unu degsi unqom. Iga bosim degsi unqasai di iga niḡi ti jemaigo uḡe. <sup>5</sup> E are qalem, e was qalub nanḡi di minjritqa nanḡi namoqna aisib nuḡo silali niḡi nami koroiyqa mareb qaji di niḡi koba na gereiyqab. Gereiyibqa e bunuqna bosiy oqai. Yim tamo unḡasari kalil nanḡi silali di unsib qalieqab, bole, niḡi nuḡo segi areqalo na silali di ateb unu. E niḡi silali di koroiyqajqa waiḡgosaiognem nanḡi deḡsib qalieqab.

<sup>6</sup> Niḡi geregere are qaliy. Tamo a iḡi kiḡala yagwas di a iḡi kiḡala olo oqas. Tamo a iḡi koba yagwas di a iḡi koba olo oqas. <sup>7</sup> Deḡa niḡi segi segi kalil silali atqajqa are soqnim silali atoqniy. Niḡi are gulbe na silali ataib. Niḡi tamo bei na waiḡim deḡa silali ataib. Niḡi nuḡo segi areqalo dauryosib are bole na silali atoqniy. Yim Qotei na niḡi tulaḡ qalaqalainḡoqnqas. <sup>8</sup> Qotei a niḡi qa are boleiyosim iḡi bole bole gaigai enḡoqnqā kere. Deḡa niḡi tulaḡ kere na sosibqa dena wau bole bole yoqniy. <sup>9</sup> Agi Qotei aqa anjam bei nami endegsib nenḡrenḡyeb unu,

“Tamo qudei nanḡi saga yago breiyo bul nanḡo iḡi iḡi jeiyoqnsib tamo iḡi saiḡoji nanḡi enjreqnub.

Deḡa nanḡo kumbra bole bati gaigai sqas.”

<sup>10</sup> O ijo was niḡi qalie, Qotei a na qujai tamo nanḡi saga yago enjreqnaqa nanḡi breiyeqnu. Osiqa tamo nanḡi bem enjreqnaqa nanḡi uyeqnu. Deḡo kere Qotei na iḡi iḡi enḡoqnimqa niḡi tulaḡ kere na sqab. Deḡa niḡi Qotei aqa tamo unḡasari nanḡi aqaryainjroqniy. Tamo nanḡi saga yago breiyeqnaḡ iḡi koba oqeleḡeqnu deḡo kere nuḡo silali koroiyqa wau di tulaḡ boleqnaqas. <sup>11</sup> Qotei na iḡi iḡi koba enḡoqnimqa niḡi na kamba Kristen nanḡi silali qa aqaryainjrqajqa tulaḡ kere na sqab. Deḡa niḡi silali di koroiyosib gago baḡq di atib iga na osi aisim Kristen nanḡi enjrimqa nanḡi deḡa Qotei biḡiyoqnsib sqab. <sup>12</sup> Nuḡo wau dena Qotei aqa tamo unḡasari nanḡi aqaryainjrimqa nanḡi kere na sqab. Nanḡi iḡi bei qa truquqasai. Di segi sai. Nuḡo wau deḡa nanḡi Qotei tulaḡ biḡiyoqnaqab. <sup>13</sup> Niḡi wau di yqab di Qotei aqa tamo unḡasari nanḡi unsib qalieqab, bole, niḡi Kristus aqa anjam bole siḡgila na ojoqnsib aqa medabu dauryeqnub. Od, niḡi na Kristen nanḡi silali kobaquja na aqaryainjroqnaqab

di nanġi nuġo kumbra di unoqnsib Qotei aqa ñam soqtoqn-qab. <sup>14</sup> Osib qalieqab, “Bole, Qotei a Korin Kristen nanġi qa are tulaġ boleiyeqnu.” Nanġi degsib qalieosib ninġi tulaġ qalaqalaingosib ninġi qa Qotei pailyoqnqab. <sup>15</sup> O ijo was ninġi quiy. Qotei a inġi tulaġ kobaquja iga egej. Inġi di agi Kristus. Inġi di aqa utru iga geregere ubtosim marqa keresai. Qotei na inġi di iga egej deqa iga a tulaġ binjyoqnqom.

## 10

### *Tamo qudei nanġi Pol qa yomuoqneb*

<sup>1</sup> Ninġi qudei e qa yomuoqnsib endegsib mareqnu, “Pol a nami iga koba na sosiqa aqa segi ñam aguq atoqnsiqa laesoqnej. Ariya a sawa isaq di sosiqa iga qa ħiriñoqnsiqa anjam sinġila na mergeqnu.” O ijo was ninġi mati Kristus aqa kumbra qa are qaliy. A aqa segi ñam aguq atoqnsiqa laesoqnej. <sup>2</sup> Deqa e nuġoq bosiy Kristus aqa kumbra di dauryosiy laesqai. E ninġi qa ħiriñqasai. Ariya tamo qudei nanġi are qaleqnu, iga mandam tamo nanġo kumbra dauryoqnsim laqnum. Tamo nanġi di e na ħiriñtnjrsiy anjam sinġila na minjrqi. E laesqasai. <sup>3</sup> Bole, iga mandamq endi laqnum. Ariya iga mandam tamo nanġo kumbra na qotosaieqnum. <sup>4</sup> Qotei na qoto qa inġi inġi iga egej. Inġi inġi di Qotei aqa sinġila ti unu. Di mandam qaji inġi inġi sai. Iga dena qotoqnsim gago jeu tamo nanġo sinġila gotrañyeqnum. <sup>5</sup> Areqalo uge ti gisañ anjam ti di iga na gotrañyeqnum. Kumbra uge kalil ninġi Qotei qalieqajqa gam getentetñgeqnu qaji di dego iga na gotrañyeqnum. Gago wau agiende. Iga na tamo unġasari nanġo are tigeltetñreqram nanġi nanġo areqalo kalil Kristus yekriteqnu. <sup>6</sup> Deqa ijo was, iga ninġi qa tarineqnum. Ninġi gago anjam kalil dauryekritibqa iga na tamo kalil Qotei aqa anjam gotrañyeqnu qaji nanġi ħolawotnjrqom.

<sup>7</sup> Ninġi laña baban na tamo nanġo kumbra tenemtoqnaib. Ninġi geregere tenemtoqniy. Tamo bei a endegsi marqas, “E Kristus aqa tamo.” Ariya tamo di a olo endegsi poiyem, a Kristus aqa tamo qa marqo deqa iga dego Kristus aqa tamo unum. A degsi poiyem. <sup>8</sup> Tamo Koba a na iga sinġila egej deqa iga aqa wau ojeqnum. Iga ninġi sinġilatñġwajqa deqa wau ojeqnum. Iga ninġi ugeuġeñġwajqa deqa wau ojosaieqnum. E gago wau deqa gago ñam kiñala soqtqai. E degyqai di e jemaibqasai. <sup>9</sup> Ariya ninġi endegsib are qalaib, “Pol a iga ula egwajqa deqa anjam sinġila na nenġrenjyoqnsiq gagoq qarinyeqnu.” Ninġi degsib are qalaib. <sup>10</sup> Bole, tamo qudei nanġi e qa endegsib yomueqnu, “Pol a anjam sinġila na nenġrenjyoqnsiq gagoq qarinyeqnu. Ariya a gago ambleq endi sosiq anjam mergoqnej di a sinġila saiqoji soqnej. Anjam

palontqa wau dego a qaliesai bole sai.” <sup>11</sup> Tamo qudei nanġi e qa degsib yomueqñub. Deqa tamo deqaji nanġi endegsi poinjrem. Anjam iga sawa isaq endi sosim nenġrenjyeqñum qaji di iga nuñgo ambleq di sosim dauryeqñum.

<sup>12</sup> Tamo qudei nanġi diqoqsib nanġo segi ñam soqteqñub. Iga nanġi unub dego sai. Gago kumbra ti nanġo kumbra ti ombla kerekere sai. Tamo nanġi di mareqñub, “Gago kumbra bole. Tamo kalil nanġo kumbra bolesai.” Nanġi degsib mareqñub. Di kiyayaqa? Nanġi powo tulañ saiqoji unub deqa.

<sup>13</sup> Iga nanġi unub dego sai. Iga gago segi ñam soqtoqñqasai. Wau Qotei na egej qaji deqa segi gago ñam soqtoqñqom. Wau bei Qotei na egej qaji agiende. Iga na niñġi Korin Kristen wauetñgeqñum. <sup>14</sup> Iga Qotei aqa wau tamo kalil qa namoosim nuñgoq di wau utru atsim Kristus aqa anjam bole niñġi mernġoqñem. Iga tamo qudei nanġo wau bajinosaioqñem.

<sup>15</sup> Wau Qotei na egej qaji di segi iga ojqañqa siñgilaoqñsim gago ñam soqteqñum. Iga tamo qudei nanġo wau Qotei na egosai qaji deqa gago ñam soqtosaieqñum. Gago are endegsi unu. Nuñgo areqalo Yesus qa siñgilateb qaji di tulañ boleqñnimqa gago wau dego nuñgoq di tulañ kobaoqñqas. <sup>16</sup> Kobaoqñnimqa iga nuñgo sawaq dena tigelosim sawa sawa isaq giloqñsim dia Yesus aqa anjam mare mare laqñqom. Tamo qudei nanġi nami wauoqñeb qaji sawa iga deq gilqasai. Iga nanġo wau qa gago ñam soqtqasai.

<sup>17</sup> Agi Qotei aqa anjam bei nami endegsib nenġrenjyeb unu, “Tamo bei a ñam bei soqtqa marsimqa a Tamo Koba aqa ñam segi soqtme.” <sup>18</sup> Iga qalie, tamo bei a aqa segi ñam soqtqas di a Tamo Koba aqa ñamgalaq di ñam saiqoji sqas. Ariya Tamo Koba a na tamo bei aqa ñam soqtetqas di a ñam bole oqas.

## 11

*Tamo qudei nanġi gisañjoqñsib Qotei aqa wau tamo buleqñub*

<sup>1</sup> Niñġi e odbibqa e olo nanari anjam kiñala mernġwai. Niñġi e odbqa kereamqa e odbiy. <sup>2</sup> Aqo Qotei wo gago are koba endegsi unu. Niñġi Kristus a segi qujai areiyosib aqa sorgomq di soqñiy. Tamo bei na aqa duñge nami sambalaosai qaji di osim tamo qujai yim a na oqas dego kere e niñġi Kristus aqa bañq di adem. <sup>3</sup> E amal uge Satan qa are qalsim deqa e niñġi qa ulaeqñum. A nami Iv gisañyonaqa a une atej. Une dena nuñgo areqalo ugetetñimqa niñġi Kristus a segi qalaqalaiyqa urataib deqa e ulaeqñum. <sup>4</sup> E qalieonum, tamo qudei nanġi nuñgoq boqñsib gisañgoqñsib Yesus bei qa anjam palontoqñsib mernġeqñub. Yesus bei deqa iga nami anjam palontosaiioqñem. Tamo nanġi di mondor bei qa dego niñġi mernġeqñub. Di gisañ mondor. Mondor bei deqa iga nami

ninji merngosaiqnem. Yesus aqa anjam bole iga nami ninji merngoqnem qaji di dego tamo qudei nanji bubulyoqnsib olo anjam bei ninji merngeqnu. O ijo was ninji kiyaya gisan anjam di quoqnsib bole edegeqnu?

<sup>5</sup> Ninji qudei endegsib are qaleqnu, “Tamo nanji di Qotei na bole qarinnjrnaq gagoq beb.” Di sai. Qotei na nanji qarinnjrosai. Ninji quiy. Tamo nanji di ñam ti unub ariya e dego ñam ti unum. Deqa tamo nanji dena e bunbosai. <sup>6</sup> Bole, e anjam marqajqa medabu gulbeibeqnu. Di unqum. E powo qa truquosaieqnum. Kumbra kalil e nunqo ambleq di yoqnem qaji dena e ijo powo babteqnam ninji unoqneb.

<sup>7</sup> Ninji qalie, e Qotei aqa anjam bole ninji merngoqnem bati deqa e nunqo silali inji inji yaingosaiqnem. Ijo kumbra dena e ijo segi ñam aguq atoqnem. Di kiyaya? Nunqo ñam olo goge oqwajqa deqa. E kumbra di yoqnem di e une atoqnem e? Sai. <sup>8</sup> E Kristen tamo unqasari qure qureq di unub qaji nanqoq dena silali oqnsim olo nunqo ambleq di Qotei aqa wau lanja ojoqnem. E nunqo silali yaingosaiqnem. Ijo kumbra dena e qure qureq di Kristen nanqo silali bajinobuloqnem. <sup>9</sup> Bati e nunqo ambleq di inji inji qa truquoqnsimqa e na tamo bei gulbe yosaiqnem. E ninji gulbe engwajqa tulan uratoqnem agi bini e degsi unum. Bati bei Kristen was qudei nanji Masedonia sawaq dena Korin qureq bosib inji inji qa e aqaryaioboqneb. Gam dena e ninji gulbe engwajqa uratoqnem. <sup>10</sup> Kristus aqa anjam bole ijoq di unu deqa e ninji endegsi merngwai. E nunqo silali yainqwa urateqnum. Ijo kumbra deqa e ijo segi ñam soqteqnum. E degoqnsiy sqai. Akaia sawaq di tamo qudei na e getentbqasai. <sup>11</sup> E ninji qalaqalainqosaieqnum deqa e kumbra di yeqnum kiyo? Sai bole sai. Qotei a qalie, e ninji tulan qalaqalainqeqnum.

<sup>12</sup> E nunqo silali yainqwa urateqnum. E degoqnsiy sqai. Tamo qudei nanji nunqo ñamgalaq di iga bul sqa marsibqa nanqo segi ñam soqteqnu. Deqa e nanji gam getentetnjroqnai. <sup>13</sup> Tamo nanji di Qotei na qarinnjrosai. Nanji Yesus aqa wau tamo bolesai. Nanji gisanqnsib nanqo segi kumbra uge bulyoqnsib tamo bole buleqnu. Yeqnab tamo unqasari nanji na unjroqnsib mareqnu, “Nanji Kristus aqa wau tamo bole.” <sup>14</sup> O ijo was ninji nanqo kumbra di unsib deqa tulan prugaib. Iga qalie, Satan a dego gisanqnsiya aqa segi kumbra uge bulyoqnsiya Qotei aqa lan angro bole suwanqoq di unub qaji nanji buleqnu. <sup>15</sup> Satan a kumbra degyeqnu deqa aqa wau tamo nanji dego nanqo kumbra uge bulyoqnsib Qotei aqa wau tamo bole buleqnu. Deqa iga nanqo kumbra di unsim tulan prugwasai. Mondonj Qotei na tamo nanji di nanqo une deqa kambatnjrsim awai ugedamu enjqas.

*Pol a Qotei aqa wau ojoqnej deqa a gulbe gargekoba itoqnej*

<sup>16</sup> E olo mernḡwai. Niḡgi e nanari tamo edegaib. Uḡgum, niḡgi e nanari tamo edegwab di kere. Deqa niḡgi e odbibqa e olo ijo ñam kiñala soqtqai. <sup>17</sup> E Tamo Koba aqa areqalo dauryosim anjam endi marosaieqnum. E nanari tamo bulosim deqa e anjam endi maroqnsim ijo segi ñam soqteqnum. <sup>18</sup> Tamo gargekoba naḡgi mandam tamo naḡgo kumbra dauryoqnsib naḡgo segi ñam soqteqnum. Deqa e dego kumbra di dauryosiy olo ijo ñam kiñala soqtqai.

<sup>19</sup> Niḡgi segi qa mareqnum, “Iga powo koba ti unum.” Ariya niḡgi kiyaaq olo nanari tamo naḡgi odnjreqnabqa naḡgi nanari anjam niḡgi mernḡeqnum? <sup>20</sup> Nuḡgo kumbra agiende. Tamo bei na niḡgi a laḡa kaḡgalyqajqa mernḡimqa kiyo, nuḡgo iḡgi iḡgi saitimqa kiyo, nuḡgo iḡgi iḡgi gisaḡ na yaḡḡimqa kiyo, aqa segi ñam soqtimqa kiyo, nuḡgo ula ponḡimqa kiyo niḡgi a odyqab. <sup>21</sup> O ijo was, iga tamo naḡgi di bul sai. Iga siḡgila saiqoji unum deqa iga na gulbe deqaji niḡgi enḡwa keresai. E deqa jemaibqas e? Sai.

Tamo naḡgi di naḡgo segi ñam soqtqajqa ulaosaieqnum. Deqa e kamba dego ijo segi ñam soqtqai. O ijo was, e nanari tamo bulosiy deqa anjam endegsi mernḡwai. <sup>22</sup> Tamo naḡgi di mareqnum, “Iga Hibu tamo.” Ariya e dego Hibu tamo. Naḡgi mareqnum, “Iga Israel tamo.” E dego Israel tamo. Naḡgi mareqnum, “Iga Abraham aqa moma tiḡtiḡ.” E dego Abraham aqa moma tiḡtiḡ. <sup>23</sup> Naḡgi mareqnum, “Iga Kristus aqa wau tamo.” O ijo was, e nanari tamo bulosiy endegsi marqai, e dego Kristus aqa wau tamo. Agi e na tamo naḡgi di tulaḡ bunḡjrsimqa ḡes na ti jaqatiḡ na ti Kristus aqa wau ojeqnum. Bati gargekoba jeu tamo naḡgi na e tonto talq di waiboqneb. Osib e lubogargekobatoqneb. Bati gargekoba e moiqa jojomoqnem. <sup>24</sup> Bati 5 Juda naḡgi na e kumbainḡbo gargekobatoqneb. Sisiyeb 39. <sup>25</sup> Bati qalub naḡgi bu toqoḡ na e luboqneb. Bati qujai naḡgi na e moiyoḡbqa marsib meniḡ na luboqneb. Bati qalub e qobuḡ na gileqnam qobuḡ a padalej. Qobuḡ a padalonaq qolo ti qanam ti e yuwalq di otosi laqnem. <sup>26</sup> Bati gargekoba e sawa isaḡ siḡga na walweloqnem. Yeqnam ya koba doqnsiqa ya na e padaltbqa jojomoqnej. E gamq di walweleqnamqa baiḡ tamo naḡgi gam getentoqnsibqa e lubqa laqneb. Juda naḡgi ti sawa bei bei qaji naḡgi ti dego e lubqa laqneb. Qure qureq di, wadau sawaq di, yuwalq di dego e padalqa jojomoqnem. Gisaḡ Kristen naḡgi na dego e ugeugeibqa laqneb. <sup>27</sup> E ḡes na ti jaqatiḡ na ti waukobaoqnem. Qolo gargekoba e waukobaoqnsim ḡeiosaiqnem. E mam ti laqnem. E ya qarboqnej. Bati gargekoba e iḡgi saiqoji soqnem. Bati gargekoba e yorbeqnaqa e ijo jejamu

kabutqajqa gara saiqoji soqnem. <sup>28</sup> Ariya bini gulbe qudei dego ijoq di branteqnub. Gulbe kobaquja bei agiende. E bati gaigai Kristen tamo ungasari qure qure kalilq di unub qaji nanqi qa are koba qaleqnum. Nanqi bole unub kiyo sai kiyo deqa e nanqi qa tulan are koba qaleqnum. <sup>29</sup> Deqa Kristen was bei aqa singila saiamqa e was deqa are koba qalsiy e dego singila saibqas. Ingi bei na Kristen was bei a uneq waiyimqa e was deqa are koba qalsiy are ugeibqas.

<sup>30</sup> O ijo was, gam bei saibqo deqa e ijo segi ñam soqtqai. Gulbe bei bei ijoq beqnu deqa ningi poinqeqnu, e singila saiqoji unum. E deqa qujai ijo ñam soqtqai. E ijo kumbra bei qa ijo ñam soqtqasai. <sup>31</sup> Tamo Koba Yesus aqa Abu Qotei a qalie, e anjam bole mareqnum. E gisanqosaiqnum. Deqa iga bati gaigai Qotei binjiyoqnqom. <sup>32</sup> Damaskus qureq di Mandor Aretas a na qure taqato qaji tamo minjnaqa a qoto tamo qudei nanqi qarinqjrnaqa nanqi qure aqa siranme kalil taqatoqneb. Di kiyaaqa? E ulanqa laqnitqa nanqi na e ojsib tonto talq di waibqajqa deqa. <sup>33</sup> Ariya Kristen was qudei nanqi na e aqaryaibosib gumba q di jigsib qure aqa jen gogetosib sil na gumba tontosib jen aqa siranme kiñalaq dena e ura uratbonab jen oqeq aiyem. Aisim qure taqato qaji tamo aqa banq dena ulanem.

## 12

### *Qotei na ñeibilqei Pol osoryej*

<sup>1</sup> E gam bei saibqo deqa e olo ijo ñam soqtqai. Bole, e ijo ñam soqtqai kumbra dena e aqaryaibqqa keresai. Di unqum. Tamo Koba a na ñeibilqei bei e nami osorbej deqa ningi saingit quiy. <sup>2</sup> Ñeibilqei agiende. Wausau 14 koboej endi Qotei na Kristus aqa tamo bei osi oqsiqa torei lan qureq oqej. Lan qure di tulan goge koba. Tamo oqej qaji di e qalie. Tamo di agi e segi. A jejamu qorbi oqej kiyo aqa jejamu uratosiq oqej kiyo di e qaliesai. Qotei a segi qalie. <sup>3-4</sup> E qalieonum, Qotei na tamo di osi oqsiqa lan qureq oqej. A jejamu qorbi oqej kiyo aqa jejamu uratosiq oqej kiyo di e qaliesai. Qotei a segi qalie. A lan qureq oqsiq dia anjam bei quej. Anjam di aqa damu tamo bei na ubtosim marqa keresai. Anjam di marqajqa getento koba. <sup>5</sup> E tamo di aqa ñam soqtqai. E ijo segi ñam soqtqasai. E singila saiqoji unum deqa qujai e ijo ñam soqtqai. E ijo kumbra bei qa ijo ñam soqtqasai.

<sup>6</sup> E ijo segi ñam soqtqai di e nanari tamo sqasai. Di kiyaaqa? E anjam bole marqai. E gisanqasai. Ariya e ijo segi ñam soqtqa uratonum. Tamo qudei nanqi ijo kumbra qa ti ijo anjam qa ti are qalsib ijo ñam soqtetbqab di kere. Nanqi ijo ñam lanja soqtetbaib.

### *Qotei a gulbe qarinyonaq Pol aqa jejamuq aiyej*

<sup>7</sup> Qotei a nejobilqei tulan boledamu e osorbonaq unem. Ariya e di unsiy olo diqaim deqa Qotei na gulbe uge sil luwit bul qarinyonaq ijo jejamuq aiyej. Gulbe di Satan na ojsiq dena e ugeugeibeqnu. <sup>8</sup> Deqa e singila na Qotei pai-lyoqalubtem, “O Abu, ni na gulbe di olo taqal atetbime.” <sup>9</sup> Onaqa Qotei a saidosiq endegsi merbej, “Ni singila saiqoji unum deqa e ni olo singilatmoqnqai. Osiy ni qa are boleboleboqnqas. Dena ni keretmqas.” Qotei na e degsi merbej deqa e singila saiqoji unum di unqum. E olo areboleboleboqnqas. Yim Kristus aqa singila ijoq di sqas. <sup>10</sup> E Kristus aqa ñam qa singila saiqoji sqai kiyo, tamo qudei na e misilingboqnqab kiyo, e gulbe oqnqai kiyo, jeu tamo nanqi na e ugeugeiboqnqab kiyo, e waukobaoqnqai kiyo di unqum. E deqa areboleboleboqnqas. Di kiyaaqa? E singila saiqoji sqai bati di e Kristus aqa singila ti sqai.

### *Korin Kristen nanqo areqalo Yesus qa singilateb qaji di Pol na olo singilatetnjrej*

<sup>11</sup> Anjam e mareqnum qaji endi nanari anjam. Ninqi segi na ijo are tigeltetbeqnub deqa e nanari anjam endi mareqnum. Ninqi ijo kumbra bole ubtosaieqnub deqa e segi kamba ijo kumbra bole ubteqnum. Bole, e ñam saiqoji. Ariya kiyaaqa ninqi na olo tamo qudei nanqo ñam soqtoqnsib mareqnub, “Tamo nanqi di Qotei aqa anjam maro tamo bolequja”? O ijo was ninqi quiy. Tamo nanqi dena e bunbosai. <sup>12</sup> Agi e nunqo ambleq di sosim manwa gargekoba babtoqnem dena ninqi endegsib qalieeb, Qotei na e qarinqej. E singila na tigeloqnsim gulbe qoboioqnsim manwa ti wau singila ti gargekoba nunqo ambleq di babtoqnem. Kumbra dena ninqi osorngoqnej, e Qotei aqa wau tamo bole. <sup>13</sup> Kumbra kalil e qure qureq di Kristen nanqo ambleq di yeqnum qaji di e nunqo ambleq di dego yoqnem. Ariya kumbra qujai e nunqo ambleq di yosai. E ninqi gulbe engwa uratosim deqa e nunqo silali ingi ingi yaingosaiqnem. Di e une yoqnem e? Sai. Ninqi e une yoqnem edegsib ijo une di olo kobotetbiy.

<sup>14</sup> E nami nunqoq boaiyeltem. Ariya bini e olo nunqoq bqajqa are qaleqnum. E nunqoq bqai di e ninqi gulbe engwasai. E nunqo silali ingi ingi yaingwajqa are qalosaieqnum. E ninqi segi elenqajqa are qaleqnum. Ninqi qalie, anqro kiñilala nanqi na nanqo ai abu nanqi silali qa aqaryainjrosaiqnub. Ai abu nanqi na nanqo anqro nanqi silali qa aqaryainjreqnub. <sup>15</sup> E ninqi tulan qalaqalaingeqnum deqa e ijo ingi ingi ti ijo jejamu ti ninqi torei engwajqa areboleboleibeqnu. Ariya kiyaaqa ninqi kamba olo e kiñala segi qalaqalaibeqnub?

16 Ningi qudei e qa endegsib mareqñub, “Bole, Pol a gago silali inñi inñi boleq di yaigosaiocñej. Ariya a na iga walawalaigoqñsiq gago silali inñi inñi gisañ na yaigoqñej.”  
 17 O ijo was, e nami Kristen was qudei nanñi qarinqñnam nuñgoq aiyeb. Aisib ninñi gisañgeb e? Osib nuñgo silali inñi inñi laña yaingosib olo bosib e ebeb e? Sai. 18 E na Taitus minñnam a nuñgoq aiyej. E Kristen was bei dego qarinqñyonam a Taitus dauryosiq ombla na aiyeb. Aisib Taitus a ninñi gisañgosiq nuñgo silali inñi inñi qudei bajinñej e? Sai. Aqo Taitus wo areqalo qujai ti sosim gam qujai dauryosim kumbra bole segi yoqñem.

19 Ningi ijo anjam kalil endi sisiyosib endegsib are qalaib, “Pol a segi une saiqoji degsi iga mergwa osiqa anjam nenñrenñeyej.” Di sai. O ijo was bole, anjam kalil e nenñrenñyonum qaji endi ninñi singilatñgwajqa deqa nenñrenñyonum. E Kristus aqa tamo unum deqa e Qotei aqa ñamgalaq di anjam endi nenñrenñyonum. 20 E ninñi qa ulaeqñnum. E nuñgoq bosiy nuñgo kumbra unsiy e areboleboleibqas kiyo sai kiyo? Ninñi dego ijo kumbra unsib areboleboleinñwas kiyo sai kiyo? E deqa ulaeqñnum. E nuñgoq bosiy nuñgo kumbra endi unqai kiyo? Ninñi anjam na qoteqñub. Ninñi nuñgo Kristen was nanñi qa are ugeinñeqñnu. Ninñi minñinñ oqeqñnu. Ninñi pupoelenñeqñub. Ninñi nuñgo Kristen was qudei nanñi mis-ilinñnreqñub. Ninñi yomueqñub. Ninñi diqeqñub. Ninñi Qotei aqa wau ugeugeiyeqñub. E nuñgoq bosiy nuñgo kumbra di unqai kiyo? 21 E bosiy nuñgo ambleq di tamo gargekoba nami une yoqñeb qaji nanñi are bulyosai degsi unqai kiyo? Degsi unqai di ijo Qotei na nuñgo ñamgalaq di e olo jemai ebqas. Tamo nanñi di nami une endeqaji yoqñeb. Nanñi kumbra uge jigat yoqñeb. Nanñi sambala kumbra yoqñeb. Nanñi kumbra uge yqajqa are prugnñroqñej. E nuñgoq bosiy tamo nanñi di nanño une qoreiyosai degsi unqai di e nanñi qa are gulbeibqas. E deqa ulaeqñnum.

## 13

*Pol a Korin Kristen nanñoq olo bqajqa are qaleqñnu*

1 E nami nuñgoq boaiyeltem. Ariya bini e olo nuñgoq bqajqa are qaleqñnum. Agi Qotei aqa anjam bei nami endegsib nenñrenñyeb unu, “Tamo bei a une atimqa tamo aiyel kiyo tamo qalub kiyo nanñi aqa une unsib babtibqa iga qusim marqom, ‘Bole, tamo di a une yqo.’” 2 E nami nuñgoq bosim ninñi uratñgosim bati bei e olo nuñgoq bosim ninñi endegsi mernñgem, “E bunuqna nuñgoq olo bosiy tamo une ateqñub qaji nanñi ñolawotñnrqai.” Ariya bini e sawa isaq endi sosim anjam di ninñi ti tamo nami une atoqñeb qaji nanñi ti olo



merngeqnum. <sup>3</sup> Ningi qalieqajqa, Kristus a ijo medabu na anjam mareqnu kiyo sai kiyo. E nungoq bosiy tamo nanji une ateqnub qaji nanji di n̄olawotnjrit ningi unsib qalieqab, bole, Kristus a ijo medabu na anjam mareqnu. Ningi quiy. Kristus a singila saiqoji sosim ningi tingitngwasai. A na aqa singila kobaquja ningi osorn̄gwas. <sup>4</sup> Bole, Kristus a n̄amburbasq di gainesoqnej bati deqa a singila saiqoji soqnej. Ariya a olo Qotei aqa singila osiq deqa bini a n̄ambile unu. Iga Kristus beteryejunum deqa iga dego singila saiqoji unum. Ariya iga Qotei aqa singila osim Kristus ombla n̄ambile sqom. Iga nungoq bosim singila di ningi osorn̄gwom.

<sup>5</sup> Ningi nungo segi segi so tenemtoqniy. Ningi degyqab di ningi Kristus qa nungo areqalo singilateqnu kiyo sai kiyo di qalieqab. Yesus Kristus a nungo are miligiq di unu di ningi poin̄gosai kiyo? A nungo are miligiq di sqasai di ningi endegsib qalieqab, ningi aqa tamo bolesai. <sup>6</sup> Ariya ningi iga qa endegsi poin̄gem, iga Kristus aqa wau tamo bole unum. <sup>7</sup> Iga ningi qa endegsim pailyeqnum, “O Abu, ni na Korin Kristen nanji aqaryainjrimqa nanji kumbra uge kalil uratoqnsib kumbra bole bole yoqnqab.” O ijo was, iga wau bole yeqnum ningi di qalieqajqa deqa iga pailyoaieqnum. Ningi iga wau tamo bolesai edegwab di un̄gum. <sup>8</sup> Ningi qalie, iga Qotei aqa anjam ugetqa keresai. Iga Qotei aqa anjam singilatqajqa waueqnum. <sup>9</sup> Deqa iga singila saiqoji soqnim ningi singila ti sqab di iga areboleboleigwas. Iga gaigai ningi qa endegsim pailyeqnum, “O Abu, ni na Korin Kristen nanji aqaryainjrimqa nanji tore kere na sqab.” <sup>10</sup> Tamo Koba a na e giltbej deqa e aqa wau taqateqnum. E nungoq bosiy n̄irin anjam na nungo kumbra tingitetngwa uratonum. Deqa e isaq endi sosim anjam endi nen̄gren̄yonum. E ningi singilatngwajqa deqa Tamo Koba a na e wau ebej. E ningi ugetngwajqa sai.

*Pol a anjam getentosiq Kristen nanji kaiyeinjrej*

<sup>11</sup> Ariya ijo was, e ijo anjam getentqai. Ningi areboleboleingoqnem. Ningi kumbra bole kalil qa kere na sqajqa singilaoqniy. Ningi ijo anjam quoqnsib dauryoqniy. Ningi kalil areqalo qujaitosib soqniy. Yim Qotei a ningi ti sqas. Agi a na ningi tulan̄ qalaqalain̄geqnu. A are lawo qa utru.

<sup>12</sup> Ningi na nungo Kristen was kalil nanji segi segi kundoqnjriy. Kumbra di agi Qotei aqa segi tamo un̄gasari kalil nanji yeqnub. Qotei aqa tamo un̄gasari kalil qure endia unub qaji nanji na ningi kaiyein̄gonub.

<sup>13</sup> Tamo Koba Yesus Kristus a ningi qa are boleiyeme. Qotei na ningi qalaqalain̄geme. Mondor Bole na ningi kalil aqaryain̄jimqa ningi a beteryosib koba na are qujaitosib soqniy. Bole.

## GALESIA

<sup>1</sup> E Pol. Yesus Kristus na e qarınbej deqa e aqa anjam mare mare laqnum. Mandam tamo bei na e qarınbosai. Tamo bei na e giltbosai dego. Yesus Kristus aqa Abu Qotei wo nanđi segi aiyel na e giltbeb. Yesus agi Qotei na subq na tigeltej. <sup>2</sup> Kristen was kalil e koba na endi unum qaji nanđi e ti anjam endi nunđoq qarınyonum. Ninđi Galesia sawaq di loueqnub qaji.

<sup>3</sup> Tamo Koba Yesus Kristus aqa Abu Qotei wo nanđi aiyel ninđi qa are boleinjrimqa ninđi lawo na soqniy. <sup>4</sup> Yesus a gago Abu Qotei aqa areqalo dauryosiq deqa a gago une kobotqa marsıqa aqa segi nambile uratosiq moiyej. A na iga elenamqa iga mandam qa kumbra uge uge kalil uratqa marsiq iga qa moiyej. <sup>5</sup> Deqa iga Qotei aqa nıam bati gaigai soqtoqnqom. Bole.

### *Yesus aqa anjam bole qujai segi unu*

<sup>6</sup> Kristus a ninđi qa are boleiyey deqa Qotei na ninđi aqa segi tamo unđasari sqajqa osiq metnđej. Ariya kiyaqa ninđi olo urur Qotei qoreiyosib Yesus aqa anjam bole dauryqa uratosib anjam bei dauryeqnub? E nunđo kumbra deqa qusim tulan pruguetem. <sup>7</sup> Ninđi qalie, Yesus aqa anjam bole bei saiqoji. Ariya tamo qudei nanđi nunđo areqalo nińaayetnđwajqa wauoqnsib Kristus aqa anjam bole olo bubulyeqnub. <sup>8</sup> Deqa ninđi quiy. Iga na kiyo lanđ anđro bei na kiyo Yesus aqa anjam bole iga nami ninđi mernđoqnem qaji di olo bubulyosim anjam bei mernđwom di Qotei na iga ojsim nıamyuwoq di breigeme. <sup>9</sup> Od, tamo bei na Yesus aqa anjam bole iga nami ninđi mernđoqnem qaji di olo bubulyosim anjam bei mernđwas di Qotei na a ojsim nıamyuwoq waiyeme.

<sup>10</sup> Ninđi kiyersib are qalonub? Mandam tamo nanđi e qa arearetnjrqajqa kiyo Qotei a e qa arearetqajqa kiyo deqa e waueqnum? Ninđi quiy. Mandam tamo nanđi e qa arearetnjrqajqa deqa e waueqnum qamu e Kristus aqa wau tamo bolesai qamu.

### *Qotei a segi na Pol giltej*

<sup>11</sup> O ijo was kalil, e bole mernđgonum. Yesus aqa anjam bole e nami ninđi mernđoqnem qaji di tamo bei na babtosai. <sup>12</sup> Anjam bole di e tamo bei aqa medabuq na osai. Tamo bei na e osorbosai dego. Yesus Kristus a segi na anjam bole di babtosiq osorbej.

<sup>13</sup> Ninđi qalie, e nami Juda nanđo kumbra sińgila na dauryoqnsimqa Qotei aqa tamo unđasari nanđi ugeugeinjroqnem.

Osim e nanği torei padaltnjrçajqa singila na wauoqnem. <sup>14</sup> E ijo moma nanço kumbra kalil dauryçajqa tulañ singilaoqnem. Ijo kumbra dena e na Juda tamo gargekoba e ombla louoqnem çaji nanği bunjroqnem.

<sup>15</sup> Ariya e ñambabosaisonamqa Qotei a e giltbosiqa e qa are boleiyosiq metbej. <sup>16</sup> Osiqa bati a segi atej çaji di brantonaga a na aqa Njiri Yesus e osorbosiq merbej, “Ni na Yesus aqa anjam bole osi giloqnsim tamo unçasari sawa bei beiq di unub çaji nanği minjre minjre laqne.” Ariya bati di e na tamo qudei nanği Yesus qa anjam bei nenemnjosaiioqnem. <sup>17</sup> E Yesus aqa anjam maro tamo nanği unjrçajqa Jerusalem aiyosai dego. Tamo nanği di namoqna Yesus aqa wau ojoqneb. E bunuqna aqa wau ojem. Ariya e nanği unjosai. E Arebia sawaq aisim di soqnem. Sosim bunuqna e olo puluosim Damaskus qureq gilem. <sup>18</sup> Wausau qalub koboonaqa e Pita segi unqajqa Jerusalem aiyem. Aisim bati 15 Pita ombla soqnem. <sup>19</sup> E Jerusalem di soqnem bati di e Yesus aqa anjam maro tamo bei unosai. E Tamo Koba Yesus aqa was Jems a segi unem. <sup>20</sup> Ijo anjam e nenğrenyonum çaji endi anjam bole. E Qotei aqa ñamgalaq di anjam bole segi nenğrenyonum. E gisañosai.

<sup>21</sup> Ariya bunuqna e Jerusalem olo uratosim Siria sawa ti Silisia sawa ti deq gilsim di laqnem. <sup>22</sup> Bati deqa Kristus aqa tamo unçasari Judia sawaq di soqneb çaji nanği ijo ulatamu poinjosaisoqnej. <sup>23</sup> Nanği e qa laña endegsib quoqneb, “Pol a nami iga padaltgwa laqnej. Ariya bini a olo Yesus aqa anjam bole a nami ugeugeiyqa wauoqnej çaji di palontoqnsiq laqnu.” <sup>24</sup> Nanği e qa degsib quoqnsib tulañ areboleboleinjrnaqa Qotei aqa ñam soqtoqneb.

## 2

### *Kristen gate nanği Pol ombla areqalo qujai*

<sup>1</sup> Wausau 14 koboonaqa e olo Jerusalem aiyem. E Barnabas ombla aiyoqnsim Taitus dego osi aiyem. <sup>2</sup> Qotei a segi na merbej deqa e Jerusalem aiyem. E Jerusalem aisim di sosimqa e tamo lañaj nanği koba na qairosaiioqnem. E Kristen gate nanği segi koba na qairoqnem. Yesus aqa anjam bole e sawa bei beiq di palontoqnem çaji di e na ubtosim minjroqnem. E tamo lañaj bei minjosai. Di kiyaya? Yesus aqa wau e nami yoqnsim agi bini yeqnum çaji di ulonjo uge. <sup>3</sup> Taitus a Grik tamo. Ariya a e ombla Jerusalem di sonamqa Kristen gate nanği e endegsib merbosai, “Ni na Taitus osim muluñ waiy.” Degsib merbosai. <sup>4</sup> Bole, Kristen tamo qudei nanği uli na gago koro miligiq aiyeb. Nanği Kristen tamo bolesai. Nanği gisañ tamo. Iga nami kañgal tamo bulosim dal anjam aqa sorgomq di sonamqa Kristus Yesus na iga elenej deqa bini dal anjam

na iga olo taqatgosai. Ariya gisanj tamo nanġi dena gago kumbra di lumu na tenemtqa marsibqa gago koro miligiq aiyeb. Nanġo are koba endegsi soqnej. Nanġi na iga olo dal anjam aqa sorgomq di atibqa dal anjam na iga taqatgim iga kanġal tamo bulqom. Nanġo are koba degsi soqnej deqa nanġi gago koro miligiq aiyeb. <sup>5</sup> Aisib mergeb, “Ninġi Taitus muluŋ waiyiy.” Onaqa iga nanġo anjam di quetnjrosai. Nanġi Yesus aqa anjam bole olo bubulyaib deqa iga na nanġi saidnjrem. Di kiyaaqa? Yesus aqa anjam bole di nunġoq di gaigai sqajqa deqa.

<sup>6</sup> Ijo areqalo agiende. Kristen gate nanġi ñam ti unub di laŋa. Qotei a tamo nanġo ñam qa are qalosaieqnu. E na Kristen gate nanġi ijo wau qa sainjrnəmqa nanġi qusib mareb, “Di kere.” Nanġi olo anjam bei totoryosib e merbosai. <sup>7</sup> Pita aqa wau agiende. A na muluŋ uno qaji nanġi Yesus aqa anjam bole minjre minjre laqnu. Qotei a wau di Pita yej. E dego wau ti. Ijo wau agi e na muluŋ unosai qaji nanġi Yesus aqa anjam bole minjre minjre laqnum. Qotei a wau di e ebej. Kristen gate nanġi degsib qalieeb deqa nanġi olo anjam bei totoryosib e merbosai. <sup>8</sup> Od, Qotei na Pita singila yej deqa a muluŋ uno qaji nanġi Yesus aqa anjam bole minjre minjre laqnu. Dego kere Qotei na e singila ebej deqa e sawa bei bei qaji nanġi Yesus aqa anjam bole minjre minjre laqnum. <sup>9</sup> Tamo unġasari kalil nanġi mareqnu, “Jems na Pita na Jon na nanġi qalub Kristen gate unub.” Ariya nanġi qalub qalie, Qotei a e qa dego are boleiyosiq Yesus aqa wau ebej. Degsib qalieosib deqa nanġi na aqo Barnabas wo gago baŋ ojsib mergeb, “Ninġi gago Kristen was bole.” Osib nanġi aqo aiyel ti are qujaitosib anjam endegsib keretosib mergeb, “Ninġi Barnabas wo sawa bei beiq di Qotei aqa wau yoqniy. Iga muluŋ uno qaji nanġo ambleq di wauoqnqom.” <sup>10</sup> Osib nanġi anjam qujai segi aqo aiyel endegsib mergeb, “Gago ambleq endi Kristen qudei nanġi inġi inġi tulaŋ saiqoji unub. Deqa ninġi nanġi qa are walŋgaiq. Ninġi nanġi aqaryainjroqniy.” Onaqa iga nanġi odnjrem. Nami iga tamo inġi inġi saiqoji nanġi aqaryainjrqaqja are koba soqnej agi bini degsim unum.

### *Pol a Pita aqa kumbra uge babtej*

<sup>11</sup> Ariya bunuqna Pita a Antiok qureq bonaqa e aqa ulatamuq di a nriŋtem. Di kiyaaqa? A kumbra uge yej deqa.

<sup>12</sup> Aqa kumbra uge agiende. Nami a sawa bei bei qaji nanġi koba na inġi uyoqneb. Onaqa bati bei Jems a na Juda Kristen qudei muluŋ unqajqa tulaŋ singilaoqneb qaji nanġi qarinjrnəqa Antiok bonabqa Pita a nanġi qa ulaosiq olo sawa bei bei qaji nanġi di tututnjrej. Aqa kumbra uge agide. <sup>13</sup> Juda Kristen qudei nanġi dego Pita beteryosib gisanj

kumbra di yeb. Yonabqa bunuqna Barnabas a dego nanği daurnjrısiqa nanğo gisan kumbra di yej. <sup>14</sup> Nanği Yesus aqa anjam bole degsib ugetonabqa e unsimqa nanğo nğamgalaq di Pita endegsi minjem, “Ni Juda tamo. Ariya ni Juda nanğo kumbra dauryqa uratosim sawa bei bei qaji nanği bulosim nanğo kumbra dauryeqnum. Di ni kere degyeqnum. Ariya kiyaca ni olo sawa bei bei qaji nanği minjreqnum, ‘Ninği Juda nanğo kumbra dauryiy?’”

*Iga Yesus qa gago areqalo sinğilatqom gam dena qujai iga tamo bole une saiqoji sqom*

<sup>15</sup> Bole, iga Juda. Di gago len tıntın. Iga sawa bei bei qaji sai. Agi sawa bei bei qaji nanği uneq di laqnu. Iga tamo deqaji sai. <sup>16</sup> Ariya iga qalieonum, tamo nanği Moses aqa dal anjam dauryqab gam dena nanği Qotei aqa nğamgalaq di tamo bole une saiqoji sqa keresai. Tamo nanği Kristus Yesus qa nanğo areqalo sinğilatqab gam dena qujai Qotei na nanği tamo bole une saiqoji qa minjrğas. Iga dego Kristus Yesus qa gago areqalo sinğilatem deqa Qotei na iga tamo bole une saiqoji qa mergej. Iga dal anjam dauryem gam dena sai. Tamo a dal anjam dauryqas gam dena a Qotei aqa nğamgalaq di tamo bole une saiqoji sqa keresai. <sup>17</sup> Od, iga Kristus qa gago areqalo sinğilatem gam dena Qotei na iga tamo bole une saiqoji qa mergej. Iga degyem bati di iga sawa bei bei qaji nanği bulosim iga dego une tamo brantobulem. Deqa iga endegsi marqom kiyo, “Kristus na iga uneq breigej”? O ijo was, iga degsi marqasai bole sai. <sup>18</sup> E dal anjam aqa sorgomq di sqa uratosiy ariya bunuqna e puluosiy dal anjam aqa sorgomq di olo sqai di ijo kumbra dena e une tamo brantqai. <sup>19</sup> Dal anjam na e moiyo gamq di waibosiq moiyothej deqa bini e olo Qotei ombla nambile unum. E Kristus ombla namburbasq di gainobulem. <sup>20</sup> Osim e olo nambile bunuj em. Nambile di ijo segi nambile sai. Kristus a segi ijo are miligiq di nambile unu. Deqa bini kumbra kalil e mandamq endi yeqnum qaji di e Qotei aqa Niri qa ijo areqalo sinğilatoqnsim yeqnum. Agi Qotei aqa Niri na e tulan qalaqalaibosiq aqa segi nambile uratosiq e qa moiyej. <sup>21</sup> Qotei a iga qa are boleiyey aqa kumbra di e na ugeugeiyqasai. Iga Moses aqa dal anjam dauryqom gam dena iga Qotei aqa nğamgalaq di tamo bole une saiqoji so qamu Kristus a lanja moiyej qamu.

### 3

*Iga Yesus qa gago areqalo sinğilatqajqa anjam*

<sup>1</sup> O Galesia tamo unğasari, ninği tulan nanari. Iga nami ninği Yesus Kristus osornğonam ninği a namburbasq di gainesonaq unobuleb. Ariya tamo yai na nunğo areqalo olo niñaqyetnğej

deqa nin̄gi Yesus aqa anjam olo urateq̄nub? <sup>2</sup> Ijo nenem qujai agiende. Nin̄gi gam kiye na Qotei aqa Mondor eb? Nin̄gi dal anjam dauryeb gam dena nin̄gi Mondor eb kiyo nin̄gi Yesus aqa anjam bole qusib a qa nun̄go areqalo singilateb gam dena nin̄gi Mondor eb kiyo? <sup>3</sup> Nin̄gi nanarionub e? Nin̄gi nami are bulyosib bati deqa nin̄gi Yesus dauryqa utru atsib Mondor aqa singila na walweloq̄neb. Ariya bini kiyaa nin̄gi olo nun̄go segi singila na Yesus dauryqa marsib walweleq̄nub? <sup>4</sup> Gulbe nin̄gi nami qoboiyoq̄neb qaji di nin̄gi laña qoboiyoq̄neb e? E are qalonum, nin̄gi laña qoboiyosai. <sup>5</sup> Qotei na aqa Mondor nin̄gi en̄goq̄nsiq nun̄go ambleq̄ di mañwa kokba babteleñeñu. A kiyaa degyeq̄nu? Nin̄gi dal anjam dauryeq̄nub a deqa osiq degyeq̄nu e? Sai. Nin̄gi Yesus aqa anjam bole qusib a qa nun̄go areqalo singilateb a deqa osiq degyeq̄nu.

<sup>6</sup> Qotei aqa anjam bei nami endegsib nengren̄yeb unu, “Abraham a Qotei qa aqa areqalo singilatej gam dena Qotei na a tamo bole une saiq̄oji qa min̄nej.” <sup>7</sup> Deqa ijo was, nin̄gi endegsi poingem, tamo nan̄gi Yesus qa nan̄go areqalo singilateq̄nub qaji nan̄gi segi Abraham aqa an̄gro tint̄ñ unub. <sup>8</sup> Nami Qotei a endegsi qalieej, “Bunuq̄na sawa bei bei qaji nan̄gi Yesus aqa anjam bole qusib nan̄go areqaloq̄ di singilatib gam dena e na nan̄gi tamo bole une saiq̄oji qa min̄jr̄qai.” Qotei a nami degsi qalieosiq deqa a Yesus aqa anjam bole di ubtosiq Abraham min̄nej. A endegsi min̄nej, “O Abraham, ino moma nan̄goq̄ dena tamo bei brantim aqa wau na e sawa bei bei qaji nan̄gi boletn̄jr̄qai.” O ijo was, anjam di agi nengren̄q̄ di unu. <sup>9</sup> Abraham a Qotei qa aqa areqalo singilatej deqa Qotei na tamo un̄gasari kalil Yesus qa nan̄go areqalo singilateq̄nub qaji nan̄gi Abraham a ti boletn̄jr̄qas. <sup>10</sup> Tamo qudei nan̄gi endegsib are qaleq̄nub, “Iga dal anjam dauryq̄om gam dena iga Qotei aqa ñamgalaq̄ di tamo bole une saiq̄oji sqom.” O ijo was, tamo nan̄gi di Qotei na min̄jr̄qas, “Nin̄gi tamo uge.” Osim nan̄gi padaltn̄jr̄qas. Agi Qotei aqa anjam bei nami endegsib nengren̄yeb unu, “Tamo nan̄gi Qotei aqa dal anjam mutu kalil torei dauryekritq̄asai di a na min̄jr̄qas, ‘Nin̄gi tamo uge.’ Osim nan̄gi padaltn̄jr̄qas.” <sup>11</sup> Qotei aqa anjam bei dego endegsib nengren̄yeb unu, “Tamo nan̄gi Qotei qa nan̄go areqalo singilatq̄ab di a na nan̄gi tamo bole une saiq̄oji qa min̄jr̄qas. Yim nan̄gi ñambile gaigai sqab.” Deqa iga qalieonum, tamo nan̄gi dal anjam dauryq̄ab gam dena Qotei na nan̄gi tamo bole une saiq̄oji qa min̄jr̄qasai. <sup>12</sup> Dal anjam dauryq̄ajqa ti Qotei qa gago areqalo singilatq̄ajqa ti di ombla kerekere sai. Nan̄gi utru segi segi. Agi Qotei aqa anjam bei nami endegsib nengren̄yeb unu, “Tamo a dal anjam mutu kalil torei dauryekritq̄as di a ñambile sqas.”

<sup>13</sup> Dal anjam a marqo, iga dal anjam mutu kalil torei dau-ryekritqasai di Qotei na iga tamo uge qa mergsim padaltgwas. Kristus a deqa are qalsiqa iga aqaryaigwa marsiqa gago padalo sawa osiqa a segi Qotei aqa njamgalaq di tamo uge bulosiqa iga qa padalej. Agi Qotei aqa anjam bei nami endegsib nenngrenyeb unu, “Tamo kalil njamtaᅇ goge di gainᅇjunub qaji nanᅇi Qotei na tamo uge qa minjroqnsiq padaltnjreqnu.”  
<sup>14</sup> Kristus Yesus na iga degsi aqaryaigej deqa aqa wau na Qotei a sawa bei bei qaji nanᅇi Abraham a ti boletnjqas. Iga Yesus qa gago areqalo siᅇgilatqom gam dena iga Qotei aqa Mondor oqom. Mondor di Qotei a nami iga egwa marej.

*Qotei aqa anjam nami marej qaji di dal anjam na taqal waiyqa keresai*

<sup>15</sup> O ijo was kalil, e na mandam tamo nanᅇo kumbra qa ninᅇi endegsi mernᅇwai. Tamo bei a moiyoᅇaisosimqa a na aqa ᅇoro kalil aqa anᅇro nanᅇo banᅇ di uratqa marsim a anjam bei nenngrenyosim siᅇgilatqas. Deqa bunuqna a moiyim aqa anᅇro nanᅇi aqa ᅇoro di oqab. Aqa anjam nenngrenyᅇj qaji di tamo bei na olo taqal atqa keresai. Osim olo anjam bei dego totoryosim nenngrenyqa keresai. <sup>16</sup> Dego kere inᅇi bole bole Qotei na mondonᅇ iga egwas qaji di a ubtosiqā Abraham aqa moma bei wo minjrej. A Abraham aqa moma gargekoba nanᅇi minjrosai. A aqa moma qujai segi minᅇj. Anjam di nenngrenᅇ di unu. Aqa moma qujai di agi Kristus. <sup>17</sup> O ijo was, e ninᅇi degsi mernᅇgonum di aqa utru agiende. Qotei a nami Abraham ombla anjam qoseb. Onaqa wausau 430 koboonaqa dal anjam brantej. Dal anjam dena Qotei aqa anjam Abraham ombla qoseb qaji di taqal waiyqa keresai. Qotei na inᅇi bole bole iga laᅇa egwa marej awai saiqoji. Osiqa anjam di siᅇgilatej. Anjam di dal anjam na gentqa keresai. <sup>18</sup> Iga dal anjam dauryqom gam dena iga inᅇi bole bole di onum qamu Qotei na inᅇi di iga laᅇa egwa keresai qamu. Iga qalieonum, Qotei a inᅇi bole bole di iga laᅇa egwajqa are qalsiq Abraham ombla anjam qoseb. <sup>19</sup> Deqa bunuqna Qotei a kiyāqa olo dal anjam atej? E ubtosiy marqai. A gago une boleq atqa osiqa dal anjam atej. A endegsi are qalej. Dal anjam a soqnim bunuqna Abraham aqa moma qujai di a bᅇas. Moses a Israel nanᅇi Qotei ti nanᅇo ambleq di tigelesosiqā yeba waiyonaqa lanᅇ anᅇro nanᅇi na dal anjam di Moses yonabqa a na kamba Israel nanᅇi enjrej. <sup>20</sup> Amble qaji tamo a na tamo qujai segi aqa anjam gereiyetqa keresai. A tamo aiyel kiyo tamo qalub kiyo nanᅇo ambleq di tigelesosim yeba waiyosim nanᅇo anjam gereiyetnjqas. Ariya Qotei a segi qujai unu. Deqa a anjam bei siᅇgilatimqa tamo qudei na olo aqa anjam di gentqa keresai.

*Dal anjam a gago abu bul sosisqa iga Kristus aqa areq joqsij gilej*

<sup>21</sup> E endegsi marqai kiyo? Dal anjam ti inġi bole bole Qotei a nami iga egwa marej qaji de ti ombla jeu atoqnsib unub. E degsi marqasai bole sai. Dal anjam mutu bei na iga nambile egwa kere qamu iga dal anjam dauryqom gam dena iga tamo bole une saiqoġi so qamu. <sup>22</sup> Ariya degsi sosai. Agi Qotei aqa anjam bei nami endegsib nengrenyeb unu, “Tamo unġasari kalil nanġo une na nanġi tonto talq di breinjrobuleqnu.” O ijo was, anjam degsib nengrenyeb deqa iga Yesus Kristus qa gago areqalo sinġilatem gam dena iga inġi bole bole Qotei a nami iga egwa marej qaji di oqom.

<sup>23</sup> Nami iga Yesus qa gago areqalo sinġilatqa bati brantosaionaqa dal anjam na iga taqatgesoqnej. Sonaq sonaq ariya bunuqna iga Yesus qa gago areqalo sinġilatqa bati agi brantej. <sup>24</sup> Dal anjam a gago abu bul sosisqa iga Kristus aqa areq joqsij gilej. Gilnaqa iga Kristus qa gago areqalo sinġilatem. Deqa bini iga Qotei aqa nambialaq di tamo bole une saiqoġi unum. <sup>25</sup> Iga Kristus qa gago areqalo sinġilatqa bati brantej deqa iga olo dal anjam aqa sorgomq di sqasai. Dal anjam a olo gago abu bul sqasai dego.

*Tamo a Yesus qa aqa areqalo sinġilatqas gam dena a Qotei aqa anġro tintiñ sqas*

<sup>26</sup> Niñgi kalil Kristus Yesus qa nunġo areqalo sinġilateb deqa niñgi Qotei aqa anġro tintiñ unub. <sup>27</sup> Niñgi kalil yanso osib Kristus beteryejunub deqa niñgi Kristus a gara bul jigsib unub. <sup>28</sup> Deqa niñgi endegsib maraib, “E Juda qaji” o “E Grik tamo” o “E kanġal tamo” o “E kanġal tamo sai” o “E tamo” o “E unġa.” Niñgi degsib maraib. Niñgi Kristus Yesus beteryejunub deqa niñgi kalil tamo qujaiosib unub. <sup>29</sup> Niñgi Kristus aqa segi tamo unġasari unub deqa niñgi Abraham aqa anġro tintiñ dego unub. Agi inġi bole bole Qotei a nami Abraham yqajqa minjej qaji di niñgi oqab.

## 4

*Iga Qotei aqa anġro tintiñ unum*

<sup>1</sup> Ijo anjam agiende. Anġro matu a na bunuqna aqa abu aqa inġi inġi kalil oqas. A anġro kiñala sosim a aqa abu aqa kanġal tamo lanġaj bul sqas. <sup>2</sup> Deqa tamo qudei nanġi a taqatoqnqab. Taqatesoqnib bati aqa abu nami atej qaji di brantimqa nanġi a olo taqatqasai. <sup>3</sup> Dego kere iga nami anġro kiñilala bulosim mondor uge uge lanġ ti mandam ti taqatejunub qaji nanġo kanġal tamo bul soqnem. <sup>4</sup> Ariya bati Qotei a nami atej qaji di brantonaqa a na aqa Niri Yesus qarinyonaq mandamq aiyej. Aisij aqa ai na nambabtonaqa a dal anjam aqa sorgomq di



soqnej. <sup>5</sup> A degyej. Di kiyaaqa? A na tamo ungasari dal anjam aqa sorgomq di soqneb qaji nanqi olo elenosim nanqo uneq na awainjrqaajqa deqa. Yim iga Qotei aqa anqro tintin sqajqa deqa.

<sup>6</sup> Deqa ijo was, bini ningi Qotei aqa anqro tintin unub. Qotei na aqa Niri aqa Mondor qarinyonaqa a gago are miligiq aiyej. Aiyej deqa iga Qotei endegsi meteqnum, "O ni gago Abu." <sup>7</sup> Deqa ningi olo kanqal tamo bul sosai. Ningi Qotei aqa anqro tintin unub. Ningi aqa inqi inqi kalil oqab.

*Pol a Galesia Kristen nanqi qa are koba qaloqnej*

<sup>8</sup> Nami ningi Qotei qalieosaisosib bati deqa ningi gisan qotei nanqo kanqal tamo bul soqneb. <sup>9</sup> Ariya bini ningi Qotei qalieonub. A ningi qa dego qalieqo. Deqa kiyaaqa ningi olo puluosib mondor uge uge nanqo kanqal tamo bul sqajqa are qaleqnum? Ningi qalie, mondor uge uge nanqi di singila saiqoji unub deqa nanqi na ningi aqaryainqwa keresai. <sup>10</sup> Ningi gaigai yori bati kokba ti bai qala bunuj ti wausau bunuj ti di unqajqa are qaleqnum. <sup>11</sup> Deqa e ningi qa ulaeqnum. Wau kalil e nunqo ambleq di yoqnem qaji di lanq ulonqaim deqa e ulaeqnum.

<sup>12</sup> Nami e dal anjam aqa sorgomq di sqa uratosim ningi bul soqnem. Bati deqa ningi na e une bei ebosaiqneb. Deqa ijo was, e ningi endegsi mernqwai. Ningi kamba e bul soqniy. <sup>13</sup> Ningi are qaliy. E maibej bati deqa e nunqoq bosim Yesus aqa anjam bole utruq na mernqoqnem. <sup>14</sup> Ijo jejamu singila saiqoji soqnej deqa e ningi gulbe koba enqoqnem. Ariya ningi deqa e qoreibosai. Ningi e gereibqa asgingosai. Qotei aqa lanq anqro bei kiyo Kristus Yesus a segi kiyo nunqoq bqas di ningi a osib gereiyqab dego kere ningi e osib gereibeb. <sup>15</sup> Bati deqa ningi e qa tulanq areboleboleinqoqnej. Deqa e qalieonum, e na ningi mernqgem qamu ningi nunqo nqamdamu dego otorosib ebeb qamu. O ijo was, kiyaaqa bini ningi e qa areboleboleinqosaieqnu? <sup>16</sup> E ningi anjam bole mernqeqnum dena e ningi jeu ateqnum e? Di sai.

<sup>17</sup> Ningi quiy. Gisan anjam maro tamo nanqi na ningi walawalainqeqnub. Nanqi ningi aqaryainqwjajqa deqa are qalo-saieqnum. Nanqi na ningi tintinqibqa ningi e qoreibosib olo nanqi daurnjrqaajqa deqa are qaleqnum. <sup>18</sup> Iga gago Kristen was nanqi kumbra bole bole enjrqaajqa singilaoqnoqom di bolequja. Deqa ningi gaigai kumbra di yoqniy. E ningi koba na soqnim bati deqa segi sai. Ningi gaigai yoqniy. <sup>19</sup> O ijo anqro, ningi quiy. Unq anqrotqa osiq jaqatinqyeqnu dego kere e ningi qa are jaqatinqbeqnu. Ijo are koba endegsi unu. Kristus a nunqo are miligiq di soqnimqa ningi a bulosib aqa kumbra geregere dauryoqniy. <sup>20</sup> Bini e ningi koba na sosai. E ningi koba na so qamu e ningi lawo anjam mernqo qamu. O ijo was kalil,

e ningi qa are koba qaleqnum. E kiyersiy ningi aqaryaingwai di e yala poibosai.

*Pol a Hagar qa ti Sara qa ti yawo anjam marej*

<sup>21</sup> Ningi dal anjam aqa sorgomq di sqajqa are qaleqnum deqa e ningi nenemngwai. Kiyaqa ningi dal anjam geregere poiŋgosaieqnu? <sup>22</sup> Qotei aqa anjam bei nami endegsib nenngrenyeb unu. Abraham a angro mel aiyeltej. Angro bei Hagar na nambabtej. Hagar a kanjal uŋa. Angro bei Sara na nambabtej. Sara a kanjal uŋa sai. A Abraham aqa naur tintin. <sup>23</sup> Abraham a mandam tamo nanŋo kumbra dauryosiq deqa a Hagar wo nrenjosib angro qujai Ismael nambabteb. Ariya Sara aqa angro a gam bei na nambabtej. Gam agiende. Qotei a anjam marnaqa aqa anjam di aqa damu brantonaqa Sara a aqaratonaq aqa angro qujai Aisak nambabtej. <sup>24</sup> Sara Hagar wo nanŋo anjam di yawo anjam bul. Nanŋi aiyel anjam namij ti anjam bunuj ti sigitejunub. Hagar a anjam namij sigitejunu. Anjam di Sainai manaq di brantej. Hagar aqa moma nanŋi kanjal tamo unub. <sup>25</sup> Hagar a Sainai mana sigitejunu. Sainai mana di Arebia sawaq di unu. Hagar a mandam qaji Jerusalem dego sigitejunu. Deqa aqa moma kalil nanŋi a ombla kanjal tamo unub. <sup>26</sup> Ariya Jerusalem bunuj a lanŋ goqe di unu. A kanjal uŋa sai. A gago ai. <sup>27</sup> Agi Qotei aqa anjam bei nami endegsib nenngrenyeb unu, “O uŋa, ino miligi ugee deqa ni angtotqa keresai. Di unŋum, ni areboleboleimeme. Ni angro oqajqa jaqatinmosaieqnu. Di unŋum, ni are boleimim soqne. Sosim ni louoqnsim areboleboleimim kikioqne. Di kiyaqa? Qotei a ino miligi gereiyetmimqa ni na uŋa kalil gumbulun ti unub qaji nanŋi bunŋrsimqa angro tulanŋ gargekoba oqam.” <sup>28</sup> O ijo was, uŋa di agi Sara. Ningi Sara aqa angro Aisak a bulosib unub. Qotei a nami anjam marnaqa Aisak a nambabtej. Dego kere Qotei a anjam marnaqa ningi Qotei aqa angro tintin branteb unub. <sup>29</sup> Abraham a mandam tamo nanŋo kumbra dauryosiq Hagar wo nrenjosib angro qujai Ismael nambabteb. Deqa Ismael a na Sara aqa angro Aisak jeutoqnsiq a ugeugeiyognej. Aisak agi Qotei aqa Mondor aqa singila na nambabtej. Dego kere bini iga Mondor ti unum qaji tamo qudei na jeutgoqnsibqa ugeugeigeqnum. <sup>30</sup> Agi Qotei aqa anjam bei nami endegsib nenngrenyeb unu, “O Abraham, ni na kanjal uŋa di aqa angro Ismael wo nanŋi winjrim jaraiyeb. Ni que. Aisak a kanjal uŋa aqa angro sai. A ino naur tintin aqa angro. Deqa ino inŋi inŋi kalil a na oqas. Ismael a na ino inŋi inŋi oqasai.” <sup>31</sup> O ijo was, iga kanjal uŋa aqa angro sai. Iga Abraham aqa naur tintin aqa angro unum.

## 5

*Iga kanjal tamo bul sqasai*

<sup>1</sup> Kristus na iga elenej deqa iga olo kanjal tamo bul sqasai. Dal anjam na iga olo bunu taqatgwasai dego. Deqa ijo was, ningi singila na tigelesosib tamo qudei na olo ningi dal anjam aqa sorgomq di sqa merngoqrib saidnjroqniy.

<sup>2</sup> E Pol. E na ningi endegsi merngit quiy. Ningi mulun aiqab di Kristus na ningi aqaryaingwa keresai. <sup>3</sup> Ningi qudei mulun aiqa mareqnu deqa e na endegsi merngwai. Ningi mulun aiqab di Qotei na merngwas, “Ningi dal anjam mutu kalil dego torei dauryekritiy. Qujai bei grotai b.” <sup>4</sup> Ningi qudei mareqnu, “Iga dal anjam dauryqom gam dena Qotei na iga tamo bole une saiqoji qa mergwas.” Ningi degsib mareqnu di ningi Kristus urateqnu. Qotei a ningi qa are boleyej aqa kumbra di dego ningi qoreiyeqnu. <sup>5</sup> O was ningi degaib. Iga Mondor ejunum deqa iga aqa wau na Qotei qa gago areqalo singilatqnsim mondon a na iga tamo bole une saiqoji qa mergwajqa deqa tariñoqnsim unum. <sup>6</sup> Tamo a Kristus Yesus beteryesqas di a endegsi poiyyas, “Iga mulun aiqom di laña. Iga mulun aiqasai di dego laña. Ariya iga Yesus qa gago areqalo singilatqsim qalaqalaiyo kumbra dauryqom di kumbra bole utru ti.” A degsi poiyyas.

<sup>7</sup> Nami ningi Yesus aqa gam geregere dauryosib walweloqneb. Ariya tamo yai na gam getentetnjej deqa ningi olo anjam bole dauryqa urateqnu? <sup>8</sup> Nungo areqalo ningi bini ojejunub qaji di bolesai. Qotei agi ningi metnjej qaji a na areqalo di ningi engosai. <sup>9</sup> Nungo areqalo uge di sum bul. Ningi qalie, tamo nanji sum kiñala oqnsib bem ti bulyeq nab bem tiyekritoqnsiq tulan kobaqujaeqnu. Dego kere nungo areqalo uge di tulan kobaqujaqas. Deqa ningi areqalo di uratiy. <sup>10</sup> O ijo was, e qalieonum, ningi areqalo uge di uratqab. Osib ijo areqalo olo dauryqab. Tamo Koba a na aqaryaingimqa ningi degyqab. Di e qalieonum. Tamo yai nanji nungo areqalo niñaqyetngwajqa waueqnu di e qaliesai. Tamo nanji di awai ugedamu oqab.

<sup>11</sup> Ariya “Ningi mulun aiyiy” e anjam di tamo nanji minjreqnum qamu kiyaaq jeu tamo nanji na e ugeugeibeqnu? O ijo was, e anjam di tamo nanji minjreqnum qamu Yesus a namburbasq di moiyej anjam dena jeu tamo nanjo areqalo ugetetnjrosai qamu. <sup>12</sup> Jeu tamo nanji dena nungo areqalo niñaqyetngqnu. Nanji mulun aiqajqa tulan singilaeqnu deqa unqum, nanji nanjo segi welum gei dego potosib torei taqal waiyebe.

<sup>13</sup> Od, ijo was, Yesus a ningi elenej deqa dal anjam na olo bunu ningi taqatngwasai. Qotei a deqa are qalsiq ningi

metnjej. Ariya ninji endegsib are qalaib, “Iga dal anjam aqa sorgomq di sosai deqa unqum, iga gago areqalo namij dauryosim kumbra uge uge yoqnqom.” Ninji degsib are qalaib. Ninji kumbra endegyiy. Ninji nunqo Kristen was nanji aqaryainjroqnsib qalaqalainjroqniy. <sup>14</sup> Anjam bei dego unu, “Ni ino segi jejamu gereiyeqnum dego kere ni ino was nanji degsim geregerinjroqne.” O ijo was, anjam dena dal anjam kalil kabutejunu. <sup>15</sup> Deqa ninji segi segi njirinoqnsib qotoqnaib. Qotoqnqab di ninji segi segi qa kumbra uge yoqnsib uneq aisib padalqab.

*Areqalo namij ti Qotei aqa Mondor ti ombla jeu atoqnsib unub*

<sup>16</sup> Ijo anjam bei agiende. Ninji Qotei aqa Mondor aqa kumbra na walweloqniy. Degsib walwelqab di ninji nunqo segi jejamu qa areqalo namij dauryqasai. <sup>17</sup> Iga qalie, gago areqalo namij ti Qotei aqa Mondor ti ombla jeu atoqnsib unub. Deqa kumbra bole ninji yqajqa arearetnjeqnu qaji di ninji yosaieqnu. <sup>18</sup> Ariya ninji Qotei aqa Mondor aqa kumbra dauryqab di ninji olo dal anjam aqa sorgomq di sqasai.

<sup>19</sup> Areqalo namij aqa kumbra di ninji qalie. Sambala kumbra ti, kumbra jiga ti, kumbra uge uge yqajqa are prugnoqa, <sup>20</sup> gisan qotei qa louoqa, gumaninoqa, was bei jeutoqa, njirinoqa, was bei aqa inji inji qa maulngoqa, minjin oqoqa, are ugeoqa, nunqo segi jejamu qa are qalsib anjam na qotoqa, Kristen was nanji pupoaiyeltjroqa, <sup>21</sup> tamo ñoro ti nanji qa are ugeingoqa, ya uysib nanarioqa, alan kobaoqa. O ijo was, areqalo namij aqa kumbra kalil agide. Tamo ungasari kumbra deqaji yeqnu qaji nanji Qotei na taqatnjrsim nanjo Mandor Koba sqasai. E nami ninji degsi merngem agi olo merngonum.

<sup>22</sup> Ariya Qotei aqa Mondor na iga kumbra bole endeqaji yqajqa are tigeltetgeqnu. Qalaqalaiyo kumbra dauryoqa, areboleboleigoqa, lawo kumbra yoqa, urur minjin oqosaiqa, gago was nanji aqaryainjroqnsim kumbra bole bole enjroqa, kumbra bole tintin dauryoqa, <sup>23</sup> lawo na soqa, gago segi jejamu taqatosim areqalo namij dauryqa uratoqa. O ijo was, iga kumbra bole deqaji yoqnqom di dal anjam na iga getentgwa keresai. <sup>24</sup> Tamo ungasari Kristus Yesus beteryejunub qaji nanji na nanjo areqalo namij ti are prugnjqajqa kumbra ti kalil hamburbasq di qamnab moiyej.

<sup>25</sup> Qotei aqa Mondor na iga hambile egej deqa iga aqa kumbra na walweloqnqom. <sup>26</sup> Iga gago segi ñam soqtqasai. Iga Kristen qudei nanjo are ugetetnjroqnsim qotoqnqasai. Iga gago was nanjo ñoro qa maulgoqnqasai dego.

## 6

*Ni inġi bei yagwam di ni olo inġi di otorosim oqam*

<sup>1</sup> O ijo was, Kristen tamo bei a une atimqa niġi Qotei aqa Mondor dauryeqnub qaji niġi na tamo di unsibqa lawo na osib aqa kumbra gereiyetiy. Satan na niġi dego uneq breiġim ulonjaib deqa niġi geregere nam atoqniy. <sup>2</sup> Osib niġi na nuġo Kristen was nanġi aqaryainjroqnsib nanġo gulbe qoboiyetnjroqniy. Degsib qoboiyqab di niġi Kristus aqa dal anjam keretosib dauryqab. <sup>3</sup> Nuġo ambleq di tamo bei a marqas, “E ñam koba ti unum.” Ariya a ñam ti sosai. A ñam saiqoji unu deqa a na aqa segi jejamu gisanjyqo. <sup>4</sup> Deqa niġi nuġo segi segi wau geregere peleyiy. Osib nuġo wau di bole kiyo sai kiyo di niġi qalieqab. Tamo a degyqas di a aqa segi wau qa areboleboleiyqas. Ni ino segi wau ti tamo bei aqa wau ti turtosim peleyaim. <sup>5</sup> Tamo kalil nanġi nanġo segi segi wau taqatoqnebe.

<sup>6</sup> Kristen gate nanġi Qotei aqa anjam plaltoqnsib niġi merġeqnub deqa niġi na kamba nanġi inġi inġi qa aqaryainjroqniy.

<sup>7</sup> Niġi nuġo segi jejamu gisanjosib endegsib are qalaib, “Iga Qotei maquiyimqa a gago une unqasai.” O ijo was, niġi Qotei maquiyqa keresai. Ni inġi bei yagwam di ni olo inġi di otorosim oqam. <sup>8</sup> Tamo bei a inġi uge yagobulosim aqa areqalo namij dauryqas di aqa areqalo namij dena kumbra uge uge babtoqnim a padalqas. Ariya tamo bei a inġi bole yagobulosim Qotei aqa Mondor aqa kumbra dauryqas di Mondor dena a nambile yimqa a so bole gaigai sqas. <sup>9</sup> Deqa iga kumbra bole yoqnoqom. Iga kumbra bole yqajqa asgigwasai di bunuqna iga awai bole oqom. <sup>10</sup> Deqa bati soqnim iga na tamo unġasari kalil nanġi kumbra bole enjroqnoqom. Osim tamo unġasari Yesus qa nanġo areqalo sinġilateqnub qaji nanġi kumbra bole enjrqajqa tulan sinġilaqom.

*Kristus a namburbasq di moiyej anjam deqa segi Pol a areboleboleiyoquej*

<sup>11</sup> Anjam mutu endi e segi na nenġrenyonum. E nenġren kokba ijo segi ban na atelenonum di uniy. <sup>12</sup> Niġi quiy. Tamo nanġi niġi mulu breiġwa sinġilaeqnub qaji nanġi nuġo jejamuq dena ñam koba oqajqa deqa areboleboleinjreġnu. Kristus a namburbasq di moiyej anjam deqa nanġi nanġo areqalo sinġilatqa ulaeqnub. Osib mareqnub, “Jeu tamo nanġi na iga ugeugeigo uge.” Utru deqa nanġi na niġi mulu breiġwa sinġilaeqnub. <sup>13</sup> Nanġi segi nami mulu aiyeb. Ariya nanġi Qotei aqa dal anjam dauryosaieqnub. Nanġi na niġi mulu breiġosib nuġo jejamuq dena ñam koba oqajqa deqa

areboleboleinjreqnu. <sup>14</sup> Ariya e ijo segi ñam soqtqa keresai. E tamo bei aqa ñam soqtqa keresai dego. E gago Tamo Koba Yesus Kristus aqa ñam segi soqtqai. A ñamburbasq di moiyej anjam deqa segi e areboleboleiboqnqas. Mandam qa kumbra kalil nami ijo areqaloq di soqnej qaji di Kristus ombla moreñeb. E segi dego ñamburbasq di moiyoqblem. Deqa e olo mandam qa kumbra kalil dauryqa uratem. <sup>15</sup> Iga muluñ aiqom di laña. Iga muluñ aiqasai di dego laña. Qotei na gago are bulyetgonaqqa iga tamo ungasari bunuj brantem di kumbra bole utru ti. <sup>16</sup> Tamo ungasari kumbra di ojsib dauryeqnub qaji nañgi qa Qotei a duloqnsiq are latetnjreqnu. Tamo ungasari nañgi di Israel nañgo moma bole. Nañgi Qotei aqa tamo ungasari tiñtiñ.

<sup>17</sup> Tamo bei na e gulbe ebaiq. Nami jeu tamo nañgi na e luboqneb. E luboqneb qaji pirigi agi ijo jejamuq di unu. Niñgi di unsib endegsi poinqwas, “Bole, Pol a Yesus aqa wau tamo bole.”

<sup>18</sup> O ijo was kalil, gago Tamo Koba Yesus Kristus a niñgi qa are boleiyosim nuñgo qunuñ taqatoqneme. Bole.

## EFESUS

### *Yesus na Pol qarinyej*

<sup>1</sup> E Pol. Kristus Yesus na e qarinyej deqa e aqa anjam mare mare laqnum. Qotei aqa segi areqalo na e wau di ebej. Ningi Qotei aqa segi tamo ungasari Efesus qureq di unub qaji. Ningi Kristus Yesus geregere dauryeqnub. E anjam endi nenngrenyosim nungoq qarinyonum. <sup>2</sup> Gago Abu Qotei wo Tamo Koba Yesus Kristus wo nanngi aiyel ningi qa are boleinjrimqa ningi lawo na soqniy.

### *Kristus na lan qaji inji bole bole iga egej*

<sup>3</sup> Iga Qotei aqa ñam soqtoqnqom. A gago Tamo Koba Yesus Kristus aqa Abu Qotei. A Kristus aqa singila na lan qaji inji bole bole iga egej. A gago qunun qa are qalsiq deqa inji di iga egej. <sup>4</sup> Qotei a mandam atosaisosiq bati deqa a na iga giltgej. Di kiyaaqa? Iga Kristus beteryosim Qotei aqa segi kumbra boleq di sosim aqa ñamgalaq di une saiqoji sqajqa deqa. <sup>5</sup> Tulan nami Qotei na iga qalaqalaigosiq iga aqa segi angro sqa marsiq Yesus Kristus aqa wau na iga elenej. Qotei aqa segi areqalo na a degyej. <sup>6</sup> Aqa kumbra dena a iga qa are boleiyej. Aqa Niri Yesus a tulan qalaqalaiyeqnu qaji aqa singila na a degyej. Deqa aqa ñam tulan goge oqoqnqas.

<sup>7</sup> Qotei a iga qa are tulan boledamuiyej. Aqa kumbra di aqa utru agiende. A na Kristus qarinyonaqa a gago uneq na iga awaigwa marsiq moiyej. Moisiq aqa len aiyej dena Qotei na gago une kalil kobotetgej. <sup>8</sup> A iga qa are tulan boleiyosiq qalie ti powo ti kalil iga egej. <sup>9</sup> Nami Qotei a are qalej, “Kristus a wau di yqas.” Osiqa aqa areqalo di ulitesoqnej. Ariya bini a na olo aqa areqalo di boleq atsiq iga osorgeqnu. <sup>10</sup> Deqa iga qalieonum, Qotei na inji inji kalil mandam ti lan qure ti di unub qaji nanngi taqatnjroqnqas. Osim gilsim gilsim bati a nami atej qaji di brantimqa a inji inji kalil di olo osim Kristus aqa banq di atim Kristus a nanngo gate sqas.

<sup>11</sup> Qotei a mareqnaqa inji inji kalil babeleneqnu. Tulan nami a aqa segi areqalo dauryosiq iga na Kristus beteryosim iga aqa segi tamo ungasari sqajqa marsiq giltgej. <sup>12</sup> Iga Juda unum deqa iga namoqna Kristus qa gago areqalo singilattem. Gago kumbra dena Qotei aqa ñam tulan goge oqoqnqas.

<sup>13</sup> Ningi sawa bei bei qaji ningi dego Qotei aqa anjam bole queb. Anjam bole agiende. Qotei a Yesus aqa wau na ningi elenej. Ningi Yesus qa nunngo areqalo singilatosib a beteryesonab Qotei na aqa anjam nami marej qaji di dauryosiq aqa toqor ningi engej. Deqa ningi aqa segi tamo ungasari unub.

Toqor di aqa Mondor Bole. <sup>14</sup> Iga Mondor ejunum deqa iga qalieonum, bunuqna iga inği bole bole Qotei a nami aqa segi tamo unğasari nanği enjrqa marej qaji di oqom. Qotei a gago uneq na iga awaigej deqa iga inği bole bole di oqom. Iga deqa bini tarinjoqnsim unum. Gago kumbra dena Qotei aqa ñam tulan goge oqoqnqas.

*Pol a Efesus Kristen nanği qa pailyej*

<sup>15</sup> E endegsi quem. Ninği Tamo Koba Yesus qa nungo areqalo singilatoqnsib Qotei aqa segi tamo unğasari kalil nanği qalaqalainjreqnub. <sup>16</sup> Deqa e gaigai Qotei binjiyoqnsim ninği qa pailyeqnum. <sup>17</sup> A gago Tamo Koba Yesus Kristus aqa Qotei. A gago Abu rian koba ti unu qaji. Deqa e ninği qa endegsi pailyeqnum, “O Abu, ni na Efesus Kristen nanği areqalo bole enjrimqa nanği ino anjam aqa utru geregere poinjrim ni qa bole qalieoqnqab.” <sup>18</sup> O ijo was, ijo are koba endegsi unu. Qotei na nungo areqalo suwantetngimqa inği tulan bole bole a nami ninği engwa osiq metnğej qaji di ninği qalieqab. Agi ninği inği di oqajqa tarinjoqnsib unub. Iga Qotei aqa segi tamo unğasari unum deqa a na inği di iga egwa marsiq gereiyetgej unu. <sup>19</sup> Qotei a singila koba ti unu. Singila dena a na gaigai iga Yesus qa gago areqalo singilateqnum qaji iga aqaryaigeqnu. Qotei aqa singila di tulan kobaquja. Deqa iga na ubtosim marqa keresai. Aqa singila kobaquja di gagoq di waueqnu. Ninği singila di qalieqajqa deqa e ninği qa Qotei pailyeqnum. <sup>20</sup> Singila di nami Kristus aqaq di wauoqnej. Agi Kristus a moinaqa Qotei aqa singila kobaquja dena a na Kristus olo subq na tigeltosiq lan qureq osi oqsıq aqa ban woq di awotej. <sup>21</sup> Deqa Kristus na mondor singila nanği ti gate kokba ti mandor nanği ti tamo kokba ti kalil nanği tulan bunjrsıqa goge kobaq di unu. A na tamo kalil bini bati endeqa ñam koba ejunub qaji nanği ti tamo kalil bunuqna ñam koba oqab qaji nanği ti tulan bunjrsıqa goge kobaq di unu. <sup>22</sup> Qotei na inği inği kalil osıqa Kristus aqa sorgomq di atej unub. Deqa Kristus a inği inği kalil di nanngo gate koba sosıqa Qotei aqa segi tamo unğasari kalil nanği taqatnjreqnu. <sup>23</sup> Tamo unğasari nanği di agi Kristus aqa jejamu qujai unub. Kristus a nanği ti inği inği kalil ti ekritosıq tulan keretnjrejunu.

## 2

*Iga morenesobulonam Qotei a iga qa are boleiyosıq qalaqalaıgej*

<sup>1</sup> Nami ninği une yoqnsib laqneb deqa ninği morenesobuleb. <sup>2</sup> Bati deqa ninği mandam qa kumbra uge uge na walweloqneb. Ninği mondor uge uge lan goge di unub qaji nanngo gate koba Satan aqa kumbra dauryoqneb. Satan a segi



mondor singila koba. Deqa a tamo ungasari Qotei aqa anjam gotranjeqnub qaji nanngo are miligiq di singila na waueqnu. <sup>3</sup> Nami iga kalil dego nanngi koba na laqnsimqa gago jejamu qa areqalo uge uge namij dauryoqnem. Deqa Qotei a iga ti nanngi qa ti minjin ani oqetej.

<sup>4-5</sup> Bole, iga une yoqnsim laqnem deqa iga morenesobulem. Ariya bati deqa Qotei a iga qa tulan dulosiq qalaqalaigej deqa a na iga Kristus ombla nambile egej. A iga qa are boleiyej aqa kumbra dena a na iga elenjej. <sup>6</sup> Osiqa iga Kristus Yesus ombla olo subq na tigeltgobulosiqa iga lan qureq joqsi oqsiqa Kristus aqa awo jaram kobaq di awotgej. <sup>7</sup> Kristus Yesus aqa wau na Qotei a iga qa are tulan boledamuiyosiq iga boletgej. Aqa kumbra di a na tamo ungasari kalil bunuqna brantoqnqab qaji nanngi osornjroqnqas. <sup>8</sup> Ningi Yesus qa nunngo areqalo singilatonabqa Qotei a ningi qa are boleiyej. Aqa kumbra dena a na ningi elenjej. Ningi wau bole yonab dena Qotei na ningi elenosai. Qotei a ningi lanja elenjej awai saiqoji. <sup>9</sup> Od, ningi wau bole yonab dena Qotei na ningi elenosai. Deqa ningi nunngo segi nam soqtqa keresai. <sup>10</sup> Kristus Yesus aqa wau na Qotei a gago are bulyetgonaqa iga tamo ungasari bunuj brantem. Deqa kumbra bole bole kalil Qotei a nami iga dauryqajqa gereiyetgej qaji di iga dauryoqnsim walweloqnqom.

### *Kristus a moiyej dena a jeu kobotej*

<sup>11</sup> Ningi qalie, Juda nanngi mulun aiyeqnub. Di nanngo kumbra. Deqa nanngi na ningi misilingoqnsib endegsib mernjeqnub, “Ningi mulun aiyosai qaji tamo.” Nanngi nanngo segi ban na tamo nanngi mulun breinjreqnub. Ariya ningi geregere are qaliy. Ningi Juda sai. Ningi sawa bei bei qaji. <sup>12</sup> Deqa ningi nami Kristus aqaq di sosai. Ningi isaq di soqneb. Ningi nami Israel nanngi ti sosai dego. Qotei a marej, “E na Israel nanngi inji bole bole enjrqi.” Osiqa aqa anjam di singilatosiq soqnej. Ariya a na inji bole bole di ningi engwa marosaioqnej. Deqa ningi inji bole bole deqa tariñosaiioqneb. Ningi mandamq endi lanja Qotei qaliesai soqneb. <sup>13</sup> Ariya bini ningi Kristus Yesus beteryesosibqa Qotei aqa jomq di unub. Nami ningi isaq di sonabqa bati deqa Kristus a ningi qa moisiq aqa len aiyej. Aqa kumbra dena a na ningi joqsiqa Qotei aqa areq bej. <sup>14</sup> Kristus a segi na jeu kobotej deqa bini iga kalil koba na so bole unum. Nami Juda nanngi ti sawa bei bei qaji nanngi ti jeu atoqnsib soqneb. Deqa jen a nanngo ambleq di sosiqa nanngi potnjrej. Ariya Kristus a moisiq dena jen di waqtosiq jeu kobotosiq Juda nanngi ti sawa bei bei qaji nanngi ti turtnjrsiq sawa qujaiq di atej. <sup>15</sup> A moiyej gam dena a na Moses aqa dal anjam mutu kalil taqal atekritej. A na Juda nanngi ti sawa bei bei qaji nanngi ti turtnjrej deqa nanngi tamo bunuj brantosib tamo qujaosib

unub. Kumbra dena Kristus na jeu kobotosiqa iga kalil lawo kumbraq di atej unum. <sup>16</sup> A na Juda nanngi ti sawa bei bei qaji nanngi ti turtnjrim nanngi koba na tamo qujaiosib sqajqa deqa marsiq namburbasq di moiyej. Moisiq dena a jeu kobotej. <sup>17</sup> A bosiq anjam bole endegsi palontoqnej, “Bini ningi jeu turyqajqa kumbraq di unub.” A na anjam bole di ningi sawa isaq di unub qaji ti tamo ungasari jojom di unub qaji nanngi ti palontosiq merngoqnej. <sup>18</sup> Kristus aqa wau dena iga koba na Mondor qujai ejunum. Deqa iga kalil are qujaitosim unum. Mondor dena gam waqtetgej deqa iga gaigai gago Abu Qotei aqa ulatamuq di brantoqnqom.

### *Kristen nanngi Qotei aqa tal bul unub*

<sup>19</sup> Deqa bini ningi olo yaun tamo sosai. Ningi Qotei aqa angro tintin unub. Ningi ti Qotei aqa segi tamo ungasari kalil nanngi ti koba na was bole unub. <sup>20</sup> Ningi Qotei aqa tal bul unub. Qotei a segi na tal di gereiyej. Qotei aqa anjam maro tamo nanngi ti aqa medabu o qaji tamo nanngi ti tal ai bul tigelejunub. Qotei a segi na tal di tigeltej. Kristus Yesus a segi tal ai tuma qaji. A segi na tal di singilatejunu. <sup>21</sup> Tal di aqa tanu kalil nanngi Kristus beteryejunub deqa nanngi kalil koba na singila na tigelejunub. Qotei na tal di gereiyosiq unu. Deqa tal di kobaqujaoqnsiqa Tamo Koba aqa segi tal bul tigelejunu. <sup>22</sup> Ningi dego Kristus beteryejunub deqa Qotei na ningi ti aqa segi tamo ungasari kalil nanngi ti koroingej unub. Deqa ningi aqa segi so tal bul unub. Qotei aqa Mondor wo nanngi aiyel na tal di gereiyosib miligiq di unub.

## 3

### *Pol na sawa bei bei qaji nanngi Kristus aqa anjam bole minjre minjre laqnu*

<sup>1</sup> O ijo was, Qotei a ningi kumbra tulan boledamu engej. E kumbra deqa saoqnsim laqnam tamo qudei na e ojsib tonto talq endi waibeb unum. E Pol. E na ningi sawa bei bei qaji aqaryaingwa osim deqa Kristus Yesus aqa wau ojeqnum. Utru deqa e tonto talq endi unum. <sup>2</sup> Ningi queb, Qotei a e qa are boleiyosiq wau ebej. O ijo was kalil, Qotei a ningi qa dego are boleiyqajqa deqa e wau yeqnum. <sup>3</sup> Qotei na jeu kobotej anjam di nami ulitesoqnej ariya a na olo boleq atsiqa e osorbej. E deqa anjam truquyala endi nengrenyonum. <sup>4</sup> Ningi ijo anjam endi sisiyosib qalieosib mariy, “Bole, Kristus aqa anjam nami uliesoqnej qaji di aqa utru Pol a geregere poiyeqnu.” <sup>5</sup> O ijo was, Qotei na uli anjam di tamo ungasari nami soqneb qaji nanngi minjrosaiocnej. Ariya bini a na aqa Mondor aqa singila na uli anjam di babtosiqa aqa anjam maro tamo nanngi ti aqa medabu o qaji tamo nanngi ti minjreqnu. <sup>6</sup> Uli anjam di aqa

utru agiende. Qotei na sawa bei bei qaji nanġi ti Juda nanġi ti turtnjrsiqa sawa qujaiq di atej. Nanġi Yesus aqa anjam bole ojejunub deqa nanġi kalil tamo qujaiosib inġi bole bole Qotei a nami Kristus Yesus aqa wau na nanġi enjrqa marej qaji di oqab. <sup>7</sup> E Yesus aqa anjam bole di mare mare laqajqa deqa Qotei a e qa are boleiyosiqa e wau tamo atej. Osiqa aqa segi singila kobaquja e ebej. <sup>8</sup> E tamo bolesai. Qotei aqa segi tamo unġasari kalil nanġi na e tulaġ bunbejunub. Di unġum. Qotei a e qa are boleiyej deqa e sawa bei beiq di Kristus aqa anjam mare mare laqnum. Kristus aqa anjam agiende. A na inġi tulaġ bole bole iga egwas. Inġi bole bole di aqa utru iga na ubtosim marqa keresai. <sup>9</sup> Ningi qalie, Qotei a mandam ti inġi inġi kalil ti atelenej unub. Ariya kumbra a yqajqa nami aqa areqaloq di soqnej qaji di a na ulitej. Bini a na aqa areqalo di olo boleq atqa marsiq e wau ebej. <sup>10</sup> Od, a na aqa segi qalie ti powo ti boleq atqa marsiq e wau ebej. Deqa laġ anġro singila kokba ti mondor laġ goge di unub qaji nanġi ti bini Qotei aqa areqalo di unoqnsib geregere poinjreqnu. Qotei aqa areqalo agiende. A na Juda nanġi ti sawa bei bei qaji nanġi ti turtnjrsim sawa qujaiq di atqas. <sup>11</sup> Tulaġ nami Qotei a kumbra di yqajqa are qalej. Ariya bini a gago Tamo Koba Kristus Yesus aqa wau na kumbra di yeqnu. <sup>12</sup> Iga Yesus qa gago areqalo singilateqnum deqa iga ulaosaieqnum. Iga bole qalieonum, iga Qotei aqa ulatamuq di brantqajqa gam agi Yesus a segi qujai. <sup>13</sup> Deqa ninġi quiy. E ninġi qa osim Yesus aqa wau ojeqnum. E wau di ojeqnum deqa e gulbe koba qoboieqnum. Ninġi deqa are koba qalaib. Ninġi are koba qalqab di ninġi ulonqab. Deqa ninġi ijo gulbe deqa areboleboleinġem. Ijo gulbe dena ninġi aqaryaingimqa ninġi Qotei ombla so bole gaigai sqab.

*Pol a Efesus Kristen nanġi qa pailyeqnu*

<sup>14</sup> Deqa ijo was, e singa pulutoqnsim Abu Qotei binjyeqnum. <sup>15</sup> A tamo unġasari kalil laġ ti mandam ti di unub qaji nanġo Abu. Deqa a na nanġo ñam segi segi breiyetnjreqnu. <sup>16</sup> E ninġi qa endegsim pailyeqnum, “O Abu, ni nami inġi tulaġ bole bole Efesus Kristen nanġi gereiyetnjrem. Deqa ni nanġo are miligiq di ino Mondor atim soqnim dena nanġi tulaġ singilaqab. <sup>17</sup> Amqa nanġi Kristus qa nanġo areqalo singilatesoqrib kumbra dena Kristus a nanġo are miligiq di sqas. O Abu, ni na Efesus Kristen nanġi singilatnjrimqa qalaqalaiyo kumbra nanġo are miligiq di tulaġ singilatib soqneme. Mandam na ñam jirim ojesonaqa ñam a singila na tigelejunu dego kere.” O ijo was, e ninġi qa degsim Qotei pailyeqnum. <sup>18-19</sup> Deqa ninġi ti Qotei aqa segi tamo unġasari kalil nanġi ti singila osib Kristus aqa qalaqalaiyo kumbra qa

geregere qalieosib soqniy. Aqa qalaqalaiyo kumbra di tulan kobaquja. A tulan olekoba. A tulan goge koba. A tulan guma koba. Od, Kristus aqa qalaqalaiyo kumbra dena powo ti qalie ti kalil tulan bunyejunu. Deqa ningi aqa qalaqalaiyo kumbra qa geregere qalieosib soqniy. Soqnib ingi bole bole kalil Qotei na ekritosiq keretejunu qaji di dego nungoq di maqesqas.

<sup>20</sup> Qotei aqa singila a gago are miligiq di waueqnu. Aqa singila dena gago areqalo ti pailyo ti kalil tulan bunyejunu. <sup>21</sup> Deqa Qotei aqa segi tamo ungasari kalil nanngi Kristus Yesus aqa ñam na bati gaigai Qotei aqa ñam soqtoqnsib gilsib gilsib diño bati itqab. Bole.

## 4

### *Iga Kristus aqa jejamu qujai*

<sup>1</sup> E Pol. E Tamo Koba aqa wau ojeqnum deqa e tonto talq endi unum. Qotei na ningi a dauryqa osiq metnjej. Deqa e nungo are tigeltetnjitqa ningi kumbra Qotei a tulan areareteqnu qaji di yoqnsib walweloqniy. <sup>2</sup> Osib ningi nungo segi ñam aguq atoqnsibqa ningi segi segi qa lawo kumbra yoqniy. Kristen tamo qudei na ningi une bei engibqa ningi kamba olo nanngi qa urur minjin oqaiq. Ningi nanngi qalaqalainjroqnsib gulbe nanngi na ningi engeqnuq qaji di qoboiyetnjroqniy. <sup>3</sup> Osib ningi nungo Kristen was kalil nanngi koba na are qujaitosib lawo na sqajqa singilaoqniy. Kumbra di agi Qotei aqa Mondor na iga osorgeqnu. <sup>4</sup> Iga kalil Kristus aqa jejamu qujai unum. Iga kalil Mondor qujai ejunum. Qotei na ningi ingi qujai qa tarinqa osiq metnjej. Ingi qujai di agi lan qureq di unu. <sup>5</sup> Tamo Koba qujai dego unu agi Kristus. Iga a qa qujai gago areqalo singilateqnum. Iga kalil yanso qujai em. <sup>6</sup> Qotei qujai unu. A gago kalil qa Abu. A na qujai tamo ungasari kalil nanngi taqatnjreqnu. A nanngo are miligiq di waueqnu. A nanngo ambleq di unu.

<sup>7</sup> Kristus a iga kalil qa are boleiyosiq segi segi singila egej. <sup>8</sup> Agi Qotei aqa anjam bei nami endegsib nenngrenyeb unu, “Qotei a tonto tamo gargekoba nanngi elenosiqa joqsiq lan goge oqej.

Oqsiq dia nanngi singila enjrej.”

<sup>9</sup> O ijo was, Kristus a lan goge oqej anjam di aqa utru agiende. A mati oqosai. A mati moiyo qureq aiyej. <sup>10</sup> Aisiq dena olo tulan goge oqsiq lan qure kalil bunyekritosiq torei oqej. A degyej. Di kiyayaqa? A na ingi ingi kalil ekritosim keretqajqa deqa. <sup>11</sup> Deqa a segi qujai na tamo nanngi singila enjreqnu. Tamo qudei nanngi a na singila enjreqnaqa nanngi aqa anjam mare mare laqnu. Tamo qudei nanngi a na singila enjreqnaqa nanngi aqa medabu oqnsib aqa anjam babteqnu. Tamo qudei nanngi

a na singila enjreqnaqa nan̄gi aqa anjam bole palontoqnsib tamo un̄gasari nan̄gi are bulyetnjreqnub. Tamo qudei nan̄gi a na singila enjreqnaqa nan̄gi Qotei aqa anjam plaltoqnsib Kristen tamo un̄gasari nan̄gi taqatnjreqnub. <sup>12</sup> Kristus na tamo nan̄gi di singila enjreqnu. Di kiyaaqa? Nan̄gi na kamba iga Qotei aqa segi tamo un̄gasari singilatgimqa iga Kristus aqa wau geregere ojqaqqa deqa. Gago wau dena Kristus aqa jejamu a so bole sqas. Kristus aqa jejamu agi iga segi. <sup>13</sup> Wau di gilsim gilsim mondon̄ iga kalil gago areqalo torei Kristus qa singilaboletosim koba na are qujaitosim sqom. Sosim bati deqa iga kalil Qotei aqa Niri qa bole qalieqom. Kumbra dena iga tulan̄ boleqnsim singila ti sosim Kristus aqa segi kumbra bole kalil ekritosim keretqom. <sup>14</sup> Gisan̄ tamo nan̄gi maqu kumbra yoqnsib anjam koba lan̄a lan̄a maroqnsib laqnub. Jagwa na yuwal tigelteqnaqa oqe aiyeqnu dego kere anjam dena tamo un̄gasari qudei nan̄go areqalo niñaqyetnjreqnu. Ariya iga angro kiñilala bul sqasai deqa anjam dena gago areqalo niñaqyetgwasai. <sup>15</sup> Iga gisan̄ anjam di qusim dauryqasai. Iga qalaqalaiyo kumbra dauryoqnsim anjam bole segi maroqnqom. Osim dena iga kalil boleqnsim singilaoqnsim gago Gate Koba Kristus beteryesqom. <sup>16</sup> Iga kalil Kristus aqa jejamu qujai unum deqa iga qudei aqa ban̄ bul. Iga qudei aqa singa bul. Iga qudei aqa ñamdamu bul. A na aqa ban̄ ti singa ti ñamdamu ti di turtoqnsiqa qujaitejunu. Deqa iga segi segi kalil Kristus beteryoqnsim aqa wau geregere ojoqnsim aqa qalaqalaiyo kumbra dauryoqnqom. Kumbra dena iga tulan̄ boleqnsim singilaoqnqom.

*Nin̄gi so bunuj ti areqalo bunuj ti soqniy*

<sup>17</sup> Deqa e Tamo Koba aqa ñam na nin̄gi singila na endegsi mern̄gwai. Sawa bei bei qaji nan̄go areqalo tulan̄ niñaqejunu deqa nin̄gi na nan̄go kumbra uge uge olo dauryosib walwe-laib. <sup>18</sup> Nan̄go qalie ti powo ti tulan̄ ambruejunu. Nan̄gi tulan̄ nanarioqnsib laqnub. Nan̄go are miligi getenejunu. Deqa Qotei aqa ñambile nan̄goq di sosai. <sup>19</sup> Nan̄gi kumbra uge uge yoqnsib ariya nan̄gi deqa jemainjrosaieqnu. Nan̄gi torei kumbra ugeq aiyejunub. Nan̄gi kumbra uge jigat yqajqa are tulan̄ prugn̄reqnu.

<sup>20-21</sup> E qalie, nin̄gi Kristus aqa anjam ojejunub deqa nin̄gi sawa bei bei qaji nan̄go kumbra uge di dauryosaieqnu. Nami anjam plalto tamo nan̄gi na Kristus aqa anjam mern̄geqnab nin̄gi quoqneb. Anjam di gisan̄ sai. Di Yesus aqa anjam bole. <sup>22</sup> Nin̄gi so namijq di sosib walweloqneb bati deqa so namij dena nin̄gi gisan̄geqnaqa nin̄gi kumbra uge uge yqajqa are prugn̄goqnej. Nun̄go kumbra dena nin̄gi padalqa gamq di brein̄goqnej. Deqa bini nin̄gi so namij di torei urat̄iy.

<sup>23</sup> Uratosib areqalo bunujq di soqniy. <sup>24</sup> Ningi so bunuj osib gara bul jigsib soqniy. Qotei na ningi a bul sqa marsiqa nungo so bunuj di gereiyetnjej. Ningi qalie, tamo nanngi so bunujq di unub qaji nanngo kumbra tulan bole tintinj branteqnu. Deqa nanngi Qotei aqa segi kumbra boleq di unub.

<sup>25</sup> Deqa ningi gisanj kumbra kalil uratekritisib anjam bole segi Kristen tamo ungasari nanngi minjroqniy. Ningi kalil Kristus aqa jejamu qujai unub deqa ningi kumbra degyoqniy. <sup>26</sup> Ningi minjinj oqimqa ariya ningi urur minjinj kobotiy. Ningi minjinj ti soqnib qoloaiq. Qoloqas di ningi olo une bei ato uge. <sup>27</sup> Ningi urur minjinj kobotqasai di ningi Satan gam waqtetibqa a na ningi olo uneq breingwas. <sup>28</sup> Ariya bajinj tamo nanngi olo bajinjaib. Nanngi nanngo segi ban na wauoqnsib dena inji inji oqnsib tamo ungasari inji qa truqueqnu qaji nanngi aqaryainjroqnebe. <sup>29</sup> Ningi nunngo medabu waqtoqnsib anjam uge maroqnaib. Ningi anjam bole segi maroqnsib dena tamo ungasari gulbe ti unub qaji nanngi singilatnjroqniy. Yimqa nanngi nunngo anjam quoqnsib dena Qotei a nanngi qa are boleiyosim kumbra bole enjroqnas. <sup>30</sup> Qotei na aqa toqor ningi engej deqa ningi aqa segi tamo ungasari unub. Toqor di agi aqa Mondor Bole. Dinjo batiamqa a nunngo uneq na ningi torei awainjwas. Deqa ningi na Mondor di are gulbe yaib. <sup>31</sup> Ningi are uge ti minjinj ti njirinj ti qoto ti misilinj anjam ti kumbra uge uge ti kalil torei uratij. <sup>32</sup> Osib ningi na nunngo Kristen was nanngi kumbra bole bole enjroqnsib nanngi qalaqalainjroqnsib nanngo une kobotetnjroqniy. Qotei a Kristus aqa nam na nunngo une kalil kobotetnjej deqa ningi na kamba olo nunngo Kristen was nanngo une dego kobotetnjroqniy.

## 5

### *Ningi suwanj qaji tamo ungasari sosib suwanjoq di laqniy*

<sup>1</sup> Qotei na ningi tulan qalaqalainjeqnu. Ningi aqa segi angro tintinj unub deqa kumbra a segi yeqnu qaji di ningi dego dauryosib yoqniy. <sup>2</sup> Kristus na iga tulan qalaqalaigosiq aqa segi nambile uratosiq iga qa moiyej. Dego kere ningi qalaqalaiyo kumbra dauryosib walweloqniy. Atra tamo nanngi atraiyo inji inji sabanj quleq ti bolequja di oqnsib Qotei atraiyeqnu dego kere Kristus na aqa segi nambile Qotei atraiyosiq moinaqa Qotei a deqa tulan areboleboleiyej.

<sup>3</sup> Ningi sambala kumbra yaib. Ningi kumbra jigat dego yaib. Ningi tamo qudei nanngo inji inji qa mamaulngaiq. Nunngo ambleq di kumbra uge deqaji saiq. Iga Qotei aqa segi tamo ungasari unum deqa iga kumbra kalil deqaji dauryosib. <sup>4</sup> Anjam jiga ti nanari anjam ti alanj anjam ti di

dego ningi maroqnaib. Iga anjam deqaji marqom di kumbra bolesai. Deqa ningi anjam bei marqa oqnsib anjam bole segi maroqnsib Qotei binjiyoqniy. <sup>5</sup> Ningi endegsib qalieoiy. Tamo bei a sambala kumbra ti kumbra jiga ti mamaul kumbra ti dauryqas di Kristus aqa Abu Qotei wo nanqi aiyel na a taqatqasai. Osib aqa Mandor Kokba sqasai dego. Mamaul kumbra di gisan qotei qa louo bul.

<sup>6</sup> O ijo was, tamo qudei na ningi kumbra uge deqaji yqa-jqa titngoqnsib anjam laña laña merngoqnbqa ningi nanqo anjam di qusib dauryaib. Tamo ungasari Qotei aqa anjam gotranjeqñub qaji nanqi kumbra uge deqaji yeqñub deqa Qotei a nanqi qa tulan minjin oqeteqnu. <sup>7</sup> Deqa ningi tamo ungasari deqaji nanqi ti beteroqnaib. <sup>8</sup> Ningi nami ambruq di soqneb. Ariya bini Tamo Koba a na ningi elenosiq aqa suwanjoq di atej unub. Deqa ningi suwan qaji tamo ungasari sosib suwanjoq di laqniy. <sup>9</sup> Suwan a na kumbra endeqaji babteqnu. Tamo ungasari suwanjoq di unub qaji nanqi kumbra bole bole yeqñub. Nanqi kumbra tintin dauryeqñub. Nanqi anjam bole mareqñub. <sup>10</sup> O ijo was, kumbra kalil Tamo Koba a tulan areareteqnu qaji di ningi geregere qalieqa osib dauryoqniy. <sup>11</sup> Osib tamo ungasari ambruq di sosib kumbra uge uge yeqñub qaji nanqi ti beteroqnaib. Nanqi kumbra deqaji yeqñub deqa nanqi kumbra bole bei babtosaieqñub. Deqa ningi na tamo ungasari nanqi di endegsib minjroqniy, “Nunqo kumbra di uge.” <sup>12</sup> Tamo ungasari ambruq di unub qaji nanqi ulioqnsib kumbra yeqñub. Di kiyayaqa? Nanqo kumbra di tulan ugedamu. Deqa iga nanqo kumbra uge qa yala marqasai bole sai. Marqom di iga jemaigwas. <sup>13</sup> Ariya suwan a na kumbra kalil boleq ateqnu. <sup>14</sup> Suwan a kumbra bei boleq atqas di a suwanjobulqas. Agi anjam bei endegsi unu, “O tamo neiejunum qaji ni olo subq na tigel.

Yim Kristus na ni suwan emqas.”

<sup>15</sup> Deqa ijo was, ningi nunqo segi segi walwel geregere taqatosib soqniy. Ningi nanari tamo bulosib walwelaib. Ningi powo ti sosib walweloqniy. <sup>16</sup> Bini bati uge. Deqa ningi bati laña ñanquiyai. Bati soqnim ningi Qotei aqa kumbra yoqniy. <sup>17</sup> Ningi nanari kumbra yoqnaib. Ningi Tamo Koba aqa areqalo geregere qalieosib dauryoqniy.

<sup>18</sup> Ningi ya uge uyoqnsib nanarioqnaib. Kumbra dena ningi ugeugeingwas. Deqa ningi Qotei aqa Mondor aqa kumbra dauryoqnbqa a na ningi taqatngesqas. <sup>19</sup> Ningi nunqo Kristen was nanqi ti koba na anjam maroqnsibqa bati deqa ningi Qotei qa louoqniy. Lou qudei nengrenq di unu qaji dena ti lou qudei Qotei aqa Mondor na nunqo are miligiq di tigelteqnu qaji dena ti ningi Qotei qa louoqniy. Osib nunqo medabu na ti

nunġo are miligi na ti Tamo Koba a qa louoqniy. <sup>20</sup> Kumbra kiye nunġoq di brantoqnim, unġum, ninġi bati gaigai gago Tamo Koba Yesus Kristus aqa ñam na Qotei binjiyoqniy.

*Pol a tamo unġa wo nanġi anjam minjrej*

<sup>21</sup> Kristus a nunġo Tamo Koba unu deqa ninġi a qa ulaoqn-sibqa Qotei aqa tamo unġasari kalil nanġo sorgomq di soqniy.

<sup>22</sup> O unġasari, ninġi Tamo Koba aqa sorgomq di unub deqa ninġi nunġo gumbulun nanġo sorgomq di dego soqniy.

<sup>23</sup> Kristus a gago gate koba unu dego kere nunġo gumbulun nanġi nunġo gate unub. Iga kalil Kristus aqa jejamu qujai unum. A na iga elenej. <sup>24</sup> O unġasari, Qotei aqa tamo unġasari nanġi Kristus aqa sorgomq di unub dego kere ninġi bati gaigai nunġo gumbulun nanġo sorgomq di soqniy.

<sup>25</sup> O tamo, ninġi na nunġo nġaun nanġi tulan qalaqalainjroqniy. Agi Kristus na aqa segi tamo unġasari nanġi tulan qalaqalainjrsiq aqa segi nġabile uratosiq nanġi qa moiyej dego kere. <sup>26</sup> Kristus a ya na ti aqa segi anjam na ti nanġi yansnjrej deqa nanġi Qotei aqa kumbra boleq di unub.

<sup>27</sup> Kristus a nanġi qa moiyej. Di kiyaaqa? A na nanġi aqa segi qa marsim nanġi Qotei aqa kumbra boleq di atim nanġi tulan boledamu une saiġoji sqajqa deqa. <sup>28</sup> Deqa tamo, ninġi nunġo nġaun nanġi dego tulan qalaqalainjroqniy. Agi ninġi nunġo segi jejamu qalaqalaiyeqñub dego kere. Tamo nanġi nanġo nġaun nanġi qalaqalainjrqab di nanġi nanġo segi jejamu dego qalaqalaiyqab. <sup>29</sup> Iga qalie, tamo nanġi nanġo segi jejamu jeutosaieqñub. Nanġi nanġo jejamu geregereiyoqnsib inġi bole bole anaiyeqñub. Kristus na aqa segi tamo unġasari nanġi geregereinjreqnu dego kere. <sup>30</sup> Iga kalil Kristus aqa jejamu qujai unum. Iga segi segi aqa sinġa ti ban ti unum.

<sup>31</sup> Agi Qotei aqa anjam bei nami endegsib nenġrenjyeb unu, “Tamo bei na aqa ai abu nanġi uratnjrsimqa aqa segi nġaun wo beterosib jejamu qujaitosib sqab.” <sup>32</sup> Qotei aqa uli anjam di tulan kobaquja. E na Kristus a ti aqa segi tamo unġasari nanġi ti sigitnjrsim agi ninġi mernġonum. <sup>33</sup> O tamo, Qotei a ninġi qa osiq anjam di marej. Deqa ninġi na nunġo nġaun nanġi qalaqalainjroqniy. Ninġi nunġo segi jejamu qalaqalaiyeqñub dego kere. Ariya unġasari, ninġi kamba dego nunġo gumbulun nanġo sorgomq di sosibqa nanġi kumbra bole enjroqniy.

## 6

*Pol a anġro nanġi ti nanġo ai abu nanġi ti anjam minjrej*

<sup>1</sup> O anġro, ninġi na Tamo Koba a beteryejunub deqa ninġi nunġo ai abu nanġo anjam dauryoqniy. Ninġi kumbra deġyqab di bolequja. <sup>2-3</sup> Agi Qotei a dal anjam endegsi marej, “Ni



ino ai abu nanjo sorgomq di sosim nanjo anjam dauryoqne.” Osiqa olo anjam endegsi totoryej, “Ni degyqam di ni bole sosim mandamq endi so kobaiyqam.” Qotei a anjam degsi totoryej. A nami dal anjam bei marqa osiqa anjam degsi totoryosaioqnej.

<sup>4</sup> O abu, ningi na nunjo angro nanjo areqalo ugetetnjraib. Nanji minjin oqetnjro uge. Ningi Tamo Koba aqa njamgalaq di nanji dalnjroqnsib tingitnjroqniy.

*Pol a kanjal tamo nanjo wau qa gate nanji ti anjam minjrej*

<sup>5-6</sup> O kanjal tamo ningi quiy. Ningi nunjo wau qa gate nanjo sorgomq di sosibqa nanji qa ulaoqniy. Ningi Kristus qa wau bole yeqnub dego kere ningi gaigai nunjo wau qa gate nanji qa wau bole yoqniy. Ningi gisan na nanjo njamgalaq di lanja wau bole yobulaib. Ningi Kristus aqa kanjal tamo dego unub. Deqa ningi nunjo are miligiq na Qotei aqa areqalo dauryosib nunjo wau qa gate nanji qa wau bole yoqniy. <sup>7</sup> Ningi mandam tamo nanji segi wauetnjrosaieqnub. Ningi Tamo Koba a dego waueteqnub. Ningi deqa are qaloqnsib are bole na nunjo wau qa gate nanji wauetnjroqniy. <sup>8</sup> Ningi are qaliy. Ningi wau bole yqab di Tamo Koba a na kamba awai boledamu enjwas. Ningi kanjal tamo unub kiyi ningi kanjal tamo sai kiyi di unqum. Ningi wau bole yoqniy.

<sup>9</sup> Ariya wau qa gate, ningi dego nunjo kanjal tamo nanji kumbra bole enjroqniy. Ningi nanji ula enjroqnaib. Tamo Koba a lanj goge di unu. A nunjo Tamo Koba unu. A kanjal tamo nanjo Tamo Koba dego unu. Aqa njamgalaq di tamo ungasari kalil nanji kerekere unub deqa a kumbra qujai na nanji peginjreqnu. Ningi deqa are qaloqnsib nunjo kanjal tamo nanji kumbra bole enjroqniy.

*Ningi qoto tamo bulosib qoto qa ingi ingi jigelenoyi*

<sup>10</sup> Ariya e ijo anjam getentqai. Ningi Tamo Koba a beterye-junub deqa ningi aqa singila kobaquja osib singila na tigelesoqniy. <sup>11</sup> Osib qoto qa ingi ingi Qotei na ningi engeqnu qaji di jigelenosib singila na tigelosib Satan aqa gisan anjam ti aqa uli kumbra ti gotranjoqnsib qotoqniy. <sup>12</sup> Ningi geregere are qaliy. Iga mandam tamo ungasari nanji ti qotosaieqnum. Iga lanj goge qaji singila ti Satan aqa mondor uge uge nanji ti aqa gate kokba nanji ti qoteqnum. Nanji kalil ambru qa bati endeqa mandam taqatoqnsib unub. <sup>13</sup> Deqa bati uge endi ningi qoto qa ingi ingi Qotei na engeqnu qaji di elenosib singila na tigelosib qotoqniy. Yim bunuqna qoto koboamqa ningi singila na tigelesqab.

<sup>14</sup> Deqa ningi singila na tigelesqa marsibqa anjam bole alalag bul di tigsib tigeloiy. Osib kumbra bole tintin gara

jugo bul jigsib dena nungo are targa kabutiy. <sup>15</sup> Qotei na jeu kobotej deqa iga a ti are qujaitosim unum. Anjam bole di ningi singa tatal bul jigsib mare mare laqniy. <sup>16</sup> Ningi qoto qa inji inji kalil di jigekritosib ariya Yesus qa dego nungo areqalo singilatosib soqniy. Nungo areqalo di dumu bul osib tigeloiy. Yimqa tamo uge Satan na qaja ti nhamyuwo ti ningi qa waiyoqnimqa nungo dumu dena ningi na qaja ti nhamyuwo ti di gotranjoqniqab. <sup>17</sup> Qotei na ningi elenej aqa kumbra di ningi gate tatal bul jigsib soqniy. Sosib Mondor aqa sebru dego ojsib dena qotoqniy. Sebru di Qotei aqa anjam. <sup>18</sup> Ningi Mondor aqa singila na gaigai Qotei pailyoqniy. Ningi aqarataib. Ningi Qotei na aqaryaingwa maroqnsib pailyoqniy. Ningi pailyoqniy urato uge deqa ningi geregere nham atoqnsib soqniy. Sosib Qotei aqa segi tamo ungasari kalil nanngi qa pailyoqniy. <sup>19</sup> Osib e qa dego endegsib pailyoqniy, "O Abu, ni na Pol aqa medabu singilatetimqa a ulaqasai. A ino anjam bole nami uliesoqnej qaji di ubtoqnsim tamo ungasari nanngi minjroqniqas." <sup>20</sup> O ijo was kalil, Qotei na e qarinqbonaqa e aqa anjam bole di mare mare laqnem deqa jeu tamo nanngi na e tonto talq endi waibeb unum. E anjam bole di marqajqa wau ti. Deqa ningi e qa Qotei pailyoqniy na e singilatboqniy e ulaqasai. E aqa anjam di singila na tamo ungasari nanngi minjroqniqai.

### *Anjam getento*

<sup>21</sup> Ariya Tikikus a nungoq bjo deqa a na ijo wau kalil qa ningi saingwas. Tikikus a gago Kristen was bole. A Tamo Koba aqa wau tamo bole. <sup>22</sup> E na a qarinyonum nungoq bjo. Iga kiyersim unum di a na ningi merngwas. Osim nungo are singilatetngwas.

<sup>23</sup> O Kristen was kalil, Tamo Koba Yesus Kristus aqa Abu Qotei wo nanngi aiyel na nungo are latetngebe. Osib ningi aqaryaingibqa ningi nanngi aiyel qa nungo areqalo singilatoqnsib qalaqalaiyo kumbra dauryoqniy. <sup>24</sup> Tamo ungasari kalil gago Tamo Koba Yesus Kristus qalaqalaiyqajqa uratosaeqniqab qaji nanngi qa Qotei a are boleiyeme. Bole.

## FILIPAI

<sup>1</sup> E Pol. Aqo Timoti wo Kristus Yesus aqa wau tamo unum. Aqo aiyel na anjam endi nengrenyonum. Nengrenyosim ningi Kristus Yesus aqa segi tamo ungasari Filipai qureq di unub qaji nungoq qarinyonum. Nungo Kristen gate nanngi ti nungo wau tamo nanngi qa ti dego anjam endi qarinyonum. <sup>2</sup> Gago Abu Qotei wo Tamo Koba Yesus Kristus wo nanngi aiyel ningi qa are boleinjrimqa ningi lawo na soqniy.

### *Pol a Filipai Kristen nanngi qa Qotei pailyeqnu*

<sup>3</sup> E bati gaigai ningi qa are qaloqnsim deqa e ijo Qotei binিয়েqnum. <sup>4</sup> Osim gaigai arebolebole na ningi kalil qa pailyeqnum. <sup>5</sup> Ningi nami iga betergosib Yesus aqa anjam bole mare mare laqneb. Agi bini ningi degyeqnub. Deqa e ningi qa tulan areboleboleibeqnu. <sup>6</sup> E endegsi qalieonum, Qotei a nungo are miligiq di wau boledamu yeqnu. A nami wau di utru atej. Ariya bini a wau di yeqnu dena gilsim gilsim mondonj Kristus Yesus olo bqajqa batiamqa a na wau di kobotqas. <sup>7</sup> Ningi ijo are miligiq di unub deqa e kere ningi qa are qaleqnum. E tonto talq endi sqai kiyo e walwelosiy Yesus aqa anjam bole singilatoqnsiy mare mare laqnqai kiyo di unqum. Qotei a e qa are boleyosiq wau ebej deqa ningi kalil e beterbosib e ti koba na Qotei aqa wau ojeqnum. <sup>8</sup> Kristus Yesus a na iga tulan qalaqalaieqnu. Aqa kumbra dena ijo are tigeltetbej deqa e ningi kalil olo nungwajqa are koba unu. Di Qotei a segi qalie.

<sup>9</sup> E bati gaigai ningi qa endegsi Qotei pailyeqnum, “O Abu, ni na Filipai Kristen nanngi aqaryainjrimqa nanngi qalaqalaiyo kumbra nanngo are miligiq di tulan singilatosib dauryqab. Osib powo koba ti areqalo bole ti sqab.” <sup>10</sup> O ijo was, ningi kumbra kalil geregere tenemtosis kumbra bole segi yoqniy. Ningi degyqab di mondonj Kristus a olo bosim tamo ungasari nanngi peginjrqqa batiamqa ningi une saiqoji sqab. <sup>11</sup> Kumbra bole kalil Yesus Kristus a segi na babteqnu qaji di nungoq di tulan kobaoqnmqa Qotei aqa ñam goge oqoqnqas. Utru deqa e ningi qa Qotei pailyeqnum.

### *Pol a tonto talq di unu*

<sup>12</sup> O ijo was, ningi endegsib qalieoiy, jeu tamo nanngi na e tonto talq endi waibeb unum. Ariya nanngi Yesus aqa anjam bole getentosai. Anjam bole di olo tulanj singilaeqnu. <sup>13</sup> Tamo kalil nanngi qalie, e Kristus Yesus aqa wau ojoqnm deqa jeu tamo nanngi na e tonto talq endi waibeb unum. Tonto talqato tamo nanngi dego qalie. <sup>14</sup> E tonto talq endi unum deqa

Kristen was gargekoba nanġi Tamo Koba a qa nanġo areqalo siġilatoqnsib aqa anjam palontqajqa ulaosaieqñub.

15-17 Bole, tamo qudei na ijo ñam tentib aguq aiqajqa deqa are qaloqnsib nanġo are uge na Kristus aqa anjam mare mare laqñub. Nanġi nanġo segi ñam soqtqajqa are qaloqnsib Kristus aqa anjam mare mare laqñub. Nanġi tamo aqaryainjrqaajqa deqa are qalosaieqñub. E tonto talq endi soqñit nanġi ijo are ugetetbqajqa deqa are qaloqnsib Kristus aqa anjam mare mare laqñub. Ariya tamo qudei nanġi are bole na Kristus aqa anjam mare mare laqñub. Tamo di nanġi qalie, e Yesus aqa anjam bole siġilatqajqa waueqnamqa jeu tamo nanġi na e tonto talq endi waibeb unum. Deqa nanġi e tulañ qalaqalaiboqnsib Kristus aqa anjam mare mare laqñub. 18 Deqa unġum. Tamo nanġi are bole na Kristus aqa anjam mare mare laqñub kiyo tamo nanġi are uge na Kristus aqa anjam mare mare laqñub kiyo di kere. Nanġi kalil koba na Kristus aqa anjam mare mare laqñub deqa e tulañ areboleboleibeqñu.

*Pol a are qalej, “E mandamq endi sosiy Filipai Kristen nanġi aqaryainjroqñai”*

19 Deqa ijo was, e tulañ areboleboleibim sqai. Di kiyaaqa? E qalieonum, Qotei a nunġo pailyo na ti Yesus Kristus aqa Mondor na ti e aqaryaibosim tonto talq endena oqeq atim e bole sqai. 20 Deqa ijo are koba endegsi unu. Wau kalil Qotei na ebej qaji di e geregere ojoqñqai. Yim deqa e jemaibqasai. Bini bati endeqa ti bunuq qa ti e siġila na tigelqnsiy ijo jejamu Kristus torei yekritosiy aqa ñam soqtoqñqai. Agi e kumbra degyeqnum. Deqa e moiqai kiyo e sqai kiyo di unġum. E ijo kumbra kalil qa Kristus aqa ñam soqtoqñqai. 21 Ijo are koba endegsi unu. E sqai di e Kristus ombla sqai. Ariya e moiqai di e olo inġi tulañ boledamu oqai. 22 E mandamq endi sosiyqa e tamo unġasari gargekoba nanġi aqaryainjroqñqai. E gam kiye dauryqai di e qaliesai. 23 E areqalo aiyeltejunum. Ijo areqalo bei agiende. E lañ qureq oqsiy Kristus ombla sqai. E degyqai di tulañ bolequja. 24 Ariya e mandamq endi sosiy niġi aqaryaingoqñqai di dego bolequja. 25 Deqa e are qalonum, e mandamq endi sqai. E qalieonum, e urur moiqasai. E mati sosiy niġi koba na Yesus aqa wau ojoqñqai. Yim wau dena niġi Yesus qa nunġo areqalo geregere siġilatoqnsib areboleboleinġim sqab. 26 Deqa ijo was niġi quiy. E olo nunġoq bosiy niġitqa bati deqa niġi e qa tulañ areboleboleinġim Kristus Yesus aqa ñam soqtoqnsib sqab.

*Niġi Kristus aqa ñam qa jaqatinj oqñqab*

27 Ijo anjam kobaquja bei agiende. Niŋgi Kristus aqa anjam bole geregere dauryoqniy. Niŋgi degyqab di e anjam endegsi quqwai, “Bole, Filipai Kristen naŋgi are qujaitoqnsib waukobaeqnu. Di kiyaaqa? Tamo ungasari naŋgi Yesus aqa anjam bole naŋgo areqaloq di siŋgilatqajqa deqa.” O ijo was, e olo nuŋgoq bosiy nuŋgwai kiyo e tonto talq endi sqai kiyo di unqum. 28 E qalieqai, niŋgi nuŋgo jeu tamo naŋgi qa ulao-saieqnu. Nuŋgo kumbra dena jeu tamo naŋgo are qamet-njreqnaqa naŋgi endegsi poinjreqnu, “Bole, iga padalqom.” Ariya ijo was, niŋgi padalqasai. Qotei na niŋgi elenam niŋgi so bole gaigai sqab. 29 Niŋgi quiy. Qotei na niŋgi giltŋgej. Di kiyaaqa? Niŋgi Kristus qa nuŋgo areqalo siŋgilatqajqa deqa. Deqa segi sai. Niŋgi aqa ñam qa jaqatiŋ oqajqa deqa ti niŋgi giltŋgej. 30 Nami e jeu tamo naŋgi ti Qotei aqa anjam na qoteqnam niŋgi e nuboqneb. Agi bini e jeu tamo naŋgi ti qoteqnam niŋgi deqa queqnu. Niŋgi dego e beterbosib jeu tamo naŋgi ti qoteqnum. Dena niŋgi jaqatiŋ eqnu.

## 2

*Niŋgi kalil are qujaitosib qalaqalaiyo kumbra dauryiy*

1 O ijo was, Kristus a gaigai nuŋgo are siŋgilatetŋgoqnsiqa niŋgi qalaqalaiŋgoqnsiqa nuŋgo are latetŋgeqnu. Qotei aqa Mondor a nuŋgoq di beterejunu. Niŋgi nuŋgo Kristen was naŋgi qa are boleŋgeqnaqa naŋgi qa duleqnu. 2 E deqa niŋgi qa areboleboleibeqnu. Ariya niŋgi olo kumbra qudeji dego yoqniqna dena e tulaŋ areboleboleiboqnaqas. Kumbra agiende. Niŋgi kalil are qujaitosib qalaqalaiyo kumbra dauryosib soqniy. Sosib niŋgi areqalo qujai na Qotei aqa wau yoqniy. 3 Niŋgi nuŋgo segi jexamu qa are qalaib. Niŋgi nuŋgo segi ñam soqtoqnaib. Niŋgi nuŋgo segi ñam aguq atoqnsib olo nuŋgo Kristen was naŋgo ñam soqtetnjroqniy. 4 Niŋgi nuŋgo segi iŋgi iŋgi qa are qaloqnsib gereiyonaib. Niŋgi nuŋgo Kristen was naŋgi qa are qaloqnsib naŋgo iŋgi iŋgi dego gereiyetnjroqniy.

*Yesus a aqa segi ñam aguq atej deqa*

*Qotei na a olo ñam kobaquja yej*

5 Niŋgi Kristus Yesus aqa areqalo ojsib dauryoqniy. 6 Yesus a segi Qotei sosiqa ariya a deqa are qalosaioqnej. 7 A aqa ñam kobaquja di ojqa uratosiqa a tamo bulyosiqa a kanjal tamo laŋaj bul soqnej. 8 Deqa tamo kalil naŋgi a unoqneb di a mandam tamo soqnej. Sosiqa aqa segi ñam aguq atsiqa Qotei aqa anjam dauryosiq moiyej. Od, a ŋamburbasq di moiyej. 9 Onaqa Qotei na a laŋ qureq osi oqsiqa ñam kobaquja yej. Deqa bini aqa ñam dena ñam kalil tulaŋ buŋnjrejunu. 10 Qotei na ñam di Yesus yej deqa mondon laŋ aŋgro kalil naŋgi ti

tamo kalil nan̄gi ti Yesus aqa areq di singa pulutqab. Od, in̄gi in̄gi kalil lan̄ ti mandam ti mandam sorgom ti dia unub qaji nan̄gi Yesus aqa areq di singa pulutqab. <sup>11</sup> Osib nan̄go medabu qujaitoqnsib maroqnqab, “Yesus Kristus a segi Tamo Koba.” Yim kumbra dena Abu Qotei aqa ñam tulan̄ goge oqoqnqas.

*Nin̄gi suwan̄ qa kumbra tamo un̄gasari nan̄gi osorn̄jroqniy*

<sup>12</sup> O ijo was bole, e qalieonum, nin̄gi gaigai ijo anjam dauryeqnub. Ariya nin̄gi olo singila na dauryoqniy. E nin̄gi koba na sqai bati deqa segi sai. Bini e isaq endi soqnit nin̄gi ijo anjam dauryqa urataib. Nin̄gi ijo anjam olo singila na dauryoqniy. Qotei a nin̄gi padalo sawaq na elenej deqa nin̄gi ulaoqnsib lan̄ qureq oqwajqa singilaoqniy. <sup>13</sup> E qalieonum, Qotei a nun̄go are miligiq di waueqnu deqa nin̄gi kumbra a tulan̄ areareteqnu qaji di yeqnub. Nin̄gi kumbra di yqajqa are koba sonaqa agi yeqnub.

<sup>14</sup> Ariya nin̄gi ñirin̄oqnsib anjam na qotoqnaib. Kumbra kalil nin̄gi yeqnub qaji di nin̄gi lawo na yoqniy. <sup>15-16</sup> Nin̄gi degyqab di nin̄gi Qotei aqa an̄gro tintin̄ une saiqoji sqab. Sosib nin̄gi ñambile gaigai sqajqa anjam ojoqnsib mandam qaji tamo un̄gasari nan̄go ambleq di laqnsib suwan̄ qa kumbra nan̄gi osorn̄jroqnqab. Tamo un̄gasari nan̄gi di kumbra bole dauryqa uratoqnsib kumbra uge uge yeqnub. Deqa mondoñ Kristus a olo bosim nan̄go une deqa nan̄gi peginjr̄qas. Yim bati deqa e nun̄go kumbra bole kalil qa tulan̄ areboleboleibqas. Areboleboleibim qalieqai, wau kalil e nun̄go ambleq di yoqnem qaji di e lan̄a yosaiqnem.

<sup>17</sup> O ijo was, nun̄go areqalo Yesus qa singilateqnu qaji di Qotei atraiyo in̄gi bul. Jeu tamo nan̄gi na e lubib moiqai kiyo? Moisiy nun̄go areqalo de ti ijo len̄ wain bul aiqas qaji de ti turtosiy Qotei atraiyobulqai. E moiqai di un̄gum. Bini e nin̄gi ti koba na areboleboleigwas. <sup>18</sup> Nin̄gi dego e ti koba na areboleboleigwas.

*Pol na Timoti qarinyim a Filipai Kristen nan̄goq gilqa marej*

<sup>19</sup> Tamo Koba Yesus na e odbimqa sokiñala e Timoti qarinyit a nun̄goq gilqas. Gilsim olo puluosim ijoq bosim nun̄go kumbra kalil qa e saibqas. Yim e qusiy are singilatqai. <sup>20</sup> Timoti a gaigai nin̄gi qa are qaloqnsiq deqa a na nin̄gi aqaryain̄gwajqa gam ñameqnu. Tamo deqaji bei endi sosai. Aqo Timoti wo segi nin̄gi qa are qaleqnum. <sup>21</sup> Tamo kalil nan̄gi nan̄go segi jejamu qa are koba qaleqnu. Nan̄gi Yesus Kristus aqa wau qa are qalosaieqnu. <sup>22</sup> Timoti aqa kumbra tulan̄ boledamu di nin̄gi qalie. A na e wauetboqnsiqqa Yesus aqa anjam bole mare mare laqnu. An̄gro nan̄gi na nan̄go abu nan̄gi wauetn̄jreqnu dego kere Timoti na e wauetbeqnu. <sup>23</sup> Deqa e kiñala

tariņosiy kumbra kiye jeu tamo nanġi na e ebqab di qalieosiy Timoti qarinyit a nuņgoq boqujatosim saingwas. <sup>24</sup> E endegsi qalieonum, Tamo Koba a na e gam waqtetbinqa sokiñala e segi dego nuņgoq bosiy nuņgwai.

*Pol a Epafroditus qarinyqa marej*

<sup>25</sup> E endegsi are qalonum, e Epafroditus dego qarinyit a nuņgoq gilqas. A gago Kristen was bole. A e ombla wau qujai. Aqo ombla qatqarosim jeu tamo nanġi ti qoteqnum. Niņġi nami a qarinyonab ijoq bosiq a qaryaiboqnej. <sup>26</sup> Bini a niņġi nuņgwajqa are koba unu. A qalie, a qure endia maiyonaqa niņġi deqa qusibqa a qa are gulbeinġej. <sup>27</sup> A makobaiyonaq moiqa jojomonaqa Qotei na a boletosiqa a qa dulej. A qa segi dulosai. Qotei a e qa dego dulej. Di kiyaaqa? E are tulaņ gulbekobaibaim deqa. <sup>28</sup> Deqa ijo was, e arebolebole na Epafroditus olo qarinyonum nuņgoq gilqo. Di kiyaaqa? Niņġi a unsib tulaņ areboleboleinġwajqa deqa. Yim e olo niņġi qa are koba qalqasai. <sup>29</sup> Deqa Epafroditus a nuņgoq bamqa niņġi a qa tulaņ areboleboleinġim Tamo Koba aqa ñam na gereiyoniy. Niņġi na tamo bole deqaji kalil naņgo ñam gaigai soqtetnjqoniy. <sup>30</sup> Epafroditus a aqa segi jejamu bole sqajqa deqa are qalosaieqnu. A Kristus aqa wau ojoqnsiq deqa a moiqa jojomej. Bati deqa niņġi na e aqaryaibqa keresai deqa niņġi Epafroditus qarinyonab ijoq bosiq a kamba e aqaryaiboqnej.

### 3

*Tamo a Kristus qa aqa areqalo siņġilatqas di a tamo bole sqas*

<sup>1</sup> Ariya ijo was kalil, e ijo anjam getentqai. E anjam qujai bei unu. Anjam agiende. Niņġi Tamo Koba a qa tulaņ areboleboleinġim soqniy. E anjam di olo nenġrenjya asgibosaieqnu. E are qalonum, anjam dena niņġi aqaryainġwas.

<sup>2</sup> Niņġi geregere ñam atoqniy. Tamo qudei nanġi baun juwan bul sosib kumbra uge uge yeqnub. Tamo deqaji nanġi muluņ aiqajqa tulaņ siņġilaeqnub. Naņgo muluņ di bolesai. Di gisaņ muluņ. <sup>3</sup> Ariya iga tamo deqaji sai. Iga muluņ bole aiyo qaji. Iga Qotei aqa Mondor aqa siņġila na Qotei qa louoqnsimqa Kristus Yesus aqa ñam soqtetqnum. Iga qalie, jejamu qa kumbra na iga aqaryaigwa keresai bole sai. <sup>4</sup> E nami jejamu qa kumbra dauryqajqa tulaņ siņġilaoqnem. Tamo qudei nanġi mareqnub, “Gago jejamu qa kumbra na iga aqaryaigwa kere.” O ijo was, e tamo nanġi di tulaņ buņnjrejunum. <sup>5</sup> Ijo jejamu qa kumbra agiende. E ñambabonamqa bati 8 onaqa ijo ai abu nanġi na e osib muluņ waibeb. E Israel tamo. Ijo moma utru Benjamin. E Hibru anjam qalie bole. E dal anjam siņġila na dauryoqnem. Od, e Farisi naņgo kumbra na dal anjam

dauryoqnem. <sup>6</sup> E Qotei aqa wau ojqajqa tulan singilaoqnem deqa e na Kristen nanngi ugeugeinjroqnem. E dal anjam kalil dauryekritem deqa tamo kalil nanngi na e nubooqsib ijo une bei babtosaioqneb. <sup>7</sup> Deqa e are qaloqnem, “Ijo jejamu qa kumbra dena tamo kalil nanngo kumbra tulan bunyeqnu.” E degsi are qalsimqa ariya bunuqna e are bulyosim ijo jejamu qa kumbra kalil unem di kumbra bolesai. Degsi unsimqa e kumbra di uratosim olo Kristus aqa gam dauryoqnem. <sup>8</sup> Di segi sai. E mandam qa kumbra kalil dego uratekritem. Di kiyaaqa? E Kristus segi ojqajqa deqa. E ijo Tamo Koba Kristus Yesus qa bole qalieem. Kristus qa qalieqajqa kumbra di tulan bolequja e degsi unem. E poibej, mandam qa kumbra kalil di qalam jiri bul. Deqa bini e Kristus segi ojqajqa are koba unu. <sup>9</sup> E a segi beteryejunum. E dal anjam dauryqai gam dena e Qotei aqa nangalaq di tamo bole sqa keresai. Deqa e gam bei na tamo bole une saiqoji unum. Gam agiende. E Kristus qa ijo areqalo singilateqnum. Od, iga Kristus qa gago areqalo singilatqom gam dena qujai Qotei na iga mergwas, “Ninggi ijo nangalaq di tamo bole une saiqoji unub.” <sup>10</sup> Deqa e Kristus qa qalieqajqa are koba unu. A subq na tigelosiq singila kobaquja ej. E singila deqa qalieqajqa are koba unu. A jaqatin osiq moiyej. Deqa e a beteryosiy a ombla jaqatin osiy moyobulqajqa are koba unu. <sup>11</sup> E qalieonum, mondon e olo subq na tigelqai.

*Pol a Yesus aqa kumbra dauryqajqa singila na waueqnu*

<sup>12</sup> E Kristus Yesus aqa kumbra di torei dauryekritosai unum. E gaigai kumbra di ojqajqa singila na waueqnum. Nami Yesus na e ojsiqa aqa segiq di atej deqa bini e kamba aqa kumbra ojqajqa singila na waueqnum. <sup>13</sup> O ijo was kalil, e Yesus aqa kumbra di torei ojekritosai unum. Ijo areqalo qujai agi merngwai. Jejamu qa kumbra kalil e nami dauryoqnem qaji di e uratekritisoy awai bole Qotei na mondon ebqas qaji di oqajqa singila na waueqnum. <sup>14</sup> Tamo nanngi gurguroqsib bubuneqnu di nanngi awai oqajqa. Dego kere e awai oqa maroqnsim singila na urureqnum. Awai agiende. Kristus Yesus aqa wau na Qotei na e metbimqa e lan qureq oqsiy dia a ombla so bole gaigai sqai.

<sup>15</sup> E areqalo bole ti sosim anjam endi nengrenyonum. Ninggi qudei Qotei aqa kumbra dauryqajqa singila ti unub deqa ningi dego areqalo bole ti soqniy. Ariya ningi qudei areqalo bei ejunub kiyo? Degam Qotei na nungo areqalo di olo gereiyetngwas. <sup>16</sup> Kumbra bole bole iga ojeqnum qaji di iga singila na ojesqom. Iga uratqasai.

<sup>17</sup> O ijo was, ningi kalil gaigai ijo kumbra dauryoqniy. Osib tamo ungasari ijo kumbra dauryeqnub qaji nanngi unjroqnsib



nanjo kumbra dego dauryoqniy. <sup>18</sup> Kristus a namburbasq di moiyej anjam di tamo gargekoba nanji na jeuteqñub. E nanji qa bati gargekoba niñgi sainjoqñem. Deqa bini e akam ti olo niñgi sainjeqñum. <sup>19</sup> Tamo nanji di nanjo segi jejamu qa kumbra qa are qaloqñsib dauryeqñub. Nanjo kumbra di nanji na gisanj qotei bul ateqñub. Nanji bati gaigai mandam qa inji inji oqajqa are tulanj prugnjqñu. Osib jemai kumbra yqajqa areboleboleinjreqñu. Deqa mondonj nanji namyuwoq di torei padalqab. <sup>20</sup> Ariya iga lanj qure qaji tamo ungasari unum deqa mondonj Tamo Koba Yesus Kristus a lanj qureq na mandamq aisim iga elenqas. Deqa bini iga a qa tariñoqñsim unum. <sup>21</sup> Yesus a singila koba ti unu deqa a na inji inji kalil elenqsim aqa segi sorgomq di atim sqas. Aqa singila dena a na gago jejamu bulyetgimqa gago jejamu di Yesus aqa jejamu bulosim so bole gaigai sqas. Gago jejamu di agi bini gulbe ti jaqatinj ti unu.

## 4

### *Ninji Tamo Koba Yesus qa areboleboleinjgoqñeme*

<sup>1</sup> Deqa ijo was bole, niñgi Tamo Koba a beteryosib singila na tigelesoqniy. Agi e nami niñgi degsi mernjem. E niñgi tulanj qalaqalainjeqñum deqa e niñgi qa are koba qaleqñum. Osim niñgi qa tulanj areboleboleibeqñu. Niñgi segi ijo awai bole bul. E awai di oqajqa waukobaeqñum.

<sup>2</sup> Ariya Yuodia Sintike wo, niñgi aiyel Tamo Koba a beterye-junub deqa niñgi aiyel ombla are qujaitosib geregere soqniy. <sup>3</sup> Tamo bei e ombla wauo qaji a dego Filipai di unu. E tamo di minjqai, “O was, ni na unja aiyel nanji di aqaryainjrime. Nanji aiyel unja bole. Nanji aiyel e ombla na Yesus aqa anjam mare mare laqñem. Tamo qudei nanji Klemen a ti dego e koba na wauoqñem. Nanjo ñam Qotei a nambile qa buk miligiq di nenjrenyej unub.”

<sup>4</sup> O ijo was, niñgi bati gaigai Tamo Koba a qa areboleboleinjgoqñeme. E olo mernjwai. Niñgi tulanj areboleboleinjgoqñeme.

<sup>5</sup> Niñgi lawo kumbra dauryoqñibqa tamo kalil nanji nunjo kumbra di unoqñqab. Sokiñala Tamo Koba a olo bqas. <sup>6</sup> Deqa niñgi inji bei qa areqalo kobaiyaib. Niñgi gaigai nunjo gulbe kalil qa Qotei pailyoqñsib a binjyoqñsib endegsib minjoqniy, “O Abu, ni na iga aqaryaigoqñe.” <sup>7</sup> Niñgi degyoqñibqa Qotei na niñgi are latetngwas. Osim a na nunjo are miligi ti nunjo areqalo ti taqatetngwas. Yimqa niñgi Kristus Yesus beteryosib are lawo sqab. Qotei aqa are lawo di tulanj bolequja. Are lawo di aqa utru iga geregere poigwa keresai.

<sup>8</sup> Ariya ijo was, e anjam qujai bei unu. Anjam agiende. Niŋgi kumbra bole ti kumbra tintiŋ ti kumbra jiga saiqoji deqa ti kumbra Qotei a tulaŋ areareteqnu qaji deqa ti are qaloqnsib soqniy. Kumbra kalil tamo naŋgi yeq nab iga un-oqnsim biŋiyeqnum qaji deqa ti are qaloqnsib soqniy. <sup>9</sup> Od, Qotei aqa anjam kalil e nami niŋgi merŋgeqnam quoqneb qaji di niŋgi dauryosib soqniy. Ijo kumbra kalil e nami nungo ambleq di yeqnam niŋgi unoqneb qaji di dego niŋgi dauryosib soqniy. Yimqa Qotei a niŋgi ti sqas. Agi Qotei a are lawo qa utru.

*Filipai Kristen naŋgi na Pol aqaryaiyeb deqa a naŋgi qa tulaŋ areboleboleiyej*

<sup>10</sup> O ijo was, niŋgi bini e olo aqaryaiqbajqa are qaleqnu deqa e Tamo Koba a qa tulaŋ areboleboleibeqnu. Bole, nami niŋgi e qa are qaloqneb ariya bati di niŋgi e aqaryaiqbqa gam saiqoji. <sup>11</sup> E iŋgi iŋgi qa truqueqnum e deqa are qalo-saieqnum. Niŋgi na e aqaryaiqbajqa e deqa are qalsim anjam endi merŋgosai. E are lawo sqajqa kumbra qalieonum deqa gulbe kiye ijoq di brantqas di uŋgum, e ulaqasai. <sup>12</sup> E iŋgi saiqoji sqai kiyo e iŋgi koba ti sqai kiyo di uŋgum, e are lawo sqai. E are lawo sqajqa kumbra qalieonum deqa e iŋgi kere sqas kiyo e mambqas kiyo e iŋgi koba ti sqai kiyo e iŋgi qa truquoqnqai kiyo di uŋgum, e are lawo sqai. Gulbe kiye ijoq di brantqas di uŋgum, e are lawo sqai. <sup>13</sup> Kristus a segi na e siŋgilatbeqnu deqa e kumbra kalil yqa kere.

<sup>14</sup> E gulbe ti sonamqa niŋgi e beterbosib silali qa aqaryai-boqneb di niŋgi keretoqneb. <sup>15</sup> O Filipai tamo uŋgasari, niŋgi qalie, e nami Yesus aqa anjam bole palontqajqa wau utru atsim Masedonia sawa uratosim walweleqnamqa niŋgi segi e qa are qaloqnsib silali qa aqaryai-boqneb. Kristen qudei naŋgi e silali qa aqaryai-bosaioqneb. <sup>16</sup> Agi e Tesalonaika qureq di sonamqa niŋgi e silali qa aqaryai-boqneb. <sup>17</sup> Niŋgi olo e silali ebqajqa e deqa are qalosaieqnum. Niŋgi kumbra bole dauryibqa Qotei na kamba niŋgi awai bole eŋgwajqa e deqa are qaleqnum. <sup>18</sup> E silali iŋgi iŋgi kere unu. E iŋgi bei qa truquosai. Di kiyaaqa? Niŋgi na silali Epafroditus yeb a na osi bosiq ebej. Niŋgi silali qa e aqaryai-beb deqa niŋgi Qotei atraiyobuleb. Atraiyo iŋgi di quleq bole ti. Qotei a atraiyo iŋgi deqa tulaŋ areboleboleiyeqnu. <sup>19</sup> Qotei a Kristus Yesus aqa ñam na iŋgi tulaŋ bole bole iga egoqnqas. Deqa niŋgi iŋgi bei qa truquoqnibqa a na engoqnimqa niŋgi tulaŋ kere na sqab. <sup>20</sup> Qotei a gago Abu. A segi Qotei bole. Deqa iga bati gaigai aqa ñam soqtoqnqom. Bole.

*Pol a Filipai Kristen naŋgi kaiyeinjej*

<sup>21</sup> Niŋgi Kristus Yesus aqa tamo uŋgasari unub. E na niŋgi kalil kaiyeiŋgonum. Kristen was e koba na endi unum qaji naŋgi na dego niŋgi kaiyeiŋgonub. <sup>22</sup> Qotei aqa tamo uŋgasari kalil naŋgi na niŋgi kaiyeiŋgonub. Kristen tamo uŋgasari Mandor Sisar aqa talq di waueqñub qaji naŋgi dego niŋgi kaiyeiŋgonub.

<sup>23</sup> Tamo Koba Yesus Kristus a niŋgi qa are boleiyosim nuŋgo qunuŋ geregere taqateme. Bole.

## KOLOSI

<sup>1</sup> E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej. <sup>2</sup> Aqo gago was Timoti wo anjam endi nengrenyosim nungoq qarınyonum. Nıngi gago Kristen was bole. Nıngi Qotei aqa segi tamo ungasari Kolosi qureq di unub qaji. Nıngi Kristus qa nungo areqalo singilateqnub. Gago Abu Qotei a nıngi qa are boleiyımqa nıngi lawo na soqniy.

*Kolosi Kristen nanđi Yesus qa nanđo areqalo singilateb*

<sup>3</sup> Aqo Timoti wo gaigai nıngi qa pailyoqnsımqa gago Tamo Koba Yesus Kristus aqa Abu Qotei bınyıyeqnum. <sup>4</sup> Aqo aiyel nıngi qa anjam bei endegsi quem. Nıngi Kristus Yesus qa nungo areqalo singilatoqnsıb Qotei aqa segi tamo ungasari kalil nanđi qalaqalainjreqnub. <sup>5-6</sup> Nami Yesus aqa anjam bole nungoq bonaqa nıngi queb. Qusıbqa bini inđi bole bole Qotei na lan goge dia gereiyetınđej qaji di nıngi oqa-jqa tarıneqnub. Yesus aqa anjam bole di sawa sawa kalilq gileqnaqa tamo ungasari gargekoba nanđi quoqnsıb nanđo areqaloq di singilatoqnsıb kumbra bole bole yeqnub. Nıngi dego kumbra bole bole yeqnub. Qotei a ıga qa are boleiyej anjam bole di nıngi qusıb poınđonaqa bati deqa nıngi kumbra bole yqajqa utru ateb. <sup>7</sup> Anjam di Epafras a nıngi mernđonaq qusıb poınđej. Epafras a ıga ti Kristus aqa wau tamo bole unum. Iga Epafras tulan qalaqalaiyeqnum. A singila na nıngi aqaryainđoqnsıqa Kristus aqa wau ojeqnu. <sup>8</sup> A nıngi qa endegsi ıga saıgej, “Qotei aqa Mondor na Kolosi Kristen nanđi singilatnıreqnaqa nanđi qalaqalaiyo kumbra dauryeqnub.”

*Pol a gaigai Kolosi Kristen nanđi qa Qotei pailyeqnu*

<sup>9</sup> Iga nami quem, nıngi kumbra bole di yeqnub. Bati deqa ıga nıngi qa pailyqa utru atem. Bini ıga gaigai nıngi qa pailyoqnsım unum. Iga endegsi pailyeqnum, “O Abu, ni na Kolosi Kristen nanđi aqaryainđrimqa nanđi ino areqalo geregere poınđrqas. Amqa ino Mondor na nanđi powo koba enđroqnimqa nanđi ino anjam kalil bole qalieoqnaqab. <sup>10</sup> Osıb nanđi kumbra kalil Tamo Koba a tulan areareteqnu qaji di yoqnsıb walweloqnaqab. O Qotei, ni na nanđi aqaryainđroqnimqa nanđi wau bole bole yoqnsıb ni qa geregere qalieoqnb nanđo qalie di tulan kobaoqnaqas. <sup>11</sup> Ni ino segi singila kobaquja na nanđi singilatnıroqnim nanđi gulbe kalil qoboıyoqnaqab. Osıb lawo na sosıb tulan areboleboleinđroqnaqas.” <sup>12</sup> O ıjo was, ıga degsım nıngi qa Abu pailyeqnum. Deqa nıngi a bınyıyoqnsıb soqniy. A na nıngi keretınđej deqa inđi bole bole a nami lan

goge dia gereiyetŋgej qaji di nŋingi mondonŋ oqsib oqab. Agi nŋingi ti Qotei aqa segi tamo unŋgasari kalil suwanŋoq di unub qaji nanŋi ti inŋgi di oqab. <sup>13</sup> Nami iga ambruq di soqnem. Ambru aqa singila dena iga taqatgesoqnej. Onaqa bunuqna Qotei na iga ambruq dena elenŋosiqa aqa segi Niri qujai tulanŋ qalaqalaiyeqnu qaji aqa sorgomŋ di iga atej unum. Deqa bini Yesus a gago Mandor Koba sosisq iga taqatgeqnu. <sup>14</sup> A na iga awaigosiqa gago une kobotetgej.

*Pol a Yesus aqa kumbra ti wau ti deqa anjam saej*

<sup>15</sup> Yesus a segi Qotei. Gago ŋamdamu na iga Qotei unqa keresai. Inŋgi inŋgi kalil Qotei na gereinjrej qaji di Yesus a segi utru. <sup>16</sup> Yesus aqa wau na Qotei na inŋgi inŋgi kalil lanŋ ti mandam ti di unub qaji di gereinjrej. Inŋgi inŋgi kalil gago ŋamdamu na uneqnum qaji ti gago ŋamdamu na unqa keresai qaji ti di Yesus aqa wau na Qotei na gereinjrej. Lanŋ goge qaji singila ti lanŋ anŋgro nanŋi ti mandor kokba ti mondor nanŋi ti kalil di Yesus aqa wau na Qotei na gereinjrej unub. Inŋgi inŋgi kalil di Yesus a segi utru. Di aqa segi inŋgi inŋgi. <sup>17</sup> Tulanŋ nami inŋgi inŋgi kalil di brantosaisonaqa Yesus a soqnej. A na inŋgi inŋgi kalil di geregere taqateqnu deqa inŋgi inŋgi kalil degsi bole unub. <sup>18</sup> Yesus a Kristen tamo unŋgasari nanŋo gate. Nanŋi aqa jejamu bul. A nanŋo ŋambile qa utru. A tamo kalil nanŋi qa namoosiq subq na tigelej deqa a segi qujai inŋgi inŋgi kalil nanŋo gate. <sup>19</sup> Qotei aqa are koba endegsi unu. Aqa segi ŋambile ti kumbra ti kalil aqa Niri Yesus aqaq di soqnim Qotei a segi Yesus aqaq di keretosim maqesqas. <sup>20</sup> Osim a Yesus aqa wau na inŋgi inŋgi kalil mandam ti lanŋ ti di unub qaji nanŋi tingitnjrimqa nanŋi a ombla geregere lawo na sqab. Aqa are koba degsi unu deqa a na Yesus qarinyonaqa a ŋamburbasq di moinaqa aqa lenŋ aiyej qaji dena a jeu kobotosiqa iga olo elenŋej.

<sup>21</sup> Nami nŋingi Yesus qa isaq di soqneb. Nŋingi nunŋo segi areqalo na laqnsibqa Qotei ti jeu atoqnsib kumbra uge uge yoqneb. <sup>22</sup> Ariya bunuqna Yesus a ŋamburbasq di moiyej aqa kumbra dena Qotei na jeu kobotosiqa nŋingi olo elenŋej. A degyej. Di kiyayaqa? A na nŋingi metŋgim nŋingi aqa areq bosib aqa segi kumbra boleq di sosib aqa ŋamgalaq di tamo bole une saiqoji sqajqa deqa. <sup>23</sup> Deqa ijo was kalil, une bei na nŋingi titŋgwa laqnimqa Yesus aqa anjam bole nŋingi queb qaji di nunŋo areqaloq di olo singilatoqniy. Di urataib. Nŋingi inŋgi bole bole Qotei a nami nŋingi enŋgwa marej qaji di oqajqa tarinŋoqniy. Osib singila na tigelesoqniy. E Pol. E Qotei aqa wau tamo. E na Yesus aqa anjam bole di tamo unŋgasari kalil mandamq endi unub qaji nanŋi minjre minjre laqnum.

*Pol a Kolosi Kristen nanŋi aqaryainjrqa marsiq jaqatinj koba eqnu*

<sup>24</sup> Kristus aqa tamo unŋasari nanŋi aqa segi jejamu bul. A na nanŋi aqaryainjrqa marsiq jaqatinj koba ej. Aqa jaqatinj di koboosaiunu deqa e dego nanŋi qa ti ninŋi qa ti osimqa ijo segi jejamuq di jaqatinj koba eqnum. Ijo kumbra dena e na Kristus aqa jaqatinj kereteqnum. E ijo jaqatinj deqa tulanj areboleboleibeqnu. <sup>25</sup> Qotei a segi na e giltbej deqa e Kristus aqa tamo unŋasari nanŋi qa waueqnum. Ijo wau agiende. E Qotei aqa anjam kalil mare mare laqnum. Di ninŋi aqaryaingwajqa deqa. <sup>26</sup> Tulanj nami Qotei aqa anjam di uliesoqnej. Deqa tamo unŋasari kalil nanŋi aqa anjam di qalieosaisoqneb. Uliesosiq bosiq bosiq ariya bini Qotei na aqa anjam di olo boleq ateqnaqa aqa segi tamo unŋasari nanŋi quoqnsib poinjreqnu. <sup>27</sup> Qotei aqa segi areqalo na uli anjam di boleq atoqnsiqa iga osorgeqnu. Deqa iga endegsi poigeqnu, bole, Qotei na sawa bei bei qaji nanŋi aqaryainjreqnu. Uli anjam di tulanj bolequja. Aqa damu agiende. Kristus a nunŋo ambleq di unu. Mondonj a na ninŋi elenjosim lanj qureq joqsi oqimqa dia ninŋi inŋi tulanj bole bole oqab. Ninŋi inŋi di oqajqa tarinjoqnsib unub. <sup>28</sup> Iga na tamo unŋasari kalil nanŋi Kristus aqa anjam minjreqnum. Iga powo bole ti sosim anjam di sinŋila na minjreqnum. Iga degyeqnum. Di kiyaaqa? Nanŋi gago anjam di qusib Kristus aqa kumbra torei dauryekritosib soqniq iga na nanŋi joqsim Qotei aqa areq di atqajqa deqa. <sup>29</sup> E deqa wau koba yeqnum. Kristus aqa sinŋila kobaquja Qotei na ebej qaji dena e wau koba yoqnsim laqnum.

## 2

*Ninŋi gisanj anjam dauryaib*

<sup>1</sup> O ijo was, ninŋi endegsib qalieoiy. E ninŋi qa ti Kristen tamo unŋasari Laodisia qureq di unub qaji nanŋi qa ti tamo unŋasari kalil ijo ulatamu unosaieqnuq qaji nanŋi qa ti wau koba yeqnum. <sup>2</sup> E ninŋi kalil are sinŋilatetnŋitqa ninŋi segi segi qa qalaqalaiyo kumbra yoqnsib are qujaitosib sqajqa deqa osim wau koba yeqnum. Ijo are koba endegsi unu. Ninŋi powo bole osib Kristus qa nunŋo areqalo torei sinŋilaboletosib dena ninŋi Qotei aqa uli anjam geregere qalieqab. Kristus a segi uli anjam di aqa utru. <sup>3</sup> Qalie ti powo ti kalil aqaq di uliejunu.

<sup>4</sup> E ninŋi anjam degsi mernŋonum. Di kiyaaqa? Tamo bei na bosim ninŋi gisanjosim walawala anjam bei mernŋimqa ninŋi qusib dauryaib deqa. <sup>5</sup> E bini ninŋi koba na sosai. E isaq endi unum. Ariya ninŋi ijo are miligiq di unub deqa e ninŋi ti sobulejunum. E qalieonum, ninŋi wau bole yoqnsib nunŋo

areqalo Kristus qa geregere singilatoqnsib unub. Deqa e ningi qa tulan areboleboleibeqnu.

*Iga Kristus taqyosim nambile bole oqom*

<sup>6</sup> Ningi nami Tamo Koba Kristus Yesus osib nungo areq di ateb deqa ningi aqa kumbra na walweloqniy. <sup>7</sup> Mandam na nam jirim ojesonaqa nam a singila na tigelejunu dego kere ningi Yesus osib nungo are miligiq di singilatosib aqa kumbra dauryoqniy. Yesus aqa anjam bole iga na merngoqnem qaji di ningi bati gaigai nungo areqaloq di singilatosib soqniy. Osib ningi gaigai Qotei binjiyoqniy.

<sup>8</sup> O was ningi geregere nam atoqniy. Tamo qudei na bosib ningi nanngo anjam dauryqajqa walawalaingwab. Nanngi nanngo segi powo na ti gisan anjam na ti ningi walawalaingwab. Deqa ningi nanngo anjam di dauryaib. Tamo nanngi di nanngo moma nanngo anjam dauryeqnub. Osib mondor uge uge lan ti mandam ti taqatejunub qaji nanngo anjam dego dauryeqnub. Nanngi Kristus aqa anjam dauryosaieqnub.

<sup>9</sup> Ningi qalie, Kristus a tamo bulyosiq gago ambleq di soqnej. Qotei aqa segi nambile ti kumbra ti kalil Kristus aqaq di keretosiq maqejunu. <sup>10</sup> Ingi ingi kalil singila ti unub qaji nanngo gate koba agi Kristus. Ningi Kristus aqa segi tamo ungasari unub deqa Qotei na ningi nambile engej. Nambile di nungoq di tulan keretosiq maqejunu. <sup>11</sup> Ningi Kristus taqyejunub deqa ningi mulun bole aiyejunub. Di jejamu qaji mulun sai. Ningi Kristus aqa kumbra na nungo areqalo namij kalil urateb. Kumbra di mulun bole aqa utru. <sup>12</sup> Ningi yanso eb bati deqa ningi Kristus beteryosib a ti moiyoqneleb. Onaqa Qotei na ningi Kristus ombla subq atobulej. Qotei na Kristus olo subq na tigeltej bati deqa a na ningi Kristus ombla subq na tigeltngobulej. Di kiyaaqa? Ningi Kristus qa nungo areqalo singilateb deqa. <sup>13</sup> Nami ningi une yoqnsib laqnsib nungo areqalo namij dauryoqneleb. Dena ningi morenesobuleb. Onaqa Qotei na ningi olo Kristus koba na nambile engsiqa nungo une kalil kobotetngej. <sup>14</sup> Nami dal anjam a gago une kalil boleq atsiq iga jeutgej deqa iga dal anjam aqa sorgomq di soqnem. Sonamqa Qotei na olo dal anjam mutu kalil di taqal waiyosiq dal anjam aqa singila kobotosiqa Kristus aqa namburbasq di qamej. <sup>15</sup> Kumbra dena Qotei na mondor uge uge nanngi ti nanngo gate kokba ti kalil nanngo singila kobotetnjrej. Osiqa qoto singilaosiqa nanngi kalil tulan bunnjrej. Kristus a namburbasq di moiyej wau dena Qotei a qoto singilaonaq tamo ungasari kalil nanngi unekriteb.

*Ningi Kristus koba na morenjobuleb deqa ningi dal anjam aqa sorgomq di sosai*

<sup>16</sup> Deqa tamo bei na nunjo jejamuq di anjam qametngosim endegsi merngaiq, “Ninggi inngi uyo ti ya uyo ti yori bati ti bai qala bunuj ti getentoqniy.” <sup>17</sup> O ijo was, kumbra deqaji sen qunun bul damu saiqoji. Kumbra dena inngi bole bole mondon brantqas qaji di iga lan suwi osorgeqnu. Ariya Kristus a segi inngi bole bole deqa utru. <sup>18</sup> Tamo qudei na ningi endegsib merngwab, “Ninggi nunjo segi nam aguq atoqnsib olo lan angro nanngi qa louoqniy. Iga neiobilqei na kumbra di unem deqa ningi degyiy.” O ijo was, ningi tamo di nanjo anjam quetnraib. Tamo deqaji nanngi nanjo segi areqalo namij dauryeqnub. Osib mareqnub, “Iga powo bole ti unum.” <sup>19</sup> Tamo deqaji nanngi Kristus beteryosaieqnub. Kristus a gago gate. Iga aqa jejamu qujai. Iga aqa singa ti ban ti bul. A na iga singilatgeqnu deqa iga kalil jejamu qujaiq di turtobuloqnsim Qotei aqa wau na boleoqnsim singilaeqnum.

<sup>20</sup> Ningi Kristus koba na morenobuleb deqa ningi mondor uge uge lan ti mandam ti taqatejunub qaji nanjo sorgomq di sosai. Deqa kiyaaq ningi olo mandam tamo nanjo kumbra dauryeqnub? Kiyaaq ningi nanjo dal anjam dego dauryeqnub? <sup>21</sup> Nanjo dal anjam agiende, “Ni inngi di ojaim. Ni inngi di uyaim. Inngi di ino jejamuq di betermaiq.” O ijo was, ningi kiyaaq dal anjam di dauryeqnub? <sup>22</sup> Dal anjam di jejamu qa inngi inngi qa anjam. Iga jejamu qa inngi inngi qa are qaloqnqom di iga padalqom. Inngi inngi di urur koboqab. Dal anjam deqaji mandam tamo nanngi na babteqnub. <sup>23</sup> Bole, iga endegsi unobuleqnum. Dal anjam dena tamo qudei nanjo are tigeltetnjreqnaqa nanngi louoqnsib nanjo segi nam aguq atoqnsib nanjo jejamu qaloqnsib singilateqnub. Deqa nanngi are qaleqnub, dal anjam dena powo bole babteqnu. Di sai. Ningi quiy. Dal anjam dena iga aqaryaigwa keresai. Iga dal anjam di dauryqom dena iga gago segi areqalo namij uratqa keresai bole sai.

### 3

#### *Kristus a gago nambile qa utru*

<sup>1-2</sup> O ijo was, Qotei a ningi Kristus ombla subq na tigeltngobulej deqa ningi lan goge qaji inngi inngi oqajqa wauoqniy. Kristus a lan goge oqsiq Qotei aqa ban woq di awejunu deqa ningi gaigai lan goge qaji inngi inngi oqajqa are qaloqniy. Ningi mandam qaji inngi inngi qa are koba qaloqnaib. <sup>3</sup> Ningi morenobulosib olo nambile eb. Nunjo nambile di agi Kristus aqaq di uliesonaqa ningi Qotei beteryejunub. <sup>4</sup> Kristus a nunjo nambile qa utru. Mondon a boleq dimqa ningi dego a koba na Qotei aqa rian ti wala ti boleq dqab.

*Ninggi kumbra uge kalil uratekritiy*



<sup>5</sup> Deqa nin̄gi mandam qaji kumbra kalil nun̄go are miligiq di unu qaji di moiyyotiy. Mandam qaji kumbra agi ubtosiy mern̄gwai. Sambala kumbra ti, kumbra jiga ti, kumbra uge uge yqajqa are prun̄goqa, mandam qa ingi ingi qa maun̄goqa di kalil moiyyotiy. Mamaul kumbra di gisan̄ qotei qa louo bul. <sup>6</sup> Tamo nan̄gi kumbra deqaji yeqnub qaji nan̄gi mondon̄ Qotei na awai uge en̄jsim nan̄gi qa min̄jin̄ oqetqas. Tamo nan̄gi di Qotei aqa anjam gotran̄yo qaji tamo. <sup>7</sup> O ijo was, nami nin̄gi dego tamo deqaji nan̄gi koba na laqnsibqa kumbra di yoqneb.

<sup>8</sup> Ariya bini nin̄gi kumbra kalil di uratekritiy. N̄rin̄ ti min̄jin̄ ti are uge ti yomu anjam ti anjam jiga ti di kalil uratekritiy. <sup>9</sup> Nin̄gi nun̄go areqalo namij aqa kumbra uge kalil qoreiyeb deqa nin̄gi olo nun̄go Kristen was nan̄gi gisan̄ anjam min̄jroqnaib. <sup>10</sup> Nin̄gi so bunujq di unub. Qotei a segi na nun̄go so bunuj di gereiyet̄nej. Osiqa a na gaigai nin̄gi powo bole en̄geqnu. A na nin̄gi a bul sqa marsiqa nun̄go so bunuj di gereiyet̄nej. <sup>11</sup> Iga so bunujq di unum deqa iga kalil kerekere unum. Deqa iga endegsi marqasai, “E Grik qaji” o “E Juda qaji” o “E mulun̄ aiyo qaji” o “E mulun̄ aiyosai qaji” o “E yaun̄ tamo” o “E yamban̄ tamo” o “E kan̄gal tamo” o “E kan̄gal tamo sai.” Iga degsi marqasai. Di kiyaaqa? Kristus a gago kalil qa Tamo Koba. A segi qujai na iga keretgejunu.

### *Nin̄gi nun̄go Kristen was nan̄gi qa duloqniy*

<sup>12</sup> Qotei a nin̄gi aqa segi qa marsiq gilt̄nej deqa a na nin̄gi tulan̄ qalaqalain̄geqnu. Deqa nin̄gi kumbra endegyoqniy. Nin̄gi nun̄go Kristen was nan̄gi qa duloqnsib kumbra bole bole en̄jroqniy. Osib nin̄gi nun̄go segi n̄nam aguq atoqnsib tamo nan̄gi lawo na gerein̄jroqniy. Tamo qudei na nin̄gi une bei engibqa nin̄gi kamba olo nan̄gi qa urur min̄jin̄ oqaiq. <sup>13</sup> Kristen tamo bei na nin̄gi gulbe engimqa un̄gum gulbe di qoboiyosib aqa une kobotetiy. Nin̄gi degyiy. Di kiyaaqa? Tamo Koba a na nun̄go une kobotet̄nej deqa. <sup>14</sup> Nin̄gi qalaqalaiyo kumbra yoqniy. Qalaqalaiyo kumbra na kumbra kalil tulan̄ bun̄jreqnu. Deqa nin̄gi kalil koba na areqalo qujaitosib nun̄go Kristen was nan̄gi qalaqalain̄jroqniy. <sup>15</sup> Kristus a na iga lawo kumbra egeqnu deqa kumbra dena nun̄go are miligi taqatesoqneme. Qotei na nin̄gi met̄nej deqa nin̄gi jejamu qujai bul sosib Qotei bin̄jyoqniy. <sup>16</sup> Osib nin̄gi Kristus aqa anjam nun̄go are miligiq di sin̄gilatib soqnem. Soqnim nin̄gi na nun̄go Kristen was nan̄gi areqalo bole ti powo ti osorn̄jroqniy. Nin̄gi nun̄go are miligiq di Qotei bin̄jyoqnsib a qa louoqniy. Lou qudei nen̄gren̄q di unu qaji dena ti lou qudei Qotei aqa Mondor na nun̄go are miligiq di tigelteqnu qaji dena ti nin̄gi Qotei qa louoqniy. <sup>17</sup> Nun̄go anjam maro na ti nun̄go wau na

ti nunjo kumbra kalil na ti ningi Tamo Koba Yesus aqa ñam soqtoqniy. Osib ningi aqa ñam na Abu Qotei binjiyoqniy.

*Pol a tamo ti unja ti angro ti nanji anjam minjrej*

<sup>18</sup> O ungasari, ningi nunjo tamo nanjo sorgomq di soqniy. Ningi degyqab di Tamo Koba a ningi qa tulan areboleboleiyqas. <sup>19</sup> O tamo, ningi nunjo njanj nanji tulan qalaqalainjroqniy. Ningi nanjo are ugetetnjraib.

<sup>20</sup> O angro, ningi gaigai nunjo ai abu nanjo anjam dauryoqniy. Ningi degyqab di Tamo Koba a ningi qa tulan areboleboleiyqas. <sup>21</sup> O abu, ningi na nunjo angro nanjo are ugetetnjraib. Ningi nanjo are ugetetnjraqab di nanji are gulbeinjraqas. Osim nanji wau bole yqajqa asginjraqas.

*Pol a kanjal tamo nanjo wau qa gate nanji ti anjam minjrej*

<sup>22</sup> O kanjal tamo, ningi gaigai nunjo wau qa gate nanjo anjam dauryoqniy. Ningi gisan na nanjo njamdamuq di lanja wau bole yobulaib. Ningi Tamo Koba a qa ulaosib gaigai are bole na nunjo wau qa gate nanji qa wau bole yoqniy. <sup>23</sup> Wau kalil ningi nanji qa yeqnub qaji di ningi singila na yoqniy. Ningi mandam tamo nanji qa wauosaieqnub. Ningi Tamo Koba a qa waueqnub. <sup>24</sup> Ningi qalie, mondonj Tamo Koba a na ningi awai boledamu engwas. Awai di a nami aqa segi tamo ungasari nanji enjraqa marej. Ningi are qaliy. Ningi Tamo Koba Kristus aqa kanjal tamo unub. A segi nunjo Wau qa Gate. <sup>25</sup> Tamo ungasari une ateqnub qaji nanji Qotei na kamba awai uge enjraqas. Aqa njanjalaq di tamo ungasari kalil nanji kerekere unub deqa a kumbra qujai na nanji peginjraqas.

## 4

<sup>1</sup> O wau qa gate, ningi nunjo kanjal tamo nanji kumbra bole enjroqniy. Ningi qalie, nunjo Gate dego unu. Agi a lanj qureq di unu.

*Ningi gaigai singila na Qotei pailyoqniy*

<sup>2</sup> Ariya ijo was, ningi gaigai singila na Qotei pailyoqniy. Ningi aqarataib. Ningi pailyoqnsib areqalo bole ti sosib Qotei binjiyoqniy. <sup>3</sup> Ningi iga qa dego Qotei pailyoqniy. Ningi endegsib pailyoqniy, “O Abu, ni na Pol aqa wau qujai nanji ti gam waqtetnjroqnimqa nanji medabu waqtoqnsib Kristus aqa anjam nami uliesoqnej qaji di mare mare laqnqab.” O ijo was ningi quiy. Jeu tamo nanji Kristus aqa anjam di dauryqa asginjreqnu deqa nanji e ojsib tonto talq endi waibeb unum. <sup>4</sup> Deqa ningi e qa endegsib pailyoqniy, “O Abu, ni na Pol aqa medabu singilatetimqa a ino areqalo dauryoqnsim Kristus aqa anjam geregere palontoqngas.”

<sup>5</sup> O ijo was, ningi areqalo bole dauryoqnsib tamo ungasari Yesus qaliesai qaji nanngo ambleq di kumbra bole bole yoqniy. Bati soqnim ningi Kristus aqa kumbra nanngi osornjroqniy. <sup>6</sup> Ningi tamo ungasari nanngo are boletetnrqca oqnsib anjam bole segi gaigai minjroqniy. Tamo qudei na ningi anjam bei nenemngibqa ningi kamba anjam kiyersib minjrqa oqnsib geregere are qaloqnsib minjroqniy.

*Pol a Tikikus Onesimus wo qarinjnrnaq nanngi Kolosi Kristen nanngoq gileb*

<sup>7</sup> E na Tikikus qarinyonum nunngoq bqo. A ijo wau kalil qa ningi saingwas. Tikikus a gago wau qujai. A gago Kristen was bole. A Tamo Koba aqa wau tamo bolequja. <sup>8</sup> E na a qarinyonum nunngoq bqo. Iga kiyersim unum di a na ningi saingim qusib dena nunngo are singilatqab. <sup>9</sup> E na Onesimus dego qarinyonum a Tikikus ombla nunngoq bonub. A dego gago Kristen was bole. A nunngo len qujai. Nanngi aiyel nunngoq bosib gago kumbra kalil qa ningi saingwab.

*Pol na Kolosi Kristen nanngi kaiyeinjrej*

<sup>10</sup> Aqo Aristarkus wo ombla tonto talq endi waigeb unum. Aristarkus a na ningi kaiyeingwo. Mak a Barnabas aqa gagai. A dego ningi kaiyeingwo. Mak a nunngoq bo degamqa ningi a osib geregereiyiy. Agi e nami a qa anjam nenngrenyosim nunngoq qarinyem. <sup>11</sup> Jastus a dego ningi kaiyeingwo. Aqa ñam bei Yesus. A Tamo Koba Yesus aqa wa. Nanngi qalub Juda tamo. Juda tamo qudei nanngi e ombla Qotei aqa wau ojosaieqnu. Nanngi segi qalub e ombla Qotei aqa wau ojeqnum. Qotei na aqa segi tamo ungasari nanngi taqatnjrsim nanngo Mandor Koba sqas anjam di nanngi segi qalub e aqaryaiboqnsib mare mare laqnu. Juda tamo bei na degyosaieqnu.

<sup>12</sup> Epafras a dego ningi kaiyeingwo. A nunngo len qujai. A Kristus Yesus aqa wau tamo. A gaigai singila na ningi qa endegsi pailyeqnu, “O Qotei, ni na Kolosi Kristen nanngi aqaryainjrimqa nanngi singila na tigeloqnsib ino kumbra bole kalil keretoqnsib ino areqalo geregere qalieqab.” Epafras a ningi qa degsi pailyeqnu. <sup>13</sup> O ijo was, e ningi endegsi merngwai. Epafras a gaigai ningi qa are qaloqnsiq deqa a wau koba yeqnu. A ningi qa ti Laodisia Kristen nanngi qa ti Hierapolis Kristen nanngi qa ti are qaloqnsiq deqa wau koba yeqnu. <sup>14</sup> Ariya Luk a dego ningi kaiyeingwo. A yu qangra tamo. Iga a tulan qalaqalaiyeqnum. Demas a dego ningi kaiyeingwo.

<sup>15</sup> O was ningi ijo kaiye anjam endi osib Laodisia Kristen nanngi dego minjriy. Osib Kristen tamo ungasari Nimfa aqa talq di korooqnsib loueqnub qaji nanngi a ti ijo kaiye

anjam endi osib nan̄gi min̄jriy. <sup>16</sup> Nīngi ijo anjam kalil e nēngren̄yonum qaji endi sisiyosib koboamqa qarinyib Laodisia Kristen nan̄goq gilimqa nan̄gi dego sisiyqab. E anjam bei dego nami nēngren̄yosim Laodisia Kristen nan̄goq qarinyem. Ijo anjam di nan̄gi na kamba olo nun̄goq qarinyib nīngi sisiyoiy. <sup>17</sup> Ariya nīngi na Arkipus endegsib min̄jiy, “Qotei a ni wau emej deqa wau di ni na geregere taqatosim wauoqne.”

<sup>18</sup> E Pol. Ijo anjam bosiq endi koboqo. Deqa e ijo segi ban̄ na kaiye anjam endi nēngren̄yosim nun̄goq qarinyonum. E tonto talq endi unum deqa nīngi e uratbaib. Nīngi e qa are qaloqnsib soqniy. O ijo was, Qotei a nīngi qa are boleiyeme. Bole.

## 1 TESALONAIKA

<sup>1</sup> Iga Pol na Sailas na Timoti na iga qalub anjam endi nenngrenyosim ningi Tesalonaika qureq di loueqnub qaji nunngoq qarinyonum. Ningi Tamo Koba Yesus Kristus aqa Abu Qotei wo nanngi aiyel beternjrejunub.

Qotei a ningi qa are boleiyimqa ningi lawo na soqniy.

*Tesalonaika Kristen nanngi Yesus qa nanngo areqalo singilateb*

<sup>2</sup> Iga gaigai ningi kalil qa pailyoqnsim Qotei binjiyeqnum. <sup>3</sup> Ningi Yesus qa nunngo areqalo singilateqnub deqa ningi kumbra bole bole yeqnub. Osib ningi qalaqalaiyo kumbra dauryoqnsib wau bole ojeqnub. Mondon gago Tamo Koba Yesus Kristus a olo bqas. Ningi a qa tarinjoqnsib singila na tigelejunub. Iga nunngo kumbra deqa are qaloqnsim gago Abu Qotei binjiyeqnum. <sup>4</sup> O ijo was kalil, Qotei a ningi aqa segi qa marsiq giltngrej deqa a na ningi tulan qalaqalaingeqnu. Di iga qalieonum.

<sup>5</sup> Iga nami Yesus aqa anjam bole nunngoq osi bem. Iga lan anjam maro na osi bosai. Iga singila ti Mondor Bole ti areqalo bole ti dena osi bem. Ningi qalie, iga nunngo ambleq di sosim kumbra boledamu yoqnsim ningi aqaryaingoqnem.

<sup>6</sup> Ningi Qotei aqa anjam ojesoqneb deqa gulbe gargekoba nunngoq di brantoqnej. Bati deqa ningi gago kumbra ti Tamo Koba aqa kumbra ti dauryoqneb. Ningi uratosaiqneb. Mondor Bole na nunngo areqalo tigeltetngoj deqa ningi tulan areboleleingoj. <sup>7-8</sup> Ningi Tamo Koba aqa anjam palonteqnab anjam di giloqnsiq Masedonia sawa ti Akaia sawa ti dia brantoqnej. Deqa sawa dia tamo ungasari kalil Yesus qa nanngo areqalo singilateqnub qaji nanngi nunngo kumbra qa quoqnsib dauryeqnub. Sawa dia segi sai. Sawa sawa kalilq di dego ningi Qotei qa nunngo areqalo singilateb deqa saqnsib laqnab tamo ungasari nanngi quekriteqnub. Deqa unqum, iga aitentosisim nunngo kumbra deqa olo mare mare laqasai. <sup>9</sup> Iga nami nunngo ambleq di sonamqa bati deqa ningi gago anjam dauryoqneb. Nunngo kumbra deqa sawa sawa kalilq di tamo ungasari nanngi saqnsib laqnub. Ningi are bulyosib gisan qotei nanngi torei uratnjrsib Qotei bole agi nambile gaigai unu qaji a areiyosib waueteqnub. <sup>10</sup> Osib ningi Qotei aqa Njiri a lan qureq na bqajqa deqa tarinjoqnsib unub. Nunngo kumbra deqa dego sawa sawa kalilq di nanngi saqnsib laqnub. Qotei aqa Njiri di agi Yesus. A moinaqa Qotei na olo subq na tigeltej. A na iga padalo sawaq na elenej deqa mondon Qotei aqa minjin

oqwa bati boqnimqa iga aqa minjin di turqasai. Iga so bole gaigai sqom.

## 2

### *Pol a Tesalonaika Kristen nanjo ambleq di wau bole yoqnej*

<sup>1</sup> O ijo was ninji segi qalie, iga nami nunjoq bosim nunjo ambleq di wauoqnem gago wau di lanja ulonjosai. <sup>2</sup> Ninji qalie, iga nunjoq bosaisosimqa iga Filipai qureq di Qotei aqa wau ojeqnam jeu tamo nanji na iga jaqatin egoqnsib ugeugeigoqneb. Bunuqna iga nunjo qureq bonamqa dia dego jeu tamo nanji na iga ugeugeigoqneb. Gago Qotei na gago are singilatetgej deqa iga jeu tamo nanji qa ulaosai. Iga singila na tigeloqnsim Qotei aqa anjam bole ninji mernjoqnem. <sup>3</sup> Bati deqa iga ninji endegsi mernjoqnem, “Ninji Yesus qa nunjo areqalo singilatiy.” Iga anjam uge bei ninji mernjosaiioqnem. Iga nunjo ambleq di sosim kumbra jiga ti gisan kumbra ti yosaiioqnem. <sup>4</sup> Qotei a segi gago kumbra tenemtoqnsiq une bei unosaiioqnej deqa a na iga wau egsiqa mergej, “Ninji ijo anjam bole mare mare laqniy.” O ijo was, mandam tamo nanji gago wau qa arearetnjroqnaqajqa iga deqa are qalosaioqnem. Iga endegsi are qaloqnem, “Qotei a segi gago are miligi peleiyqnsim gago wau qa arearetoqnaqas.” <sup>5</sup> Ninji qalie, iga walawala anjam bei ninji mernjosaiioqnem. Osim nunjo inji inji qa maulgonaq lanja gisan na anjam palontosaioqnem. Qotei a segi gago kumbra qa qalie. <sup>6</sup> Iga wauoqnem di ninji na kiyo tamo qudei na kiyo gago ñam soqtetgwajqa deqa wauoqnem e? Sai. Iga deqa wauosaioqnem. <sup>7</sup> Bole, iga Kristus aqa wau tamo bole unum deqa iga ninji endegsi mernjwa kere, “Ninji silali inji inji qa aqaryaigoqniy.” Ariya iga degyosai. Iga nunjo ambleq di angro kiñilala bul lawo na soqnem. Ai nanji na nanjo angro mom nanji mungum anainjreqnub dego kere iga nunjo ai bul sosim ninji gereinjoqnem. <sup>8</sup> Osim iga ninji tulan qalaqalainjoqnem. Deqa iga nunjo silali inji inji yaingwajqa are qalosaioqnem. Iga Qotei aqa anjam bole ninji merngwajqa deqa are qaloqnem. Di segi sai. Iga gago segi nambile dego uratosim ninji aqaryaingwajqa are qaloqnem. Di kiyqa? Ninji gago Kristen was bole unub deqa.

<sup>9</sup> O was ninji qalie, iga ninji koba na sosimqa Qotei aqa anjam bole mernjoqnem bati deqa iga waukobaoqnem. Iga ninji gulbe engwa uratosim deqa gago segi ban na qanam ti qolo ti tulan singila na wauoqnem. Osim dena gago segi inji inji awaiyoqnsim uyoqnem. Ninji iga silali qa aqaryaigwajqa deqa mernjosaiioqnem.

10 Niŋgi Yesus qa nuŋgo areqalo siŋgilateqnu b qaji iga na kumbra bole bole osorŋgoqnem. Iga kumbra uge bei osorŋgosaiqnem. Iga Qotei aqa ŋamgalaq di kumbra bole tintiŋ nuŋgo ambleq di yoqnem. Di niŋgi qalie. Qotei a dego qalie. 11 Abu naŋgi na naŋgo aŋgro naŋgi tingitŋjroqnsib dalŋjreqnub dego kere iga niŋgi tingitŋgoqnsim dalŋgoqnem. 12 Iga niŋgi degŋgoqnem. Di kiyaaqa? Niŋgi kumbra Qotei a tulaŋ areareteqnu qaji di yoqnsib walweloqŋajqa deqa. Qotei aŋgi a na niŋgi endegsi metŋgej, “Niŋgi ijoq babqa e nuŋgo Mandor Koba sosiy niŋgi taqatŋgitqa niŋgi laŋ qureq di so bole gaigai sqab.”

*Tesalonaika Kristen naŋgi gulbe qoboioqne b*

13 Iga Qotei aqa anjam niŋgi merngeqnam niŋgi quoqnsib endegsib are qalosaioqne b, “Anjam di mandam tamo naŋgo anjam.” Sai. Niŋgi are qaloqne b, “Bole, anjam di Qotei aqa anjam tintiŋ.” Deqa bini Qotei aqa anjam di nuŋgo are miligiq di siŋgila na waueqnu. Di kiyaaqa? Niŋgi Yesus qa nuŋgo areqalo siŋgilate b deqa. Utru deqa iga gaigai Qotei biŋjiyeqnum. 14 O ijo was, tamo uŋgasari Judia sawaq di Kristus Yesus aqa Abu Qotei wo qa loueqnub qaji naŋgo kumbra aŋgi niŋgi dauryeqnub. Tamo uŋgasari naŋgi di Juda naŋgi na gulbe koba enjroqne b dego kere nuŋgo segi leŋ qujai naŋgi na niŋgi gulbe koba eŋgeqnu b. 15 Juda naŋgi na Tamo Koba Yesus qalsib moi yote b. Naŋgi nami Qotei aqa medabu o qaji tamo naŋgi dego ŋumoqnsib moi yotŋjroqne b. Osib iga dego wigonab iga nuŋgo qure uratosim jaraiyem. Juda naŋgi di kumbra Qotei a tulaŋ areareteqnu qaji di gotraŋyoqnsib tamo uŋgasari kalil naŋgi jeutŋjreqnub. 16 Osib iga na sawa bei bei qaji naŋgi Qotei aqa anjam minjrqa yeqnam gam getentetgeqnu b. Qotei na sawa bei bei qaji naŋgi elenaim deqa Juda naŋgi na gam getentetgeqnu b. Deqa naŋgi bati gaigai naŋgo segi une tumbol ateqnu b. Naŋgi kumbra degyeqnu b deqa Qotei aqa minjiŋ bosiq naŋgoq di unu.

*Pol a Tesalonaika Kristen naŋgi olo unjrqa jqa are koba qaleqnu*

17 O ijo was, Juda naŋgi na iga wige b deqa iga niŋgi uratŋgosim bati truquyala sawa beiq di soqnem. Deqa iga nuŋgo ulatamu unosaieqnum. Niŋgi gago are miligiq di unub deqa iga niŋgi ti sobulejunum. Deqa iga nuŋgoq olo bosim nuŋgwajqa gam ŋameqnum. Iga niŋgi olo nuŋgwajqa are koba qaleqnum. 18 Od, iga nuŋgoq olo bqajqa are unu. E Pol e segi bati gargekoba nuŋgoq olo bqajqa yeqnam Satan na iga gam getentetgoqne j. 19 Mondon gago Tamo Koba Yesus a laŋ qureq na bamqa bati deqa iga niŋgi qa are siŋgilatosim Yesus aqa

ɲamgalaq di tulan areboleboleigwas. Yim Yesus na mergwas, “Ningi ijo wau tamo bole.” O ijo was, bati deqa iga ningi qa tulan areboleboleigwas. <sup>20</sup> Od, bini dego iga ningi qa tulan areboleboleigqnu. Ningi na gago are tulan boletetgeqnu.

### 3

#### *Pol a Timoti qarinyonaq Tesalonaika Kristen nanjoq gilej*

<sup>1</sup> Iga ningi qa are kobaigoqnej. Deqa iga are qalem, “Unɲum, iga olo tarinɲa keresai. Aqo Sailas wo Atens qureq endi sqom.” <sup>2</sup> Iga degsi are qalsimqa Timoti qarinyonam nunjoq gilej. Timoti a gago Kristen was bole. A Qotei aqa wau tamo. A Kristus aqa anjam bole maro qaji tamo. A ningi aqaryaingosim nunjo areqalo Yesus qa singilateqnu qaji di olo singilatetɲwajqa deqa osim qarinyonam nunjoq gilej. <sup>3</sup> Gulbe ti jaqatin ti ningi eqnu qaji dena nunjo areqalo ugetetɲaim deqa marsim Timoti qarinyonam nunjoq gilej. Ningi qalie, Qotei a nami ningi ti iga ti gulbe oqajqa marsiq giltgej. <sup>4</sup> Agi iga ningi koba na sosimqa endegsi mernjoqnem, “Gulbe gargakoba gagoq boqnas.” Mernjoqnam gulbe agi gagoq di brantoqnej. Di ningi qalie. <sup>5</sup> Utru deqa e tarinɲa keresai. Ningi nunjo areqalo Yesus qa bole singilateqnu kiyo sai kiyo di e qalieqajqa deqa Timoti qarinyonam nunjoq gilej. E endegsi are qalem, walawalaiyo tamo Satan na ningi uneq waingonaga ningi gago wau laɲa ulontosib nunjo areqalo Yesus qa singilato qaji di urateb kiyo? Degsi are qalsim are kobaiboqnej.

*Timoti a olo bosiq Pol minjej, “Tesalonaika Kristen nanjo so bolequja”*

<sup>6</sup> Ariya Timoti a nunjoq gilsiq olo uratɲgsiq aqo Sailas wo gagoq di brantosiqa anjam bolequja endegsi mergej, “Tesalonaika Kristen nanji Yesus qa nanjo areqalo singilatoqnsib segi segi qa qalaqalaiyo kumbra yeqnu. Osib gaigai ningi qa are boleinjreqnu. Ningi nanji unjrɲajqa are koba unu dego kere nanji kamba ningi nunɲwajqa are koba unu.” <sup>7</sup> O ijo was, ningi Yesus qa degsib nunjo areqalo singilateqnu anjam di Timoti a bosiq aqo Sailas wo saigonaqa anjam dena gago gulbe kalil qa olo are singilatetgej. <sup>8</sup> Deqa iga qalieonum, ningi singila na Tamo Koba aqa ñam ojejunub. Iga di qalieosim deqa bini iga so bole unum. <sup>9</sup> Iga ningi qa are qaloqnsim deqa iga gago Qotei aqa ɲamgalaq di tulan areboleboleigqnu. Gago arebolebole di tulan kobaquja. Qotei na arebolebole di iga egej deqa iga a biɲiyeqnum. <sup>10</sup> Iga qanam ti qolo ti endegsim Qotei pailyeqnum, “O Abu, ni na odgimqa iga Tesalonaika Kristen nanjoq gilsim unjrɲom. Unjrsim nanjo



areqalo Yesus qa singilateqñub qaji di truquinjrimqa iga na olo singilatetñjqom.” Iga degsim Qotei pailyeqñum.

*Pol a olo Tesalonaika Kristen nanngoq gilqajqa are qaleqnu*

<sup>11</sup> Gago are koba endegsi unu. Gago Abu Qotei wo gago Tamo Koba Yesus wo nanği aiyel na gam waqtetgibqa iga nunngoq olo gilqom. <sup>12</sup> Gago areqalo bei dego agiende. Tamo Koba a na ninği aqaryainğimqa qalaqalaiyo kumbra nunngoq di tulañ kobaeme. Amqa ninği segi segi qa qalaqalaiyo kumbra yoqnsibqa tamo unğasari kalil nanği dego tulañ qalaqalainjroqniy. Agi iga na ninği tulañ qalaqalaingeqñum dego kere. <sup>13</sup> Kumbra dena Qotei a nunngo are miligi singilatetñğimqa ninği aqa segi kumbra bole dauryoqnsib tamo unğasari tulañ bolequja brantosib gago Abu Qotei aqa ñamgalaq di une saiqoji soqniy. Soqñib mondoñ gago Tamo Koba Yesus na Qotei aqa segi tamo unğasari kalil nanği lan qureq dena joqsim bças. Bole.

## 4

*Ninği sambala kumbra kalil torei uratiy*

<sup>1</sup> O ijo was, kumbra bole kalil Qotei a tulañ areareteqnu qaji di iga na nami ninği osorngoqñem. Kumbra di agi ninği dauryeqñub. Ariya bini iga nunngo are miligi singilatetngosim Tamo Koba Yesus aqa ñam na endegsi mernğwom, “Ninği kumbra bole di olo torei singilatosib yoqniy.”

<sup>2</sup> Anjam kalil iga nami Tamo Koba Yesus aqa ñam na ninği merngoqñem qaji di ninği segi qalie. <sup>3</sup> Anjam agiende. Qotei aqa areqalo agi ubtosiy marqai. Ninği aqa segi kumbra boleq di sosib sambala kumbra kalil torei uratiy. <sup>4</sup> Osib ninği nunngo segi so geregere taqatıy. Ninği degyqab di ninği Qotei aqa segi kumbra boleq di sosib ñam bole oqab. <sup>5</sup> Yimqa nunngo areqalo uge uge na ninği titngosim sambala kumbraq di breiñwasai. Ninği qalie, tamo unğasari Qotei qaliesai qaji nanği sambala kumbra dauryoqnsib unub. <sup>6</sup> Ariya ninği kumbra di uratiy. Ninği na nunngo Kristen was nanği kumbra uge bei osornjraib. Osib nanği gisanjnrsib nanngo ñauñ ugetñjraib. Tamo Koba a na tamo unğasari kumbra uge deqaji yeqñub qaji nanği awai uge enjrqas. Iga nami ninği singila na degsi merngoqñem. <sup>7</sup> Qotei na iga kumbra jigat yqajqa metgosai. Iga aqa segi kumbra boleq di sqajqa deqa metgej. <sup>8</sup> Deqa tamo bei a gago anjam endi gotranıyqas di a kumbra tulañ ugedamu yqo. A tamo nanngo anjam gotranıyosai. A Qotei aqa anjam gotranıyqo. Qotei agi a na aqa Mondor Bole ninği engeqnu.

*Ninği qalaqalaiyo kumbra torei singilatosib yoqniy*

<sup>9</sup> Ningi nungo Kristen was nanngi qalaqalainjreqnub deqa e olo anjam bei totoryosiy nengrenyqasai. Qalaqalaiyo kumbra di Qotei na osorngekretej. <sup>10</sup> Agi ningi na Masedonia Kristen kalil nanngi tulan qalaqalainjreqnub. Ariya ijo was, iga nungo are singilatetngimqa ningi qalaqalaiyo kumbra di olo torei singilatosib yoqniy. <sup>11</sup> Osib lawo na sosib nungo segi ingi ingi taqatosib nungo segi ban na wauoqniy. Anjam di iga nami ningi merngoqnem. <sup>12</sup> Ningi degsib wauoqniyqa ningi ingi bei qa truquingwasai. Deqa tamo ungasari Yesus qaliesai qaji nanngi nungo kumbra di unsib tulan areboleholeinjrqas.

*Yesus a olo bosim tamo ungasari moreno qaji ti nambile unub qaji ti nanngi koba na sqab*

<sup>13</sup> Ariya ijo was, tamo ungasari nami moreneb qaji nanngi mondon kumbra kiye turqab di ningi qalieqajqa deqa merngwom. Yim ningi nanngi qa are gulbeingwasai. Tamo ungasari Qotei qaliesai qaji nanngi subq na tigelo bati qa tarinosaieqnu. Deqa nanngo was bei a moiqas di nanngi tulan are gulbeinjrqas. Ariya ningi degsib are gulbeingwasai. <sup>14</sup> Yesus a moisiqa olo subq na tigelej anjam di ningi iga ti gago areqaloq di singilatejunum. Deqa iga qalieonum, mondon Qotei a tamo ungasari kalil Yesus ombla sosib moreneb qaji nanngi subq na tigeltjrimqa nanngi Yesus beteryosib koba na lan qureq na mandamq aiqab.

<sup>15</sup> Iga Tamo Koba aqa anjam ningi endegsi merngwom. Mondon Tamo Koba a mandamq aiyonimqa iga nambile unum qaji iga na tamo ungasari nami moreneb qaji nanngi bunjrsim namo oqsim Yesus itqasai. <sup>16</sup> Qotei a anjam singila na marimqa lan angro matu a lelenoqnimqa Qotei a gul anjamqas. Yimqa Tamo Koba Kristus a lan qure uratosim mandamq aiyonimqa tamo ungasari nami Kristus qa nanngo areqaloq singilatosib moreneb qaji nanngi namo subq na tigelqab. <sup>17</sup> Tigelabqa bati deqa iga nambile unum qaji iga ti nanngi ti tuosim koba na lanbiq na oqsim Tamo Koba a itqom. Osim a ti gaigai sqom. <sup>18</sup> Deqa ningi anjam di Qotei aqa tamo ungasari nanngi minjroqnsibqa dena nanngo are singilatetnjroqniy.

## 5

*Yesus a bqajqa bati tamo bei a qaliesai*

<sup>1-2</sup> O ijo was, Tamo Koba Yesus a bati gembu bqas di tamo bei a qaliesai. A bqajqa bati di bajin tamo bul brantqas. Bajin tamo nanngi qolo beqnu dego kere Yesus bqajqa bati di lumu brantosim tamo ungasari nanngi pructnjrqas. Ningi di qalie deqa iga olo anjam bei totoryosim nengrenyqasai. <sup>3</sup> Yesus a bosaisoqnimqa tamo ungasari gargekoba nanngi endegsib maroqnuqab, "Iga so bole unum. Iga ingi bei qa ulaqasai."

Degsib maroqñibqa gulbe kobaquja nanjoq di brantoku-jatqas. Unja anjrotqa osiq jaqatin eqnu dego kere. Gulbe di nanji britosib jaraiqa keresai. <sup>4</sup> Ariya ijo was, ninji ambruq di sosai deqa Yesus bñajqa bati di bajin tamo bul bñas dena ninji pruoqñgwasai. <sup>5</sup> Ninji kalil pulon aqa anjro. Ninji suwan aqa anjro. Iga qolo qaji tamo sai. Iga ambru qaji tamo sai. <sup>6</sup> Deqa iga nerenjo ani tamo nanji bul sqasai. Iga nam atoqnsim areqalo bole ti sqom. <sup>7</sup> Iga qalie, tamo nanji nerenjoqñub qaji nanji qolo nerenjoqñub. Tamo nanji ya uge uyoqnsib nanarieqñub qaji nanji qolo ya uyeqñub. <sup>8</sup> Ariya iga suwan qaji tamo unum deqa iga areqalo bole ti sosim Qotei qa gago areqalo singilatoqnsim qalaqalayo kumbra yoqñom. Gago kumbra di iga qoto qa gara jugo bul jigsim tigelesqom. Osim Qotei na iga padalo sawaq na elenqajqa deqa tarinjoqñom. Gago kumbra di iga qoto qa gate tatal bul atsim tigelesosim nam atoqñom. <sup>9</sup> Qotei na iga aqa minjin turqajqa giltgosai. Gago Tamo Koba Yesus Kristus na iga elenqajqa deqa giltgej. <sup>10</sup> Yesus a iga qa moiyej deqa iga mandamq endi sqom kiyo iga moiqom kiyo di unjum. Iga Yesus a koba na nambile gaigai sqom. <sup>11</sup> Deqa ninji segi segi na Qotei aqa tamo unjasari nanji anjam bole minjoqnsib dena nanji singilatnjoqñiy. Agi bini ninji degyeqñub.

### *Ninji kumbra bole bole yoqñiy*

<sup>12</sup> Ariya ijo was, iga na ninji endegsi mernjwom. Ninji nunjo Kristen gate nanjo sorgomq di soqñiy. Tamo Koba a na nanji gate atelenej deqa nanji ninji aqaryainjwajqa waueqñub. Wauoqnsib Qotei aqa anjam ninji mernjoqnsib nunjo kumbra tingitetñgeqñub. <sup>13</sup> Nanji wau di yeqñub deqa ninji nanji qa are boleñgoqñim nanji qalaqalainjoqñiy. Osib ninji nunjo Kristen was kalil nanji koba na are qujaitosib soqñiy.

<sup>14</sup> O ijo was, iga nunjo are tigeltetñgimqa ninji kumbra endegyi. Ninji na tamo unjasari wauqajqa asginjreqnu qaji nanji tingitnjoqñiy. Osib tamo unjasari are gulbeinjreqnu qaji nanji singilatnjoqñiy. Tamo singila saiqoji unub qaji nanji dego aqaryainjroqñiy. Osib tamo kalil nanji lawo na gereinjroqñiy.

<sup>15</sup> Tamo qudei nanji ninji kumbra uge engibqa ninji na kamba olo kumbra uge enjraib. Ninji na gaigai nunjo Kristen was nanji ti tamo unjasari kalil nanji ti kumbra bole osornjoqñiy.

<sup>16</sup> Osib ninji gaigai areboleboleñgim soqñiy. <sup>17</sup> Sosib gaigai pailyoqñiy. <sup>18</sup> Kumbra kiye nunjoq di brantognim, di unjum, ninji olo Qotei binjoqnsib minjoqñiy, "Ni keretonum." Qotei

aqa areqalo agiende. Niŋgi Kristus Yesus beteryesosib degyoqniy.

<sup>19</sup> Qotei aqa Mondor na niŋgi wau bei yqajqa are tigeltetŋgimqa niŋgi olo getentaib. Niŋgi wau di yiy. <sup>20</sup> Qotei aqa medabu o qaji tamo naŋgi na anjam merngoqniqbqa niŋgi naŋgi qa olo are ugeiŋgaiq. <sup>21</sup> Anjam kalil niŋgi queqnuq qaji di niŋgi geregere tenemtoqnsib pegiyoqniy. Osib kumbra kalil dego pegiyoqnsib kumbra bole segi dauryoqniy. <sup>22</sup> Osib kumbra uge kalil uratoqniy.

<sup>23</sup> Qotei a are lawo qa utru. A na niŋgi torei aqa segi kumbra boleq di atqas. A nuŋgo mondor ti nuŋgo qunuŋ ti nuŋgo jejamu ti kalil taqatesoqniqqa niŋgi so bole gaigai sqab. Deqa mondon gago Tamo Koba Yesus Kristus a olo laŋ qureq na bamqa niŋgi aqa ŋamgalaq di une saiqoji sqab. <sup>24</sup> Qotei agi niŋgi metŋgej qaji a na niŋgi aqaryaŋgimqa iŋgi bole kalil di nuŋgoq di brantqas. Qotei a gisaŋ tamo sai. Anjam kalil a mareqnu qaji di a bole dauryeqnu.

<sup>25</sup> O ijo was, niŋgi iga qa Qotei pailyoqniy.

<sup>26</sup> Niŋgi na nuŋgo Kristen was kalil naŋgi segi segi kundoqniy. Kumbra di agi Qotei aqa tamo uŋgasari naŋgi yeqnuq.

<sup>27</sup> E Tamo Koba aqa ñam na niŋgi endegi merngwai. Niŋgi na Qotei aqa tamo uŋgasari kalil naŋgi koroinjrsib ijo anjam nenŋrenyonum qaji endi sisiyabqa naŋgi quqwab.

<sup>28</sup> Gago Tamo Koba Yesus Kristus a niŋgi qa are boleiyeme. Bole.

## 2 TESALONAIKA

<sup>1</sup> Iga Pol na Sailas na Timoti na iga qalub anjam endi nenngrenyosim ningi Tesalonaika qureq di loueqnub qaji nunngoq qarinyonum. Ningi na gago Abu Qotei wo Tamo Koba Yesus Kristus wo nanngi aiyel beternjrejunub.

<sup>2</sup> Tamo Koba Yesus Kristus aqa Abu Qotei wo nanngi aiyel ningi qa are boleinjrimqa ningi lawo na soqniy.

*Gulbe oqa bati qa Tesalonaika Kristen nanngi singila na tigelejunub*

<sup>3</sup> O ijo was, iga gaigai ningi qa are qaloqnsim Qotei binjyeqnum. Iga kere degyeqnum. Di kiyaaqa? Nunngo areqalo Yesus qa singilateqnub qaji di tulan kobaqujaeqnu deqa. Ningi segi segi qa qalaqalaiyo kumbra yeqnub. Nunngo kumbra di dego tulan kobaqujaeqnu. <sup>4</sup> Iga qure qure kalilq di Qotei aqa tamo unngasari nanngi nunngo kumbra deqa sainjroqnsim nunngo ñam soqteqnum. Kumbra uge kalil jeu tamo nanngi na ningi engeqnum qaji deqa ti gulbe kalil nunngoq di branteqnu qaji deqa ti iga na Qotei aqa tamo unngasari nanngi sainjreqnum. Osim endegsi minjreqnum, “Tesalonaika Kristen nanngi gulbe kalil qoboioyqnsib Yesus qa nanngo areqalo singilateqnub.”

*Qotei a kumbra bole tintin na tamo unngasari nanngi peginjre-qnu*

<sup>5</sup> Gulbe kalil di nunngoq di branteqnu deqa iga endegsi poigwo, Qotei a kumbra bole tintin na iga pegigeqnu. Ningi jaqatin eqnub di aqa utru agiende. Qotei a nunngo jaqatin di unoqnsiq merngeqnu, “Bole, ningi jaqatin di eqnub deqa e nunngo Mandor Koba sosiy ningi taqatngwa kere.” <sup>6</sup> Mondon Qotei a kumbra bole tintin endeqaji yqas. Jeu tamo agi ningi gulbe engeqnum qaji nanngi a na kamba gulbe enjrqas. <sup>7</sup> Tamo Koba Yesus aqa lan angro nanngi ti namyuwo ti lan qureq na mandamq aisib tamo unngasari kalil nanngo namgalaq di brantqab. Brantib bati deqa Qotei na iga ti ningi ti aqaryaigosim gago gulbe kalil iga bini qoboieqnum qaji di kobotim iga aqaratqom. <sup>8</sup> Yesus a mandamq aisim tamo unngasari Qotei qaliesai qaji nanngi ti tamo unngasari gago Tamo Koba Yesus aqa anjam bole dauryqa urateqnub qaji nanngi ti njolawotnjrqas. <sup>9</sup> Osim nanngi awai ugedamu enjrqas. Nanngo awai uge agiende. Nanngi Tamo Koba a ombla sqasai. Nanngi aqa singila koba ti rian ti unqasai dego. Nanngi tulan isaq di sosibqa bati gaigai padalosib sqab. <sup>10</sup> Bati Qotei na nami atej qaji di brantimqa Yesus a bosim nanngi degsim njolawotnjrqas. Ariya Qotei aqa segi tamo unngasari Yesus qa nanngo areqalo

siŋgilateqñub qaji nañgi kalil a mandamq aiyuqñim unsibqa aqa ñam soqtosib a qa tulañ areboleboleinjrím sqab. Niñgi dego nañgi koba na areboleboleinjrím sqab. Di kiyáqa? Qotei aqa anjam iga nami merñgoqñem qaji di niñgi qusib nuñgo areqaloq di siŋgilateb deqa.

*Pol a Tesalonaika Kristen nañgi qa pailyeqñu*

<sup>11</sup> Deqa ijo was, iga bati gaigai niñgi qa are qaloqñsim gago Qotei endegsi pailyeqñum, “O Abu, ni na Tesalonaika Kristen nañgi aqaryainjroqñime. Yimqa kumbra kalil ni nami nañgi dauryqa metnjrem qaji di nañgi dauryoqñibqa ni unoqñsim tulañ arearetmoqñqas. O Abu, ni na nañgi siŋgilatnjroqñimqa nañgi kumbra bole kalil dauryqajqa are koba soqñim dauryoqñqab. Osib Yesus qa nañgo areqalo siŋgilatoqñsib aqa wau geregere ojoqñqab.” O ijo was, iga degsim niñgi qa Qotei pailyeqñum. <sup>12</sup> Gago Qotei wo Tamo Koba Yesus Kristus wo nañgi aiyel niñgi qa are boleinjreñu. Deqa niñgi gago Tamo Koba Yesus aqa ñam soqtoqñiy. Yimqa a na kamba dego nuñgo ñam soqtetjgoqñqas.

## 2

*Yesus a bosaisoqñimqa Qotei aqa dal anjam gotrañyo qaji tamo kobaquja a namoqna brantqas*

<sup>1</sup> O ijo was kalil, mondoñ gago Tamo Koba Yesus Kristus a lañ qureq na boqñimqa niñgi iga ti aqa singaq di koroqom. Iga deqa niñgi anjam kiñala merñgim quiy. <sup>2</sup> Tamo qudei nañgi mareqñub, “Tamo Koba a bqajqa bati brantqo koboqo.” Osib olo qudei mareqñub, “Anjam di Qotei aqa Mondor na babtosiq iga mergwo.” Olo qudei mareqñub, “Anjam di Qotei aqa anjam bole.” Olo tamo qudei nañgi mareqñub, “Anjam di Pol aqa wau qujai nañgi ti nenjrenjonab iga sisiyem.” O was, niñgi nañgo anjam di qusib prugaib. <sup>3</sup> Nañgo anjam di gisañ. Nañgi gisañ kumbra dego yeqñub. Deqa niñgi nañgi daurnjraib. Niñgi quiy. Yesus bqajqa bati di laña brantqasai. Bati di brantqa laqñimqa kumbra qudei namoqna endegsi bqas. Tamo gargekoba nañgi Qotei qoreiyuqñsib sqab. Qotei aqa dal anjam gotrañyo qaji tamo kobaquja a dego boleq dqas. Boleq dosim mondoñ a ñamyuwoq aisim padalougetqas. <sup>4</sup> Tamo kobaquja di a diqoqñsim aqa segi ñam soqtoqñsim gisañ qotei kalil nañgi tulañ bunjnroqñqas. Osim a Qotei aqa atra tal koba miligiq gilsim di awoosim marqas, “E segi Qotei.” O ijo was, kumbra kalil di namoqna brantim Kristus a bunuqna bqas.

<sup>5</sup> E nuñgo qureq di sosimqa tamo kobaquja deqa niñgi saiñgoqñem. Niñgi ijo anjam di olo are walñgwo kiyo? <sup>6</sup> Tamo kobaquja di a bosaiunu. A bqajqa bati agi Qotei a nami

atej unu. A namoqna baim deqa tamo bei na a bqajqa gam getentejunu. Gam getentetejunu qaji tamo di ninji qalie. Tamo kobaquja a bqajqa batiamqa Qotei na marim a brantqas. <sup>7</sup> Ninji qalie, tamo kobaquja di a Qotei aqa dal anjam gotranjo qaji tamo unu. A bini ulioqnsiq waueqnu. A uliesoqnmqa Qotei na gam getentejunu qaji tamo di taqal waiyim tamo kobaquja a boleq dqas. <sup>8</sup> A boleq dimqa bati deqa Tamo Koba Yesus a rian koba ti bosim aqa me mondor medabuq na puyqas. Puyimqa jagwa koba dosim dal anjam gotranjo qaji tamo kobaquja di qalsim moiyoqas. O ijo was, Yesus aqa rian dena tamo kobaquja di tulan padaltougetqas. <sup>9</sup> Dal anjam gotranjo qaji tamo kobaquja di a Satan aqa singila ti bosim aqa gisan kumbra na manwa gargekoba tamo ungasari nangi osornjroqnas. <sup>10</sup> Osim aqa kumbra uge dena a na tamo ungasari padalo gam dauryeqnub qaji nangi gisa gisanjroqnas. Tamo ungasari nangi di Qotei na elenqa oqnsiq aqa anjam bole minjreqla nangi deqa arearetnjrosaeqnu. <sup>11</sup> Deqa Qotei na nanjo areqalo niñaqyetnjrimqa nangi aqa anjam bole dauryqa torei uratosib Satan aqa gisan anjam dauryoqnaqab. <sup>12</sup> Deqa iga qalieonum, tamo ungasari kalil Qotei aqa anjam bole nanjo areqaloq di singilatosaieqnub qaji nangi di Qotei na njolawotnjrsim awai ugedamu enjrqas. Di kiyaya? Nangi kumbra uge uge dauryqajqa areboleboleinjre- qnu deqa.

### *Qotei na ninji elenqajqa marsiq giltņej*

<sup>13</sup> Ariya ijo was kalil, Tamo Koba a na ninji tulan qalaqalaingeqnu. Deqa iga bati gaigai ninji qa are qaloqnsim Qotei binjyeqnum. Tulan nami Qotei na ninji elenqajqa marsiq giltņej. A ninji giltņgwa osiq endegsi are qalej, “Ijo Mondor Bole na Tesalonaika Kristen nangi singilatnjrimqa nangi ijo segi tamo ungasari bolequja sqab. Sosib ijo anjam bole nanjo areqaloq di singilatib kumbra dena e na nangi elenqai.” O ijo was, utru deqa Qotei na ninji giltņej. <sup>14</sup> Aqa are endegsi unu. Ninji gago Tamo Koba Yesus Kristus aqa rian koba ti aqa singila ti unqab. Aqa are degsi sonaqa a na ninji metņej. A Yesus aqa anjam bole iga mare mare laqnum qaji deqa are qalsiq ninji metņej. <sup>15</sup> Deqa ijo was, ninji singila na tigelooqnsib Qotei aqa anjam kalil iga nami ninji mernjoqnem qaji di dauryoqniy. Anjam kalil iga nengrenjoqnem qaji di dego ninji dauryoqniy.

<sup>16</sup> Gago Tamo Koba Yesus Kristus wo gago Abu Qotei wo nangi aiyel na iga tulan qalaqalaieqnub. Qotei a gaigai iga singilatgoqnsiq iga qa are boleiyeqnu. Mondon a na iga torei boletgwas. Deqa bini iga a qa tariņoqnsim unum. <sup>17</sup> O ijo

was, Qotei a nungo are singilatetngosim aqaryaingimqa ningi kumbra bole kalil geregere dauryosib wau bole bole yoqniy.

### 3

*Pol a Tesalonaika Kristen nanngi minjrej, "Ninggi iga qa Qotei pailyoqniy"*

<sup>1</sup> Ariya ijo was, gago anjam qujai bei unu. Anjam agiende. Ningi iga qa Qotei pailyoqniy. Yimqa a na iga aqaryaigimqa iga Tamo Koba aqa anjam geregere mare mare laqnqom. Laqnimqa aqa anjam di tulan kobaosim sawa sawa kalil keretoqnmimqa tamo ungasari gargekoba nanngi quoqnsib aqa ñam soqtoqnqab. Nami aqa anjam di nungo ambleq di dego tulan kobaej. <sup>2</sup> Deqa ningi iga qa Qotei pailyoqnbimqa a na iga aqaryaigosim tamo kumbra uge uge yeqnub qaji nanngo banq dena iga elenqas. Ningi qalie, tamo gargekoba nanngi Yesus qa nanngo areqalo singilatosaieqnbub.

<sup>3</sup> Ariya ningi quiy. Tamo Koba a gisanj tamo sai. Anjam kalil a mareqnu qaji di a bole dauryeqnu. Deqa a ningi singilatetngosim taqatngimqa Satan na ningi ugeugeingwa kere-sai. <sup>4</sup> Iga Tamo Koba aqa ñam na qalieonum, anjam kalil iga nami ningi merngoqnem qaji di ningi dauryeqnbub. Bunuqna dego ningi dauryoqnsib sqab.

<sup>5</sup> Gago are koba endegsi unu. Tamo Koba a na nungo are prugtetingimqa ningi Qotei aqa qalaqalaiyo kumbra geregere qalieosib dauryoqniy. Osib singila na tigeloqnsib gulbe qoboiyoqniy. Agi Kristus a nami singila na tigeloqnsiq gulbe qoboiyoqnej dego kere.

*Ninggi kalil wauoqniy*

<sup>6</sup> O ijo was kalil, gago Tamo Koba Yesus Kristus aqa ñam na iga anjam bei ningi endegsi merngwom. Kristen was qudei nanngi gago anjam iga nami ningi merngoqnem qaji di dauryqa uratosib deqa nanngi wauqajqa asginjreqnu. Deqa ningi na was nanngi di qoreinjrsib sasaloiy. Ningi nanngi koba na saib. <sup>7</sup> Ningi gago kumbra dauryoqnsib soqniy. Gago kumbra di ningi qalie. Iga nami ningi koba na sosimqa iga wauqajqa asgigosaijoqnej. <sup>8</sup> Iga nunngo inji uyo lanja yaingosaijoqnem. Iga gago segi inji awaiyoqnsim uyoqnem. Iga ningi gulbe engwa uratosim deqa iga qanam ti qolo ti waukobaoqnem. <sup>9</sup> Bole, iga Qotei aqa anjam maro tamo unum deqa iga nunngo silali inji inji lanja yaingwa kere. Di iga uratoqnem. Iga endegsi are qaloqnem. Iga wauoqnsim gago segi inji awaiyoqnsim uyoqnmimqa gago kumbra di ningi unoqnsib bole qa maroqnsib dauryoqnqab.

<sup>10</sup> Ningi qalie, iga ningi koba na sosimqa endegsi merngoqnem, "Tamo a wauqasai di a inji uyqasai dego."



<sup>11</sup> Ariya iga anjam endegsi quem, “Nunngo ambleq di tamo qudei nanği wauqajqa asginjreqnu. Nanği laña sosibqa yomu anjam koba laña laña mareqnub.” <sup>12</sup> Deqa iga Tamo Koba Yesus Kristus aqa ñam na tamo nanği deqaji endegsi minjrqom, “Ninği lawo na sosib wauoqnsib nunngo segi inği awaiyoqnsib uyoqniy.”

<sup>13</sup> O ijo was, ninği kumbra bole yqajqa asgingaiq. <sup>14</sup> Kristen was qudei nanği gago anjam iga nenğrenyonum qaji endi uratibqa ninği na nanği taqal breinjrib isaq gileb. Yimqa nanngo kumbra uge deqa nanği jemainjrqas. <sup>15</sup> Tamo nanği di nunngo jeu tamo edegaib. Ninği endegsib are qaloqniy, “Tamo nanği di gago Kristen was. Deqa iga Qotei aqa anjam minjroqnsim nanği olo tingitnjroqniqom.” Ninği deqsib are qaloqniy.

*Pol a kaiye anjam nenğrenyosiq Tesalonaika Kristen nanngoq qarinyej*

<sup>16</sup> Tamo Koba a are lawo qa utru. Deqa a na nunngo are latetngimqa ninği gaigai are lawo soqniy. Tamo Koba a ninği kalil koba na soqnebe.

<sup>17</sup> E Pol. E ijo segi ban na kaiye anjam endi nenğrenyosim nunngoq qarinyonum. E ijo anjam kobotqa laqnsimqa e degyeqnum. Di ijo kumbra.

<sup>18</sup> Gago Tamo Koba Yesus Kristus a ninği kalil qa are boleiyeme. Bole.

# 1 TIMOTI

<sup>1</sup> E Pol. Kristus Yesus na e qarınbej deqa e aqa anjam mare mare laqnum. Kristus Yesus aqa Abu Qotei wo nanği aiyel na e wau di ebeb. Qotei na iga elenėj deqa iga Yesus a olo lan qureq na bam unqajqa deqa tariñoqnsim unum.

<sup>2</sup> O Timoti, e anjam endi nenğrenyosim inoq qarınyonum. E nami Yesus aqa anjam bole ni mermonam qusımqa ino areqaloq di sıngilatem. Deqa ni ijo anğro bole bulonum. Gago Abu Qotei wo gago Tamo Koba Kristus Yesus wo nanği aiyel ni qa dulosis are boleınjrimqa ni lawo na soqnime.

## *Iga gisañ anjam kalil gotranjoqnaqom*

<sup>3</sup> E Masedonia sawaq gilqa osımqa ni endegsi mermem, “Ni Efesus qureq di soqne.” Ariya bini e anjam di pulutosiy ni mermqai, “Ni Efesus qureq di olo soqne.” O Timoti, qure dia tamo qudei nanği Qotei aqa anjam marqa oqnsib gisañ anjam bei ti turtoqnsib tamo unğasari nanği minjreqnub. Deqa ni Efesus qureq di sosımqa tamo nanği di sıngila na endegsi minjroqne, “Niñgi gisañ anjam di plaltoqnaib.” <sup>4</sup> O Timoti, gisañ tamo nanği di laña sa anjam ti nanğo moma nanğo ñam qa ti anjam koba laña laña mareleneqnub. Deqa ni na tamo nanği di minjrimqa nanğo kumbra di uratqab. Nanğo anjam dena tamo unğasari nanğo areqalo tulañ ugeugeiyet-njreqnu. Deqa tamo unğasari nanği di Qotei qa nanğo areqalo sıngilatqa yeqnab gisañ tamo nanğo anjam dena nanği getentnjreqnu. Deqa inği bole bole Qotei na iga egeqnu qaji di nanği qalieqa keresai. <sup>5</sup> Gago wau agiende. Iga na tamo unğasari nanği Yesus aqa anjam minjreqnam nanği a qa nanğo areqalo sıngilatoqnsib endegsi poinjreqnu, “Bole, iga Qotei aqa ñamgalaq di une saıqoji unum.” Degsi poinjreqnaqa nanği are bole ti sosib qalaqalaiyo kumbra dauryeqnub. <sup>6</sup> O Timoti, tamo qudei nanği kumbra di urateqnub deqa nanği tulañ nanarioqnsibqa anjam laña laña mareleneqnub. <sup>7</sup> Bole, nanği Qotei aqa dal anjam plaltqajqa arearetnjreqnaqa mareqnub, “Anjam iga plalteqnum qaji endi anjam bole.” Ariya anjam nanği plalteqnub qaji di aqa utru nanği segi poinjrosaieqnu.

<sup>8</sup> Iga qalieonum, Qotei aqa dal anjam a bolequja. Ariya iga dal anjam geregere daurqasai di dal anjam dena iga aqaryaigwa keresai. <sup>9</sup> Ni que. Qotei a tamo bole nanği qa osiq dal anjam atosai. A dal anjam gotranjo qaji tamo nanği qa osiq dal anjam atej. Nanğo kumbra uge agiende. Nanği diqoqnsib Qotei qoreıyoqnsib une ateqnub. Osib Qotei aqa kumbra dauryqa uratoqnsib olo mandam qaji kumbra uge

uge yeqñub. Nanji nanjo ai abu ñumsib moiyoñjreqñub. Osib tamo qudei nanji dego ñumelenjeqñub. <sup>10</sup> Nanji sambala kumbra yoqñsib laqñub. Nanji unja wo ñerenja uratoqñsib tamo bei bei wo ñerenjoqñsib sambala kumbra yeqñub. Nanji tamo qudei bajinelenjoqñsib nanji kanjal tamo ateqñub. Nanji gisan anjam koba maroqñsib olo puluoqñsib nanjo gisan anjam di singilateqñub. Osib kumbra uge uge gargekoba yeqñub. Nanjo kumbra de ti Qotei aqa anjam bole ti ombla jeu atoqñsib unub. <sup>11</sup> Qotei na e qarinjbej deqa e aqa anjam bole di mare mare laqñum. Anjam di rianj koba ti unu. Iga areboleboleigwajqa utru agi Qotei a segi.

### *Qotei a Pol qa dulej*

<sup>12</sup> Gago Tamo Koba Kristus Yesus a na e singila ebsiqa marej, “Pol a ijo wau tamo bole sqas. A ijo wau uratqasai.” Osiqa e giltbosiqa aqa wau ijo banq di atej. Deqa e a tulanj binjiyeqñum. <sup>13</sup> Bole, nami e Yesus aqa ñam misilinjoqñsim a jeutoqñsim a qa anjam uge uge maroqñem. E nanari tamo sosim ijo areqalo Yesus qa singilatqa uratoqñem deqa e kumbra uge di yoqñem. Yeqñam bati di Qotei a e qa dulej. <sup>14</sup> Osiqa a e qa are tulanj boleiyosiq ijo are tigeltetbej deqa bini e gago Tamo Koba Kristus Yesus qa ijo areqalo singilatoqñsim qalaqalaiyo kumbra dauryeqñum.

<sup>15</sup> Anjam bei agiende. Kristus Yesus a une tamo nanji elenja osiq deqa mandamq aiyej. Tamo kalil nanji anjam di qusib marqab, “Bole.” O Timoti, e nami une gargekoba yoqñem deqa e une tamo kalil nanji tulanj bunjnroqñem. <sup>16</sup> Yesus Kristus a une tamo nanji qa tariñsokobaiyeqñu. Aqa kumbra di tamo ungasari kalil nanji qalieqajqa deqa a matiqa e qa dulej. Di kiyaaqa? Nanji Yesus aqa kumbra di qalieosib a qa nanjo areqalo singilatosis ñambile gaigai sqajqa deqa. <sup>17</sup> Qotei a bati gaigai gago Mandor Koba sqas. A moiqa keresai. Iga a unqa keresai dego. A segi Qotei bole. Deqa iga aqa ñam soqtoqñsim a binjiyoqñom. Bole.

### *Pol a Timoti minjej, “Ni qoto tamo bulosim kumbra uge kalil gotranjoqne”*

<sup>18</sup> O ijo angro Timoti, Kristen gate nanji nami Qotei aqa medabu osib ni qa anjam babtosis wau emeb. E deqa are qalsimqa anjam endi inoq qarinyonum. Deqa ni sisiyosim daurye. Kristen gate nanjo anjam babteb qaji dena ni singilatmoqñimqa ni qoto tamo bulosim kumbra uge kalil gotranjoqne. <sup>19</sup> Gotranjoqñsimqa ino areqalo Yesus qa bole singilatoqne. Osim qalieqam, ni Qotei aqa ñamgalaq di une saiqoji unum. O Timoti, tamo qudei nanji nanjo uneq di tulanj sougetejunub deqa nanji Yesus aqa anjam bole qalieqa

keresai. Qotei na nanjo kumbra tingitetnrqa yeqnaq nanji olo urateqnu. Nanji Yesus qa nanjo areqalo singilatqa asginjreqla qobun a sargumq di paraeqnu dego kere nanji areqalo uge uge dauryoqnsib laqnu. Kumbra dena nanji tulan ugetnrqas. <sup>20</sup> Agi Himeneus Aleksander wo nanji aiyel kumbra uge deqaji yeqnu. Deqa e na nanji aiyel Satan aqa banq di adem. Di kiyaaqa? Nanji aiyel endegsi poinjrqaqqa, “Bole, iga olo Qotei misilinyqasai.”

## 2

### *Iga tamo ungasari kalil nanji qa pailyoqnqom*

<sup>1</sup> O Timoti, e anjam kobaqja bei endegsi mermit ni qusim daurye. Ni na Kristen nanji minjroqnmqa nanji tamo ungasari kalil qa pailyoqnsib Qotei binjiyoqnebe. <sup>2</sup> Osib mandor kokba ti sawa taqato qaji tamo kalil nanji qa ti dego Qotei pailyoqnebe. Yim nanji na iga geregere taqatgesoqnbqa iga kalil lawo na sosim kumbra Qotei a areareteqnu qaji di dauryoqnqom. <sup>3</sup> Pailyo deqaji Qotei aqa njamgalaq di tulan boledamu. Qotei agi iga elenjej qaji. <sup>4</sup> Qotei aqa are koba endegsi unu. A na tamo ungasari kalil nanji elenjamqa nanji aqa anjam bole poinjrim ojesqab. <sup>5</sup> Iga qalie, Qotei a segi qujai Qotei bole. Kristus Yesus a segi qujai iga Qotei ti gago ambleq di tigelesosiqa yeba waiyej unu. <sup>6</sup> Yesus a moiqaqqa bati kereonaqa a bosiqqa tamo ungasari kalil nanji elenqa marsiqqa aqa segi nambile uratosiq moiyej. Aqa kumbra dena Qotei na iga endegsi osorgej, a na tamo ungasari kalil nanji elenqajqa are koba unu. <sup>7</sup> Qotei na e giltbej deqa e aqa anjam mare mare laqnum. E aqa anjam palontqajqa wau ti. E bole mermonum. E gisaqosai. E aqa anjam plaltoqnitqa sawa bei bei qaji nanji poinjrim Yesus qa nanjo areqalo singilatqajqa deqa osiq e wau ebej.

<sup>8</sup> Deqa ni na Kristen tamo qure qure kalilq di unub qaji nanji minjroqnmqa nanji minjin ti njirin ti uratosib Qotei aqa segi kumbra boleq di sosib nanjo ban soqtoqnsib pailyoqnebe.

### *Ungasari nanji Qotei aqa anjam dauryosib wau bole bole yoqnqab di nanjo wala bole*

<sup>9</sup> Ni na Kristen ungasari nanji minjroqnmqa nanji areqalo bole na gara jigoqnebe. Nanji diqoqnsib nanjo gate banqa walatoqnaib. Osib kolilei na ti wala bole na ti nanjo jejamu maqtosib gara wala ti jigoqnaib. <sup>10</sup> Ni na ungasari nanji minjroqnmqa nanji Qotei aqa anjam dauryoqnsib wau bole bole yoqnebe. Di nanjo wala bole. <sup>11</sup> Ungasari nanji nanjo segi nam aguq atoqnsib medabu getentoqnsib Qotei aqa anjam quoqnebe. <sup>12</sup> Nanji Qotei aqa anjam plaltaib. Osib tamo nanjo

gate saib. E na nanġi saidnjonum. Nanġi medabu getentosib anjam segi quoqnebe. <sup>13</sup> Ni que. Qotei a Adam namoqna gereiyosiqa bunuqna a Iv gereiyej. <sup>14</sup> Satan na Adam gisaŋ anjam minjosai. A na Iv gisaŋ anjam minjnaq qusiġ dauryej. Osiġ deqa a une atej. <sup>15</sup> Deqa ni na unġasari nanġi minjroqnmqa nanġi anġrotoqnsib anġro qa wauoqnebe. Nanġi wau di yoqnsib gaigai Yesus qa nanġo areqalo sinġilatoqnebe. Osib qalaqalaiyo kumbra dauryosib Qotei aqa segi kumbra boleġ di sosib nanġo segi jejamu taqatoqnebe. Yim deqa Qotei na nanġi elenqas.

### 3

*Tamo bei a Kristen nanġo gate sqa marsimqa a kumbra bole bole dauryoqnem*

<sup>1</sup> O Timoti, ijo anjam endi bole. Deqa ni que. Tamo bei a Kristen nanġo gate sqajqa are qalqas di kere. Di wau bolequja. <sup>2</sup> Deqa ni unime. Tamo bei a Kristen nanġo gate sqa marsimqa a kumbra bole bole dauryoqnem. Yim tamo unġasari nanġi aqa jejamuq di une bei unqasai. Tamo di a unġa aiyeltaiq. A unġa qujai segi esoqnem. Osim aqa segi so geregere taqatosim areqalo bole ti soqnem. Tamo lanġaj nanġi aqa meq boqnbqqa oqnsim geregereinjroqnem. A Qotei aqa anjam palontqajqa wau geregere poiym anjam palontqnem. <sup>3</sup> A ya uge uyoqnsim nanarioqnaiq. A urur minjin oqim qotoqnaiq. A lawo na soqnem. A silali koba ti sqajqa are qaloqnaiq. <sup>4</sup> A na aqa unġa ti aqa anġro nanġi ti geregere taqatnjroqnome. Yim aqa anġro nanġi aqa anjam geregere quoqnsib dauryoqnebe. <sup>5</sup> A aqa segi unġa ti aqa anġro nanġi ti geregere taqatnjrqasai di a Kristen nanġi geregere taqatnjrqqa keresai dego. Deqa a Kristen nanġo gate sqa keresai. <sup>6</sup> Ni Kristen tamo bunuj a gate ataim. A gate sqas di a diqosim aqa segi ñam soqtim Qotei na nami Satan ñolawotej dego kere a ñolawotqas. <sup>7</sup> Deqa ni tamo bei a Kristen nanġo gate atqa osimqa ni aqa kumbra endeqaji unsim a gate ate. A tamo unġasari Qotei qaliesai qaji nanġo ñamgalaq di ñam bole ti unu. A ñam bole ti sqasai di a gate ataim. Tamo deqaji a gate sqas di tamo qudei nanġi a misilinġyibqa Satan na a tulaŋ ugeugeiyim a aliemq di sobulqas.

*Kristen nanġo wau tamo nanġi areqalo bole ti sosib wauoqnebe*

<sup>8</sup> Tamo qudei nanġi Kristen nanġo wau tamo sqa marsibqa nanġi dego areqalo bole ti sosib kumbra bole bole yoqnebe. Nanġi medabu aiyeltaib. Nanġi ya uge uyoqnsib nanarioqnaiq. Nanġi tamo nanġo silali yainjrqajqa are koba qalaib. <sup>9</sup> Nanġi Qotei aqa ñamgalaq di are gulbe saiqoji sosibqa uli

anjam Qotei a nami babtej qaji di singila na ojoqnebe. Uli anjam di iga nami qusim Qotei qa gago areqalo singilatem. <sup>10</sup> O Timoti, ni na Kristen nanjo wau tamo nanji geregere peleinjime. Nanji wau bole yibqa ni di unsim nanji wau tamo ate. <sup>11</sup> Nanjo njanj nanji dego areqalo bole ti sosibqa kumbra bole bole yoqnsib nanjo segi so geregere taqatosib wau kalil Qotei na nanji enjrej qaji di geregere ojoqnebe. Nanji yomu anjam maroqnaib. <sup>12</sup> Kristen nanjo wau tamo nanji unja aiyeltaib. Nanji unja qujai segi esoqneb. Sosibqa nanjo njanj nanji ti nanjo angro nanji ti geregere taqatnjroqnebe. <sup>13</sup> Kristen nanjo wau tamo nanji wau bole yoqnqab di nanji ñam bole ti sosib nanjo areqalo Kristus Yesus qa bole singilatoqnqab. Deqa nanji Yesus aqa anjam mare mare laqajqa ulaqasai.

*Qotei aqa kumbra nami uliesoqnej qaji di tulan kobaquja*

<sup>14</sup> O Timoti, e inoq urur bosiy numqajqa are koba unu. Ariya e mati anjam endi nenjrenyosim inoq qarinyonum. <sup>15</sup> E inoq urur bqa keresaiamqa ni ijo anjam endi sisiyame. Osim kumbra bole kalil Qotei na Kristen nanji dauryqa areareteqnu qaji di ni geregere poimqas. Kristen nanjo utru agiende. Nanji Qotei nambile so qaji aqa segi tamo ungasari unub. Nanji tal ai bul tigeloqnsib Qotei aqa anjam bole singilateqnum. <sup>16</sup> Iga kalil medabu qujaitoqnsim endegsi mareqnum, “Qotei aqa kumbra nami uliesoqnej qaji di tulan kobaquja.” Aqa kumbra agiende,  
A segi tamo bulyonaqa tamo ungasari nanji a unoqneb.  
Aqa kumbra bole kalil Mondor Bole na babtosiq iga osorgej.  
Lan angro nanji dego a unoqneb.  
Aqa wau tamo nanji sawa bei beiq giloqnsibqa aqa anjam mare mare laqnum.  
Mandamq endi tamo ungasari nanji a qa nanjo areqalo singilateqnum.  
Qotei na a olo osiq lan qureq osi oqnaqa a dia ñam kobaquja ej.

## 4

*Gisanj tamo nanji mondonj bqab*

<sup>1</sup> Qotei aqa Mondor a anjam endegsi babtej. Diño bati jojomoqnmqa tamo ungasari gargekoba nanji Yesus qa nanjo areqalo singilatqa uratoqnqab. Nanji gisanj mondon ti mondon uge uge ti nanjo anjam qusib dauryoqnqab. <sup>2</sup> Dauryoqnbqa gisanj tamo nanji na nanjo areqalo tulan niñaqyetrjribqa nanji nanjo segi une poinjrqa keresaiinjrqas. <sup>3</sup> Gisanj tamo nanji dena anjam uge endegsib tamo ungasari nanji minjroqnqab, “Ninji unjataib. Ninji tamotaib. Ninji damu uyaib. Di getento kalil.” O Timoti, anjam di gisanj. Qotei na inji inji kalil

atelenjej deqa iga inji inji di oqa maroqnsim Qotei binjiyoqnsim oqnqom. Iga Qotei aqa anjam bole qalieosim gago areqaloq di singilatejunum deqa iga inji inji di oqnqom. <sup>4</sup> Iga qalie, inji inji kalil Qotei na atej qaji di bole. Deqa iga inji bei getentqasai. Iga Qotei binjiyoqnsim inji inji kalil di oqnqom. <sup>5</sup> Inji inji di Qotei aqa segi inji bole tintinj. Qotei a gago pailyo na ti aqa segi anjam na ti inji inji di boleteqnu.

*Pol na Timoti minjej, “Ni Yesus aqa wau tamo bole soqne”*

<sup>6</sup> O Timoti, ni na ijo anjam kalil endi gago Kristen was nanji minjroqne. Ni degyqam di ni Kristus Yesus aqa wau tamo bole sqam. Yimqa anjam bole ni ino areqaloq di singilateqnum qaji dena ti powo bole ni osim dauryeqnum qaji dena ti ni olo torei singilatmesqas. <sup>7</sup> Tamo qudei nanji lanja sa anjam uge uge mareqnu. Anjam dena tamo ungasari nanji nanaritnjreqnu. Deqa ni anjam di qoreiyosim Qotei aqa kumbra dauryqajqa singilaoqne. <sup>8</sup> Ni qalie, iga gago jejamu qaloqnsim geregere taqatoqnqom di iga singila oqnsim sqom. Kumbra dena iga kiñala aqaryaigwas. Di gago jejamu segi aqaryaiyqas. Ariya iga Qotei aqa kumbra dauryqajqa singilaoqnqom di iga mandamq endi so bole sosim mondonj dego iga nambile gaigai sqom. Kumbra dena iga torei aqaryaigwas. <sup>9</sup> O Timoti, anjam di bole. Tamo kalil nanji qusib marqab, “Bole.” <sup>10</sup> Qotei nambile unu qaji a na tamo ungasari kalil nanji elenqajqa waueqnu. Od, a na tamo ungasari a qa nanjo areqaloq singilateb qaji nanji bole elenjej koboqo. Deqa iga Qotei qa tarinjoqnsim unum. Utru deqa iga gaigai singila na aqa wau ojeqnum.

<sup>11</sup> Ijo anjam kalil endi ni na plaltoqnsim Kristen nanji minjroqne. <sup>12</sup> O Timoti, tamo qudei nanji ni qa mareqnu, ni angro kiñala. Tamo nanji dena ino ñam ugetetmaib. Ino anjam maro ti ino walwel ti di ni geregere taqatosim kumbra bole segi yoqne. Osim qalaqalaiyo kumbra dauryoqnsim Qotei qa ino areqaloq singilateqnsim Qotei aqa namgalaq di tamo bole une saiqoji soqne. Soqnim Kristen nanji ino kumbra di unoqnsib ni daurmoqngab. <sup>13</sup> Ariya e inoq urur bqasai di Kristen nanji louqa koroqnbqqa ni tigeloqnsim Qotei aqa anjam nengrenq di unu qaji di sisiyoqnsim anjam aqa damu palontoqne. Osim nanji Qotei aqa gam bole osornjroqne. <sup>14</sup> Nami Kristen gate nanji ino gateq di nanjo banj atnabqa Qotei na ni singila emej. Bati di tamo bei na Qotei aqa medabu osiq ni qa anjam bei babtej. Deqa ni singila di oqnsim Qotei aqa wau ojqa asgimaiq. <sup>15</sup> Ni gaigai wau di geregere taqatosim singila na wauoqne. Yimqa Kristen kalil nanji ino kumbra di unoqnsib maroqngab, “Ni Qotei aqa wau bole yeqnum.” <sup>16</sup> Ni ino segi kumbra ti ino anjam maro ti geregere taqatosim singila na

Qotei aqa wau yoqne. Yimqa Qotei na ni ti tamo ungasari kalil ino anjam queqñub qaji nanği ti elenqas.

## 5

*Kristen kalil nanği gago was, jaja, ai abu bul unub*

<sup>1</sup> O Timoti, ni na tamo qeli nanği njirintjroqñaim. Ni lawo na nanği tingitnjroqne. Ni nanği tingitnjrqa osimqa nanği ino abu bul lawo na tingitnjroqne. Angro meli nanği ti angro wala nanği ti dego lawo na tingitnjroqne. Ni nanği tingitnjrqa osimqa nanği ino was bul lawo na tingitnjroqne. <sup>2</sup> Uña qeli nanği dego tingitnjrqa osimqa nanği ino ai bul lawo na tingitnjroqne. Uña meli nanği dego tingitnjrqa osimqa nanği ino jaja bul lawo na tingitnjroqne. Ni Qotei aqa ñamgalaq di une saiqoji sosimqa uña meli nanği tingitnjroqne.

*Uña qobul nanği taqatnjrqajqa anjam*

<sup>3</sup> Nungo ambleq di uña qobul nanği unub. Nanği qudei angro saiqoji. Deqa ni na uña qobul nanği di kumbra bole osornjroqne. <sup>4</sup> Uña qobul qudei nanngo angro ti moma ti soqñib ni na nanği endegsi minjre, “Nunگو ai ti moma ti nanği qobulonub deqa ninği na nanği taqatnjroqñsib inği inği enjroqñiy. Nunگو wau bole agide. Ninği nami angro kiñilala sonabqa nanği waukobaoqñsib ninği gereinjoqñeb. Bini nanği qobulonub deqa ninği na kamba nanği taqatnjroqñiy. Ninği kumbra degyqab di Qotei a ninği qa tulan areboleboleiyqas.”

<sup>5</sup> Uña qobul qudei nanği angro saiqoji. Nanği segi unub. Nanği Qotei qa nanngo areqalo singilatoqñsib a qa tariñoqñsib qolo ti qanam ti pailyoqñsib unub. <sup>6</sup> Ariya nanği qudei nanngo segi jejamu qa areqalo uge uge dauryeqñub. Deqa nanği moiyoqñsib unub. <sup>7</sup> Deqa ni na uña qobul nanği di minjroqñimqa nanği Qotei pailyoqñsibqa kumbra bole bole dauryoqñebe. Nanği kumbra degyqab di nanği tamo ungasari kalil nanngo ñamgalaq di une saiqoji sqab. <sup>8</sup> Ariya ni que. Tamo bei na aqa segi tal qujai nanği gereinjrqaasai di a kumbra tulan ugedamu yqo. A Yesus qa aqa areqalo singilatqa uratobulqo. Ni une. Tamo nanği Qotei qaliesai qaji nanği kumbra uge deqaji yosaieqñub.

<sup>9</sup> O Timoti, ni uña qobul nanngo ñam nenğrenyim Kristen nanği na inği inği qa aqaryainjroqñqab. Ni uña qobul endeqaji nanngo ñam nenğrenye. Nanği uña qeli wausau 60 onub. Nanği nami tamo qujai segi esoqñeb. <sup>10</sup> Nanği wau bole bole yoqñeb deqa nanği tamo ungasari nanngo ñamgalaq di uña bolequja. Nanği na nanngo angro nanği gereinjoqñsib boletnjroqñeb. Tamo lanaj nanği nanngo meq beqñabqa oqñsib gereinjoqñeb. Nanği na Kristen nanngo sinğa yansetnjroqñeb.



Tamo ungasari nanngi gulbe ti sonabqa nanngi na aqaryainjroqneb. Nanngi wau bole bole yqajqa singilaoqneb. O Timoti, ni unja qobul deqaji nanngo ñam nenngrenyim Kristen nanngi na inji inji qa aqaryainjroqñab.

<sup>11</sup> Ariya unja qobul meli nanngi singila bole unub deqa ni nanngo ñam nenngrenyim. Nanngi qudei olo tamo oqajqa are prugnjqreñaqa Kristus qoreiyeqnub. <sup>12</sup> Nanngi nami anjam singilatosib mareb, “Iga olo tamo oqasai. Iga Kristus aqa wau segi ojqom.” Ariya nanngo anjam di nanngi bunuqna uratosib olo tamo oqajqa are prugnjqreñu. Deqa nanngi unetonub. <sup>13</sup> Nanngo kumbra uge bei agiende. Nanngi lalie kobaeqñub. Di segi sai. Nanngi ta talq giloqnsib anjam laña laña maroqnsib yomu anjam quqwajqa tulan arearetnjqreñu. Anjam uge uge iga marqajqa getento qaji di nanngi mare mare laqñub. <sup>14</sup> Deqa e are qalonum, unja qobul meli deqaji nanngi olo tamo osib angrotoqnsib nanngo segi tal gereiyeqñab di kere. Nanngi degyqab di jeu tamo nanngi na Kristen nanngi misilinjrq keresai. <sup>15</sup> Ni qalie, unja qobul meli qudei nanngi Qotei aqa gam bole uratoqnsib olo Satan dauryeqñub. <sup>16</sup> Ariya Timoti, ni que. Ungasari qudei Yesus qa nanngo areqalo singilateqñub qaji nanngo ai nanngi qobulonub. Deqa ni na nanngi minjrimqa nanngi nanngo ai nanngi taqatnjroqnsib inji inji enjroqñab. Yimqa Kristen nanngi na gulbe di qoboiquasai. Unja qobul angro saiqoji unub qaji nanngi segi Kristen nanngi na taqatnjroqnsib inji inji qa aqaryainjroqñab.

*Kristen gate nanngi wau bole yeqñub deqa iga na nanngi gereinjroqñom*

<sup>17</sup> Kristen gate nanngi wau bole yeqñub deqa ni na tamo ungasari nanngi minjrimqa nanngi Kristen gate nanngo ñam soqtetnjroqnsib inji inji qa aqaryainjroqnebe. Kristen gate qudei nanngi Qotei aqa anjam palontqajqa waukobaoqnsib Qotei aqa gam bole tamo ungasari nanngi osornjqreñub. Deqa ni na tamo ungasari nanngi minjrimqa nanngi Kristen gate nanngi di tulan geregereinjroqnebe. <sup>18</sup> Iga qalie, tamo nanngi wauqab di nanngo awai oqab. Agi Qotei aqa anjam bei nami endegsib nenngrenyeb unu, “Makau nanngi waukobaoqnsib inji ñenngi paraparaiyoqnsib aqa sau taqal ateqñub. Deqa ninngi na makau nanngi damu uyqa saidnjraib.” <sup>19</sup> Ariya Timoti, tamo qujai na ni mermqas, “Kristen gate bei a une yqo.” Degsi mermqas di ni aqa anjam quetaim. Ariya tamo aiyel kiyo tamo qalub kiyo nanngi na degsib mermibqa ni nanngo anjam di quetnjre. <sup>20</sup> Kristen gate qudei nanngi une yoqñibqa ni na nanngi joqsim Kristen gate kalil nanngo ulatamuq di tigeltnjrsim nanngo une boleq atsim njirintnjre. Yimqa Kristen gate kalil nanngi ino kumbra di unsib nanngi dego une yqajqa ulaqab.

*Pol na Timoti minjej, “Ni Qotei aqa wau geregere taqatime”*

<sup>21</sup> O Timoti, Qotei aqa lan angro nanği ti Kristus Yesus ombla nanço ıamgalaq di e sinğila na anjam endegsi ni mermqai. Wau kalil e ino banq di atem qaji di ni bole taqatosim wauoqne. Ni que. Ni ino leı qjai nanği ti tamo ıam ti nanği segi geregereinjroqnaim. Ni tamo kalil nanği turtnjrsim geregereinjroqnime. <sup>22</sup> Ni tamo bei a Kristen nanço gate atqa osimqa ino banq aqa gateq di urur ataim. Ni grotqam di a bunuqna une yimqa ni a ombla une oqam. Deqa ni ino segi so geregere taqatosim Qotei aqa ıamgalaq di une saiqoji soqne.

<sup>23</sup> Ariya Timoti, ni mene jaqatinımeqnu deqa ni bunuqna ya segi uyaim. Ni ya ti wain ti turtosim uyoqne. Yim ino mene olo boleqas.

<sup>24</sup> Tamo qudei nanço une boleq di unu. Qotei na tamo nanği di awai uge enjrıas. Tamo qudei nanço une uliejunu. Bunuqna nanço une di dego boleq dqas. <sup>25</sup> Dego kere tamo nanço kumbra bole qudei boleq di unu. Kumbra bole qudei boleq dosaiunu. Kumbra di dego boleq dqas. Kumbra di gaigai uliesqa keresai.

## 6

*Kanğal tamo nanği kumbra bole segi yoqnebe*

<sup>1</sup> Ni na Kristen kanğal tamo nanği minjrimqa nanği nanço wau qa gate nanço ıam soqtoqnsib nanço sorgomq di geregere soqnebe. Yimqa wau qa gate nanği Qotei aqa ıam ti Yesus aqa anjam ti misilinyqa keresai.

<sup>2</sup> Kristen kanğal tamo qudei nanço wau qa gate nanği dego Kristen. Deqa ni na kanğal tamo nanği di minjrimqa nanği endegsib are qalaib, “Gago wau qa gate nanği gago Kristen was. Deqa unğum, iga nanço anjam gotranıyoqnqom.” Nanği degsib are qalaib. Ni na nanği minjrimqa nanği endegsib are qalqab, “Gago wau qa gate nanği Yesus qa nanço areqalo singilateqnu. Deqa iga nanği qalaqalainjroqnqom.” Nanği degsib are qalqab di nanği nanço wau qa gate nanği geregere wauetnjroqnqab. O Timoti, ni ijo anjam di plaltoqnsim Kristen nanği minjroqne.

*Tamo nanği silali koba oqajqa are qalqab di Satan na nanği uneq breinjıas*

<sup>3</sup> Gago Tamo Koba Yesus Kristus aqa anjam kalil bole. Di gisaı anjam sai. Iga anjam di ojgom gam dena iga Qotei aqa kumbra geregere qalieosim dauryqom. Ariya tamo qudei nanği degyosaieqnu. Nanği Yesus aqa anjam di uratoqnsib olo anjam bei Yesus aqa anjam ti ombla kerekereosai qaji di palonteqnu. <sup>4</sup> Tamo deqaji nanği nanço segi areqalo dauryqajqa tulaı arearetnjreınaqa diqoqnsib laqnu. Nanği

powo saiqoji sosibqa anjam qudei qa laña laña ñirinoqnsib ñam qudei qa anjam na qotoqnsib unub. Anjam dena nanjo are ugetetnjreqnaqa nanji qotoqnsibqa misilin anjam koba maroqnsib areqalo uge ti laqnub. <sup>5</sup> Osib nanji gaigai ñirin anjam koba maroqnsib areqalo uge uge na niñaqoqnsib laqnub. Nanji Qotei aqa anjam bole poinjrosai bole sai. Deqa nanji endegsib are qaleqnub, “Iga Qotei aqa kumbra dauryqom gam dena iga ñoro koba ti sqom.” O Timoti, nanjo anjam di gisanj.

<sup>6</sup> Bole, iga Qotei aqa kumbra dauryqom gam dena iga lanj goge qaji ñoro koba oqom. Jexamu qa inji inji Qotei na egeqnu qaji di iga oqnsim mareqnum, “Inji di iga qa kere.” Iga degsi mareqnum gam dena dego iga lanj goge qaji ñoro bole oqom. <sup>7</sup> Iga qalie, iga nami ñambabem di iga inji inji ti ñambabosai. Bunuqna iga moiqom di iga inji inji ti olo moiqasai dego. <sup>8</sup> Deqa iga endegsi marqom, “Iga inji uyo ti gara ti yala eqnum di kere.” <sup>9</sup> Ariya tamo nanji silali koba oqajqa are qaleqnub qaji nanji Satan na walawalainjroqnsiq uneq breinjreqnu. Aliem na wagme nanji ojeleneqnu dego kere. Deqa nanji kumbra uge uge yqajqa are prugnjqreqnaqa kumbra dena nanji tulanj ugetnjreqnu. Mondoñ nanji torei padalqab. <sup>10</sup> Tamo deqaji nanji silali tulanj qalaqalaiyeqnu. Nanjo kumbra di agi kumbra uge uge kalil qa utru. Kumbra dena tamo qudei nanji titnjreqnaqa nanji Yesus qa nanjo areqalo sinjilatqa uratoqnsib gulbe gargekoba iteqnub.

*Tamo unjasari Yesus qa nanjo areqalo sinjilateqnu qaji nanji ñambile bole oqab*

<sup>11</sup> O Timoti, ni Qotei aqa tamo bole unum deqa ni kumbra uge kalil torei qoreiyosim taqal ate. Osim ni kumbra bole bole yoqnsim Qotei aqa kumbra dauryoqnsim a qa ino areqalo sinjilatoqnsim tamo unjasari nanji qalaqalainjroqne. Osim ni sinjila na tigeloqnsim gulbe kalil qoboioqnsim tamo unjasari nanji lawo kumbra osornjroqne. <sup>12-13</sup> Tamo unjasari Yesus qa nanjo areqalo sinjilateqnu qaji nanji sinjila na gurgurobuloqnsib bubuñeqnub. Deqa Timoti, ni sinjila na ururoqne. Osim dena ni ñambile gaigai sqam. Ñambile di Qotei na ni emqajqa are qalsiq metmej. Qotei a na qujai inji inji kalil ñambile enjreqnu. Ni tamo unjasari gargekoba nanjo ñamgalaq di Kristus Yesus aqa ñam ubtoqnem. Deqa Yesus agi nami Pontius Pailat aqa ulatamuq di anjam maroqnej qaji aqa Abu Qotei wo nanjo ñamgalaq di e ni sinjila na endegsi mermqai. <sup>14</sup> Anjam ni qusim ojejunum qaji di ni geregere dauryoqne. Ni anjam di ugetaim. Ugetqasai di tamo nanji ni misilinmqa keresai. Ni anjam di dauryosim gilsim gilsim gago Tamo Koba Yesus Kristus a olo lanj qureq na brantim ni unqam. <sup>15</sup> Yesus

bqajqa bati di Qotei a segi na bati atim a bqas. Gago are boletetgwajqa utru agi Qotei a segi. A segi qujai mandam ti inġi inġi kalil ti taqatejunu. A mandor kokba kalil nanġo Mandor Koba. A tamo kokba kalil nanġo Tamo Koba. <sup>16</sup> A segi qujai moiyoſaieqnu. A suwaŋoq di unu. Aqa suwaŋ di kobaquja. Deqa iga aqa areq di brantqa keresai. Tamo bei na nami aqa ulatamu unosaioqnej. Tamo bei na a unqa keresai. Deqa iga kalil gaigai aqa ñam soqtoqnqom. A bati gaigai ſiŋgila koba ti sqas. Bole.

*Ñoro tamo nanġi Qotei qa nanġo areqalo ſiŋgilatoqnebe*

<sup>17</sup> O Timoti, ni na Kristen tamo unġasari mandam qa ñoro koba ejunub qaji nanġi endegsim minjre, “Niŋgi diqosib nuŋgo segi ñam soqtaib. Nuŋgo ñoro urur koboqas deqa niŋgi ñoro qa are ſiŋgilataib. Niŋgi Qotei qa nuŋgo areqalo ſiŋgilatosib soqniy. Qotei na inġi bole bole kalil iga egeqnaqa iga oqnsim areboleboleigeqnu. <sup>18</sup> Deqa niŋgi kumbra bole bole yoqnsib tamo unġasari nanġi aqaryainjroqniy. Osib gaigai nuŋgo inġi inġi jeiyuqnsib tamo unġasari inġi inġi qa truqueqnu b qaji nanġi enjroqniy. Mandam qa ñoro a inġi bole edegaib. Inġi bole agi tamo unġasari aqaryainjrqaqja kumbra.” O Timoti, ni na tamo unġasari mandam qa ñoro koba ejunub qaji nanġi deqsim minjroqne. <sup>19</sup> Nanġi ino anjam di dauryqab di mondoŋ nanġi laŋ goge qaji inġi inġi tulaŋ koba koroiyib inġi inġi dena nanġi tulaŋ aqaryainjrqaſ. Yimqa nanġi ŋambile bole gaigai sqab.

*Pol na Timoti minjej, “Ni Qotei aqa wau geregere taqatesoqne”*

<sup>20</sup> O Timoti, Qotei na ni wau emej deqa ni wau di geregere taqatesoqne. Tamo qudei nanġi anjam uge laŋa laŋa mareqnu b deqa ni nanġo anjam di qoreiye. Tamo nanġi di mareqnu b, “Iga powo bole ti unum.” Di gisaŋ. Nanġi Qotei jeutoqnsib aqa areqalo dauryqa asġinjreqnu. <sup>21</sup> Tamo deqaji nanġi Yesuſ qoreiyuqnsib a qa nanġo areqalo ſiŋgilatqa urateqnu b.

O ijo was, Qotei a niŋgi kalil qa are boleiyeme. Bole.

## 2 TIMOTI

<sup>1</sup> E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej deqa e na tamo ungasari nanği endegsi minjreqnum, “Ninği Kristus Yesus qa nuńgo areqalo sinğilatqab di ninği ńambile oqab.” Nambile di Qotei a nami iga egwa marej.

<sup>2</sup> O Timoti, ni ijo anğro bole bulonum. E anjam endi nenğrenyosim inoq qarınyonum. Tamo Koba Kristus Yesus aqa Abu Qotei wo nanği aiyel ni qa dulosib are boleinjrimqa ni lawo na soqnime.

*Iga Yesus aqa anjam bole qa jemaigwasai*

<sup>3</sup> Ijo moma nanği nami Qotei aqa wau ojoqneb dego kere e bini Qotei aqa wau ojeqnum. Ijo moma nanğo are miligiq di nanği qalieeb, nanği Qotei aqa ńamgalaq di une saiqoji soqneb. E segi dego ijo are miligiq di degsi qalieonum. Deqa Timoti, e qolo ti qanam ti Qotei pailyoqnsim ni qa are qaloqnsim Qotei binıyeqnum. <sup>4</sup> Nami e ni uratmqa laqnamqa ni e qa are ugeimonaqa akamem. E deqa are qaloqnsim ni olo numqajqa are koba unu. E ni numsiyqa tulan areboleboleibqas. <sup>5</sup> Nami ino moma Lois wo ino ai Yunis wo nanği aiyel Yesus qa nanğo areqalo sinğilatoqneb dego kere bini ni Yesus qa ino areqalo sinğilateqnum. Utru deqa e ni numqajqa are qaloqnsim unum. <sup>6</sup> Nami e ijo ban ino gateq di atnamqa Qotei na ni aqa wau ojajqa deqa sinğila emej. Deqa e ino areqalo tigeltetmitqa ni sinğila deqa olo are qaloqnsim wau di sinğilatoqne. Tamo a ńam puyim pulońosim kobaqas dego kere ni ino wau di olo sinğilatim kobaqas. <sup>7</sup> Ni qalie, Qotei na iga ulaqajqa deqa aqa Mondor egosai. Iga sinğila ti qalaqalaiyo kumbra ti areqalo bole ti sqajqa deqa osiq aqa Mondor egej.

<sup>8</sup> Deqa ni gago Tamo Koba aqa anjam qa jemaimaiq. Ni e qa dego jemaimaiq. E Yesus aqa anjam mare mare laqnem deqa jeu tamo nanği na e ojsib tonto talq endi waibeb unum. Deqa ni na e beterbosim Qotei aqa sinğila ti sosim Yesus aqa anjam bole mare mare laqne. Osim dena ni e ombla gulbe oqnsim sqom. <sup>9</sup> Qotei na iga elenosiqa iga aqa segi kumbra boleq di sqajqa deqa are qalsiq metgej. Iga wau bole bole yoqnem Qotei a deqa osiq iga metgosai. Tulan nami a inği inği kalil atosaisosiqa a aqa segi areqalo na iga metgej. Osiq iga qa are boleiyosiqa Kristus Yesus qarınyosiq dena iga elenjej. <sup>10</sup> Bati kereonaqa Kristus Yesus agi iga elenjej qaji a boleq dosiq moiyo aqa sinğila kobotej. Aqa kumbra dena Qotei a iga qa are boleiyej. E Yesus aqa anjam bole mare mare laqnum

gam dena tamo ungasari nanqi endegsi poinjreqnu, “Bole, iga moiqasai. Iga nambile gaigai sqom.”

<sup>11</sup> E Yesus aqa anjam bole palontqajqa ti plaltqajqa ti deqa Qotei na e giltbej. <sup>12</sup> Deqa unqum, e gulbe oqnsiy sqai. E deqa jemaibqasai. E Yesus qa ijo areqalo singilateqnum. E a qa qalie bole. A e wau ebej deqa e qalieonum, a na wau di geregere taqatoqnsim gilsim a olo bqajqa bati brantqas.

<sup>13</sup> O Timoti, anjam bole kalil e nami ni mermoqnem qaji di ni geregere dauryoqnsim palontoqne. Osim Kristus Yesus qa ino areqalo singilatoqnsim a qalaqalaiyoqne. <sup>14</sup> Qotei na aqa anjam bole di ino banq di atej. Anjam di tulan bolequja. Deqa ni anjam di geregere taqatesoqne. Mondor Bole agi gago are miligiq di unu qaji a na ni aqaryaimoqnmqa ni Qotei aqa wau geregere ojsim laqne.

<sup>15</sup> Ni qalie, tamo kalil Esia sawaq di unub qaji nanqi e uratbosib jaraiyeb. Figelus Hermogenes wo nanqi aiye dego e uratbosib jaraiyeb.

<sup>16</sup> E endegsi pailyeqnum, “O Tamo Koba, ni Onesiforus aqa tal qujai nanqi qa dulame.” O Timoti, Onesiforus a bati gargekoba ijo are boletetboqnej. E tonto talq di soqnem bati deqa a e qa jemaiyosai. <sup>17</sup> A Rom qureq bosiq dia e qa namosiq itbej. <sup>18</sup> Deqa e a qa endegsi pailyeqnum, “O Tamo Koba, mondon ni na tamo ungasari nanqi peginjrqa batiamqa ni Onesiforus a qa dulame.” O Timoti, nami Efesus qureq di dego Onesiforus a e qa wau gargekoba yoqnsiq aqaryaiboqnej. Di ni qalie.

## 2

*Pol na Timoti minjej, “Ni Yesus aqa qoto tamo bulosim gulbe qoboiyesoqne”*

<sup>1</sup> O ijo anqro Timoti, Kristus Yesus a iga qa are boleiyeqnu aqa kumbra dena ni singilatmoqne. <sup>2</sup> E tamo gargekoba nanqo nangalaq di Qotei aqa anjam palontoqnem di ni quonem. Anjam di ni na olo tamo qudei Yesus bole dauryeqnub qaji nanqi dego minjroqnmqa nanqi kamba tamo qudei nanqi minjroqnaq.

<sup>3</sup> Ni e ombla Kristus Yesus aqa qoto tamo bulosim gulbe qoboiyesoqne. <sup>4</sup> Qoto tamo nanqo kumbra di ni qalie. Nanqi qotqajqa wau ojoqnsib olo wau bei qa are qalosaieqnub. Nanqi qotqajqa wau segi ojeqnub. Deqa nanqo gate a nanqi qa tulan areboleboleiyeqnu. <sup>5</sup> Tamo bei bei wo gurgurosib hubunjosib bei na bei bunyosim di a awai oqas. A ururqajqa kumbra geregere dauryqasai di a awai oqasai. <sup>6</sup> Tamo bei a wuosim ingi yagwas di ingi meliamqa a osim uyqas. Deqa tamo lanaj bei a namoqna bosim ingi uyqasai. <sup>7</sup> O Timoti, ijo

anjam e ni mermeqnum qaji endi ni qusim ino areqaloq di singilatime. Yimqa Tamo Koba a na powo emimqa ni ijo anjam kalil endi gegerere poimqas.

<sup>8-9</sup> Ni gaigai Yesus Kristus qa are qaloqne. A moisiq olo subq na tigelej. A Mandor Koba Devit aqa moma. E aqa anjam bole palontoqnsim laqnam jeu tamo nanqi na e tamo uge bul nuboqnsib gulbe koba eboqneb. Deqa nanqi na e ojsib tonto talq endi waibeb unum. Ariya nanqi Qotei aqa anjam getentqa keresai. <sup>10</sup> E tamo unqasari Qotei na giltnjrej qaji nanqi qa are qaloqnsim gulbe kalil qoboieqnum. E degyeqnum. Di kiyaaqa? Qotei na nanqi elenjamqa nanqi Kristus Yesus aqa ñam na ñambile osib a ombla so bole gaigai sqajqa deqa.

<sup>11</sup> Qotei aqa anjam bei unu. Anjam di gisañ sai. Anjam di bole. Deqa iga gago areqaloq di singilatqa kere. Anjam agiende.

“Iga Yesus ombla moiyoqbulen deqa iga a ombla olo ñambile gaigai sqom.

<sup>12</sup> Iga gulbe kalil qoboioqnsim singila na tigelesqom di mon-don iga Yesus ombla mandor kokba sqom.

Iga a qoreiyqom di a na kamba iga qoreigwas.

<sup>13</sup> Iga aqa anjam dauryqa marsimqa olo dauryqa uratqom di Yesus a segi aqa anjam uratqa keresai. A dauryoqnsim sqas.”

*Pol na Timoti minjej, “Ni Qotei aqa wau tamo bole soqne”*

<sup>14</sup> O Timoti, Kristen nanqi ijo anjam deqa are walnjraim deqa ni na gaigai minjroqne. Osim Qotei aqa ñamgalaq di nanqi endegsim minjroqne, “Ñinqi anjam qudei qa laña laña ñirinjoqnaib. Osib ñam qudei qa anjam na qotoqnaib. Anjam dena ñinqi aqaryainqwa keresai. Ñinqi anjam di qusib dauryqab di nunqo areqalo niñaqesqas.”

<sup>15</sup> O Timoti, ni Qotei aqa wau tamo boledamu sosimqa aqa anjam bole gegerere palontoqnaqajqa singilaoqne. Yim Qotei a ino wau kalil qa tulañ arearetoqnaqas. Deqa ni aqa ñamgalaq di jemaimqasai. <sup>16</sup> Tamo qudei nanqi anjam uge laña laña mareleñeqnub deqa ni nanqo anjam di qoreiye. Nanqo anjam di tulañ ugedamu. Anjam dena tamo unqasari nanqi are prugtetnjroqnim nanqi Qotei aqa kumbra torei uratoqnaqab. <sup>17</sup> Anjam di yu uge bulosim tulañ kobaqujaosim tamo unqasari nanqi ugeuqinjoqnaqas. Tamo aiyel anjam uge deqaji mareq-nub agi Himeneus Filetus wo. <sup>18</sup> Nanqi aiyel anjam bole qa gam uratosib gisañ anjam endegsib mareq-nub, “Tamo unqasari kalil nanqi nami subq na tigeleb koboej. Deqa nanqi olo bunuqna subq na tigelqasai.” O Timoti, gisañ anjam dena

tamo ungasari qudei nami Yesus qa nanngo areqalo sinjilateb qaji nanngo areqalo olo niñaqyetnjreanu.

<sup>19</sup> Qotei aqa segi tamo ungasari nanngi tal ai bulosib sinjila na tigelejunub. Tal aiq di Qotei aqa anjam endegsib nenngrenyeb unu, “Tamo Koba a aqa segi tamo ungasari nanngi qa qalie bole.” Anjam bei dego tal aiq di nenngrenyeb unu, “Tamo kalil Tamo Koba aqa ñam ejunub qaji nanngi kumbra uge uge qoreiyebe.”

<sup>20</sup> E yawo anjam bei mermqai. Tal kobaquja bei miligiq di tabir qudei gol na ti silva na ti gereiyeb. Tabir qudei ñamtañ na gereiyeb. Tabir qudei jagi na gereiyeb. Tabir qudei wau bole qa gereiyosib olo tabir qudei wau kiñilala qa gereiyeb. <sup>21</sup> Deqa tamo bei a kumbra uge kalil uratosim Qotei aqa ñamgalaq di une saiqoji sqas di a tabir wau bole qa gereiyeb qaji di bul sqas. Deqa a ñam bole osim Qotei aqa segi kumbra boleq di sosim Gate Koba Yesus geregere wauetoqnqas. A wau bole kalil yoqnqajqa tulañ kere na sqas.

<sup>22</sup> Deqa Timoti, areqalo uge uge angro wala nanngi dauryeqnub qaji di ni na qoreiye. Osim ni kumbra bole yoqnqajqa wauoqnsim Qotei qa ino areqalo sinjilatoqnsim tamo ungasari nanngi qalaqalainjroqnsim lawo na soqne. Tamo ungasari are bole ti sosib Tamo Koba aqa ñam na pailyeqnub qaji nanngi ni ombra kumbra kalil di yoqniy. <sup>23</sup> Tamo ungasari areqalo bole ti sosai qaji nanngi nanari anjam laña laña mareleñeqnub deqa ni nanngo anjam di quoqnaim. Ni qalie, anjam dena qoto ti ñirinñ ti tigelteqnu. <sup>24</sup> Tamo Koba aqa wau tamo nanngi anjam na qotoqnsib ñirinoqnaib. Nanngi na tamo ungasari kalil nanngi kumbra bole bole enjroqnsib Qotei aqa anjam plaltosib minjroqnebe. Tamo qudei na nanngi gulbe enjribqa nanngi deqa ñirinoqnaib. Nanngi kamba olo kumbra lawo nanngi osornjroqnebe. <sup>25</sup> Nanngi lawo na Qotei aqa anjam gotranño qaji tamo nanngo areqalo olo gereiyetnjroqnebe. Yim Qotei na nanngo are bulyetnjrimqa nanngi aqa anjam bole poinjrim dauryqab. <sup>26</sup> Nami Satan a tamo nanngi di sinjila na ojesonaqa nanngi aqa anjam dauryoqnebe. Deqa Qotei aqa wau tamo nanngi lawo na nanngi tingitnjribqa nanngi Qotei aqa anjam bole qa poinjrim olo areqalo bole osib Satan aqa banq dena jaraiyosib sawa boleq di sqab.

### 3

*Diño bati jojomoqnmqqa tamo nanngi kumbra uge uge yoqnqab*

<sup>1</sup> O Timoti, ni endegsi poimem. Mondonñ diño bati jojomoqnmqqa gulbe gargekoba mandamq endi brantelenqab.

<sup>2</sup> Tamo nanngi kumbra uge uge endeqaji yoqnqab. Nanngi



nanjo segi jejamu qa tulan areboleboleinjroqngas. Nanji silali koba oqajqa are prugnjoqngas. Nanji nanjo segi ñam soqtoqnsib diqoqnsib ñirin anjam koba maroqnsib tamo nanji misilinjnroqngab. Nanji nanjo ai abu nanjo anjam gotranjoqngab. Tamo qudei na nanji aqaryainjroqngabqa nanji kamba olo nanji qa are boleinjroqngasai. Nanji Qotei aqa kumbra bole kalil qoreiyogngab. <sup>3</sup> Nanji qalaqalaiyo kumbra dauryqa uratoqngab. Nanji ñiriñoqnsib jeu atoqnsib olo jeu turyogngasai. Nanji yomu anjam gargekoba maroqnsib nanjo segi jejamu taqatqajqa asginjroqngas. Nanji laña laña qotoqnsibqa tamo nanji ñumoqnsib kumbra bole jeutoqngab. <sup>4</sup> Nanji tamo qudei nanji ugeugeinjroqngab. Nanji urur kumbra uge uge yoqngab. Nanji kumbra di yqajqa ulaogngasai. Nanji nanjo segi ñam soqtoqnsib mandam qa inji inji qa tulan areboleboleinjroqngas. Nanji Qotei qa yala arearetnjroqngasai. <sup>5</sup> Nanji laña baban na Qotei aqa kumbra bole dauryobuloqnsib sqab. Kumbra bole aqa singila nanji yala poinjrqasai. O Timoti, tamo deqaji brantoqngabqa ni na nanji beternjraim. Torei uratnjrsim isaq gile.

<sup>6</sup> Tamo deqaji nanji kumbra uge endegyegngub. Nanji unja qudei nanjo tal miligiq giloqnsib nanji walawalainjroqnsib areqalo titetnjreqngub. Unja nanji di areqalo bole ti sosai. Nanji une gargekoba yeqngab nanjo une dena nanji singila na ojeqnaqa nanji kumbra uge uge yqajqa are prugnjqrengnu. <sup>7</sup> Unja nanji di gaigai qalie oqajqa are qaloqnsib ariya nanji anjam bole aqa utru poinjrqa keresainjreqngnu. <sup>8</sup> Gisan tamo nanji di Qotei qa nanjo areqalo singilatosaieqngub. Nanjo areqalo tulan niñaqejunu. Nami Janes Jambres wo nanji aiyel Moses jeutoqneq dego kere gisan tamo nanji na Qotei aqa anjam bole jeuteqngub. <sup>9</sup> Ariya nanjo kumbra di tulan kobaqngasai. Nami Janes Jambres wo nanji aiyel kumbra deqaji yeqngabqa tamo ungasari kalil nanji unoqnsib maroqneq, “Nanjo kumbra di nanari.” Dego kere gisan tamo nanji kumbra uge uge yoqngabqa tamo ungasari kalil nanji unoqnsib maroqngab, “Nanjo kumbra di nanari.”

*Pol na Timoti minjeq, “Ni Qotei aqa anjam singila na ojesoqne”*

<sup>10</sup> O Timoti, ni nami e ombla soqngem deqa ijo anjam kalil e na plaltoqngem qaji di ni qalie. Ijo walwel ti ijo kumbra ti di ni qalie bole. E Qotei qa ijo areqalo singilatoqngsim ijo are miligi dego gaigai singilatoqngsim waukobaoqngem. Osim tamo ungasari nanji qalaqalainjroqngsim singila na tigelogngsim gulbe qoboiyoqngem. Di ni qalie bole. <sup>11</sup> Antiok qure ti Aikoniam qure ti Listra qure ti dia jeu tamo nanji na e kumbra uge uge ebeqngabqa e jaqatin koba oqngem. Qure

qureq di kumbra uge kalil e qa brantoqnej qaji di ni qalie. Ariya bati deqa Tamo Koba a na e aqaryaiboqnsiqa gulbe kalilq dena e oqnsiq taqal atoqnej. Deqa bini e bole unum. <sup>12</sup> Ni qalie, jeu tamo nanği na tamo unğasari kalil Kristus Yesus beteryesosib Qotei aqa kumbra dauryqa singilaeqnuq qaji nanği ugeugeinjroqñqab. <sup>13</sup> Tamo uge uge nanği ti gisañ tamo nanği ti tulañ ugeoqñqab. Ugeoqnsib gisañ anjam gargekoba maroqñib Satan na kamba dego nanği olo gisa gisañjroqñqas. Yim nanço kumbra di tulañ ugedamuqas.

<sup>14</sup> Ariya Timoti, anjam iga nami ni mermonam qusim ino areqaloq di singilatam qaji di ni olo singila na ojesoqne. Ni iga qa bole qalieonum deqa ni degyoqne. <sup>15</sup> Nami ni anğro kiñala sosimqa ni Qotei aqa anjam nenğrenç di so qaji di qalieosim bosim agi qalieosim unum. Anjam dena ni powo bole emonaqa ni Kristus Yesus qa ino areqalo singilatamqa Qotei na ni padalo sawaq dena ej. <sup>16</sup> Qotei aqa anjam kalil nenğrenç di so qaji di Mondor a segi na babtej. Anjam dena iga aqaryaigoqnsiqa gam bole osorgoqnsiqa gago areqalo tingitetgeqnu. Osiqa gago walwel gereiyetgoqnsiqa iga kumbra bole dauryqajqa singilatgeqnu. <sup>17</sup> Deqa anjam dena Qotei aqa tamo unğasari nanği keretnjreqnaqa nanği kumbra bole kalil yoqnsib wau bole bole ojeqñub.

## 4

*Pol na Timoti minjej, “Ni Yesus aqa anjam palontqajqa tulañ singilaoqne”*

<sup>1</sup> Qotei aqa Niri Kristus Yesus wo nanço ñamgalaq di e ni singila na endegsi mermqai. Mondonç Yesus a lañ qureq na brantosim tamo unğasari kalil ñambile so qaji nanği ti nami moreñeb qaji nanği ti peginjrqas. Osim a bati gaigai Mandor Koba sqas. <sup>2</sup> Deqa ni Yesus aqa anjam palontoqne. Tamo unğasari nanği ino anjam quqwa arearetnjroqñqas kiyo asginjroqñqas kiyo di unğum. Ni na nanği tingitnjroqñsim dalnjroqñsim are tigeltetnjroqne. Ni asgimaiq. <sup>3</sup> O Timoti, ni que. Bunuqna tamo gargekoba nanği Qotei aqa anjam quqwa asginjroqñimqa olo anjam utru bei bei quqwajqa are prugnjroqñqas. Osib nanço segi areqalo dauryosib anjam plalto tamo qudei nanği metnjroqñib bosib gisañ anjam minjroqñib qusib arearetnjroqñqas. <sup>4</sup> Deqa nanği anjam bole quqwa uratosib laña sa anjam quqwajqa dab atoqñqab. <sup>5</sup> Ariya Timoti, ni kumbra degyaim. Ni gaigai areqalo bole na sosimqa gulbe ti jaqatinç ti qoboioqne. Osim ni na Yesus aqa anjam bole tamo unğasari nanği minjre minjre laqne. Ni nanği aqaryainjrqajqa wau ti unum deqa ni wau di keretosim yoqne.

*Pol a moiqa bati jojomej*

<sup>6</sup> Ni qalie, jeu tamo nanġi na e lubsib moiyoṭbqa bati jojomqo. Israel nanġi wain bilentoqnsib Qotei atraiyeqṇub dego kere e moisiyqa ijo leṇ aiqas qaji dena Qotei atraiyobulqai. <sup>7</sup> Tamo nanġi gurguroqnsib bubuṇeqṇub dego kere e nami siṅgila na ururosīm Yesus dauryoqṇem aġi bini e degyeqṇum. E ijo wau kalil kobotonum. E Qotei qa ijo areqalo siṅgilatoqṇem di e uratosaiyoqṇem. Aġi bini e ijo areqalo di siṅgila na ojejunum. <sup>8</sup> Tamo nanġi gurguroqnsib bubuṇeqṇub di nanġi awai oqajqa. Ijo awai bole aġi Qotei a laṇ qureq di atej unu. E awai di oqajqa tariṇoqṇsim unum. Ijo awai aġiende. Mondon Tamo Koba a na e tamo bole une saiqoġi qa merbqas. Di ijo awai bole. Tamo Koba a kumbra bole tintiṇ na tamo unġasari nanġi peginjrqas. Peginjrqas bati deqa a awai bole di e ebqas. A e segi awai ebqasai. Tamo kalil Yesus a laṇ goge na brantim unqajqa deqa areboleboleinjreqṇu qaji nanġi dego awai bole enjrqas.

*Pol na Timoti minjej, “Ni ijoq urur au”*

<sup>9</sup> O Timoti, ni ijoq urur au. <sup>10</sup> Ni que. Demas a mandam endeqa kumbra qa tulaṇ areareteqṇu. Deqa a na e uratbosiqa Tesalonaika qureq gilej. Kresens a Galesia sawaq gilej. Taitus a Dalmesia sawaq gilej. <sup>11</sup> Aqo Luk wo segi unum. Deqa ni Mak osimqa endeq boiy. Mak a tamo bole. A na e aqaryaiboqnsiqa wau bole yeqṇu. <sup>12</sup> Tikikus aġi e na qarinyonam Efesus qureq aiyej.

<sup>13</sup> Ni ijoq bqa osimqa ijo gara jugo Troas qureq di uratem qaji di osim osau. Aġi Karpus aqa talq di uratem unu. Ijo buk qudei dego osau. Ariya ijo pepa lulumo qudei wagme nanġo jegara na gereiyo qaji di dego osim osbetbe. Ni are walmaiq.

<sup>14</sup> Bras na inġi inġi gereiyo tamo aqa ñam Aleksander a na e ugeugeiboqnej. Deqa mondon Tamo Koba a na kamba Aleksander ṇolawotqas. <sup>15</sup> Aleksander a nami iġa jeutgoqnsiqa gago anjam tulaṇ ugeugeiyoqnej. Deqa ni a qa geregere ṇam atoqne.

<sup>16</sup> Jeu tamo nanġi nami e ojsib anjam pegiyo talq di tigeltbeb bati deqa tamo bei na e taqbosai. Tamo kalil nanġi e uratbosib jaraiyeb. Deqa e Qotei endegsi pailyem, “O Abu, ni nanġo une deqa olo kambatnjraime.” E degsi Qotei pailyem. <sup>17</sup> Ariya Tamo Koba Yesus a segi na e taqbosiqa siṅgila ebej deqa e anjam pegiyo talq di tigelosim Yesus aqa anjam bole mareqnamqa sawa bei bei qaji nanġi quoqneb. Qotei na e aqaryaibosiqa baun juwan nanġo medabuq na e osiq taqal waibej. <sup>18</sup> Deqa e endegsi qalieonum. Jeu tamo nanġi boqnsib kumbra uge uge ebqa maroqṇib Qotei na e aqaryaiboqṇsim nanġo baṇq dena e oqṇsim taqal waiboqṇqas. Osim bunuqna

a na e laɗ qureq osi oqsim dia e taqatbosim ijo Mandor Koba sqas. Deqa iga bati gaigai aqa ñam soqtoqnqom. Bole.

<sup>19</sup> O Timoti, ni na ijo kaiye anjam endi osim tamo naɗgi Onesiforus aqa talq di unub qaji naɗgi ti Prisila Akwila wo naɗgi koba na minjime. <sup>20</sup> Erastus a Korin qureq di unu. Trofimus a Miletus qureq di ma ti sonaq e na uratem unu.

<sup>21</sup> Ni ijoq urur boqumat. Ni tariñoqnim ulili bati bo uge.

Yubulus na Pudens na Linus na Klodia na naɗgi qolqe Kristen tamo kalil naɗgi ti koba na kaiye anjam endi inoq qarinyonub.

<sup>22</sup> Tamo Koba a na ino qunuɗ geregere taqateme. Osim niɗgi kalil qa are boleiyeme. Bole.

## TAITUS

<sup>1</sup> E Pol. E Qotei aqa wau tamo. Yesus Kristus na e qarınbej deqa e aqa anjam mare mare laqnum. Tamo ungasari Qotei na gıltnjrej qaji nanđi aqa anjam minjroqnitqa qusib Yesus qa nanđo areqalo sıngilatqajqa deqa qarınbej. E na nanđi aqaryainjritqa nanđi Qotei aqa anjam geregere qalieosib aqa kumbra dauryqajqa deqa ti qarınbej. Qotei aqa anjam di gısanı sai. Di anjam bole. <sup>2</sup> E na nanđi aqaryainjritqa nanđi nambile gaigai sqajqa deqa e waueqnum. Nanđi nambile di oqajqa tarınoqnsib unub. Tulađ nami Qotei a ınđi ınđi kalil atosaisosıqa a na nambile di ıga egwajqa marej. A bole marej. A gısaıosaieqnu. <sup>3</sup> Bati kereonaqa a na aqa anjam maro tamo nanđi wau enjrej. Kumbra dena a na aqa segi anjam babtej. A na e dego wau ebej deqa e aqa anjam mare mare laqnum. Anjam dena a na ıga padalo sawaq na elenej.

<sup>4</sup> O Taitus, e anjam endi nengrenjyosim inoq qarınyonum. Aqo ombla Kristen tamo ungasari kalil nanđi koba na areqalo qujaitosim Yesus qa gago areqalo sıngilateqnum. Deqa ni ıjo anđro bole bul. Gago Abu Qotei wo Kristus Yesus ađi ıga elenej qaji wo nanđi aiyel ni qa are boleınjrimqa ni lawo na soqnime.

### *Pol na Taitus minjej, “Ni na Kristen nanđo gate atelenj”*

<sup>5</sup> O Taitus, e ni Krit nuiq di uratmem unum. Krit nuiq di Qotei aqa wau koboosai unu. Deqa ni na wau di kobotosim qure segi segiq di Kristen nanđo gate atelenj. Ađi e nami wau deqa ni mermem. <sup>6</sup> Deqa ni unime. Ni tamo bei a Kristen nanđo gate atqa osımqa a peleiyosim aqa kumbra kalil unsim di ni a gate ate. Tamo di a tamo ungasari kalil nanđo nımgalaq di une saıqoji soqneme. A unı aiyeltaıq. Aqa anđro nanđi Yesus qa nanđo areqalo sıngilatosib soqnebe. Nanđi kumbra uge uge yoqnaib. Nanđi diqoqnsib nanđo ai abu nanđo anjam gotranıyoqnaib. <sup>7</sup> Ni qalie, Kristen nanđo gate nanđi Qotei aqa wau taqateqnum. Deqa ni tamo bei a gate atqa osımqa ni aqa kumbra endeqaji unsim a gate ate. A tamo ungasari kalil nanđo nımgalaq di une saıqoji unu. A aqa segi nıam soqtosaieqnu. A Kristen tamo ungasari nanđi nırın taqatnjrosaisieqnu. A urur minjın oqetosaieqnu. A ya uge uyoqnsıq nanariosaisieqnu. A qoto ani tamo sai. A silali koba oqnqajqa tulađ arearetosaisieqnu. <sup>8</sup> Tamo lanaj nanđi aqa meq beqnaıba oqnsıq geregereınjreqnu. A kumbra bole bole dauryqajqa are qaloqnsıq areqalo bole ti unu. A kumbra tıntın ti Qotei aqa segi kumbra bole ti di dauryqajqa tulađ

areareteqnu. A aqa segi so geregere taqateqnu. <sup>9</sup> A Yesus aqa anjam bole iga plalteqnum qaji di singila na ojeqnu. Deqa a anjam di geregere palontoqnsiq Kristen nanjo are tigeltetnjreqnu. Tamo qudei nanji anjam di gotranjyeq nab a na nanji tingitnjroqnsiq dalnjreqnu.

*Krit nuiq di tamo gargekoba nanji gisanjreqnub*

<sup>10</sup> O Taitus, Krit nuiq di anjam gotranjo qaji tamo gargekoba unub. Tamo nanji di anjam laja laja maroqnsib tamo ungasari nanji gisa gisanjreqnub. Tamo nanji di Juda tamo. Deqa nanji na tamo muluj breinjraqajqa tulan singilaeq nub. <sup>11</sup> Nanji na Kristen nanjo silali yainjrqa are qaloqnsib anjam uge uge iga marqajqa getento qaji di plaltoqnsib minjreqnub. Nanji degyeq nub deqa nanji na Kristen qudei nanjo angro ti nanjo was nanji ti areqalo ugetetnjreqnabqa nanji Qotei aqa gam bole olo urateq nub. Deqa Taitus, ni na tamo uge deqaji nanjo medabu getentosim saidnjre. <sup>12</sup> Nami Krit nuiq di qalie tamo bei a anjam endegsi marej, “Krit tamo kalil nanji gisanj ani. Nanji tamo uge. Nanji wagme juwan bul. Nanji qunjan bolet. Nanji wauqa asgim ani.” <sup>13</sup> O Taitus, aqa anjam di bole. Deqa ni singila na tamo uge uge nanji tingitnjroqne. Yimqa nanji Yesus qa nanjo areqalo geregere singilatqab. <sup>14</sup> Osib nanji Juda nanjo gisanj anjam ti tamo nanji Qotei aqa anjam bole qoreiyeq nub qaji nanjo dal anjam ti quqwa uratqab.

<sup>15</sup> Tamo ungasari Qotei aqa njamgalaq di jiga saiqoji unub qaji nanji qalie, ingi uyo kalil jiga saiqoji unu. Deqa nanji oqnsib uyeq nub. Ariya tamo ungasari kumbra jigat dauryoqnsib Yesus qa nanjo areqalo singilatosaieq nub qaji nanji torei jiga ti. Deqa nanji mareq nub, “Ingi ingi kalil jigat.” Nanjo areqalo ti nanjo are miligi ti tulan jigat. <sup>16</sup> Nanji segi mareq nub, “Iga Qotei qa qalie bole.” Di gisanj. Nanji kumbra uge uge yeq nub dena iga poigeqnu, nanji Qotei qoreiyeq nub. Deqa Qotei na nanji torei walinjreqnu. Nanji Qotei aqa anjam gotranjo qaji tamo unub. Nanji kumbra bole bei dauryqa keresai bole sai.

## 2

*Tamo qeli nanji kumbra bole bole yoqnebe*

<sup>1</sup> O Taitus, ni Qotei aqa anjam bole plaltoqne. <sup>2</sup> Ni na tamo qeli nanji anjam endegsim minjroqne, “Ningi nunjo so geregere taqatiy. Osib areqalo bole ti sosib kumbra bole bole yoqniy. Ningi Qotei aqa anjam bole geregere qalieosib qalaqalaiyo kumbra yoqnsib gulbe kalil qoboioqnsib singila na tigelesoqniy.” O Taitus, ni na tamo qeli nanji anjam degsim minjroqne.

<sup>3</sup> Ni na uña qeli nanği anjam endegsim minjroqne, “Kumbra bole kalil Qotei a areareteqnu qaji di ninği dauryosib soqniy. Ninği yomuqnaib. Wain uyoqnsib nanarioqnaib. Ninği na Kristen nanği kumbra bole osornjroqniy. <sup>4-5</sup> Osib uña meli nanği dalnjribqa nanği kumbra endegsib yoqnebe. Nanği nanço tamo ti nanço ançro ti qalaqalainjroqnebe. Nanği areqalo bole na walwelosib Qotei aqa nçamgalaq di une saiçoji soqnebe. Nanği Kristen nanği gereinjroqnebe. Nanği nanço tal geregere taçatosib nanço tamo nanço anjam dauryoqnebe. Nanği kumbra bole degyoqñibqa nanço tamo nanği na unjrsibqa Qotei binjyosib aqa anjam yomuiyqa uratqab.” O Taitus, ni na uña qeli nanği anjam degsim minjroqñime.

*Pol na Taitus minjej, “Ni kumbra bole yoqñim ançro meli nanği unsib dauryoqñab”*

<sup>6</sup> Ariya ni na ançro meli nanği dego are tigeltetnjroqñimqa nanği areqalo bole na walweloqnebe. <sup>7</sup> O Taitus, ni kumbra bei yqa osimqa kumbra bole segi yoqne. Yimqa ançro meli nanği ino kumbra di unoqnsib dauryoqñqab. Ariya ni gisañ anjam maroqñaim. Ni anjam palontqa osimqa anjam bole segi palontqne. Alañ anjam koba maroqñaim. Diçoqñaim. Areqalo bole ti sosim kumbra bole bole yoqne. <sup>8</sup> Ni anjam bole segi palontqñimqa tamo nanği ino anjam di uge qa marqa keresai. Deqa jçu tamo nanği na iga yomuigwa kere-saiinjrimqa nanği jemainjrqas.

*Kançal tamo nanği gaigai nanço wau qa gate nanço sorgomq di soqnebe*

<sup>9</sup> O Taitus, ni na kançal tamo nanği anjam endegsim minjroqne, “Ninği gaigai nuñço wau qa gate nanço sorgomq di sosibqa wau bole bole nanği arearetnjreçnu qaji di yoqniy. Ninği nanço medabu ojoqnaib. <sup>10</sup> Osib nanço inçi bei bajinçaij. Ninği nanço anjam geregere dauryosib nanği kumbra bole bole enjroqniy. Yimqa nanği nuñço kumbra deqa tulañ areboleboleinjrqas. Ninği kumbra bole kalil yoqñibqa nuñço wau qa gate nanği unoqnsib Qotei açi iga eleñej qaji aqa anjam tulañ binjyoqnsib maroqñqab, ‘Di anjam bolequja.’” O Taitus, ni na kançal tamo nanği anjam degsim minjroqne.

*Iga Yesus bqajqa bati qa tariñoqñom*

<sup>11</sup> Iga qalie, Qotei a iga qa are boleiyeqnu. Aqa kumbra di a na boleq atsiq iga osorgej. Deqa a na tamo unçasari kalil nanği padalo sawaq dena eleñqa kere. <sup>12</sup> Qotei a iga qa are boleiyeqnu aqa kumbra dena iga endegsi osorgeqnu, iga Qotei qoreiyqajqa kumbra ti mandam qaji areqalo uge uge ti toreì uratekritqom. Osim iga mandam tamo unçasari nanço ambleq di sosimqa areqalo bole na ti kumbra bole na

ti Qotei aqa kumbra na ti walweloqñqom. <sup>13</sup> Walweloqñsim inji bole bole iga mondoñ oqom qaji di oqajqa tariñoqñqom. Yesus Kristus a segi Qotei. A singila koba ti unu. A na iga elenjej. Mondoñ a wala bole ti rianj koba ti osim lanj qureq na bqas. Iga di unqajqa tariñoqñqom. <sup>14</sup> Yesus a gago uneq na iga awaigosim iga aqa segi tamo ungasari tinñij sqajqa deqa marsiq aqa segi ñambile uratosiq iga qa moiyej. Deqa iga gaigai kumbra bole dauryqajqa singilaoqñqom.

<sup>15</sup> O Taitus, ni gaigai Kristen tamo ungasari nanji anjam di minjroqñimqa nanji quoqñsib dauryoqñqab. Ni na tamo ungasari anjam gotranjyeqñub qaji nanji tingitnjroqñsim dalnjroqñe. Tamo bei na ino anjam di uge qa maraiq.

### 3

#### *Qotei a iga qa are boleiyosiq kumbra boledamu egej*

<sup>1</sup> O Taitus, ni na Kristen tamo ungasari nanji anjam endegsim minjroqñe, “Ningi na mandor nanji ti sawa taqato qaji tamo kokba ti nanjo sorgomq di sosibqa nanjo anjam dauryoqñiy. Osib gaigai wau bole yqajqa are qaloqñiy.

<sup>2</sup> Ningi tamo qudei nanji misilij anjam minjroqñaij. Osib anjam na qotoqñaij. Gaigai lawo na sosib tamo ungasari kalil nanji kumbra bole osornjroqñiy.” O Taitus, ni na Kristen tamo ungasari nanji anjam degsim minjroqñe.

<sup>3</sup> Ni qalie, iga dego nami areqalo uge ti sosimqa Qotei aqa anjam gotranjyoqñem. Bati deqa Satan na iga gisa gisanqeñaqa iga Qotei aqa gam bole dauryqa uratoqñsim kumbra uge uge dauryqajqa are pruggeqñaqa gago segi jejamu qa tulan areboleboleigoqñej. Kumbra dena iga singila na taqatgesoqñej. Deqa iga minjin ti are uge ti sosim walweloqñem. Tamo qudei na iga jeutgeqñabqa iga kamba dego nanji jeutnjroqñem.

<sup>4</sup> Ariya bati di Qotei agi iga elenjej qaji a na iga tulan qalaqalaigosiq iga qa are boleiyosiq kumbra boledamu egej. Aqa kumbra di a segi na boleq atej. <sup>5</sup> Osiq iga elenjej. Gago segi wau bole bole iga yoqñem qaji a deqa osiq iga elenjosai. A iga qa dulosiq iga lanja elenjej awai saiqoji. Osiq gago are miligi yansetgosiq aqa Mondor Bole egsiq iga angro bunuj bul ñambabtgej. <sup>6</sup> Yesus Kristus agi iga elenjej qaji aqa wau na Qotei na aqa Mondor Bole qarinyonaqa gago are miligiq aiyej.

<sup>7</sup> Yesus a iga qa are boleiyej deqa iga Qotei aqa ñamgalaq di tamo bole une saiqoji unum. Deqa mondoñ iga ñambile gaigai sqom. Iga ñambile di oqajqa tariñoqñsim unum. <sup>8</sup> Qotei aqa anjam di tulan boledamu. Deqa iga anjam di gago areqaloq di singilatqom.

O Taitus, ni Qotei aqa anjam di singila na palontoqñimqa tamo ungasari Qotei qa nanjo areqalo singilateqñub qaji nanji



quoqnsib kumbra bole bole yoqñqab. Anjam dena tamo unğasari nañgi aqaryainjreqnu. <sup>9</sup>Tamo qudei nañgi laña laña ñirinjoqnsib nanari anjam maroqnsib laqñub. Nañgi Moses aqa dal anjam qa ti nañgo moma nañgo ñam qa ti anjam na qoteqñub. Nañgi anjam di marqajqa tulañ arearetnjreqnu. Iga qalie, anjam dena iga aqaryaigwa keresai. Deqa Taitus, ni tamo deqaji nañgo anjam di quetñjraim. Torei urat.

<sup>10</sup>Tamo bei na Kristen tamo unğasari nañgo areqalo ugetetñjrsim nañgi pupoinjrimqa ni na tamo di minjimqa aqa kumbra di uratem. A ni quetmosaiamqa olo minje. Minjimqa olo quetmosaiamqa ni a uratosim torei qoreiye. <sup>11</sup>Ni qalie, tamo deqaji nañgi Qotei aqa gam torei urateqñub. Nañgi une yo qaji tamo unub. Nañgo une dena nañgi osornjreqnu, nañgi tamo uge.

*Pol na Taitus minjej, “Ni urur bosim e itbe”*

<sup>12</sup>Ariya Taitus, ni que. E na Artemas kiyo Tikikus kiyo qarinyitqa a inoq gilqas. Gilsim mermimqa ni urur bosim Nikopolis qureq di e itbe. Yuwal ugeo bati qa e dia sqai. Soqñit ni bosim dia e itbe. <sup>13</sup>Apolos wo dal anjam qalie tamo Senas wo nañgi aiyel ino qure uratosib walwelqa laqñibqa ni na aqaryainjrimqa nañgi gamq di inñgi bei qa truquqasai.

<sup>14</sup>Ni na Kristen nañgi anjam plaltosim minjroqñimqa nañgi wau bole yoqñqajqa geregere qalieosib tamo qudei inñgi inñgi qa truqueqñub qaji nañgi aqaryainjroqñebe. Nañgi laña sosib wau bole bole yosaio uge.

<sup>15</sup>Kristen kalil e koba na endi unum qaji nañgi na ni kaiyeimonub. Deqa ni na kamba tamo unğasari iga tulañ qalaqalaigeqñub qaji nañgi gago kaiye anjam endi minjprime. Tamo unğasari nañgi di iga koba na Yesus qa gago areqalo siñgilateqnum.

O ijo was, Qotei a niñgi kalil qa are boleiyeme. Bole.

## FILEMON

<sup>1</sup> O Filemon, e Pol. E Kristus Yesus aqa wau tamo. E aqa anjam mare mare laqnem deqa jeu tamo nanji na e ojsib tonto talq endi waibeb unum. Aqo gago was Timoti wo anjam endi nenngrenyosim inoq qarinyonum. Ni gago Kristen was bole. Ni iga koba na wau qujai. <sup>2</sup> Aqo aiyel anjam endi ni qa ti gago jaja Apia qa ti Arkipus qa ti Kristen tamo ungasari kalil ino talq di loueqnub qaji nanji qa ti qarinyonum. Arkipus a iga koba na qoto tamo bulosim Qotei aqa wau ojeqnum.

<sup>3</sup> Gago Abu Qotei wo Tamo Koba Yesus Kristus wo nanji aiyel ninji qa are boleinjrimqa ninji lawo na soqniy.

*Filemon a kumbra tulan boledamu yoqnej deqa Pol a areboleboleiyonej*

<sup>4</sup> E gaigai ijo Qotei binjiyoqnsim ni qa pailyeqnum. <sup>5</sup> E ni qa anjam endegsi queqnum, ni na Tamo Koba Yesus tulan qalaqalaiyoqnsim a qa ino areqalo singilateqnum. Osim ni na Qotei aqa segi tamo ungasari kalil nanji dego qalaqalainjreqnum. <sup>6</sup> Ni iga ti beterosim koba na Yesus qa gago areqalo singilateqnum deqa e endegsi Qotei pailyeqnum, “O Abu, ni na Filemon iga ti aqaryaigimqa iga powo bole osim inji bole bole Kristus a iga egeqnu qaji di geregere poigwas.” <sup>7</sup> Od, was, e qalieonum, ni na Qotei aqa segi tamo ungasari kalil nanji qalaqalainjroqnsim nanjo are tulan singilateqnum. Ino kumbra dena ijo are latetbeqnaqa e areboleboleibeqnu.

*Pol na Filemon minjej, “Ni na Onesimus qalaqalaiyime”*

<sup>8</sup> O Filemon, e qalieonum, ino kumbra kalil bole. Deqa e ni kumbra bei yqajqa mermitqa ni ijo anjam daurye. E Kristus aqa ñam na ni singila na mermqa kere. <sup>9</sup> Ariya e ni tulan singila na mermqasai. Aqo ombla qalaqalaiyo kumbra dauryeqnum deqa e ni lawo na mermqai. E Pol. E Kristus Yesus aqa wau tamo. E aqa anjam mare mare laqnem deqa jeu tamo nanji na e ojsib tonto talq endi waibeb unum. <sup>10</sup> E tonto talq endi sonamqa ino kanjal tamo Onesimus a ni uratmosiq ulanosiq Rom qure endeq bosiq e itbej. E itbonaqa e Yesus aqa anjam minjnamqa a are bulyosiq Yesus qa aqa areqalo singilatej. Deqa bini a ijo angro bul unu. Deqa e ni mermqai, ni a kumbra bole osoryime. <sup>11</sup> A nami kanjal tamo bolesai soqnej deqa a ni qa wau bole yosaiqnej. Ariya bini a kanjal tamo bolequja unu deqa a ni qa wau bole yoqnqa kere. A e qa dego wau bole yoqnqa kere.

<sup>12</sup> Ariya endego e Onesimus qarinyonum a inoq olo bqo. Deqa e a qa are ugeibqo. Di kiyaaqa? E a tulan qalaqalaiyeqnum deqa. <sup>13</sup> E Yesus aqa anjam bole qa waueqnum deqa e tonto talq endi unum. Ariya ijo are koba endegsi unu. E Onesimus olo osiy a e ombla tonto talq endi sosim a na e aqaryaiboqnqas. A ino kanjal tamo unu deqa a na e aqaryaibqas di ni na dego e aqaryaibqam. <sup>14</sup> Ariya e Onesimus qarinyonum inoq olo bqo. E endegsi are qalonum. Ni na e aqaryaibqa are soqnim ni ino segi areqalo na e odbosim Onesimus olo ijoq qarinye. E singila na ni mermqasai.

<sup>15</sup> Bole, Onesimus a bati truquyala ni uratmej. E are qalonum, Qotei a segi na gam gereiyonaqa Onesimus a ni uratmej. Di kiyaaqa? Ni na a olo osim ningi ombla bati gaigai sqajqa deqa. <sup>16</sup> Onesimus a ino kanjal tamo segi sai. A ino Kristen was bole. A ijo Kristen was dego. Deqa e a tulan qalaqalaiyeqnum. A ino kanjal tamo bolequja. A ni ombla Tamo Koba beteryejunub. Deqa e qalieonum, ni a olo tulan qalaqalaiyoqnqam.

<sup>17</sup> Ni e ombla Yesus aqa wau tamo unum edegosim Onesimus osim geregereiyoque. Ni e osim geregereibeqnum dego kere. <sup>18</sup> Onesimus a une bei ni emej kiyo? A ino silali bei nami yaimosiq olo ni emqajqa mermosiq bunuqna ni emosai kiyo? Degamqa ni na merbimqa e kamba silali di keretosiy ni olo emqai. <sup>19</sup> E Pol. Anjam endi e ijo segi ban na nengrenyonum. Ni e merbimqa Onesimus a ino silali bei yaimej qaji di e na kamba olo ni emekritqai. Ariya ni que. Nami e Yesus aqa anjam ni mermonam qusim are buliyem. E ino qunun qa aqaryaimem. Deqa e ni endegsi mermqa kere, ni na kamba olo ino segi nambile e ebekritime. Ariya e degsi ni mermqa uratonum. <sup>20</sup> O ijo was Filemon, ni que. Aqo ombla Tamo Koba Kristus aqa tamo unum deqa ni aqa ñam na olo Onesimus ijoq qarinyosim dena ijo are boletetbe.

<sup>21</sup> E qalieonum, ni ijo anjam endi dauryqam. Osim ijo anjam endi bunyosim olo Onesimus ijoq qarinyqam. Utru deqa e anjam endi nengrenyonum. <sup>22</sup> Ijo anjam qujai bei agiende. E are qalonum, Qotei a nunjo palyo qusim gam waqetbimqa e nunjoq olo bqai. Deqa Filemon, e ino talq di nejajqa warum bei ni na gereiyetbe.

*Pol aqa wau qujai nanqi na Filemon kaiyeiyeb*

<sup>23</sup> Aqo Epafras wo ombla tonto talq endi unum. Epafras a dego Kristus Yesus aqa wau tamo. A Yesus aqa anjam mare mare laqnej deqa jeu tamo nanqi na a ojsib tonto talq endi waiyeb unu. A na ni kaiyeimqo. <sup>24</sup> Mak na Aristarkus na Demas na Luk na nanqi qolqe dego ni kaiyeimonub. Nanqi e koba na wau qujai.

<sup>25</sup>Tamo Koba Yesus Kristus a ningi qa are boleyosim nungo qunun geregere taqatoqneme. Bole.

## HIBRU

### *Qotei aqa Niri a na iga anjam mergeqnu*

<sup>1</sup> Nami Qotei na gago moma utru nanġi anjam minjroqnej. A gam endena nanġi anjam minjroqnej. A na aqa medabu o qaji tamo nanġi qarinjreqlaqa nanġi giloqnsib bati gargekoba gago moma utru nanġi anjam minjroqneb. <sup>2</sup> Ariya bini Qotei na iga dego anjam mergeqnu. Diġo bati jojomoqo deqa a na aqa Niri aqa medabu na iga anjam mergeqnu. Qotei na aqa Niri giltej deqa a inġi inġi kalil oqas. Aqa baġ na Qotei na mandam atej unu. <sup>3</sup> A na Qotei aqa rian koba iga osorgeqnu. Aqa so ti Qotei aqa so ti ombla kerekere. Aqa anjam singila ti unu. Anjam dena a na inġi inġi kalil singilatejunu. A gago une kobotetgosiqa laġ qureq oqsiq Qotei singila koba ti unu qaji aqa baġ woq di awejunu.

### *Qotei aqa Niri a laġ anġro nanġi tulaġ buġnjrejunu*

<sup>4</sup> Qotei na aqa Niri ñam kobaquja yej. Ñam dena laġ anġro nanġo ñam tulaġ buġnejunu. <sup>5</sup> Nami Qotei na aqa Niri endegsi minnej,

“Ni ijo segi Anġro.

Bini e ino Abu unum.”

Osiqa olo anjam bei dego aqa Niri qa endegsi marej, “E aqa Abu sqai. A ijo Anġro sqas.” Ariya Qotei na aqa laġ anġro nanġi anjam degsi minjrosaiioqnej. <sup>6</sup> Nami Qotei na aqa Niri matu qarinjyim mandamq aiqa osiqa a qa olo anjam endegsi marej, “Ijo laġ anġro kalil nanġi aqa sorgomq di sosib a qa louoqnqab.” <sup>7</sup> Ariya Qotei a laġ anġro nanġi qa anjam degsi marosaiioqnej. A nanġi qa endegsi marej,

“E ijo laġ anġro nanġi wau enjrem.

Deqa nanġi jagwa ti namyuwo ti bulosib ijo wau ojeqnu.”

<sup>8</sup> Ariya Qotei na aqa segi Niri endegsi minnej,

“O Qotei, ni bati gaigai Mandor Koba sqam.

Ni tamo bole unum deqa ni na ino segi tamo unġasari nanġi taqatnjroqnqam.

<sup>9</sup> Ni kumbra bole yqajqa tulaġ arearetmeqnu.

Ni kumbra uge yqajqa arearetmosaieqnu.

Deqa ino Qotei na ni giltmosiqa ino gateq di gorenj bilentosiq ñam kobaquja emej.

Deqa ni tulaġ areboleboleimeqnu.

Ino arebolebole dena ino was nanġo arebolebole tulaġ buġnejunu.”

<sup>10</sup> Qotei na aqa Niri degsi minjsiqa olo anjam bei dego endegsi minnej,

“O Tamo Koba, ni nami mandam atem unu.  
Osim lanj dego ino segi banj na gereiyem.

<sup>11</sup> Lanj ti mandam ti koboqab.

Ariya ni bati gaigai sqam.

Lanj ti mandam ti gara jugo bulosib sariosib ugeqab.

<sup>12</sup> Tamo bei na aqa gara lubtoqnsiq taqal ateqnu  
dego kere ni na lanj ti mandam ti lubtosim taqal atqam.

Tamo bei na aqa gara piqtoqnsiq taqal ateqnu  
dego kere ni na lanj ti mandam ti piqtosim taqal atqam.

Ariya ni segi bulyqasai.

Ni bati gaigai degsi sqam.

Ino sqajqa bati koboqasai.”

<sup>13</sup> Qotei na aqa Niri degsi minjsiqa olo minjej,

“Ni ijo banj woq endi awesoqnmqa

e na ino jeu tamo kalil nanjgi elenjosiy ino singaq di atelenqai.”

Qotei na anjam deqaji aqa lanj angro nanjgi minjrosaijoqnej.

<sup>14</sup> Lanj angro nanjgi Qotei aqa Niri bul sai. Nanjgi Qotei aqa wau  
ojo qaji mondor. A na nanjgi qarijnjreqnaqa nanjgi aqa wau  
ojeqnu. Nanjo wau agiende. Nanjgi giloqnsib tamo ungasari  
a na elenqas qaji nanjgi aqaryainjreqnu.

## 2

### *Qotei na iga elenjej aqa wau di tulanj kobaquja*

<sup>1</sup> Deqa ijo was, anjam ningi nami quoqneb qaji di ningi  
olo singila na ojsib dauryiy. E dego anjam di dauryqai. Iga  
dauryqasai di iga ulonjosim anjam di torei urato uge. <sup>2</sup> Nami  
Qotei na aqa lanj angro nanjo medabu na gago moma utru  
nanjgi anjam minjroqnej. Anjam di singila koba. Deqa tamo  
ungasari kalil anjam di gotranjoqneb qaji nanjgi Qotei na kam-  
batnjroqnsiqa awai uge enjroqnej. <sup>3</sup> Bunuqna Qotei na iga  
padalo sawaq na elenjej. Aqa wau di tulanj kobaquja. Iga Qotei  
aqa wau di qoreiyqom di iga awai tulanj ugedamu turqom.  
Awai di iga britosim jaraiqa keresai.

Namoqna gago Tamo Koba a na iga elenqajqa anjam di  
mare mare laqnej. Onaqa tamo nanjgi aqa anjam di quoqneb  
qaji nanjgi kamba olo mare mare laqneb. Osib iga endegsib  
mergoqneb, “Anjam di bole.” <sup>4</sup> Yeqnaqa Qotei na nanjo an-  
jam di singilatoqnej. A gam endena nanjo anjam singilatoqnej.  
A Mondor Bole aqa wau segi segi jeisiq enjreqnaqa nanjgi  
manjwa ti kumbra singila ti babtoqneb. Qotei aqa segi areqalo  
na a degyoqnej.

### *Qotei na iga elenjej aqa wau di Yesus a segi na tigeltej*

<sup>5</sup> Mondonj Qotei na mandam bunuj atqas. Iga qalieonum,  
Qotei na aqa lanj angro nanjgi mandam bunuj di taqatqajqa

wau enjrosai. <sup>6</sup> Agi Qotei aqa anjam bei nami endegsib nenngrenyeb unu,

“O Qotei, ni kiyaaqa tamo nanngi qa are qaleqnum?

Osim nanngi qa duloqnsim aqaryainjreqnum?

<sup>7</sup> Ni na tamo nanngi lan angro nanngo sorgomq di atem unub.

Deqa nanngi lan angro nanngo sorgomq di sokiñala soqnib

bunuqna ni na nanngo ñam olo soqtetnjrimqa

nanngo ñam tulan kobaosim lan angro nanngo ñam bunyqas.

<sup>8</sup> Od, ni na inngi inngi kalil osim tamo nanngo sorgomq di atim sqab.”

O ijo was, Qotei aqa anjam degsi unu deqa iga qalieonum, a na inngi inngi kalil osim tamo nanngo sorgomq di atim sqab. A inngi bei uratqasai. Ariya bini iga uneqnum di inngi inngi kalil tamo nanngo sorgomq di sosai. <sup>9</sup> Ariya iga Yesus uneqnum. Nami a lan angro nanngo sorgomq di sokiñala soqnej. Bati deqa Qotei a tamo kalil nanngi qa are boleiyonaqa kumbra dena Yesus a nanngo padalo sawa osiq moiyej. A jaqatin koba osiq moiyej deqa Qotei na aqa ñam olo soqtetosiqa ñam kobaquja yej.

<sup>10</sup> Qotei a inngi inngi kalil qa utru. A na inngi inngi kalil gereiyej. A na aqa angro gargekoba nanngi joqsim lan qureq oqwajqa deqa are qalsiq Yesus singilatonaqa a jaqatin koba ej. Osiqa aqa jaqatin dena a Qotei aqa anjam torei dauryekritosiq tamo nanngi elenqajqa wau tigeltej. Qotei a degsi Yesus singilatej di kumbra bolequja. <sup>11</sup> Iga qalie, Yesus aqa angro kalil a na aqa segi kumbra boleq di atej qaji nanngi a ombla Abu qujai. Deqa a na nanngi minjreqnu, “Ninngi ijo was tintin.” A nanngi was qa minjrqajqa jemaiyosaieqnu. <sup>12</sup> Deqa a na aqa Abu endegsi minnej,

“O Qotei, e na ijo was nanngi di ino ñam qa sainjroqnqai.

Nanngi louqa korooqnibqa e nanngo ambleq di tigeloqnsiy ino ñam soqtoqnqai.”

<sup>13</sup> Yesus a degsi aqa Abu minjsiq olo endegsi marej, “E Qotei qa ijo areqalo singilatosiy a qa tarinjoqnsiy sqai.” Osiqa marej, “Ninngi e nubiy. Angro kalil Qotei na ebej qaji nanngi di e koba na unum.”

*Yesus na iga aqaryaigwa osiqa tamo bulyosiq moiyej*

<sup>14</sup> Yesus aqa angro nanngi di mandam tamo. Deqa Yesus a dego mandam tamo bulyosiq moiyej. A Satan aqa singila kobotqa marsiq deqa moiyej. Satan a moiyo qa utru. A na tamo ungasari nanngi moyotnjrqajqa singila ti unu. <sup>15</sup> Deqa nanngi moiqa ulaeqnab Satan a nanngi singila na ojeleneqnu. Ariya nanngi degsib ulaoqnsib sonabqa Yesus a nanngi Satan aqa banq dena elenqajqa marsiq moiyej.

<sup>16</sup> Yesus a lan angro nanngi aqaryainjrqa osiq moyosai. A Abraham aqa moma nanngi aqaryainjrqa osiq moiyej. <sup>17</sup> Utru

deqa a aqa was kalil nanḡi bulosiq tamo yuej. Deqa bini a atra tamo gate sosiq Qotei aqa wau ojeqnu. A tamo unḡasari nanḡi qa dulosim nanḡi aqaryainjrqaqqa deqa marsiq atra tamo gate brantej. A tamo bole unu deqa a Qotei aqa anjam kalil dauryoqnsiqa aqa wau ojeqnu. Aqa wau agiende. A na tamo unḡasari nanḡo une kobotetnjroqnsiqa Qotei aqa minjin taqal waiyeqnu. <sup>18</sup> Gulbe gargekoba Yesus aqa jejamuq di branteqnaqa a jaqatin koba oqnej. Deqa a na tamo unḡasari gulbe oqnsib uneq aiqa laqnuḡ qaji nanḡi geregere aqaryainjrqa kere.

### 3

*Yesus aqa ñam na Moses aqa ñam tulanḡ bunyejunu*

<sup>1</sup> O Kristen was kalil, Qotei lanḡ qureq di unu qaji a na ninḡi metnḡej deqa ninḡi Yesus qa are qaloqniy. Yesus a Qotei na aqa anjam mare mare laqajqa qarinyej. A gago atra tamo gate unu. Deqa iga aqa ñam boleq di maroqnoqom. <sup>2</sup> Qotei na Yesus minnej, “Ni ijo wau oje.” Onaqa Yesus a Qotei aqa wau di uratosai. A wau di geregere ojoqnej. Moses a dego nami Qotei aqa wau geregere ojoqnej. A Qotei aqa tamo unḡasari nanḡo ambleq di wauoqnej. Tamo unḡasari nanḡi di Qotei aqa tal bul soqneb. <sup>3</sup> Iga qalie, tamo nanḡi tal ateqnuḡ qaji nanḡo ñam kobaquja. Tal aqa ñam kiñala. Yesus a tal ato qaji tamo bul soqnej deqa Qotei na a ñam kobaquja yej. Yesus aqa ñam dena Moses aqa ñam tulanḡ bunyejunu. <sup>4</sup> Tal kalil agi tamo nanḡi na ateqnuḡ. Ariya Qotei a segi na inḡi inḡi kalil atelenej. <sup>5</sup> Moses a kanḡal tamo bul sosiqqa Qotei aqa tamo unḡasari nanḡo ambleq di wauoqnej. Deqa Moses aqa ñam kiñala. Tamo unḡasari nanḡi di agi Qotei aqa tal bul soqneb. Moses a nanḡo ambleq di wau geregere yoqnej. A Qotei aqa medabu oqnsiqa kumbra bunuqna brantqas qaji deqa anjam maroqnej. <sup>6</sup> Ariya Kristus a Qotei aqa Niri. Deqa Qotei na a wau yonaqa a Qotei aqa tamo unḡasari nanḡi taqatnjroqnej. Tamo unḡasari nanḡi di agi Qotei aqa tal bul unub. Kristus a wau di geregere yoqnej. A Qotei aqa Niri deqa iga gaigai gago areqalo a qa sinḡilatoqnsim a mondoḡ olo bosim iga boletgwajqa deqa tariḡoqnsim sqom. Iga degyqom di iga dego Qotei aqa tal bul sqom.

*Tamo qudei nanḡi Qotei aqa aqarato sawa miligiq gilqasai*

<sup>7</sup> Iga Qotei aqa tamo unḡasari unum deqa iga Mondor Bole aqa anjam qusim dauryqom. Aqa anjam agiende, “Bini bati endi ninḡi Qotei aqa medabu quoqniy.

<sup>8</sup> Ninḡi nunḡo are miligi getentaib.

Ninḡi nunḡo moma utru nanḡi bul saib.

Agi nami nunḡo moma utru nanḡi ijo medabu quqwa asginjreḡnaqa gotranjoqneb.



Nanġi wadau sawaq di ijo sinġila lanja tenemtoqneb.

<sup>9</sup> Nanġi ijo sinġila bati gaigai unoqneb gilsu gilsiq wausau 40 koboej.

Ariya nanġi deqa e qa are qalosaioqneb.

<sup>10</sup> Deqa e nanġi qa minjin oqnaqa marem,

‘Nanġi nanġo are miligiq di e daurbosaieqneb.

Nanġi gaigai ijo gam bole urateqneb.’

<sup>11</sup> Deqa e nanġi qa minjin oqnaqa endegsi minjrem,

‘Ninġi ijo aqarato sawa miligiq gilqasai. E bole merngonum.’ ”

<sup>12</sup> O ijo was, ninġi geregere njam atoqniy. Ninġi njam atqasai di ninġi qudei nunġo are miligi ugeqas. Amqa ninġi Yesus qa nunġo areqalo sinġilatqa uratosib Qotei nambile gaigai unu qaji a qoreiyqab. Degaib deqa ninġi njam atoqniy. <sup>13</sup> Iga mareqnum, “Bini bati endi.” Deqa ninġi bati gaigai nunġo Kristen was nanġi sinġilatnroqniy. Une aqa kumbra na ninġi qudei gisanġosim nunġo are miligi getentaim deqa ninġi degyoqniy.

<sup>14</sup> Iga nami Qotei qa gago areqalo sinġilatoqnem. Ariya gago areqalo di iga olo sinġila na ojesosim gilsim moiqom. Iga degyoqom di iga Kristus aqa segi tamo unġasari tintin sqom.

<sup>15</sup> Iga qalie, anjam endegsi unu,

“Bini bati endi ninġi Qotei aqa medabu quoqniy.

Ninġi nunġo are miligi getentaib.

Ninġi nunġo moma utru nanġi bul saib.

Agi nami nunġo moma utru nanġi ijo medabu quqwa asginjreqnaqa gotranjoqneb.”

<sup>16</sup> O ijo was, yai nanġi Qotei aqa medabu quoqnsib olo quqwa asginjreqnaqa gotranjoqneb? Di Israel tamo unġasari agi Isip sawaq di sonabqa Moses na joqsiq gilej qaji nanġi.

<sup>17</sup> Qotei a yai nanġi qa minjin oqnaqa gilsu gilsiq wausau 40 koboej? Di Israel tamo unġasari agi une yoqnsib wadau sawaq di morenoqneb qaji nanġi. <sup>18</sup> Qotei na yai nanġi endegsi minjrej, “Ninġi ijo aqarato sawa miligiq gilqasai”? Osiqa minjrej, “E bole merngonum”? Di tamo unġasari aqa medabu gotranjoqneb qaji nanġi. <sup>19</sup> Deqa iga qalieonum, Israel tamo unġasari nanġi di Qotei qa nanġo areqalo sinġilatosaiioqneb. Utru deqa nanġi Qotei aqa aqarato sawa miligiq gilqa keresai.

## 4

*Qotei aqa tamo unġasari nanġi aqarato sawa miligiq gilqab*

<sup>1</sup> Qotei a nami marej, “Ijo segi tamo unġasari nanġi ijo aqarato sawa miligiq gilqab.” O ijo was, sawa di miligiq gilqajqa bati koboosai unu. Deqa ninġi ulaoiy. Ninġi qudei sawa di miligiq gilqa uratosib ulono uge. <sup>2</sup> Moses aqa bati qa Israel tamo unġasari nanġi Qotei aqa anjam bole quoqneb. Iga dego Qotei aqa anjam bole quoqnem. Ariya Israel nanġi

anjam di lanja quoqnsib nanjo areqaloq di singilatosaiqneq. Deqa anjam dena nanji yala aqaryainjrosaiqnej.

<sup>3</sup> Iga Qotei qa gago areqalo singilateqnum deqa a na odgim iga aqa aqarato sawa miligiq gilqom. Agi nami Qotei a Israel nanji qa endegsi marej,

“E nanji qa minjin oqnaqa minjrem,

‘Ninji ijo aqarato sawa miligiq gilqasai. E bole merngonum.’”

Kumbra di Moses aqa bati qa brantej. Ariya iga qalie, tulan nami Qotei a mandam atsiqa aqa wau kalil kobotej. <sup>4</sup> Agi aqa anjam bei nami endegsib nengrenyeb, “Qotei na aqa wau kobotosiqa bati 7 onaqa a aqaratej.” <sup>5</sup> Osib bunuqna anjam endi nengrenyeb, “Nanji ijo aqarato sawa miligiq gilqasai.”

<sup>6</sup> Deqa iga qalieonum, aqarato sawa di miligiq gilqajqa bati koboosai unu. Tamo ungasari qudei nanji miligiq gilqa kere. Tamo ungasari nami Qotei aqa anjam bole quoqnsib gotranjyoqneq qaji nanji aqa aqarato sawa miligiq gilosai.

<sup>7</sup> Deqa wausau gargekoba gilnaqa Qotei a olo aqarato bati bunuj atej. Agi a Devit aqa medabu na endegsi marej,

“Bini bati endi ninji Qotei aqa medabu quoqniy.

Ninji nunjo are miligi getentaib.”

Devit aqa bati qa Qotei a marej, “Bini bati endi.” Anjam dena iga endegsi osorgeqnu, Qotei a tamo ungasari nanji aqa aqarato sawa miligiq gilqajqa olo bati bunuj atej.

<sup>8</sup> Josua na aqarato di Israel nanji enjrosai. Enjrej qamu Qotei a bunuqna olo bati bunuj atqa marosai qamu. <sup>9</sup> Deqa iga qalieonum, Qotei aqa segi tamo ungasari nanjo aqarato bini unu. Iga yori bati gaigai aqarateqnum dego kere. <sup>10</sup> Iga qalie, tamo a Qotei aqa aqarato sawa miligiq gilqas di a aqa wau kobotosim aqaratqas. Agi Qotei a nami aqa wau kobotosiq aqaratej dego kere. <sup>11</sup> Deqa iga aqarato sawa di miligiq gilqajqa tulan singilaqom. Singilaqasai di ninji qudei Israel nanjo kumbra dauryosib Qotei aqa anjam gotranjosib ulonjo uge.

<sup>12</sup> Qotei aqa anjam a nambile ti unu. Anjam di singila na waueqnu. A serie bul tulan qalat. Deqa anjam dena tamo nanjo are qametnjroqnsiqa nanjo qunun ti tanu ti singa ti miligiq aiyuqnsiqa nanjo areqalo ti nanjo are miligi ti geregere pegiyeqnu. <sup>13</sup> Inji bei a Qotei qa uliqa keresai. Inji inji kalil Qotei a ateleney qaji di a na geregere nam atoqnsiq uneqnu. Deqa mondon a na qujai gago kumbra kalil qa iga pegigwas.

*Yesus a gago atra tamo gate unu*

<sup>14</sup> Gago atra tamo gate unu. A lan qureq oqsiq di unu. A Qotei aqa Niri Yesus. Deqa iga aqa nam boleq di maroqnsim ojesqom. <sup>15</sup> Iga segi singila saiqoji. Deqa iga na gago une aqa

siŋgila kobotqa keresai. Ariya gago atra tamo gate unu agi Yesus. Deqa iga endegsi are qalqasai, Yesus a gago une qa iga aqaryaigwa keresai. Iga degsi are qalqasai. Satan na iga walawalaigoqnsiqa uneq waigwa laqnu. A nami Yesus dego uneq waiyqa maroqnsiq walawalaiyoqnej. Ariya Yesus a segi une saiqoji. <sup>16</sup> Deqa ijo was, iga Qotei aqa areq gilqajqa ulaqasai. Iga aqa areq giloqnqom. A iga qa are boleiyeqnu deqa iga aqa areq giloqnim a iga qa duloqnqas. Iga gulbe ti soqnim a iga qa are boleiyeqnsim gago gulbe qa aqaryaigoqnqas.

## 5

### *Atra tamo gate nanjo wau*

<sup>1</sup> Qotei a mandam tamo qudei nanji giltjroqnsiqa nanji atra tamo gate ateqnu. Atra tamo gate nanjo wau agiende. Nanji na tamo ungasari nanjo une qa aqaryainjrqa maroqnsib wagme inji inji oqnsib Qotei atraiyeqnu. <sup>2</sup> Atra tamo gate nanji di iga bul mandam tamo. Nanji dego siŋgila saiqoji unub deqa nanji une yoqnqa kere. Deqa nanji na tamo ungasari powo saiqoji unub qaji nanji ti tamo ungasari Qotei aqa gam groteqnu qaji nanji ti lawo na aqaryainjreqnu. <sup>3</sup> Nanji dego une ti unub deqa nanji tamo ungasari nanjo une qa ti nanjo segi une qa ti are qaloqnsib wagme inji inji oqnsib Qotei atraiyeqnu.

<sup>4</sup> Tamo lanaj bei a aqa segi areqalo na atra tamo gate sqa keresai. Qotei a segi na atra tamo gate nanji metnjroqnsiqa ñam koba enjreqnu. Agi Qotei a nami Aron metosiq atra tamo gate atej.

<sup>5</sup> Kristus a dego aqa segi ñam soqtosiq atra tamo gate sqa marosai. Qotei na Kristus giltosiq atra tamo gate atej. Agi Qotei na nami Kristus endegsi minjej,

“Ni ijo segi Angro.

Bini e ino Abu unum.”

<sup>6</sup> Osiqa olo anjam bei dego Kristus minjej,

“Melkisedek a atra tamo soqnej

dego kere ni bati gaigai atra tamo sqam.”

<sup>7</sup> O ijo was, Yesus a mandamq endi sosiqa a siŋga pulutoqnsiqa Qotei pailyoqnej. A qalieej, Qotei na a oqa kere. Yim a moiqasai. Deqa a siŋgila na Qotei pailyoqnej. A lelen ti akam ti pailyoqnej. A aqa segi areqalo uratoqnsiqa Qotei aqa sorgomq di soqnej. Deqa Qotei na aqa pailyo quetoqnej. <sup>8</sup> Yesus a Qotei aqa Niri. Ariya a jaqatinj koba oqnej dena a powo osiqa Qotei aqa anjam dauryqajqa qalieej. <sup>9-10</sup> Qalieosiq deqa a Qotei aqa anjam torei dauryekritej. Deqa Qotei na a giltosiq minjej, “Ni atra tamo gate sqam. Agi Melkisedek a nami atra tamo soqnej dego kere.” Qotei na Yesus degsi minjej deqa

Yesus a tamo kalil Qotei aqa anjam dauryeqnub qaji nanġi elenqas. Nanġi elenqajqa utru agi Yesus qujai. Deqa nanġi nambile gaigai sqab.

*Iga anġro mom bul sqasai*

<sup>11</sup> O ijo was kalil, e Yesus aqa wau deqa anjam gargekoba niġi mernġwajqa unu. Ariya nunġo areqalo getenjejunu deqa niġi anjam di aqa utru gegerere poinġwa keresai. Deqa e niġi anjam di mernġwajqa baġi koba. <sup>12</sup> Niġi nami are bulyeb bati olekoba gilqo. Deqa niġi Qotei aqa anjam plaltqa kere. Ariya nunġo powo kobaosai unu deqa niġi anġro mom munġum uyeqnub dego bul unub. Niġi inġi sinġila uyqa keresai unub. Deqa tamo qudei na olo Qotei aqa anjam utruq na plaltosib niġi mernġwab di kere. <sup>13</sup> Iga qalie, anġro mom nanġi munġum segi uyeqnub. Nanġi kumbra bole qa gam gegerere poinġrosai unu. <sup>14</sup> Tamo nanġi kokbaonub qaji nanġi inġi sinġila uyeqnub. Nanġi nami bati gargekoba kumbra bole ti kumbra uge ti pegiyoqneb. Deqa nanġi areqalo bole ti powo bole ti unub.

## 6

*Iga Qotei qa tariġoqnqom*

<sup>1</sup> Deqa ijo was kalil, iga Kristus aqa anjam nami utruq na quoqnem qaji dena prugosim olo anjam aqa damu dauryoqnqom. Yim anjam dena iga sinġilatgoqnqas. Anjam iga nami utruq na quoqnem qaji di niġi qalie. Anjam agiende. Iga Qotei qa gago areqalo sinġilatoqa, moiyo qaji kumbra uratosim are bulyoqa, <sup>2</sup> yanso oqa, Kristen gate nanġo gateq di baġ atoqa, subq na tigeloqa, Qotei na tamo kalil nanġi peginġroqa, tamo qudei nanġi namyuwoq di gaigai soqa. O ijo was, Kristus aqa anjam di iga nami utruq na quoqnem. Ariya bini iga anjam dena prugosim olo anjam aqa damu dauryoqnqom. <sup>3</sup> Qotei na marim iga degyqom.

<sup>4</sup> O ijo was, niġi qalie. Nunġo ambleq di tamo qudei nanġi Qotei na areqalo suwantetnġrnaqa nanġi lan qureq oqwjajqa gam bole qalieeb. Nanġi Mondor Bole esoqneb. <sup>5</sup> Nanġi Qotei aqa anjam uyo oneiyoqnsib maroqneb, “Anjam di bolequja.” Nanġi Qotei aqa sinġila mondoġ brantqas qaji di dego qalieosib ojesoqneb. <sup>6</sup> Ariya bati bei tamo nanġi di olo ulonġosib Qotei aqa anjam qoreiyeb. Deqa nanġi bunuqna puluosib are bulyqajqa gam saiinjrej. Nanġo une dena nanġi Qotei aqa Nġiri olo namburbasq di qamobulosib tamo unġasari kalil nanġo nambgalaq di aqa nġam tulan ugeugeiyeb.

<sup>7</sup> Tamo deqaji nanġi qa e yawo anjam endegsi mernġwai. Wau lanja nanġi inġi yageqnabqa awa boqnsiq mandam aqa miligiq aiyeqnu. Aiyeqnaqa Qotei a mandam di boleteqnu

deqa ingi bole oqoqnsiq melieqnaqa wau lanja nanği boqnsib ingi oqnsib uyeqñub. <sup>8</sup> Ariya sil luwit oqsim ingi kabutñjrqaş di ingi bole oqwasai. Mandam di ugeqas. Deqa sokiñala Qotei na mandam di torei waliyosim ñamyuwo na koitqas.

<sup>9</sup> O gago was bole, anjam singila di iga na ningi merngonum. Ariya iga qalieonum, ningi deqsib padalqasai. Qotei na ningi elenqas. <sup>10</sup> Qotei a tamo uge sai. A tamo bole. Deqa a nungo kumbra bole kalil unoqnsiq olo are walyosaieqnu. Nungo kumbra bole agiende. Ningi gaigai wau bolequja yoqnsib Qotei tulañ qalaqalaiyoqnsib aqa segi tamo unğasari nanği geregereinjqñub. Ningi nami degyoqñeb agi bini ningi degyeqñub. <sup>11</sup> Gago are koba endegsi unu. Ningi kumbra bole di singila na ojoqnsib mondoñ Qotei na ningi boletñgwajqa deqa tariñoqñiy. <sup>12</sup> Ningi asgingaiq. Qotei aqa tamo unğasari nanği kumbra agiende. Nanği Qotei qa nanço areqalo singilatoqnsib olo asgingrosaieqnu. Deqa mondoñ nanği ingi bole bole Qotei a nami aqa anğro nanği enjrqa marej qaji di oqab. O ijo was, nanço kumbra di ningi dego deqsib dauryoqñiy.

*Qotei aqa anjam a nami Abraham minjej qaji di a na singilatej*

<sup>13-14</sup> Nami Qotei na Abraham minjej, “E ni boletmosiy ino moma nanği tulañ kobatñjrqai.” Osiqa aqa anjam di singilatej. Mandam tamo nanği na Qotei bunyqa keresai. Deqa Qotei a mandam tamo bei aqa ñam na anjam singilatqa keresai. Deqa a anjam di Abraham minjsiqa aqa segi ñam na anjam di singilatosiq minjej, “E bole mermonum.” <sup>15</sup> Onaqa Abraham a Qotei aqa anjam di qusiqa aqa areqaloq di atsiq tariñosiq soqñej. A tariñqa asgiyosai. A tariñesosiq bunuqna anjam Qotei na minjej qaji di aqa damu brantonaq unej.

<sup>16</sup> Anjam singilatqa kumbra agiende. Tamo bei na anjam singilatqa osimqa a tamo kobaquja bei aqa ñam na anjam singilatqas. Yim tamo qudei nanği qusib marqab, “Anjam di bole.” Deqa tamo qudei nanği anjam di olo uge qa marqa keresai. <sup>17</sup> Qotei na Abraham minjej, “E ino moma nanği kobatñjrqai.” Osiqa aqa anjam di singilatej. Aqa kumbra dena a na Abraham aqa moma nanği osornjrej, a na aqa anjam di olo bulyqa keresai. <sup>18</sup> Deqa Qotei aqa kumbra aiyel unu. A na anjam di Abraham minjej. Osiqa aqa segi ñam na anjam di singilatej. Aqa kumbra aiyel di unu deqa a na aqa anjam di olo bulyqa keresai. A gisañqa keresai dego. Deqa iga Qotei aqa anjam di gago are miligiq di atsim Qotei aqa jojomq giloqnsim a qa tariñoqñom. <sup>19</sup> Qotei agi iga a qa tariñeqnum qaji a anka bul singila koba. Deqa iga Qotei qa gago are miligi singilatoqnsim Warum Tulañ Getento Koba gara gainejunu qaji di torei miligiq giloqñom. <sup>20</sup> Yesus a getento warum di iga qa waqtosiq a segi namoosiq miligiq gilej. Deqa bini a getento

warum dia unu. A di sosimqa bati gaigai a gago atra tamo gate sqas. Agi Melkisedek a nami atra tamo soqnej dego kere.

## 7

### *Melkisedek a ñam koba ti soqnej*

<sup>1</sup> Melkisedek a Salem qure nanjo mandor soqnej. A Qotei Goge Koba aqa atra tamo dego soqnej. Bati deqa Abraham a mandor qudei nanji ti qotsiqa nanji ñumej. Ñumsiqa olo aqa qureq beqnaqa Melkisedek a gamq di Abraham turosiqa aqa gateq di ban atetosiqa a qa pailyej. <sup>2</sup> Onaqa inji inji kalil Abraham a mandor nanjoq dena elenjej qaji di a na poto 10 yosiq oto qujai Melkisedek atraiyej. Melkisedek aqa ñam aqa damu agiende, Kumbra Bole Yeqnu Qaji Mandor. Qure ñam Salem aqa damu agiende, Are Lawo. Melkisedek a Salem qure nanjo mandor soqnej deqa aqa ñam aqa damu bei agiende, Are Lawo Qaji Mandor. <sup>3</sup> Melkisedek a abu saiqoji. A ai saiqoji. A moma bei dego saiqoji. Aqa ñambabo bati di iga qaliesai. Aqa moiqajqa bati di dego iga qaliesai. Deqa a Qotei aqa Ñiri bulosiq a bati gaigai atra tamo unu.

<sup>4</sup> Melkisedek aqa ñam tulan kobaquja. E deqa ninji sainjwai. Gago moma utru Abraham a mandor nanjoq dena inji inji boledamu elenosiqa poto 10 yosiq oto qujai Melkisedek atraiyej. <sup>5</sup> Bunuqna Qotei na Livai aqa moma nanji minjrej, “Ninji atra tamo sqab.” Agi dal anjam endegsi unu, “Israel nanji na inji inji poto 10 yoqnsib oto qujai Livai aqa moma nanji atrainjroqnaqab.” Israel nanji Abraham aqa lej na ñambabeb. Nanji Livai aqa moma nanjo was. <sup>6</sup> Melkisedek a Livai aqa lej sai. Ariya Abraham a inji inji poto 10 yosiq oto qujai Melkisedek atraiyej. Atraiyonaqa Melkisedek a Abraham aqa gateq di ban atetosiqa a qa pailyej. Abraham agi nami Qotei na minjej, “E ino moma nanji kobatnjrqai.” <sup>7</sup> Iga qalie, tamo ñam ti nanji na tamo ñam saiqoji nanjo gateq di ban atetnjroqnsib nanji qa pailyeqnaqab.

<sup>8</sup> Israel nanji na Livai aqa moma nanji inji inji atrainjre-qnaqab. Livai aqa moma nanji moreñeqnaqab. Ariya Melkisedek agi Abraham na inji inji atraiyej qaji aqa moiqajqa bati nanji nami nenjrenyosaiqnaqab. Deqa a bati gaigai sobule-junu. <sup>9</sup> Livai aqa moma utru qujai di agi Abraham. Deqa iga endegsi marqom, Livai na inji inji di osiq Melkisedek atraiyobulej. <sup>10</sup> Melkisedek a Abraham gamq di turej bati di Livai a ñambabosaisoqnej. Abraham a inji inji di Melkisedek atraiyej bati deqa Livai a Abraham aqa jejamu miligiq di soqnej. Bunuqna Livai a Abraham aqa lej na ñambabeb. Deqa iga endegsi marqom, Livai a dego inji inji di Melkisedek atraiyobulej.

*Yesus a atra tamo gate bunuj unu*

<sup>11</sup> Livai aqa moma nanği atra tamo sosib wauoqneb nanęo wau dena tamo unęasari nanęi boletnjrosaiioqnej. Nanęi boletnjrej qamu atra tamo bei a olo brantosai qamu. Bole, dal anjam a marej, Livai aqa moma nanęi atra tamo sqab. Dal anjam di Israel nanęi nami esoqneb. Ariya Qotei a olo marnaqa Yesus a gago atra tamo brantej. A Aron bulosiq atra tamo brantosai. A Melkisedek bulosiq atra tamo brantej. <sup>12</sup> O ijo was, dal anjam a marej, Livai aqa moma nanęi atra tamo sqab. Ariya bunuqna Qotei a nanęi kobotnjrsiqa olo atra tamo bei aęi Yesus atej. Qotei aqa kumbra dena a na dal anjam bulyosiq olo dal anjam bei atej. <sup>13</sup> Yesus a Livai aqa leņ na ęambabosai. A leņ bei nanęoq na ęambabej. Leņ nanęi di atraiyqajqa wau nami ojosaiioqneb. <sup>14</sup> Iga qalie, gago Tamo Koba a Juda aqa leņ na ęambabej. Leņ dena atra tamo nanęi brantqajqa Moses a deqa marosaiioqnej.

<sup>15</sup> Yesus a atra tamo bunuj brantosiq Melkisedek bulonaq iga unem. Deqa iga poięeqnu, atra tamo bunuj dena atra tamo kalil nami soqneb qaji nanęi tulaņ bunęnjrejunu. <sup>16</sup> Dal anjam a marej, atra tamo nanęi Livai aqa leņ na brantqab. Ariya Yesus a gam bei na atra tamo brantej. A ęambile ti siņgila ti unu. A gaigai deęsim sqas. Gam dena a atra tamo brantej. <sup>17</sup> Aęi Qotei na nami Kristus endęsi minęej,

“Melkisedek a atra tamo soqnej  
dego kere ni bati gaigai atra tamo sqam.”

<sup>18</sup> O ijo was, anjam dena iga poięeqnu, dal anjam nami soqnej qaji di siņgila saiqoji. Dal anjam dena iga aqaryaigwa keresai. Deqa Qotei na dal anjam di taqal waiyej. <sup>19</sup> Dal anjam dena iga boletgosaiioqnej deqa Qotei na dal anjam di taqal waiyosiqa olo gam bunuj waqtetgej. Gam bunuj di tulaņ bolequja. Gam dena dal anjam namij di tulaņ bunęejunu. Deqa iga gam bunuj di dauryosim Qotei aqa areq giloqnsim a qa tariņoqņom.

<sup>20-21</sup> Qotei na Yesus giltosiqa minęej, “Ni atra tamo sqam.” Deęsi minęsiqa aqa anjam di siņgilatej. Atra tamo nami soqneb qaji nanęi dego Qotei na giltnjroqnsiqa minęroqnej, “Niņęi atra tamo sqab.” Ariya a aqa anjam di siņgilatosaiioqnej. Aęi Qotei aqa anjam bei nami endęsib neņęreņyeb unu, “Tamo Koba a na Kristus endęsi minęej,  
‘Ni bati gaigai atra tamo sqam.’

Osiqa aqa anjam di siņgilatej. Deqa aqa anjam di a olo uratqa keresai.”

<sup>22</sup> Deqa iga qalieonum, Qotei aqa anjam bunuj di tulaņ bolequja. Di kiyaaqa? Yesus a seęi na anjam di gereiyej deqa. Anjam dena dal anjam namij tulaņ bunęejunu.

<sup>23</sup> Nami tamo gargekoba nanġi atra tamo soqneb. Nanġi moreñoqneb deqa nanġi gaigai atra tamo sqa keresai. <sup>24</sup> Ariya Yesus a gaigai sqa deqa a gaigai atra tamo sosim wauoqnqas. Tamo bei na aqa sawa oqa keresai. <sup>25</sup> Deqa tamo unġasari Yesus aqa ñam na Qotei aqa areq gileqnu b qaji nanġi Yesus na torei elenqa kere. Di kiyaaqa? A gaigai ñambile sosisq nanġi qa Qotei pailyeqnu.

<sup>26</sup> Yesus a atra tamo gate deqaji unu deqa a na iga tulan aqaryaigwa kere. A gaigai Qotei aqa segi kumbra boleq di sosisq dauryeqnu. A une bei saiqoji. A Qotei aqa ñamgalaq di tamo tulan bolequja. Qotei na a osi oqsiiq lan qureq di awotej unu. Deqa a une tamo nanġo ambleq di sosai. A isaq di unu. <sup>27</sup> Atra tamo gate nami qaji nanġi bati gaigai wagme inġi inġi oqnsib Qotei atraiyeqnu. Mati nanġi nanġo segi une qa wagme inġi inġi oqnsib Qotei atraiyeqnu. Osib olo tamo unġasari nanġo une qa dego Qotei atraiyeqnu. Ariya Yesus a wau degyosaieqnu. A bati qujai qa aqa segi jejamu ñambile sonaq osiqa Qotei atraiyej. <sup>28</sup> Dal anjam a nami marej, mandam tamo nanġi atra tamo gate sqab. Tamo nanġi di sinġila saiqoji. Ariya bunuqna Qotei na olo anjam bei marsiqa anjam di sinġilatej. Anjam di aqa damu agiende. A na aqa segi Niri torei keretosiq a atra tamo gate atej. Deqa a bati gaigai atra tamo gate sqa.

## 8

### *Yesus a lan qureq oqsiiq dia atra tamo gate unu*

<sup>1</sup> Ijo anjam di aqa utru agiende. Atra tamo gate deqaji unu. Di Yesus qujai. A lan qureq oqsiiq Mandor Koba aqa ban woq di awejunu. <sup>2</sup> A lan qure qaji atra talq di atraiyo wau ojeqnu. Atra tal di Qotei aqa segi tal bole. Tamo bei na tal di atosai. Tamo Koba a segi na tal di atej.

<sup>3</sup> Atra tamo gate nanġo wau di ninġi qalie. Nanġi wagme inġi inġi oqnsib Qotei atraiyeqnu. Deqa Yesus a dego atra tamo gate sosisqa aqa segi jejamu osiqa Qotei atraiyej. <sup>4</sup> Yesus a mandamq endi so qamu a atra tamo sosai qamu. Di kiyaaqa? Livai aqa moma nanġi segi mandamq endi atra tamo sosib wagme inġi inġi Qotei atraiyeqnu. Dal anjam a degsi unu. <sup>5</sup> Livai aqa moma nanġi gaigai mandam qaji atra tal miligiq di waueqnu. Atra tal dena lan qure qaji atra tal iga lanja suwi osorgeqnu. Moses a nami atra tal di atqa laqnaqa Qotei na tal sigitosiqa Moses osoryonaqa degsi atej. Agi Qotei na Moses endegsi minnej, “E mana goge dia atra tal sigitosim ni osormem. Deqa ni atra tal ti aqa inġi inġi kalil ti degsim gereiyime.” Qotei na nami Moses degsi minnej. <sup>6</sup> Ariya bini Yesus a atraiyo wau ojeqnu di wau tulan bolequja. Aqa wau



dena atra tamo nami qaji nanjo wau tulan bunyejunu. Yesus a Qotei aqa anjam bunuj singilatqa osiqa iga Qotei ti gago ambleq di tigelesosiqa yeba waiyej unu. Deqa anjam bunuj dena anjam namij di tulan bunyejunu. Ingi bole bole bunuj Yesus na iga egwa marej qaji dena ingi bole bole namij dego tulan bunyejunu.

*Anjam bunuj a na anjam namij tulan bunyejunu*

<sup>7</sup> O ijo was ningi are qaliy. Anjam namij dena iga aqaryaigwa kere qamu Qotei a olo anjam bunuj marosai qamu. <sup>8</sup> Ariya Tamo Koba a na tamo ungasari nanjo une babtetnrjsiqa endegsi marej, “Ningi quiy. E bati atonum unu. Bati di brantimqa e anjam bunuj qosisiy Israel nanji ti Juda nanji ti minjrit nanji qusib dauryqab. <sup>9</sup> Ijo anjam bunuj di anjam namij dego sai. E nanjo moma nanji Isip sawaq dena joqsim gilsim mana goge dia ijo anjam namij nanji enjrem. Bati deqa nanji ijo anjam di dauryqa uratosib gotranjoqneb deqa e na kamba nanji qoreinjrem. <sup>10</sup> Ijo anjam bunuj agiende. Bati bei brantimqa e na ijo dal anjam kalil osiy Israel nanjo areqaloq di atqai. Osiy nanjo are miligiq di dego nengrenyqai. Deqa e nanjo Qotei soqnit nanji ijo segi tamo ungasari sqab. <sup>11</sup> Sosib bati deqa nanji kalil e qa geregere qalieqab. Deqa nanji olo bunuqna nanjo was nanji endegsi minjrqsai, ‘Ningi Tamo Koba a qa qalieoiy.’ Degsi minjrqsai. Nanji kalil e qa qalieqab. Tamo ñam ti tamo ñam saiqoji nanji ti kalil e qa qalieqab. <sup>12</sup> Di kiyaca? E nanji qa dulosiy nanjo une kobotetnrqai. Deqa bunuqna e nanjo une qa olo are qalqasai.” Tamo Koba a nami degsi marej.

<sup>13</sup> Agi Qotei a marej, “E anjam bunuj qosqai.” A degsi marej deqa iga qalieonum, anjam a nami qosej qaji di olo namijej. Deqa anjam di sokiñalayosim torei koboqas.

## 9

*Atra tamo gate nami qaji nanji wagne aqa leñ atraiyeqñub*

<sup>1</sup> Israel nanji anjam namij dauryoqneb bati deqa nanji mandam qaji atra talq di Qotei qa louoqneb. <sup>2</sup> Atra tal di jagwa oqajqa tal bul. Tal miligiq di warum bei soqnej. Warum di aqa ñam “Getento Warum.” Warum miligiq di nanji lam ti atra bijal ti atraiyqa bem ti atnab soqnej. <sup>3</sup> Getento warum qoreq di nanji gara kobaquja bei gainteb. Gara aqa qoreq di warum bei soqnej. Warum di aqa ñam “Warum Tulan Getento Koba.” <sup>4</sup> Qa sum koitib qurem quleqwajqa deqa marsib atra bijal gol na gereiyosib warum dia atnab soqnej. Qotei aqa dal anjam so qaji ñam monqum dego warum dia soqnej. Ñam monqum aqa qalaq di gol na walateb. Ñam monqum miligiq di lan qure qa ingi uyo Qotei na nami

Israel nanġi anainjrej qaji di tabirq di atnab soqnej. Tabir di dego gol na gereiyeb. Nam moŋgum miligiq di Aron aqa walwelqa toqon nami qenjilitej qaji di atnab soqnej. Meniŋ aiyel Qotei a nami nanġo quraq di aqa dal anjam nenġrenyej qaji di dego nam moŋgum miligiq di atnab soqnej. <sup>5</sup> Nam moŋgum aqa quraq di lan anġro aiyel nanġo sigito qunun atnab soqnej. Lan anġro aiyel nanġi di Qotei aqa singila sigitoqnsib unub. Nanġo bari na nam moŋgum di kabutesoqnej. Nam moŋgum aqa qura di tamo unġasari nanġo une kobotetnrqajqa sawa. Bini e inġi inġi kalil deqa anjam koba marqasai.

<sup>6</sup> Inġi inġi kalil deqaji atra tal miligiq di atnab sonabqa atra tamo nanġi bati gaigai atra tal miligiq giloqnsibqa warum dia Qotei louqajqa wau yeqnu. <sup>7</sup> Ariya atra tamo gate a segi bati qujai qa wausau gaigai Warum Tulaŋ Getento Koba di miligiq giloqnsiqa aqa segi une qa ti tamo unġasari nanġo une qa ti leŋ oqnsiqa Qotei atraiyeqnu. Tamo unġasari nanġi di powo bole ti sosai deqa nanġi une yeqnu. <sup>8</sup> O ijo was kalil, Mondor Bole na iga endegsi osorgeqnu, atra tal namij sonaqa iga Warum Tulaŋ Getento Koba di miligiq gilqajqa gam geteŋejunu. <sup>9</sup> Atra tal dena kumbra bunuj bini branteqnu qaji di iga laŋa suwi osorgeqnu. Tal dia atra tamo nanġi wagne inġi inġi oqnsib Qotei atraiyeqnu. Ariya wagne inġi inġi dena tamo unġasari Qotei qa loueqnu qaji nanġo are miligi gereiyetnrqa keresai. Deqa nanġi endegsi qalieqa keresai, “Bole, Qotei na gago une kobotetgekritqo.” Degyqa keresai. <sup>10</sup> O ijo was, anjam namij di a inġi uyo qa ti ya uyo qa ti yanso oqajqa ti jejamu inġi inġi qa ti segi mareqnu. Qotei na Israel nanġi anjam namij di enjrej. Di kiyaqqa? Nanġi anjam di dauryosib soqni b bunuqna a na olo gam bunuj gereiyqas.

### *Kristus na aqa segi leŋ osiqa Qotei atraiyej*

<sup>11</sup> Ariya Kristus a brantosiqqa a gago atra tamo gate sosiqa inġi bole bole Qotei na mondon iga egwas qaji di osiqa lan qure qa atra tal miligiq gilej. Atra tal di tulaŋ bolequja. Atra tal dena mandam qaji atra tal tulaŋ bunyejunu. Mandam tamo nanġi na lan qure qaji atra tal di gereiyosai. <sup>12</sup> Kristus a makau ti kaja du du ti nanġo leŋ osiqa atra tal di miligiq gilosai. A aqa segi leŋ osiqa bati qujai qa atra tal di miligiq gilej. Aqa wau dena a gago uneq na iga olo awaigej deqa iga nambile gaigai sqom. <sup>13</sup> Atra tamo nami qaji nanġi makau ti kaja du du ti nanġo leŋ oqnsib Qotei atraiyeqnu. Osib makau nanġo damu koiteqna skuleqnaq sum oqnsib tamo unġasari nanġo gateq di bilenteqnu. Nanġi na tamo unġasari une ti unub qaji nanġo jejamu yansetnrqajqa marsib kumbra degyeqnu. <sup>14</sup> Ariya Kristus aqa leŋ na wagne nanġo leŋ tulaŋ bunyejunu. Kristus a jiga bei saiqoji. A gago jejamu

yansetgosai. A gago are miligi yansetgej. Mondor gaigai sqas qaji a na Kristus singilatonaqa aqa segi nambile osiqa Qotei atraiyej. Osiqa aqa leŋ aiyej qaji dena gago are miligi yansetgej. Deqa iga qalieonum, iga Qotei aqa nŋamgalaq di une saiqoji unum. Deqa iga moiyo qaji kumbra kalil uratqom. Osim Qotei nambile gaigai unu qaji a qa are qaloqnsim waue-toqnqom.

*Kristus aqa leŋ na anjam bunuj singilatej*

<sup>15</sup> Yesus aqa leŋ aiyej qaji dena iga bole aqaryaigej. Deqa iga Qotei aqa nŋamgalaq di tamo bole une saiqoji unum. Yesus a na Qotei aqa anjam bunuj singilatqa osiqa iga Qotei ti gago ambleq di tigelesosiqa yeba waiyej unu. Nami iga anjam namij aqa sorgomq di sosim bati deqa iga une yoqnsim laqnem. Onaqa Yesus a iga qa moisiq dena a iga olo awaigosiqa gago une kobotetgej. Deqa iga ti tamo ungasari kalil Qotei na metnjreqnu qaji naŋgi ti nambile gaigai sqom. Qotei a nami marej, “E na nambile di ijo segi angro tɪntɪn naŋgi enjrqi.”

<sup>16</sup> E mandam tamo naŋgo kumbra qa mernɟwai. Tamo bei a qalieqo, a bunuqna moiqas. Deqa a pepa bei osim aqa angro naŋgi aqa inɟi inɟi kalil oqajqa marsim naŋgo nŋam nenɟrenɟyim sqas. A moiyo saisoqnimqa aqa angro naŋgi aqa inɟi inɟi oqa keresai. A moiyimqa naŋgi aqa inɟi inɟi oqab. <sup>17</sup> Tamo di a nambile soqnimqa aqa anjam nenɟrenɟyej qaji di a laŋa sqas. Ariya a moiyimqa aqa anjam di singila ti sqas. <sup>18</sup> Dego kere nami atra tamo naŋgi anjam namij singilatqa osibqa naŋgi na wagme naŋgi nŋumeq nab naŋgo leŋ aiyoqneŋ. <sup>19</sup> Agi Moses a dal anjam kalil plaltosiq tamo ungasari naŋgi minjrsiq koboonaqa a na makau ti kaja du du ti naŋgo leŋ osiqa ya ti sil lent ti nŋamtaŋ aqa dani aqa nŋam hisop de ti turtosiq tamo ungasari naŋgo gateq di bilentej. Osiqa Qotei aqa lou gara nenɟrenɟ aqa qoreq di dego bilentej. Sil lent di kaja du du naŋgo junɟum na gereiyo qaji. <sup>20</sup> Moses a leŋ bilentosiq marej, “Leŋ endi aisiq Qotei aqa anjam singilatqo. Agi Qotei a nami nŋi endegsi mernɟej, ‘Nŋi anjam di dauryiy.’ ” <sup>21</sup> Osiqa Moses a olo leŋ bilentonaqa atra tal ti atraiyqajqa inɟi inɟi ti naŋgoq dego aiyej. <sup>22</sup> Deqa iga qalieonum, leŋ na inɟi inɟi kalil yansqas. Leŋ aiqasai di Qotei na tamo ungasari naŋgo une kobotqasai. Dal anjam a degsi marqo.

*Kristus a gago une kobotqa marsiqa aqa segi jexamu Qotei atraiyej*

<sup>23</sup> Atra tal namij aqa inɟi inɟi dena laŋ qaji inɟi inɟi laŋa sigitejunu. Atra tamo naŋgi na wagme naŋgo leŋ oqnsib dena inɟi inɟi di yanseqnub. Ariya wagme naŋgo leŋ na laŋ qaji inɟi inɟi yansqa keresai. Leŋ tulaŋ boledamu na segi laŋ qaji

inġi inġi yansqas. <sup>24</sup> Iga qalie, Kristus a mandam qaji atra tal miligiq gilosai. Mandam qaji atra tal di tamo nanġi na ateb. Tal di Qotei aqa atra tal bole laġa sigitejunu. Kristus a laġ qureq oqej deqa bini a Qotei aqa areq di sosiqa iga qa waueqnu.

<sup>25</sup> Atra tamo gate nami qaji a wausau gaigai wagme nanġo leġ oqnsiqa Warum Tulanġ Getento Koba di miligiq gileqnu. A aqa segi leġ osaieqnu. A wagme nanġo leġ oqnsiq miligiq gileqnu. Ariya Yesus a degyosaieqnu. A laġ qureq oqsiq bati qujai qa aqa segi jejamu osiq Qotei atraiyej. A bati gargekoba degyosai oqnej. <sup>26</sup> A bati gargekoba degyoqnej qamu Qotei na nami mandam atej bati deqa a jaqatinġ oqnsiq bosu bosiq agi bini olo jaqatinġ eqnu qamu. Ariya diġo bati jojomqo deqa Kristus a bati qujai qa mandamq aisiq gago une kobotqa marsiq aqa segi jejamu osiq Qotei atraiyej. <sup>27</sup> Iga qalie, tamo kalil nanġi bati qujai qa moiyeqnu. Mondonġ nanġi Qotei aqa ulatamuq di brantib a nanġo une qa nanġi peginjrqas. <sup>28</sup> Dego kere Kristus a bati qujai qa tamo gargekoba nanġo une qoboiyetnjrqas marsiqa aqa segi jejamu osiq Qotei atraiyej. Ariya mondonġ a laġ qureq na bqas. Bati deqa a na tamo unġasari nanġo une olo qoboiyetnjrqasai. A bosim tamo unġasari a qa tariġeqnub qaji nanġi torei elenqas.

## 10

### *Wagme nanġo leġ na gago une kobotqa keresai*

<sup>1</sup> Moses aqa dal anjam aqa wau agiende. Dal anjam na inġi bole bole Qotei a mondonġ iga egwas qaji di iga laġa suwi osorgeqnu. Damu osorgosaieqnu. Atra tamo gate nanġi wagme inġi inġi oqnsib wausau gaigai Qotei atraiyeqnu deqa iga qalieonum, dal anjam na tamo unġasari Qotei aqa areq gileqnu qaji nanġi torei boletnjrqas keresai. <sup>2</sup> Wagme inġi inġi dena tamo unġasari Qotei qa loueqnub qaji nanġo une yansetnjrqas kere qamu atra tamo gate nanġi na olo atraiyosai qamu. Deqa tamo unġasari nanġi nanġo une qa olo are gulbeinjrosai qamu. <sup>3</sup> Ariya atra tamo gate nanġi wausau gaigai wagme inġi inġi di oqnsib Qotei atraiyeqnu. Deqa tamo unġasari nanġi nanġo une qa olo are qaloqnsib are gulbe ti unub. <sup>4</sup> Kumbra di aqa utru agiende. Makau ti kaja du du ti nanġo leġ na tamo unġasari nanġo une kobotetnjrqas keresai bole sai.

<sup>5</sup> Deqa Kristus a mandamq aiqa osiqa endegsi pailyej, "O Abu, ni atraimqajqa wagme inġi inġi qa arearetmosaieqnu.

Deqa e ijo segi jejamu osiy ni atraimqai. Ijo jejamu di agi ni na e gereiyetbem.

6 O Abu, atra tamo nanġi na tamo unġasari nanġo une qa aqaryainjrqa maroqnsib wagme inġi inġi oqnsib nġamyuwo na koitoqnsib ni atraimeqñub.

Ni inġi inġi deqa arearetmosaieqñu.

7 Deqa e ni endegsi pailmonum,

‘O Qotei, e bonum.

Agi nami anjam degsib e qa nenġrenyeb.

Bini e ino areqalo dauryqa bonum.’” Kristus a mandamq aiqa osiqa degsi Qotei pailyej.

8 Agi Kristus a namoqna pailyej, “O Abu, ni atraimqajqa wagme inġi inġi qa arearetmosaieqñu. Atra tamo nanġi na tamo unġasari nanġo une qa aqaryainjrqa maroqnsib wagme inġi inġi oqnsib nġamyuwo na koitoqnsib ni atraimeqñub. Ni inġi inġi deqa arearetmosaieqñu.” O ijo was, dal anjam a nami atraiyqajqa inġi inġi deqa marej. 9 Ariya bunuqna Kristus a olo pailyej, “O Qotei, e ino areqalo dauryqa bonum.” A degsi pailyej deqa iga qalieonum, a kumbra namij di taqal waiyosiq a olo kumbra bunuj atej. 10 Yesus Kristus a Qotei aqa areqalo dauryosiq deqa a bati qujai qa aqa segi jejamu osiqa Qotei atraiyej. Wau dena Yesus na iga elenġosiq a Qotei aqa segi kumbra boleq di atej.

*Yesus aqa leñ na gago une kobotetgej*

11 Atra tamo kalil nanġi bati gaigai atra tal miligiq giloqnsibqa nanġo wau yeqñub. Nanġi bati gargekoba wagme inġi inġi oqnsib Qotei atraiyeqñub. Inġi inġi dena tamo unġasari nanġo une kobotetnrqqa keresai. 12 Ariya Kristus a bati qujai qa gago une kobotqa marsiqa aqa segi jejamu osiqa Qotei atraiyej. Osiqu lan qureq oqsiqu dia Qotei aqa ban woq di awoej. Deqa aqa atraiyo wau di gaigai sqas. 13 A Qotei aqa ban woq di awesosiqa mondorj Qotei na aqa jeu tamo kalil nanġi osim aqa sinġaq di koroinjrqaqqa deqa tariñeqñu. 14 Yesus a bati qujai qa aqa segi jejamu osiqa Qotei atraiyej. Wau dena a na tamo unġasari a nami Qotei aqa segi kumbra boleq di atej qaji nanġi torei boletnrrej. Deqa nanġi bati gaigai une saiqoġi sqab.

15 Anjam deqaji Mondor Bole na dego iga mergeqñu. Agi a endegsi mergeqñu, 16 “Tamo Koba a marej, ‘Ijo anjam bunuj agiende. Bati bei brantimqa e na ijo dal anjam kalil osiy tamo unġasari nanġo are miligiq di atqai. Osiy nanġo areqaloq di dego nenġrenyqai.’” 17 Osiqu olo anjam bei dego totoryosiq endegsi marej, “E nanġo une kobotetnrqai deqa bunuqna e nanġo une qa olo are qalqasai.” 18 O ijo was, Qotei na gago une torei kobotej deqa atraiyo inġi bei na gago une olo kobotqa keresai bole sai.

*Iga Warum Tulañ Getento Koba di miligiq gilqa kere*

19 O ijo was kalil, Yesus aqa lenj aiyej qaji dena gago une kobotetgej. Deqa iga Warum Tulaŋ Getento Koba di miligiq giloqnqom. Iga ulaqasai. Warum di agi Qotei aqa atra talq di unu. 20 Yesus a segi na n̄ambile qa gam bunuj waqtetgosiqa a segi namoosiq warum di miligiq gilsiq gara gainjejunu qaji dena torei miligiq gilej. Gara di Yesus aqa segi jejamu. 21 Gago atra tamo gate unu agi Yesus. Deqa a na Qotei aqa tamo ungasari kalil nan̄gi taqatn̄reqnu. 22 A gago kumbra uge kalil qa are qalsiqa aqa segi lenj bilentonaqa aisiq gago are miligi yansetgej. Deqa iga ya na yanso em. Yesus aqa wau dena iga qalieonum, iga Qotei aqa n̄amgalaq di une saiqoji unum. Deqa kumbra gisaŋ kalil gago are miligiq di unu qaji di iga taqal waiyqom. Osim Qotei qa gago areqalo torei siŋgilatosim aqa areq giloqnqom. 23 Iga qalie, iŋgi bole bole Qotei a nami iga egwa marej qaji di a na egwas. A uratqasai. Deqa iga Qotei aqa n̄am siŋgila na ojsim boleq di maroqnsim iŋgi bole bole deqa tariŋoqnqom. Iga areqalo aiyeltqasai. 24 Iga gago Kristen was nan̄go are tigeltetn̄jroqnm̄qa nan̄gi qalaqalayo kumbra ti kumbra bole bole ti dauryoqnqab. 25 Osim iga Qotei aqa n̄am qa koroqoqnqom. Iga kumbra di uratqasai. Kristen was qudei nan̄gi koroqajqa asgin̄reqnu. Deqa iga nan̄gi siŋgilatn̄jroqnqom. Niŋgi qalie, Yesus a olo bqajqa bati jojomqo.

### *Iga Qotei aqa N̄iri qoreiyqasai*

26 Niŋgi quiy. Iga Yesus aqa anjam bole qalieonum deqa bunuqna iga diqosim gago segi areqalo na une yoqnqasai. Yoqnqom di Qotei na gago une kobotetgwasai. Osim atraiyqajqa iŋgi bei iga egwasai. 27 Iga une yoqnqom di iga pegigwajqa bati qa ulaosim tariŋqom. Pegigwajqa bati deqa Qotei na aqa jeu tamo kalil nan̄gi ojelen̄osim n̄amyuwo kan̄kan̄ kobaq di brejn̄r̄qas. 28 Iga qalie, tamo bei a Moses aqa dal anjam gotran̄yimqa tamo aiyel kiyo tamo qalub kiyo aqa une unsib boleq di maribqa tamo ungasari nan̄gi a qa dulqasai. Nan̄gi a qalib moiqas. 29 Ariya tamo bei a Qotei aqa N̄iri qoreiyosim aqa n̄am ugeugeiyqas di aqa une deqa a gulbe tulaŋ kobaquja oqas. Aqa gulbe dena dal anjam gotran̄yo qaji tamo aqa gulbe tulaŋ bunyqas. Tamo di a nami Qotei aqa anjam bunuj Yesus aqa lenj na siŋgilatej qaji di dauryoqnej. Osiqa a Qotei aqa segi kumbra boleq di soqnej. Ariya a olo Yesus aqa lenj di ugeugeiyosim Qotei aqa Mondor iga qa are boleiyeqnu qaji aqa n̄am ugetqas di a gulbe tulaŋ kobaquja oqas. 30 Iga qalieonum, Qotei a nami endegsi marej, “Tamo nan̄go une kalil e segi na kambatosiy awai uge en̄jr̄qai. Di ijo segi wau.” Osiqa marej, “Tamo Koba a na aqa tamo ungasari nan̄go une

qa peginjrqas.” <sup>31</sup> O ijo was, Qotei nambile unu qaji a na tamo bei njolawotqas di a tulan ulaugetqas.

*Nunگو areqalo Yesus qa singilateq nub qaji di geregere ojesoqniy*

<sup>32</sup> Ningi are qaliy. Nami Qotei a nunگو areqalo suwan-tetngonaqa bati deqa jeu tamo nanğı na gulbe ti jaqatinğ ti gargekoba ningi enگوqneb. Engeq nab ningi singila na tigeloqnsib gulbe di gotranگوqneb. <sup>33</sup> Jeu tamo nanğı dena nunگو Kristen was qudei nanğı joگوqnsib tamo ungasari kalil nanگو nğamdamuğ di tigeltngiroqnsib nanگو nğam misilinyoqnsib nanğı ugeugeinjroqneb. Yeq nab ningi na nunگو Kristen was nanğı di beternjroqnsib singilatngiroqneb. <sup>34</sup> Jeu tamo nanğı dena nunگو Kristen was qudei nanğı ojoqnsib tonto talq di breinjreq nab sonabqa ningi na tonto tamo nanğı deqa are qaloqnsib nanğı geregereinjroqneb. Bati di jeu tamo nanğı dena ningi qudei nunگو ingi ingi yaingوqneb. Ariya ningi deqa are ugeingosaiognej. Ningi areboleboleingوqnej. Di kiyaqqa? Ningi qalie, ingi di lanğ mandam qaji ingi. Ingi bati gaigai sqas qaji di tulan bolequja. Mondonğ ningi ingi di oqab. Di ningi qalie.

<sup>35</sup> Kumbra bole ningi nami yoqneb qaji deqa olo are qaloqnsib yoqniy. Osib nunگو areqalo Yesus qa singilateq nub qaji di geregere ojesoqniy. Ningi olo urataib. Ningi uratqasai di mondonğ ningi awai tulan boledamu oqab. <sup>36</sup> Ningi nunگو gulbe kalil qoboiyoqnsib singila na tigelesoqniy. Ningi degyqab di Qotei na ningi singilatngimqa ningi aqa areqalo dauryekritosib mondonğ ingi bole bole a nami ningi engwa marej qaji di ningi oqab. <sup>37</sup> Agi Qotei aqa anjam bei nami endegsib nengrenğyeb unu, “Sokiñala tamo bunuqna bqas qaji di a bqas. Deqa a tariņsokobaiyqasai. A urur boqujatqas. <sup>38</sup> Ijo segi tamo ungasari bole nanğı e qa nanگو areqalo singilatqab di nanğı nambile sqab. Nanğı na e qoreibqab di e nanğı qa areboleboleibqasai.”

<sup>39</sup> O ijo was, iga Qotei qoreiyosim padalqasai. Tamo qudei nanğı degyeq nub. Ariya iga tamo deqaji sai. Iga Qotei qa gago areqalo singilato qaji tamo. Deqa iga nambile gaigai sqom.

## 11

*Iga Qotei qa gago areqalo singilatqajqa kumbra*

<sup>1</sup> Iga Qotei qa gago areqalo singilateq num di aqa utru agiende. Iga qalieonum, ingi bole bole Qotei a nami iga egwa marej qaji di iga oqajqa tariņesoqnimqa a na egwas. Iga gago nğamdamu na ingi di unqa keresai di unğum. Iga ingi di oqom.

<sup>2</sup> Qotei aqa tamo ungasari nami soqneb qaji nanğı a qa nanگو areqalo singilatoqneb deqa a nanğı qa maroqnej, “Nanğı tamo bolequja.” <sup>3</sup> O ijo was, iga Qotei qa gago areqalo singilateq num

deqa iga endegsi poigeqnu, bole, Qotei a anjam segi marnaqa laj ti mandam ti brantej. Ingi ingi iga unqa keresai qaji di Qotei na elejosiq dena a ingi ingi kalil iga uneqnum qaji di gereinjrej. Iga degsi poigeqnu.

*Abel na Enok na Noa na nanği qalub*

*Qotei qa nanngo areqalo singilateb*

<sup>4</sup> Abel a Qotei qa aqa areqalo singilatosiq deqa a ingi bei Qotei atraiyonaqa Qotei a ingi deqa tulan arearetej. Kein a dego ingi bei Qotei atraiyej. Ariya Qotei a Kein aqa atraiyo ingi deqa arearetosai. Kumbra dena iga osorgeqnu, Abel a Qotei aqa nãangalaq di tamo bole une saiqoji soqnej. Abel a moiyej ariya a Qotei qa aqa areqalo singilatej deqa bini a Qotei aqa anjam iga mergobuleqnu.

<sup>5</sup> Enok a dego Qotei qa aqa areqalo singilatej. Deqa a moiyo-sai. A nãabile sonaqa Qotei na a osiq laj qureq oqej. Oqnaqa tamo ungasari nanği a qa nãamoqneb a olo unosai. Kumbra dena iga osorgeqnu, Qotei na Enok laj qureq osi oqosaisosiq a Enok aqa kumbra qa tulan arearetoqnej. <sup>6</sup> O ijo was, ningi Qotei aqa areq gilqa osibqa ningi mati a qa nungo areqalo singilatosib endegsib mariy, “Bole, Qotei a unu. Deqa iga a qa nãamosim gilsim itonam a na awai boledamu egwas.” O ijo was, ningi degsib marqab di Qotei a ningi qa tulan arearetqas. Tamo nanği Qotei qa nanngo areqalo singilatqasai di a nanği qa arearetqa keresai.

<sup>7</sup> Noa a dego Qotei qa aqa areqalo singilatej. Deqa Qotei na minjej, “E bunuqna awa qarinyit bosim mandam kalil keretqas. Deqa ni qobun gereiyime.” Noa a awa unosaisosiq a Qotei aqa anjam di dauryosiq aqa angro nanği ti aqa unja a ti padalaib deqa qobun gereiyej. Aqa kumbra dena a na tamo ungasari kalil mandamq di soqneb qaji nanngo une babetnjrej. A Qotei qa aqa areqalo singilatej deqa Qotei na a tamo bole une saiqoji qa minjej.

*Abraham Sara wo nanği Qotei qa nanngo areqalo singilateb*

<sup>8</sup> Abraham a dego Qotei qa aqa areqalo singilatej. Deqa Qotei na Abraham metonaqa a Qotei aqa anjam dauryosiq mandam mutu bei Qotei na a yqajqa minjej qaji deq gilej. A sawa qabitqas kiyo di a qalieosaisosiq gilej. <sup>9</sup> A Qotei qa aqa areqalo singilatej deqa a gilsiq mandam mutu dia brantosiq yaun tamo soqnej. Mandam mutu di agi Qotei na a yqajqa minjej. A di sonaqa Qotei na minjej, “Mondon e na ino moma nanği mandam mutu endi enjrqi.” Onaqa Abraham a mandam mutu dia laqnsiq jagwa oqajqa tal gereiyoqnsiq di nãioqnej. A na Aisak Jekop wo nanği joqsiqa koba na soqneb. Qotei na nanği aiyel dego minjrej, “Mondon e na nungo moma



nanği mandam mutu endi enjrçai.”<sup>10</sup> Abraham a lan qureq oqsim dia sqajqa deqa are qaloqnsiq tariñoqnej. Lan qure di bati gaigai sqas. Lan qure agi Qotei a segi na gereiyey unu.

<sup>11</sup> Abraham aqa njan Sara a dego Qotei qa aqa areqalo singilatej. Deqa a tulan qeliosiq marej, “Bole, e anğrotçai. Anjam Qotei na merbej çaji di a uratqasai. A dauryqas.” Sara a degsi marej deqa Qotei na aqa miligi gereiyetonaqa a gumaney. <sup>12</sup> Abraham a dego qeliosiq a moiqajqa bati jojomon-aqa Qotei na a singila yonaqa a anğro mel qujai nambabtej. Onaqa bunuqna aqa moma nanği tulan gargekobaeb. Bongar tulan gargekoba unub dego kere Abraham aqa moma nanği ulul bul tulan gargekobaeb. Deqa sisyyqa keresai.

<sup>13</sup> O ijo was, Abel na Enok na Noa na Abraham na Sara na nanği kalil Qotei qa nanço areqalo singilatesosib moreneb. Nanği mandamç endi sosibqa inçi bole bole Qotei a nami nanği enjrqa minjrej çaji di nanği osai. Nanği inçi di oqajqa tariñesosibqa isaç na inçi di unsib deqa areboleboleinjrej. Deqa nanği maroqneb, “Iga mandamç endi so boleiyqasai. Iga mandamç endi yan n tamo bulosim sokiñala sosim bunuqna iga mandam endi uratqom.” <sup>14</sup> O ijo was, iga qalieonum, tamo unğasari anjam degsib mareqnub çaji nanği nanço segi sqajqa sawa boleq oqwajqa are qaleqnub. <sup>15</sup> Nanği nanço qure utruç olo aiçajqa deqa are qaleb çamu nanği puluosib aiyeb çamu. <sup>16</sup> Ariya nanği nanço qure utruç olo aiçajqa are qalosaieqnub. Nanği sawa tulan boledamu agi lan qureq di unu çaji deç oqwajqa are qaleqnub. Tamo unğasari nanği dena Qotei endegsib minjeqnub, “Ni gago Qotei.” Yeqnaqa Qotei a nanço Qotei sqajqa jemaiyosaieqnu. Nanği a qa nanço areqalo singilateqnub deqa a nanço qure agi lan goge dia gereiyetnjrej unu.

<sup>17</sup> Abraham a Qotei qa aqa areqalo bole singilatej kiyo sai kiyo di Qotei a tenemtqa osiq endegsi minjej, “Ni ino segi anğro qujai Aisak çalsim e atraibe.” Onaqa Abraham a Qotei aqa anjam di uratosai. Bole, Qotei na nami minjej, “E na ino moma nanği mandam mutu endi enjrçai.” Ariya a Qotei qa aqa areqalo singilatej deqa a Aisak osiq Qotei atraiyya gilej. <sup>18</sup> Agi Qotei a nami Abraham minjej, “Aisak aqa leñ na ino moma nanği bumbrançqab.” <sup>19</sup> Abraham a Aisak çalça osiq endegsi are çalej, “E Aisak çalitça, unğum, Qotei na a olo subç na tigeltça kere.” Abraham a degsi are çalsiq sonaqa Qotei na saidyey, “Ni Aisak çalaim.” Deqa iga yawo anjam endegsi marçom, Qotei na Aisak subç na tigeltobulosiq olo Abraham yey.

*Aisak na Jekop na Josep na nanği çalub Qotei qa nanço areqalo singilateb*

<sup>20</sup> Aisak a dego Qotei qa aqa areqalo singilatosiqa Jekop Iso wo nanngo gateq di aqa ban atetnjrsiqa nanngi qa pailyosiqa kumbra bunuqna nanngoq di brantqas qaji deqa nanngi minjrej.

<sup>21</sup> Jekop a dego Qotei qa aqa areqalo singilatosiqa Josep aqa angro aiyel nanngo gateq di aqa ban atetnjrsiqa nanngi qa pailyej. A tulan qeliosiqa moiqa jomosiqa deqa a na aqa walwelqa toqon ojsiq singa pulutosiq Qotei qa louej.

<sup>22</sup> Josep a dego Qotei qa aqa areqalo singilatosiq deqa a tulan qeliosiq moiqa jomosiqa a na aqa was nanngi endegsi minjrej, “Ninggi na nunngo moma agi Israel nanngi minjribqa bunuqna nanngi Isip sawa uratoqnsibqa bati deqa nanngi ijo tanu osi gilqab.”

*Moses a Qotei qa aqa areqalo singilatej*

<sup>23</sup> Ariya Moses aqa ai abu nanngi dego Qotei qa nanngo areqalo singilateb. Deqa Moses a nambabonaqa nanngi a osib bai qalub a ulitonab soqnej. Nanngi qalieeb, Moses a angro tulan bolequja. Nanngi Isip nanngo mandor koba ulaiyosai deqa nanngi aqa anjam gotranjosib Moses ulitonab soqnej.

<sup>24</sup> Sosiqa tamo kobaqujaonaqa Isip tamo ungasari nanngi na minjoqneb, “Ni Isip nanngo mandor koba aqa asi aqa angro.” Onaqa Moses a Qotei qa aqa areqalo singilatosiq deqa a aqa segi nam aguq atsiqa nanngo anjam di quqwa uratoqnej. <sup>25</sup> A endegsi are qalej, “Qotei aqa tamo ungasari agi Israel nanngi gulbe ti unub. Deqa ungun, e nanngi koba na sosiy gulbe oqnqai. Une qa arebolebole a sokiñalayosim koboqas. Di e uratqai.” <sup>26</sup> Osiqa olo endegsi are qalej, “E Kristus aqa nam qa jemai oqai di kere. Mondon e awai tulan boledamu oqai. Awai dena silali ti ñoro ti kalil Isip sawaq endi unu qaji di tulan bunyejunu.” Moses a awai boledamu di oqa marsiq deqa a degsi are qalej. Osiqa Qotei qa aqa areqalo singilatej.

<sup>27</sup> Moses a Qotei qa aqa areqalo singilatosiq deqa a tigelosiq Isip sawa uratosiq gilej. Isip nanngo mandor koba a Moses qa minjin oqetej ariya Moses a deqa ulaosai. Qotei agi iga unosaieqnum qaji di Moses na unobulosiq deqa a singila na tigelosiq Isip sawa uratosiq gilej. <sup>28</sup> Moses a Qotei qa aqa areqalo singilatosiq deqa a na Israel tamo ungasari nanngi minjrnaqa nanngi kaja du du ñumsib nanngo damu uyebe. Uysib kaja du du nanngo len ainaqa di osib Qotei na aqa lan angro bei qarinyim bosim Israel nanngo angro matu nanngi ñumaim deqa len di nanngo siranmeq di liyeb.

*Tamo ungasari tulan gargekoba nanngi Qotei qa nanngo areqalo singilatoqneb*

<sup>29</sup> Israel nanngi Qotei qa nanngo areqalo singilatosib deqa nanngi Yuwal Lentq di gentosib mandam boleq aisib walwelosib

gileb. Gileq nab Isip nanği na nanği daurnjrsib yuwal ambleq aisib ya uysib moreñeb.

<sup>30</sup> Bunuqna Israel nanği Qotei qa nanço areqalo singilatosib deqa nanği Jeriko qure agutosib kalilyo bati 7 yonabqa qure aqa dadan kalil ululoñeb.

<sup>31</sup> Sambala unça Rahap a dego Qotei qa aqa areqalo singilatej. Deqa Israel tamo aiyel nanği lumu na Jeriko qure unça bonabqa a na nanği aiyel osiqa lawo na gereinjrsiqa ulitnjrej. Qure deqaji tamo unçasari nanği Qotei aqa anjam gotranjoqneq deqa Qotei na nanği kalil padaltnjrej. Rahap a segi Qotei na uratonaq bole soqneq.

<sup>32</sup> Gideon na Barak na Samson na Jepta na Devit na Samuel na Qotei aqa medabu o qaji tamo kalil nanği dego Qotei qa nanço areqalo singilatoqneq. E nanği qa olo ninği sainğwajqa bati keresaiibqo. <sup>33</sup> Nanği Qotei qa nanço areqalo singilatoqneq deqa nanği na mandor kokba nanği qoto itnjroqnsib qoto bunjoqneq. Osib kumbra bole tinğin yoqneq. Inği bole bole Qotei na nami nanği enjrq minğrej qaji di nanği elenjoqneq. Laion nanği boqnsib nanği uyqa laq nab nanği na nanço medabu getentetnjroqneq. <sup>34</sup> Namyuwo na nanği koitnjrq laqnaq nanği olo namyuwo mosotoqneq. Jeu tamo nanği boqnsib serie na nanği ñumqa laq nab nanği jaraiyoqneq. Nanği segi singila saiçoji sonab Qotei na olo nanği singilatnjroqneq. Nanği singilaoqnsib qotoqnsib sawa bei bei qaji nanği teteinjroqneq. <sup>35</sup> Unçasari qudei nanço anğro nanği moreñeq nab Qotei na olo subq na tigeltnjroqneq. Jeu tamo nanği na Qotei aqa tamo qudei nanği tonto talq di breinjroqnsib jaqatin koba enjroqneq. Osib minjroqneq, “Ninği Qotei qoreiyib iga ninği uratnğim ninği tonto talq dena oqedqab.” Onaqa nanği na saidosib minjroqneq, “Sai. Mondon iga olo subq na tigelosim nambile tulan boledamu oqom. Deqa unğum, bini iga jaqatin oqnsim unum di kere.”

<sup>36</sup> Jeu tamo nanği na Qotei aqa tamo unçasari qudei nanği misilinjroqnsib kumbainjroqneq. Osib nanği tonto talq di breinjroqnsib sil singila kokba na nanği tontnjroqneq. <sup>37</sup> Osib Qotei aqa tamo unçasari qudei nanği menin na ñumoqnsib moiyoğnjroqneq. Osib olo qudei nanği serie na ginğenğnjreq nab moreñoqneq. Osib olo qudei nanço jejamu qaja na qametnjroqneq. Nanği qudei gara bolesai deqa nanği kaja nanço junğum na gara gereiyoqnsib jugoqneq. Nanği inği inği tulan saiinğrej deqa nanği laña soqneq. Jeu tamo nanği na nanği gulbe enjroqnsib tulan ugeugeinjroqneq. <sup>38</sup> Tamo unçasari nanği di tulan ugeosib soqneq deqa nanği wadau sawaq di, manaq di, menin kokba miligiq di, sub miligiq di laqneq. Nanği Qotei qa nanço areqalo singilatoqneq deqa nanği kumbra bole yoqneq.

Nanġi tamo unġasari kalil mandamq di soqneb qaji nanġi bul sai. Nanġo kumbra tulaġ bolequja.

<sup>39</sup> Nanġi kalil Qotei qa nanġo areqalo sinġilatoqneb deqa nanġi aqa nġamgalaq di tamo unġasari tulaġ bolequja soqneb. Ariya inġi bole bole Qotei na nanġi enjrqqa minjrej qaji di nanġi osaiqneb. <sup>40</sup> Di kiyaaqa? Qotei na olo inġi tulaġ boledamu bei iga egwajqa marsiqa gereiyej unu. Mondon a na iga ti nanġi ti turtgosim iga kalil koba na inġi boledamu di egwas. Osim dena a na iga kalil torei boletgwas.

## 12

### *Iga Yesus koqyesosim a qa gago areqalo sinġilatqom*

<sup>1</sup> Tamo unġasari nami soqneb qaji nanġi di Qotei qa nanġo areqalo sinġilatoqneb deqa bini nanġi lanbi bul iga agutgesonab iga nanġi unjreqnum. Unjreqnum deqa iga sinġila na gurgurobuloqnsim bubuqnoqom. Qotei na iga giltgej deqa iga gurguroqnmqa gulbe qudei na iga getentgwa laqnimqa iga gulbe di olo gotranjoqnoqom. Une qudei gagoq di heterqajqa laqnu qaji di dego iga gotranjoqnoqom. <sup>2</sup> Osim iga Yesus koqyoqnsim gurgurqom. Iga Qotei qa gago areqalo sinġilateqnum di Yesus a segi utru. Bunuqna a na gago areqalo di torei keretqas. Yesus a nami qalieej, a nġamburbasq di moism bunuqna a olo tulaġ areboleboleiyqas. Jeu tamo nanġi a qa maroqneb, “A tamo uge deqa a moiqa.” Ariya Yesus a deqa jemaiyosai. A aqa are sinġilatosiq nġamburbasq di moiyej. Bini a olo lan qureq di Qotei aqa awo jaram baġ woq di awejunu.

### *Qotei na iga tingitgwa marsiqa gulbe egeqnu*

<sup>3</sup> Ninġi geregere are qaliy. Une tamo nanġi Yesus qa tulaġ ugeoqnsib a jeuteqnab a sinġila na tigelesoqnej. Ninġi dego sinġila na tigelesoqniy. Ninġi ulaaib. Osib asġingaiq. <sup>4</sup> Bole, ninġi une gotranjqajqa sinġilakobaeqnub. Ariya jeu tamo nanġi na kamba ninġi moiyoṡnġosaieqnub. <sup>5-6</sup> O ijo was, Qotei a nami anjam bei ninġi merġej. Ninġi anjam deqa are walġgwo kiyo? A ninġi dalġgwa osiqa endegsi merġej, “O ijo anġro, e nunġo Tamo Koba. Deqa e ninġi tingitġgwa marsiyqa gulbe enġoqnit ninġi gulbe di qoboiyqa asġingaiq. Osib are gulbeinġaiq. Ninġi quiy. Tamo unġasari e qalaqalainjreqnum qaji nanġi di e na olo tingitnjreqnum. Tamo unġasari e ijo segi anġro qa mareqnum qaji nanġi di e na olo gulbe enjreqnum.” Qotei a ninġi aqa segi anġro sqa marsiq deqa anjam degsi merġej. Ninġi anjam deqa olo are walġgwo kiyo?

<sup>7</sup> O ijo was, Qotei na ninġi tingitnġoqnsim gulbe enġoqnmqa ninġi sinġila na tigeleqnsib gulbe di qoboioqniy. Abu nanġi na nanġo anġro nanġi gaigai tingitnjreqnub dego kere Qotei

na nin̄gi tingit̄ngeqnu. <sup>8</sup> Qotei na aqa an̄gro kalil nan̄gi gaigai tingit̄n̄reqnu. A na nin̄gi tingit̄n̄gwasai di nin̄gi aqa an̄gro sqa keresai. Nin̄gi gam qaji un̄a aqa an̄gro bul sqab. <sup>9</sup> Nin̄gi are qaliy. Gago mandam qaji abu nan̄gi na iga tingit̄goqneb. Deqa iga nan̄go ñam soqtoqnem. Ariya gago lan̄ qaji Abu a gago qunun̄ taqateqnu. Deqa iga aqa sorgomq di geregere sosimqa aqa ñam tulan̄ soqtoqnqom. Osim dena iga ñambile sqom. <sup>10</sup> Gago mandam qaji abu nan̄gi sokiñala sosib nan̄go segi areqalo dauryosib iga tingit̄goqneb. Ariya Qotei na iga geregere aqaryaigwajqa osiq iga tingit̄geqnu. Di kiyaya? Iga aqa segi kumbra boleq di sqajqa deqa. <sup>11</sup> Bole, Qotei na iga tingit̄gwa maroqnsiq gulbe egeqnaqa iga areboleboleigosaieqnu. Iga are gulbeigeqnu. Ariya bunuqna gulbe dena iga sin̄gilat̄gimqa iga kumbra bole tin̄tin̄ dauryqajqa geregere qalieqom. Osim dena iga lawo na sqom.

*Nin̄gi Qotei aqa segi kumbra bole dauryiy*

<sup>12</sup> Deqa nun̄go ban̄ a laesqas di nin̄gi na olo sin̄gilatosib wauoqniy. Nun̄go sin̄ga tombol dego laesqas di nin̄gi olo sin̄gila na tigelesoqniy. <sup>13</sup> Tigelesosib gam bole dauryosib walweloqniy. Nin̄gi degyqab di nun̄go sin̄ga ugeqasai. Nun̄go sin̄ga olo boleqas.

<sup>14</sup> Nin̄gi tamo kalil nan̄gi ti koba na geregere lawo na sqajqa sin̄gilaoqniy. Osib nin̄gi Qotei aqa segi kumbra bole dego dauryqajqa sin̄gilaoqniy. Tamo a Qotei aqa segi kumbra bole dauryqasai di a Tamo Koba un̄qa keresai. <sup>15</sup> Nin̄gi geregere ñam atoqnsib soqniy. Qotei a nin̄gi qa are boleiyeqnu aqa kumbra di nin̄gi qudei olo uratosib ulon̄o uge. Ñamtan̄ oqsic gei uge uge atelen̄eqnu dego kere nun̄go ambleq di tamo bei a are uge ti sosim kumbra uge uge babtoqnimqa nin̄gi na saidiy. Tamo dena nin̄gi niñaq̄ngimqa nin̄gi Qotei aqa ñamgalaq di jiga ti so uge. <sup>16</sup> Nin̄gi na Kristen tamo un̄gasari nan̄gi saidnjribqa nan̄gi sambala kumbra yaib. Osib Qotei qoreiyaib. Agi Aisak aqa ñiri Iso a Qotei qoreiyej. Osiqa a an̄gro matu soqnej deqa are qalosaioisic in̄gi bole bole aqa abu na nami a yqajqa min̄jej qaji di qarinyosiq dena in̄gi uyo bei awaiyosiq uyej. <sup>17</sup> Nin̄gi qalie, bunuqna Iso a aqa abu aqa in̄gi bole bole di olo oqajqa marnaqa Qotei na saidyej. Deqa a akamugetej. Aqa kumbra uge yej qaji di a olo uratosim are bulyqajqa gam saiiyej.

*Nin̄gi Jerusalem bunuj lan̄ goge di unu qaji deq beben̄eb*

<sup>18</sup> Nami Israel nan̄gi Sainai mana utru jojomyosib dia ñamyuwo ti ambru ti jagwa ti unoqneb. Nan̄go ban̄ na mana di ojoqneb. Ariya ijo was, nin̄gi in̄gi in̄gi deq bosai. <sup>19</sup> Israel nan̄gi Sainai manaq di gul an̄jam quoqnsib Qotei aqa kakro

dego quoqneb. Osib ulaugeteb. Deqa nanği Moses minjeb, “Qotei a olo anjam bei mergaiq.”<sup>20</sup> Nanği Qotei aqa anjam di qusib ulaugeteb. Agi Qotei na nanği endegsi minjrej, “Tamo bei kiyo wagme bei kiyo mana endeq oqimqa niği a meniğ na qalib moiym.” Qotei na nanği degsi minjrej.<sup>21</sup> Manağ di nanği iği iği di unoqnsib deqa nanği tulağ ulaugeteb. Moses a dego mana deqa ulaosiq marej, “E ulaugetosim tulağ ginda gindañeqnum.”

<sup>22</sup> Ariya niği iği iği deq bosai. Niği Saion manağ beleneb. Osib Qotei ñambile gaigai unu qaji aqa segi qureq dego beleneb. Qure di agi Jerusalem bunuj lağ goqe di unu qaji. Niği lağ anğro tulağ gargekoba sisiiyqa keresai nanğoq dego beleneb.<sup>23</sup> Tamo unğasari Qotei qa korooqnsib loueqnub qaji nanğoq dego niği beleneb. Tamo unğasari nanği di Qotei aqa segi anğro matu tiñtiğ. Nanğo ñam Qotei a lağ qureq di nenğrenyej unu. Niği Qotei qa ti tamo unğasari kumbra bole dauryeqnub qaji nanğo qunuğ qa ti beleneb. Tamo unğasari nanği di Qotei na torei boletnjrej. Qotei agi mondoğ iga kalil pegigwas.<sup>24</sup> Ariya niği Yesus qa dego beleneb. Yesus agi Qotei aqa anjam bunuj siğilatqa osiqa iga Qotei ti gago ambleq di tigelesosiqa yeba waiyej unu. Yesus aqa leğ bilenej qaji a qa dego niği beleneb. Deqa leğ dena Qotei aqa anjam niği merñgobuleqnu. Yesus aqa leğ di tulağ bolequja. Leğ dena Abel aqa leğ tulağ bunyejunu. Abel aqa leğ na dego niği anjam merñgobuleqnu.

### *Niği Qotei aqa anjam quqwa urataib*

<sup>25</sup> O ijo was, niği geregere ñam atoqniy. Qotei na niği anjam merñgoqnimqa niği aqa anjam dauryqa urataib. Qotei a nami mandamq endi sosiqa Israel nanği anjam siğila na minjroqnej. Minjreqnaqa nanği aqa anjam di dauryqa uratoqneb. Deqa Qotei na nanği awai uge enjrej. Awai uge di nanği britosib jaraiqa keresai. Ariya bini Qotei a lağ goqe di sosiqa iga dego anjam siğila na mergeqnu. Deqa iga a qoreiyqom di a na iga awai tulağ ugedamu egwas. Awai uge di iga britosim jaraiqa keresai bole sai.<sup>26</sup> Nami Qotei na Israel nanği anjam siğila na minjreqnaqa aqa kakro dena mandam reñgiyoqnej. Ariya bini a olo anjam endegsi iga mergeqnu, “Bunuqna bati qujai qa e olo mandam reñgiyqai. E mandam segi reñgiyqasai. E mandam ti lağ ti reñgiñjrjai.”<sup>27</sup> A marej, “Bati qujai qa.” Deqa iga qalieonum, Qotei na iği iği a nami atej qaji di taqal breinjrim nanği torei koboqab. Iği iği di agi Qotei na reñgiñjrjas. Yimqa iği iği a na reñgiñjrjasai qaji di gaigai sqab.

<sup>28</sup> Qotei a gago Mandor Koba sosiğ iga taqatgeqnu. Aqa kumbra di reñgiğqa keresai. Deqa iga Qotei biñiyoqnsim

kumbra a tulan areareteqnu qaji dena a qa louoqnsim aqa ñam soqtoqnsim ulaoqnsim aqa sorgomq di sqom. <sup>29</sup> Iga degyqom. Di kiyaaqa? Gago Qotei a ñamyuwo bul inġi inġi kalil koitelenqnu qaji.

## 13

### *Ninġi segi segi qa qalaqalaiyo kumbra yoqniy*

<sup>1</sup> O ijo Kristen was, bati gaigai ninġi segi segi qa qalaqalaiyo kumbra yoqniy. <sup>2</sup> Qure bei qaji tamo nanġi nunġo meq boqni b ninġi na oqnsib geregereinjroqniy. Kumbra di ninġi urataib. Ninġi qalie, qure bei qaji tamo nanġi nami nunġo moma qudei nanġo meq beqnab tamo bole edegoqnsib geregereinjroqneb. Ariya nanġi tamo sai. Nanġi lan angro.

<sup>3</sup> Qotei aqa tamo unġasari qudei nanġi tonto talq di unub deqa ninġi nanġi uratnjraib. Ninġi nanġi qa are qaloqnsib koba na tonto talq di sobulosib nanġi gereinjroqniy. Kristen tamo qudei nanġi jEU tamo nanġi na jaqatinj enjreqnub deqa ninġi nanġi qa dego are qaloqnsib koba na jaqatinj obuloqnsib nanġi gereinjroqniy. Ninġi qalie, jEU tamo nanġi na nunġo jejamu dego ugeugeiyqa kere.

<sup>4</sup> Tamo a unġatqas di kumbra bole. Unġa a tamotqas di dego kumbra bole. Deqa ninġi kumbra di ugetaib. Ninġi kumbra di geregere taqatosib Qotei aqa ñangalaq di jiga saiqoji soqniy. Ninġi qalie, tamo unġasari sambala kumbra yeqnu b qaji nanġi Qotei na awai uge enjrqas.

<sup>5</sup> Ninġi silali qa mamaunġgaiq. Ninġi endegsib maroqniy, “Iga silali ti inġi ti kiñala eqnum di kere.” Agi Qotei a marej, “E ni uratmqasai. E ni qoreimqasai dego.” <sup>6</sup> Deqa iga gago are sinġilatoqnsim endegsi maroqnqom, “Tamo Koba a na e aqaryaibeqnu.

Deqa e ulaqasai.

Tamo bei na e ugetbqa keresai.”

### *Iga Yesus dauryqajqa jemaigwasai*

<sup>7</sup> O ijo was ninġi quiy. Kristen gate nanġi Qotei aqa anjam palontoqnsib ninġi mernġeqnub. Osib Qotei qa nanġo areqalo sinġilatoqnsib kumbra bole bole yeqnu b. Nanġo kumbra deqa ninġi are qaloqnsib dauryoqniy.

<sup>8</sup> Yesus Kristus aqa kumbra bulyqasai. A nami degsi soqnej. A bini degsi unu. A bati gaigai degsi sqas. <sup>9</sup> Deqa tamo qudei nanġi bosib anjam utru segi segi na nunġo are tigeltetnġibqa ninġi nanġo anjam di dauryaib. Osib Qotei aqa gam urataib. Qotei a ninġi qa are boleiyeqnu aqa kumbra dena nunġo are sinġilatetnġoqneme. Ariya tamo qudei nanġi mareqnu b, “Iga inġi uyo na gago are sinġilatoqnqom.” Di gisanj. Kumbra

di laŋa jejamu qa kumbra. Ingi uyo dena tamo nanŋi yala aqaryainjrosaieqnu.

<sup>10</sup> Gago atra bijal bunuj unu. Atra tamo nanŋi atra tal namij miligiq di waueqnu. Deqa nanŋi atra bijal bunuj dena ingi uyqa keresai. <sup>11</sup> Atra tamo gate nami qaji a tamo unŋasari nanŋo une kobotetnrqa maroqnsiq wagme nanŋo leŋ oqnsiq Warum Tulan Getento Koba di miligiq gileqnu. Atra tamo nanŋi olo wagme nanŋo damu osi aiyooqnsib qure qalaq di atoqnsib koiteleneqnu. <sup>12</sup> Dego kere Yesus a Jerusalem qure qalaq aisiq dia jaqatin osiq aqa segi leŋ bilentosiq tamo unŋasari nanŋi qa moiyej. Aqa leŋ dena a na tamo unŋasari nanŋi Qotei aqa segi kumbra boleq di atqajqa deqa marsiq nanŋi qa moiyej. <sup>13</sup> Deqa iga dego qure qalaq aiyooqnsim Yesus aqa areq di brantoqnsim a ñam uge osiq jemaiyej dego kere iga ñam uge oqnqom. <sup>14</sup> Iga qalie, mandamq endi qure kalil koboqab. Deqa iga yaun tamo bulosim qure utru saiqoji laŋa unum. Mondon iga laŋ qureq oqsim dia gaigai sqom. Iga qure deq oqwjajqa tariŋeqnum. <sup>15</sup> Deqa iga Yesus aqa ñam na Qotei binjyoqnsim atraiyobuloqnqom. Osim iga gago medabu na aqa ñam soqtoqnqom. <sup>16</sup> O ijo was, niŋgi na tamo unŋasari nanŋi kumbra bole bole enjroqniy. Nanŋi ingi qudei qa truquoqnbq niŋgi na aqaryainjroqniy. Niŋgi kumbra di urataib. Niŋgi kumbra degyqab di niŋgi Qotei atraiyobuloqnqab. Yim Qotei a nunŋo kumbra deqa tulan arearetoqnqas.

*Yesus Kristus a gago are miligiq di waueqnu*

<sup>17</sup> Nunŋo Kristen gate nanŋi na nunŋo qunun taqateqnu. Mondon nanŋi nanŋo wau deqa Qotei minjqab. Deqa niŋgi nanŋo medabu geregere dauryoqnsib nanŋo sorgomq di soqniy. Niŋgi degyqab di nanŋi are gulbe na niŋgi taqatngwasai. Nanŋi arebolebole na niŋgi taqatngwab. Osib nanŋi are gulbe saiqoji sosib niŋgi geregere aqaryainjgoqnqab.

<sup>18</sup> Niŋgi iga qa Qotei pailyoqniy. Iga qalieonum, iga Qotei aqa ñamgalaq di une saiqoji unum. Iga gaigai kumbra bole dauryqajqa are qaleqnum. <sup>19</sup> Deqa ijo areqalo agiende. Niŋgi e qa Qotei pailyibqa a na gam waqtetbimqa e nunŋoq urur boqujatqai.

<sup>20</sup> Gago Tamo Koba Yesus a kaja nanŋo Mandor sinŋila ti unu qaji. Aqa kaja nanŋi agi iga. Aqa leŋ aiyej dena a na Qotei aqa anjam bunuj gaigai sqas qaji di sinŋilatej. Qotei a are lawo qa utru. A na Yesus olo subq na tigeltej. <sup>21</sup> Qotei qujai dena niŋgi aqaryainjimqa niŋgi aqa areqalo geregere dauryosib kumbra bole yoqniy. A gago are miligi gereiyetgimqa iga Yesus Kristus aqa wau na kumbra kalil a tulan areareteqnu



qaji di yoqnqom. Iga kalil bati gaigai aqa ñam soqtoqnqom. Bole.

*Anjam getento*

<sup>22</sup>O ijo was, e na ningi singilatngwajqa deqa anjam truquyala endi nenngrenyonum. Deqa ningi ijo anjam endi geregere qusib dauryoqniy. <sup>23</sup>E ningi endegsi merngwai. Gago was Timoti a tonto talq dena uratonab oqedej. Deqa a urur ijoq bqas di aqo aiyel ombla na nunngoq bosim nungwom.

<sup>24</sup>Ningi na ijo kaiye anjam endi osib Kristen gate kalil nanngi ti Qotei aqa tamo ungasari kalil nanngi ti minjriy. Itali tamo qudei bosib endia unub qaji nanngi na dego ningi kaiyeingonub.

<sup>25</sup>Qotei a ningi kalil qa are boleyeme. Bole.

## JEMS

<sup>1</sup> E Jems. E Tamo Koba Yesus Kristus aqa Abu Qotei wo nanjo wau tamo. Israel nanjo moma utru 12 nanjo lej agi ninji. O was ninji kalil kaiye. E na anjam endi nenngrenyosim nunjoq qarinyonum. Ninji nunjo segi segi qure utru uratosib jaraiyosib sawa sawa kalil keretosib di unub.

### *Iga gulbe qoboieqnum dena iga sinjila eqnum*

<sup>2</sup> O ijo was, gulbe utru segi segi gargekoba nunjoq boqnimqa ninji gulbe deqa tulan areboleboleingim soqniy. <sup>3</sup> Gulbe deqaji nunjoq boqnimqa ninji nunjo areqalo Yesus qa bole singilatqab kiyo sai kiyo di Qotei a geregere unqas. Ninji qalie, gulbe dena ninji singilatngeqnaqa ninji gulbe qoboieqnum. <sup>4</sup> Deqa ninji bati gaigai sinjila na tigeloqnsib gulbe qoboieqniy. Ninji degyqab di ninji Qotei aqa kumbra bei qa truquoqnasai. Ninji tulan kere na sqab.

### *Tamo bei a powo qa truquosimqa a Qotei pailyim Qotei na powo yqas*

<sup>5</sup> Ariya tamo bei a powo qa truquosimqa a Qotei pailyem. Yimqa Qotei na a powo yqas. Ninji qalie, Qotei a tamo ungasari kalil nanji ingi bole bole enjreqnu. Nanji Qotei pailyeqnab a nanji qa olo njirinosaieqnu. <sup>6</sup> Ariya tamo bei a Qotei pailyqa osimqa a are gulbeiyaiq. Osim endegsi maraiq, “Qotei na ingi bole ebqas kiyo sai kiyo?” A degsi maraiq. A Qotei qa aqa areqalo singilatosisim pailyem. Jagwa tigelosiq yuwal korkortoqnsiqa oqe aiyeqnu dego kere tamo are gulbeiyeqnu qaji a bati bei Qotei qa aqa areqalo singilatoqnsiqa olo bati bei aqa areqalo singilatoqnsiqa. <sup>7</sup> Tamo Koba a na tamo deqaji nanji ingi bei enjrqasai. Deqa tamo deqaji nanji endegsib are qalaib, “Iga ingi bole bole oqngom.” Di sai. <sup>8</sup> Nanji areqalo aiye aiyeltoqnsib kumbra lanja lanja yeqnub deqa Qotei na nanji ingi bei enjrqasai.

### *Jems a ñoro tamo ti tamo ingi saiqoji nanji ti anjam minjrej*

<sup>9</sup> Kristen was bei a ñam saiqoji soqnimqa a areboleboleiyem. Di kiyaga? A Qotei aqa ñamgalaq di ñam koba ti unu deqa. <sup>10</sup> Tamo bei ñoro koba ti unu qaji a dego areboleboleiyem. Di kiyaga? A Qotei aqa ñamgalaq di ñam saiqoji unu deqa. Tamo nanji ñoro koba koroiyqajqa arearetnjreqnu qaji nanji balamtamo aqa so bulosib sokiñalayosib morenqab. <sup>11</sup> Iga qalie, sen oqsim kanjanamqa balamtamo aqa so laosim moiym aqa wala bole di koboqas. Dego kere tamo nanji ñoro

koba ti unub qaji nanḡi wau bei bei yoqnsib bati qujai qa urur moreḡosib koboqab.

### *Qotei na iga are qametgosaieqnu*

<sup>12</sup> Tamo unḡasari gulbe qoboiyoqnsib siḡgila na tigelejunub qaji nanḡi areboleboleinjreme. Mondonḡ Qotei a nanḡi qa tulan arearetim awai boledamu enjrim nanḡi ḡambile gaigai sqab. Qotei a marej, “E na tamo kalil e qalaqalaibeqnuḡ qaji nanḡi awai bole enjrqai.” Qotei a degsi marej. <sup>13</sup> Deqa tamo bei a une atqajqa are prugyimqa a endegsi maraiq, “Qotei na are qametbqoqa e une atqajqa are prugbeqnu.” A degsi maraiq. Iga na Qotei aqa are qametim a une yqa keresai dego kere Qotei na iga une atqajqa are qametgosaieqnu. <sup>14</sup> Gago segi segi are miligi tigeloqnsiqa iga titgeqnu. Gam dena gago segi areqalo uge na iga uneq breigwa oqnsiqa walawalaigoqnsiqa gisanḡeqnu. <sup>15</sup> Gago are miligi tigeleqnu di unḡa a gumaḡeqnu dego kere. Bunuqna unḡa a anḡroteqnu dego kere gago are miligi tigeloqnsiqa une babteqnu. Yeqnaqa gago une di tulan kobaeqnaqa iga moiyo gam tureqnum.

<sup>16</sup> O ijo was bole, une aqa kumbra dena niḡgi gisanḡaim deqa niḡgi une kalil uratij. <sup>17</sup> Inḡi bole bole kalil Qotei na iga egeqnu qaji di lanḡ goge na branteqnaq iga lanḡa eleḡeqnum. Abu Qotei suwanḡoq di unu qaji a na inḡi di qarinyeqnaqa gagoq beqnu. Qotei a kumbra bubulyosaieqnu. A seḡ qununḡ bul sai. Seḡ qununḡ a olekobaoqnsiqa olo truqueqnu Qotei a degyosaieqnu. <sup>18</sup> A aqa segi areqalo dauryosiq iga gereigej deqa a gago Abu. A aqa anjam bole na iga gereigej deqa iga inḡi meli bunuj bulosim inḡi inḡi kalil a nami gereinjrej qaji di tulan bunḡjrejunum.

### *Iga Qotei aqa anjam lanḡa quqwasai*

<sup>19</sup> O ijo was bole, niḡgi endegsi poiḡgem. Niḡgi anjam bei marqa osibqa urur medabu waqtaib. Mati didaboqniy. Urur minjinḡ oqaiq. <sup>20</sup> Tamo nanḡi urur minjinḡ oqetnjreqnu qaji nanḡi Qotei aqa kumbra bole dauryqa keresai. <sup>21</sup> Deqa niḡgi kumbra uge uge jigat kalil taqal waiyoqniy. Osib nunḡo segi ḡam aguq atoqnsib Qotei aqa anjam a na nami nunḡo are miligiq di atej qaji di niḡgi ojesoqniy. Ojesqab di Qotei a nunḡo qununḡ oqas. <sup>22</sup> Ariya niḡgi Qotei aqa anjam di bole dauryoqniy. Lanḡa qusib olo urataib. Niḡgi lanḡa quqwab di niḡgi nunḡo segi jexamu gisanḡyqab. <sup>23</sup> Tamo bei a Qotei aqa anjam lanḡa quoqnsiq olo dauryqa urateqnu di a tamo ya jeqiloq di aqa ulatamu uneqnu dego bul. <sup>24</sup> A ya jeqiloq di aqa ulatamu unsim olo puluosim giloqnsim aqa ulatamu unḡo qaji di a olo are walyqas. <sup>25</sup> Qotei aqa dal anjam bunuj unu.

Dal anjam di bole tĩntĩ. Qotei a gago une aqa singila kobotet-gwa osiqa dal anjam di iga egej. Deqa gago une na iga olo ojqa keresai. Tamo nanġi dal anjam di geregere peleiyonqnsib dauryonqab di Qotei a nanġo wau kalil boletonqas. Ariya tamo nanġi dal anjam di lanġa qusib olo are walnjrqas di Qotei a nanġo wau bei boletqasai.

<sup>26</sup> Tamo bei a endegsi are qalqas, “E gaigai Qotei qa loueqnum. Deqa e Kristen tamo bole.” Ariya tamo di a aqa segi medabu geregere taqatqasai di a na aqa segi jejamu gisanjyqas. Deqa a Qotei qa loueqnu di a lanġa loueqnu. <sup>27</sup> Iga Kristen tamo unġasari unum deqa iga kumbra bole endeqaji yoqnqom. Iga na anġro mandum nanġi ti unġa qobul nanġi ti geregereinjroqnsim nanġo gulbe kalil qoboiyetnjrqom. Osim iga gago segi walwel taqatosim mandam endeqa kumbra jigat kalil uratekritqom. Iga kumbra deqaji yoqnqom di iga Qotei aqa nġamgalaq di Kristen tamo bole une saiqoji sqom.

## 2

*Ninġi na tamo kalil nanġi turtnjrsib kumbra qujai enjroqniy*

<sup>1</sup> O ijo was kalil, gago Tamo Koba Yesus Kristus a rianġ koba ti unu. Ninġi a qa nunġo areqalo singilateqnu deqa e ninġi endegsi merġwai. Ninġi na tamo nġam ti nanġi areinjroqnsib olo tamo nġam saiqoji nanġi qoreinjroqnaib. <sup>2-3</sup> Nunġo kumbra agiende. Nġoro tamo bei a gara boledamu na walaosim banrĩnġ gol na gereiyo qaji di jigsim nunġo Qotei tal miligiq gilqas di ninġi aqa nġam soqtqab. Osib a geregereiyosib minjibqa awo jaram boleq di awoqas. Ariya tamo bei inġi inġi saiqoji a gara jigat branġo jigsimqa Qotei tal miligiq gilqas di ninġi aqa nġam aguq atsib minjqab, “Ni qalaq di tigelesoqne” o “Ni mandamq di awo.” <sup>4</sup> O ijo was, ninġi kumbra degyeqnu di ninġi areqalo uge ti sosib tamo nanġi lanġa peginjreqnub.

<sup>5</sup> O ijo was bole, ninġi quiy. Tamo unġasari inġi inġi saiqoji nanġi Qotei na giltnjrej deqa nanġi torei a qa nanġo areqalo singilateqnu. Agi Qotei a nami endegsi marej, “Tamo unġasari e qalaqalaibeqnu qaji nanġi di e na taqatnjrsiy nanġo Mandor Koba sqai.” <sup>6</sup> O ijo was, ninġi kiyayaqa tamo inġi inġi saiqoji nanġo nġam aguq ateqnu? Ninġi are qaliy. Yai nanġi na ninġi ugeuġeĩnġoqnsib nunġo jejamuq di une enġoqnsib ninġi joqoqnsib anjam pegiyo talq di tigeltġgeqnu? Nġoro tamo nanġi na ninġi degġgeqnu. <sup>7</sup> Tamo nanġi dena Yesus aqa nġam boledamu misilĩnyeqnu. Nġam di agi Qotei a nunġoq di atej unu.

<sup>8</sup> Mandor Koba Qotei aqa dal anjam bei nami endegsib nenġrenyeb unu, “Ni ino segi jejamu gereiyeqnum dego kere tamo unġasari nanġi degsim gereinjroqnime.” O ijo was, ninġi

dal anjam di dauryosib keretqab di ninqi kumbra bolequja yqab. <sup>9</sup> Ariya ninqi na tamo qudei nanqi areinjroqnsib olo tamo qudei nanqi qoreinjreqnub di ninqi une ateqnub. Deqa ninqi dal anjam gotranjo qaji tamo brantonub. <sup>10</sup> Tamo bei a dal anjam mutu kalil dauryekritosim ariya qujai bole qujai grotqas di a dal anjam mutu kalil grotekritqo. Deqa aqa jejamuq di gulbe sqas. <sup>11</sup> Iga qalie, Qotei a nami dal anjam endegsi marej, “Ni tamo bei aqa uja jejamu ojetaim.” Osiqa dego marej, “Ni tamo bei qalsim moiyoaim.” Bole, ni tamo bei aqa uja jejamu ojetosaieqnum. Ariya ni tamo bei qalsim moiyoaim di ni dal anjam gotranjo qaji tamo brantqam. <sup>12</sup> Qotei a gago une aqa sinqila kobotetgwa osiqa dal anjam bunuj egej. Deqa gago une na iga olo ojqa keresai. O ijo was ninqi quiy. Qotei a dal anjam deqa are qalsim iga pegigwas. Deqa ninqi nunqo anjam maro ti nunqo kumbra ti kalil geregere taqatoqniy. <sup>13</sup> Ninqi tamo nanqi qa dulqasai di une pegiyo bati qa Qotei a kamba dego ninqi qa dulqasai. Ariya ninqi tamo nanqi qa duloqnqab di une pegiyo bati qa ninqi une saiyoji sqab.

*Tamo a Yesus qa aqa areqalo sinqilatqas di a kumbra bole babetoqnqas*

<sup>14</sup> O ijo was ninqi quiy. Tamo bei a mareqnu, “E Yesus qa ijo areqalo sinqilateqnum.” A degsi maroqnsiq ariya a kumbra bole bei yala babetosaieqnu. Lanja medabu na anjam mareqnu. Deqa tamo di Qotei na oqasai. <sup>15-16</sup> Kristen was bei a gara saiyoji kiyo inqi saiyoji kiyo soqnimqa nunqo ambleq di tamo bei na minjqas, “Ni lawo na gilsim gara bei osim jigsim inqi uysim menetmim soqne.” A anjam segi lanja minjqo deqa anjam dena kiyersim a aqaryaiyqas? Keresai. <sup>17</sup> Dego kere iga Yesus qa gago areqalo sinqilatosim ariya iga kumbra bole bei babetosaieqnum di iga lanja gago areqalo Yesus qa sinqilateqnum. Deqa iga tamo moisiq aqa jejamu lanja unu dego bul sqom.

<sup>18</sup> Tamo bei a endegsi marqas, “E Yesus qa ijo areqalo sinqilateqnum.” Degsi marimqa e na kamba minjqai, “O was, ni kumbra bole bei babetosaieqnum. Deqa e kiyersiy qalieqai, ni bole Yesus qa ino areqalo sinqilateqnum? E qalieqa keresai. Ariya e Yesus qa ijo areqalo sinqilatosiy kumbra bole dego tur-tosiy yoqnqai di ni e nubsim merbqam, ‘Bole, ni ino areqalo Yesus qa bole sinqilateqnum.’ <sup>19</sup> Ni mareqnum, ‘Bole, Qotei a segi qujai unu.’ Ni kere mareqnum. Mondor uge nanqi dego degsib maroqnsib Qotei ulaiyeqnub. <sup>20</sup> Ni nanari tamo. Ni mareqnum, ‘E Yesus qa ijo areqalo sinqilateqnum.’ Ni degsi maroqnsim ariya ni olo kumbra bole bei babetosaieqnum. Deqa ni lanja medabu na mareqnum. Ni ijo anjam endi

poimqa are soqnim poimeme.” <sup>21</sup> O ijo was ninḡi quiy. Nami gago moma utru Abraham a na aqa anḡro qujai Aisak osiq Qotei atraiyqa marsiq atra bijalq di atej. Atnaqa Qotei a Abraham aqa kumbra di unsiqa minjej, “Ni degyonum deqa ni ijo ḡamgalaq di tamo bole une saiḡoji unum.” <sup>22</sup> Ninḡi are qaliy. Abraham a Qotei qa aqa areqalo singilatosiq kumbra bole dego turtosiq yej. Aqa areqalo Qotei qa singilatej qaji de ti aqa kumbra bole ti aiyeltosiq dauryej. Deqa iga endegsi marḡom, Abraham aqa kumbra bole dena aqa areqalo Qotei qa singilatej qaji di taqyosiq tulan keretej. <sup>23</sup> Deqa Qotei aqa anjam bei nami nenḡrenyeb qaji aqa damu brantej. Anjam agiende, “Abraham a Qotei qa aqa areqalo singilatej deqa Qotei na minjej, ‘Ni ijo ḡamgalaq di tamo bole une saiḡoji unum.’” Osiqa Abraham minjej, “Ni ijo was bole.” <sup>24</sup> Deqa ijo was ninḡi qalie, tamo nanḡi Yesus qa nanḡo areqalo singilatosib ariya nanḡi olo kumbra bole bei babtqasai di nanḡi Qotei aqa ḡamgalaq di tamo bole une saiḡoji sqa keresai. Tamo nanḡi Yesus qa nanḡo areqalo singilatoqnsib kumbra bole dego turtosib yeqnub qaji nanḡi segi Qotei aqa ḡamgalaq di tamo bole une saiḡoji unub.

<sup>25</sup> Ninḡi sambala uḡa Rahap a qa dego are qaliy. Rahap aqa kumbra bole agiende. Josua a tamo aiyel nanḡi qarinjrnnaqa Jeriko qureq gilnabqa qure deqaji nanḡi na tamo aiyel nanḡi di ḡumqa laq nab Rahap a nanḡi aiyel ulitnjrej. Osiqa gam bei osornjrnaqa nanḡi jeu tamo nanḡi alelnjrsibqa jaraiyeb. Rahap a kumbra bole di yej deqa a Qotei aqa ḡamgalaq di uḡa bole une saiḡoji soqnej. <sup>26</sup> Iga qalie, tamo a me mondor ti sqasai di a moiḡas. Dego kere tamo bei a Yesus qa aqa areqalo singilatosim ariya a olo kumbra bole babtqasai di a tamo moisiq aqa jejamu lanḡa unu dego bul sqas.

### 3

#### *Iga gago segi medabu geregere taqatqom*

<sup>1</sup> O ijo was kalil, tamo quja quja segi Qotei aqa anjam palontoqnebe. Tamo gargekoba nanḡi anjam palontoqnaib. Ninḡi qalie, mondonḡ une pegiyo batiamqa Qotei na anjam palonto tamo nanḡo wau qa geregere peginjrqas. <sup>2</sup> Bati gaigai iga kumbra gro groyeqnum. Ariya iga gago anjam maro qa grotqasai di iga tamo bolequja sqom. Sosimqa gago banḡ ti singa ti jejamu ti kalil geregere taqatqom. <sup>3</sup> Iga hos nanḡo medabuq di sil atoqnsim nanḡi titnjreqnam nanḡi iga daurgeqnu. Iga nanḡo medabu segi ojeqnam nanḡo jejamu dego iga daurgeqnu. <sup>4</sup> Ninḡi qobunḡ uniy. Qobunḡ a tulanḡ kobaquja. Aqa kuḡni tulanḡ kiḡnala. Ariya jagwa koba tigelosiq qobunḡ tutqa laqnaqa qobunḡ aqa abu na kuḡni ojoqnsiq tingiteqnaq qobunḡ a

dauryoqnsiq gileqnu. <sup>5</sup> Dego kere gago medabu kiñala. Ariya a diq koba yeqnu. Iga gago medabu waqtoqnsim gago segi ñam soqtoqnsim diqoqnsim anjam mareqnum.

Iga qalie, ñamyuwo yusiq tulañ kobaqujaoqnsiq ñamtañ kalil yuelenqnu. <sup>6</sup> Gago medabu a ñamyuwo bul. Iga gago medabu waqtoqnsim dena iga kumbra uge uge yoqnsim gago jejamu kalil tulañ jigategnum. Mondonj tamo nañgi ñamyuwoq aisib padalqab dego kere gago medabu na gago so tulañ ugeugeiyeqnu. <sup>7</sup> Niñgi wagme nañgi qa are qaliy. Wagme ti qebari ti qe ti kalil iga na taqatnjreqnum. <sup>8</sup> Ariya iga gago medabu taqatqa keresai. Iga gago medabu na gaigai anjam uge uge marelenqnum. Amal uge na tamo nañgi uñinjroqnsib moiyojnreqnub dego kere gago medabu na iga kumbra uge ugeq breigeqnu. <sup>9</sup> Gago kumbra agiende. Iga gago medabu waqtoqnsim gago Tamo Koba Abu Qotei aqa ñam soqtoqnsim olo puluoqnsim medabu qujai dena tamo unğasari nañgi mis-iliñnjreqnum. Tamo unğasari nañgi di Qotei na gereinjrsiq aqa segi so boleq di atej. <sup>10</sup> Iga kumbra uge deqaji yeqnum. Agi iga gago medabu waqtoqnsim Qotei aqa ñam soqtoqnsim olo medabu qujai dena anjam uge uge marelenqnum. O ijo was, gago kumbra di ugedamu. <sup>11</sup> Ya jumbum qujaiq na ya bole ti ya uge ti brantqa keresai. <sup>12</sup> Qura na oliv aqa gei oqa kere e? Wain sil na qura aqa gei oqa kere e? Yuwal a ya bole bulyqa kere e? Sai.

*Tamo powo bole ti unub qaji nañgi kumbra bole bole yoqnebe*

<sup>13</sup> Nunjo ambleq di tamo qudei nañgi qalie ti powo ti unub kiyo? Sqab di nañgi nañgo segi ñam aguq atoqnsib kumbra bole bole yoqnebe. Yim tamo unğasari nañgi nañgo kumbra di unoqnsib maroqnqab, “Nañgi tamo bole.” <sup>14</sup> Ariya niñgi olo nunjo segi jejamu qa are qaloqnsib laña are ugeinjoqnm diqoqnaib. Niñgi degyqab di niñgi gisañ kumbra dauryosib Qotei aqa anjam bole ugetqab. <sup>15</sup> Osib niñgi powo uge ti sqab. Powo deqaji lañ goge na bosai. Di mandam qaji powo. Di gago areqalo namij aqa powo. Powo di Satan aqaq na beqnu. <sup>16</sup> Niñgi quiy. Tamo unğasari nañgi nañgo segi jejamu qa are qaloqnsib laña are ugeinjroqnm diqoqnqab di nañgi so tulañ ugeq di sosib kumbra uge uge yoqnqab. <sup>17</sup> Ariya tamo unğasari lañ goge na powo eqnub qaji nañgi kumbra tulañ bolequja yeqnub. Nañgi kumbra jigat dauryosaieqnub. Nañgi lawo na sosib tamo nañgi jinga na gereinjroqnsib nañgi qa duloqnsib kumbra bole bole osornjreqnub. Nañgi na tamo kalil nañgi turtnjroqnsib kumbra qujai enjreqnub. Nañgi laña babañ na Qotei aqa kumbra dauryosaieqnub. Nañgi bole dauryeqnub. <sup>18</sup> Tamo deqaji nañgi lawo na sosib are

qujaitoqnsib jeu turyoqnsib kumbra bole tintin babteqnu. Ingi meli branteqnu dego kere.

## 4

*Tamo bei na mandam qaji kumbra qalaqalaiyqas di a olo Qotei jeutqas*

<sup>1</sup> O ijo was, ningi qudei nungo segi jejamu qa areboleboleingeqnaqa kumbra uge uge yqajqa are prugneqnu. Utru deqa ningi qotoqnsib niringkobaqnu. Kumbra di nungo jejamu miligiq di singila na waueqnu. <sup>2</sup> Ningi ingi ingi koba oqajqa tulan arearetingeqnaqa mamaulneqnu. Ariya ningi ingi ingi di osaieqnu deqa ningi qoto tigeltqnsib tamo numeqnu. Ningi ingi ingi di osaieqnu di aqa utru agiende. Ningi Qotei pailyosaieqnu deqa. <sup>3</sup> Ningi qudei ingi ingi qa Qotei pailyoqnsib ariya ningi ingi ingi di osaieqnu. Di kiyaya? Ningi nungo segi jejamu qa areboleboleingwajqa maroqnsib areqalo uge na palyeqnu deqa. <sup>4</sup> Un̄a bei na aqa gumbulun uratosiq olo tamo bei ombla sambala kumbra yeqnu dego kere ningi Qotei uratoqnsib kumbra uge uge yeqnu. Ningi quiy. Tamo bei na mandam qaji kumbra qalaqalaiyqas di a olo Qotei jeutqas. Ningi di qaliesai kiyo? Od, tamo bei na mandam qaji kumbra qalaqalaiyqa are qalqas di a Qotei jeutqas. <sup>5</sup> Agi Qotei aqa anjam bei nami endegsib nenngrenyeb unu, “Qotei na aqa Mondor gago are miligiq di atej unu. Mondor di a iga qa tulan areareteqnu.” O ijo was, ningi anjam di lan̄a sa anjam edegaib.

<sup>6</sup> Qotei a iga qa are tulan boleiyeqnu. Deqa aqa anjam bei nami endegsib nenngrenyeb unu, “Tamo un̄gasari nan̄go segi n̄am soqteqnu qaji nan̄gi Qotei na olo jeutnjreqnu. Ariya tamo un̄gasari nan̄go segi n̄am aguq ateqnu qaji nan̄gi qa Qotei a olo are boleiyeqnu.” <sup>7</sup> Deqa ijo was, ningi nungo segi n̄am aguq atoqnsib Qotei aqa sorgomq di soqniy. Sosisbqa Satan gotran̄yoqniy. Yimqa Satan na ningi uratngosim ulan̄qas. <sup>8</sup> Ningi Qotei jojomyoqniyqa a kamba dego ningi jojom̄ngoqnaqas. O une tamo, ningi quiy. Tamo nan̄gi nan̄go ban̄ yansoqnsib jiga koboteqnu dego kere ningi nungo are miligi gereiyqnsib bulyoqniy. Ningi areqalo aiye aiyelteqnu qaji olo nungo are miligiq dena jiga kalil taqal atoqniy. <sup>9</sup> Ningi nungo une qa are gulbeingonim akamugetoqniy. Od, ningi nungo kiki uratoqnsib olo akamoqniy. Osib nungo arebolebole kobotosib olo are gulbeingonime. <sup>10</sup> Ningi Tamo Koba aqa n̄amgalaq di nungo segi n̄am aguq atoqniy. Ningi degyqab di a na nungo n̄am olo soqtetngwas.

*Ningi nungo Kristen was nan̄gi uge qa minjraib*



<sup>11</sup> O ijo was, nin̄gi segi segi qa anjam uge maroqnaib. Tamo bei na aqa Kristen was qudei nan̄gi anjam uge minjr̄qas kiyo nan̄go une qa nan̄gi peginj̄r̄qas kiyo di a dal anjam dego uge qa marsiq pegiyqo. Nin̄gi dal anjam pegiyeqnub di nin̄gi dal anjam dauryqa urateqnub. <sup>12</sup> Qotei a segi na dal anjam bajtej deqa a na qujai iga pegigwa kere. A na qujai tamo un̄gasari nan̄gi elen̄qa kere. A na qujai nan̄gi padaltnjr̄qa kere. Nin̄gi tamo kiyero deqa nin̄gi na tamo un̄gasari nan̄gi peginj̄reqnub? Di kumbra uge.

### *Nin̄gi nun̄go segi ñam soqtoqnaib*

<sup>13</sup> Nin̄gi qudei endegsib mareqnub, “Bini kiyo nebe kiyo iga qure beiq gilsim dia wausau qujai sosim silali qa wauosim olo bqom.” <sup>14</sup> Nin̄gi degsib mareqnub. Ariya nebe kumbra kiye nun̄goq di brantqas di nin̄gi qalieqa keresai. Nin̄gi ñam qurem bul sokiñalayosib koboqab. <sup>15</sup> Deqa nin̄gi endegsib maroqniy, “Tamo Koba a marimqa iga kumbra kiye yqa are qalsim yqom.” <sup>16</sup> Kiyaqa nin̄gi qudei olo nun̄go segi ñam soqtoqnsib diqoqnsib laqnub? Nun̄go kumbra di uge. <sup>17</sup> Ni geregere are qale. Ni kumbra bole qa qalieosim ariya ni dauryqasai di ni une yonum.

## 5

### *Tamo nan̄gi ñoro koba ti unub qaji nan̄gi awai ugedamu oqab*

<sup>1</sup> O ñoro tamo nin̄gi quiy. Bunuqna gulbe kokba nun̄goq boqnqas. Nin̄gi deqa pailoqnsib akamugetoqniy. <sup>2</sup> Nun̄go ñoro ti wala ti kalil ugeelen̄qo. Sisimbiñ na nun̄go gara kalil dego ugeugeiyqo. <sup>3</sup> Nun̄go gol ti silva ti di baisuwi na ugetqo. Deqa mondon̄ baisuwi dena nun̄go une boleq atsim ñamyuwo bulosim nun̄go jejamu koitosim ugeugeiyqas. Nin̄gi ñoro koba koroiyeb deqa diño bati qa nin̄gi awai ugedamu oqab. <sup>4</sup> Nin̄gi quiy. Nun̄go wau tamo nan̄gi nun̄go in̄gi meli gentoqnsib nun̄go ban̄q di ateqnab nin̄gi na kamba olo nan̄gi gisan̄j̄roqnsib awai oto nun̄go segi qa getentoqnsib oto segi nan̄gi en̄j̄reqnub. Deqa nan̄gi maoqnsib endegsib Qotei pailyeqnub, “O Tamo Koba, nan̄gi iga kumbra uge degsib egeqnub.” Yeqnaqa Qotei siñgila koba ti unu qaji a nan̄go pailyo di queqnu. Deqa mondon̄ a na nin̄gi awai uge en̄gwas. <sup>5</sup> O ñoro tamo, nin̄gi gara bole bole jugoqnsib nun̄go segi jejamu qa arebolebolein̄geqnaqa in̄gi koba uyeqnub. Deqa mondon̄ Qotei na nin̄gi lun̄gwas. Kaja nan̄go jejamu diq diqeqnaq nan̄go mandor nan̄gi na ñumeqnub dego kere Qotei na nin̄gi lun̄gwas. <sup>6</sup> Nun̄go kumbra uge bei agiende. Nin̄gi na kumbra bole yo qaji tamo nan̄go jejamuq di une qametn̄j̄roqnsib ñumeqnub. Ariya nan̄gi na kamba olo nin̄gi gotran̄gosaieqnub.

*Ningi gulbe qoboioqnsib Tamo Koba a olo bqajqa tarinjoqniy*

<sup>7</sup> Deqa ijo was, ningi nunjo are miligi singilatoqnsib gulbe qoboioqnsib Tamo Koba a olo bqajqa tarinjoqniy. Ningi asgingaiq. Ningi wau lanja nanji bul soqniy. Ningi qalie, wau lanja nanji asginjrosaieqnu. Nanji ingi yagoqnsib awa qa tarineqnu. Awa beqnaqa ingi melieqnaqa nanji ingi meli di oqnsib uyeqnu. <sup>8</sup> Dego kere ningi nunjo are miligi singilatoqnsib gulbe qoboioqnsib tarinjoqniy. Tamo Koba a bqajqa bati jojomqo deqa ningi degyoqniy.

<sup>9</sup> O ijo was, ningi Qotei aqa tamo ungasari qudei nanji qa njirinjoqnsib yomuqnaib. Qotei a nunjo une di unsim ningi pegingo uge. Ningi quiy. Une Pegiyo Tamo agi bqa jojomqo. A siranmeq di tigelejunu. <sup>10</sup> O ijo was, ningi Qotei aqa medabu o qaji tamo nanji qa are qaliy. Nanji nami Tamo Koba aqa ñam na anjam palontoqneb deqa jeu tamo nanji na nanji ugeugeinjroqneb. Ariya nanji Qotei aqa anjam marqa ulaosaiqneb. Nanji nanjo are miligi singilatoqnsib jaqatinjoqnsib gulbe di qoboioqneb. <sup>11</sup> Ningi quiy. Iga endegsi mareqnum, “Tamo ungasari gulbe qoboioqnsib singila na tigelejunub qaji nanji Qotei na taqatnjreqnu. Deqa nanji areboleboleinjreqnu.” Ningi Jop aqa kumbra qa nami queb. Jop a singila na tigelosiqa gulbe kobaquja qoboiesoqnej. Ningi qalie, bunuqna Tamo Koba a na Jop olo boletej. Od, iga qalieonum, Tamo Koba a gaigai iga qa duloqnsiqa iga qa are boleyeqnu.

*Ningi anjam bei marqa osibqa ingi bei na singilataib*

<sup>12</sup> O ijo was kalil, e anjam kobaquja bei unu. Anjam agiende. Ningi anjam bei marqa osibqa ingi bei na singilataib. Ningi lanj qure aqa ñam na anjam singilataib. Ningi mandam aqa ñam na anjam singilataib. Ningi od qa segi mariy. Ningi said qa segi mariy. Ningi degyqab di Qotei na ningi awai uge bei enjwasai.

*Tamo nanji kumbra bole bole yeqnub qaji nanjo pailyo singila koba*

<sup>13</sup> Nunjo ambleq di tamo qudei nanji jaqatinjoqnsib kiyo? Degamqa ningi na minjribqa nanji nanjo jaqatinjoqnsib deqa Qotei pailyoqnebe. Nunjo ambleq di tamo qudei nanji areboleboleinjreqnu kiyo? Degamqa ningi na minjribqa nanji Qotei qa louoqnsib aqa ñam soqtoqnebe. <sup>14</sup> Nunjo ambleq di tamo qudei nanji mainjreqnu kiyo? Degamqa ningi na minjribqa nanji Kristen gate nanji metnjrib bosib Tamo Koba aqa ñam na nanjo gateq di banj atetnjrsib goreñ bilentosib nanji qa pailyebe. <sup>15</sup> Nanji Tamo Koba a qa nanjo areqalo singilatosib pailyoqab di a na tamo mainjro qaji nanji olo tigeltnjrqas.

Osim nanġi une yoqneb degamqa a na nanġo une kalil dego kobotetnrqas. <sup>16</sup> Deqa ijo was, ninġi nunġo segi segi une palontoqnsib Kristen was nanġi ubtosib minjroqniy. Osib ninġi segi segi qa Qotei pailyoqniy. Yim a na ninġi boletngwas. Tamo nanġi kumbra bole bole yeqnu qaji nanġo pailyo di singila koba. Deqa nanġi palyeqnab Qotei a quoqnsiqa nanġo anjam dauryeqnu. <sup>17</sup> Ninġi Elaija qa are qaliy. A iga bul mandam tamo. Ariya a endegsi pailyoqnej, “O Qotei, ni na lanġ getentimqa awa bqasai.” A degsi palyeqnaqa Qotei na lanġ getentonaqa awa bosai. Degsi sonaq wausau qalub bei oto koboej. <sup>18</sup> Onaqa Elaija a olo palyonaqa lanġ waqonaqa awa bej. Bosiq inġi inġi kalil melielenej.

*Kristen was bei a gam bole uratqas di iga na aqaryaiyimqa a olo Qotei aqa areq bqas*

<sup>19</sup> O ijo was ninġi quiy. Kristen was bei a Qotei aqa anjam bole dauryqa uratimqa tamo bei na a olo are bulyetqas di tamo dena aqa was kumbra bolequja yqo. <sup>20</sup> Ninġi endegsib qalieoiy. Kristen was bei a une ti soqnim tamo bei na aqaryaiyimqa a gam uge di uratqas di tamo dena aqa was aqa qunuġ moiyo sawaq dena oqo. Deqa was di a moiqasai. Qotei na aqa une gargekoba kobotetqas.

## 1 PITA

<sup>1</sup> E Pita. Yesus Kristus na e qarınbej deqa e aqa anjam mare mare laqnum. Niŋgi nuŋgo segi segi qure utru uratosib jaraiyosib sawa sawa kalil keretosib di unub. Niŋgi Pontus sawa ti Galesia sawa ti Kapadosia sawa ti Esia sawa ti Bitinia sawa ti di unub. E anjam endi nengrenyosim nuŋgoq qarınyonum. <sup>2</sup> Tulaŋ nami Abu Qotei a niŋgi qa qalieosiq giltŋgej. A degyej. Di kiyaaqa? Aqa Mondor na niŋgi aqa segi kumbra boleq di atimqa niŋgi Yesus Kristus aqa anjam dauryqajqa deqa. Yim aqa leŋ aiyej qaji dena niŋgi yansıgwajqa deqa. O ijo was, Qotei a niŋgi qa are tulaŋ boleiyimqa niŋgi geregere lawo na soqniy.

*Qotei a ɱambile boledamu laŋ goge dia iga gereiyetgej unu*

<sup>3</sup> Iga gago Tamo Koba Yesus Kristus aqa Abu Qotei aqa ɱam soqtoqnqom. Qotei a iga qa tulaŋ dulosıqa ɱambile bunuj egej. A na Yesus Kristus subq na tigeltej gam dena iga ɱambile bunuj egej. ɱambile bunuj dena iga sıngilatgeqnu deqa iga iŋgi bole bole Qotei na mondoŋ egwas qaji deqa tariŋoqnsim unum. <sup>4</sup> Iŋgi bole bole di ugeqa keresai. A koboqa keresai dego. Qotei na laŋ goge dia niŋgi gereiyetŋgej unu. <sup>5</sup> Niŋgi Yesus qa nuŋgo areqalo sıngilateqnu deqa Qotei aqa sıngila kobaquja na niŋgi taqatŋgejunu. Deqa diŋo batiamqa Qotei na niŋgi torei elenqas. Kumbra di brantim niŋgi unqab.

<sup>6</sup> Qotei na niŋgi degsim elenqas deqa niŋgi tulaŋ areboleboleiŋgeqnu. Gulbe utru segi segi na niŋgi jaqatiŋ eŋgeqnu di unqum. Sokiɱala gulbe di olo koboqas. <sup>7</sup> Gulbe deqaji nuŋgoq boqnimqa niŋgi nuŋgo areqalo Yesus qa bole sıngilatqab kiyo sai kiyo di Qotei a unqas. Yimqa mondoŋ diŋo batiamqa Yesus Kristus a brantosim a niŋgi qa tulaŋ areboleboleiyim niŋgi biŋiŋgosim ɱam koba eŋwas. Iga qalie, gol a iŋgi tulaŋ boledamu. Tamo naŋgi ɱamyuwo na gol koitoqnsib dena qalieeqnub, gol di bole kiyo sai kiyo. Dego kere nuŋgo areqalo Yesus qa sıngilateqnu qaji di tulaŋ bolequja. Nuŋgo areqalo dena gol agi ugeosim koboqas qaji di tulaŋ bunyejunu. <sup>8</sup> Nami niŋgi Yesus unosaioqneb. Bini dego niŋgi a unosaieqnub. Ariya niŋgi a tulaŋ qalaqalaiyoqnsib a qa nuŋgo areqalo sıngilatoqnsib a qa tulaŋ areboleboleiŋgeqnu. Nuŋgo arebolebole dena mandam qaji arebolebole kalil tulaŋ bunyejunu. Nuŋgo arebolebole di aqa utru iga na dauryosim ubtqa keresai. <sup>9</sup> Niŋgi Yesus qa nuŋgo areqalo sıngilateqnu deqa Qotei na niŋgi elenqas.

<sup>10</sup> Qotei na ningi elenqajqa anjam di aqa medabu o qaji tamo nanngi nami maroqneb. Nanngo anjam di aqa utru nanngi qalieqa osib deqa geregere n̄amoqnsib wauoqneb. <sup>11</sup> Kristus aqa Mondor a nanngo are miligiq di sosiq nanngo medabuq na anjam endegsi babtosiq maroqnej, “Bunuqna Kristus a jaqatin̄ osim moisis olo subq na tigelosim lan̄ qureq oqsim dia a ñam koba ti sqas.” Qotei aqa medabu o qaji tamo nanngi endegsib nenemoqneb, “Kristus a bati gembu bqas? Kumbra kiye namoqna brantim Kristus a bunuqna bqas?” <sup>12</sup> Onaqa Qotei na kamba nanngi endegsi minjrej, “Anjam ningi mareqnuq qaji di aqa damu nunngo bati qa brantqasai. A bunuqna brantqas.” O ijo was, Qotei na ningi elenqajqa anjam di aqa medabu o qaji tamo nanngi nami maroqneb. Onaqa bunuqna a na aqa Mondor Bole qarinyonaqa lan̄ goge na aisiq Qotei aqa anjam maro tamo nanngi sin̄gilatn̄jroqnej. Yeqnaqa nanngi Kristus aqa anjam bole plaltoqnsib ningi mern̄goqneb. Anjam bole di aqa utru Qotei aqa lan̄ an̄gro nanngi geregere qalieqajqa are koba unu.

*Qotei na iga aqa segi kumbra boleq di sqajqa osiq metgej*

<sup>13</sup> Deqa ningi nunngo walwel geregere taqatqajqa are qalogniy. Osib mondon̄ Yesus Kristus a olo lan̄ qureq na brantosim ningi qa are boleiyqajqa deqa tariñoqnsib soqniy. <sup>14</sup> Sosib ningi an̄gro du du bulosib Qotei aqa anjam geregere qusib dauryoqniy. Nami ningi Qotei qaliesai deqa ningi nunngo areqalo uge uge dauryoqneb. Ariya bini ningi kumbra di olo dauryaib. Uratiy. <sup>15</sup> Qotei a gaigai aqa segi kumbra boleq di sosiq dauryeqnu. Deqa ningi dego Qotei aqa kumbra boleq di sosib dauryoqniy. Utru deqa Qotei na ningi metn̄gej. <sup>16</sup> Agi Qotei aqa anjam bei nami endegsib nen̄gren̄yeb unu, “Ningi ijo kumbra boleq di sosib dauryoqniy. Di kiyaaqa? E dego ijo segi kumbra boleq di sosim dauryeqnum.”

*Kristus aqa len̄ aiyej qaji dena Qotei na iga awaigej*

<sup>17</sup> Ningi Qotei endegsib meteqnuq, “O gago Abu.” Qotei aqa n̄amgalaq di tamo un̄gasari kalil nanngi kerekere unub deqa a kumbra qujai na nanngo une qa peginjreqnu. A nanngo segi segi wau unoqnsiq dena nanngi peginjreqnu. Deqa ningi endegsib maroqniy, “Mandam endia gago qure utru sosai.” Degsib maroqnsib Qotei qa ulaoqnsib aqa sorgomq di geregere soqniy. <sup>18</sup> Ningi qalie, nami ningi nunngo moma nanngo kumbra uge uge dauryoqnsib soqneb. Sonabqa Qotei na olo nunngo uneq na ningi awain̄gej. Mandam qa ñoro ti gol ti silva ti koboqas qaji dena Qotei na ningi awain̄gosai. <sup>19</sup> Kristus aqa len̄ aiyej qaji dena ningi awain̄gej. Kristus aqa len̄ di tulan̄ bolequja. Kaja du du nami Qotei atraiyoqneb qaji nanngo

jejamuq di yu bei saiqoji. Dego kere Kristus aqa jejamuq di une bei saiqoji. <sup>20</sup> Tulaŋ nami Qotei a mandam atosaisosiqa a Kristus qa qalieosiq giltej. Ariya bini diŋo bati jojomoqo deqa Qotei a niŋgi qa osiqa Kristus qarinyonaq bej. <sup>21</sup> Bosiq niŋgi aqaryaingej deqa niŋgi Qotei qa nuŋgo areqalo singilatoqnsib unub. Kristus agi moinaqa Qotei na olo subq na tigeltosiq metonaqa a laŋ qureq oqsiq dia ñam kobaquja ej. Utru deqa niŋgi Qotei qa nuŋgo areqalo singilatoqnsib a qa tariŋoqnsib unub.

### *Iga segi segi qa qalaqalaiyo kumbra yoqnqom*

<sup>22</sup> Niŋgi anjam bole dauryosib nuŋgo qunuŋ yansobuleb. Utru deqa niŋgi na nuŋgo Kristen was naŋgi bole qalaqalainjreqnub. Ariya kumbra di niŋgi olo torei singilatosib segi segi qa qalaqalaiyo kumbra yoqnsib soqniy. <sup>23</sup> Niŋgi iŋgi meli bulosib ñambile bunuj eb. Iŋgi meli ugeqas qaji dena niŋgi ñambile osai. Iŋgi meli gaigai sqas qaji dena niŋgi ñambile eb. Iŋgi meli di Qotei aqa anjam. Anjam di ñambile ti. A gaigai sqas. <sup>24</sup> Agi Qotei aqa anjam bei nami endegsib nenŋrenjyeb unu, “Tamo uŋgasari naŋgi mandamq endi bati olekoba sqasai. Ñiŋ a gaigai kaŋgraneqnaqa balamtamo aqa so a sokiñalayoqnsiq uloŋeqnu dego kere tamo uŋgasari naŋgi urur koboqab. Naŋgo ñam balamtamo aqa so bulosim uloŋqas. <sup>25</sup> Ariya Tamo Koba aqa anjam a bati gaigai sqas.” O ijo was, anjam bole di agi Yesus aqa anjam maro tamo naŋgi palontoqnsib niŋgi mernjoqneb.

## 2

### *Yesus a tal ai bul*

<sup>1</sup> Niŋgi ñambile bunuj eb deqa niŋgi kumbra uge kalil uratiy. Gisaŋ anjam ti maqu kumbra ti are uge ti yomu anjam ti kalil di niŋgi torei uratekritiy. <sup>2</sup> Iga qalie, aŋgro mom naŋgi muŋgum qaŋ uyqajqa qarnjreqnu. Dego kere niŋgi muŋgum qaŋ bolequja Qotei aqaŋ na beqnu qaji di oqajqa are qaloqniy. Muŋgum qaŋ di Qotei aqa anjam. A jiga bei saiqoji. Muŋgum qaŋ dena nuŋgo qunuŋ aqaryaiyimqa niŋgi tulaŋ boleosib singilaqab. Yim Qotei na niŋgi elenqas. <sup>3</sup> Tamo Koba a na niŋgi kumbra bole engeqnu. Aqa kumbra di niŋgi uyo oneiyuqnsib mareqnu, “Bole.”

<sup>4</sup> Tamo Koba a tal ai bul singila na tigelejunu. Tal ai di ñambile unu. Niŋgi tal ai deq boiy. Tal ai di tamo qudei na unsibqa uge qa marsib taqal waiyeb. Ariya Qotei na olo tal ai di giltosiqa marej, “Tal ai di tulaŋ bolequja.” <sup>5</sup> Niŋgi dego tal ai bul ñambile unub. Qotei aqa Mondor na niŋgi aqa segi tal sqa marsiqa niŋgi gereiŋgeqnu. Deqa niŋgi Qotei aqa atra tamo

bolequja sosib Yesus Kristus aqa ñam na nungo segi jejamu Qotei atraiyoqñib a ninği qa tulañ arearetoqñqas.

<sup>6</sup> Qotei aqa anjam bei nami endegsib nenğrenyeb unu, “Ninği quiy. E na tal ai qujai giltosim tal singilatqajqa deqa tumaq di tigelttem unu. Tal ai di tulañ bolequja. A singila koba. E na Saion manaq di tigelttem unu. Deqa tamo nanği tal ai di osib nanço areqaloq di singilatqab di nanği jemainjrqasai.”

<sup>7</sup> O ijo was, tal ai tuma qaji di agi Kristus. Ninği Kristus qa nunço areqalo singilateqñub deqa ninği mareqñub, “Tal ai di tulañ bolequja.” Ariya tamo nanği Kristus qa nanço areqalo singilatosaieqñub qaji nanği tal ai di uge qa mareqñub. Agi Qotei aqa anjam bei nami endegsib nenğrenyeb unu,

“Tal gereiyo qaji tamo nanği na tal ai di arqsibqa uge qa marsib taqal waiyeb. Onaqa tal ai di Qotei na olo osiq tumaq di tigeltej unu.”

<sup>8</sup> Qotei aqa anjam bei dego nami endegsib nenğrenyeb, “Tamo gudei nanği tal ai di quraqyoqñsib manğaleqñub.” O ijo was, tamo nanği di Qotei aqa anjam gotranyeqñub. Utru deqa nanği tal ai di quraqyoqñsib manğaleqñub. Qotei a nami marej, “Nanği tulañ padalqab.”

<sup>9</sup> Ariya Qotei na ninği giltñgej deqa ninği aqa atra tamo sosib a ombla mandor kokba tigelonub. Tigelosib ninği aqa segi kumbra boleq di sosib dauryeqñub. Ninği aqa segi tamo unğasari tiñtiñ unub. A na ninği giltñgej deqa ninği aqa so bole kalil ubtekritoqñsib mare mare laqñub. Nami ninği ambruq di soqñeb deqa Qotei na ninği metñgonaqa ninği ambru uratosib suwañoq beleneb. Suwaño di tulañ bolequja.

<sup>10</sup> Nami ninği tamo unğasari lanaj soqñeb. Ariya bini ninği Qotei aqa segi tamo unğasari unub. Nami Qotei a ninği qa are boleiyosaiioqñej. Ariya bini a ninği qa are boleiyeqñu.

### *Iga Qotei aqa wau tamo bole sqom*

<sup>11</sup> O ijo was bole, ninği mandamq endi yaun tamo bulosib unub deqa e ninği endegsi mernğwai. Nunço areqalo namij ti nunço qunun ti ombla qoteqñub. Deqa ninği nunço areqalo namij torei qoreiyiy. <sup>12</sup> Bini ninği sawa bei bei qaji nanço ambleq di unub. Deqa ninği nanço ñamgalaq di kumbra bole bole dauryoqñiy. Dauryoqñib nanği nunço kumbra di unoqñqab. Unoqñsib nanço yomu anjam ninği qa mareqñub qaji di nanği uratosib mondonj une pegiyo bati qa nanği Qotei aqa ñam soqtoqñqab.

<sup>13</sup> O ijo was, ninği Tamo Koba a qa are qaloqñsib sawa taqato qaji tamo nanği ti mandor kokba ti nanço anjam dauryoqñiy. <sup>14</sup> Osib tamo gate nanço anjam dego dauryoqñiy. Tamo gate nanği di agi mandor kokba nanği na qarijnjreqñab giloqñsib tamo unğasari kumbra uge uge yeqñub qaji nanği

kamba awai uge enjreqnub. Osib tamo ungasari kumbra bole bole yeqnub qaji nanngo ñam soqtetnjreqnub. <sup>15</sup> Qotei aqa areqalo agiende. Niñgi kumbra bole bole yoqnibqa nanari tamo agi niñgi yomuñgeqnub qaji nanngi nunngo kumbra di unsibqa nanngo anjam uge di olo uratosib mequmesqab. <sup>16</sup> Bole, niñgi tamo bei aqa sorgomq di sosai. Niñgi deqa are qaloqnsib walweloqniy. Ariya niñgi endegsib are qalaib, “Iga tamo bei aqa sorgomq di sosai deqa unqum, iga kumbra uge uge yoqnqom.” Niñgi degsib are qalaib. Niñgi Qotei aqa kanjal tamo bul unub deqa niñgi aqa sorgomq di soqniy. <sup>17</sup> Niñgi tamo ungasari kalil nanngi kumbra bole bole osornjroqniy. Osib nunngo Kristen was nanngi qalaqalainjroqniy. Niñgi Qotei ulaiyoqniy. Niñgi mandor kokba nanngo ñam soqtetnjroqniy.

*Iga Kristus aqa kumbra dauryoqnsim jaqatin qoboiyoqnom*

<sup>18</sup> O kanjal tamo, niñgi nunngo wau qa gate nanngo sorgomq di sosibqa nanngo anjam dauryoqniy. Wau qa gate bole nanngo anjam segi dauryoqnaib. Wau qa gate uge nanngo anjam dego dauryoqniy. <sup>19</sup> Niñgi Qotei qa are qalsib wau bole yib nunngo wau qa gate nanngi lanja jaqatin enqwab di unqum. Niñgi jaqatin di qoboiyoqniy. Yimqa Qotei a nunngo kumbra deqa tulan areboleboleiyqas. <sup>20</sup> Ariya niñgi wau uge yib nunngo wau qa gate nanngi deqa lungib niñgi jaqatin qoboiyqab di Qotei a niñgi awai bole enqwasai. Niñgi wau bole yib nunngo wau qa gate nanngi na lungib niñgi jaqatin qoboiyqab di Qotei a nunngo kumbra deqa tulan areboleboleiyqas.

<sup>21</sup> Kristus a dego niñgi aqaryaingwa osiqa jaqatin qoboiyosiq moiyej. Aqa kumbra di a na niñgi osorngej deqa niñgi kamba aqa kumbra di dauryosib jaqatin oqnsib soqniy. Qotei a niñgi degyqa osiqa metñgej. <sup>22</sup> Kristus a une bei yosaiyoqnej. Aqa medabu na gisan anjam bei dego marosaiyoqnej. <sup>23</sup> Jeu tamo nanngi na a misilinjoqnsib anjam uge uge minjeqnab a deqa kamba anjam uge bei nanngi minjrosaiyoqnej. Nanngi a jaqatin koba yeqnab a deqa olo nanngi jaqatin enjraqajqa marosaiyoqnej. A aqa segi jejamu osiqa Qotei aqa banq di uratej. Qotei agi iga geregere pegigeqnu qaji. <sup>24</sup> Kristus a gago une kalil qoboiyosiqa aqa segi jejamuq di gago une atsiqa a ñamburbasq di iga qa gainej. Iga moyobulosim olo ñambile sosim une aqa kumbra uratosim kumbra bole yoqnqajqa deqa osiqa ñamburbasq di iga qa gainej. Jeu tamo nanngi na Yesus qalougetosib jaqatin koba yeb. Aqa jaqatin dena a na iga olo boletgej.

<sup>25</sup> Nami niñgi kaja bul sosibqa nunngo segi areqalo na aleloqnsib laqneb. Ariya bunuqna niñgi Mandor Yesus aqa areq beb deqa a na nunngo qunun geregere taqatejunu.



### 3

#### *Tamo uña wo nanği kumbra bole yoqnebe*

<sup>1</sup> O unğasari, niği nunğo gumbuluñ nanğo sorgomq di soqniy. Nunğo gumbuluñ qudei nanği Qotei aqa anjam dauryosaiabqa di unğum, niği mequmesosib nanğo ñamgalaq di kumbra bole bole yoqniy. Yibqa nanği unsib dena nanği are bulyqab. <sup>2</sup> Niği degsib kumbra bole na walwelosib nanğo sorgomq di soqnib nanği unsib marqab, niği unğasari bole. <sup>3</sup> Niği nunğo jejamu walatqajqa are prunğoqnaiq. Niği nunğo gate pranğoqnsib wala bole bole gateq di jugoqnaib. Osib kolilei na nunğo jejamu walatoqnaib. Gara wala ti dego jugoqnaib. İnği inği di laña jejamu qa wala. <sup>4</sup> Niği nunğo are miligi walatqab di bolequja. Are miligi aqa wala agiende. Niği are bole na sosibqa tamo unğasari kalil nanği lawo na gereinjroqniy. Are miligi aqa wala di Qotei aqa ñamgalaq di tulañ boledamu. Wala di ugeqa keresai. <sup>5</sup> Agi Qotei aqa unğasari nami soqneb qaji nanği nanğo are miligi degsib walatoqneb. Osib Qotei aqa kumbra boleq di sosib a qa tariñoqnsib nanğo gumbuluñ nanğo sorgomq di soqneb. <sup>6</sup> Niği Sara uniy. A na aqa tamo Abraham aqa anjam dauryoqnsiqa minjoqnej, “Ni ijo tamo koba.” Deqa unğasari, niği Sara aqa kumbra di dauryosib kumbra bole yoqniy. Niği ulaaib. Niği kumbra bole yoqnaqab di niği Sara aqa anğro tıntın sqab.

<sup>7</sup> O tamo, niği dego areqalo bole dauryosib nunğo ñauñ nanği koba na geregere soqniy. Nunğo ñauñ nanği tamo sai. Nanği uña. Nanğo jejamu singila sai. Deqa niği lawo na nanği kumbra bole bole osornjroqniy. Niği qalie, nunğo ñauñ nanği niği ti koba na ñambile gaigai sqab. Deqa niği nunğo ñauñ nanği geregereinjroqniy. Niği kumbra degyqab di inği bei na nunğo pailyo getentqa keresai. Qotei a nunğo pailyo quoqnaqas.

#### *Niği gaigai kumbra bole yoqniy*

<sup>8</sup> Ariya e na ijo anjam endi kobotqa osiy niği endegsi mernğwai. Niği kalil koba na geregere are qujaitoqnsib tamo unğasari kalil nanği qa duloqniy. Osib niği segi segi qa qalaqalaiyo kumbra yoqnsib Kristen was nanği qa are boleınğoqnim nunğo segi ñam aguq atoqniy. <sup>9</sup> Tamo qudei na niği kumbra uge enğibqa niği kamba olo nanği kumbra uge enjraib. Tamo qudei na niği anjam uge mernğibqa niği kamba olo nanği anjam uge minjraib. Niği nanği qa endegsib pailyoqniy, “O Abu, ni na nanği boletnjrime.” Qotei a niği degyqa osiqa metnğej. Deqa niği degyibqa Qotei a kamba niği boletnğoqnaqas.

<sup>10</sup> Agi Qotei aqa anjam bei nami endegsib nengrenyeb unu,

“Tamo bei a so bole sqa marsimqa a anjam uge bei maroq-naiq.

A gisañ anjam dego maroqnaiq.

<sup>11</sup> A kumbra uge kalil torei qoreiyosim kumbra bole segi yoqneme.

Osim tamo ungasari kalil nanği koba na lawo sqajqa siñgilaoqneme.

<sup>12</sup> Tamo ungasari nanği kumbra bole deqaji yoqnqab di Tamo Koba a na nanği geregere taqatnjroqnqas.

Osim nanço pailyo dego quetnjroqnqas.

Ariya tamo ungasari kumbra uge uge yeqñub qaji nanği Tamo Koba a na olo qoreinjroqnqas.”

*Iga kumbra bole bole yimqa jeu tamo nanği na iga jaqatin egwab*

<sup>13</sup> O ijo was, ninği kumbra bole bole yqajqa siñgilaoqnqab di tamo yai na ninği olo ugeugeinğwas? <sup>14</sup> Bole, ninği kumbra bole bole yibqa tamo qudei na ninği jaqatin egwab. Di unğum. Ninği deqa areboleboleinğem. Tamo nanği dena ninği ula engeqñub. Ariya ninği nanği ulainjraib. Osib are gulbeinğaiq.

<sup>15</sup> Ninği nunço are miligiq di Tamo Koba Kristus atsib soqñiy. Soqñibqa tamo qudei na ninği endegsib nenemñwab, “Ninği inği bole kiye qa tariñoqñsib deqa areboleboleinğeqñu?”

Degsib nenemñgibqa ninği na kamba anjam kiyersib minjrqa oqñsib geregere are qaloqñsib minjroqñiy. <sup>16</sup> Ariya ninği anjam siñgila na nanği minjraib. Ninği Qotei ulaiyoqñsib lawo na nanği anjam minjroqñiy. Osib ninği gaigai Qotei aqa ñamgalaq di une saiçoji sosib Kristus aqa ñam na kumbra bole bole yoqñiy. Yoqñib jeu tamo agi ninği misilinğeqñub qaji nanği nunço kumbra di unsib jemainjrğas. <sup>17</sup> Deqa iga kumbra bole bole yoqnqom. Yoqñim Qotei a marim tamo qudei na iga jaqatin egoqnqab di kere. Ariya iga kumbra uge uge yimqa tamo qudei na iga jaqatin egwab di uge. Iga degyqasai.

*Kristus a iga qa moisiq olo subq na tigelej*

<sup>18</sup> Ninği Kristus qa are qaloqñiy. Kristus a une saiçoji sosiqa a une tamo nanço padalo sawa osiq nanço une qa moiyej. O ijo was, Kristus na ninği joqsim Qotei aqaq oqwajqa deqa osiq ninği qa moiyej. A bati qujai qa moiyej deqa a olo moiqa kere-sai. A tamo bulyosiqa mandamq endi sonaqa jeu tamo nanği na a qalnab moiyej. Moisiq olo subq na tigelosiq a mondor ti soqñej. <sup>19</sup> Sosiqa moiyo sawaq aisiq dia mondor uge uge nanği Qotei aqa anjam palontosiq minjroqñej. <sup>20</sup> Noa aqa bati qa mondor nanği di Qotei aqa anjam gotranjoqñeb. Bati deqa tamo ungasari nanço kumbra uge tulañ kobaoqñej. Ariya Qotei a nanço une qa urur kambatnjrosaiqñej. A tariñoqñe

sokobaiyonaqa Noa a qobun kobaquja gereiyej. Gereiyosiq koboonaqa tamo ungasari 8 segi qobun gogetosib sonabqa awa koba bosiq ya tulan koba dej. Tamo ungasari 8 nanji di Qotei na elenjej deqa nanji bole soqneb. <sup>21</sup> Ya di yawo anjam bul. Qotei na nanji yaq dena elenjej dego kere ninji ya na yanso onabqa Qotei a ninji elenjej. Ya dena Qotei a nungo jejamu qaji jiga yansetngosai. Ninji yanso osib Qotei pailyonab a nungo pailyo di qusiqa nungo are miligi qaji jiga yansetnjej. Qotei a Yesus Kristus olo subq na tigeltej gam dena a na ninji elenjej. <sup>22</sup> Kristus a lan qureq oqej deqa bini a Qotei aqa ban woq di awejunu. Deqa lan angro nanji ti lan qaji mondor kokba ti lan qaji singila ti kalil nanji Kristus aqa sorgomq di unub.

## 4

### *Iga gago areqalo namij uratqom*

<sup>1</sup> Kristus na aqa segi jejamu osiq jaqatin koba qoboyosiq moiyej. Dego kere ninji Kristus aqa kumbra di singila na dauryosib nungo segi jejamu osib jaqatin qoboyesogniy. Ninji degyiy. Di kiyaaqa? Tamo bei na aqa segi jejamu osim jaqatin qoboyiqas di a une uratqas. <sup>2</sup> Osim a Qotei aqa areqalo segi dauryoqnqas. A aqa jejamu qa areqalo namij olo dauryqasai. <sup>3</sup> Ninji qalie, sawa bei bei qaji nanji kumbra uge uge yqajqa tulan arearetnjreqnu. Nami ninji dego nungo areqalo namij na walweloqnsib kumbra uge uge yoqneb. Sawa bei bei qaji nanjo kumbra agiende. Nanji sambala kumbra yqajqa are prugnjqreqnu. Qolo jigeeqnaqa nanji ya uge uyoqnsib alan kobaoqnsibqa nanarioqnsib laqnu. Osib Qotei aqa dal anjam gotranjoqnsib gisan qotei nanji binjnjreqnub. <sup>4</sup> Nami ninji nanji daurnjsib koba na kumbra uge uge deqaji yoqneb. Ariya bini ninji kumbra di urateqnub deqa nanji na ninji nungoqnsib tulan prugoqnsib ninji misilinqeqnub. <sup>5</sup> Mondon sawa bei bei qaji nanji di Qotei aqa ulatamuq di tigelosib nanjo une kalil babtosis minjib a quqwas. Bati deqa Qotei na tamo nambile so qaji nanji ti tamo moreno qaji nanji ti peginjrqas. <sup>6</sup> Utru deqa Kristus a nami tamo moreno qaji nanji aqa anjam bole palontosiq minjroqnej. Tamo nanji di jejamu ti sonab Qotei na nanji peginjrej. Ariya mondon nanji olo nambile osib Qotei bulosib mondor ti sqab.

### *Qotei a ninji wau segi segi engej*

<sup>7</sup> Mandam ti inji inji kalil ti koboqajqa bati jojomoqo. Deqa ninji areqalo bole ti sosib nungo kumbra kalil geregere taqatoqniy. Ninji degyqab di ninji Qotei pailyoqnsib geregere pailyoqnqab. <sup>8</sup> E anjam kobaquja bei dego ninji endegsi merngit quiy. Ninji segi segi qa qalaqalaiyo kumbra yoqniy.

Qalaqalaiyo kumbra dena une gargekoba kabutejunu. <sup>9</sup> Deqa Kristen was nanği nunğo talq boqnibqa ninği nanği oqnsib geregereinjroqniy. Ninği nanği aqaryainjrqaqqa asğingaiq. <sup>10</sup> Qotei a ninği kalil qa are boleiyosiq wau segi segi engej. Deqa ninği aqa wau tamo bolequja sosibqa aqa tamo unğasari nanği qa wauoqnsib aqaryainjrqaqniy. <sup>11</sup> Ninği qudei anjam palontqa wau osibqa Qotei aqa anjam geregere palontqniy. Ninği qudei tamo unğasari nanği aqaryainjrqa wau osibqa Qotei na siğgila enğimqa siğgila dena wauoqniy. Amqa wau kalil nanği yeqnub qaji di tamo unğasari nanği na unoqnsib Yesus Kristus aqa ñam na Qotei binjiyoqnqab. Yesus Kristus a bati gaigai ñam koba ti siğgila ti sqas. Bole.

*Kristus a jaqatin qoboiej dego kere iga jaqatin qoboiey-qnum*

<sup>12</sup> O ijo was bole, gulbe ugedamu ñamyuwo bulosiq nunğoq beqnu. Ninği deqa tulañ prugosib endegsib are qalaib, “Gulbe deqaji nami gagoq di brantosaioqnej.” Ninği degsib are qalaib. Ninği nunğo areqalo Kristus qa bole siğgilateqnu kiyo sai kiyo di Qotei a tenemtqa osiq deqa gulbe qarinyeqnaqa nunğoq beqnu. <sup>13</sup> Kristus a nami jaqatin qoboiej dego kere ninği jaqatin qoboieyqnu. Ninği deqa areboleboleingim soqniy. Yimqa mondonñ Kristus a rianñ koba ti brantimqa bati deqa ninği olo tulañ areboleboleingim sqab. <sup>14</sup> Ninği Kristus aqa ñam ojejunub deqa tamo qudei na ninği misilingwab di unğum. Ninği deqa areboleboleingem. Ninği qalie, Qotei aqa Mondor rianñ ti unu qaji a na ninği beterngejunu. <sup>15</sup> Ariya ninği tamo ñumibqa kiyo, inği bajinibqa kiyo, tamo nanği ugeugeinjribqa kiyo, tamo bei aqa wau ugetibqa kiyo tamo qudei na unsib deqa jaqatin enğwab di kere enğwab. Deqa ijo was, ninği kumbra uge di yaib. <sup>16</sup> Ninği ñam Kristen ojesoqniy tamo qudei na ñam deqa jaqatin enğwab di kere. Ninği deqa jemaingaiq. Ninği tulañ areboleboleingim Qotei aqa ñam soqtoqniy.

<sup>17</sup> Une pegiyo bati jojomoq deqa Qotei a namoqna aqa segi tamo unğasari nanği peginjraqas. Deqa iga qalieonum, tamo unğasari Qotei aqa anjam bole gotranjeqnu qaji nanği a na peginjrsim awai tulañ ugedamu enjrqaq. <sup>18</sup> Agi Qotei aqa anjam bei nami endegsib nenğrenyeb unu, “Qotei na tamo unğasari kumbra bole bole yeqnub qaji nanği elenqajqa banği koba. Deqa iga qalieonum, tamo unğasari Qotei qoreiyoqnsib une yeqnub qaji nanği a na elenqajqa olo tulañ banği koba.” <sup>19</sup> Deqa ijo was, Qotei a are soqnim ninği qudei jaqatin oqab di kere. Ninği nunğo segi jejamu osib Qotei aqa banq di uratosib kumbra bole bole yoqniy. Qotei a gago Abu. A segi na iga gereigej deqa a bati gaigai iga taqatgesqas.

## 5

*Kristen gate nan̄gi na Qotei aqa tamo un̄gasari nan̄gi geregere taqatnjroqnebe*

<sup>1</sup> O Kristen gate kalil, e nin̄gi anjam endegsi mern̄gwai. E dego gate. Kristus a jaqatin̄ osiq moinaqa e ijo segi n̄amdamu na unem. Mondon̄ a olo rian̄ koba ti brantim̄qa bati deqa Qotei na lan̄ goqe qaji ingi bole bole nin̄gi e ti egwas. Deqa Kristen gate, nin̄gi wau endegyi. <sup>2</sup> Nin̄gi Qotei aqa tamo un̄gasari nan̄gi geregere taqatnjriy. Nan̄gi kaja bul unub deqa Qotei na nan̄gi joqsiqa nun̄go ban̄q di atej. Qotei na nin̄gi wau di en̄gej deqa nin̄gi are bole na wauoqniy. Tamo qudei na nin̄gi singila na waingibqa nin̄gi deqa wau di ojaib. Nin̄gi silali qa osib wau di ojaib. <sup>3</sup> Nin̄gi nun̄go segi n̄am soqtosib Qotei aqa tamo un̄gasari nan̄gi njirin̄ na taqatnjraib. Qotei na nan̄gi joqsiqa nun̄go ban̄q di atej deqa nin̄gi kumbra bole na ti lawo na ti nan̄gi taqatnjriy. Yimqa nan̄gi nun̄go kumbra di unsib nin̄gi daurn̄gwab. <sup>4</sup> Nin̄gi kumbra degyibqa mondon̄ kaja nan̄go Mandor Koba a lan̄ qureq na brantim̄qa bati deqa nin̄gi awai tulan̄ boledamu oqab. Awai di ugeqa keresai. Gaigai sqas.

*Iga gago segi walwel geregere taqatqom*

<sup>5</sup> O an̄gro wala, nin̄gi Kristen gate nan̄go sorgomq di soqniy. O ijo was kalil, nin̄gi nun̄go segi n̄am aguq atoqniy. Agi Qotei aqa anjam bei nami endegsib nen̄gren̄yeb unu, “Tamo un̄gasari nan̄go segi n̄am soqteqnub qaji nan̄gi Qotei na olo jeutnjre-qnu. Ariya tamo un̄gasari nan̄go segi n̄am aguq ateqnub qaji nan̄gi qa Qotei a olo are boleiyeqnu.” <sup>6</sup> Deqa nin̄gi nun̄go segi n̄am aguq atoqnsib Qotei singila ti unu qaji aqa sorgomq di soqniy. Yimqa bati kereamqa a na nun̄go n̄am olo soqtet̄ngwas. <sup>7</sup> Qotei a gaigai nin̄gi qa are koba qaleqnu. Deqa nin̄gi na nun̄go gulbe kalil oqnsib Qotei aqa ban̄q di uratoqniy.

<sup>8</sup> Nin̄gi nun̄go segi walwel geregere taqatosib n̄am atoqnsib soqniy. Laion nan̄gi tulan̄ lelen̄oqnsib tamo n̄umoqnsib uye-qnub dego kere nun̄go jeu tamo Satan a gaigai tamo un̄gasari nan̄gi padaltnjr̄qajqa n̄amoqnsiq laqnu. <sup>9</sup> Deqa nin̄gi Yesus qa nun̄go areqalo singilatoqnsib Satan gotran̄yoqniy. Nin̄gi qalie, nin̄gi jaqatin̄ eqnub dego kere Qotei aqa tamo un̄gasari sawa sawa kalilq di unub qaji nan̄gi degsib jaqatin̄ eqnub. <sup>10</sup> Qotei a iga qa are boleiyqajqa utru. A Kristus Yesus aqa n̄am na nin̄gi met̄n̄gej deqa mondon̄ nin̄gi Kristus ombla aqa rian̄ ti so bole gaigai sqab. Deqa nin̄gi mandamq endi sokiñala jaqatin̄ oqnsib koboamqa Qotei na nin̄gi olo bolet̄ngosim singilat̄ngimqa nin̄gi gaigai singila na tigelesqab. <sup>11</sup> Qotei a bati gaigai singila koba ti sqas. Bole.

*Anjam mutu qudei*

<sup>12</sup> Anjam truquyala endi Sailas na e aqaryaibosiqqa nenngrenyosiq nunngoq qarinyqo. E qalieonum, Sailas a gago Kristen was bole. O ijo was, Qotei a ningi qa are boleyeqnu. E nunngo areqalo tigeltetngitqa aqa kumbra di ningi geregere ojsib tigelesoqniy. E aqa kumbra deqa are qalsim anjam endi nenngrenyonum.

<sup>13</sup> Kristen was nanngi Babilon qureq di Qotei qa loueqnub qaji nanngi na ningi kaiyeingonub. Agi nanngi ningi ti Qotei na giltngelj. Mak a dego ningi kaiyeingwo. Mak a ijo angro bul. <sup>14</sup> Ningi na nunngo Kristen was kalil nanngi segi segi kundoqnrsib qalaqalaiyo kumbra osornjriy.

Ningi kalil Kristus beteryejunub deqa ningi lawo na soqniy. Bole.

## 2 PITA

<sup>1</sup> E Saimon Pita. E Yesus Kristus aqa wau tamo. A na e qarınbej deqa e aqa anjam mare mare laqnum. Yesus Kristus a gago Qotei. A kumbra bole yeqnu qaji tamo. A iga padalo sawaq na elenej. Ningi iga ti Yesus qa gago areqalo singilateqnum. <sup>2</sup> Ningi gago Tamo Koba Yesus aqa Abu Qotei wo nanji aiyel qa bole qalieonub. Deqa Qotei a ningi qa are tulan boleiyosim nungo are latetngeme.

### *Ningi Qotei aqa segi tamo ungasari tintin unub*

<sup>3</sup> Yesus Kristus a segi Qotei. A singila koba ti unu. Iga a qa bole qalieonum deqa a na iga nambile qa ti Qotei aqa kumbra qa ti tulan keretgej. Osika aqa segi rian na ti so bole na ti iga metgej. <sup>4</sup> A na lan qure qa ingi bole bole iga egej. A nami ingi di iga egwa marej. Ingi di tulan boledamu. Mandam tamo ungasari nanji kumbra uge uge yqajqa are prugnreqnu. Kumbra dena nanji ugetnjreqnu. Deqa ijo was, ningi kumbra di uratosib Qotei aqa segi kumbraq di soqniy.

<sup>5</sup> Ningi Yesus qa nungo areqalo singilateqnum deqa ningi kumbra bole bole yqajqa waukobaoqniy. Osib dena ningi Qotei qa bole qalieosib soqniy. <sup>6</sup> Osib dena ningi nungo segi jejamu geregere taqatoqniy. Osib dena ningi gulbe qoboioqnsib singila na tigelesoqniy. Osib dena ningi Qotei aqa kumbraq di sosib walweloqniy. <sup>7</sup> Osib dena ningi nungo Kristen was nanji geregereinjroqniy. Osib dena ningi qalaqalaiyo kumbra dauryosib soqniy.

<sup>8</sup> Kumbra bole deqaji nungoq di tulan kobaoqneme. Amqa ningi gago Tamo Koba Yesus Kristus qa bole qalieqab. Nungo qalie di loumqa keresai. Qalie di nungoq di tulan singilaoqnsim gei gargekoba atelenqas. <sup>9</sup> Kumbra bole deqaji tamo qudei nanngoq di sosai deqa nanji nam qandimo bul unub. Nanji geregere nam atqa keresai. Bole, Qotei a nami tamo nanji di nanngo une kobotetnjrej. Ariya nanji deqa olo are walnjreqnu. <sup>10</sup> O ijo was kalil, Qotei a nami ningi giltngosiq metngej deqa ningi aqa segi tamo ungasari tintin sqajqa singilaoqniy. Ningi degyqab di ningi ulonqa keresai. <sup>11</sup> Qotei na gam waqtetngoqnimqa gago Tamo Koba Yesus Kristus agi iga elenej qaji a nungo Mandor Koba sosim ningi taqatngimqa ningi so bole gaigai sqab.

<sup>12-13</sup> Bole, ningi ijo anjam endi qalieosib Qotei aqa anjam bole kalil singila na ojejunub. Ariya ningi ijo anjam endeqa olo are walngaim deqa e mandamq endi sosiy bati gaigai ningi

merngoqnsiy nungo areqalo tigeltetnngoqnqai. E kere degye-qnum. <sup>14</sup>E qalieonum, sokiñala e ijo jejamu uratosiy moiqai. Gago Tamo Koba Yesus Kristus na e degsi merbej. <sup>15</sup>Deqa e ijo anjam endi ninigi merngoqnqai. Merngoqnsiy bunuqna e moiytqa ninigi ijo anjam endeqa gaigai are qaloqnsib sqab.

### *Qotei a Yesus ñam kobaquja yej*

<sup>16</sup>Iga nami gago Tamo Koba Yesus Kristus aqa singila qa ti a bqajqa bati qa ti ninigi anjam merngeqnam ninigi quoqneb. Iga anjam di merngoqnem bati deqa iga mandam tamo nanjo sa anjam dauryosaiqnem. Iga segi na Yesus aqa rianj ti manwa ti unsim deqa ninigi saingonem. <sup>17</sup>Iga endegsi unem. Abu Qotei na Yesus ñam koba yosiq aqa segi rianj ti manwa ti Yesus aqaq di atej. Osiq a Yesus qa endegsi marej, “Endi ijo Anqro e na qalaqalaiyeqnum qaji. E a qa tulan areboleboleibeqnu.” <sup>18</sup>Iga Qotei aqa getento manaq di Yesus ombla sonamqa Qotei a lanj goge na anjam di marnaq iga quem. <sup>19</sup>Deqa iga bole qalieonum, Qotei aqa medabu o qaji tamo nanjo anjam nami maroqneb qaji di anjam bole. Deqa ninigi nanjo anjam di torei ojij. Ninigi ojgab di bolequja. Nanjo anjam di wanjal bul sawa ambruq di pulonqnu. Pulonosiqa nebe qa burbas oqeqnu dego kere nungo are miligiq di suwanqnu.

<sup>20-21</sup>O ijo was, ninigi endegsib qalieoiy. Qotei aqa medabu o qaji tamo nanji nami anjam maroqneb nenqrenq di unu. Nanjo anjam maroqneb qaji di nanji mandam tamo nanjo areqalo na marosaiqnem. Mondor Bole na nanjo areqalo tigeltetnjreqnaqa nanji Qotei aqa medabu oqnsib anjam maroqneb.

## 2

### *Bunuqna tamo qudei nanji bosib gisanj anjam koba maroqnqab*

<sup>1</sup>Bole, gisanj anjam maro tamo nanji Israel nanjo ambleq na tigelosib anjam maroqneb. Nanji Qotei aqa medabu o qaji tamo bolesai. Bunuqna nungo ambleq na dego tamo deqaji nanji lumu tigelosib gisanj anjam koba ninigi merngoqnqab. Yimqa ninigi qudei nanjo anjam dauryosib padalqab. Tamo nanji dena Gate Koba Yesus nami nanji awainjrej qaji a qor-eiyonqab. Deqa mondonj nanji urur padalqab. <sup>2</sup>Gisanj tamo nanji di kumbra uge uge yoqnbqqa tamo unqasari gargekoba nanji na nanjo kumbra di dauryosib Qotei aqa gam bole misilinyqab. <sup>3</sup>Gisanj tamo nanji di mamaul ani deqa nanji bosib nungo silali inji inji gisanj na yainqonqab. Tulanj nami Qotei na gisanj tamo nanji di peginjrqqa bati atsiqa nanji qa endegsi marej, “E nanji padaltnjrougetqai.” Od, tamo nanji di bole padalqab. Qotei a nanji padaltnjrqqa bati qa tarineqnu.



<sup>4</sup> Ningi qalie, nami lan angro qudei nanği une atoqneb. Deqa Qotei na nanği uratnjrosai. A nanği ojsiqa sub guma kobaq di breinjrej unub. Sub di ambru koba. Sub dia nıamyuwo unu. Dia lan angro nanği tariņesoqñibqa mondoņ Qotei a nanğo une qa peginjrsim awai uge enjrças. <sup>5</sup> Tamo unğasari Noa aqa bati qa soqneb qaji nanği Qotei qoreiyeb deqa Qotei na nanği dego uratnjrosai. A nanği padaltnjrej. Awa koba aisiqa mandam ya maqonaqa dena Qotei na nanği padaltnjrej. Ariya Qotei a Noa padaltosai. Noa a Qotei aqa anjam palontoqnsiq tamo unğasari nanği endegsi minjroqnej, “Ninği kumbra bole dauryoqñiy.” Deqa Qotei na Noa a ti tamo unğasari 7 nanği ti geregere taqatnjrnaqa nanği bole soqneb. <sup>6</sup> Sodom qure ti Gomora qure ti nanği dego Qotei na padaltnjrqa marsiqa nıamyuwo qarinyonaqa aisiq nanği koitnjrnaq nanği torei padalekriteb. Deqa bunuqna tamo unğasari nanği Sodom Gomora ti nanği qa are qaloqnsib ulaoqñqab. Osib Qotei qoreiyqa uratqab. <sup>7</sup> Lot a kumbra bole yoqnej deqa a Sodom qureq di sosiqa tamo uge uge nanği kumbra ugeteqñabqa di unoqnsiqa are gulbekobaiyoqnej. Deqa Qotei na Lot olo osiqa sawa boleq di atnaqa a padalosai. <sup>8</sup> Lot aqa kumbra bolequja. A Sodom qureq di bati gaigai nanğo kumbra uge unoqnsiq nanğo anjam uge dego quoqnej. Aqa are miligi tulan boledamu deqa nanği Qotei aqa dal anjam gotranıyeqñabqa di unoqnsiq a prugugetoqnsiqa are tulan jaqatıñkobaiyoqnej. <sup>9</sup> O ijo was ninği quiy. Tamo Koba Qotei a nami kumbra kalil di yoqnej deqa iga qalieonum, tamo unğasari bini Qotei dauryeqñub qaji nanği gulbe iteqñabqa a na nanği elenqa kere. Nanği elenqajqa gam di Qotei a segi qalie bole. Tamo uge uge nanğo kumbra dego Qotei a qalie bole. Deqa mondoņ a na nanği peginjrsim awai uge enjrças. <sup>10</sup> Tamo qudei nanği kumbra tulan uge uge yeqñub deqa nanği awai ugedamu oqab. Tamo nanği di sambala kumbra tulan jigat yoqñqajqa are prugnıreqnu. Osib nanği endegsib are qaleqñub, “Tamo Koba Qotei aqa anjam kalil lanı sa anjam. Deqa iga dauryqasai.”

Gisanı anjam maro tamo nanğo kumbra tulan uge. Nanği kumbra endeqaji yeqñub. Nanği diqoqnsib nanğo segi areqalo dauryeqñub. Nanği lan angro kokba nanği misilıñnjrqajqa ulaosaieqñub. <sup>11</sup> Lan angro qudei nanği tulan sıngila koba ti unub deqa nanği na lan angro kokba nanği di bunıjreqñub. Ariya lan angro sıngila ti unub qaji nanği di diqosaieqñub. Nanği gisanı anjam maro tamo nanği bul sai. Deqa nanği Tamo Koba Qotei aqa ulatamuq di lan angro kokba nanği misilıñnjrosaieqñub.

<sup>12</sup> Gisanı tamo nanği di wagme juwanı bul tulan nanarioqnsib laqñub. Nanği nanğo segi jejamu qa areqalo uge uge

dauryeqnub. Anjam nan̄gi poinjrosai qaji di nan̄gi olo misilin̄yeqnub. Iga wagme juwan̄ nan̄gi ojelen̄oqnsim ñumeqnum dego kere mondon̄ Qotei na gisan̄ tamo nan̄gi di ñumougetqas. <sup>13</sup> Nan̄gi kumbra uge uge yeqnub deqa bunuqna nan̄gi gulbe koba itqab. Nan̄go kumbra agiende. Nan̄gi qanam jige alan̄kobaoqnsibqa ya uge uyoqnsib nanarieqnub. Nan̄gi kumbra di yqajqa tulan̄ areboleboleinjreqnu. Nan̄gi nin̄gi ti in̄gi uyoqnsib dena nun̄go ñam ugetoqnsib nin̄gi jiga en̄geqnub. Nan̄gi gisan̄ kumbra dauryqajqa tulan̄ areboleboleinjreqnu. <sup>14</sup> Nan̄gi gaigai un̄a qa mamaulnjreqnu deqa nan̄gi sambala kumbra yqajqa are koba unu. Nan̄gi une yoqnqajqa tulan̄ arearetnjreqnaqa olo uratosaiyeqnub. Nan̄gi na tamo qudei areqalo aiye aiyelteqnub qaji nan̄gi walawalainjreqnabqa nan̄gi daurnjroqnsib une yeqnub. Gisan̄ tamo nan̄gi di tamo qudei nan̄go in̄gi in̄gi qa mamaulnjreqnu. Nan̄gi kumbra di yqajqa qalie bole. Deqa Qotei na nan̄gi torei padaltnjrqas. <sup>15</sup> Nan̄gi Qotei aqa gam bole uratoqnsib nanarioqnsib laqnub. Osib nan̄gi Beor aqa an̄gro Balam aqa gam dauryeqnub. Balam a nami kumbra uge yoqnsiqa silali oqajqa tulan̄ arearetoqnej. <sup>16</sup> Donki nan̄gi anjam marqa keresai ariya donki bei a tamo bulosiqa medabu waqtosiqa Balam aqa kumbra uge deqa ñirin̄tej. Onaqa Balam a qusiqa aqa nanari kumbra di olo uratej. Balam a nami gisan̄oqnsiqa maroqnej, “E Qotei aqa medabu o qaji tamo bole.”

<sup>17</sup> Gisan̄ tamo nan̄gi di ya sub bul jeño qaji. Jagwa na awa puyeqnaqa urur koboeqnu dego kere tamo nan̄gi di baban̄ na tamo bole unub ariya nan̄gi kumbra bole bei babtosaieqnub. Deqa mondon̄ Qotei na nan̄gi sawa ambruq di breinjrqas. Sawa di Qotei na nami nan̄gi gereiyetnjrej unu. <sup>18</sup> Gisan̄ tamo nan̄gi di medabu waqtoqnsib diqoqnsib anjam uge uge marelen̄eqnub. Nan̄gi na tamo un̄gasari qudei nan̄gi walawalainjreqnabqa sambala kumbra yoqnsib nan̄go segi jejamu qa areqalo uge uge dauryeqnub. Tamo un̄gasari nan̄gi di ya ya endi are bulyosib tamo nan̄gi Qotei qaliesai qaji nan̄go kumbra urateb. Ariya gisan̄ tamo nan̄gi na nan̄gi titnjreqnab nan̄gi olo kumbra uge uge dauryeqnub. <sup>19</sup> Gisan̄ tamo nan̄gi dena tamo un̄gasari nan̄gi walawalainjroqnsib endegsib minjreqnub, “Nin̄gi iga daurgwab di kumbra bei na nin̄gi taqatngwa keresai. Deqa un̄gum, nin̄gi nun̄go segi areqalo na kumbra kiye yqa maroqnsib yoqniy.” Nan̄go anjam di gisan̄. Agi nan̄go segi kumbra uge uge na nan̄gi tulan̄ sin̄gila na ojoqnsiq nan̄gi taqatnjreqnu. Nin̄gi qalie, tamo bei aqa kumbra bei na a taqatesqas di a kumbra di aqa kan̄gal tamo bul sqas. <sup>20</sup> Bole, tamo un̄gasari nan̄gi di nami gago Tamo Koba Yesus Kristus agi iga elenej qaji a qa bole qalieeb.

Nan̄gi degsib qalieeb deqa nan̄gi mandam qa kumbra jigat kalil urateb. Ariya bini nan̄gi puluosib kumbra jigat di olo dauryeqnub. Deqa kumbra dena nan̄gi singila na ojesonaq nan̄go so tulaŋ ugeeqnu. Nan̄go so uge namij dego sai. Nan̄go so olo tulaŋ ugedamueqnu. <sup>21</sup> Nan̄gi nami kumbra bole qa gam qaliesai qamu di kere. Ariya nan̄gi gam di qalieosib Qotei aqa anjam ojesoqneb. Ojesosib olo bini nan̄gi anjam di qoreiyeqnub. Deqa mondoŋ nan̄gi awai tulaŋ ugedamu oqab. <sup>22</sup> Tamo un̄gasari nan̄gi di baun̄ ti bel ti bul. Yawo anjam endegsi unu, “Baun̄ nan̄gi n̄iloqnsib olo puluoqnsib nan̄go n̄ilo uyeqnu.” Yawo anjam bei dego unu, “Bel nan̄gi yaq di yaloqnsib olo boqnsib jagiq di brineqnu.”

### 3

#### *Tamo Koba Yesus a olo bqas*

<sup>1-2</sup> O ijo was bole, e nami anjam bei nengren̄yosim nun̄goq qarinyem. Bini e olo anjam endi nun̄goq qarinyonum. Nami Qotei aqa medabu o qaji tamo nan̄gi anjam palontoqneb. Tamo Koba Yesus agi iga elenej qaji aqa wau tamo nan̄gi dego anjam palontoqneb. E nun̄go areqalo tigeltetngitqa nin̄gi nan̄go anjam deqa olo are qaliy. E deqa anjam endi nun̄goq qarinyonum.

<sup>3</sup> Ariya e na anjam kobaquja bei nin̄gi mern̄git poin̄gem. Mondoŋ diŋo bati jojomoqnm̄qa meqe meqem tamo nan̄gi boqnsib nan̄go segi areqalo uge uge dauryoqnsib misilin̄ anjam endegsib maroqngab, <sup>4</sup> “Qotei a nami marej, ‘Mondoŋ Kristus a olo bqas.’ Ariya a qabi unu? Nin̄gi uniy. Gago moma utru nan̄gi moreŋoqneb bosi bosiq agi bini iga degsi unum. Qotei a nami mandam atej agi bini mandam a degsi unu. Deqa Kristus a qabi unu?” <sup>5</sup> O ijo was, meqe meqem tamo nan̄gi di tulaŋ nanariosib deqa nan̄gi anjam degsib maroqngab. Nami Qotei a anjam marnaqa laŋ brantej di nan̄gi poin̄rosai. Qotei a olo anjam marnaqa mandam a ya ambleq di brantej di dego nan̄gi poin̄rosai. <sup>6</sup> Noa aqa bati qa Qotei a olo marnaqa ya koba dosiqa mandam ya maqosiqa in̄gi in̄gi kalil padaltej. <sup>7</sup> Bini laŋ ti mandam ti tariŋoqnsib unub. Tariŋesoqnb̄qa mondoŋ Qotei a olo anjam marimqa nan̄gi n̄amyuwo na yusib koboqab. Bati deqa Qotei na tamo un̄gasari a qoreiyeqnub qaji nan̄go une qa peginjrsim nan̄gi torei padaltn̄jqas.

<sup>8</sup> O ijo was bole, nin̄gi ijo anjam endeqa olo are wal̄ngaiq. Qotei aqa areqalo agiende. Bati qujai a wausau 1,000 dego kere. Wausau 1,000 a bati qujai dego kere. Bati qujai ti wausau 1,000 ti nan̄gi ombla kerekere. <sup>9</sup> Ariya tamo qudei nan̄gi endegsib mareqnu, “Tamo Koba Qotei a nami in̄gi bole

bole iga egwa marej. Kiyaaqa a inġi di iga egwajqa tariñoqnsiq laja sokobaiyeqnu?” Di sai. Qotei na tamo bei padaltqajqa arearetosaieqnu. Deqa a ninġi kalil are bulyqajqa marsiq lawo na ninġi qa tariñoqnsiq unu.

### *Mandam ti laj ti koboqab*

<sup>10</sup> Diño bati brantimqa Tamo Koba a bajin tamo bul urur boqujatqas. Bamqa bati deqa laj a poņosim koboqas. Inġi inġi kalil Qotei na atej qaji di dego ŋamyuwo na tulaņ kanķanjam yusib koboqab. Deqa mandam ti aqa inġi inġi kalil ti olo bunu sqasai. <sup>11</sup> Ninġi are qaliy. Inġi inġi kalil degsi koboqas deqa e ninġi kumbra kiye dauryqajqa mernġwai? Od, ninġi kumbra endi dauryiy. Ninġi nunġo segi jejamu Qotei yekritosib aqa segi kumbra boleq di soqniy. <sup>12</sup> Sosib Qotei aqa bati koba brantqajqa deqa tariñoqniy. Bati di urur brantqajqa deqa ninġi siņgila na wauoqniy. Bati di brantimqa laj a ŋamyuwo na yusim koboqas. Inġi inġi kalil Qotei na atej qaji di dego ŋamyuwo na tulaņ kanķanjam yusib ya bulosib koboqab. <sup>13</sup> Qotei a nami endegsi marej, “E na laj bunuj ti mandam bunuj ti gereiyqai.” A degsi marej deqa iga maņwa di unqajqa tariñoqnsim unum. Laņ bunujq dia, mandam bunujq dia kumbra bole tiņtinj gaigai sqas.

### *Ninġi ŋam atoqnsib Tamo Koba Yesus qa tariñoqnsib soqniy*

<sup>14</sup> O ijo was bole, ninġi maņwa di brantqajqa tariņeqnub deqa ninġi Qotei aqa ŋamgalaq di tamo bole une saiqoġi sqajqa siņgila na wauoqniy. Osib ninġi Qotei ombla areqalo qujaitosib lawo na soqniy. Soqni b mondoņ Qotei a nunġo kumbra di unqas. <sup>15</sup> Gago Tamo Koba a na iga elenqajqa deqa tariņeqnu. Ninġi di qalieqajqa deqa e anjam endi nenġrenyonum. Gago was bole Pol a dego Qotei na powo yeqnaqa anjam deqaji nenġrenyoqnsiq nunġoq qarinyoqnej. <sup>16</sup> Pol a gaigai anjam deqaji nenġrenyoqnej. Bole, Pol aqa anjam qudei iga poigwajqa wau koba. Deqa nanari tamo qudei Yesus qa naņgo areqalo siņgilatosai qaji naņgi Pol aqa anjam di bubulyoqnsibqa ugeugeiyeqnu. Osib Qotei aqa anjam kalil nenġrenq di unu qaji di dego ugeugeiyeqnu. Deqa mondoņ naņgi tulaņ padalougetqab.

<sup>17</sup> O ijo was bole, ninġi qalie, maņwa kalil di brantqas. Deqa ninġi geregere ŋam atoqniy. Ninġi ŋam atqasai di dal anjam gotraņyo qaji tamo naņgi bosib ninġi gisaņgosib titnġibqa ninġi siņgila na tigelesqa uratosib uloņo uge. <sup>18</sup> Gago Tamo Koba Yesus Kristus agi iga elenġ qaji a ninġi qa are boleiyeqnu. Ninġi a qa qalieonub. Nunġo qalie di kobaqujaeme. Yim Yesus a olo ninġi qa are tulaņ boleiyonqas. A rian ti ñam koba ti

unu deqa bini bati endi iga aqa ñam soqtoqnqom. Osim bati  
gaigai aqa ñam soqtoqnsim sqom. Bole.

# 1 JON

## *Anjam a boleq donaq a iga unem*

<sup>1</sup> Anjam a nambile unu. Anjam di nami soqnej. Anjam di iga quoqnem. Gago nAMDAMU na unoqnem. Gago ban na dego ojoqnem. <sup>2</sup> Nambile di boleq donaq a iga unem. Nambile di gaigai sqas. Nambile di aqa Abu wo sosiqa boleq donaq a iga unem. Deqa iga a qa ninji sainjeqnum. <sup>3</sup> Iga Anjam di gago nAMDAMU na unoqnem. Iga a quoqnem. Deqa iga a qa ninji sainjeqnum. Di kiyaaqa? Ninji iga ti beterosim are qujaitosim sqajqa deqa. Agi ninji iga ti Abu Qotei aqa Niri Yesus Kristus wo nanji aiyel beternjrsim nanji koba na are qujaitosim unum. <sup>4</sup> Iga ninji ti tulan areboleboleigwajqa deqa iga anjam endi nenngrenyosim nungoq qarinyonum.

## *Qotei a suwanjoq di unu dego kere iga suwanjoq di walweloqn-qom*

<sup>5</sup> Yesus Kristus a anjam endegsi mergonaq iga quem, “Qotei a pulonj bul. Ambru bei aqaq di sosai.” Iga anjam di qusimqa agi ninji olo mernjeqnum. <sup>6</sup> Iga marqom, “E Qotei beteryosim a ombla are qujaitosim unum.” Degsi marsimqa ariya iga olo ambruc di walwelqom di iga gisanjeqnum. Iga kumbra bole dauryosaieqnum. <sup>7</sup> Qotei a suwanjoq di unu dego kere iga suwanjoq di walwelqom di iga Qotei aqa tamo ungasari kalil nanji ti beterosim are qujaitosim sqom. Degsi sqom di Qotei aqa Niri Yesus aqa len aiyej qaji dena gago une kalil yansetgimqa iga aqa nangalaq di tamo bole une saiqoji sqom.

<sup>8</sup> Iga marqom, “E une yosaieqnum.” Degsi marqom di iga gago segi jejamu gisanjeqnum. Deqa anjam bole gago are miligiq di sqa keresai. <sup>9</sup> Ariya iga gago segi une babtosim marqom, “Od, e une ti.” Degsi marqom di Qotei a iga uratgwasai. A kumbra bole tintinj dauryosim gago une yansetgwas. Osim gago kumbra uge kalil taqal waiyimqa iga aqa nangalaq di tamo bole une saiqoji sqom. <sup>10</sup> Iga marqom, “E nami une yo-saiognem.” Degsi marqom di iga Qotei aqa nam ugetoqnsim a gisanj tamo qa minjobuleqnum. Deqa aqa anjam gago are miligiq di sqa keresai.

## 2

### *Yesus a gago aqaryaigo tamo*

<sup>1</sup> O ijo angro kiñilala, ninji une yoqnaib deqa e anjam endi nenngrenyosim nungoq qarinyonum. Ariya ninji qudei une yibqa aqaryaigo tamo Yesus Kristus a na ninji aqaryaingwas. Yesus agi aqa Abu ombla sosiqa gaigai kumbra bole tintinj

yeqnu. <sup>2</sup> A gago une kobotetgosim Qotei aqa minjin taqal waiyqajqa bej. A iga segi une kobotetgwajqa bosai. Tamo ungasari kalil mandamq endi unub qaji nanji dego une kobotetnrqajqa bej.

*Tamo a Qotei qa qalieqas di a Qotei aqa anjam dauryoqnqas*

<sup>3</sup> Iga kiyersi endegsi qalieqom, “Bole, iga Qotei qa qalieonum”? E ubtosiy marqai. Iga Qotei aqa dal anjam dauryqom dena iga bole qalieqom.

<sup>4</sup> Tamo bei a marqas, “E Qotei qa qalieonum.” Degsi marqas ariya a Qotei aqa dal anjam dauryosaieqnu. Deqa tamo di a gisan tamo. Aqa are miligiq di anjam bole sosai. <sup>5-6</sup> Ariya tamo bei a Qotei aqa anjam dauryoqnqas di Qotei aqa qalaqalaisyqo kumbra tamo di aqa are miligiq di tulan kobaoqnsim singilaoqnqas.

Tamo bei a marqas, “E Qotei beteryejunum.” A degsi marqas di a kumbra kalil Yesus yoqnej qaji di dauryosim yoqneme. Iga degyqom di iga qalieqom, iga Qotei beteryejunum. <sup>7</sup> O ijo was bole, dal anjam e nenjrenyonum qaji endi dal anjam bunuj sai. Endi dal anjam namij ninji nami quoqneb qaji. <sup>8</sup> Ariya dal anjam e nenjrenyonum qaji endi dal anjam bunuj dego. A anjam bole. A Kristus aqag di sosisa nungoq di dego unu. Di kiyaaqa? Ambru a koboqa laqnaqa suwan a olo branteqnu deqa.

<sup>9</sup> Tamo bei a marqas, “E suwanog di unum.” Degsi marqas ariya a na olo aqa Kristen was qudei nanji jeutnjreqnu. Deqa tamo di a suwanog di sosai. A ambruq di unu. <sup>10</sup> Tamo bei na aqa Kristen was nanji qalaqalainjroqnqas di iga unsim qalieqom, bole, tamo di a suwanog di unu. Deqa une bei na a ulontosaieqnu. <sup>11</sup> Ariya tamo bei na aqa Kristen was qudei nanji jeutnjrqas di iga unsim qalieqom, tamo di a ambruq di sosisq walweleqnu. Ambru na aqa namdamu getentetqo deqa a sawa qabiteqnu di a qalieqasai.

<sup>12</sup> O ijo angro kiñilala, ninji quiy. Kristus aqa ñam na Qotei a nungo une kalil kobotetnjej. E deqa anjam endi nenjrenyosim nungoq qarinyonum.

<sup>13</sup> O abu ninji quiy. Tamo nami soqnej agi bini unu qaji a qa ninji qalieonub. E deqa anjam endi nenjrenyosim nungoq qarinyonum.

O angro wala, ninji Satan gotranjeyqnu. E deqa anjam endi nenjrenyosim nungoq qarinyonum.

<sup>14</sup> O ijo angro, ninji Abu qa qalieonub. E deqa anjam endi nenjrenyosim nungoq qarinyonum.

O abu ninji quiy. Tamo nami soqnej agi bini unu qaji a qa ninji qalieonub. E deqa anjam endi nenjrenyosim nungoq qarinyonum.

O anġro wala niŋgi quiy. Qotei aqa anjam nuŋgoq di unu deqa niŋgi siŋgila ti sosib Satan gotraŋyeqnu. E deqa anjam endi neŋgreŋyosim nuŋgoq qariniyonum.

*Niŋgi mandam endeqa kumbra qalaqalaiyai*

<sup>15</sup> O ijo was, niŋgi mandam endeqa kumbra qalaqalaiyai. Tamo a mandam endeqa kumbra qalaqalaiyqas di a Abu qalaqalaiyqa keresai. <sup>16</sup> Mandam qaji tamo unġasari naŋgo kumbra agiende. Naŋgi naŋgo segi jejamu qa are prugnjqnaqa ñoro koba oqajqa mamaulnjqnaqa tulaŋ diqoqnsib laqnu. Kumbra di Abu aqaq na bosai. Di mandam endeqa kumbra. <sup>17</sup> Mandam endi koboqas. Mandam endeqa are prugyoqa ti mamaulyoqa ti dego koboqab. Ariya tamo a Qotei aqa areqalo dauryoqnaqas di a gaigai sqas.

*Bini Kristus aqa jeu tamo gargekoba naŋgi branteqnu*

<sup>18</sup> O ijo anġro, diŋo bati jojomqo. Niŋgi nami queb, Kristus aqa jeu tamo kobaquja a bqas. Bini Kristus aqa jeu tamo gargekoba naŋgi branteqnu. Deqa iga qalieonum, diŋo bati jojomqo. <sup>19</sup> Jeu tamo naŋgi di gago ambleq di sosib olo iga uratgosib jaraiyeb. Di kiyaaqa? Naŋgi gago Kristen was bolesai deqa. Naŋgi gago Kristen was bole qamu naŋgi iga koba na unum qamu. Ariya naŋgi iga uratgosib jaraiyeb deqa iga qalieonum, naŋgi gago Kristen was bolesai.

<sup>20</sup> Niŋgi Qotei aqa Mondor Bole ejunub deqa niŋgi kalil powo ti unub. <sup>21</sup> E anjam endi neŋgreŋyosim nuŋgoq qariniyonum. Di kiyaaqa? Niŋgi anjam bole qalieonub deqa. Niŋgi anjam bole qaliesai e deqa are qalsim anjam endi neŋgreŋyosai. Niŋgi qalie, anjam bole ti gisaŋ anjam ti ombla kerekere sai. Anjam bole na gisaŋ anjam bei babtqa keresai. <sup>22</sup> Gisaŋ anjam maro tamo naŋgi tal qabe? E niŋgi merŋwai. Tamo naŋgi di endegsib mareqnu, “Yesus a Kristus sai.” Naŋgi degsib maroqnsib deqa naŋgi Abu Qotei aqa Niri wo qoreiyeqnu. Osib Kristus jeuteqnu. <sup>23</sup> Tamo a Qotei aqa Niri qoreiyqas di a Abu dego qoreiyqas. Tamo a Qotei aqa Niri qa aqa areqalo siŋgilatqas di a Abu qa dego aqa areqalo siŋgilatqas.

*Qotei aqa Mondor na niŋgi anjam bole merŋgeqnu*

<sup>24</sup> Anjam niŋgi nami quoqneq qaji di niŋgi olo siŋgila na ojesoqniy. Ojesqab di niŋgi na Abu Qotei aqa Niri wo beternjsib naŋgi ti sqab. <sup>25</sup> Nami Kristus na iga endegsi mergonaq quem, “E niŋgi ŋambile eŋgitqa niŋgi ŋambile gaigai sqab.”

<sup>26</sup> O ijo was kalil, gisaŋ tamo naŋgi na niŋgi gisaŋwajqa laqnu. E deqa are qalsim anjam endi neŋgreŋyosim nuŋgoq qariniyonum. <sup>27</sup> Niŋgi Kristus aqa Mondor eb agi nuŋgoq di unu deqa niŋgi powo qa truquosaieqnu. Deqa e anjam bei



totoryosiy ningi merngwasai. Mondor a segi na anjam kalil ningi merngeqnaq quoqnsib poingeqnu. Mondor aqa anjam di gisanj sai. Di anjam bole. Deqa ningi Mondor aqa anjam di qusib poingim Kristus beteryosib soqniy.

### *Iga Qotei aqa segi angro tintin unum*

<sup>28</sup> Od, ijo angro kiñilala, ningi Kristus beteryosib soqniy. Ningi degyqab di mondon a olo brantimqa ningi jemaingwasai. Ningi are singilatosib aqa ulatamuq di tigelesqab. <sup>29</sup> Ningi qalie, Kristus aqa kumbra kalil tulan bole. Deqa ningi endegsib qalieoiy, tamo kalil kumbra bole yeqnu qaji nanji Qotei aqa segi angro tintin unub. Nanji olo nambabobulosib Qotei aqa angro branteb.

## 3

<sup>1</sup> Gago Abu Qotei na iga tulan qalaqalaigeqnu. A na iga aqa segi angro sqa marsiq giltgej deqa iga aqa angro tintin unum. Mandam qaji tamo nanji Qotei qa qaliesai. Deqa nanji iga qa dego qaliesai. <sup>2</sup> O ijo was bole, iga Qotei aqa segi angro unum. Ariya mondon iga kiyersim sqom di iga geregere qalieosai unum. Iga qalie, Yesus a olo bamqa iga a unsim iga a bul sqom. <sup>3</sup> Tamo ungasari kalil Yesus bam unqajqa tariheqnu qaji nanji nanjo une olo urateqnu. Deqa nanji Qotei aqa nambalaq di jiga saiqoji unub. Agi Yesus a segi jiga saiqoji unu dego kere.

<sup>4</sup> Une atqajqa kumbra ti dal anjam gotranjyqajqa kumbra ti di ombla kerekere. Deqa tamo ungasari une ateqnu qaji nanji Qotei aqa dal anjam gotranjyqnu. <sup>5</sup> Ningi qalie, Yesus a gago une kobotqa bej. A segi une saiqoji. <sup>6</sup> Tamo bei a Yesus beteryesqas di a une atoqnqasai. Tamo bei a une atoqnqas di iga poigwas, a Yesus unosaieqnu. A Yesus qa qaliesai dego.

<sup>7</sup> O ijo angro kiñilala, ningi geregere nam atoqniy. Tamo bei na bosim ningi gisanjo uge. Ningi quiy. Tamo nanji kumbra bole tintin dauryeqnu qaji nanji tamo bole tintin unub. Yesus a tamo bole tintin unu dego kere. <sup>8</sup> Satan a nami une atoqnsiq boqnej agi bini a degyqnu. Deqa tamo ungasari une ateqnu qaji nanji Satan aqa angro unub. Ariya Qotei aqa Niri a Satan aqa wau kobotqa bej. <sup>9</sup> Tamo bei a olo nambabobulosim Qotei aqa segi angro brantqas di a une atoqnqasai. Aqa are miligiq di Qotei aqa segi nambile unu deqa a une atoqnqa keresai. Di kiyaga? A Qotei aqa segi angro unu deqa. <sup>10</sup> Tamo bei a Qotei aqa angro unu kiyo a Satan aqa angro unu kiyo di iga kiyersi qalieqom? E ubtosiy marqai. Tamo ungasari kumbra bole tintin dauryosaieqnu qaji nanji Qotei aqa angro sai. Tamo ungasari nanjo Kristen was nanji qalaqalainjrosaieqnu qaji nanji dego Qotei aqa angro sai.

*Yesus na iga qalaqalaiyo kumbra osorgej*

<sup>11</sup> O ijo was kalil, iga segi segi qa qalaqalaiyo kumbra yoqñqom. Anjam di ningi nami queb. <sup>12</sup> Deqa iga Kein aqa kumbra dauryqasai. Kein a Satan aqa tamo soqnej. A na aqa was Abel qalnaq moiyej. Kiyaqa a na aqa was qalnaq moiyej? Utru agiende. A kumbra uge yoqnej deqa. Ariya Abel a kumbra bole tintinj yoqnej.

<sup>13</sup> O ijo was, mandam qaji tamo nanji na ningi jeutñgoqñibqa ningi deqa prugosib ulaaib. <sup>14</sup> Iga gago Kristen was nanji qalaqalainjreqnum deqa iga endegsi qalieonum, iga padalqa gam uratosim ñambile gaigai sqajqa gamq di unum. Ariya tamo nanji nanjo Kristen was nanji qalaqalainjrosaieqñub qaji nanji padalqa gamq di unub. <sup>15</sup> Tamo nanji nanjo Kristen was nanji jeutñjreqñub qaji nanji leñ ojo tamo bul unub. Ningi qalie, leñ ojo tamo nanji ñambile gaigai sqa keresai. <sup>16</sup> Yesus a aqa segi ñambile uratosiq iga qa moiyej. Aqa kumbra dena a na iga qalaqalaiyo kumbra osorgej. Deqa iga dego gago segi ñambile uratosim gago Kristen was nanji qa moreñqom. <sup>17</sup> Tamo bei a mandam endeqa inji inji koba koroiyosimqa ariya aqa Kristen was bei inji saiqoji soqñim unsim a aqaryaiyqasai di iga endegsi qalieqom, Qotei aqa qalaqalaiyo kumbra tamo di aqa are miligiq di sosai. <sup>18</sup> O ijo angro kiñilala, ningi quiy. Iga laña anjam maro na Kristen nanji qalaqalainjrqom di keresai. Iga kumbra bole dego turtosim enjroqñqom di kere.

*Iga Qotei aqa ulatamuq di are lawo sqom*

<sup>19-20</sup> Iga tamo ungasari nanji qalaqalainjrqom di iga endegsi qalieqom, iga anjam bole dauryeqnum. Deqa gago une bei na iga are gulbetetgwas di unqum, iga Qotei aqa ulatamuq di are lawo sqom. Qotei aqa qalie kobaquja. Aqa qalie dena gago are tulañ bunyejunu. <sup>21</sup> O ijo was bole, gago une bei na iga are gulbetetgwasai di iga are singilatosim Qotei aqa ulatamuq di tigelesqom. <sup>22</sup> Osim iga inji bei qa Qotei pailimqa a gago pailyo qusim inji di egwas. Di kiyaaqa? Iga aqa dal anjam dauryoqñsim kumbra a areareteqñu qaji di yeqnum deqa. <sup>23</sup> Qotei aqa dal anjam agiende. Iga aqa Niri Yesus Kristus aqa ñam qa gago areqalo singilatosim segi segi qa qalaqalaiyo kumbra yoqñqom. Qotei aqa dal anjam di a na nami iga mergonaq quem. <sup>24</sup> Tamo bei a Qotei aqa dal anjam dauryqas di a Qotei beteryesqas. Qotei a kamba dego tamo di beteryesqas. Qotei na aqa Mondor iga egej deqa iga qalieonum, Qotei a iga betergejunu.

## 4

*Ningi na mondor kalil nanji peginjroqñiy*

<sup>1</sup> Tamo gargekoba nanġi mandamq endi laqnsibqa endegsib mareqnu, “Iga Qotei aqa medabu o qaji tamo bole.” O ijo was bole, nanġo anjam di gisan. Deqa ninġi nanġo anjam di nuġo areqaloq di sinġilataib. Ninġi na mondor kalil nanġi geregere peginjroqnsib dena ninġi qalieqab, nanġi Qotei aqaq na beqnu kiyo sai kiyo. <sup>2</sup> Tamo unġasari Qotei aqa Mondor ti unub qaji nanġi endegsib mareqnu, “Yesus Kristus a tamo bulyosiqa mandamq aiyej.” Dena ninġi qalieqab, tamo unġasari nanġi di Qotei aqaq na beb. <sup>3</sup> Ariya Yesus a tamo bulyosiqa mandamq aiyej anjam di tamo unġasari Qotei aqa Mondor ti sosai qaji nanġi saideqnu. Dena ninġi qalieqab, tamo unġasari nanġi di Qotei aqaq na bosai. Nanġi mondor uge ti unub. Mondor uge di Kristus aqa jeu tamo kobaquja aqa segi mondor. Ninġi nami queb, mondor uge di a bqas. Agi a bosiq mandamq endi laqnu.

<sup>4</sup> O ijo angro kiñilala, ninġi Qotei aqaq na beb. Qotei aqa Mondor a nuġoq di unu deqa ninġi na gisan anjam maro tamo nanġi gotrañjreqnu. Qotei aqa Mondor a na mondor agi mandam tamo nanġoq di unu qaji a tulañ bunyeqnu. <sup>5</sup> Gisan anjam maro tamo nanġi di mandamq endena bran-  
teb deqa nanġi mandam qa segi anjam mareqnu. Mareq-  
nab mandam tamo nanġi nanġo anjam quoqnsib dauryeqnu. <sup>6</sup> Iga Qotei aqaq na bem deqa tamo unġasari Qotei qa qalieonub qaji nanġi gago anjam quetgeqnu. Ariya tamo unġasari Qotei qa qaliesai qaji nanġi gago anjam quetgosaieqnu. Kumbra dena iga anjam bole qa Mondor ti gisan mondor ti nanġi peginjroqnsim nanġi qa poigeqnu.

*Iga Qotei qalaqalaiyom di iga Kristen nanġi dego qalaqalainjqom*

<sup>7</sup> O ijo was bole, Qotei a qalaqalaiyo kumbra qa utru. Deqa iga gago Kristen was nanġi qalaqalainjqom. Tamo kalil qalaqalaiyo kumbra dauryeqnu qaji nanġi olo ñambabobulosib Qotei aqa segi angro tiñtin unub. Deqa nanġi Qotei qa qalieonub. <sup>8</sup> Qotei a segi qalaqalaiyo kumbra qa utru. Deqa tamo bei a qalaqalaiyo kumbra dauryqasai di a Qotei qa qalieqa keresai. <sup>9</sup> Qotei aqa Niri qujai unu. Qotei na a qarinyonaq mandamq aiyej. Deqa iga aqa ñam na ñambile gaigai sqom. Kumbra dena iga osorgej, Qotei na iga qalaqalaigeqnu. <sup>10</sup> Qotei a qalaqalaiyo kumbra qa utru. Deqa iga endegsi are qalqasai, iga namoqna Qotei qalaqalaiyem. Di sai. Qotei a namoqna iga qalaqalaigej. Osiqa aqa Niri qarinyonaq mandamq aisiqa gago une kobotetgosiqa Qotei aqa minjin taqal waiyej.

<sup>11</sup> O ijo was bole, Qotei na iga degsi qalaqalaigeqnu deqa iga kamba dego segi segi qa qalaqalaiyo kumbra yoqnoqom.

<sup>12</sup> Iga nami Qotei aqa ulatamu unosaiognem. Ariya iga segi segi qa qalaqalaiyo kumbra yoqnoqom di Qotei a gagoq di beteresoqnmqqa aqa qalaqalaiyo kumbra di gago are miligiq di tulan kobaoqnsim singilaoqngas.

<sup>13</sup> Iga kiyersim qalieqom, Qotei a gagoq di beteresonaqa iga kamba dego a beteryejunum? E ubtosiy marqai. Qotei na aqa Mondor iga egej dena iga qalieqom. <sup>14</sup> Abu na tamo ungasari kalil mandamq endi unub qaji nanqi elenqa osiq deqa aqa Niri qarinyonaq mandamq aiyej. Aqa kumbra di iga unsim deqa saoqnsim laqnum. <sup>15</sup> Tamo bei a endegsi marqas, “Yesus a Qotei aqa Niri.” Degsi marqas di Qotei na a beteryesqas. Yimqa a dego Qotei beteryesqas. <sup>16</sup> Iga qalieonum, Qotei na iga qalaqalaigeqnu. Qalieosim deqa iga Qotei qa gago areqalo singilateqnum.

Qotei a segi qalaqalaiyo kumbra qa utru. Tamo a qalaqalaiyo kumbra dauryqas di a na Qotei beteryesqas. Yim Qotei a dego tamo di beteryesqas. <sup>17</sup> Beteryesoqnm qalaqalaiyo kumbra gago are miligiq di tulan kobaoqnsim singilaoqngas. Bole, iga mandamq endi unum. Ariya iga Yesus bulosim unum deqa mondon Qotei na iga pegigwa batiamqa iga are singilatosim aqa ulatamuq di tigelesqom. <sup>18</sup> Tamo a qalaqalaiyo kumbra dauryqas di a ulaqasai. Aqa are miligiq di qalaqalaiyo kumbra tulan kobaoqnsiq singilaeqnu deqa ulaqajqa kumbra aqaq di sosai. Ulaqajqa kumbra aqa utru agiende. Tamo bei a are qaleqnu, “Mondon Qotei na e nolawotbosim awai uge ebqas.” A degsi are qaloqnsiq deqa a ulaeqnu. A degsi ulaeqnu deqa iga qalieonum, aqa are miligiq di qalaqalaiyo kumbra singilaosaiunu.

<sup>19</sup> Iga gago Kristen was nanqi qalaqalainjreqnum. Di kiyaya? Qotei a namoqna iga qalaqalaigej deqa. <sup>20</sup> Tamo bei a marqas, “E Qotei qalaqalaiyeqnum.” Degsi marqas ariya a na olo aqa Kristen was nanqi jeutnjreqnu. A na nanqi qalaqalainjrosaieqnu. Deqa tamo di a gisan tamo. A na aqa Kristen was agi nango ulatamu gaigai uneqnu qaji nanqi qalaqalainjrosaieqnu. Deqa iga qalieonum, a Qotei agi aqa ulatamu nami unosaiognej qaji a dego qalaqalaiyqa keresai. <sup>21</sup> Tamo a Qotei qalaqalaiyqas di a aqa Kristen was nanqi dego qalaqalainjreme. Dal anjam di iga Yesus aqaq na em.

## 5

### *Iga mandam endeqa singila gotranjyeqnum*

<sup>1</sup> Yesus a segi Kristus. Tamo nanqi degsib maroqnsib Yesus qa nanjo areqalo singilatqab di nanqi olo nambabobulosib Qotei aqa angro tinjin sqab. Tamo nanqi Abu qalaqalaiyqab di nanqi aqa angro nanqi dego qalaqalainjrqab. <sup>2</sup> Iga Qotei

qalaqalaisyosim aqa dal anjam dauryqom di iga qalieqom, iga Qotei aqa angro nanği dego qalaqalainjreqnum. <sup>3</sup> Qotei qalaqalaisyajqa kumbra agiende. Iga aqa dal anjam dauryqom. Iga aqa dal anjam dauryqajqa di gulbe sai. Di oto. <sup>4</sup> Tamo nanği olo nambabobulosib Qotei aqa segi angro unub qaji nanği mandam endeqa singila gotranjoqnqab. Od, iga Qotei qa gago areqalo singilatqom di iga qoto bunjoqnsim mandam endeqa singila gotranjoqnqom.

### *Qotei na aqa Niri qa anjam babtej*

<sup>5</sup> Tamo kiyero nanği mandam endeqa singila gotranjoqnqab? E ubtosiy marqai. Tamo nanği di mareqnum, “Yesus a Qotei aqa Niri.” Nanği deqsib maroqnsib Yesus qa nanço areqalo singilateqnum deqa nanği segi mandam endeqa singila gotranjoqnqab. <sup>6</sup> Yesus Kristus a bosiqqa ya na yanso ej. Osiqa namburbasq di moinaqa aqa len aiyej. A ya na yanso oqajqa deqa segi bosai. A moiymqa aqa len aiqajqa deqa ti bej. Qotei aqa Mondor a anjam bole qa utru. A Yesus Kristus aqa anjam babteqnu. <sup>7</sup> Tamo qalub nanği Yesus aqa anjam babteqnum. <sup>8</sup> Tamo qalub agiende. Mondor ti ya ti len ti nanği qalub anjam qujaitosib Yesus aqa anjam babteqnum.

<sup>9</sup> Tamo lanaj nanği iga anjam mergwab di iga qusim marqom, bole. Ariya Qotei na aqa segi Niri qa anjam iga mergeqnu. Anjam dena tamo lanaj nanço anjam tulan bunyejunu. <sup>10</sup> Tamo nanği Qotei aqa Niri qa nanço areqalo singilatqab di nanği aqa anjam dego nanço are miligiq di atib sqas. Ariya tamo nanği Qotei aqa anjam deqa nanço areqalo singilatqasai di nanği na Qotei aqa ñam ugetosib Qotei a gisan tamo qa minjobulqab. Di kiyaaqa? Nanği Qotei aqa Niri qa anjam Qotei na iga mergeqnu qaji di nanço areqaloq di singilatqasai deqa. <sup>11</sup> Qotei aqa anjam agiende. A na iga nambile gaigai sqajqa marsiq nambile egej. Nambile di Qotei aqa Niri aqaq di unu. <sup>12</sup> Tamo bei a Qotei aqa Niri beteryesqas di a nambile oqas. Ariya tamo bei a Qotei aqa Niri beteryesqasai di a nambile oqasai.

### *Iga qalieonum, iga nambile gaigai sqom*

<sup>13</sup> O ijo was, ninği Qotei aqa Niri aqa ñam qa nunço areqalo singilateqnum. E na anjam endi nenğrenyosim nunçoq qarinyonum. Di kiyaaqa? Ninği bole qalieqajqa, ninği nambile gaigai sqab. <sup>14</sup> Iga inği bei qa pailyqa osimqa iga Qotei aqa areqalo dauryosim pailyqom di a gago pailyo quqwas. Deqa iga ulaqasai. Iga are singilatqom Qotei aqa ulatamuq di tigelesqom. <sup>15</sup> Iga qalieonum, Qotei a gago pailyo gaigai queqnu. Deqa iga inği bei qa Qotei pailyymqa a na egwas.

<sup>16</sup> Niŋgi na Kristen was bei a une atim unsibqa niŋgi a qa Qotei pailyiy. A moiqajqa une atosai deqa niŋgi a qa pailyibqa Qotei na aqa une kobotim a moiqasai. A ɲambile sqas. Ariya Kristen tamo bei a moiqajqa une atqas di Qotei na a qalim moiqas. Niŋgi a qa pailyqajqa e na merngosai. <sup>17</sup> Kumbra uge kalil tamo naŋgi yeqnub qaji di une. Ariya une qudei qa Qotei na tamo naŋgi moiyoŋjrosaiqnu.

<sup>18</sup> Iga qalie, tamo uŋgasari Qotei aqa segi aŋgro unub qaji naŋgi une atosaiqnu. Qotei aqa Aŋgro Yesus a na naŋgi taqatnjreqnu deqa tamo uge Satan na naŋgi ugeugeinjrqa keresai. <sup>19</sup> Iga qalie, iga Qotei aqa segi aŋgro unum. Mandam qaji tamo uŋgasari kalil naŋgi tamo uge Satan aqa sorgomq di unub. Deqa a na naŋgi siŋgila na taqatnjreqnu.

<sup>20</sup> Iga qalieonum, Qotei aqa Niri a bosiq iga powo egej deqa iga Qotei qa bole qalie. Iga Qotei beteryejunum. Iga aqa Niri Yesus Kristus dego beteryejunum. Yesus a segi Qotei bole. A segi ɲambile gaigai sqajqa utru.

<sup>21</sup> O ijo aŋgro kiñilala, niŋgi gisaŋ qotei kalil naŋgi torei qoreinjsib sasaloiy.

## 2 JON

<sup>1</sup> E Kristen gate. Ni uña Qotei na giltmej qaji. E anjam endi nenngrenyosim ni qa ti ino angro nanngi qa ti qarinyonum. E ningi bole qalaqalaingeqnum. E segi sai. Tamo ungasari kalil anjam bole qalieonub qaji nanngi dego ningi qalaqalaingeqnum. <sup>2</sup> Anjam bole gagoq di unu. Anjam di bati gaigai gagoq di sqas. Utru deqa iga ningi qalaqalaingeqnum. <sup>3</sup> Abu Qotei aqa Niri Yesus Kristus wo nanngi aiyel anjam bole na ti qalaqalaiyo kumbra na ti iga qa dulosib are boleinjrimqa iga lawo na sqom.

### *Ningi segi segi qa qalaqalaiyo kumbra yoqniy*

<sup>4</sup> Ino angro qudei nanngi anjam bole dauryeqnum. E di quoqnsim tulan areboleboleibeqnu. Abu a nami iga mergej, “Ningi anjam bole di dauryiy.” <sup>5</sup> Ariya uña, e anjam bei nenngrenyitqa ni sisiyosim daurye. Anjam agiende. Iga segi segi qa qalaqalaiyo kumbra yoqnoqom. Anjam di dal anjam bunuj sai. Di dal anjam iga nami quoqnem qaji. <sup>6</sup> Qalaqalaiyo kumbra agiende. Iga Qotei aqa dal anjam dauryqom. Dal anjam di agi ningi nami quoqneb. Deqa ningi dauryosib walweloqniy.

### *Ningi Kristus aqa anjam singila na ojesoqniy*

<sup>7</sup> Ningi quiy. Gisanj tamo gargekoba nanngi mandamq endi laqnum. Laqnsibqa Yesus Kristus a tamo bulyosiq mandamq aiyej anjam di nanngi na olo saideqnum. Tamo deqaji bei a Kristus aqa jeu tamo kobaquja. A gisanj ani tamo. <sup>8</sup> Deqa ningi geregere nam atoqniy. Ningi nam atqab di gago wau iga nami nungo ambleq di yoqnem qaji di ningi olo ulontqasai. Ningi singila na tigelesosib mondon awai tulan boledamu oqab. <sup>9</sup> Ningi Kristus aqa anjam ojqa uratosib olo anjam bei totoryosib dauryqab di ningi Qotei ombla sqa keresai. Ningi Kristus aqa anjam singila na ojesqab di ningi Abu Qotei aqa Niri wo nanngi aiyel koba na gaigai sqab. <sup>10</sup> Tamo bei a nungoq bosim ariya a Kristus aqa anjam ti bqasai di ningi a ban ojetaib. Ningi a osib nungo talq osi gilaib dego. <sup>11</sup> Ningi a ban ojetqab di ningi a beteryesosib a ombla wau uge yqab.

### *Jon a Kristen nanngoq bosim anjam kalil minjrekritqas*

<sup>12</sup> E anjam gargekoba nenngrenyosiy nungoq qarinyqa kere. Ariya e nenngrenyqasai. E bosiy ningi nungsiy anjam kalil merngekritqai. Yim ningi qusib areboleboleingwas.

<sup>13</sup> Ino jaja agi Qotei na giltej qaji aqa angro nanngi na ni kaiyeimonub. Bole.

## 3 JON

<sup>1</sup> E Kristen gate. O ijo was bole Gaius, e anjam endi nenngrenyosim inoq qarinyonum. E ni bole qalaqalaimeqnum.

<sup>2</sup> O ijo was bole, e ni qa endegsi pailyeqnum, “O Abu, ni na Gaius aqa wau kalil boletime. Osim a singilatim a ma saiqoji soqneme.” O Gaius, e qalieonum, ino qunun a bole unu. <sup>3</sup> Nami Kristen was qudei nanngi e nubqa bosib merbeb, “Gaius a anjam bole dauryeqnu.” Degsib merbonab e qusim tulan areboleboleibej. Od, Gaius, e qalieonum, ni anjam bole dauryeqnum. <sup>4</sup> Ijo anngro nanngi anjam bole dauryeqnub e di quoqnsim deqa tulan areboleboleibeqnu. Ijo arebolebole dena arebolebole kalil tulan bunyejunu.

### *Gaius na aqa Kristen was nanngi gegerereinjqnu*

<sup>5</sup> O ijo was bole, e qalie, ni kumbra bole dauryoqnsim ino Kristen was nanngi gegerereinjqnum. Osim Kristen was qudei nanngo ulatamu ni qaliesai qaji nanngi qure beiq na beq nabqa nanngi dego ni na gegerereinjqnum. <sup>6</sup> Was nanngi di ino qalaqalaiyo kumbra qa saeq nab Kristen tamo unngasari qure endia unub qaji nanngi queq nub. Deqa ni que. Was nanngi di olo ni uratmosib walwelqa laqnibqa ni na inngi inngi qa nanngi aqaryainjrim nanngi walwelqab. Qotei a ino kumbra deqa tulan arearetoqngas. <sup>7</sup> Was nanngi di Yesus aqa wau oj qajqa are qaloqnsib aqa ñam osib walweleq nub. Nanngi sawa bei bei qaji nanngo ambleq di waueq nub. Nanngo wau dena nanngi silali inngi inngi osaieq nub. <sup>8</sup> Deqa iga tamo deqaji nanngi aqaryainjroqngom. Iga degyqom di iga nanngi koba na wau ojoqnsim anjam bole singilatoqngom.

### *Diotrefes a kumbra uge yeqnu*

<sup>9</sup> Nami e anjam qudei nenngrenyosim Kristen tamo unngasari ino qureq di unub qaji nanngo qarinyem. Ariya Diotrefes a gago anjam quetgosaieqnu. A tulan diqoqnsiqa a na Kristen kalil nanngi bunngjrsim aqa segi ñam soqtqajqa singilaeqnu. <sup>10</sup> Deqa e nunngoq bosiy Diotrefes aqa kumbra qudei qa olo saingwai. Aqa kumbra bei agiende. A iga qa anjam uge uge mareleñeqnu. Di segi sai. Kristen was nanngi walwelosib nunngo qureq beq nab a na nanngi aqa meq joqsi gilqa urateqnu. Yeqnaqa tamo qudei na was nanngi di nanngo meq joqsi gilqa laq nab a na nanngi dego getentnjreqnu. Osiqa nanngi Qotei tal miligiq gilqa saidnjreqnu.

### *Demitrius a kumbra bole yeqnu*



<sup>11</sup> O ijo was bole Gaius, ni kumbra uge dauryaim. Ni kumbra bole segi daurye. Tamo a kumbra bole dauryqas di a Qotei aqa tamo sqas. Ariya tamo nanği kumbra uge uge dauryeqnub qaji nanği Qotei unqa keresai.

<sup>12</sup> Tamo kalil nanği Demetrius a qa mareqnub, aqa kumbra bole. Anjam bole a segi dego tamo sigitosiqa Demetrius aqa kumbra bole qa mareqnu. E segi dego a qa mareqnum, aqa kumbra bole. Ni qalie, ijo anjam a bole.

*Jon a Gaius unqajqa bosim a ombla anjam qairqab*

<sup>13</sup> E anjam gargekoba nenğrenjyosiy inoq qarinyqa kere. Ariya e nenğrenjyqasai. <sup>14</sup> Sokiñala e inoq bosiy ni numsiy aqo ombla anjam marqom.

<sup>15</sup> Ni lawo na soqnime. Kristen was qure endia unub qaji nanği ni qa kaiye anjam qarinyonub. E dego Kristen was kalil ni koba na unub qaji nanği qa kaiye anjam qarinyonum. Ijo kaiye anjam endi ni na nanği minjrime. Bole.

## JUT

<sup>1</sup> E Jut. E Yesus Kristus aqa wau tamo. E Jems aqa was. E anjam endi nenngrenyosim ningi tamo unngasari Qotei na metngej qaji nunngoq qarinyonum. Abu Qotei na ningi qalaqalaingeqnu. Yesus Kristus a segi na ningi taqatngeqnu. <sup>2</sup> Qotei a ningi qa tulan dulosim qalaqalaingimqa ningi geregere lawo na soqniy.

### *Jeu tamo nanngi uliosib Kristen nanngo ambleq aiyeb*

<sup>3</sup> O ijo was bole, Qotei na ningi e ti padalo sawaq na elenjej. Qotei aqa wau deqa e na nenngrenyosiy nunngoq qarinyqajqa are koba unu. Ariya e anjam bei dego nenngrenyosiy nunngoq qarinyqajqa are unu. Anjam agiende. Gago areqalo Yesus qa singilattem qaji di jeu tamo nanngi na ugeugeiyqa laqnu. Deqa ningi na tamo nanngi di gotranjnroqniy. Ningi qalie, Qotei na gam waqtetgonaga iga Yesus qa gago areqalo singilattem. Iga Qotei aqa tamo unngasari unum deqa tamo bei na gago areqalo di ugeugeiyqa keresai. <sup>4</sup> O ijo was, tamo qudei nanngi uliosib nunngo ambleq aiyeb. Qotei a nami tamo nanngi deqa endegsi marej, “Mondon e nanngo une qa peginjrsiy padaltnjrqi.” Od, tamo nanngi di Qotei qoreiyeqnu. Qotei a iga qa are boleiyeqnu aqa kumbra di tamo nanngi dena olo bubulyoqnsib mareqnu, “Qotei a iga qa are boleiyeqnu deqa unngum, iga kumbra uge uge yoqnqom.” Nanngi degsib maroqnsib gago Gate Koba Yesus Kristus qoreiyeqnu.

<sup>5</sup> Ningi qalie, nami Israel nanngi Isip sawaq di sonabqa Tamo Koba a nanngi joqsiq sawa beiq gilej. Joqsiq gilsiq ariya nanngi qudei a qa nanngo areqalo singilatotsai deqa a na nanngi padaltnjrej. E nunngo are tigeltetngitqa ningi Israel nanngo kumbra deqa are qaliy. <sup>6</sup> Ningi lan angro uge uge nanngi qa dego are qaliy. Tulan nami nanngi lan qureq di Qotei aqa wau ojoqnsib olo lan qure uratosib jaraiyeb. Deqa Qotei na nanngi ojelenosiq sawa ambruq di breinjrsiq tontnrej. Nanngi sawa dia tarijsokobaiyib mondon dijo batiamqa Qotei na nanngi olo osimqa nanngo une qa nanngi peginjrqa. <sup>7</sup> Nami Sodom ti Gomora ti qure kalil jom di soqneb qaji nanngi ti lan angro uge uge nanngo kumbra di dauryoqnsib sambala kumbra tulan ugedamu yoqneb. Nanngo sambala kumbra di tulan bei. Deqa mondon Qotei na nanngi nanyuwoq di breinjrim nanngi bati gaigai dia sqab.

Qotei na nanngi degsim padaltnjrqa deqa iga ulaoqnsim nanngo kumbra uge di dauryqa uratqom. <sup>8</sup> Ariya tamo nanngi nunngo ambleq aiyeb qaji nanngi dego kumbra uge deqaji

dauryeqnub. Agi nan̄gi ɲeiobilqeiqnsib dena nan̄go segi jeku jamu jiga yeqnub. Osib Qotei a nan̄go Tamo Koba sqajqa deqa asginjreqnaqa olo diqoqnsib Qotei aqa lan̄ an̄gro kokba nan̄gi misilin̄jreqnub. <sup>9</sup> Lan̄ an̄gro gate Maikel a kumbra degyosaieqnu. A nami Satan ombla ɲirin̄osib nan̄gi Moses aqa qusa oqajqa deqa anjam na qotoqnsib ariya Maikel a Satan misilin̄yosai. A Satan misilin̄yqa uratosiq min̄jej, “Tamo Koba a segi na ni saidmim medabu getentqam.” <sup>10</sup> Tamo nan̄gi nun̄go ambleq aiyeb qaji nan̄gi di tulan̄ diqoqnsib kumbra nan̄gi poin̄rosai qaji di olo misilin̄yreqnub. Nan̄gi wagme juwan̄ bul tulan̄ nanarioqnsib nan̄go segi jeku jamu qa areboleboleinjreqnu. Nan̄go kumbra deqa mondon̄ Qotei na nan̄gi ɲumougetqas. <sup>11</sup> Od, tamo nan̄gi di tulan̄ padalougetqab. Kein a nami kumbra uge yoqnej dego kere tamo nan̄gi di Kein dauryosib kumbra uge yeqnub. Nan̄gi silali koba oqajqa deqa maroqnsib gam grotognsib Balam aqa kumbra uge dauryosib laqnub. Kora agi nami Qotei aqa anjam gotran̄yoqnej qaji aqa kumbra uge dego nan̄gi dauryeqnub. Deqa nan̄gi padalougetqab.

<sup>12</sup> Tamo nan̄gi di tulan̄ ugedamu. Nin̄gi in̄gi uyqa ko-rooqnsibqa Qotei aqa qalaqalaiyo kumbra dauryqa oqnsib awoeqnab tamo nan̄gi di uli na boqnsib nun̄go ambleq di kumbra tulan̄ jigat yeqnub. Nan̄gi kumbra di yqajqa jemain̄rosiaieqnu. Nan̄gi nan̄go segi jeku jamu qa are qaleqnub. Jagwa na awa puyeqnaqa urur koboeqnu dego kere tamo nan̄gi di kumbra bole bei babtosaieqnu. Qura geitqa batieqnaqa a geitosaieqnu dego kere tamo nan̄gi di kumbra bole bei babtosaieqnu. Iga ɲamtan̄ moiyo otoroqnsim taqal breinjreqnum dego kere tamo nan̄gi di Qotei na osim sawa ugeq di breinjrqas. Deqa mondon̄ nan̄gi moiyougetosib torei padalqab. <sup>13</sup> Jagwa na yuwal tigelteqnaqa yuwal korkortoqnsiq morman̄ aiyeqnu dego kere tamo nan̄gi di kumbra uge uge babtelen̄oqnsib nan̄gi nan̄go kumbra uge deqa jemain̄rosiaieqnu. Nan̄gi bongar bul dego unub. Agi bongar nan̄gi lan̄ goge di gam grotognsib lan̄a lan̄a laqnub. Deqa mondon̄ Qotei na tamo nan̄gi di breinjrim sawa ambruq aiyelen̄osib bati gaigai dia sqab. Sawa ambru di Qotei na nami nan̄gi gereiyetn̄rej unu.

<sup>14</sup> Nami Enok a Qotei aqa medabu osiqa tamo uge nan̄gi deqa anjam maroqnej. A Adam aqa silei 7q dena ɲambabej. A anjam bei endegsi marej, “Nin̄gi uniy. Mondon̄ Tamo Koba a na aqa segi lan̄ an̄gro tulan̄ gargekoba nan̄gi joqsim bqas. <sup>15</sup> Bosim tamo kalil a qoreiyeqnub qaji nan̄go une qa peginjrsim ugeugeinjrqas. Osim nan̄go kumbra uge uge kalil nan̄gi osorn̄jrimqa nan̄gi deqa are koba qalsib gulbe kokba

oqab. Tamo nanği di Qotei qa misiliñ anjam koba maroqnsib kumbra ugedamu yeqnub. Deqa Qotei na nanği gulbe tulañ kokba enjrças.” Enok a nami anjam degsi marej. <sup>16</sup> Tamo nanği di gaigai ulatamu ugeinjreçnaqa tamo nanço jejamuq di anjam laña laña çamelençoqnsib nanço segi areqalo uge uge dauryeqnub. Nanği nanço medabu waqtoqnsib diçoqnsib nanço segi ñam soqteqnub. Osib tamo unçasari nanği walawalainjreçnab nanği na nanği daurnjreçnub.

*Nunço areqalo Qotei qa sinçilateqnub çaji di ninçi ojesoçniy*

<sup>17</sup> Ariya ijo was bole, ninçi kumbra mondoñ brantças çaji deqa are çaloçniy. Gago Tamo Koba Yesus Kristus a na aqa anjam maro tamo nanği çariñjreçnaqa nunçoq boçnsib kumbra deqa merñçoqneb. Nanço anjam deqa ninçi olo are çaloçniy. <sup>18</sup> Açi nanği anjam endegsib merñçoqneb, “Mondoñ diño bati jojomamça meçe meçem tamo nanği boçnsib Qotei çoreiyoçnsib nanço segi areqalo uge uge dauryoçnqab.” <sup>19</sup> O ijo was kalil, meçe meçem tamo nanği dena Kristen nanği potoaiyeltnjreçnub. Osib mandam qa inçi inçi qa are koba çaleqnub. Qotei aqa Mondor a nançoq di sosai deqa nanği kumbra uge di yeqnub.

<sup>20</sup> Ariya ijo was bole, nunço areqalo Qotei qa sinçilateqnub çaji di ninçi ojesosibça dena ninçi tulañ sinçilaqab. Osib ninçi Mondor Bole aqa sinçila na pailyoçniy. <sup>21</sup> Qotei a ninçi çalaçalainçeçnu deqa ninçi a beteryesoçniy. Yimça a gaigai ninçi çalaçalainçoqnaças. Ninçi gago Tamo Koba Yesus Kristus a iga qa dulçajça tariñoçniy. Ninçi degyçab di ninçi ñambile gaigai sçab. <sup>22</sup> Tamo çudei Yesus qa nanço areqalo sinçilateqnub çaji nanço areqalo olo gulbeinjreçnu. Deqa ninçi nanği qa duloçniy. <sup>23</sup> Tamo çudei nanği une ti unub deqa nanği ñamyuwoq aiça laçnub. Deqa ninçi nanği urur minjribça nanği nanço une uratosib are bulyçab. Osib deqa nanği ñamyuwoq aiçasai. Qotei na nanği elenças. Tamo çudei nanği nanço areqalo namij dauryeqnub deqa nanği gara sari bulosib tulañ jiga ti unub. Deqa ninçi nanği qa olo duloçnsib nanço une qa ulaosib kumbra jigat deçaji kalil uratosib sasaloiy.

*Iga Qotei aqa ñam soqtoçnqom*

<sup>24</sup> O ijo was kalil, Qotei na ninçi taçatnçimça ninçi ulonçasai. Mondoñ a na ninçi joçsim lañ çureq osi oçimça ninçi aça rianç unsib une saiçoji sçab. Bati deqa ninçi tulañ areboleboleinçim sçab. <sup>25</sup> Qotei a segi çujai Qotei bole. A gago Tamo Koba Yesus Kristus aqa wau na iga elençe. Deqa iga aqa ñam soqtoçnqom. A gago Mandor Koba sinçila ti unu çaji. A na

inji inji kalil taqatejunu. A nami degsi soqnej. A bini degsi unu. A bati gaigai degsi sqas. Bole.

## ULI ANJAM KRISTUS NA BABTEJ QAJI

<sup>1-3</sup> Nami anjam endi uliesonaqa Yesus Kristus na babtej. Qotei na anjam endi Yesus minjnaqa a babtej. E Jon. E Yesus aqa wau tamo. E Qotei aqa medabu osim anjam endi nenngrenjyonum. Kumbra kalil e unem qaji di e ubtosim buk endia nenngrenjyonum. Osim Qotei aqa anjam ti Yesus Kristus aqa anjam ti bole qa marsim palontonum. Tamo a Qotei aqa anjam endi sisiyqas di a tulan areboleboleiyqas. Tamo ungasari anjam endi quoqnsib dauryeqnub qaji nanği dego tulan areboleboleinjrqas. Kumbra kalil e ubtosim buk endia nenngrenjyonum qaji di brantqajqa bati jojomqo. Kumbra di urur brantqas deqa Yesus na aqa wau tamo nanği osornjrej. A gam endena nanği osornjrej. A na aqa lan anğro qarinjyonaqa ijoq bosiqqa anjam endi e merbej. Merbej deqa agi e nenngrenjyonum.

*Jon a anjam endi Kristen tamo ungasari  
qure 7 di unub qaji nanğoq qarinjyej*

<sup>4</sup> E Jon. E anjam endi nenngrenjyosim ninği tamo ungasari qure 7 di unub qaji nanğoq qarinjyonum. Ninği Yesus aqa ñam qa koroeqnub qaji. Ninği Esia sawaq di unub. Qotei bini unu, nami soqnej, bunuqna bqas qaji a ninği qa are boleiyimqa ninği lawo na soqniy. Mondor 7 Qotei aqa awo jaram koba namoq di unub qaji nanği dego ninği qa are boleinjrimqa ninği lawo na soqniy. <sup>5</sup> Yesus Kristus a Qotei aqa anjam kalil geregere palonteqnu. A tamo kalil nanği qa namoosiq subq na tigelej. A mandor kokba kalil mandamq endi unub qaji nanğo Tamo Koba. A dego ninği qa are boleiyimqa ninği lawo na soqniy.

Yesus a iga qalaqalaigeqnu. A moisiqa aqa len aiyej dena a na gago une kalil kobotetgej. <sup>6</sup> Iga aqa Abu Qotei aqa atra tamo sqajqa deqa ti iga a ombla mandor kokba sqajqa deqa ti marsiq iga giltgej. Yesus Kristus a bati gaigai ñam koba ti singila koba ti sqas. Bole.

<sup>7</sup> Ninği uniy. Yesus a lanbi ambleq na boqnimqa tamo kalil nanği a unqab. Tamo kalil nami a qaja na qameb qaji nanği dego a unqab. Tamo ungasari kalil mandamq endi unub qaji nanği a qa are ugeinjrimqa tulan akamugetqab. Od, kumbra di brantqas. Bole.

<sup>8</sup> Tamo Koba Qotei singila koba ti unu qaji a marej, “E segi qujai namoq di unum. E segi qujai bunuq di sqai.” Di bole. Qotei a segi qujai nami soqnej. A bini unu. A bunuqna bqas.

*Jon a Kristus unej*

<sup>9</sup> E nungo was Jon. Iga kalil koba na Yesus aqa tamo ungasari unum. E nangi ti gulbe qoboiyoqnsim jaqatin eleneqnum. Qotei a gago Mandor Koba sosisq iga taqatgeqnu. Deqa iga singila na tigelocqnsimqa gulbe qoboiyejunum. E Qotei aqa anjam ti Yesus aqa anjam ti palontocqnsim laqnem deqa jeu tamo nangi na e taqal waibosib nui ñam Patmos endia e ateb unum. <sup>10</sup> E Patmos nui endi sonamqa Tamo Koba aqa bati brantej. Bati brantonaqa Qotei aqa Mondor Bole na e singilatbonaqa ijo qoreq di tamo bei lelenonaqa e aqa kakro quem. A tulan lelenkobaej. Gul anjameqnu dego kere. <sup>11</sup> Lelenosisq merbej, “Kumbra kalil ni unqam qaji deqa anjam nenngrenye. Nenngrenyosim qarinyimqa tamo ungasari qure 7 dia Yesus aqa ñam qa koroeqnu qaji nanqoq gilem. Tamo ungasari nangi di agi Efesus qureq di, Smerna qureq di, Pergamum qureq di, Taiataira qureq di, Sardis qureq di, Filadelfia qureq di, Laodisia qureq di Yesus aqa ñam qa koroeqnu.”

<sup>12</sup> Onaqa e tamo anjam merbej qaji di unqajqa bulosim nam atsimqa lam 7 gol na gereiyo qaji di sonab unjrem. <sup>13</sup> Lam nanqo ambleq di tamo bei sonaq e unem. Tamo di a Tamo Angro bul. A gara olekoba jugnaq aisiq singa kabutej. Aqa are targaq di alalag gol na gereiyo qaji dena kainyej. <sup>14</sup> Aqa gate ti gate banqa ti lanbi bul tulan qat soqnej. Aqa namdamu nam pulon bul pulonqnej. <sup>15</sup> Aqa singa minjaloqnej. Bras namyuwo na koiteqna minjaleqnu dego kere. E aqa kakro quem di ya kobaquja meli dosiq anjam ateqnu dego kere. <sup>16</sup> Aqa ban wo na bongar 7 ojelenesoqnej. Aqa medabuq na serie olekoba tulan qala uge qala aiyel brantej. Aqa ulatamu sen bul tulan suwanjoqnej.

<sup>17</sup> E tamo di unsimqa tulan ulaugetosim nam ambruibonaqa e aqa singa jojomoq di ulonosim moyobulem. Onaqa a na aqa ban wo ijo gateq di atsiqa merbej, “Ni ulaaim. E segi qujai namoq di unum. E segi qujai bunuq di sqai. <sup>18</sup> E nambile gaigai sqajqa utru. Nami e moyiem. Bini ni e nube. E olo nambile unum. E bati gaigai nambile sqai. E segi na moyio ti moyio qure ti taqatejunum. <sup>19</sup> Deqa kumbra ni unonum qaji deqa nenngrenye. Kumbra bini unu qaji ti kumbra bunuqna brantelenqas qaji deqa ti nenngrenye. <sup>20</sup> Bongar 7 ijo ban woq di unub qaji nangi ti lam 7 gol na gereiyo qaji nangi ti di ni unjronum. Di anjam ulito qaji. Aqa utru mermqai. Bongar 7 dena tamo ungasari qure 7 dia e qa koroeqnu qaji nanqo lan angro 7 nangi sigitnjrejunub. Lam 7 dena tamo ungasari qure 7 dia e qa koroeqnu qaji nangi sigitnjrejunub.”

## 2

*Jon a Efesus qure nanqoq anjam qarinyej*

<sup>1</sup> Yesus na e degsi merbsiqa olo merbej, “Efesus qureq di tamo ungasari ijo ñam qa koroeqñub qaji nanjo lan angro qa anjam endegsi nenngrenye, ‘E ijo ban wo na bongar 7 ojejunum. E lam 7 gol na gereiyo qaji nanjo ambleq di walweleqñum. E na anjam endi inoq qarinyonum. <sup>2</sup> Ino kumbra ti ino wau ti di e qalieonum. E qalie, ni singila na tigeloqñsimqa tamo uge nanji qa tulan asgimeqñu. Tamo nanji di endegsib mermeqñub, “Iga Qotei aqa anjam marqajqa qaringej qaji tamo.” Di gisanj. Qotei na nanji qarinjrosai. Ni nanjo anjam di tenemtosis endegsi poimqo, nanji gisanj tamo. <sup>3</sup> Ni ijo ñam ojejunum deqa tamo qudei na ni ugeugeimeqñub. E qalieonum, ni singila na tigeloqñsimqa gulbe di qoboiyeqñum. Ni asgimosaiqñu.

<sup>4</sup> “Ariya ino kumbra uge qujai e ubtosiy mermqai. Nami ni e qa ino areqalo singilatqa utru atsim bati deqa ni na e tulan qalaqalaiboqñem. Bini ni degsim e qalaqalaibosaieqñum. <sup>5</sup> Nami ni kumbra bole dauryoqñem. Bini ni kumbra di uratosim ni ulononum. Deqa ni que. Kumbra ni nami yoqñem qaji deqa olo are qalsimqa are bulyosim kumbra di daurye. Ni dauryqasai di e inoq bosiy ino lam olo taqal atetmqai. <sup>6</sup> Ariya ino kumbra bole bei agi ubtosiy mermqai. Nikolas aqa wau tamo nanji kumbra uge uge yeqñub. Nanjo kumbra di ni tulan urateqñum. Keretosim urateqñum. E dego urateqñum.

<sup>7</sup> “Tamo a dabkala ti sqas di a Qotei aqa Mondor aqa anjam geregere quem. Anjam di Mondor na tamo ungasari qure qure kalilq di ijo ñam qa koroeqñub qaji nanji minjreñu. Tamo a Satan ombla qotsim singilaqas di e na lan qure qa ñam gei osiy anaiyit a uysim dena ñambile gaigai sqas. Ñam di Qotei aqa lan qureq di unu.’ O Jon, ni anjam degsi nenngrenyosim Efesus nanjo lan angro aqaq qarinye.”

### *Jon a Smerna qure nanjoq anjam qarinye*

<sup>8</sup> Yesus na e degsi merbsiqa olo merbej, “Smerna qureq di tamo ungasari ijo ñam qa koroeqñub qaji nanjo lan angro qa anjam endegsi nenngrenye, ‘E segi qujai namoq di unum. E segi qujai bunuq di sqai. Nami e moyem. Bini e olo ñambile unum. E na anjam endi inoq qarinyonum. <sup>9</sup> Ni gulbe ti jaqatinj ti ejunum di e qalie. Ni inji tulan saiqoji unum di dego e qalie. Ariya ni lan qure qa inji inji koba elenjejunum. E qalie, tamo qudei na ni misilinjmoqñsib anjam uge uge mermeqñub. Nanji segi qa mareqñub, “Iga Juda tamo.” Di gisanj. Nanji Satan aqa angro. <sup>10</sup> Bunuqna ni jaqatinj koba oqñqam. Ni deqa ulaaim. Ni que. Satan na ninji qudei ojelenosim tonto talq di breingwas. Ninji ijo ñam geregere ojgab kiyoi sai kiyoi di Satan a qalieqajqa deqa ninji tonto talq di breingwas. Ninji bati 10 gulbe ti jaqatinj ti sqab. Bati deqa ninji e qa nunjo



areqalo singilatosib soqniy. Soqni b jeu tamo nanġi na ninġi luġib morenqab. Amqa e ninġi awai boledamu enġwai. Awai agiende. Ninġi nġambile gaigai sqab.

11 “Tamo a dabkala ti sqas di a Qotei aqa Mondor aqa anjam gegerere quem. Anjam di Mondor na tamo unġasari qure qure kalilq di ijo nġam qa koroeqnu b qaji nanġi minjreqnu. Tamo a Satan ombla qotsim singilaqas di a moiyo bunu qaji turqasai. Moiyo dena a ugetqa keresai. Sai bole sai.’ O Jon, ni anjam degsi nenġrenjyosim Smerna nanġo lan anġro aqaq qarinjye.”

*Jon a Pergamum qure nanġoq anjam qarinjyej*

12 Yesus na e degsi merbsiqa olo merbej, “Pergamum qureq di tamo unġasari ijo nġam qa koroeqnu b qaji nanġo lan anġro qa anjam endegsi nenġrenjye, ‘E serie olekoba tulan qala uge qala aiyel ojejunum. E na anjam endi inoq qarinjyonum. 13 E qalie, qure ni unum qaji di Satan na taqatejunu. Aqa awo jaram koba qure dia unu. Ariya e qalie, ni ijo nġam singila na ojesosimqa e qa ino areqalo singilateqnum. Ino areqalo di ni na ulitosaieqnum. Nami ijo anjam palonto tamo Antipas a nunġo ambleq di wauoqnej. Antipas a ijo anjam gegerere dauryoqnej deqa jeu tamo nanġi na a qalnab moiyej. Moinaqa ni di unsimqa ni deqa ulaosai. Osim e qoreibosai. Qure dia Satan a unu.

14 “Ariya ino kumbra uge qudei e ubtosiy mermqai. Tamo qudei Pergamum qureq di unub qaji nanġi Balam aqa kumbra uge singila na ojesonab ni na nanġi saidnjrosaeqnum. Balam aqa kumbra uge agiende. Nami a na Balak gam osoryonaqa gilsiqqa Israel nanġi gisa gisanjnroqnsiqqa kumbra ugeq breinjroqnej. Breinjroqnsiqqa areqalo tigeltetnjreqnaqa nanġi gisan qotei atrainjro qaji inġi uyoqnsib sambala kumbra yoqnsib laqneb. 15 Tamo qudei dego Pergamum qureq di unub qaji nanġi Nikolas aqa wau tamo nanġo anjam dauryeqnu b. 16 Deqa ni are bulye. Ni are bulyqasai di e urur inoq bosiy serie olekoba ijo medabuq di unu qaji dena tamo nanġi di qoto itnjrqai.

17 “Tamo a dabkala ti sqas di a Qotei aqa Mondor aqa anjam gegerere quem. Anjam di Mondor na tamo unġasari qure qure kalilq di ijo nġam qa koroeqnu b qaji nanġi minjreqnu. Tamo a Satan ombla qotsim singilaqas di e na lan qure qa inġi uliejunu qaji di anaiyit uyqas. Meni n qat dego yqai. Osiy meni n quraq di nġam bunuj nenġrenjyqai. Nġam di tamo bei a qalieqasai. Tamo meni n oqas qaji a segi nġam di qalieqas.’ O Jon, ni anjam degsi nenġrenjyosim Pergamum nanġo lan anġro aqaq qarinjye.”

*Jon a Taiataira qure nanjoq anjam qarinye*

<sup>18</sup> Yesus na e degsi merbsiqa olo merbej, “Taiataira qureq di tamo ungasari ijo ñam qa koroeqñub qaji nanjo lan angro qa anjam endegsi nengrenye, ‘E Qotei aqa Niri. Ijo ñamdamu ñam pulon bul puloneqnu. Ijo singa minjaleqnu. Bras geregere ñomyeqñab minjaleqnu dego kere. E na anjam endi inoq qarinyonum. <sup>19</sup> Kumbra bole kalil ni yeqnum qaji di e qalieonum. E qalie, ni qalaqalaiyo kumbra dauryoqñsim e qa ino areqalo singilatoqñsim wau bole bole yeqnum. Osim gulbe kalil inoq di branteqnu qaji di geregere qoboioqñsim singila na tigelejunum. Kumbra ni nami yoqñem qaji di bolequja. Ariya kumbra ni bini yeqnum qaji di olo tulan boledamu. Di e qalie.

<sup>20</sup> “ ‘Ariya ino kumbra uge qujai agi ubtosiy mermqai. Uña Jesebel a ni ombla sosisq waueqnaqa ni na a wiyosaieqnum. A segi qa mareqnu, “E Qotei aqa medabu o qaji uña.” Di sai. A na ijo wau tamo nanji gisa gisañjroqñsiqa gam osornjreqnaqa nanji sambala kumbra yoqñsibqa gisañ qotei atrainjro qaji inji uyeqñub. <sup>21</sup> A are bulyqajqa e bati yem di a are bulyosim aqa sambala kumbra uratqajqa saidej. <sup>22</sup> Deqa ni que. E na uña di jaqatinj koba yitqa a makobaiyqas. Tamo nanji a ombla sambalaoqñsib laqñub qaji nanji dego jaqatinj ti gulbe koba ti enjrqai. Nanji aqa kumbra uge uge uratosib are bulyqasai di e nanji degnjrqai. <sup>23</sup> Aqa angro nanji dego ñumit moreñqab. Amqa tamo ungasari qure qure kalilq di ijo ñam qa koroeqñub qaji nanji qalieqñab, e tamo kalil nanjo are miligi ti areqalo ti geregere unoqñsim peleiyeqnum. Deqa ninji quiy. E nunjo kumbra segi segi keretosiy awai enjwai.

<sup>24</sup> “ ‘Ariya ninji qudei Taiataira qureq di unub qaji nunjo kumbra bole agi ubtosiy mernjwai. Ninji Jesebel aqa anjam dauryosaieqñub. Tamo nanji mareqñub, “Di Satan aqa uli anjam.” Anjam di ninji qaliesai. Deqa e ninji gulbe bei enjwasai. <sup>25</sup> Kumbra bole kalil ninji ojejunub qaji di singila na ojesoqñib e bqai.

<sup>26</sup> “ ‘Tamo a Satan ombla qotsim singilaosim ijo kumbra dauryosim gilsim gilsim diño bati itqas di e singila yitqa a na tamo ungasari sawa sawa kalilq di unub qaji nanji taqatñjroqñqas. <sup>27</sup> A na nanji tulan singila na taqatñjroqñqas. Tamo nanji web paraparainjreqñub dego kere. E na tamo di singila yitqa a wau di yqas. Ijo Abu na e singila ebej dego kere a singila yqai. <sup>28</sup> Nebeqa burbas bunuj oqeqnu qaji di dego a yqai. <sup>29</sup> Tamo a dabkala ti sqas di a Qotei aqa Mondor aqa anjam geregere quem. Anjam di Mondor na tamo ungasari qure qure kalilq di ijo ñam qa koroeqñub qaji nanji minjreqnu.’ O Jon, ni anjam degsi nengrenyosim Taiataira nanjo lan angro aqaq qarinye.”

### 3

#### *Jon a Sardis qure nanngoq anjam qarinyej*

<sup>1</sup> Yesus na e degsi merbsiqa olo merbej, “Sardis qureq di tamo ungasari ijo ñam qa koroeqñub qaji nanngo lan angro qa anjam endegsi nenğrenye, ‘E Qotei aqa Mondor 7 ejunum. E bongar 7 dego ojejunum. E na anjam endi inoq qarinyonum. Kumbra ni yeqnum qaji di e qalieonum. Ino kumbra di bolesai. Nanği ni qa mareqñub, “Ni ñambile unum.” Di sai. Ni moiymem. <sup>2</sup> Deqa ni ñam sirosim olo tigel. Ino kumbra bole qudei moiyoşaiunu qaji di ni na olo şingilat. E ino kumbra kalil unonum di ijo Qotei aqa ñamgalaq di keresai. <sup>3</sup> Anjam bole ni nami qusim dauryem qaji deqa olo are qale. Are qalsim anjam di geregere dauryosim are bulye. Ni ñam sirosim tigelqasai di e bajın tamo bul inoq boqujatqai. Bati gembu e inoq bqai di ni qalieqa keresai.

<sup>4</sup> “‘Ariya tamo ungasari qudei Sardis qureq di unub qaji nanngo kumbra bolequja. Nanngo gara jigatosai deqa nanği gara qat jıgsib e ombla walweloqñqab.

<sup>5</sup> “‘Tamo a Satan ombla qotsim şingilaqas di e na gara qat jıgetqai. Aqa ñam ñambile qa buk miligiq di unu qaji di e na olo nuntqasai. Aqa ñam di e na ijo Abu ti aqa lan angro nanği ti nanngo ulatamuq di ubtqai. <sup>6</sup> Tamo a dabkala ti sqas di a Qotei aqa Mondor aqa anjam geregere quem. Anjam di Mondor na tamo ungasari qure qure kalilq di ijo ñam qa koroeqñub qaji nanği minjreçnu.’ O Jon, ni anjam degsi nenğrenyosim Sardis nanngo lan angro aqaq qarinye.”

#### *Jon a Filadelfia qure nanngoq anjam qarinyej*

<sup>7</sup> Yesus na e degsi merbsiqa olo merbej, “Filadelfia qureq di tamo ungasari ijo ñam qa koroeqñub qaji nanngo lan angro qa anjam endegsi nenğrenye, ‘E Qotei aqa tamo bole une şaiçoji unum. E kumbra bole qa utru. Devit a nami mandor koba soqnej dego kere e kamba Mandor Koba unum. Deqa e şırañ waqtqai di tamo bei na getentqa keresai. E getentqai di tamo bei na olo waqtqa keresai. E na anjam endi inoq qarinyonum. <sup>8</sup> Kumbra bole kalil ni yeqnum qaji di e qalieonum. Deqa ni unime. Ino ulatamuq di e şırañ bei waqtetmonum. Di tamo bei na getentqa keresai. E qalie, şingila kiñala inoq di unu. Ni ijo anjam geregere ojoqnsim dauryeqnum. Ni ijo ñam uratoşaeqnum. <sup>9</sup> Deqa ni que. E na maritqa Satan aqa wau tamo nanği bosib ino şingaq di şinga pulutosib endegsib qalieqab, e ni qalaqalameqnum. Nanği segi qa mareqñub, “Iga Juda tamo.” Di gisañ. Nanği Juda tamo sai. <sup>10</sup> Ni ijo anjam dauryoqnsim gulbe qoboıyejunum deqa e ni taqatmesoqñitqa Satan na tamo ungasari kalil nanği uneq breinjraq batiamqa

a ni uneq breimqasai. <sup>11</sup> E inoq boqujatqai. Deqa anjam ni ojejunum qaji di singila na ojesoqne. Amqa tamo bei na ino awai bole yaimqasai.

<sup>12</sup> “Tamo a Satan ombla qotsim singilaqas di e na a osiy ijo Qotei aqa tal ai bul namoq di tigeltit sqas. Deqa a olo bunu Qotei aqa talq dena oqedqasai. Aqa jejamuq di e na ijo Qotei aqa ñam ti ijo Qotei aqa qure koba agi Jerusalem bunuj aqa ñam ti ijo segi ñam bunuj ti nenngrenyqai. Jerusalem bunuj agi lan goge di unu. Qure di ijo Qotei aqaq dena mandamq aiqas. <sup>13</sup> Tamo a dabkala ti sqas di a Qotei aqa Mondor aqa anjam geregere quem. Anjam di Mondor na tamo ungasari qure qure kalilq di ijo ñam qa koroeqnub qaji nanqi minjreqnu.’ O Jon, ni anjam degsi nenngrenyosim Filadelfia nanqo lan angro aqaq qarinye.”

*Jon a Laodisia qure nanqoq anjam qarinyej*

<sup>14</sup> Yesus na e degsi merbsiqa olo merbej, “Laodisia qureq di tamo ungasari ijo ñam qa koroeqnub qaji nanqo lan angro qa anjam endegsi nenngrenye, ‘Ijo ñam Anjam Bole. E Qotei aqa anjam kalil geregere palonteqnum. Ingi ingi kalil Qotei na gereiyej qaji di aqa utru agi e segi. E na anjam endi inoq qarinyonum. <sup>15</sup> Kumbra kalil ni yeqnum qaji di e qalieonum. E qalie, ni ulili sai. Ni kanqan sai. Ni ulili sqam di kere. Ni kanqan sqam di kere. <sup>16</sup> Ni tulan kanqan sai. Ni tulan ulili sai. Ni kanqan kiñala segi. Deqa e ni ingi qusa bul ijo miligiq na oqsim ijo medabuq na beqmqai. <sup>17</sup> Ni ino segi ñam soqtoqnsim mareqnum, “E silali koba ti unum. E ñoro koba ejunum. E ingi bei qa truquosaieqnum.” Di ni gisanonum. Ni ingi ingi tulan saiqoji. Ni sougetejunum. Ni ñam qandimo unum. Ni yosi laqnum. Di ni segi poimosai. <sup>18</sup> Deqa e ni endegsi mermqai. Ni ijoq dena gol ñamyuwo na yusiq milalej qaji di awaiyosim dena ni ñoro bole ti sqam. Ni gara qat dego awaiyosim jugwam dena ino jejamu kabutim tamo bei na ino yosi unqasai. Amqa ni jemaimqasai. Ni goren dego awaiyosim dena ino ñamdamu piyim ñam poimqas. <sup>19</sup> Tamo nanqi e qalaqalainjreqnum qaji di e na olo ñirinjnroqnsim dalnjreqnum. Deqa ni ino kumbra tingitqa singilaosim are bulye.

<sup>20</sup> “Ni e nube. E siranmeq di tigelesosim kindokin-doneqnum. Tamo bei a ijo kakro qusimqa siran waqtetbqas di e miligiq gilsiy aqo ombla ingi uyqom. <sup>21</sup> Tamo a Satan ombla qotsim singilaqas di e na minjitqa aqo ombla ijo awo jaram kobaq di awoqom. Nami e segi qoto singilaosimqa aqo ijo Abu wo aqa awo jaram kobaq di awoem dego kere. <sup>22</sup> Tamo a dabkala ti sqas di a Qotei aqa Mondor aqa anjam geregere quem. Anjam di Mondor na tamo ungasari qure qure kalilq di

ijo ñam qa koroeqñub qaji nanği minjreqnu.’ O Jon, ni anjam degsi nenğrenğyosim Laodisia nanğo lanğ anğro aqağ qarınğye.” Yesus na e degsi merbej.

## 4

### *Lanğ qureğ di nanği Qotei binğyoqnsib loueqñub*

<sup>1</sup> Onaqa e olo ñam atsimqa lanğ goge dia sirañ bei wağesonağ unem. Unsim koğyeqñamqa tamo nami leleñonağ aqa kakro gul anjamobulonağ quem qaji a na endegsi merbej, “Ni goge endeq au. Bamqa kumbra kalil bunuqna brantelenğas qaji di e ni osormqai.” <sup>2</sup> Onaqa bati qujai deqa Qotei aqa Mondor na e siñgilatbonaqa e tarosim lanğ goge dia awo jaram kobaquja sonağ unem. Tamo bei a awo jaramq di awesoqnej. <sup>3</sup> Aqa jejamu tulanğ minjalej. Meninğ jaspas tulanğ minjaleqnu dego kere. Aqa jejamu meninğ konilian bul tulanğ lent. Tuembinğ na awo jaram di kalilyesoqnej. Tuembinğ aqa nenğrenğ di tulanğ minjalej. Meninğ emeral tulanğ minjaleqnu dego kere. Tuembinğ di ñam banğa gesgi bul. <sup>4</sup> Ariya e olo ñam atsimqa awo jaram kokba 24 unjrem. Awo jaram kokba 24 dena awo jaram kobaquja ambletesoqneb. Tamo gate 24 nanği awo jaramq di awoelenğesoqneb. Nanği gara qat olekokba jigelenğosib mandor kokba nanğo gate tatal wala ti gol na gereiyo qaji di atelenğosib soqneb. <sup>5</sup> Awo jaram kobaqujağ dena minjal branteqnağ unem. Qatronğ ti kola anjam ti dego branteqnağ quem. Awo jaram namoq di ñam pulonğ 7 pumblonğelenğeb. Ñam pulonğ dena Qotei aqa Mondor 7 nanği sigitnjrejunub. <sup>6</sup> Awo jaram namoq di inği kobaquja bei sonağ unem. Inği di yuwal banğa bul. A qununğ bul dego. A tulanğ jeqilo.

Ariya e olo ñam atsimqa wagme ñambile so qaji qolqe unjrem. Nanği na awo jaram kobaquja agutosib tigelesoqneb. Nanğo bile ti qore ti dia ñamdamu gargekoba soqneb. <sup>7</sup> Wagme ñambile so qaji namba 1 a laion bul. Wagme ñambile so qaji namba 2 a makau bul. Wagme ñambile so qaji namba 3 aqa ulatamu tamo ulatamu bul. Wagme ñambile so qaji namba 4 a baira kobaquja tiosiq laqnu dego bul. <sup>8</sup> Wagme qolqe ñambile so qaji nanği di segi segi bari 6 ti. Bileqsi qoreqsi bariqsi ñamdamu gargekoba soqneb. Qanam ti qolo ti nanği gaigai louoqnsib endegsib mareqñub, “Qotei a siñgila koba ti unu. Siñgila kalil aqağ di unu. A nami soqnej. A bini unu. A bunuqna bqas.” Nanği degsib louoqnsib maroqnsib olo wainoqnsib mareqñub, “Qotei a getento koba. Qotei a getento koba. Qotei a getento koba.” Wagme qolqe nanği gaigai degsib louoqnsib mareqñub. Nanği aqaratosaieqñub.

<sup>9</sup> Tamo awo jaram kobaqujağ di awejunu qaji a ñambile gaigai unu. Deqa wagme qolqe ñambile so qaji nanği a qa

tulan areboleboleinjreqlaqa aqa ñam soqtoqnsib binjyeynub.  
<sup>10</sup> Yeqnaqa tamo gate 24 nanqi sinqa pulutoqnsibqa tamo awo jaramq di awejunu qaji a qa loueqnub. Tamo di agi ñambile gaigai unu qaji. Tamo gate nanqi nanjo gate tatal wala ti gol na gereiyo qaji di awo jaram kobaquja namoq di breiyoqnsibqa endegsib loueqnub,

<sup>11</sup> “O gago Tamo Koba Qotei, ni segi qujai lan goge di unum. Deqa tamo kalil nanqi ni qa tulan areboleboleinjreqlaqa ino ñam soqtoqnsibqa ino singila binjyeynub.

Nanqi ni kumbra degmeqnub. Di kiyaaqa? Ni na qujai mar-nam inqi inqi kalil branteb unub.

Ni ino segi areqalo na inqi inqi kalil gereiyem.  
 Gam dena qujai inqi inqi kalil branteb unub.”

## 5

### *Jon a buk bei unej*

<sup>1</sup> Onaqa e olo ñam atsimqa tamo awo jaramq di awesoqnej qaji aqa ban woq di buk bei ojesonaq unem. Buk di aqa banqa olekokba. Banqa di lulumesonaq unem. Buk aqa miligiqsi qoreqsi nenqrej ti soqnej. Buk di tamo bei na plaltosim aqa miligi unaim deqa nanqi na aqa banqa lulumyosib kandel aqa namur na qandrato 7 yeb. <sup>2</sup> Onaqa e olo ñam atsimqa lan anqro singila koba bei brantonaq unem. Lan anqro di a tulan lelenosiq marej, “Tamo yai a tamo bole unu deqa a na kandel aqa namur waqtosim buk di plaltqa kere?” <sup>3</sup> Onaqa tamo bei na buk di plaltosim aqa miligi unqajqa tamo dego bei sosai. Lan qureq di, mandamq di, mandam sorgomq di tamo dego bei sosai. <sup>4</sup> E degsi unsim deqa e tulan akamugetem. <sup>5</sup> Onaqa tamo gate bei na merbej, “O Jon, ni akamaim. Ni que. Laion a Juda aqa len na ñambabej deqa a qoto singilaosiq aqa jeu tamo nanqi tulan bunjrej. A Mandor Koba Devit aqa len na ñambabej deqa a na kandel aqa namur waqtosim buk di plaltqa kere.”

### *Jon a Kaja Du unej*

<sup>6</sup> Onaqa e olo ñam atsim Kaja Du tigelesonaq unem. A qalnab moiyej olo ñambile so bulonaq unem. A awo jaram ti wagne ñambile so qaji qolqe nanqi ti tamo gate nanjo awo jaram kokba ti ambleq di tigelesonaq unem. A qala 7 ti ñamdamu 7 ti soqnej. Ñamdamu 7 dena Qotei aqa Mondor 7 nanqi sigitnjrej unub. Mondor di Qotei na qarinqjrnaqa sawa sawa kalilq gileleneb qaji. <sup>7</sup> Onaqa Kaja Du a bosiqqa tamo awo jaramq di awesoqnej qaji aqa ban woq dena buk di yaiyej. <sup>8</sup> Buk di yaiyonaqa wagne ñambile so qaji qolqe nanqi ti tamo gate 24 nanqi ti bosib Kaja Du aqa areq di sinqa puluteb. Nanqi kalil segi segi gombinj ti tabir gol na gereiyo

qaji ti ojelenesoqneb. Tabirq dena qurem oqoqnsiqa Qotei aqa ulatamuq di branteqnu. Qurem di quleq boledamu. Qurem di aqa utru agiende. Qotei aqa segi tamo ungasari nanjo pailyo qurem bul oqoqnsiqa aqa ulatamuq di branteqnu. <sup>9</sup> Wagne qolqe nanji ti tamo gate nanji ti bosib Kaja Du aqa areq di singa pulutosibqa lou bunuj na endegsib louoqneb,

“O Kaja Du, ni buk di osimqa kandel aqa namur buk qandratejunu qaji di waqtqa kere.

Ni lumnab moisis ino lej aiyej deqa ni na ino segi tamo ungasari nanji awainjrsimqa Qotei aqa banq di atelenem unub.

Od, ni na tamo ungasari lej segi segi, anjam maro segi segi, jejamu segi segi, sawa segi segi nanji awainjrsimqa Qotei aqa banq di atelenem.

<sup>10</sup> Ni na nanji giltjrem deqa nanji Qotei aqa atra tamo ti mandor kokba ti sosib mandamq di tamo ungasari nanji taqatnjroqgab.”

### *Inji inji kalil nanji Kaja Du aqa ñam soqtoqneb*

<sup>11</sup> Ariya e olo ñam atsimqa lan angro tulan gargekoba tigelesonab unjrem. Nanji di iga na sisiyqa keresai. Nanji handet milion dego. Nanji tigelosibqa awo jaram ti wagne ñambile so qaji nanji ti tamo gate 24 nanji ti agutnjresosibqa tulan murqumyeqneb e nanjo kakro quem. <sup>12</sup> Nanji endegsib lelenjoqnsib maroqneb,

“Kaja Du agi nami qalnab moiyej qaji a singila ti ñoro ti powo ti ñam ti rian ti arebolebole ti oqa kere.

Deqa tamo ungasari kalil nanji aqa ñam soqtoqnsibqa a qa tulan areboleboleinjroqnimqa a binjiyoqnsib sqab.”

<sup>13</sup> Onaqa inji inji kalil Qotei na gereinjrej qaji nanji anjam mareqneb e nanjo kakro quem. Inji inji kalil lan qureq di, mandamq di, mandam sorgomq di, yuwal miligiq di unub qaji nanji anjam mareqneb e nanjo kakro quem. Od, inji inji kalil sawa sawa kalilq di unub qaji nanjo kakro quem. Nanji endegsib maroqneb,

“Tamo awo jaramq di awejunu qaji nanji Kaja Du wo bati gaigai arebolebole ti ñam ti rian ti singila ti oqnsib sqab.

Deqa iga bati gaigai nanji aiyej binjinjroqnom.”

<sup>14</sup> Onaqa wagne qolqe ñambile so qaji nanji maroqneb, “Anjam di bole.” Degsib mareqnebqa tamo gate nanji singa pulutoqnsib louoqneb.

## 6

### *Kaja Du a kandel aqa namur 7 waqtelenej*

<sup>1</sup> Onaqa Kaja Du a buk di ojesonaq e unem. Buk di kandel aqa namur na qandrato 7 yeb. Kaja Du a kandel aqa namur

namba 1 waqtonaqa wagme nambile so qaji matu a namoosiq marej, “Ni au.” Aqa kakro di kola anjam ato bulonaq e quem. <sup>2</sup> Degsi marnaqa e nam atsimqa hos qat bei brantonaq unem. Tamo hos quraq di awesoqnej qaji a an ti. Nanqi na gate tatal wala ti yonabqa aqa gateq di atsiqa qoto singilaqa marsiqa gilsiq qoto singilaqnej.

<sup>3</sup> Onaqa Kaja Du a kandel aqa namur namba 2 waqtonaqa wagme nambile so qaji namba 2 na marnaq e quem, “Ni au.” <sup>4</sup> Degsi marnaqa hos bei brantej. Hos di lent. Nanqi na tamo hos quraq di awesoqnej qaji a singila yeb. Yonabqa a na tamo ungasari mandamq di soqneb qaji nanqo areqalo niñaqyetnjrnaqa nanqi lawo kumbra uratosib tamo nanqi ñumoqnsib moiyoqnjroqneb. Nanqi na a serie kobaquja yonabqa gilsiq wau di yoqnej.

<sup>5</sup> Onaqa Kaja Du a kandel aqa namur namba 3 waqtonaqa wagme nambile so qaji namba 3 na marnaq e quem, “Ni au.” Degsi marnaqa e nam atsimqa hos tulu brantonaq unem. Tamo hos quraq di awesoqnej qaji aqa banq di skel ojesonaq e unem. <sup>6</sup> Unsimqa wagme qolqe nambile so qaji nanqo ambleq di tamo bei na anjam marnaq e aqa kakro quem. A na tamo hos quraq di awesoqnej qaji di minjej, “Ni na tamo ungasari nanqi mam koba enjre. Yimqa nanqi silali kobaquja na bem sum tabir qujai segi awaiyoqnqab. Silali kobaquja na bali dego tabir qalub segi awaiyoqnqab. Deqa ni na oliv namtan ti wain sil ti ugeugeiyaim.”

<sup>7</sup> Onaqa Kaja Du a kandel aqa namur namba 4 waqtonaqa e wagme nambile so qaji namba 4 aqa kakro quem. A marej, “Ni au.” <sup>8</sup> Degsi marnaqa e nam atsimqa hos merient brantonaq unem. Tamo hos quraq di awesoqnej qaji aqa ñam Moiyo. Moiyo Qure na a dauryosiq laqnej. Onaqa nanqi aiyel singila osib tamo ungasari mandam taqal qujaiq di so qaji nanqi serie na ti mam na ti ma uge na ti wagme juwan na ti ñumnab morenejeb. Mandam taqal qalubq di so qaji nanqi uratnjrnab soqneb. Nanqi ñumosai.

<sup>9</sup> Onaqa Kaja Du a kandel aqa namur namba 5 waqtonaqa Qotei aqa tamo ungasari nami ñumnab morenejeb qaji nanqo qunun atra bijal sorgomq di sonab e unjrem. Tamo ungasari nanqi di Qotei aqa anjam singila na ojesosib mare mare laqneb deqa jeu tamo nanqi na nanqi ñumnab morenejeb. <sup>10</sup> Nanqo qunun tulan lelenoqnsib Qotei endegsib minjoqneb, “O Tamo Koba, ni ingi ingi kalil nanqo Mandor Koba. Ni gaigai kumbra bole yeqnum. Ni getento koba. Ni kumbra bole segi yeqnum. Deqa ni iga merge. Iga bati gembub tarijonamqa jeu tamo mandamq di unub qaji nanqi na iga lugnab gago lej aiyej deqa ni kamba peginjrsim awai uge enjrqam?”



11 Onaqa Qotei a gara jugo qat olekokba elenosiqa nanği segi segi jigetnjrsiqa minjrej, “Ninği mati kiñala aqaratosib tariñoqnsib soqniy. Jeu tamo nanği na ninği lunğnab nunğo len aiyej dego kere nunğo wau qujai nanği ti nunğo was nanği ti degsib ñumqab. Tamo gembub jeu tamo nanği na ñumqab di e segi maritqa nanği kalil ñumekritib kereamqa bati deqa e kamba nanği peginjrsiy awai uge enjrqai.”

12 Onaqa Kaja Du a kandel aqa namur namba 6 waqtonaqa e ñam atsimqa mimin tulan kobaquja donağ unem. Unem di sen ambruosiq gara tulu bulej. Bai lentosiq len bulej.

13 Onaqa bongar nanği lan goge na ululoñosib mandamq aiyeleneb. Jagwa koba boqnsiq qura qunjimyeqnaqa gei qoqi ululoñosib mandamq aiyeleneqnub dego kere. 14 Lan dego loumej. Qobun rer qalsib lubteqnub dego kere. Mana ti nui ti kalil nanğo so sawa uratosib jaraiyeb. 15 Jaraiyonabqa mandor kokba ti tamo ñam ti qaja tamo nanğo gate ti ñoro tamo ti tamo singila ti kanğal tamo ti tamo nanğo segi wau ojo qaji nanği ti kalil gulbe di unsibqa ulaugetosib meniñ kokba miligiq di ulieleneb. Osib mana miligiq di dego ulieb.

16 Uliesosib tulan lelenkobaoqnsib mana ti meniñ kokba ti kalil endegsib minjroqneb, “Ninği bosib iga kabutgibqa tamo awo jaramq di awejunu qaji a na iga nugwasai. Kaja Du aqa minjin dego gagoq bqasai. 17 Nanği aiyel tamo unğasari nanği qa minjin oqetnjrqa bati brantqo deqa tamo yai na nanğo singila gotranjyqa kere? Tamo dego bei sosai.”

## 7

### *Israel tamo 144,000 nanği Qotei aqa toqor eb*

1 Onaqa lan anğro qolqe nanği lan utru qolqeq di tigelesonab e unjrem. Jagwa qolqe nanği na mandam ti yuwal ti ñam banğa ti puynjraib deqa lan anğro qolqe nanği dena jagwa qolqe di getentnjresoqneb. 2 Lan anğro nanği di Qotei na mandam ti yuwal ti niñaqnjrqaqqa singila enjrej. Onaqa lan anğro bei sen oqo sawaq dena brantonağ e unem. A na Qotei ñambile gaigai unu qaji aqa toqor ojesosiqa tulan lelenosiqa lan anğro qolqe nanği di minjrej, 3 “Ninği mandam ti yuwal ti ñam banğa ti nami niñaqnjraib. Iga mati gago Qotei aqa wau tamo nanğo lanjaq di toqor atnam soqnimqa di ninği na inği inği kalil di niñaqnjriy.” 4 Onaqa tamo gembub toqor eleneb di marnab e quem. Tamo 144,000 nanğo lanjaq di toqor ateleneb. Tamo nanği di Israel nanğo moma utru 12 nanğo len.

5 Juda aqa len na tamo 12,000 nanği toqor eleneb. Ruben aqa len na tamo 12,000 nanği toqor eleneb. Gat aqa len na tamo 12,000 nanği toqor eleneb. 6 Aser aqa len na tamo 12,000 nanği toqor eleneb. Naptali aqa len na tamo 12,000 nanği toqor

eleneb. Manase aqa leŋ na tamo 12,000 nanŋi toqor eleneb. <sup>7</sup> Simeon aqa leŋ na tamo 12,000 nanŋi toqor eleneb. Livai aqa leŋ na tamo 12,000 nanŋi toqor eleneb. Isakar aqa leŋ na tamo 12,000 nanŋi toqor eleneb. <sup>8</sup> Sebulun aqa leŋ na tamo 12,000 nanŋi toqor eleneb. Josep aqa leŋ na tamo 12,000 nanŋi toqor eleneb. Benjamin aqa leŋ na tamo 12,000 nanŋi toqor eleneb.

*Tamo unŋasari tulaŋ gargekoba nanŋi koroesosibqa Qotei binjiyoqneb*

<sup>9</sup> Onaqa bunuqna e olo ŋam atsimqa tamo unŋasari tulaŋ gargekoba koroesonab unjrem. Tamo unŋasari nanŋi di tamo bei na sisiyqa keresai. Nanŋi leŋ segi segi, sawa segi segi, jejamu segi segi, anjam maro segi segi. Nanŋi awo jaram ti Kaja Du ti nanŋo areq di tigelosibqa gara jugo qat olekokba jigelenosib nanŋo baŋ na tuwom baŋga ojelenesoqneb. <sup>10</sup> Osib nanŋi siŋgila na endegsib maroqneb, “Iga padalqa laqnamqa gago Qotei awo jaram kobaq di awejunu qaji nanŋi Kaja Du wo na iga elenosib boletgeb.”

<sup>11</sup> Onaqa laŋ anŋro kalil nanŋi na awo jaram ti tamo gate nanŋi ti wagme qolqe ŋambile so qaji nanŋi ti agutnjrsib tigelesoqneb. Tigelesosibqa awo jaram namoq di siŋga pulutoqnsib Qotei qa endegsib louoqneb, <sup>12</sup> “Bole. Gago Qotei a bati gaigai arebolebole ti rianŋ ti powo ti ŋam ti siŋgila ti sqas. Deqa iga a binjiyoqnsim sqom. Bole.”

*Qotei na aqa tamo unŋasari nanŋo gulbe kalil kobotetnjrqas*

<sup>13</sup> Onaqa tamo gate bei na nenembej, “Tamo unŋasari gara qat olekokba jigejunub qaji di yai nanŋi? Nanŋi tal qabe?” <sup>14</sup> Onaqa e na kamba minjem, “O ijo tamo koba, ni segi qalie.” Onaqa merbej, “Tamo unŋasari nanŋi di jeu tamo nanŋi na tulaŋ ugeugeinjsib gulbe ti jaqatinŋ ti enjreb. Nanŋi Kaja Du aqa leŋ aiyej qaji dena nanŋo gara yanselenonab qatej. <sup>15</sup> Deqa nanŋi Qotei aqa awo jaram namoq di tigeloqnsibqa bati gaigai qanam ti qolo ti Qotei aqa atra tal miligiq di sosibqa a waueteqneb. Qotei awo jaram kobaq di awejunu qaji a segi nanŋi koba na sosimqa taqatnjroqnas. <sup>16</sup> Deqa nanŋi olo bunu mamnjrqasai. Nanŋi bunu ya qarnjqasai. Sen na olo nanŋi kaŋkaŋnjrqasai. Inŋi bei na dego nanŋi kaŋkaŋnjrqasai. <sup>17</sup> Kaja Du awo jaram jojomq di unu qaji a nanŋo Mandor Koba gaigai sqas. A nanŋi joqoqnsim ŋambile gaigai sqajqa ya jumbumq giloqnas. Qotei na nanŋo ŋam ya kalil nuntetnjrimqa nanŋi olo bunu akamqasai.”

## 8

*Kaja Du a kandel aqa namur namba 7 waqtej*

<sup>1</sup> Onaqa Kaja Du a kandel aqa namur namba 7 waqton-aqa laŋ qureq di nanŋi kirikiriosib sonab sawa dabkonosiq sokiñalayej. <sup>2</sup> Sokiñalayonaq e na laŋ anŋro 7 Qotei aqa ulatamuq di tigelesoqneq qaji nanŋi unjrem. Unjrem di nanŋi gul 7 ojsib tigelesoqneq.

<sup>3</sup> Onaqa laŋ anŋro bei bosiq a atra bijal jomq di tigelesoqnej. A tabir gol na gereiyo qaji di ojesoqnej. Di kiyaaqa? A ŋam sum osim tabir miligiq di bilentosim koitimqa qurem quleq ti oqwajqa deqa. Onaqa nanŋi ŋam sum koba a yonabqa osiqa Qotei aqa segi tamo unŋasari kalil nanŋo pailyo ti ŋam sum de ti turtosiqa atra bijal gol na gereiyo qaji dia Qotei atraiyej. Atra bijal di awo jaram namoq di unu. <sup>4</sup> Atraiyonaqa Qotei aqa segi tamo unŋasari nanŋo pailyo ti qurem quleqt de ti laŋ anŋro aqa banq dena oqsiqa Qotei aqa ulatamuq di brantej. <sup>5</sup> Onaqa laŋ anŋro a tabir di osiqa atra bijalq dena ŋamyuwo osiqa tabirq di jugonaq maqonaqa waiyonaq mandamq aiyej. Ainaqa kola anjam ti qatron ti minjal ti mimin koba ti brantej.

### *Laŋ anŋro qolqe nanŋi gul anjameb*

<sup>6</sup> Onaqa laŋ anŋro 7 gul 7 ojesoqneq qaji nanŋi gul anjamqa-ja tigelosib rarieb.

<sup>7</sup> Laŋ anŋro namba 1 a namo aqa gul anjamej. Gul anjamonaqa ais awa bul ŋamyuwo ti leŋ ti turtosib mandamq aiyeb. Ainabqa ŋamtaŋ ti ñin ti mandam taqal qujaiq di so qaji di kalil yuekriteb. Mandam taqal aiyel uratonab soqnej.

<sup>8</sup> Onaqa laŋ anŋro namba 2 na aqa gul anjamonaqa ingi bei mana kobaquja bul yusiq puloŋeqnaqa osib waiyonab yuwalq aiyej. Ainaqa yuwal taqal qujai leŋ bulyej. Yuwal taqal aiyel leŋ bulyosai. <sup>9</sup> Degonaqa wagme kalil yuwal taqal qujaiq di ŋambile so qaji nanŋi morenej. Qobuŋ kalil dego yuwal taqal qujaiq di so qaji nanŋi padalekriteb.

<sup>10</sup> Onaqa laŋ anŋro namba 3 na aqa gul anjamonaqa bongar kobaquja tor bul yusiq puloŋosiq laŋ qure uratosiq ya ti ya jumbum ti mandam taqal qujaiq di so qaji deq aiyej. Mandam taqal aiyelq di sai. <sup>11</sup> Bongar di aqa ñam Isa Koba. Bongar di ya ti ya jumbum ti mandam taqal qujaiq di so qaji deq ainaqa ya di isakobaeb. Deqa tamo gargekoba nanŋi ya di uysib isakobainjrnaqa morenej.

<sup>12</sup> Onaqa laŋ anŋro namba 4 na aqa gul anjamonaqa sen taqal qujai ugeej. Bai taqal qujai dego ugeej. Bongar kalil laŋ taqal qujaiq di so qaji nanŋi dego ugeeleneb. Laŋ taqal aiyelq di sai. Deqa qanam sen taqal qujai ambruej. Qolo bai taqal qujai ambruej. Bongar kalil laŋ taqal qujaiq di so qaji nanŋi dego ambrueleneb.

<sup>13</sup> Onaqa e olo nam atsimqa baira kobaquja lan sorgomq di tiosiq laqnaq unem. A tulan lelenosiq endegsi marnaq e quem, “O aiyoy! Lan angro qalub nanqi gul anjamosaiunub. Nanqi gul anjamabqa tamo ungasari mandamq di unub qaji nanqi gulbe tulan kokba osib padalougetqab.”

## 9

### *Lan angro namba 5 na aqa gul anjamej*

<sup>1</sup> Onaqa lan angro namba 5 na aqa gul anjamonaga bongar bei lan uratosiq mandamq aiyeqnaq e unem. Unem di nanqi na bongar di singila yonabqa a gilsiq sub guma koba waqtej. <sup>2</sup> Waqtonaga qurem koba subq dena oqej. Liki yusiq qurem koba oqeqnu dego kere. Subq dena qurem oqsqa sen ti lan ti ambrutej. <sup>3</sup> Onaqa quremq dena sis tulan gargekoba nanqi brantosib mandamq aiyeleneb. Mandamq ainabqa Qotei na nanqi singila koba enjrej. Singila di belqalaqala nanjo singila ti kere. <sup>4</sup> Singila enjrsiq minjrej, “Ningi na nin ti nam banqa gesgi ti namtan ti ugeugeinjraib. Nanqi uratnjrib soqneb. Tamo ungasari nanjo lanjaq di Qotei aqa toqor osai qaji nanqi segi ugeugeinjriy. <sup>5</sup> Ugeugeinjrsib jaqatin koba enjroqnbqa bai 5 nanqi jaqatin oqnsib sqab. Ariya ningi na nanqi moiyojnraib. Jaqatin segi enjroqniy.” Onaqa sis nanqi dena tamo ungasari Qotei aqa toqor osai qaji nanqi jaqatin tulan uge enjroqneb. Belqalaqala na tamo ungasari nanqi unjrejqub dego kere. <sup>6</sup> Bati deqa tamo ungasari nanqi morenqa gam namab namab ugeinjrqa. Nanqi morenqa are soqnim nanqi morenqa keresai.

<sup>7</sup> E sis nanqi unjrem di hos qoto qa gilqajqa walatnjrejqub dego kere. Sis nanjo gateq di gate tatal gol na gereiyo qaji atelenesoqneb. Nanjo ulatamu tamo ulatamu bul. <sup>8</sup> Nanjo gate banqa olekoba. Unja nanjo gate banqa bul. Nanjo qalagei laion nanjo qalagei bul. <sup>9</sup> Nanjo are targaq di gara jugo dumu bul singila koba atesoqneb. Nanjo bari aqa anjam ato hos gargekoba rongom ti qoto qa gurgur ti gileqnb singa anjam ateqnub dego kere. <sup>10</sup> Sis nanjo weru belqalaqala nanjo weru bul, qaja ti. Nanjo singila weruqsi unu. Weru dena tamo ungasari nanqi jaqatin enjrqa kere. Yim nanqi bai 5 jaqatin oqnsib sqab. <sup>11</sup> Sis nanjo mandor agi sub guma koba taqato qaji lan angro. Aqa nam Hibru anjam na Abadon. Gago anjam na Tamo Padaltnjro Qaji.

<sup>12</sup> Gulbe kobaquja namba 1 agi koboqo. Ningi quiy. Gulbe kokba aiyel brantosai unub. Sokiñalayosib brantqab.

### *Lan angro namba 6 na aqa gul anjamej*

<sup>13</sup> Onaqa laŋ angro namba 6 na aqa gul anjamonaqa atra bijal gol na gereiyo qaji aqa qala qolqe nanŋo ambleq dena tamo bei aqa kakro brantonaq e quem. Atra bijal di Qotei aqa ulatamuq di unu. <sup>14</sup> Onaqa tamo dena laŋ angro namba 6 gul ojesoqnej qaji di minjej, “Laŋ angro qolqe Yufretis ya koba qalaq di tontnjreb unub qaji nanŋi di palontnjre.” <sup>15</sup> Onaqa laŋ angro namba 6 a anjam di qusiqa gilsiq laŋ angro qolqe nanŋi di palontnjrej. Nanŋi na tamo unŋasari kalil mandam taqal qujaiq di so qaji nanŋi ñumib morenqajqa deqa osiq nanŋi palontnjrej. Tamo unŋasari mandam taqal aiyelq di so qaji nanŋi ñumqasai. Nanŋi bole sqab. Bati Qotei a nami giltej qaji di brantimqa laŋ angro qolqe nanŋi dena tamo unŋasari nanŋi ñumqab. Nanŋi deqa tariŋosib sonab bati di tintiŋ brantonaqa laŋ angro namba 6 a gilsiq nanŋi palontnjrej. <sup>16</sup> Onaqa qaja tamo tulaŋ gargekoba hos quraq di awesoqneb qaji nanŋi branteb. Nanŋi 200 milion e degsi quem. <sup>17</sup> E ñeio bulosimqa tamo hos quraq di awesoqneb qaji nanŋi unjrem di nanŋo are targaq di gara jugo dumu bul singila koba jigelenesoqneb. Gara jugo qudei di nanŋo wala lent. Qudei qenjent. Qudei merient. Hos nanŋo gate laion nanŋo gate bul. Nanŋo medabuq na ñamyuwo ti qurem ti meniŋ yuo ti branteleneb. <sup>18</sup> Gulbe qalub dena tamo unŋasari kalil mandam taqal qujaiq di so qaji nanŋi ñumeleneb. Mandam taqal aiyel urateb. Ñamyuwo ti qurem ti meniŋ yuo ti hos nanŋo medabuq na branteleneb qaji dena tamo unŋasari nanŋi ñumeleneb. <sup>19</sup> Hos nanŋo singila nanŋo medabuqsi weruqsi unu. Nanŋo weru amal bul, gate ti. Nanŋo weru dena tamo unŋasari nanŋi ugeugeinjreknub.

<sup>20</sup> Ariya tamo unŋasari gulbe qalub dena ñumosai qaji nanŋi are bulyosai. Nanŋi mondor uge uge ti gisaŋ qotei nanŋo sulum ti biŋinjroqneb. Nanŋo kumbra uge di nanŋi urato-saioqneb. Nanŋo segi baŋ na sulum di gereiyoqneb. Gol na silva na bras na meniŋ na ñamtaŋ na ti gereiyoqneb. Sulum di qunuŋ saiqoji. Deqa nanŋi ñam atqa keresai. Nanŋi anjam quqwa keresai. Nanŋi walwelqa keresai. <sup>21</sup> Tamo unŋasari nanŋi di leŋ ojoqneb. Nanŋi gumanioqneb. Nanŋi quñam qaloqneb. Nanŋi sambalaoqneb. Nanŋi bajioqneb. Nanŋo kumbra uge uge kalil di nanŋi uratosaioqneb. Osib are bulyosaioqneb.

## 10

### *Jon a buk kiñala uyej*

<sup>1</sup> Onaqa laŋ angro bei a laŋ goge na aiyeqnaq e unem. A laŋ angro singila koba. A laŋbi na kabuosiqa aqa gateq di tuembiŋ atesoqnej. Aqa ulatamu sen bul suwaŋoqnej. Aqa siŋga tal ai yusiq ñanŋao bul. <sup>2</sup> Aqa baŋq di buk kiñala bei

waqesonaq ojesoqnej. Aqa singa wo yuwalq di atej. Singa qonaq mandamq di atej. <sup>3</sup> A tulan lelenej. Laion anjameqnu dego kere. Lelenonaqa kola 7 nanqi anjam ateb. <sup>4</sup> Kola 7 nanqi anjam atnabqa e nanqo anjam qusim nenngrenyqa laqnamqa lan goge dia tamo bei anjam marnaqa e aqa kakro quem. A na merbej, “Kola 7 nanqo anjam di qusim tent. Nenngrenyaim.”

<sup>5</sup> Onaqa lan anqro yuwalqsi mandamqsi singa atsiq tigelesonaq e unem qaji a na aqa ban wo soqtonaqa lanq oqej. <sup>6</sup> Osiqa Qotei lan ti mandam ti yuwal ti ingi ingi kalil ti gereiyelenej qaji aqa ñam na endegsi marej, “E bole marqai. Diño bati jojomqo. Deqa Qotei a tariñsokobaiyqasai. <sup>7</sup> Lan anqro namba 7 na aqa gul anjamamqa Qotei aqa uli anjam nami aqa medabu o tamo nanqi minjroqnej qaji di a na babtekritqas. Uli anjam di Qotei aqa anjam bole. Aqa medabu o tamo nanqi di aqa wau tamo.”

<sup>8</sup> Onaqa tamo lan goge dia anjam merbonaq e aqa kakro quem qaji a na olo merbej, “Ni gilsim lan anqro aqa singa yuwalqsi mandamqsi atsiq tigelejunu qaji aqa banq di buk waqejunu di yayiosim am.” <sup>9</sup> Onaqa e lan anqro di aqa areq gilsim minjem, “Ni buk kiñala ino ban na ojejunum qaji di e ebe.” Onaqa merbej, “Ni osim uye. Uyimqa ino medabuq di bisim qaq bul tulan qaqtinmqas. Aisim ino bi aniq di isakobaimqas.” <sup>10</sup> A degsi merbonaqa e aqa banq dena buk kiñala di yayiosim uyem. E uynamqa ijo medabuq di bisim qaq bul tulan qaqtinbej. Aisiq ijo bi aniq di isakobaibej.

<sup>11</sup> Onaqa nanqi na olo merbeb, “Ni Qotei aqa medabu osimqa anjam palontoqnqam. Tamo unqasari len segi segi, sawa segi segi, anjam maro segi segi nanqo kumbra qa ni anjam palontoqnqam. Mandor kokba gargekoba nanqo kumbra qa dego ni anjam palontoqnqam.”

## 11

### *Tamo aiyel nanqi Qotei aqa anjam palontoqneb*

<sup>1</sup> Onaqa nanqi na e walwelqajqa toqon ebsibqa merbeb, “Ni toqon endi waiyosim Qotei aqa atra tal aqa ole keret. Osim atra bijal aqa ole dego keret. Tamo unqasari atra tal miligiq di loueqnub qaji nanqi dego sisiy. <sup>2</sup> Ariya ni que. Koro sawa atra tal meq di unu qaji di keretaim. Di urat. Qotei na koro sawa di tamo Juda sai nanqi enjrimqa nanqi aqa qure koba niñaqyoqñibqa bai 42 gilqas. <sup>3</sup> Bati deqa e na ijo anjam palonto tamo aiyel qarinjritqa nanqi are ugeo qaji gara jigsib ijo anjam palontoqñibqa bati 1,260 gilqas.”

<sup>4</sup> Tamo aiyel di kanar qeli bul. Nanqi aiyel lam bul dego. Nanqi mandam taqato qaji Tamo Koba aqa ulatamuq di tigelejunub. <sup>5</sup> Tamo qudei na nanqi aiyel ugeugeinjraqa

maribqa nanjo aiyel medabuq na njamuwu brantosim nanjo jeu tamo nanji di koitnjrim yuekritisib morenqab. Tamo bei na nanji aiyel ugeugeinjrqa marimqa kumbra dena qujai a segi moiqas. <sup>6</sup> Qotei na nanji aiyel singila enjrimqa nanjo anjam maro bati qa nanji lan getentibqa awa bqasai. A na nanji aiyel singila enjrimqa nanji maribqa ya kalil len bulyqas. Nanji aiyel na tamo ungasari nanji gulbe uge uge enjroqnqa kere. Yim dena nanji tulan niñaqoqnqab. Nanji aiyel manwa di babtqajqa are soqnim babtoqnqab.

<sup>7</sup> Nanjo aiyel anjam maro bati koboamqa wagme juwan sub guma kobaq di unu qaji a subq dena brantosim nanji aiyel qoto itnjrsim a qoto singilaosim nanji ñumim morenqab. <sup>8</sup> Morenabqa nanjo aiyel jejamu qure aqa gam koba ambleq di uratnjrib sqab. Qure di aqa ñam iga sasirosim mareqnum, “Sodom ti Isip ti.” Qure dia nami nanjo Tamo Koba namburbasq di qamnab moiyej. <sup>9</sup> Nanjo aiyel jejamu gam ambleq di soqniqbqa tamo ungasari jejamu segi segi, sawa segi segi, anjam maro segi segi, len segi segi kalil nanji beļenosib nanjo aiyel jejamu koqnjroqniqbqa bati qalub bei oto gilqas. Nanjo aiyel jejamu subq atqa saidoqnqab. <sup>10</sup> Nanji aiyel morejonub deqa tamo ungasari kalil mandamq di unub qaji nanji tulan areboleboleinjroqniqbqa inji uyoqnsib lou tuoqnsib nanjo was nanji lueinjroqnqab. Nanji kumbra degyoqnqab. Di kiyaaqa? Qotei aqa medabu o tamo aiyel nanji dena tamo ungasari kalil mandamq di so qaji nanji jaqatin koba enjroqneb deqa.

<sup>11</sup> Bati qalub bei oto di koboonaqa Qotei na jagwa qarinyonaqa nanjo aiyel miligiq aiyej. Ainaqa nanji aiyel olo mondor osib nambile sosib tigeleb. Tigelonabqa tamo ungasari nanji na nanji aiyel unjrsib tulan ulaugeteb. <sup>12</sup> Onaqa lan goge dia lan angro bei a tulan leļenosiqqa nanji aiyel metnjrej, “Niņgi goge endeq boiy.” Metnjrnaqa nanji aiyel aqa kakro qusibqa lanbi miligiq na lan qureq oqeqnabqa nanjo jeu tamo nanji na nanji koqnjresoqneb. <sup>13</sup> Onaqa bati qujai deqa mimin tulan kobaquja dosiq qure koba di reņginyonaqa qure taqal qujai padalej. Qure taqal 9 padalosai. Mimin dena tamo ungasari 7,000 padaltnjrej. Onaqa tamo ungasari mimin dena padaltnjrosai qaji nanji tulan ulaugetosib Qotei lan qureq di unu qaji aqa ñam soqteb.

<sup>14</sup> Gulbe kobaquja namba 2 agi koboqo. Niņgi quiy. Sokiñalayimqa olo gulbe kobaquja namba 3 brantqas.

### *Lan angro namba 7 na aqa gul anjamej*

<sup>15</sup> Onaqa lan angro namba 7 na aqa gul anjamonaqa tamo ungasari kalil lan qureq di so qaji nanji tulan leļenosib endegsib marnab e quem, “Gago Tamo Koba aqa Kristus wo

Mandor Kokba sqajqa bati brantqo. Deqa nanği aiyel bati gaigai Mandor Kokba sosib mandam taqatqab.”<sup>16</sup> Onaqa tamo gate 24 Qotei aqa ulatamuq di nanğo awo jaramqsi awesoqneb qaji nanği sinğa pulutosib ñam quosib Qotei louetoqneb.<sup>17</sup> Osib endegsib pailyoqneb,

“O Tamo Koba Qotei, singila kalil inoq di unu.

Ni bini unum. Ni nami soqnem.

Ni na ino singila osim ni Mandor Kobaonum.

Deqa iga ni binimeqnum.

<sup>18</sup> Sawa bei bei qaji nanği tulañ minjin oqetnjreqnu.

Ino minjin oqwajqa bati dego brantqo.

Ni na tamo unğasari moreño qaji nanği peginjraqajqa bati brantqo.

Ni na ino wau tamo kalil nanği awai bole enjraqajqa bati dego brantqo.

Ino wau tamo nanği di agi ino medabu o qaji tamo ti, ino segi tamo unğasari bole nanği ti, tamo kalil ino ñam qa ulaeqnub qaji nanği ti.

Ino wau tamo nanği di agi tamo ñam kokba ti tamo ñam saiqoji ti. Ni na nanği awai bole enjraqajqa bati brantqo.

Ariya tamo unğasari mandam ugeugeiyeqnub qaji nanği ni na kamba ugeugeinjraqa bati dego brantqo.”

<sup>19</sup> Tamo gate 24 nanği degsib Qotei qa loueqnabqa lañ anğro nanği na Qotei aqa atra tal lañ qureq di unu qaji aqa siran waqteb. Waqtosibqa Qotei aqa dal anjam so qaji ñam monğum tal miligiq di sonaq uneb. Onaqa minjal ti qatron ti kola anjam ti mimin ti ais onğol kokba awa bul ti aiyeleneb.

## 12

### *Jon a unğa bei amal uge wo unjrej*

<sup>1</sup> Lañ goge dia Qotei aqa mañwa bei brantonaq e unem. E unem di unğa bei tigelesoqnej. Unğa di a sen na kabuosiqa baiq di tigelesoqnej. Aqa gateq di bongar 12 atsiq soqnej.

<sup>2</sup> Unğa di a gumañ ti. A anğro oqajqa jejamu jaqatinyeqnaqa tulañ pailoqnej. <sup>3</sup> Onaqa lañ goge dia mañwa bei brantonaq e unem. E unem di amal lent kobaquja soqnej. Amal di aqa gate 7 ti aqa qala 10 ti soqnej. Aqa gateq di dego gate tatal 7 soqneb. Gate tatal di mandor kokba nanği na ateqnub deqaji bul. <sup>4</sup> Aqa weru na bongar kalil lañ taqal qujaiq di so qaji nanği butuynjrnaqa ululoñosib mandamq aiyeleneb. Lañ taqal aiyelq di sai.

Unğa di anğrotimqa amal dena anğro a qalsim uyqajqa deqa osiq unğa aqa areq di tigelesosiq koqyosiq tarinoqnej. <sup>5</sup> Onaqa unğa di aqaratonaga aqa anğro mel ñambabej. Anğro di mondoñ Qotei na singila yimqa a bu toqon ojsim tamo unğasari kalil



sawa sawa kalilq di unub qaji nanği singila na taqatnjqroqnas. Anğro mel nambabey qaji di Qotei na oqujatosiq lañ qureq osi oqej. Oqsıqa aqa awo jaramq di awotej. <sup>6</sup> Onaqa uña di a ulanjsıqa wadau sawaq gilej. Dia aqa segi so sawa Qotei na nami gereiyetej. A di soqnimqa Qotei na bati 1,260 a taqatesosim inği anaiyoqnas.

<sup>7</sup> Ariya lañ goge dia qoto koba brantej. Lañ anğro gate Maikel aqa lañ anğro nanği ti tigelosib amal qoto iteb. Onaqa amal aqa lañ anğro nanği ti kamba tigelosib Maikel aqa lañ anğro nanği ti qoto itnjreb. <sup>8</sup> Onaqa amal aqa lañ anğro nanği ti qoto singilaqajqa keresaiinjrej deqa nanği lañ qureq di sqa keresai. <sup>9</sup> Qotei aqa lañ anğro nanği na amal kobaquja aqa lañ anğro nanği ti breinjrnab mandamq aiyeleneb. Amal di nami soqnej qaji. Aqa ñam Satan. Aqa ñam bei, “Tamo Unğasari Kalil Nanğo Ñam Ugetetnjro Qaji.” A na tamo unğasari kalil mandamq di unub qaji nanği gisa gisanjnreqnu.

<sup>10</sup> Onaqa olo lañ goge dia lañ anğro bei tulañ lelenonaqa e aqa kakro quem. A anjam endegsi marej, “Tamo unğasari nanği padalqa laqnabqa gago Qotei na nanği elenqo. A kumbra di yqo deqa aqa singila boleq dekritqo. A gago Mandor Koba unu. Amal na qolo ti qanam ti Qotei aqa ulatamuq di gago Kristen was nanğo ñam ugetetnjreqnu. Amal di waiyonub mandamq aiqo. Deqa bini Qotei aqa Kristus a ñam koba ti singila koba ti unu. <sup>11</sup> Gago was nanği nanğosegi jejamu bole sqajqa deqa are qalosaiqneq. Kaja Du a moisiq aqa leñ aiyej deqa nanği qoto bunyoqnsib endegsib are qaloqneq, ‘Unğum, jeu tamo nanği na iga lugwajqa marsib lugwab di kere. Iga deqa ulaqasai.’ Nanği degsib are qaloqnsib Yesus aqa anjam mare mare laqneq. <sup>12</sup> Deqa lañ qure ti tamo unğasari lañ qureq di unub qaji ninği ti areboleboleingeme. Mandam ti yuwal ti ninği geregere ñam atiy. Gulbe kobaquja nunğoq di brantqas. Satan a sokiñalayosim padalqas di qalieosiq deqa minjin ani oqetqoqa ninği ugeugeingwa aiqo.” Lañ anğro a anjam degsi marej.

<sup>13</sup> Amal di waiyonab mandamq aiyej di unsiqa a na uña anğro mel nambabtej qaji di qalim moiqajqa deqa dadauryoqnej. <sup>14</sup> Onaqa nanği na baira kobaquja aqa bari aiyel uña di yonabqa jigsıqa amal di uratosıqa pururuosıqa aqa segi so sawaq gilsıqa wadau sawaq di brantej. Dia Qotei na uña di geregere taqatosimqa wausau qalub bai 6 inği anaiyoqnas. <sup>15</sup> Onaqa e olo ñam atsimqa amal aqa medabuq na ya beqyonaqa ya meli do bulosıqa uña di dauryonaq unem. Ya dena uña di qalsim moiyoqajqa deqa amal na ya di beqyej. <sup>16</sup> Onaqa mandam na uña aqaryaiyosıqa meanosıqa ya amal na beqyej qaji di kalil uyekritej. <sup>17</sup> Deqa amal a uña qa minjin

ani oqetonaqa unja aqa angro qudei nanği qoto itnjrqajqa gilej. Unja aqa angro nanği di agi tamo unğasari Qotei aqa dal anjam dauryoqnsibqa Yesus aqa anjam mare mare laqñub qaji. <sup>18</sup> Ariya amal a gilsıqa alile di tigelesoqnej.

## 13

### *Wagme juwan aiyel nanği branteb*

<sup>1</sup> Onaqa e olo ñam atsimqa wagme juwan unem. A yuwalq dena brantonaq unem. Aqa gate 7 ti aqa qala 10 ti soqñeb. Aqa qalaq di gate tatal 10 soqñeb. Gate tatal di mandor kokba nanği na ateqñub deqaji bul. Aqa gateq di ñam qudei nengrenjonab soqñeb. Ñam di Qotei misilinjo qaji ñam.

<sup>2</sup> Wagme juwan e unem qaji di pusi juwan bul kobaquja. Pusi di aqa ñam lepat. Aqa sinğa bea aqa sinğa bul. Aqa medabu laion aqa medabu bul. Amal na aqa segi sinğila wagme juwan di yosiqa minjej, “Ni e ombla mandor kokba sqom.” Osiqa a ñam kobaquja yej. <sup>3</sup> Wagme juwan di aqa gate bei nami qalñab moisiq yu ti so bulonaq e unem. Yu di olo mosoonaq e aqa pirigi unem. Onaqa tamo unğasari kalil wagme juwan di uneb qaji nanği tulan prugugetosib a dauryoqñeb. <sup>4</sup> Amal na aqa segi ñam wagme juwan di yej deqa tamo unğasari nanği amal a qa louoqñeb. Osib wagme juwan a qa dego louoqnsibqa maroqñeb, “Tamo yai aqa sinğila wagme juwan aqa sinğila ti kere? Tamo yai na a qoto itqa kere? Tamo dego bei sosai.”

<sup>5</sup> Onaqa Qotei na wagme juwan di odyonaqa tigelosiqa diqoqnsıqa Qotei misilinjoqnej. Qotei na a sinğila yonaqa bai 42 a kumbra di yoqnej. <sup>6</sup> Yoqnsıqa aqa segi medabu waqtoqnsıqa Qotei misilinjoqnej. Osiqa Qotei aqa ñam ti aqa tal ti tamo unğasari lan qureq di unub qaji nanği ti misilinjnroqnej.

<sup>7</sup> Onaqa Qotei na wagme juwan di olo odyonaqa tigelosiqa Qotei aqa segi tamo unğasari nanği qoto itnjroqnsıqa nanği ñumoqnsıqa a segi qoto sinğilaqnej. Onaqa Qotei na a olo sinğila yonaqa a na tamo unğasari kalil leñ segi segi, sawa segi segi, anjam maro segi segi, jejamu segi segi nanği taqatnjroqnej. <sup>8</sup> Deqa tamo unğasari kalil mandamq di unub qaji nanği na wagme juwan di binjoqnsib aqa ñam tulan soqtoqñeb. Tamo unğasari nanği di Qotei a nami mandam atosaisosiqa nanği ñambile gaigai sqajqa saidosiq ñambile qa buk miligiq di nanço ñam nengrenjoq uratej. Buk di agi Kaja Du nami qalñab moiyej qaji aqa buk.

<sup>9</sup> Tamo a dabkala ti sqas di a anjam endi geregere qusim poiyem. <sup>10</sup> Qotei a tamo bei tonto talq di waiyqa marımqa tamo di osib tonto talq di waiyqab. Tamo bei na tamo bei sebru na qalqas di a kamba sebru na qalib moiqas. Kumbra

deqaji brantimqa bati deqa Qotei aqa segi tamo ungasari nanği Yesus qa nanço areqalo sinğilatoqnebe. Osib gulbe qoboioyqnsib soqnebe.

<sup>11</sup> Onaqa wagme juwan bei mandam miligiq na brantonag e unem. Wagme di aqa gateq di qala aiyel soqneb. Qala di kaja du nanço qala bul. E aqa anjam maro quem di amal aqa anjam maro bul. <sup>12</sup> Wagme juwan dena wagme juwan e nami unem qaji aqa sinğila kalil yaiyej. Yaiyosiq a na mandam ti tamo ungasari mandamq di so qaji nanği ti nanço areqalo tigeltetnjreqnaqa nanği wagme juwan e nami unem qaji a qa loueqnub. Wagme juwan e nami unem qaji di agi qalnab moisiqa aqa yu olo mosoonag e aqa pirigi unem. <sup>13</sup> Wagme juwan bunu brantej qaji di a manwa tulan kokba babteqnaq e unem. A manwa bei endegsi babteqnu. A na tamo ungasari nanço ulatamuq di namyuwo meteqnaqa lan goge na namyuwo brantqnsiq mandamq aiyeqnu. <sup>14</sup> Qotei na odyej deqa a manwa di wagme juwan nami brantej qaji aqa ulatamuq di babteqnu. Osiqa kumbra dena a na tamo ungasari mandamq di so qaji nanği gisa gisanjnroqnsiq endegsi minjreqnu, “Ninği sulum bei gereiyiy. Gereiyqa osibqa wagme juwan aqa ulatamu bul gereiyosib aqa ñam soqtoqniy.” Wagme juwan di agi nami serie na qalnab moisiq olo tigelosiq nambile soqnej. <sup>15</sup> Qotei na wagme juwan bunu brantej qaji di odyonaqa a na sulum di mondor yonaqa a nambile osiq anjam mareqnu. A degyeqnu. Di kiyaca? Tamo ungasari nanği sulum di binjiyoqnsib a qa louoqnqajqa deqa. Tamo ungasari sulum di binjiyqa urateqnu qaji nanği di a na ñumim morenqab.

<sup>16</sup> Ariya wagme juwan bunu brantej qaji a na aqa wau tamo nanği endegsi minjreqnu, “Ninği na tamo ungasari kalil nanço ban woqsi lanjaqsi ijo toqor atetnjriy.” Degsi minjreqnaqa nanği giloqnsib toqor atetnjreqnub. Tamo ñam saiqoji nanği ti tamo ñam ti tamo ñoro ti tamo inği inği saiqoji nanği ti kanğal tamo ti tamo nanço segi wau ojo qaji nanği ti kalil nanço ban woqsi lanjaqsi toqor ateleneqnub. <sup>17</sup> Tamo bei aqaq di toqor atqa minjib saidqas di a olo bunuqna inği awaiyqajqa getentqab. A inği bei qarinyosim silali oqajqa dego getentqab. Toqor di wagme juwan aqa segi ñam. Iga ñam di sisiyqom di aqa utru brantqas. <sup>18</sup> Tamo a areqalo bole ti sqas di a wagme juwan aqa ñam di geregere sisiyosim poiyem. Ñam di tamo nanço ñam bul. Iga ñam di sisiyqom di 666 brantqas.

## 14

*Kaja Du aqa tamo ungasari nanği lou bunuj na louoqneb*

<sup>1</sup> Onaqa e olo nam atsimqa Kaja Du a Saion manaq di tigelesonaq unem. Tamo 144,000 nanği dego a koba na

tigelesonab unjrem. Unjrem di nanngo lanjaq di Kaja Du aqa ñam ti aqa Abu aqa ñam ti nenngrenjonab soqnej. <sup>2</sup> Onaqa lan goge dia tamo ungasari tulan gargekoba nanngi anjam bei murqumyoqnsib mareqnaqqa e nanngo kakro quem. E nanngo kakro quem di ya koba meli dosiq anjam ato bul. Kakro di kola aisiq anjam atobulej. E kakro quem di tamo nanngi gombin anjamo bul. <sup>3</sup> Tamo ungasari nanngi di Qotei aqa awo jaram namoq di tigelesosibqa wagme qolqe ñambile so qaji nanngi ti tamo gate nanngi ti nanngo ñamdamuq di lou bunuj na louoqneb. Tamo 144,000 Qotei na nami mandamq dena awaiyelenej qaji nanngi segi lou di qalieqa kere. Tamo qudei nanngi lou di qalieqa keresai. <sup>4</sup> Tamo 144,000 nanngi di nami unja ti sambalaosaiqneb. Deqa nanngo jejamu yala jigatosai. Nanngi une saiqoji. Kaja Du a walwelosiq sawa sawaq gileqnaqa nanngi a dauryosib laqneb. Tamo kalil mandamq di unub qaji nanngo ambleq dena Qotei na tamo 144,000 nanngi di awaiyelenej. Deqa nanngi inngi meli bunuj bulosib Qotei aqa Kaja Du wo nanngo segi tamo unub. <sup>5</sup> Nanngi nami gisan anjam bei marosaioqneb. Nanngo jejamuq di une bei saiqoji.

*Lan angro qalub nanngi Qotei aqa anjam maroqneb*

<sup>6</sup> Onaqa lan angro bei lan sorgomq di pururueqnaqa e unem. Lan angro dena Qotei aqa anjam bole bati gaigai sqas qaji di osi giloqnsiqqa tamo ungasari kalil mandamq di unub qaji nanngi minjroqnsiq laqnej. A na tamo ungasari len segi segi, sawa segi segi, anjam maro segi segi, jejamu segi segi nanngi turtnjroqnsiq anjam bole di minjroqnsiq laqnej. <sup>7</sup> A tulan lelenoqnsiqqa endegsi minjroqnej, “Qotei na tamo ungasari nanngi peginjrqaqqa bati brantqo. Deqa ninngi Qotei ulaiyoqnsib aqa ñam soqtoqniy. Qotei a lan ti mandam ti yuwal ti ya jumbum ti kalil gereiyej. Deqa ninngi a qa louoqniy.”

<sup>8</sup> Onaqa lan angro bei na lan angro di dauryosiq bej. Bosiq endegsi marej, “Qure koba Babilon a tulan padalougetqo! Od, a tulan padalougetqo! Babilon a na tamo ungasari kalil mandamq di so qaji nanngo are tigeltetnjreqnaqa nanngi aqa sambala kumbra dauryoqneb. Osiqqa a na wain singila koba bul nanngi anainjreqnaq nanarioqneb.”

<sup>9</sup> Onaqa lan angro bei a lan angro aiyel nanngi di daurnjrsiq bej. Bosiqqa tulan lelenosiqqa marej, “Tamo bei a wagme juwan aqa sulum wo qa louoqnsimqa aqa lanjaqsi banqsi toqor oqas di a wain singila koba uyobulqas. <sup>10</sup> Wain dena Qotei aqa minjin singila koba sigitejunu. Qotei a wain di ya ti bulyosai. A na aqa minjin gambanq di qamsim tamo di anaiyim uyqas. Uysimqa Qotei aqa lan angro nanngi Kaja Du ombla nanngo ulatamuq di ñamyuwo na ti meniñ yuo na ti jaqatin koba

oqnsim sqas. <sup>11</sup> Namyuwo di aqa qurem bati gaigai oqoqngas. Tamo nanği wagme juwan aqa ñam ti aqa toqor ti osib aqa sulum wo biñinjreqnub qaji nanği bati gaigai qanam ti qolo ti jaqatin koba oqnsib sqab. Nanği aqaratqa keresai.”

<sup>12</sup> Kumbra deqaji brantimqa bati deqa Qotei aqa segi tamo unğasari nanği gulbe qoboiyoqnsib siñgila na tigelesoqnebe. Nanği di Qotei aqa dal anjam dauryoqnsibqa Yesus qa nanço areqalo siñgilateqñub.

<sup>13</sup> Onaqa lan goge dia tamo bei a lelenonaqa e aqa kakro quem. A na merbej, “Ni anjam endegsi nengrenye, ‘Bini qa ti bunuq qa ti tamo unğasari Tamo Koba a qa nanço areqalo siñgilatosis moreñqab qaji nanği tulan areboleboleinjrim sqab.’” Onaqa Qotei aqa Mondor a dego merbej, “Od, nanği mandam qa wau kalil uratosib lan qureq oqsib dia aqaratosib sqab. Kumbra bole kalil nanği mandamq di yoqneb qaji di aqa awai bole nanği lan qureq oqsib itqab.”

### *Mandam qa inği meli gentqa batıqo*

<sup>14</sup> Onaqa e olo ñam atsimqa lanbi qat unem. Tamo bei a lanbiq di awesoqnej. Tamo di a Tamo Anğro bul. Aqa gateq di gate tatal gol na gereiyo qaji di atsiq soqnej. Aqa banq di sarep olekoba tulan qala uge ojesoqnej. <sup>15</sup> Onaqa lan anğro bei a Qotei aqa atra talq dena brantosiqa tulan lelenosiqa tamo lanbiq di awesoqnej qaji di minjej, “Inği meli gentqa batıqo. Mandam qa inği kalil meliekritonub deqa ni ino sarep osimqa inği meli giñgenye.” <sup>16</sup> Onaqa tamo lanbiq di awesoqnej qaji a na aqa sarep ganiñyosiqa mandamq di inği melieleñej di kalil giñgenyej.

<sup>17</sup> Onaqa olo lan anğro bei a Qotei aqa atra tal lan qureq di unu qaji dena brantej. A dego sarep tulan qala uge ojesoqnej. <sup>18</sup> A brantonaqa olo lan anğro bei a Qotei aqa atra bijalq dena brantej. Lan anğro di Qotei na siñgila yonaqa a ñamyuwo taqatesoqnej. A brantosiqa tulan lelenosiqa lan anğro sarep qala uge ojesoqnej qaji di minjej, “Mandam qa wain sil aqa gei meliekritonub. Deqa ni ino sarep qala uge di osimqa wain sil aqa gei giñgenyosim sawa qujaiq di koroinjre.” <sup>19</sup> Degsi minjnaqa lan anğro dena tigelosiqa aqa sarep osiqa ganiñyej. Ganiñyosiqa mandamq di wain sil aqa gei melieleñej qaji di kalil giñgenyekritosiqa sawa qujaiq di koroinjrej. Osiqa wain gei parato qaji kulum kobaqujaq di breinjrej. Kulum dena Qotei aqa minjin sigitejunu. <sup>20</sup> Kulum di qure koba aqa polomq di ateb unu. Kulum miligiq di nanği na wain sil aqa gei paraparainjnabqa kulumq dena len koba aisiqa mandamq di tulan maqosiqa oqsıq hos nanço medabu tinq di diñej. Osiqa sawa tulan kobaquja kabutej. 300 kilomita dego.

## 15

### *Lan angro 7 nanqi gulbe uge uge 7 ojesoqneb*

<sup>1</sup> Onaqa manwa kobaquja bei lan goge di brantonaq e unem. Unsimqa tulan prugugetem. Lan angro 7 nanqi gulbe uge uge 7 ojesoqneb. Gulbe uge uge di koboamqa Qotei aqa minjin torei koboqas. Amqa gulbe uge deqaji olo bunu brantqasai.

<sup>2</sup> Onaqa e inji bei yuwal banqa bul unem. A tulan jeqilosiq qunun bulej. Yuwal baban gogeq di namyuwo pulonjoqnej. Tamo ungasari nami qoto singilaosib wagme juwan ti aqa sulum ti aqa nam aqa toqor ti gotranjreb qaji nanqi yuwal qalaq di tigelosib Qotei aqa gombin ojelenesoqneb. <sup>3</sup> Osib Qotei aqa wau tamo Moses aqa lou ti Kaja Du aqa lou na ti endegsib louoqneb,

“O Tamo Koba Qotei, singila kalil inoq di unu.

Wau kalil ni yeqnum qaji di singila koba.

Iga ino wau di unoqnsim deqa tulan prugeqnum.

Tamo ungasari sawa sawa kalilq di unub qaji nanjo Mandor Koba agi ni segi.

Kumbra kalil ni yeqnum qaji di tulan boledamu.

<sup>4</sup> O Tamo Koba, ni segi qujai kumbra tulan bolequja yeqnum. Ino jejamuq di une bei saiqoji.

Deqa tamo ungasari kalil nanqi bati gaigai ni binimoqnsibqa ino nam soqtoqnsib sqab.

Tamo ungasari sawa sawa kalilq di unub qaji nanqi ino areq boqnsib ni qa louoqnqab.

Ino kumbra bole kalil ni segi na boleq babtekritonum.”

<sup>5</sup> Onaqa e olo nam atsimqa Qotei aqa atra tal lan qureq di unu qaji aqa siran waqesonaq unem. Tal dia Qotei na aqa anjam bole babteqnu. <sup>6</sup> Onaqa lan angro 7 gulbe uge uge 7 di ojesoqneb qaji nanqi Qotei aqa atra talq dena brantosib oqedeb. Nanqi gara jugo qat tulan boledamu jigelenosib alalag gol na gereiyo qaji dena nanjo are targaq di kainyosib soqneb.

<sup>7</sup> Onaqa wagme nambile so qaji bei a brantosiq tabir 7 gol na gereiyo qaji di elenosiqa lan angro 7 nanqi di enjrej. Tabir 7 di Qotei bati gaigai sqas qaji aqa minjin na maqesoqneb.

<sup>8</sup> Onaqa Qotei aqa rian ti aqa singila ti dena qurem koba oqsiqu Qotei aqa atra tal getentej. Deqa tamo bei a Qotei aqa atra tal miligiq gilqa keresai. Lan angro 7 nanqi gulbe uge uge 7 di bilentib koboamqa bati deqa tamo nanqi olo Qotei aqa atra tal miligiq gilqa kere.

## 16

### *Lan angro 7 nanqi tabir 7 bilentonab mandamq aiyej*

<sup>1</sup> Onaqa tamo bei Qotei aqa atra tal miligiq di soqnej qaji a anjam bei marnaqa e aqa kakro quem. A tulan lelenosiqa

lanj angro 7 nanği di endegsi minjrej, “Niği tabir 7 Qotei aqa minjin na maqelenjejunu qaji di bimbleñyib mandamq aiyem.”

<sup>2</sup> Onaqa lanj angro matu a gilsıqa aqa tabir namo bilentonaqa mandamq aiyej. Mandamq ainaqa tamo ungasari wagme juwan aqa toqor osib aqa sulum binjoqneb qaji nanjo jejamuq di yu şingila kokba tulan uge bumbranjeleneb.

<sup>3</sup> Onaqa lanj angro namba 2 a olo gilsıqa aqa tabir yuwalq di bilentej. Bilentonaqa yuwal a tamo moiyo qaji nanjo lenj bulej. Onaqa ingi ingi kalil yuwal miligiq di njambile so qaji nanği moreñekriteb.

<sup>4</sup> Onaqa lanj angro namba 3 a kamba gilsıqa aqa tabir bilentonaqa ya ti ya jumbum ti deq aiyej. Ainaqa ya kalil lenj na ugeej. <sup>5</sup> Onaqa lanj angro bei a olo brantej. Lanj angro di ya kalil taqato qaji lanj angro. A na endegsi marnaq e quem, “O Qotei, ni bini unum. Ni nami soqnem. Ino kumbra kalil tulan bolequja. Ino jejamuq di une bei saiqoji. Ni segi getento koba. Utru deqa ni na jeu tamo nanği peginjrsimqa gulbe endi nanjoq qarinyonum. O Qotei, ino kumbra di tulan bole tıntın. <sup>6</sup> Jeu tamo nanği dena ino medabu o qaji tamo nanği ti ino segi tamo ungasari nanği ti moiyoñjreqnab nanjo lenj aiyeqnej. Deqa ni na kamba lenj anainjronum nanği uynub. Keretosim anainjronum.” <sup>7</sup> Onaqa atra bijal a endegsi marnaq e quem, “Od, Tamo Koba Qotei, şingila kalil inoq di unu. Ni na jeu tamo nanği di peginjreqnum di ni kumbra bole tıntın yeqnum.”

<sup>8</sup> Onaqa lanj angro namba 4 a gilsıqa aqa tabir senq di bilentonaqa Qotei na odonaqa senj tulan kanjanosıqa tamo nanjo jejamu koitetnjrej. <sup>9</sup> Senj aqa njamyuwo di tulan kanjanosıq tamo nanjo jejamu koitetnjrej. Qotei na gulbe uge di qarinyej deqa nanği aqa ñam misilinyoqnsib aqa ñam soqtqa urateb. Osib nanği are buljosai.

<sup>10</sup> Onaqa lanj angro namba 5 a gilsıqa aqa tabir osıqa wagme juwan aqa awo jaramq di bilentej. Bilentonaqa tamo ungasari wagme juwan na taqatnjresoqnej qaji nanği ambrukobainjrnac soqneb. Sosib jaqatinj tulan koba osib qala bisiriqtoneb. <sup>11</sup> Nanjo jaqatinj qa ti yu uge uge nanjo jejamuq di bumbranjeleneb qaji deqa ti nanği tulan minjin oqetnjrnaca Qotei lanj qureq di unu qaji a misilinyoqneb. Nanjo kumbra uge uge yoqneb qaji di nanği uratosai. Nanği are buljosai dego.

<sup>12</sup> Onaqa lanj angro namba 6 a gilsıqa aqa tabir Yufretis ya kobaq di bilentej. Bilentonaqa ya jeñosıq mandor kokba nanği senj oqo sawaq dena bqajqa gam waqej. <sup>13</sup> Onaqa e mondor uge qalub unjrem. Mondor uge qalub di balum du du bul. Nanği amal aqa medabuq na ti wagme juwan aqa medabuq na ti gisanj anjam maro qaji wagme juwan aqa

medabuq na ti brantelenjeb. <sup>14</sup> Mondor uge qalub dena manjwa gargekoba yoqnsibqa mandor kokba sawa sawa kalil taqatejunub qaji nanjoq giloqnsib minjreqnub, “Ningi na nunjo qaja tamo kalil koroinjrsib minjribqa Qotei a tamo ungasari nanji peginjrqa batiamqa nanji qotelenqab.” Qotqajqa bati di Qotei singila ti unu qaji aqa bati koba.

<sup>15</sup> Onaqa Yesus a marej, “Ningi quiy. E bajinj tamo bul nunjoq boqujatqai. Deqa tamo bei a nam sosim aqa gara tigsim sqas di a areboleboleiyqas. A yosi laqasai. Tamo ungasari nanji aqa jemai unqasai.”

<sup>16</sup> Ariya mondor uge qalub dena mandor kokba sawa sawa kalil taqatejunub qaji nanji joqsibqa Armagedon sawaq di koroinjreb. Nam Armagedon di Hibru anjam. Aqa damu, Megido mana.

<sup>17</sup> Onaqa lan angro namba 7 a gilsiq aqa tabir jagwaq di bilentej. Bilentonaqa atra tal miligiq di tamo bei a anjam marnaqa e aqa kakro quem. Tamo di a Qotei aqa awo jaram jomq di tigelesoqnej. A tulan lelenosiq a marej, “Gulbe kalil koboqneq.” <sup>18</sup> Onaqa minjal ti qatron ti kola anjam ti branteb. Miminj dego brantej. Miminj di tulan kobaquja. Miminj deqaji nami brantosaoqnej. Qotei na Adam gereiyej bati deqa miminj deqaji brantosai dena bosiq agi bini unum. <sup>19</sup> Miminj dena Babilon qure koba tulan niñaqyosiq potoqalubtej. Qure kalil dego padalelenjeb. Babilon aqa kumbra tulan ugedamu. Aqa kumbra deqa Qotei a are qalsiq wain singila koba gambanq di qamsiq Babilon anaiyonaq uysiq nanariej. Wain dena Qotei aqa minjin koba sigitejunu. <sup>20</sup> Onaqa nui kalil nanjo so sawa uratosib jaraiyelenjeb. Mana kalil dego jaraiyosib koboeb. <sup>21</sup> Bati deqa ais ongol kokba awa bul aiyelenjeb. Ais ongol di tulan kokba. Ais ongol segi segi nanjo gulbe 50 kilogram. Ais di lan goge na tamo nanjo jejamuq aisiqa nanji tulan ugeugeinjrej. Qotei na ais di qarinyej deqa tamo nanji Qotei misilinyoqneq.

## 17

### *Qotei na sambala unja kobaquja awai ugedamu yqas*

<sup>1</sup> Onaqa lan angro 7 tabir 7 ojesoqneq deqaji bei na bosiq merbej, “Ni endeq au. Bamqa Qotei na sambala unja kobaquja a pegiyosim awai ugedamu yim ni osormit unqam. Sambala unja di ya kokbaq di awejunu. <sup>2</sup> Mandor kokba kalil mandamq di unub qaji nanji a ombla na sambalaoqnsib laqneq. Tamo kalil mandamq di unub qaji nanji dego a ti sambalaoqnsib laqneq. Deqa nanji wain bul uyoqnsib nanarioqneq.”

<sup>3</sup> Onaqa Qotei aqa Mondor na e singilatbonaqa lan angro dena e osiq a wadau sawaq osi gilej. Osi gilnaqa e nam atsim



uņa bei sonaq unem. Uņa di a wagne juwan bei lent aqa quraq di awesoqnej. Wagne juwan aqa jejamuq di ñam gargekoba nenğrenjonab soqneb. Ñam di Qotei misiliņyo qaji ñam. Wagne juwan di aqa gate 7 soqneb. Aqa qala 10 dego soqneb. <sup>4</sup>Uņa di gara lent utru aiyela dena kabuosiq soqnej. Gol ti meniņ naimyo ti kolilei boledamu na ti walaosiq awe-soqnej. Aqa banq di gamban gol na gereiyo qaji ojesoqnej. Aqa kumbra uge uge na ti aqa sambala kumbra jigat dena ti gamban miligiq di maqelenesoqnej. Aqa kumbra di Qotei aqa ñamgalaq di tulan ugedamu. <sup>5</sup>Uņa aqa lanjaq di aqa ñam nenğrenjonab soqnej. Ñam di sasir anjam. Aqa ñam bole agiende, “Babilon qure kobaquja. A sambala uņa kalil nanğo ai. Mandam qa kumbra uge uge kalil nanğo ai agi a segi.” Aqa ñam bole agide. <sup>6</sup>Uņa dena Qotei aqa segi tamo unğasari nanği ugeugeinğroqnsiqa ñumeleņeqnaq moreņoqneb. Tamo unğasari nanği di Yesus qa nanğo areqalo siņgilatosib aqa ñam mare mare laqneb qaji. Uņa dena nanği ñumeqnaq nanğo leņ aiyeqnaqa a leņ di wain bul uyoqnsiq nanarioqnej. Yeqnaqa e di unsimqa tulan prugugetosim are koba qaloqnem.

<sup>7</sup>Onaqa laņ anğro dena e merbej, “Ni kiyaga are koba qaleqnum? Uņa de wo wagne juwan lent wo nanğo kumbra di sasir anjam. Wagne juwan di agi gate 7 ti qala 10 ti unu. A na uņa di qolaiyejunu. Nanğo aiyel sasir anjam di aqa utru uliejunu. Di e na babbittqa ni que. <sup>8</sup>Wagne juwan ni unonum qaji di a nami soqnej. A bini sosai. Bunuqna a olo sub guma kobaq dena brantosim torei padalqas. Amqa tamo unğasari kalil mandamq di unub qaji nanği na wagne juwan di unsibqa tulan prugugetqab. Wagne juwan di a nami soqnej. A bini sosai. A olo bunuqna brantqas. Tamo unğasari nanği di Qotei a nami mandam atosaisosiqa nanği ñambile gaigai sqajqa saidosiq ñambile qa buk miligiq di nanğo ñam nenğrenyqa uratej.

<sup>9</sup>“Tamo a areqalo bole ti sqas di a anjam endi geregere poiym. Wagne juwan aqa gate 7 nanği dena mana 7 sigitnjrejunub. Uņa di a mana 7 goge quraq di awejunu. <sup>10</sup>Gate 7 nanği dena mandor kokba 7 sigitnjrejunub. Mandor 5 nanği nami padaleb. Qujai unu. Qujai a mandor brantosaiunu. A mandor brantqajqa tariņeqnu. A bunuqna mandor brantosim sokiñalayosim padalqas. <sup>11</sup>Wagne juwan a dego mandor koba bei. A mandor kokba 7 nanğo ambleq di unu. A mandor koba namba 8. A dego torei padalqas. A nami soqnej bini sosai.

<sup>12</sup>“Ariya qala 10 ni unjronum qaji di nanğo utru e na ubtt ni quqwam. Nanği na mandor kokba 10 sigitnjrejunub. Nanği dego mandor brantosaiunub. Nanği bunuqna wagne juwan

aqa ñam osib a ombla mandor kokba sqab. Sokiñalayosib olo padalqab. <sup>13</sup> Nanği mandor kokba sosibqa areqalo qujaitosib nanço segi siñgila ti ñam ti kalil wagne juwan di yqab. <sup>14</sup> Osib Kaja Du qa ñiriñosib qoto itqab. Amqa Kaja Du a qoto siñgilaosimqa nanği bunñjrqs. Kaja Du a tamo kokba kalil nanço Tamo Koba. A mandor kokba kalil nanço Mandor Koba. Tamo unğasari a ombla unub qaji nanği a ti qoto siñgilaqab. Nanği di Kaja Du na metnjrsiq aqa segi tamo unğasari sqajqa giltñjrej qaji. Deqa nanği aqa anjam bole dauryeqnub.”

<sup>15</sup> Onaqa lañ anğro dena olo merbej, “Ya kokba sambala uña a di awesonaq ni unonum qaji di aqa utru e na ubtit ni quqwam. Ya kokba dena tamo unğasari tulañ gargekoba nanği sigitñjrej unub. Nanği di leñ segi segi, jejamu segi segi, anjam maro segi segi nanği. <sup>16</sup> Qala 10 ni unjronum qaji nanği ti wagne juwan a ti nanği na sambala uña di jeutosib a tulañ ugeugeiyosib gara bumbranyetosib aqa damu uyekritosib tanu ñamyuwo na koitqab. <sup>17</sup> Qotei a segi na mandor kokba 10 nanço are tigeltetñjrej deqa nanği aqa areqalo dauryosib uña di degsib ugeugeiyqab. Deqa bati brantimqa nanği areqalo qujaitosib nanço segi siñgila ti ñam ti kalil wagne juwan di yibqa Qotei aqa anjam kalil nami marej qaji di aqa damu brantqas. <sup>18</sup> Uña ni unonum qaji di aqa utru e na ubtit ni quqwam. Uña di a qure kobaquja. A mandor kokba kalil mandamq di unub qaji nanço mandor koba sosiqa nanği taqatñjreqnu.”

## 18

### *Babilon qure kobaquja a tulañ padalougetej*

<sup>1</sup> Onaqa lañ anğro bei a lañ qure uratosiq mandamq aiyeqnaq e unem. Lañ anğro di tulañ siñgila koba. Aqa qasar na walaej dena mandam kalil suwanekritej. <sup>2</sup> A tulañ lelenosiqa endegsi marej, “Babilon qure kobaquja a padalougetqo! Od, a padalougetqo! Babilon qure di mondor uge uge kalil nanço so sawa. Mondor uge nanği ti qebari jigat nanği ti qebari uge kalil dego qure dia unub. <sup>3</sup> Tamo unğasari sawa sawa kalilq di unub qaji nanği Babilon ombla na sambalaoqnsib laqneb. Deqa nanği wain siñgila koba bul uyoqnsib nanarioqneb. Mandor kokba mandamq di unub qaji nanği dego Babilon ombla na sambalaoqnsib laqneb. Silali qa wauo tamo nanği Babilon aqa kumbra uge uge dena silali koba oqneb. Babilon a kumbra tulañ ugedamu yoqnej. Aqa kumbra deqa a jemaayosaiyoqnej.”

<sup>4</sup> Onaqa lañ goge dia tamo bei a lelenonaqa e aqa kakro quem. A endegsi marej, “O ijo tamo unğasari, niñgi Babilon

qure di uratosib ijoq boiy. Une kalil a yeqnu qaji di ningi yo uge. Aqa une deqa a gulbe tulan ugedamu oqas. Ningi a beteryosib gulbe di o uge. <sup>5</sup> Babilon aqa une kalil di tum-bolosi qoqsiq lan qure ojjoqa e unonum. Aqa kumbra uge deqa Qotei a are walyosaieqnu. <sup>6</sup> Ningi aqa kumbra uge kalil deqa a kambatiy. A kumbra uge yoqnsiqa olo di bunyoqnsiqa kumbra tulan ugedamu yeqnu. Ningi aqa kumbra uge deqa keretosib a kambatiy. A wain singila koba gambanq di qamsiq bulyeqnu. Deqa ningi olo wain tulan singila koba bulyosib a kamba anaiyy. <sup>7</sup> A na aqa segi ñam soqtoqnsiqa sambalaoqnsiqa kumbra uge uge yeqnu. Ningi aqa kumbra deqa keretosib a jaqatin koba yibqa a akamugetqas. A segi qa mareqnu, 'E mandor koba unum. E ijo segi awo jaram kobaqujaq di awejunum. E uña qobul sai. Gulbe bei ijoq bqa keresai. Deqa e akamqasai.' <sup>8</sup> A degsi mareqnu deqa bati qujai qa gulbe tulan uge uge aqaq aiyelenosim a makobaiyim akamugetqas. Osim a mamyimqa aqa jejamu ñamyuwo na yugwas. Qotei Koba singila ti unu qaji a degsim Babilon aqa kumbra uge qa pegiyosim tulan padaltougetqas.

<sup>9</sup> "Mandor kokba mandamq di unub qaji nanqi Babilon ombla na sambalaoqnsib kumbra tulan ugedamu yoqneb. Deqa Babilon a ñamyuwo na yuim qurem oqoqnmqa mandor kokba nanqi qurem di unsibqa akamaniosib tulan are gulbeinjrqas. <sup>10</sup> Nanqi Babilon aqa jaqatin koba di unsibqa tulan ulaugetqab. Osib isaq di tigelesosib maroqnqab, 'O Babilon, ni qure kobaquja! Ni nami qure singila koba soqnem! Ariya bini ni tulan padalougetonum! Bati qujai qa ino kumbra uge aqa awai agi ni itonum!'

<sup>11</sup> "Silali qa wauo tamo sawa sawa kalilq di unub qaji nanqi Babilon aqa jaqatin di unsibqa akamaniyoqnsibqa are tulan gulbeinjroqnqas. Di kiyaya? Tamo qudei nanqi olo nanjo ingi ingi awaiyoqnqasai. <sup>12</sup> Nanjo ingi ingi agi gol, silva, meniñ boledamu, kolilei tulan boledamu, gara qat naimyo, gara lent utru segi segi, gara yauno pirqaqo. Nanjo ñoro qudei agi ñamtañ quleqt bole bole, ingi ingi elefan aqa qalagei na gereiyo qaji, ingi ingi ñamtañ boledamu na gereiyo qaji, ingi ingi bras na gereiyo qaji, ingi ingi ain na gereiyo qaji, ingi ingi meniñ naimyo na gereiyo qaji. <sup>13</sup> Nanjo ingi ingi qudei agi meiwo, lei uyo qaji, sum koitib quleq oqwajqa, namur quleqt, goren quleqt, wain, goren goiyo qaji, bem sum. Nanjo ñoro qudei agi makau, kaja, hos ronqom ti, kangal tamo nanjo jejamu ti nanjo qunun ti. Ingi ingi kalil deqaji tamo qudei nanqi olo bunu awaiyoqnqasai. <sup>14</sup> Deqa silali qa wauo tamo nanqi na Babilon endegsib minjoqnqab, 'Ingi ingi kalil ni tulan arearetmoqnej qaji agi ni uratmosib koboounub. Ñoro bole

bole kalil ni silali kobaquja na awaiyem qaji de ti ino wala bole bole ti agi koboönub. Deqa inḡi inḡi kalil deqaji ni olo bunu unqasai bole sai.’

15 “Silali qa wauo tamo nanḡi na inḡi inḡi deqaji gargekoba qarinyeqnabqa Babilon na awaiyoqnsiqa silali tulaḡ koba enjroqnej. A kumbra di yoqnej deqa bunuqna a jaqatinḡkobaikyqas. Yimqa silali qa wauo tamo nanḡi di unsibqa ulaugetosib isaḡ di tigelesosibqa akamaniyoqnsib are tulaḡ gulbeinjroqnqas. 16 Osib endegsib Babilon minjoqnqab, ‘O qure koba Babilon, ni tulaḡ padalougetonum! Nami ni gara qat tulaḡ naimyo na kabuoqnsimqa gara lent utru segi segi jugoqnsimqa ino jejamu gol na ti meniḡ boledamu na ti kolilei boledamu na ti walatoqnsim soqnem. 17 Deqa bati qujai qa ino silali ti ino wala ti kalil agi saiekritonub.’ Silali qa wauo tamo nanḡi degsib Babilon minjoqnqab.

“Qobuḡ ojo tamo nanḡi ti tamo qobuḡ na laqnub qaji nanḡi ti tamo qobuḡq di waueqnub qaji nanḡi ti tamo yuwalq dena silali eqnub qaji nanḡi ti kalil Babilon qure koqyosibqa isaḡ di tigelesqab. 18 Tigelesosib ḡamyuwo na a yuim qurem oqoqnmimqa di unsibqa tulaḡ leleḡoqnsib maroqnqab, ‘Qure endi tulaḡ kobaquja. Qure bei qure ende ti keresai.’ 19 Nanḡi degsib maroqnsibqa wi sum oqnsib nanḡo gateq di atoqn-sibqa akamaniyoqnsibqa are tulaḡ gulbeinjroqnqas. Osib tulaḡ leleḡoqnsib endegsib Babilon minjoqnqab, ‘O qure koba Babilon, ni padalougetonum! Qobuḡ taqato tamo yuwalq di laqnub qaji nanḡi inoq dena silali tulaḡ koba oqneb. Deqa nanḡi ino jaqatinḡ di unsibqa are tulaḡ gulbeinjroqnqas. O aiyo! Bati qujai qa ni torei padalougetonum!’

20 “O laḡ qure ti Qotei aqa segi tamo unḡasari niḡi ti tamo kalil Yesus na aqa anjam mare mare laqajqa qarinyej qaji niḡi ti Qotei aqa medabu o tamo niḡi ti Babilon qure padalougetqo di unsib areboleboleiḡeme. Babilon aqa kumbra uge kalil Qotei na unekritosiqa deqa keretosiḡ awai uge yqo. Babilon na niḡi ugeugeiḡoqnej deqa Qotei na kamba a ugeugeiyqo.”

21 Ariya anjam di koboonaqa laḡ anḡro siḡgila koba bei a bosiqqa bem sum kuroyo qaji meniḡ kobaquja osiq soqtosiqa yuwalq di waiyej. Osiqa marej, “Qotei na degsim Babilon qure koba siḡgila na waiyim tamo qudei na olo bunu a unqasai. 22 O Babilon qure, bunuqna tamo nanḡi inoq di gombinḡ ti yumba ti gul ti nanḡo anjam ato olo quoqnqasai. Inḡi inḡi gereiyo tamo nanḡi dego olo bunu inoq di sqasai. Bem sum kuroyibqa inoq di olo anjam atim quqwasai. 23 Wanjal inoq di olo pulonqasai. Inoq di tamo unḡa wo olo baḡ ojqasai. Deqa nanḡo aiyeḡ anjam inoq di bunu quqwasai. Nami ino silali qa

wauo tamo nanġi tamo kokba soqneb. Ariya bini nanġi ko-boonub. O Babilon, ni ino gumaninġ kumbra na tamo unġasari sawa sawa kalilq di unub qaji nanġi gisa gisanġnroqnem.

<sup>24</sup>“Babilon qure a na Qotei aqa medabu o qaji tamo nanġi ti Qotei aqa segi tamo unġasari nanġi ti ñumeqnaq moreñoqneb. Aqa une di aqa jejamuq di sonaqa Qotei a unqo. Tamo unġasari kalil jeu tamo nanġi na ñumoqneb qaji nanġo leñ aiyeqnaq Qotei a unsiqa une di Babilon aqa jejamuq di atqo.”

## 19

### *Tamo unġasari nanġi Qotei aqa ñam soqtoqneb*

<sup>1</sup> Onaqa lanġ goge dia tamo unġasari tulanġ gargekoba nanġi murqumyeqnaq e nanġo kakro quem. Nanġi murqumyeqnaq endegsib maroqneb, “Iga gago Qotei aqa ñam soqtoqnaqom! A ñam koba ti sinġila koba ti unu. Iga padalqa laqnamqa a na iga elenġej. <sup>2</sup> A kumbra bole tintinġ na tamo unġasari nanġi peginġreqnu. Agi a na sambala unġa kobaquja pegiyqo. Unġa dena aqa sambala kumbra na tamo unġasari kalil mandamq di so qaji nanġi ugeugeinġroqnej. Osiqa Qotei aqa wau tamo nanġi dego ñumeqnaq moreñoqneb. Aqa une deqa Qotei na a awai uge yqo.”

<sup>3</sup> Ariya nanġi olo lelenoqnsib endegsib maroqneb, “Iga Qotei aqa ñam soqtoqnaqom! Namyuwo na Babilon qure yuim aqa qurem bati gaigai oqoqnaqas!” Nanġi degsib maroqneb.

<sup>4</sup> Onaqa tamo gate 24 nanġi ti wagne qolqe nambile so qaji nanġi ti sinġa pulutosibqa Qotei awo jaramq di awejunu qaji a qa louoqnsib maroqneb, “Bole. Iga Qotei aqa ñam soqtoqnaqom!” <sup>5</sup> Onaqa awo jaram jojomq di tamo bei a tigelosiq anjam bei marnaqa e aqa kakro quem. A lelenosiq endegsi marej, “Qotei aqa wau tamo ninġi ti tamo unġasari Qotei qa ulaeqnub qaji ninġi ti tamo lanġaj ti tamo ñam ti kalil ninġi Qotei aqa ñam soqtoqniy!”

### *Kaja Du aqa unġa ban ojqa batiqo*

<sup>6</sup> Onaqa lanġ goge dia tamo unġasari tulanġ gargekoba nanġi murqumyeqnaq anjam mareqnaq e nanġo kakro quem. Nanġo kakro di ya kobaquja meli dosiq anjam atobulej. Nanġo kakro di kola aisiq anjam atobulej. Nanġi tulanġ lelenoqnsibqa endegsib maroqneb, “Iga gago Tamo Koba Qotei aqa ñam soqtoqnaqom! Sinġila kalil aqaq di unu. Deqa bini a Mandor Koba sosiq inġi inġi kalil taqateqnu! <sup>7</sup> Bini iga Qotei qa tulanġ areboleboleigoqnaq aqa ñam soqtoqnaqom. Di kiyaaqa? Kaja Du na aqa unġa ban ojqa bati brantqoqa aqa unġa a walaosiq aqa jejamu gereiyqo. <sup>8</sup> Qotei na a gara qat tulanġ naimyo jigetqo. Gara di tulanġ milalosiq suwanġejunu.” Gara

qat naimyo dena kumbra bole tintin kalil sigitejunu. Kumbra bole di Qotei aqa segi tamo ungasari nanngi dauryeqnub.

<sup>9</sup> Onaqa lan angro dena olo merbej, “Ni anjam endegsim nengrenye, ‘Kaja Du aqa unja ban ojqa batiqo deqa aqa Abu Qotei na ingi koba goiqo. Goisiq aqa segi tamo ungasari nanngi metnjrqoqa ingi uyqa bonub. Bonub qaji nanngi tulan areboleboleinjrqas.’” Osiaq merbej, “Anjam endi Qotei aqa anjam bole.” <sup>10</sup> Lan angro na e degsi merbonaqa e aqa areq di singa pulutosim a binijyqa laqnamqa a na olo merbej, “Ni e binibaim! E ni bul. E ni ti tamo kalil Yesus aqa anjam qa nanngo areqalo singilateqnub qaji nanngi ti koba na wau qujai. Iga kalil was. Deqa ni Qotei segi binijyoqnime. Iga qalie, Yesus a Qotei aqa medabu o qaji tamo nanngo are tigeltetnjreqnaqa nanngi aqa anjam palonteqnub.”

*Jon a tamo hos quraq di awesonaq unej*

<sup>11</sup> Onaqa e olo nam atsimqa lan waqonaqa hos qat bei brantonaq unem. Tamo hos quraq di awesoqnej qaji aqa nam agiende, “Qotei aqa wau geregere taqateqnu qaji tamo.” Aqa nam bei, “Kumbra bole yeqnu qaji tamo.” A kumbra bole tintin na tamo ungasari nanngi peginjroqnsiqqa nanngi qoto itnjreqnu. <sup>12</sup> Aqa namdamu nam pulon bul puloneqnu. Aqa gateq di gate tatal gargekoba atejunu. Gate tatal di mandor kokba nanngi na ateqnub deqaji bul. Aqa jejamuq di nam bei nengrenyeb unu. Nam di a segi qalie. Tamo bei a nam di qaliesai. <sup>13</sup> A gara olekoba osiaq lenq di tuqtosiq dena kabuejunu. Aqa nam endegsib mareqnub, “Qotei aqa Anjam.” <sup>14</sup> Qaja tamo tulan gargekoba lan qureq dena hos segi segi osibqa hos quraq di awoelenosib tamo di dauryosib gileq nab e unjrem. Hos nanngi di qat kalil. Qaja tamo nanngi di gara qat tulan naimyo milalo jigejunub. <sup>15</sup> Tamo di aqa medabuq na serie olekoba tulan qala uge branteqnu. A serie di osimqa tamo ungasari sawa sawa kalilq di unub qaji nanngi numelenqas. A bu toqon ain na gereiyo qaji di dego ojsimqa dena tamo ungasari sawa sawa kalilq di unub qaji nanngi singila na taqatnjroqnas. Osimqa wain gei parato qaji kulumq di aqa singa waiyosim wain gei paraparainjrqas. Kulum dena Qotei singila koba ti unu qaji aqa minjin sigitejunu. <sup>16</sup> Tamo di aqa gara olekobaqsi aqa qaloqsi nam endegsib nengrenyeb unu, “Mandor kokba kalil nanngo Mandor Koba. Tamo kokba kalil nanngo Tamo Koba.”

<sup>17</sup> Onaqa lan angro bei senq di tigelesonaq e unem. A tulan lelenosiqqa qebari kalil lan sorgomq di pururueqnub qaji nanngi endegsi minjrej, “Ninngi bosib koroabqa Qotei na ingi koba atsim metnjgim ninngi uyiy. <sup>18</sup> Mandor kokba ti qaja tamo nanngo gate kokba ti tamo singila ti hos nanngi ti tamo hos quraq di

awejunub qaji nanği ti nanęo qusa nięni bosib uyi. Kanęal tamo ti tamo nanęo segi wau ojo qaji nanęi ti tamo lanęaj ti tamo ñam ti kalil nanęo qusa nięni bosib uyi.”

<sup>19</sup> Onaęa e olo ñam atsimęa mandam qaji mandor kokba kalil nanęi ti nanęo qaja tamo nanęi ti wagme juwanę a ti bosib koroesonab unjrem. Nanęi na tamo hos quraę di awesoęnej qaji aęa qaja tamo nanęi ti qoto itnjręa marsib koroesoęneb. <sup>20</sup> Ariya tamo dena wagme juwanę wo gisaņ anjam maro qaji wagme juwanę wo nanęi aiyel oje. A na nanęi aiyel ñambile sonab ojsięa wainjrnaę ñamyuwoę aiyeb. Ñamyuwoę di meniņ kalil yusiq ñanęaeęnu. Wagme juwanę aęa ulatamuę di gisaņ anjam maro qaji wagme na maņwa tulaņ kokba yoęnej. Aęa kumbra dena a na tamo unęasari nanęi gisa gisaņnjroęnej. Tamo unęasari nanęi di wagme juwanę aęa toęor osib aęa sulum biņiyoęneb. <sup>21</sup> Onaęa tamo hos quraę di awesoęnej qaji a na wagme juwanę aęa qaja tamo kalil nanęi ñumeęnaę moreņoęneb. Serie olekoba aęa medabuę na brantej qaji dena nanęi ñumoęnej. Onaęa qebari kalil nanęi bosib qaja tamo nanęo qusa uynab mene dięnjrej.

## 20

### *Satan a wausau 1,000 sub guma kobaę di sqas*

<sup>1</sup> Onaęa lanę anęro bei lanę goęe na mandamę aiyeęnaę e unem. Qotei na a siņgila yonaęa a sub guma koba taęatqajęa marsiq sil raunęa osiq mandamę aiyej. <sup>2</sup> Aisię amal kobaęuęa ojsiq sil dena tontej. Amal di wausau 1,000 tontim sqas. A nami soęnej qaji. Aęa ñam Satan. Aęa ñam bei, “Tamo Unęasari Kalil Nanęo Ñam Uęetetnjro Qaji.” <sup>3</sup> Lanę anęro dena Satan ojsiq tontosięa sub guma kobaę di waiyej. Waiyosięa sub me kabutosięa qandimtej. A dia wausau 1,000 sqas. Deęa a na sawa bei bei qaji nanęi olo gisa gisaņnjręasai. A subę di tariņosim soęnimęa wausau 1,000 di koboamęa a olo uratib oęęodosim sokiñalayęas.

<sup>4</sup> Onaęa e awo jaram kokba qudei unjrem. Awo jaram kokbaę di tamo qudei nanęi awoelenęesoęneb. Tamo nanęi di Qotei na wau enjrnaęa nanęi awo jaram kokbaę di awoosib tamo unęasari nanęi peginjroęneb. Onaęa e tamo unęasari tulaņ gargekoba nami moreņeb qaji nanęo qunuņ unjrem. Tamo unęasari nanęi di nami Yesus aęa ñam maroęnsibęa Qotei aęa anjam siņgila na ojesoęneb deęa jeu tamo nanęi na nanęo kakro giņęeņnjrnab nanęi moreņeb. Tamo unęasari nanęi di wagme juwanę aęa sulum wo biņinjrosaiyoęneb. Nanęo lanęaqsi banęsi wagme juwanę aęa toęor osai. Deęa nanęi olo ñambile osib wausau 1,000 Kristus ombla mandor kokba sqab. <sup>5</sup> Di subę na tigeo namo qaji. Tamo unęasari Yesus qa nanęo

areqalo singilatosai qaji nanği bati deqa ɲambile oqasai. Nanği mati tariɲosib soqɲibqa wausau 1,000 di koboamqa nanği subq na tigelqab. <sup>6</sup> Tamo uɲgasari namoosib subq na tigelqab qaji nanği di Qotei aqa segi tamo uɲgasari bole. Deqa nanği tulaɲ areboleboleinjrɲas. Nanği moiyo bunu qaji turqasai. Moiyo dena nanği taqatɲrɲa keresai dego. Nanği Qotei aqa Kristus wo nanği atra tamo sosib wausau 1,000 Kristus ombla mandor kokba sqab.

*Satan a bati gaigai ɲamyuwo kobaq di jaqatiɲ oqnsim sqas*

<sup>7</sup> Wausau 1,000 di koboamqa sub guma koba aqa me olo waqtibqa Satan a subq dena oqedqas. <sup>8</sup> Oqedosim sawa sawa kalilq giloqnsimqa tamo uɲgasari nanği gisa gisaɲɲroqɲas. Tamo uɲgasari nanği di Gok sawa ti Magok sawa ti dena belenqab. Satan na nanği koroinjrimqa qoto qa gilqab. Nanği qaja tamo nanği tulaɲ gargekoba. Nanği ulul bul sisiyqa keresai. <sup>9</sup> Nanği sawa sawa kalilq dena bosib Qotei aqa qure koba a na tulaɲ qalaqalaiyeqnu qaji di agutesqab. Osib Qotei aqa segi tamo uɲgasari nanği so sawa dego agutesqab. Yim bati deqa laɲ goge na ɲamyuwo aisim qaja tamo nanği di koitɲrɲas. <sup>10</sup> Satan a nanği gisa gisaɲɲroqnej aqa une deqa Qotei na a waiyim ɲamyuwoq aiqas. ɲamyuwoq di meniɲ kalil yusiq ɲaɲgaeqnu. Wagme juwaɲ wo gisaɲ anjam maro qaji wagme juwaɲ wo nanği aiyeɲ nami ɲamyuwoq di breinjreb unub. Deqa Satan a dego Qotei na waiyim ɲamyuwoq aisim nanği aiyeɲ koba na bati gaigai qolo ti qanam ti ɲamyuwoq di jaqatiɲ oqnsib sqab.

*Qotei a awo jaram kobaqujaq di awesoqnej*

<sup>11</sup> Onaqa e awo jaram kobaquja bei tulaɲ qat unem. Tamo awo jaramq di awesoqnej qaji aqa ulatamuq dena mandam ti laɲ ti jaraiyosib loumeb. <sup>12</sup> E ɲam atsimqa tamo uɲgasari nami moreɲeb qaji nanği awo jaram namoq di tigelesonab unjrem. Tamo ɲam ti tamo laɲaj ti kalil e unjrem. Unjreqnam laɲ aɲgro qudei nanği na buk qudei osi bosib waqteleneb. Buk miligiq di kumbra kalil tamo uɲgasari nanği nami yoqneɲ qaji di Qotei na nenɲrenyonaq soqnej. Buk bei dego laɲ aɲgro nanği osi bosib waqteb. Buk di ɲambile gaigai sqajqa buk. Tamo awo jaramq di awesoqnej qaji a buk miligiq di anjam sisiyosiq anjam dena tamo uɲgasari moreɲo qaji nanği peginjrej. <sup>13</sup> Tamo uɲgasari kalil nami yuwalq di moreɲeb qaji nanği yuwal na uratɲrɲnaq tigeleb. Moiyo Qure na dego tamo uɲgasari nami moreɲeb qaji nanği uratɲrɲnaq tigeleb. Tamo awo jaramq di awesoqnej qaji a na tamo uɲgasari nanği segi segi kumbra kalil dena nanği peginjrej. <sup>14</sup> Osiqa Moiyo Qure osiq ɲamyuwo kobaq di waiyej. ɲamyuwo koba di moiyo



bunu qaji. <sup>15</sup> Tamo ungasari kalil nanjo ñam ñambile qa buk miligiq di sosai qaji nanji di Qotei na breinjrnac ñamyuwo kobaq aiyelenjeb.

## 21

### *Lañ bunuj ti mandam bunuj ti brantqab*

<sup>1</sup> Onaqa e lañ bunuj ti mandam bunuj ti unjrem. Lañ namij ti mandam namij ti koboeb. Yuwal dego koboej. <sup>2</sup> Onaqa e Qotei aqa qure koba Jerusalem bunuj di dego unem. Qure di Qotei aqaq di sosiqa lañ goge dena mandamq aiyeqnaq e unem. Qure di aqa wala tulañ boledamu. Uña a tamo bañ ojqa osim walaqas dego kere. <sup>3</sup> Onaqa awo jaram namoq di tamo bei a tigelosiq anjam marnaqa e aqa kakro quem. A tulañ leñosiqa marej, “Niñgi quiy. Bini Qotei aqa tal aisiq tamo ungasari nanjoq di unu. Deqa Qotei a nanjo ambleq di sqas. Nanji aqa segi tamo ungasari sqab. Od, Qotei a nanji koba na sqab. A nanjo Qotei sqas. <sup>4</sup> A nanjo ñam ya kalil nuntetnrqas. Deqa nanji olo akamqasai. Nanji olo moreñqasai. Nanji olo are gulbeinjrnqasai. Nanji olo jaqatinj oqasai. Kumbra namij kalil di koboqas.”

<sup>5</sup> Onaqa tamo awo jaramq di awesoqnej qaji a marej, “Niñgi quiy. E inji inji kalil bunuj atonum.” Osiqa merbej, “Ni ijo anjam kalil endi nengrenye. Anjam endi bole. Tamo nanji qusib marqab, ‘Bole.’” <sup>6</sup> Osiqa olo merbej, “Bati kereqo. E segi qujai namoq di unum. E segi qujai bunuq di sqai. E inji inji kalil qa utru. Wau kalil e yeqnum qaji di e olo koboteqnum. Tamo a ya qaryimqa e na ñambile qa ya jumbumq dena tigsy anaiyit uyqas. Ya di awai saiqoji. E na laña anaiyqai. <sup>7</sup> Tamo a Satan ombla qotsim siñgilaqas di e na inji inji kalil di laña yqai. E aqa Qotei soqnit a ijo angro sqas.

<sup>8</sup> “Ariya tamo ulakobaecqub qaji nanji ti tamo Yesus qa nanjo areqalo siñgilatosaieqnum qaji nanji ti ñamyuwo kobaq aiqab. Tamo kumbra uge uge yo qaji, leñ ojo qaji, sambala kumbra yo qaji, gumaniño qaji, quñam qalo qaji, gisañ qotei biñinjro qaji, gisañ anjam maro qaji nanji di ñamyuwo kobaq aiyelenqab. Ñamyuwoq di meniñ yusiq ñangaeqnu. Ñamyuwo di moiyo bunu qaji.”

### *Jon a Jerusalem bunuj unej*

<sup>9</sup> Onaqa lañ angro 7 tabir 7 ojesoqneb nanji deqaji bei bosiq a ijo areq di tigelej. Tabir 7 miligiq di nami gulbe uge uge 7 jigsib bilentonab mandamq aisiq tamo ungasari nanji tulañ ugeugeinjrsiq Qotei aqa minjin kobotej. Lañ angro dena merbej, “Ni endeq au. Bamqa Kaja Du aqa uña bunuj walaqo qaji di osormit unqam.” <sup>10</sup> Onaqa Qotei aqa Mondor na e siñgilatbonaqa lañ angro dena e osiq mana tulañ goge

kobaq oqej. Oqsiq dia Qotei aqa qure koba Jerusalem bunuj osorbej. Qure di Qotei aqaq di sosiqa lan goge dena mandamq aiyeqnaq e unem. <sup>11</sup> Qure di Qotei aqa rian na tulan suwantej. Qotei aqa rian di tulan bolequja. A menin boledamu bul. A tulan suwanosiq menin jaspalej. Osiq tulan jeqilosiq qunun bulej. <sup>12</sup> Qure di nanqi na dadanye. Dadan di tulan goge koba. Dadan di aqa siranme 12 soqneb. Siranme jomq di lan angro 12 nanqi tigelesoqneb. Siranmeq di Israel tamo ungasari nanqo moma utru 12 nanqo nam nenqrenyonab soqneb. <sup>13</sup> Dadan guta qa di siranme qalub soqneb. Dadan taun qa di siranme qalub soqneb. Dadan beben qa di siranme qalub soqneb. Dadan guma qa di siranme qalub soqneb. <sup>14</sup> Menin kokba 12 na dadan aqa utru sinqilateb. Menin quraq di tamo 12 Kaja Du na qarinqirnaq aqa anjam mare mare laqneb qaji nanqo nam atnab soqneb.

<sup>15</sup> Lan angro e anjam merbej qaji a toqon bei gol na gereiyo qaji di ojesoqnej. Ojsiq qure ti qure aqa dadan ti dadan aqa siranme ti nanqo ole keretej. <sup>16</sup> Qure aqa par ti ole ti kerekere. Lan angro dena toqon di osiq qure keretej di aqa par ti ole ti goge ti 2,200 kilomita. Qure aqa par ti ole ti goge ti kerekere. <sup>17</sup> Lan angro na qure aqa dadan keretej di aqa goge 144 meta. Toqon lan angro na ojesoqnej qaji di mandam qaji toqon. Kereto dena a na dadan keretej.

<sup>18</sup> Qure aqa dadan di Qotei na menin jaspalej na gereiyej. Qure di gol na gereiyej. Qure di tulan rianosiq qunun bulej. <sup>19</sup> Menin boledamu segi segi na dadan aqa utru walatej. Menin boledamu namba 1 aqa nam jaspalej. Menin namba 2 aqa nam sapaia. A qenjent. Menin namba 3 aqa nam aget. Menin namba 4 aqa nam emeral. A nam banqa gesgi bul. <sup>20</sup> Menin namba 5 aqa nam sadonikis. A lentosiq qatej dego. Menin namba 6 aqa nam konilian. A lent. Menin namba 7 aqa nam krisolait. A merient. Menin namba 8 aqa nam beril. A nam banqa gesgi bul. Menin namba 9 aqa nam topas. A merient. Menin namba 10 aqa nam krisopres. Menin namba 11 aqa nam haiasin. Menin namba 12 aqa nam ametis. A lent. <sup>21</sup> Dadan aqa siran 12 di menin qat kokba 12. Menin kokba di kolilei tanu bul. Siran segi segi di menin qat qujai. Qure aqa gam kalil gol na gereiyej. Gam di tulan jeqilosiq qunun bulej.

<sup>22</sup> Qure dia e atra tal bei unosai. Tamo Koba Qotei sinqilalej ti unu qaji aqa Kaja Du wo nanqi segi aiye qure di aqa atra tal. <sup>23</sup> Qure di sen ti bai ti na suwantosai. Qotei aqa segi rian na qure di suwanteqnu. Kaja Du a segi qure di aqa pulon. <sup>24</sup> Tamo ungasari sawa sawa kalilq di unub qaji nanqi qure di aqa rian na walweloqnaq. Mandor kokba sawa sawa kalil taqatejunub qaji nanqi na nanqo noro bole bole

oqnsib qure miligiq osi boqñqab. <sup>25</sup> Dadan aqa siranme kalil waqesqab. Olo kabuesqasai. Bati gaigai waqesqab. Qure dia qolooqñqasai. Gaigai suwanq sqas. <sup>26</sup> Tamo ungasari sawa sawa kalilq di unub qaji nanqi na nanqo wala ti nanqo ñoro bole bole ti oqnsib qure koba di miligiq osi boqñqab. <sup>27</sup> Ariya tamo kumbra uge uge yeqnub qaji nanqi ti tamo gisan anjam mareqñub qaji nanqi ti ingi ingi jiga ti kalil qure di miligiq gilqa keresai. Tamo ungasari nanqo ñam ñambile qa buk miligiq di Qotei na nengrenyey qaji nanqi segi qure di miligiq gilqa kere. Ñambile qa buk di agi Kaja Du aqa segi buk.

## 22

### *Jon a ñambile qa ya ti ñam ti unej*

<sup>1</sup> Onaqa lan anqro dena e ya bei osorbej. Ya di ñambile qa ya. Ya di tulan rianosi qunub bulej. Ya di Qotei aqa Kaja Du wo nanqo awo jaramq dena bosiq qure aqa gam koba dauryosiq sumoqnej. <sup>2</sup> Ya qalaq di ñambile qa ñam bei tigelesoqnej. Ñam di bai segi segi gei utru yoqñqas. Bai bei gei utru bei yqas. Bai bei gei utru bei yqas. Degsim gilsim gei utru 12 yqas. Aqa banqa na tamo ungasari sawa sawa kalilq di unub qaji nanqo ma kobotetnjroqñqas. <sup>3</sup> Ingi kalil Qotei a uge qa mareqnu qaji nanqi qure dia sqasai.

Qure dia Qotei aqa Kaja Du wo nanqo awo jaram sqas. Qotei aqa wau tamo nanqi a qa louoqñqab. <sup>4</sup> Osib aqa ulatamu unoqñqab. A na aqa segi ñam nanqo lanjaq di nengrenyim sqas. <sup>5</sup> Qure dia ambruqasai. Deqa wanal qatrentqasai. Sen suwanqasai. Tamo Koba Qotei a segi na tamo ungasari nanqi suwantnjroqñim nanqi bati gaigai mandor kokba sqab.

### *Yesus a boqujatqas*

<sup>6</sup> Onaqa lan anqro dena olo merbej, “Anjam endi bole kalil. Tamo nanqi qusib marqab, ‘Bole.’ Tamo Koba Qotei na aqa lan anqro qarinyqoqa bosiq aqa wau tamo nanqi kumbra urur brantqas qaji di osornjrqo. Qotei na aqa medabu o qaji tamo nanqo are tigeltetnjreqnaqa nanqi aqa anjam palonteqnub. <sup>7</sup> Ninqi quiy. Yesus a marqo, ‘E nunqoq boqujatqai.’”

Tamo ungasari nanqi Qotei aqa anjam e buk endia nengrenyonum qaji di dauryqab di nanqi tulan areboleboleinjrqas.

<sup>8</sup> E Jon. E anjam kalil endi quem. Kumbra kalil e ubtosim buk endia nengrenyonum qaji di e unem. Unsimqa lan anqro kumbra di osorbej qaji aqa areq di singa pulutosim a binjiyqa laqnamqa a na merbej, <sup>9</sup> “Ni e binjibaim! E ni bul. E ni ti ino was agi Qotei aqa medabu o qaji tamo nanqi ti koba na wau qujai. Tamo ungasari buk endia anjam dauryeqnub qaji nanqi dego iga koba na wau qujai. Deqa ni Qotei segi

binjyoqnime.”<sup>10</sup> Osiqa merbej, “Qotei aqa anjam ni buk endia nengrenjonum qaji di tentaim. Kumbra kalil ni ubtosim buk endia nengrenjonum qaji di brantqa bati jojomqo. <sup>11</sup> Deqa unqum. Tamo unqasari kumbra uge uge yeqnuv qaji nanqi olo kumbra uge uge yoqnebe. Tamo unqasari kumbra jigat yeqnuv qaji nanqi olo kumbra jigat yoqnebe. Tamo unqasari kumbra bole bole yeqnuv qaji nanqi olo kumbra bole bole yoqnebe. Tamo unqasari Qotei aqa kumbra boleq di sosib dauryeqnuv qaji nanqi olo aqa kumbra boleq di sosib dauryoqnebe.”

<sup>12</sup> Yesus a mareqnu, “Ningi quiy. E urur boqujatqai. Bosiy tamo nanqo kumbra segi segi pegiyosiy awai enjrqai. <sup>13</sup> E segi qujai namoq di unum. E segi qujai bunuq di sqai. E segi namo qaji. E segi bunu qaji dego. E ingi ingi kalil qa utru. Wau kalil e yeqnum qaji di e olo koboteqnum.

<sup>14</sup> “Tamo unqasari nanqo gara yansonab qatej qaji nanqi tulan areboleboleinjrim sqab. Nanqi nambile qa nam gei osib uyqa kere. Nanqi Qotei aqa qure koba dego miligiq gilqa kere. Deqa nanqi areboleboleinjrim sqab. <sup>15</sup> Ariya tamo unqasari kumbra uge uge yeqnuv qaji nanqi Qotei aqa qure koba di miligiq gilqasai. Nanqi oqeq di sqab. Tamo unqasari gumanino qaji, quñam qalo qaji, sambala kumbra yo qaji, leñ ojo qaji, gisan qotei binjinjro qaji, gisan kumbra dauryqajqa tulan arearetnjro qaji nanqi Qotei aqa qure koba di miligiq gilqasai. Nanqi oqeq di sqab. <sup>16</sup> E Yesus. E na ijo lan angro qarinyonumqa ningi qure qureq di ijo ñam qa koroeqnuv qaji nunqoq aisiq anjam endi palontosiq mernqwo. E Mandor Koba Devit aqa leñ na nambabem qaji. E Devit aqa Angro. Nebeqa burbas bunuj oqeqnu dego kere e degsim minjaleqnum.”

<sup>17</sup> Qotei aqa Mondor wo Kaja Du aqa unq bunuj wo nanqi aiyel na mareqnuv, “Yesus, ni aue.” Tamo kalil ijo anjam endi queqnuv qaji nanqi marebe, “Yesus, ni aue.” Tamo bei a ya qaryimqa bosim nambile qa ya osim uyem. Ya di awai saiqoji. Qotei na lanq anaiyqas.

### *Jon a anjam bei sinqila na marej*

<sup>18</sup> E Qotei aqa anjam buk endia nengrenjonum. Tamo kalil anjam endi queqnuv qaji nanqi e sinqila na endegsi minjrqai. Tamo bei a anjam bei osim Qotei aqa anjam ende ti turtqas di gulbe uge uge kalil e ubtosim buk endia nengrenjonum qaji di Qotei na kamba tamo di yqas. <sup>19</sup> Tamo bei a Qotei aqa anjam e buk endia nengrenjonum qaji mutu bei osim taqal waiyqas di Qotei na kamba tamo di taqal waiyimqa a nambile qa nam gei osim uyqasai. A Qotei aqa qure koba miligiq gilqasai dego.

<sup>20</sup> Tamo a kumbra endi kalil ubtosiq marqo qaji a olo marqo, “Bole, e boqujatqai.”

Anjam endi bole. O Tamo Koba Yesus, ni aue.

<sup>21</sup> Tamo Koba Yesus a tamo ungasari kalil nanɣi qa are  
boleyeme. Bole.